



Informazioni su questo libro

Si tratta della copia digitale di un libro che per generazioni è stato conservata negli scaffali di una biblioteca prima di essere digitalizzato da Google nell'ambito del progetto volto a rendere disponibili online i libri di tutto il mondo.

Ha sopravvissuto abbastanza per non essere più protetto dai diritti di copyright e diventare di pubblico dominio. Un libro di pubblico dominio è un libro che non è mai stato protetto dal copyright o i cui termini legali di copyright sono scaduti. La classificazione di un libro come di pubblico dominio può variare da paese a paese. I libri di pubblico dominio sono l'anello di congiunzione con il passato, rappresentano un patrimonio storico, culturale e di conoscenza spesso difficile da scoprire.

Commenti, note e altre annotazioni a margine presenti nel volume originale compariranno in questo file, come testimonianza del lungo viaggio percorso dal libro, dall'editore originale alla biblioteca, per giungere fino a te.

Linee guida per l'utilizzo

Google è orgoglioso di essere il partner delle biblioteche per digitalizzare i materiali di pubblico dominio e renderli universalmente disponibili. I libri di pubblico dominio appartengono al pubblico e noi ne siamo solamente i custodi. Tuttavia questo lavoro è oneroso, pertanto, per poter continuare ad offrire questo servizio abbiamo preso alcune iniziative per impedire l'utilizzo illecito da parte di soggetti commerciali, compresa l'imposizione di restrizioni sull'invio di query automatizzate.

Inoltre ti chiediamo di:

- + *Non fare un uso commerciale di questi file* Abbiamo concepito Google Ricerca Libri per l'uso da parte dei singoli utenti privati e ti chiediamo di utilizzare questi file per uso personale e non a fini commerciali.
- + *Non inviare query automatizzate* Non inviare a Google query automatizzate di alcun tipo. Se stai effettuando delle ricerche nel campo della traduzione automatica, del riconoscimento ottico dei caratteri (OCR) o in altri campi dove necessiti di utilizzare grandi quantità di testo, ti invitiamo a contattarci. Incoraggiamo l'uso dei materiali di pubblico dominio per questi scopi e potremmo esserti di aiuto.
- + *Conserva la filigrana* La "filigrana" (watermark) di Google che compare in ciascun file è essenziale per informare gli utenti su questo progetto e aiutarli a trovare materiali aggiuntivi tramite Google Ricerca Libri. Non rimuoverla.
- + *Fanne un uso legale* Indipendentemente dall'utilizzo che ne farai, ricordati che è tua responsabilità accertarti di farne un uso legale. Non dare per scontato che, poiché un libro è di pubblico dominio per gli utenti degli Stati Uniti, sia di pubblico dominio anche per gli utenti di altri paesi. I criteri che stabiliscono se un libro è protetto da copyright variano da Paese a Paese e non possiamo offrire indicazioni se un determinato uso del libro è consentito. Non dare per scontato che poiché un libro compare in Google Ricerca Libri ciò significhi che può essere utilizzato in qualsiasi modo e in qualsiasi Paese del mondo. Le sanzioni per le violazioni del copyright possono essere molto severe.

Informazioni su Google Ricerca Libri

La missione di Google è organizzare le informazioni a livello mondiale e renderle universalmente accessibili e fruibili. Google Ricerca Libri aiuta i lettori a scoprire i libri di tutto il mondo e consente ad autori ed editori di raggiungere un pubblico più ampio. Puoi effettuare una ricerca sul Web nell'intero testo di questo libro da <http://books.google.com>

Liturg.

72 2°
(1)

Casalamus

2. 3. 4. 5.

2 Liturg. 72-1

<36622501690014

<36622501690014

Bayer. Staatsbibliothek

S

Situa - 81

S A C R A R U M
CÆREMONIARUM
SIVE RITUUM ECCLESIASTICORUM
SANCTÆ ROMANÆ ECCLESIAE
LIBRI TRES

AB AUGUSTINO PATRICIO ORDINATI,
ET A MARCELLO CORCYRENSI ARCHIEPISCOPO
PRIMUM EDITI

*Nunc vero tandem in duos Tomos distributi, ac innumeris
pene mendis purgati, & Commentariis aucti*

AD SANCTISSIMUM PATREM
BENEDICTUM XIV.
PONTIFICEM MAXIMUM
T O M U S I.

*Quo Libri primi Ritus, ac Ceremoniæ explicantur, auctoritate
Summorum Pontificum, Patrum, Canonum, probatorum
Auctorum, Ordinumque Romanorum, & Cærimonialium
tum editorum, tum mss. complurium*

AUCTORE JOSEPHO CATALANO

ORATORII S. HIERONYMI CARITATIS PRESBYTERO.


Monasterii Benedictoburani.



R O M Æ, MDCCL.

Ex Typographia Antonii de Rubeis apud Pantheon, in via Seminarii Romani.

SUPERIORUM PERMISSU.



BENEDICTO XIV. PONTIFICI MAXIMO

SALUTEM IN DOMINO, ET FELICITATEM PLURIMAM
JOSEPHUS CATALANUS.



*Ametſi, BEATISSIME PATER, an-
no Jubilæi ſub auſpiciis SANCTI-
TATIS TUÆ prodire debuiſſet in lucem Tomus I.
Conciliorum Italiæ, quo, ut promiſeram, Ro-
manæ Synodi omnes continerentur Notis a me
a 2 il-*

illustratæ: mutato tamen consilio, & translata ejus Operis editione in aliud tempus, censui publici juris facere Cæremoniale Sanctæ Romanæ Ecclesiæ ab Augustino Patricio non sine summo labore ordinatum, a Christophoro Marcello Corcyrensi Archiepiscopo typis vulgatum, a me vero tandem omnium minimo perpetuis Commentariis auctum. Non enim par erat, ut illustrata nuper Capella Regis utriusque Siciliæ, & aliorum Principum per Virum Cl. Josephum Carafam Clericum Regularem, Cappella Romani Pontificis Maximi Regiarum Capellarum omnium princeps lateret, ejusque sacri Ritus antiquitate, majestâte, varietate, amplitudine, ceteris præstantiores jacerent. Novum plane Opus, arduumque, & a nullo adhuc tentatum lubens suscepi, tum præsertim, quod Tu BEATISSIME PATER in aureis Litteris tuis, Constitutionibus, aliisque tuis Operibus plerosque obscuriores Pontificiæ Capellæ Ritus, eorumque originem, & rationem, ubi se se Tibi dedit occasio, profunda eruditione, & facilitate mirabili explicuisti, facemque mihi præbuiisti, ut aliorum originem invenirem. Forte servata hæc erat provincia doctissimis Cæremoniariis Capellæ Tuæ Pontificiæ, qui Ritus ipsos ex usu jam callent, & ex praxi prædecessorum suorum dirigunt, quorum Diaria manu exarata fere innumera penes se habent. Fateor equidem, me nulli in hoc adornando Opere molestiam facere, nec velle in alienam

*nam messem irruere, aut varios quorundam
agendi modos refellere. Unum hoc mihi præfixi,
Pontificios Romanæ Ecclesiæ Ritus adversus he-
terodoxos, pseudoque catholicos ipsorum irriso-
res, Canonum, Patrum, Romanorum Ordinum,
ac potissimum Summorum Pontificum auctori-
tate communire, & Majorum exemplis compro-
bare. Fuerunt jam, BEATISIME PATER, qui me
iterum iterumque urgebant, ut insigniores sal-
tem Pontificios Ritus, quibus Cærimoniale San-
ctæ Romanæ Ecclesiæ refertum est, Commen-
tariis non modo, sed & elegantibus, nitidisque
figuris ære incisis exornarem. Sed duo me ab
hoc suscipiendo consilio quammaxime deterrue-
runt. Primum, difficultas operis. Alterum vero
magni sumtus, quibus sustinendis vires meæ
impares sunt. Fortasse non defuissent in Urbe
omnium principe Mæcenates Optimi bonorum
studiorum, ac rerum præsertim ritualium ama-
teres, qui opem indigenti homini, vel nihil
unquam petenti ultro attulissent; sed absurdum
tamen putavi, criminosumque, alienam pecuniam
pro exiguis operibus meis in lucem edendis ac-
cipere, quæ utilius in præclarissima aliorum Eru-
ditorum Opera, quibus Urbs abundat, impendi
posset. Ceterum explicare satis nequeo, quan-
tum studii, diligentiae, atque laboris in banc
novam Cærimonialis Romanæ Ecclesiæ editio-
nem impenderim. Oportuit namque hominem
sacro Hieronyminiani Oratorii ministerio addi-
tum,*

Etum, assiduamque Sacramenti Pœnitentiæ, ac Verbi Dei ministrum integras fere noctes vigilare, subcesivisque diei horis huc illucque discurrere, Bibliothecas lustrare, Codicesque pene innumeros tum editos, tum manu exaratos describere, quo Cæremoniale Romanum perpetuis Commentariis illustratum ederetur tandem in lucem. Oportuit varias ejusdem editiones, Venetam scilicet primam anni 1516. Coloniensem 1557. & Romanam 1560. simulque conferre, variantes lectiones notare, erroresque plurimos, quibus ipsæ editiones scatebant, corrigere. Præ ceteris editionem Romanam sequutus, Titulos in varios paragraphos legentium commoditati distribui, & quod omnium gravissimum est, patrimonioli mei redditus, quibus sustentor, in coemptionem illorum saltem librorum coactus sum erogare, qui ad tantum conficiendum Opus promptiores mihi essent ad manus, præter alios multos mihi humanissime a Viris doctis commodatos, & apud publicos bibliopolas lectos, atque descriptos. Libentissime autem hoc novum Opus immensum, atque difficile in duo magna Volumina distributum nulli parcens incommodo aggressus sum, quod sperem, Tibi sacrorum studiorum fautori fore gratissimum, ac fortasse etiam S. R. E. Cardinalibus, Prælatisque omnibus Romanæ Curie utile, atque Episcopis universis, ad quorum Ecclesias ab Ecclesia Romana omnium Matre, atque

*que Magistra una cum doctrina Catholica sacri Ritus manarunt. Ne tandem tua, BEATIS-
SIME PATER, diutius patientia abuter, tua fre-
tus comitate admirabili, unum Te oro, atque
obtestor, ut tot mearum dedicationum, qui-
bus Tibi Opera mea omnia nuncupavi, tædium
feras. Mereri enim hanc a Te gratiam posse vi-
deor, cum Opera ipsa, quæ tracto, Canonica
scilicet, Theologica, atque Liturgica me ad Te
omnium harum facultatum Doctorem, atque
Magistrum sapientissimum venire omnino com-
pellant. Faxit Deus Optimus Maximus, ut
SANCTITATEM TUAM quamdiutissime sospitem
servet, mibique gratiam largiatur, ut multa
illa, ac magna Volumina, quibus Concilia om-
nia Italiæ tum edita, tum manuscripta, quot-
quot reperiri potuerunt, descripsi, Notisque il-
lustravi, uni SANCTITATI TUÆ, quam impense
veneror, valeam dedicare.*

I M P R I M A T U R,

Si videbitur Reverendis. P. Magistro Sacri Palatii Apostolici .

Ferdinandus M. De Rubeis Archiep. Tarsen. Vicegerens .



APPROBATIONES CENSORUM.

P R I M A .

INsigne Opus, nempe Pontificiæ Capellæ Cæremoniale a præclarissimo Apostolicarum Cæremoniarum Præfecto Augustino Patricio ordinatum, a Marcello Corcyrensi Archiepiscopo vulgatum, nunc vero primum a clarissimo eruditissimoque Viro Josepho Catalano Oratorii Sancti Hieronymi Charitatis Presbytero innumeris pene ab erroribus, quibus omnes ipsius Cæremonialis editiones scatebant, purgatum, & perpetuis Commentariis auctum, quum mandante Reverendissimo Patre Fr. Josepho Augustino Orsi Sacri Palatii Apostolici Magistro perlegerim, nihil prorsus reperi Catholicæ Fidei, aut bonis moribus dissonum; sed miratus plane sum indefessum Authoris laborem, atque solertiam in investiganda rerum obscuriorum origine, & Sacrarum Pontificiarum Cæremoniarum disciplina, veterum non modo Ritualium, & manu scriptorum Diariorum, sed & Conciliorum, ac Patrum auctoritate adversus hæreticos, impiosque, & pseudocriticos ipsarum irrisores, qui, ut verbis Apostoli Judæ utar, *quæcumque ignorant, blasphemant*. Censeo itaque, edendum quamcitissime in lucem hoc perutile novum Opus, in quo quidem, sicut & in ceteris ejusdem Authoris Operibus, quibus & Pontificale Romanum, & Cæremoniale Episcoporum, & Sacrosancta omnia Concilia Œcumenica summa eruditione illustravit, exactissime dilucidantur tum Sacri Canones, tum veteres novique Ecclesiæ Ritus, tum præcipuæ partes Ecclesiasticæ historiæ, & quod potissimum est, zelus in eis instaurandæ Ecclesiasticæ disciplinæ, ubi a primævo suo Instituto deflexit, ac Pontificiæ Dignitatis, Potestatisque tuendæ, quam perperam Hæretici conantur infringere, summo opere effulget. Datum Romæ Kalendis Aprilis MDCCL.

Ignatius Reali Apostolicis Cæremoniis Præfectus.

S E C U N D A .

QUOD plerique docti Viri sacris addicti antiquitatibus diu maxime optarunt, ut Sanctæ Romanæ Ecclesiæ Liber Cæremonialis sub Christophori Marcelli nomine vulgatus iterum Typis daretur, & a mendis purgatus prodiret; id nuper pro ea, qua summo opere pollet, ingenii vi, atque indefatigabili studio præstitit admodum Reverend. Pater Josephus Catalanus Oratorii Sancti Hieronymi Charitatis Presbyter, Ecclesiæ Canonum, Sacrorumque Rituum scientia apprime excultus, necnon compluribus, iisque egregiis, id genus Voluminibus jamdudum elucubratis clarissimus. Is nimirum variis ejusdem Cæremonialis editionibus, ac mss. Codicibus, perpetuis insuper adjectis Commentariis, Textum primigeniæ lectioni multa cura restituit, ac plurima eruditione illustratum protulit; Opusque adornavit iis, qui in Sacris Ecclesiæ Ritibus operam navant, perquam commodum: Quod, mandante Reverendissimo Patre Augustino Orsi Sacri Palatii Apostolici Magistro, accurate perlegi, nihilque in eo deprehendi Fidei Orthodoxæ, aut bonis moribus adversum; ideoque prælo dignissimum censeo. Dat. pridie Idus Junii MDCCL.

*Venantius Philippus Pierfanctes Apostolicarum
Cæremoniarum Magister.*

TER-

Post conditos, emissosque in vulgus inenarrabili celeritate novem comprehensos majoris moduli Tomis exquisitioris eruditionis suppellectile instructos Commentarios in Pontificale Romanum, Cæremoniale Episcoporum, & Œcumenica Concilia lassatum, exhaustumve plerique existimabant ingenium Cl. Patris Josephi Catalani Presbyteri Oratorii S. Hieronymi Caritatis. Sed ut vere cogitationes mortalium vanæ sunt! Ecce Vir ille plane adamantinus, & indeficientis sapientiæ, vix edito postremo commendatorum Operum Tomo, quasi ex ipso labore instauratis viribus, nova suis humeris paria meditatur, aggreditur, imo jam, quod in duos grandioris itidem molis Tomos distribuit, atque ita inscripsit: *Sacrarum Cæremoniarum Sacrosanctæ Romanæ Ecclesiæ Libri tres ab Augustino Patricio ordinati, a Marcello Corcyrensi Archiepiscopo typis vulgati, nunc vero primum perpetuis Commentariis aucti, ad prælum deposcit.* Mirum, & portento simile, hominem gravissimis Presbyterii sui muniis impeditissimum, sine divite Mæcenate manus porrigente adjunctices, sine parata domi necessaria Librorum multitudine, sine amanuensi &c. audere tantum, tantum posse! Utut vero de his, annuendumne a supremis Præsidibus Viro incomparabili occulti hætenus feracissimæ mentis foetus editionem postulanti? Censoribus ad id declarandum electis peritissimis, quæ placitura sit, nescio, mihi, ejus etiam judicium qualecumque super hoc exquirere pro ingenita humanitate dignatus est Reverendissimus P. Sacri Palatii Apostolici Magister, facto examine, sedet hæc animo sententia: nec ad modicum tempus dia luce privandum Opus, quod, nedum nihil olet adversum Catholicis Dogmatibus, & sanctitati morum, universam Ecclesiam, Romanam Sedem, Literariam Rempublicam singulari beneficio honestabit. Petin quod? Diu est, quod plures haud vulgaris doctrinæ, ac pietatis Viri cum gemitu advertunt, detrimentum esse non exiguum Ecclesiæ, Romæ, Literis, Codicem Sacrarum Cæremoniarum R. E. Cæremoniale Capellæ Papalis communius dictum, venerabilem alias, censendumque plurimi, utpote dirigendis rebus maximi momenti deputatum, typorum opera terras omnes pervasisse. Siquidem, quæ circumferuntur, exemplaria, complectuntur utique reliquias veterum præclarissimorum, quum Romanæ, tum aliarum Ecclesiarum, Institutorum, liturgicon præsertim; sed tamquam gemmas in luto jacentes, & positas in abscondito: sic gesta quædam, & consuetudines descriptas, memoratasve non dubie in argumentum potissime decoris, ac amplitudinis Apostolicæ Sedis, & supremorum Pontificum, exponunt, ut in eorum ludibrium, dedecusque verti possint, & aliquando soleant ab osoribus, Invidisque Romanæ majestatis. Ad hæc: sive Marcelli evulgatoris non magis, quam corruptoris, & plagiarii culpa, sive oscitantia typographorum, Romani quoque, sæpe lectionem ingerunt insigniter variantem, scatentque mendis, interdum foedissimis, talibus saltem, quæ a vero ordinatoris Patricii sensu minus cautum lectorem enormiter distrahant. At geminus, de quo res est, Commentariorum Tomus, ubi in apertum eruperit, tantum detrimentum omnino resarciat. Nam, ad unicum sinceriorem lectionem compositis variis editionis multiplicis textibus, mendisque, præcipue turpioribus, castigatis, erasisve, Codicem congruæ puritati restituit; prænem ab eo causam eliminat insultandi Cathedræ Petri, & Apostolicorum dignitati, quæ improvide calamo dormitantis quandoque Scriptoris exciderunt, vel explicatis prudentissime, vel in planiorem veritatis semitam magistra manu reductis: eo præterea conclusas, velut tamen inter sordes, ac tenebras, gemmas, fere cujusque natali solo, pretioque, hoc est, quamplurimum perillustrium Ecclesiasticarum Institutionum origine, usuque detectis, & demonstratis, in defœcatissimo, splendidissimoque loco conspiciendas proponit. Utinam! hujus profecto singularis beneficii authorem summus, verusque bonorum Largitor sospitem servet, ac valentissimum, saltem donec, absoluta, quam postulat, evulgatione, statim, quod ad umbilicum deductum audio, volumen Commentariorum in *Rituale Romanum* multo locupletiorum, utiliorumque publicatis dudum a Viro ceteroquin bene de Literis merito; inde, ingenti jam parte digestam *Collectionem Conciliorum Italiæ* amplissimam eruditio omnibus, piisque communem reddit. Quot enim isthinc bona! Certè (ut, intimioribus missis, manifestius aliquod futurum prænunciem) si contigerit primum, ea se felicitate, gloriaque donatam prædicabit ætas nostra, qua proxime superior. Quandoquidem, sicuti huic revera gloriosissimum, faustissimumque fuit vidisse magni Baronium in Annalibus suis ferme totam gestorum Ecclesiæ notitiam cultori-

bus, & apologistis Catholicæ Religionis apprime necessariam duodecim Voluminibus Orbi Christiano exhibentem, illi æque faustum erit, gloriosumque vidisse alium doctissimum Scriptorem, quasi celeberrimi Cardinalis exemplo, ne dicam vocibus suis, adhuc quodammodo per nobilitatum pluries (1) publica laudatorum Annalium recitatione, jussu, auspicioque habita SS. Patris Philippi Nerii, Oratorium Hieronymianum resonantibus, excitarit, offerentem in suis Commentariis haud minus necessariam ceterarum pene omnium sanctiorum Ecclesiæ rerum dilucidationem duodecim pariter Voluminibus distinctam, Si alterum evenerit, Italia desinet aliis invidere cultioris Europæ Nationibus, quæ in colligendis, promulgandisque Synodali-
bus propriarum Ecclesiarum Constitutis promptiores quantum utilitatis, commodive suis majorum disciplinæ regulas, & Fidei sensa ignorare nolentibus compararint, jure meritoque optimo jactant. Eadem insuper uberes, nec hercle substitutas tam cito lacrymas, quibus nuper extinctum luget Ludovicum Antonium Muratorium, sistet illico; quod sibi divinitus servatum, redditumve propemodum in sapientissimo, robustissimoque Catalano putatura sit apicem illum Literatorum, suarumque rerum illustratorem præstantissimum. Dabam Romæ anno Jubilæi MDCCL. mensē Augusti in Festo S. Augustini Ecclesiæ Doctoris,

*Petrus Morettus Canonicus insignis Basilicæ
S. Mariæ Translyberim.*

Q U A R T A

Viri Cl. Josephi Catalani Tomum primum Commentariorum ad Cæremoniale Pontificium Augustini Patricii perlegi, mandante Reverendissimo Patre Sac. Palatii Apost. Magistro. Opus, ut cetera tot & tanta celeberrimi Auctoris, tentatum a nemine, illudque perquam difficile; cum ob rerum multitudinem, ac varietatem, tum ob latentes sæpe tot actionum, dictorumque origines, causasque hac illac reconditas. Præstat autem id omne pro sui more Vir magnus, incredibili ubertate, & diligentia, gravitate, atque sapientia, Erit certe, cur istarum præsertim rerum studiosi, imo & Antistites, ipsi habeant magnam gratiam; nec item erit deinceps, cur sibi ex earundem editione timeat dignitas majestasque Pontificum, quod Paridi de Grassis visum est olim, Ea enim non modo in tuto ponitur, sed & illustratur inde, confirmaturque mirum in modum, Itaque ut in publicum prodeat, maxime, exoptandum censeo.

Datum Romæ die 14. Septembris anni MDCCL.

*F. Pius Thomas Schiara Ordinis Prædicatorum
Casanatensi Bibliothecæ Præf.*



I M P R I M A T U R.

Fr. Joseph Augustinus Orsi Ord. Præd. Sac. Pal. Apost. Mag.

PRÆ-

(1) Vide Baronii actionem gratiarum ad B. Philippum Nereum Tom. VII. Annalium &c.

P R Æ L O Q U I U M

In Cæremoniale Sacrosanctæ Romanæ Ecclesiæ.

C A P. I.

Rituum Romanorum cognitio necessaria, & prima Romani Cæremonialis origo.

I. **C**um Romana Ecclesia, ut scitissime notat clarissimus Mabillonius in Commentario prævio ad Ordinem Romanum, Num. 1. aliarum, maxime Occidentis, Ecclesiarum norma sit, & exemplar, non parum interest Republicæ Christianæ, ut sacri Ritus, quibus ab initio fundatæ Religionis Deum Optimum Maximum coluit, omnibus cogniti, ac perspecti habeantur. Proxima quippe est Fidei Divinæ Religio, quæ quam illa credit, ac suspicit, supremam majestatem certis signis, & cæremoniis communi consilio institutis, colit, veneraturque. Et quemadmodum a Romana Ecclesia Fidei suæ originem repetunt ipsæ præsertim Occidentis Ecclesiæ; sic etiam ab eadem modum, & formam Divini cultus derivari par est. Non immerito itaque Viri pii, ac docti, quod notavit Georgius Cassander, qui Romanum Ordinem anno MDLXI. Coloniz primus typis excudi curavit, judicant, *nihil hoc in genere præstantius inveniri posse, quam ipsum Romani Ordinis Libellum, quem omnes, qui de Ecclesiasticis Ritibus, & Officiis Divinis scripserunt, tanquam principem, & caput agnoscunt, summamque ei auctoritatem deferunt; sic ut omnia ejus generis scripta, nihil aliud sint, quam hujus Libelli Commentaria.*

II. Ordinem ipsum Romanum post Cassandrum iterum Coloniz post septem annos excudi curavit Melchior Hittorpius una cum aliis antiquis rerum Ecclesiasticarum Scriptoribus, novissime vero, ut alios omittam, memoratus Mabillonius varios ejusdem Romani Ordinis Libellos in unum collegit, eruditeque prævio Commentario illustravit Tomo II. Musei Italici. Non unum enim, sed plures olim fuisse Libellos ipsius Ordinis, ex Amalario Metensi addiscimus, cujus hæc sunt verba Capite LII. Antiphonarii, ubi agit de Officio hebdomadæ Paschalis: *Notum solemniter est, canere Matrem nostram Romanam Ecclesiam tres Psalmos ante Hymnum Evangelii, & post Hymnum duos per diversa Altaria diversorum locorum, sapissime tamen ad Crucem, & ad fontes, qui continent per diversos Libellos ordinem Romanum.* Diversi erant hi Libelli, non modo pro diversis argumentis, ut Libellus de Missa Pontificali, Libellus de Missa Episcopali secundum ritum Ecclesiæ Romanæ, Libellus de Baptismo, Libellus de Ordinibus sacris, & alii de aliis Ecclesiasticis rebus Libelli, sed etiam pro uno eodemque argumento. Id quod ex hoc Amalarii loco manifestum est, ubi diversos Libellos citat pro uno eodemque Officio hebdomadæ Paschalis. Hinc est, quod Mabillonius veterem sententiam sequutus totidem Libellos Ordinis Romani distinxit, quot ejusdem, diversive de Ri-

To. I.

tibus Romanis argumenti adducit scriptiones. Atque hæc est aliorum Scriptorum opinio, quorum loca supervacaneum est recensere.

III. Ergo Auctor hic præstantissimus tres omnino vetustissimos de Missa Pontificali Libellos primo loco exhibet, quibus alii duo succedunt de Missa Episcopali secundum Ritum Ecclesiæ Romanæ. Post hos sequuntur Libelli de Ordine Baptismi, ac de Ordinationibus sacris. Quæ omnia scripta sunt ante seculum nonum, aut decimum. Succedunt Auctores a Seculo XII. Benedictus Canonicus S. Petri sub Innocentio II. Cencius de Sabellis Cardinalis sub Cælestino III. Ad hæc Cæremoniale jussu Gregorii X. editum, Ordinarium Jacobi Gajetani Cardinalis, ac demum Libri Cæremoniarum Petri Amelii Episcopi Senogalliensis. Variis ipsis Libellis, quos Romanos Ordines Mabillonius appellat, suntque numero xv. varias Admonitiones præfixit idem Auctor ad informandum studiosum Lectorem. Quale vero de his judicium, ac de vulgato Ordine Romano ferendum sit, nos docet earum rerum peritissimus, doctrina, pietate, ac dignitate Eminentissimus S. R. E. Cardinalis Josephus Maria Thomasius inclyti Ordinis Clericorum Regularium Alumnus in Scholiis ad Responsorialia: *Ordo Romanus, inquit, antiquitus, non eo modo, quo apud nos editus est, circumferebatur. Discretis namque Libellis continebatur, quibus potiora per annum explicabantur Officia. Ceterum Ordo ille Romanus editus ab Hittorpio, farrago potius est diversorum Rituum secundum varias consuetudines; itaut antiquiores, germanioresque Ritus in tanta varietate discernere sine eorum Libellorum ope pene sit impossibile.* Sane ipsa laudati Cardinalis Thomasi Opera in varios Tomos distributa elegantissima editione, adjunctis aliis ejusdem Auctoris Opusculis, illustravit, atque egregiis Dissertationibus, ac Notis exornavit Vir Clarissimus ejusdem Ordinis Clericorum Regularium P. D. Franciscus Vezzofius.

IV. Venio tandem ad Cæremoniale Romanum, quod Augustinus Patricius ex antiquis Romanis Ordinibus, & probatis Romanæ Ecclesiæ usibus concinnavit, & Innocentio Papæ VIII. dedicavit. Fuit Patricius Apostolicus Cæremoniarius, quatuorque annos servivit Pio II. Pontifici, a quo Piccolominei cognomen habuit. Eidem adfuit morienti, cujus suprema verba refert in suo Cæremoniali, quod nos Commentariis illustramus, Lib. I. Titulo XIV. Cap. II. Sane ex Magistro Cæremoniarum laudati Innocentii Papæ VIII. renunciatus fuit Pientis Episcopus anno MCDLXXXIII. obiitque anno Christi MCDXCVI. Alexandro VI. Pontifice. Quod adscriptum legimus in Codice Chigiano, qui Lactantii Opera complectitur; viderique de ea re inter alios potest eruditus Ughellus in sua Italia Sacra in Episcopis Pientinis. Dedicatoria Patricii Epistola ad Innocentium VIII. nostro Cæremoniali præfixa, quam nos inferius describemus, & tempus scripti Operis præfert, idest annum MCDLXXXVIII. Kal. Martii, &

ipsum Opus genuino vindicat Auctori, præter ea, quæ ex Paride Grassio inferius referemus. Christophorus enim Marcellus Archiepiscopus Corcyrensis electus, primum Venetiis in lucem Cæremoniale ipsum emiserat, hoc inscripto Titulo: *Rituum Ecclesiasticorum, sive sacrarum Cæremoniarum S. R. E. Libri tres*; & quidem cum Pontificio Privilegio Leonis Papæ X. dato sub die xvii. Decembris anni MDXVI. extatque in ipsa 1. Veneta editione peracta die xxi. mensis Novembris ejusdem anni MDXVI. dedicatoria Epistola ipsius Marcelli ad memoratum Leonem X. Papam, de qua suo loco inferius. Sit autem nunc.

C A P U T II.

Augustini Patricii Piccolomini Episcopi Pientini Epistola ad Innocentium VIII. in Librum Sacrarum Cæremoniarum, quibus Romani Pontifices uti consueverunt.

SANCTISSIMO Domino Nostro Innocentio Octavo, universalis Ecclesiæ Summo Pontifici, Augustinus Patricius Piccolomineus, indignus Episcopus Pientinus, felicitatem. Absoluta nuper satis feliciter divino munere emendatione Libri Pontificalis, explicationem, ordinationemque sacrarum cæremoniarum, quibus Romani Pontifices uti consueverunt, tuo jussu, tuisque auspiciis, Beatissime Pater, aggredior. Certamen profecto priori laboriosius, longeque difficilius, cum propter incertam ejus rei disciplinam, lateque per multa capita vagantem, tum etiam ob frequentem cæremoniarum additionem, diminutionem, variationem, ac pro tempore multiplicem mutationem. Cogitavit sane circumspiciatissima Beatitudo tua, & recte quidem, plurimum ad divinam clementiam nobis propitiandam pertinere, si puris, castis, congruisque cæremoniis illa colatur, nec minus spectare ad majestatem Apostolicam, sacrique Senatus, auctoritatem, venerationemque præservandam, atque augendam, si suo ordine, ritumque decenti omnia peragantur; si rerum, temporum, personarum ratio habeatur; si cuique reddantur debitus honor, & propria reverentia, quæ quidem omnia hac una disciplina continentur, suggeruntur, administranturque. Quanta fuerit apud omnes gentes, apud omnes populos, apud omnes nationes Sacrorum cura, nimis longum esset enarrare. Præmittam Eleusinae Cereris vana, atque abdita Sacra; furiosa, pudendaque Dionysii Orgia; Ægyptiorum irridenda, & portentuosissima minima, & Romanorum superstitionem religionem: apud quos nulli Magistratus legitimi putabantur, nullæ expeditiones, sive mari, sive terra suscipiebantur, nihil a Senatu, populoque statuebant, nisi prius justis cæremoniis Superum voluntas explorata esset. Sacra certe Pentateuci historia tota fere in tradendis divinis ritibus versatur; ita ut nihil magis Moysen, immo ipsum Deum curasse constet, quam ut statutis congruisque cæremoniis Divina Majestas ab hominibus coleatur: ubi eodem tenore servari mandantur præcepta, cæremoniæ, atque judicia.

Majores vero nostri, duces, & doctores Christiani populi, ab initio nascentis Ecclesiæ

sacros ritus divino afflati Numine nobis tradiderunt: quos deinde, crescente Fidelium multitudine, illorum successores Romani Pontifices, salva rerum substantia, auxerunt, ornaverunt, atque mirum in modum ampliaverunt, adduntque in dies: mutantur, & variantur permulta, quæ non tam priscis institutionibus adversa sunt, quam tempori, & rebus, quæ aguntur, accommoda, atque decora. Quo fit, ut cum propter rei vetustatem pauca admodum ex priorum observantiis reperiantur, & quæ deinde a posteris litteris mandata essent, tum propter Romanæ Curie crebras apud exteras gentes peregrinationes, tum etiam propter varias confusasque scribentium sententias, parum usui, & utilitati nostris temporibus esse videantur; cæremoniis non tam scriptis, quam jam pridem consuetis hactenus magna ex parte usi sumus. Hinc variæ aliquando inter Patres de peragendis Sacris opiniones, hinc contentiones indecentes interdum, inter ministros cæremoniarum: cum memoria hominum labilis sit, & fluxa, sæpeque aliæ pro aliis succurrant: & quid certi tenendum sit, fixa regula ostendi non possit. Hæc igitur, ut reor, provide considerans Sanctitas Tua, Beatissime Pater, cupiensque, ut in rebus omnibus, tam divinis, quam humanis decus, & ordo debite servetur; utque sine tumultu, quiete, tranquille, cum gravitate, & dignitate omnia peragantur: injunxit mihi, ut tam ex Libris majorum, quos ex archivis Romanæ Ecclesiæ complures deprompsi; quam ex quotidiano usu Capellæ Apostolicæ, in quo annis supra viginti non sine labore assiduo versatus sum; cæremonias omnes, quibus nostro tempore uti consueverunt Romani Pontifices, prætermittis superfluis, & antiquatis, in ordinem redigerem. Devitarem, recusaremque hoc munus perlibenter, & sarcinam humeris meis omnino imparem excussissem, si licuisset Pontifici Maximo non obtemperare. Sed sciens, obedientiam victimis præstantiorem esse, & reum esse mortis, qui Summo Pontifici non paret: malui rudis, atque ignarus judicari, quam protervus, & inobediens. Erexit, & mirum in modum confirmavit mihi labentem animum in primis summa tuæ pietatis in omnes benignitas, atque clementia, quæ non tam ineptitudinem meam, quam optimam mentem, & parendi promptitudinem metietur, tum illorum Reverendissimorum Patrum, quos hujus nostræ lucubrationis recognitores revisoresque constituisti, prudentia, diligentia, acerrimum, integrumque judicium, & omnium rerum divinarum, atque humanarum summa doctrina, qui profecto nihil admittent, quod gravitati, ac dignitati Apostolicæ Sedis, & tanti Senatus non conveniat. Quorum exactissimæ censuræ hos Libros per multos dies libentissime submisi, ratus, ut si a tantis viris approbarentur, fore ut a nemine merito possent damnari.

Totum Opus in tres Libros divisimus. Primus & major ea continebit, quæ ad Summum Pontificem, & Sacrum Senatum pertinent extra ordinem Divini Officii, ut puta electionem, & consecrationem Romani Pontificis, Cæsaris coronationem, canonizationes Sanctorum, creationes Cardinalium, & cetera hujusmodi. Secundus ordinem, & ritum celebrandi sacras solemnitates per totum anni circulum complectetur;

tur; & quæ ad Divinum Officium spectant tam in Vesperis, quam in Missis, & aliis horis. Et in hoc quidem Libro secundo, quoniam minutiora multa insunt, quibus sine continua exercitatione nemo facile meminisse posset, adhibuimus nobis adiutorem Joannem Burcardum Argentensem, Præpositum Haselatensem, & sacrarum Cæremoniarum ministrum: cujus solerti opera etiam usi sumus in emendatione Libri Pontificalis, qui omnia, quam diligentissime collegit, & accuratissime annotavit, ut parvo labore in digerendo Libro opus fuerit. Tertium Librum addimus generalia quædam, normas, atque cujusque officii summarias instructiones continentem, præposuimusque cuique Libro capita rerum, quæ in eo continentur: ut facilius quid quisque desiderat, invenire queat. Admirabuntur fortasse complures disertis, & latinæ linguæ censores, quod vim, proprietatemque verborum latinorum non usquequaque servaverimus: quodque plura admiscuerimus nova vocabula, quæ latinus dici potuissent. Quibus ingenue fatebimur ignorantiam nostram, & tamen multa ibi esse affirmabimus, quæ si aliter dicerentur, non facile ab omnibus intelligerentur. Secuti sumus in his terminos a superioribus harum rerum Scriptoribus usurpatos, & qui hodie etiam sunt in usu apud Sacrorum ministros, arbitrati, Sanctitatem Tuam, & Sacrum Senatum non tam verborum lenocinia, quam rerum ordinem, & explicationem a nobis exacturos. Quibus si satisfecerimus, Deo optimo maximo bonorum omnium largitori, qui unde satisfacere possemus, clementissime tribuit, gratias agimus immortales: sin minus, ut imbecillitati, ruditatiue nostræ ignoscas, & obtemperandi studium benigne suscipias, etiam atque etiam supplices exoramus. Vale Romæ Kal. Martiis, anno Salutis MCDLXXXVIII.

C A P U T III.

Epistola Christophori Marcelli Archiepiscopi Corcyrensis ad Leonem X. præfixa Cæremoniali huic a se vulgato Venetiis anno 1516.

SANCTISSIMO D. NOSTRO DOMINO LEONI X. PONT. MAXIMO CHRIST. MAR. ARCHIEPISCOPUS CORCIREN. FOELICITATEM.

Vetustissimam sacrarum Cæremoniarum observationem, Beatissime Pater, & unacum ipsa Religione ortam esse, conspicuum est. Velut enim hæc mortalibus semper optima, ac summopere necessaria extitit, utpote qua Deos immortales suspicerent, admirarentur, & colerent, ita sine debito Cæremoniarum ornatu inculta est, informis, ac omni pulchritudine vacua. Placet recognitio Principi, benevolentia placet; at multo magis gratum obsequium, si & gestuum veneratione, & compositione verborum, & munerum blandimentis afficiatur. Sedet in sublimi Solio Rex omnium optimus, circumstant divinæ mentes, quæ certatim se illi gratas reddunt, diversis agitationibus Cæli moventur. Coeunt partim, partim dissentiant

elementa; quod suum est, agunt alia, & pro temporis varietate mutantur. Summa denique consensione, disparibus tamen officiis, sibi ipsi consonat, suoque principio obsequitur Universum. Quare Mortales quoque, quos cum Diis mercaturam quandam exercere Plato commemorat, & præcipue nos, qui supremi illius splendoris facti sumus divina voluntate participes, candidissimæ pietati, purissimisque Sacrificiis delectum Cæremoniarum injunximus, quem pia hæc editio tuo dicata Nomini continet, quæ post annos sub tanto Principe in lucem prodierit lætatur. Ubi non deifica Oracula, neque Thamiæ, aut Orphæi hymnos, quibus se adeo jactavit Græcia, non Sybillinos affatus, aut vanam Hebræorum superstitionem, non mutabilem Caldæorum ignem, neque Ægyptiorum Serapim, aut Persarum solem invenies, sed Divini Numinis deductionem, preces castissimas, Cælestis Patriæ speciem, sacratissimos Ritus, arcana præfigurata Mytheria. Quid enim aliud Pontificum electio, Conciliorum norma, Divorum adscriptio, Cardinalium allectio, Pontificalis pompa, admissio Principum, alique Sacrorum usus, qui in unum totius universi Principem Summum consensum, Dei providentiam, potestatem, splendorem, Imperium, liberalitatem ostendunt? Nobis certe hoc in Diogenis Fano constitutis melius quam per has Cæremonias, quibus adeo celebratur Roma, tuæque auctoritas colitur, Divina omnia illucere non possent. Hanc itaque lucubrationem accipe Sacratissime Pontifex, quæ tantis auspiciis sub tuo augustissimo Principatu vulgari promeruit. Hanc inquam accipe, lætoque animo amplectere, quæ tam pro sui ipsius dignitate, quam pro tui amplitudine, gratissima quidem omnibus futura sit, & plurimum jucunditatis perpetuis temporibus allatura.

C A P U T IV.

Querimonia Paridis Grassi adversus Marcellum electum Archiepiscopum Corcyrensem, quod Augustini Patricii Cæremoniale sub suo nomine vulgasset.

Editionem Cæremonialis Romanæ Ecclesiæ, quod, ut dictum est, ordinavit Augustinus Patricius, & deinde publici juris fecit Marcellus electus Corcyrensis Episcopus, graviter tulit Paris de Grassis Cæremoniarum tunc in Urbe Apostolicarum Magister sub Leone Papa X. ratus, arcanos Romanæ Ecclesiæ ritus non esse proferendos in vulgus, ne in contemptum tandem veniant. Unde querelas de hac editione deposuit apud ipsum Pontificem Leonem X. apud quem accusavit plagii memoratum Corcyrensem Archiepiscopum, propterea quod Augustini Patricii Piccolominei Opus de sacris Cæremoniis sub suo nomine vulgasset. Porro etsi non omnia, ut scite observat doctissimus Joannes Mabillonius in Commentario prævio ad Ordinem Romanum Tomo II. Musei Italici pag. vi. & sequenti, ex Diario laudati Cæremoniarum Paridis, quædam nihilominus supplentur, quæ hic paucis delibanda sunt. Paris audito Librum

Ceremonialem Augustini Pientini Episcopi, suppresso veri Auctoris nomine, ab Electo Corcyrensi Venetiis editum esse, rem primo retulit ad Cardinales, ex quibus multi commoti sunt, quod *Ceremonia sacra, & Mysteria eorum divulgata fuerint*. Deinde querelam ad Pontificem delatae, qui *prima facie turbatus, dixit, se facturum, quod Cardinalibus placeret*. At quia *Cardinalis Sanctae Crucis forsan fuerit causa*, quod *imprimeretur Liber ille*; dixit, non malum esse. Sed tamen cavuit, ne ullum ejus exemplar divenderetur, dum in proximo Consistorio super hoc negotio statutum fuisset. Hæc facta sunt anno MDXVII. die XI. Martii. Mense sequenti post Festum S. Marci, Paris prolixam hac de re Epistolam a se scriptam legit in Consistorio, in qua eorum sententiam refellere conatur, qui existimant, *Religionis Christianae Ceremonias ad publicam mortalium utilitatem esse divulgandas*; aitque, si hæc semel licentia invaluerit, Summi Pontificis venerationi magnopere detractum iri, quem cum ut Deus aliquis in terris ob arcana sacra, *qua tum verum magnitudine, tum varietate divinitatem quandam præferre videantur*, existimetur, & credatur, iis publicatis, mox hac opinione cadere necesse sit, reducere in ceterorum mortalium classem. Gravi itaque poena dignum esse electum illum Corcyrensem, qui Librum Ceremoniarum S. R. E. furto surripuisset, atque in lucem emisisset temere, suppresso etiam veri Auctoris nomine, imo ad mille & supra correptiones admisisset in editis Libris. Ad extremum petiit Paris, *Librum Ceremoniarum nuper impressum omnino comburi simul cum falso Auctore, aut saltem ipsum Auctorem corrigi, & castigari*. Hæc summatim referre visum est, quæ plenius ex ipsa Paridis tum Epistola, tum narratione intelliguntur, quæ sunt hujusmodi, legunturque apud eundem Mabillonium citato Tomo II. Musei Italici pag. 587. & seqq.

Hodie, nempe XI. Martii, anno MDXVII. cum mihi dictum esset, Librum Ceremonialem nostrum, quo Respublica nostra Ecclesiastica regitur, & gubernatur, fuisse Venetiis impressum, & ad Urbem remissum omnibus venalem; dolui vehementer: & priusquam aliquid dicerem Pontifici, super hoc conquestus fui cum Cardinalibus, qui in die creationis annuæ Papalis expectabant Pontificem venturum ad Missam. Et aliqui, immo multi ex eis commoti; scandalizati sunt, quod ceremoniæ sacræ, & mysteria eorum divulgata fuerint: sic ut ceremoniæ nostræ, quæ erant quid sacrum, fiant quid publicum, &c. Et in fine dixerunt Papæ dolentes. Papa autem prima facie turbatus, dixit se facturum quid Cardinalibus placeret. Et quia Cardinalis sanctæ Crucis forsan fuerat causa, quod imprimeretur Liber ille; dixit, non malum esse. Tandem Papa commisit Cardinali de Grassis protectori officii ceremoniarum, ut simul cum Auditore Camerae provideret, ne amplius aliquod volumen venderetur usque ad diem Consistorii: quia tunc exquisitis votis omnium Cardinalium concluderetur. Et sic factum est.

Deinde cum collatione facta de illo impresso cum nostro, invenissem, multa fuisse ad libitum addita, & plura similiter cassata; retuli Papæ, præsentibus Cardinalibus in Consistorio

sequenti, ac Papa vidit, ac magis commotus est. Et vocato iterum Auditore Camerae, mandavit, ut omnia volumina impressa apud se habeat, & sic retineat, donec aliud sibi dixerit.

Sicut supra dixi, XI. Martii scripti, electum Corcyrensem publicasse Librum Ceremonialem contra jus fasque, & Papa mihi commisit, ut ipsum Librum diligenter viderem, ac collationem cum originali, si quid esset additum, vel imminutum, quod illud signarem, ac referrem. Itaque eo totaliter viso, & signato, feci hanc meam Epistolam, quam præmisi quasi investivam contra ipsum Corcyrensem temerarium. Libri sacri, & eam Papæ dedi in manibus, & legit & approbavit, mandans mihi, ut in primo Consistorio recitem causas, quibus motus fui; & exaudiret præsentem Senatu petitiones meas, quæ sunt, ut ipsa Epistola de verbo ad verbum hic posita, sic videlicet.

Sanctissimo D. N. Leoni Papæ X. Paris de Grassis Episcopus Pisaurensis Ceremoniarum Magister. Inter sacras, solemnesque Romanæ Ecclesiæ ceremonias, Beatissime Pontifex, a juventute mea versatus tuo, ac tuorum beneficio prædecessorum, illis jam ad XVI. prope annum præfectus, piaculum ingens, & id quidem calumniæ, & ignominie plenum, facturus videor, si transeat sub silentio, & conniventibus oculis patiar, illas per Libros sacrorum rituum, nuper sub nomine cujusdam falsi, & temerarii Auctoris impressos, corrumpi, ac in contemptum Apostolicæ Sedis divulgari; atque antecessores meos, qui eisdem præfuerunt ceremoniis, illasque mihi tamquam per manus dedere suis laboribus, suis vigiliis, ac studiis, contra jura, legesque, defraudare æquo animo feram sub felicissimo Sanctitatis Vestræ Pontificatu, cujus ingenii dotes ita longa experientia omnes didicimus, ut jam non dubitemus eam (si qualia hæc sunt intelligat) pro sua erga Deum pietate, pro Sanctæ Sedis Apostolicæ majestate, ac innata justitia, non solum non passuram, sed, sicut ego ea pro criminis magnitudine sine hac verborum detestatione præterire non possum, ita illam acriter vindicaturam. Nam quemadmodum justus cujusque Principis est curare, ne quisquam suo jure fraudetur: ita, si diligenter inspexerimus, ad quempiam alium non magis spectat, quam ad Romanum Pontificem, ne sacræ suæ ceremoniæ maculentur, neve aliqua in parte alterentur, ac præsertim ne corrumpantur, sed, & quod omnium Principum est, ne prolatae in vulgus velut prostituta Pontificalium sacrorum existimationem minuant, flocci faciant, & contemnantur. Quod si in primis tua, ac sacrosanctæ Sedis Apostolicæ res agitur, B. P. ne pigeat obsecro, hæc, qualiacumque sint, quæ temporis angustia cursim collegimus, perlegere. Inveniet profecto in his, non quæ verborum contextu auribus grata & jucunda; sed quæ ad rem tuam maxime pertinentia sint & necessaria. Verum antequam ab eo exordiar, quod hæc sacræ ceremoniæ in vulgus minime prodendæ sunt; respondebo illorum opinioni, qui existimant, religionis Christianæ ceremonias ad publicam mortalium utilitatem esse divulgandas, moti forsan, vel eo argumento, quod ipsa divini Numinis deductio, & cetera Ecclesiæ sacramenta, Libris Pontificalibus impressa, & publica-

blicata sunt. Quippe illa ad omnes Ecclesias & singulos quosque sacerdotes pertinent, nec omnino recondi poterant. Hæc ad Romanam Ecclesiam tantum, ejusque Summum Pontificem, suosque dumtaxat ad id operis vocatos ministros. Sed utinam etiam & illa quæ dixi, secretiora forent & magis recondita. Non enim ea quotidie ad profanas manus in Sacerdotii contemptum, nec ad alienas sectas in nostræ Religionis irrisionem devenire videremus. At quoniam acta reprehendi magis possunt, quam corrigi, revertamur ad rem nostram integram adhuc, ne hoc malo exemplo & ipsa labefactetur. Novit jam pridem S. T. omnem Romanorum Pontificum auctoritatem, omnem majestatem hujus sacrosantæ Sedis pendere ex animis opinionibusque Principum, & Prælatorum. Dum enim illi summos Pontifices non tamquam mortales homines, sed tamquam Deos in terris existimant & credunt; illis se sponte sua subjiciunt, illis parent, illos suspiciunt, ac venerantur, & etiam adorant; incredibilique quadam afficiuntur admiratione, cum aliquando audiunt, aut vident supra humanum opus ab illis per eas, de quibus agimus, cæremonias in Sanctorum numerum quempiam referri; Pontifices tanta sollemnitate, tantaque observatione eligi, atque sanctificari; Imperatores coronari, Reges inungi, Cardinales assumi, Patriarchas, Archiepiscopos, Episcoposque consecrari, ac cetera effici, quæ tum rerum magnitudine, tum veritate divinitatem quamdam præferre videtur. Quod si Sacrorum arcana pandantur, & sacræ publicentur cæremoniæ, ilico futurum est, ut omnis opinio minuatur, ut Pontificia auctoritas elanguescat, necesse est. Suberit extemplo Summus Pontifex vel uniuscujusque plebei hominis censura. Alius ritus non recte a majoribus ordinatos redarguet: alius non observatas traditiones objiciet: alius morem cultumque Sacrorum perperam interpretabitur: alius gestus deridebit & subsannabit. Et cum antecessores tui consueverint, pro tempore, pro loco, pro necessitate cæremonias quandoque mutare; non erunt Summi Pontifices sui arbitrii, neque sine vulgi murmuratione id exsequi poterunt, ut cumque res familiari cognitione in contemptum adducent. Quod ne fiat, non minus curandum a nobis, qui vero Fidei lumine illustramur, quam curatum sit olim a gentilibus in suis superstitionibus, quibus quasi peculiaris mos omnibus arcana cæremoniarum nec velle, nec audere in vulgus edere, afferentibus, non licere profanis nosse deorum mysteria, semper fuit: in quibus nulla major quam fides silentii deberetur. Quod ut cetera innumerabilia taceam, quæ circa hæc a Macrobio, Apuleio, Valerio, Plutarcho, ac ceteris antiquis Auctoribus referuntur, memoriæ traditum est, Tarquinius Regem, M. Tullium, quod Librum secreta civilium sacrorum continentem, cuidam Sabino describendum dedisset, Colso insulam in mare abjici jussisse. Quod si apud eos tanto supplicio Libri sola descriptio vindicata est: qua pœna apud nos erit afficiendus, qui non solum Sacra descriperit, sed etiam descripta corruerit, ac corrupta divulgaverit? Adde quod ille triumphator illis eisdem Sacris præerat, licebatque illi eundem Librum legere & attrectare: hic noster ab omnibus cæremoniis alienus ex sacris pene-

tralibus furto Librum hunc surripuisse facile credi potest. Nam cum Innocentius V I I I. summa industria collectas in hunc Librum cæremonias, non ignorans quam retinenda & occultanda forent Sacrorum arcana, in Palatii Sacratio ac interiori Bibliotheca magna cum diligentia observanda reposuisset, ut inde per illos tantum qui præessent, quando opus esset, incorrupte haurirentur, idque huc usque observatum fuisset; quomodo ad hujus manus pervenerint, non liquet satis. Illud certissimum est, quod hic novus homo, & modo sacris initiatus, unus inventus est, qui quod nemo alius etiam inter sacras cæremonias educatus umquam ausus fuisset, auderet non solum Librum hunc in profanas manus edere, sed etiam multa subtrahere, nonnulla addere, & quamplurima immutare, & corrumpere. At dicat ipse, obsecro, ubinam istas cæremonias, quas immutabat, didicerat? quo auctore, quo magistro, qua facultate nitebatur? nam si Liber ipse cæremonialis a Sede apostolica approbatus jus & legem facit, ut in Clementinis Tit. *De jejurando*, sancitum est, & nulli præterquam Principi licet ea quæ juris sunt immutare: qua audacia hunc impulsus dicemus, ut cum secundum constitutiones nomen adhuc suum nesciret, (appellavit enim se ubique electum Archiepiscopum, cum electum tantum appellare debuisset, nec licebat, ante Pallii assumptionem quemquam Archiepiscopum nominari) hanc Juris mutationem sibi licere putaret? Describebat perfectus bonus vir quod minime intelligebat. Si enim eadem non ignorasset, neque ambulasset in tenebris, non posuisset *sinistram* pro *dextra*, non *fidelem* pro *filialem*, non particulas negativas, aut disjunctivas aliquando omisisset, quæ sensum perverterent, aut depravarent: præterisset *fanones*, *voxilla*, *colores*, *collegia*; nec immutasset juramenta, benedictiones, unctiones, & cetera, quæ de substantia sunt, & characteres imprimunt, quæ nullo pacto immutari debent, aut possunt. Sed quid in his moror? ad mille & supra, B. P. corruptiones enumeravimus in Libro hoc suo nuper impresso, dum illum cum exemplari protocollo Pientini Præfulis, veri Auctoris contulimus. Nec verbis nostris fidem habeat S. V. Librum ipsum quem protuli intueatur. Signata sunt loca, aut asterisco, aut linea, aut litura. Nulla prorsus pagina errore vacat; quæ omnia non minus pro pietate tua erga Deum reprobare, & repellere debet S. T. quam pro tua justitia curare, ne defuncto eidem Præfui Pientino, Viro doctissimo, ac de Sede Apostolica bene merito, vis, & injuria inferatur, suisque vigiliis, suo nomine spoliatur, ac suo honore privetur. Is cum plures annos magistratum cæremoniarum egregie, & scite exercuisset, ab Innocentio VIII. prædecessore, & affine tuo, ab hujusmodi magistratu vacatione accepta, eisdem tamen stipendiis Senas, tamquam in secessum literarum, ad Romanæ Ecclesiæ cæremonias in librum hunc colligendas missus est. Laboravit triennio Vir gravis, & summæ experientiæ: demum incredibili studio, & exacta diligentia absolutum librum ejusdem Pontificis nomini, antepositis suis epistolis, dedicavit, contentus vel eo nomine, quod apud posteros non Auctor, sed quasi collector aut compiler sacrarum cæremoniarum diceretur. Nec existimavit bonus Pater, aliquem suo

tan-

tantum nomini invisurum . Sed o mores hominum ! non erubuit sub tuo Pontificatu electus ille Corcyrensis ejus Patris, cujus debuisset potius observare memoriam, abradere nomen, & epistolas, ac suas ita inferere, ut se Libri hujus caeremonialis auctorem credere secutura posteritas crederetur. Quis enim in hoc Libro nuper impresso præterquam unus Christophorus Marcellus nominatur ? Quodnam Pientini Præfulis auctoris, aut alterius cujusvis legitur nomen ? Quin etiam subtraxit iste, qui tam impudenter alienos sibi labores vindicat, verba illius optimi Patris, quibus in Capite de Clericis caeremoniarum imperfectionem suam excusabat, dicentis inter alia : Utinam tam bene officium meum sustinere scivissem, cum in eo fui, quam bene imperfectum meum cognosco. Eat igitur, etsi non dolo, non fraude id fecisse autumet, dicat se suas epistolas ad ornamentum tantum apposuisse, non ut laudes alienas usurparet. Sed interrogetur, obsecro, cujusnam sit illa lucubratio, quam adeo efficacissimis verbis a S. T. accepi, in prima epistola efflagitat ? utrumve intelligat brevis epistolæ suæ, an totius operis lucubrationem ? interrogetur, inquam, a quo absoluta maxima pars operis videri poterat, cum tot & tanta priorre Libro peregerit, ut ipsa altera epistola ampullatum : vel a quo ultimus absolvitur liber, ut ejus verbis utar . Putabatne simplex vir, dum opus alienum ad verbum transcribebat, futurum ut nunquam in furto deprehenderetur ? an id magis ingenium fortasse opinabatur, quam mutum reddere, vel fateri, per quem profecisset ? An existimabat potius tantum opus, paucis admodum immutatis verbis, & rubricis, ita suum fieri, ut veri auctoris nomen penitus aboleretur ? Primum se omnium hæc ad usum, & voluptatem communicasse, commemorat . O egregium opus ! o laboriosam concinnationem ! Exsequias juste emendavit ; *albam, album ; genuflexum, supplicandum ; officiales, magistratus ; pileum, galerum* concinnavit . Pro *lignis, tignis* supposuit ; pro *cusino, pulvino* ; pro *bacili, vase*, pro *perfectis, perfecta* ; pro *platea, aream* ; pro *armis insensia* ; pro *rubeo, purpureum* inseruit . Hæc & hujusmodi sunt frivola quidem, & inania, quæ iste suis sesquipedalibus verbis se concinnasse jactat ; ac si pura nuda, clara & simplicia non magis Religio exposceret, quam ista verborum lenocinia . At si concinnaturus erat, cur non omnia concinnavit ? cur non eodem ubique modo, pro *Papa, Pontificem*, pro *processionibus supplicationes* subegerit ? Modo easdem dictiones reliquit intactas, tamquam pertæsus etiam longam concinnationem eorum Librorum, quorum auctor haberi volebat . Quid ? quod ubique nomen, & excusationem, ac epistolas auctoris delevisset . Non delevit etiam *Hoc juramentum Fredericus III. Imperator, qui adhuc regnat, dum Senis esset, præstitit* . Quid & illud intactum reliquit ? *Ceremonias in coronandis Regibus servandas in Libro Pontificali, quem nuper emendavimus, plene conscripsimus* ; ut in altero scilicet dolus, & mendacium appareret, defuncto jam diu Imperatore : in altero furtum confiteretur ; nisi mallet geminare Pontificalem Librum illum, ita ut hos fecit sibi attribuens . Præterit ultra hæc multa his non minora, sive negligentia, sive ut omnia pariter confunderet . Nam & se interfuisse coronationi

ejusdem Imperatoris, & vidisse Cardinales Nicenum & Atrebatensem, ac servisse Pio II. per annos plurimos, & suo tempore nullum Romanum Pontificem præter Sixtum IV. consecratum, satis impudenter autumat : ac si dicat, nec Pium III. nec te Leonem X. nostro tempore fuisse consecratos, quæ cuncta ut primo Auctori apprime conveniebant, ita huic suppositio, & ejus Libro omnem fidem adimunt . Aut enim illa non erant amovenda, aut hæc quoque cum illis abradenda fuerunt, ut concinnatum undequaque opus videretur . Ast o si ipse Pientinus auctor revertatur, & nunc sua jura reposcat ! nonne iste operosus concinnator, tamquam Horatiana cornicula, alienis omnibus pennis deplumatus, cum suis tantum corruptionibus remansurus esset, futurusque omnibus ludibrio ? At putabit forte, ea sibi licere, si epistolas suas cum a se concinnato opere ad S. T. direxisset, ejusque sacratissimo nomine culpam suam pertexisset, eos imitatus, qui, ut impune furati sint, furta magistratibus elargiuntur . Sed non vidit ingeniosus in alienis operibus auctor, quantum Beatitudinem tuam offenderet, dum, tamquam inanis gloriæ nimis appetentem eam in locum abraforum nominum ingerit, sui que criminis participatione coinquinare contendit, non solum invidis & malevolis causam contra eam invehendi præbet, sed etiam ejus successoribus abradendi Leonis sanctissimum nomen cum tua ignominia, at cum laude sua auctorum nomina restituendi materiam relinquit . Quod si his, quæ maxime Sanctitatem tuam movere deberent, non moveris, Sanctissime Pontifex, nec afficit te contemptus Apostolicæ Sedis, ac Pontificiæ dignitatis, qui ex hac arcanorum invulgatione illico irrepturus est ; moveat te quæso tua erga Deum pietas, nec eam una cum ipsis caeremoniis ab isto insolenti jactatore corrumpi patiaris . Moveat te demum Innocentii V III. prædecessoris tui, affinisque memoria, cui tu tantum debes, ut fortasse nemo magis . Is enim suum abs te, tum jure affinitatis & gratitudinis, tum æquitatis & justitiæ reponi petit . Is Librum suum integrum & incorruptum desiderat, & in arcanis reservari, ut vivens instituit, efflagitat . Obsequere eorum umbris, Beatissime Pater, tam justa, tam pia, tam sancta postulantibus ; & quæ tua justitia est, rejecto & expulso etiam sub anathemate isto impudenti usurpatore cum suis corruptionibus, Libros suis auctoribus restitue . Futurum est enim, ut plus veræ laudis, plus gloriæ adeptura sit S. T. in eorum nominibus reponendis, quam si quodlibet egregium opus a vero auctore sibi dicaretur .

Hanc epistolam cum in manibus Papæ dedissem, legissetque libenter, & avidè, & acceptasset rationes, & argumenta in ea per me allegata ; versus ad Cardinales aliquos, qui sibi forte adhærebant, dixit, me rationem habere super petitionibus meis : & librum caeremoniarum nuper impressum omnino comburi simul cum falso auctore, sicut postulasset, aut saltem ipsum auctorem corrigi & castigari omnino debere, prout præsentibus videretur . Itaque ad primum Consistorium rem & causam differre, ut in ipso Consistorio proponerem, prout proposui, audientibus omnibus ; & tandem Papa mandavit tribus Cardinalibus, videlicet R. D. Antonio de Monte Tit. S. Prædix, & D. Petro de

Ac-

Accoltis S. Eusebii Anconitano, & D. Achilli de Grassis S. Sixti Cardinali Bononieusi, Protectori officii Cæremoniarum, fratri meo, ut petitiones meas ad partes plenius intelligerent, & me, prout juris fuerit, ac sibi videretur, expedirent tam super Libro comburendo, quam Auctore castigando, & ad Urbem citando personaliter & comparendo. Itaque quid sequetur, hic etiam successive adnotabo.

C A P U T V.

Observatio Joannis Mabillonii in ipsam Paridis Grassi querimoniam, quæ legitur Tomo II. Musæi Italici pag. VII. & in eum in aliquot animadversio.

QUOD attinet ad Paridis postulata, sane in hoc correptione dignus erat electus ille Corcyrensis, quod alienum Opus vero, ac genuino detractum Auctori, tribuisset sibi; at tantas iras non merebatur ob vulgatum Librum Cæremoniarum, quasi reus esset violatæ Pontificiæ Majestatis. Non enim ex arcanis ejusmodi Cæremoniis metimur Summi Pontificis venerationem, quicumque in Religione Christiana recte sapimus; sed ex eo quod Ecclesiæ Catholicæ Caput sit, ac Beati Petri in prima Sede Successor, maxime ubi supremam illam dignitatem congrua morum sanctitate, quod in Beatissimo Pontifice nunc suspicimus, exornat. Neque sane Paridis postulatio pro ejus votis successit; cum neque Liber editus, neque ejus editor ignis pœnam sustinuerint. Cur autem arfissent ambo, quos Pontifex privilegio munierat?

Tantane animis caelestibus ira?

Hactenus Mabillonius, qui tamen in eo cum aliis quibusdam labi videtur, qui affirmant, in hoc correptione dignum esse Marcellum electum Corcyrensem Episcopum, quod alienum Opus vero, ac genuino detractum auctori, tribuisset sibi. Non enim Marcellus ait, ipsum fuisse Cæremonialis hujus Auctorem, sed dumtaxat se in recitata superius ad Leonem Papam X. Epistola editorem significat, eoque sensu accepta haud dubie fuit ea Epistola ab eodem Pontifice, qui etiam ejus editionem Pontificio privilegio munivit, cui subscripsit Bembus, qui a secretis erat ejusdem Pontificis. Sed nec in decursu Operis aliquid dicit Marcellus, quo se venditare voluerit Auctorem laudati Cæremonialis Ecclesiæ Romanæ.

C A P U T VI.

Recensentur duo Diplomata, alterum Leonis X. alterum Senatus Consulti Veneti, quibus Cæremoniale ipsum Romanæ Ecclesiæ a Corcyrensi editum munitum fuit, legunturque in prima illius editione Veneta anni 1516.

ANTEQUAM ipsa describamus Diplomata, operæ pretium ducimus ea recensere, quæ in fronte memoratæ primæ Venetæ editionis leguntur: *Habes, inquit, optime Lector Rituum Ecclesiasticorum, sive Sacrarum Cæremoniarum*

*Sacrosanctæ Romanæ Ecclesiæ Libros tres. Opus cum non ante formis excusum, tum vero argumento suo, & jucundum tibi, & utile. Nam quæ ratio creandi Pontificis, quæ reliquorum Antistitum, qui modus admittendi Imperatoris cum Urbem invisit, quæ Divorum nostrorum Apotheoses; exin qui pietatis ordo dum divinis Pontifex operatur a Kalendis Januariis ad anni finem, postremo veluti coronis, ac fastigium Operis, summa ad institutam rem pertinens explicatio personarum, ac officiorum, quæ operanti Pontifici adsunt, his Libris continentur. Est & in fronte Operis Reverendissimi, & doctissimi Corcyrensis Archiepiscopi Christophori Marcelli ad Sanctissimum Dominum Nostrum Leonem X. Epistola, cum indice. Epistolam ipsam jam supra descripsimus Cap. III. Sed nec omitenda quæ in ipsa prima Operis pagina post recitatam hactenus ad Lectorem Admonitionem sequuntur: *Diris Pontificis interdictum, ne non prædictum dicas, anceps librariæ, nequis infra quinquennium præter nos excudat. Quare caveas, ne lucri cupiditas transversum te actum, & graviore pœna viventem afficiat, & mortuum barathro æternum addicat.* Post hæc recensentur laudata Diplomata, quorum primum est;*

LEO PAPA X.

Universis & singulis, ad quos hæc nostra Littera pervenerint, salutem, & Apostolicam Benedictionem.

CUM dilecti filii, Antonius, & Silvanus Capelli Cives Veneti Librum Rituum Ecclesiasticorum edere in manus hominum statuerint, ac propterea in eo imprimendo, non parvos sumptus fecerint, & labores subierint; vereanturque, nequi fructus ex illo percipi possent, ii intercipientur ab aliis, qui nihil impenderint ea in re laboris: Nos adducti eorum precibus, inhibemus, mandamusque omnibus, & singulis, ne per spatium quinque annorum jam nunc incipiendorum Librum ipsum imprimere, aut imprimi facere, impressumve venundare, aut vendendum tradere ullis in locis audeant, Antonio, & Silvano non permittentibus. Qui contra inhibitionem, mandatumque hoc nostrum fecerit, admiserit, cujuscumque nationis, & dignitatis sit, is universæ Dei Ecclesiæ expers, excommunicatusque esto. Datum Romæ apud Sanctum Petrum sub annulo Piscatoris die XVII. Decembris MDXVI. Pont. Nostri anno IIII.

Bembus.

Exemplum Senatus Consulti Veneti, quod cavetur, nequis infra decennium Opus hoc imprimat, impressumve alibi hic importet sub mactis in eo. Die VII. Junii MDXVI. in Rogatis.

Vadit pars, Quod cum Nobiles Viri Antonius & Silvanus Capelli a Bancho imprimi facere intendunt quoddam Opus Cæremoniarum Ecclesiasticarum, cautum auctoritate hujus Senatus, & statutum sit, quod per decennium nemo ipsum Opus imprimi facere possit, tam in hac Civitate nostra Venetiarum, quam in aliquo alio loco Dominio nostro subiecto, aut alibi impressum vendere tam Latino, quam materno sermone, præterquam impressum cura, & impensis ipsorum Nobilium Antonii & Silvani Capello sub pœna amittendi ipsa volumina, & aureo.

reorum decem pro quolibet volumine, qui reperirentur, cujus pœnæ tertia pars sit eorum Judicum, seu Officialium, quibus primum denunciatum fuerit; alia tertia pars detur Hospitali Pietatis, & alia sit Accusatoris, seu inventoris.

Laurentius Quartus.

C A P U T VII.

Qua occasione, quove consilio editum fuerit hoc Opus, a nullo adhuc tentatum, & de ejusdem Operis difficultate, ac utilitate.

Quum non ita pridem & Pontificale Romanum in tres Tomos distributum, & Cæremoniale Episcoporum in duos partitum Tomos Commentariis illustraverim; nefas mihi pene esse putavi Ritus Romanæ Ecclesiæ Ecclesiarum omnium Matris atque Magistræ silentio præterire: tum vero præsertim, quod minime decebat, ut illustrata nuper Capella Regis utriusque Siciliæ, & aliorum Principum per Virum Clarissimum Josephum Garafam Clericum Regularem, Capella Romani Pontificis Maximi, Capellarum omnium princeps lateret, ejusdemque Sacri Ritus antiquitate, majestate, varietate, & amplitudine ceteris prestantiores jacerent. Aggressus sum, fateor, Opus arduum, & difficillimum, & forte Apostolicis Cæremoniariis servatum, qui Pontificios Ritus ex usu jam callent, uti jam dixi in Epistola dedicatoria ad feliciter regnantem BENEDICTUM XIV. Pontificem Maximum. Sed quum vidissem, & diu quidem, eorum calamos altiori premi silentio, malui ego novo huic labori, & magnæ impensæ succurrere, quam rem tanti momenti penitus præteriri. Jam diu anceps fui, an aggredi hoc Opus immensum, longum, perplexumque, & plurimi otii, quo indigebam, debuissem, Opus inquam ingentis studii, & lectionis, ut e rudibus antiquitatis in lucem innumeris pene, ac varii Sacri Ritus proferrentur, qui cum profundis tenebris sepulti sint, quædam dumtaxat tenuissima eorum vestigia apud priscos Scriptores inveniuntur, uti jam notavit doctissimus æque ac religiosissimus Joannes Cardinalis Bona in sua ad Res Liturgicas Præfatione.

Quamquam vero terrori mihi fuerint inextricabiles difficultates in singulis Ritibus Romanæ Ecclesiæ explicandis, & in eorum origine, quantum fieri potuit, investiganda, quicquid obstabat, patientia, ac studii pertinacia vincere tentans, Bibliothecas lustravi, ac multa volumina evolvi tum edita, tum manu exarata, quæ extant in celeberrima Casanatensi Bibliotheca, præter illa, quæ mihi humanissime commodarunt duo primi Apostolicarum Cæremoniarum Magistri, Ignatius Reali, & Venantius Philippus Pierfanctes, eorumque ope multa inveni, quæ ad ipsorum Sacrorum Ecclesiæ Romanæ Rituum originem spectant. Plurimum vero profuit notitia Conciliorum, Sanctorum Patrum, ceterorumque Ecclesiasticorum Scriptorum, ex quibus non pauca delibavi quæ ad eam rem quammaxime pertinebant. Summo demum mihi fuere adjumento Regnantis Summi Pontificis BENEDICTI XIV. aurea Volumina, in quibus varios obscuriores Ponti-

ficiæ Capellæ Ritus profunda eruditione, & facilitate mirabili, ubi se se illi dedit occasio, explicuit, facemque mihi præbuit, ut aliorum originem, & rationem invenirem.

Quantum vero utilitatis sit meum hoc Opus, & nova hæc Cæremonialis Sanctæ Romanæ Ecclesiæ editio, ingenue fatebuntur, & qui illud diu apud bibliopolas frustra quæsierunt (rarissime enim apud ipsos invenitur, inventumque magno pretio redimi oportebat) & qui illud in sua Bibliotheca retinent; omnes siquidem illius editiones, ac Romana præsertim, summa typographorum oscitantia sæpe lectionem ingerunt insigniter variantem, scatentque mendis interdum fœdissimis, quæ nos, in unum collatis editionibus, diligenter correximus, Codicemque Augustini Patricii, qui Cæremoniale ipsum ordinavit, congruè restituiimus puritati. Fuit Patricius celeberrimus suo tempore Cæremoniarum Magister, operamque suam per plures annos in eo munere apud Pium II. a quo, uti alias dictum fuit, Piccolominei cognomen accepit, aliosque Summos Pontifices, summo studio, ac diligentia, & magna cum laude præstitit, ac demum ob ejus merita Episcopus Pientinus effectus est, de eoque videri possunt quæ scripsit Ughellus in sua Italia Sacra in Episcopis Pientinis. Oratione quidem, ut est Apostolicorum Cæremoniariorum mos usus est, simplici, & nuda, styli blanditias consulto aspernatus, nempe cum res ipsa omnem verborum ornatum respuat, nec commode secus explicari possit, ut scite docet Franciscus Mucantius in Epistola dedicatoria ad Othonem Truchses S. R. E. Cardinalem prefixa Operi Paridis Crassi, quod inscriptum est: *De Cæremoniis Cardinalium, & Episcoporum in eorum Dioecesibus.*

In Commentariis nostris, quibus Cæremoniale Sanctæ Romanæ Ecclesiæ illustravimus, potissimum usi sumus mss. Diariis laudati Paridis Crassi, quippe qui per plures & ipse annos Julio II. Leoni X. aliisque Pontificibus Maximis sedulo in Cæremoniarii Apostolici munere inservivit, meruitque ob operam suam eisdem fideliter præstitam Episcopatum Pisauriensem. Quamobrem mirari non debet humanissimus Lector, si nos in explicandis Pontificiis Ritibus planum, ac simplicem stylum adhibuerimus, contentis omnino delicatulorum quorundam pseudocriticorum nostri hujus ævi disteriis, qui perperam Scriptores Cæremoniarum derident, & carpunt, quod vocibus minus Latinis utantur. Fuit nuper, qui Auctorem eximium carpebat, quod Librum hoc Titulo inscripserit: *De Capella Regis &c.* volebat enim inscribi: *De Sacello Regis &c.* At vero carpenti potius, ac ridendi omnino hujusmodi homines, qui vix in Calepino versati, veteræ Ecclesiæ monumenta, antiqua Pontificum Diplomata, Conciliorum Canones, & res Ecclesiasticas penitus ignorant. Extat Libro III. Decretalium Titulus xxxviii. qui inscriptus est: *De Capellis Monachorum*, eaque vox *Capella*, unde dicti etiam sunt *Capellani*, passim occurrit in Actis Conciliorum, Summorum Pontificum Constitutionibus, & apud Scriptores rerum liturgicarum passim. Legendus Thomassinus in sua veteri, ac nova Ecclesiæ disciplina; præ ceteris vero eruditissimus Dufresne in suo mediæ, & infimæ Latinitatis Glossario.

Sed

Sed hisce omisſis, præteriri ad rem noſtram illud non debet, mutatum nempe nonnihil videri hodie ab antiquis ritibus illis, quos ordinavit Patricius in ſuo Cæremoniali, Quod tamen mirum videri non debet, cum idiplum in omnium fere ampliatiõe variari videamus. Multiplicata ſiquidem, ut verbis utar Paridis Crassi in citato ſuperius Opere *De Cæremoniis* &c. Cap. i. in dies devotione, etiam Cæremoniæ multiplicatæ, & ſalva rerum ſubſtantia, reformatæ fuerunt; quæ etiam noſtro quoque, tempore, tam pro rei ſacræ reverentia, quam pro Apoſtolicæ Sedis ornamento, ac Sacri Senatus auctoritate, cum ordinum, ac temporum, & locorum omnium ratione penſata, prout cujuſque merito, & uſui, rationique convenit, ornantur, & ſucceſſive mirum in modum ampliantur, non quidem, ut priſcis adverſentur inſtitutis, quia nimirum plura reperiuntur, quæ nobis probanda ſunt, quam quæ repudianda, ſed ut temporibus, ac locis, & actibus in dies emergentibus magis accommodentur. Non itaque cæremoniæ ipſæ, ut arbitrariæ, aut temere confictæ repudiandæ ſunt, verum ut ſacræ, & rerum ſacrarum ſacris uſibus convenientiſſime dicatæ, omni cura ſtudioque reverenter ſuſcipiendæ; quia proſecto nos mortale genus præcipue ad propriam Divinæ Majeſtati venerationem tribuendam, ipſamque piis ſupplicationibus excolendam, ac ad honorem hominibus a Deo præeleſtis impendendum inducunt, Statum etiam utriuſque profeſſionis Principum maxime exornant, rudes inſtruunt, diſcolos compeſcunt, & quicquid Divinitatis, humanitatiſque, & honoris, ac honeſtatis eſt, indicant, & demonſtrant.

Reliquum eſt, ut iterum iterumque Lectorem admoneam, ut quæcumque ſcilicet a me in his Commentariis explicabuntur, non ea quidem ex meo ipſius arbitrio præſumta, nec a me temere effutita, ſed de ipſo vetuſtiorum, recentiorumque Romanæ Eccleſiæ Cæremonialium fonte, deque frequentiſſima Papalium, actionum obſervantia excerpta fuiſſe. Verumtamen ſiqua ſorte pro huius Operis abſolutione ſuperaddenda videbuntur, id, ut libuerit cuique, per me liceat. Non enim cuncta, ut ſcitiffime idem Crassus ſubjicit, & univerſa præcepta, quæ vaſtitaſ huius ſcientiæ continet, ſed multa me dicturum polliceor. Namque, ſicut periti prodiderunt, in uno homine ſcientia perfectæ eſſe non poteſt, nec ars, aut diſciplina ulla ſingulari ingeniõ conſummari. Quod ſi corrigere potius placuerit, liberuſque id per me poſſit, dummodo, qui nos correxerit, potius corrector benignus ſit emendando, quam latrator inviduſ detrahendo. Quod iccirco dixi, quia ſunt hodieque non pauci, qui cum nihil valeant, nihil ſciant, ut docti videantur, & eruditi, alienos Libros lacerant, Auctoribuſque imponunt, quod nunquam illis venit in mentem, ut alios fileam,

qui ſanctioriſ diſciplinæ cultoreſ, probatoſque illorum Libros a legitimis Magiſtratibuſ, & Cenſoribuſ, ſi non labe, certe ſuſpicionem Janſeniſtarum infectoſ appellitare, & etiam ſcribere non erubescunt.

Unum adhuc addiderim, quod alias ſuperius innui, ſcripſiſſe me ſcilicet quæ in antiquis Romanæ Eccleſiæ monumentis, & probatis Auctoribuſ inveni, præſertim vero in mſ. Apoſtolicorum Diariis, ut ex his poſteri in ſimilibus caſibus judicare valeant, quid magis deceat; *quamquam illorum aliqui*, ut verbis utar eruditiffimi Franciſci Mucantii Apoſtolicæ Cæremoniarum ſub Pontificatu Gregorii XIII. cujuſ etiam geſta enarravit, in ſuo mſ. Diario, *multa præter rem ſuis ſcriptis admixuerint, ſape etiam quæ fuerant memoranda tacuerint, nonnunquam plures annos, & integroſ Pontificatuſ ſilentio præterierint, aut per eoſ aride nimis, & ſicco pede pertranſierint; unde ſæpiuſ diverſimode iidem actus celebrati ſunt, cum exempla deſicerent, ſeu potiuſ oblivioni tradita eſſent, nec certi quidquam appareret, pugnantibuſ inter ſe Patrum ſententiis, quod gravitati, Majeſtatiſque tantæ Sedis parum convenire videtur; quippe conſentaneum eſt, illam tanquam Orbis totiuſ Magiſtram, a qua univerſæ Eccleſia exemplum, & normam ſumere debent, uniformem regulam in ſuis Ritibus, & Cæremoniis, conſtanter, quoad ejus fieri poſſit, ſervare, nec hodie improbare id quod olim approbavit, aut contra, niſi cauſa plene cognita, & per Viroſ peritoſ, atque auctoritate Apoſtolicæ delectoſ mutare diſcuſſa. Ita Mucantiuſ Apoſtolicarum Cæremoniarum peritiſſimuſ, & Magiſter, qui etiam ſtatim ſubjicit, quod, licet ipſi Romani Pontificeſ pro eorum arbitrio Cæremoniaſ ipſaſ, quæ præſertim exteriorem cultum reſpiciunt, innovare, vel etiam in totum mutare poſſint, prout aliquando fecerunt: attamen dubitandum non eſt, ea, quæ ſemel conſilio adhibito recte ſtatuta fuere, faciliuſ duratura eſſe, & inconvulſa fore, ſi ſcriptis firmata erunt, & decenſer explicata; eo enim factõ diſputationi locus auferitur.*

Atque hæc ſunt, quæ deſcribenda cenſui in propylæo, ut ita loquar, noſtri huius novi Operis, quod quidem ea fiducia aggreſſuſ ſum, quod ſperem gratum fore primuſ Regnanti Summo Pontifici BENEDICTO XIV. Viro omnium ſapientiſſimo, ac de re Litteraria, & præſertim Rituali optime merito, itemque S. R. E. Cardinalibuſ, Patriarchiſ, Epiſcopiſ, ceteriſque Sacrarum Cæremoniarum ſtudioſiſ, tum potiſſimuſ, quod non pauca in hoc adornando Opere eruerim, quæ in mſ. Codicibuſ latebant. Ceterum ſi in toto hoc Opere, quid exciderit Catholicæ Fidei minus conſonum, inditum penituſ volo, atque ejuro. Sum enim filiuſ Eccleſiæ Romanæ, & Apoſtolicæ Sedis obſequentiſſimuſ, cujuſ cenſuræ cuncta quæ ſcripſi, ſcribamque in poſterum, libenſ ſubjicio.

INDEX TITULORUM

PRIMI LIBRI CÆREMONIALIS SANCTÆ ROMANÆ ECCLESIAE.

D E Conclavi, & Electione Papæ. Titulus I.	pag. 1.
De Ordinatione, & Consecratione novi Pontificis. Titulus II.	85.
De convivio solemnī Pontificis cum Cardinalibus, & Prælatīs. Titulus III.	146.
Quæ mutantur, si Coronatio Pontificis fiat extra Urbem. Titulus IV.	161.
De adventu, & Coronatione Electi in Imperatorem Romanum, Titulus V.	165.
De Canonizatione unius Sancti. Titulus VI.	220.
De pluribus Benedictionibus. Titulus VII.	248.
De creatione novorum Cardinalium. Titulus VIII.	290.
De Consistorio publico, ac loco, & ordine Consistorii. Titulus IX.	330.
De provisione Ecclesiarum. Titulus X.	335.
De publicationibus solemnibus. Titulus XI.	346.
Ordo, quomodo Papa equitat in Pontificalibus. Titulus XII.	350.
De receptione Principum. Titulus XIII.	358.
De Concilio Generali. Titulus XIV.	371.
De morte, & exequiis Reverendissimorum Cardinalium, & Papæ. Titulus XV.	386.

Fili hominis pone cor tuum, & vide oculis tuis,
& auribus tuis audi omnia, quæ ego loquor
ad te de universis Cæremoniis Domus
Domini, & de cunctis legibus ejus.
Ezechielis Cap. XLIV.



SACRARUM CÆREMONIARUM SANCTÆ ROMANÆ ECCLESIAE

LIBER I.

DE CONCLAVI ET ELECTIONE PAPÆ

TITULUS I.


De loco Conclavis primum deligendo.

§. I.

Sacras Apostolicæ Sedis, Romanicæ (1) Pontificis Cæremonias, & observationes, quibus Summi Pontifices uti consueverunt, collecturi, congruum arbitramur ab ipsa Romani Antistitis electione inchoare: si prius locum, in quo electio ipsa celebranda est, descripserimus. Et quamvis Romani Pontificis electio ubicumque Pontifex decesserit, (2) ex Gregorii X. Clementis V. Decretis, & institutis celebrari debeat; tamen quia frequenter Romæ, ubi (3) plerumque agit, & Auditores causarum Pontifice absente (4) linqui consuevere, & in Palatio Apostolico apud S. Petrum haberi solet, utpote in peculiari, & propria Sede (ita enim hodie appellant, ubi Patres pro electione includuntur) in ipso Apostolico Palatio designabimus. Is locus continet Aulas superiores duas, live tres, & Sacella duo, & ita undique firmis repagulis, muroque clauditur, ut ostia nulla, fenestræ nullæ, nisi altissimæ, exitus nullus, introitus tantum unus super sit.

COMMENTARIUS.

I.



N eligendis Ecclesiarum Prælati, quibus & humana, & divina ministeria committuntur, quantam adhiberi curam oporteat, testantur passim & Generalium Conciliorum Decreta, & sacratissimæ, ac repetitæ Summo-

rum Romanorum Pontificum Constitutiones, propterea quod, uti recte docet Pius Papa IV. in sua Constitutione, quam de electione Romani Pontificis anno MDLXII. edidit, a bonis bona omnia, videlicet charitas, vigilantia, Ecclesiastica disciplina, denique animarum eis com-

To. I.

missarum salus proficisceretur; a malis vero contra, nonnisi mala, nempe avaritia, negligentia, fastus, & animarum periculum possit expectari. Quod si in quibuslibet Ecclesiarum Pastoribus tantopere providendum est, nequis assumatur indignus, majorem certe, & perspicaciorē diligentiam in Romano Pontifice Maximo eligendo, qui ceteris Pastoribus est præfutura, & totius Dominici gregis curam habiturus, oportet adhiberi. Atque hinc plane, ut nempe Summorum Pontificum electiones libere, & recte, & mature fierent, variæ ab ipsis editæ sunt Constitutiones, quas recensuimus Tomo III. Conciliorum in Commentario ad Canonem I. Concilii III. Lateranensis, & Tomo IV. in Commentario ad Canonem II. Concilii II. Lugdunensis.

II. Præ ceteris autem labente Seculo v. Symmachus in Apostolica Sede constitutus Pontifex

A

Ma-

(1) Ita legitur in prima omnium editione Veneta anni 1516. & Colonienſi anni 1557. in Romana vero anni 1562. legitur, *Præfatis*. (2) In ipsa Romana, secundum Gregorii X. Clementis V. Decreta & ordinationes.

(3) In eadem Romana, *Pontifex plerumque residet*. (4) Ibidem, *itinerante*.

Maximus, anno quadringentesimo nonagesimo nono Kalendis Martii Synodum i. Romæ coegit, in qua actum est de tollendo ambitu in Comitibus Pontificiis, & de præcludenda Schismaticis via. Decretumque primum fuit, ut cujusvis Ordinis Clerici, qui, Papa incolumi, suffragium alicui in prima futura Romani Pontificis electione polliciti fuissent, aut sacramento se in alicujus gratiam obstrinxissent, loci sui dignitate, & communione privarentur. Decretum alterum fuit, ut post obitum Papæ ille Apostolicæ Sedis consecraretur Episcopus, qui consentientibus totius Ordinis Ecclesiastici suffragiis electus esset; vel si studia essent diversa, vinceret sententia plurimorum, sic tamen ut careret Sacerdotio, qui captus promissione, non recto judicio de electione decrevisset. Decretum est tandem, ut si quis ad Ecclesiasticam pertulerit notitiam consilia eorum, qui contra hanc Synodum de Pontificali egerint ambitu, & rationabili probatione convicerit, particeps hujusmodi actionis, non solum purgatus ab omni culpa sit, sed etiam remuneratione, quæ non indigna sit, sublevetur. Porro Decretis his edendis occasionem dedit schisma Laurentii adversus electionem Symmachi: duo enim eadem die ordinati fuerant Romani Pontifices, Symmachus quidem in Basilica Constantiniana, Laurentius vero a quibusdam pecunia corruptis in Basilica S. Mariæ: *Et a majori quidem parte ordinatus est Symmachus unus ex Diaconis; ab aliis vero Laurentius*, inquit Theodorus Lector Lib. II. *Historiæ Ecclesiasticæ*, qui addit, ex duplici illa electione cædes, rapinas, & alia innumera mala perpetrata esse. Ceterum memorata Romana Synodus, non a Theodorico Rege, ut habet Theodorus Lector loco laudato, sed a Symmacho convocata fuit, ut habet Liber Pontificalis, & legitur in principio Actorum Synodi: quam quidem celebratam Kalendis Martii anni CDXCIX. habent vulgatæ editiones, in quibus legitur: *Post Consulatum Paulini V. C. Kalendis Martii in Basilica Beati Petri Apostoli, Synodo Prasidente Beatissimo Symmacho &c.* Consulatus autem Paulini incidit in annum CDXCVIII. ut notat Pagius in Symmachi Vita, Num. 14. ubi etiam ait, Synodo huic Episcopos LXXII. interfuisse.

III. Tum ante, tum post memorata Synodi Romanæ sub Symmacho Decreta vix ullam rem aliam fuisse tot tantisque mutationibus obnoxiam, quam fuit Romani Pontificis creatio, jam fuisse ostendimus nos citato Tomo III. Conciliorum in Commentario ad laudatum Canonem i. Concilii III. Lateranensis, Alexandro Papa III. anno MCLXXIX. celebrati, quo edicitur, ut a solis S. R. E. Cardinalibus (quod Nicolaus II. jam ante Alexandrum in suo Romano Concilio anni MLIX. Can. i. statuerat, sed obtinere nequiverat) Romanus Pontifex eligeretur, ita tamen ut ex tribus duæ partes in unum conspirarent. Alexandri III. sive Concilii III. Lateranensis sanctionem confirmavit postea, novoque muniit robore Gregorius Papa X. in Concilio Lugdunensi II. anni MCCLXXIV. Can. II. ubi occurrens prolixis Romanæ Ecclesiæ vacationibus, gravibusque dispendiis, atque periculis celebrem illam Constitutionem edidit de ritu in electione Papæ servando; de erectione, & clausura Conclavis eligentium Cardinalium; de interdictione quacumque privata sive per litteras,

sive per internuncios communicatione; de omnimoda pactio-num, conventionum, pollicitationum, juramentorum, quæcumque circa futuram electionem intervenerint, diremptione. Sane observat Glossa in ipsam Constitutionem relata a Bonifacio Papa VIII. in Capite, *Ubi periculum*, III. *De electione &c.* in Sexto, *illam potius sumere vigorem ex renovatione Celestini V. & hac approbatione, & conservatione, quam ex primæ approbatione Gregorii, ex eo quia revocata fuerat per Hadrianum V. & per Joannem XXI. & pro revocata habebatur, nec olim inter Gregorianas legebatur*. Addit mox Glossa, non æquum fuisse, ut Constitutio ista tam utilis approbatione tanti Concilii edita absque requisitione Concilii revocata fuerit, quia, ut habet Regula Juris, *omnis res per quascumque causas nascitur, per easdem dissolvitur*. Verum recte & illud subdit, probatque, potuisse ipsam Constitutionem licet in Generali Concilio editam, a solo Papa revocari: *De plenitudine tamen potestatis id facere potuerat, cum sit Papa supra omnia Concilia*.

IV. Porro modum præscripsit in ea Constitutione Gregorius X. Pontifex ad celerem Romani Pontificis electionem faciendam. Multa enim mala ex longa Romanæ Ecclesiæ vacatione accidere solebant, ut eadem Constitutio non obscure innuit; idque præcipue contigerat post mortem Clementis IV. cum Interpontificium usque ad memorati Gregorii electionem trium fere fuerit annorum. Cardinales siquidem numero XVII. qui Viterbii ubi mortuus & sepultus est Clemens IV. in Curia Romana præsentibus erant, in creatione futuri Pontificis dissentire cæperunt, electioque adeo discordiis agitata est, ut a die XXIX. Novembris anni MCCLXVIII. quo obiit Clemens IV. protracta quidem fuerit ad diem 1. mensis Septembris anni MCCLXXI. quo electus est Gregorius X. ejus successor. Sæpius siquidem congregati Cardinales negotium conficere nulla ratione valere. Eo enim tempore, ut tradit Panvinus in Adnotatione ad Vitam Gregorii X. a Platina scriptam, nequaquam, ut nunc consuetudo est, Cardinales in Conclavi recludebantur, sed summo mane singulis diebus, si Romæ erant, Laterani, vel in Basilica S. Petri, vel alibi, prout occasio se se offerebat; sin autem extra Urbem, in Ecclesia Cathedrali illius Civitatis, in qua tunc commorabantur, una conveniebant, perinde ac nostro tempore faciunt, cum congregationem sunt habituri de Romani Pontificis electione tractantes.

V. Quinam ritus Seculo XI. servari solitus fuerit in electione ipsa Summi Pontificis, docet jam nos antiquus Ritualis Codex ante annum MCXCII. in Romana Ecclesia usurpatus, a Cencio Cardinale, & Camerario Ecclesiæ Romanæ, Libro, *De censibus*, insertus, estque is Ordo Romanus XI. a Mabillonio una cum aliis editus Tomo II. Musæi Italici. In ipso autem Ordine Capite XLV. hic ritus præscribitur: *Mortuo Romano Pontifice, & sepulto, omnes Cardinales ad propria revertuntur secundum antiquam consuetudinem. Secunda vero die conveniunt in Ecclesia, & Missa mortuorum cantata, omnes similiter secundum consuetudinem antiquam recedunt. Tertia autem die iterum omnes in Ecclesia congregati, Missa Sancti Spiritus ibidem primitus celebrata, tractant de electione, & perscrutata omnium Cardinalium voluntate ab aliquibus de*

de ipsis, in quem major, & melior pars convenit Cardinalium, Prior Diaconorum ipsum de Pluviali rubro ammantat, & eidem Electo Nomen imponit, ipsumque deinde duo de majoribus Cardinalibus addextrant usque ad Altare, ubi prostratus adorat, Primicerio cum Schola Cantorum, & Cardinalibus cantantibus, Te Deum laudamus. Quo finito, ab Episcopis Cardinalibus ad Sedem ducitur post Altare, & in ea, ut dignum est, collocatur. In qua dum sedet electus, recipit omnes Episcopos, & Cardinales, & quos sibi placuerit, ad pedes, postmodum ad osculum pacis. Hucusque laudatus Ordo.

VI. Nulla in hoc Ordine Conclavis mentio. Gregorius enim Papa X. fuit primus, qui illud sua Constitutione in Generali II. Lugdunensi Concilio edita præscripsit. Usitatum tamen primum Viterbii post Clementis IV. Papæ obitum, cui idem Gregorius in Pontificatu successit, docent nonnulli Auctores ex Diplomate a Cardinalibus ibidem in Conclavi inclusis emisso, quo petebant Henricum Cardinalem Ostiensem inde extrahi. Diploma autem ipsum ex Viterbiensi Archivio editum legere est apud Macrum in Hiero-lexico, verbo *Conclave*, & apud Oldoinum in nova ad Ciaconium editione, quod etiam, quia breve est, lubet hoc loco describere. *Nos miseratione divina Episcopi, Presbyteri, & Diaconi Sacrosanctæ Romanæ Ecclesiæ Cardinales infirmitati Venerabilis Fratris nostri N. (Henrici) Ostiensis & Velletrensis Episcopi, fraterno compatiens affectu, vobis Alberto de Montebono Potestati, & Raynerio Gatto, qui pro Capitaneo Viterbinsi te geris, & communi Viterbiens. tenore præsentium sub debito fidelitatis, quo nobis, & Ecclesiæ Romanæ tenemini, districte præcipiendo mandamus, quatenus cum idem Episcopus juri & voto sibi competentibus in electione Romani Pontificis renunciaverit coram nobis, quantum ad præsentem vacationem dumtaxat, volens, ut non obstante ejus absentia, sine ipso hac vice libere procedamus ad providendum Romanæ Ecclesiæ de Pastore, ratam habiturus, & gratam electionem, seu provisionem, quam de Romano Pontifice, absque ipso, & ejus requisitione duxerimus faciendam; ac instantia petierit, vobis mandari, ut de Palatio, in quo sumus inclusi, ipsum permitteritis exire, eundem Episcopum de ipso Palatio statim egredi libere permittatis, nec ipsum de cetero aliquatenus detineatis invitum. Datum Viterbii in Palatio discoperto Episcopatus Viterbiensis vi. Idus Junii, anno Domini MCCLXX. Apostolica Sede vacante.* Sigilla decem & septem in cera rubra pendentia cum diversorum Sanctorum Imaginibus in Diplomate ipso cernuntur; totidemque in ipso Conclavi fuisse Cardinales, Panvinius, Ciaconius, & alii docent. Fortasse autem, uti aumat Macrus, Sancti illi in sigillis impressi erant Cardinalatus cujusque Tituli secundum morem illius seculi.

VII. Puto autem, labi Auctores, qui ajunt, Viterbii primum cæptum fuisse Conclave, in quo Cardinales inclusi Gregorium Papam X. elegerunt. Longe enim ante, & quidem compluries id in aliis Romanorum Pontificum electionibus factum est, teste Glossa in Cap. *Licet, De evitanda, §. Nullatenus, De electione &c.* ubi ait, discordantes Cardinales inclusos fuisse in electione Honorii III. Gregorii IX. Cælestini IV. & To. I.

Innocentii IV. Certe in Vita Honorii III. scribit Ciaconius, Innocentio III. mortuo, cum res Christiana non solum propter Asiaticum bellum, sed & propter civiles Italicas dissensiones, gravissimis esset exposita periculis, & cum in novo Pontifice eligendo dissentire cœpissent, ne Sedis Apostolicæ vacatio in longum progredereetur, illico Cardinales in Comitio se reclusisse, & Summum Pontificem elegisse. Tum vero hæc habet: *Hinc cæptus mos laudabilis fuit inclusionis Cardinalium, ut citius Papam crearent, neque moras necterent, & cibus in dies parcius, & imminutior, fieret stimulus celeriter electionem Pontificis maturandi, ut cavetur in Capite*, Ubi periculum, De electione, in Sexto. Electus fuit Honorius ipse Pontifex Maximus Perusii die XVIII. mensis Junii anni MCCXVI. cum cessasset *Papatus per unum diem*, ut scribit Martinus Polonus in suo Chronico, & Bernardus Guido in Spéculo historico Romanorum Pontificum, ubi etiam causam tam festinæ electionis perspicue docet fuisse arctam Cardinalium inclusionem: *Vacavit Sedes*, inquit, *per unum tantummodo diem, Perusinis causa electionis Papæ strictissime arctantibus Cardinales*. Idem tradit Blondus Lib. VII. Decade II. ubi ait coactum fuisse in Conclavi Collegium Cardinalium; sed falsum tamen est, cum scribit, cibum eis per singulos dies fuisse imminutum, cum die XVI. Junii, mortuo Innocentio, & die sequenti sepulto, reclusi Cardinales die XVIII. ejusdem mensis Papam elegerint.

VIII. Sed ut alia omittam exempla Romanorum Pontificum, qui ante Gregorium X. a Cardinalibus in Conclavi reclusis electi fuere, ita certe electus fuit anno MCCLIV. Alexander IV. Neapoli, ubi ejus Prædecessor Innocentius IV. diem suum extremum clauserat. Testatur id quidem Nicolaus de Curbio in Vita ejusdem Innocentii, Capite ultimo; postquam enim dixit, nuntiata Innocentii morte Guillelmo Cardinali Legato Ariani esistenti, hunc Neapolim prope- rasse ad ipsius sepulturam, ita mox subdit: *Ubi cum aliquandiu oravisset, Neapolitani Cives eum cum dolore tamen, & lacrymis ad Domum, ubi Papa decesserat, ubi etiam alios concluderant Cardinales, curialiter deduxerunt*. Flavius Blondus, qui claruit anno MCDXL. Lib. II. Decade VII. ait Cardinales ea conditione Conclave ingressos; ut, omni postposita longiori debito mora, rebus Ecclesiæ, Manfredi violentia insidiisque periclitaturis, per novi Pontificis creationem providerent, atque Bartolinum Tavernarium Equitem Parmensem, quem Innocentius IV. sororium suum Neapoli Prætorem imposuerat Virum prudentem, honesta vi adhibita, illos, cibo per singulos dies imminuto, ut in aliquem concordarent, impulisse potius, quam hortatum esse. Sane falsum & illud videtur, quod de imminutione cibi per singulos dies ait Blondus; nam ut inter alios Scriptores notat Pagius in Vita Alexandri IV. Num. II. die tantum x. Decembris anni MCDLIV. reclusi Cardinales fuerunt, & die XII. ejusdem mensis novum elegerunt Summum Romanum Pontificem.

IX. Quicquid de ea re sit, certum illud est, antiquiorem esse Viterbiensi Conclavi, Cardinalium reclusionem in electionibus Summorum Pontificum, uti hactenus probatum fuit. Non eo tamen inficias, quin Gregorius Papa X. celebri sua Constitutione in Concilio II. Lugdunensi

edita Can. II. inter alia, quæ de electione Papæ statuit, certam formam Conclavis præscripserit. Ante enim ipsum Gregorium licet Cardinales aliquando in memoratis electionibus recludi solerent, nullo id tamen jure cautum fuerat. Imo Glossa, quæ ante Gregorii Constitutionem scripsit, in Capite, *Licet de evitanda, De electione &c.* ubi varia exempla prædictæ reclusionis recenset, expresse ait: *Tamen id de jure faciendum non est.* Ergo Gregorius X. celebrem sanctionem de electione Romani Pontificis edidit plures continentem leges, quæ processu temporis paululum variatæ, in hanc propemodum formam ex usu redactæ sunt juxta Panvinium in Notis ad Platinam, ubi agit de Vita Gregorii X.

1. Ut novi Pontificis Comitia habeantur loco idoneo, ubi Pontifex præcedens cum sua Curia residens, Causarumque, & Litterarum Apostolicarum Audientiam habens mortuus fuerit. Quod si in Villa, Pago, aut Oppido obierit, & propterea commode ibidem Comitia haberi nequiverint, in Urbe, in cujus Diœcesi Villa, Pagus, vel Oppidum fuerint, habeantur, nisi interdicta sit. Quo casu in proximiori Urbe non interdicta ipsa electio fieri debet. Si vero Audientia alio loco fuerit, tunc non ubi Papa obierit, sed ubi eadem Audientia fuerit, futuri Pontificis creatio habeatur.

2. Ut mortuo Pontifice Comitia non habeantur, nisi ad minus decem dierum spatio interjecto, quo tempore & Cardinales absentes expectari, & Novendialia demortui Pontificis per Cardinales præsentibus celebrari debent.

3. Ut Cardinales omnes quavis ratione a Conclavi absentes, nullum ferendorum suffragiorum jus habere possint.

4. Ut non solum Cardinales absentes, sed & omnes cujusvis ordinis, & conditionis homines in Romanum Pontificem creari possint.

5. Ut finitis Novendialibus, Sacrisque die x. rite Spiritui Sancto factis, omnes Cardinales, qui adsunt, sive absentes venerint, sive non, in Palatio, in quo mortuus Pontifex habitabat, loco tuto, undique clauso, & optime custodito, quod *Conclave* vocant, concludantur cum duobus tantum, vel si ægritudine laborent, ut nunc consuetudo est, tribus, aut quatuor famulis, qui eis necessaria subministrent in loco Comitiorum. Nec alicui præterea fas sit locum ingredi, vel egredi, nisi infirmitatis causa, certisque quibusdam hominibus, quorum opera in Conclavi existentibus maxime est necessaria. Is porro locus Conclavis nullum intermedium parietem habeat, sed omnes Cardinales in cellulis suis laneis distinctis pannis ipsum inhabitent in communi.

6. Ut locus, & portæ Conclavis diligentissime custodiantur: si Romæ electio habeatur, primum a Prætorianis, deinde a Regulis Romanis, & Oratoribus Principum sacramento prius obstrictis, demum in loco, ostio Conclavis proximior, ab Episcopis, & Conservatoribus Urbis. Si autem extra Urbem Comitia hæc habeantur, a loci ejusdem Dominis temporalibus eodem juramento fidelitatis obligatis. Quorum munus est Conclave custodire, & diligenter cavere, nequid Conclavi inferatur, seu exportetur, quo minus legitima suffragia ferri possent, atque singula scutari, quæ vel cibi, vel alterius rei causa inferuntur ad eos, & providere, nequid

detrimenti patiantur Cardinales, omnibusque ipsorum nutibus præsto esse. Milites vero Prætoriani, ac Reguli Romani Conclave ab omni impressione tutum reddere debeant.

7. Ut Cardinales Conclavi egredi nulla ratione possint, nisi Romano Pontifice creato.

8. Ut Cardinalibus venientibus post ingressum Conclavis, & ante Papæ creationem potestas sit Conclave ingredi, ac cum ceteris suffragia ferre; nullusque Cardinalis quavis occasione, aut prætextu etiam excommunicationis vinculo innodatus ab electione ipsa arceri possit.

9. Ut post triduum ingressus Conclavis, nisi Pontifex renunciatus fuerit, Episcopi cum Regulis Romanis, & his, qui Conclavis custodiæ præsumt, maximam in epulis, & cibis, quæ Cardinalibus inferuntur, rationem habeant, & illis nonnisi ferculum unum inferri permittant.

10. Ut in Comitibus habendis sub anathematis pœna nulli fas sit, aut largitione uti, aut quidpiam polliceri, aut prensare, sive ambiendo, animos Cardinalium sibi in nova creatione devincire. Quo interim tempore Cardinalibus nulli alii negotio vacando jus, potestasque sit, quo electio maturetur.

11. Ut nemo Romanus Pontifex renunciari possit, nisi duarum partium ex tribus Cardinalium in Conclavi præsentium integra suffragia tulerit.

12. Ut mortuo Romano Pontifice omnes Ecclesiastici Magistratus, & officia statim cessent, atque a muneribus suis vacent, præter Pœnitentiarium majorem, minoresque, & Camerarium Sanctæ Romanæ Ecclesiæ, quorum munera etiam mortuo Papa perdurant.

X. Hæc sunt, quæ docet Panvinus ex dicto Capite, *Ubi periculum, De electione &c.* in Sexto, & ex Clementina Constitutione, *Ne Romani*, Titulo eodem. Ex quibus patet, mitigatam esse memoratam Gregorii X. seu Concilii Lugdunensis II. de Conclavi Constitutionem, in qua inter alia statutum fuerat, ut quilibet Cardinalis uno tantum famulo, vel Clerico, vel laico contentus esset, & quibus patens necessitas id suggereret, duos tantum habere permittebatur. Præterea eadem Constitutione fuerat statutum, ut si electio non fieret intra tres dies ab ingressu Conclavis, per quindecim dies sequentes tam in prandio, quam in cœna Cardinales uno solo ferculo essent contenti. Quibus diebus decursis, ex tunc tantummodo panis, vinum, & aqua ministrarentur eisdem Cardinalibus. Unde ab Hadriano V. qui electus est Papa anno MCCLXXXVI. suspensa ea Constitutio fuit, ut testatur Jordanus auctor cœvus apud Raynaldum ad ipsum annum, Numero xxvi. *Hic statim post suam creationem Constitutionem Gregorii de restrictione Cardinalium in electione Papæ suspendit, intendens eam aliter ordinare, sed morte præventus non potuit, nec Sacerdos ordinatus est.* Nempe ex Cardinali Diacono Tituli S. Hadriani electus est Papa, & cum nec Presbyter, nec Pontifex consecratus fuisset, supremum diem obiit, *cum sedisset a die sue creationis usque ad diem obitus, mensem unum, & dies novem*, ut ait Bernardus Guido, & ex eo Pagius in ipsius Vita, Num. II.

XI. Porro quum Hadrianus V. Gregorii X. Constitutionem de Cardinalium in Conclavi reclusionem post sepulturam Pontificis verbo tenus, & non scripto suspendisset, idque Cardinalium

cœ-

cætus promulgandum censuisset per Archiepiscopum Corinthiensem, hic non solum male habitus est, sed etiam a pluribus Romanæ Ecclesiæ Officialibus vis Purpuratis Patribus illata: ab ipsis etiam Viterbiensibus Sacrum Collegium in duriorē, atque arctiorem custodiam compactum fuit, quod Cardinalium assertioni nulla fides adhiberetur. Hæc Raynaldus eruit quidem ex Diplomate, quo Joannes XX. dictus XXI. Gregorii Constitutionem ad tempus abrogavit, & ex alio, quo Sacrum Tribunal instituit, cui injunxit, ut animadverteret in eos, qui prædicta facinoræ perpetrarant. Primum Diploma, quo Joannes ipse XXI. Constitutionem a Gregorio X. latam, atque ab Hadriano V. suspensam ad tempus revocavit, data est Viterbii II. Kalendas Octobris anno I. Pontificatus, Christi autem anno MCCLXXVI. ejusque verba hæc sunt: *Suspensionem ipsam ab eodem Prædecessore Hadriano factam fuisse, ut præmittitur, præsentium tenore testamur; ac ipsam nihilominus ratificantes, & ratam haberi volentes, revocatione prædicta* (aliquos enim asseruisse, Hadrianum in lecto ægritudinis decumbentem, suspensionem revocasse prædictam, jam dixerat laudatus Joannes Papa) *non obstante, Constitutionem eandem quoad omnem suum effectum de Fratrum ipsorum consilio decrevimus esse suspensam*. Revocasse Joannem Constitutionem ipsam Gregorii X. consilio Joannis Gajetani, scribit in Chronico suo Ptolomæus Lucensis, sic inquit: *Hic statim Constitutionem per Gregorium X. de reclusionē Cardinalium suspensam per Hadrianum revocavit consilio, ut fertur, Joannis Gajetani, cujus nutu multa faciebat, eo quod principalis auctor fuerat suæ promotionis*.

XII. Quum vero Joannes XXI. alique duo præsertim Prædecessores Pontifices Innocentius V. qui Gregorio X. successit, eique deinde Hadrianus V. & huic, ut quidam Scriptores contendunt, Vicedominus, ob Pontificatus brevitatem, paucos, vel nullos Cardinales creassent, octo, qui remanserant post Joannis XXI. obitum, elapsis duobus integris mensibus, post varias controversias inter se exortas, quod Galli, & Itali suæ Nationis Pontificem creare contenderent, ac libertas ob solutam Gregorii X. de Conclavi Constitutionem, discordiam augeret, a Viterbiensibus, apud quos Joannes ipse anno MCCLXXVII. die xvi. Maji obiit, tantæ moræ impatientibus, Prætorio Civitatis inclusi, desolato Orbi Patrem dare coacti sunt, ut scribit Raynaldus ex Epistola 1. Lib. 1. Nicolai III. Pontifex tamen creatus non est, nisi postquam vacasset Sedes menses sex, & dies octo; cum Nicolaus hujus nominis III. electus fuerit die tantum xxv. mensis Novembris memorati anni MCCLXXVII. Ptolomæus Lucensis in suo Chronico scribit quidem, tunc vacasse Ecclesiam *per sex menses, videlicet ab hebdomada Pentecostes usque ad Festum Catharinæ anno MCCLXXVII*. Sed recte notat Pagius in Vita ipsius Nicolai III. neglexisse Ptolomæum eos dies, qui ultra illos sex menses supersunt. Eundem diem Nicolai III. Papæ electioni assignant Jordanus, atque Bernardus Guido apud memoratum Pagium; eamque rem extra dubium ponit ipsemet Nicolaus Pontifex in Litteris encyclicis, quas post suam Coronationem dedit *Romæ apud S. Petrum xviii. Kal. Februarii anno 1.* in quibus declarat, se esse electum *in die B. Catharinæ*, quæ occurrit in

die xxv. Novembris. Litteras autem ipsas legere est apud Raynaldum ad prædictum annum MCCLXXVII. Num. LVIII. & seq.

XIII. Mortuo Nicolao III. in Castro Suriani septimo a Viterbio lapide die xvi. Augusti anni MCCLXXX. pro electione novi Pontificis Conclave quidem Viterbii coactum est, cujus tamen libertas violata a Viterbiensibus fuit; quippe qui Richardi impulsu, qui Conclavi præerat, in ipsum Conclave irrumpentes, duos Cardinales Nicolai III. propinquos, Matthæum scilicet Tituli S. Mariæ in Porticu, & Jordanum Tituli Sancti Eustachii Diaconos per vim abstractos in vincula conjecerunt, uti ex variis Auctoribus refert Pagius in Vita Martini IV. quem, prædictis Cardinalibus in custodiam datis, reliqui post sex mensium vacationem in una sententiam coeuntes in Festo Cathedræ S. Petri, seu viii. Kalendas Martii anni MCCLXXXI. in Summum Pontificem elegerunt. Mortuo Martino die xxvi. mensis Martii anni MCCLXXXV. neglecta penitus fuit in novi Pontificis electione Constitutio Gregorii X. Papæ de Conclavi. Exequiis enim Martini per tres tantum dies celebratis, die 1. mensis Aprilis memorati anni MCCLXXXV. Cardinales *libere, nulla inclusionis coactione præambula*, conveniunt de Successoris electione tractari, & *tandem in crastinum scrutinii via electa*, concorditer elegerunt Jacobum Sabellum Cardinalem Diaconum Tituli S. Mariæ in Cosmedin, fuitque Honorius IV. ut ipsemet asserit in Litteris encyclicis de sua electione datis, quæ extant apud Raynaldum ad prædictum annum MCCLXXXV. Numero xvi. & seqq.

XIV. Obiit Honorius die 11. Aprilis anni MCCLXXXVII. apud S. Sabinam in Monte Aventino, ubi continuam residentiam fecerat. Cum autem Gregorius X. sua Constitutione edixisset, ut novi Pontificis Comitia haberentur, ubi Pontifex cum sua Curia residens, Caesarumque, & Litterarum Apostolicarum Audientiam habens, mortuus fuisset, hinc est, quod facer Cardinalium Senatus in Palatio Pontificio apud eandem Sanctam Sabinam coactus est. Verum cum plures ex Cardinalibus adversa valetudine tentati essent, ac nonnulli morbi gravitati succubuissent ob aeris intemperiem, Mons enim Aventinus magna ex parte noxiis austri flatibus expositus est, ad colligendas puriores auras Cardinales superstitēs discesserunt, & electionem distulerunt ad tempus magis salubre, ut inter alios tradit Ptolomæus Lucensis; ex quo etiam habemus, vacasse tunc Sedem decem & amplius menses, a die scilicet 11. Aprilis, quæ anno MCCLXXXVII. concurrebat cum die Cænæ Domini, usque ad diem xxii. mensis Februarii anni proxime sequentis MCCLXXXVIII. *Vacavit*, inquit, *tunc Ecclesia a Cæna Domini, quia tunc mortuus est Honorius, usque ad Cathedram S. Petri, in qua electus est Nicolaus*, Pontifex scilicet hujus Nominis IV. Porro sedata hyemis frigoribus epidemia, reversi Cardinales ad locum prædictum, conspirantibus omnium votis, Nicolaum ipsum elegere ibidem, teste laudato Pagio in Nicolai Papæ IV. Vita. Numero II.

XV. Refert Raynaldus ad annum MCCLXXXIX. laudati Nicolai IV. Epistolam, in qua revocavit Constitutionem a Gregorio X. editam de inclusionē Cardinalium in Conclavi pro electione Romani Pontificis quoad omnium illius capitum ob

observationem, ac Litteras a Joanne XXI. de ea re Viterbii pridie Kalendas Octobris primo sui Pontificatus anno exaratas confirmavit, non sine tamen summo publicæ & Christianæ rei detrimento ob diuturnum ab ejus morte Interpontificium, ut idem Raynaldus notat. Verum ut observat Pagius in Nicolai IV. Vita, Num. XXI. non tenuis est suspicio falsitatis ejus revocationis factæ per ipsum Nicolaum Pontificem, ex lectione trium Diplomatum Cælestini Papæ V. ejus immediati successoris, extantque apud eundem Raynaldum in Addendis ad Tomum III. in quorum duobus prioribus Cælestinus ipse V. asserit quidem, Gregorii X. Constitutionem, ab Hadriano V. & a Joanne XXI. fuisse suspensam; in tertio vero eam etiam per eundem Joannem XXI. fuisse revocatam, nulla in his omnibus Nicolai IV. revocationis mentione facta, quam certe non siluisset, si re vera Sanctus hic Pontifex eam Constitutionem quoad omnium illius capitum observationem revocasset, ut supponit Raynaldus citata ejus Epistola, quam referre ad litteram debuisset, cum tot alias ad Historiæ Ecclesiasticæ illustrationem parum necessarias, & quæ passim apud alios Scriptores leguntur, retulerit, licet istius nec locum, nec tempus, nec motiva ulla repræsentet.

XVI. Certum plane illud est, post Nicolai IV. obitum, qui contigit die IV. Aprilis anno Christi MCCXCII. Cardinalium reclusionem in Conclavi a Gregorio X. præscriptam servatam minime fuisse. Post diuturnam enim, & perniciosam Cardinalium dissensionem, qua annis duobus, mensibus tribus, & die uno, Romana Sedes vacavit, electus tandem fuit nutu potius Divino, quam eorum voluntate die V. Julii anno MCCXCIV. S. Cælestinus V. absens, & extra Collegium Cardinalium, Eremita quippe erat, seu Monachus, de Murrhone cognominatus a Monte Murrhonis, quem ex solitudinis, & pacatoris vitæ desiderio inhabitabat, duobus passuum millibus a Sulmone Civitate distante. Is Pontifex vel initio sui Pontificatus arctam de Conclavi cogendo, Sede Apostolica vacante, Gregorii X. Constitutionem renovavit, Diplomate dato x. Kal. Octobris Aquilæ, ubi consecratus fuerat die XXIX. Augusti, quod extat apud memoratum Raynaldum in Addendis ad Tomum III. Cum autem advertisset idem Pontifex, vim hujus Edicti eludi posse a Cardinalibus, qui Sede vacante ob Nicolai IV. obitum Perusii existentes Carolum Siciliæ Regem sacramento adstrinxerant, ipsum Cardinales non detenturum, si Pontifex in Regno Neapolitano obiret, vim illius sacramenti convulsit, & a Carolo Cardinales eo casu in Conclave adigendos sanxit, Diplomate dato *apud S. Germanum XVI. Kal. Novembris*, apud eundem Raynaldum loco citato. Denique Diplomate dato *Neapoli IV. Idus Decembris*, Gregorii X. de Conclavi Constitutionem iterum confirmavit, ea adjecta lege, si Pontificis obitu, si voluntaria abdicatione, si quavis alia ratione Sedes vacaret. De hujus legis innovatione a S. Cælestino Papa V. facta ita canit Jacobus Gajetanus in suo Poemate.

..... *Sed primitus arctam
Gregorii Legem statuit, qua claustra subire
Cardineos apices jussit, Pastore vacante
Ecclesia. Quando lex illa timenda recessit
Concilii, suspensa prius, renovata per istum.*

*Quam licet assiduo laudent vulgaria plausu,
Certa tamen rerum docet experientia, grandes
Urgentesque metus, infandaque crimina, nondum
Antiquis congesta malis, incumbere sponse.
Heu dolor, heu lacrymæ! patimur sine murmure
sævum*

Quid loquimur vulnus, vulnus miserabile vulnus.

Verum hæc scripsit Jacobus Cardinalis animo exulcerato propter illius Constitutionis renovationem. Nam alias non inclusis, ut mos postea tulit, in Conclavi Cardinalibus, diuturna Interpontificia magno Ecclesiasticæ rei detrimento consequuta, experientia compertum est, uti scite notat idem Pagius in Vita S. Cælestini Papæ V. Numero XI.

XVII. Quod olim statuit Gregorius X. de inclusione Cardinalium in Conclavi post dies X. a morte Pontificis, & quod edixit S. Cælestinus V. ut si Pontificis obitu, si quavis alia ratione Sedes Apostolica vacaret, locum ipsa Constitutio haberet, observari profecto cœptum est in electione Bonifacii Papæ VIII. Post abdicatum, siquidem a laudato Cælestino die XXI. Decembris anni MCCXCIV. Pontificatum, quem mensibus V. & diebus VII. tenuit, Cardinales Neapoli, ubi ea abdicatione facta est, *die Jovis, x. Kal. Januarii*, seu die XXI. ejusdem Decembris se in Conclavi *apud Castrum novum Civitatis Neapolitanæ contiguum, ubi tunc idem Frater Petrus*, seu Cælestinus V. *cum sua residebat familia, incluserunt*, ut de electione novi Romani Pontificis tractarent, inquit Bonifacius ipse VIII. in Litteris encyclicis, quas scripsit de sua Promotione, extantque apud Raynaldum ad annum MCCXCV. Num. VII. Tum itaque, idest in electione Bonifacii VIII. uti notat Pagius in ejusdem Bonifacii Vita, Num. I. non vero, ut inquit Papebrochius in suo Conatu, in electione Benedicti Papæ XI. ejus Successoris observari cœpta est Lex Gregorii X. de Novendio interponendo inter Pontificis prioris mortem, & conventionem ad Conclave pro Successoris electione. Id disertis verbis confirmat Jacobus Cardinalis Stefanescus Cælestino V. & Bonifacio VIII. cœvus, & familiaris in Papatu Lib. I. de electione & coronatione Bonifacii VIII. Summi Pontificis, Cap. I. sic inquit.

*Jam veneranda Ducum, Cleri stipata catervis
Turba novum lectura Patrem convenerat aulæ
Regis, & excusso bis quino lumine Phœbi
Lege dato, Proceres obductis marmore valvis
Carcere clauduntur.*

XVIII. Laudatam toties Gregorii X. de Conclavi Constitutionem novo haud dubie munii robore Bonifacius Papa VIII. ubi eam in Sextum Decretalium retulit Lib. I. Titulo V. Capite III. Atque hinc est, quod eo e vivis erepto die XI. mensis Octobris anni MCCCIII. Cardinales Novendialibus primum expletis, Sacrificque die X. nempe XXI. ejusdem mensis rite Spiritui Sancto factis, juxta Constitutionem ipsam Gregorii X. Romæ in Palatio Vaticano, in quo Bonifacius obierat, Conclave ingressi sunt, in eoque postridie, scilicet XXI. ejusdem mensis Nicolaum Bocasium Ordinis Prædicatorum Cardinalem Episcopum Ostiensem, Tarvisii in Lombardia natum in Summum Romanum Pontificem elegerunt, *unico facto, ac publicato scrutinio*, ut ipsemet Pontifex Benedictus XI. appellatus est.

afferit in Litteris encyclicis de sua promotione datis Kalendis Novembris post suam Coronationem, quæ, ut legitur in ms. Codice apud Papebrochium, facta est Dominica proxima sequenti, nempe die xxvi. Octobris. Servatam quoque fuisse eandem de Conclavi Constitutionem in electione Clementis V. in ejusdem Vita Pagius docet, & ante eum varii Scriptores. Benedicto enim XI. die v. Julii anni MCCCIV. Perusii mortuo, dieque x. Missa de Spiritu Sancto dicta, Cardinales in Conclavi se recluserunt ad Successorem ei sufficiendum, suffectusque est Nonis Junii anni MCCCIV. absens extra Collegium Cardinalium Bertrandus de Gotgo Archiepiscopus Burdigalensis, qui fuit Clemens V.

XIX. Is Pontifex jam non modo Comitiorum Pontificalium Constitutionem a Gregorio Papa X. editam confirmavit, & quidem in Generali Concilio Viennensi, sed & nonnulla addidit, seu supplevit, quæ legi possunt in ejusdem Clementinis Lib. I. Titulo III. *De electione &c.* Cap. II. ubi inter alia statuit, Cardinales per exceptionem excommunicationis, suspensionis, vel interdicti, ab electione non repelli: *Ceterum, ut circa electionem prædictam eo magis vitentur dissensiones. & schismata, quo minus eligentibus aderit dissidendi facultas, decernimus, ut nullus Cardinalium cujuslibet excommunicationis, suspensionis, aut interdicti prætextu, a dicta valeat electione repelli: juribus aliis circa electionem eandem hætenus editis plene in suo robore duraturis.* Obiit Clemens V. anno MCCCIV. ut scribit Ptolomæus Lucensis, xi. Kal. Maji in quodam Castro Regis Franciæ, quod dicitur Rochamaura. Cum vero Constitutione Gregorii Papæ X. ab ipso Clemente confirmata cautum esset, ut Cardinales ad eligendum Romanum Pontificem Comititia haberent ubi Papa cum sua Curia residens, causarumque, & Litterarum Apostolicarum Audientiam habens mortuus fuerit; defuncto Clemente apud Roccamauram, Carpentoracte convenerunt, quia scilicet tunc Curia ea in Civitate residebat.

XX. Testatur id quidem Bernardus Guido in Chronico Romanorum Pontificum; sed tamen Conclave ibidem coactum, dissolutum fuit, quod nempe Cardinales Vascones non valentes eligere Papam Vasconem, & multa præterea, in ea inclusione incommoda patientes, eo quod cibaria eis subtraherentur, & domus eorum dissiparentur, post trium circiter mensium inclusionem hæc non ferentes, die xxiv. Julii, ut scribunt Cardinales Italici in Epistola encyclica de incendio Urbis Carpentoractis, Valentis die viii. Septembris data apud Baluzium Tomo II. Pag. 286. ignem in Palatio Carpentoractensi, ubi constitutum fuerat Conclave, posuerunt, quo incensa est magna pars Civitatis, sicque ad diversa loca dispersi sunt; tandemque anno Christi MCCCXVI. post multas dissensiones, Conclavi in Lugdunensi Civitate coacto, ibidem die vii. Augusti, concorditer, & unanimiter Jacobum de Ossa, seu potius de Eusa in Romanum Pontificem elegerunt, qui dictus est Joannes XXII. uti videre est apud ejusdem Pontificis Vitæ Scriptores. Porro post Joannis obitum, qui contigit die iv. Decembris anni MCCCXXXIV. celebratis de more Novendialibus, Cardinales numero xxiv. Idibus Decembris a Comite Novalio Roberti Siciliæ Regis Senescallo, hoc est,

Præfecto Provinciæ, in Palatio Avenionensi, in quo Joannes decesserat, inclusi, Jacobum Furrerium Cardinalem Tituli S. Priscæ die xx. Decembris anni ejusdem MCCCXXXIV. Romanum Pontificem renunciarunt, fuitque is Benedictus XII. Atque hæc constant ex tertia hujus Pontificis Vita apud Baluzium, & apud Villanum, Lib. xi. Cap. xxi. errantque Bzovius, Ciaconius, & Spondanus, qui eum electum scribunt in Cœnobio Dominicanorum, ex eo decepti, quod in ipso Cœnobio coronatus fuerit, uti notat Pagius in ejusdem Pontificis Vita.

XXI. Diem suum clausit extremum Benedictus Avenione die xxv. Aprilis anni MCCCXLII. celebratisque de more Novendialibus, ibidem, ubi mortuus est, Conclavi coacto, die v. Maji Cardinales in eo reclusi, die vii. ejusdem mensis ante Vigiliam Ascensionis concordia mirabili Petrum Rogerium Presbyterum S. R. E. Cardinalem SS. Nerei & Achillei Titulo Fasciolæ in Summum Pontificem elegerunt, qui Nomen sibi Clementis VI. assumpsit. Hic Pontifex Gregorii XII. Constitutionem aliquantulum laxavit, nova edita Constitutione, quam infra hoc Titulo legere est in §. xiii. quamque nos in ejusdem Commentario fusc enarrabimus. Ceterum licet obeunte Romæ Pontifice, in Apostolico Palatio, ut ait noster §. Conclave sit construendum, constat nihilominus, tum Eugenium Papam IV. anno Christi MCDXXXI. tum ejus Successorem Nicolaum V. anno MCDXLVII. electos fuisse in Conclavi, quod paratum fuerat Romæ in Cœnobio Sanctæ Mariæ super Minervam Fratrum Ordinis Prædicatorum, uti videre est apud Ciaconium, & apud alios passim Scriptores, qui Vitæ laudatorum Pontificum narrant. Extantque hodie electiones ipsæ pictura expressæ supra interiorem Sacrii portam ejusdem Cœnobii cum hujusmodi inscriptione.

MEMORIÆ CREATIONIS HIC HABITÆ

SUMMORUM PONTIFICUM

EUGENII IV. ET NICOLAI V.

Porro quod electionem Eugenii IV. Papæ spectat, rem ita narrat in ejus Vita Ciaconius: *Missa Spiritus Sancti ab Episcopo Albano cantata, Cardinales xiv. qui tunc in Urbe erant, Conclave ingressi sunt paratum in Sacratio S. Mariæ super Minervam Ordinis Prædicatorum. Fuit septa platea super Minervam usque ad plateam Rotunda.* Præter Ciaconium etiam Spondanus, alique ajunt, electum fuisse Eugenium a xiv. Cardinalibus, sed, ut notat Oldoinus ad ipsum Ciaconium, rectius tradit Panvinus, renunciatum fuisse Eugenium Romanum Pontificem a tredecim Cardinalibus. Ciaconius enim inter alios Cardinales Electores recenset Fr. Angelum de Anna Episcopum Cardinalem Prænestinum, qui tamen duobus fere annis ante jam e vivis excefferat, ut idem Oldoinus in Vita ejusdem Cardinalis refert.

XXII. Sed hoc obiter notato, anno ipso MCDXLVII. quo obiit Eugenius IV. *decima post ejus obitum die, quæ fuit Sabbati, quarta Martii, Cardinales duodeviginti,* ut docet doctissimus Georgius in Vita Nicolai V. *a Vaticana Basilica in Aedes Fratrum Ordinis Prædicatorum ad S. Mariæ supra Minervam Sacra Comititia celebraturi processerunt;* ibique paulo post elegerunt in Summum Pontificem Thomam de Sarzana Oppido Lunensis agri exiguis parentibus na-

na-

natum ab Eugenio IV. Cardinalem creatum Tituli S. Susannæ Virum doctrina & omni ferme scientiarum, ac Christianarum virtutum genere insignem, qui Nomen Nicolai V. suscepit ob memoriam præclarissimi S. R. E. Cardinalis Tituli S. Crucis Nicolai Albergati, cujus acta ac gesta egregia in lucem edidit amicus noster præstantissimus Constantinus Rugerius Bibliothecæ Imperiali Præfectus; fuerat enim Nicolaus V. dum esset adolescens inter Albergati domesticos, a quo etiam prædicationem aliquando Pontificatus Summi acceperat, ut docet Spondanus ad annum MCDXLVII. Num. II, alique varii ejus Vitæ Scriptores.

XXIII. Ceterum cum ex variis Apostolicis Romanorum Pontificum Decretis, ut supra in hoc Commentario ostendimus, ubi Pontifex Romanus moritur, ibi Comititia fieri debeant, si quis forte sciscitetur, cur Cardinales in electione Eugenii IV. & Nicolai V. creatione Minervitanum Cænobium Ordinis Prædicatorum elegerint; id plane ex Ænea Sylvio, qui fuit postea Pius Papa II. in Oratione ad Fridericum III. discimus: *Quia nimirum*, ut ex memorato Auctore laudatus Georgius docet in ipsius Nicolai V. Vita, anno Domini MCDXLVII. Num. II. *tunc Vaticanæ Pontificum Aedes minus tutæ ob Procerum Romanorum, plebisque motus videbantur. Itaque ab eorum insidiis Cardinales cavendum rati, nequa vis fieret, & nequa ideo suspicio ob schismaticorum proterviam de legitima electione suboriretur, alio Comititia celebranda, tutioremque locum deligendum curarunt. Comitium ingressi, in illud statim inclusi sunt, ac ostium primum quatuor Antistitibus custodiendum traditum, ostium secundum Oratoribus Regum, inter quos erat ipsemet Æneas Sylvius, tum Friderici Caesaris Ablegatus, ut ipse tradit.* Scite mox illud idem Georgius subdit, id mirum quidem non esse, nam mos erat, uti nos inferius dicemus ex nostro hoc Cæremoniali, & aliis veteribus monumentis, ut ostii secundi custodia Oratoribus Principum demandaretur.

XXIV. Reliquum est, ut ea enarremus, quæ de Conclavi noster hic primus §. docet in fine: *Is locus*, inquit, *continet Aulas superiores duas, sive tres, & Sacella duo, & ita undique firmis repagulis, muroque clauditur, ut ostia nulla, fenestræ nullæ, nisi altissima, exitus nullus, introitus tantum unus supersit.* Certe Gregorius X. in sua Constitutione, quam de Conclavi edidit Canone II. Concilii II. Œcumenici Lugdunensis, inter alia edixit, ita illud claudendum undique, *ut nullus illud intrare valeat, vel exire*; itemque, *ut nulli ad eosdem Cardinales aditus pateat, vel facultas secreta loquendi cum eis &c.* Antiquum morem clausuræ ipsius Conclavis diserte enarrat in Ordine xv. Romano, Cap. cxlix. Petrus Amelius, ubi inter alia edicit, *ut caveat bene Camerarius, quod portæ murentur, & omnes fenestræ, quæ sunt bassa prope terram, vel solarium ad minus ad quatuor eannas, & omnia foramina quacumque parva, vel modica expensis Camera.* De Sacellis in Conclavi juxta §. nostri præscriptum erigendis testis est idem Amelius, qui tamen citato loco longe antequam nostrum hoc Cæremoniale ordinaretur ab Augustino Patricio, ita de unius Sacelli, seu Capellæ, meminit, inquit: *Item sit una Capella, cujus portæ & fenestræ om-*

nes sint clausæ de bono muro, demta porta, qua itur ad Conclave, & fenestris, quæ intra Conclave respiciunt, quæ aperta remaneant.

XXV. Pergit Amelius, aliaque de ipsa Capella recenset, quæ hic describere operæ pretium duximus: *In hac Capella*, inquit, *omni die Cardinales Missam debent audire omnes insimul, non tamen cantando, sed basse.* Item si non sit Capella, quæ Conclave contingat, fiat infra Conclave in aliquo angulo, vel pro Conclavi unum Altare portatile, & ibi audiunt omni die Missam; & in eadem Capella possunt convenire ad eligendum, & faciendum Concilium, vel ubi placebit eis melius. Tum etiam mox: *Item in dicta Capella semper debet esse Corpus Christi cum candela accensa ad omnem eventum, quam solvit Camera, & omnes alias, candelas scilicet cereas, quæ in dictis Missis consumuntur ibidem Sede vacante.* Sed nec omitendum quod deinde inferius tradit de ipsa Capella, & Clerico eidem inserviente, sic inquit: *In Conclavi autem unus Clericus audientia, qui servit Capellæ, in Capella dicens Epistolas, intret, & scribat omnia, quæ sunt de die in diem, & ordinet omni die de Missa dicenda coram Cardinalibus, & teneat unam lampadem accensam in Capella, & aliam in medio Conclavis, & custodiat paramenta, Calicem, Librum, & Chlamidem S. Petri cum Mitra Consistoriali.*

XXVI. Porro in Palatio Vaticano, ubi ex antiquo more Conclave construi solet, duo extant Sacella, quorum alterum Sixtinum a Sixto Papa IV. qui illud construi fecit, dictum est, alterum vero Paulinum, quod olim Nicolai Papæ, nunc Paulinum a Paulo Papæ III. qui illud instauravit, vocant, ut inquit Apostolicus Cæremoniarius Franciscus Mucantius in suo ms. Diario, ubi enarrat gesta Gregorii Papæ XIII. qui S. Pio Papæ V. successit anno MDLXXII. Sacellorum Sixtini, & Paulini meminit in Diario suo ms. Joannes Paulus Mucantius enarrans acta Sedis vacantis post obitum Sixti V. aitque, Cardinalem Gefualdum suppletem vices Cardinalis S. Georgii Decani adhuc convalescentis, & debilis propter infirmitatem, *in dicto Sacello Paulino celebravisse Missam lectam de Spiritu Sancto, in qua Communionem præbuit omnibus Cardinalibus*; fere, inquit, *nam hac die, vili. scilicet Septembris, nonnulli Cardinales Presbyteri devotionis causa Festum Nativitatis Beatæ Mariæ Virginis celebraverunt in Sacello Sixti IV. in quo ultra Altare solitum quatuor alia Altaria ad commoditatem, & usum Reverendissimorum Dominorum Cardinalium, & Conclavistarum celebrare volentium erecta fuerunt.* Adit deinde, majorem Cardinalium partem e manibus Cardinalis prædicti celebrantis Communionem sumsisse, Presbyteros cum Croceis, & Stola desuper a collo pendente; Diaconos vero cum Stola a collo pendente, sed super humerum sinistrum more Diaconali. Sed de his dicemus fusius infra opportuniore loco. De ipsa autem Capella Paulina, ita dicta, quod, uti jam notavimus, Paulus Papa III. eam instauravit, fuse differit inter alios eruditus Augustinus Taja Senensis in Opere suo posthumo Italico idiomate scripto, cui Titulus Latinitate donatus, est, *Descriptio Palatii Apostolici Vaticani*, pag. 66. & pluribus seqq. editumque est Opus ipsum Romæ hoc anno mpccl. penes Palearinos.

§. II.

Descriptio Romani Conclavis.

Dum igitur Pontifici defuncto iusta peraguntur, Camerarius Sanctæ Romanæ Ecclesiæ, & qui (1) Apostolicæ Camera præsumt, curam instruendi, ornandique locum (2) Conclavis diligenter gerant: ad quem adscensum, aditumque unum tantum dimittant, quæ ad S. Petrum per januam in principio primæ Aulæ meridiem versus descenditur. In ipsa prima Aula, quæ Regia appellatur, eo quod ibi publica Consistoria pro Regibus, Regiisque Legatis suscipiendis celebrari solent, fenestræ, portæque omnes muro, calceque (3) firmentur, præter illas, quibus ad Sacella, & ad secundam Aulam itur. Porta prima in principio Aulæ ferreis vestibibus, & seris (4) quatuor muniatur. In medio porticulum habeat, quo esculenta, & poculenta clausis Patribus (5) ministrentur. In angulo ad sinistram intranti camerula aperiatur pro latrinis, quæ nullum exitum, nullamque habeant fenestram: in ea sedulo ardeant lampades, ibique Cæremoniæ Ministri dormiant. In Sacello, sive Capella minori ad dexteram, quæ (6) Divo Nicolao dicata est, convenient Patres ad Divina peragenda, & ad electionem celebrandam. In majori Capella ad sinistram parentur cellulæ pro Patribus tot quot sunt numero Cardinales electioni interfuturi. In capite hujus Capellæ ad (7) sinistram intranti Camera sunt, in quibus Sacrista Palatii Apostolici habitat: harum prima pars, quæ latrinas habet, pro Conclavi reservetur; cetera omnia muro claudantur, itaut tenebrosa fiat pars illa; & ideo, ut de prima camerula diximus, lampadibus accensis continue illustretur. Cellulæ in ipsa Capella majori hinc inde constituantur non muro, aut materia distinctæ, sed cortinis lineis, aut laneis tenuioribus separata. Eriguntur namque ipsæ cellulæ (8) lignis quaternis a superiori parte, a quibus cortinæ dependent, firmaneturque ipsa tigna aliis tignis transversis itaut locus non maculetur; & inter cellulam, & cellulam spatium dimittitur palmi, vel circa. Famuli Cardinalium, ut primum distributio cellularum facta est, illas ornare properent, quæ per literas alphabeti signantur. Inde non ordine, sed sorte Patribus distribuuntur pridie, quam ingrediantur Conclave; ut cortinis, lectis, & opportuna suppellectile in tempore possint ornari. Locus ipse Conclavis ita undique claudendus, ac muniendus est, ut aditum nullum, nisi unum tantum, ut diximus, (9) habeat, nemoque inclusos alloqui, videre, seu quippiam ad eos clam mittere queat. Sed advertendum est maxime, ne supra, aut infra, sive a lateribus habitationum Conclavis ire, stare, habitare quispiam possit, ne voce, signo, sono, aut aliquo alio ingenio perscrutari quæ intus fiunt (10) valeat.

C O M M E N T A R I U S.

I. **P** Lura sunt, quæ in hoc §. statuuntur, ac primo quidem, ut dum Pontifici defuncto iusta peraguntur, Camerarius Sanctæ Romanæ Ecclesiæ, & qui Apostolicæ Camera præsumt, curam instruendi, ornandique locum Conclavis diligenter gerant. Camerarius antiqua Dignitas est in Palatiis Regum, cui Camera Regiæ, idest, Thesauri, seu Cimeliorum Regis cura incumberebat. Ejus apud Galliæ Reges munus sic describit Hincmarus Remensis de ordine Palatii, Cap. xxii. De honestate vero Palatii, seu specialiter ornamento regali, necnon & de donis annuis militum, absque cibo, & potu, vel equis, ad Reginam præcipue, & sub ipsa ad Camerarium pertinebat; & secundum cujusque rei qualitatem, ipsorum sollicitudo erat, ut tempore congruo semper futura prospicerent, nequid, dum opus esset, ullatenus opportuno tempore de-

To. I.

fuisse. De donis vero diversarum legationum, ad Camerarium respiciebat, nisi forte jubente, jubente Rege tale aliquid esset, quod Reginæ ad tractandum cum ipso congrueret. Meminit ejus officii jam longe ante Hincmarum Gregorius Turonensis Lib. iv. Historiæ Francorum, Cap. xxvi. ubi loquens de Hariberto Rege, qui Hemerium a Leontio Episcopatu dejectum restituit, sic inter alia inquit: Et statim directis V. ris Religiosis, Episcopum in loco restituit, dirigens etiam quosdam de Camerariis suis, qui exactis a Leontio Episcopo mille aureis, reliquos juxta possibilitatem condemnarent Episcopos. Hinc patet, apud Francos non unicum fuisse in Palatio Camerarium, sed plures, nisi illi fuerint Camerarii Provinciarum, quos etiam Franci Nuncios Camera appellabant, uti pluribus docet Dufresne in suo mediæ & infimæ Latinitatis Glossario.

B

II. Fue-

(1) Ita in editione Romana hujus Cæremonialis anni 1560. in Veneta vero anni 1516. & Colonienfi anni 1557. deest, Apostolica. (2) Ita quoque in dicta Romana editione, deest tamen in aliis citatis. (3) Ita in Veneta, & Colonienfi, in Romana legitur, ac cemento. (4) In Romana legitur, & clausuris. (5) Ibidem, subministrentur. (6) Ibidem ita legitur: quæ Paulina appellata est. (7) Ibidem legitur, ad dexteram. (8) Ibid. lignis. (9) Ibidem legitur, habere possit. (10) valeat deest in editione Romana.

II. Fuerunt & olim in Regno Siculo, & Neapolitano Camerarii Provinciarum, qui Fiscalium reddituum curam habebant, qui in Cameram, seu Fiscum inferebantur. Hinc legere est apud Hugonem Falcandum *Camerarios Calabria, Apulia, &c.* testisque est Romualdus Salernitanus Archiepiscopus in Chronicis suis ad annum MCXLIII. quod *Rex Rogerius in Regno suo perfecta pacis tranquillitate potitus, pro conservanda pace Camerarios, & Justitarios per totam Terram instituit.* Teste eodem Falcando, inde redemptionis onus importabile, quæ totam Apuliam, Terramque laboris ultima jam desperatione concusserat, omnino censuit amovendum; scripsitque Magistris Camerariis, ut a nemine deinceps quicquam nomine redemptionis exigent. Meminit & Petrus Diaconus Lib. IV. Cap. CIV. *Canzolini Capuani Principatus Camerarii*; viderique præterea possunt Constitutiones Siculæ, Lib. I. Titulo XV I. XXXV I. XL I. & aliis sequentibus, itemque Historia Longobardorum Camilli Peregrini, pag. 254. ubi plura de Officio Camerarii, seu Magistris Camerarii tradit. Porro, ut idem Dufresne adnotavit, Camerarii ejusmodi iidem videntur, qui sub secunda Regum Francorum Stirpe *Nuntii Camera* appellabantur, quibus Provinciarum, & Urbium, quæ ad Fiscum Regium, *Cameram* dictum proprie spectabant, cura demandabatur, erantque veluti Procuratores Fisci in iis Provinciis, & Urbibus, eorumque cum Ducibus æquata habebatur potestas: sic appellati, quod a Camera Regia, seu Camerario Regio in Provincias mitterentur, essentque quasi *Missi Camera.*

III. Rursus fuit antiquitus Camerarii dignitas non modo in Ecclesiis Cathedralibus, uti nos docent Statuta Ecclesiæ Londinensis in Monastico Anglicano Tomo III. pag. 340. sed officium quoque Monasticum fuit, cujus meminit eruditus Altaferra Lib. IX. *Originum rei Monastica*, Cap. X. Describitur autem officium ipsum in Libro Ordinis S. Victoris Parisiensis, Cap. X. his verbis: *Ad officium Camerarii pertinent omnes census, & redditus Monasterii, sive de villis, sive de terris, sive de molendinis, sive de aliis rebus quibuslibet, ut ipse eos tempore statuto & perquirat, & recipiat. Horrea etiam, & aratra, & terra arabiles, & cetera cultura Monasterii, necnon & pecora, & omnes nutritura communes ad ejus curam spectant, ut ipse provideat, quæ in his omnibus instaurandis, & exercendis, sive conservandis necessaria sunt &c.* Teste Lanfranco in Decretis pro Ordine S. Benedicti, cujus verba affert in citato Glossario landatus Dufresne, *Camerarii est, procurare omnia vestimenta, & calceamenta, & lectos, & stramenta lectorum &c.* His adde Statuta antiqua Abbatie Corbejensis Lib. II. Cap. I. antiqua Statuta Cluniacensium, in quibus Hugo Abbas inter alia statuit, *ut unaquæque Provincia unum, aut duos habeat Provisores, quos Camerarios appellamus.* Nec omittenda sunt quæ de iisdem Camerariis habent Udalricus in Consuetudinibus Cluniacensibus, Lib. III. Cap. XI. Eckehardus junior de casibus S. Galli, Cap. V. Petrus Venerabilis Lib. II. *De miraculis*, Cap. XXV. Monasticum Anglicanum Tomo I. pag. 148. Browerus in Annalibus Fuldensibus, Lib. I. Cap. XI. & alii, qui etiam & Subcamerarii mentionem faciunt, cui scilicet in Monasteriis Camerarii, eo absente, fungi munere

incumbebat, ut & custodia cellarii, granarii, & horrei, & stabuli, atque illi observare, ut est in Libro Ordinis S. Victoris Parisiensis, Cap. X.

IV. Quod Camerarium Apostolicum spectat, seu Sanctæ Romanæ Ecclesiæ, de quo loquitur nostrum Cæremoniale, ille dicitur, qui pecuniarum, & thesauri Ecclesiæ Romanæ curam gerit. Id officii institutum fuisse sub S. Gregorio VII. qui anno Christi MLXXXIII. Summus Pontifex renunciatus fuit, Archidiaconi extincto nomine, tradit eruditissimus Panvinus, aliique Auctores, quos citat, ac sequitur Cohellius in Notitia Cardinalatus, Cap. XXXIX. Committi consuevisse vel olim Camerarii munus in Romana Ecclesia Cardinali, addiscere plane licet ex Epistola Decretali Innocentii Papæ III. relata in Capite, *Ad audientiam XIIII. De præscriptionibus*, ubi ita inquit: *Considerantes etiam Librum Censualem, quem non suspectum habuimus, licet non in nostra, sed in Cardinalis Sancti Hadriani Camera sit inventus, qui eum quando Camerarius fuerat, de Camera Beati Petri suscepit.* Inter S. R. E. Camerarios celebris extat memoria Cencii Sabelli, qui uti ex ejus Actis apud Ciaconium, & aliis Scriptoribus constat, munere Camerarii S. R. E. functus sub Cælestino Papa III. ab eodem Diaconus Cardinalis Titulo S. Lucie in Silice creatus est, ac deinde ab Innocentio III. Presbyter Cardinalis SS. Joannis & Pauli Titulo Pammachii; defuncto autem Innocentio, eidem in Pontificatu successit anno MCCXVI. dictusque est Honorius III. de quo ita scribit in suo Chronico Abbas Urspergensis: *Successit Honorius III. qui prius fuerat Cencius nominatus, fueratque Camerarius Cardinalium, & pecunias ipsis collatas inter eos fideliter, & provide distribuebat.* Hic porro ob egregiam in Camerarii officio præstatam operam appellatus jam passim a Scriptoribus fuit Cencius Camerarius, qui etiam, ut post Panvinium testatur Baronius ad annum MCXCII. rebus temporalibus Romanæ Ecclesiæ consulturus, aggressus est opus valde utile, & census, qui tunc Romanæ Ecclesiæ a diversis persolvebantur, cum singulorum publicis instrumentis in unum corpus redegit, quod Liber Censuum inscribitur; ac Librum quoque Ritualement, seu Cæremonialement descripsit, in quo, ut ait Panvinus, *sanctæ illius, & venerandæ vetustatis puritas, & sinceritas, atque Romanæ Ecclesiæ in tractandis Sacris, & re divina celebranda, summa cura, & observantia inspicitur.* Atque hunc Librum una cum aliis Romanæ Ecclesiæ Ritualibus inseruit doctissimus Mabillonius Tomo II. Musei Italici, estque Ordo Romanus XII.

V. His obiter notatis, post extinctam alias magnæ potestatis dignitatem Cardinalis Archidiaconi, cum Papa occupatus in cognitione causarum Consistorialium, ac etiam aliarum, quas in Capella cum Capellanis cognoscebat, vacare, non posset administrationi ejus Cameræ, seu Fisci, & cognitioni causarum Fiscalium, quam cum aliquibus Clericis habere solebat: hinc, uti post alios notat Cardinalis de Luca Parte II. Relationis Romanæ Curie, Discursu XI. ejusdem Cameræ administrationem, seu præfidentiam una cum dictis Clericis commisit Cardinali, qui Camerarius proinde appellari consuevit. Verum paulatim iste Officialis juxta rerum, ac temporum contingentias ob Papæ commissiones antiquam

tiquam Archidiaconi potestatem pene in omnibus reassumit, præsertim circa temporale regimen immediatum Urbis, atque Districtus; ac etiam circa mediatum regimen Ditionis temporalis, seu Status Ecclesiastici in causis appellationum, vel recursuum: quinimo ejus auctoritatem extendere cœpit etiam in cognitione causarum profanarum Fori Ecclesiastici in gradu appellationis, vel recursus ab Ordinariis Locorum, & a Metropolitanis, quas Papa in Consistorio, vel respective in sua Capella, cognoscere nolebat, utpote leviores, vel criminales, in quibus ipse Camerarius speciem Vicarii Papæ gerere videbatur; cumque omnibus per se ipsum vacare non posset, hinc aliquos deputare cœpit Adjuutores, & Officiales subordinatos, & præsertim pro cognitione causarum appellationum, vel recursuum undique etiam extra temporalem Ecclesiæ Ditionem venientium, habebatque Auditorem, qui dicebatur Cameræ, idest, hujus Cardinalis Camerarii Auditor; itemque pro immediato regimine temporali Urbis, ejusque Districtus, alium habebat Ministrum, seu Adjutorem, cui ad differentiam Auditoris dabatur nomen Vicecamerarii, & Gubernatoris Urbis, quod adhuc hodie retinet; prout etiam pro conservatione pecuniarum Cameræ, & administratione negotiorum ejusdem, sive pro quibus Clericorum judicium, seu votum exquirere non videbatur adeo necessarium, Ministrum quoque alium habebat, cui dabatur Thesaurarii nomen, quod hodieque retinet, aliosque habebat Ministros, & Officiales; quinimo, ut nonnulla antiqua mss. Diaria docent, idem ipse Camerarius officium quoque Datarii quandoque exercere consuevit.

VI. Verum eadem ratione, qua dignitas Archidiaconi suppressa fuit, quia scilicet sua potestate abutebatur juxta notata a nobis Tomo III. Conciliorum in Commentario ad Canonem IV. Concilii III. Lateranensis, Camerarii quoque auctoritas paulatim diminui cœpit. Pontifex siquidem manus apposuit in deputatione Officialium Camerario subordinatorum, nempe Auditoris, Gubernatoris, & Thesaurarii, qui utpote independentes ab ipso Camerario Tribunalia propria erigere cœperunt, cum Papa immediate communicando ea, quæ in gravioribus negotiis occurrebant, adeo ut a Camerario minime dependerent. Atque hinc sequutum est, ut tractu temporis ejus auctoritas restricta sit ad quandam potius honorificam præfecturam Cameræ Apostolicæ, seu Fisci utriusque Principatus, Ecclesiastici, & temporalis, dum actualis administratio juxta hodiernam praxim residet penes prædictum Thesaurarium, & penes ipsum Collegium, seu Tribunal memoratorum Clericorum, de cujus origine, sicut & de aliorum Officialium, qui ad Romanam Curiam spectant, fuse differit laudatus Cardinalis de Luca citata Parte II. Relationis Romanæ Curie, Discursu xxxIII. & seqq. Ceterum licet in pluribus arctata jam sit Cardinalis Camerarii antiqua auctoritas, multæ nihilominus sunt ejus hodieque facultates, quas inter alios recensent idem Cardinalis de Luca in ipsa Relatione Curie Romanæ, Parte II. Discursu XI. & Jacobus Cohellius in Notitia Cardinalatus, Cap. xxxix. ubi inter alia notat, quod alias Cæremoniale præscribit, Conclavis, ubi Pontificis electio celebranda est, con-

To. I.

struendi, & ornandi curam penes Camerarium esse. Pertinere ad ipsum Camerarium munus construendi Conclavis præ ceteris docuit antiquus Ordo Romanus xv. Petri Amelii, qui claruit Seculo XIV. Cap. cxlix. apud Mabillonium Tomo II. Musei Italici: *De Conclavi vero dicendum est*, inquit Amelius, *Primo ordinatione, ac dispositione loci caveat bene Camerarius, quod porta murentur, & omnes fenestra, qua sunt bassa prope terram, vel solarium ad minus ad quatuor cannas, & omnia foramina quacumque parva, vel modica, expensis Camera.*

VII. Ad Conclave quod attinet, jam non ea hodie adamussim servatur structura a nostro Cæremoniali præscripta; non enim idem illud est Vaticanum Palatium, quod olim erat tempore Augustini Patricii, qui Cæremoniale hoc ordinavit, tametsi quod substantiam, ut ajunt, Conclavis spectat, omnia fere hodieque in ejus structura servantur, quæ jam & antiquitus vel ante Patricium in usu erant, ut liquet ex laudato antiquo Romano Ordine xv. Petri Amelii, qui inter alia ait, ut in ipso Conclavi *sit una Capella, cujus porta, & fenestra omnes sint clausa de bono muro, demta porta, qua itur ad Conclave, & fenestris, qua in Conclavi respiciunt, qua aperta remaneant.* Sed hæc jam supra explicuimus. Describendum hoc loco censemus, quod primum de Conclavi, atque ad ipsum aditu tradit Grassus in suo ms. Diario, ubi enarrat Acta Sedis vacantis post obitum Julii Papæ II. sic enim inquit: *Circa diem secundum, aut tertium exequiarum inoeipi designare Conclave, & custodias, & aditum. Primo autem cognovi, tutius esse, quod aditus ad Conclave haberetur per scalas strictiores, quibus a camera plumbi ascenditur ad Aulas Papales, quam si per latiores scalas, quibus itur ad Paradisum, & inde ad S. Petrum, namque illæ sunt strictiores, & secretiores pro omni casu, quam istæ, quæ sunt latiores, & placuit omnibus, quod ego facerem quicquid mihi placeret, prout factum est.*

VIII. Quod primam portam Conclavis spectat in principio Aulæ positam, mandat nostrum Cæremoniale in hoc præsentis §. ut *ferreis vectibus, & seris quatuor muniatur*; additque mox, ut *in medio porticulum habeat, quo esculenta, & poculenta clausis Patribus ministrantur.* De ferreis vectibus istis, ac seris opportunius dicemus inferius; quoad vero porticulum, quod fieri olim in medio portæ primæ Conclavis solitum fuit, testatur in suo ms. Diario laudatus Grassus, proposuisse se Cardinalibus, Sede vacante ob Julii II. Papæ obitum, quod propter multas fraudes, quæ committuntur in aperitione portellæ, quando intro feruntur fercula, bonum esset, quod una Rota apud portam in angulo fieret more Monialium, quod placuit omnibus, & commiserunt, quod fieret omnino cum duabus portis hinc inde, & Custodes unam clavem haberent, & alii Magistri cæremoniarum tenerent. Sed audiamus iterum eundem Cæremoniarum Apostolicum Grassum, qui ipsum Conclave post laudati Papæ Julii constructum direxit, ita de eadem re loquentem, ubi agit de Conclavi, & ad ipsum aditu: *Ante ipsam portam Conclavis fuit una mensa transversa, super qua ponerentur cibaria pro Conclavistis, & nemo ex servitoribus portantibus posset accedere proximior ad portam ipsam. Sed profecto, quantum ego ex usu, & arte co-*

B 2

gno-

gnosco, bonum esset de cetero, quod nulla fieret portella in ipsa porta Conclavis propter multas fraudes, tam verbales, quam actuales, & reales, quæ ibimet ab ipsis Custodibus patrantur, sed quod in angulo aliquo ibi proximo fiat una Rota, sicut habent Moniales in clausuris suis, ex qua cibaria inferantur, absque eo quod aliqui se hinc inde mutuo conspiciere possunt; & etiam quod fiat aliquod repagulum, quod parapectum dicitur, non ex tela linea, seu ex panno, sed omnino ex ligneis tabulis altis, & fortibus, ut nulus ex his, qui intus sunt, accedere ad locum portæ, sive Rotæ, aut videre desuper posset, nisi Magistri Cæremoniarum cum suis famulis. Ita Grassus ex quo originem Rotæ habemus, quæ hodieque fieri in Conclavi solet instar Rotæ Monasteriorum Monialium,

IX. Mandat præterea noster §. ut in angula prædictæ scilicet Aulæ, ad sinistram intranti camerula aperiatur pro latrinis, quæ nullum exitum, nullamque habeant fenestram; in ea sedulo ardeant lampades; ibique cæremoniarum Ministri dormiant. Latrina locus est privatarum sordium & ad exonerandum ventrem accommodatus a latendo dictus, sive potius a lavando, ut docet Varro Lib. II. *De analogia*. Latrinarum Conclavis meminit quidem in suo Cæremoniali Burchardus §. xxxv. itemque nostrum Cæremoniale in hoc eodem §. paulo inferius, ubi loquitur de Capella majore, in quo cellulæ pro Cardinalibus parabantur: *In capite hujus Capellæ, inquit, ad sinistram intranti camera sunt, in quibus Sacrista Palatii Apostolici habitat; harum prima pars, quæ latrinas habet, pro Conclavi reservatur; cetera omnia muro claudantur, ita ut tenebrosa fiat pars illa; & ideo, ut de prima camerula diximus, lampadibus accensis continue illustratur.* Sed audiamus Burchardum citato §. xxxv. sic agentem: *Item prima auleta, & camera prædicta parva Sacrista, in qua paramenta, & Libri Capellæ sunt repositi, dimissa sunt libere pro Conclavi, & latrina in dicta camera existentes, quas Sacrista clausas tenere solebat, apertæ sunt pro usu Cardinalium; omnes aliæ portæ, & fenestræ ibidem fuerunt muratæ.* Tum etiam subdit: *Item in angulo magnæ Aulæ ad sinistram intrantis ruptus est murus pro introitu per cameram ibidem, quam Medicus Papæ inhabitare solebat ad latrinas in cameris ibidem existentes.* Hinc sane, quamquam ex præscripto nostri Cæremonialis, cujus Auctor est Augustinus Patriarchus sub variis Pontificibus Apostolicarum Cæremoniarum Præfectus, in ipsis latrinis Conclavis dormire deberent ipsi Cæremoniarum Ministri, testatur nihilominus in suo ms. Diario Paris de Grassis, in Conclavi post obitum Julii II. constructo parare se quidem fecisse antiquo more latrinas, in iisque mansisse Medicum cum lecto suo: *Latrinas, inquit, more antiquo parare feci, ubi unicus Medicus mansit cum sua lectica.* Addit tum etiam illud, quod nempe deinceps melius, curatiusque custodiantur, & observentur, nam postea intellexi, ibi multos Conclavistas habuisse secreta colloquia cum diversis extrinsecus manentibus.

X. Docet hæc in citato suo ms. Diario Paris de Grassis, qui etiam locum suæ habitationis, ubi cum socio suo Cæremoniarario mansit, ita describit: *Nos duo, Magistri scilicet Cæremoniarum, habuimus cameram Officialium portæ fer-*

reæ, ubi dormivimus, & mansimus pro quiete, & diversorio nostro. Fecimus etiam cortinas ex saria violatas per longum aulam ante portam Conclavis, & per transversum capientes tantum spatium, quantum esset usque ad portam cameræ nostræ, intra quod spatium erat lectus, ut dixi, & ibi nostra mensula, ubi comedebamus, & conservabamus fragmenta eduliorum, & vini in duabus buttis, Quod ait hic Grassus de mensula, & de reliquiis cibi, ac vini in duobus vasis feruatis, vasa enim buttæ significant, uti videre est apud Dufresne, supervacaneum profecto est, in huiusmodique levitates non semel idem Auctor in suis mss. Diariis lapsus est, unusque ipse ex illis esse videtur Apostolicarum Cæremoniarum Magistris, quos in Diario suo ms. carpit eruditus Franciscus Mucantius, Apostolicus & ipse Cæremoniararius sub Gregorio Papa XIII. referens enim gesta hujus Pontificis dolet primum, quo aliqui suorum prædecessorum multa præter rem suis scriptis admiscuerint, sæpe etiam quæ fuerant memoranda, tacuerint, & integros Pontificatus silentio præterierint, aut per eos aride nimis & sicco pede pertransierint &c.

XI. Notato hoc obiter, pergit nostrum Cæremoniale, edicitque in hoc eodem §. ut in Sacello, sive Capella minori ad dexteram, quæ Divo Nicolao dicata est, convenient Patres ad Divinam peragenda, & ad electionem celebrandam. Capellam istam, sive Sacellum, olim S. Nicolao dicatum, de quo sæpe Cæremoniale hoc nostrum loquitur, fuisse deinde dictum Paulinum, a Paulo III. qui illud instauravit, jam supra notavimus, testimonio laudati Francisci Mucantii, qui etiam in citato suo ms. Diario ait, ipsum Sacellum dictum fuisse olim Nicolai Papæ. In ipso Sacello consuevisse Cardinales, ubi scilicet Conclave in Palatio Vaticano esset constructum, & Divina peragere, & electionem novi Pontificis celebrare, & Apostolici Cæremoniararii in suis mss. Diariis, & alii Auctores de Conclavibus, electionibusque Summorum Pontificum tractantes, passim affirmant; inter quos Auctor Commentariorum Pii Papæ II. Libro I. ubi agit de Conclavi in Apostolico Vaticano Palatio constructo post obitum Callisti III. qui contigit anno mcdlv. postquam dixit, duo ibidem fuisse Sacella, & in majore cellas, in quibus Cardinales edarent, dormirentque, ita statim subjicit: *Minus, quod S. Nicolai appellatur, consultationi, electionique Pontificis asservaverunt.* Atque huc spectat quod in suo ms. Diario scribit Franciscus Mucantius de electione Gregorii Papæ XIII. *Eadem die, nempe xiiii. Maji anni mclxxii. circa horam xxiiii. admirabili omnium Patrum consensu Reverendissimus Dominus Vgo Boncompagnus Bononiensis Presbyter Cardinalis S. Sixti præoccupatus, deductus fuit ad dictum Sacellum Paulinum; quo clauso, absque mora cuncti Reverendissimi Domini Cardinales unanimes eandem elegerunt in Summum Pontificem.*

XII. Constat autem ex recitata loco Commentariorum Pii Papæ II. institutum esse antiquum, id quod nostrum Cæremoniale deinde præscribit, ut nempe in majori Capella ad sinistram parentur cellulae pro Patribus tot quot sunt numero Cardinales interfuturi. Aucto Cardinalium, & Conclavistarum, ut ajunt, numero, alibi hodie, & in diversis Palatii Vaticani locis cellulae ipsæ construuntur, angusta scilicet cubi-

cubicula, lignea materia fabrefacta, laneisque vestibis conteſta, deſcripta jam olim ab Ænea Sylvio in Oratione ad Fridericum III. Imperatorem inter Miscellanea Baluzii Tomo VII. ex quo tamen docemur, nondum eo ævo, anno ſcilicet MCDXLVII. morem invaluiſſe conſtruendi cellulas ligno. Sic enim ſcribit de Conclavi, in quo, anno ipſo MCDXLVII. electus fuit Nicolaus Papa V. *Cellulas non ligno, ſed panno claſas habent.* Quando primum cellulae fieri ex lignis cœperint, jam nos alibi abunde explicuimus.

XIII. Quod Cardinalium cellulas ſpectat in ipſo Conclavi conſtruendas, mandat proſecto noſtrum Cæremoniale, ut *cellula in ipſa Capella majori hinc inde conſtituantur, non muro, aut materia diſtinſta, ſed cortinis lineis, aut laneis tenuioribus ſeparata.* Tum vero etiam mox addit: *Eriguntur namque ipſæ cellulae lignis quaternis a ſuperiore parte, a quibus cortina dependeat, firmaturque ipſa tigna aliis lignis tranſverſis, itant locus non maculetur, & inter cellulam, & cellulam ſpatium dimittitur palmi, vel circa.* Plura de his cellulis dicemus mox infra in eodem hoc Commentario, ubi inter alia docebimus, quando primum cellulae iſtæ Conclavis fieri cœperint ex tabulis ſubtilibus. Certe anno MCDXLVII. in Conclavi poſt obitum Eugenii Papæ IV. in Cœnobio Minervitano erecto, teſte Ænea Sylvio in Oratione ad Federicum III. Imperatorem, Cardinales *cellulas non ligno, ſed panno claſas habebant. Parietes omnes lanei; audire quicquid inter ſe agatur, poſſunt &c.* Porro tigni, ut habet alia editio nomine omne genus materiei, ex qua ædificia conſtant, continetur, ex Ulpiano in Lege 1. ff. *De tigno injuncto*; & in Lege, *Tigni*, ff. *Ad exhibendum*; ſignificat tamen hoc loco trabem qua varie diſpoſita domuncula extruitur, & proprie cui ſuperponitur teſtum, a tegendo nomen deductum. Teſte Burchardo in Cæremoniali, nbi agit de Conclavi erecto poſt obitum Sixti Papæ IV. §. LXXV. *In Capella majori ab una parte erecta erant cellulae tredecim pares a muro Altaris ad murum oſtii totum comprehendentes totidem ab alia parte ex regulis fortibus, ſive trabicellis parvis compoſitæ. Inter cellulam erat palmus & ſemis, vel minus, & in medio deambulatorium latitudinis duarum canarum, vel circa ab oſtio Capella uſque ad Altare majus. Porta cancelli intermediæ amota fuerunt, & ſubtus Altare majus ejusdem Capella reſpoſita. In qualibet camera erecta fuit lectica, ana ex tabulis novis conclavata altitudinis quatuor palmorum, latitudinis ſeptem, & longitudinis undecim, vel circa, & una banca.* Lectica hic idem eſt, ac lectus, de eaque voce videri poteſt Duſrefne in ſuo Gloſſario. Sed perſpicuum eſt, quod ſcribit Graſſus in ſuo ms. Diario: *Poſuimus, inquit, in angulo apud portam unam lecticam, ubi dormiebat ipſe meus coadjutor ſupernumerarius cum duobus ſamulis noſtris.*

XIV. Rurſus eodem teſte Burchardo loco citato, *cellulas hujusmodi, ſive cameras, ut ſupra dictum eſt, Cardinalibus diſtributas ſervitores ſingulorum ſingulas ornaverunt ab extra circumcirca, & ſupra ex ſargia quidam rubea, alii viridi, alii alba, alii mixta, & in eis, qua pro uſu Reverendiſſimorum Dominorum Cardinalium ſuorum neceſſaria, & opportuna erant, portari fecerunt.* Sargia genus panni eſt, de quo idem Duſrefne in ſuo Gloſſario plura adnotavit.

Sed vocibus hiſce omiſſis, audiamus nunc Paridem Graſſum, qui de cellulis ipſis multa nos docet, ubi in ſuo ms. Diario enarrat Conclave poſt Julii II. Papæ obitum erectum, Capite inſcripto, *De ſtruttura & forma cellularum.* Sic autem inquit: *Longitudo omnium illarum fuit æqualis, videlicet hinc inde a parietibus uſque ad liſtas albas marmoreas, quæ ab oſtio magno ducuntur uſque ad cancellos; latitudo fuit æqualis, itant unaquæque eſſet palmorum undecim cum una, quaſi parte alterius; altitudo fuit judicio meo nimis brevis, cum potuerit eſſe multo amplior, ex quo nemini præjudicialis; ſed erat in tecto ſingulorum quaſi una fenestra, quæ funiculo aperiebatur, ut lumen reciperetur; ab una ad aliam erat quaſi limes vacuus quatuor digitorum, nec plus, & oſtia ſingulorum cellarum ab utraque parte ſic poſita, ut non eſſent oppoſita, ne cum unus ex cella hinc exiret, poſſet videri ab alio, qui ex cella hinc exiret. Retro verſus parietem cellarum ab utroque latere tantum ſpatii ultra cortinas dimittebatur, ut ibi eſſet locus latrina, & locus dormiendi pro Conclaviſtis, & locus ſupelleſtilium.*

XV. Præterea, ut idem Graſſus nos docet, *coopertura cellarum erant pro conſanguineis Pontificis deſuncti, & pro palatinis, & alumnis ejus ex colore volaceo, pro aliis vero Cardinalibus viridi, & omnes ex ſtria unius qualitatis, nec una precipior quàm alia.* Puto equidem, ab hoc Conclavi poſt Julii II. Papæ obitum conſtituto, cœpiſſe primum variari colorem pannorum, quibus cella ipſæ cooperiuntur, ut nimirum propinqui Cardinales deſuncti Papæ, aliique ab eo creati colore violaceo, alii viridi uterentur; nam alias, ut ex recitato ſuperius teſtimonio Burchardi conſtat, in Conclavi ubi electus fuit Innocentius VIII. anno ſcilicet MCDLXXXIV. varii colores a Cardinalibus in cellis veſtiendis adhibiti fuere, nempe rubeus, viridis, albus, ac mixtus. Conclave autem ob mortem Julii II. conſtructum eſt anno MDXIII. in quo forte primum inventa eſt ea colorum viridis, ac violacei diſtinſtio. Antea ſiquidem Cardinales in veſtiendis cellis ſuis quoad colorem ſuo quiſque arbitrio utebatur, uti non modo liquet ex allato teſtimonio Burchardi, verum etiam Æneæ Sylvi, qui in Oratione ad Fridericum III. Imperatorem loquens de Conclavi, ubi electus fuit anno Chriſti MCDXLVII. Nicolaus V. antea dictus Cardinalis Bononiensis, ita de cellis inquit: *Loca cellarum ſorte deliguntur. Poſt per ſe quiſque ornat ſuam, quidam rubeis, quidam viridibus pannis tabernaculum ſibi faciunt.* Notat mox inter alia, Cardinalis Bononiensis cellulam albo colore veſtitam fuiſſe: *Forſitan, inquit, nec purior, nec mundior cujuſquam erat mens; nec enim ante illam diem extorquere quiſquam ex eo paruit votum ejus.* Porro, ut memoratus etiam Graſſus reſert, in hoc eodem Conclavi, *ut facilius cella dominorum cognoscerentur, appoſuerunt, Cardinalium ſcilicet ſamuli, in liminari frontiſpicio arma gentilia ſua: aliqui fecerunt litteras majuſculas, alphabeti ſcilicet, quibus cellulae ipſæ ex antiquo ritu, cujus non modo noſtram Cæremoniale, ſed & Burchardus meminit, ſignantur.*

XVI. Sane cellularum diſtributio in Conclavi poſt obitum Sixti IV. conſtructo, referente laudato Burchardo in Cæremoniali ejus Sedis vacantis §. xxxiii. ita peracta eſt: *Eadem die, nempe xxv. Auguſti, Reverendiſſimi Domini Car-*

Cardinales S. Marci, & S. Georgii, quibus ordinatio Conclavis per Sacrum Collegium commissa fuit, distribuerunt sorte Cameras pro Cardinalibus designatas. Hoc ordine signatæ fuerunt omnes camera litteris alphabeti per ordinem, quævis camera una littera, Prima ad sinistram videlicet cornu Epistolæ Altaris Capellæ majoris, in qua Conclave erat, signata fuit A, secunda B, tertia C, & sic de aliis. Signatas ait fuisse cameras omnes, quarum numero erant viginti sex, una excepta, videlicet ultima ad sinistram intrantis Capellam, quæ erat prope ostium, quo intratur ad cameram Sacristiæ in cornu Evangelii. Tum vero sic etiam subdit: Ibidem Reverendissimus Cardinalis S. Georgii, Camerarius scilicet S. R. E. ut paulo inferius explicat, fieri fecit viginti quinque schedulas pares, quamlibet una littera alphabeti signatam, & eas singulariter plicatas poni in uno biretto, quem alter tenuit. Reverendissimus Dominus S. Georgii nominavit successive singulos Cardinales, & ille pro quolibet nominato unam schedulam, & quilibet accepit illam cameram, quæ littera in schedula posita signata erat. Facta hujusmodi distributione, appositum fuisse inquit a tergo cujuslibet schedulæ nomen illius Cardinalis, cui ipsa schedula sorte venerat, & per Cursores de mandato ejusdem Cardinalis S. Georgii Camerarii præfati schedulas ipsas singulis Cardinalibus in domibus ipsorum præsentatas, ut servitores eorum cameras ipsas juxta Canonum sanctiones parare possent, & alias munire. Grassus in suo ms. Diario tradit, factas fuisse in Capella majori cellulas xxix. tam pro præsentibus, quam & pro absentibus venturis; pro iis etiam, qui non venerunt structas fuisse cellulas inquit, licet non paratæ fuerint, quarum usum Cardinales, qui cellarum propinquas habuerunt, tenuerunt.

XVII. Cautum vero & illud ex nostro Cæremoniali est, ut cellulæ ipsæ non ordine, sed sorte Patribus, idest, Cardinalibus, distribuantur pridie quam ingrediantur Conclave, ut cortinis, lectis, & opportuna supellectile in tempore possint ornari. Fieri debere eam distributionem per sortem, docent passim antiqui Apostolici Cæremoniarum in suis mss. Diariis. Sed tradit tamen Grassus, ubi enarrat Acta Conclavis constructi post obitum Julii Papæ II. fuisse scilicet tunc ordinatum, & observatum, quod cellæ pro nonnullis Cardinalibus infirmis darentur non per sortem, ut reliquæ omnes, sed exciperentur studiose, videlicet una, quæ esset in angulo apud portam, qua itur ad Sacristiam, nam illa aliquanto amplior ex necessitate structura fuit, daretur Vicecancellario infirmo tali infirmitate, ut ire pedibus suis nullatenus posset, nisi ab aliis portaretur, & alia quæ esset ex opposito, daretur Cardinali de Medicis . . . nam & ipse Cardinalis de Medicis, qui fuit postea Papa,

nempe Leo X. erat infirmus. Addit mox, fuisse tunc etiam ordinatum, quod cellæ pro Cardinalibus absentibus, tot fierent, quot omnino essent extra Urbem; & quod cella illa, quæ habet eorum Cantorum, daretur absque sorte Cardinali Volaterrano infirmo, & sic factum fuit. Præter has memoratas diserte asserit, reliquas omnes datas fuisse per sortem: Aliæ autem omnes per sortem assignatæ. Quicquid sit de antiquo usu, mandat inter alia Pius IV. in sua Constitutione, quæ incipit, In eligendis, edita anno MDLXII. spectatque electionem Romani Pontificis, quod cellæ Conclavis Cardinalibus sorte distribuantur, nec liceat eas etiam infirmitatis prætextu mutare, aut desuper adificare, vel illas dilatare, sed quilibet etiam Decanus sit sua sorte contentus.

XVIII. Ex præscripto denique nostri Cæremonialis, locus ipse Conclavis ita undique claudendus, & muniendus est, ut aditum nullum, nisi unum tantum, ut diximus, omnino habere possit; nemoque inclusos alloqui, videre, seu quippiam ad eos clam mittere queat. Edicit plane, quod alias Summi Pontifices pridem statuerant, ac præsertim Gregorius Papa X. in sua illa celebri Constitutione, quam de Conclavi edidit in Concilio Lugdunensi II. Can. II. quem nos fuisse explicuimus Tomo IV. Conciliorum, legere est in Cap. *Ubi periculum* III. *De electione* &c. in Sexto. Inter alia autem Gregorius ipse citato loco sic ad rem inquit: *In eodem Palatio unum Conclave, nullo intermedio pariete, seu alio velamine omnes inhabitent in communi, quod, reservato libero ad secretam cameram aditu, ita claudatur undique, ut nullus illud intrare valeat, vel exire.* Additque mox: *Nulli ad eosdem Cardinales aditus pateat, vel facultas secreta loquendi cum eis, nec ipsi aliquos ad se venientes admittant, nisi eos, qui de voluntate omnium Cardinalium inibi præsentium pro his tantum, quæ ad electionis instantis negotium pertinent, vocarentur.* Et statim iterum: *Nulli etiam fas sit, ipsis Cardinalibus, vel eorum alicui nunciam mittere, vel scripturam.* Idipsum statuere & alii sequioris ævi Pontifices, quorum Constitutiones curæ semper fuit Cæremoniariis Apostolicis diligentissime observare, uti ex eorum mss. Diariis addiscimus, viderique præ ceteris potest quid ea re scripserit Petrus Amelius in suo Romano Ordine xv. Cap. cxi. ix. quod inscriptum est, *Rubrica de Conclavi*, apud Mabillonium Tomo II. Musei Italici, interque alios laudati superius Apostolicarum Cæremoniarum Magistri, Joannes Burchardus, Paris de Grassis, Franciscus Mucantius, & alii; quibus omnibus addi præsertim debet Cæremoniale novissimum, jussu Gregorii XV. Papæ editum, continens ritus electionis Romani Pontificis. Juxta illius enim præscriptum dirigitur hodie Conclave, & Electio Papæ.

§. III.

De loco ubi conveniunt Cardinales Sede vacante ante Conclavis ingressum.

Interea Patres crebro conveniant, vel in Sacristia Ecclesiæ, ubi exequiæ defuncti Pontificis celebrantur, finita Missa, sive in Domo Domini Camerarii, si ea est idonea, & si is est ex numero Cardinalium, nam & extra Collegium potest esse Camerarius. Administratio enim temporalium, & Urbis, ac Romanæ Curiae gubernatio, vacante

Se-

Sede, ad Sacrum Collegium, & præcipue ad ipsum Camerarium spectat; & ideo apud nullum alium Cardinalem, sed apud eum tantum, aut apud aliquam Ædem sacram, si magis id libet, convenire solent.

COMMENTARIUS.

I. **V**etus mos est, quem & hic §. confirmat, ut nempe interim cum exequiæ defuncti Pontificis celebrantur, Cardinales crebro conveniant, vel in Sacristia Ecclesiæ, ubi ipsæ exequiæ habentur, finita Missa, vel in Domino Camerarii, si ea est idonea, & si ipse Camerarius est ex Cardinalium numero; quia scilicet, *administratio temporalium, & Urbis, vacante Sede ad Sacrum Collegium, & præcipue ad ipsum Camerarium spectat*. Plura quæ ad hunc §. spectant, jam alibi fuse explicuimus, & Camerarii potestatem, & Sacri Collegii circa temporalium administrationem Sede vacante. Unum hoc loco adnotabimus, quod de potestate ipsius Sacri Collegii Sede vacante statuit Pius Pontifex IV. in celebri sua Constitutione, quam de electione Summi Pontificis edidit anno MDLXII. incipitque, *In eligendis*. Statuit enim inter alia Pius, ut *Sedis vacatione durante Collegium Cardinalium in iis, quæ ad Pontificem Maximum, dum viveret, pertinebant, nullam omnino potestatem, aut jurisdictionem habeat, neque gratiam, neque justitiam faciendi, aut factam per Pontificem mortuum, executioni demandandi, sed ea omnia futuro Pontifici reservare teneatur*. Neque de statu temporali S. R. E. neque de pecuniis Camera Apostolica, aut Datarii, vel pro solutione debitorum ante obitum Pontificis quomodolibet contractorum, aut alias ex quavis causa (casibus *infra scriptis dumtaxat exceptis*) quicquam disponere, nec contra dictam Gregorii, nempe Pape X. Constitutionem pro se ipsis aliquid percipere, nec æs alienum ultra necessarios sumtus presentibus comprehensos contrahere debeat. Addit & alia Pontifex, quæ deinde ab aliis Pontificibus confirmata, atque explicata luculentius fuerunt, præsertim vero a sanctæ memoriæ Clemen-

te XII. in sua Constitutione, quæ incipit, *Apostolatus officium*, edita IV. nonas mensis Octobris anno Christi MDCCXXXII.

II. Continet hæc Constitutio diversas ordinationes pro bona directione Conclavis, ac rerum Sede Apostolica vacante agendarum. Inter alia vero, quum tempore Sedis vacantis duplex habeatur Cardinalium Congregatio, altera nempe generalis, sive totius Collegii, & altera particularis constans tribus Cardinalibus antiquioribus, uno scilicet ex quoque ordine cum Camerario, quorum officium tertia die post Conclavis ingressum omnino expirat, in eorumque locum tres alii sequentes in ordine quolibet, tertio die una cum eodem Camerario succedunt; provide statuit Clemens, *ut in dicta Congregatione particulari, sive ante, sive post capta Comititia, levioris dumtaxat momenti, ac in dies, seu passim occurrentia negotia expediantur; siquid vero gravioris momenti, ac indaginis fuerit, id omne ad Congregationem generalem, seu Collegium Cardinalium deferatur; ac ulterius, quæ in una Congregatione particulari decreta, resoluta, vel denegata fuerint, in alia revocari, mutari, aut concedi nequeant, sed id faciendi jus habeat ipsa tantum Congregatio generalis per pluralitatem suffragiorum*. Legenda integra Constitutio, edita enim est a Pontifice, qui cum Cardinalatus fungebatur officio, ter comitiis ad Pontificem eligendum interfuit, diuque in Romana Curia versatus, multa noverat, quæ vel confirmatione, vel immutatione, aut additione opus habebant. Fuit plane Clemens vir animi excelsi, juriumque Apostolicæ Sedis, ac Romanorum Pontificum vindicator egregius. Porro sunt & alia in hoc nostro §. quæ a nobis abunde alias explicata fuere.

§. IV.

De Custodibus Palatii, & Conclavis.

Inter alia ibi constituunt quadruplices Custodes futuri Conclavis. Primæ portæ Palatii custodia alicui magno Prælato, vel Nobili potenti, ut primum obiit Pontifex, committitur, qui armata cohorte diu noctuque Palatium Patresque tueatur, cui ducenti, sive trecenti pedites assignantur. Secunda custodia est in prima porta, qua ad locum Conclavis ascenditur, & hæc demandatur Conservatoribus, & Capitibus regionum Urbis, qui adjunctis sibi aliquibus Nobilibus Civibus portam ipsam custodiant. Tertia, custodia in secunda porta aliquanto superius demandari solet Oratoribus laicis, sive non Prælati Regum, aut Principum, aut etiam aliquibus magnis, & potentibus Proceribus numero (1) condecanti. Quarta autem custodia, quæ est in ipso aditu unico Conclavis committi consuevit Prælati dignioribus Romanæ Curia sex, aut octo, sive sint Oratores, sive non; & si commode fieri potest, & (2) alioquin idonei censeantur, curandum, ut ex diversis Nationibus eligantur, ut omnium studiis tractetur, quod ad omnes pertinet. Sed hæc omnia quoad custodiarum distinctionem, & Custodum numerum, & qualitatem, in arbitrio sunt Sacri Senatus, qui pro temporis, & loci

(1) In editione 1. Veneta legitur, *numero ad id idoneo*, & ita etiam in Colonienſi; in Romana vero ut in nostro §.

(2) Ita in ipsis Veneta & Colonienſi editionibus, in Romana vero, *ut alii &c.*

loci commoditate, & conditione opportune providere consuevit. Custodes primæ portæ Palatii cum armatis, ut primum obiit Pontifex, locum servant, alii vero, cum Patres intrant Conclave.

COMMENTARIUS.

I. **E**st antiquus mos, ut antequam Cardinales intrent Conclave, Custodes constituant, qui Conclave ipsum tueantur, ejusque moris meminit quidem Petrus Amelius in Romano suo Ordine xv. Cap. cxlix. ubi sic inter alia inquit: *Item sciendum, quod Domini Cardinales tres, prior cum Camerario de consilio aliorum, antequam intrant Conclave, debent eligere quatuor solemnes Viros, qui habent extra custodire Conclave cum gentibus armatis, & caveant bene super hoc, quod tales sint idonei, Poterunt esse duo Prælati, & duo Milites, vel unus Miles, & unus Banderiensis. Banderenses, seu etiam Bandarense, & Bandorense, teste Dufresne in suo Glossario, dicti sunt Romæ eo nomine regionum Capitanei; appellati sunt quoque Bandonarii a bandis, seu bannis, pedestris militiæ signis, ut docet eruditissimus Petrus Morettus in suo celebri Opere, De Presbyterio, Parte III. Sectione III. in Nota ad calcem paginæ 221. occurruntque illæ voces passim in antiquis Romanis Ordinibus, & apud Scriptores mediæ ævi. Quicquid autem de iis sit, pergit Amelius citato loco, muniaque ipsorum Custodum ita mox exponit: *Item dicti Custodes caveant sibi bene sub pœna perjurii, quod bene aperiant semper, & videant quicquid portatur Cardinalibus ad comedendum; etsi pastilla eis portarentur, illa aperiant. Tum vero addit: Item sub pœna perjurii nullam litteram eis dent, nec permittant illos accipere, nec ab ipsis etiam recipere, quantumcumque necessitas cogeret, sed quicquid voluerint habere ab extra, dictis Custodibus ore dicant. Et rursus: Item quod nullus intret ad eos, quandiu erunt in dicto Concilio, nisi forte aliquis Cardinalis ab extra veniret de sua Legatione, & ille potest intrare solus cum uno Presbytero, & uno Clerico. Illud quoque subjicit, ut omni die mane & sero faciant de domibus eorum portari cibaria cotta, & alia vitæ necessaria. Concludit tandem & ait: Item in porta Conclavis sint ad minus tres claves cum tribus serraturis: quilibet custodientium habeat suam. Item dicta porta sit clausa bene cum barribus, & clavelaturis, & catena; & in medio sit foramen, per quod detur eis ad comedendum, longitudinis unius palmi & semis, & tantum in altitudine, quod etiam cum clavi claudatur.**

II. Hactenus Amelius in citato loco de Custodibus Conclavis, eorumque officio. In Concilio Constantiensi, ubi electus fuit anno mcdxvii. Martinus V. Conclavi parato in Domo Communis Constantiensis, deputati fuerunt quidem Custodes Conclavis tam pro parte Cardinalium, quam pro Nationibus quidam Prælati, qui omnes in manibus Joannis Cardinalis Ostiensis prædicti Concilii Præsidis, tactis Cruce, & Evangeliiis, juraverunt, se capitula quædam statuta observaturos, ut tradit Pagius in Vita ipsius Martini V. Papæ, Num. 1. Sed omissa hoc loco ista Prælatorum custodia, qui ex variis Nationibus assumebantur, dicemus siquidem de ea inferius loco opportuniori, ex præscripto nostri hujus §.

primæ portæ Palatii custodia alicui magno Prælato, vel nobili potenti, ut primum obiit Pontifex, committitur, qui armata cohorte, die nocteque Palatium, Patresque tueatur, cui ducenti, sive trecenti pedites assignantur. Teste Burchardo in suo Diario Sedis vacantis ob Sixti IV. obitum, ubi enarrat Acta Conclavis, in quo electus fuit Innocentius VIII. ad quatuor custodias deputati quidem, & ordinati fuerunt Custodes; videlicet portæ Palatii... deputatus fuit Reverendus in Christo Pater D. Joannes ex Comitibus Armaniaci Episcopus Castrensis in Francia, qui sub se habuit quinque pedites, vel circa. Porro testatur Grassus in suo ms. Diario agens de Conclavi post mortem Julii Papæ II. constructo, data sibi a Cardinalibus provincia ordinandi ipsum Conclave, primo designasse se Capitaneum, & Governatorem Palatii cum ducentis stipendiariis, & Custodes primæ portæ Palatii, Governoris Conclavis meminit inter alios Pius IV. in sua Constitutione, quæ incipit, *In eligendis*, edita anno MDLXII. spectatque electionem Summi Pontificis, ubi etiam varia ipsius Governoris Conclavis munia recenset.

III. Quod secundam custodiam spectat, erat illa, ut inquit noster §. in prima porta, qua ad locum Conclavis ascenditur; & hac demandatur Conservatoribus, & capitibus regionum Urbis, qui adjunctis sibi aliquibus nobilibus Civibus portam ipsam custodiant. Agit & de hac custodia Burchardus in suo memorato Diario, seu Cæremoniali, §. xxv. sic inquit: *Ad secundam custodiam, quæ erat in capite scalarum, qua itur ad Cameram Apostolicam, sive in pede scalarum deputati fuerunt Custodes Camera Urbis & capita regionum, videlicet quolibet die unus Conservator, & duo capita regionum cum quatuor civibus Romanis nobilibus per eos eligendis. Paris de Grassis, qui curam habuit ordinandi Conclave post obitum Julii II. Papæ constructum, in suo ms. Diario ita ait: Secundam custodiam posui non in camera plumbi, ut multi designabant, sed in prima, & in secunda cameris superioribus, quæ sunt in angulo logiæ longæ, & feci ibi poni repagula transversa cum tuitione loci, & ibi fuerunt Conservatores, & Caporiones cum Civibus, & Nobilibus Romanis arbitrio ipsorum Conservatorum eligendis ad numerum xx. itaut essent semper ibi personæ decem. Teste Ænea Sylvio in Oratione ad Federicum III. Imperatorem in Conclavi quod in dormitorio Prædicatorum Minervæ constitutum est, ubi scilicet anno Christi mcdxlvii. electus fuit Nicolaus V. Pontifex Maximus, ostium primum quatuor Prælati commissum est, qui quatuor claves habuere, Archiepiscopus Ravennas, Anconitanus, Aquilanus, & Semocensis Episcopi.*

IV. Tertia custodia in secunda porta aliquanto superius, ut idem hic noster §. inquit, demandari solet Oratoribus laicis, sive non Prælati Regum, aut Principum, aut etiam aliquibus magnis, & potentioribus Proceribus numero ad id condecienti. In Conclavi, ubi electus fuit Innocen-

nocentius VIII. anno MCDLXXXIV. teste Burchardo §. xxv 1. ad tertiam custodiam, quæ erat in pede scalarum, quibus de Camera Apostolica ascenditur ad Palatium, deputati fuerunt Dominus Marquardus Brisacher Orator Serenissimi Imperatoris, D. Aunellus Orator Regis Neapolitani, D. Florius Roverella Orator Regis Ungariæ; tres Oratores alii, unus Ducis Mediolani, alius Domini Florentinorum, & tertius Domini Senensis. Audiamus nunc, ut ordinavit Grassus hanc tertiam custodiam in Conclavi post mortem Julii II. Pontificis erecto: *Tertiam*, inquit, custodiam posui superius plano scalarum ante aulam, quæ Imperialis vocatur, & consignavi cameras duas ex illis, quæ sunt ibi supra logiam longam, & ibi posui Oratores omnes laicos, qui essent in Urbe, ac cum eis diversarum Nationum Nobiles Curiales eligendos a Cardinalibus Protectoribus diversorum Regum, ac Principum, & Rerumpublicarum, & fuerunt in totum numero sexdecim. Similia docent & alii Apostolici Cæremoniarum in suis mss. Diariis, quorum loca supervacaneum est hic recensere. Unum vero illud non omitam, quod nempe observat eruditissimus Dominicus Georgius in Vita Nicolai V. Pontificis Maximi anno MCDXLVII. Numero II. in Conclavi scilicet erecto in Cænobio Minervitano Fratrum Prædicatorum, ubi Nicolaus ipse electus Summus Pontifex fuit, ostium secundum traditum fuisse custodiendum Oratoribus Regum, inter quos erat Æneas Sylvius, tum Friderici Cæsaris Ablegatus, ut ipsemet Sylvius scribit. Rectissime autem mox Georgius subdit, id mirum non videri; nam mos erat, quemadmodum ex S. R. E. Cæremoniarum Libris monemur, ut ostii secundi custodia Oratoribus Principum demandaretur. Sed nec omitendum, quod tradit memoratus Burchardus in §. xxv 11. ubi postquam in præcedentibus de tribus custodiis dixit, ita subjicit: *Ordinatum fuit, quod in singulis custodiis hujusmodi, ubi portæ sunt, fuerunt claves opportuna tradendæ Custodibus prædictis.*

V. Quarta demum custodia, quæ, ut habet noster §. erat in ipso aditu unico Conclavis, committi consuevit Prælati dignioribus Romana Curia sex, aut octo, siue sint Oratores, siue non, & si commode fieri potest, ut alii idonei censeantur, curandum, ut ex diversis Nationibus eligantur. Servatum fuisse hunc morem in Conclavi, ubi electus fuit Martinus V. ut scilicet adhiberentur Custodes tam pro parte Cardinalium, quam pro Nationibus, jam supra notavimus; confirmaturque hic mos testimonio Burchardi, qui in citato suo Cæremoniali §. xxv 111. ubi de hac quarta custodia loquitur, ita inquit: *Ad quartam custodiam, quæ erat in porta Conclavis, deputati fuerunt pro Natione Germanica D. Petrus Antonius de Clappis Præpositus Wormaciensis Orator Reverendissimi Domini Bertoldi de Nauberg electi Moguntini Electoris Imperii; Dominus Prosper Camulius Episcopus Cathanensis Orator Illustrissimi Maximiliani Ducis. Pro Natione Italica D. Bonfranciscus Episcopus Reginenfis Orator Ducis Ferrariæ, D. Raynaldus de Ursinis Archiepiscopus Florentinus, Dominus Leonardus Grifus Archiepiscopus Beneventanus, D. Urbanus de Flisco Episcopus Forolivienfis, D. Hieronymus de Comitibus Episcopus Massanensis, D. Ludovicus de Gonzaga administrator, To. I.*

siue electus Mantuanus, qui asserens se infirmum, non acceptavit onus hujusmodi sibi commissum, Dominus Franciscus de Columna, & Jacobus de Sermoneta Sedis Apostolicæ Protonotarii. Pro Natione Gallicana D. Eustachius Archiepiscopus Arelatensis, & D. Episcopus Petrus Nannetensis. Pro Natione Hispanica D. Gundislaus electus Barchinonensis; & pro Anglicana D. Joannes Episcopus Dunelmensis Orator Regis Angliæ. Ita Burchardus, qui etiam mox addit, pro Religione Rhodienensium deputatum fuisse D. Joannem Rendal, itemque Virginium militem Ordinis S. Joannis Hierosolymitani, Turcopellarium Rhodianum. Turchapellarius, seu Turcopolearius, ut habet Macrus in suo Hierolexico, dignitas erat Anglicæ Nationis inter Equites Melitenses, eratque annexa in primario ejusdem Nationis, atque Turcopolis præerat, qui sunt levis armaturæ milites; unde mansit adhuc in Melita hoc Turcopoli vocabulum; nam vocantur hodie Turcopoli equitantium cohortium Præfecti.

VI. Præstat nunc Grassus audire ita de quarta Conclavis custodia, quam & ipse ordinavit, in suo ms. Diario loquentem: *Quartam custodiam feci ante portam Conclavis, cui designavi duas cameras, quæ sunt ibi in angulo apud logias, unde projiciuntur populo palma, & candelæ, & deputavi omnes Oratores, Ecclesiasticos, & cum eis tot Prælatos ex omni ordine Curia, ut essent in totum numero sexdecim, qui per vices inter se custodirent, videlicet duos Patriarchas, duos Archiepiscopos, duos Episcopos, duos Protonotarios, & duos Auditores Rotæ, sic ut cum Oratoribus essent sexdecim, qui per vices inter se custodirent, sic ut quatuor semper adessent, & custodirent juxta formam juramenti, quod præstiterunt in forma. Una cum Rotæ Auditoribus ex more pridem recepto assistit Sacri Palatii Apostolici Magister; quod mirum videri non debet, ut enim monet nostrum hoc Cæremoniale Libro 111. §. xx 111. ubi de Magistro Sacri Palatii agit, & sedet, inquit, vel stat semper post primum Auditorem, Rotæ scilicet, qui adest. Teste Vincentio Maria Fontana in Syllabo Magistrorum Sacri Palatii Apostolici pag. 32. ipse Palatii Apostolici Magister locum in Pontificia Capella post Sacra Rotæ Decanum obtinuit ex Indulto Apostolico Eugenii IV. (quod incipit, Dum ex pluribus, datumque est anno MCDXXXVI. tertio Kalendas Novembris) usque ad annum MDCLV. quo Alexander Papa VII. nunc in Ecclesia Dei feliciter regnans, mense Octobri, Pontificium Sacellum majori, nobiliorique Prælatorum numero decorare constituens, exclusis ab illo minoris notæ Clericis, qui Sacri Palatii Magistrum, Rotæ Auditores, atque Apostolicæ Camera Clericos præcedebant, & bis in eandem introductis (nam Clerici Camera Apostolicæ causa præcedentiæ cum Auditoribus Rotæ, neque ad Pontificium Sacellum, neque ad alias publicas functiones conveniebant) locum Magistri Sacri Palatii pro tempore, post Sacra Rotæ Auditores immediata super cunctos Camera Apostolicæ Clericos in perpetuum stabilivit.*

VII. Una cum Rotæ Auditore jam ex antiquo more quartæ huic custodiæ assistit Sacri Palatii Apostolici Magister; idque juris firmatum illi fuit etiam cum pari numero sunt ipsi Sacra Rotæ Auditores, ut liquet ex Decreto, quod in Conclavi post obitum Clementis Papæ XII. die

xxx. Martii una cum Camerario ediderunt Cardinales S. R. E. qui tunc erant Ordinum capita. Cui edendo occasionem dedit ejusdem Sacræ Rotæ Decanus Carolus Calcagninus, qui contende-
bat, ipsum Magistrum Sacri Palatii non debere cum Rotæ Auditore custodiæ assistere, cum Auditores sunt pari numero. Verum merito vicit Magister Sacri Palatii, qui tunc erat F. Nicolaus Ridolfi, tum præsertim, quod ejus prædecessores in Conclavibus anni MDCLXVII. & anni MDCLXX, custodiæ interfuerunt una cum Rotæ Auditore, licet tunc Auditores Rotæ essent numero pari. Constant hæc ex Protocollo II. ipsius Nicolai Ridolfi, quod legi apud ejus successorem Fr. Josephum Augustinum Orsi, in eoque extat memoratorum Cardinalium Decretum, quod dicit, Magistrum Sacri Palatii Apostolici, una cum Sacræ Rotæ Auditore ad ipsam custodiam etiam cum Auditores Rotæ sunt pari numero, esse admittendum.

VIII. Notandum nunc vero illud quod nostrum Cæremoniale admonet, nempe *hæc omnia quoad custodiarum distinctionem, & Custodum numerum, & qualitatem in arbitrio esse Sacri Senatus, qui pro temporis, & loci commoditate, & conditione opportune providere consuevit.* Tum vero hæc subjicit: *Custodes primæ portæ Palatii, cum armatis, ut primum obiit Pontifex, locum servant, alii vero, cum Patres intrant Conclave.* Porro tradit Cardinalis de Luca, Parte II. Relationis Romanæ Curie, Discursu III. Num. XIV. & seq. duos esse fixos, ac principales Conclavis Custodes, Prælatum scilicet illum, qui a Sacro Cardinalium Collegio ante ingressum electus fuerit, quique Conclavis Gubernator dicitur, & secularem alterum, *qui Conclavis Marefciallus nuncupatur.* Istud munus ait, *hereditario jure, diuturnoque tempore, obtinuisse, ac obtinere illum, qui primam figuram facit, seu, ut dici assolet, est caput nobilis, ac pervetustæ Familiæ Sabellorum, & qui attento præsentis statu, est Albani Princeps.* Addit, istam prærogativam concessam dici prædictæ Sabellorum Familiæ *in præmium adeo proficua inventionis Conclavis, quo mediante, præxis non tribuit illas diuturnas, & scandalosas Sedis Apostolicæ vacationes, quas Chronica narrant.* Transit deinde idem laudatus Auctor ad alios Conclavis Custodes, quorum etiam munia recenset his verbis: *Alii vero Custodes sunt Prælati, ac etiam respectivè Conservatores Populi custodientes Rotas, per quas victualia, aliaque necessaria transmittuntur ad formam clausuræ Monasteriorum Monialium; dictique Custodes per turnum deputari soliti singulis diebus, invigilant, ne Apostolicis Constitutionibus contraveniatur circa alloquutiones, vel litterarum transmissionem.* Dicti vero Custodes principales retinent *claves portæ majoris, per quam habetur ingressus, & egressus ad prædictorum Monasteriorum formam.* Ita ille.

IX. Quicquid autem sit de ceteris Custodibus, & de Gubernatore Conclavis, de quibus inter Apostolicos Cæremonarios Paris de Grassis, in suo ms. Diario, & inter Summos Pontifices Pius IV. in citata sua Constitutione, *In eligendis*, loquuntur; quod Marefciallum, ut ajunt, Conclavis spectat, ipsum munus *hereditario jure diuturnoque tempore*, Sabellorum Familiæ caput obtinuisse, ait quidem Cardinalis de Luca,

probarique ejus dictum potest testimonio aliorum Auctorum recentiorum, inter quos Augustinus Oldoinus in suis ad Ciaconium Additionibus Tomo II. ubi enarrat Vitam Gregorii X. Papæ Col. 184. ait præfectum fuisse custodiæ Viterbiensis Conclavis anno MCCLXXII. Lucam Sabellum, idque constare *ex Diplomatis Pontificiis.* Teste Erancisco Mucantio Apostolico Cæremoniarario in suo ms. Diario apud eruditissimum Apostolicum Cæremoniarium Venantium Philippum Pierfanctem, Conclavi, ubi electus fuit Pius Papa V. præfuit Flaminius Sabellus, qui etiam, mortuo in ipso Conclavi Francisco Gonzaga S. R. E. Cardinali, res ipsius defuncti veluti ex antiquo privilegio suæ familiæ concessio prætendebat, sed ejus tamen prætentione a Sacro Collegio rejecta, ordinatum Gubernatori fuit, ut huic negotio silentium imponeretur. Ceterum quamvis constet custodiæ Conclavium præsertim ubi illa extra Urbem constructa fuerunt, varios potentiores Viros præfectos fuisse, jam non inficior, Sabellos Romanos Principes eo Marefciallatus munere aliquando functos fuisse; defuncto enim tandem ultimo ex ipsa perillustri familia Julio Principe, Clemens XI. Pontifex Maximus anno MDCCXII. ipsum Officium Marefciallatus commisit uni ex primariis Romanis Principibus Augusto Chisio Principi Terræ Farnesii, uti liquet ex Apostolico Diplomate, quod lubet ad calcem hujus Commentarii describere, estque hujusmodi.

C L E M E N S P A P A XI.

Dilecto Filio Nobili Viro Augusto Chisio Principi Terræ Farnesii Aquapenden. Diæcesis.

Dilecte Fili Nobilis Vir salutem, & Apostolicam Benedictionem. Sinceræ fidei, ac singularis devotionis affectus, quem erga Nos, & Sedem Apostolicam gerere comprobaris; necnon eximia Majorum tuorum in eandem Sedem merita Nos adducunt, ut ea, per quæ honorum tibi fiat accessio, libenter tibi concedamus, quæque Nobis maxime cordi sunt, & esse debent, tuæ curæ, ac fidei alacri animo committamus. Cum itaque Officium Marefciallatus S. R. E. olim Curie de Sabellis nuncupatæ, cui custodia Conclavis, Sede præfata pro tempore vacante, ac speciatim retinendi penes se omnes claves exteriores illius januæ commissa reperitur, per obitum q. Julii Principis Sabelli nuper apud eandem Sedem defuncti, qui illud, dum viveret, ex concessione Apostolica ad sui vitam obtinebat, vacaverit, & vacet ad præsens: Nos te præmissorum meritorum tuorum intuitu specialibus favoribus, & gratiis prosequi volentes, & a quibuscumque excommunicationis, suspensionis, & interdicti, aliisque Ecclesiasticis sententiis, censuris, & pœnis a Jure, vel ab homine, quavis occasione, vel causa latis, si quibus quomodolibet innodatus existis, ad effectum præsentium dumtaxat consequendum, harum serie absolventes, & absolutum fore censentes. Motu proprio, & ex certa scientia, ac matura deliberatione nostris, deque Apostolicæ potestatis plenitudine tibi Officium Marefciallatus hujusmodi, ut præfertur, vel alias quomodolibet vacans, cum omnibus, & singulis illius honoribus, oneribus, & emolumentis, necnon privilegiis, facultatibus, & indultis Officio hujusmodi quomodolibet concessis, servata tamen in omnibus, & per omnia perpetua suppressione il-

illius Curiae praefatae, ejusque Officialium a fel. rec. Innocentio Papa X. Praedecessore nostro per suum Chirographum die VII. Aprilis MDCLII. editum, facta, tenore praesentium ad tui vitam concedimus, & assignamus: Mandantes propterea dilectis Filiis nostro, & Sanctae Romanae Ecclesiae Camerario, & Praesidentibus Clericis Camerae Nostrae Apostolicae, caeterisque, ad quos spectat, ut te ad dictum Marefciallatus S. R. E. Officium, ejusque liberum exercitium, juxta tenorem praesentium recipiant, & admittant, tibi que respective faveant, pareant, & assistant, ac de salariis, & emolumentis solitis, & consuetis debito tempore cum effectu responderi curent, & faciant. Non obstantibus Constitutionibus, & Ordinationibus Apostolicis, ac Almae Urbis Nostrae, nec non Camerae Apostolicae praefatae, aliisque etiam juramento, confirmatione Apostolica, vel quavis firmitate alia roboratis Statutis, & Consuetudinibus, privilegiis quoque, indultis, & Litteris Apostolicis in contrarium praemissorum quomodolibet concessis, confirmatis, & innovatis. Quibus omnibus, & singulis, illorum tenores praesentibus pro plene, & sufficienter expressis, ac de verbo ad verbum insertis habentes, illis alias in suo robore permanfuris, ad praemissorum effectum hac vice dumtaxat specialiter, & expresse derogamus, caeterisque contrariis quibuscumque. Volumus autem, ut tu de eodem Marefciallatus Officio recte, & fideliter erga Nos, & Sedem Apostolicam exercendo, ac da non recipiendo allquod genus muneris, praeter esculenta, & poculenta, quae triduo consumi possint, juxta formam Juris Communis, in manibus ejusdem Camerarii debitum praestes in forma solita juramentum. Datum Romae apud Sanctum Petrum sub Annulo Piscatoris die XXI. Martii MDCCXII. Pontificatus nostri anno XII.

X. Haecenus Diploma Apostolicum, juxta cujus praescriptum die I. Aprilis ejusdem anni MDCCXII. idem Illustrissimus, atque Excellentissimus Dominus D. Augustus Chisius Farnesii Princeps coram Eminentissimo S. R. E. Cardinali, & Camerario Joanne Baptista Spinula constitutus flexis genibus juramentum praestitit, ipsaque Apostolicae Litterae in Libro Signaturarum, ut ajunt, sub folio 28. registratae fuerunt, ut docet Astulphus Galloppi Reverendae Camerae Apostolicae Secretarius, & Cancellarius. Porro ex recitatis Pontificis litteris addiscere licet, qualesit Marefcialli munus in Conclavi. Ceterum, cum ipsum munus ad vitam dumtaxat duraturum concessum esset laudato Principi Augusto Chisio, BENEDICTUS XIV. feliciter regnans, ac sanctissime Romanam, atque universam Ecclesiam regens, eidem Augusto in praedicto Officio Marefciallatus coadjutorem dedit ejus sapientissimum filium Augustinum, ut nempe, mortuo patre, posset is & ad sui vitam duraturum idem munus obire, ut docent nos Apostolicae laudati Pontificis Litterae datae die I. Septembris anno MDCCXI. quae sunt hujusmodi.

BENEDICTUS PAPA XIV.

Dilecte Fili Nobilis Vir, salutem, & Apostolicam benedictionem. Sinceræ fidei, ac singularis devotionis affectus, quem erga Nos, & Sedem Apostolicam gerere comprobaris, necnon eximia Majorum tuorum in eandem Sedem merita Nos adducunt, ut ea, per quae honorum tibi fiat accessio, libenter tibi concedamus, quae-

To. I.

que Nobis maxime cordi sunt, & esse debeant, tuae curae, ac fidei alacri animo committamus. Cum itaque, sicut dilectus filius Nobilis Vir Augustus Chisius Princeps Terrae Farnesii Aquependen. Diocesis genitor tuus Nobis nuper exponi fecit, quod ipse Officium Marefciallatus Sanctae Romanae Ecclesiae olim Curiae de Sabellis nuncupatae, cui custodia Conclavis Sede prima pro tempore vacante, ac speciatim retinendi penes se omnes claves exteriores illius januae commissa reperitur, in quatuor Conclavibus exercuerit; nunc vero, attenta senili ætate sua, te tibi in Coadjutorem cum futura ad tui favorem in Officio hujusmodi successionem, a Nobis deputari summo pere desideret. Nos te, ac dictum Augustum specialibus favoribus, & gratiis prosequi volentes, ac vestrum singulares personas a quibusvis excommunicationis, suspensionis, & interdicti, aliisque Ecclesiasticis sententiis, censuris, & poenis a jure, vel ab homine quavis occasione, vel causa latis, si quibus quomodolibet innodatae existunt, ad effectum praesentium tantum consequendum harum serie absolventes, & absolutas fore censentes: Supplicationibus ipsius Augusti nomine Nobis super hoc humiliter porrectis inclinati, te eidem Augusto Coadjutorem cum futura ad tui favorem in Officio Marefciallatus hujusmodi successionem, itaut quandocumque eidem Augusto placuerit, & non alias in dicto Officio Coadjutoris te ingerere, & immiscere libere, & licite possis, & valeas, auctoritate Apostolica tenore praesentium constituimus, & deputamus: ac tibi Officium Marefciallatus Sanctae Romanae Ecclesiae hujusmodi, quandocumque illud per cessum, vel decessum dicti Augusti, aut alias quomodolibet ex illius persona vacare contigerit, ex nunc prout ex tunc, & e contra cum omnibus, & singulis illius honoribus, oneribus, & emolumentis, necnon privilegiis, facultatibus, & indultis Officio hujusmodi quomodolibet concessis, praesertim, quibus dictus Augustus in vim Motus proprii fel. rec. Benedicti Papae XIII. Praedecessoris nostri sub datum x. Decembris MDCCXIV. editi, de praesenti gaudet, servata tamen in omnibus, & per omnia perpetua suppressione illius Curiae praefatae, ejusque Officialium a pia mem. Innocentio Papa X. etiam Praedecessore nostro per suum Chirographum, die VII. Aprilis MDCLII. editum facta, alias solitis, & consuetis, itaut liceat tibi statim secuto obitu dicti Augusti, aut ipso Officio praefatum cedente, vel dimittente, seu Officio hujusmodi ex ejus persona quomodolibet vacante, dicti Officii possessionem, seu quasi possessionem apprehendere, & retinere, ipsumque Officium libere exercere, auctoritate, & tenore praesentis ad tui vitam concedimus, & assignamus, teque in locum ejusdem Augusti quoad Marefciallatus hujusmodi ex nunc prout ex tunc substituimus, & subrogamus. Mandantes propterea dilectis filiis nostro, & S. R. E. praefatae Camerario, ac Praesidentibus Clericis Camerae nostrae Apostolicae, caeterisque, ad quos spectat, ut te ad dictum Officium Marefciallatus S. R. E. hujusmodi, ejusque liberum exercitium juxta tenorem praesentium recipiant, & admittant, ac praesentis gratiae commodo, & effectu pacifice frui, & gaudere sinant, & faciant, nec te desuper a quocumque quavis auctoritate, quomodolibet indubite molestari, perturbari, vel inquietari permit-

C 2

mittant; tibi que respective faveant, pareant, & assistant, ac de salariis, ac emolumentis solitis, & consuetis debito tempore cum effectu responderi curent. Non obstantibus Constitutionibus, & ordinationibus Apostolicis, ac almæ Urbis nostræ, necnon Cameræ Apostolicæ præfate, aliisve quibusvis etiam juramento, confirmatione Apostolica, vel quavis firmitate alia roboratis statutis, & consuetudinibus, privilegiis quoque, indultis, & Literis Apostolicis in contrarium præmissorum quomodolibet concessis, confirmatis, & innovatis. Quibus omnibus, & singulis illorum tenores præsentibus pro plene, & sufficienter expressis, & ad verbum insertis habemus, illis alias in suo robore permanentibus ad præmissorum effectum hac vice dumtaxat specialiter, & expresse derogamus, cæterisque contrariis quibuscumque. Volumus autem, ut tu, antequam Officium Maresciallatus hujusmodi exercere incipias, de eodem Maresciallatus Officio recte, & fideliter erga Nos, & Sedem Apostolicam exercendo, ac de non recipiendo aliquod genus muneris, præter esculenta, & poculenta, quæ triduo consumi possint, juxta formam Juris communis, in manibus ejusdem Camerarii debitum præstes in forma solita juramentum. Datum Romæ apud Sanctam

Mariam Majorem sub Annulo Piscatoris die prima Septembris MDCCXL. Pontificatus nostri anno I.

XI. Hucusque BENEDICTI XIV. Papæ Apostolicæ Litteræ, Ceterum die 1x. Decembris anni MDCCXL. *suprascriptus Illustrissimus, & Excellentissimus Dominus D. Augustinus Cbissus Princeps Campanæ juramentum de bene & fideliter exercendo dictum Officium Maresciallatus S. R. E. in manibus Eminentissimi, & Reverendissimi D. Annibalis miseratione divina Episcopi Sabinen. Cardinalis S. Clementis S. R. E. Camerarii juxta formam in suprascriptis Litteris expressam, tactis Sacrosanctis Dei Evangeliiis, flevis genibus præstitit*, ut fidem facit Gregorius Castellani Reverendæ Cameræ Apostolicæ Secretarius, qui etiam ait, fuisse ipsas Litteras recensitas in Libro Signaturarum sub folio 137. anni MDCCXL. Porro unum ego hic tandem addiderim, tametsi Marescialli Conclavis nomen in antiquis Cæremonialibus, & Diariis mss. minime inveniat, ex quo tamen Conclavia fieri cœperunt, extitisse semper prænobiles Viros, atque potentes, qui custodiæ Conclavis præfecti fuerunt, tum ad sollicitandam electionem novi Pontificis, tum vero potissimum ad insolentiam eorum coercendam, qui vim Cardinalibus Conclavi inclusis inferrent.

§. V.

De ultima porta Conclavis, & ejus clavibus.

Et hæc quidem porta Conclavis quatuor, ut diximus (1) clausuris munitur, ab extra una, supra porticulum duabus, infra porticulum ipsum etiam una; & similiter (2) ab intus infra porticulum una. Custodes ipsius loci claves duas portæ, & clavem porticuli retinent; Clerici Cæremoniarum aliam portæ clavem, & clavem porticuli (3) ab intus, itaut neque porta, neque porticulum aperiri possit sine consensu illorum, qui sunt intus, & qui sunt extra. Aulæ sive duæ sint, sive tres, reservantur pro deambulatione Patrum.

COMMENTARIUS.

I. **A**git hic nostrum Cæremoniale de ultima porta Conclavis, & ejus clavibus, & hæc quidem porta, inquit, quatuor, ut diximus, clausuris munitur &c. De clausura ipsius portæ Conclavis notabile est plane illud, quod docet in suo Ordine xv. Cap. cxlix. Petrus Amelius, cujus verba licet alias a nobis descripta fuerint, opportunum tamen est, ac operæ pretium, ut ea iterum hoc loco recenseamus: *In porta Conclavis, inquit, sint ad minus tres claves cum tribus ferraturis; quilibet custodientium habeat suam; item dicta porta sit clausa bene cum barris, & clavelaturis, & catena; & in medio sit foramen, per quod detur eis ad comedendum, longitudinis unius palmi, & tantum in altitudine, quod etiam cum clavi claudatur.* Portam Conclavis intus, & extra muniti seris, pervetustus plane est mos, cujus passim mentionem faciunt in suis mss. Diariis Apostolici Cæremoniarum. Retineri a principalibus Conclavis Custodibus claves, quibus porta major ejusdem Conclavis claudatur, notavit Cardinalis de Luca Parte II. Relationis Romanæ Curie, Discursus

su 111. Num. xv. Juxta præscriptum nostri hujus §. *Custodes ipsius loci claves duas portæ, & clavem porticuli retinent, Clerici Cæremoniarum aliam portæ clavem, & clavem porticuli ab intus, itaut neque porta, neque porticulum aperiri possit sine consensu illorum, qui sunt intus, & qui sunt extra.* Meminit hujus sui officii Apostolicus Cæremoniarum Magister Paris de Grassis in suo ms. Diario, ubi enarrat Conclave post obitum Julii Papæ II. erectum, sic inquit: *Nos duo Magistri Cæremoniarum cum meo Coadjutore, & duobus nostris famulis fuimus intus sic in totum quinque custodientes intrinsecus ipsum Conclave, & posuimus in angulo apud portam unam lecticam, ubi dormiebat ipse meus Coadjutor supernumerarius cum duobus famulis nostris, non tamen ipsi retinebant claves; nam socius meus semper illas apud se retinuit, & semper aperuit, & clausit, dum opus fuit. Curam sibi ego dimisi alimentorum intro ferendorum, & portæ custodiendæ; nam ego curam observandæ portæ habui illius Aulæ, in qua Reverendissimi Domini Cardinales ut plurimum erant congregati; ut nimirum ibi.*

(1) Ita in editione Romana; in Veneta vero I. & in aliis legitur, *ferris*.
 (3) Ibidem, *interioris*.

(2) In eadem Veneta editione, *interiore*

ibidem quædam aliqua statuerent, quæ tamen ad Pontificis electionem minime pertinerent, ut

docet noster sequens §. ac etiam ipsi Cæremoniarum Apostolici in suis mss. Diariis.

§. VI.

Quæ liceat Cardinalibus tractare in Conclavi præter electionem.

Et in una ex eis remotiori scilicet solent aliquando simul convenire ad ea statuenda, quæ sunt præter electionem Pontificis. Quamquam secundum Sacrorum Canonum constitutiones fas non sit Patribus aliud tractare in Conclavi, nisi de providendo manifesto, & urgenti periculo Terris Ecclesiæ, & de substituendo pro tempore Pœnitentiarum Summo, & Camerario Sanctæ Romanæ Ecclesiæ, si interea vacarent; non est tamen inconueniens, & a Majoribus nostris frequentatum est, tractare aliqua, quæ etsi ipsum actum electionis præcise non respiciant, tamen laudabile regimen futuri Pontificis concernunt, & ipsius (1) Pontificis religiosam administrationem honestiori quodam vinculo temperant.

COMMENTARIUS.

I. Docet hic noster §. quæ liceat Cardinalibus tractare in Conclavi præter electionem: *Et in una ex eis, Aulis, remotiori scilicet solent aliquando simul convenire ad ea statuenda, quæ sunt præter electionem Pontificis*; sed quæ tamen, ut idem noster §. in fine subiicit, *regimen futuri Pontificis concernunt, & ipsius Pontificis religiosam administrationem honestiori quodam vinculo temperant*. Quicquid sit, certum illud est, quod noster ipse §. docet, secundum Canonum constitutiones, fas non esse Cardinalibus aliud tractare in Conclavi, nisi de providendo manifesto, & urgenti periculo Terris Ecclesiæ, & de substituendo pro tempore Pœnitentiarum, & Camerario S. R. E. si interea vacarent. Id plane præ ceteris jam olim statuit Gregorius X. in celeberrima illa sua Constitutione, quam de Conclavi edidit in Generali II. Concilio Lugdunensi, Canone II. relato in Ca-

pite, *Ubi periculum, De electione &c.* in Sexto. Sic enim ille inter alia inquit: *Idem quoque Cardinales acceleranda provisioni sic vacent attentius, quod se nequaquam de alio negotio intromittant, nisi forsan necessitas adeo urgens incideret, quo eos oporteret de Terra ipsius Ecclesiæ defendenda, vel ejus parte aliqua providere; vel nisi aliquod tam grande, & tam evidens periculum immineret, quod omnibus, & singulis Cardinalibus presentibus concorditer videretur illi celeriter occurrendum*. Novo suo muniit robore hanc Gregorii Constitutionem Clemens V. ubi de eadem re Constitutionem edidit in Concilio Viennensi, quæ legitur in Clementinis, Capite, *Ne Romani II. De electione &c.* ubi inter alia edicit, deficiente Romanæ Ecclesiæ Camerario, vel Pœnitentiarum, posse Cœtum Cardinalium pro tempore vacationis alios subrogare. Sed de his jam alibi fusius diximus.

§. VII.

Quæ curanda, si extra Urbem electio habenda esset.

Ceterum si aliquando contingeret, ut alibi celebranda esset Pontificis electio, hinc esset sumendum exemplum, & curandum in primis, ut locus ipse idoneus, & tutus, & fidei militum manu munitus sit; deinde ut aditus ad Conclave triplici custodia firmari possit; tum aulam quandam ita capacem habeat, ut in ea cellulæ omnes pro Cardinalibus commode constituentur. Præterea ut Sacellum contineat pro re Divina, & electione celebranda idoneum; demum aulas aliquas pro deambulatione, & latrinas ad partes; & ita claudendum est ipsum Conclave, ut nemo inclusos videre, nemo cum eis (2) colloqui, aut ad eos quidpiam latenter transmittere, jacereve ullo modo queat.

COMMENTARIUS.

I. Contigit jam sæpe, ut Conclave extra Urbem fuerit constructum, in iis scilicet locis, in quibus diem suum extremum Romani Summi Pontifices clausierint, idque variis exemplis comprobatur, jam a nobis superius allatis. Ceterum si deinceps contingeret, ut alibi celebranda esset Pontificis electio, sta-

tuit hic noster §. *hinc esse sumendum exemplum, & curandum in primis, ut locus ipse idoneus & tutus & fidei militum manu munitus sit &c.* Licet autem electio novi Pontificis juxta præscriptum Sacrorum Canonum in eo loco debeat celebrari, ubi Pontifex diem suum extremum clausierit, consueverunt tamen Romani Pontifices, ab

(1) Ita in Veneta 1. editione, in Romana vero, *Pontificatus*. Veneta vero 1. anni 1516. & Colonienſi anni 1557. *eos alloqui*.

(2) Ita in Romana editione anni 1560. in

ab Urbe ad alia loca proficiscentes, si ante reditum in iis morerentur, Conclavis locum declarare in Urbe pro novo eligendo Pontifice. Certe Clemens VII. Bononiam profecturus, ut Carolus V. Imperiali Diademate decoraret, si ante suum ad Urbem reditum ex hac luce migrasset, Conclavis locum pro novo Pontifice eligendo declaravit in Urbe, nisi Urbs tunc Interdicto subjaceret, vel esset aperte rebellis, aut inibi de impressione dubitaretur; super quo majoris partis Cardinalium decisioni standum esse voluit; & tunc in Civitate Castellana, seu Urbevetana, vel Perusina, dummodo Ecclesiastico Interdicto subiectæ, seu rebelles non essent, novi Pontificis electionem celebrandam esse sanc-

civit, Constitutione edita pridie Nonas Octobris anno MDXXIX, quæ incipit: *Cum charissimus*, legiturque in Romano Bullario. Quod ipsum etiam postea confirmavit, cum eundem fuit Masiliam anno MDXXXIII, ad congressum cum Francisco Rege Galliarum, ut ex eodem Bullario tradit Spondanus ad prædictum annum MDXXIX. Numero v. Incipit autem alia Constitutio data anno MDXXXIII, tertio Nonas Septembris, *Licet varia*. Edidit similes declarationes nostro hoc ævo Benedictus XIII. qui tametsi Pontifex Maximus esset, sequutus tamen plurimum prædecessorum exempla, Beneventanam Ecclesiam, quam rexerat in minoribus constitutus, retinuit, eamque bis invisit.

§. VIII.

Quæ in Conclave convehenda.

In eum locum supellex opportuna convehenda est pro Cardinalibus, & eorum famulis; esculenta, & poculenta nulla, præter aquam, & confectioes, & quæ ad medicinam pertinent. Quæ vero ad cibum, & potum attinent, portantur vespere, & mane singulis diebus. Descripta summarie loci, in quo electio celebrari debet, convenienti forma, nunc ad ipsam electionem deveniendum est, cujus modum, & originem, altius aliquantulum repetere (1) non incongruit.

COMMENTARIUS.

I. **M**odica olim supellectile usos fuisse, Cardinales in Conclavi, addiscimus plane ex Ordine Romano xv. auctore Petro Amelio Cap. cxlix. ubi ita inter alia inquit: *Item ipsi Domini, Cardinales nempe, faciant parari Cameras suas cum cortinis suis & lectisterniis sine palea, nisi esset in frigoribus; item mensam, scamnum, non tamen capsam, nisi esset aperta totaliter desuper; item vas ad tenendum aquam, vinum, & alia utensilia lignea &c.*

Tum etiam paulo post subdit: *Item omni die mane & sero faciant de domibus earum portari cibaria cocta, & alia vita necessaria*; quia scilicet in Conclavi, ut juxta receptum morem tradit hic noster §. esculenta, & poculenta nulla, præter aquam, & confectioes, & quæ ad medicinam pertinent, teneri possunt. Quo ritu quæve pompa deferrentur olim cibi ad Cardinales in Conclavi existentes ab eorum familiaribus, dicemus alias suo loco.

§. IX.

Ordo eligendi Pontificis, & ratio.

Jus itaque eligendi Summi Pontificis a Christo Domino derivatum est. Ipse enim Christus primum denominatione Successorem instituit, dicens Petro: *Pasce oves meas*. Et ea ratione Petrus Clementem etiam nominavit: quod tamen ita creditur, si a Senatu Ecclesiæ Romanæ admitteretur. Senatus autem Romanæ Ecclesiæ a Petro Divina inspiratione institutus est, cum quo omnia ardua Ecclesiæ negocia explicaret; ad quemve referret, videlicet Collegium xxiv. Senatorum ex Presbyteris, & Diaconibus Romanæ Urbis instar xxiv. Seniorum, quos Agnus Dei Christus Salvator in Apocalypsi Joannis adstantes habere perhibetur. Hos enim Petrus loco assistantium Apostolorum post eorum per Orbem divisionem elegerat, & designarat, ac Consiliarios Romanæ Ecclesiæ, Coadjutoresque, atque Romani Pontificis electores instituit. Cognoscentes igitur, hujusmodi denominationis formam graviter in futurum Ecclesiæ posse nocere, Senatores non Clementem acceperunt, sed Linum elegerunt, & illum post Petrum Pontificatui Romano præesse voluerunt: quamvis deinde Clemens, decedentibus Lino, & Cleto, ab ipso Senatu electus fuerit. Hic autem mos post Petrum longo tempore fuit observatus, ut videlicet Senatores Romanæ Ecclesiæ Summum Pontificem eligerent. Ipsi autem Senatores, Presbyteri scilicet, & Diacones Urbis temporibus Sylvestri Primi Papæ sunt appellati S. R. E. Cardinales, Principes videlicet in Ecclesia: qui postea tempore Innocentii Papæ IV. quod ille in Concilio Lugdunensi cav-

(1) Ita in ipsa Veneta, & Colonienſi, in Romanæ vero, aliquantulum repetimus.

vit, pro insigni Aristocratia, & Majestatis in Ecclesia, Pileum rubrum susceperunt. Interea vero orientibus, ut assolet, in rebus humanis, scandalis, & scissuris inter eodem Senatores, reliquus Clerus Romanus, & Populus ad praesentiam solummodo exhibendam in electione Pontificis, & ejus corroborationem adjunctus est. Inde, ut plerumque fit, inducta violentia, aut aliter quomodocumque, alii etiam a Senatoribus ipsis ad ipsum actum, & jus electionis active tantum coeperunt intervenire, licet passive priscis illis temporibus, solis ipsis Senatoribus, idest, Presbyteris, & Diaconibus S. R. E. jus electionis in Summum Pontificem conveniret, prout patet ex Concilio Stephani Papae; & habetur in Decretis, LXXIX. Distinctione, Canone, *Oportebat*, cum duobus sequentibus Capitibus. Unde satis liquet, a Petro de Presbyteris, & Diaconibus S. R. E. in Summos Pontifices eligendis, qui semper fuerunt Senatores Ecclesiae, & hodie, & Stephani temporibus Cardinales nominati, Procedente, autem tempore, ad sedandas majores contentiones, & tumultus, qui ob eam rem saepe oriebantur, Romani (1) Imperatores manus ita (2) apposuerunt, ut nemo in Pontificem Canonice electus diceretur, nisi Principis Decreto esset confirmatus. (3) Unde cum Pelagius II. injussu Mauriti Imperatoris ad Pontificatum assumptus esset, Divum Gregorium Diaconum, qui ei postea successit in Pontificatu, ad se super ea repurgandum, Constantinopolim misit. Liberata post haec tempora Italia, ac Romana Ecclesia a Longobardorum durissimo jugo erepta, Hadrianus Primus, ut LXIII. Distinctione, Can. *Hadrianus*, sive Leo III. ut alii volunt, Romanum Imperium ex Graecis in Germanos transtulit, Carolumque Magnum Augustum declaravit; cui electionem Romani Pontificis, & jus ordinandae Romanae Ecclesiae concessit. Nec multo post Leo Octavus (4) Imperium Othoni Alemanorum Regi ex Saxonum prosapia primo confirmavit, LXIII. Distinctione, Can. *In Synodo*. Sed postea pientissimi Imperatores quum experientia didicissent, aliis forsan non ita piis Principibus succedentibus, hujusmodi auctoritatem Romanae Ecclesiae, & Reipublicae Christianae perniciosam fore, praesertim quoniam Romanus Pontifex a Christo institutus est, ut Imperatorem, & omnes oves pasceret, purgaret, atque spiritualiter judicaret, illa se potestate abdicarunt, jusque integrum ad Senatum Ecclesiae, & Romanum Clerum, & Populum rediit, Ludovico praesertim Imperatore statuente, atque volente, LXIII. Distinctione, Can. *Ego Ludovicus*. Ex quo pro vera Romani Pontificis suprema Monarchia satius ostendenda ad id res deducta est, ut Gregorius Quintus, Othone III. consentiente, Imperatores de cetero a nonnullis Principibus Spiritualibus, & Secularibus fore eligendos sanxerit, & sic ad Summum Pontificem Dei vices gerentem in terris, tanquam ad eum, per quem Reges regnant, supremum Christianae Monarchiae Principem Romani Imperii moderationem pertinere significaverit.

COMMENTARIUS.

I. **D**E varia eligendi Summi Romani Pontificis forma, quae pro temporum ratione in Ecclesia viguit, actum abunde a nobis jam fuit Tomo III. Conciliorum, in Commentario ad Canonem I. Concilii III. Oecumenici Lateranensis. Sed operae pretium est, ut alia quaedam nunc notemus, quae in recitata hujus §. narratione continentur: *Jus*, inquit, *eligendi Summi Pontificis a Christo Domino derivatum est; ipse enim Christus primum denominatione Successorem instituit, dicens Petro, Joannis* Cap. ultimo, *Pasce oves meas*. His verbis S. Petrum fuisse creatum a Christo Summum Ecclesiae Pastorem, & Pontificem, Sancti Patres tum Graeci, tum Latini affirmant, inter quos S. Chrysostomus in aureo Tractatu, *De Sacerdotio*, quem nos in Libros, & Capita partitum Notis auximus, Lib. II. Cap. I. sic inter alia inquit: *Qua-*

nam item de causa idem ille, Christus nempe, Sanguinem effudit suum? Certe ut oves eas acquireret, quarum curam tum Petro, tum Petri Successoribus committebat; & S. Gregorius Libro IV. Epistola XXXII. ad Mauritium Imperatorem data ita locum ipsum, ac alia Christi Domini exponit: Cunctis Evangelium scientibus liquet, quod voce Dominica Sancto, & omnium Apostolorum Petro Principi Apostolo totius Ecclesiae cura commissa est. Ipsi quippe dicitur: Petre amas me? Pasce oves meas. Ipsi dicitur: Ecce Satanas expetit cribrare vos sicut triticum, & ego pro te rogavi Petre, ut non deficiat Fides tua, & tu aliquando conversus confirma Fratres tuos. Ipsi dicitur: Tu es Petrus, & super hanc petram aedificabo Ecclesiam meam, & portae inferi non praevalerunt adversus eam. Et tibi dabo claves Regni Caelorum; & quodcumque

(1) Ita in Veneta I. & Colon. editionibus, in Romana vero, *Principes*. (2) Ita quoque in ipsis Veneta, & Colonienfi, in Romana deest *ita*, legiturque, *manus apposuerunt, nemoque Canonice electus putabatur, nisi &c.*

(3) Verba illa, *Unde cum Pelagius &c.* usque ad *misit*, leguntur in editione Romana, sed desunt in Veneta I. & Colon.

(4) Ita in ipsis Veneta, & Colonienfi, in Romana vero legitur, *Clerici & populo benevolente idem confirmavit Othoni I. & ejus Imperio Romano successoribus*. Deinde quoque etiam variat, nam inquit: *Sed piissimi deinde Principes cum experientia didicissent, hujusmodi potestatem Romana Ecclesia, & Reipublica Christiana perniciosam fore, illa se abdicarunt; rursumque ad Clerum, & populum res rediit &c.*

que ligaveris super Terram, erit ligatum & in Cælis; & quodcumque solveris super Terram, erit solutum & in Cælis. *Ecce claves Regni Cælestis accipit: potestas ei ligandi, & solvendi tribuitur: cura ei totius Ecclesiæ, & principatus committitur.* Eadem & alii Patres tam Latini, quam Græci docent, quorum loca recenset inter alios insigniores Theologos Cardinalis Bellarminus Lib. 1. *De Romano Pontifice*.

II. Pergit nostrum Cæremoniale, aitque, eadem ratione, qua Christus Petrum Pontificem constituit, *Petrum Clementem etiam nominasse: quod tamen ita creditur, si a Senatu Ecclesiæ Romanæ admitteretur.* Linus ne, an Clemens proximus post Petrum Pontifex fuerit, discrepat inter veteres Scriptores. Tertullianus in Libro, *De præscriptionibus adversus hæreticos*, Capite xxxii. *Clementem a Petro ordinatum*, ex vetustis monumentis tradit. Consentit S. Hieronymus tum Lib. 1. *adversus Jovinianum*, Cap. vii. tum Commentario in Isaiam, Cap. lxi. fuitque hæc sententia Patrum Latinorum usque ad Seculum iv. quamquam laudatus Hieronymus in Libro, *De Viris illustribus*, Cap. xv. ubi de Clemente loquitur, eum affirmet *quartum post Petrum Romanum Episcopum fuisse, secundum Linum, & tertium Cletum*. Proximus igitur, ut inter alios in Lini Vita observat Antonius Sandinus, Petri successor est Linus ex S. Hieronymo, cujus opinio testimoniis confirmatur S. Irenæi Lib. iii. *adversus hæreses*, Cap. iii. Eusebii Lib. iii. *Historiæ Ecclesiasticæ*, Cap. II. & Lib. v. Cap. vi. S. Epiphaniî Hæresi xxvii. Optati Milevitani Lib. II. S. Augustini Epistola lxi. & Theodoretî in secundam Pauli Epistolam ad Timotheum, Cap. iv. Lino ex eorundem Scriptorum auctoritate subjiaciendus Cletus, quem omnes, si Epiphanium, & Hieronymum excipias, Anacletum vocant. Optatus vero, & Augustinus non Lino, sed Clementi sufficiunt, ut in memorati Lini Vita idem Sandinus notavit.

III. Magnus Annalium Parens Cardinalis Baronius, cujus sententiam præ ceteris probant Natalis Alexander, Bollandus, Cotelierius, Tillemontius, alique Viri docti, & critici, ad annum LXIX. Num. xlii. sequutus Epiphanium in citata Hæresi xxi. §. vi. scribit S. Clementem accepisse quidem a S. Petro Episcopatum, sed cedentem juri suo, collatam sibi dignitatem recusasse, ut Linus, & Cletus Petri ipsius in Episcopali munere adjutores, alius post alium electus per suffragia Cleri Romanam Ecclesiam gubernarent. Qua ex re componitur controversia, quæ intercedit inter Scriptores memoratos, quorum alii Linum, alii Clementem proximum post Petrum Pontificem fuisse contendunt. Quemadmodum enim, qui Linum Petro suggerunt, ii Clementem a S. Petro Ecclesiæ Episcopum constitutum non negant, ita qui dicunt, Clementem Petri adhuc superstitis Successorem designatum, non inficiantur, illum vivo Lino, & Cleto, constanter recusasse delatum sibi a Petro honorem Pontificatus. Legendi hanc in rem Cotelierius in Constitutiones Apostolicas Lib. vii. Cap. xlv. & Petrus Coustant in illa sua celebri Dissertatione, *De proximis B. Petri successoribus*, quam præfixit suo Tomo i. Epistolarum Romanorum Pontificum.

IV. Sponte itaque sua recusavit Clemens delatum sibi a S. Petro Pontificatum, labique vi-

detur Augustinus Patricius in hoc §. ubi inquit, Senatum Romanæ Ecclesiæ, seu electores Pontificis jam ab ipso Petro institutos, *cognoscetes hujusmodi denominationis formam, graviter in futurum Ecclesiæ posse nocere, non Clementem accepisse, sed Linum elegisse, & illum post Petrum Pontificatui Romano præesse voluisse, quamvis deinde Clemens, decedentibus Lino & Cleto, ab ipso Senatu electus fuerit.* Quicquid autem de ea re sit, fuit certe aliquando mos, ut Episcopi sibi Successorem designarent, eoque jure recte ac sapienter usi sunt complures antiqui Antistites, cum quos sanctissimos scirent, eos ad Episcopale munus deligerent, ut prodit Baronius ad annum cxxxvi. Num. xlii. variisque exemplis ostendit Thomassinus, Parte II. *Disciplina*, Libro II. Cap. lv. & sequenti. Ceterum Hilarus Papa vetuit id quidem in suo Romano Concilio, quod anno cdlxv. celebravit in Basilica Sanctæ Mariæ die xvi. Kalendarum Decembris, ut habent Acta, quæ correctiora edita sunt, quam antea fuerant, a Christiano Lupo in fine Tomi i. Epistolarum Casinensium. Quinque editi sunt in eo Concilio Canones ad constituendam Ecclesiæ disciplinam, atque horum postremo cautum est, nequis Episcopatus sibi eligeret Successorem, uti notat Pagius in memorati Hilari Pontificis Vita, Numero vii.

V. Ante Hilarum Papam prohibuit jam inter alias Antiochena Synodus anni cccxli. Canone xxiii. juxta interpretationem Dionysii Exigui, ne Episcopi suos sibi Successores adsciscant, jubetque, ut defunctis suo fato Episcopis, tum vera electio a Synodo Provinciæ celebretur: *Episcopo non licere pro se alterum Successorem sibi constituere, licet ad exitum vitæ perveniat. Quod si tale aliquid factum fuerit, irritum esse hujusmodi est constitutum. Servetur autem Jus Ecclesiasticum id continens, oportere non aliter fieri, nisi cum Synodo, & judicio Episcoporum, qui post obitum quiescentis, potestatem habent eum, qui dignus extiterit, promovere.* Notat Thomassinus citato loco, Nuni. vi. non damnari hoc Canone quorundam Episcoporum sanctissimorum libertatem, qui ostenderant, quos optarent, quos optimos judicarent fore Successores: non eligi fecerant, non ordinaverant: totum Concilio Provinciali permiserant, ut factam a se designationem ratam, irritamve faceret. Ea porro vox *constituere* id sonat, ut non ostendatur tantum, & proponatur Successor, sed ut instituat, & mittatur in possessionem; adeout pervertatur, irriteturque, & Cleri Populique electio, & Concilii Provincialis auctoritas, & aliquo saltem temporis puncto duo sint Episcopi unius Ecclesiæ contra Statutum Niceni i. Concilii, Can. vii. quo cautum est, ne in una Civitate duo sint Episcopi. Tenendum plane illud est, ea designatione Successorum facta a quibusdam sanctissimis Episcopis nihil detractum fuisse libertati suffragiorum Populi, Cleri, & Episcoporum Provinciæ, a quibus olim Successoris Canonica celebrabatur electio; poterant isti alium præferre designato Successori.

VI. Quod Romanos Pontifices spectat, jam non desunt Auctores relati a Fagnano in Capite, *Accepimus*, v. *De pactis*, qui censent, posse Papam sibi Successorem substituere, suamque ipsorum opinionem variis argumentis firmare conantur, quæ tamen idem Fagnanus citato loco egregie

gie confutat contrariam opinionem propugnans. Ajunt Christum Dominum suo arbitrio Petrum sibi Successorem instituisse, cum post resurrectionem ei dixit, Joannis Cap. XXI. *Pasce oves meas*. Sed ineptum est hoc argumentum; nam Christus uti supremus Dominus potuit de re sua, idest Ecclesia, quam suo Sanguine fundavit, absolute disponere; non sic autem alii Pontifices, qui non Domini, sed dispensatores existunt, uti docet Cardinalis Turrecremata in Summa, *De Ecclesia*, Lib. II. Cap. II. Præterea, ut scite, inquit Augustinus Triumphus in Libro, *De potestate Ecclesiæ*, Questione II. Articulo II. *Christus fuit Deus, & homo, ideoque in suo judicio non potuit falli, neque fallere; sed quia judicium humanum est fallibile, quia purus homo potest falli, & fallere, ideo conveniens fuit post Christi ascensionem, & post mortem illius, qui immediate a Christo electus fuit, ut promotio cujuslibet alterius Summi Pontificis fieret per electionem, ut ex collatione, & concordia plurium talis electio careret errore, & mereretur suscipere divinam inspirationem*. Hactenus Augustinus Triumphus.

VII. Ineptum quoque est argumentum, quod adversarii opponunt, Petrum sibi elegisse Successorem in Pontificatu Clementem. Nam primo, uti quidam respondent, non est trahendum in exemplum, factum S. Petri Successorem sibi Clementem substituentis; moveri siquidem potuit ille inspiratione Divina. Secundo caruit & illa effectu suo substitutio, utpote quam minime S. Vir acceptavit, sed Petro immediate successit Linus, & Lino Cletus, Cleto autem deinde Clemens, uti supra ex Sanctis Patribus, aliisque priscis Scriptoribus dictum est, constatque ex Martyrologio Romano, Breviario item Romano, & Canone Missæ, ubi post Linum, Cleti, & deinde Clementis fit commemoratio, licet non desint, qui proximum Petri Successorem Clementem statuerint; unde Glossa in Can. I. Causa VIII. Questione I. recitat versum.

Disputat hic Mūdus, quartus, fueritve secundus? Etenim, ut inquit Glossa ibidem, post S. Petrum animadvertens Clemens perniciosum fore exemplo, ut aliquis sibi eligeret Successorem, renuntiavit Papatui, in manibus scilicet Sacerdotum, qui tunc Romæ aderant. Ceterum ex communi eruditorum sententia, supposititia est illa Clementis Epistola ad Jacobum Fratrem Domini scripta, in qua de sua substitutione in Romanum Pontificem a S. Petro in fine vitæ facta ita inquit: Simon Petrus in ipsis diebus, quibus vitam sibi præsensit, apprehensa manu mea, repente consurgens, in auribus totius Ecclesiæ hæc protulit verba: Clementem hunc Episcopum vobis ordino, cui soli meæ prædicationis, & doctrinæ Cathedram trado.

VIII. Perperam præterea factum Bonifacii II. Papæ objicitur, quod sibi Vigilium Successorem elegerit; ex ipso quippe facto magis magisque contraria sententia confirmatur. Duas sub Bonifacio ipso Pontifice Romanas Synodos ex Anastasio explicat ad annum DXXXI. Baronius, in quarum prima congregata in Basilica S. Petri Bonifacius, ut occurreret licentiæ Regum Gothorum in designandis Pontificibus, de qua diximus Tomo III. Conciliorum in Commentario ad Canonem I. Concilii III. Lateranensis, fecit Constitutum, ut sibi Successorem

To. I.

ordinaret: quo Constituto cum Chirographis Sacerdotum, & jurejurando ante Confessionem Beati Petri Diaconum Vigilium constituit, idest Successorem in Pontificatu. Baronius scribit, quod cum ipsi Gothorum Reges impie sibi usurpassent Romani Pontificis electionem, ad hujusmodi usurpatam licentiam ex Gothorum manibus extorquendam, Bonifacius Ecclesiæ consultum esse judicaverit, ut nullo relicto Sedi vacanti loco, Successorem sibi eligeret. Quod licet speciem quandam justitiæ præferret, postea tamen ab omnibus est reprobatum, atque rescissum. Nam ut subdit idem Anastasius in Bonifacii II. Papæ Vita, eodem tempore, seu non multo post, facta iterum Synodo, hoc censuerunt, cassaverunt, Sacerdotes omnes propter reverentiam Sanctæ Sedis, & quia contra Canones hoc fuerat factum, & quia culpa eum, idest Bonifacium, respiciebat, ut Successorem sibi constitueret, ipse Bonifacius Papa reum se confessus est majestatis, quod Diaconum Vigilium sui subscriptione Chirographi, & ante Confessionem Beati Petri Successorem constitueret, ac ipsum Constitutum in præsentia omnium Sacerdotum, & Cleri, & Senatus incendio consumpsit. Idem Baronius ait, Bonifacium reum majestatis ex ea parte Gothi videri potuisse, quod contra Regis voluntatem, ad quem Romani Pontificis electionem spectare Theodoricus statuerat, Successorem sibi instituisset. Sed quod addit illud constitutum in priori Synodo Romana fuisse a Bonifacio ambitione, & consilio Vigilii, constare ex Decreto anathematis Silverii Papæ in Vigilium, subsistere non potest, cum Decretum illud sit supposititium, ut in Vita Silverii Pontificis docet Pagius, Numero VII.

IX. Haud tamen negaverim, quin multa exempla in Romanorum Pontificum Vitis occurrant, quibus docemur, Pontifices sibi Successores substituisse. Verum si accurate considerentur, jam illæ non fuerunt substitutiones Successorum, sed potius designationes, uti observat Fagnanus in citato Capite, *Accepimus, De patris*. Pontifices enim a Cardinalibus rogati indicabant quem dignum putarent Cathedra Petri, salvis Cardinalium suffragiis. Ideoque nullus ex designatis post obitum Pontificis designantis gessit se pro Papa, nisi post subsequutam Cardinalium electionem. Sic S. Gregorius VII. Salerni ante tertiam diem sui obitus rogatus ab Episcopis, & Cardinalibus, qui tunc aderant, ut de Romanæ Sedis post obitum suum ordinatione juberet, hortatus est, ut Desiderium, ex Principibus Beneventanis primum Monachum, deinde Abbatem Casinensem, & S. R. E. Presbyterum Cardinalem Tituli S. Cæcilie Pontificem facerent, aut Lugdunensem Episcopum Hugonem, aut Ottonem Ostiensem Episcopum, aut denique Lucensem eligere quantocius se defuncto studerent. Sicque post ejus mortem reluctans electus fuit anno MLXXXVI. a Cardinalibus Desiderius ipse, & Victor III. dictus. Idem Victor post duorum annorum Pontificatum & vita discessurus teste Leone Ostiensi in Casinensi Chronico, Lib. III. Cap. LXIV. convocatis Episcopis, & Cardinalibus, monuit & ipse, ut juxta laudatum Gregorii VII. Papæ statutum Ottonem Episcopum Ostiensem ibi tunc præsentem eligerent quamprimum Pontificem; electusque is fuit anno MLXXXVIII. & vocatus est Urbanus II.

D

Ce-

Ceterum observandum est, quod in ejusdem Urbani Vita notat Pagius, Victorem scilicet Papam, quod de Successore sibi eligendo decrevit, non imperando fecisse, sed sicut decessor ejus Gregorius fecerat, admonendo, & exhortando, quod id ejus ævi iniquitas postularet. Unde ii, ad quos pertinebat electio, scientes non posse, nec debere a morientibus Pontificibus Successores eligi, non sine consueti collatione suffragii nominatum ab ipso Victore III. evexerunt in Apostolicum Thronum, uti rem fuse narrat idem Pagius in Urbani II. Vita.

X. Omisissis id genus exemplis, ex pervertusta, & cœva Christianæ Religionis disciplina spectat profecto Præfulum electio ad Senatum cujusque Ecclesiæ. Teste auctore hujus Cæremonialis Augustino Patricio, *Senatus Romanæ Ecclesiæ a Petro divina inspiratione institutus est, cum quo omnia ardua Ecclesiæ negotia explicaret*. Senatus Ecclesiæ dictus est Clerus, ac præsertim Cœtus Presbyterorum, ejusque meminit non uno in loco S. Hieronymus, præsertim in Epistola ad Rusticum relata in Can. *Ecclesiæ*, xvi. Quæstione 1. *Ecclesiæ*, inquit, *habet Senatum, Cœtum Presbyterorum*. Idem in Isaiam Cap. 111. *Et nos*, inquit, *habemus in Ecclesiæ Senatum nostrum, Cœtum Presbyterorum*. Longe ante S. Hieronymum S. Ignatius in Epistola ad Trallianos, Senatum ipsum vocat *Sacrum Cœtum, Concilium, & assessores Episcopi*. Cui concinit antiquus Auctor Apostolicarum Constitutionum Libro II. Cap. xxviii. ubi appellantur, *Consiliarii Episcopi, & Corona Ecclesiæ, Consilium, & Senatus Ecclesiæ*. Morem autem fuisse Ecclesiæ antiquissimum, ut sine confesso, & consilio Cleri nihil Episcopus perageret, testem habemus S. Cyprianum in Epistola sua xxviii. ad Presbyteros, & Diaconos ita scribentem: *Desiderastis quoque, ut de Philumeno, & Fortunato Hypodiaconis, & Favorino Acolyto, qui medio tempore recesserunt, & tunc venerunt, quid mihi videatur, rescribam. Cui rei non potui me solum Judicem dare, cum multi adhuc de Clero absentes sint*. Idipsum & in aliis Epistolis suis idem Cyprianus affirmat, eademque erat aliarum prisca Ecclesiarum disciplina, quam enarrat Thomassinus Parte II. Lib. 111. Cap. vii.

XI. Ad Romanam Ecclesiam quod attinet, non addubito, quin ea ibidem a S. Petro statuta fuerit disciplina, ut cum ipsius Ecclesiæ Senatu, seu Clero Pontifex omnia ardua Ecclesiæ negotia explicaret. Auctor est S. Epiphanius Hæresi xlii. Marcionem venisse Romam sub Hygino, qui electus fuit Papa anno CXXXVII. conatumque per præstigias nescio quas illaqueare Presbyteros, qui eam regebant Ecclesiam, & cum Apostolis versati fuerant: *Eo statim ac Marcion pervenit, Seniores adiens, qui ab Apostolorum discipulis edocti adhuc supererant, ut in communionem admitteretur, ab iis frustra petiit*. Juxta veterem vel Romanæ Ecclesiæ disciplinam Siricius Papa, qui ad Apostolicam Sedem evectus fuit anno ccclxxxiv. confixit Jovinianum, novellamque ejus hæresim in Synodo Presbyterorum, & Diaconorum, cui Presbyterium nomen erat, uti ex ejusdem Pontificis Epistola II. liquet: *Facto ergo Presbyterio constitit, Christianæ Legi esse contraria, quæ docebat Jovinianus. Omnium nostrum tam Presbyterorum, quam Diaconorum, quam etiam totius Cleri una suscitata fuit sententia*.

Hoc Papæ Decretum accepit S. Ambrosius, illudque in Synodo suæ Provinciæ Episcoporum confirmavit, unde & ad eum ita rescripsit: *Quos Sanctitas tua damnavit, scias, apud nos quoque secundum judicium tuum esse damnatos*. Tandem, ut alios omittam Romanos Pontifices, Felix III. ordinatus Papa anno CDLXXXIII. depositionis sententiam in pseudoepiscopum Antiochenum Petrum Cnaphem contorquens, eandem suo, & eorum nomine promulgavit, qui una secum Apostolicum Thronum regerent, hoc est, Presbyterorum, & Diaconorum Ecclesiæ Romanæ, ut ex illius Epistola iv. addiscimus: *Firma sit hæc tua depositio a me, & ab his, qui una mecum Apostolicum Thronum regunt*.

XII. Quod de Siricio, & Felice attigimus, perspicue demonstrat, quod fuse explicat Thomassinus citato loco, Presbyteros, Diaconosque Romanos Romanis Conciliis interesse solitos cum Episcopis, qui forte tum Romæ reperiebantur, & una cum Pontifice cognovisse de causis omnibus, quæ ad primariam principemque Ecclesiam toto ex Orbe referebantur. Hæc erat & aliarum omnium forma Ecclesiarum, seu Metropolitanarum, seu Cathedralium. Causæ omnes ibi, seu temporales, seu spirituales, Cleri superioris conspiratione, & judicio terminabantur, hoc est Presbyterorum, & Diaconorum cum Episcopo. Atque ex his splendet Capitulum antiquitas, dignitasque summa, Collegii scilicet Presbyterorum, & Diaconorum Episcopo adunatorum in tractandis negotiis Ecclesiæ Cathedralis, imo & Throni Romæ Apostolici. Eorum enim cum Episcopo unus erat Senatus, unum Consilium, unum Ecclesiæ totius regimen, cujus ab imperio Clerus, populusque reliquus pendebat. Romæ ab ipsis Presbyteris Diaconisque non eæ tantum res tractabantur, quæ ad Diœcesin, sed etiam quæ ad Metropolim Romanam spectarent, ad earumque disceptationem, ac judicium vocabantur Presbyteri ipsi, atque Diaconi Cleri Romani. Ut intelligas Clerum superiorem Metropolitanæ, Primatis, Patriarchæ, adeoque Summi Pontificis, illum esse Senatum, ad quem referantur causæ omnes, quæ ad ipsum Præfulem perferuntur, quocumque se exporrigat ejus potestas. Certe Concilio 111. Romano sub Felice Papa III. Presbyteri omnes Romani subscribunt, nec filetur adstantium Diaconorum præsentia: *Adstantibus quoque Diaconibus*.

XIII. Perinde est de Concilio Romano sub Hilario Pontifice, ubi actum est de transferendo Episcopo ab Ecclesia Hispaniæ una ad alteram. Præter Papam, & Episcopos adfuere Presbyteri, Diaconique Ecclesiæ Romanæ, Presbyteri sedentes, Diaconi stantes: *Residentibus etiam universis Presbyteris, adstantibus quoque Diaconibus*. Applausus, & acclamationes etiam ab Episcopis, & Presbyteris fiebant, sive ad confirmandam Papæ sententiam, sive ad prosperam illi, longævamque vitam imprecandam: *Ab universis Episcopis, & Presbyteris acclamatum est, ut disciplina servetur, ut Canones custodiantur, rogamus*. Hilario vita &c. Applaudunt quoque, & acclamant similiter Presbyteri cum Diaconis in Concilio Romano sub Gelasio Papa I. & quod magis magisque notandum est, compluribus in Romanis hisce Conciliis lites dirimebantur, aliis ex Provinciis, imo & a Patriarchatibus aliis ad Papam devolutæ, nec alibi primum, quam in ejus

ejus Senatu, seu Consistorio Presbyterorum, & Diaconorum disceptandæ, quod olim Romæ *Presbyterium* dicebatur. Ex his itaque manifestissime patet, vel primis Ecclesiæ adolescentis temporibus Clerum superiorem Romanæ præsertim Ecclesiæ, qui ex Presbyteris, ac Diaconis constabat, in Consilium, & Senatum Pontificis coaluisse, & tum spiritualement, tum etiam temporalem administrationem Ecclesiæ capeffivisse, cum eoque Pontificem, vel omnia ardua Ecclesiæ negotia explicuisse, idque ex S. Petri institutione, ut docet Auctor nostri hujus Cæremonialis Augustinus Patricius.

XIV. Eodem teste Patricio, *ipsi Senatores, Presbyteri scilicet, & Diacones Urbis, temporibus Silvestri Primi Papæ sunt appellati S. R. E. Cardinales, Principes videlicet in Ecclesia*. Cardinalis, si vocis significatum spectes, idem est, quod principalis, nam olim virtutes quædam a S. Ambrosio Lib. 1. *De Officiis*, Cap. xxiv. aliisque Patribus vocatæ sunt cardinales, quasi principales, & a Phycis venti cardinales, atque ab Ecclesiasticis Scriptoribus Presbyteri, vel Diaconi Cardinales. Complures Auctores ejus vocis originem ad Romanum Concilium anni cccxxiv. sub S. Silvestro celebratum referunt, ubi Canone vi. legitur, in Ecclesia Romana septem fuisse *Diaconos Cardinales*; eamque sententiam sequutus est inter alios Patricius. Verum supposititia est Synodus ipsa, quæ in ejusdem S. Silvestri Actis tertio Kalendas Junii post baptizatum Constantinum Imperatorem, eo præsentente collecta dicitur, Hincmaro Remensi, Petro de Marca, Labbeo, Lupo, aliisque Viris eruditibus. Quomodo enim die trigesima mensis Maji anni cccxxiv. Synodus illa celebrari potuit præsentente Constantino, qui toto illo anno bello Liciniano occupatus, in Oriente versatus est, ut videre est in Critica Baroniana ab erudito Pagio scripta. Ejus Synodi plurima supposititia capita retulit Schellstratius in secunda parte antiquitatis illustratæ, Dissertatione III. Cap. viii. Legendus autem Natalis Alexander in Historiam Ecclesiasticam Seculi iv.

XV. Quicquid sit de ea S. Silvestri Papæ Synodo, notissimum plane fuit vel a primis seculis Cardinalium in Ecclesia nomen, sed diversorum tamen ab iis, qui recentioribus seculis S. R. E. Cardinales dicuntur. Episcopus quippe Cardinalis antiquitus dictus fuit omnis ille Episcopus, qui Ecclesiæ alicui Cathedrali erat intitulatus, five incardinatus, idest proprius illius Ecclesiæ Episcopus. Similiter quoque Presbyter, aut Diaconus Cardinalis vocatus est, qui alicui Ecclesiæ, aut loco pio tanquam ordinarius, & proprius Presbyter, aut Diaconus, intitulatus, five incardinatus erat; eoque nomine appellabantur, quia sicut cardo fixus est, & immobilis, ac circa illum valvæ volvuntur; ita quoque circa ipsos Episcopos, Presbyteros, Diaconosque, tanquam fixos, & proprios Ecclesiarum cardines populus eorum curæ commissus in Ecclesiastico regimine, & animarum cura quodammodo volveretur. Tradit hæc Vanespen Parte 1. *Juris Ecclesiastici universi*, Titulo xxii. Capite 1. ubi etiam scite subdit, Episcopos, Presbyteros, & Diaconos Cardinales in hoc unice ab aliis non Cardinalibus distingui olim consuevisse, quod illi tanquam proprii, & quasi fixi, ac immobiles Ministri, Ecclesiis suis essent inti-

To. I.

tulati: hi vero tanquam adventitii, & subsidarii alicui Ecclesiæ essent assignati; atque ita juxta veterem Cardinalium nomenclaturam bodierni Parochi vere dicerentur Presbyteri Cardinales: Vicepastores vero non Cardinales. Hoc quidem sensu Gelasius I. in Litteris ad Cælestinum Episcopum apud Gratianum Can. iv. Distinctione xxiv. Pontificem Cardinalem opponit Pontifici, seu Episcopo Visitatori, qui scilicet dumtaxat ad tempus alicui Ecclesiæ tanquam Visitator invigilat.

XVI. Crebrum est in Epistolis S. Gregorii Magni Cardinalis nomen, sed nequaquam Ecclesiæ Romanæ proprium, sed ad omnes prorsus Ecclesias pertinebat, ut variis exemplis ostendit Thomassinus Parte 1. *Disciplina*, Libro II. Cap. xv. & sequenti; additque Vanespen loco citato, etiam Seculo xi. Presbyteros Ecclesiarum Parochialium dictos fuisse Cardinales. Atque hoc sensu intelliguntur Sacerdotes Cardinales in Cap. II. *De officio Archipresbyteri*, quos etiam antiquus Glossographus vocat *principales*, & in Corpore Juris Canonici correcto editionis Antuerpiensis anni MDCXLVIII. ad marginem notatur ex Antonio Augustino: *Cardinales Sacerdotes hoc loco non Urbis tantum Romæ, sed aliarum etiam Civitatum primos interpretamur, quibus tituli, idest, Parochiæ committuntur*. Auctor quidem dictæ Decretalis dicitur *Leo Papa* absque expressione ulteriori; sed laudatus Antonius Augustinus eruditissimus monet, Leonem IX. appellari a quibusdam ex veteribus Libris. Si ea itaque inscriptio vera sit, vel ex hac Decretali habemus, etiam ætate Leonis IX. idest circa medium Seculi xi. Parochialium Ecclesiarum Rectores fuisse dictos Sacerdotes Cardinales. Ceterum tametsi commune esset Cardinalis vocabulum Presbyteris, Diaconisque aliarum Ecclesiarum, summa tamen fuit potestas, dignitasque Cardinalium Ecclesiæ Romanæ tum priscis seculis, uti superius probatum est, tum vero maxime seculis sequioribus, præsertim cum soli ipsi cæpere eligere Romanum Pontificem, uti addiscimus ex S. Petro Damiani, qui Seculo xi. omni virtutum laude florebat. Sic enim ille Libro 1. Epistola xx. inquit: *Romanæ Ecclesiæ Cardinales Romanum Pontificem principaliter eligunt, & quibusdam aliis prærogativis non modo quorumlibet Episcoporum, sed etiam Patriarcharum, atque Primatum jura transcendunt*.

XVII. Quando soli Cardinales Ecclesiæ Romanæ eligere cæperint Summum Pontificem, notavimus jam nos Tomo III. Conciliorum in Commentario ad Canonem 1. Concilii III. Lateranensis, ubi diximus Alexandrum III. removisse omnino Clerum ab ea electione, *assumptis in Ordinem Cardinalium, qui inter Clericos præcipui erant, vel eorum officiis penitus extinctis &c.* Fuit enim vetus non modo aliarum Ecclesiarum, sed & ipsius Romanæ disciplina per xii. secula fere servata, ut Pontifices Cleri, populi que suffragiis eligerentur, uti passim eruditi Scriptores docent; lapsusque est omnino Patricius, cum ait primum, morem post Petrum longo tempore fuisse observatum, *ut videlicet Senatores Romanæ Ecclesiæ, quos eo nomine Cardinales appellat, Summum Pontificem eligerent*; & deinde subjicit, quod *orientibus, ut assolet in rebus humanis, scandalis, & scissuris inter eosdem Senatores, reliquus Clerus Romanus, & Populus*

D 2

ad

ad præsentiam solummodo exhibendam in electione Pontificis, & ejus corroboracionem adjunctus est. Porro evidenter ostendit inter alios Thomassinus Parte II. Lib. II. Cap. I. & seqq. Episcoporum non modo, sed & Romani Pontificis electionem totam fere semper pependisse e Cleri populi que suffragiis; eique licet bis terve solum se inferuerint Gothorum Reges, his tamen demum devictis, recuperatoque Romanæ Urbis Principatu, ita eandem sibi vindicasse Justinianum, ac suis transmississe Successoribus, ut libera Clero & populo relinquerentur suffragia, sola sibi retenta Pontificis electi confirmatione, antequam is ordinari posset.

XVIII. Rursus labitur idem Patricius, quum ait, *præcis temporibus solis ipsis Senatoribus, idest, Presbyteris, & Diaconibus S. R. E. jus electionis passivæ in Summum Pontificem convenisse, prout patet ex Concilio Stephani Papæ, ejus scilicet nominis, III. & habetur in Decretis, lxxix. Distinctione, Canone, Oportebat, cum duobus sequentibus Capitibus.* Ex Anastasio Decretum recitat Gratianus in citata Distinctione Canone III. cujus verba hæc sunt: *Oportebat, ut hæc sacrosancta Domina nostra Romana Ecclesia, juxta quod a Beato Petro, & ejus Successoribus institutum est, rite ordinaretur, & in Apostolatus culmen unus de Cardinalibus Presbyteris, aut Diaconis consecraretur.* Ex quibus verbis colligi videtur, quod & notavit post Pagium eruditus Sandinus in Vita Stephani III. qui electus Pontifex fuit anno DCCLXVIII. ex Decreto quidem Stephani *solis Presbyteris, & Diaconis Cardinalibus Summum Pontificatum fuisse reservatum, cum antea etiam Subdiaconi Pontifices crearentur.* Observat Baronius ad annum DCXIV. Num. I. & Thomassinus Parte I. Disciplina, Libro II. Cap. XXI. Num. XX. *Adeodatum, seu Deusdedit primum omnium e Subdiacono contra Leges Ecclesiæ creatum fuisse Papam.* Sed lapsi quoque & hi præstantissimi Auctores sunt; exemplar enim Anastasii, quo usus est Baronius, ita habet: *Deusdedit, seu Adeodatus, filius Stephani ex Subdiacono sedit annos tres.* Sed hunc tamen Anastasii locum alii ita restituunt: *Deusdedit ex patre Stephano Subdiacono; atque ajunt, Deusdedit non fuisse Subdiaconum, sed Subdiaconi filium.* Ceterum tametsi præferenda sit ea Anastasii lectio, qua usus est Baronius, lapsus adhuc fuit Auctor hic Eminentissimus, quum ita de Adeodato ad ipsum annum DCXIV. Num. I. scripsit: *Ut autem Subdiaconus Romanus Pontifex crearetur, nunc primum accidit absque Majorum exemplo.* Testatur namque Liberatus Diaconus Silverio Papæ æqualis in suo Breviario Cap. XXI. eundem *Silverium Subdiaconum creatum fuisse Romanum Pontificem, anno scilicet DXXXVI. ideoque longe ante Adeodatum.*

XIX. Licuit itaque Subdiaconos eligere in Summos Romanos Pontifices usque ad Stephanum III. aliis IV. in cujus Synodo Romana anno DCCLXIX. celebrata sub anathemate interdictum est, *ne ullus unquam præsumat laicorum, neque ex alio Ordine, nisi per distinctos gradus ascendens, Diaconus, aut Presbyter Cardinalis factus fuerit, ad Sacrum Pontificatus honorem promoveri; ut est apud Anastasium in Vita Stephani III. Atque ex Decreto erui posse videtur, quod notat Pagius in Vita Deusdedit Pontificis,*

tunc tantum Subdiaconos a Pontificatu exclusos, cum ex Liberato laudato habeamus, Silverium ex eo Ordine ad Pontificatum assumptum, nemine hanc ei incapacitatem objiciente; & ex Anastasio incertum remaneat, an ipse etiam Deusdedit, seu Adeodatus fuerit ante suam electionem solum Subdiaconus; quod probabilius videtur, nam posterior lectio habet quidem, eum fuisse Subdiaconi filium, sed non negat, ipsum etiam fuisse Subdiaconum, quod prior lectio diserte habet. Porro celebravit Stephanus suam Romanam Synodum potissimum adversus Constantinum pseudopontificem, quem adhuc laicum existentem, antequam Paulus Papa I. spiritum exhalaret, frater ejus Toto Dux Neapolitanæ Civitatis per vim in Sedem Pontificiam intrusit, fecitque per Georgium Prænestinum Episcopum licet reluctanter in Clericum tonsurari; alio vero die, inquit Auctor Vitæ Stephani III. Anastasio vulgo tributæ, *illucescente secunda feria, Subdiaconus, atque Diaconus ab eodem Episcopo contra Sanctorum Canonum instituta consecratus est; sicque universum populum sibi sacramentum præbere fecit, & adveniente Dominico die, rursus cum multitudine armatorum exercituum in Basilicam Beati Petri properans, Pontifex ab eodem Georgio Episcopo Prænestino, & aliis duobus Episcopis, Eustratio Albanense, & Cironato Portuense consecratus est; & per anni spatium, & mensem unum Sedem Apostolicam invasam detinuit.*

XX. Sed hisce omisiss, scite illud notat Patricius, *procedente tempore, ad sedandas majores contentiones, & tumultus, qui ob eam rem, ob electionem scilicet Romani Pontificis, sæpe oriebantur, Romanos Imperatores manus ita apposuisse, ut nemo in Pontificem Canonice electus diceretur, nisi Principis Decreto confirmatus.* Electionem Romani Pontificis, devictis a se Gothis, recuperatoque Romanæ Urbis principatu, vindicavit sibi quidem Justinianus Imperator, suisque Successoribus transmisit, qui tamen juris istius possessionem ita sibi asseruere, ut quemadmodum supra notatum est, libera Clero, & Populo relinquentes suffragia, solam sibi retinerent Pontificis electi confirmationem, antequam is posset ordinari. Imperatores vero electionem non confirmasse, nisi soluta prius consueta auri quantitate, ex Anastasio in Agathone Papa addiscimus; de eaque nova electionis forma, sicut & de aliis sequioribus, videri plane possunt quæ scripsimus nos in toties laudato Commentario ad Canonem I. Concilii III. Lateranensis, quem legere est nostro Tomo III. Conciliorum, ubi res fuse, ac dilucide a prima sua origine a nobis fuit jam ex veterum Scriptorum monumentis explicata, supervacaneumque censemus actum iterum agere.

XXI. Errat præterea iterum iterumque Patricius, ubi subjicit, quod *liberata Italia, ac Romana Ecclesia a Longobardorum durissimo iugo erepta, Hadrianus Primus, ut LXIII. Distinctione, Canone, Hadrianus, sive Leo III. ut alii volunt, Romanum Imperium ex Græcis in Germanos transtulit, Carolumque Magnum Augustum declaravit, cui electionem Romani Pontificis, & jus ordinandæ Romanæ Ecclesiæ concessit.* Commentitia profecto est hæc Hadriani Papæ concessio, qua in Romana Synodo c. l. Episcoporum, Carolum Magnum donasse dicitur

tur jure eligendi Romani Pontificis, & Præsules Ecclesiæ ceteros investiendi. Mentio ejus Synodi habetur quidem in Chronico Sigeberti ad annum DCCLXXIII. eandemque summopere inter alios prædicant Ivo Carnotensis, & Gratianus in citato Canone, *Hadrianus*. Sed cum in editione Sigeberti ab Auberto Miræo curata, & cum exemplaribus mss. collata, hujus Synodi nulla mentio reperiatur, ea alicui interpolatori tribuenda. Sed quid alia memorem, Synodum ipsam ut commentitiam omnes pene docti Scriptores rejiciunt, non modo Baronius, alique Itali passim, verum & Galli ipsi Auctores, Thomassinus non uno in loco, Petrus de Marca Libro VII. *De Concordia*, Cap. XII. atque ut alios omittam, Pagius in Vita Hadriani, Numero XII. & seqq. Quamobrem satis mirari nequeo, quod Joannes Mabillonius Vir alioqui doctissimus, & ut dici assolet, emunctæ naris, memoratam superius commentitiam Synodum, atque concessionem in Commentario suo prævio ad Romanum Ordinem §. XV. Tomo II, Musæi Italici veluti genuinam, atque sinceram recensere minime veritus fuerit.

XXII. Dubitari illud nequit, quin variæ fuerint vicissitudines libertatis electionum Papæ sub Imperio Caroli Magni, & ejus stirpis. Narrat Patricius, quod *pietissimi Imperatores quum experientia didicissent, aliis forsitan non ita piis Principibus succedentibus, hujusmodi auctoritatem Romana Ecclesiæ, & Reipublica Christiana perniciosam fore, præsertim quoniam Romanus Pontifex a Christo institutus est, ut Imperatorem, & omnes oves pasceret, purgaret, atque spiritualiter judicaret, illa se potestate abdicarunt, jusque integrum ad Senatum Ecclesiæ, & Romanum Clerum, & Populum rediit, Ludovico præsertim Imperatore statuente, atque volente, LXIII. Distinctione, Canone, Ego Ludovicus. Sane in hoc Canone statuit inter alia Ludovicus Pius Imperator, ut mortuo Pontifice Romano, quem omnes Romani elegerint, sine aliqua ambiguitate, & contradictione, more Canonico consecratur: & cum consecratus fuerit, Legati ad nos, inquit, vel ad Successores nostros Reges Francorum dirigantur, qui inter nos, & inter illum amicitiam, & charitatem, & pacem consociant. Merum id esse commentum contendit Pagius in Vita Paschalis I. Papæ, Nu-*

mero IV. probatque ex eo, quod ipso Ludovico Pio vivente, Eugenius II. Papa ad postulationem Lotharii, Ludovici Pii filii, & in Imperio collega statuerit, ut Pontifex Romanus non consecraretur, nisi in præsentia Legatorum Imperialium, quod toto seculo nono & ultra in usu positum fuit, absque eo quod Clerus Romanus illam donationem in medium attulerit, licet se se ab ea lege abhorre non semel ostenderit, imo & Hadrianus III. illam resciderit.

XXIII. Partem Constitutionis ab Eugenio II. editæ refert Baronius ad annum DCCCXIV. Numero XIII. integram, & in novem Capitula distributam Cointius ad eundem annum, & Pagius in Critica Baroniana Num. III. Capite ejus Constitutionis tertio ita statuitur: *In electione autem Romani Pontificis nullus, sive liber, sive servus præsumat aliquod impedimentum facere; sed illi solummodo Romani, quibus antiquitus concessum est Constitutione Sanctorum Patrum, sibi eligant Pontificem.* Sigonius, *De Regno Italia*, Lib. IV. ad annum DCCCXV. post recitatam hujus Constitutionis partem, ita subjicit: *Illud etiam propter tumultus superiores adjectum videtur, ut ad vitanda Comitiorum dissidia, aut Legati Regis, aut Rex ipse, si in Urbe adessent, Consecrationi interessent; sic enim subsequentibus annis est observatum, & postremo nova etiam lege sancitum.* Quod Sigonius hoc loco indicat subobscurè, Pagius ad ipsum annum DCCCXV. Num. XXIX. ponit pro certo, aitque Eugenium, Romæ commorante Lothario, decrevisse, ut Legati Imperatoris interessent Consecrationi Romani Pontificis. Idque eam ob rem, ut animadvertit Pagius junior in ipsius Eugenii Vita Num. VI. quod verebatur, ne jus confirmandi electionem Papæ ab Orientalibus Imperatoribus antea usurpatam Lotharius quoque sibi assumeret, atque vindicaret. Fatetur nihilominus idem Pagius, non fuisse id ab Eugenio factum sine Cleri, aut populi repugnantia, cum Valentinus anno DCCCXXVI. in locum Eugenii subrogatus, non legatur coram Legatis Cæsareis ordinatus. Gregorium IV. ait Valentini successorem videri primum, qui Francis Romæ imperantibus in Legatorum Imperialium præsentia consecratus fuit; eumque morem subinde interruptum, Seculo tandem Christi undecimo fuisse penitus abolitum.

§. X.

De potestate electionis Summi Pontificis tradita Sacro Cardinalium Collegio, & quibusdam in ea servandis.

Verum cum variis, contrariisque vulgi seditionibus, atque studiis, & aliquando Principum violentia in electione Pontificis creberrimi tumultus, contentiones, rixæ, atque etiam cruentissimæ pugnæ committerentur; sæpeque altero per vim dejecto, alter Cathedram occuparet, res Romanæ Ecclesiæ in maximam perniciem devenerat. Nam parvo annorum intervallo decem diversorum meritorum Viri Petri Sedem tenuerunt: Benedictus Nonus, Sylvester Tertius, Gregorius Sextus, Clemens Secundus, Damasus item Secundus, Leo Nonus, Victor etiam Secundus, Stephanus Nonus, Benedictus Decimus; cuius Successor Nicolaus Secundus Pontifex, maximæ prudentiæ, & sanctitatis, ut tantis malis obviaret, anno salutis quinquagesimoprimo supra millesimum, in Concilio Lateranensi sacram Legem dedit de electione Romani Pontificis per Sacrum Senatum sacrosanctæ Romanæ Ecclesiæ Cardinalium peragenda, quam

dein-

deinde (1) in Concilio Senensi Alexander Tertius, & in Lugdunensi Gregorius Decimus, ac Viennensi Clemens Quintus confirmaverunt; cujus quidem Legis observantia Apostolicam Sedem ex maxima calamitate liberavit. Deinde ut schismata tollerentur, Alexander Tertius in Concilio Generali statuit, ut ille demum Canonice electus censeretur, in quem duæ Collegii partes consensissent. Sed vetuit Symmachus, cuius licere, Pontifice adhuc superstiti, verbo, scripto, vel promissionibus, juramento, aut aliquo alio modo agere de Successore: transgressores dignitate, (2) & communionem privans, (3) accusantesque, & conscios impunitate, ac præmio afficiendos censens. Nicolaus insuper præfatus voluit, Romani Pontificis electionem cum deliberatione Prædecessoris fieri debere.

COMMENTARIUS.

I. **C**erte Seculo ipso XI. quod variis contrariisque vulgi seditionibus, atque studiis, & aliquando Principum violentia in electione Pontificis creberrimi tumultus, contentiones, rixæ, atque etiam cruentissimæ pugnæ committerentur, sepæque altero per vim dejecto, alter Cathedram occuparet, uti Patricius inter alia notavit, *Nicolaus Secundus Pontifex maxima prudentia, & sanctitatis, ut tantis malis obviaret, anno salutis quinquagesimo primo supra millesimum in Concilio Lateranensi sacram legem dedit de electione Romani Pontificis per Sacrum Senatuum sacrosanctæ Romanæ Ecclesiæ peragenda*. Errat plane hic Patricius, quum ipsum Concilium a Nicolao II. habitum dicit anno MLI. celebratum quippe fuit anno MLIX. uti docet Baronius ad ipsum annum, aliique Scriptores passim, constatque ex initio ejusdem Constitutionis. Nicolai Constitutio, seu Decretum de electione Romani Pontificis Cardinalibus attributa, habetur integra apud Labbeum, Binium, Harduinum, aliosque Conciliorum collectores, & apud Lupum Tomo v. Operum editionis Venetæ. Statuit autem primum in ea Constitutione Pontifex, ut vacante Sede Romana, *Cardinales Episcopi diligentissima simul consideratione tractantes, mox sibi Clericos Cardinales adhibeant, sicque reliquos Clerus, & populus ad consensum novæ electionis accedat*. Tum vero paulo post ita subjicit: *Eligant autem de ipsius Ecclesiæ gremio, si repertus fuerit idoneus; & si de ipsa non invenitur, ex alia assumatur, salvo debito honore, & reverentia dilecti filii nostri Henrici, qui in presentiarum Rex habetur, & futurus Imperator, Deo concedente, speratur, sicut jam ei concessimus, & Successoribus, qui ab Apostolica Sede personaliter hoc jus impetraverint*.

II. Quod attinet ad Decretum in favorem Henrici IV. Germaniæ Regis emissum, & a Gratiano Distinctione XXI. relatum in eo Canone, qui incipit, *In nomine*, illud jam per sureptionem fuisse obtentum, & Regem Henricum se eo indignum reddidisse, ostendit S. Anselmus Libro II. contra Guibertum antipapam, & sequaces ejus, legiturque Tomo XVI. Bibliothecæ Patrum, ubi sic inquit: *Sunt item, qui objiciunt, Nicolaum juniorem Decreto Synodali constituisse, ut obeunte Apostolico Pontifice, Successor eligeretur, & electio ejus Regi notificaretur: facta vero electione, &, ut prædictum est, Regi notificata, ita demum Pontifex consecraretur, Quod si admittendum est, ut ratione fa-*

ctum dicatur, objicimus ad hoc confutandum, præfatum Regem, & Optimates ejus se ea Constitutione indignos fecisse. Primum, quia postea præfatum Nicolaum, Colonensem Archiepiscopum pro suis excessibus corripuisse, graviter tulerunt, eumque hujus gratia, quantum in se erant, a Papatu deposuerunt, & Nomen ejusdem in Canone Consecrationis nominari vetuerunt; ideoque Decretum ejus de Jure irritum esse debet. Et post pauca contra ipsum Decretum adducta, ita subjicit: Patet, præfatum Decretum nullius momenti esse, nec unquam aliquid virum habuisse; & hæc dicens non præjudico beatæ memoriæ Papæ Nicolai, nec quidquam ejus honori derogo, Patrum sententias Dei spiritu conditas sequendo; homo quippe fuit, eique, ut contra fas ageret, surripi potuit. Priora Anselmi Lucensis verba refert Baronius ad annum MLIX. Num. XXIX. ex Deusededit Cardinali, cujus Collectio Canonum, seu Libri IV. de rebus Ecclesiasticis, Anselmo etiam Lucensi attributa extat ms. in Bibliotheca Vaticana.

III. Sed quicquid sit, mortuo Nicolao II. Alexander II. qui eidem successit anno MLXI. electus & consecratus est, insciis Imperatrice & ejus filio Henrico Rege; ideoque Cadolum, seu Cadolaum antipapam eligi procurarunt, a quo multa damna Romana Ecclesia perpeffa est, durante Schismate. Quamobrem cum timeretur, ne novum Schisma post Alexandri II. mortem oriretur, Gregorius VII. Alexandro II. immediate succedens anno MLXXIII. suam consecrationem distulit usque ad Regis confirmationem, eoque mortuo omnes postmodum Pontifices ordinati sunt inscio Rege Germaniæ licet Imperiali corona donato; dicique potest, ipsum Gregorium VII. tametsi multa perpeffum, Romanam Ecclesiam ab ea servitute liberasse. Ceterum quomodo Rex Henricus, ejusque Optimates eo privilegio se indignos reddiderint, docet, probatque S. Petrus Damiani in Opusculo IV. seu in Disceptatione Synodali inter Advocatum, & Romanæ Ecclesiæ Defensorem apud Baronium ad annum MLXII. & apud Pagium in Vita Alexandri II. Papæ. Hæc autem sunt laudati Romanæ Ecclesiæ Defensoris verba: *Rectores Aula Regiæ cum nonnullis Teutonici Regni, ut ita loquar, Episcopis conspirantes, contra Romanam Ecclesiam Concilium collegistis, qui Papam, scilicet Nicolaum II. quasi per Synodalem sententiam condemnastis, & omnia, quæ ab eo fuerant statuta, cassare incredibili prorsus audacia præsumistis. In quo nimirum non dicam judicio, sed præ-*

(1) Hæc verba, quam deinde &c. atque ad verbum confirmaverunt, in Veneta I. editione, & Colonensi leguntur, & desunt in Romana.

(2) In eadem Romana legitur privavit.

(3) Ibidem censuit.

præjudicio, id ipsum quoque Privilegium, quod Regi prædictus Papa contulerat, si dicere liceat, vacuastis. Nam, dum quicquid ille constituit, vestra sententia decernente destruitur; consequenter etiam id, quod ab eodem Papa Regi præstitum fuerat, aboletur.

IV. Illud vero hoc loco minime omittendum est, quod post Pagium seniore adnotavit Pagius alter in Vita Nicolai II. Papæ, Num. VII. ex hoc ferme tempore, quo Cardinalium S. R. E. dignitas longe majori in pretio haberi cœpit, electionem Romani Pontificis ad solos ipsos Cardinales, nudam vero electi approbationem ad populum pertinuisse. Constat id quidem ex Decreto electionis Gregorii VII. his verbis expresso: *Nos Sancta Romana Catholica & Apostolica Ecclesiæ Cardinales, Clerici, Accolythi, Subdiaconi, Presbyteri, presentibus venerabilibus Episcopis, Abbatibus, Clericis, ac Monachis, consentientibus plurimis turbis utriusque sexus, diversisque Ordinis acclamantibus, eligimus nobis in Pastorem, & Summum Pontificem Hildebrandum videlicet Archidiaconum, quem amodo usque in sempiternum, & esse, & dici Gregorium Papam, & Apostolicum volumus, & approbamus.* Porro docet Panvinius in adnotatione ad Vitam Alexandri III. a Platina scriptam, in electione Lucii III. qui creatus fuit anno MCLXXXI. Papæ electionem tunc primum redactam fuisse ad solos Cardinales, Clero, & omni populo ab electione Pontificis omnino exclusis, Legemque salutarem in Generali Concilio Lateranensi anno MCLXXIX. celebrato latam de duobus tertiis suffragiorum Cardinalium, ad evitanda in posterum Schismata executioni mandatam fuisse; additque, sibi id

constare ex ejusdem Pontificis Diplomate apud se asservato. Id quod docet laudatus Panvinius, jam & alii eruditi Scriptores tradunt, præsertim vero Pagius in Breviario Gestorum Romanorum Pontificum, Tomo II. in Vita memorati Lucii Papæ III. Num. I. viderique præterea possunt quæ idem Auctor notavit in Vita Nicolai II. Papæ, Num. VII. & in Vita Innocentii itidem II. Pontificis, Num. V.

V. Legem de electione Papæ a Cardinalibus S. R. E. peragenda latam a Nicolao Papa II. notante Patricio, deinde in Concilio Senensi Alexander Tertius, & in Lugdunensi Gregorius Decimus, ac Viennensi Clemens Quintus confirmaverunt. Concilium Senense de electione Papæ ab Alexandro Papa III. celebratum nullum invenio, ideoque in hoc asserendo errat Patricius, sciteque autem mox illud subjicit, *ut schismata tollerentur*, Alexandrum III. in Concilio Generali, Lateranensi scilicet III. habito MCLXXIX. statuisse, *ut ille dum Canonice electus censceretur, in quem duæ Collegii, Cardinalium videlicet, partes consensissent.* Extat hoc Decretum in Canone I. memorati III. Œcumenici Lateranensis Concilii, legiturque in Capite, *Licet, De electione.* Itaque, ut adnotavit laudatus Panvinius ad Platinam, *Clero omnino, & Populo a Pontificia electione exclusis, ea ad Cardinales solos tunc primum redacta est, ad evitanda in posterum schismata*; eamque eligendi rationem, quæ ad hæc usque tempora servatur illæsa, esse omnium optimam, probat doctissimus Bellarminus Lib. I. *De Clericis*, Cap. IX. Multa autem scitu digna de hac re videri possunt nostro Tomo III. Conciliorum in Commentario ad ipsum I. Canonem Lateranensis III. Concilii.

§. XI.

Gregorii X. Statutum de electione Summi Pontificis.

Post hæc autem, ne diutinæ vacationis incommodis Romana Ecclesiæ premeretur, neve Patres variis ambientium studiis corrumpi possent, Gregorius prælibatus ejus nominis Decimus in Concilio Lugdunensi statuit, Romano Pontifice vita functo, Cardinales præsentibus decem tantum dies absentes expectare (1) debere, moxque cum illis, qui adessent, locum Conclavis in Urbe, in qua Pontifex cum sua Curia residebat, simul ingredi, cum uno tantum Ministro, vel si patens necessitas fuerit, cum duobus. Conclave ipsum nullo pariete, aut velamine separandum, in communi habitandum, ita claudendum, ut nullus postquam convenerit, egredi queat: neminem ad colloquium admittendum, nisi forte re urgente, & ab universo Collegio approbatum, & a nemine nuncios, sive litteras accipiendas: fenestram, sive porticulum unum tantum dimittendum, quo subministrari possint, quæ ad vitam pertinent. Si vero postquam Patres intraverint, intra tres dies electionem non perfecerint, per quinque sequentes dies tam in prandio, quam in coena uno tantum ferculo contentos esse oportere: quibus elapsis, si adhuc concordēs non fuerint, panis tantum, vinum, & aqua illis administrantur, quoad Pontificem rite eligant. Interim vero nihil de Camera Apostolica a Patribus percipiendum, nihil aliud omnino agendum, nisi communi consensu aliquid pro patrimonio Ecclesiæ necessario sit providendum: si quis ex Patribus ob adversam valetudinem egressus est, aut de novo adveniens ingredi voluerit, re adhuc integra admittendum ea conditione, ut eo utatur, quo alii Patres tunc utuntur. Si extra locum suæ Curiae Pontifex decesserit, conveniant Cardinales in Civitate illius Territorii, ubi decessit, in Palatio Episcopali, vel alio decenti loco, & omnia servant, quæ superius sunt dicta. Statuit & alia pleraque Gregorius, quæ ad Dominos loci (2) Conclavis, & Patrum tutelam, ac securitatem pertinent:

(1) In editione legitur Romana, oportere.

(2) deest loci in Veneta, & Colonienſi, sed legitur in editione Romana.

tinent: hortatur Patres ad electionem rite faciendam pro Dei honore, & publica utilitate, & pactiones, juramenta, obligationesque omnes pro ea re factas damnat, atque irritat.

COMMENTARIUS.

I. **P**ater Alexandri III. Decretum, quo editur, ut is censeatur Canonice electus Pontifex, in quem duæ Cardinalium partes consentiunt, *ne diutina vacationis incommodis*, ut notat noster §. *Romana Ecclesia premeretur, neve Patres variis ambientium studiis corrumpi possent, Gregorius prælibatus ejus nominis Decimus, in Concilio Lugdunensi*, scilicet Generali II. Canone II. quem nos fusc explicuimus nostro Tomo IV. Conciliorum, & supra non uno in loco, *statuit, Romano Pontifice, vita functo, Cardinales præsentem decem tantum dies absentes expectare debere, moxque cum illis, qui adessent, locum Conclavis in Urbe, in qua Pontifex cum sua Curia residebat, simul ingredi cum uno tantum Ministro, vel si patens necessitas fuerit, cum duobus.* De Conclavi abunde actum jam superius fuit; ejus ordinandi occasionem dedit diutina Apostolicæ Sedis vacatio in annum fere tertium, quo Gregorius ipse X. subrogatus fuit Clementi Papæ IV. Mandat autem inter alia in ipsa sua Constitutione, quæ relata est in Capite, *Ubi periculum* III. De electione &c. in VI. ut Cardinales, qui fuerint in Civitate ipsa præsentem, absentes expectare decem diebus tantummodo teneantur; & interim novendialia demortui Pontificis per Cardinales præsentem celebrentur, ut tradit Panvinus in Notis ad Platinam, ubi enarrat vitam Gregorii X. Novendialia sunt preces, seu Missæ per novem dies continuos pro defuncto Pontifice celebrandæ, de quibus dicemus infra, Titulo XV. ubi agemus de ægrotatione, morte, & exequiis Romani Pontificis.

II. Certum profecto illud est, ante laudati Gregorii Constitutionem nulla lege fuisse adstrictos Cardinales, ut decem dies expectarent absentes ad peragendam electionem novi Pontificis. Constat siquidem vel ex Summorum Pontificum Vitis, qui Seculo ipso XIII. quo Gregorius Papa rexit Ecclesiam, claruerunt, citius non semel peractas fuisse eorum electiones, licet Cencius Camerarius, qui fuit postea Papa Honorius III. in suo Ordine Romano XII. Capite XLVIII. diserte scribat, mortuo Summo Pontifice, tertio tantum die post agi cœptum de Successoris electione. Et quidem eodem die, quo mortuus est Cælestinus III. electum fuisse Innocentium itidem III. nos dubitare non sinunt acta ejus Vitæ edita a Francisco Bosqueto ex veteri Collegii Fuxfensis ms. Codice, & a Pagio descripta in Vita ipsius Innocentii, Num. I. Rursus erepto ex hac vita Innocentio III. die decimasexta mensis Julii anni MCCXVI. & die sequenti sepulto, statim, scilicet die decima octava ejusdem mensis memoratus Cencius, qui in Pontificatu Honorius III. nomen sumsit, electus est Perusii, cum cessasset *Papatus per unum diem*, ut scribit Martinus Polonus in Chronico, & Bernardus Guido in Speculo historico Romanorum Pontificum confirmat, ubi causam tam festinatæ electionis nos docet: *Vacavit Sedes*, inquit, *per unum tantummodo diem, Perusinis causa electionis Papæ strictissime arctantibus Cardina-*

les. Tandem, ut alios omittam, mortuo Honorio III. die XVIII. Martii, die sequenti XIX. electus atque inthronizatus etiam fuit Gregorius IX. uti ostendit Pagius in ejusdem Gregorii Vita. Sane docet Glossa in citato Capite, *Ubi periculum*, quod ubi decem dies expectati sunt Cardinales absentes, possunt præsentem Cardinales Papam eligere, *etiamsi essent pauciores, quam tertia pars per hanc Constitutionem.*

III. Ergo Romano Pontifice vita functo Cardinales præsentem decem tantummodo diebus juxta laudatam Gregorii X. Constitutionem Cardinales absentes expectare tenentur, & interim solitas novem continuorum dierum exequias omnino peragere, nec ullo prætextu ulterius differre. Id epim expresse mandat Pius Papa IV. in sua Constitutione, quæ incipit, *In eligendis*, edita anno MDLXII. volens præterea, ut *si quando per observantiam alicujus magni & præcipui Festi, Cardinalibus videretur officium exequiarum intermittere debere, dies illi sic intermissi in numerum novem dierum nihilominus computari debeant, & impensa, quæ in eis pro exequiis faciendâ esset, inter pauperes Christi distribuantur.* Statuit deinde & illud Pius, ut lapsis decem diebus a die obitus Pontificis, ingressus Conclavis nullatenus prorogetur, aut differatur, sed sequenti die Missa de Spiritu Sancto celebrata, sive Cardinales absentes venerint, sive non, qui fuerint præsentem statim Conclave ingredi teneantur, & ingredienti ipsi absque mora aliqua in electionis negotio procedant, & singulis diebus Scrutinium fiat, & in primo Scrutinio etiam accedere liceat; siqui vero forte intrare noluerint, vel ingressi absque manifesta infirmitatis causa, juramento Medicorum, & a majori parte Cardinalium per secreta suffragia approbata exiverint, dictæ Constitutionis Gregorii X. pœnam incurrant. Declarat insuper Pius, quod postquam Cardinales præsentem, aliis Cardinalibus etiam de latere Legatis, aut alia quacumque etiam publica causa, etiam cum licentia Summi Pontificis absentibus, ulterius non expectatis, post tamen lapsum dictorum decem dierum a morte Pontificis, electionem, *sive intra, sive extra Conclave fecerint* electio sic facta, ex itineris, aut alterius etiam probabilis, & notorii ipsorum Cardinalium absentium impedimenti prætextu, impugnari minime valeat, *cum publica utilitas ex matura electione proveniens, cuius alteri rationi præferri debeat.*

IV. Ex recitatis hætenus verbis notandum illud præsertim est, electionem scilicet Papæ, vel Pii IV. Pontificis tempore, ac etiam deinceps potuisse peragi *sive intra, sive extra Conclave*; docetque Cohellius in sua Notitia Cardinalatus, Cap. XII. citans Jacobatium, *De Concilio*, Lib. IV. Articulo IV. Num. CLIV. & sequenti, ac Manfredum Decisione CCCXIV. electionem ipsam tam aperto, quam clauso Conclavi peractam, validam fuisse putatam. Quicquid sit de hac opinione, nulli dubium est, quin hodie ex celeberrima omnium Constitutione, quam

quam de electione Summi Pontificis edidit Gregorius XV. anno MDCXXI. incipitque, *Æterni Patris Filius*, ad validitatem electionis requiratur, ut fiat *in Conclavi*, & *eo clauso*. Ceterum quod super hujusmodi Conclavis clausura accidere quædam possent, ex quibus validitas electionis Papæ in dubium posset revocari, Urbanus Papa VIII. ut omnem dubitandi ansam tolleretur, nova sua Constitutione eam Gregorianæ sanctionis partem ita intelligendam esse edixit: *Ut statim post clausum Conclave diligens fiat inquisitio super ipsa clausura, eaque in effectu reperta, publicum fiat documentum per Cæremoniarum Magistrum; quo peracto, etiamsi postea in totum, vel in parte apertum de facto reperitur Conclave, semper tamen clausum, & pro clauso censendum, & habendum quoad electionis validitatem, donec de consensu duarum partium Cardinalium præsentium per secreta suffragia apertum esse declaretur.*

V. Juxta praxim, quæ a multo tempore invaluit, & Cæremonialis præscriptum, quod continet ritus electionis Romani Pontificis, & jussu Gregorii Papæ XV. editum est, *exequiis defuncti Pontificis completis, & interim Conclavi opportuno preparato, Cardinales in Basilica S. Petri, vel alibi, pro temporis, & loci opportunitate, conveniunt, ubi per Decanum Sacri Collegii, vel, eo impedito, per alium ex antiquioribus Cardinalibus, Missa de Spiritu Sancto celebretur, & in fine per aliquem Prælatum, aut alium Virum doctum habeatur Oratio, in qua moneatur, ut sepositis omnibus privatis affectibus, solum Deum præ oculis habentes, Sanctæ Romanæ, & universali Ecclesiæ de Pastore sufficienti, & idoneo providere, omni qua possunt brevitate, & diligentia curent, ad Apostolicarum Constitutionum, & Conciliorum præscriptum.* Sane juxta antiquum Romanum Ordinem xli. Auctore Cencio, Cap. xlviii. cujus supra meminimus, mortuo Romano Pontifice, & sepulto, tertia ejus obitus die congregatis Cardinalibus in Ecclesia, *Missa Sancti Spiritus ibidem primitus celebrabatur.* Introductis Novendialibus, consuevit Missa de Spiritu Sancto celebrari die decima, ejusque ritus meminit in suo Romano Ordine xv. Petrus Amelius, Capite clix. in Rubrica, *De Conclavi*, ubi etiam ait, Cardinales post mortem Gregorii Papæ XI. *voluisse audire in Hospitali Sancti Spiritus Missam de Spiritu Sancto.* Sequenti die post Novenam id factum addit, *quia voluerunt habere consilium cum Romanis, antequam intrarent Conclavim, pro conservatione Conclavis.* Eodem teste Auctore, post mortem Domini Urbani VI. *Domini Cardinales post Missam nonam, & Sermonem voluerunt audire Missam ibidem, in Hospitali scilicet Sancti Spiritus, de Spiritu Sancto cum Sermonem, quam dixit Dominus Pisanus.* Forte Sermo habitus post Missam nonam fuit in laudem defuncti Pontificis, alter vero dictus post Missam de Spiritu Sancto, fuit de novo eligendo Pontifice.

VI. Re divina peracta, Clericus Cæremoniarum capit Crucem Papalem, & procedit, quem Cardinales sequuntur, Episcopi primum, deinde Presbyteri, postremo Diaconi cum suis Cappis violaceis. Crucem præcedunt Familiares Cardinalium, & immediate Cantores Hymnum *Veni Creator Spiritus* cantantes. Post
To. I.

Cardinales sequuntur Prælati, atque ita processionally procedentes Conclave ingrediuntur; & cum ad Capellam pervenerint, Cardinalium Decanus apud Altare dicit orationem, *Deus, qui corda fidelium.* Qua finita, leguntur, & jurantur per Cardinales Constitutiones de Romani Pontificis electione, & una cum eis Constitutio Gregorii XV. Deinde Cardinales post Sermonem habitum per Decanum, quo eos convenientibus verbis ad electionis negotium rite, & recte peragendum hortatur, ad cellas sorte inter eos juxta Constitutionem Pii IV. distributas diverunt; & post prandium omnes rursus simul congregantur, & Officiales Conclavis, & alii præstant Sacro Collegio juramenta consueta.

VII. Ex eodem vero Cæremoniali jussu laudati Gregorii Papæ XV. edito cautum est, ut Cardinales ingressi Conclave non exeant, vespere reversuri, sed in ipso omnino permaneant; ipsumque Conclave post ter jussu Cardinalis Decani personatam campanulam, videlicet prima vice circa primam horam noctis, secunda circa secundam, & tertia circa tertiam, exclusis omnibus, qui in Conclavi remanere non debent, intus, & extra claudatur, & claves S. R. E. Camerario, ac Magistro Cæremoniarum, & Prælati Custodibus Conclavis juxta solitum assignentur. Deinde accensis fanalibus, tres Cardinales Capita Ordinum, & Camerarius una cum Magistro Cæremoniarum latebras, & angulos omnes Conclavis diligenter perquirunt, ne quis ex iis, qui esse in Conclavi prohibentur, intus remanserit. In Conclavi autem esse possunt Familiares Cardinalium, & alii Officiales, & Ministri Conclavis, qui in Constitutione Pii IV. recensentur, quibus adduntur duo alii, unus famulus pro Magistris Cæremoniarum, & alius pro Secretario Sacri Collegii, hac tamen conditione adjecta, ut famulus Magistrorum Cæremoniarum actu uni ex illis inserviat, & per sex menses ante fuerit ejus continuus commensalis; quæ conditio in famulo Secretarii similiter exigitur. Omnium autem istorum Conclavistarum post prandium diei sequentis fit recognitio, ne quis inter illos forte esset ex iis, qui in Conclavi esse non possunt; quæ recognitio, ut certius fiat, jubentur Conclavistæ omnes intrare Capellam, & postea fingillatim recensentur.

VIII. Statuit præterea de Conclavistis Pius IV. in citata sua Constitutione, ut nimirum, Conclavistæ a Cardinalibus approbentur, & qui Cardinalibus inservituri sunt in Conclavi, continui Commensales ipsorum Cardinalium, & *ab anno ante fuisse, & tunc esse debeant; & non mercatores, Ministri Principum, Domini temporales, & jurisdictionem habentes, neque fratres, aut nepotes Cardinalium, etiamsi expensis eorum viverent.* Mandat quoque, ut *de qualitatibus Conclavistarum Cardinales deputati ante Conclavis ingressum diligenter inquisitionem habere, & eos approbare, ac post ingressum denuo diligenter providere debeant.* Jubet denique, ut *Conclavistæ & quicumque alii servientes, Conclave ex causa infirmitatis manifestæ, & notabilis a medicis medio juramento probatæ, & de consensu Deputatorum, quorum etiam conscientiam, inquit Pontifex, desuper oneramus, & non aliter exituri, nullo modo reverti possint, sed eorum loco alii eodem prorsus tempore, quo infirmi exhibent, ingrediantur.* Porro quod famulorum numerum
E

merum spectat, quos quisque Cardinalis habere in Conclavi pro suo servitio potest, definitus hic primum fuit ex Constitutione Gregorii X. Papæ, quam in hoc §. nostri Cæremonialis recenset Patricius, ubi ait debere Cardinales Conclave simul ingredi cum uno tantum ministro, vel si patens necessitas fuerit, cum duobus; quia forte aliquis, ut ait Glossa, podagras patitur, ita quod necesse habet per servientes sustineri, & portari, vel alia similis causa. Ceterum statuit quidem in sua Constitutione Pius IV. Pontifex, ut quilibet Cardinalis in Conclavi duobus servientibus Clericis, vel laicis contentus sit; infirmis autem, & graviter affectis a majori parte Collegii per secreta suffragia tertius ad summum indulgeri possit.

IX. Præter Conclavistas, quibus Cardinales in Conclavi ad sua propria servitia utuntur, ex ejusdem Pii Papæ IV. Constitutione alii Ministri, & Officiales Conclavis determinati sunt; Sacrista quoque, inquit, cum uno Clerico coadjutore in officio Sacristiæ, duo quoque Magistri Cæremoniarum Conclave ingrediantur, Missis celebrandis, & aliis, quæ ad ipsos pertinent, vacaturi. Adsit præterea unus Religiosus pro Confessionibus audiendis a majori parte Cardinalium per secreta suffragia eligendus. Unus Collegii Secretarius tantum, duo Medici, unus Chirurgus, unus Aromatarius cum uno, aut duobus servientibus, unus faber lignarius, unus cementarius, duo barbitonfores cum uno aut duobus servientibus. Item octo, aut decem servientes publicæ utilitati, & commoditati omnium, veluti pro lignis portandis, pro verrendo Conclave, & similibus necessariis ministrandis, qui omnes a Collegio Cardinalium, non tamen ex familia alicujus Cardinalis, per fabas secretas eligantur, ita tamen ut is obtineat, qui plura vota tulerit, & eis salaria de publico persolvantur. Addit mox, si ultra præfatas personas in Conclavi aliquis inventus fuerit, expelli illum statim debere; & si quis uspiam se occultasse deprehendatur, ignominiose esse expellendum, & infamia notandum, officiisque, ac Beneficiis privandum: conscios vero sub eadem pœna teneri illos Collegio revelare, præmium reportaturos si indicaverint.

X. Notandum nunc sunt, quæ de ipso Conclavi statuit nostrum Cæremoniale, sive potius Gregorius X. in sua Constitutione: Conclave ipsum, ait, nullo pariete, aut velamine separandum: in communi habitandum. Permisit tamen postea Clemens VI. Cardinalibus posse habere in Conclavi simplicium cortinarum velamina, ut honestius valerent in suis lectis quiescere: Liceat etiam eis ex decentia honestatis habere in clausura hujusmodi, cum in lectis quiescendi causa, vel dormiendi, esse voluerint, dumtaxat intermedia, seu velamina simplicium tantummodo cortinarum. Ex hisce intermediis ortæ sunt deinde cellæ in Conclavi, de quibus loquitur in sua Constitutione Pius Papa IV. mandans, ut cellæ Conclavis Cardinalibus sorte distribuuntur, nec liceat eas etiam infirmitatis prætextu mutare, aut desuper adificare, vel illas dilatare, sed quilibet, etiam Decanus, sit sua sorte contentus. Cellæ istæ sunt veluti cubicula, invaluitque mos, ut ex tabulis fiant, pannoque viridi cooperiantur, cellis tamen illis exceptis, quæ usui sunt Cardinalibus a proximo defuncto Pontifice electis; ipsæ enim cellæ ve-

stiri panno violaceo solent, & quidem a Conclavi post obitum Julii II. ut supra dictum fuit. Porro ex Romano Ordine xv. Petri Amelii Capite cxlix. cautum fuit, ut Cardinales faciant parari cameras suas cum cortinis suis, & lectis sternis sine palea, nisi esset in frigoribus. Mobilia Cardinalium in Conclavi habenda, ab eodem Auctore hæc recensentur, scamnum, non tamen capsa, nisi esset aperta totaliter, vas ad tenendum aquam, vinum, vel carnes, & alia utensilia lignea, veru, seu barræ, super quibus debent poni cortinæ, & circumquaque solvit Camera. Cæpisse primum fieri cellas Conclavis ex tabulis subtilibus anno MDXXI. in Conclavi scilicet post Leonis X. Papæ obitum constructo, ex ms. Diario Paridis Grassi addiscimus, servaturque in celebri Bibliotheca Casanatensi, & continet Acta ab anno MDXIII. usque ad annum MDXXI. De eo itaque laudatus Auctor in fine Codicis agens, sic inter alia inquit: Fieri feci tabularium super solari, & cooperiri cellas ex tabulis subtilibus, & claudi fenestras cum telaribus, & tela cerata super fenestras vitreas. Eo quoque tempore, eodem Auctore Grassi Cæremoniarum Romanæ Ecclesiæ Magistro, fieri cæpta est Rota, per quam fercula introducerentur; sic enim mox ipse subjicit: Item proposui, quod propter multas fraudes, quæ committuntur in aperitione portella quando introferuntur fercula, bonum esset, quod una Rota apud portam in angulo fieret more Monialium; quod placuit omnibus, & commiserunt, quod fieret omnino cum duabus portis hinc inde, & Custodes unam clavem haberent, & aliam Magistri cæremoniarum tenerent.

XI. His jam iterum iterumque explicatis, redeo ad nostrum Cæremoniale, quo statuitur, neminem in Conclave ad colloquium admittendum, nisi forte re urgente, & universo Collegio approbatum, & a nemine nuncios, sive litteras accipiendas. Id plane edixit primum Gregorius X. in sua Constitutione ita inquires: Nulli ad eosdem Cardinales aditus pateat, vel facultas secrete loquendi cum eis: neo ipsi aliquos ad se venientes admittant, nisi eos, qui de voluntate omnium Cardinalium inibi præsentium pro his tantum, quæ ad electionis instantis negotium pertinent, vocarentur. Additque hæc statim: Nulli etiam fas sit, ipsis Cardinalibus, vel eorum alicui nuncium mittere, vel scripturam; qui vero contrafecerit, scripturam mittendo, vel nuncium, aut cum aliquo ipsorum secrete loquendo, ipso facto sententiam excommunicationis incurrat. Notat Glossa Canonici Juris in Cap. Vbi periculum, De electione &c. in v. i. excommunicationem hac Constitutione Gregorii X. minime esse reservatam, ideoque posse ab Ordinario absolvi. Sed sciendum tamen, reservatam deinde fuisse Pii Papæ IV. Constitutione, quæ incipit, In eligendis, ubi inter alia ita statuit: Litteras vero, aut cujusvis generis scripta ad eos, qui in Conclavi erunt, seu nuncium, vel notam, aut signum mittere, seu recipere, aut contra, e Conclavi ad eos, qui foris erunt, nullo modo liceat: qui contra fecerint, quacumque dignitate, etiamsi Cardinalatus honore præfulgeant, pœna excommunicationis lata sententia subiaceant, absolvendi facultate, prætequam in mortis articulo, soli Pontifici Maximo reservata, a quo nihilominus pro qualitate delicti, ultra di-

Etam

Etiam excommunicationis pœnam, puniendi erant.

XII. Edicit præterea nostrum Cæremoniale, fenestram, sive porticulum unum tantum dimittendum, in ipso scilicet Conclavi, quo subministrari possint, quæ ad vitam pertinent. Eadem plane & hæc sunt, quæ statuit Gregorius Pontifex X. in sua Constitutione, sic dicens: *In Conclavi tamen prædicto aliqua fenestra competens dimittatur, per quam eisdem Cardinalibus ad victum commode necessaria ministrentur; sed per eam nulli ad ipsos patere possit ingressus.* Juxta antiquos hujus loci Interpretes, quos citat Glossa, debet esse ipsa fenestra cum rota ad modum Monialium, vel cum barris ferreis circumdata. Docet autem in suo Romano xv. Ordine Petrus Amelius, Cap. cxi. debuisse fieri hanc fenestram, seu porticulum in porta ipsa Conclavis: *Porta, inquit, sit clausa bene cum barris, & clavelaturis, & catena; & in media sit foramen, per quod detur eis ad comedendum, longitudinis unius palmi, & semis, & tantum in altitudine, quod etiam cum clavi claudatur.* Juxta eundem Auctorem munus erat Custodum Conclavis, ut omni die, mane, & sero facerent ad Cardinales de domibus eorum portari cibaria cocta, & alia vitæ necessaria; cavendumque eisdem ait, sub pœna perjurii, quod bene aperiant semper, & videant quisquid portatur Cardinalibus ad comedendam, & si pastilla eis portarentur, illa aperiant.

XIII. Confirmat hæc quidem, novoque robore munit Pius Papa IV. ubi in sua de electione Romani Pontificis Constitutione statuit, ut Prælati quoque ad custodiam Conclavis deputati, sub pœna perjurii, & suspensionis a Divinis, maxima, & exquisita diligentia utantur in inspicendis, ac perscrutandis epulis, & aliis rebus, ac personis Conclave intrantibus, & de eo exeuntibus, ne sub earum rerum velamine litteræ, aut notæ, vel signa aliqua transmittantur. Additque mox etiam, quod si tale quid inventum fuerit, familiares Cardinalium, aut alii delinquentes, pœnam privationis Officiorum, & Beneficiorum, ac inhabilitatis ad obtenta, & obtinenda incurrant; & ulterius per Gubernatorem carceribus mancipentur, exinde, nisi mandato novi Pontificis, minime relaxandi, sed ejus arbitrio acrius puniendi, omni facultate Collegio Cardinalium in favorem quorumcumque, qui in præmissis, vel eorum aliquo deliquerint, omnino interdicta. Solent cibi ad Cardinales Conclavi inclusos ab eorum domibus deferri per Dapiferos, qui eam etiam ob causam a recentioribus Pontificibus donati sunt privilegiis, uti in eorum Constitutionibus videre est, quæ in Romano Bullario sæpè occurrunt.

XIV. Quantum vero ad cibos, quibus vesci in Conclavi Cardinales debent, nostrum Cæremoniale Constitutioni adhærens Gregorii Papæ X. statuit quidem, si postquam Patres Conclave intraverint, intra tres dies electionem non perfecerint, per quinque sequentes dies, tam in prandio, quam in cœna uno tantum ferculo contentos esse oportere: quibus elapsis, si adhuc concordēs non fuerint, panis tantum, vinum, & aqua illis administrentur, quoad Pontificem rite eligant. Sed & id postea variatum nonnihil fuit a Clemente Papa VI. ut ex ejus Constitutione liquet, qua statuit, ut Cardinales in Conclavi congregati, singulis diebus, præter panem,

To. I.

vinum, & aquam, in prandio, & in cœna, unum dumtaxat ferculum carniū unius speciei tantummodo, aut piscium, seu ovorum, cum uno potagio de carnibus, vel piscibus principaliter non confecto, & decentibus salsamentis habere valeant, ultra carnes salitas, & herbas crudas, ac caseum, fructus, sive electuaria: ex quibus tamen nullum specialiter ferculum, nisi ad condimentum fieret, vel saporem; adjecta conditione, ut nullus eorum de alterius ferculo vesci possit. Atque hæc confirmavit deinde Pius Papa IV. in citata sua Constitutione, *In eligendis, quæ mandat, ut Cardinales primo ipso die, quo Conclave ingressi fuerint, tam in prandio, quam in cœna, uno solo ferculo unius speciei tantum, eoque moderato, & alias juxta Constitutionem præfati Clementis VI. qualificato contenti sint, & esse debeant, nec quisquam in alterius cella, vel de alterius ferculo vescatur.*

XV. Jubet quoque & illud hic noster §. quod alias recentiores æque ac prisca Pontifices constituerunt, interim scilicet dum vacat Sedes, nihil de Camora Apostolica a Patribus percipiendum, nihil aliud omnino agendum, nisi communi consensu pro patrimonio Ecclesiæ necessario sit providendum. Sed audiamus primum de hac re Gregorium X. in Constitutione sua sic agentem: *Provisionis quoque hujusmodi pedente negotio, dicti Cardinales nihil de Camera Papæ recipiant, nec de aliis eidem Ecclesiæ tempore vacationis obvenientibus undecumque; sed omnia, ipsa vacatione durante, sub ejus, cujus fidei, & diligentia Camera eadem est commissa, custodia manean, per eum futuri Pontificis dispositioni reservanda.* Tum etiam ita paulo post addit: *Idem quoque Cardinales acceleranda provisioni sic vacent attentius, quod se nequaquam de alio negotio intromittant, nisi forsitan necessitas adeo urgens incideret, quod eos oporteret de Terra ipsius Ecclesiæ defendenda, vel ejus parte aliqua providere, vel nisi aliquod tam grande, & tam evidens periculum immineret, quod omnibus, & singulis Cardinalibus præsentibus concorditer videretur, illi celeriter occurrendum.* Confirmat hæc Pius Papa IV. luculentiusque exponit in sua Constitutione, *In eligendis, §. Sedis autem, ex eoque Cæremoniale Gregorii Papæ XV. jussu editum, & inter alios Cohellius in notitia Cardinalatus, Cap. xiii.*

XVI. Ut aliquid vero de antiqua Romanæ Ecclesiæ disciplina dicamus circa administrationem rerum ejusdem Ecclesiæ Sede vacante; teste Baronio ad annum DXC. quem citat Sandinus in adnotatione ad Vitam Joannis IV. Archiepiscopus, Archidiaconus, & Primicerius Notariorum non tantum vacante Sede, sed etiam absente Summo Pontifice, Ecclesiam Romanam administrabant. Extat in Capite II. Libri Diurni Romanorum Pontificum, Titulo 1. formula Litterarum ad Italiæ Exarchum de transitu Pontificis scribi solitarum, in qua hæc leguntur: *Superscriptio, Domino excellentissimo, æque præcellentissimo, & a Deo nobis longævum in principalibus ministeriis feliciter conservando, III. Exconsuli, Patrio, & Exarcho Italiæ, Ill. Archiepiscopo, Ill. Archidiacono, Ill. Primicerio Notariorum, sedentes locum Sedis Apostolicæ.* Ubi Ill. idem est, quod apud nos N., cum scilicet locus nominis indicatur. Quo tandem tempore vacante Sede, administratio trans-

E 2

lata

lata fuerit ad Sacrum Cardinalium Collegium, facile non est divinare, Franciscus Pagius in Prefatione Tomi I, Vitarum Romanorum Pontificum, Num. XIV. conjicit, administrationem ipsam translata fuisse ad Cardinales non quidem anno MCCXLI, ut ad annum eundem, Numero XXI, insinuat Spondanus, sed anno MLIX, quo Nicolaus II. in Synodo Romana, de qua supra dictum est, tribuit jus eligendi Romani Pontificis solis Cardinalibus. Ab eodem anno MLIX. absente Pontifice, Ecclesiæ regimen fuisse penes aliquot Cardinales a Pontifice designatos, multum verisimile videtur; nam anno MCXVIII. cum Gelasius II. in Galliam secedere decrevisset, Petrum Portuensem Episcopum pro se Vicarium constituit, & Cardinales aliquot ei in auxilium sociavit, ut testatur Pandulphus in ejus Vita.

XVII. Obiter his dictis, devenio ad nostri Cæremonialis præscriptum, in quo statuitur, *siquis ex Patribus ob adversam valetudinem egressus est, aut de novo adveniens ingredi voluerit, re adhuc integra, admittendum ea conditione, ut eo utatur, quo alii Patres tunc utuntur.* Quod hic breviter, subobscuraque ait Patricius, fusius jam ante illum, clariusque exposuit Gregorius X. ita inquit: *Sane si aliquis ex prædictis Cardinalibus Conclave prædictum, ut supra exprimitur, non intraverit, aut intrans, absque manifesta causa infirmitatis, exierit, ipso minime requisito, nec in ejusdem electionis negotio ulterius admittendo, per alios ad eligendum Summum Pontificem libere procedatur. Si vero infirmitate superveniente idem Conclave ex eis aliquem exire contingat, poterit ejus suffragio non requisito, ad electionem procedi; sed si ad alios post sanitatem sibi redditam, seu ante redire voluerit, vel etiam si alii absentes, quos per decem dies diximus expectandos, supervenerint, re integra, videlicet antequam eidem Ecclesiæ sit de Pastore provisum, in eodem negotio in illo statu, in quo ipsum invenerint, admittantur, præmissa tam de clausura, quam de servientibus, cibo, ac potu, & reliquis, cum aliis servaturi.* Orta est aliquando quæstio de Cardinali, qui propter infirmitatem nolens manere in Conclavi, voci suæ renunciavit, an hæc renunciatio valeat, & num rediens admittendus sit. Ostiensis quidem, cui, ut notavit Glossa in Cap. *Ubi periculum*, De electione, in VI. hoc de facto contigit, discussit hanc quæstionem in Cap. *Nisi cum pridem*, De renunciatione, docetque, Cardinalem factæ renunciationis poenitentem, si redierit, admittendum esse; sed statim

tamen addit, Cardinalem ipsum de iis, quæ medio tempore facta sunt, conqueri haud posse. Videri autem possunt & de hac Quæstione Canonici Juris Interpretes in suis ad citatum Textum in Capite, *Ubi periculum*, Commentariis. Præteris vero legendus doctissimus Passerinus in suo celeberrimo Opere numeris omnibus absoluto, quod inscripsit, *De electione Canonica*.

XVIII. Porro si extra locum suæ Curiae Pontifex decesserit, cautum est ex nostro Cæremoniali Constitutionibus Gregorii X. & Clementis V. adhærente, ut *convenient Cardinales in Civitate illius Territorii, ubi decesserit, in Palatio Episcopali, vel alio condecienti loco &c.* Sed & audiamus hic Gregorium ipsum X. Papam, qui ita de ea re statuit: *Si quando Romanum Pontificem extra Civitatem prædictam, in qua erat cum sua Curia residens, contigerit ab hac luce migrare, teneantur Cardinales in Civitate, in cujus Territorio, seu districtu Pontifex obiit, convenire, nisi sit forsitan interdicta, vel contra Ecclesiam Romanam in aperta rebellionem persistat: quo casu in alia viciniore convenient, quæ similiter nec Interdicto subiaceat, nec sit, ut prædictum, aperte rebellis.* Additque mox: *In hac etiam Civitate tam quoad expectationem absentium, quam quoad habitationem communem, clausuram, & cætera omnia in domo Episcopali, vel alia qualibet eisdem Cardinalibus deputanda, eadem observentur, quæ superius, obeunte dicto Pontifice in ea, in qua cum sua Curia residebat, sunt expressa.* Hæc Gregorii Decretum confirmavit deinde, explicuitque luculentius Clemens V. in Clementina sua Constitutione, quam edidit ipse de electione Summi Pontificis, legiturque in Cap. II. De electione &c. cum enim juxta prædictam Constitutionem Gregorii, Papa extra Civitatem, in qua cum sua erat Curia, moriente, in Civitate, in cujus districtu, seu territorio moritur, sit regulariter Successoris electio celebranda; districtus, seu territorii nomine Diocesim hoc casu intelligendam fore, censuit Clemens; qui etiam adjecit, *quod si in certo loco Causarum, & Litterarum Apostolicarum audientia remanente, Papam alibi mori contingat, non ibi, sed ubi prædicta fuerit audientia, memorata electio, celebretur, etiamsi eadem audientia tempore mortis hujus vacare noscatur, nisi forte ante mortem eandem ordinatum esset per Papam de Curia transferenda: quo casu servetur provisio Constitutionis prædictæ; ut scilicet fiat electio in loco, ubi Papa moritur, uti jam Gregorius Papa X. statuerat.*

§. XII.

De Clementis V. declaratione, & additione.

Hæc Gregorii Decretum Clemens confirmans declarat, illudque per Sanctæ Romanæ Ecclesiæ Cardinales, vacante Sede, nullo modo immutari posse, nec licere Cardinalibus quicquam potestatis, aut jurisdictionis Pontificalis tunc exercere, nisi Officio Camerarii, & majoris Poenitentarii, si forte per id tempus vacarent, pro tempore providere. 2^o Territorio autem Diocesim intelligi voluit hac additione, quod si Audientia Causarum, & Litterarum Apostolicarum in aliquo certo loco Pontifice moriente remanserit, electionem ibi, non autem ubi Papa decesserit, esse celebrandam, nisi prius per Papam statutum fuisset de Curia transferenda. Item si electione non completa, Patres de Conclavi simul, vel successive exierint, compellendos esse a Domini-

nis, seu Magistratibus locorum rursus ad Conclave redire, & opus perficere. Demum absolvit, & habilitat (1) omnes Cardinales ad effectum electionis, ab omnibus Censuris, & poenis.

COMMENTARIUS.

I. **S**Tatuit & alia pleraque Gregorius, quæ uti notat hic noster §. ad Dominos Conclavis, & Patrum tutelam, & securitatem pertinent, hortaturque Patres ad electionem rite faciendam pro Dei honore, & publica utilitate, & passionibus, juramenta, obligationesque omnes pro ea re factas damnat, atque irritat. Quæ omnia confirmarunt deinde, novoque robore munierunt & alii Summi Pontifices, præ cæteris autem Clemens Papa V. in citata sua Constitutione in Concilio Viennensi edita, quæ incipit, *Ne Romani*, & relata est inter Clementinas, Cap. II. citato Titulo, *De electione &c.* cujus etiam meminit nostrum Cæremoniale, ubi ait, Gregorii X. Papæ Decretum confirmatum, ac declaratum fuisse a Clemente V. *illudque per Sanctæ Romanæ Ecclesiæ Cardinales, vacante Sede, nullo modo immutari posse; nec licere Cardinalibus quicquam potestatis, aut jurisdictionis Pontificalis tunc exercere, nisi Officio Camerarii, & majoris Pœnitentarii, si forte per id tempus vacarent, pro tempore providere.* Recitanda hic cenfeo verba Clementinæ Constitutionis, qua inter alia mandat Clemens Papa V. *quod si ejusdem Ecclesiæ, Romanæ scilicet, Camerarium, aut Majorem, vel aliquos alios ex Pœnitentiariis, quorum officium per obitum ejusdem Pontificis nolumus, inquit, expirare, per mortem, vel alias deficere quovis modo contingat, valeat idem Cætus, videlicet Cardinalium, ad tempus vacationis hujusmodi, pro numero deficientium, vel ampliori etiam, quantum ad Pœnitentarios, si hoc eidem Cætui concorditer expedire videbitur, alios subrogare.*

II. De Camerario S. R. E. jam superius non nihil diximus; de Pœnitentario autem differuimus Tomo III. Romani Pontificalis in Commentario ad Titulum III. Agit de utroque in sua de electione Summi Pontificis Bulla Pius Papa IV. ubi inter alia decernit, & declarat, Camerarii, & Majoris Pœnitentarii officia, etiam Sede vacante durante, ita durare, ut tamen ea, quæ ipsius Pii Papæ Constitutione prohibentur, & quæ Pontifice vivente exercere non consueverunt, seu a quibus pro ejusdem Pontificis reverentia, aut alias quomodolibet abstinebant, minime usurpent. Sane quod Pœnitentiarium Romanæ ipsius Ecclesiæ spectat, quemadmodum Episcopi jampridem habuerunt Pœnitentiarium Generalem, ad quem tanquam ad ipsum Episcopum pro absolutione gravium criminum recursus haberetur, & quem in perplexis, atque difficilioribus casibus inferiores Confessarii confulerent, uti ostendit Vanespen Parte I. *Juris Ecclesiastici*, Titulo XII. Cap. III. ita & Romanus Pontifex jampridem Pœnitentiarium suum habuit. Cum vero labentibus seculis plurium criminum, ac Censurarum absolutiones, necnon votorum, atque Irregularitatum dispensationes, & Canoniorum impedimentorum relaxationes ad Sedem Apostolicam devolutæ sint, ideoque major, & frequentior pro iis obtinendis ad ipsam Apostolicam Sedem accedendi fuerit necessitas, Sum-

mus Pontifex, quod ea solus examinare, & decidere minime valeret, omnia Pœnitentiarium suo plene commisit; idque primitus, uti in Relatione Romanæ Curiae Parte II. Discursu XII. notat Cardinalis de Luca, tam in Foro externo, quam interno, adeout pleraque negotia, quæ hodie per Datariam, ut vocant, & Secretariam Brevis expediantur, concederentur per viam Pœnitentariæ, itaut tunc temporis minime effet necesse super dispensatione, exempli gratia, Matrimoniali, pro Foro interno recurrere ad Pœnitentiarium, & pro Foro externo ad Datariam, ut fieri hodie solet.

III. Teste eodem Cardinale de Luca, quem citat, ac sequitur laudatus Vanespen Parte I. *Juris Ecclesiastici*, Titulo XII. Cap. III. duravit hæc summa Pœnitentarii auctoritas usque ad tempora Pii IV. qui anno MDLXII. Bullam reformationis Pœnitentariæ Apostolicæ edidit, quæ incipit, *In sublimi*, in qua ait primum Pontifex, quod ad Pœnitentariæ Apostolicæ officium considerationis oculis directis, attenderit, in Pœnitentariæ officio, in quo morum censura, & animarum salus præcipue vertitur, plures, & diversos abusus, propter superiorum temporum licentiam, & injuriam irrepsisse, ideoque reformationem decrevisse, qua plurimas facultates Pœnitentario, & ejus Officialibus adimit. Ulterius progressus Pius V. novam plane formam ipsius Pœnitentariæ, priore in totum renovata, & abolita, induxit, per suam Constitutionem, quæ incipit, *In omnibus*, mandans inter alia, ut ipsum Pœnitentariæ Officium certis quibusdam facultatibus, quæ aliis magis convenerunt, exoneratum, atque expeditum, debinc ea, quæ animarum salutem præcipue concernunt, attentiore studio prosequatur. Functionibus autem Pœnitentarii imminutis, consequens erat, ut & Officialium, & Ministrorum quoque numerus diminueretur. Unde in citata Constitutione suppresso, & abolito magno numero ipsorum Officialium, ac Ministrorum, certos ac paucos, qui hoc Tribunal regant, negotiaque ad illud pertinentia expediant, Pontifex designavit: *Illorum autem omnium officiorum in ipso Pœnitentariæ officio constitutorum*, ait memoratus Pius V. *venedictionem, aut quamvis aliam voluntariam, tacitam, vel expressam ea dimittentium dispositionem expresse prohibemus; sed illa omnia probis, & peritis gratis omnino, & sine aliqua dimittentium, aut aliorum quorumcumque acceptione concedantur; quod si secus factum fuerit, quæcumque concessionis de illis pro tempore factæ, nullius sint roboris, vel momenti.*

IV. Ministrorum Pœnitentariæ Romanæ primus est quidem Pœnitentarius Apostolicus, qui Pœnitentarius Major dicitur, isque juxta Constitutionem Pii V. officium suum per seipsum exercere debet, oportetque, ut sit Presbyter, Magister in Theologia, seu Decretorum Doctor; & si causa legitima a Summo Pontifice approbata absens, vel impeditus fuerit, alium S. R. E. Cardinalem prædictis qualitatibus insignitum.

sibi

(1) Ita legitur in editione Romana; in Veneta deest, & habilitat.

sibi substituat; qui quidem taliter subrogatus interim per seipsum hoc munus prosequatur, Litteralque non Pœnitentiarum delegantis, sed suo proprio nomine jubeat expediri, Præter Pœnitentiarum majorem sunt insuper in tribus Patriarchalibus Ecclesiis Urbis Pœnitentiarum minores, qui ex diversis Religionibus assumuntur: in Lateranensi Basilica Religiosi Ordinis Minorum Observantium Reformatum; in Vaticana Societatis Jesu Presbyteri; atque in Liberiana, sive S. Mariæ Majoris Religiosi Ordinis Prædicatorum; iique omnes confessiones excipiunt, & in signum majoris potestatis virgam in manibus tenent, quibus pœnitentes, aliosque ante ipsos genuflexos leviter percutere in capite consueverunt. Hi sane respective in Domo Basilicæ propinqua sub obedientia unius eorum, qui Superior deputatur, regulari modo, tanquam in Claustro vivunt; atque in pertinentibus ad hoc munus, ait Cardinalis de Luca, sunt subiecti Pœnitentiarum, ejusque visitationi, & correctioni; in iis vero, quæ concernunt disciplinam Regularem, sunt subiecti Prælati propriæ Religionis.

V. Habet hic Pœnitentiarius Major & aliam Ministrorum speciem, seu Officialium, qui scilicet regunt Pœnitentiarum per quandam speciem Tribunalis, audiendo nempe supplicationes super petitis absolutionibus, & dispensationibus præcipue Pœnitentium ab Urbe absentium, pro quibus expediendæ sunt Litteræ, ut ajunt, in forma. Juxta hodiernum Curia stylum, & præfatam reformationem Pii Papæ V. qui omnia loca Referendariorum, Correctorum, Revisoris, viginti septem Scriptorum exercitia, & octo Procuratorum, quibus Pœnitentia olim constabat, suppressit, uti ex Pii Constitutione notat Cohellius in Notitia Cardinalatus, Cap. LIV. constat Pœnitentiariæ Tribunal Majore Pœnitentiarum, Regente, Datario, uno Correctore, uno Theologiæ Magistro, uno Decretorum Doctore, duobus Procuratoribus, duobus Scriptoribus, & uno Sigillatore; primusque post Pœnitentiarum Majorem est ille Officialis, qui vocatur Regens Pœnitentiariæ, debetque ex Constitutione memorati Pii Papæ V. esse *Magister in Theologia, vel Decretorum Doctor, Vir eximia doctrina præstans, casuumque conscientia peritus*, uti & alter Officialis, qui Datarius vocatur. Regens vices Majoris Pœnitentiarum gerit, habetque etiam facultatem plures absolutiones, & dispensationes, quæ nimirum negari non solent, concedendi. Has ipse quoque signat, idque per verbum, *Fiat*, quemadmodum ipse Pœnitentiarius Major, sed aliter, quam Papa; hic enim signat hac forma: *Fiat, ut petitur*. Pœnitentiarius vero, aut ejus Regens: *Fiat de speciali*; vel, *Fiat de expresso*; si nimirum factò prius verbo cum Sanctissimo concedatur gratis, uti observat Marcus Leo in Praxi Pœnitentiariæ, Parte I. Cap. I. Num. VI. Datarius Pœnitentiariæ in calce supplicationum scribit datam diei, mensis, & anni Pontificatus Papæ viventis in hunc modum: *Datum Romæ apud Sanctum Petrum sub sigillo Pœnitentiariæ, si Pontifex in Palatio Vaticano resideat, si vero in Quirinali, apud Sanctam Mariam Majorem pridie Nonas Novembris Pontificatus Sanctissimi D. N. BENEDICTI Papæ XIV. anno IX.*

VI. Adsunt præterea in hoc Pœnitentiariæ Tribunali, ut asserunt memorati Auctores Mar-

cus Leo, & Cardinalis de Luca, tres Procuratores, quamvis duo dumtaxat assignentur a Pio V. seu Secretarii in hac materia bene periti, qui per turnum, ut inquit Cardinalis de Luca, inter se distribuunt libellos, qui porriguntur sine nomine, sub aliquo signo, vel cifra, ut dignoscantur ab iis, qui negotia gerunt; ipsique Procuratores desuper efformant supplicationes juxta stylum Tribunalis, quas postea in Congregatione proponunt. Habet præterea ipsum Tribunal duos Consultores, unum scilicet Theologiæ Magistrum, qui Theologus Pœnitentiariæ vocatur, & alterum Doctorem in Decretis, seu in Jure Canonico. Suum quoque Sigillatorem habet, qui, ut ait Marcus Leo loco citato, Numero XIV. *publicum sigillum Sacra Pœnitentiariæ apud se retinet, Litteras Majoris Pœnitentiarum expediendas, intus, & extra, Bullas vero intus subscribit tantum post Correctorem, subsequenti forma: Gratis ubique. J. Rospigliosus.* Hæc ille, cujus tempore Sigillator erat Julius Rospigliosus. Corrector vero, seu Revisor, est Officialis, qui supplicationes a Procuratoribus Pœnitentiariæ confectas perlegit, & cum necessitas exposcit, corrigit; & pro adimpleti sui muneris signo notam peculiarem imprimit in extremis supplicationum paginis; Litteras demum omnes in forma Brevis, ac Bullas secundum præscriptam supplicationis formam expediendas & expeditas subscribit. Sunt tres tandem in hoc Tribunali Scriptores, qui, postquam supplicatio signata est, de commissione Procuratorum, Litteras, vel Brevia, juxta formam supplicationis scribunt, ut postmodum subscribantur, & claudantur, ac sigillentur, Oratoribus, vel eorum Agentibus consignandis.

VII. Plura de Summo, seu Majore Pœnitentiarum Apostolicæ Sedis, & de Officialibus Sacra Pœnitentiariæ, deque ejus origine, & stylo scribunt Chassaneus, Gomefius, Vestrius, Gravatus, Mandosius, & alii quos citat laudatus Cohellius, itemque memoratus Marcus Leo, Cardinalis de Luca, Vanespen, & inter alios Vincentius Petra S. R. E. Cardinales Pœnitentiarius Major peculiari Tractatu, quem inscripsit, *De Sacra Pœnitentia*. Ceterum, licet Sede vacante, juxta Clementis V. Constitutionem Cardinalium Cætus Majorem Pœnitentiarum, vel aliquos alios ex Pœnitentiariis, si per mortem, vel alias deficere quovis modo contingat (puta quia incidit in furorem, vel in infirmitatem, quæ impedit executionem officii, aut si recederet, vel nollet officium exercere, uti notat Glossa) valeat ad tempus vacationis hujusmodi, pro numero deficientium, vel ampliori etiam, quantum ad Pœnitentiarum, si hoc eidem Cætui concorditer expedire videbitur, alios subrogare; docet nihilominus Joannes Andreas laudatus a Glossa ibidem, quod ubi nullus ex Pœnitentiariis deficeret, non posset Cardinalium Cætus, Sede vacante, alios subrogare: *Cum Constitutio sit prohibitoria præter casus permisos, & istud non videtur permillum, nisi cum aliquis deficit.* Sunt & alia, quæ de ipso Majori S. R. E. Cardinale Pœnitentiarum dici hic possent, quæ tamen suis locis in decursu hujus Operis, ubi se se nobis opportuna præbebit occasio, ad Tyronum notitiam eruditionemque, ex antiquis mss. Apostolicorum Cæremoniariarum Diariis, aliisque præfatis Auctoribus explicabimus.

§. XIII.

§. XIII.

De Clementis VI. limitatione.

Extat & Decretum Clementis Sexti circa annum salutis quadragesimum supra mille & trecentos editum, per quod superiora Statuta limitantur. Quod, quia ultimum est, & in Sacrorum Canonum Codicibus non adhuc descriptum, de verbo ad verbum duximus inferendum.

C L E M E N S &c.

Ad perpetuam rei memoriam.

Licet in Constitutione a felicitis recordationis Gregorio Papa X. Prædecessore nostro super electione Romani Pontificis, edita in Concilio Lugdunensi, inter cetera caveatur expresse, quod, si eundem Pontificem in Civitate, qua cum sua Curia residebat, diem claudere contingat extremum, Cardinales in Palatio, in quo idem Pontifex habitat, omnes convenient, & in eo singuli singulis tantummodo, nisi illi, quibus ex patenti necessitate duo permittuntur, sint contenti servantibus Clericis, vel laicis, prout elegerint, unum Conclave, nullo inter medio pariete, vel alio velamine, habitent in communi. Et quod diebus certis, non facta provisione de Pastore, decursis, panis, vinum, & aqua tantummodo eisdem Cardinalibus, donec subsequatur provisio, administretur. Quia tamen, sicut frequenti multorum assertione, & in Cardinalatu constituti percepimus, nonnulli ex Cardinalibus ipsis in observatione Constitutionis ipsius gravati nimium extiterunt, multique ex ipsis duos in dicto Conclavi habuerunt servitores, non absque scrupulo conscientiae, propter ambiguitatem dictorum verborum, videlicet ex patenti necessitate duo permittantur in dicta Constitutione, ut præmittitur, contentorum: Nos providere super his cupientes, ex his, & aliis certis causis rationabilibus, quæ ad id nostrum animum induxerunt, rigorem Constitutionis ipsius, & ad Fratrum nostrorum supplicationem in hoc providimus temperandum: statuentes, quod Cardinales, postquam Conclave huiusmodi, seu clausuram pro dicta electione celebranda intraverint, singuli duos servientes tantum Clericos, vel laicos, prout duxerint eligendos, ac insuper singulis diebus, præter panem, vinum, & aquam, in prandio, & in cœna unum dumtaxat ferculum carniū unius speciei tantummodo, aut piscium, seu ovorum cum uno potagio de carnibus, vel piscibus principaliter non confecto, & decentibus salsamentis habere valeant ultra carnes salatas, & herbas crudas, ac caseum, fructus, sive electuaria. Ex quibus tamen nullum specialiter ferculum conficiatur, nisi ad condimentum fieret, vel saporem. Nullus vero eorum de alterius ferculo vesci possit; liceat etiam eis ex decencia honestatis habere in clausura huiusmodi, cum in lectis quiescendi causa, vel dormiendi esse voluerint, intermedia, seu velamina simplicium tantummodo cortinarum; & felicitis memoriæ Clementis Papæ Quinti Prædecessoris nostri, & aliis Constitutionibus Apostolicis contrariis, quibus propter hoc in aliis derogari nolumus, non obstantibus quibuscumque. Nulli ergo &c. Datum Avenioni VIIII. Idus Decembris, Anno x.

C O M M E N T A R I U S.

I. **S**tatuerat jam inter alia Gregorius Papa X. in celebri sua Constitutione, quam de Conclavi erigendo edidit in Generali II. Lugdunensi Concilio, cujus iterum iterumque mentionem fecimus, ut Cardinales scilicet in Conclavi inclusi pro electione Romani Pontificis, uno tantum famulo, vel Clerico, vel laico, contenti essent, & quibus patens necessitas id suggerebat, duos tantum habere permittebantur. Præterea eadem Constitutione statuerat, ut si electio non fieret intra tres dies ab ingressu Conclavis, per quindecim dies sequentes, tam in prandio, quam in cœna, uno tantum ferculo essent contenti; quibus diebus decursis, ex tunc tantummodo panis, vinum, & aqua ministrarentur eisdem Cardinalibus, donec electio subsequeretur. Statuerat insuper, ut om-

nes Cardinales in eodem Conclavi, nullo intermedio pariete, aut velamine, in communi habitarent. At vero hanc Gregorii X. Papæ Constitutionem laxavit nonnihil, mutavitque Clemens Papa VI. mandans, I. posse ipsos Cardinales in Conclavi existentes habere secum duos famulos Clericos, vel laicos, prout eis magis placebit. II. elapsis tribus diebus post suum ad Conclave introitum, concedi eisdem ultra panem, vinum, & aquam in prandio, & in cœna, fructus, caseum, & electuaria, & unum ferculum carniū, vel piscium dumtaxat in prandio, & aliud in cœna. III. licere eisdem *ex decencia honestatis habere in clausura, cum in lectis quiescendi causa, vel dormiendi esse voluerint, intermedia velamina simplicium tantummodo cortinarum.* Edidit de his Clemens Constitutionem, quæ

quæ non modo legitur in hoc nostro §. verum etiam reperitur inter Acta Concilii Constantiensis, & data dicitur *Avenione viij. Idus Decembris, anno x.* sui scilicet Pontificatus, ideoque anno Christi MCCCLI. Ceterum de his cortinis videri possunt, quæ supra diximus in Commenta-

rio ad §. II. ubi etiam notavimus quando primum introductæ fuerunt lignæ cellulæ, & distinctiones illæ colorum, violacei scilicet, quo ornantur ædiculæ Cardinalium a proxime defuncto Pontifice creatorum, & viridis, quo reliquorum Cardinalium cellulæ vestiuntur.

§. XIV.

Exhortatio, ut revideantur Majorum Decreta super electione.

Hæc pauca ex Decretis Sanctorum Patrum libavimus pro ingenii nostri imbecillitate, sed hortamur Reverendissimos Dominos Cardinales, ut, cum electionis negotium imminet, secundum Ostiensis in sua Lectura Consilium, diligenter revideant Pontificum, & Conciliorum Statuta de electione Romani Pontificis edita, & Doctorum super ea re interpretationes. Et quoniam res est maxime ardua, indigetque magna discussione, fiet fortassis super hac re specialis Tractatus.

COMMENTARIUS.

I. **V**aria de electione Papæ Decreta jam nos explicuimus supra in Commentariis ad §. 1. & seqq. Insignes plane sunt Constitutiones editæ ea de re a Summis Pontificibus Nicolao II. in Romano Concilio anni MLIX. ab Alexandro III. in Generali Concilio Lateranensi III. Can. 1. a Gregorio X. in Lugdunensi II. Concilio Œcumenico, Can. II. & a Clemente V. Concilio Generali Viennensi, quorum Constitutiones relatæ in Corpore Juris Canonici, leguntur in Titulis, *De electione &c.* & ab innumeris pene Canonici Juris Consultis explicatæ habentur. Præter citatas Constitutiones,

aliasque antiquiorum Pontificum, variæ de ipsa Romani Pontificis electione editæ sunt a Pontificibus recentioribus Sanctiones, quæ in unum collectæ præfixæ fuerunt novo Cæremoniali continenti ritus electionis Romani Pontificis Gregorii XV. Papæ jussu edito. Legenda autem editio novissima anni MDCCXL. adjunctam enim habet celebrem Clementis Papæ XII. Constitutionem, quæ incipit, *Apostolatus officium*, & continet diversas ordinationes pro bona directione Conclavis, ac rerum, Sede Apostolica vacante, agendarum. Edita fuit ea Constitutio ab ipso Clemente XII. Pontifice anno MDCCXXXI.

§. XV.

De Missa Spiritus Sancti.

Exequiis igitur defuncti Pontificis per novem dies completis, & Conclavi opportuno præparato, decima die Patres conveniunt in Basilica S. Petri, vel alibi pro temporis, & loci opportunitate, ubi per unum ex eis Missa de Spiritu Sancto celebratur, & in fine per aliquem Prælatum, seu alium doctum Virum habeatur Sermo, in quo moneantur Patres, ut sepositis omnibus privatis affectibus, Deum tantum præ oculis habentes, Sanctæ Romanæ, & universali Ecclesiæ de Pastore idoneo providere curent. Estque admodum conveniens, ut Decreta Summorum Pontificum pro electione hujusmodi statuta ab ipso Oratore summam repetantur, & reducantur ad memoriam Dominorum Cardinalium.

COMMENTARIUS.

I. **N**ovendialia in exequiis Pontificum statuta primum fuisse videntur a Gregorio Papa X. ubi in sua Constitutione edita in Generali Concilio Lugdunensi II. Can. II. & relatæ in Cap. *Ubi periculum*, III. *De electione &c.* in Sexto, inter alia statuit, ut *Cardinales, qui fuerint in Civitate ipsa præsentibus, in qua scilicet Pontifex obiit, absentes expectare decem diebus teneantur*. Hinc mortuo Aretii ipso Gregorio die x. Januarii anni MCCLXXVI. juxta legem ab eo latam Cardinales in Conclavi se incluserunt die xx. ejusdem mensis, & anni; & postridie, in Festo videlicet S. Agnetis Virgi-

nis, ac Martyris, primo celebrato, & publicato scrutinio, elegerunt in Summum Romanum Pontificem Petrum Tarantasiensem ex Ordine Prædicatorum Episcopum Cardinalem Ostiensem, celebrata jam prius de more Missa Spiritus Sancti, appellatusque est Innocentius V. Id constat ex Litteris encyclicis post suam Coronationem datis, quibus Fideles de adepta dignitate certiores fecit, quas ex Formulario Marini Ebuli refert Raynaldus ad annum ipsum MCCLXXVI. Numero xvii. *Convenimus*, inquit, *in Civitate prædicta*, scilicet Aretii, *& in omni mansuetudine spontanea Palatium, in quo idem Prædecessor* ka.

habitabat, pridie ante Festum Beatae Agnetis intrantes, in ipso Festo summo mane Missarum solemnibus in honorem Sancti Spiritus celebratis ex more, ipsiusque gratia votis invocata supplicibus, concorditer ad celebrandam electionem instantem scrutinii viam elegimus; & assistente ipso benigno Sapientiae Spiritu, qui devote se invocantibus, Ecce adsum, solet dicere invocatus, cujus gratia molimina tarditatis ignorat, primo celebrato, & publicato scrutinio, quod tamen nequaquam aliud, sicut nec oportuit, est sequutum, in humilitatem nostram. . . . unanimiter concordarunt. Idem ritus servatus est in sequioribus Romanorum Pontificum electionibus, praesertim ubi a Caelestino V. Clemente V. & Clemente VI. confirmata fuit laudata Gregorii X. Constitutio, ut nimirum expletis Novendialibus defuncti Pontificis, & celebrata Missa Spiritus Sancti, Cardinales ingrederentur Conclave, ibique eligerent novum Pontificem.

II. Ante Gregorii X. Constitutionem tamen Novendialia ipsa minime in usu essent, consuevit tamen, mortuo, & sepulto Pontifici Missa mortuorum secunda ab ejus obitu die cantari, tertia vero die Missa Spiritus Sancti celebrata, de electione tractari. Hanc fuisse antiquam Romanae Ecclesiae consuetudinem docet nos Romanus Ordo XII. auctore Cencio Diacono Cardinali S. Luciae in Orpheo, & S. R. E. Camerario, sub Caelestino Papa III. qui deinde post Innocentii III. mortem Romanus Pontifex renunciatus, Honorius III. nominatus est. Is ergo Cencius in memorato Ordine, Cap. XLVIII. sic inquit: *Mortuo Romano Pontifice, & sepulto, omnes Cardinales ad propria revertuntur secundum antiquam consuetudinem. Secunda vero die conveniunt in Ecclesia, & Missa mortuorum cantata, omnes similiter secundum antiquam consuetudinem recedunt. Tertia autem die iterum omnes in Ecclesia congregati, Missa Sancti Spiritus ibidem primitus celebrata, tractant de electione.* Missae de Spiritu Sancto celebratio in electionibus Summorum Pontificum occurrit passim apud Ecclesiasticae Historiae Scriptores, Auctoresque Romanorum Ordinum, inter quos Petrus Amelius in suo Romano Ordine xv. Cap. cXLIX. sic inter alia inquit: *Item sciendum, quod Domini Cardinales post mortem Domini Gregorii Papae XI. voluerunt audire in Hospitali Sancti Spiritus Missam de Spiritu Sancto. Sequenti die, post Novenam fuit, Novendialia scilicet defuncto Pontifici juxta morem jam introductum celebrata, quia voluerunt habere consilium cum Romanis, antequam intrarent Conclavim, pro conservatione Conclavis.* Obiit Gregorius XI. die XXVII. Martii anni MCCCLXXVIII. Eundem morem servatum fuisse post mortem Urbani VI. qui Gregorio successit, migravitque e vita die xv. Aprilis anni MCCCLXXXIX. testis est citato loco idem Amelius, ubi ita ait: *Item post mortem Domini Urbani VI. Domini Cardinales post Missam nonam, & Sermonem voluerunt audire Missam ibidem de Spiritu Sancto cum Sermone, quam dixit Dominus Pisanus.*

III. Supremo Novendialium die consuevisse ad Sacri Senatus Patres Conclave ingressuros sermonem, seu Orationem haberi a Viro docto, imo & quandoque ab uno ex ipsis Patribus, exemplum habemus Thomae Tituli S. Susannae Presbyteri Cardinalis, qui ad Summum Pontifi-

To. I.

catum evehctus, Nicolaus V. dictus est. Is enim Eugenio IV. anno MCDXLVII. die XXIII. Februarii e vivis erepto, iustisque more Majorum per S. R. E. Cardinales Novendialium spatio rite solutis, postremo illorum die gravem elegantemque ad eosdem ingressuros Conclave de futuro Pontifice eligendo Orationem habuit. Funebrem Orationem Jannottus Manettus in Vita Nicolai V. appellat, & ex eo Raynaldus ad annum Christi MCDXLVII. Num. XIV. Sed aptius de Eugenio, & de eligendo novo Pontifice dixissent, id nos docente Aenea Sylvio, qui tum Romae versabatur, & omnia diligenter inspiciebat. Aeneae verba in Oratione ad Fridericum III. Imperatorem inter Miscellanea Baluzii Tomo VII. pag. 548. haec sunt: *Eugenio duo Sermones facti sunt, Alterum Malatesta quidam ex genere Auditorum, alterum Cardinalis Bononiensis fecit, prima, & ultima exequiarum die. Ille vitam Eugenii commendavit, hic obitum. Ille, qualis fuerit Eugenius, enarravit; hic, qualis eligi deberet Successor, edocuit. Comminatus est extremum iudicium Cardinalibus, si amore, si odio, si aliqua affectu indigno in electione uterentur; tantaque vehementia loquutus est, ut Angelum, non hominem sermocinari putares, pluresque sibi Summum Pontificatum augurarentur.* Aeneae Sylvio concinit Poggius Florentinus, qui in sua ad Nicolai V. Oratione, extremo exequiarum die ab eodem Thoma Cardinali Bononiensi Tituli S. Susannae Orationem de Pontifice eligendo habitam testatur.

IV. Mirum sane aliquibus videri poterit, si nostri temporis morem cum moribus antiquis metiamur, huiusmodi Orationem a Sanctae Romanae Ecclesiae Cardinale habitam, quod hodie, & jam diu in usu non est. At, uti recte observat eruditissimus Dominicus Georgius in Vita Nicolai V. anno MCDXLVII. Num. I. in fine, moris erat interdum, ut non duae tantum, sed etiam plures Novendialium tempore conciones de Pontificis defuncti laudibus a Cardinalibus, qui Missas de illius obitu ordinatim celebraturi erant, post Missam recitarentur, nisi eas alicui Praefuli, seu Theologo demandarent; ac nona die ab eodem Cardinale, qui Missam celebraret, seu cui ille commisisset, de laudibus defuncti Papae, deque alio eligendo Oratio habenda erat. Meminit plane ejus ritus Ordo Romanus Petri Amelii Cap. cXLVI. apud Mabillonium Tomo II. Musei Italici: *Sciendum tamen, quod omni die debet esse Missa, quae debet dici per Cardinales juxta Ordinem suum, & Sermo per eosdem, nisi committant Praelatis, vel Magistris in Theologia, aliis non.* Ritus habendae Orationis de eligendo Pontifice postremo exequiarum die Papae defuncto per solutarum mentionem passim faciunt Caeremoniarii Apostolici in suis Diariis, ex iisque habemus, non modo Sacrae Theologiae Magistros, verum etiam Jurisconsultos eam ad Cardinales Orationem habuisse. Certe Auctor est Franciscus Mucantius Apostolicus Caeremoniarius in suo ms. Diario ubi enarrat gesta Pontificatus Gregorii XIII. ultimo exequiarum die, quae celebratae fuerunt illius Praedecessori S. Pio V. habitam fuisse Orationem de novo scilicet Pontifice eligendo per *Antonium Buccapadulium Jurisconsultum Romanum.*

V. Ceterum ex praescripto nostri §. in ea Oratione, quae fieri potest per aliquem Pra-

F

tum,

tum, seu alium doctum Virum, admoneri debent Cardinales, ut sepositis omnibus privatis affectibus, Deum tantum præ oculis habentes, Sanctæ Romanæ Ecclesiæ, & universali Ecclesiæ de Pastore idoneo providere curent. Id plane inculcant passim Summi Pontifices Cardinalibus in suis Constitutionibus, quas de electione Papæ ediderunt, viderique inter alias potest celeberrima de ea re Gregorii X. Constitutio, de qua in superioribus Commentariis diximus. Notanda hic iterum ea Orationis verba, quam post Eugenii IV. obitum ad Cardinales Conclave ingressuros habuit Thomas Cardinalis Bononiensis, quippe qui, ut testatur Æneas Sylvius, comminatus est extremum iudicium Cardinalibus, si amore, si odio, si aliquo affectu indigno in electione uterentur. Ut alios mittam, profecto ab hisce passionibus alienus penitus fuit S.R.E. Cardinalis S. Carolus Borromeus, utpote qui, ut tradit ejus Vitæ Auctor Carolus a Basilica Petri, Lib. 1. Cap. 1x. mortuo illius Avunculo Pio Papa IV. omne demum studium, curam, operamque in eo posuit, ut Pontifex Ecclesiæ daretur, qui pietate, vitæ sanctitate, doctrinaque plurimum prodesset, qualem inter alios Michaellem Ghislerium Ordinis Dominicani, Cardinalem Alexandrinum cognoverat; nam & eum amavit, & plurimi fecit semper, & de vitæ, atque Ecclesiæ suæ rationibus sæpe consuluit. Itaque nulla habita ratione, quid Carasfarum ille causæ facere fortasse posset, qui a Paulo IV. Cardinalis esset factus, quodve Pio ejus avunculo parum gratus fuisset: Marco Sittico Cardinali Altempsio secum adnente, in ejus omni conatu creationem incubuit, Collegis, qui se se ad eum applicaverant, idem persuasit, & eosdem, cum res prope perficeretur, secum retinuit, ne sibi forte quis eriperetur, atque ita quod volebat, celeriter obtinuit. Creatus est vij. Idus Januarii anno MDLXVI. & Pius Quintus appellatus.

VI. Dignum plane notatu est, quod de ea Missa docet in suo Cæremoniali Sedis vacantis post obitum Sixti IV. Papæ Joannes Burchardus §. xxxvii. *Feria quinta mensis Augusti xxvi. Reverendissimus Dominus Cardinalis S. Marci in Basilica S. Petri, & Altari ante cancellum & supra parato in ceterorum xxviij. Reverendissimorum Dominorum Cardinalium præsentia, ac Prælatorum, & Orationum in Romana Curia existentium dixit Missam solemnem de Spiritu Sancto cum Oratione convenienti, & Præfatione, omiſſis verbis, hodierna die; etsi bene memini in*

dixit prima Oratione sub sua conclusione dixit aliam, & bene; debet enim dici pro electione futuri Pontificis, videlicet: Supplices Domine humilitate deprecamur &c. & dixit, Credo, & alia more solito. Cum iret ante Altare de Faldistorio pro dicenda Confessione, deposita sibi Mitra, retento in capite bireto, fecit profundam Cardinalibus reverentiam, dicens, in hac Missa ita convenire, cum Cardinales tunc Pontificem repræsentent. Idem fecit redeundo, & accedendo ad Altare post Offertorium. Missa finita, ipse celebrans dedit benedictionem cum Mitra, more solito, & non fuerunt data Indulgentia. Addit tum paulo post in §. xxxviii. in hac Missa, & aliis novem exequalibus Prælatos Curie interfuisse sine cappis, sed in eorum mantellis cum suis capitiis circa collum transversatis, more solito. Neque vero illud hic omittendum, quod idem Burchardus in superiori §. lxxiii. de Sermone habito post ipsam Missam, & de ritibus tunc ab Oratore servatis docet, sic inquit: Interim dictus Guillelmus de Ferreriis Auditor Rotæ Cappa sua consueta, & Rochetto indutus, prout in Capella Auditores uti solent, venit ante Altare, ubi genuflexus aliquantulum oravit; tum surrexit, & accessit ad pulpitem, ubi postquam Cardinalis S. Marci ad locum suum venisset, & aliquantulum quievisset, incæpit, & prosequutus est Orationem suam.

VII. Finem tandem ut huic Commentario imponam, describam dumtaxat quid de Missa Spiritus Sancti, & de Oratione habenda peractis Novendialibus Papæ defuncti, statuit demum Cæremoniale jussu Gregorii XV. Pontificis editum, ex cujus præscripto, exequiis defuncti Pontificis completis, & interim Conclavi opportuno præparato, Cardinales in Basilica S. Petri, vel alibi, pro temporis & loci opportunitate conveniunt, ubi per Decanum Sacri Collegii, vel eo impedito, per alium ex antiquioribus Cardinalibus, Missa de Spiritu Sancto celebratur, & in fine per aliquem Prælatus, aut alium Virum doctum habetur Oratio, in qua monentur, ut sepositis omnibus privatis affectibus, solum Deum præ oculis habentes, Sanctæ Romanæ, & universali Ecclesiæ de Pastore sufficienti, & idoneo providere, omni qua possunt brevitate, & diligentia curent, ad Apostolicarum Constitutionum, & Sacrorum Conciliorum præscriptum. Eadem plane hæc sunt, quæ jam pridem in nostro §. statuta fuerunt, sed in hoc tamen moderno Gregorii XV. Cæremoniali luculentius explicata.

§. XVI.

De introitu in Conclavē.

Re Divina peracta, si placet Patribus tunc intrare Conclave, Clericus Cæremoniarum capiat Crucem Papalem, & procedat, quem Cardinales sequantur, Episcopi, Presbyteri, Diaconi. Crucem præcedunt Familiares Cardinalium laici, & immediate Cantores cantantes Hymnum, *Veni Creator Spiritus*; & in Conclavi apud Altare prior Cardinalium dicit Orationem: *Deus, qui corda fidelium*. Post Cardinales sequuntur Prælati, & alii Curiales Clerici. Cardinales erunt cum suis Cappis obscuris.

COMMENTARIUS.

I. **R**itum, quo peractis exequiis defuncti Pontificis, & Sermone jam habito de eligendo novo Pontifice, Cardinales

ad Conclave jam ante editionem nostri hujus Cæremonialis procederent, docet Æneas Sylvius in Oratione ad Fridericum III. Imperatorem, sic in-

inter alia inquit: *Finitis exequiis decima post obitum Eugenii, nempe Papæ IV. die Cardinales apud Minervam hora vespertina convenerunt, receptisque juramentis fidelitatis ab Officialibus quibuscumque, Processione, & invocatione Sancti Spiritus, humi deflexis capitibus, atque oculis, Conclave sunt ingressi.* Deferri consuevisse & in hujusmodi processione Crucem, & quidem Papalem a Cæremoniario Apostolico, testis est Burchardus, Cæremoniarius & ipse Apostolicus, in suo Cæremoniali Sedis vacantis ob Sixti Papæ IV. obitum §. xxxix. ubi ita eam Cardinalium ad Conclave Processionem describit: *Sermone finito, accepi ego Crucem Papalem cum suo baculo argenteo juxta Altare prædictum præparatam. Processi versus portam Ecclesiæ prædictæ, & Conclave. Præcedebant Scutiferi Cardinalium, & alii complures. Cardinales me immediate sequebantur. Primi Vicecancellarius, & Neapolitanus. Post illos alii Episcopi, tum Presbyteri, tandem Diaconi Cardinales, omnes bini, & bini, exceptis ultimis Presbyteris, quorum tres simul ibant.*

II. Sed nec silendum quod idem Burchardus mox subjicit, Postquam enim dixit, Cantores Capellæ, & Canonicos, ac Clerum Basilicæ Vaticanæ non interfuisse huic Processioni, nec aliquid fuisse in ea cantatum, hæc habet: *Sed Romani eives, & alii in numero copioso circumdabant quisque suum Protectorem, Amicum, & Dominum Cardinalem, dantes ei supplicationes, & alias petitiones pro officiis, & aliis gratiis a novo Pontifice in Conclavi obtinendis, & impetrandis.* Estque & is etiam modernus mos, sed hoc omisso, præstat hoc loco ritum ejus Processionis describere, quem laudatus Burchardus ita prosequitur: *Figuram in Cruce portavi, ut retro ad Cardinales versam ex eo quod hoc casu Collegium Pontificem representet. Cum pervenissem in primam Aulam Conclavis, in eo jam erant circiter 3000. hominum, qui nos præveniant. Nam Vicecamerarius ante introitum nostrum non expulerat gentem ibidem existentem, neque viam pro Cardinalibus, & suis Conclave intrare debentibus ordinaverat, vel custodierat, prout ex officio sibi incumbit. Capella tamen major, in qua cellula erant parata, & Cardinalium munitiones, & res reposita, clausa erat, & a servitoribus Cardinalium custodita, qua ipsis aperta fuit. Addit tum etiam Burchardus, Cardinales processisse ante Altare majus dictæ majoris Capellæ, quod nudum erat, & nihil penitus desuper positum, ubi absque ulla reverentia, uel genuflexione ipsi Altari facta (& male, debet enim fieri, & cantari Versiculus & Oratio per priorem Episcoporum) fecerunt circumlum &c. Sed audiamus Paridem Grassum, qui ritum ipsum in §. nostro præscriptum narrat in suo ms. Diario, seu Cæremoniali Sedis vacantis ob mortem Julii Papæ II. ubi ita inquit.*

III. Finita Missa, Ego Cæremonista Crucem accepi, quam superpelliciatu portavi ad gradus Altaris versa Cruce ad populum, tunc ut scilicet Cantores videntes Imaginem Crucifixi devotius inchoarent Hymnum, *Veni Creator Spiritus.* Cum vero procedere cœpimus verti Crucifixum ad sequentes post me Cardinales, primo Episcopos, tum Presbyteros, ultimo Diaconos, & sicut dixi tantus fuit populus, ut vix ego Crucifer movere me de loco extra Capel-

To.I.

lam potuerim, cum tamen multi custodes adhibiti feissent cum Gubernatore Palatii, & aliis stipendiariis. Via nostra fuit ad portam magnam, quæ est in sinistra porticu S. Petri versus ad Palatium, & inde ascendendo ad cortile medium magnum Palatii, itaut transcendimus totum cortile, & venimus ad portam cathanatam ad puteum, & sub columnatu illius cortilis ingressi sumus logias longas, & inde ascendimus scalas ad superiores aulas, ubi paratum erat conclave, ut infra dicetur. Socius meus propter laborem meum Crucis portandæ in tanta via accepit Crucem in medio hujus viæ, & prosequutus est usque ad Altare majoris Capellæ, ubi erant cellulæ Cardinalium; quod Altare fuit paratum cum mantilibus, & duobus candelabris ardentibus absque alia pompa, & Reverendissimus Cardinalis S. Georgii stans in cornu Evangelii cantavit Orationem post versiculos a Cantoribus decantatos, Collegio Reverendissimorum Cardinalium in girum, ut potuit, stante. Quo facto omnes Cardinales depositis Cappis magnis ingressi sunt suas quisque cellas præter nonnullos Palatinos, qui etiam Cappis in aula depositis iverunt prandium ad aulas suas &c.

IV. Hactenus Paris de Grassis, eademque tradunt passim alii Cæremonarii Apostolici in suis mss. Diariis, ubi eam Processionem referunt. Ut alios omittam, Franciscus Mucantius in ms. Diario, ubi enarrat ritus Sedis vacantis post Pii Papæ V. obitum, qui contigit anno MDLXXII. die 1. Maji, sic ritum ejus Processionis Cardinalium ad Conclave describit: *Post vero habitam Orationem (de novo scilicet Pontifice eligendo die xii. Maji per Antonium Buccapadulium Jurisconsultum Romanum) Cornelius Firmanus unus ex Clericis Cæremoniarum, accepta statim Cruce, subsequente se sacra Reverendissimorum Cardinalium Collegio, direxit iter versus Conclave, ubi ingressi fuerunt Sacellum, quod olim Nicolai Papæ, nunc Paulinum a Paulo Papa III. qui illud instauravit, vocant, ibique decantato per Cantores Versiculo, Emitte Spiritum tuum &c. Reverendissimus Dominus Cardinalis Augustanus Episcopus Prænестinen. dixit Orationem consuetam de Spiritu Sancto. Quibus expeditis multi ex Cardinalibus exeuntes Conclave diverterunt hinc inde per Palatium, deinde reversi sunt, paucis exceptis, qui ibidem remanserunt.*

V. Ritum antiquum confirmavit denique novum Cæremoniale Ritus electionis Romani Pontificis, jussu Gregorii XV. Papæ editum, cujus hæc sunt de ea re verba: *Re Divina peracta, Clericus Cæremoniarum capit Crucem Papalem, & procedit, quem Cardinales sequuntur, Episcopi primum, deinde Presbyteri, postremo Diaconi cum suis Cappis violaceis: Crucem præcedunt familiares Cardinalium, & immediate Cantores Hymnum, Veni Creator Spiritus, cantantes. Post Cardinales sequuntur Prælati, atque ita processionaliter procedentes Conclave ingrediuntur, & cum ad Capellam pervenerint, Cardinalium Decanus apud Altare dicit Orationem, Deus, qui corda Fidelium; qua finita leguntur, & jurantur per Cardinales Constitutiones de Romani Pontificis electione, & una cum eis Constitutio novissima Gregorii XV. juxta ejusdem Cæremonialis præscriptum, deinde Cardinales post Sermonem habitum per Decanum, quo eos convenientibus verbis ad electionis negotium*

F 2

gotium

gotium rite, & recte peragendum hortatur, ad cellas sorte inter eos juxta Constitutionem Pii IV. de qua supra diximus, distributas divertunt, & post prandium omnes rursus simul congregantur, & Officiales Conclavis, & alii præstant Sacro Collegio juramenta consueta. Atque hæc sunt, quæ de ingressu Conclavis statuit demum laudatum novum Cæremoniale editum Gregorii XV. Pontificis jussu.

VII. Reliquum est, ut & illud hoc loco adnotemus, quod docet Cardinalis de Luca Parte II. Relationis Romanæ Curie, Discursu III. Num. XIII. sequuto scilicet solemni Cardinalium ad Conclave ingressu, qui non de omnibus præsentibus esse solet, cum nonnulli privatim ferro ingrediantur, per totam illam diem, liberum patere aditum Principum Oratoribus, ac Magnatibus, & Prælatibus, aliisque omnibus tam nobilibus, quam popularibus, Conclave peragendi, atque benevolos Cardinales in cellis visitandi; præsertim vero Principum, & Rerum-

publicarum Oratores, ac Magnates totum Collegium Cardinalium visitant, eisque obsequia præstant, atque felices faciunt adulatorias augurationes. Ita quidem Cardinalis de Luca. Esse autem antiquum morem, ut Oratores Principum defuncto Pontifice, ipsorum Principum nomine Sacrum Cardinalium Collegium visitent, eisque opem suam exhibeant, testis est Aeneas Sylvius in Oratione ad Fridericum III. Imperatorem, ubi inter alia ita inquit: *Es mortuo*, nempe Eugenio IV. *affuerunt mox Oratores Regis Aragonum, qui in hunc modum Cardinales sunt allocuti*: Accepit Majestas Regia Summi Pontificis obitum, doletque tanto Patre orbatam esse Ecclesiam, sanctumque hortatur Collegium vestrum, Successorem illi uti dignum sufficiatis; vicinitatem suam nulli suspectam esse debere; si quid vel juramenti, vel tutamenti ad liberam Pontificis electionem conferre potest, in promptu est. Quidquid jubetis, lubens faciet. Hucusque laudatus Auctor.

§. XVII.

Quæ agenda a Dominis Cardinalibus antequam ad Conclave proficiscantur.

Si vero volunt differre introitum ad Vesperam, convenient de hora, & vadant domum ad prandium, ubi hora congrua fuerit, antequam discedant, si prius hoc non fecerint, quod facere convenit. Si post Missam sunt ingressuri Conclave, convocent familiam suam, unusquisque moneant, hortentur omnes, primum ad orandum Clementissimum Deum, ut Patribus inspiret ea circa electionem futuri Pontificis agere, quæ suæ placita sunt voluntati, & salutis Sanctæ Romanæ Ecclesiæ, atque universæ Reipublicæ Christianæ profutura; tum, ut domum die, noctuque bene custodiant, Magistro domus obediant, pacifice, & quiete inter se vivant, & per Urbem non multum vagentur; noctu autem domi se omnino contineant; deinde hora præscripta in Nomine Domini vadant ad Basilicam S. Petri, si Romæ, & in Palatio Apostolico sit Conclave. Sin alibi, ad Ecclesiam Conclavi proximam; & valde honestum, imo necessarium videtur, ut antequam Conclave ingrediantur Patres, omnes Deo se reconcilient, confiteantur peccata sua, & qui non sunt celebraturi, communicent, ut sint capaces gratiæ Spiritus Sancti in tanta re peragenda admodum necessariæ. Postquam vero omnes convenerint, ascendant simul ad Conclave.

COMMENTARIUS.

I. **M**orem fuisse aliquando, ut Cardinales vespere ad Conclave pergerent, exemplum habemus in Sede vacante ob mortem Eugenii IV. teste enim Aenea Sylvio in Oratione ad Fridericum III. Imperatorem, *fnitis exequiis decima post obitum Eugenii die Cardinales apud Minervam hora vespertina convenerunt*, in Conclave scilicet tunc temporis apud Fratres Dominicanos S. Mariæ super Minervam constructum. Quicquid sit de hujusmodi exemplis, mandat quidem inter alia Pius IV. in sua Constitutione, quæ incipit, *In eligendis*, edita anno MDLXII. septimo Idus Octobris, ut *Missæ de Spiritu Sancto celebrata, sive Cardinales absentes venerint, sive non, qui fuerint præsentibus statim Conclave ingredi teneantur*. Sed audiendum præ ceteris quid in hac re statuatur Cæremoniale continens ritus electionis Romani Pontificis jussu Gregorii XV. Papæ editum, cujus verba hæc sunt: *Cardinales autem ingressi Conclave non exeant vespere reversuri, sed in ipso omnino permaneant; ipsumque Conclave post*

ter jussu Cardinalis Decani personatam campanulam, videlicet prima vice circa primam horam noctis, secunda circa secundam, & tertia circa tertiam, exclusis omnibus, qui in Conclavi remanere non debent, intus, & extra claudatur, & claves S. R. E. Camerario, ac Magistro Cæremoniarum, & Prælatibus custodibus Conclavis juxta solitum assignentur. De clausura Conclavis jam alibi differuimus; quod vero memoratum Gregorii XV. Cæremoniale mandat, ut *Cardinales ingressi Conclave non exeant, vespere reversuri, sed in ipso omnino permaneant*, antiquum morem corrigere videtur, cujus mentionem facit in suo ms. Diario Franciscus Mucantius, qui enarrans ritus Sedis vacantis post Pii V. obitum, ait multos Cardinales post ingressum Conclavis, & dictam Orationem de Spiritu Sancto, exeuntes Conclave divertisse hinc inde per Palatium, ac deinde ad ipsum reversos fuisse, paucis exceptis, qui ibidem remanserunt.

II. Idipsum jam antea acciderat in Conclavi Sedis vacantis post Julii II. obitum, teste in suo ms.

ms. Diario Paride Graffo: *Postquam Cardinales, inquit, ad Conclavem pervenerunt, Sacris de more peractis, multi ex eis, qui Palatium inhabitabant, non intra Conclavem remanserunt pransuri, sed ad cameras suas proprias accesserunt, & cum eis multi ex aliis Cardinalibus pransi sunt fere omnes reliqui, & per Palatium euntes; depositis Cappis in ipso Conclavi, iverunt induti solis Robetis, & Caputiis, quod eis licere visum est.* Ait mox Graffus, se id neque improbasse, neque laudasse, sic tamen factum fuisse; tandemque circa horam decimam nonam omnes ad Conclavem venisse, & circa vigesimam quartam clausum fuisse, *exquisitis prius omnibus lateribus, & reconstitutis omnibus Conclavistis, etiam nominatim expressis, & lectis.* Sed de clausura Conclavis, & ritu, quo ea perageretur dicemus infra fusius in Commentario ad §. xx. ubi antiquum non modo morem, sed & recentiorum, narrabimus juxta novissimas Romanorum Pontificum de claudendo Conclavi Sanctiones.

III. Notandum vero hic restat, quod ait noster §. de exhortatione, quam facere debent familiis suis Cardinales Conclavem ingressuri; *Convocent, inquit, familiam suam, unusquisque monent, hortentur omnes, primum ad orandum Clementissimum Deum, ut Patribus inspiret ea circa electionem futuri Pontificis agere, quae sua placita sunt voluntati, & saluti Sanctae Romanae Ecclesiae, atque universae Reipublicae Christianae profutura; tum, ut domum die noctuque bene custodiant; Magistro domus obediant; pacifice, & quiete inter se vivant; & per Urbem non multum vagentur; noctu autem domi se omnino contineant.* Optimae sane instructiones, quae utinam ab ipsis Cardinalium Familiaribus servarentur, praesertim dum illi Conclavi sunt inclusi,

Sed de continenda in officio suo Cardinalium familia notatu digna sunt quae in generali Concilio v. Lateranensi statuit Leo Papa X. Sessione x. quaeque nos explicuimus Tomo iv. Conciliorum. Videri autem praeter ceteris possunt quae de eadem re scripsit in Tractatu, *De Cardinalibus*, doctus aequae, ac religiosus Auctor Hieronymus Platus una cum Additionibus, ac Notis ab eruditissimo Archiepiscopo Tyri Joanne Andrea Tria ibidem factis, & Romae editis anno MDCCXLIX.

IV. Cautum est denique ex nostro hoc §. *ut antequam Conclavem ingrediantur Patres, omnes Deo se reconcilient, confiteantur peccata sua, & qui non sunt celebraturi, communicent &c.* Huc facit quod in Epistola sua cxxx. scripsit olim ad Franciscum Cardinalem Jacobus Cardinalis Papiensis, agens de arduo electionis Papae negotio. Sic enim inter alia inquit; *Placandus penitentia Deus, rogandusque Sacrificio assiduo, ut non secundum merita nostra, nec secundum peccatoris populi iniquitatem, sed secundum suam misericordiam, Pastorem, & Principem det Sanctae Ecclesiae, eum videlicet, qui immutata Zachariae Prophetae sententia, in terra visitet derelicta, conquirat dispersa, sanet contrita, & quod constat, emutuat, quique nec carnes pinguium comedit, nec ungulas eorum dissolvat; sed, quod Apostolus admonet, seipsum praebet exemplum bonorum operum in doctrina, integritate, gravitate, verbo sano irreprobenabilem, ut is qui ex adverso est, vereatur, nil habens malum de nobis dicere; qui demum toto ministerio suo ejusmodi sit, de quo populus Dei exultet.* Legenda integra Epistola a Cardinalibus praesertim cum sunt electuri novum Pontificem, monita enim multa salutaria continet ab ipsis Cardinalibus scitu digna.

§. XVIII.

De juramento exigendo a custodibus.

Et cum ad Altare Conclavis convenerint, prior Episcoporum Cardinalium omnibus aliis adstantibus, & praesente, ac rogato aliquo Notario, exigit corporale juramentum, tactis sacris Evangeliiis, a Custodibus Conclavis, & a secundis, ac tertiis Custodibus, quod fideles, & diligentes erunt ad custodiendum Palatium, & Conclavem Reverendissimorum Dominorum Cardinalium, neque permittent, Reverendissimos Dominos Cardinales ullo modo gravari ultra Constitutiones Sanctorum Patrum de electione Romani Pontificis statuentes, & maxime Clementis Papae Sexti, quas, quantum ad eos pertinet, omni studio, & integritate servabunt, & ab aliis pro viribus facient observari. Quarti vero Custodes, idest, portae ultimae introitus Conclavis, praeter haec jurabunt, quod non permittent, aliquem appropinquare ad portam Conclavis, aut loqui, sive litteras dare aliquo modo illis, qui sunt intus, nisi de expresso consensu totius Collegii, & scripta, quae ad Collegium pertinerent. Item quod perscrutabuntur cibaria, & vasa, quae intromittentur, omni solertia, & fide, introspiciendo epulas, & fercula, ne forsan laterent aliqua litterae; vinum & aquam in vasis vitreis portari facient, & Constitutiones praefatas integre observabunt.

COMMENTARIUS.

I. **P**auca sunt, quae in hoc Commentario adnotemus, quam & ea, quae in hoc praesenti §. continentur, enarraverimus jam fuisse in Commentariis superioribus, prout se nobis non uno in loco dedit occasio. Sane, juxta praescriptum novi Caeremonialis jussu Gre-

gorii XV. Papae editi, eodem die, quo Cardinales ingressi sunt Conclavem, *post prandium omnes rursus simul congregantur, & Officiales Conclavis, & alii praestant Sacro Collegio juramenta consue- ta.* Paucos fuisse olim Conclavis Officiales, addiscimus ex Ordine Romano xv. Auctore Pe-

Petro Amelio, Cap. cxi ix, ubi inter alia docet, illud sciendum, quod Domini Cardinales tres, prior cum Camerario de consilio aliorum, antequam intrent Conclave, debent eligere quatuor solemnes Viros, qui habent extra custodire Conclavē cum gentibus armatis, & caveant bene super hoc, quod tales sint idonei. Poterunt esse duo Prælati, & duo Milites, vel unus Miles, & unus Banderensis. Vocabulum hoc Banderensis, vel Bandarenis, & Bandorensis, occurrit passim in Ordinibus Romanis, & apud mediæ, & infimæ Latinitatis Scriptores, uti videre est apud eruditum Dufresne in suo Glossario, verbo, *Bandorenses*, ubi ait, dictos fuisse Romæ eo nomine Capitaneos regionum.

II. Quicquid sit, ex recitato Petri Amelii loco, profecto & illud addiscimus, non semper custodiæ Conclavis præfectos fuisse Magnates Nobiles Romanos perillustres familiæ Sabellorum, multoque minus a prima Conclavis institutione, munus illud fuisse hæreditarium penes ipsam Sabellorum Familiam, ut ait Cardinalis de Luca, uti jam supra notavimus in Commentario ad §. iv. Nam præterquamquod, uti apud Ecclesiasticæ Historiæ Scriptores legimus, aliarum familiarum Magnates, Virique potentiores variorum Conclavium custodiæ præfecti fuerunt, præsertim ubi illa extra Urbem in iis locis, in quibus Romani Pontifices obierunt, constructa sunt; diserte docet laudatus Amelius, in arbitrio esse Cardinalium eligere quatuor solemnes Viros, qui habent extra custodire Conclavē &c. Ceterum quod nostram rem spectat, edicit mox idem Amelius recitato loco, ut dicti Custodes caveant sibi bene sub pœna perjurii, quod bene aperiant semper, & videant quidquid portatur Cardinalibus ad comedendum, & si pastilla eis portarentur, illa aperiant. Additque tum etiam: Item sub pœna perjurii nullam Litteram eis dent, nec permittant illos accipere, nec ab ipsis etiam recipere, quantumcumque necessitas coegerit, sed quicquid voluerint habere ab extra, dictis Custodibus ore dicant. Pœna perjurii jam supponit juramentum prius præstitum ab ipsis Custodibus.

III. Teste Burchardo in Cæremoniali Sedis vacantis post Sixti IV. obitum, §. xxx ix. eadem die, qua Cardinales ingressi sunt Conclave, vocati sunt omnes, qui ibidem in Aula, vel circa reperiri potuerunt, ad secundam, tertiam, & quartam custodiam Conclavis deputati, quibus coram Cardinalibus, & Collegio prædicto congregatis Reverendissimus Dominus Vicecancellarius tanquam prior Cardinalium dixit, eos ad custodiam Conclavis deputatos esse, propterea de fideliter custodiendo Conclave ipsum, & Palatium, & non permittere, Cardinalibus aliquam inferri violentiam, ac Canonicas Sanctiones observare velle super hoc disputantes, jurare oportere: Sic nos Deus adjuvet, & hæc sancta Dei Evangelia; & accepto per eundem Vicecancellarium Breviario aperto, acceperunt ante eum singuli Custodes, & supra deputati ibidem præsentis, & genuflexi, tactis scripturis ejusdem Breviarii ambabus manibus, præmissa se observaturos jurarunt. Quo ritu præstitum fuerit hujusmodi juramentum in Conclavi Sedis vacantis post Julii II. obitum, enarrat in suo ms. Diario Paris de Grassis, cujus verba lubet & in hoc Commentario describere; varia enim scitu di-

gna in ejusdem Grassi narratione Lector curiosus inveniet. Sic autem inquit in eo Capite, quod inscripsit, *De juramento per Custodes præstando, & aliis agendis per eosdem*.

IV. Indictum fuerat omnibus, qui Conclave custodire in pluribus locis deberent, ne die ipsa ingrederentur, maxime ad præstandum juramentum, quia Cardinales finita Missa de Spiritu Sancto ingressi essent, & quia hora jam fuit tarda, urgente fame, Cardinales distulerunt jurandi tempus in horam vigesimam; & sic eadem hora omnes fere Cardinales convenerunt in parva Capella, ubi illis sedentibus in gyrum, vocavi omnes Custodes quatuor custodiarum, & ego genuflexus ante capita Cardinalium legi primo verbatim formam juramenti, quod præstare debent Gubernator, & Capitaneus Palatii cum suis adjutoribus. Quo lecto, ego posui Librum in manibus Camerarii sedentis, & ipsi Gubernator, & Capitaneus venerunt, & genuflexi tactis scripturis jurarunt, & Socius meus successive scribebat nomina singulorum. Deinde legi formam juramenti, quod præstare debent Conservatores, & Capuriones, ac alii Romani in prima custodia, & similiter ipsi venerunt, & jurarunt, quorum nomina Socius scripsit; & tertio legi formam juramenti, quod præstant Oratores laici simul cum Nobilibus diversarum Nationum, & sic factum fuit, ut in primis, in secundis, & ultimo idem factum fuit de Prælati Oratoribus, & non Oratoribus.

V. Pergit Grassus, atque, juramento præstito, aliquos ex primoribus ipsorum Custodum tam laicos, quam Ecclesiasticos cum aliquali moderamine, & præstatione reverentiæ dixisse ad Cardinales, quod ipsi omnes juxta possibilitatem custodirent fideliter, & diligenter, verumtamen siquid forte faciant, quod eis displiceat, ut quia non gratificabunt in omnibus sicut forte velint, non indignentur contra illos, quia ipsi faciunt illud, quod ille actus requirit. Testatur quoque idem auctor Grassus, fecisse illos in veritate, prout actus ille requirit, diligentissime, & studiosissime, quantum in eis fuit, tam die, quam nocte vigilantes, nequa fraus fieret. Teste Francisco Mucantio in suo ms. Diario Sedis vacantis post Pii Papæ V. obitum, Oratores Principum, ex quibus erant tantummodo præsentis Oratores Cæsaris, & Ducis Urbini, negarunt se præstituros juramenta sine scientia, & consensu aliorum Oratorum, qui aberant; ideoque illis omissis, fuit delatum juramentum Conservatoribus, & Officialibus Populi Romani pro tertia custodia Conclavis; pro quarta vero, & quinta, omnibus Prælati, qui aderant. Agit Mucantius de prima Cardinalium congregatione facta eodem die, nempe xii, Maji anni MDLXXII. hora xx. in qua, ut inquit, declaratus fuit Capitaneus Generalis custodia Urbis Dominus Hieronymus Bonellus nepos Pontificis prædefuncti, nempe Pii Papæ V. qui præstitit juramentum consuetum. Addit, post eum, Montem Valentium Gubernatorem Urbis, & Episcopum Nepefinum, Legatum Burgi, & Palatii præstitisse juramentum, licet Nepefinus satis conquestus fuerit, fuisse prius vocatum Gubernatorem, cum se majorem, & digniorem diceret tanquam Legatum, & sic præferendum. Agunt de juramento præstando ab ipsis Conclavis Custodibus Cæremoniarum Apostolici in suis ms. Diariis.

§. XIX.

§. XIX.

De exhortatione prioris Episcoporum Cardinalium ad Collegium.

Tum exclusis omnibus aliis, prior Episcoporum Cardinalium ipsos Cardinales verbis convenientibus hortabitur, ut velint cogitare magnitudinem rei, de qua sunt tractaturi, qua nihil (1) in terris excellentius esse potest. Electuri enim sunt Jesu Christi Vicarium, Petri Successorem, Pastorem Dominici gregis, Aulae Caelestis Clavigerum, & omnium Christianorum Principem, (2) atque Patrem: debere illos memoria repetere formam, atque regulas a Sanctis Patribus traditas in electione servandas, quas sine gravissima Dei offensa, & propriae salutis discrimine (3) praeterire non possunt: proinde dimissis omnibus animi affectibus, solum honorem Dei, salutem Reipublicae Christianae, & Romanae Ecclesiae ante oculos habeant, & talem eligere curent, qui Ecclesiae Dei praesse, & prodesse valeat, & sciat.

COMMENTARIUS.

I. **E**lectionem Romani Pontificis, rem esse magni momenti, Romanae ipsi Ecclesiae Praesules aequae, ac Patres, & Synodi pari sententia affirmant. Dandus est enim, ut verbis utar Cardinalis Papiensis in Epistola xl. ad Cardinales Sede vacante post Pii II. obitum data, *dandus est*, inquit, *plebi Catholica Pastor, instituendus in Ecclesia Dux, qui regat populum suum, qui sanet contrita: opus omnium maximum*. Rectissime inquit noster §. nihil esse posse excellentius in Terris electione ipsa Romani Antistitis; ideoque consuevit vel olim Prior Episcoporum Cardinalium Cardinales Conclave ingressos verbis convenientibus exhortari, ut velint cogitare magnitudinem rei: *electuri enim sunt Jesu Christi Vicarium, Petri Successorem, Pastorem Dominici gregis, Aulae caelestis Clavigerum, & omnium Christianorum Principem, atque Patrem*. Haec & alia id genus praeclarissima, quae solum Romanum Pontificem spectant, fuse, egregieque explicat doctissimus Cardinalis Bellarminus in suis, *De Summo Pontifice*, Libris. Nomina autem illa sunt, quibus ipsi Romani Pontifices a Patribus passim, & a Conciliis appellati fuerunt; supervacaneumque est hoc loco ipsa Patrum, & Synodorum testimonia describere. Unum plane adnotabo, quod scripsit S. Bernardus Lib. II. *De Consideratione*, ad Eugenium III. Pontificem, quodque nostrum hunc §. quammaxime illustrat: *Tu es*, inquit, *cui Claves tradita, cui oves credita sunt. Sunt quidem & alii Cali janitores, & gregum Pastores. Habent illi assignatos greges singuli singulos. Tibi universi crediti, uni unus, nec modo ovium, sed & Pastorum, Tu unus omnium Pastor. Quod si ita est, quanta erit sarcina, quantum onus, totum, ut ita dicam, Orbem terrarum humeris sustinere? uti scite notat eruditissimus Platus in Tractatu, *De Cardinalis Dignitate, & Officio*, Cap. xxx. Num. xvi.*

II. Porro juxta nostri §. praescriptum, prior ipse Episcoporum Cardinalium inter alia Cardinales in sua exhortatione admonebit, *debere illos memoria repetere formam, atque regulas a Sanctis Patribus traditas in electione servanda, quas sine gravissima Dei offensa, & propriae salutis discrimine praeterire non possunt: proinde*

dimissis omnibus animi affectibus, solum honorem Dei, salutem Reipublicae Christianae, & Romanae Ecclesiae ante oculos habeant, & talem eligere curent, qui Ecclesiae Dei praesse, & prodesse valeat, & sciat. His plane concinunt, quae in citata Epistola sua xl. scripsit olim laudatus Cardinalis Papiensis: *Abjiciendi*, inquit, *affectus factiones, & ut ita dicam, ultramontanitates: neque Italus Transalpinum borreat, si bonus est, neque Italum Transalpinus indignetur: propter utrosque crucifixus est Dominus: super utrosque oriri facit Solem & Lunam, & pluit; & aliquando per Italum melius administratum, & per eundem magnae calamitates illatae. Non amicitia, non spes commodorum propriorum, non odia sunt attendenda. Omnia haec Domino condonanda. Valetudo multum adjicit animo. Multum infirmitas detrahit. Quamquam, ubi vigor naturalis est, non tam est attendenda. An nescitis, imperare caput, non pedes? Vidimus cecos, claudos gessisse magnas res &c.* Varias id genus Epistolas, quibus docet quae attendenda sint in eligendo Romano Pontifice, idem Papiensis scripsit, lectu dignas praesertim a S. R. E. Cardinalibus novum Pontificem Sede vacante electuris.

III. Notanda demum potissimum sunt illa nostri hujus §. verba, quibus dicitur, regulas a Sanctis Patribus traditas in electione servandas, praesertim vero Summi Romani Pontificis, *sine gravissima Dei offensa, & propriae salutis discrimine*, non posse a Cardinalibus praeteriri. Ea enim est communis saniorum Theologorum, & Canonistarum sententia, quam pluribus probat memoratus Platus in citato Tractatu, *De Cardinalis Dignitate, & Officio*, Cap. xxxi. non solum scilicet, gravi se scelere Cardinales obstringere, si inepto suffragium suum tribuant, sed etiam si tribuant apto, praetermisso tamen aptiori. Oportet enim, ut eum eligant, qui praeter ceteros maxime aptus videatur. Docet hoc ipsum, ut alios omittam, S. Antoninus Theologus aequae insignis, ac Canonici Juris Consultus, Parte III. Titulo xxii. Cap. II. ubi hac quaestione his verbis posita, *An teneantur Cardinales eligere meliorem in Pontificem*; disertè respondet, teneri, alioquin peccare mortaliter, & esse personarum acceptionem; sed quid opus est aliorum

(1) Ita in Romana editione; in Veneta vero 1. inter eos.
(3) In eadem Veneta legitur, praetermittere.

(2) In Veneta ipsa deest, atque Patrem.

rum testimonia referre, cum ipsi Cardinales Pontificem eligentes, antequam schedulam in Calicem mittant, jurejurando, clara, & intelligibili voce idipsum se præstituros affirmant per ea verba, quæ præscripta sunt in celebri illa Gregorii XV. Constitutione de electione Romani Pontificis, quæ incipit, *Æterni Patris Filius*, edita, xvii. Kalendas Decembris mdcxxi. *Testor Christum Dominum, qui me judicaturus est, me eligere quem secundum Deum iudico eligi debere, & quod idem in accessu præstabo.*

IV. Teste eodem Plato Cap. xxxi. §. unico, observatum est, qui in hoc tanto negotio, quale est illud electionis Papæ, suarum potius utilitatum, quam divini obsequii rationem habere voluerunt, plerumque ita a Deo punitos esse, ut a quibus potissimum omnia sperabant, & quibus hac spe immerito suffragati erant, ab iis non modo nihil præmii referrent, sed male, etiam tractarentur. Iusto utique Dei iudicio, ut & ipsi per quæ peccarent, plecterentur, & alii

discerent eorum exemplo, ac tam evidenti, tamque præsentī pœna deterrentur. Horrendum plane est hac in re Alexandri VI. exemplum, qui cum quorundam S. R. E. Cardinalium suffragatione suam magis, quam Ecclesiæ utilitatem spectantium ad Pontificatum provectus esset, pro magnis commodis, quæ sibi sponponderant, magnas cuncti ab eo calamitates acceperunt. Ita etenim memoriæ proditum est, omnes, qui illi in dignitate adipiscenda faverant, non multo post alios alia pœna luisse partim exilio, partim teterrimo carcere, partim etiam capite dampatos; quin etiam multos Romanos Proceres, quorum propinqui Cardinales illum extulerant, variis ex causis vel sublatis, vel bonis exutos. Miserabilem istorum historiam iusto Dei iudicio permissam in eorum exemplum, qui in tam gravi negotio proprium, & non Ecclesiæ commodum respiciunt, per nomina, & cognomina distincta, legere est apud doctissimum Panviniū in Vita ejusdem Alexandri VI.

§. XX.

De claudendo Conclavi, & bis, qui in eo remanent.

His peractis, Reverendissimi Domini Cardinales ad cellulas quisque suas divertunt, & Camerarius, alique Officiales Cameræ Apostolicæ omnes extra Conclave abire jubent, præter eos, quos remanere oportet, ut infra dicemus. Tum omnibus prædictis expulsi, porta Conclavis cum suo porticulo omnibus clausuris (1) claudatur intus, & extra; assignenturque claves duæ (2) Clericis Cæremoniarum (3) ab intus, & tres Prælati Custodibus ab extra (4). Deinde accensis funalibus, aliqui jussu Patrum ad hoc deputati latebras, angulosque omnes Conclavis diligenter scrutantur, nequis extra ordinem inter clausos remanere possit. In Conclavi autem ordinarie hi remanent, omnes Reverendissimi Domini Cardinales, & unusquisque illorum pro suo servitio retinent duos servientes tantum. Siquis autem adversa valetudine premeretur, conceditur sibi tertius Minister ex consuetudine, non ex Constitutione. Præterea Sacrista Sacri Palatii, & duo Clerici Cæremoniarum. Servitores Dominorum Cardinalium, quisque hero suo famulatur.

COMMENTARIUS.

I. **D**E clausura Conclavis differuimus supra non uno in loco. Celebre est de ea re, quod edicit Romanus Ordo xv. Auctore Petro Amelio, Cap. cxlix, cujus verba licet a nobis jam alias descripta, operæ tamen pretium censemus iterum & hoc loco repetere; *Item in porta Conclavis, inquit, sint ad minus tres claves cum tribus serraturis; quilibet custodientium habeat suam. Item dicta porta sit clausa bene cum barris, & clavelaturis, & catena.* Additque mox, foramen ipsum, seu porticulum in medio portæ, per quod introduci solebant olim cibaria, claudendum etiam clavi. Solemnis Conclavis clausura fiebat plane eodem die, quo Cardinales ingressi fuerunt Conclave, & eo quidem ritu quem hic noster §. præscribit; *Accensis funalibus aliqui jussu Patrum ad hoc deputati latebras angulosque omnes Conclavis diligenter scrutantur, nequis extra ordinem inter clausos remanere possit.* Mentionem ejus ritus faciunt passim Cæremoniarum Apostolici in suis Diariis tum editis, tum manu exaratis, Sed præstat describere

locum novissimi Cæremonialis jussu Gregorii Papæ XV. editi; *Ipsam Conclave, inquit, post ter jussu Cardinalis Decani personatam campanulam, videlicet prima vice circa primam horam noctis, secunda circa secundam, & tertia circa tertiam, exclusis omnibus, qui in Conclavi remanere non debent, intus, & extra claudatur, & claves S. R. E. Camerario, ac Magistro cæremoniarum, & Prælati Custodibus Conclavis juxta solitum assignentur.* Tum vero subdit consentanee ad §. nostri præscriptum, ita inquit; *Deinde accensis funalibus, tres Cardinales capita Ordinum, & Camerarius una cum Magistro Cæremoniarum latebras, & angulos omnes Conclavis diligenter perquirunt, nequis ex iis, qui esse in Conclavi prohibentur, intus remanserit.*

II. In Conclavi autem sub ipsa clausura, præter Cardinales, remanent regulariter duo cujuslibet Cardinalis familiares, qui vulgo Conclavistæ nuncupantur, pro eorum servitio, solumque Cardinalibus senioribus, vel infirmis, ac etiam iis, qui de Principum genere sunt, indulge-

(1) Ita in editione Romana, in Veneta 1, legitur, *serris*, citatur Veneta. (3) In ipsa Veneta, *interioribus*.

(2) Vox *duæ* deest in Romana editione, sed legitur in (4) In eadem Veneta legitur, *exterioribus*.

fulgetur tertius familiaris, vel Conclavista ratione majoris servitii, quo indigere dignoscatur, uti docet Cardinalis de Luca Parte II. Relationis Romanæ Curiae, Discursu III. Numero XVI. ubi etiam advertit, ab ipsius Sacri Cardinalium Collegii judicio, atque determinatione pendere, an ille, qui tertium Conclavistam petit, eo sit, necne dignus. Ceterum tametsi juxta hujus nostri §. præscriptum, præter Cardinales, duosque illorum familiares, vel tres, uti dictum est, remaneant etiam in ipso Conclavi *Sacrista Sacri Palatii*, & duo Clerici *Cæremoniarum*, nulla aliorum facta penitus mentione; remanent nihilominus ibidem clausi alii quoque Officiales, vel Ministri, Cæremoniarum non duo tantum, sed longe plures, Religiosus Sacerdos, qui tam Cardi-

nalibus, quam aliis Conclavistis Sacramentum poenitentiae administret, atque etiam aliquas statibus temporibus faciat conciones. Remanent quoque aliqui Medici, Chirurgi, Pharmacopolæ, & Barbitonfores, nec non plures inferiores pro vilibus, & sordidis ministeriis necessarii; qui omnes recensentur in citata toties Constitutione Pii Papæ IV. quæ incipit, *In eligendis*, edita anno MDLXII. quosque inter alios recenset Pafserinus in Tractatu, *De electione Canonica*, Quæstione XI. notatque laudatus Cardinalis de Luca citato loco, licet praxis doceat admissionem majoris numeri ministrantium, quam dicta Constitutio præcipiat, id provenire, necessitate ita exigente, ob excrevit numerum Cardinalium sub Sixto V.

§. XXI.

*De Sacrista, qui celebrat in communi coram Patribus;
& de Cæremoniarum ministeriis.*

Sacrista Divina celebrat in communi coram Patribus, & vestes, ac paramenta futuri Pontificis servat, præparatque; Clerici Cæremoniarum Celebranti subministrant: subsellia pro Dominis Cardinalibus, ubi, & quomodo illis placet, præparant; & in communi omnibus Patribus serviunt; consuevitque aliis superioribus temporibus instrumentum de electione Pontificis confici.

C O M M E N T A R I U S.

I. **D**Ebere in Conclavi erigi Sacellum, seu Capellam, in qua *Cardinales Missam debent audire omnes insimul, non tamen cantando, sed basse*, edicit Romanus Ordo XV. auctore Petro Amelio Cap. CXLIX. ubi etiam ait, *in dicta Capella debere esse Corpus Christi cum candela accensa ad omnem eventum, quam solvit Camera, & omnes alias, quæ in dictis Missis consumuntur ibidem, Sede vacante*. Juxta nostrum §. *Sacrista Divina celebrat in communi coram Patribus*. Fuit hoc plane Sacristæ munus ante ordinationem nostri Cæremonialis ab Augustino Patricio factam jussu Innocentii Papæ VIII. Etenim Burchardus in suo Cæremoniali Sedis vacantis post obitum Sixti Papæ IV. qui Innocentium ipsum præcessit, §. XLIV. postquam dixit die XXVII. Augusti, anni scilicet MCDLXXXIV. qui dies primus fuit post Cardinalium ad Conclave ingressum, summo mane Cardinalem Sancti Marci in Altari majori parvæ Capellæ celebrasse Missam pro devotione sua, ministrante sibi uno ex suis Conclavistis, idemque post eum fecisse Cardinales Aquensem, & Matisconensem, & quosdam alios, ita ad rem nostram mox subjicit: *Deinde circa horam septimam Abbas Sancti Sebastiani Sacrista noster, nobis sibi ministrantibus, dixit Missam publicam in paramentis tamen Sacerdotalibus tantum. Interfuerunt omnes Cardinales induti super Rochetum parvis capucinis coloris ipsis Cardinalibus magis placentis, & desuper Croceis coloris violacei obscuri, fimbrias duorum palmorum, vel circa, post se trahentes, stantes ad scamna sua more consueto, Episcopi, & Presbyteri in latere Evangelii, & Diaconi ab alio latere, videlicet Epistola, digniores versus Altare.*

II. Pergit Burchardus, ritusque explicat in *Tal.*

ea Missa servatos, quos nos ad majorem nostræ hujus §. intelligentiam opportune censuimus in hoc Commentario referre: *Dicta*, inquit, *per Celebrantem Oratione*, Domine Jesu Christe, qui dixisti &c. *obtuli instrumentum pacis osculandum ipsi Celebranti, deinde singulis Cardinalibus, qui genuflexi erant in locis suis*. Tum vero mox subdit sequenti §. XLV. *Primo dedi Vicecancellario, postea aliis per ordinem, dicens singulis: Pax tecum; illis respondentibus: Et cum spiritu tuo. In fine Missæ ipse Celebrans stans versus ad Cardinales, illis benedicebat, eos signans, & dicens: Benedicat vos Omnipotens Deus Pa ✕ ter & Fi ✕ lius, & Spi ✕ ritus Sanctus. Nonnulli tamen asseriebant, quod ipse Celebrans versus Cardinales genuflexus, illis benedicere debebat; quod tamen mihi satis absurdum videbatur, cum benedicens semper major sit benedicendo in eo actu. Missam dixit de Spiritu Sancto, cum Oratione: Deus, qui corda Fidelium &c. & sua Præfatione, in quibus omisit illa verba, hodierna die. Primam Orationem dixit sub sua conclusione; deinde aliam pro electione, videlicet: Supplice Domine humilitate deposcimus &c. etiam sub sua conclusione; cum Gloria in excelsis, Credo, & Ite Missa est. In paramentis rubeis celebravit, prout conveniebat; super Altari erat Crux in medio, & quatuor candelabra, hinc & inde posita. Hucusque Burchardus, ex quo ritum addiscimus, quo in Conclavi Missa publica a Sacrista celebraretur, cujus Missæ ab eodem aliis diebus, Conclavi durante, celebratæ mentionem passim idem Auctor facit in citato suo Cæremoniali. Ceterum nostrum hoc Cæremoniale nos docet infra §. XLIX. consuetudinem olim fuisse, ut duæ Missæ singulis diebus in Conclavi dicerentur, una de die currenti,*

G

al-

altera propria, quæ Sede vacante dicitur, & scripta in fine hujus voluminis, una per Sacristam, altera per aliquem ex Capellanis Cardinalium, nisi ipsi Cardinales personaliter velint celebrare. Sed de his vide quæ infra dicemus in Commentario ejusdem §.

III. Sane constat ex mss. Diariis, non modo duas, sed & longe plures consuevisse in Conclavi Missas per Cardinales, eorumque Conclavistas Presbyteros celebrari. Publica tamen Missa, cui scilicet Cardinales, alique non celebrantes intererant, erat illa, quam dicebat Sacrista, cui celebranti, ut ait hic noster §. & testatur memoratus Burchardus, Cæremoniarum Magistri subministrant; est enim magna Sacristæ Pontificii Sacelli dignitas, de qua, sicut & de ejus munis fuse differit eruditissimus Angelus Rocca, Tomo 1. Operum, in Chronistoria, *De Apostolico Sacrario*, ubi inter alias ejusdem functiones, & eas recenset, quæ in hoc nostro Cæremoniali notatæ sunt, præsertim vero illas, quæ in præfenti §. præscribuntur: *Introducitur denique*, loquitur de ipso Sacrista, *in Conclave, ubi pro novo Pontifice eligendo quotidie universo Sanctæ Romanæ Ecclesiæ Cardinalium Collegio rem sacram facit; & pro electo secundum morem vestiendo, nova secum defert, custoditque indumenta: Ecclesiæ item Sacramenta, juxta Cardinalium, & Conclavistarum indigentiam, in Conclavi administrat; necnon alias ad res, & quidem gravissimas, nonnunquam, prout occasio se se offert, adhibetur, quippe qui primum Conclavistarum tenet locum.*

IV. Teste eodem Rocca, pluribus ab hinc seculis; Præfectura Sacrarii Pontificii donari solent Fratres Ordinis Eremitarum S. Augustini; unusque ex iis fuit Joannes Paulus Bossius Mediolanensis, Abbas S. Sebastiani, cujus supra mentionem fecit Burchardus. Is enim a pueris Ordini Eremitarum S. Augustini nomen dedit, & in eo professionem emisit, atque in eodem habitu ad Sacrarii Pontificii munus fuit assumptus. Postremo Abbas S. Sebastiani extra muros Urbis Ordinis Cisterciensis effectus, ad dictum Ordinem translatus fuit, ut Alexander VI. Litteris suis testatur; qui etiam, ne hoc exemplo Eremitarum S. Augustini Ordo jure suo antiquo, ac privilegio dictum Officium obtinendi tempus in posterum frustrari posset, peculiari Bulla edita, Sacrarii Pontificii munus a Fratribus prædicti Ordinis perpetuo exercendum esse Motu proprio declaravit. Hæc autem declaratio, ut ex ipsa

constat Bulla, cujus memoratus Rocca mentionem facit, facta fuit, dum ipse Bossius Abbas S. Sebastiani, atque Alexandri VI. foret Sacrista. Sed de Sacrista, ejusque Officio dicemus fusius infra Lib. III. sicut & de aliis Ministris, atque Officialibus Curie Romanæ juxta ordinem nostri hujus Cæremonialis, quod nos Commentariis illustramus.

V. Unum est tandem, quod hic præteriri nullatenus debet, quod nempe de publica ista Sacristæ Missa tradit idem Burchardus §. c1. ubi ita inquit: *Cum Missa publica per Sacristam dicebatur, omnes Conclavistæ, vel qui volebant Missam ipsam audire, extra tamen ostia Capellæ minoris, in qua Missa celebrabatur, ad primam, & secundam aulam Conclavis respondentia, stantes, erant; & interim, cum Missa diceretur, nullus ad ostium Conclavis pulsabat; similiter cum scrutinium fieret Missa finita; ac scabellis pro Cardinalibus cum folio papiri, penna, sive calamo, & incaustro, ac candelis parvis duabus, aut tribus ordinatis, omnes redibant ad Capellam majorem, in qua recludebantur per nos Clericos Cæremoniarum omnes, Cardinalibus in Congregatione existentibus.* Ita ille, cujus loca libenter describo; fuit enim ipse diu Apostolicarum Cæremoniarum Præfectus, & quidem non in sola praxi versatus, sed penitiori earum notitia summe instructus. Ceterum sciendum hic illud est, in Conclavi Sedis vacantis post obitum Pii Papæ V. sequenti die, quo Cardinales ingressi sunt Conclave, idest, die XIII. Maji celebrasse Missam in Sacello Paulino Cardinalem Augustanum supplendo vices Cardinalis Decani pedum infirmitate detenti, ut tradit in suo ms. Diario Franciscus Mucantius, qui etiam, postquam dixit celebratam fuisse tunc Missam de Spiritu Sancto, ita de ritibus in ea servatis inquit: *Pax fuit data cum instrumento Capitis Ordinum tantum, qui deinde successive aliis Reverendissimis Cardinalibus subsequenter ore & facie subministrabant. In fine Missæ Celebrans juxta ritum præbuit sacram Communionem omnibus Reverendissimis Cardinalibus.* Additque mox idem Mucantius, Missa expleta, Secretarium Sacri Collegii alta voce legisse Litteras Summorum Pontificum Julii II. & Pii IV. super electione novi Pontificis, & reformatione Conclavis ex Libro juramentorum, qui est apud Magistros Cæremoniarum. Hodie præter laudatorum Pontificum Constitutiones legitur inter alias celebris Gregorii XV. Constitutio, de qua superius dictum est.

§. XXII.

Quomodo intromittuntur cibaria.

Cum prandii, seu coenæ tempore cibaria afferuntur, Familiæ Cardinalium cornutas (ita enim cophinos appellant, quibus illa portantur) usque ad secundam custodiam deducunt. Tum Præfectus Familiæ illius Cardinalis cum duobus, qui cornutam portant, usque ad ultimam custodiam accedunt. Prælati custodes cornutam aperiunt, fercula, & omnia, quæ intus sunt, diligenter perscrutantur, nequid litterarum lateat (1). Tum aperto ab extra (2) porticulo, ab intus (3) aperiri per Clericum Cæremoniarum, vocarique servientes illius Cardinalis, cujus cornuta est advecta, jubent, illique cornutam cum cibis assignant, & vinum, quod est in vitreis phialis allatum. Servitores, qui extra adstant, ad portam Conclavis non accedunt; & qui intus sunt, a Prælatibus custo-

(1) Ita in Romana editione; in Veneta vero, *infr.*
1. legitur *extrinsecus*.

(3) Ibidem, *intrinsecus*.

(2) Ita quoque in editione Romana, in Veneta vero

custodibus cornutas recipiunt; & qui primum venerint, primum expediuntur. Ante portam intus aliquantulum remote suspenditur cortina quædam, ne per porticulum, cum aperitur, videri possint, qui sint intus; & hoc semper servatur, cum cibaria portantur.

C O M M E N T A R I U S.

I. **T** Estis est in suo Hierolexico Macrus, verbo, *cornuta*, aliquos Sriptores recentiores scribi maluisse *carnutam*, ab illatis in ea carnibus etymon trahentes. Verum, ut seite idem Auctor docet, *cornuta est capsula quadam, quæ tempore Conclavis ad deferenda comestibilia pro Eminentissimis Cardinalibus inservit, sic appellata a binis cornibus, seu ansis, per quas hasta transacta, commodius deferatur a servis*. Cornutarum mentionem, & quidem ad usum Conclavis inter alios non uno in loco facit Æneas Sylvius, potissimum vero Libro II. Historiæ Concilii Basileensis, ita ad rem scribens: *Cibaria comparabant, quæ horis indictis in lignea capsula depicta, quam cornutam appellant, usque ad Conclavis ostium deferrebant; ut ibidem nempe Cornutam ipsam Custodes aperientes, fercula, & omnia, quæ intus erant, diligenter perscrutarentur, nequid litterarum lateret, ut inquit hic noster §. & docet laudatus Æneas Sylvius sua in Oratione ad Fridericum III. Imperatorem anno MCDXLVII. apud Baluzium Tomo VII. Miscellaneorum, ubi enarrat Conclave in Cœnobio Minervitano Fratrum Prædicatorum prædicto anno erectum: Cibaria, inquit, in cornuta feruntur clausa, sed aperiuntur ad ultimum ostium per quatuor Prælatos, inspiciunturque, ne quid litterarum, armorumve feratur*. Certe, ut jam alias notavimus, mandat inter alia Romanus Ordo xv. Auctore Petro Amelio, Capite cxi. ut *Custodes caveant sibi bene sub pœna perjurii, quod bene aperiant semper, & videant quicquid portatur Cardinalibus ad comedendum, & si pastilla eis portarentur, illa aperiant*. Est ergo antiquus ritus, ut a Custodibus, qui portæ ultimæ introitus Conclavis præfunt, juramentum vel eam ob causam prius exhibeatur. Legenda inter alias Constitutio Pii Papæ IV. quæ incipit, *In eligendis*, edita anno MDI XII. qua cautum est, ut *Prælati quoque ad custodiam Conclavis deputati, sub pœna perjurii, & suspensionis a Divinis, maxima, & exquisita diligentia utantur in inspicendis, ac perscrutandis epulis, & aliis rebus &c.*

II. Quod cornutas spectat, de quibus non nihil jam superius diximus, duo adhuc sunt, quæ hic adnotemus ex memorato Ænea Sylvio in citata Oratione ad Fridericum III. Imperatorem; primo siquidem docet, *cornutarum nomine nihil aliud intelligi, quam cistas ligneas depictas, & armis cujuslibet Cardinalis ornatas*. Describit deinde ritum, qua cornutæ ipsæ, in qua cibaria clausa erant, ad Conclave deferrebantur: *Duo Scutiferi, inquit, unam perticam suspensam portant. Alii bini præcedunt. Sequuntur in processione Episcopi, ceterique Clerici de familia ejus Cardinalis, cujus cornuta fertur. Tot funera duci credas, quot cornutæ, Cardinalesque sunt. Usque adeo miseros Curiales adulandi consuetudo illexit, ut cum Cardinalibus nequeant, cornutis assententur, atque illas nibilo minus, quam Cardinales honorant*. Dignam risu hanc cæremoniam dicit, sicut & illam, qua

To. I.

vel *media hyeme sub pyra, quam doloris castrum appellant, quatuor lugubribus induti vestibus, flabellis, quæ non adsunt, muscas expellant, ventulumque non præsentem Pontifici faciunt*. Addit optare se quidem, utrasque cæremonias ab Ecclesia secludi, sed concedendum est aliquid consuetudini; ut idem Auctor subjicit. Notato hoc obiter, audiamus nunc Burchardum in Cæremoniali Sedis vacantis post obitum Sixti Papæ IV. qui contigit anno Christi MCDLXXXIV. Idibus Augusti. Sic enim inquit sub die xxvi. Augusti de ordinatione prandii, ac cænæ deferendæ ad Conclave: *Eadem die circa horam vigesimam secundam redierunt servitores Cardinalium ad ostium Conclavis cum cibariis, & potu pro cæna, quibus restituebantur vasa argentea, quæ prandio apportaverant. Dedit tunc horam singulis, quod Conclavi hujusmodi durante, deinceps singulis diebus circa horam quartodecimam cum prandio, & circa xxij. cum cæna Cardinalium advenirent*.

III. Fuse de ipsa cornuta, ac deferendi eam ritu ad Conclave agit idem Burchardus in citato suo Cæremoniali §. xcix. & seq. cujus locum, tametsi longiusculum, lubet tamen integrum, describere; multa enim scitu digna continet, & curioso antiquitatis lectori grata. Sic autem inquit de praxi circa eam rem servata in Conclavi Sedis vacantis post Sixti IV. Papæ obitum: *Circa horas prandii, & cæna veniebant ex domibus Cardinalium ad loca prædicta magistri domorum, canaparii cum vinis, & aliqui ex Capellanis, & scutiferis, aliis palatia Cardinalium ipsorum custodientibus. Hora deinde adveniente, præcedentibus Scutiferis, binis, & binis, ac Capellanis eodem ordine sequentibus, parafrenarii unus ante alterum retro inter se super spatulis per baculum portabant cornutas, in quibus cibaria, & potus cum pane inclusa erant. Cum essent in porta secundæ custodiæ Palatii, Scutiferi, & Capellani cum Magistro domus ibidem remanebant soli; Parafrenarii cum cornuta ascende-bant per secundam, & tertiam usque ad quartam custodiam, ubi extra ostium Conclavis cornutas firmabant. Pergit Auctor, aitque §. c. cornutam hujusmodi unam clausuram cum duabus clavibus paribus habuisse, quarum unam Magister aulae, alterum vero Conclavistæ cum Domino Cardinale existentes tenebant; illum vero cum cibaria, & vinum in cornuta posuisset, facta prius de singulis credentia, cornutam clavem oblerasse, & ad Conclave misisse.*

IV. Tradit deinde Burchardus, duas fuisse cujusque Cardinalis cornutas, quarum una mittebatur, ut supra, altera vero in Conclavi erat; tum vero mox ita subdit: *Ego, & socius meus Conclavistas illius Cardinalis cujus erat cornuta, vocabamus, quibus cum sua cornuta vacua venientibus aperui sportellum ostii ab intus, & illi de quarta custodia ab extra, & Conclavistæ ipsi clavem cornutæ custodibus porrigebant, qui aperta cornuta singula ex illis contrahentes ponebant super parvam mensam ibidem juxta-*

ostium

ostium Conclavis præparatam, ubi unus Custodum per alios ad hoc Deputatus perspiciebat singula, movendo pezzam panis per minestras, aperiendo pullos, scindendo carnes, & panes, ac tortas, ubi ipsi videbatur, ac perspiciebat vitra, sive carafas vini. Nam vinum non in flaschis, aut quocumque alio vase, sed in vitris discoopertis mittebatur, sive portabatur, minestra vero in parvis ollis ut plurimum dabatur. Singula per eos bene visa nobis Clericis Cæremoniarum Custodes ipsi parrigebant per sportellum ostii; nos vero illa recipientes, posuimus supra credentiam nostram magnam, ubi Conclavista expectabant, & illa recipiebant ponentes in sua cornuta, quam ibi tenebant paratam, cum qua omnia ad cameras suas portabant.

V. Narrat hæc recitato loco Burchardus, nefasque mihi esse puto & illa omittere quæ de cornuta, & cibariis ipsis, ac de usu reliquiarum, mox idem Auctor subicit, sic inquit: Cum in sero cibaria venirent pro cæna, Conclavista exponebant vasa argentea, & vitrea, quæ in mane acceperant super credentiam nostram in Conclavi, & ego illa restituebam Parafrenariis ab extra expectantibus vacua. Panis enim, & vina, & carnes falsæ, & alia, quæ poterant conservari, nos Clerici cæremoniarum in vasa nostra, quæ ad hoc in Conclave portavimus reposuimus. Portaveram enim parvum buticellum pro vino colligendo, & unam capsam magnam pro pane, & huiusmodi, quæ reposui in camera Medicorum, per quam ibatur ad latrinas in angulo circa ostium Conclavis; alia autem, videlicet minestram, carnes, sive pisces crescentes, & similia extra dedimus Custodibus prædictis. Idem fiebat in mane de vasis sero receptis. Parafre-

narii, vel alii servitores Cardinalium expectabant circa secundam custodiam in mane & sero, qui avisabantur per nos, & Custodes de hora, quando cibaria portanda essent, & avisata portabant, & non prius. Nam hora firma non poterat eis assignari ex eo quod Cardinales aliquando citius, aliquando tardius rem suam expediebant. Custodes prædicti non servabant alium ordinem in recipiendis cibariis prædictis, sed qui prior veniebat cum cibariis prædictis, illum primo remittebam, sive primi, sive ultimi, aut cuiuscumque Cardinalis familiaris esset. Ibidem. Custodes quartæ custodiæ singulis diebus duos inter se deputabant, unum pro prandio, & alium pro cæna, qui cibaria inspiceret. Atque hæc sunt quæ in suo Cæremoniali refert Burchardus, cuius locum integrum ad maiorem nostri hujus §. intelligentiam placuit describere.

VI. Cautum præterea & illud est ex hoc nostro eodem §. ut ante portam intus aliquantulum remote suspendatur cortina quadam, ne per porticulum, cum aperitur, videri possint qui sunt intus. Et hoc semper servari ait, cum cibaria portantur. Usus hunc antiquum mutatum fuisse in Conclavi Sedis vacantis post Julii Papæ II. obitum, anno MDXIII. notavimus jam supra in Commentario ad §. II. Num. VIII. ex testimonio Paridis Grassi, qui, ut idem testatur, Rotam instar Monasteriorum Monialium introduxit, per quam cibaria inferantur, & cortinæ loco repagulum ex ligneis tabulis altis, & fortibus, ut nullus ex his, qui intus sunt, accedere ad locum portæ, sive Rotæ, aut videre desuper posset, nisi Magistri Cæremoniarum cum suis famulis. Tradit & alia Grassus, de quibus nos alias.

§. XXIII.

Qui cibi ministrentur, & quod unus de alterius ferculo non vescatur.

Primis tribus diebus ministrantur Patribus cibi libere pro eorum voluntate; illis elapsis, panis, vinum, & aqua cum uno ferculo tantum carniū, vel ovorum unius speciei cum salsamentis, sapore, caseo, herbis crudis, & fructibus. Neque secundum Constitutionem Clementis VI. licet alicui ex Patribus de ferculo alterius vesci.

COMMENTARIUS.

I. **Q**uid de cibis ministrandis Cardinalibus in Conclavi existentibus, primis diebus, ac sequentibus statuerit primum Gregorius Papa X. ac deinde Clemens VI. jam superius dictum fuit. Ex Constitutione Pii Papæ IV. quæ incipit, *In eligendis*, edita VII. Idus Octobris anno MDLXII. cautum est, ut Cardinales primo ipso die, quo Conclave ingressi fuerint, tam in prandio, quam in cæna, uno solo ferculo unius speciei tantum, eoque moderato, & alias juxta Constitutionem præfati Clementis VI. qualificato contenti sint,

& esse debeant, nec quisquam in alterius cella, vel de alterius ferculo vescatur. Idipsum confirmavit Cæremoniale Gregorii XV. Papæ jussu editum, ubi inter alia statuit, *clauso conclavi servari debere omnia, quæ de colloquiis, litteris, & cibis &c. in Constitutione Pii IV. sancita sunt*. Atque hæc iis plane concinunt, quæ in nostro hoc §. præscripta sunt. Ceterum quid nomine unius ferculi intelligatur, non est ita facile definire, tum præsertim, quod non desunt Theologi Casuistæ, ac etiam Doctores, qui unum ipsum ferculum de lauto convivio intelligunt.

§. XXIV.

De cortinis, & habitu Cardinalium.

Dum Patres comedunt, aut aliquid aliud in cellulis agunt, cortinæ anteriores, & collaterales apertæ semper esse debent, nisi cum in lecto interdiu, sive noctu quiescunt.

Cum

Cum autem collegialiter a Patribus est aliquid agendum, utuntur Croceis obscuris, & subtus parvo Caputio supra Rocchettum. Est autem Crocea genus chlamidis longæ ad terram usque a parte anteriori aperta a summo ad imum circa collare rugosa, in formam Capparum Prælatorum, si demas cucullum. Quando autem sunt in cellis, aut per aulas deambulant, possunt esse in Rochettis, sive cum parvis mantellis desuper, ut magis placet.

COMMENTARIUS.

I. **J**Am non uno in loco supra adnotavimus, Clementem Papam VI. sua Constitutione edita Avenione VII. Idus Decembris anno MCCCII. quam superius descripsimus §. XIII. Cardinalibus indulgisse, ut *liceret eis ex decentia honestatis habere in clausura*, idest in Conclavi, cum in lectis quiescendi causa, vel dormiendi esse voluerint, intermedia, seu velamina simplicium tantummodo cortinarum. Antea enim cautum fuerat ex Constitutione Gregorii X. promulgata in generali II. Lugdunensi Concilio, uti etiam supra diximus, ut Cardinales novum electuri Pontificem, *unum Conclave nullo intermedio pariete, vel alio velamine, habitarent in communi*. Porro ex intermediis illis, seu velaminibus simplicium cortinarum ortæ sunt deinde cellæ in Conclavi, quæ sunt veluti quædam cubicula, coeperuntque primum fieri ex tabulis subtilibus anno MDXXI. in Conclavi scilicet post Leonis Papæ X. obitum constructo, ut nos docet testimonium Paridis Grassi, qui in suo ms. Diario, fieri se fecisse inquit in ipso Conclavi *tabularium super solari, & cooperiri cellas ex tabulis subtilibus, & claudi fenestras cum telaribus, & tela cerata super fenestras vitreas*. Sed de hujusmodi cellis, earumque ornatu jam supra iterum atque iterum diximus.

II. His ergo omisiss, juxta nostri hujus §. præscriptum, cum collegialiter a Patribus est aliquid agendum, utuntur Croceis obscuris, & subtus parvo Caputio supra Rocchettum. Quidnam sit Crocea, definit mox idem hic noster §. sic inquires: *Est autem Crocea genus chlamidis longe ad terram usque a parte anteriori aperta a summo ad imum circa collare rugosa, in formam Capparum Prælatorum, si demas cucullum*. Cucullus vestis est nota Scriptoribus, qua scilicet caput operiebatur, eoque vocabulo dicta est etiam Monachalis, quæ alio nomine cuculla dicitur, indeque Monachi appellati sunt cucullati, teste Petro Blesensi, qui Lib. VII. Epistola XIV. ita scribit: *Inde est quod Mundus plenus est cucullatis, & pene vacuus Monachis*. Plura de ea voce videri possunt apud eruditos Dufresne, & Macrum, quorum alter, quod Croceam spectat, ita eam describit: *Crocea est Cappa nigri coloris, qua Cardinales utuntur in Conclavi, circa collum crispata, longa usque ad terram, & ex parte anteriori aperta, manto Græcorum Episcoporum similis ad instar illius, quod fertur in Mozzetta*.

Esse antiquum ritum, ut ipsam vestem Cardinales in Conclavi adhibeant, testem habemus Auctorem Commentariorum Pii II. Papæ Libro II. ubi ita inquit paulo post initium: *Mane Patres omnes induti palliis a summo deorsum apertis, quas Croceas vocant, in cellam Beati Nicolai, quæ ad dextram primæ aulæ est, silentio convenere*. Loquitur de Conclavi, in quo electus fuit Paulus II. anno MCDLXIV. & hæc Capella hodie Paulina vocatur, quod eam scilicet Paulus Papa III. instauraverit, uti diximus supra in Commentario ad §. I. Croceæ a Cardinalibus delatæ in Conclavi mentionem faciunt passim Cæremoniarii antiqui Apostolici, Burchardus, Grassus, alique. Justa præscriptum Cæremonialis jussu Gregorii XV. Papæ editi, *non solum cum ad electionem Cardinales procedunt, Croceis uti debent, sed juxta vetus Cæremoniale, nostrum, scilicet, quod Augustinus Patricius ordinavit, cum aliquid collegialiter agendum est*. Et quidem tunc uti ea veste consuevisse Cardinales, addiscere licet ex recitato paulo superius loco Auctoris Commentariorum Pii II. Papæ. Teste Francisco Mucantio in suo ms. Diario, ubi enarrat ritus Conclavis Sedis vacantis post obitum Pii Papæ V. in Congregatione, quam habuerunt Cardinales eodem die, quo Conclave ingressi sunt hora XX. in Sacello Paulino *eorum habitus erat Caputium coloris violacei, quod Mozzettam vocant supra Rocchettum discoopertum*.

III. Porro Cardinales ipsi, ut tandem docet hic noster §. *quando sunt in cellis, aut per aulas deambulant, possunt esse in Rochettis, sive cum parvis mantellis desuper, ut magis placet*. Jam non modo in Conclavi, sed & Novendiali spatio magis magisque, quam alio quovis tempore, resplendet Cardinalitia dignitas vel circa ipsam habitus formam, quia scilicet non modo in Conclavi existentes, uti Rochetto discooperto possunt, verum etiam prædicto Novendiali spatio, cum per Urbem incedunt, eo modo quo in signum jurisdictionis incedit Papa per universum Orbem Rochetto discooperto, & Mozzetta indutus, & Episcopus in propria Diœcesi, vel Cardinalis in sua Ecclesia Titulari; uti inter alios notat Cardinalis de Luca, Parte II. Relationis Romanæ Curie, Discursu III. Num. XII. Cæterum quod Conclavistarum habitum spectat, ut de eo aliquid notemus, uti hi in Conclavi solent veste talari, quam vulgo zimarram appellant.

§. XXV.

De modestia servanda in Conclavi, & de lampadibus in locis opportunis.

Caveant diligenter Patres, ne cum Horas Canonicas soli, vel cum alio legunt, seu quidpiam aliud in cella agunt, molestiam, aut impedimentum aliis inferant. Et in pri-

primis ne conventicula noctu agitent, neve ambiendo per cellulas, sive per aulas immoderate discurrant. Idque multo magis curent servientes maxime, ne dum Patres quiescunt, sursum, & deorsum discurrendo strepitum faciunt. Noctu locis opportunis ardeant lampades, & assidue in locis tenebrosis apud latrinas.

COMMENTARIUS.

I. **C**erti juris est, teneri Cardinales ad recitationem Divini Officii, seu Horarum Canonicarum, tum ratione Sacrorum Ordinum, quibus fere omnes sunt insigniti, tum Beneficiorum Ecclesiasticorum ratione, quæ possident. Horæ Canonice dicuntur, quod certis quibusdam diei noctisque horis persolvendæ sunt ab iis, qui ad ipsas recitandas tenentur juxta veterem Sanctorum Patrum, & Ecclesiæ disciplinam, uti pluribus probat Thomassinus Parte I. *Disciplina*, Libro II. Cap. LXXXI. & seqq. Certe refert S. Petrus Damiani, qui claruit Seculo XI. detentum aliquandiu in Purgatorio Sanctum Severinum Colonensem Episcopum, quod summo mane totum recitaret pensum divinum, quia reliquum diem in Palatio degens Imperatorio, negotiis publicis impendere cogebatur. Vide Baronium ad annum MLXII. Num. LXXXIII.

II. Quicquid sit de variatione hujus discipline, quæ olim vel in privata Divini Officii recitatione servanda erat juxta notata per laudatum Thomassinum loco citato, mandat primum hic noster §. ut caveant diligenter Patres, Cardinales scilicet in Conclavi existentes, *ne cum Horas Canonicas soli, vel cum alio legunt, seu quidpiam aliud in cella agunt, molestiam, aut impedimentum aliis inferant*. Est enim Conclave veluti Cænobium Monachorum, in quo quis non debet alii molestiam inferre orando voce clamosa, juxta regulam præscriptam a Patriarcha Occidentalium Monachorum S. Benedicto Cap. LII. & ante S. Benedictum ab Isaaco Abbate apud Cassianum Collatione IX. Cap. xxxv. ubi etiam ejus discipline has rationes docet: *Cum summo orandum est silentio, inquit, non solum ne fratres adstantes nostris susurris, vel clamoribus avocemus, & orantium sensibus obstrepemus, sed ut ipsos quoque inimicos nostros, qui orantibus nobis maxime insidiantur, lateat nostræ petitionis intentio*. Ceterum si non licet clamosa Divini Officii recitatione molestiam vicinis inferre, multo minus licebit tempus quietis confabulatione, strepitu, susurrisque violare; meritoque noster hic idem §. statuit, ut & ipsi Cardinales caveant, *ne conventicula noctu agitent, neve ambiendo per cellulas, sive per aulas immoderate discurrant; idque multo magis curent servientes maxime, ne dum Patres quiescunt, sursum & deorsum discurrendo strepitum faciant*.

III. Strepitum porro excitant nimium in incessu præcipientes præsertim per dormitorium tempore quiescendi. Quidam gressibus adeo gravibus longisque gradiuntur, ut non levem excitent tumultum, vicinaque omnia tremere videantur; quæ insolentia quietos aliorum animos in admirationem, vel aliquam subinde indignationem movet. Huc referre licet frequentiores tussés, excreationes nimias, sternutationes affectatas, oscitationes, singultus, aliosque id genus strepitus, quibus vicini affliguntur. Cavendum itaque, ne præsertim noctu dum tempus est quie-

scendi quocumque sonitu strepitus fiat, ob quem alias innocenter factum legimus, S. Lambertum ex Episcopo Monachum graviter punitum. Quiescentibus enim Fratribus in communi dormitorio, surgenti Lamberto clam ad orationem, ut narrat ejus vitæ Auctor apud Surium die xvi. Septembris, lapsus est calceus alter e manibus, qui feriens pavementum, turbavit quietem Fratrum, & Abbatem excitavit. Hic nihil sciscitatus: *Quisquis, inquit, ille fuerit, cujus culpa fraternitas turbata est, pro consuetudine nostra se conferat ad Crucem*. Erat autem Crux pœnitentiæ locus expositus, similis carceri Climaci. Lambertus promte properavit ad Crucem tantum cilicio indutus in nocte gelidissima, & multa glacie, ac nive asperrima. Nec inde discessit, donec revocatus est ab Abbate, qui mane facto circumspiciens ante caminum circumstantes Fratres, animadvertit Episcopum non adeste. Venit splendenti facie, propinquat ad ignem, Abbati petit veniam. Respondet ille: *Nibil in me peccastis, quod ego vobis condonare debeam*.

IV. Cautum est tandem ex hoc eodem nostro §. ut in ipso Conclavi noctu locis opportunis ardeant lampades, & assidue in locis tenebrosis apud latrinas. Ut candela noctis tempore jugiter in dormitorio ardeat usque mane, statuit quidem in sua Regula v. Benedictus Capite xxii. itemque inter alios S. Isidorus, Cap. xiv. ubi ita ait: *Dormientium locum illustret, ut depulsis tenebris testimonium pateat singularis quietis*. Candelæ nomine, cujus meminit S. Benedictus, intelligitur, *vel lampas cum oleo accensa, vel cereus cum cera & lychno, vel etiam sepum in quodam vase aptatum*, inquit ejus loci expositores Bernardus Cassinensis, & Nicolaus de Fractura. Licet autem unius dumtaxat candelæ mentionem facere videatur S. Benedictus, duæ tamen, vel plures, ubi non sufficit una toti illustrando dormitorio, debent accendi, *ut clare Fratres in lectis singulis videantur*, ait idem Bernardus Cassinensis, qui loqui videtur de dormitorio, in quo uno, separatis tamen lectis, Monachi veteres dormiebant, ut pluribus docet eruditissimus Martene in Commentario ad citatam S. Benedicti Regulam Commentario, Cap. xxii. Quicquid sit, tradit Boherius, in Cassinensi Monasterio, ubi centum Monachi habitare consueverant, septem lampades tota nocte ardere consuevisse; quod etiam asserit Nicolaus de Fractura. Neque id in dormitorio tantum, sed & in cella, ut vocant, *necessariorum*, ad quam Fratres ventris purgandi gratia, pergunt, & in omnibus omnino locis, in quibus Fratres de nocte transire necesse est, *ut tam corporis, quam animæ offendicula vitentur*; ut refert ibidem citatus Martene; & videri etiam possunt quæ idem eruditissimus Auctor de eadem re scribit in suo præclarissimo Opere, quod inscripsit, *De antiquis Monachorum ritibus*, ubi varia recenset ea in re Monachorum statuta.

§. XXVI.

De statutis fieri solitis a Cardinalibus in Conclavi ante electionem per futurum Pontificem servandis.

Consueverunt nostris temporibus Patres antequam ad electionem deveniant, statuere, quædam communi consensu, a futuro Pontifice confirmanda, quæ postea singuli subscribunt, juramentoque adstringunt se observaturos, si ad Pontificatum assumantur. Hæc ubi perfecerunt, de electione agere incipiunt.

C O M M E N T A R I U S.

I. **C**onfectio statutorum in Conclavi res est plena periculi, fuitque in usu Seculo XIV. ac præsertim post obitum Clementis VI. qui contigit die VI. Decembris anni MCCCII. Sane electuri Cardinales novum Pontificem proposuerunt eligere Joannem Birellium Ordinis Carthusianorum Generalem, Virum doctrina, & sanctimonia insignem. At vero Joanne rejecto opera Cardinalis Talayrandi, seu Petragoricensi, quia scilicet Joannes factus Pontifex Cardinales ambitionem, & mundi fastum diligentes ad statum revocaturus esset antiquum, & pulcri ipsorum equi post paucos dies ad carros, plaustra, & aratra reducendi forent; electus fuit Innocentius VI. uti rem narrat in suo Chartusienfi Chronico Lib. II. Cap. XXI. Petrus Dorlandus, & ex eo Pagius in Vita ipsius Innocentii VI. Pontificis, Numero I.

II. Cum itaque laudatus Birellius majori rejectentium, quam rejecti dedecore, a Pontificatu fuisset rejectus, Cardinales privati commodi illecebra deliniti, ad Cardinalitiam dignitatem augendam, quasdam leges edidere, quas renunciatus ab ipsis Pontifex sacramento confirmaturus esset, quarum hæc summa erat. Ut novus Pontifex non creet aliquos Cardinales, donec eorum numerus ad sexdecim redactus fuerit, & tunc tot assumeret, quot ad plus adscenderent ad numerum viginti, & non ultra, prædictis sexdecim in eo numero computatis. Quos quidem ab ipso creandos ordinare deberet de omnium Cardinalium, seu duarum partium eorundem consilio, & consensu: hoc tamen salvo, quod extante numero, qui tunc erat, ordinet duos Cardinales de consilio omnium, vel majoris eorum partis. Item quod Papa non procedat ad depositionem, seu personæ captionem alicujus Cardinalis, sine consilio, & consensu omnium Fratrum, nemine discrepante. Item quod Collegium Cardinalium perciperet jure suo medietatem omnium fructuum, reddituum, & emolumentorum ad Ecclesiam Romanam spectantium, prout in Privilegio Nicolai Papæ IV. continetur. Denique ut hæc & alia quædam in iis legibus contenta jurarent omnes Cardinales superstitēs, quod ille, qui ad Papatum assumetur, inviolabiliter observaret. Atque has pactiones se servaturos sacramento simpliciter alii spondere, alii cum hac clausula, *si jure niterentur*.

III. His actis, communibus suffragiis die XV. ejusdem mensis Decembris, & anni Christi MCCCII. Stephanus Alberti Ostiensis Episcopus ad Apostolicum Solium evehctus est sub nomine Innocentii VI. qui anno sequenti, Pontifica-

tus tamen sui primo, prædictas leges, seu pactiones, a Cardinalibus in Conclavi editas, quas ipse, & quidam alii sub hac conditione juraverant, *si, & in quantum scriptura hujusmodi de jure procederet*, rescidit in cœtu quorundam Cardinalium, ac plurium Doctorum, & Jurisperitorum, quod Constitutionibus Gregorii X. & Clementis V. cautum esset, Cardinales, Sede vacante, de quibuscumque negotiis, præterquam de provisione Romanæ Ecclesiæ facienda, se intrittere non posse, certis dumtaxat exceptis casibus, de quibus tamen aliquis contentus in Scriptura hujusmodi non existeret, & quod Scriptura ipsa in diminutionem, & præjudicium plenitudinis potestatis a Deo collatæ soli dumtaxat Romano Pontifici, redundaret, essetque temerarium, & insanum apud Catholicos asserere, *quod Romanus Pontifex Successor Petri, & Vicarius Jesu Christi, non sit vocatus, & assumtus in plenitudinem potestatis: quæ profecto apud ipsum non esset, si ex aliorum consensu, arbitrio, vel adminiculo dependeret*. Declaravit itaque, Cardinales contenta in scriptura nullatenus facere potuisse, ideoque nec Romanum Pontificem, nec Cardinales ipsos ad juramenti observantiam fuisse, & esse quomodolibet obligatos. Diploma Pontificis hanc in rem editum refert Raynaldus ad annum MCCCIII. Num. XXIX. datum apud Villamnovam Avenionensis Diœcesis II. Kalend. Julii, anno I. Pontificatus.

IV. Crevit nihilominus magis magisque Cardinalium audacia imponendi scilicet leges futuro Pontifici non modo Avenionensis schismatis tempore, quo per quadraginta circiter annos Romana fuit Ecclesia vexata, sed etiam ubi dari debuit Ecclesiæ pax in Concilio Constantiensi. Sessione siquidem XL. celebrata die Sabbati XXX. Octobris anni MCDXVI. decretum est, futurum Pontificem cum delegatis singularum Nationum, antequam Concilium ipsum dissolveretur, reformare debere Ecclesiam in capite, & in membris, & Curiam Romanam super articulis sequentibus: de numero, qualitate, & natione Cardinalium; de reservationibus Sedis Apostolicæ; de annatis, communibus servitiis, & minutis; de collationibus Beneficiorum, & gratiis expectativis; de confirmationibus electionum; de causis in Romana Curia tractandis, vel non; de appellationibus ad Curiam Romanam; de officiis Pœnitentiariæ, & Cancellariæ; de exemptionibus, & incorporationibus tempore schismatis factis; de fructibus medii temporis; de non alienandis bonis Romanæ Ecclesiæ; propter quæ, & quomodo Papa possit deponi; de extirpatione simo-

simoniæ; de dispensationibus; de provisione Papæ, & Cardinalium; de Indulgentiis, ac tandem de Decimis. His statutis, & habita deinde Sessione xlii, die Lunæ viii. Novembris ejusdem anni MCDXV. electus demum fuit in Romanum Pontificem die xi, Odo, seu Otto Columna S. Georgii ad velum aureum Diaconus Cardinalis, qui in honorem S. Martini, in cujus Festo creatus fuit, Martinus Papa V. nominari voluit.

V. Martino V. Papa die xx. mensis Februarii anni MCDXXXI. mortuo, celebratisque novem diebus de more exequiis, Cardinales eadem die qua introierunt Conclave, antequam ad electionem procederent novi Pontificis, juxta abusum jam introductum statuerunt inter se, atque jurarunt quosdam articulos, *ad conservandum statum Ecclesiæ Romanæ, & Monarchiam Ecclesiasticam cum Cardinalium dignitate, qui cum sint lumina, & ornamenta prope Papam Sedem Apostolicam illustrantia, & columna firmissima sustentantes Ecclesiam Dei cum Romano Pontifice, eidem ut membra suo capiti concordia insolubili debent esse conjuncti.* Verba sunt Eugenii IV. electi in eo Conclavi Pontificis in Diplomate confirmationis illorum articulorum, inter quos hi erant. Ut imposterum apponeretur in Litteris Apostolicis, *de consensu Fratrum nostrorum*, non vero solum, ut prius, *de consilio*: ut Papa non posset creare novos Cardinales absque consensu antiquorum; & ut medietas Patrimonii Ecclesiastici esset ipsorum Cardinalium. Sed hos articulos contempsit postea Eugenius, ut ex ejusdem gestis in Pontificatu liquet apud Spondanum, & Raynaldum, Pagium, aliosque Scriptores.

VI. In Conclavi quoque, in quo post-obitum Pii Papæ II. electus Pontifex fuit anno Christi MCDLXIV. Paulus II. variæ leges editæ juratæque fuere, quarum quædam non parum injuriæ erant auctoritati potestatique Pontificiæ, quas deinde jure meritoque idem Paulus abrogandas censuit. Earum legum capita exhibet Jacobus Cardinalis Papiensis Lib. i. Commentariorum, quæ hujusmodi sunt. I. Quisquis Patrum ad Pontificatum esset assumptus inchoatam expeditionem in Turcas, quantum Romanæ Ecclesiæ paterentur opes, continuaret, proventumque aluminis ad eam rem integrum adhiberet. II. lapsos Cardinalium mores ad S. R. E. Patrum disciplinam restringeret. III. porro Curiam ipsam, de Provincia in Provinciam, sine plurium ex Patribus intra Italiam, & extra Italiam, sine omnium assensu, qui subscriptionibus pateret, non transferret. IV. Concilium Generale Christianorum intra triennium cogeret, in quo & Principes seculi ad tuendam Religionis causam accerferentur ægræque partes Ecclesiæ communi medicamento sanitatem reciperent. V. Cardinales non ante crearet, quam ii qui creati jam haberentur, intra xxiv. essent reducti, majoremque hoc numero non pati in Ecclesia esse; neminem quoque assumere, qui non trigessimum annum excederet, quique non professus esset, vel Pontificium Jus, vel Civile, vel Litteras sacras, nec nisi unum, eumque hujus generis hominem de cognatione sua eligeret; in omnibus autem eligendis, sententias Patrum, non tacitas in aurem, ut ante, sed ex subselliis, ad declinandos errores, palam acciperet. VI. De majoribus insuper commitendis Sacerdotiis, nonnisi in Consistorio, sententiis auditis, decerneret: jus ad ea nominandi

nulli omnino promitteret. Diplomata eis non daret, quibus ad alienum arbitrium eadem se collaturum promitteret; si quæ essent antea data uno edicto adimeret. VII. Non deponeret de sede sua Episcopum, Abbatemve postulatione ulla Principum, nisi accusatores ex Juris forma, talionis pœna se prius obligarent, ipsique Rei solemni judicio auditi essent. VIII. Non Cardinalem, remve suam apprehenderet, nisi ex Patrum sententiis; non damnavit etiam, nisi ex Synodali Constitutione, cujus est initium, *Sanctorum Prasul.* IX. Nihil porro ex omni Ecclesiæ patrimonio, quod paulo insignius esset, in quemquam distraheret, aut ejus censum minueret, nisi etiam assenserint Patres, & concessioni subscripserint. X. Iisdem quoque non consulentibus, nulli non subdito bellum inferret, aut ad inferendum fœdus quodquam iniret. XI. Testamenta defunctorum Curialium libera fineret. XII. Portoria nova nulla induceret, nec vetera augeret. XIII. Principi, Potentatuique tributum de Clericis sine ratione nullum concederet. XIV. Arcium Custodes jurejurando, vadimoniisque adigeret de iis, vacante Sede, Collegio reposcenti tradendis; eas quæ essent momenti majoris, solis Clericis, qui tamen suæ non essent cognationis, committeret; eundem vero, & Arcis Custodem, & Præsidem Civitatis non faceret. XV. Præsidibus Provincia decedentibus, administratorum omnium Judices daret. XVI. Ducem Ecclesiastici exercitus ex suo genere non constitueret. XVII. Nihil in Diplomatribus factum diceret ex Fratrum consilio, quod vere consulentibus eis decretum non esset. XVIII. denique primo quoque mensium omnium Consistorio imperaret, has leges ad innovandam memoriam ex scripto præsentate recitari.

VI. Has leges, inquit Cardinalis Papiensis post illas recitatas Libro II. Commentariorum, cum Paulus ante Cardinalis, moxque Pontifex factus subscriptionibus duabus, jurejurando, votoque firmasset, delere nihilominus paulo post aggressus est. Queritur non semel de ea abrogatione Papiensis, Paulumque Pontificem non in Commentariis tantum, atque in suis Litteris ad Theanensem Cardinalem scriptis redarguit, sed etiam in sua Epistola ad ipsum Paulum, quæ est clxxx. ubi inter alia ita inquit: *Quid hoc est, Paule? Tenebra enim mihi sunt. Quid agis, aut quo hac tentas consilio? Mutata repente sunt omnia, nihil pristinum video; pro charitate tua in nos tua successit duritas, pro blandimentis asperitas, pro lato initio tristis successus. Vovisti Cardinalis, vovisti & Pontifex, servaturum te leges, quæ in Conclavi sunt editæ ad salutem publicam utiles. Voti tui duobus in libellis Chirographum extat. Dixisti, cum scriberes, etiam sine voto servaturum te eas fuisse. Sic quoque scripsisti cupide, ut vindex non servantium videreris futurus. Sperabamus respiraturam Ecclesiam, futurum Pontificatum, qualem a Petro non vidimus. Quid nunc dicam? aut quid non potius dicam? Reliqua recitare superfedeo, quum obvia sint cuique in Romana Alphonfi Ciaconii anni MDCLXXVII. de Romanorum Pontificum Vitis editione, quæ si acerbiora videantur, & duriora, Christianæ Papiensis severitati, quam in eo adnotavit Jovius in elogiis, sunt condonanda, ut scite inquit nuperus, & eruditus Auctor Vindiciarum quas præmisit Vitæ ipsius Pauli*

Pa.

Papæ II. ex Codice Angelicæ Bibliothecæ Fratrum Ordinis S. Augustini desumptæ, Cap. II.

VIII. Præter binos Consiliarios, Stephanum scilicet Ecclesiæ Mediolanensis Antistitem, & Theodorum Tarvisinæ Ecclesiæ Episcopum, quibus in iis abrogandis legibus usus Pontifex fuit, celebres etiam ad eam rem expendendam Canonistas adhibuit. Extat eandem in rem Andreæ Barbatæ Siculi præstantissimi Jurisconsulti Consilium docentis, legibus illis etfi promissione, juramento, & voto firmatis, Paulum minime ligatum esse, quas proinde absque perjurii, & violati voti culpa infringere valeat, dummodo in Ecclesiæ utilitatem id cedat. Legitur hoc Consilium in fronte prioris Consiliorum ejus voluminis, ab eo conscriptum ex demandata sibi a Borzio Ferrariæ Duce provincia. Barbatæ Consilio adhæsit Alexander Tartagnus Imolensis, ut patet ex ex Lib. VI. Consiliorum illius, Consilio CCXXIV. necnon Franciscus Bursatus Mantuanus, quod constat ex ipsius Consilio CDXLIII. nec aliter sentit Dominicus Cardinalis Jacobatius in Tractatu, *De Concilio*, Lib. VII. Articulo V. ubi de Capitulis Conclavis fufe, & solide differit. Scitissime notat laudatus Auctor Vindiciarum Pauli Papæ II. gravissimis hisce Pontificii Juris Interpretum Responsis suffultam Pauli in legibus illis abrogandis sententiam, immunem fuisse a Platina censura, qui ad carpenda ejus Pontificis gesta vehementer propensus, quum nullam illius abrogationis mentionem fecerit, eandem visus est haud aptam censuisse materiam contumeliis suis, atque conviciis.

IX. Denique, ut alia omittam Conclavia, in quibus antequam ad novi electionem Pontificis procederetur, condi leges, ac jurari a Cardinalibus solitum fuit, ut illæ deinde ab electo Pontifice observarentur; irrito profecto conatu hujusmodi leges editæ post mortem Pii Papæ III. fuere, antequam scilicet Julius II. ad Pontificatum assumptus fuisset anno MDIII. *ad cohibendum ejus animi impetum*, ut inquit Spondanus, *seu alias ad tranquillum Ecclesiæ, atque Italiae statum conservandum*. Legum capita, quæ etiam Julius factus Pontifex novo jurejurando confirmavit, hæc erant. Ne futurus Pontifex cuiquam Regi, aut Principi, Civitatis Romanæ Ecclesiæ non obnoxie sine diserto duarum ex tribus partium Cardinalium consensu bellum inferret, aut fœdus ad inferendum alicui bellum faceret.

Ut in causis majoribus, ac præsertim in creatione Cardinalium, & processu faciendo contra eos, in privationibus, vel translationibus Episcoporum, ipsis invitis, in societate, pace, & bello extra Terras Ecclesiæ, suffragia Cardinalium dari deberent per calculos albos, & nigros, aliterque data ipso jure essent nulla. Cardinalibus per futurum Pontificem creandis, dummodo ex antiquis essent numero viginti, os non aperiretur ad danda suffragia in tribus hisce casibus, videlicet creatione aliorum Cardinalium, alienatione, seu infeudatione Terrarum Ecclesiæ, & in non observatione horum Capitulorum. Si vero ex antiquis essent pauciores viginti, tunc ex novis impleteretur is numerus secundum ordinem suæ creationis. Qui recens crearentur Cardinales, in hæc ipsa capita jurarent, alioqui Cardinalatus privilegiis, & emolumentis haud fruerentur. Electus Pontifex publicum universi Christianissimi Concilium intra biennium a promotionis die numerandum, in Urbem liberam, ac tutam nec ulli suspectam convocaret: si negligentior ea in re deprehenderetur, duæ partes Cardinalium convocandi Concilii potestatem haberent; hæcque statuta intelligerentur pro defensione Catholicæ Fidei, & erectione Ecclesiasticæ libertatis, pro reformatione Ecclesiæ in capite, & in membris, ac vinculo charitatis inter Summum Pontificem, & Fratres ejus S. R. E. Cardinales confirmando.

X. Legere est has leges apud Jacobatum in citato loco, *De Capitulis Conclavis*, & apud Spondanum ad annum MDXI. Num. IX. ubi etiam notat, quod quamvis a Julio electo Pontifice fuerint jurejurando confirmatæ, novis tamen supervenientibus casibus, ab eodem aut mutatæ sunt, aut dilataæ. Ceterum licet juramento additum esset, nec seipsum a perjurio, & anathemate, quibus, si falleret, se subiciebat, absoluturum, nec absolutionem alicui commissurum; quam tamen hujusmodi cautiones infirmæ sint obligationis in eo, qui suprema pollet auctoritate, maxime cum novi emergunt casus alicujusmodi excusationis, nemo non intelligit, & exemplis aliorum Pontificum, qui se similibus obligationibus subjecere, confirmatur: *Possunt enim ipsi*, subdit citato loco memoratus Spondanus, *seipsum ab iis liberare, cum expedire viderint; nec propterea fas est Cardinalibus eorum obedientiæ renunciare.*

§. XXVII.

Quæ servanda, ne electio possit impugnari.

Sed (1) advertant Reverendissimi Domini Cardinales, ut in electione servant Sanctorum Patrum Canonicas Constitutiones, Nicolai II. Alexandri III. Gregorii X. Clementis V. & VI. & aliorum si quæ sunt, ne impugnari possit electio. Sciantque, tam Episcopos, quam Presbyteros, seu Diacones Cardinales æqualem in eligendo potestatem habere, neque fieri relationem meriti ad meritum, neque zeli ad zelum, sed numeri ad numerum; itaut ille qui a duabus partibus Cardinalium cujuscumque Ordinis sit, rite electus, pro vero & indubitato Pontifice habeatur; & Cardinales novos ut primum creati, & publicati fuerint, eandem habere potestatem in electione, nisi os fuerit eis clausum a Pontifice, & non apertum ante mortem, quia tunc non haberent potestatem; sin autem non fuerit eis os clausum, integra remaneat potestas, Post mortem Innocentii VI. in electione Successoris, in qua fuit electus Urbanus V.

H

ex.

(1) Ita in Romana editione, in Veneta vero 1. Sed advertendum est per Reverendissimos &c.

extra Collegium, tunc Abbas S. Germani Altissiodorensis, (1) & absens: Dominus Andronicus de Rocha Abbas Cluniacensis assumptus in Cardinalem per Innocentium primo venit ad Curiam in die obitus dicti Innocentii, & quamvis installatus non esset in Consistorio, nec haberet Titulum, fuit admissus per alios Cardinales ad Conclave electionis, ut alii, & ita duo ex Cardinalibus antiquis ex commissione Collegii, causa cognita, judicarunt esse faciendum, quia sola assumptio ad Cardinalatum dat (2) jus eligendi, & alia Cardinalibus convenientia, & propterea Papa in tempore claudit os novis, quod prius erat apertum.

COMMENTARIUS.

I. **D**E electione Papæ variis temporibus varii Summi Pontifices varias Constitutiones edidere, præsertim vero Nicolaus II. Alexander III. Gregorius X. Clemens V. & Clemens VI. alique a nobis superius memorati, & inter ipsos Pius IV. & Gregorius XV. Servandas esse a Cardinalibus ipsas Pontificias Constitutiones, *ne impugnari possit electio*, recte admonet hic noster §. subdens mox etiam, *tam Episcopos, quam Presbyteros, seu Diacones Cardinales aequalem in eligendo potestatem habere &c.* Romani Pontificis electionem a Nicolao Papa II. in Lateranensi Synodo anno MLIX. S. R. E. Cardinalibus attributam, jam & a nobis superius ostensum fuit. Nicolai Decretum novum munxit robore Alexander III. in Generali III. Synodo Lateranensi anni MCLXXIX. Canone I. ubi statuit, ut *si forte inter Cardinales de substituendo Summo Pontifice non poterit esse plena concordia, & duabus partibus concordantibus, pars tertia concordare nolaerit, aut sibi alium præsumserit nominare, ille absque ulla exceptione ab universali Ecclesia Pontifex habeatur, qui a duabus partibus concordantibus electus fuerit, & receptus*. Extat hoc Decretum in Cap. *Licet, De electione &c.* notatque Panvinus ad Platinam, Clero omnino, & populo a Pontificis electione exclusis, eam ad Cardinales solos tunc primum redactam esse, ad evitanda posterorum schismata. Atque hanc eligendi formam esse omnium optimam, probat inter alios doctissimus Cardinalis Bellarminus Lib. I. *De Clericis*, Cap. IX.

II. Quamquam vero Constitutione primum Nicolai II. ac deinde Alexandri III. consensu universalis Ecclesiæ multorum sæculorum spatio comprobata ad solos S. R. E. Cardinales electio Romani Pontificis spectet, in Concilio tamen Constantiensi, Sessione XL. celebrata die xxx. Octobris anni MCDXVII. ad tollendum teterrimum schisma, quod diu Christianum Orbem vexaverat, statutum fuit, ut hac dumtaxat vice, & de expresso Cardinalium consensu, Cardinalibus ipsis adjungerentur *sex Prælati, vel alia honorabiliores personæ Ecclesiasticæ in Sacris Ordinibus constitutæ de qualibet Natione in eadem Synodo tunc existentes, quos, seu quas qualibet ipsarum Nationum pro se ad hoc infra decem dies elegeret*; utque nemo haberetur pro vero, ac legitimo Pontifice, nisi quem duæ tum Cardinalium, tum Delegatorum partes cooptassent. Quinque Nationes erant, Italica, Gallicana, Germanica, Anglica, & Hispanica, ex iisque deputati sunt triginta Electores, sex pro qualibet Natione; fueruntque Joannes Patriarcha Constantinopolitanus, Archiepiscopi quinque, undecim Episcopi, & unus electus, ac duodecim Abbates, aut alii in dignitatibus Ecclesiasticis consti-

tuti. Hi porro Cardinalibus adjuncti, qui erant numero XX. vel, ut aliis placet, XXXI. ex triplici obedientia Gregorii XII. Joannis XXIII. & Benedicti XIII. seu Petri de Luna, Concilio præfentes, Conclave die VII. Novembris ejusdem anni MCDXVII. ingressi paratum in Domo Communitatis Civitatis Constantiæ, tertio post die, nempe XI. Novembris, concordibus suffragiis in Romanum Pontificem elegerunt Odonem, seu Othonem Columnam ex nobilissima, ac perve-tusta Columnensi Romana stirpe, S. Georgii ad velum aureum Diaconum Cardinalem, qui Martinus Quintus appellari voluit in honorem Sancti Martini, in cujus Festo electus Pontifex Maximus fuit, uti jam diximus Tomo IV. Conciliorum in Enarratione Sessionis XLI. Concilii Constantiensis.

III. Sed hic casus peculiaris fuit, nam alias, ut dictum est, soli S. R. E. Cardinales Episcopi, Presbyteri, & Diaconi potestatem habent eligendi Romanum Pontificem; fuitque unus ex damnatis Joannis Wiclefi articulis agentis, electionem Papæ a Cardinalibus, per diabolum, esse introductam. Sane autem docet & illud Fagnanus in Capite, *Accepimus, De pactis*, Numero LI. Cardinalium Collegium, quod est honorabilius Ecclesiæ membrum, privari haud posse *jure eligendi Romanum Pontificem, quod habet ex consensu universalis Ecclesiæ, & in cujus possessione per tot secula existit ... idque perquam convenienter, ut solidis rationibus probat Cardinalis Turrecremata in Summa, De Ecclesiæ, Lib. II. Cap. LI. contra stultum errorem Joannis Wicleff, & Augustinus Triumphus, ubi supra, Quæstione II. Articulo II. & III.* Addit mox etiam Fagnanus, repugnare naturali rationi, *ut Cardinales hoc jure sibi quasito sine justa, & necessaria causa spoliarentur*; timendumque foret, ne schismata in Ecclesia fuscitarentur, ad quæ etiam evitanda, Clemens Papa V. in sua Constitutione II. quæ incipit, *Ne Romani*, legiturque inter Clementinas, *De electione &c.* statuit inter alia, *ut nullus Cardinalium, cujuslibet excommunicationis, suspensionis, aut interdicti prætextu, a dicta valeat electione repelli*. Id quod etiam decreverunt sequioris ævi Summi Pontifices, ac præsertim Pius Papa IV. & Gregorius XV. in memoratis toties Constitutionibus suis, quas de electione Romani Pontificis ediderunt.

IV. Licet autem vel ipsi excommunicati Cardinales juxta laudatorum Pontificum sanctiones, *a Summi Pontificis electione activa, & passiva excludi nullo modo possint*; statuit tamen, & declaravit Pius IV. quod *si forte aliquis Cardinalis saltem in Diaconatus Ordine constitutus non fuerit, is nullatenus ad eligendum admitti debeat*; eamque sanctionem confirmarunt Sixtus

(1) In ipsa Veneta ita legitur: *Altissiodorensis de Rocha; Abbas Cluniacensis assumptus &c.*

(2) Ibidem, *habet &c.*

Quintus in sua Constitutione l. ut notat Cohellius in Notitia Cardinalatus, Cap. xiii. & deinde Gregorius XV. in suo Cæremoniali, *De electione Summi Pontificis*, §. *Porro Capitula*, ubi tamen declarat, exclusionem ipsam habere quidam locum, ubi Cardinalis in Diaconatus Ordine minime constitutus, non esset Pontificio privilegio munitus. Hæc ejus verba: *Quoniam autem juxta Constitutionem Pii IV. Cardinales, qui saltem in Ordine Diaconatus constituti non sunt, ad electionem Romani Pontificis non admittuntur, inspicendum erit antequam ad electionis negotium procedatur, an aliqui ex Cardinalibus præsentibus Ordine prædicto careant; nam si careant, a suffragio ferendo excludendi erunt, nisi Privilegio Pontificio muniti sunt.* Ita Cæremoniale Gregorii XV. Papæ jussu editum. Ceterum Collegium Cardinalium est fere velut Episcopi Capitulum, ut notat Cardinalis de Luca in Relatione Romanæ Curiae Discursu l. ubi inter alia docet Num. x. etiam in Cardinalibus pro electione Papæ facienda procedere idem, quod generaliter in Capitulis, & Collegiis Ecclesiasticis statutum est, ut non existentes in Sacris vocem non habeant in Capiulo. Statuit id quidem Tridentina Synodus Sessione xxi. *De reformatione*, Cap. iv. Sed recte subjicit laudatus de Luca, forte nunquam Cardinales licet Sacris minime initiati ab electione fuisse exclusos, ob dispensationem scilicet, quæ illis a Pontifice concedi solet.

V. Certum plane & illud est, quod docet. & hic noster §. *Cardinales novos, ut primum creati, & publicati fuerint, eandem habere potestatem in electione, nisi os fuerit eis clausum a Pontifice, & non apertum ante mortem, quia tunc non haberent potestatem; sin autem non fuisset eis os clausum, integra permaneat potestas.* Probat id statim exemplo Androini Cardinalis de Rocha, qui ex Cluniacensi Abbate assumptus in Cardinalem per Innocentium VI. primo venit ad Curiam in die obitus dicti Innocentii, & quamvis installatus non esset in Consistorio, nec haberet Titulum, fuit admissus per alios Cardinales ad Conclave electionis, ut alii Cardinales antiqui; & ita duo ex Cardinalibus antiquis ex commissione Collegii causa cognita judicarunt esse faciendum, quia sola assumptio ad Cardinalatum dat jus eligendi, & alia Cardinalibus convenientia; & propterea Papa in tempore clausit os novis, quod prius erat apertum. Creatus fuit Cardinalis Androinus de Rocha ab Innocentio VI. una cum aliis septem Cardinalibus die xvii. Septembris anni mcccxi. quia scilicet æstate illius anni, teste Villaneo Lib. x. Cap. xlv. novem obierant Cardinales. Verum gravissimis Reipublicæ Christianæ, ac Sedis Apostolicæ negotiis alibi occupatus Androinus a tempore suæ creationis, quæ in ejus absentia facta fuerat, non accessit Avenionem, nisi quando Innocentius laborabat in extremis, obiitque die xii. mensis Septembris anni mcccxi. quique propterea licet haberet Pileum rubeum, Titulum tamen non habebat, aut in Consistorio sedem, quia nondum ei os clausum, & apertum fuerat; nihilominus de communi consensu Cardinalium admissus est una cum aliis in Conclave, in quo electus fuit Urbanus V. judicantibus illis concorditer, solam assumptionem, seu promotionem ad Cardinalatum tribuere vocem in electione Pon-

To. I.

tificis; idque expresse denotari ritu illo, quo noviter promoti per Papam claudunt os quousque Titulum acceperit, quando illud ei aperitur, ut in posterum vocem liberam in omnibus habeat; non autem claudi nisi quod prius apertum est; ac proinde cum non fuisset os clausum Androino a Pontifice, utique illud ei apertum, & liberum remansisse.

VI. Constant hæc non modo ex laudato Patricio, verum ex Auctore primæ Vitæ Urbani V. notatque Pagius in Vita ejusdem Urbani V. Papæ, Num. II. eam Cardinalium explicationem argute inventam scribi a Spondano ad annum mcccxi. Num. x. quod contraria de his Decreta sub Eugenio IV. reperiantur. Verum licet certum sit, Eugenium IV. sanctionem edidisse, qua promulgavit, eos tantum Cardinalatus jure potituros, qui præsentibus Pileum rubeum, Titulum, Anulumque a Pontifice receperint, vel ad quos absentes Pontifex Galerum rubeum miserit, neque in renuntiando novo Pontifice, ceterisve rebus suffragia laturos, nisi postquam in Consistorio promendæ suæ sententiæ potestatem acceperint, seu postquam eis os clausum, & apertum fuerit; creditum tamen est, id ab eo factum, ut Dominicum Capranicam a Martino V. dictum Cardinalem, dignitate exueret; cum longe ante hæc tempora in usu positum fuerit, ut Cardinales vi suæ Nominationis, licet Pileum rubeum non recepissent, nec Titulum, nec alia, ad electionem tamen Pontificis fuisse admissos. Hujus rei insigne exemplum refert Bernardus Guido in Catalogo Cardinalium assumptorum ex Ordine Prædicatorum apud Baluzium, & Pagium citato loco Num. II. ubi narrat creationem Cardinalis Galteri Winkterburni factam a Benedicto Papa XI. anno mccciv. in jejuniis Quatuor Temporum post Cineres: *Hic*, ait laudatus Guido, *post novem menses a die, qua fuit in Cardinalem nominatus, & post quinque fere menses ab obitu memorati Domini Benedicti Papa, pervenit ab Anglia Perusum Civitatem, ubi adhuc Curia morabatur, Sede vacante, iv. Kal. Decembris, Sabbato scilicet ante Dominicam primam Adventus anno Domini mccciv. fuitque exhibitus sibi magnus, & debitus honor a Populo Perustino, & sine alio diverticulo declinavit ad Conclave Cardinalium, ubi inclusi propter electionem Summi Pontificis commanebant, a quibus cum magno favore, & honore susceptus est, & in sequenti crastino S. Andrea, scilicet in Kalendis Decembris, ad scrutinium electionis Summi Pontificis tanquam Cardinalis admissus, quamvis nondum haberet Titulum, nec Anulum, nec Capellum.* Ex quo, ut obiter notem, quod & observavit Pagius, corrigendus est Oldoinus, qui cum Wadingo Galterum vocat Cardinalem Sanctæ Sabinae.

VII. Hinc suscitata Quæstione in electione Innocentii VIII. vacante tunc Sede per obitum Sixti IV. an nempe Cardinalis, cui nondum clausum & apertum fuit os, juxta ritum, & cæremonias Pontificias, de quibus erit opportuniore loco sermo, habeat votum in electione Pontificis; aderat enim in Conclavi Ascanius Maria Cardinalis Sfortia, qui cum in Vita Pontificis nondum Romam venisset, non fuerat illi apertum os in Consistorio. Verum Patres tunc Majorum utique sequuti exempla decreverunt, ex eo quia non præcesserat alia cæremonia-

H 2

clau-

claudendi os, nec erat illi clausum, dum Pontifex e vita excessit, permiffum, & licitum esse prædicto Cardinali Sfortiæ, sicut & aliis votum habere, ut refert Joannes Baptista Burchardus unus ex Cæremoniarum Pontificiarum Magistris, qui tunc aderat in Conclavi, & omnia quæ in illo gesta fuerunt, sigillatim summaque diligentia scripsit. Rem ipsam ex laudato Bruchardo narrat in sua Cardinalatus Notitia Jacobus Co-

hellus Cap. xiiii. Ceterum ritum ipsum claudendi, & aperiendi ora novorum Cardinalium, eisque Titulum assignandi ediderunt inter alios Raynaldus ad annum mcccxxxviii. Num. lxxxiii. & Mabillonius Tomo II. Musei Italici, Pag. 431. de eodemque dicemus nos fuse inferius, Titulo viii. qui est de creatione novorum Sanctæ Romanæ Ecclesiæ Cardinalium, & de aliis ad eum ritum spectantibus.

§. XXVIII.

In quo casu electus Pontifex, eique adhaerentes sunt excommunicati.

Et quamvis Romanus Pontifex Canonice institutus nullo humano iudicio judicari possit, nisi fiat hæreticus; si tamen contra formam istarum Constitutionum, Papatum sibi usurpaverit, tam ipse, quam ei adhaerentes sunt excommunicati, & similiter electus per seditionem, impressionem, vel quodlibet aliud ingenium, videlicet per calliditatem, & fraudem.

COMMENTARIUS.

I. **E**X quo creperunt nonnulli ambitionis spiritu inflati contra regulas Canonice electionis, Romanam præsertim Ecclesiam invadere, statim anathematis pœna, quam adversus id genus homines noster hic §. statuit, percussus fuere. Certe eam etiam ob causam damnatus jam olim fuit a S. Cornelio Papa, Synodo Romæ congregata, in qua sexaginta quidem Episcopi, Presbyteri vero, atque Diaconi multo plures convenerunt, Novatianus Romanus Presbyter, qui primum in Ecclesia Romana schisma excitavit, calumniatusque ipsum S. Cornelium tanquam vitio creatum Pontificem, instigante Novato Presbytero Carthaginensi, nonnullos ad suas traxit partes, ac tribus Episcopis simplicioribus vi & fraude ad hoc adactis, clandestine pseudopontifex ordinatus est; uti rem fuse narrant Scriptores Vitæ S. Cornelii Papæ, & qui ejusdem Pontificis gesta litteris consignarunt.

II. Longum esset aliorum pseudopontificum schismata hic recensere, quos variis temporibus intrusos varii Romanæ Ecclesiæ legitimi Præsules non modo diro anathemate perculerunt, verum etiam veluti hæreticos, atque hæresiarchas damnarunt, uti nos inter alias docent Generalis I. Synodus Lateranensis Can. vi. & Generalis iidem Lateranensis Synodus II. Can. xxx. Legendus Canon I. Concilii etiam Generalis III. Lateranensis, quo statuitur, ut electus in Romanum Pontificem contra jam præscriptam formam, *tam ipse, quam qui eum receperint, excommunicationi subjaceant, & totius Sacri Ordinis privatione multentur, itaut Viatici eis etiam, nisi tantum in ultimis, communicatio denegetur; & nisi respuerint, cum Dathan, & Abiron, quos terra vivos absorbit, accipiant portionem.* Porro ubi noster §. ait, eum qui contra

formam istarum Constitutionum, Papatum sibi usurpaverit, tam ipsum, quam & ei adhaerentes esse excommunicatos, alludit ad Constitutiones veterum Pontificum Nicolai II. Alexandri III. Gregorii X. Clementis V. & Clementis VI. quas superius memoravit. Pœnas itaque contra usurpantes malis artibus Papatum legere est in laudatorum Pontificum Constitutionibus, quibus addendæ & aliæ sunt sequioris ævi Pontificum qui post Augustinum Patricium nostri hujus Cæremonialis ordinatorem claruerunt, præsertim vero illæ, quas de electione Papæ Pius IV. anno MDLXII. & deinde Gregorius XV. anno Christi MDCXXI. ediderunt.

III. Ceterum ut has Constitutiones omittam, de quibus alias non uno in loco diximus, post ordinatum Cæremoniale a Patricio, Julius II. anno MDV. ut simoniæ fœditati, cujus Sedes Apostolica vehementer infamabatur, in posterum occurreret, Constitutionem edidit xix. Kal. Februarii, qua statuit, ut siqua simonia in electione Summi Pontificis committatur, vel ab electo, vel ab eligentibus, electio eo ipso nulla existat, & contra ipsum uti hæreticum agi possit, & auxilium brachii secularis implorari; tamque ipse, quam qui eum simoniace elegerint, aut eligi quomodocunque procuraverint, privati sint Cardinalatu, aliisque omnibus Dignitatibus, & Beneficiis Ecclesiasticis, feudis, bonis, honoribus, &c. iique Cardinales, qui simoniæ non consenserint, electionem alterius Pontificis agere possint, & Concilium etiam Generale indicere, & convocare. Hæc Julius II. Pontifex. Sed scite subdit Spondanus ad ipsum annum MDV. Num. I. *Quod pie cogitatum remedium multis videtur difficultatibus implicatum. Sed forte providit Deus, ne unquam opus fuerit.*

§. XXIX.

De Missis in Conclavi celebrandis.

Consuetudo fuit apud superiores, ut duæ Missæ singulis diebus in Conclavi dicerentur, una de die currenti, altera propria, quæ Sede vacante dicitur, & scripta erit in
fine

sine hujus voluminis; una per Sacristam, altera per aliquem ex Capellanis Cardinalium, nisi ipsi Cardinales personaliter velint celebrare.

COMMENTARIUS.

I. **D**E Missa per Sacristam in communi coram Cardinalibus celebranda in Conclavi, & de ejus antiquo ritu, jam supra differuimus in Commentario ad §. XXI. Missæ celebrandæ quotidie in Conclavi, & audiendæ a Cardinalibus ibidem inclusis. mentionem facit quidem Romanus Ordo xv. auctore Petro Amelio, Cap. cxlix. ubi ita inquit: *In Conclavi autem unus Clericus audientia, qui servit Capellæ, in Capella dicens Epistolas, intret, & scribat omnia, quæ fiunt de die in diem, & ordinet omni die de Missa dicenda coram Cardinalibus, & teneat unam lampadem accensam in Capella, & aliam in medio Conclavis, & custodiat paramenta, Calicem, Librum, & Cblamidem S. Petri cum Mitra Consistoriali.* Ex præscripto autem Cæremonialis Gregorii XV. Papæ jussu editi, mane sequenti post clausum præcedenti nocte Conclave, conveniunt Cardinales in eo præsentem, qui infirmitate non sunt impediti, ad Capellam Paulinam, & ibi celebrata consue-
ta Missa, & facta Cardinalium communione, statim ad negotium electionis procedere debent. Teste Joanne Paulo Mucantio in suo Diario ms. anni mdcx. ubi enarrantur Acta Sedis. vacantis post obitum Sixti V. die viij. Septembris Cardinalis Gesualdus supplens vices Cardinalis S. Georgii Decani adhuc convalescentis, & debilis propter infirmitatem, in dicto Sacello Paulino celebravit Missam lectam de Spiritu Sancto, in qua Communionem præbuit omnibus Cardinalibus, fere, inquam, nam hac die nonnulli Cardinales Presbyteri devotionis causa propter Festum Nativitatis B. Mariæ Virginis celebraverunt in Sacello Sixti IV. in quo ultra Altare solitum, quatuor alia Altaria ad commoditatem, & usum Reverendissimorum Dominorum Cardinalium, & Conclavistarum celebrare volentium erecta fuerunt. Sed major pars Cardinalium e manibus prædicti Celebrantis Communionem sumsit, Presbyteri cum Croceis, & Stola desuper a collo pendente, Diaconi vero cum Stola non a collo pendente, sed super humerum sinistrum more Diaconali. Sane solitos fuisse Cardinales celebrare in parva Capella Conclavis Missas, & quidem summo mane, testatur in suo Cæremoniali Sedis vacantis post mortem Sixti Papæ IV. Burchardus §. xlvii. ubi sub die xxviii. Augusti anni scilicet mcdlxxxiv.

quo Sixtus obiit, deinde etiam subjicit, *circa horam duodecimam, Sacristam celebrasse Missam publicam omnibus Cardinalibus præsentibus &c.*

II. Præter Sacristæ, Cardinalium, & aliorum Conclavistarum Missas, quæ in Conclavi quotidie celebrari solent, mos etiam ille invaluit, tamen non ita antiquus, ut Musici Capellæ in quodam Vaticani Palatii atrio Altari erecto, ibidem Missam quotidie de Spiritu Sancto canant usque ad novi Pontificis electionem. Certe mos ille antiquus est, cujus meminisse nostrum hoc Cæremoniale debuerat, ut Clerus Secularis, Regularisque quotidie mane ad ipsum Atrium Palatii Vaticani processionaliter accedat, invocetque ibidem gratiarum Spiritus Sancti, cantans Hymnum, *Veni Creator Spiritus.* Fuisse in usu hunc morem initio Seculi xv. ubi scilicet anno mcdxvii. pro electione novi Pontificis erectum fuit Conclave in Domo Communitatis Constantiensis, testatur post alios Paggius in Vita Martini Papæ V. Num. i. *Facta est, inquit, omni die Processio circumquaque Conclave.* Ut alia exempla omittam ejus Processionis, quæ in usu fuit ante editionem nostri hujus Cæremonialis ab Augustino Patricio ordinati, testimonium describam Aeneæ Sylvii, qui in sua ad Fridericum III. Imperatorem Oratione, Cæremonias describens in Conclavi servatas, ubi anno mcdxlvii. electus fuit Nicolaus Papa V. sic inter alia ait: *Illud admodum placuit nobis, quoniam singulis diebus Processio Sacerdotum circa Conclave fuit, summis precibus Spiritus Sancti præsentiam electioni depascens. Nec enim abesse solet cum sincera mente deposcitur ille, sed ultro vocantibus adest, opusque dirigit.* Post editionem nostri hujus Cæremonialis mentionem facit ritus, quem enarramus, in suo ms. Diario Franciscus Mucantius, ubi enarrat electionem Gregorii XIII. Papæ, ita inquit: *Solent singulis diebus summo mane omnes Religiosorum Ordines, & Clerus Urbis ad Vaticanum psallentes, atque obsecrantes Deum pro digna electione novi Pontificis accedere.* Addit etiam, consuevisse etiam Clerum ipsum, Religiososque Ordines in Atrio magno Palatii aliquantulum expectare, si forte Crux proferatur novæ electionis nuntia. De hac Crucis ostensione, & de publicatione novi electi Pontificis dicemus infra.

§. XXX.

De primo tractatu electionis, ac de triplici eligendi forma, & primum per viam inspirationis, seu Spiritus Sancti.

Cum igitur de electione agere volunt, audita Missa, Domini Cardinales soli in Capella illa remanent, sedentque super scabella, sive scamna illis parata. Super Altare restat Calix vacuus, & Patena. Ante Altare mensa parva rubeo panno cooperta ponitur, & super eam pugillares, & papyrus. Inter quam, (1) & Altare ponuntur scabella tria; in quorum medio, Episcoporum, a dextris Presbyterorum, & a sinistris Diaconorum Cardinalium Priores sedent. Sacrista vero, Familiares Cardinalium, & omnes alii, qui

(1) Ita in editione Romana, in Veneta vero 1. legitur: *inter concavum, & Altare juxta mensam ponuntur &c.*

in Conclavi reperiuntur, in Capella majori, ubi cellulæ sunt, claudantur. Soli Clerici Cæremoniarum solent extra portam Capellæ parvæ, ubi Patres clausi de electione tractant, expectare, præsto (1) venturi, si a Patribus pro aliqua re vocarentur. Cum omnes ordine suo confederint, Prior Episcoporum in loco prædicto sedens, commodis verbis hortatur Patres ad providendum Sanctæ Romanæ Ecclesiæ de Viro idoneo, & sufficienti, qui tantum onus utiliter ferre queat. Deinde proponit eis, per quam viam ad electionem procedere placeat, per viam Compromissi, sive per viam Scrutinii. Quod si forte aliquis Patrum diceret in hanc sententiam: *Reverendissimi Domini, perspecta singulari virtute, probitate &c. Reverendissimi Domini N. ego iudicarem sine alio processu, ipsum eligendum ad Summum Pontificatum, & ex nunc ego eligo ipsum in Summum Pontificem Sanctæ Romanæ Ecclesiæ*. Si alii, vel saltem duæ partes istius sententiam sequerentur, & viva voce, simili modo illum talem eligerent, ille esset Canonice electus, & verus Papa; & vocatur per viam Spiritus Sancti talis electio sine cedulis, aut Compromisso; sæpeque apud Majores nostros fuit celebrata hæc via.

COMMENTARIUS.

I. **A**udita Missa, acturi de electione Cardinales, soli in Capella illa remanent, sedentque super scabellum, sive scamnum illis paratum, juxta ritum, cujus jam ante editionem nostri hujus Cæremonialis ab Augustino Patriocio ordinati mentionem fecit in suo Cæremoniali Sedis vacantis post Sixti IV. obitum Joannes Burchardus §. XLVII. ubi ritum ipsum in hoc §. nostro notatum fusius luculentiusque enarrat, sic inquit: *Finita Missa, locavimus unam parvam mensam longitudinis viij. palmorum, & latitudinis iv. vel circa, consueta altitudinis inter parvum ostium, per quod itur ad secundam aulam Palatii prædicti, nempe Vaticani, & murum illi oppositum, in medio ibidem quodam panis rosario, quasi duas cannas habente cooperimus. Desuper posuimus unum horologium, campanellam, calamare cum in claustris, pennam, vel calamum, & unum quinternum chartæ. Sacrista vero depositis sacris vestibus, posuit in medio Altari Calicem consecratum vacuum cum Patena desuper posita. Servitores Cardinalium ponebant quisque ante suum Dominum scabellum erectum in modum pulpiti, & desuper calamare cum in claustris, penna, sive calamo, unam candelam parvam, & unum folium chartæ, in quo per capita scripta erant nomina omnium Cardinalium in Conclavi existentium*. Loquitur deinde de capitulis, seu de statutis per futurum Pontificem servandis, quæ olim fieri solita erant a Cardinalibus antequam de ipsa Pontificis electione tractarent.

II. Egimus jam nos de statutis ipsis supra in Commentario ad §. xxv. Ut alia autem in hoc præsentis §. contenta explicemus, ex ejusdem præscripto, *super Altari restat Calix vacuus, & Patena*. Calix vacuus idem ille profecto erat, cum quo dicta fuit coram Cardinalibus Missa, uti recitato superius loco non obscure innuit laudatus Burchardus, ut in ipsius scilicet Calicem Cardinales schedulas suas immittant, quibus aliquem in Pontificem volunt eligere. Videtur plane introductus hic ritus Seculo xv. ejusque expressa sit mentio Lib. I. Commentariorum Pii II. qui electus Pontifex fuit anno mcdlviii. *Sequenti die, inquit, itum est de more ad rem Divinam; qua peracta, scrutinium incepere. Calix aureus in Ara positus est; & tres Cardinales eum observare, Ruthenus Episcopus, Rotho-*

magensis Presbyter, & Columnensis Diaconus, nequa fraus intercederet; reliqui Cardinales in suis locis confederunt, & surgentes ex ordine dignitatis, ac senii accedentes ad Altare, schedulas in Calicem mittebant, in quibus nomina eorum scripta erant, quos ad Pontificatum eligebant. Cumque hoc omnes fecissent, mensa in medio Aedis posita est, & tres Cardinales memorati supra eam schedularum Calicem everterunt, schedulasque legentes singulas, alta voce nomina eorum annotaverunt, qui erant in illis conscripti. Ex ms. Diario Paridis Grassi, ubi enarratur Conclave Sedis vacantis post Julii II. Papæ obitum, die xi. mensis Martii anni MDXIII. Prior Episcoporum, idest Cardinalis Decanus, *volutum prius Calicem portavit ad mensam*. Deinde vero, ut ibidem legitur, *Cardinales portaverunt cedulas suas ad Calicem super Altari positum*.

III. Una cum Calice adhibitam vel olim fuisse & Patenam desuper positam, addiscere licet ex recitato superius testimonio Burchardi. Sed audiamus quid de ipso ritu delationis schedulæ in Calicem, & usu Patenæ præscribat Cæremoniale jussu Gregorii XV. Papæ editum: *Quilibet Cardinalis, inquit, propriam schedulam, postquam illam scripserit, obsignaverit, & complicaverit, duobus primis digitis sumet, ac elevata manu palam deferet ad Altare, penes quodstant Scrutatores, & in quo est Calix magnus ad recipiendas schedulas paratus, & Patena coopertus, ibique genuflectens aliquantulum orabit; deinde surgens, alta, & intelligibili voce jurabit in hanc formam, quæ in tabella super Altari posita descripta habetur: Testor Christum Dominum, qui me judicaturus est, me eligere, quem secundum Deum judico eligi debere, & quod idem in accessu præstabo: Post hæc schedulam in Patenam ponet, & per Patenam mittet in Calicem; quo facto, inclinabit se ad Altare, & ad suum locum revertetur*. Hæc servanda ait, ubi Cardinalis ad Altare pergere possit, nam si ob infirmam valetudinem non possit, & præsens in Capella sit, ultimus Scrutator discum cum schedulis ad eum deferet, ex quo Cardinalis infirmus unam accipiens, eam in loco suo secrete conficiet, deinde prævio juramento prædicto, schedulam obsignatam, & complicatam eidem Scrutatori tradet, qui eam palam de-

(1) Ita in ipsa Veneta 1. editione, in editione autem Romana legitur, *futuri*.

deferet ad Altare, & sine oratione, & juramento in Patenam ponet, & per eam in Calicem mittet, in magnum scilicet Calicem illum, qui uti dictum est, in Altari ad recipiendas schedulas paratus extat. Ceterum in citato Gregorii XV. Cæremoniali & alterius Calicis mentio fit, cum nempe facta depositione schedularum seorsum, quæ est postremus Scrutiniæ actus, per ultimum Scrutatorem, & finita insertione schedularum in filum, idem Scrutator capita fili nodo jungit, & schedulas omnes ita colligatas in alium Calicem vacuum, vel in mensa seorsum ponit.

IV. Præterea ut ait noster §. *Sacrista, familiares Cardinalium, & omnes alii, qui in Conclavi reperiuntur, in Capella majori, ubi cellulae sunt, clauduntur; soli Clerici Cæremoniarum solent extra portam Capellæ parvæ ubi Patres clausi de electione tractant, expectare, præsto venturi, si a Patribus pro aliqua re vocarentur*. Sed audiamus Joannem Burchardum, morem suo tempore servari solitum ita enarrantem in memorato suo Cæremoniali Sedis vacantis post Sixti Papæ IV. obitum §. ci. *Dum scrutinium fieret, finita Missa, ac scabellis pro Cardinalibus cum folio papyri, penna, sive calamo, & in claustris, ac candelis parvis duabus, aut tribus ordinatis, omnes redibant ad Capellam majorem, in qua recludebantur per nos Clericos Cæremoniarum, omnes, Cardinalibus in Congregatione existentibus. Additque mox: Ego ostium primæ aulae custodiebam, ita quod inter aulam tertiam, in qua Congregationes fiebant, & me erat secunda aula media, & dum me vocare volebant, campanellam pulsabat unus. Similia his docent alii Apostolici Cæremoniarum, quorum loca recensere hic opus non est.*

V. Tandem juxta præscriptum nostri hujus §. audita a Cardinalibus Missa, de qua dictum & superius fuit, cum omnes ordine suo confederint, Prior Episcoporum in loco prædicto sedens, commodis verbis hortatur Patres ad providendum Sanctæ Romanæ Ecclesiæ de Viro idoneo & sufficienti, & qui tantum onus utiliter ferre queat. Deinde proponit eis, per quam viam electionis procedere placeat &c. Refert triplicem formam eligendi Papam a prædictis æque, atque a recentioribus Pontificibus probatam, novissime autem a Gregorio XV. uti jam notavimus Tomo III. Conciliorum in Commentario ad Canonem I. Concilii III. Lateranensis, Num. xxxix. Triplex autem

forma est per Scrutinium, per Compromissum, per Inspirationem, quæ omnia egregie nos docet Concilium Generale IV. Lateranense, fuseque explicant Romani antiqui Ordines xiii. & xiv. apud Mabillonium Tom. II. Musei Italici, ex quorum altero multa Patricius huic Cæremoniali inseruit, ac præsertim Compromissi formam, quæ, ut inquit Romanus ipse Ordo xiv. Auctore Jacobo Gajetano, Cap. I. *servari consuevit per Dominos Cardinales, quando insistant super electione Summi Pontificis, & eligunt per viam procedere Compromissi*. Sed de hac forma sequentes nos ordinem nostri Cæremonialis, dicemus inferius in Commentario ad §. sequentem inscriptum, *De electione per viam Compromissi*.

VI. Per Inspirationem, sive per viam Spiritus Sancti, ut ait hic noster §. fit electio, si forte aliquis Patrum diceret in hanc sententiam: Reverendissimi Domini, perspecta singulari virtute, probitate &c. Reverendissimi Domini N. ego judicarem sine alio processu ipsum eligendum ad Summum Pontificatum, & ex nunc ego eligo ipsum in Summum Pontificem Sanctæ Romanæ Ecclesiæ; Si alii, vel saltem duæ partes ipsius sententiam sequerentur, & viva voce simili modo illum talem eligerent, ille esset Canonice electus & verus Papa; & vocatur per viam Spiritus Sancti talis electio sine cedulis, aut Compromisso; sæpeque apud Majores nostros fuit celebrata hac via. Hactenus noster §. ex quo docemur, electionem hujusmodi fieri quidem, cum repente nullo inter eligentes ordine servato, sed unus post alium per revelationem divinam continuo aliquem eligunt, uti in electione S. Fabiani Papæ contigit, qui subrogatus est in locum S. Anteri die xi. Januarii anni cxxxvi. cum enim Clerus & populus convenissent pro faciendâ electione, columba e sublimi evolans ejus capiti insedit, & Romanum Pontificem designavit, ut tradit Eusebius Lib. vi. *Historiæ Ecclesiasticæ*, Cap. xxix. Per Inspirationem quoque, seu per adorationem fit electio, cum Cardinalium duæ partes, nullo facto Scrutinio, omnium consensu, & voluntate, aliquem in Romanum Pontificem adorant, & salutant, atque ita electi inter alios fuere Clemens VII. anno MDXXXIII. Paulus III. anno MDXXXIV. Julius III. anno MDL. Marcellus II. anno MDLIX. Pius IV. anno MDLIX. & ut alios omittam, Pius V. anno MDLXI.

§. XXXI.

De electione per viam Compromissi.

Si Dominis Cardinalibus placuerit procedere per viam Compromissi, oportet, quod omnes concordent ad compromittendum, aliter vero non tenet; nisi forte duæ partes tandiu in sententia permanerent, quoad Compromissarii electum nominarent, illumque compromittentes comprobarent; tuncque ut electus a duabus partibus esset Canonice electus. Forma autem talis Compromissi est hujusmodi; *In Nomine Domini, Amen. Anno ejusdem &c. & die &c. Nos Episcopi, Presbyteri, & Diaconi Sanctæ Romanæ Ecclesiæ Cardinales, omnes, & singuli in Consistorio existentes, videlicet T. Ostiensis, D. Portuensis, & sigillatim omnes alii nominentur, Cardinales de electione tractantes Summi Pontificis; elegimus, & eligimus per viam procedere Compromissi; & unanimiter, & concorditer, nemine discrepante, elegimus Compromissarios Reverendissimos Patres Dominos T. Episcopum &c. A. Tituli S. N. Presbyterum, & L. S. Hadriani Diaconum Cardinales, quibus damus plenariam facultatem, & potestatem providendi Sanctæ Romanæ Ecclesiæ de Pastore sub hac forma, videlicet, quod duo ex ipsis possint eli-*

eligere tertium de seipsis, & omnes tres concorditer de Collegio, vel extra possint Romana, & universali Ecclesiæ providere, & volumus, quod dicta potestas duret usque ad consumptionem candelæ inibi ex consensu singulorum accensæ, & promittimus, nos illum pro Romano Pontifice habituros, quem dicti Compromissarii in forma prædicta duxerint eligendum &c. Compromissarii vero ad partem in aliquo loco separato se retrahant, & primum inter se protestentur, quod per quamcunque prolationem verborum, non intelligunt dare consensum suum, nisi in scriptis illum expresse ponant, ut inter se possint uti verbis humanis, & reverentialibus sine præjudicio.

COMMENTARIUS.

Idem quod hic noster §. præscribit de modo, qui servari consuevit per Cardinales, quando insistent super electione Summi Pontificis, & eligunt per viam procedere Compromissi, legere plane est in antiquo Romano Ordine xiv. Cap. i. ubi etiam formula ipsi Compromissi in hoc nostro §. descripta, iisdem fere verbis legitur. Fit autem per Compromissum electio, quando aliqui Cardinales eliguntur, in quos omnium vice eligendi potestas transfunditur cum certis clausulis, & conditionibus in ipso Compromisso explicatis; eaque forma electi sunt Gregorius X. anno mclxxi. & Clemens V. anno mcccv. uti videre est apud Spondanum, Raynaldum, Ciaconium, aliosque Scriptores, inter quos Pagius in Vita ipsius Gregorii Num. vi. hæc habet: *Cardinales tandem, qui jam tribus ferme annis inter se dissidentes fuerant, sive timore Dei, sive pudore sui, seu Principum,*

aliorumque omnis generis hominum continuis hortationibus, precibus, querelis, forte & minis commoniti, seu, ut quidam ajunt, diminutione alimentorum coacti, per viam Compromissi in sex Cardinales facti, suadente maxime S. Bonaventura Ordinis Minorum Generali Ministro, ut scribunt Panvinus, Ciaconius, & Severinus Binius in Gregorio X. Kalendis Septembris anni millesimi ducentissimi septuagesimi primi in Pontificem Maximum renunciarunt Thealdum Vicecomitem Placentinum, Archidiaconum Leodiensem, Virum sanctum, & religiosum extra Collegium Cardinalium, & absentem &c. Electum etiam post longum Interpontificium fuisse a Cardinalibus per Compromissum Clementem V. tunc absentem, & ipsum quoque extra Cardinalium Collegium, post alios Scriptores idem Pagius narrat in Vita ejusdem Pontificis Clementis V. Num. i. & seqq.

§. XXXII.

De electione per viam Scrutinii:

Alius modus est, & magis tritus, procedendi per viam Scrutinii, qui si magis placet, primo deliberandum est, an post Scrutinium eadem die sit attendenda via per Accessum. Deinde omnibus in locis suis in Capella confedentibus, Prior Episcoporum cum cedula sua in manu accedit ad Altare, & genuflexus aliquantulum orat, tum surgit, & cedulam prædictam, quam primo osculatur, in Calice reponit, priore Diaconorum a sinistra parte Altaris, ubi Epistola legitur, stante, & Patenam manu sua elevante. Has cedulas, quæ vota eorum continent, scribere solent Reverendissimi Domini ad partem, quomodo eis placet in hanc formam: *Ego A. Episcopus Ostiensis &c. Cardinalis &c. eligo in Summum Pontificem, Reverendissimum Dominum meum D. S. Tituli Sancti Marci Presbyterum Cardinalem;* & eodem modo quisque nominare potest duos, aut plures de Collegio in eadem cedula, & aliquem extra Collegium a tergo ipsius cedulæ. Cedulam ipsam bene plicatam sigillo suo annulari signat; &, ut diximus, facta prius oratione, illam deosculatam quisque in Calicem ponit. Ut autem Prior Episcoporum cedulam in Calice posuit, accedit ad dextrum cornu Altaris, & ibi cum Priore Diaconorum Patenam elevat, dum Patres votorum cedulas Calici (1) immittunt. Qui ordine suo omnes sigillatim Episcopi, Presbyteri, & Diaconi, eodem modo, ut de Priore Episcoporum diximus, cedulas in Calicem mittunt. Cedulis in Calice depositis, sedent Patres, & quisque ante se scabellum habet cum papyro, & pugillaribus. In papyro scripta sunt per ordinem Patrum omnium præsentium nomina cum aliqua distantia, itaut unum tantum nomen in quolibet versu contineatur, in hunc ferme modum: *Reverendissimus Dominus Nicenus habet. Reverendissimus Dominus Rothomagensis habet;* & sic de singulis. Et scribuntur nomina, quibus communiter appellantur, propter brevitatem, & non nomina Titulorum. Tum Prior Episcoporum Calice de Altari simul cum Diaconorum Priore sumens, illum super mensam prædictam imponit; deinde & ipse, & Diaconus sedent a dextris, Priore Presbyterorum sedente, ut prædiximus. Prior deinde Episcoporum sedens Calicem manu dextra capiens,

(1) Ita in Romana editione, in Venetæ vero i. & Colonienfi editione legitur: *imponunt.*

piens, ac sinistra Patenam firmam retinens, Calicem ipsum super Patenam (1) invertit; ita tamen ut nihil effundat, & iterum Calicem erigens super mensam, ut prius erat, illum constituit; tum sinistra aliquantulum Patenam elevans, dextra cedula unam, quæ sorte ad manus venit, palam digitis duobus extrahit; illamque primo Priori Presbyterorum ostendens, legendam porrigit Diaconorum Priori, qui eam mox aperit, & voce, qua ab omnibus exaudiri possit, distincte legit: *Ego N. Cardinalis Papiensis eligo in Summum Pontificem, Reverendissimum Dominum meum D. B. Tituli Sanctæ Sabine Presbyterum Cardinalem &c.* ut ibi scriptum invenit. Cardinales omnes, tam ipsi tres priores, quam alii super nomina in cedula nominatorum, eligentium nomina scribunt in papyris suis, vel signum aliquod faciunt, omnibus cedulis perlectis, & votis eligentium descriptis. Tres priores vota computant, & alta voce habentes plures voces Diaconus nominat dicendo: *Reverendissimus D. A. habet voces decem; & Reverendissimus V. habet voces octo; & Reverendissimus D. habet voces septem.* Deinde, si non potest attentari via per Accessum, & voces non sufficiunt, re infecta Patres discedunt; neque per totum diem aliud agi potest circa actum electionis, quia non fit bis in die Scrutinium. Sequenti die iterum summo mane in Capella conveniunt, & re Divina peracta, Scrutinium, ut die præterita, faciunt; cedulas in Calicem mittunt, quæ a prioribus extrahuntur, leguntur, & computantur, ut supra.

COMMENTARIUS.

I. **T**ertius tandem modus eligendi est, & magis tritus, ut docet hic noster §. procedendi per viam Scrutini, de quo jam longe hoc nostrum Cæremoniale fuisse egit Romanus Ordo XIV. Auctore Jacobo Gajetano, Cap. III. & sequenti. Sed attendenda hodie sunt, quæ in sua celebri Constitutione statuit Gregorius XV. & Cæremoniale jussu illius editum, quod idcirco Gregorianum appellabimus, continens ritus electionis Romani Pontificis. Ergo, uti ipsum Cæremoniale nos docet, tertius modus, seu forma electionis Romani Pontificis est, quæ vocatur *per Scrutinium, vel per Scrutinium, & Accessum*, cujus formæ ritus secundum memorati Gregorii XV. Papæ Constitutionem, quæ vult non solum Scrutinium fieri feretum, sed etiam Accessum, continet tres actiones, alteram, quæ *Antescrutinium*, alteram quæ *Scrutinium*, & tertiam, quæ *Postscrutinium* appellari potest. Antescrutini actus sunt quinque, videlicet, præparatio schedularum Scrutini, & Accessus, Extractio Scrutatorum, & Deputatorum pro votis infirmorum per sortem, scriptio schedularum Scrutini, earumque complicatio, & ob-signatio.

II. Scedularum præparatio ad Magistros Cæremoniarum pertinet, qui eas impressas, ubi fieri poterit, alioquin unius manu scriptas secundum formam in ipso Gregoriano Cæremoniali descriptam accipient tam pro Scrutinio, quam pro Accessu, & ponent in duobus discis, vulgo *bacili* nuncupatis, quos in mensa ante Altare collocabunt, ut inde possint Cardinales, cum opus fuerit, schedulas sumere. Forma autem schedulæ Scrutini, quod ejus figuram attinet, erit altera parte longior, hoc est plus longa, quam lata; longitudo ejus erit fere unius palmi, latitudo autem dimidii palmi. Quo vero ad contenta in ea, in anteriori ejus parte, quæ brevitatæ gratia facies nominari potest, tria continere debet; primo in superiori parte secundum ejus latitudinem duo hæc verba: *Ego Cardinalis*, cum tanta ab invicem distantia, ut inter ipsa nomen proprium Cardinalis eligentis scribi possit, & paulo infe-

To.I.

rius duos circulos parvos ad loca sigillorum indicanda. Secundo in medio continere debet hæc verba: *Eligo in Summum Pontificem, Reverendissimum D. meum D. Cardinalem.* Tertio in parte inferiori alios duos parvos circulos ad loca sigillorum similiter demonstranda. Forma vero schedulæ Accessus eadem prorsus est quam Scrutini; nisi quod in medio ejus, loco verborum, *Eligo in Summum Pontificem Reverendissimum D. meum D. Cardinalem*, ponuntur hæc verba: *Accedo Reverendissimo D. meo D. Cardinali.*

III. In exteriori autem parte scedularum tam Scrutini, quam Accessus, quæ tergum nominari potest, duo sunt imprimendi limbi ex illis quos ad orpatum Librorum impressores adhibent, & vulgari vocabulo *fregi* nuncupant; quorum primus circa sui medium continet hoc verbum, *Nomen*, impressum secundum longitudinem ipsius limbi; alter continet hocce verbum, *signa*, similiter impressum, ut præcedens. Hi autem limbi excogitati sunt ad obscurandum diaphanum paginarum, ne scilicet ad lumen nomina, & signa eligentium conspici possint; ubi vero impressoris copia adfuerit, limborum defectus lineis suppleri poterit.

IV. Secundus actus Antescrutini est extractio Scrutatorum, & Deputatorum pro votis infirmorum, quæ extractio antequam ad Scrutinium procedatur, sorte facienda est, hoc modo. In uno facculo, aut vase publice ponantur tot schedæ, vel, si magis placet, spherulæ ligneæ palam numeratæ, quot sunt Cardinales præsentés in Conclavi cum eorum nominibus: deinde per ultimum Diaconum extrahuntur primo Scrutatores tres, & postea tres Deputati pro votis infirmorum, qui brevitatæ gratia *Infirmarii* appellari possunt, de quorum omnium Officio infra suo loco scribetur. Quod si in extractione Scrutatorum, & Infirriorum, ac etiam Recognitorum, de quibus etiam suo loco dicetur, extracti fuerint Cardinales, qui ob infirmitatem, aliudve impedimentum muneribus prædictis satisfacere non possint, alii non impediti loco illorum extrahantur. Peracta vero extractione, schedæ, seu spherulæ

I

rulæ

(1) Ita in editione Romana, at vero in Veneta, *immittit*.

ruæ eorum, qui extracti fuerunt, in sacculum, seu in vas iterum conijciantur.

V. Tertius actus Antescrutinii est schedularum Scrutinii scriptio, quæ fiet hoc modo. Ad duas, vel plures parvas mensas, quæ erunt cum atramento, & calamis paratæ in loco Capellæ apto, ut qui scribunt, conspici possint; quid vero scribitur, non possit; accedent Cardinales per ordinem, incipiendo a Decano, & ibi sedentes in scabellis paratis schedulam quisque suam acceptam prius ex disco, scribet hoc modo. Primo in prima parte in spatio inter verba, *Ego Cardinalis*, scribet proprium nomen; deinde in secunda parte nomen illius, quem eligit, caractere tamen, quantum fieri potest, alterato, ut manus scribentis cognosci non possit, & caveat, ne plures in schedula scribat, quia suffragium juxta Gregorianam Constitutionem, idest Gregorii Pape XV, esset nullum; in tertia vero parte, signa, hoc est, numerum aliquem, & dictum aliquod Scripturæ, seu verbum, aut aliud hujusmodi.

VI. Quartus actus Antescrutinii est schedularum complicatio, quæ ut expeditius peragi a Cardinalibus valeat, poterit a Cæremoniariis Magistris, cum eas præparant, fieri in hunc qui sequitur modum. Binæ fient plicaturæ ex utraque parte cujusque schedulæ ita ut nomen eligentis, & signa, cum fuerint scripta, maneant testæ ex utraque parte a limbis; deinde quod reliquum est ita complicitur, ut schedula fere ad latitudinem pollicis redigatur; prout ex complicata schedula, quæ in ipso Gregoriano Cæremoniali ponitur, conspici potest. Cæterum Magistri Cæremoniarum schedulas non complicatas, ut supra, sed explicatas, & cum cera rubra in parvis circulis, ponent in discis; & Cardinales postquam eas, ut supra, scripserint, eo usque solum plicabunt, quo nomen, & signa eligentis tegantur; reliquas autem plicaturas tunc facient, cum schedulas, ut infra dicetur, obsignaverint.

VII. Quintus & postremus actus Antescrutinii est schedularum obsignatio, quæ ab unoquoque Cardinalium facienda erit in tergo schedularum cum sigillo ad hoc parato in loco parvorum circulorum, ubi cera fuerit posita. Porro sigillum non debet esse solitum Cardinalis, sed aliud, & secrete habitum, & ita simplex, ut facile notari possit, veluti si in sigillo sculpantur, aut tres numeri, aut tres literæ, & numeri, vel una tantum imago. Et hæc de Antescrutinio sufficiant. Ceterum quod attinet ad Cardinales infirmos, aut aliter impeditos, inferius suo loco dicetur.

VIII. Sequitur secunda actio, quæ nomine Scrutinii appellata fuit. Ocho sunt hujus actionis actus, videlicet delatio schedulæ, juramenti præstatio, positio schedulæ in Calicem, schedularum mixtio, numeratio illarum, Scrutinii publicatio, Schedularum in filum insertio, & illarum depositio seorsum. Delatio schedulæ, & duo sequentes actus, qui melius simul describuntur ob eorum connexitatem, hoc modo fient. Quilibet Cardinalis propriam schedulam postquam illam scripserit, obsignaverit, & complicaverit, duobus primis digitis sumet, ac elevata manu palam deferet ad Altare, penes quod stant Scrutatores, & in quo est Calix magnus ad accipiendas schedulas paratus, & Patena coopertus, ibique genuflectens aliquantulum orabit; deinde surgens alta, & intelligibili voce jurabit in hanc formam, quæ in tabella super Altari posita descripta habetur:

Testor Christum Dominum, qui me judicaturus est, me eligere, quem secundum Deum judico, eligi debere, & quod idem in Accessu præstabo. Post hæc schedulam in Patenam ponet, & per Patenam mittet in Calicem; quo facto inclinabit se ad Altare, & ad suum locum revertetur. Et hæc servanda erunt, si Cardinalis ad Altare pergere possit, nam si ob infirmam valetudinem non possit, & præsens in Capella sit, ultimus Scrutator discum cum schedulis ad eum deferet, ex quo Cardinalis infirmus unam accipiens, eam in loco suo secrete, ut supra dictum est, conficiet; deinde prævio juramento prædicto, schedulam obsignatam & complicatam eidem Scrutatori tradet, qui eam palam deferet ad Altare, & sine oratione, & juramento in Patenam ponet, & per eam in Calicem mittet; quæ omnia observanda erunt per ultimum Scrutatorem erga eos Cardinales, qui in Capella præsentem, ob valetudinem ad Altare pergere non poterunt.

IX. Si vero aliqui Cardinales infirmi sint in suis cellis, tres Cardinales Infirmarii, ut supra extracti, ad eos accedent cum capsula altitudinis unius palmi, in cujus superiori parte sit rima, seu foramen ejus magnitudinis, ut per illud schedula complicata possit per suam latitudinem intus capsulam transmitti; quam capsulam, antequam Scrutatores Infirmariis tradant, palam aperient, ut ceteri Cardinales possint eam inanem, & vacuam conspiciere; deinde claudent, & clavem ponent super Altare; deinde Infirmarii cum capsula clausa, & cum parvo disco tot schedulas continente, quot sunt infirmi Cardinales, ad unumquemque eorum accedent, & infirmi acceptas ex disco schedulas, secrete scribent, obsignabunt, & complicabunt, & prævio jam dicto juramento, in capsulam per rimam mittent: quod si infirmi scribere non possint, alii eorum arbitrio deligendi, præstito de secrete servando in manibus Infirmariorum juramento, prædicta facient; atque hi advertere debent, quod non solum juramenti vinculo tenentur servare secretum, sed etiam in excommunicationem latæ sententiæ, si contrafecerint, incurrant. His peractis, Infirmarii ad Capellam revertentur cum capsula, quam Scrutatores aperient, & schedulas in ea contentas palam numerabunt, & tot repertas, quot sunt infirmi, ponent singillatim in Patenam, & per Patenam simul omnes in Calicem. Ne autem nimis in longum protrahatur Scrutinii actio, Infirmarii poterunt proprias schedulas post Decanum conficere, & in Calicem ponere; deinde dum ceteri Cardinales Scrutinium agunt, ad infirmos pergere, ad accipienda eorum suffragia eo modo, quo proxime ante dictum est.

X. Quartus actus Scrutinii est schedularum permixtio, quæ fiet per primum Scrutatorem, Calice, in quo ipsæ schedulæ positæ fuerunt, Patena cooperto, pluries agitato.

XI. Quintus actus est numeratio schedularum, quæ palam fiet per ultimum Scrutatorem capiendo singillatim unamquamque schedulam ex Calice, eamque ponendo in alium, qui ad hoc paratus sit, Calicem vacuum. Quod si numerus schedularum non respondeat numero Cardinalium, omnes comburendæ sunt; & iterum, idest secunda vice, ad suffragia statim est deveniendum; si vero numerus schedularum numero Cardinalium respondeat, prosequendi sunt alii actus Scrutinii.

XII. Se-

XII. Sextus actus est publicatio Scrutini, quæ fit per Scrutatores, qui sedent ad mensam ante Altare positam, fiet hoc modo. Primus Scrutator accipiet unam schedulam, eamque intactis figillis explicabit, & viso in ea schedula electi nomine, eam tradet secundo Scrutatori, qui pariter eodem electi nomine perspecto, eandem tradet tertio, qui illam alta, & intelligibili voce perleget, ut omnes Cardinales præsentis notare possint suffragium in folio impresso, quod penes se habebunt cum nominibus omnium Cardinalium; notabit autem juxta nomen Cardinalis ex schedula recitati. Idem faciendum erit de ceteris schedulis in Calice positis usque ad ultimam. Quod si in Scrutini publicatione inveniant Scrutatores duas schedulas ita complicatas, ut ab uno tantum datas fuisse appareat, si quidem unus, & idem in utraque electus fuerit, schedulæ prædictæ habebuntur, & notabuntur pro uno suffragio; si vero diversi fuerint nominati, neutrum suffragium validum erit, prout in Bulla Gregoriana statuitur de illa schedula, in qua plures nominati sunt. Scrutinium tamen neutro casu vitatur. Ceterum suffragia prædicta, finita Scrutini publicatione, poterunt a Patribus juxta nomina Cardinalium, qui ea obtinuerunt, in unam summam redigi, vel in separato folio notari hoc modo: *Reverendissimus D. Cardinalis A. habet suffragia xx. & Reverendissimus D. Cardinalis B. habet suffragia xv. & sic de aliis; quod fit, ne Cardinales, cum opus est, cogantur semper numerare suffragia, quæ juxta nomina Cardinalium notarunt.*

XIII. Septimus actus Scrutini est schedularum in filum insertio, quæ, ut schedulæ ipsæ cautius conservari possint, excogitata fuit. Hæc autem insertio fiet per ultimum Scrutatorem, inserendo schedulam unamquamque, postquam eam perlegerit, acu cum filo ad hunc effectum parato in loco, ubi est verbum, *Eligo*.

XIV. Octavus, & postremus Scrutini actus est depositio schedularum seorsum, quæ similiter fiet per ultimum Scrutatorem, qui finita insertionem omnium schedularum in filum, capita fili nodo junget, & schedulas omnes ita colligatas in alium Calicem vacuum, vel in mensam seorsum ponet.

XV. Sequitur tertia, atque postrema actio, quæ *Postscrutinium* appellata fuit, cujus actus, si sequuta sit electio per Scrutinium, tres tantum sunt, videlicet numeratio schedularum, recognitio suffragiorum, & schedularum combustio, de quibus inferius suis locis dicetur. Si vero per Scrutinium non sit sequuta electio, actus sunt septem, videlicet, Accessus, sigillorum, atque signorum apertio, eorum annotatio, suffragiorum examen, suffragiorum Scrutini, vel Scrutini & Accessus numeratio, eorum recognitio, & schedularum combustio.

XVI. Primus itaque actus est Accessus, qui immediate post Scrutinium, hoc est, post depositas seorsum Scrutini schedulas fiet, nisi forte in Scrutinio fuerit creatus Papa, tunc enim nullus fieri debet Accessus; in quo quidem Accessu eadem omnia servanda sunt a Cardinalibus, quæ dicta sunt servari debere in Scrutinio peragendo tam in schedularum scriptione, obsignatione, complicatione, delatione, & positione in Calicem, quam in earum numeratione, publicatione, notatione suffragiorum, & insertionem in

To.I.

filum, ac depositione seorsum, exceptis tamen infrascriptis. Primo quod Cardinales schedulas pro Accessu sumere debent ex disco schedularum Accessus. Secundo in schedularum Accessus scriptione, si Cardinalis nemini velit accedere, debet in media schedulæ parte, loco nominis Cardinalis, qui scribendus esset, si ad eum fieret Accessus, scribere, *Nemini*; schedula autem Accessus scribi, & obsignari debet cum eisdem figillis, & signis schedulæ Scrutini sub pœna nullitatis suffragii ipsius Accessus. Tertio, quod non potest Accessus fieri ad eum Cardinalem, qui in Scrutinio saltem unum suffragium non obtinuerit, neque ad eum, qui ab ipso met Cardinale fuit in Scrutinio nominatus. Quarto, quamvis in Accessu non liceat plures nominare, sicut non licet in Scrutinio plures eligere, sub pœna nullitatis suffragii tam in Accessu, quam in Scrutinio; nihilominus licebit accedere uni ex pluribus nulliter a se nominatis in Scrutinio, dummodo ei ab alio aliquod suffragium, non tamen nulliter, ut præfertur, in ipso Scrutinio datum fuerit. Quinto, quod in Accessu non præstatur juramentum, de quo supra, quia in Scrutinio fuit jam præstitum per illa verba, *Et quod idem in Accessu præstabo*. Sexto denique Infirmarii deferre debent ad infirmos schedulas Accessus, & simul etiam unum folium impressum, in quo sit notatus suffragiorum numerus palam recognitus, quæ quisque Cardinalis in Scrutinio nominatus obtinuerit.

XVII. Secundus, tertius, & quartus actus Postscrutini, sunt sigillorum, & signorum apertio, eorum annotatio, & suffragiorum examen, qui tunc solum locum habere possunt, quando sequuta est electio per Scrutinium, & Accessum. Fieri autem debent hoc modo. Primus Scrutator schedulas Accessuum, quos obtinuit electus, in ea parte solum, quæ signa continet, aperiet, & inspectis diligenter earum sigillis, & signis, apertas, ac in filo, ut erant, insertas tradet secundo Scrutatori, & secundus eadem inspectione facta, porriget tertio, qui alta, & intelligibili voce sigilla, & signa prædictarum schedularum enunciabit, & annotabit in latere sinistro folii impressi ad hunc effectum parati sub verbis, *Sigilla, & signa Accessuum*; quam etiam annotationem facient ceteri Cardinales, si voluerint, in simili folio impresso. Deinde primus Scrutator, reliquis Scrutatoribus inspicientibus, pro Accessuum prædictorum examine capiet schedulas Scrutini, & incipiens ab uno capite fili, in quo insertæ sunt, sigillum primæ ejus schedulæ quæret in sigillis Accessuum notatis, ut supra in folio impresso; & si illud in eo non invenerit, omitta prima Scrutini schedula, capiet secundam, ejusque sigillum similiter quæret; quod si etiam non invenerit, capiet tertiam, & deinde sequentes singillatim, donec sigillum alicujus earum inveniet, eoque invento, Scrutini schedulam in ea parte, ubi signa sunt, aperiet; & si non invenerit, signa hujus schedulæ concordare cum signis Accessus, schedulam illam omittet, & aliam capiet, sicut paulo ante de schedulis non concordantibus in sigillo dictum est; si vero invenerit, signa concordare, ostendet illa secundo, & tertio Scrutatoribus, qui una cum ipsis post diligens examen super identitate sigillorum, & signorum ambarum schedularum, Scrutini scilicet, & Accessus, in-

I 2

spiciet,

spiciet, an idem, vel diversi in utraque schedula sint nominati; & si idem nominatus sit, suffragium Accessus nullum censebitur; si vero diversi nominati sint, suffragium Accessus pro valido habebitur; & hoc casu tertius Scrutator sigillum, & signa schedulæ Scrutini, ac etiam nomen electi, qui in ea continetur, alta & intelligibili voce enunciabit, & annotabit in late-

Exemplum folii impressi, in quo Accessus, & Scrutini, Sigilla, & Signa

concordantia annotantur.

<i>Sigilla, ac Signa Accessuum.</i>	<i>Sigilla, & Signa Scrutini Accessibus respondentia,</i>	<i>Cardinales nominati in Scrutinio,</i>
ACD. 43. Deus. BRF. 32. Bonitas. RGI. 50. Beatitudo, NSP. 26. Gloria.	BRF. Bonitas, RGI. Beatitudo.	Cardinalis S. Eusebii. Cardinalis S. Sixti.

XVIII. Quod si fortasse in ista inquisitione contingat, duas, vel plures schedulas Scrutini reperiri cum eisdem Sigillis, & signis alicujus schedulæ Accessus, tunc si in earum aliqua electus nominatus fuerit, in alia vero alius, primus Scrutator, reliquis Scrutatoribus similiter insipientibus, Scrutini schedulas hujusmodi, & schedulam Accessus in ea etiam parte, in qua est nomen eligentis, & accedentis, aperlet, ut constare possit secundum Gregorianam Constitutionem de validitate, vel invalidate Accessus; si vero in aliqua hujusmodi schedularum Scrutini concordantium cum Accessu non sit nominatus electus, debent eæ schedulæ omitti, & ad subsequentes procedendum erit.

XIX. Quintus actus Postscrutini est numeratio suffragiorum vel Scrutini folius, vel Scrutini & Accessus, quæ fiet per Scrutatores semper, si secuta sit electio, si non; & si quidem secuta non sit electio, ut sciatur, quod in eo Scrutinio, vel Scrutinio, atque Accessu non habetur Papa; si vero secuta sit, ut constet de Canonica Pontificis electione. Fiet autem hæc numeratio suffragiorum hoc modo. Scrutatores in unam summam redigent suffragia, quæ quilibet nominatus in Pontificem obtinuit, si in Scrutinio solo, si in Scrutinio, atque Accessu simul; & si invenerint, nullum ex nominatis ad duas tertias partes suffragiorum pervenisse, non habetur Papa in illo Scrutinio, si in Scrutinio & Accessu. Si vero invenerint, aliquem ex nominatis duas tantum partes suffragiorum obtinuisse, aperient electi schedulam etiam in ea parte, in qua est nomen eligentis; & si quidem ex ea apparuerit, electum alii suffragatum fuisse, electio ejus erit Canonica; si vero constiterit, sibi suffragium dedisse, ejus electio ex dispositione Gregorianæ Constitutionis nulla erit ob defectum unius suffragii. Si denique plures invenerint duas tertias partes suffragiorum obtinuisse, vel etiam ultra duas tertias, tunc in suffragio-

re dextero prædicti folii impressi, sub verbis, *Sigilla, & signa Scrutini respondentia Accessibus*; notabit autem ea ex adverso Accessus concordantis in sigillo, & signis; quam annotationem ceteri quoque Cardinales, si voluerint, in simili folio impresso facient. Sed hujusmodi actus, qui explicatione difficiliore sunt, quam operatione, exemplo melius percipiuntur,

rum paritate, nullus erit electus, in imparitate vero ille est Canonicus Papa, qui superat alium etiam in uno suffragio.

XX. Sextus actus Postscrutini est recognitio, quæ per Recognitores, si secuta sit electio, si non, fiet, inspicendo tam schedulas Scrutini, atque Accessus, quam suffragiorum annotationes factas per Scrutatores, ut per hujusmodi recognitionem constare possit, an Scrutatores sincere, & fideliter muneri suo satisfecerint. Recognitores autem extrahantur forte, ut Scrutatores, & Infirmarii, statim quidem post Scrutinium, si secuta sit in eo electio; si vero non sit secuta, post Scrutinium, & Accessum, cum scilicet Scrutatores suum impleverint munus per numerationem suffragiorum, & hæc extractio fiet, si secuta sit electio in Scrutinio & Accessu, si non.

XXI. Septimus & postremus actus Postscrutini est combustio omnium schedularum, quæ semper, & palam per Scrutatores fiet, ac statim post recognitionem, si electio sit secuta, si non. Et hæc omnia, quæ de Scrutini ritibus sunt exposita, servanda erunt diligenter a Cardinalibus in omnibus Scrutiniis, si fiant mane post Missam, si Vesperi post Hymnum, *Veni Creator Spiritus*. Atque hi sunt Ritus ex præscripto Constitutionis Gregorij XV. in electione Romani Pontificis observandi, quos ex Rituali ejusdem Papæ jussu editi ad verbum hucusque descripsimus; tum præsertim quod ipse Gregorius XV. motu proprio, ut ajunt, & ex certa scientia, ac de Apostolicæ potestatis plenitudine omnia, & singula in prædicto Cæremoniali ordinata, & quomodolibet contenta approbavit, confirmavitque, ac inter alia Cæremoniale hujusmodi in totum vel in parte mutari, vel ei aliquid addi prohibuit, ut plenius legere est in ejus Diplomate, quod incipit, *Decet Romanum Pontificem*, editum iv. Idus Martii anni MDCXXI, Pontificatus anno II.

§. XXXIII.

De Accessu, & quomodo fiat.

Deinde si duæ partes in cedulis non conveniunt, procedunt ad electionem per viam Accessus. Nam hoc pacto celerius ad finem electionis pervenitur, ad illos accedendo, quos in cedula non nominaverit; & potest fieri Accessus ad unum, vel plures, sicut & nominatio in cedulis; sed ex honestate, & decore juniores debent aliquantulum expectare quoad antiquiores Accessum incipiant. Illis vero diutius supersedentibus, qui-

quilibet potest incipere; surgit qui vult incipere, & dicit: *Ego accedo ad Reverendissimum Dominum meum talem*; & statim omnes signant super nomen electi nomen, accedentis; & simili modo & alii qui volunt, accedunt, & signantur. Si non concurrunt duæ partes, nihil factum est, & sequenti die ad Scrutinium revertuntur. Si autem voces sufficiunt, qui ultimus ex necessariis vocibus accedit, solet dicere: *Et ego accedo ad Reverendissimum Dominum meum talem, & facio eum Papam*. Et notandum est, quod si Accessus fieret ad plures imperceptibiliter, & inconfuse, ita ut duo haberent duas partes, nemini jus acquiritur, & pro infecto habetur. Legimus, superioribus temporibus, cum duæ partes in electione concordabant, priorem Diaconorum consuevisse induere electum Mantum Papale, dicendo: *Ego investi te de Papatu, ut præsis Urbi, & Orbi*. Sed hodie non servatur.

COMMENTARIUS.

I. **F**Use jam & de Scrutinio, & de Accessu agit antiquum Patricii Cæremoniale, quod nos explicamus. Inter alia autem nos docet, quod suo ævo ubi voces eligentium sufficerent, qui ultimus ex necessariis vocibus accederet, dicere solitus esset: *Et ego accedo ad Reverendissimum Dominum meum talem, & facio eum Papam*. Ita sane accidit in electione Æneæ Sylvii Senensis, qui fuit postea Pius II. Pontifex, electus xiv. Kalend. Septembris anni mcdlviii. Ut enim in ejusdem Commentariis legitur Lib. i. pag. 30. prope finem, cum una illi tantum vox deesset, duodecim siquidem tunc Pontificem efficiebant, id animadvertens Prosper Cardinalis Columnensis, eam sibi gloriam acquirendam putavit, ut Pontificem ipse pronunciaret; cumque esset Æneæ veteri benevolentia conjunctus, versus ad reliquos Cardinales, Et ego, inquit, Senensi accedo, eumque Papam facio: Quo audito, Cardinales universi nihil morati, ad pedes Æneæ se se projecerunt, eumque Pontificem salutarunt. Ita ille, sed addit mox etiam Patricius, superioribus temporibus, cum duæ partes in electione concordabant, priorem Diaconorum consuevisse induere electum Mantum Papale, dicendo, Ego investi te de Papatu, ut præsis Urbi, & Orbi. Sed hodie non servatur. Plane meminit hujus antiqui Ritus Romanus Ordo xiv. Auctore Jacobo Gajetano, Capite x. quod inscriptum est, De investitione Papatus fienda per Priorem Diaconorum Cardinalium post electionem in Papam electi. Tum vero paulo post initium ita ad rem inquit: Prior Diaconorum exiit eum Cappa, sive Cblamyde, qua utitur, & ponit ei, si non habet, Albam, Rochetum, Camisiam, & ornamentum ad modum Presbyteri super humeros, si est Presbyter, vel super levam partem, si est Diaconus, & non in Presbyterii Ordine constitutus, & postea ponit ei Mantum, & dicit, Investio te de Papatu Romano, ut præsis Urbi, & Orbi; & tradit ei etiam anulum, quo uti consueverunt Prædecessores ipsius, & ei Mitram competentem tempori super caput imponit &c. Ejusdem quoque ritus, & iisdem ferme verbis mentionem facit antiquum Romanum Jacobi Gajetani Ordinem Cæremoniale Romanum Gregorii X. Papæ jussu editum, ut videre est apud Mabillonium Tomo II. Musæi Italici, pag. 221.

II. Vetustum ejus ritus exemplum occurrit quidem in actis electionis Alexandri III. Papæ, qui creatus fuit Pontifex die vii. Septembris anni mclix. Octavianus siquidem Cardina-

lis Presbyter Tituli S. Cæcilie Alexandri æmulus, & post ejus electionem nominatus & ipse Pontifex a duobus dumtaxat Cardinalibus Presbyteris, Joanne Tituli S. Martini, & Guidone Tituli S. Callisti, statim conductos milites introduxit opera quorundam Senatorum, quos pecunia corruerat, & favore illorum, qui Frederico I. Imperatori adhærebant, Papale Mantum a collo Alexandri violenter abstulit, sed cum ab aliis ei ereptum esset, ipse aliud per Capellanum suum paratum sumit, dictusque est Victor IV. Huic pseudopontifici Fridericus additus Conciliabulum apud Papiam indixit anno MCLX. celebrandum, ubi probata electio Victoris fuit, quia scilicet inter alios præcipuos ejus electionis ritus, Mantum ei Papale fuerat impositum, ut ejusdem Papiensis Conciliabuli Acta testantur apud Frisingensem Lib. II. De rebus gestis Friderici I. Imperatoris, Cap. lxxvii. Sic autem illa inquit: Dominus Octavianus, & nemo alius Romæ in Ecclesia Beati Petri, petitione populi, & consensu, ac desiderio Cleri & Cardinalibus Mantum indutus est solemniter, & præfente Cancellario (ita appellant Alexandrum, qui in minoribus vocabatur Rolandus, eratque S. R. E. Cancellarius) & non contradicente, in Cathedra Beati Petri collocatus est, & a Cardinalibus, & Clero Romano, Te Deum laudamus, solemniter ei cantatum est, & nomen ei Victor impositum est. Ibi multitudo Cleri, & Populi Romani venit ad pedes ejus. Tunc Scriptarius secundum antiquam Romanorum consuetudinem ascendens in altum, voce magna clamavit ad Populum dicens: Audite Cives Romani, & cætus Reipublicæ, secunda Feria Pater noster Adrianus mortuus est, & proximo sequenti Sabbato Dominus Octavianus Cardinalis S. Cæcilie in Romanum Pontificem electus, & immanatus est. Placet vobis? Respondit magna voce Clerus, & Populus: Placet. Secunda, & tertia vice interrogatus Populus, si placeret, clara voce respondit: Placet. Deinde cum bandis, & aliis Papalibus insignibus Dominus Papa cum laudibus in Palatium deductus est.

III. Pluribus conantur Acta ipsa Conciliabuli Papiensis probare, legitimam fuisse electionem Victoris, longumque Abbatum, & Clericorum, atque Canonicorum Urbis catalogum recensent, qui Victori ipsi reverentiam, & obedientiam exhibuerunt; sed nullam tamen fuisse illius electionem, legitimam vero electionem Alexandri, diserte asserit S. Ailredus Monasterii Rievellensis in Agro Lincolnensi, & Provincia Cantuariensi

riensi siti Abbas hoc tempore vivens, qui in suo Sermone ccxxxī. Conciliabulum Papiense perstringens, inter alia processum enarrat utriusque electionis, & justitiam Alexandri Pontificatus ex ipsa narratione deducit, & inquit: *Ecce defuncto Hadriano legitimo Petri Successore, stat in Cardinalibus ceterorum Apostolorum legitima successio. Cogitate nunc constitutos in medio eorum Rolandum, & Octavianum, sic interim nominamus eos quasi in utero matris sue Ecclesiæ Romanæ jam laborantis in partu. Rogo Fratres mei, nonne partus iste similis est partui Rebeckæ? Ecce, ecce infelix Esau rufus, & bispidus quomodo ipsa viscera materna contorquet, & simplicem illum Jacob, quem totus ille interaneorum omni effectu concentus complectitur, manibus furibundus invadit. Audistis enim, quomodo de collo sanctissimi Viri, nempe Alexandri, infelix ille, scilicet Octavianus, Mantum demone plenus extraxit; & cum ei non pro voto cessisset, cum summo matris dolore egressus de utero, cupiditatis, & ambitionis suæ pilis, summum cernentibus horrorem incussit.* Prolixus est Sermo, ejusque partem non modicam legere est apud Pagium in Vita laudati Alexandri, Numero xv. & seqq. De legitima autem electione Alexandri videri possunt, quæ fusc diximus nos Tomo III. Conciliorum in Historia Concilii Œcumenici III. Lateranensis.

IV. Ex hætenus vero enarratis illud profecto addiscimus, consuevisse scilicet de Papatu investiri electos Pontifices per Mantum Papale, de quo inter alios differit eruditus Georgius in Opere, *De liturgia Romani Pontificis*, Habitum itaque jam olim fuit Mantum inter præcipuas Summorum Pontificum vestes, adeout dignitatis investituram per illud acciperent. Erat plane rubea Cappa, & Papale insigne, ut docet Gerhohus Reicherfp, ubi de Alexandri Papæ III. electione ita inquit: *Oblato ei, ut mos est, per Archidiaconum Manto, rubea videlicet illa Cappa, quæ insigne Papale est.* Ita si deponerentur, aut sponte dignitatem abdicabant, Mantum ipsum, ut præcipuum insigne dimittebant, uti exemplum nos docet Honorii Papæ II. qui quod ante constitutum electioni diem violenter potius intrusus, quam legitime electus videbatur, contra Theobaldum Cardinalem Presbyterum S. Anastasiæ, qui ante eum electus, Cælestinus dictus fuerat, licet hic eodem quo electus est, die se abdicaverit, ut constat ex Pandulpho in ejusdem Honorii Vita, Pontificatum dimisit, *Mitram, & Mantum* deponens, ut ex Codice Vaticano tradit Baronius ad annum mcxxiv. & ex eo Pagius in Vita laudati Honorii, Num. 1. *Sed quia electio Honorii minus Canonice processerat, post*

septem dies, a morte scilicet, vel sepultura Callisti II. in conspectu Fratrum, sponte Mitram, & Mantum refutavit, atque deposuit. Addit mox, libere ac Canonice fuisse a Cardinalibus assumptum in Romanum Pontificem: *Fratres, inquit, tam Episcopi, quam Presbyteri, & Diaconi Cardinales, videntes ipsius humilitatem, prospicientes in posterum, ne in Romanam Ecclesiam aliquam inducerent novitatem, quod perperam factum fuerat, in melius reformarunt, & eundem denuo advocantes, ad ejus vestigia prociderunt, & tanquam Pastori suo, & universali Papæ consuetam obedientiam exhibuerunt.*

V. Sicut Mantum, ita & *immantare*, & *ammantare*, de Summis Pontificibus dictum est, & de veste, qua primum in sua ipsorum electione induebantur, ut superius probatum est, & constat etiam ex antiquo Romano Ordine Cencii Camerarii sub Cælestino Papa III. qui claruit labente Seculo Christi xii. *Perscrutata, inquit ille, omnium Cardinalium voluntate ab aliquibus de ipsis, in quem major, & melior pars convenerit Cardinalium, prior Diaconorum ipsum de Pluviali rubeo ammantat.* Immantare verbum occurrit passim apud Radevicum Canonicum, Frisingensem Lib. II. *De rebus gestis Friderici I. Imperatoris*, Cap. lxxvii. ubi refert Acta Conciliabuli Papiensis in causa electionis Alexandri Papæ III. *Sequenti vero die proxima, inquit, Rectores Cleri Romani accedentes ad Dominum Cancellarium, & ad Cardinales, qui cum eo erant, voluerunt cognoscere, si immantatus esset, sicut quidam dicebant, & non invenerunt eum immantatum, neque aliqua specie dignitatis variatum; & habito cum eo, & Cardinalibus suis colloquio, cognoverunt ab ore ejus, & suorum, quod nunquam fuerit immantatus.* Loquuntur Acta de Alexandro Papa III. qui, uti superius notatum est, in minoribus dicebatur Rolandus, eratque S. R. E. Cancellarius. Addunt mox etiam eadem citatæ pseudosynodi Acta: *Post promotionem Domini Victoris, Octaviani scilicet pseudopontificis, Canonici Beati Petri miserunt ad Rolandum Cancellarium Canonicos suos, qui viderent, an esset immantatus, sicut quidam credebant, aut aliquo modo promotus; unde bis missi inquisitores, bis retulerunt, eum non esse immantatum, nec aliqua promotionis specie variatum.* Sed hæc putida mendacia sunt; fuit enim legitime electus Alexander Pontifex, & Manto etiam Papali in sua electione insignitus, scribitque Fastradus Abbas Clarevallensis in Epistola ad Omnibonum Veronensem Episcopum, *Octaviani nullam fuisse electionem, immantationem fecisse sibi ipsi, laicali adjutorio Pontificalem occupasse Cathedrali.*

§. XXXIV.

De conclusione electionis, Nominis mutatione, & impositione annuli Piscatoris.

Convenientibus duabus partibus in unum quempiam, ille verus, & indubitatus est Pontifex; tamen consueverunt & alii accedere; & rursus Prior Episcoporum, omnibus sedentibus, nomine totius Collegii illum talem eligit in Romanum Pontificem, & ejus assensum requirit. Quo habito, omnes surgunt, primo ad congratulandum; deinde cum exuunt Crocea, & Caputio parvo, & sic cum suo Rochetto faciunt illum, se-

sedere super ornata Sede, quam locant ante mensam, ubi priores sedebant. Imponunt illi annulum Piscatoris, & exquirunt, quo nomine velit nuncupari; & tunc solet subscribere Constitutiones ante electionem firmatas, & juratas, & signare aliquas supplicationes.

COMMENTARIUS.

I. **C**onstat jam ex Romanorum Pontificum Vitis, servatam religiose fuisse eam. Alexandri III. Constitutionem, de qua superius iterum iterumque dictum est, ut ille verus, & indubitatus haberetur Pontifex, in quem duæ saltem partes Cardinalium convenirent. Hinc, tamen aliquando non omnes Cardinales aliquem vellent Pontificem, ubi tamen noverunt, duas sacri Collegii partes in ipsum concordasse, mutato consilio prudentissime consueverunt accedere, uti hic noster §. notat. Conclufa vero electione, ut idem hic noster §. inquit, *Prior Episcoporum, omnibus sedentibus, nomine totius Collegii illum talem eligit, & ejus assensum requirit.* Non enim ordinari quis debet invitus; licet enim complures olim Viros Sanctos nonnisi renitentes Episcopatum suscepisse, & prorsus fere coactos, in eorum Vitis, atque in Ecclesiastica Historia legamus; sed tamen quomodo hæc intelligi debeant, explicat Sanctus Augustinus in Epistola sua civ. sic dicens: *Tam multi, ut Episcopatum suscipiant, tenentur inviti, perducuntur, includuntur, custodiuntur, patiuntur tanta quæ nolunt, donec eis adsit voluntas suscipiendi operis boni.* Vide Notas nostras in Opusculum S. Joannis Chrysostomi, De Sacerdotio, Lib. 1. Cap. 111. pag. 8. & 10.

II. Necessarium esse, ut electio Canonica valeat, electi assensum, docent passim Canonici Juris Consulti ad Titulum, De electione &c. viderique inter alios potest doctissimus Passerinus in suo absolutissimo Opere, De electione Canonica. Hinc ex præscripto nostri hujus §. electo Romano Pontifice, & ejus assensu habito, omnes surgunt, primo ad congratulandum, deinde eum exaunt Crocea, & Caputio parvo, & sic cum suo Rochetto faciunt illum sedere super ornata sede, quam locant ante mensam, ubi priores sedebant, imponunt illi annulum Piscatoris, & exquirunt, quo nomine velit nuncupari, & tunc solet subscribere constitutiones ante electionem firmatas, & juratas, & signare aliquas supplicationes. Quod assumptionem novi nominis spectat factam in electione Romani Pontificis, sunt qui tradunt, Sergium II. quod vocaretur os porci, seu bucca porci, primum fuisse Romanum Pontificem, qui creatus Papa nomen sibi mutavit, eo quod nomen indecens tanto Sacerdotio visus esset se habere. Verum tradit Baronius ad annum Christi dcccxliv. Num. 1. id factum in Sergio IV. neque id accidisse ob turpitudinem nominis, sed reverentia causa; cum enim ille Petrus vocaretur, indignum putavit, eodem se vocari nomine, quo Christus primum ejus Sedis Pontificem, Principem Apostolorum, ex Simone Petrum nominaverat. Verum id factum primum ab Octaviano, qui vocatus est Joannes XII. alii tradunt. Hic enim, ut ait idem Baronius ad annum Christi cmlv. Num. 1v. revera primus inventus, qui mutavit sibi nomen, ut qui ex Octaviano voluerit nominari Joannes. Sane, ut observat Angelus de Nuce in Leonis Ostiensis Chronico Casinensi Lib. 111. Cap. lxxv. Christus no-

um Ecclesia Pontificem Simonem constituens, Petrum vocari voluit, ex Augustino in Joannem, Cap. 1. Tractatu vii. ut inde mos iste originem derivare potuerit; eo etiam addito, quod nonnulli Pontifices nomina barbara prius haberent, quæ Romanis auribus durum, & ingratum quid sonabant; ideoque cum ex Germania, & Gallia, Gerebertus, Suidgerus, Poppo, Hildebrandus venissent, in Silvestrum, Clementem, Damasum, Gregorium mutati sunt. Hadrianus tamen VI. & Marcellus II. Baptismatis nomina in Pontificatu retinere. Vide Sandinum in Vitis Romanorum Pontificum, Annotatione II. ad Joannem XII. & Annotatione 1. ad Joannem XIV. itemque ejusdem Auctoris Historiam Apostolicam in S. Petro pag. 69.

III. Juxta antiquum ritum, ut idem Angelus de Nuce observat loco citato, non ipse electus nomen sibi assumebat, sed ab aliis illi imponebatur. Variis id quidem exemplis probari posset, quæ occurrunt passim in Romanorum Pontificum Vitis, qui post annum Christi millesimum claruerunt, relatis a Platina, Ciaconio, Pagio, & aliis. Quinam illi nomen imponerent, non constans fuit ordo, Teste Leone Ostiensi Lib. 111. Chronici Casinensis, Capite lxxvi. ubi agitur de Desiderio Casinensi Abbate, & S. R. E. Cardinali electo in Romanum Pontificem Maximum anno MLXXXVI. fuitque Victor III. *Universi pariter uno consensu, & animo illum capientes invitum, & renitentem attrahunt, & ad Ecclesiam prædictam Christi Martyris Lucie, ibique eum juxta morem Ecclesie eligentes, Victoris ei nomen imponunt.* Mortuo Victore, & suffecto in ejus locum Otone Ostiensi Episcopo, Albanensis Episcopus pronunciavit, *Urbanum illum placere vocari*, ut ait idem Chronicon Casinense Lib. 1v. Capite II. fuitque hic Pontifex Urbanus II. electus anno MLXXXVIII. Successit deinde Urbano in Pontificatum Rainerius, seu Ragingerius Cardinalis Presbyter Tituli S. Clementis anno MXCIX. cui postea Primiscriinii, & Scribæ Regionarii Paschalis nomen indidit; ut ex antiquis Auctoribus scribit Platina in Paschale II. Pontifice, & ex Anonymo Vaticano Baronius ad annum MC. Primiscriinii autem, seu Primiscriinariii, & Scribæ Regionarii erant Officia Romanæ Ecclesiæ, qui etiam Protoſcriinariii apud Reginonem in Chronico nuncupantur, ut notat Dufresne in suo Glossario; viderique de eisdem potest Hierolexicon Macri.

IV. Ut alios tandem omittam Pontifices, ex præscripto antiqui Romani Ordinis xii. auctore Cencio, Cap. xlviii. *Prior Diaconorum ipsum, electum nempe Pontificem, de Pluviali rubeo ammantat, & eidem electo nomen imponit.* Puto equidem impositum semper fuisse electo novo Pontifici nomen, sive a Primiscriiniis, sive a Priore Diaconorum Cardinalium, sive ab aliis id fieret, ipsius electi arbitrio, juxta præscriptum non modo nostri hujus Romani Cærimonialis auctore Augustino Patricio, sed & juxta il-

illud quoque, quod jussu Gregorii Papæ X. editum est, diciturque apud Mabillonium Tomo II. Musei Italici, *Ordo Romanus* xiii. Num. II, ubi inter alia inquit, Priorem quidem Diaconorum petere ab electo in Pontificem, *quæ nomine vocari velit, & ipsum nomine, quod ei placuerit, vocabunt*. Eadem legere est in Ordine xiv. Romano, auctore Jacobo Gajetano, Cap. X. isque est usus, qui hodieque servatur, solentque ut plurimum novi Pontifices, vel eorum sibi nomina imponere, a quibus creati Cardinales fuerunt, vel ab antiquis Romanæ Ecclesiæ Præsulibus, quibus sanguine juncti sunt, vel si Regulares sint, ab iis, qui ex eodem Ordine ad Petri Cathedram fuere evecti; sicque nostro hoc seculo Innocentius XIII. eo nomine appellari voluit, quod Innocentio III. ex nobili genere Comitum Signiæ effret sanguine junctus. Benedictus vero xiii. quod ex inclyto Prædicatorum Ordine, quem professus fuerat, Benedictus XI. Pontifex Maximus prodiiisset; Clemens tandem XII. & BENEDICTUS XIV. quod alter a Clemente XI. alter vero a Benedicto XIII. Cardinales S. R. E. creati fuissent.

V. Vetust etiam fuit mos, ut Episcopi sua aliquando, dum ordinarentur, nomina mutarent, ejusque ritus meminit Beda in Historia Gentis Anglorum Lib. v. Cap. xii. ubi loquens de S. Willibrordo Trajecti Episcopo, qui obiit anno dcccxxxvi. ut videre est apud Surium ad diem vii. mensis Novembris: *Ordinatus est autem, inquit, in Ecclesia S. Martyris Cecilia die natalis ejus, imposito sibi a Papa memorato nomine Clementis*. Fuit hic Papa Sergius I. qui eum ordinavit anno ab Incarnatione Domini sexcentesimo nonagesimo sexto; & quidem Romæ publice in Ecclesia Beatissimi Petri Principis Apostolorum, ut ait Surius, *cum magna dignitate more Apostolico eum ordinavit Archiepiscopum, ac ordinato nomen imposuit Clemens, vestimentisque suis Sacerdotalibus induit eum, & sancto quasi superhumerali Aaron Pallio dignitatis, & indumenti confirmavit gloria &c.* Testantur quoque Annales Fuldenses ad annum dcccxvi. quod eo ferme tempore Winfridus, cujus Vitam legere est apud laudatum Surium ad diem v. Junii, *cum ordinaretur, Bonifacii nomen accepit*. Fuit hic Bonifacius insignis ille Germaniæ Apostolus, & Martyr, qui etiam quo tempore S. Willibrordus Trajectensis Ecclesiæ Præsul Christiana doctrina Frisiam erudiebat, ejus studiis mirifice gratulatus, & adhærens, triennio apud illum fuit, suam illi navans operam, tam in Idolorum Fanis destruendis, quam extruendis Ecclesiis, ceterisque rebus divinis exequendis. Ceterum ut alios omittam Episcopos, quibus nominis mutatio facta est in ipsorum ordinatione, nunc ea mutatio penes solos Summos Pontifices remansit, cujus exempla videre est apud Rodolphum Glabrum Lib. iv. Cap. i. & in Casinenfi Chronico, cujus supra mentionem fecimus. Idem mos etiam apud Græcos hætenus viget. Sic enim scribit Guilius in Epistola ad Leonem Alatum: *Solent apud Græcos, qui Episcopatum incunt, mutare nomen, assumpto quoque alio Majorum suorum sanctitatis fama insignium*. Cur Summi Pontifices in sua ipsorum electione mutant nomen, explicat eruditus Pompeus Sarnellus Vigiliensis Episcopus in Epistolis suis Ecclesiasticis Tomo II. Epistola v.

VI. Electo novo Pontifici *imponunt annulum Piscatoris*, inquit in hoc Cæremoniali Patricius, concinitque Ordinibus Romanis xiii. & xiv. qui eam annuli impositionem recensent, sine tamen illo *Piscatoris* additamento. Annulus Piscatoris sigillum est, quo Romanorum Pontificum Brevia obsignantur. Tribus autem, ut notat Macrius in suo Hierolexico, uti solent Pontifices ipsi sigillis; *Annulo Piscatoris*, quo Brevia Apostolica in cera rubra; *Bulla plumbea*, qua Privilegia, & Litteræ Cancellariæ; & *Sigmo*, quo Bullæ Consistoriales muniuntur. Annulus Piscatoris dicitur, quod S. Petri in actu piscationis imaginem insculptam habet, erratque vulgus, qui ita illum esse dictum censet, quod eo S. Petrus, qui piscator erat, primus usus fuisset. Est & ejus ineptæ opinionis Rebuffus in Praxi, Titulo, *De Brevis Apostolico*, cui etiam adhærere videtur Georgius Longus in Tractatu, *De annulis signatoriis antiquorum*, Cap. ix. in fine. Ea vox annuli Piscatoris, teste Dufresne in suo Glossario, ante annos cdi. minime nota, invaluit porro multum a Seculo xiv. Quicquid autem sit, ubi electus fuit Pontifex Maximus anno mcdlxxxiv. Innocentius VIII. teste Burchardo in suo Cæremoniali Sedis vacantis post obitum Sixti Papæ IV. §. ciii. *imposuerunt sibi annulum felicitis recordationis Sixti Papæ IV. quem Sacra paratum ad hoc habebat*. Id quod etiam factum legimus in electione Leonis Papæ X. anno MDXIII. teste Paride Grassio in suo ms. Diario, ubi enarrans Pontificatum laudati Pontificis, ita inquit: *Cardinalis Sancti Georgii Prior Episcoporum imposuit ei annulum, qui fuerat Julii Secundi*. Sed mirum plane videtur, quod annulus Piscatoris imponeretur Leoni X. ille, quo fuerat usus Julius II. cum mos sit in morte Pontificis in præsentia Collegii non modo plumbum rumpi, sed & annulum Piscatoris, ut idem Paris de Grassis testatur in fine Diarii anno MDXXI. ubi agit de ipsius Leonis morte inopina, & Sede vacante. Quamobrem dici potest, tunc forte primum rumpi cœpisse Piscatoris annulum defuncto Pontifice. Sane invaluit deinde ritus, ut electo novo Pontifici annulus quidem imponatur signatus imagine S. Petri Piscatoris, litteris tamen vacuus, uti addiscimus ex ms. Diario Apostolici Cæremoniarum Philippi Pierfantis, ubi de electione Benedicti XIII. Pontificis sic inter alia ait: *Eminentissimus Albanus Tituli S. Clementis reddita pariter suo loco reverentia, annulum signatum imagine S. Petri Piscatoris, litteris vacuum imposuit in digito annulari electi, qui illico eum consignavit Cæremoniarum Magistro conservandum in parvo marsupio*.

VII. Mentio fit etiam in ipso citato ms. Diario alterius ritus, qui aliquo ex tempore invaluit, ut Major Pœnitentiarius supplex petat *pro omnibus absolutionem a Censuris forte contractis ratione Conclavis*. Sed hoc omisso, quod nostrum §. spectat, docet nos hic inter alia, quod ubi annulus Piscatoris novo Pontifici est impositus, *tunc solet subscribere Constitutiones ante electionem firmatas, & juratas, & signare aliquas supplicationes*. De subscriptione constitutionum, quas novus Pontifex ante electionem una cum Cardinalibus firmare ac jurare olim solitus fuit, diximus supra in Commentario ad §. xxvi, confirmarique id iterum potest exemplo

plo Innocentii VIII. qui statim ac Annulo Piscatoris fuit ornatus, Capitula ante electionem in Conclavi statuta promissit, vovit, iuravitque observare. Rem ita enarrat Burchardus in citato suo Cæremōnali §. ciii. & sequenti: *Quo facto, surrexit ipse, & posita est Sedes sua prædicta, ante mensam prædictam, amotis inde tribus scabellis, quæ prius erant, & apportata fuerunt Capitula supradicta per omnes Cardinales, Foschero excepto, ut supra ante primum scrutinium dictum est, subscripta, quæ post subscriptionem ultimi Cardinalis, videlicet Reverendissimi Domini Ascanii, Sanctitas sua subscripsit in singulis sex quinternis, sub his verbis, videlicet. Ego Innocentius electus, & assumtus in Summum Pontificem, præmissa omnia, & singula promitto, voveo, & iuro observare, & adimplere in omnibus, & per omnia, pure, & simpliciter, & bona fide, realiter, & cum effectu sub pœna perjurii, & anathematis, a quibus nec me ipsum absolvam, nec absolutionem alicui committam. Ita me Deus adjuvet, & hæc sancta Dei Evangelia.*

VIII. Præter Constitutiones ante electionem firmatas, & juratas, solitus etiam fuit novus Pontifex, ut inquit noster §. signare aliquas supplicationes; testemque ejus rei habemus ipsum Innocentium VIII. de quo ita scribit idem Burchardus §. cvi. *Subscriptis per electum Pontificem, ut supra, Capitulis, proposita sibi fuerunt multa supplicationes per Reverendissimos Dominos Cardinales, quas omnes Sanctitas Sua indifferenter absque illarum inspectione signavit.* Laudabile profecto est, quod de Leone X. in ms. Diario Paridis Grassi legitur; Cardinalis siquidem Agenensis, quod Vicecancellarius podagratus venire non posset, imposuit in manibus Papæ calamum, seu pennam scriptoriam, & simul cum Decano, & cum Priore Presbyterorum, ac Priore Diaconorum, qui jam erat Cardinalis de Farnesio, obtulerunt tanquam Papæ Capi-

tula publica simul cum supplicationibus aliquibus signandis, quæ ipse accepit, & ex eis aliqua signavit; quæ scilicet iusta cognovit, ut concederentur. Extant hac in re & aliorum Pontificum antiquiorum exempla, sed illud tamen notabile est, quod de Benedicto XII. electo Pontifice anno mcccxxx. scribit in suo Chronico ad annum mcccxxxv. Albertus Argentinensis: *Petitiones sibi oblatas primo die post Coronationem recipere recusavit; voluit enim nosse conditionem personæ supplicantis, & summam reddituum, & si impetrans ante fuerit beneficiatus.* Postridie nihilominus suæ electionis, seu die xxi. Decembris, in primo suo Consistorio ante Coronationem habito, ut ait tertiæ ejus Vitæ Auctor, quem Raynaldus citat sub nomine Ptolomæi Lucensis, distribuit S. R. E. Cardinalibus centum millia Florenorum ad subveniendum eorum necessitatibus.

IX. Ceterum mos aliquando fuit, ut concordata electione Pontificis in unum quempiam; is ante publicationem supplicationes eidem a Cardinalibus porrectas signaret; testemque hujus rei habemus Burchardum, qui in suo Cæremōnali Sedis vacantis, ubi agit de electione Innocentii Papæ VIII. ita §. ciii. inquit: *Peracto prandio die Sabbati prædicta, vigesima octava Augusti facta sunt diversa præctica, & tandem septendecim, vel circa, Reverendissimorum Cardinalium vota addicta in favorem Cardinalis Melfitensis, qui in nocte sequente ante horam septimam noctis incepit in camera sua signare ad instantiam quorundam Cardinalium; genuflexus super uno genu supplicationes in quodam forciori ante se positas signabat, Cardinalibus aliquibus circumstantibus, qui signaturas hujusmodi petebant, & expectabant.* Sic pervenit ad hæc Reverendissimus Dominus Senensis, qui hujusmodi videns subridendo dixit: *O piesto va a roverscio, il Papa sta segnando in ginocchione, e noi che domandiamo, stiamo ritti.*

§. XXXV.

Publicatio novi Pontificis.

Interim vero Prior Diaconorum, aperta Sacrarîi fenestrella, qua populus expectans videri potest, Crucem profert, alta voce clamans: *Annuncio vobis gaudium magnum. Papam habemus. Reverendissimus Dominus Cardinalis N. electus est in Summum Pontificem, & elegit sibi Nomen N.*

COMMENTARIUS.

I. Tandem, ut docet noster §. Prior Diaconorum, aperta Sacrarîi fenestrella, qua populus expectans videri potest, Crucem profert, alta voce clamans; *Annuncio vobis gaudium magnum: Papam habemus. Reverendissimus Dominus Cardinalis N. electus est in Summum Pontificem, & elegit sibi Nomen N.* Meminit ejus ritus Ordo Romanus xiv. auctore Jacobo Cajetano Capite i. quod inscriptum est, *De pronuntiatione nominis assumpti per electum in Papam fienda Populo per Priorem Diaconorum Cardinalium, narrando modum electionis.* Tum vero ita inquit: *Cum autem prædicta Romana Ecclesia fuerit de Pastore provi-*
To, I.

sum, Prior Diaconorum dictam electionem Populo annunciat, dicens: Si placet, ecce annuncio vobis gaudium magnum, vel aliud thema, sicut placebit; & narrat, quomodo concorditer, vel a duabus partibus Cardinalium per viam Scrutinii, Compromissi, vel Spiritus Sancti, de Collegio, vel extra Collegium, elegerunt, nominando, & laudando personam electi, & pronuntiando nomen de novo assumptum. Alia plane fuit antiquitus forma pronuntiandi populo novum electum Pontificem, quam recenset Radevicus Frisingensis Lib. II. *De rebus gestis Friderici I. Imperatoris*, Capite lxxii. ubi describit Acta pseudoconcilii Papiensis, quod Fridericus I. Impera-

perator congregavit ad constabiliendam electionem pseudopontificis Victoris IV. contra Alexandrum III. legitimum Papam: *Scriniarius*, inquit, *secundum antiquam Romanorum consuetudinem ascendens in altum, voce magna clamavit ad Populum, dicens: Audite Cives Romani, & cætus Reipublicæ, secunda feria Pater noster Hadrianus mortuus est, & proximo sequenti Sabbato Dominus Octavianus Cardinalis S. Cecilie in Romanum Pontificem electus, & immantatus est, & in Cathedra Beati Petri collocatus est, & Papa Victor est nominatus. Placet vobis? Respondit magna voce Clerus, & Populus: Placet. Secunda, & tertia vice interrogatus Populus, si placeret, clara voce respondit: Placet. Deinde cum handis, & aliis Papalibus insignibus Dominus Papa cum laudibus in Palatium deductus est.*

II. Quinam ritus servaretur Seculo xv. quo scilicet labente electus fuit Innocentius VIII. Papa, exponit in toties citato Cæremoniali Burchardus Cæremoniarius Apostolicus, ubi ita ait §. cv. *Interim Reverendissimus Dominus Cardinalis Senensis, depositis ex fenestrella Sacrificie parva juxta Altare dicta Capella existentis tegulis, sive materiis, quibus obturata erat, exposuit per eam Crucem populo ibidem in Curia Palatii congregato, & voce potenti exclamavit dicens: Annuntio vobis gaudium magnum: Papam habemus. Reverendissimus Dominus Cardinalis Melitenensis electus est in Summum Pontificem, & elegit sibi nomen, Innocentius Octavus. His dictis, omnis populus acclamavit, Campana Basilica Sancti Petri cum magna potentia pulsata sunt, & Scoppetarii custodie Palatii in triumphum sine intermissione scopettos oneratos emiservunt, quousque electus Pontifex, ex Basilica prædicta ad Palatium redisset. Electo quoque Leone X. ut ait in ms. Diario Grassus, & ducto in parvam mansionem, quæ est latus Capellæ noviter, ac noviter ad hoc ordinatæ, & aperta ejus fenestrella, Cardinalis de Farnesio Crucem protulit, & novi Pontificis electionem indicavit cum tanto plausu, ut credibile vix sit. Ostensionis Crucis factæ a Priore Diaconorum Cardinalium in proclamatione novi Pontificis, ante Burchardum, Grassumque meminit inter alios Aeneas Sylvius in sua ad Fridericum III. Oratione, ubi post relatam Nicolai Papæ V. electionem, ita subjicit: *Exacta jam hora sexta, in nonam ferebatur dies; aperta quoque Conclavis fenestra, Cardinalis de Columna Prior Diacono-**

ram Crucem Pontificalem emisit, creatumque Papam populo acclamavit. Curiosum est plane, quod idem Auctor de ea re tradit: Altus, inquit, erat locus, nec Cardinalis de Columna agnosci, nec vox bene exaudiri poterat. Exiit rumor, Cardinalem de Columna creatum Papam. Tum rupti repente cancelli. Ursini arma domi jam recepere, atque ad tuenda sua festinabant. Populus hilaris, quia Romanum habebat Papam, & Columnenses salutationibus, risibus, vocibusque gaudium exprimebant. Alii domum ejus prædæ exposuerunt. Ubi sedatus hic rumor est, Cardinalis quoque Capuani diripiunt domum. Atque inde agnita veritate, Bononiensis bona susceperunt, sed admodum pauca. Hoc pauperi beneficium est, quod pauca potest amittere.

III. Sed his obiter dictis, quod ritum proclamandi novi Pontificis spectat, ut alia antiqua exempla omittam, teste Joanne Paulo Mucantio in suo ms. Diario anni MDXC. ubi describit Urbani Papæ VII. electionem, *Cardinalis Sfortia Prior Diaconorum Cardinalium in Conclavi existentium, accepta Cruce Pontificia, ascendit scalas, & per fenestellam, quæ respicit in Atrium post ingressum portæ magnæ Palatii, ubi populus, & Clerus tempore Sedis vacantis solet quotidie convenire, & expectare nuncium electionis, populo prædicto ostendit Crucem dicens: Annuncio vobis gaudium magnum. Reverendissimus D. Joannes Baptista Castaneus Cardinalis S. Marcelli electus est in Summum Pontificem, & elegit sibi nomen: Urbanus Septimus. Porro post constructam a Paulo V. Basilicæ Vaticanæ porticum, super qua etiam pars Conclavis construitur, proclamari solet novus Pontifex ex lodia superiori, & eo quidem ritu, quem servari vidi in proclamatione ultimarum Pontificum. Prior siquidem Cardinalium Diaconorum stans in medio ipsius lodie bireto tectus, Cæremoniarum Magistro Crucem elevatam a sinistris tenente, multiplici populo adstanti schedulam legens dicit: *Annuntio vobis &c.* prolataque ea verborum formula, schedulam ipsam in populum projicit. Atque hic est ritus, cujus mentionem faciunt ms. recentiorum Cæremoniarum Apostolicarum Præfectorum Diaria. Sed hæc omnibus nota sunt, supervacaneumque est testimonia Auctorum describere. Ipsum autem ritum bis ipsi servatum vidimus, in electione scilicet Clementis XII. & BENEDICTI XIV. quem diu nobis Deus fospitem servet.*

§. XXXVI.

De indumentis electi, & prima veneratione a Cardinalibus ei facienda.

His peractis, ducitur electus in Sacrarium, & a Diaconis Cardinalibus exuitur vestimentis communibus, quæ ex antiqua consuetudine cedunt Clericis Cæremoniarum, induiturque Papali habitu, Toga scilicet lanea albi coloris, caligis rubeis, sandaliis rubeis aurea Cruce ornatis, cingulo rubeo cum aureis fibulis, bireto etiam rubeo, & demum mundo, nitidoque Rochetto; deinde imponunt ei Amictum, Albam longam, Cingulum, & Stolam ornatam cum perlis pendentem a collo, si est Presbyter, aut Episcopus. Si autem esset Diaconus, Stola sit super humerum sinistrum in formam Diaconi. Si sit Subdiaconus, vel infra, non ponatur ei Stola; & ita indutum educunt, ac super prædictam Sedem rursus sedere jubent, ibique supplicationes complures signat. Demum, dum Cardinales depositis Croceis, & parvis Caputiis Cappas suas reassumunt, imponunt novo Pontifici Pluviale rubeum pretiosum, & Mitram auro,

& gem-

& gemmis ornatam, illumque sedere faciunt super Altare, cui Cardinales omnes reverentiam exhibent per ordinem, pedes, manus, & os deosculantes.

COMMENTARIUS.

I. **F**Acta publicatione novi Pontificis, ducitur electus in Sacrarium, & a Diaconis Cardinalibus exuitur vestimentis communibus, quæ ex antiqua consuetudine cedunt Clericis Cæremoniarum. Hinc Paris de Grassis Papalium Cæremoniarum Magister, Auditorque ms. Diarii Pontificatus Leonis Papæ X. qui asservatur Romæ in celebri Casinatenſi Bibliotheca, ubi tractat de ejusdem Pontificis electione, ritibusque in ea servatis, ita ad rem inquit: *Nos ibidem tunc Pontificem Pontificali- bus . . . paravimus, & vetera vestimenta ejus pro nobis Magistris Cæremoniarum retinimus, ipsomet Pontifice contra Sacristam, qui ea recipere volebat, testificante ad nos pertinere, & sic eadem habuimus.* Jam non modo vestes Cardinalitias, quibus exuitur novus Pontifex, sed & illius cellam, hujusque ornamenta pertinuisse vel olim ad Cæremoniarum Magistros, tradit Æneas Sylvius in sua ad Fridericum III. oratione, ubi ita inquit: *Quibus, idest, Cæremoniariis Apostolicis, post electionem lucra est cella novi Pontificis, & quod illic ornamentum est.* Porro docet in suo Cæremoniali Burchardus §. cxxiii. & sequenti, Conclavistas electi Pontificis Innocentii VIII. Magistris Cæremoniarum, & ceteris Conclavistis omnia dimisisse, quæ ad electum in Conclavi spectabant; multa tamen fuisse abstracta per particulares, quæ non fuerunt nobis Conclavistarum deputatis consignata, nam campanellam, & pannum rosaceum, quibus Cardinales in Capella parva utebantur, accepit Abbas Sacrista noster invidia plenus, & ea Papæ consignavit, ultra ea, quæ fuerunt abstracta infrascripta: *talea argentea iii. scutella argentea v. scutellini argentei iii. tape- tia iii. &c.*

II. Exutus Pontifex vestimentis communibus a Diaconis Cardinalibus, uti dictum est, induitur Papali habitu, Toga scilicet lanea albi coloris, caligis rubeis, sandaliis rubeis aurea Cruce ornatis, Cingulo rubeo cum aureis fibulis, bireto etiam rubeo, & demum mundo, nitidoque Rochetto. Munus jam olim fuisse Cardinalium Diaconorum induere vestibus hisce novum Pontificem, quæ aliquando eadem vestes fuerunt, quas prædecessor Papa gestaverat, docet nos Joannes Burchardus in suo Cæremoniali Sedis vacantis post obitum Sixti IV. Sic enim inquit §. cv. de vestibus quibus post suam electionem Innocentius VIII. immediatus Sixti Successor indutus fuit: *Tum Sanctitas sua intravit parvam Sacristiam, in qua a Diaconis Cardinalibus fuit omnibus suis vestimentis exutus, & vestibus Prædecessoris sui Sixti Quarti indutus, quæ ibidem per Sacristam parata erant, videlicet camisea diploide ex setonino albo, veste ex sargia alba fina, uno pari caligarum rubeorum rosati, calcies ex panno rosato cum Crucibus desuper iu modum sandaliorum, cingulo cremesino cum fornimentis ex auro massicio, Rochetto, Amictu, Alba, Cingulo, & Stola rubea pretiosa cum perlis.* De vestibus hisce supervacaneum est hoc loco differere, notæ enim vel

To. I.

sacrarum rerum tironi sunt, de iisque jam differuimus nos Tomo I. Commentariorum in Romanum Pontificale. Siquis autem plura desideret, legere potest Viri Clarissimi Dominici Georgii insigne Opus, *De Liturgia Romani Pontificis*, Tomo I.

III. At vero ceteris vestibus omissis, quod Sandalia Papæ spectat Cruce ornata, antiquus profecto est ipsorum usus, uti inter alios pluribus probat eruditus Macrus in suo Hierolexico, verbo, *Sandalia*. Certe Romæ adhuc perdurant vetera ejus usus monumenta, ut in Tribuna S. Praxedis a Paschali Papa I. musivo opere constructa, ubi seipsum pingi fecerat cum Sandaliis juxta illius seculi morem Cruciculis nigris in cuspide eorum signatis. Claruit Paschalis I. initio seculi ix. idest creatus Pontifex fuit anno dcccxvii. Sed tamen constat, jam longe ante ipsum consuevisse Romanos Summos Pontifices gestare Sandalia Cruce insignita. Honorius siquidem I. creatus Papa anno dcccxv. cum instaurasset Templum S. Agnetis in via Numantina, Cruciculam albam, ut adhuc videtur, in sua effigie ad pedes imposuit. Sic in S. Maria ad Fontem, quam Joannes IV. teste Anastasio extruxerat, adhuc duorum Pontificum effigies conservantur cum Crucibus in cuspide Sandaliorum. Electus hic Joannes Pontifex fuit anno dcccxl. medioque ante ipsum seculo, idest anno dxc. quo ad Pontificatum evectus fuit S. Gregorius Magnus, idem in usu fuisse perspicitur ex effigie ejusdem Pontificis a Joanne Diacono descripta in ejus Vita, & ab eodem Macro allata in citato Hierolexico verbo, *Batulus*. Porro, ut alias demonstrabimus, usus osculandi Pontificis pedes antiquissimus est, & propterea in signum humilitatis Crucem apponit Papa in Sandaliis, ad ostendendam, quod talis reverentiæ actus non sibi, sed Cruci Christi exhibetur, ut inter alios docet Josephus Stephanus in Libro, *De osculo pedum Romani Pontificis*, Cap. xviii. Forte ad evitandas hæreticorum calumnias, qui eum ritum improbabant apponendi Crucem in Papæ Sandaliis, cujusmodi sunt Novatores hodierni, Gelasius II. qui creatus fuit Pontifex anno mxcviii. in suis Sandaliis non Crucem, sed tres clavos pingi curavit, ut in ejus effigie videre est allata ab eodem Macro, verbo, *Mitra*. Quicquid sit, jam compluribus ab hinc seculis retinetur usus longa consuetudine probatus, ut Romani Pontifices Sandalia gestent aurea Cruce ornata.

IV. Unum superest, quod de Sandaliis dicamus, mutatam scilicet eorum formam fuisse. Erat vetustus Sandalium usus, sicut modo a Regularibus discalceatis deferuntur, nimirum ex superiori parte aperta, ut ex Rabano Mauro, *De institutione Clericorum*, Capite xxii. habetur, ubi ita inquit: *Pes neque tectus sit, neque nudus ad terram; idest, ita sensum ejus formæ mysticum exponit, ut neque occultetur Evangelium, nec terrenis commodis innitatur.* Dignum notatu est, quod veteris Ecclesiæ disciplinæ peritissimus, ac religiosus Custos S. Carolus

rolus Boromæus, Parte iv. Actorum Ecclesiæ Mediolanensis Parte II. Libro II. *Instructio- num supellestilis Ecclesiastica*, de Sandaliis Episcopalis docet: *Sandalia*, ait, *calcei scilicet, quibus Episcopus ad Missæ Sacrum solemniter faciendum utitur, e solea integra subtus consistit, a parte autem superiori decenter ornata: quæ fenestrata etiam superne olim fuisse, non sine mysterii ratione Innocentius III. Pontifex ostendit.* Plura jam nos de Sandaliis ipsis, sicut & de aliis vestibus sacris tum Episcoporum, tum ceterorum Ministrorum Tomo I. Romani Pontificalis, in Prolegomenis, & in decursu ejus Operis, tum etiam in Opusculo, *De Codice Sancti Evangelii* &c. Lib. II. diximus de quibus videri quoque possunt varii Scriptores, qui de divinis Officiis, ac ritibus Ecclesiasticis peculiare Tractatus ediderunt; sunt autem ii multi veteres æque ac recentiores.

V. His ergo omisissis, ut alia in hoc §. nostro contenta nunc explicemus, induto novo Pontifice vestibus jam explicatis, *Domini Cardinales depositis Croceis, & parvis caputiis, Cappas suas reassumunt*, eas nempe, quæ Cappæ magnæ vocantur, seu longæ cum caputio, quibus non modo Cardinales, & Episcopi, sed & in multis Cathedralibus etiam Canonici, imo Romæ in Ecclesiis Patriarchalibus Beneficiati quoque utuntur, uti notat Macrius in Hierolexico, verbo *Cappa*, ubi etiam subjicit, differre Cappam Canonicalem ab illa Beneficiatorum in colore pelliculæ: *Nam Beneficiatorum est cinericii coloris, Canonice vero candidi armellini.* Sed & his omisissis, Cardinales induti Cappis imponunt novo Pontifici *Pluviale rubeum pretiosum, & Mitram auro & gemmis ornata, illumque sedere faciunt super Altare, cui Cardinales omnes reverentiam exhibent per ordinem, pedes, manus, & os osculantes.* Pluviale vestis est Ecclesiastica a sola parte anteriori aperta ab humeris usque ad pedes protensa, eoque nomine appellatur, quia olim pluvie tempore sumebatur, ut Ferrarius Lib. I. *De re vestiaria*, Cap. xxxix. suspicatur. Et hinc forte emanavit, ut a parte posteriori capitis tegumentum affutum haberet, quod Caputium vocamus, cujus etiam quædam forma, seu vestigium in hodiernis Pluvialibus remansit, uti notat Joannes Cardinalis Bona Libro I. *Rerum Liturgicarum*, Cap. xxiv. Numero xvii. Porro quamvis fileant de hoc indumento veteres Ecclesiasticarum rerum Scriptores, ejus tamen usum antiquitus viguisse Romani antiqui Ordines evincunt, cui suffragantur Lanfrancus Epistola xlii. ad Joannem Normanorum Archiepiscopum, & alii quos refert eruditus Saussajus, Parte I. *Panopliæ Sacerdotalis*, Lib. vi. Capite v.

VI. Adhibitum fuisse Pluviale, & quidem rubei coloris a novo Pontifice statim post suam electionem, ut nempe eo indutus ad Ecclesiam pergeret, ibique Cardinales, aliosque ad pedis osculum reciperet, docet nos Romanus Ordo XII. Auctore Cencio Camerario sub Cælestino III. Papa, qui obiit anno mxcviii. Sic enim ille in citato ipso Ordine XII. Romano, Cap. xlviii. de electo novo Pontifice agens ad rem nostram inquit: *Prior Diaconorum, Cardinalium scilicet, ipsum, Pontificem nempe electum, de Pluviali rubeo ammantat, & eidem electo nomen imponit; ipsumque deinde duo de majoribus Car-*

dinalibus addextrant usque ad Altare, ubi prostratus adorat, Primicerio cum schola Cantorum, & Cardinalibus cantantibus, Te Deum laudamus; quo finito ab Episcopis Cardinalibus ad sedem ducitur post Altare, & in ea, ut dignum est, collocatur. In qua dum sedet electus, recipit omnes Episcopos, & Cardinales, & quos sibi placuerit ad pedes, postmodum ad osculum pacis. Atque hic est ritus, qui servabatur olim ante Conclavis inventionem, recentiorque videtur esse mos ille, quem Patricii Cæremoniale præscribit, ut nimirum novum Pontificem faciant *sedere super Altare, cui Cardinales omnes reverentiam exhibent per ordinem, pedes, manus, & os osculantes.* Ex citato siquidem Cencii Camerarii Ordine Pontifex jam non super Altare sedebat, sed *ad sedem ducebatur post Altare*, in eaque collocatus Cardinales aliosque ad pedis osculum, & deinde ad osculum pacis recipiebat.

VII. Post Constitutionem Conclavis, ritus qui ibidem servari debuit ex præscripto Cæremonialis Romani jussu Gregorii Papæ X. estque apud Mabillonium Tomo II. Musæi Italici, Romanus Ordo xlii. Num. II. ubi agit de electo recens Pontifice, hic est: *Prior Diaconorum exiit eum Cappam, seu Chlamydem, Crocea forte, de qua superius dictum est, qua utitur, & ponit ei, si non habet, Albam Romanam, Rochettum scilicet, Camisiam, & Orarium ad modum Presbyteri super humeros, si est Presbyter; vel super lavam partem, si est Diaconus, & non in Presbyterii Ordine constitutus; & postea ponit ei Mantum, & dicit, Investio te de Papatu Romano, ut præsis Urbi, & Orbi; & tradit ei etiam Annulum, quo uti consueverunt Prædecessores ipsius, & ei Mitram competentem ipsi super caput imponit, & petens ab eo, quo nomine vocari velit, & ipsum eo nomine, quo ei placuerit, vocabunt.* Tum vero mox addit: *Quo facto, facit eum sedere in Sede, seu in Faldistorio, & depositis communibus calceis, si habentur rubea calciamenta Papalia, calciantur eidem; & sic Cardinales omnes per ordinem, primo Episcopi, secundo Presbyteri, tertio Diaconi veniunt coram eo flexis genibus; & idem electus ipsos ordinate ad pedem recipit, & ad pacis osculum, necnon & alios omnes Capellanos suos, & ceteros Clericos, & Laicos venientes ad ejus reverentiam, infimos, mediocres, & majores.* Eadem hæc legere est in Ordine Romano xiv. auctore Jacobo Gajetano, Cap. x. ubi nec ulla quidem fit ejus ritus mentio sessionis Pontificis super Altare, ubi collocatus Cardinales, aliosque reciperet ad osculum pedis, sed ea reverentia exhibebatur tunc temporis novo Pontifici induto quidem Pontificalibus insigniis descriptis, sed tamen sedenti non super Altare, sed *in Sede, seu in Faldistorio.*

VIII. Forte mos ille sedendi in Altari invaluit Seculo xv. Ut enim legitur Lib. I. Commentariorum Pii II. qui electus fuit anno mcdlviii. electus ipse salutatusque Pontifex Maximus ab omnibus Cardinalibus, qui ejus electioni aderant, *priora exiit indumenta, & Albam Christi Tunicam accepit, & interrogatus, quo nomine vellet vocari, Pio, respondit, & mox Pius Secundus appellatus est; & juratis quibusdam Capitulis nudius tertius in Collegio editis, in Altari positus, rursus a Cardinalibus adoratus est, pedes ejus, & manus, & ora osculantibus,*

at-

atque eo facto, publicata est Populo Pontificis electio ex alta fenestra, acclamatumque Pium. Secundum Pontificem haberi, qui fuerat Cardinalis Senensis. Non ergo recens inventum Pontificum est, quod Novatores tantopere improbant, quod nempe Pontifex collocetur in Altari, ibique adoretur, sive, ut ei Cardinales omnes reverentiam exhibeant per ordinem pedes, manus, & os deosculantes. Neque enim ea adoratio cultus religiosus est, qui Deo, vel Sanctis exhibetur, ut perperam Protestantes calumniantur, quos egregie confutavit doctissimus Cardinalis Bellarminus Lib. III. De Summo Pontifice, Cap. xviii. & sequentibus.

IX. Nugis hæreticorum calumniisque neglectis, quod nostrum ritum spectat, præter recitatum Æneæ Sylvii locum, jam ante hujus Cæremonialis ordinationem ab Augustino Patricio factam, ritus ipse, de quo agimus, servatus etiam fuit, ut alios omittam, in electione Innocentii VIII. ut testis est in suo Cæremoniali Burchardus §. cxviii. ubi ita inquit: Cardinales, depositis Croculis, & Capuccinis, ac-

ceperunt suas Cappas consuetas, cum Sanctitas Sua surrexit de Sede prædicta, & impositum sibi fuit Pluviale rubeum simplex, & Mitra cum perlis simplex, non de pretiosioribus, a Cardinalibus positus ad sedendum supra dictum Altare in parva Capella; & eo sic sedente, singuli Cardinales venerunt ad reverentiam, primo Vicecancellarius, deinde alii suo ordine, osculantes primo pedem dextrum, tum manum, & os ipsius electi. Quamquam juxta præscriptum nostri §. novo electo Pontifici Cardinales omnes reverentiam exhibent per ordinem, pedes, manus, & os deosculantes, jam non ambos ejus pedes, manusque, vel post editionem nostri Cæremonialis deosculati sunt, verum primo pedem, tum manum nudam, inde faciem ab utroque latere, ut ait Grassus in suo ms. Diario enarrans electionem Leonis X. ubi etiam addit, multos Prælatos, & Oratores, qui jam eruperant, etiam pedem, & manum deosculatos fuisse. De unius pedis, manusque, ac oris deosculatone mentionem passim faciunt Cæremoniarii Apostolici sequioris ævi in mss. Diariis suis.

§. XXXVII.

Descensus novi electi ad Ecclesiam S. Petri, & ritibus ibidem servandis.

Dum hæc aguntur, portæ Conclavis omnes aperiuntur, repagula, muri que ostiorum, & fenestrarum dejiciuntur; pulsantur Campanæ, & signa lætitiæ omnis generis eduntur. Pontifex novus, præcedente Cruce, & Cardinalibus ad Ecclesiam S. Petri descendit, & prostratus ante Altare sine Mitra aliquandiu orat, agitque gratias Deo, & Beatis Apostolis. Tum surgens, a Cardinalibus super Altare ad sedendum constituitur cum Mitra, & Prior Episcoporum genuflexus incipit, *Te Deum laudamus*, quem Hymnum Cantores prosequuntur. Interim Cardinales pedes electi, manus, & os deosculantur, servato ordine; quod & alii, qui adsunt Prælati, & Nobiles faciunt. Finito Hymno, idem Prior Episcoporum stans a cornu sinistro Altaris, ubi Epistola legitur, dicit super Electum, *Pater noster*; deinde, *Et ne nos &c. Sed libera &c.* Versus. *Salvum fac Domine Servum tuum Electum nostrum.* R. *Deus meus sperantem in te.* Versus. *Mitte ei Domine auxilium de Sancto.* R. *Et de Sion tuere eum.* Versus. *Domine exaudi orationem meam.* R. *Et clamor meus ad te veniat.* Versus. *Dominus vobiscum.* R. *Et cum spiritu tuo.* Oremus. *Omnipotens sempiterne Deus miserere famulo tuo N. Electo in Summum Pontificem, & dirige eum secundum tuam clementiam in viam salutis æternæ, ut te donante tibi placita cupiat, & tota virtute perficiat. Per Christum Dominum nostrum. Amen.* His servatis descendit Electus de Altari, & versus ad Populum solemniter benedicit dicens: *Sit Nomen Domini benedictum.* Tum eodem ordine revertitur ad Cameram Papalem, & ibi quiescit, & Domini Cardinales revertuntur ad propria.

COMMENTARIUS.

I. **D**Um in Capella Conclavis veneratio novo Pontifici a Cardinalibus exhibetur, portæ Conclavis omnes aperiuntur, repagula, muri que ostiorum, & fenestrarum dejiciuntur, pulsantur Campanæ, & signa lætitiæ omnis generis eduntur. Occurrit passim hæc signa lætitiæ in Vitis Romanorum Pontificum, sed non omittendus est tamen hoc loco abusus ille, qui diu vixit, spoliandi scilicet Cardinalis illius cellam in Conclavi, & in Urbe domum, qui electus in Summum Pontificem fuerat. Mentio plane fit hujus abusus in Commentariis Pii II. Libro I. pag. 31. ubi enim publicata est populo laudati Pii II. Papæ ele-

ctio ex alta fenestra Conclavis, tum qui erant in Conclavi Ministri Cardinalium, cellulam ejus spoliavere, atque argentum, quamvis erat modicum, & vestes, & libros diripere, & domum ejus in Urbe vilissima plebs, atque infamis non expilavit tantum, sed dirupit, etiam marmoribus asportatis. Fuisse addit & alios Cardinales affectos damno: Nam suspensio in expectatione Populo, cum varia voces jactarentur, & modo hic Cardinalis, modo ille diceretur electus, procurrare vulgus ad illorum ades, ac rapinam facere, & Genuensis pro Senensi auditus partem substantiæ amisit. Hinc teste Joanne Paulo Mucantio Papalium Cæremoniarum Præfecto in

in suo Diario ms. anni MDXC, ubi enarrat electionem Urbani VII. licet die xv. mensis Septembris circa horam xiv. conclusa fuisset memorati Papæ electio, *non fuit tunc publicata, ut commoditas daretur Conclavistis custodiendi, & conservandi bona Dominorum suorum, ne statim publicata electione, fracto Conclavi, milites, & alii ingrederentur, & bona omnium dilapidarentur, ut solet evenire in similibus.*

II. Hujusmodi rapacitas in novi Pontificis electione, antiquus profecto, & frequens abusus fuit, quem passim deplorant in suis mss. Diariis Cæremoniarum Apostolicarum. Teste Burchardo in suo Cæremoniali §. cxxiii. electo Innocentio Papa VIII, anno MCDLXXXIV. *Conclavista manserunt in Capella majori, ubi scilicet constructæ erant Cardinalium cellæ, per eos ab intus clausa, ne per armigeros, & Custodes Palatii spoliarentur; & cameras Dominorum desolarent, ac bona colligarunt ad domos deportanda.* At mox, multa fuisse abstracta de cella electi Pontificis, quæ alias ad ipsos Apostolicos Cæremoniarios spectabant. Quænam ea fuerint, diximus supra in Commentario ad §. xxxvi. Num. 1. in fine, Ceterum subdit idem Burchardus §. cxxv. ipsum ejusque socium vendidisse totum Conclave, *hoc est, lecticas, banchos, & ligna, quibus camera divisa erant, cuidam magistro de Petra sancta Carpentario pro ducatis xiv. qui solvit tantum duodecim.* Atque hic nota, quam parva olim esset impensa in construendo Conclavi, cum alias hodie in immensum excreverit, tum quia hodie majori commoditate, & magnificentia, ac olim res peraguntur, tum etiam quia tunc temporis paucior erat Cardinalium numerus.

III. Aperto Conclavi, & datis lætitiæ signis ob electionem novi Pontificis, ex præscripto nostri Romani Cæremonialis, *Pontifex novus, præcedente Cruce, & Cardinalibus ad Ecclesiam Sancti Petri descendit, & prostratus ante Altare sine Mitra aliquandiu orat, agitque gratias Deo, & Beatis Apostolis; tum surgens a Cardinalibus super Altare ad sedendum constituitur cum Mitra, & Prior Episcoporum genuflectus incipit, Te Deum laudamus, quem Hymnum Cantores prosequuntur.* Fere hæc concinunt præso Ritui, quem descripsit jam olim Cæremoniale jussu Gregorii X, Papæ editum, & deinde Romanus Ordo Jacobi Gajetani, Cap. x. ubi post narratam venerationem a Cardinalibus, atque ab aliis Papæ novo in Conclavi exhibitam, ita mox subjicit: *Quibus expeditis, Cruce præeunte Papali, ducitur processionaliter a Cardinalibus, & a tota Curia ad Cathedralem, vel ad aliam majorem Ecclesiam loci, in quo est Curia, si locus, in quo eligitur, Civitas non existit: in qua Ecclesia ad Altare ducitur, & ante ipsum Altare prostratus orat diutius; & dum orat, Te Deum laudamus, ab omnibus Clericis solemniter decantatur.* Nulla in hisce Ordinibus sedendi mentio super Altare, videturque hic primum ritus, uti dictum jam superius fuit, Seculo xv. invaluisse; habemusque ejus exemplum in electione Pii II. de quo illius Commentaria Lib. 1. ita inquirunt: *Interim novus Prasul paululum cibo recreatus, in Basilicam S. Petri ductus est, & in Ara majori collocatus, sub qua jacent Beatorum Apostolorum Corpora, & paulo post in sublimi Solio, ipsaque Apostolica Cathedra pro consuetudine sedet. Quo in loco tum*

Cardinales, & Episcopi, tam multi ex Populo ejus pedes exosculati sunt, & in Throno sedentem Christi Vicarium adoraverunt.

IV. Ritu laudabili consuetudine comprobato solet novus Pontifex e Conclavi ad Basilicam S. Petri deferri in sella humeris hominum sustentata, qui iecirco sellarii dicebantur, ut notat Macrius in suo Hierolexico verbo *Sellare*, cujus vox occurrit passim in pervetustis Ordinibus Romanis a Mabillonio descriptis Tomo II. Musei Italici. Perperam autem eam Novatores improbant, tanquam fastus, ac superbiæ notam Romani Pontificis. Constat enim, vel olim Episcopos in sua ipsorum ordinatione fuisse in sella aurea non jam a laicis, sed & ab ipsis Episcopis deportatos; idque abunde ostendimus nostro 1. Tomo Romani Pontificalis in Commentario ad §. xlv. Tituli xiii. Fuit hic præsertim Gallicanæ Ecclesiæ ritus, uti addiscimus ex Eddio in Vita S. Walfridi Eboracensis Archiepiscopi, qui in Francia ordinationis munus consequutus fuerat. Sic enim ille Cap. xii. inquit: *Ibique statim conventio magna facta est non minus quam duodecim catholicorum Episcoporum, e quibus unus erat Egelberthus Episcopus, qui eum propter fidem suam indicatam in sella aurea sedentem, more eorum sursum elevaverunt, portantes in manibus soli Episcopi intra Oratoria, nullo alio attingente, hymnosque, & cantica in choro canentes.* Atque ut alia antiqua exempla omittam, viguit hic ritus Seculo ix. in Ecclesia Altissiodorense, ut patet ex Historia Altissiodorensium Episcoporum, Cap. xxii. ubi Geraunus delatus dicitur *humeris Religiosorum ad Aulam Primicerii Martyrum Christi Stephani.*

V. Laudandus sane præ ceteris Benedictus XIII. qui, ut scribit in ejus Vita Alexander Borghia Archiepiscopus Firmanus, Numero xviii. electus Pontifex Maximus die xxix. mensis Maji anni mdcclxxiv. cum advesperasceret, ad Vaticanum Templum deductus, ubi primum ad sacra Basilica limina venit, e gestatoria sella descendit, pronus oravit, & sacra Limina non sine lacrymis osculatus est, ac nonnisi pedes ipsam Basilicam ingredi voluit, in qua, gestatoria sella uti ex vera humilitatis studio recusavit. Idem referunt in suis mss. Diariis Cæremoniarum Apostolicarum, inter quos ita scribit Philippus Pieris: *Cum electus hora prima noctis pervenisset ad portam principalem Ecclesiæ Vaticanæ voluit descendere, e sella scilicet gestatoria, ac in limine provolutus in genua, eo osculato, preces effudit, ac pedibus suis ad Sacellum Venerabilis Sacramenti reconditi procedens, preces in genuflexorio iteravit, Dominis Cardinalibus genuflexis hinc inde in scamnis pariter orantibus.* Mox ante Aram maximam in infimo gradu supra pulvinare oblongum provolutus in genua similiter oravit. Digna hæc quidem notatu, sed longe illa præstantiora, & a pluribus seculis vix audita, quæ de eodem Pontifice in eodem ms. Diario leguntur, & nota alias plurimis sunt. Non enim, uti mos est, Benedictus XIII. in medio Altaris collocari voluit, ad excipiendam aliam Cardinalium reverentiam, sed in cornu Evangelii supra idem pulvinare. Atque hunc etiam ritum servavit, ubi electus Pontifex in Conclavi primum a Cardinalibus salutatus fuit cum deosculatone pedis, manus, & oris, sive amplexus: *Ascendensque per tres ligneos gradus,*

ru-

rubro colore depictos, inquit laudatum ms. Diarium Pierfantianum, non ad medium Altaris, ut consuetum est, sed ad cornu Evangelii in eodem pulvinari, supra quod scilicet provolutus in genua oraverat, sedit, Cardinales excepturus ad semipublicam venerationem, qui cum magna pressura accedentes, nec Cappas pra multitudine populi explicare valentes, ante Electum genuflexi, pede, ac manu sub auriphrigio deosculatis, ad amplexum fuerunt elevati.

VI. Extat & de hac re præclarissimum ejusdem Benedicti XIII. Pontificis testimonium in quadam Epistola, quam in modum Diarii de electione sua scripsit, misitque ad Ecclesiam suam Beneventanam, quam xxxviii. annis rexerat. In ea autem Epistola sic inter alia inquit: Pontificalibus induti vestibus in Altari in cornu Evangelii sedimus. Nos ipsi hanc Altaris partem elegimus, nequid, quod Sanctorum Reliquiis, quæ in illius parte media collocata fuerunt, indecorum esse videretur, committeremus. Loquitur de prima reverentia exhibita sibi a Cardinalibus in Altari Capellæ Conclavis. Tum vero de alia, quam in Basilica Vaticana excepit, ita subdit: Hic item in Altari, ut factum prius fuerat, sedimus, in cornu scilicet Evangelii, Hymnoque, Te Deum laudamus, Venerabili Fratre nostro Cardinali Judice, qui prior erat Cardinalium, intonante, Cardinales omnes ad publicam adorationem excepimus. Sed nec omittenda ea eximia suæ pietatis argumenta exhibitæ deinde æneo Petri Principis Apostolorum simulacro: Seorsum deinde sacras vestes exuimus, ac pedibus ad eam Templi partem contendimus, ubi Petri Principis Apostolorum anea statua est. Caput illius pedi nostrum subjicimus, atque hunc ea, quæ datum est, animi reverentia, ac religione osculati sumus. Sed hæc satis sint, tota enim Benedicti Vita, quam nos toto ejus Pontificatus tempore observavimus, insignis sanctimonie indicia abundavit.

VII. Juxta nostri Cæremonialis præscriptum sedente super Altare, & quidem in ejus medio, ut jam usus invaluit, novo Pontifice pretiosa Mitra ornato, Prior Episcoporum genuflexus incipit, Te Deum laudamus, quem Hymnum Cantores prosequuntur. Ex præscripto Cæremonialis Gregorii X. cui concinit Ordo Romanus Jacobi Gajetani, non sedebat quidem Pontifex super Altare, dum Hymnus ipse decantabatur, sed ante ipsum Altare prostratus orabat diutius, & dum orabat, Hymnus, Te Deum laudamus, decantabatur solemniter ab omnibus Clericis; videturque mansisse electus Pontifex in oratione usque ad Benedictionem, quam idem post Canticum ipsum, & preces a Priore Episcoporum Cardinalium dictas, descendens de Altari, ut habet nostrum Cæremoniale, Populo impertitur, dicens: Sit nomen Domini benedictum &c. Sic enim inquit memoratum Gregorii X. Cæremoniale, & Gajetani Romanus Ordo xiv. Quo decantato, Prior Episcoporum dicit, Pater noster, & suffragia consueta, & orationem, Omnipotens sempiterne Deus miserere Electo nostro. Qua finita, idem Electus surgit ab Oratione, & dicit, Sit Nomen Domini benedictum, & facit benedictionem; qua expleta, reverenter osculatur Altare, & ut ordinate venit ad Ecclesiam, sic redit ad cameram suam, & signando semper in eundo, & redeundo. Ita plane ha-

bent citati Romani Ordines, in quibus præter primam factam Papæ a Cardinalibus, atque ab aliis pluribus in Conclavi adorationem, statim scilicet post ejus electionem, nullius alius adorationis fit mentio in Ecclesia ad quam e Conclavi descendit; videturque iccirco introductus novus hic ritus Seculo xv. uti constat ex nostro Cæremoniali, & ex Commentariis Pii II. cujus locum supra descripsimus. Sane ex nostri ejusdem Cæremonialis præscripto, dum Cantores Hymnum Te Deum, prosequuntur, Cardinales pedes electi, manus, & os deosculantur, servato ordine; quod & alii, qui adsunt Pralati, & Nobiles faciunt; osculantes scilicet dumtaxat pedem Pontificis, deosculatio enim manus, & oris illius a solis Cardinalibus, & Regibus fit. Facta nihilominus legitur hujusmodi deosculatio ab aliis inferioribus in electione Leonis X. de quo ita scribit in suo ms. Diario Grassus: Demum Oratores alii, & Pralati multi, & Familiares, & amici osculati sunt pedem, quibus ipse Pontifex dedit & manum, & faciem. Agit de reverentia exhibita Leoni ipsi Pontifici in Basilica Vaticana. Fuitque ea peculiaris laudati Pontificis gratia.

VIII. Ex citatis præterea Romanis Ordinibus xiii. & xiv. postquam redierit, electus Pontifex, ad cameram, deponit Pluvialem, & Mitram, & assumit rubeum Mantellum, & habere debet caligas de rubeo panno sine pedulibus, & cum stafilibus, & infulam rubeam de scarleto, & postea parvos calceos de panno eodem, & calceos religiosos usque ad medium de corio rubeo, & tunicas, & vestes de scarleto, & de super pannos albam camisiam, & erit subcinctus cingulo de serico rubeo super camisiam; & ipsa camisia erit ita longa, quod elevata competenter super ipsum cingulum reflectatur. Variarum vocum, quæ in recitato hætenus loco occurrunt, explicatio videri potest apud Dufresne in mediæ, & infimæ latinitatis Glossario, & apud Macrum in Hierolexico. Ceterum Caligæ, tibialia breviora sunt, quibus in Pontificalibus utitur Episcopus, de iisque, ac de aliis Episcoporum indumentis diximus jam non uno in loco, nempe in Commentariis ad Romanum Pontificale, & in Tractatu, De Codice Sancti Evangelii &c. itemque in Commentariis ad Cæremoniale Episcoporum, ubi se se nobis dedit occasio. Teste Ivone Carnotensi in Sermonem, De significatione indumentorum, Episcopus, priusquam sandalia pedibus inponantur, Caligis induitur usque ad genua protensis, ibique constrixis, quia Prædicator pedibus suis rectos debet facere gressus, & genua debilia roborare. Erant antiquitus caligæ Episcoporum coloris cærulei, sive cælestis, ut tradit in suo Rationali Durandus Lib. iii. Cap. viii. At illæ, quibus Summus Romanus Pontifex utebatur, ex panno purpureo erant simul cum sandaliis, in quibus ex corio signata erat pusilla Crux ex testimonio Cæremonialis Davrantæ, qui anno mcccxxv. floruit. Sed de hujusmodi sandaliis jam supra differuimus, sicut & de aliis Papæ indumentis in hoc Commentario. Non omittemus tamen, ubi se se nobis occasio dederit, de iisdem differere in decursu nostrorum Commentariorum ad hunc primum Cæremonialis Librum, & ad alios duos sequentes, ut curiosus Rituum studiosus, vel in hoc Opere earum rerum notitiam inveniat.

§. XXXVIII.

De electo extra Collegium.

Quod si electus esset aliquis extra Collegium, & tamen in Urbe, vel loco vicino, antequam Patres exeant e Conclavi, vocetur nomine Collegii ab aliquibus Prælati, & introductus in Conclavi a Priore Episcoporum, intimetur ei electio, & requiratur ejus consensus; quo habito, omnia fiant, quæ de electo præsentè superius dicta sunt. Si autem non consentiret, iterum ad novam electionem faciendam procedant. Si autem Canonice electus esset absens, ita quod per aliquos dies ejus præsentia haberi non posset; Patres publicata ejus electione, & destinata ad electum idonea Legatione, Conclavi exeant. Legati cum mandatis, & authenticis documentis nominato electionem insinuent, & consensum exquirant; acceptantem, Summum Pontificem saluent, & habitu Pontificali exornent, referantque Patribus; deinde reliqua peraguntur, ut novo electo, & Collegio videbitur. Si autem acceptare noluerit, iterum Domini Cardinales in Conclave revertantur ad novam electionem peragendam.

C O M M E N T A R I U S.

I. **T**ransit mox nostrum Cæremoniale ad Electum extra Collegium, in Urbe tamen, vel loco vicino, & ait, quod *antequam Patres exeant e Conclavi, vocetur nomine Collegii ab aliquibus Prælati, & introductus in Conclavi, a Priore Episcoporum intimetur ei electio, & requiratur ejus consensus; quo habito, omnia fiant, quæ de electo præsentè superius dicta sunt.* Ubi longe a loco Conclavis abesset electus, jam alius servaretur ritus, fuitque mos olim, ut electionis Decretum ad ipsum electum a Cardinalibus mitteretur per aliquos Episcopos, duosque Apostolicæ Sedis Notarios, cui ille assensum præberet. Ita plane factum est, ubi anno MCCXCV. ut aliqua exempla describam, post diuturnam, & perniciosam Cardinalium dissensionem, qua annis duobus, tribusque mensibus, & die uno Ecclesia Summo Pastore orbata fuit, ut ait Pagius, creatus fuit Perusii Cælestinus Papa V. electionis siquidem Decretum ad ipsum Sulmone in Eremita degentem miserunt Cardinales *per Archiepiscopum Lugdunensem, Episcopos duos, duosque Apostolicæ Sedis Notarios*, uti Jacobus Cardinalis Stephanescus scribit in Præfatione ad Acta S. Petri Cælestini, Parte II. Num. XI. rogantes, ut assensum præberet, ac Perusium se conferre dignaretur. Renuit primum Cælestinus fugamque meditatus est; sed tandem precibus, & piis commotionibus victus Pontificatum assumere acquievit. Aquillam itaque Aprutii Urbem se contulit; scripsitque ad Cardinales Perusii agentes, se ob ætatis fervorem longius progredi, non valente, venirent ut ipsi Aquillam, quod ibidem vellet consecrationis munus accipere; *In dicta Civitate Aquila*, inquit Petrus de Aliaco in ejus Vita Lib. II. Cap. XI. *vocato Cardinalium cætu, Pater Sanctus in Festo Decollationis S. Joannis Baptista Coronam, aliaque Apostolica suscepit insignia.*

II. Præscribit quoque & illud noster §. ut *si Canonice electus esset absens, ita quod per aliquos dies ejus præsentia haberi non posset, Patres publicata ejus electione, & destinata ad electum idonea Legatione Conclavi exeant: Legati cum mandatis, & authenticis documentis nomi-*

nato electionem insinuent, & consensum exquirant; acceptantem, Summum Pontificem saluent, & habitu Pontificali exornent &c. Ita plane factum est in electione Gregorii Papæ X. anno MCCCLXXI. Cardinales siquidem, qui jam tribus ferme annis inter se dissidentes fuerant, ubi tandem Kalendis Septembris memorati anni MCCCLXXI. per viam Compromissi elegerunt Viterbii in Summum Pontificem Thealdum, vel Tedaldum, sive, ut alii scribunt, Thebaldum, Vicecomitem Placentinum, Archidiaconum Leodiensem, Virum sanctum, & extra Collegium Cardinalium, atque absentem, tuncque in obsequio Christi in Syria apud Ptolomaidem commorantem cum Eduardo primogenito Regis Anglorum, ubi expectabat tempus opportunum, ut Jerosolymam cum ceteris peregrinis proficisceretur: destinarunt statim Legationem ad ipsum renunciatum Pontificem, qua functi sunt nonnulli Religiosi Prædicatores, & Minores, ut ait Continuator Parisii, electionis litteras deferentes, quibus nunciatum ei voluerunt, delatum sibi Pontificatum, & rogatum, ut quantocyus Viterbium accederet. Legatos, & Cardinalium litteras accepit Thealdus Ptolomaide, ubi Decreto electionis admissio, mense Novembri e Syria navigio recessit, Brundisiumque pervenit Kalendis Januarii anni MCCCLXXII. Beneventum, deinde per Capuam, Marfos, & Sabinos iter faciens, pervenit tandem Viterbium IV. Idus Februarii, ut legitur in Ptolomeo Lucensi. Ceterum non annuisse Pontificem precibus Romanorum Legatorum, qui petebant, ut recto tramite Romam properaret, sed prius Viterbium processisse, constat plane ex ejusdem Litteris *dati Laterani II. Kal. Aprilis* ad Eduardum ipsum primogenitum Regis Anglorum in Syria existentem, apud Raynaldum ad annum MCCCLXXII. Num. II.

III. Ceterum post diuturnam, ut dictum est, Cardinalium dissensionem, qua post obitum Nicolai IV. Papæ annis duobus, mensibus tribus, & die uno, Ecclesia mærore afflicta, & Pastore orbata fuit, ubi demum fessi Cardinales Petrum Eremitam, seu Monachum de Murrhone cognominatum a Monte Murrhonis, quem ex solitu-

litudinis, & pacatoris vitæ desiderio inhabitabat, duobus passuum millibus a Sulmone Civitate distante, Romanum Pontificem renunciaverunt, qui deinde Cælestinus V. dictus est, ad ipsum mox electionis Decretum miserunt per *Archiepiscopum Lugdunensem, Episcopos duos, duosque Apostolicæ Sedis Notarios*, ut Jacobus Cardinalis Diaconus S. Georgii ad Velum aureum scribit in Præfatione ad Acta S. Cælestini, Parte II. Num. xi. rogantes, ut assensum præberet, ac Perusium, ubi electus fuerat, se conferre dignaretur. Franciscus Petrarcha Lib. II. *De vita solitaria*, Sectione III. Capite xviii. scribit illum fuga se subducere meditatum, sed accurrentium populorum pietate ex ea retractum esse. Certe, ut notat in ejusdem S. Cælestini V. Papæ Vita Pagius, Num. iv. electioni de se factæ acquiescere recusasset, nisi urssissent preces Caroli Siciliæ Regis, & Caroli Martelli ejus filii pariter Hungariæ Regis, qui eo accurrerant, & Cardinalis Latini Sacri Collegii Decani, aliorumque, qui hoc unico remedio diuturnis, & maximis Christiani Orbis incommodis subvenire posse protestabantur, & magnis sacramentis superventurorum malorum rationem, nisi acceptaret a Deo decretum & missum Pontificatum, eum coram Supremo Judice redditurum, instanter inculcabant. Atque his victus precibus, & piis commonitionibus, Petrus Pontificatum demum assumere acquievit, dictusque est Cælestinus V.

IV. Denique, ubi Patres Concilii Basileensis, perperam exauthorato Eugenio Papa IV. die v. Novembris anni MCDXXXIX. renunciarunt Summum Romanum Pontificem Amedeum Sabaudia Ducem, qui in Ripalliæ nemore Mona-

sterium construxerat, ibique cum decem aliis nobilibus Viris Eremiticam vitam agebat, ut jam diximus Tomo IV. Conciliorum in Historia Concilii Basileensis, in enarratione Sessionis xxxix. delegerunt, deinde Legatos viginti quinque, quorum princeps erat Cardinalis Arelatensis, ut Acta Patriciana habent, qui cum Nunciis Civitatis Basileensis, & Nobilibus compluribus ad Amedeum profecti sunt, ut electionem ei præsentarent, illiusque consensum exposcerent juxta formam in Decreto Sessionis xxxviii. ejusdem Concilii statutam. Acquievit porro electioni Amedeus, metuens, ut dicebat, ne sic ad universalis Ecclesiæ, & Reipublicæ ministerium necessitate cogente vocatus, ipsius contradictionis reluctatio Divinam contra se indignationem provocaret. Ergo per laudatum Cardinalem Arelatensem, quo vocari vellet nomine, prout antiqui moris est, interrogatus, Felicis V. nomen duxit sibi eligendum, & chlamyde, caputioque, quibus tunc utebatur, depositis, professionem juxta formam Sessionis xxxviii. citati Concilii emisit, & propria manu subscripsit; qua peracta, ornamentis Papalibus eum induerunt, & ad Ecclesiam Monasterii S. Mauritii in prædicto Ripalliæ nemore constitutam solitis solemnitatibus processerunt. Insuper in Sessione xl. die xxvi. Februarii Basileæ habita Felicem V. pro vero Papa agnoscendum, eidemque soli sub censurarum pœna obediendum esse, decretum est, annullatis iis omnibus, quæ Eugenius IV. contra dixisset, vel edidisset. Sed hæc summa fuit audacia, temeritasque Basileensium Patrum, semper enim legitimus Pontifex fuit Eugenius, talisque ab Ecclesia agnitus; Felix vero V. inter pseudopontifices rejectus.

§. XXXIX.

Quid agendum ante Coronationem a novo Electo.

Ante Coronationem suam electus Romanus Pontifex Consistoria tenere non consuevit, neque Provisiones aliquas Ecclesiarum facere. Si tamen aliquo impedimento Coronationem diutius differre oporteret, & urgeret necessitas, Ecclesiis recte posset providere, & omnia, quæ essent pro utilitate Reipublicæ, peragere; & hoc tempore Bulla plumbea Litterarum suarum ab una tantum parte imprimetur, ubi sunt Capita Apostolorum; ab alia autem, ubi literæ sui Nominis imprimi solent, nihil erit. In principio, si prius erat Episcopus consecratus, scriberetur, *Innocentius Episcopus Servus &c.* ut alias. Si autem non esset consecratus Episcopus, scriberetur, *Innocentius electus Servus Servorum Dei*. In fine autem Litterarum, ante datam adduntur hæc verba: *Nec mireris, quod Bulla exprimens nomen nostrum non est appensa presentibus. Nam ii, qui fuerunt hætenus electi in Romanos Pontifices, ante suæ Consecrationis, & benedictionis solemnia in suis bullandis Litteris modum hujusmodi observare consueverunt.* In data autem dicitur loco Pontificatus nostri, suscepti a Nobis Apostolatus officii anno primo.

COMMENTARIUS.

I. **A** It hic præsens noster §. ante Coronationem suam electum Romanum Pontificem Consistoria tenere non consuevisse, neque provisiones aliquas Ecclesiarum facere; si tamen aliquo impedimento Coronationem diutius differre oporteret, & urgeret necessitas, Ecclesiis recte posset providere, & omnia, quæ essent pro utilitate Reipublicæ, peragere. Quid, To. I.

& quotuplex sit Consistorium, ac de variis ad ipsam spectantibus dicemus nos infra suo loco, Titulo ix. hujus I. Libri Cæremonialis. Quantum vero ad illud, quod statuitur de provisionibus Ecclesiarum a Romano Pontifice faciendis ante illius Coronationem, cohæret plane Decreto Nicolai Papæ II. quod edidit Canone I. Romani Concilii, quod celebravit anno MLIX. ubi

ubi agens de electione Papæ, sic inter alia inquit: *Plane postquam electio facta fuerit, si bellica tempestas, vel qualiscumque hominum conatus malignitatis studio resisterit, ut is, qui electus est, in Apostolica Sede juxta consuetudinem inthronizari non valeat, obtinet auctoritatem regendi Romanam Ecclesiam, & disponendi omnes facultates illius. Quod B. Gregorium ante suam ordinationem fecisse cognovimus.*

II. Pro majori loci hujus intelligentia tradit Baronius, & ex eo Pagius in Vita S. Gregorii Magni Papæ I. Num. 111. post electionem novi Pontificis, curam Romanæ Ecclesiæ non electum Pontificem solum gessisse, sed quatuor simul Ecclesiæ Ministros Sacros; quod colligit ex Epistola Romani Cleri ad Scotos data, cum Sedes vacaret morte Severini Pontificis, electusque in locum ejus esset Joannes IV. anno Domini DCXL. sed nondum consecratus. Recitat eam Epistolam Bedæ Libro II. *Historia Gentis Anglorum*, Capite 1x. ejusque principium est: *Dilectissimis & Sanctissimis Thomiano &c. Hilarus Archipresbyter, & servans locum Sanctæ Sedis Apostolicæ, Joannes Diaconus, & in Dei nomine electus, item Joannes Primicerius, & servans locum Sanctæ Sedis Apostolicæ, & Joannes Servus Dei Consiliarius ejusdem Apostolicæ Sedis.* Verum rerum gerendarum potestas, vacante Sede, fuit penes Archipresbyterum, Archidiaconum, & Primicerium Notariorum, nisi contingeret, ut ex illis tribus unus eligeretur Pontifex; tunc enim quartus substituebatur; & Archipresbyter, aut Archidiaconus, qui nomine Diaconi sæpe exprimitur, suum locum servabant, ut liquet ex laudata Epistola, in qua Joannes IV. Diaconus secundo tantum loco nominatur, licet Pontifex electus esset. Profecto si servare locum Sedis Apostolicæ jure electionis ei competiisset, primo loco nominatus fuisset. Electo itaque nihil fuit juris ad res gerendas, donec ordinaretur, ratione electionis suæ, nisi ante eam *inter servantes locum Sedis Apostolicæ* connumeratus fuisset.

III. Jam non modo vacante Sede, ipsi Archipresbyter, Archidiaconus, & Primicerius Notariorum, verum etiam absente Romano Pontifice Romanam Ecclesiam administrabant. Extat in Capite II. Libri Diurni Romanorum Pontificum, Titulo 1. forma Litterarum ad Exarchum de *Transitu Pontificis* scribi solitarum, in qua hæc leguntur: *Domino excellentissimo, atque præcellentissimo, & a Deo nobis longæviter in principalibus ministeriis feliciter conservando, III. Exconsuli Patricio, & Exarcho Italia, III. Archipresbyter, III. Archidiaconus, III. Primicerius Notariorum, servantes locum Sanctæ Sedis Apostolicæ*, ubi III. idem est, quod hodie apud nos N. cum scilicet locus nominis indicatur. Præterea S. Martinus Papa, qui electus fuit anno DCXLIX. in Epistola xv. ad Theodorum ait, in jussione a Calliopa Exarcha scriptum fuisse, quod ipse irregulariter, & sine lege Episcopatum furripuisset, & in Regiam Urbem transmittendus esset, *subrogato Episcopo*, quod, inquit S. Martinus, *nec dum aliquando factum est, & spero, quod nec aliquando fieri habet; quia in absentia Pontificis, Archidiaconus, & Archipresbyter, & Primicerius locum præsentant Pontificis.* Porro animadvertit Garnerius in Notis ad citatum Titulum, Archidia-

conum priore loco a Martino nominatum, cum tamen ille, tam in citata ad Scotos Epistola, quam in illa formula, secundo tantum loco recensetur.

IV. Peculiare itaque privilegium fuit Sancti Gregorii Magni Papæ, quod Clero annuente res administraverit, licet nondum ordinatus esset. In Gregorium, inquit in ejus Vita Pagius, Num. v. veluti si confirmatus esset Pontifex, intenti omnium oculi erant, ut ab eo in tanta, in qua ob pestem ingruentem, calamitate erant, remedii aliquid acciperent. Quamobrem in tanta rerum, & temporis necessitate, Gregorius se pro Pontifice gessit in his dumtaxat, quæ ad expiationem Urbis spectarent, ad luem videlicet evertendam ob quam Prædecessor ejus Pelagius mortuus est. Litanias itaque generales indixit, atque Processiones publicas tam Cleri, quam Populi omnis ordinis, ac sexus. Cujusmodi Litaniarum *septiformis* dictæ ordo sic describitur in Sermone, quem tunc Gregorius ad Populum habuit, qui extat Libro XI. Registri Gregoriani Epistola II. ut per diversarum personarum varias classes, sigillatim ex diversis ipsis assignatis Ecclesiis procederent seorsum Clerici, Viri laici, Monachi, Ancillæ Dei, feminae conjugatæ, Viduæ, pauperes, & infantes. Præter has Litanias, seu Processiones, aliæ sunt Litanie, quibus Sanctorum invocatio continetur, quarum usum multo ante Gregorii Magni tempora viguisse probat Nicolaus Serarius Libro 1. *De Litanis*, Cap. iv. Quicquid sit de origine, & distinctione Litaniarum, notat & illud memoratus Garnerius, non modo fuisse peculiare Sancti Gregorii Magni privilegium, verum etiam *consequentium nonnullorum, quod Clero annuente res administraverint ante Ordinationem.*

V. Notat post alios & hæc eruditus Sandini in Vitis Romanorum Pontificum non uno in loco, præsertim vero in Notis ad Vitam Joannis Papæ IV. & Benedicti II. qui electus Pontifex fuit anno DCXXXIV. Hic quod nondum ordinatus Epistolam scripserit ad Petrum Notarium Regionarium a Leone II. missum in Hispaniam cum Decretis sextæ Synodi, monens illum, ut datum sibi negotium conficeret, & ea quæ ab ipsa Synodo statuta fuerant, ab Hispaniæ Episcopis approbanda curaret, eique Epistolæ hanc inscriptionem præfixerit, *Benedictus Presbyter, & in Dei Nomine Electus Sanctæ Sedis Apostolicæ Petro Notario Regionario*, non obscure nos docet, quod & inter alios in ipsius Benedicti II. Vita notavit Pagius, Num. v. vel in ejus nempe electione, vel paulo ante defuisse morem illum, quem in S. Gregorio, & in Joanne IV. atque in S. Martino observavimus, vacante scilicet Sede Apostolica, vel absente Pontifice, Ecclesiæ regimen fuisse penes Archipresbyterum, Archidiaconum, & Primicerium Notariorum. Cum enim tunc soli illi tres in inscriptionibus Epistolarum nominarentur, & adderetur Nomen Pontificis Electi, si unus ex illis tribus eligeretur, in hac Epistola solus Benedictus electus nominatur; quod certe clare manifestat, regimen Ecclesiæ non penes alios, sed penes ipsum solum resedisse, licet nondum esset Pontifex ordinatus, & consequenter morem illum vel in ejus electione, vel paulo antea defuisse. Benedictum quoque ipsum in favorem S. Wilfridi Eboracensis Episcopi Decretum edidisse, tum

tum, eum adhuc esset Romanus Pontifex electus, asserit Joannes VI. in Decreto absolutionis ejus apud eundem Pagium in illius Vita Num. VII. & Wilfridus ipse coram Synodo Romæ coacta, apud Eddium ibidem laudatum Cap. XLVIII. ut omnia, inquit, reſtitutionis, pietatisque, quæ a Beatissimis Antecessoribus vestris S. Agathone, & electo Benedicto, & Beato Sergio unanimiter erga meam parvitatem decreta sunt, vos largiflua pietatis benevolentia confirmare dignemini.

VI. Post Benedictum II. jam multa exempla occurrunt, quibus docemur, negotiis Ecclesiasticis se miscuisse Romanos Pontifices, licet nondum essent inaugurati. Rectissime id quidem factum est, excommunicatique sunt tandem, qui Litteras a Papa ante suam Coronationem concessas impugnabant. Testem hujus rei habemus Clementem V. Capite ultimo Libri v. Extravagantium comunium, De sententia excommunicationis, ubi ita inquit: Quia nonnulli, prout accepimus, contra doctrinam, Apostoli suæ prudentiæ, quin potius imprudentiæ innitentes, ac disceptare super his, de quibus eis non expedit, satagentes, asserere non verentur, quod Summus Pontifex ante suæ Coronationis insignia se non debet intromittere de provisionibus, reservationibus, dispensationibus, & aliis gratiis faciendis, nec se in Litteris Episcopum simpliciter, sed electum Episcopum scribere, nec etiam uti Bulla, in qua Nomen exprimat ipsius: Nos talium temeritates compescere cupientes, singulos, qui occasione hujusmodi aliquas Litteras nostras super negotiis quibuscumque confectas, quæ a Nobis ante donationis nostræ insignia emanarunt, ausi fuerint impugnare, excommunicationis sententia innodamus. Datum apud Pefecum Burdigalensis Diœcesis, anno II. Hactenus Clementis V. Decretum, quod tamen Joannes de Selva in Tractatu, De Beneficiis, Parte 1. Quæstione II. Clementi Sexto tribuit, ut notat Glossa marginalis in citata Extravagante.

VII. Est itaque in arbitrio Romanorum Pontificum, licet nondum consecrati sint, regimini Ecclesiæ se immiscere, & omnia quæ sunt pro utilitate Christianæ Reipublicæ, peragere. Est tamen laudabilis, ac vetus mos, ut, quousque inaugurati non sint, Bulla plumbea Litterarum suarum ab una tantum parte imprimatur, ubi sunt capita Apostolorum; ab alia autem, ubi sunt litteræ sui Nominis, nihil extet. Bulla plumbea est unum ex tribus sigillis, quibus, ut dictum superius fuit, utitur Romanus Pontifex Maximus, habetque ex una parte amborum Apostolorum Capita, quibus interposita est Crux, uti notat Macrus in Hierolexico verbo, Annulus; additque verbo, Bulla, errare Polidorum Virgilium, qui in Libro, De inventoribus rerum, asserit, Stephanum III. obſignare incœpisse in Bulla plumbea, conservari enim ait Macrus Aretii cum prædicto plumbo Bullam S. Silvestri Papæ, & in S. Angeli Arce de Urbe eodem modo reperiri Bullas Leonis I. Gregorii Magni, & aliorum Pontificum ex relatione Dominici Raynaldi olim ejusdem Archivii Custodis, qui etiam stylum plumbei sigilli a S. Sylvestro incœpisse opinatur. Agit & de eadem re Lupus Tomo VI. Operum editionis Venetæ in Romanum VII. Concilium S. Gregorii VII. ubi enarrat Decretum excommunicationis contra Henricum Regem latæ, eosque refellit, qui exi-

To. I.

stimant Honorium II. Papam electum anno Domini MCXXIV. plumbeam Apostolicæ Sedis Bullam ornasse Capitibus utriusque Apostoli, nempe Petri, & Pauli; quia scilicet ante Honorium II. plumbo eis imaginibus ornato usus jam fuerat Urbanus II. creatus Pontifex anno MLXXXVIII. uti ex Privilegio, quod Bantino apud Apulos Monasterio dedit idem Urbanus, ad annum ipsum MLXXXIII. docet Baronius: Subſequebantur, inquit, subscriptiones, atque sigilla. Porro Pontificum signum, in quo Apostolorum nomina, & a tergo Imagines plumbo fusæ habentur, cum ejusmodi in extimo circulo inscriptione legitur, Benedictus Deus, & Pater Domini nostri Jesu Christi.

VIII. Testis est & idem Baronius ad annum MCH. firmatum fuisse deinde Privilegium illud a Paschali II. additque mox: Extat sigillum sub plumbo pendenti, in quo sunt effigies Beatorum Apostolorum Pauli & Petri ab uno latere, ab alio Nomen descriptum Paschalis Papæ Secundi; in sigilli autem crepidine circumcirca verba ista, nempe, Verbo Domini Cæli firmati sunt. Quocirca, ut notat Lupus citato loco, primus harum Imaginum Author videtur fuisse Urbanus II. & ita mansit usque ad Paulum II. de quo in Citicensis Ecclesiæ Chronico Paulus Langius ad annum MCDLXIV. ita scribit: Hic Papa plumbum contra morem mutavit. Quæ verba exponit quidem historica incogniti compilatio apud eundem Lupum sic inquiens: Paulus Secundus mutavit plumbeum Sigillum Papale. Nam antea semper duo Capita scilicet Petri & Pauli ex uno latere continebat, in alio autem latere nomen Papæ tantum; nunc vero stat in latere uno quasi Imago Papæ insculpta coram populi multitudine, in alia duæ Imagines oblongæ Apostolorum Petri & Pauli. Et de proximo ejus Successore Sixto IV. eadem compilatio rem ad pristinum ritum revocante ad annum MCDLXXI. eadem compilatio hæc habet: Papa Sixtus statim resumpsit Sigillum antiquum Papæ, scilicet duo Capita Apostolorum Petri & Pauli, quod suus Prædecessor Paulus, nempe II. mutaverat. Etiam Clementem Sextum, quod quinque rosas, suæ gentilitiæ arma Papali plumbo inferuerit contra morem suorum Prædecessorum, notavit Albertus Argentinensis. Ceterum, ut testatur Lupus, Clementem ipsum nullum Successorem fuit deinde imitatus. Teste Macro verbo, Bulla, hodie Papa Bullas expeditionum, & collationum in plumbo signat, sed cum hac differentia, quod expeditiones in forma, Dignum, ut ajunt, ex funiculo rubro, & flavo colore contorto plumbum pendet. Quod tandem antiquitus duo-Fratre Cistercienses conversi ad cudendas Bullas applicati erant, hinc Fratres plumbei, seu de plumbo dicti fuerunt; testisque est idem Macrus, translato deinde eo munere ad homines seculares, eosdem in Processione cum aliis Cancellariæ Officialibus incedentes, habitum laicalem Cisterciensium gestasse.

IX. Est & denique antiquus mos ille, quem nostrum Cæremoniale recenset, ut nimirum electus Pontifex in principio Litterarum, si prius erat Episcopus consecratus, scribatur, exempli gratia, Innocentius Episcopus Servus &c. ut alias, si autem non esset consecratus, scribatur, Innocentius electus Servus Servorum Dei. Innocentius iste est Papa Innocentius VIII. cui hoc

L 2

Cæ-

Cæremoniale Augustinus Patricius nuncupavit, uti videre est apud Mabillonium Tomo II. Musei Italici pag. 584. ubi legitur dedicatoria Epistola ejusdem Patricii ad Innocentium VIII. Pontificem. Episcopi nomen reticendum esse a Pontifice nondum consecrato, docent nos antiqua Romanorum Pontificum exempla, ac præsertim Benedicti Papæ II. exemplum a nobis superius allatum, qui electum se appellavit initio Litterarum, quas ante ordinationem scripsit. Non consuevisse autem Pontifices ante consecrationem nomen suum Bullis, seu Sigillis apponere, notat Spondanus ad annum mclxi. & post eum Pagius in Vitis Urbani Papæ IV. Numero V. Gregorii X. Num. ix. & Innocentii V. Num. i. Porro Gregorius ipse dum Viterbii adhuc existeret, ad Philippum Francorum Regem Litteras dedit, *Viterbii iv. Nonas Martii, suscepti a Nobis Apostolatus Officii anno i.* ex quibus constat, eum, antequam Romam pergeret, ut consecraretur, misisse ad laudatum Philippum Regem, Archiepiscopum Corinthium, qui validiora Terræ Sanctæ subsidia ferre suaderet, a quo vigintiquinque millium marcharum argenti ad id operis accepit; ut etiam ex aliis ad Carolum Siciliæ Regem de eodem negotio scriptis per Patriarcham Jerosolymitanum hortatoriis Litteris intelligitur. Quales & ad Venetos, Januenses, & alios dedit, ipseque exemplum, ceteris præbens, ære Ecclesiastico quingentos conscripsit milites, ac multos pedites, tresque triremes a Venetis conduxit, iis transmittendis.

X. Hæc omnia egisse Gregorium Papam X. antequam consecraretur, diserte exprimit Gregorius ipse ad memoratum Philippum datis, quarum hoc est initium: *Gregorius electus Episcopus Servus Servorum Dei, &c.* Ex quo & patet quod & inter alios observavit Pagius citato loco, eum ante Consecrationem, Gregorii nomen summis, licet in bullando Litteras, Gregorii nomen reticuerit; sic enim Epistolam claudit: *Nec mireris, quod Bulla non exprimens nostrum nomen, est appensa præsentibus, quæ ante consecrationis, & benedictionis nostræ solemnia transmittuntur; quia semper ii, qui fuerunt in Romanos electi Pontifices, consueverunt in bullandis Litteris, ante suæ consecrationis munus, modum hujusmodi observare.* Unde non dicit Epistolam datam anno Pontificatus primo, sed *suscepti a Nobis Apostolatus officii anno i.* Descriptam hætenus clausulam Litterarum Pontificiarum, quæ datæ scilicet sunt ante consecrationem, non modo legere est in hujusmodi Pontificiis Litteris, sed & in aliis Cæremonialibus Romanæ Ecclesiæ, ac præsertim in eo quod jussu Gregorii Papæ editum fuit, & in uno membranaceo exarato labente Seculo xiv. quod mihi commodavit litterarum bono natus pius æque ac doctus Venantius Philippus Pierfanctes Apostolicarum Cæremoniarum Magister. Ipsum itaque Cæremoniale, ubi enarratur ritus servandus in electione Papæ, sic inter alia inquit: *Idem vero Electus, in quocumque Ordine fuerit, si scribat aliquas Litteras ante suam consecrationem, bullare faciat ipsas litteras cum illa parte Bullæ, in qua sunt Capita Apostolorum ex una parte, ex altera vero erit plana, cum nondum sit consecratus in Papam; & in salutatione scribat nomen suum sic: N. Electus Servus Servorum Dei dilecto &c. salutem & Apostoli-*

cam Benedictionem; & addit in fine Litterarum ante datam: Nec mireris, quod Bulla exprimens nomen nostrum non est appensa præsentibus, quæ ante consecrationis & benedictionis nostræ solemnia non transmittuntur; quia hi, qui fuerunt hætenus in Romanos electi Pontifices, consueverunt in bullandis Litteris ante suæ consecrationis munus modum hujusmodi observare; & ponitur data in tali loco, x. Kal. Maji suscepti a Nobis Præsulatus officii anno primo. Et Pœnitentiarii dicunt in data Litterarum suarum: Datum &c. Anno primo Præsulatus Domini N. Papæ X. electi Romani Pontificis.

XI. Reliquum est, ut eum explicemus Titulum, quo initio Litterarum Romanus Pontifex uti solet; appellatur enim, *Servus Servorum Dei.* Sane post insolentem illam Joannis Constantinopolitani Antistitis arrogantiam, qui se Œcumenicum Patriarcham nominabat, ut constat ex Epistola xxxix. Libri iv. Registri Gregoriani, ad Sabinianum Diaconum, Constantinopoli Sedis Apostolicæ Apocrisarium anno dxcv. data, S. Gregorius Magnus Pontifex Maximus se semper Servum Servorum Dei inscripsit, teste Joanne Diacono in ejus Vita, 'Libro iv. Cap. lviii. ubi ait, primo illum cepisse ea formula in Epistolis suis se inscribere, ut hanc etiam in Successores transfunderet hæreditatem veræ Apostolicæ humilitatis: *Universalis vocabulum refutavit, & primus omnium se in principio Epistolarum suarum Servum Servorum Dei scribi satis humiliter definivit, cunctisque suis Successoribus documentum suæ humilitatis hæreditarium reliquit.* Hoc nempe persuasum habebat, persuasumque omnibus volebat maximus simul & humillimus Pontifex, veram Episcopi magnitudinem, totam esse in humilitate positam, nec aliud esse Episcopatum, quam divinam quandam servitutem, qua eorum servi Episcopi fierent, quorum viderentur esse Domini. Sacrilegum plane est, quod tartareo calamo scripsit impius Joannes Calvinus irridens Romanis Pontificibus, quod hi illum titulum, *Servus Servorum Dei*, a maledictione Chanaan acceperint, de quo inquit Scriptura Geneseos, Cap. ix. *Maledictus Chanaan servus servorum erit.* Quod quantum sit sacrilegum, ineptumque, atque insulsum dictionum, vel ipsi hæretici animadverterunt.

XII. Sed ut ad memoratum Romani Pontificis Titulum revertamur, cujus initium, ut dixi, Joannes Diaconus S. Gregorio Magno Papæ adscribit, Epistolæ ipsæ Gregorii, prima Libri viii. & prima Libri ix. ita quidem inscriptæ sunt: *Gregorius Servus Servorum Dei Romano Defensori Sicilia; & Gregorius Servus Servorum Dei Innocentio Africa Præsædenti.* Ad hæc Bedæ Lib. i. Historiæ Gentis Anglorum, plures Epistolas refert, quibus Gregorius Laurentium Presbyterum, & Monachos in Angliam proficiscentes commendat, in quibus se Servum Servorum Dei inscribit. Capite enim xxviii. ejusdem Libri unam adducit inscriptam Virgilio Episcopo Arelatenfi cum hoc titulo: *Reverendissimo, & Sanctissimo Viro Fratri Virgilio Episcopo Gregorius Servus Servorum Dei.* Hæc Epistola est lxi. Libri ix. citati Registri Gregoriani, in quo sine illa inscriptione refertur, sicut & quædam aliæ a Bedæ recitatæ. Guffanvillæus quidem in Notis ad Epistolam i. Libri

viii. ejusdem Registri, Romano Defensori Siciliae inscriptam, dicit se dubitare, an nuncupatio illa, *Servus Servorum Dei a Gregorio ibi usurpata fuerit*. Sed ut observat Garnerius in Appendice ad Notas Capituli i. Libri de Ordine Romano, nulla est in toto Gregorii Registro Epistola, quæ non sit a Collectore suis, quæ haberet, solemnibus formulis spoliata; habuisse tamen omnes, vel ex eo uno apertum est, quod ad seculares viros, feminasque, multæ datæ sint, nec ulla tamen domini, dominæque nomen in epigraphæ præferat, quamvis id nunquam omissum, Joannes Diaconus in ejus Vita asserat. Sed & laudatus Beda Capite xxix. refert Epistolam ejusdem Gregorii ad Augustinum Cantuariensem Episcopum, quæ in Registro Gregoriano est xv. Libri xii. & Capite xxx. Epistolam ad Mellitum, quæ in eodem Registro est lxxi. Libri ix. in quibus etiam Gregorius *Servus Servorum Dei* se inscribit, licet in eo Registro ipsæ Epistolæ ea formula spoliatæ sint.

xiii. Observat & hæc inter alios Pagius in Vita memorati Papæ S. Gregorii Magni, estque communis Scriptorum sententia egregio testimonio Joannis Diaconi fulta, ipsum Gregorium fuisse primum qui e Romanis Pontificibus, eum titulum initio Pontificiarum Litterarum adhibuerit. Non diffiteor, S. Augustinum quoque jam longe ante Gregorium quibusdam in Epistolis scripsisse se *Servum Servorum Dei*; ac deinde alios complures Episcopos idem fecisse. At recte docet Thomassinus, Parte i. *Ecclesiæ disciplina*, Libro i. Capite xi. hæc nihil obstare, quin vere dixerit Joannes Diaconus, hæreditarium nomen, *Servus Servorum Dei*, a Gregorio in Romanos deinceps Præsules devolutum

esse. Hæc quippe est Summæ Sedis prima gloria, quæ sola humilitate exaltari potest, ut sola humilitate exaltatus est Princeps Pastorum. Christus in æternum Pontifex.

xiv. Quod illam demum formulam spectat, *Salutem & Apostolicam benedictionem*, quam & initio Litterarum Romani Pontifices apponere consueverunt; scribit quidem in suo Chronico Martinus Polonus, qui claruit anno mclxxvii. S. Cletum fuisse primum Romanorum Pontificum, qui in Litteris ea formula usus est, *Salutem & Apostolicam benedictionem*; quod etiam legitur in Breviario Romano jussu S. Pii V. edito ad diem xxvi. Aprilis, quo idem Sanctus Papa colitur. Sed dubitant eruditi Viri, cum scriptum id primum fuerit a recenti Auctore, qualis est Martinus Polonus, habito respectu ad S. Cletum, qui, ut ajunt, creatus Pontifex fuit anno Christi Lxxvii. nullaque extet Cleti Epistola, quæ faciat ejus rei fidem. Illa formula uti notat in laudati Papæ Vita Pagius, & post eum Sandinus, antiquior non est Seculo vii. quo in fine vergente, Joannes V. & Sergius I. ea usi sunt, ut constat ex eorum Rescriptis a Mabillonio productis in suo Opere, *De re Diplomatica*, Lib. v. pag. 436. & Lib. vi. pag. 622. Ante Leonem IX. vel saltem Gregorium VII. *Formulam istam non fuisse stabili usu receptam*, censet Daniel Papebrochius in Conatu Chronico Historico ad Catalogum Romanorum Pontificum, ad S. Cletum, Num. iv. & Joannes Garnerius Dissertatione i. ad Librum Diurnum eorundem Pontificum, pag. 152. in qua Dissertatione disputat de inscriptione Epistolæ, qua Summus Romanus Pontifex ad alios scriberet, & ad ipsum scriberetur.

DE ORDINATIONE, ET CONSECRATIONE NOVI PONTIFICIS

TITULUS II.

§. I.

De Promotione electi Pontificis ad Sacros Ordines, si illis careat.

Cæterum si electus in Romanum Pontificem non esset in Sacris Ordinibus constitutus, ut de Petro Moroneo Anachoreta, & de quibusdam aliis Patrum nostrorum memoria accidit, statuta per eum die ante diem Coronationis, per aliquem Episcopum Cardinalem, vel alium, si magis placet, ordinetur, & ad omnes Ordines etiam Presbyteratum poterit in eadem die simul, vel interpellatis diebus promoveri, ut placuerit. In promotione autem hæc servabuntur. Convenient in loco, ubi Ordinatio fieri debet, electus Pontifex cum duobus Diaconis, & aliquibus Presbyteris Cardinalibus, Subdiacono, & Acolythis Apostolicis, & omnes convenientibus sibi & tempori paramentis ornentur. Deinde Episcopus Consecrator cum suis Ministris paretur; paretur etiam ante Altare credentia pro Consecratore, & credentia pro Pontifice electo cum rebus opportunis ad Ordinationem.

§. II.

De electi Pontificis Ordinatione in Subdiaconum.

Electus ordinandus ad Subdiaconatum in Sede sua in loco convenienti constituta primo lavet manus, tum supra Rochettum paretur Amictu, ita tamen ut possit imponi supra

ca-

caput, cum tempus erit, Alba, & Cingulo, deinde Pluviale, quod post collum remittit, ut totum retro dependeat, tum Mitram accipiat tempori congruam. Cum omnia parata erunt, Electus accedit ad Altare, procumbet ad orationem sine Mitra, & surgens faciet Confessionem cum Ordinatore, deinde revertetur ad Sedem suam, & leget Introitum &c. ut alias; & Ordinator procedet in Missa more consueto usque ad Collectam ante Epistolam exclusive. Tunc Electus super Faldistorium procumbet sine Mitra, Ordinator autem in scabello ad ejus sinistram cum Mitra, & fiet Litania per Subdiaconum, & cum perventum fuerit ad locum consuetum, surget Ordinator, & benedicet Electum tertio dicens: *Ut Electum &c.* ut in Ordinario. Deinde iterum procumbet, & finietur Litania. Tum Electus sumta Mitra revertitur ad Sedem suam, & Ordinator accedet ad eum, & sedenti cum Mitra ipse stans dat Electo Calicem vacuum cum Patena, & mox urceolos cum vino, & aqua, bacile, & manutergium, Quæ omnia Electus tanget ambabus manibus, Ordinatore dicente: *Vide hujusmodi ministerium &c.* Deinde successive etiam cum Mitra Ordinator dicit: *Oremus Deum Patrem & Dominum nostrum &c.* Tum deposita Mitra dicit: *Oremus. Flectamus genua. Levate.* Et interim etiam Electus surgit sine Mitra, & Ordinator prosequitur: *Domine Sancte Pater omnipotens æterne Deus &c.* Qua finita Oratione, Electus sedet sine Mitra, & Ordinator, accepta Mitra, imponit Amictum super caput Electi, dicens: *Accipe Amictum &c.* qui mox reassumit Mitram, & Ordinator imponit illi Manipulum in brachio sinistro, dicens: *Accipe Manipulum &c.* Tum surgit Electus, extrahitur sibi Mitra, & Pluviale, & Ordinator induit eum Tunica, dicens: *Induat te Dominus veste &c.* Sedet deinde Electus cum Mitra, & Ordinator tradit illi Librum Epistolarum, dicens: *Accipe Librum Epistolarum &c.* Finita Ordinatione Subdiaconatus, si Electus non vult ulterius procedere, reassumit Pluviale, & finitur Missa more consueto.

COMMENTARIUS.

I. **P**otuisse jam olim in Romanos eligi Pontifices non modo Clericatu insignitos, sed & laicos homines, Christianos scilicet & Catholicos, & modo non essent irregulares, docent nos passim Scriptores Vitarum Pontificum, idque ipsum testantur conditores Ecclesiasticorum Annalium, ac præsertim eorum princeps Cardinalis Baronius. Docet inter alios eruditus Sandinus in Notis ad Vitam Joannis XIX. Papæ, primum hunc fuisse, qui *nullis Ordinibus sacris initiatus Pontificium munus suscepit*. Joannem Papam XIX. ante Pontificatum extitisse Episcopum Portuensem, scribit quidem in ejus Vita Ciaconius, sed sine dubio fallitur, nam Glaber Rodolphus Lib. IV. Cap. I. laudatus ad annum MXXIV. a Baronio, ita inquit: *Erat quippe Joannes iste cognomento Romanus, Frater illius Benedicti, cui in Episcopatum successerat, largitione pecunia, repente ex laicali Ordine neophytus constitutus Prasul; sed insolentia Romanorum hujusmodi adinvenit palliatæ subdolositate ridiculum, scilicet, ut quemcumque pro suo libitu in presentiarum ad Pontificatus Officium delegerint, mutato nomine, quod illi prius fuerat, aliquo magnorum Pontificum nomine illum appellari decernunt.* Quibus ex verbis constat, quod observat in ejusdem Papæ Vita Pagius Num. II. hunc Pontificem nomen mutasse, ac Joannem se appellasse, ac insuper ante Pontificatum adeptum, non fuisse Episcopum Portuensem, sed ex laicali Ordine ad Pontificatum assumptum; quod ultimum etiam testatur Hermannus Contractus in auctiori Chronico, Quæ res cum esset inaudita, nullum enim hujusmodi exemplum in electione Romanorum Pontificum præcesserat, Glabri animum forsan

ita commovit, ut scripserit, Joannem *largitione pecunia* fuisse Pontificem constitutum; quod etiam Chronographus Viridunensis, seu Hugo Flaviniacensis Chronici Viridunensis Auctor, qui ineunte Seculo XII. floruit, litteris mandavit.

II. Sed quicquid sit de istius Pontificis electione, indubitatum profecto est illud, jam olim etiam Subdiaconos electos fuisse in Romanos Pontifices. Non desunt qui scribunt, Deusdedit Pontificem ex Subdiacono fuisse electum anno DCXV. In exemplari siquidem Anastasii, quo ad ipsum annum usus est Baronius, ita legitur: *Deusdedit filius Stephani ex Subdiacono sedit annos tres.* Ad quæ verba ita scribit: *Ut autem Subdiaconus Romanus Pontifex crearetur, nunc primum accidit, absque Majorum exemplo, ut plane in Clero magnas fluctuationes concitatas esse, sit argumento. Sed, ut, missis aliis, Deusdedit eligeretur, egregia id ejus sanctitas præstitit, qua mirifice inter tot tenebras illustratus emicuit.* Cum hucusque Viris doctis persuasum fuerit, Subdiaconos in Romanos Pontifices nunquam fuisse electos, ex editione Regia Anastasii, variisque ejus Codicibus mss. prædictus locus in hunc modum restitutus est: *Deusdedit ex patre Stephano Subdiacono;* itaut Deusdedit non fuerit Subdiaconus, sed Subdiaconi filius, ut in illius Vita notavit Pagius Num. II. & post eum Sandinus in Notis ad eandem Vitam. Verum cum ex Liberati Diaconi Breviario, Cap. XXII. constet, Silverium *ex Subdiacono* Romanum Pontificem dictum esse, anno scilicet DXXXVI. & Liberatus eo tempore, quo Silverius fuit electus, vixerit, incertum remanet, quænam ex illis duabus lectionibus sit præferenda; cum correctio prioris falso fundamento nitatur, lapsusque est in eo Baronius, quod asserit, Deusdedit fuisse pri-

primum Pontificem ex Subdiacono electum, cum, uti dictum est, jam longe ante hunc Pontificem Silverius Papa ex Subdiacono fuerit electus.

III. Porro veram esse existimo illorum sententiam, qui docent potuisse olim Subdiaconos in Romanos Præfules eligi, & quidem usque ad Pontificatum Stephani III. aliis IV. qui ejectione Constantino Antipapa, legitime fuit ipse electus anno DCCLXVIII. annoque sequenti, mense Aprili Romæ in Basilica Salvatoris juxta Lateranensem Palatium Synodum complurium Episcoporum celebravit, in quo anathemate percussus est Apostolicæ Sedis inceptor Constantinus, sancitumque Decretum coercendis affectantibus Pontificatum: *Tunc allatis sacratissimis Canonibus*, inquit Anastasius in Stephano III. *eisque liquido perscrutatis, prolata sententia est ab eodem Sacerdotali Concilio, sub anathematis interdicto, ne ullus unquam præsumat laicorum, neque ex alio Ordine, nisi per distinctos gradus ascendens, Diaconus, aut Presbyter Cardinalis factus fuerit, ad Sacrum Pontificatus honorem possit promoveri.* Provisum itaque est rationi, ac modo, quo posthac in Summi Pontificis electione libere procedatur, ex Presbyterorum scilicet Cardinalium, & Diaconorum itidem Cardinalium Ordine ille assumatur; itaut sub anathemate prohibitum fuerit, armata manu quemquam ingredi, ut libere Papa eligeretur, & canonico ritu omnia rite peragerentur. Ab edito memorati Stephani Papæ III. sive IV. Decreto, uti eruditi Auctores notant, ita demum Summus Pontificatus solis Presbyteris, & Diaconis Cardinalibus reservatus fuit, ut nullus alius ex alio Ordine eligi posset; antea enim etiam Subdiaconi eligi poterant, ut de Silverio, & Deusdedit Pontificibus dictum est. Ceterum, quamvis triplex tantum Ordo Cardinalium apud probatos Scriptores reperiatur, fuerunt jam olim in Ecclesia Romana Subdiaconi Cardinales, uti videre est apud Ciaconium, aliosque in Vitis Pontificum, & Cardinalium. Certe apud ipsos legi potest Fridericus Lotharingus a Victore II. Cardinalatu donatus Cardinalis Subdiaconus nuncupatus, successitque deinde in Romanum Pontificatum Victori Papæ II. anno MLVII. dictusque est Stephanus IX. aliis vero X. Omitto alia id genus exempla, quæ videri possunt apud Panvinium, atque Ciaconium, itemque apud Jacobum Cohellium in Notitia Cardinalatus, Cap. VII. in fine.

IV. Itaque neglectum aliquando jam fuit memoratum Stephani III. Papæ Decretum, quo Presbyteris, & Diaconis Cardinalibus Summum Romanum Pontificatum reservavit; ut enim superius dictum est, Joannes XIX. anno MXXIV. ex laicali Ordine repente constitutus Pontifex fuit. Sequioribus seculis ob Decretum Alexandri Papæ III. in Concilio Generali III. Lateranensi editum anno MCLXXIX. Can. I. Papæ electo a duabus partibus Cardinalium nulla exceptio opponi poterat, ut docet Fagnanus in Capite, *Licet VI. De electione &c.* ubi inter alia, inquit, non posse excipi contra Electum, quod non sit de Collegio, licet Jura antiqua aliud viderentur innuere, vel quod Electus sit uxoratus, vel Monachus, ut notat Glossa in Canonem, *Siquis pecunia*, Distinctione LXXIX. & in Canone, *Quam sit*, Causa XVIII. Quæstione II. Varios gravesque in hanc rem Canonici Juris

Interpretes adducit idem Fagnanus citato loco, ubi etiam egregie fuseque enarrat celebrem Gregorii XV. Constitutionem, de electione Romani Pontificis, de qua nos supra compluries loquuti fuimus. Neque enim recentissima hæc Constitutio impedit, quo minus Papa eligi extra Collegium Cardinalium possit, vel ex Ordine laicali; tametsi Sanctissimus Dominus noster Papa BENEDICTUS XIV. Lib. III. *De Servorum Dei Beatificatione, & Beatorum Canonizatione*, Capite XXXI. Num. XI. sapientissime animadvertat, congruum omnino esse, ut ex S. R. E. Cardinalibus Summus Pontifex desumatur. Id quod S. Antoninus in sua Summa, Parte III. Titulo XXI. Cap. II. §. VII. pluribus ostendere conatur, & inter alios monuit quidem Sixtus Papa V. in sua Constitutione L. ubi ita inquit: *Ex eorum corpore, numero, & Collegio ille ipse, qui cunctis Pastoribus est præficiendus, ac totius Domini gregis curam habiturus, Summus Pontifex deligatur.*

V. Si veterem Romanæ Ecclesiæ disciplinam inspiciamus, mos olim fuit, ut ex veterum monumentis eo pertinentibus manifestum est, Diaconos sæpe electos fuisse in Summos Pontifices. Observat id profecto inter alios Paschasius Quesnellus in editione Operum S. Leonis Magni, qui ex Diacono S. R. E. electus Pontifex fuit, nempe compluries accidisse, ut Diaconi potius quam Presbyteri ad Ecclesiæ supremum regimen assumerentur. Primo, quia Diaconi Ecclesiæ res non temporales tantum, sed etiam spirituales penitus noverant; est enim Diaconus Episcopi oculus, & adjutor. Secundo, quia notiores erant omnibus Urbis ordinibus; cum enim omnia in potestate sua haberent, devinciabant sibi facile Clericorum animos, ac laicorum, ad quos olim spectabat suffragiis, bonisque testimoniis Papam eligere. Prævaluisse Romæ jam olim Diaconos, seseque supra Presbyteros extulisse sua paucitate inflatos, notavit non uno in loco S. Hieronymus, cujus loca enarrat Thomassinus Parte I. *Disciplina*, Libro II. Capite XXIX. ubi etiam alias eorum arrogantiae causas recenset, quia nimirum apud Episcopum plurimum poterant, multaque obibant munia Ecclesiastica, de quibus abunde nos alias loquuti fuimus, & in Commentariis ad Œcumenicas Synodos, & Tomo I. Commentariorum ad Partem I. Romani Pontificalis ad Titulum XI. qui inscriptus est, *De Ordinatione Diaconi*. Quicquid sit de ista Diaconorum potentia, & elatione supra Presbyteros, falsum profecto est, quod præter Quesnellum Mabillonius quoque, ac Pagius alique Scriptores passim afferunt, invaluisse olim morem, ut Diaconi potius quam Presbyteri in Summos Pontifices eligerentur. Contrarium enim constabit cuique Romanorum Pontificum Vitas legenti.

VI. Quamquam vero compluries olim acciderit, ut Diaconi ad supremum Ecclesiæ regimen assumerentur, videndum tamen nunc illud est, an is, qui ex Diacono electus erat ad Pontificatum, omisso Presbyterii gradu, mox Pontifex ordinaretur. Sententiam affirmativam tuetur Mabillonius Tomo II. Musei Italici in Commentario prævio ad Ordinem Romanum, Capite XVIII. innixus testimonio Libelli II. Ordinis Romani, in quo, ubi de Romani Pontificis electione mentio fit, hæc leguntur: *Eligitur unus de*

de Cardinalibus de qualicumque Titulo fuerit ; tantum ut a Prædecessore sit Pontifice ordinatus aut Presbyter, aut Diaconus. Nam Episcopus esse non poterit. At vero in ejusdem Electi consecratione nullum est discrimen electi Diaconi, aut Presbyteri, sed una eademque pro utroque præscribitur Ordinatio. Hanc conjecturam roborat primo laudatus Auctor exemplo Constantini contra Stephanum III. aliis IV. pro Pontifice se gerentis, qui cum ex laico a factiosis electus fuisset anno DCCCLXVII. a Georgio Episcopo Prænestino primum Clericus, deinde altero die Subdiaconus, ac demum adventante Dominico die rursus cum multitudine armatorum exercituum in Basilicam Beati Petri properans, Pontifex ab eodem Georgio Episcopo Prænestino, & aliis duobus Episcopis, Eustratio Albanense, & Cironato Portuense consecratus est. Verba sunt Auctoris Vitæ Stephani III. Anastasio vulgo tributæ. Factus est autem Constantinus Clericus die XXVIII. Junii, die XXIX. ejusdem mensis Feria secunda Subdiaconus, & Diaconus, dieque tandem V. mensis Julii, quæ cum Dominica concurrebat, Pontifex Romanus consecratus est. Ex quibus constat, verum esse, quod plerique eruditi Viri docent, Pontifices Romanos ex Diaconis assumptos, per saltum ordinatos esse. In hac enim narratione, ubi memoratus Auctor summa cum diligentia omnem Constantinianæ intrusionis ordinem describit, nulla fit mentio Presbyteratus ipsi collati, quod indicio est, prætermisum prorsus ab eo fuisse. Verosimile quippe est, Constantinum eum Ordinem haudquaquam neglecturum fuisse, si necessarius extitisset, uti in ejus Vita notat Pagi, Num. 1.

VII. Forte quispiam intrusi Pontificis exemplo minus legitime hoc demonstrari posse existimet: sed ecce duo alia allata exempla ab eodem Mabillonio legitimorum Pontificum, Valentini, & Nicolai I. quorum ille anno Christi DCCCXXVII. ex Archidiacono, hic DCCCLVIII. ex Diacono electus, absque alia ordinatione Pontifices creati sunt; quod ex Anastasio manifestum est. Valentinianus quippe statim a sua electione condignis gloriæ laudibus, & honoris plenitudine ad Lateranensem Patriarchium deductus, & in Pontificali est positus Throno. Cujus ovanter ab omni Romanorum Senatu pedibus osculatis &c. Postero die facta est Valentini consecratio in Basilica S. Petri, ut idem Auctor tradit, atque ideo inthronizatio consecrationem præcessit, ut, & contigit in Benedicto III. electo Pontifice anno DCCCLV. qui ante consecrationem inthronizatus fuit, eodem teste Anastasio in ejus Vita. Nicolaus vero Papa postquam in Lateranensi Basilica inthronizatus fuisset, postmodum a Nobilibus, & Populo in Basilicam Beati Petri deductus, præscnte Cæsare consecratus, Apostolicæ sublimitatis in Sede factus est Pontifex, & Missarum solemniam super sacratissimum Corpus Apostoli celebravit; ut idem Anastasius docet, qui nullam utrobique collati Presbyteratus Valentino, & Nicolao ex Diaconis ad Summi Pontificatus apicem evectis mentionem facit. Quod mirum videri non debet, quia fortasse, ut sentit S. Hieronymus in Epistola LXXXV. in Episcopo & Presbyter continetur.

VIII. Sed quicquid sit de hac sententia, quod olim Romæ per saltum Diaconi in Episco-

pos ordinarentur, omisso Presbyteratu, objecit quidem Photius adversus Romanos, estque ejus septima objectio, quam licet ex calumnia oriri asserat Ratramnus Photii confutator, eamque retorqueat in Adversarios, qui ex laicis subito tonsis faciebant Episcopos contra Regulas Ecclesiasticas, non diffitetur tamen facti veritatem Aeneas Episcopus Parisiensis, qui claruit medio Seculo IX. respondetque, quod forte illi, qui istiusmodi ordinationi assentiunt, hoc intelligi velint, quia qui benedictione Pontificali perfungitur, reliquarum benedictionum honore decoratur; sive quia in consecratione Corporis Christi, & Sanguinis, officium Præsulis, ac Presbyteri mystice unitur. Sicut enim in terrarum Regibus diversa dignitates adscribuntur; nam Imperatores ex Consulibus creati, propter Regale commercium, quondam non omittebant, nec mutabant Consulibus, & Patricii nomen; ita credi potest, quod in sublimitate majoris Pontificis consistat etiam honor minoris Sacerdotis. Tum etiam mox hanc ipse aliam conjecturam subjicit: Forsitan autem illi, qui de Diacono ordinant Episcopum, prætermissa benedictione Presbyterali, assertioni Beati Hieronymi loquentis ad Titum, ex parte concedere videntur, qui officium Presbyteri in aliquo comparticipari affirmat ministerio Episcopali. Ex quibus liquet, Aneam admisisse id, quod Photius objiciebat, nempe quod tunc apud Romam plerumque Diaconus quodam saltu, non percepta Presbyterali benedictione, in Episcopum subito consecraretur.

IX. Quo vero tempore mos iste mutatus sit, non satis exploratum habetur. Putat Mabillonius in laudato Commentario prævio ad Ordinem Romanum, Cap. XVIII. tempore intermedio Nicolaum Primum inter, qui scilicet electus fuit anno DCCCLVIII. & Gregorium VII. qui creatus Pontifex fuit anno MLXXIII. Ordinationem per saltum abrogatam fuisse in Ecclesia Romana; additque, id contigisse occasione Photii objectionum, quarum una erat, quod Romani per saltum Episcopos ordinarent. Sed pace tanti Viri jam uno circiter seculo post Nicolaum I. electus fuit ex Diacono Benedictus V. anno scilicet DCCCCLIV. de quo Petrus Bibliothecarius in Vita Joannis XII. apud Papebrochium in Conatu Chronico-historico scribit, quod Romani eundem Benedictum Diaconum in Romanum Pontificem ordinaverunt, nulla facta Presbyteratus mentione. Continuator Reginonis ad annum DCCCCLXIV. asserit, Leonem VIII. antipapam e Pontificatu deturbasse Benedictum V. & tamen ad preces Imperatoris, Diaconatus ei tantum gradu uti concessisse. Ex quo conjectandi locus videtur, eum omisso Presbyteratu fuisse in Romanum Pontificem consecratum, nisi aliquo modo obstaret Luitprandus Ticinensis in Historia sui temporis Lib. VI. Cap. II. ubi postquam retulit depositionem Benedicti V. a Leone VIII. factam, hunc ita loquentem inducit: Benedictum Sanctæ & Apostolicæ Sedis invasorem omni Pontificatus, & Presbyteratus honore privamus.

X. Porro contrarius ritus, ut nimirum ex Diaconis electi ad apicem Romani Pontificatus, prius in Presbyteros, ac deinde in Pontifices ordinarentur, ut idem Mabillonius notat, jam invaluerat Seculo XI. quo tempore Hildebrandus Archidiaconus post Alexandri II. obitum, anno MLXXIII. electus, infra hebdomadam Pen-

teco-

tecostes in Presbyterum ordinatus est, & in Natali Apostolorum in Romanum Pontificem consecratus, ut habent Acta ejus electionis. Unde sub initio Seculi XII. Gelasius II. ex Diacono electus anno Christi MCXVIII. non ante Pontifex consecratus fuit, quam Presbyter ordinatus. Rem narrat testis oculatus nomine Pandulfus in Libro de Romanis Pontificibus, ubi narrato electi in Portum Cajetanum adventu, multorumque ad eum Episcoporum accessu, ita subdit: *In quorum presentia idem Dominus Papa per manus Lamberti Ostiensis, Petri Portuens, & Vitalis Albanensis Episcoporum, cooperantibus Archiepiscopis, & Episcopis multis, assistentibus aliis Viris Religiosis, & cum Guilielmo Duce Apulia, Roberto Principe Capuano, Richardo de Aquila, aliisque Baronibus plurimis, qui tunc ei omnes fidelitatem fecerant, existente Clero, ac Populo infinito, Sancto delatante Spiritu, & effectus est Presbyter, & in Papam Gelasius infra Kalendas Martii consecratus, ubi Petrum Rufum Diaconum Cardinalem, Baronem, Subdiaconum, & me Pandulfum Ostiariam, qui hac scripsi, in Lectorem, & Exorcistam promovit, & plures alios in minoribus gradibus ordinavit.* Ex his manifestum est, Gelasium II. ut jam & de Gregorio VII. notavimus, seorsim accepisse Sacerdotii gradum ante Pontificatum. Atque ita tempore intermedio Nicolaum I. vel Benedictum V. inter & Gregorium VII. ordinationem per saltum abrogatam fuisse in Ecclesia Romana, ex dictis hactenus conjicere licet.

XI. Agens inter alios eruditos Scriptores & de Ordinationibus per saltum clarissimus Edmundus Martene Libro I. *De antiquis Ecclesiæ ritibus*, Cap. VIII. Articulo III. Num. IX. & X. nulla Pontificum Valentini, & Nicolai I. mentione facta, de quibus jam supra egimus, scribit Paulum I. electum anno DCCLVII. & Hadrianum itidem I. anno DCCLXXII. electum, videri etiam ex Libro Pontificali ordinatos per saltum, fuerant enim antea tantum Diaconi, & ante Gregorium VII. unicum exemplum adducit, quod constet, eam consuetudinem jam abrogatam fuisse. Observat namque ex Leone Marficano Libro II. *Chronici Casinensis*, Cap. XCVIII. Stephanum Papam IX. alius X. electum anno MLVII. Alphonsum Salernitanæ Sedis electum ordinatum, *in jejuniis Martii primo Presbyterum, deinde sequenti Dominica Archiepiscopum consecrasset, ac cum honore Salernum remisisset*; ideoque non multo ante S. Gregorium VII. electum anno MLXXIII. qui primus ex Diaconis videtur esse, qui prius Presbyter, & postea Romanus Pontifex consecratus est, ut habent Acta ejus electionis superius allata, & uti non obscure innuit Ordericus Vitalis Lib. VII. *Historiæ Ecclesiasticæ*, ubi ita de ipso Gregorio VII. scribit: *Per singulos gradus Ecclesiasticorum Ordinum usque ad Summi Pontificatus apicem ascendit.* Atque hæc sunt quæ memorati Auctores docent de ordinatione per saltum aliquando Romæ usitata; quod tamen negat eruditus Lupus Tomo III. Operum editionis Venetæ in Dissertatione, *De Octava Synodo Generali*, Cap. V. quo enumerantur, ac refutantur Photii in Romanam, ac omnem Latinam Ecclesiam calumniæ, quarum nona ea erat, *Quod Diaconus non suscepto Presbyteratus Officio apud nos Episcopus ordi-*

netur. Multa sane in confutatione hujus calumniæ adducit Lupus, sed nullam tamen exemplorum superius narratorum mentionem facit, quæ opponi possent; quinimo sine ulla hæsitatione ibidem affirmat, quicquid sit de aliis Ecclesiis circa eum ordinandi abusum per saltum, nullum adduci exemplum ex Ecclesia Romana.

XII. His notatis, devenio nunc ad ordinationem electi in Pontificem, qui quidem ex præscripto Cæremonialis, Gregorii Papæ X. jussu editi, sive Ordinis Romani XIII. apud Mabillonium, Num. V. in quocunque Ordine constitutus promovebitur ad majores Ordines secundum formam, qua alii ordinantur; hoc tamen salvo, quod ipse Electus Amictu, & Alba indutus, & Cingulo subcinctus, cum Manipulo tantum, si est Subdiaconus; si vero est Diaconus cum Stola super leteram partem, sedebit in Faldistorio suo, tenens Mantam suam, Pluviale non indutum, sed post collum, & Mitram in capite (1) tempori congruam, & sic debet ordinari. Ordinator venit coram ipso, & orationes debitas dicet, & alia faciet, quæ in Ordine, quem confert, fieri consueverant. It attende, quod dum idem Electus ordinatur, Diaconus Cardinalis, & Subdiaconus Capellanus assistent ei in lavando manus, & induendo, sicut alias fieri consuevit, dum Papa celebrat, & erunt induti vestimentis sacris, & debitis, & eidem Electo postmodum duo debent assistere Diaconi Cardinales, qui ei serviant, ut est moris; & isti etiam vestibus sacris congruis erant vestiti, etsi alii Cardinales cujuscumque Ordinis non essent induti. Ordinator vero habebit suos Ministros, qui ei in Subdiaconi, & Diaconi habitu ministrent. Eadem sunt, quæ in ms. Pierianiano Codice leguntur correctius tamen, quam apud Mabillonium, qui Cæremoniale Gregorii X. seu Ordinem XIII. Romanum multis scatentem mendis descripsit.

XIII. Præterea ex ejusdem Cæremonialis præscripto, Electo ad Ordinem ordinato, post susceptum Ordinem, & vestimentis Ordini debitis receptis, Mantum, sive Pluviale, sicut dictum est, post collum reassumet, & cum venerit ad horam (2) communicandi, Ordinatus ad ipsum Ordinatorem ad Altare venit, & Ordinator eum reverenter (3) communicabit; & sic omnibus peractis, reverenter Missa expleta, ipse Electus, dicet, Sit Nomen Domini benedictum; & facit benedictionem. Qua dicta, Ordinator ter dicit eidem Electo, Multos annos, flectendo genua coram eo, ut est moris, & altiori voce semper dicendo. Idem Electus nullum servitium in Altari faciet Ordinatori, nec Epistolam, nec Evangelium cantabit &c. Atque hi sunt Ritus, qui olim servabantur, ubi electus Papa nondum Sacris initiatus, ad aliquem Majorem Ordinem promovebatur, in cujus etiam Ordinatione quædam cæremoniæ omitti solent, quæ in aliorum Ordinatione præteriri nullatenus debent juxta præscriptum Romani Pontificalis, quod jam nos in tres Tomos distributum abunde explicuimus. Porro quod Electus vel in Subdiaconum ordinatus, sive in Diaconum, vel in Presbyterum, per ea verba, Sit Nomen Domini benedictum, adstanti Populo benedicat, Ordinatorque ter eidem Electo genuflectens dicat, Ad multos annos, præscriptum etiam habemus ex nostro Cæremoniali a Patricio con-

M

cinna-

(1) Apud Mabillonium legitur, ipso. (2) Mabillonius legit, coronandi. (3) Legit idem, coronabit.

cinnato, uti videre est inferius in fine §. iv. *De Electi ordinatione in Presbyterum.*

XIV. His notatis, enarranda nunc quædam sunt, quæ nostrum hoc Cæremoniale præscribit, ac primum illud, ubi edicitur, ut si electus in Romanum Pontificem non esset in Sacris Ordinibus constitutus, *statuta per eum die ante diem Coronationis, per aliquem Episcopum Cardinalem, vel alium, si magis placet, ordinetur; & ad omnes Ordines, etiam Presbyteratum poterit in eadem die simul, vel interpellatis diebus promoveri, ut placuerit.* Quæ fuerit olim interstitiorum disciplina in Ordinatione servanda, jam abunde explicuimus Tomo I. Romani Pontificalis in Commentariis ad Titulum II. Non desunt tamen exempla vetera æque, ac recentiora, quibus docemur, uno eodemque die, & in unius celebratione Missæ collatos non modo Diaconatum, & Presbyteratum, verum etiam Episcopatum. Ita plane factum est iv. Christi Seculo cum S. Epiphanio, qui, ut legitur in ejus Vita apud Surium die xii. Maji, Pappo Episcopo professus Clericum se nondum esse ab eo nihilofecius uno die, unaque Missæ celebratione Diaconus simul, & Presbyter, & Episcopus ordinatus est: *Eum itaque ordinat Diaconum, & rursus dat ei pacem, & ipsum ordinat Presbyterum. Rursus fit consequentia, & eum ordinat Episcopum.* Vox *consequentia*, Missæ continuationem significat; uti notat Thomassinus Parte I. *Disciplina*, Libro II. Capite lxxxvi. Num. xv.

XV. Non ergo mirum, si Seculo xiv. Clemens Papa VI. Subdiaconatum, Diaconatum, & Presbyteratum in Festo Natalis Christi ad singula Missarum solemnia Delphino Viennensi contulerit: *Hic Papa*, ita de ipso Clemente VI. in Annalibus suis ad annum mccccli. scribit Monachus Rebdorfienfis, *Humbertum Delphinum fecit Patriarcham Antiochenum, & in Festo Nativitatis Domini, quod fuit in Sabbatho, ipsum promovit ad tres Sacros Ordines. In prima Missa galli cantus ordinat ipsum in Subdiaconum, in secunda Missa ortus diei ordinat ipsum in Diaconum, in summa Missa in Sacerdotem; & eodem die ipse Delphinus Missam celebravit; & post octo dies ipsum Papa consecravit Episcopum.* Missam jam olim solemniter a Romano Pontifice dictam statim post ipsius conse-

crationem, docet nos Nicolai Papæ I. exemplum, de quo ita scribit in ejus Vita Anastasius: *A nobilibus, & populo in Basilicam B. Petri deductus, præsentem Cæsarem consecratus, Apostolicaque sublimatus in Sede factus est Pontifex, & Missarum solemnia super sacratissimum Corpus Apostoli celebravit.* Sed & illud etiam docet Innocentius III. quod *solus Pontifex Romanus, qui ante Hymnum Angelicum consecratur, & postmodum ipse Missarum solemnia incipit, & perficit consecratus, in die consecrationis suæ valeat Ordines celebrare.* Sed hæc insignis prærogativa est unius Romani Pontificis Maximi, sicut & illa, ut uno eodemque die possit ad Sacros Ordines promoveri præsertim ubi ipsa interstitiorum dispensatio reservata fuit Sedi Apostolicæ.

XVI. Quod vero tandem Ordinationem spectat electi in Papam, jam cautum est ex antiquis Romanæ Ecclesiæ Cæremonialibus, ut ipse electus *in quocumque Ordine constitutus promoveatur ad majores Ordines secundum formam, qua alii ordinantur, hoc tamen salvo, quod ipse electus Amictu, & Alba indutus, & Cingulo subcinctus, cum Manipulo tamen, si est Subdiaconus; si vero est Diaconus, cum Stola super lavam sedebit in Faldistorio suo tenens Mantum, sive Pluviale non indutum, sed post collum, & Mitram in capite tempori congruam; & dum debet ordinari, Ordinator veniet coram ipso, & orationes debitas dicet, & alia quæ in Ordine, quem confert, fieri consueverunt.* Tradit hæc in suo ms. Cæremoniali Bruno Joannes Davantrias, quod mihi humanissime commodavit præstantissimus Præsul Ignatius Reali primus Apostolicarum Cæremoniarum Præfectus. Sed nec omitendum, quod idem Cæremoniale post docet: *Es attende, inquit, quod dum idem Electus ordinatur, Diaconus Cardinalis, & Subdiaconus assistent ei in lavando manus, & induendo, sicut alias fieri consuevit, dum Papa celebrat, & erunt induti vestimentis sacris debitis, & eidem Electo postmodum duo debent assistere Diaconi Cardinales, qui ei serviant, ut est moris, & isti etiam vestibus sacris congruis erant vestiti, alii Cardinales cujuscumque Ordinis non erunt induti. Ordinator vero habebit suos Ministros, qui ei in Diaconatu, & Subdiaconatu, & aliis ministrant.* Eadem leguntur in Codice Pierfanctiano.

§. III.

De Promotione ad Diaconatum.

Si vero placuerit ad Diaconatum procedere, Ordinator apud Altare in suo Faldistorio prosequitur Collectam diei cum oratione pro Ordinando sub eodem *Per Dominum*; & dicetur Epistola suo ordine. Qua finita, si Electus ante electionem erat Subdiaconus, paretur in principio, sicut diximus, addito Manipulo, & finita Epistola procumbat in Faldistorio, & fiet Litania, ut diximus. Si autem tunc ordinatus est, finita Epistola surgat, & deponat Tunicellam, & iterum sedeat cum Mitra, & Pluviali a collo; Ordinator autem ad eum accedit, & stans cum Mitra dimissis aliis rebus dicit: *Oremus dilectissimi Deum Patrem Omnipotentem &c.* Et cum pervenerit ad *Per omnia secula*, in Præfatione, deponit Mitram, & prosequitur Præfationem usque ad eum locum, ubi dicitur, *& quæ sunt agenda concedere*, tunc Electo sine Mitra sedenti imponet ipse solus dexteram manum super caput, dicens: *Accipe Spiritum Sanctum ad robur &c.* Deinde prosequitur Præfationem usque in finem. Tunc deposito Pluviali, & Mitra ab Assistentibus, Electo stanti Ordinator cum Mitra ponit illi Stolam super humerum

merum finistrum dicens; *Accipe stolam candidam &c.* Deinde induit eum Dalmatica, dicens: *Induat te Dominus &c.* Et mox tradit illi sedenti Evangeliorum Librum dicens: *Accipe potestatem &c.* Quo facto, Electo sine Mitra surgente, Ordinator deposita Mitra versus ad Altare dicit: *Oremus*, Et Ministri: *Flectamus genua &c.* Et ipse prosequitur versus ad Electum: *Exaudi Domine &c.* & , *Domine Sancte Pater &c.* His completis, si noluerit ad ulteriora procedere, Missa suo ordine finitur. Si autem ad Presbyteratum tunc erit promovendus, Ordinator revertetur ad suum Faldistorium, & leget Graduale, & *Alleluja*, sive Tractum; & postea procedet ad Ordinem Sacerdotalem, ut sequitur. Quod si Electus erat prius Diaconus, parabuntur omnia, ut supra, & ipsi addetur Stola super laevam in formam Diaconi.

COMMENTARIUS.

I. **P**Ræter pauca quædam, quæ, ut superius notatum fuit, in Ordinatione electi Papæ ad maiorem aliquem Ordinem omittuntur, jam cetera peraguntur sicut in aliorum Ordinationibus, juxta præscriptum Romani Pontificalis. Certe, ut mandat Cærimoniale Gregorii Papæ X. jussu editum apud Mabillonium, Tomo II. Musæi Italici, Ordinandus Papa electus nullum servitium in Altari faciet Ordinatori, nec Epistolam, nec Evangelium cantabit, nec ante receptionem Ordinis Diaconatus

dicitur illa postulatio, Postulat Mater Ecclesia &c. Illa petitio non est necessaria in Papa, quia scimus, per omnia esse dignum; nec etiam cum promovetur ad Ordinem Presbyterii, eadem postulatio dicitur. Plura quæ & ad hunc Commentarium spectant, videri possunt in Commentario superiori, ubi attulimus locum ms. Cærimonialis Joannis Davantriæ. Ceterum de ritu ordinandi Diaconum, jam fuse differuimus nos Tomo I. Romani Pontificalis in Commentariis ad Titulum XI,

§. IV.

De Electi ordinatione in Presbyterum.

Electus Pontifex in Ordine Diaconatus existens, cum ad Presbyteratum voluerit ordinari, parabitur, ut supra diximus, & in Missa procedetur usque ad *Alleluja*, sive Tractum exclusive, ut prædictum est, & tunc Pontifex electus paratus Amictu, Alba, Cingulo, Manipulo, Stola in modum Diaconi, & Pluviali a collo retro pendente, procumbit super Faldistorium ad Litaniam, si non est facta; & illa, ut præmissum est in Subdiaconatu, finita, revertitur ad Sedem suam; Ordinator vero cum Mitra ad Electum sedentem accedens manus ambas super Caput Electi detectum imponit, nihil dicens; & idem faciunt omnes Episcopi, sive Presbyteri Cardinales præsentés, accedentes tamen cum reverentia, & detectis capitibus. Deinde Ordinator stans cum Mitra, extenta manu super Electum stantem dicit: *Oremus Dilectissimi Deum Patrem Omnipotentem &c.* ut in Ordinario. Deinde deposita Mitra, *Oremus*; Ministri, *Flectamus genua*, *Levate*; & rursus, *Exaudi nos quæsumus Domine*; & in fine expansis manibus dicit Præfationem, *Per omnia secula seculorum &c.* usque in finem. Deinde deponitur Pluviale Electi, & Ordinator accedens cum Mitra reflectit Orarium electo ante pectus in modum Crucis: *Accipe jugum Domini &c.* Et mox imponit illi Casulam ad scapulas a parte anteriori pendentem dicens: *Accipe vestem Sacerdotalem &c.* Post hæc, deposita Mitra Ordinator super Electum dicit: *Deus sanctificationum omnium Auctor*; & finita Oratione, genuflexus ad Altare incipit Hymnum, *Veni Creator Spiritus*; & similiter Electus genuflexus; & dicto primo versu surgit, & alii prosequuntur; ipse vero Ordinator accedit cum Mitra ad Electum sedentem etiam cum Mitra, & inungit ei ambas manus de Oleo sancto Catechumenorum, producens cum pollice suo intincto duas lineas a pollice dextræ manus Electi ad indicem finistrum, & a pollice sinistro ad indicem dextrum, & mox palmas, & reliqua intus perungit dicens: *Consecrare, & sanctificare &c.* Manus Electi ita perunctæ, una super alteram ponuntur, & in mappula a collo pendente, ut fit in Episcopis, reponuntur. Tunc Ordinator deterso aliquantulum digito cum mica panis, tradit in manus Electi Calicem cum vino & aqua, & Patenam cum Hostia, quæ omnia Electus tangit, Ordinatore dicente: *Accipe potestatem offerre Sacrificium &c.* Quibus peractis, Electus in Sua Sede, & Ordinator in suo Faldistorio lavabunt manus cum mica panis & aqua. Deinde legatur Evangelium more solito, & Liber offeretur osculandus Electo. Tum Ordinator dicit: *Dominus vobiscum*, & Offertorium; & mox accedet ad Electum sedentem cum Mitra, & ipse sine Mitra accipiat de ejus manibus offertorium,

intorticia accensa, panem, & vinum, ut est moris; & per singula osculatur manum Electi offerentis. Post hæc revertitur Ordinatus ad Faldistorium, & iterum tam ipse, quam Electus lavant manus, & statim intrant ad Altare. Electus accedit ad cornu Altaris, ubi dicitur Epistola, & Presbytero Cardinale ministrante, & serviente de Libro, stans sine Mitra, voce submissa omnia dicit cum Ordinatore, & cum ipso concelebrat, signando, & etiam verba Consecrationis cum ipso proferendo, non tamen movet se de loco suo usque ad Communionem, & proceditur in Missa in omnibus, ut consuetum est; & post Secretam de die dicitur Secreta pro Ordinato sub eodem, *Per Dominum*. Postquam Ordinator sumserit sacram Eucharistiam, & partem Sanguinis Christi cum particula Corporis, quæ erat intus, communicet Electum stantem in ipso cornu de Corpore, & Sanguine Christi, & postea ambo purificentur cum vino, ut eis placuerit. His peractis, Electus revertitur ad Sedem suam cum Mitra, & Ordinator cum Mitra lavat manus. Deinde accedens ad Electum, stans sine Mitra, dicit super Electum stantem sine Mitra Responsorium: *Jam non dicam vos servos &c.* Quo finito, Ordinator imponit ambas manus super ejus caput dicens: *Accipe Spiritum Sanctum; quorum remisistis &c.* Et mox explicat Casulam, quæ in scapulis erat Electi, dicens: *Stola innocentie induat te Dominus*. Quibus finitis, imponitur Mitra Electo. Et tam Ordinator, quam alii Cardinales, & Prælati assistentes recipiuntur ad osculum manus, pedis, & oris Electi. Post hæc Ordinator redibit ad Altare, & perficiet Missam cum Oratione pro Ordinato; & dicto, *Ite Missa est*; vel, *Benedicamus Domino*, Electus Crucem ante se habens, stans sine Mitra in medio Altaris benediet omnibus, dicendo: *Sit Nomen Domini benedictum &c.* Et mox Ordinator sine Mitra accedens versus Electum tertio genuflectens cum distantia convenienti ter dicit: *Ad multos annos*; & solus recipitur ad osculum oris; & sic expleta Ordinatione exuet se vestibus sacris cum orationibus consuetis. Et hic modus de benedictione, & *Ad multos annos*, servatur etiam, si Ordines acciperet in pluribus diebus sigillatim.

COMMENTARIUS.

I. **E** Adem fere hæc sunt, quæ olim jam plenius luculentiusque statuerat Cæremoniale Gregorii Papæ X. jussu editum, ubi nempe ritum describit ordinandi electi Papæ in Presbyterum. Postquam enim edixit, in ea Papæ ordinatione omittendam esse postulationem illam, quæ in Romano Pontificali legitur in Ordinatione Diaconorum, Presbyterorumque, *Postulat Mater Ecclesia*, quia scilicet non est necessaria in Papa, quem scimus, per omnia esse dignum, ut ex eodem Cæremoniali addiscimus, & ex ms. Codice Pierfanctiano, ita deinde subjicit: *Cum ad ordinem Presbyteratus ordinari debet, induetur cum ea solemnitate, qua dictum est, habendo Stolum super humerum, & Manipulum in brachio; nec tamen habebit Tunicellam, nec Dalmaticam; nec calciabitur Sandalibus, nec habebit pectorale, nec Fanonem, sed solum Amitum, & Albam, & fiet Letania, ut consuevit; & demum Ordinator coram ipso stans ordinat eum more consueto in aliis, & manus Oleo sancto inungit, imponendo ei primo manum, & omnes Presbyteri Cardinales Presbyteri similiter, & ponit ei Casulam, & reflexo ei primo Orario, ut est moris, super utrumque humerum: quibus omnibus, ut in ordinatione Presbyterorum continetur, peractis, & Casula ei extensa ad dorsum per Ordinatorem, & peracta, (seu ut legitur in Pierfanctiano ms. Codice, parata) a Ministris, idem Electus lavabit manus suas cum mica panis, ut moris est. Quo facto, recipit ad pedem, & osculum omnes Episcopos, Presbyteros, & Diaconos Cardinales, necnon & alios Prælatos, qui adsunt, in ordine suo. Codex Pierfanctianus post Cardinales habet: Ordinatorem quoque, necnon & alios Prælatos, qui assistunt Ordinatori suo.*

II. Cantatur deinde Evangelium, & quidem per alium ex præscripto Cæremonialis Gregorii X. ut enim superius notatum fuit, Electus ipse nullum servitium in Altari facit Ordinatori, nec Epistolam, nec Evangelium cantat; quinimo cantato Evangelio, non quidem Ordinator, sed idem Electus osculatur sibi delatum Evangelium, ut est moris, inquit laudatum Gregorii Cæremoniale, ex cujus etiam præscripto post dictum, Dominus vobiscum, & Oremus, per Ordinatorem, idem Ordinator venit coram eodem Electo, & recipit de manu ejus duos magnos panes, duas phialas vini, & duo torticia, osculando ei manum; quo facto, redit ad Altare Ordinator, & Ordinatus, & unus Presbyter Cardinalis eidem Electo ordinato servit de libro in Altari in Missa, docendo, & instruendo ipsum, quia scilicet juxta ritum Ordinationis Presbyterorum concelebrare debet Ordinatori, juxta antiquum morem a nobis jam explicatum Tom. 1. Romani Pontificalis in Commentariis ad Titulum xii. qui est, de Ordinatione Presbyteri. Porro postquam Ordinator communicaverit, prefatus Electus de manu Ordinatoris super Altare communicabitur, (perperam apud Mabillonium legitur, cum coronaverit, & coronabitur) & omnia rite agentur usque ad finem Missæ. De Communionem sub utraque specie sumenda a Papa ordinato in Presbyterum, ut habet Cæremoniale nostrum ab Augustino Patricio ordinatum, jam nulla expressa habetur mentio in Cæremoniali Gregorii X. Papæ jussu edito, sicut nec in ms. Codice Pierfanctiano. Ceterum consuevisse olim saltem alicubi Presbyteros in sua ipsorum ordinatione non modo Corpus Christi, sed & Sanguinem in Missa Ordinatoris accipere, docet ex ms. Pontificali Ro-

Romano Bibliotheca Colbertina Edmundus Martene Lib. 1. De antiquis Ecclesia Ritibus, Capite VII. Articulo IX. Num. XIX.

III. Facta Communionem omnia rite aguntur, sicut praescriptum est in Romano Pontificali hodierno, usque ad finem Missae: *Qua finita, Ordinator dicit, Multos annos, ut dictum est. Sit Nomen Domini benedictum, praecinetur per ipsum Electum, prout superius est expressum, ubi scilicet de promotione Electi ad Diaconatum actum fuit. Ita plane docent nos & Gregorii X. Cereemoniale, atque ms. Codex Piersanctianus. Tandem, uti ex iisdem Libris addiscimus, idem Electus exuatur reverenter, ut moris est, dicendo Psalmos debitos, scilicet, Benedicite, & laudate Dominum, & Antiphonam, Trium puerorum; & Ordines hujusmodi recipiet, electus scilicet Pontifex nondum ordinatus, Presbyteris praesentibus, & a quocumque Episcopo sibi placuerit, Cardinale, sive alio. Tum vero mox addunt: Totum hoc agatur die Sabbati; die vero Dominico sequenti consecrabitur, nempe in Episcopum, si sibi placuerit; si vero consecrari noluerit, sed ex aliqua causa, differret conse-*

crationem quousque consecratur, Missam nec publice, nec private cantabit. Porro teste Grassio in ms. Diario, ubi enarrat gesta Pontificatus Leonis X. de Ordinatione hujus Pontificis in Presbyterum peracta die xv. Martii anno Christi MDXIII. erat etenim Diaconus cum electus Summus Pontifex fuit v. Idus ejus mensis, ipse Leo ordinatus est Presbyter a Cardinale Sancti Georgii, qui & Camerarius, & Episcopus Ostiensis erat. Sed notanda potissimum sunt quae idem Grassus mox subdit: Et ipse, Cardinalis scilicet Ordinator, cum non antea Pallium Archiepiscopale habuisset, timuit, quod non posset consecrare novum Pontificem; unde consilium petiit a multis, qui sibi consuluerunt, nunc unum, nunc aliud, & ego vero consului, & sic feci, quod antequam Papa fieret Presbyter, cum adhuc esset Diaconus, daret ipsemet Pallium eidem Episcopo Ostiensi, & fuit bene factum, quod omnibus placuit. Tradit demum, factam fuisse hanc ordinationem in Aula Pontificum inferiori, quia superior erat vacillans, & male firma, ac in periculo ruina; eique ordinationi Cardinales omnes interfuisse ex devotione sua.

§. V.

Si Electus nullum haberet Ordinem.

Hæc Ordinatio condecorate fieri poterit die Sabbati præcedente diem Dominicum consecrationis Episcopalis. Quod si forte electus in Papam esset merus laicus, nam & laicus eligi potest, dummodo sit Christianus, & Catholicus, accipit & primam Tonsuram, & minores Ordines, ut alii inferiores, nisi quod erit indutus cum Rochetto, & Manto post collum, & Mitra. Et in suo Faldistorio recipiet instrumenta Ordinum, & habitum, & non dicuntur monitiones, sive exhortationes, sed a substantialibus incipitur.

COMMENTARIUS.

I. **P**osse in Papam eligi merum etiam laicum, modo Christianus sit, & Catholicus, jam diximus supra in Commentario ad I. & II. §. Est autem illius opinionis Archidiaconus in Canone, Nullus, IV. Distinctione LXXIX. ut si eligatur in Papam, qui non sit Cardinalis, priusquam promoveatur, Cardinalis creari debeat. Annuit & huic opinioni Jacobus Cohellius in sua Cardinalatus Notitia Cap. XVI. Privilegio I. ubi etiam ait, licet Cardinalium Collegium non possit creare Cardinalem, permittendum id illi esse favore electionis Romani Pontificis, ut facilius, & rectius procedat. Sed hæc inutilis opinio est, nullum enim occurrit exemplum, quod

nos doceat, non Cardinales electos in Summos Pontifices, donatos fuisse a Sacro Collegio Cardinalitia dignitate. Certe quamvis prisci Canones, quales sunt apud Gratianum Canon, Oportebat III. & Canon, Nullus, IV. Distinctione LXXIX. aliud viderentur innuere, recte tamen docet inter alios Pagnanus in Cap. Licet VI. De electione &c. ob novam Alexandri III. Constitutionem editam in Generali Concilio Lateranensi Can. I. cui addi & possunt aliorum subsequentium Pontificum Constitutiones, Papæ electo objici haud posse, quod non sit de Collegio Cardinalium, aut quod sit laicus, vel uxoratus.

§. VI.

Consecratio Electi in Episcopum sine Benedictione, & Coronatione.

Episcopalis Consecratio electi in Romanum Pontificem, si prius non erat Episcopus, fieri debet secundum Majorum nostrorum Constitutiones eadem die, qua benedicatur, & coronatur. Sed quoniam nostris temporibus brevitatis studio alio die facta est, ut in persona felicitis recordationis Sixti Papæ Quarti, qui cum fuit electus, Presbyter tantum erat, primo ponemus ordinem ipsius consecrationis Episcopalis

palis sine Benedictione, & Coronatione; deinde Consecrationem cum Benedictione, & Coronatione.

COMMENTARIUS.

I. **S**I priscam Ecclesiæ Disciplinam inspiciamus, jam non ex Episcopis, sed ex Presbyteris, aut ex Diaconis creabantur Summi Romani Pontifices, uti notatum superius fuit. Lapsu temporis cœpere in Pontifices eligi Episcopi non modo ex ipso Cardinalium Collegio, sed etiam extra eorum Collegium, qualis postremus fuit Barii in Apulia Archiepiscopus

Bartholomæus Prignanus, qui in Romano Pontificatu Urbanus VI, appellatus est, Ab hoc tempore semper Pontifices electi sunt ex ipso Collegio Cardinalium, siue hi essent Diaconi, siue Presbyteri, siue Episcopi. Hoc autem notandum censui pro majori præsentis §, intelligentia. Sed de his vide quæ mox dicemus in Commentario sequenti.

§. VII.

Quomodo consecratur in Episcopum.

Si igitur Electo placet consecrari ante solemniam Coronationis, & privatim in hoc poterit fieri, quando ei placebit, sed convenientius die Dominico, vel Festivo, & fiet hoc modo. Die præstituto, & in loco ipsi Electo commodo tam Consecrator, quam Electus parabuntur omnibus paramentis Pontificalibus cum Psalmis, *Quam dilecta*, & aliis orationibus consuetis. Electus Chirothecas, & Annulum tantum non accipiet, alia autem omnia. Assistent ad minus duo vel tres Diaconi, & unus Presbyter Cardinalis, & cum ipso Consecratore, si est Episcopus Cardinalis, ut decet, duo alii Episcopi Cardinales, reliqui Subdiaconi, & Acolythi Apostolici, & Prælati domestici omnes cum paramentis sibi convenientibus. De Prælatiis tamen paratis præter Cardinales non est necessarium, sed fiet pro libito Pontificis. Parentur duæ credentia, una pro Electo, & altera pro Consecratore, & unum Altare tantum. Pro Electo paratur Sedes ornata in loco competenti, & Faldistorium ante Altare. Pro Consecratore Faldistorium consuetum in cornu Epistolæ, pro aliis scabella consueta. In credentiis parentur opportuna ad consecrationem, & ad celebrationem Missæ pro utrisque, cum luminaribus opportunis in Altari, & credentia. Paratis omnibus rebus, Electus accedat ad Altare, & deposita Mitra procumbat super Faldistorium. Orabit, & surgit, & remoto Faldistorio faciet Confessionem cum Consecratore a sinistra sibi assistente. Finita Confessione, Electus cum Mitra revertetur ad Sedem suam. Consecrator accedet ad Altare, osculabitur, incensabit, si placuerit, more solito; & reversus ad suum Faldistorium leget Introitum, & *Kyrie eleison*, & alia usque ad *Allelaja*, siue ad ultimum Versum Tractus exclusive, & cum Oratione diei dicitur Oratio pro Electo, ut supra. Idem faciet Electus in sua Sede cum suis Assistentibus versus ad Altare. His dictis, Electus procumbet cum Mitra in Faldistorio ante Altare, Consecrator ab ejus sinistris super aliquo scabello, alii autem in suis scabellis, & per unum ex Subdiaconis fit Litania; nam examinatio, *Antiqua Sanctorum Patrum*; & alia præcedentia omittuntur. Cum ventum erit ad locum, ubi dicitur: *Ut hunc Electum* surgit Consecrator, non tamen cum Baculo, & versus ad Electum tertio dicit signans, *Ut hunc Electum &c.* Et alii omnes Episcopi Cardinales cum suis Libris procumbentes tamen erecta aliquantulum facie idem faciant. Finita Litania, surgunt omnes, & Electus revertitur ad Sedem suam, & sedet cum Mitra. Consecrator venit ante eum, & aliis prætermisissis stans cum Mitra, simul eum adjuvantibus Episcopis Assistentibus Cardinalibus, imponit Librum Evangeliorum supra cervicem Electi sine Mitra sedentis; nam tunc Mitra ei abstrahitur, quam duo Diaconi retinent usque in finem; & Consecrator, atque Assistentes Episcopi ponunt ambas manus super caput Electi dicentes: *Accipe Spiritum Sanctum*; quod tamen Consecrator alte dicit, alii submisse, ut alia omnia. Si aderunt alii Episcopi parati, poterunt & ipsi manus imponere, & omnia legere, ut Cardinales assistentes. Deinde surgit Electus, & Diaconi assistentes retinent Librum super illius spatulis; Consecrator autem sine Mitra dicit super eum Orationem: *Populæ Domine supplicationibus nostris, & inclinato super hunc famulum tuum cornu gratiæ Sacerdotalis, Bene & dictionis tuæ in eum infunde virtutem. Per Dominum nostrum Jesu Christum Filium tuum, qui tecum vivit & regnat in unitate Spiritus Sancti Deus.* Deinde voce mediocri extensis manibus ante pectus dicat hanc Præfationem: *Per omnia secula seculorum.* Responsio. *Amen. Dominus vobiscum.* Responsio. *Et cum Spiritu tuo. Sursum corda.* Responsio. *Habemus ad Dominam. Gratias agamus Domino Deo nostro.* Responsio. *Dignum & iustum est. Vere dignum &*

justum est, æquum, & salutare, nos tibi semper, & ubique gratias agere, Domine Sancte, Pater Omnipotens, Æterne Deus, honor omnium dignitatum, quæ gloriæ tuæ famulantur Ordinibus. Deus, qui per Moysen famulum tuum secreti familiaris affatu inter cetera celestis documenta cultura, de habitu quoque indumenti Sacerdotalis instituens, electum Aaron mystico amictu vestiri inter sacra jussisti, ut intelligentiæ sensum de exemplis piorum caperet sequutura posteritas, ne eruditio doctrinæ tuæ ulli deesset ætati. Cum & apud veteres reverentiam ipsam sanctificationum species obtineret, & apud nos certiora essent experimenta rerum, quam ænigmata figurarum. Illius namque Sacerdotii anterioris habitus nostræ mentis ornatus est, & Pontificalem gloriam jam non nobis honor commendat vestium, sed splendor animarum. Quia & illa, quæ tunc carnalibus blandiebantur obtutibus, ea potius, quæ in ipsis erant intelligenda, poscebant, & ideo huic famulo tuo N. quem Apostolicæ Sedis Præfulem, & Primatem omnium, qui in Orbe terrarum sunt, Sacerdotum, & universalis Ecclesiæ Doctorem dedisti, atque ad Summum Sacerdotii ministerium elegisti, hanc quasumus Domine gratiam largiaris, ut quicquid illa velamina in fulgore auri, in nitore gemmarum, & in multimodi operis varietate signabant, hoc in ejus moribus, actibusque clarescat. Comple in Sacerdote tuo ministerii tui summam, & ornamentis totius glorificationis instructum celestis unguenti rore sanctifica. Tunc Consecrator genuflexus, & sine Mitra versus ad Altare incipit Hymnum: *Veni Creator Spiritus*; & tam Electus, quam alii genuflectunt eodem modo. Finito primo versu, surgunt omnes, & Chorus prosequitur Hymnum. Interim caput Electi sedentis in sua Sede circumligatur panniculo lineo subtili per Diaconum, ne oleum fluat super capillos, itaut panniculi extremitates retro super cervicem pendeant. Deinde Consecrator accedens ad Electum cum Mitra, & intincto pollice dextræ manus in Sacro Chrismate, stans ungit caput Electi sedentis, formans primum signum Crucis, quo coronam totam amplectatur. Deinde ungit reliquum coronæ, dicendo: *Ungatur, & consecretur caput tuum celesti bene* ✠ *ditione. In Nomine Patris* ✠ *& Filii* ✠ *& Spiritus Sancti* ✠ *Amen. Pax tibi. Et cum spiritu tuo*; & absterse aliquantulum pollice cum mica panis, deposita Mitra, prosequatur Præfationem incipiens: *Hoc Domine copiose in caput ejus infuat, hoc in oris subiecta recurat, hoc in totius corporis extrema descendat, ut tui spiritus virtus, & interiora ejus repleat, & exteriora ejus circumtegat. Abundet in eo constantia Fidei, puritas dilectionis, sinceritas pacis. Sint speciosi munere tuo pedes ejus ad evangelizandum pacem, ad evangelizandum bona tua. Da ei Domine ministerium reconciliationis in verbo, & in factis, in virtute signorum, & prodigiorum. Sit sermo ejus prædicatio non in persuasibilibus humanæ sapientiæ verbis, sed in ostensione spiritus, & virtutis. Da ei Domine Claves Regni Cælorum, ut utatur, non ut glorietur potestate, quam tribuis in ædificationem, non in destructionem. Quodcumque ligaverit super terram, sit ligatum & in Cælis; & quocumque solverit in terra, sit solutum & in Cælis. Quorum detinuerit peccata, detenta sint, & quorum dimiserit, tu dimittas. Qui maledixerit ei, sit ille maledictus, & qui benedixerit ei, benedictionibus repleatur. Sit fidelis servus & prudens, quem constituas tu Domine super familiam tuam, ut det illi cibum in tempore opportuno, & exhibeat omnem hominem perfectum. Sit solitudine non piger, sit spiritu fervens. Oderit superbiam, humilitatem, ac veritatem diligat, neque eam unquam deferat, aut laudibus, aut timore superatus. Non ponat lucem tenebras, nec tenebras lucem. Non dicat malum bonum, neque bonum malum. Sit sapientibus, & insipientibus debitor, ut fructum de profectu omnium consequatur. Tribuas ei Domine Cathedram Pontificalem ad regendam Ecclesiam tuam, & plebem tuæ sortis intra Mundi limites universi. Sis ei auctoritas, sis ei potestas, sis ei firmitas. Multiplica super eum bene ✠ ditionem, & gratiam tuam, ut ad exorandam semper misericordiam tuam tuo munere idoneus, & tua gratia possit esse devotus. Per Dominum nostrum Jesum Christum Filium tuum, qui tecum vivit, & regnat in unitate Spiritus Sancti Deus, per omnia secula seculorum. Responsio. Amen. Post hæc Consecrator inchoat, Schola prosequente, Antiphonam: *Unguentum in Capite, quod descendit in barbam, barbam Aaron: quod descendit in oram vestimenti ejus, mandavit Dominus benedictionem in seculum. Psalmus. Ecce quam bonum, & quam jucundum habitare Fratres in unum. Sicut unguentum in capite, quod descendit in barbam, barbam Aaron. Quod descendit in oram vestimenti ejus, sicut ros Hermon, qui descendit in Montem Syon. Quoniam illis mandavit Dominus benedictionem, & vitam usque in seculum. Gloria Patri, & Filio &c. Sicut erat &c.* Deinde repetatur Antiphona: *Unguentum in capite.* Interim imponitur napula*

pula ad collum Electi sedentis, supra quam imponit postea manus, & Consecrator inungit illi manus cum sacro Chrismate, ut sit aliis Episcopis, dicens: *Ungantur manus istæ de Oleo sanctificato, & Chrismate sanctificationis; sicut unxit Samuel David Regem, & Prophetam, ita inungantur, & confirmentur. In Nomine Dei Patris & Filii & Spiritus Sancti* facientes Imaginem Sanctæ Crucis Salvatoris nostri, qui nos a morte redemit, & ad Regna Cælorum perduxit. Exaudi nos pie Pater Omnipotens, Æterna Deus, ut quod te rogamus, exoremus per Christum Dominum nostrum. Amen. Oremus. Deus Pater Domini nostri Jesu Christi, qui te ad Pontificatus sublimari voluit dignitatem, ipse, qui per Samuelem David in Regem, & Prophetam inunxit, te nostro ministerio Chrismate, & mysticæ delikutionis liquore perfundat, & spiritualis bene & dictionis ubertate fecundet, ut quicquid benedixeris, benedicatur; & quicquid sanctificaveris, sanctificetur; & consecratæ manus istæ, vel pollicis impositio cunctis proficiat ad salutem, Per eundem Christum Dominum nostrum.

COMMENTARIUS.

I. **D**E Consecratione Electi in Episcopum fufe jam differuimus Tomo nostro I. Romani Pontificalis in Commentariis ad Titulum XIII. Si paucos excipias ritus, eo fere modo, ac eisdem propemodum orationibus, quibus ceteri Presbyteratu jam initiati in Episcopos consecrantur, consecrari & Summus Pontifex solet. Sed antequam ritum ipsum enarrem, notandum hic primo illud cenſeo, diu nempe illam in Ecclesia Romana vigiſſe disciplinam, ut aliarum Ecclesiarum Episcopi ad Summum Romanum Pontificatum minime promoverentur. Joannes Mabillonius in Præfatione ad Seculum v. Benedictinum §. 1. Num. vi. existimat, a Formoso e Portuensi Episcopo electo Papa anno dcccxi. incœpiſſe labem illam, quam a Romanis Pontificibus paſſa est Ecclesia Seculo x. quæ tam magna fuit, ut etiam actum fuiſſet de illa sanctiſſima Sede, si monſtris violari, atterive potuiſſet: *At id temporis, inquit, eam tenuerant piſſimi plerique Pontifices; nec quifquam fere omnium ejus sanctitatem antea, majestatemque temeraverat, quin humana, siquæ ipſis excidiſſent, errata, illustri pœnitentiæ exemplo diluiſſent. Inviolabilis apud eos erat Canonum sacrorum auctoritas, qua suam ipſi potestatem ultro moderabantur. Et ne longius exempla ſumamus, ita Seculo ix. vixerant poſt Leonem III. ejusque Succeſſores piſſimos, Nicolaus I. re & nomine Magnus, Hadrianus II. & Stephanus VI.* Sed o lugenda Roma, inquit Arnulphus Auri-lianensis Antistes apud Gerbertum, quæ noſtris majoribus clara Patrum lumina præbuiſti, noſtris temporibus monſtruoſas tenebras, futuro ſeculo famoſas offudiſti: *A Formoſo Pontifice incœpit mali labes, ſive is cauſa fuerit, ſeu occaſio. Nempe hic Portuensis primum Episcopus, a Joanne VIII. in ordinem reſta-tus est in Synodo Romana, interpoſito juramento, ſe in communione laica perpetuo permanſurum. Hujus exauſtorationis cauſæ tres. Prima quod a Nicolao I. in Bulgariam miſſus, Bulgarorum Regem ſacramento obſtrinxiffet, ne alium Episcopum, ipſo ſuperſtite, a Sede Apoſtolica ſuſciperet. Deinde, quod contra præſcripta Canonum per ambitum ab Ecclesia Portuensi ad Romanam proſilire conatus eſſet. Poſtremo, quod inconſulto Pontifice propriam deſeruiſſet Eccleſiam, & relicta Urbe contra Reipublicæ, & Imperii ſalutem, cum ſuis fautoribus conſpi-raſſe crederetur. Marinus Pontifex a depoſitione, & juramento abſolvit Formoſum, qui poſt Hadrianum III. &*

Stephanum VI. potius V. in ſupremum illum Thronum ſublimatus eſt, primuſque inſauſtum translationis exemplum in illa Sede præbuit Vir ceteroqui vera religione, divinarumque Scripturarum, & doctrinarum ſcientia clariffimus, teſte Luitprando Lib. 1. Cap. viij.

II. Haſtenus Mabillonius, cui tamen aſſentiri nequeo in eo, quod ſcribit, Formoſum fuiſſe vel cauſam, vel occasionem maxime illius labis, quam paſſa eſt Romana Eccleſia Seculo x. ſaltem ex eo Capite, quod contra præſcripta Canonum, ad Romanam Sedem e Portuensi proſilierit. Hoc enim, ut ſcite advertit Pagius in ejuſdem Formoſi Vita, Num. III. non erat Canonicum impedimentum, ne Summus Pontifex eligeretur; quod eruitur ex Stephani V. ejus deceſſoris Episto-la ad Baſilium Imperatorem ſcripta, & a Baronio anno dcccxxxv. rela-ta, in qua Marinum Pontificem vindicans a calumnia, antea Episcopum ordinatum fuiſſe negat; quod etiamſi verum eſſet, potuiſſe tamen in Sede Principis Apoſtolorum collocari: *Quid vero, inquit, magnus ille Gregorius cognomento Theologus? Nonne Nazianzeno translatus eſt? Et Meletius Sebaſta Antiochiam, & Doſitheus Seleucia Tarſum Ciliciæ? Et Reverentius Archiphanice Tyrum? Joannes Gordonia Procon-neſum? Theodorus Apamea Selymbriam? Alexander Cappadocia Hiopolim? Et multi alii diverſis in locis translati ſunt e ſuis ſedibus ad alienas?* Joannes etiam VIII. non damnavit Formoſum ex eo, quod crederet, ejus translationem eſſe contra præſcripta Canonum, ſed quia per ambitionem a minori Eccleſia, ſcilicet Portuensi, ad majorem, ſcilicet Romanam, proſilire conatus fuiſſet, ut legere eſt in ejus Episto-læ frag-mento apud laudatum Pagium in Vita Joannis Papæ VIII. Num. vi. Quare Stephanus VI. vulgo VII. Formoſi Succeſſor ſævitia ſua, ac odio in Formoſum mortuum, ſolam juſtitie umbram prætexere potuit, ideoque hæc Eccleſiæ labes, quam obtendit Mabillonius, ab illo Stephano initium ſumiſſe videtur, non vero a Formoſo, qui teſte Luitprando ab eodem Mabillonio lau-dato, religionis integritate, divinarumque Scripturarum ſcientia clariffimus fuit.

III. Porro Stephanus ipſe Papa VI. aliis VII. eodem quo electus eſt anno dcccxcvi. circa initium menſis Decembris latrociniali Romæ convocata Synodo, ſepulcrum Formoſi violavit, ipſumque mortuum exhumari juſſum, in judicium vocavit, & in Cathedra Pontificia cum Sa-cerdo.

cer dotalibus indumentis collocatum his verbis tanquam viventem sacrilege compellavit: *Cum Portuensis esses Episcopus, cur ambitionis spiritu Romanam universalem Sedem usurpasti?* Tum sacris vestibus exutum tribus abscissis digitis, in Tyberim jactari præcepit, *cunctosque quos ipse ordinaverat, gradu proprio depositos iterum ordinavit*, inquit Luitprandus Lib. I. Cap. VII: Tam execrandum Stephani facinus referunt inter alios Annalista Freherianus, & Hermannus Contractus juxta editionem Canisianam, uterque ad annum DCCCXCVI. Prior enim postquam mortem Bonifacii VI. retulit, ita deinde subjicit: *In cujus Sedem successit Apostolicus nomine Stephanus, vir fama infamandus, qui antecessorem suum Formosum inaudito more de sepulcro ejectum, & per Advocatum suæ responsionis depositum foras extra solitum sepultura Apostolica locum sepeliri præcepit*. Hermannus vero Contractus de eodem Stephano ita scribit: *Qui tyrannis favens, & Arnulphum odians, Formosum Papam octavo post obitum mense effossum, & in sella positum, loquente pro eo Diacono, criminatum, & quasi convictum degradavit &c.* Ceterum hæc omnia Stephani VI. ejusque pseudosynodi Acta, jubente Concilio Romano sub Joanne IX. anno I. ejus Pontificatus, Christi vero DCCCXCVIII. tanquam impia, atque nefaria, igni sunt tradita.

IV. Quamvis vero qui Formosi ordinationes irritas esse, ideoque a Stephano VI. jure iteratas contendebant, hanc potissimum obtenderent rationem, quod Concilii I. Nicæni Canone XVI. prohibetur, ne Episcopus, Presbyter, aut Diaconus a Civitate in Civitatem transferatur; idque si factum fuerit, in irritum prorsus ducatur; ac præterea, quod Canonibus I. & II. Concilii Sardicenis decernitur, ut Episcopus, qui ex avaritia, aut ambitione Sedem mutaverit, nec laica fruatur communione, licet excuset se, quod populus eum postulaverit; censebantque iccirco Formosum velut istorum violatorum Canonum reum a Sacerdotali gradu ad laicorum sortem cecidisse; qui nempe a Portuensi Episcopatu ad Romanum transfolarat, adeoque nec ipsum fuisse legitimum Papam, nec consequenter Ordinationes Sacras conferre potuisse: scitissime tamen defendit Formosum Auxilius in Opusculo, quod de Ordinationibus Formosi scriptum ad Leonem Nolanæ Ecclesiæ Episcopum, quodque anno MDCLV. inferuit suo, *De sacris Ordinationibus*, Operi eruditus Joannes Morinus, Auxilius ergo Lib. II. Capite II. egregie docet, Canonibus Nicenis, & Sardicenis migrationes Episcoporum non prohiberi, quæ necessitate, vel utilitate Ecclesiæ postulante, fiunt; id quod etiam auctoritate Concilii Chalcedonenfis, SS. Leonis, atque Gregorii Pontificum, necnon S. Gregorii Nazianzeni, aliorumque, quorum translationes, & migrationes ab Ecclesia sunt approbatæ, exemplis confirmat; quibus addita exempla possunt, allata a Stephano V. in Epistola ad Basilium Imperatorem superius a nobis descripta. Certe Formosus necessitatis causa de Portuensi Ecclesia pro vitæ merito ad Apostolicam Sedem provectus est, ut inquit Patres Concilii Romani sub Joanne Papa IX. Canone III. Quod satis erat, ut ejus promotio esset Canonica: *Quia quod fit præter regulam, modo fit ex justa causa, non infringit regulam; ut ait To. I.*

Symmachus Papa in Epistola XII. ad Avitum Viennensem Episcopum.

V. Neque vero post Formosum solus ille mos invaluit, ut Episcopi aliarum Ecclesiarum ad Romanum Pontificatum promoverentur, verum etiam sequioribus seculis nonnulli ita electi Romani Pontifices una cum ipso Pontificatu Romano suos Episcopatus retinere. Sic Clemens Papa II. electus Pontifex Maximus anno MXLVI. Bambergensem retinuit, Leo IX. anno MXLIX. Tullensem, Victor II. anno MLV. Aistettensem, Nicolaus II. anno MLVIII. Florentinum, Alexander II. anno MLXI. Lucensem, & Alexander IV. anno MCCLXI. Ostiensem, ac Veliternum, de quo inter alios Scriptores ita scribit Ptolomæus Lucensis Libro XXI. *Historia Ecclesiastica*, Capite XVII. apud Muratorium, Tomo XI. Scriptorum Rerum Italicarum: *Hic Pontifex hanc famam habuit, quod fuerit vir magna humilitatis, & pietatis; unde tradunt aliqua historia, quod fuerit Episcopus Ostiensis, & interdum ibat Ostiam, & Veletum, ibique prædicabat verbum Dei, vel coram se prædicari faciebat, ibidemque suis Clericis Ordines conferebat, & in causis suorum subditorum assistebat*. His adde Paulum IV. qui, ut in Clementis II. Vita notat Sandinus, retinuit Episcopatum Neapolitanum, itemque Benedictum XIII. ac feliciter regnantem, & sanctissime universam Ecclesiam verbo, & exemplo regentem BENEDICTUM XIV. quorum prior nostra hac ætate Beneventanum, alter vero Bononiensem una cum Romano Pontificatu retinere.

VI. His præmissis, devenio nunc ad ritum quo Romanus Pontifex Presbyteratu insignitus consecrandus est in Episcopum. Certe, *si Electo placet consecrari ante solemniam Coronationis, & privatim, hoc poterit fieri, quando ei placebit, sed convenientius die Dominico, vel Festivo*, ut recte in hoc §. edicatur. Vetustissima enim ea est Ecclesiæ disciplina, ut die præsertim Dominico Episcopi consecrarentur; testemque habemus S. Leonem Magnum in Epistola LXXXIX. adversus Hilarium Arelatensem, quod aliarum Provinciarum Episcopos ordinare præsumeret, inter alia, & hæc ad Viennensis Provinciæ Antistites scripsit Cap. VI. in fine: *Non passim, sed die legitimo Ordinatio celebretur; nec sibi constare status sui noverit firmitatem, qui non die Sabbati, vespere, quod luceat in prima Sabbati, vel ipso Dominico die fuerit ordinatus. Solum enim Majores nostri Resurrectionis Dominicæ diem hoc honore dignum judicaverunt, ut Sacerdotes, qui sumuntur, hoc die potissimum tribuantur*. Dulcissime inquit ex Majorum consuetudine, ac disciplina Episcopos in quavis Dominica consecrari debere. Id quod etiam alii passim sequioris ævi Scriptores tradiderunt, inter quos Hugo de Sancto Victore in Theologica de Sacramentis eruditione Lib. II. Parte II. Cap. XX. ita scribit: *Presbyteri, & Diaconi Sabbato consecrandi Episcopo præsentantur. Benedictiones vero Pontificum diebus tantum Dominicis celebrandas esse, Sacri Canones sanxerunt*. Sed & Alcuinus Flaccus, aut quicumque alius Libri ejus Auctor, *De Divinis Officiis*, qui IX. Seculo floruit, in eo Capite, quod inscripsit, *Sabbatum in XII. Lectionibus*, ejusdem disciplinæ ordinandorum Episcoporum die Dominica hanc rationem assignat: *Episcopi consecratio,*

N

qui

qui est Vicarius Apostolorum, imo & Christi, fit in Dominica, quia eadem die per donum Spiritus Sancti Dominus dignatus est illustrare corda Apostolorum.

VII. Hinc puto factum, ut Episcopi ordinari possint in Natalitiis Apostolorum, quod nempe eorum Vicarii sunt, & Successores; uti notavi Tomo I. Romani Pontificalis Titulo XIII. in Commentario ad §. II. ubi edicitur, Consecrationis Episcoporum diem debere esse Dominicam, vel Natalitium Apostolorum, vel festivam. Quando hæc extensio incœperit, etsi non ausim definire, compertum tamen habemus ex antiquo Romano Ordine, ipsas Episcoporum Ordinationes fieri etiam consuevisse *aliquoties in Natalitiis Apostolorum*. Cujus rei testis est Anastasius Bibliothecarius in Vita Pelagii II. quem ait, die S. Andreæ Apostolo sacra in Romanum Præsullem consecratum fuisse, & quidem anno Christi DLXXV. ut testatur Baronius. Additi demum videntur dies festivi, quibus populi conventus commode fieri posset, quem ad Episcoporum consecrationem convenire congruum est. Quæ consuetudo nequaquam recens judicari debet, cum S. Udalricum Augustanum Episcopum, qui obiit anno CMLXXIII. die festo SS. Innocentium ordinatum in ejus Vita legamus apud Surium die XXIV. Julii. Verum tenenda est regula Romani Pontificalis, citato §. II. docet tunc quidem fieri posse die festivo Episcopi ordinationem, si Summus Pontifex hoc specialiter indulserit. Ceterum vidi Romæ aliquando Episcopum die non festivo consecratum, idque indultum a Summo Pontifice petiisse, ut cito Roma discederet vitandi causa æstivi caloris. Fuit hic Fr. Thomas Pius Milante Dominicanus, Episcopus Castri maris, qui nuper hoc anno diem suum extremum obiit.

VIII. Quod Romanos Pontifices spectat, consecrari ii quidem ritu solemniori consuevere, & quidem ut plurimum die Dominico, ut videre est apud Pagium in Romanorum Pontificum Vitis, in quibus passim servati ejus ritus meminit. Sane electus Alexander III. die VI. Septembris anni MCLIX. eique adhærentes, quod eos Octavianus antipapa persequeretur, coacti ab Urbe discedere, ubi Nymphas non procul ab Urbe pervenerunt una cum magna hominum frequentia in Vigilia S. Matthæi, ibidem simul congregatis Ostiensi, Sabinensi, Portuensi, Albanensi, aliisque Episcopis, necnon Cardinalibus Presbyteris, & Diaconibus, simulque Abbatibus, Judicibus, Advocatis, Scriniariis, & Primicerio cum Schola Cantorum, nobilibus quoque, & plurima parte Populi Romani, Dominus Alexander per manus Ostiensis Episcopi, ad quem solum consecratio Romani Pontificis pertinet, præeunte Spiritus Sancti gratia, consecratus est in Summum Pontificem, & secundum solitum Ecclesiæ morem, Regno de more insignitus, Mitra turbinata scilicet cum Corona, inquit Auctor Anonymus hujus temporis in Codice Vaticano a Baronio laudatus ad ipsum annum MCLIX. ex quo etiam habemus, Alexandrum III. in Vigilia B. Matthæi Apostoli prospere ad Nymphas pervenisse, ubi ipsa Dominica die, in quam Vigilia illa incidebat, ut in ipsius Alexandri Vita notat Pagius, Num. III. in fine, consecratus est. Sed & ipse Alexander in Epistola Gerardo Bononiensi Episcopo scripta, & ab eodem Ba-

ronio relata testatur, se die Dominico apud Nymphas munus consecrationis accepisse, & sicut in Romana Ecclesia moris est, ibidem Pontificali Regno magnifice fuisse & solemniter coronatum. De quo ritu dicemus suo loco inferius.

IX. Solemnis Consecrationis electorum Pontificum in Episcopos peractæ die præsertim Dominico, & quidem non privatim, sed publice, & magna cum pompa, occurrunt plane passim exempla in eorundem Pontificum Vitis. Sed his omisissis, lubet nunc ritum illum describere, quem in ipsa electi Papæ Consecratione in Episcopum servari mandat antiquum Cæremoniale Gregorii Papæ X. jussu editum: *Primo*, inquit, *idem Electus, dum dicit Psalmum*, Quam amabilia &c. *calciabitur Sandaliis, & Caligis, & Alba, Cingulo, cum Subcinctorio, postea Pectorale, demum Fanonem, postea Stola, deinde Tunicella, & postea Dalmatica. Subsequenter recipit Chirothecas, & demum Casulam, & Mitram in capite sine Pallio, & Anulo Pastoralis, quæ postea recipiet in loco suo; & vestimenta erunt coloris temporis convenientis. Cardinales omnes, tam Episcopi, quam Presbyteri, Diaconi, Subdiaconi, & alii Prælati, omnes erunt in vestibus congruis temporis; & Cruce Papali præeunte cum faculis vii. & incenso, omnes de loco, in quo est vestitus, veniunt processionaliter ad Altare. Eadem eisdemque verbis legere est in ms. Codice Pierfantiiano, qui etiam monet, id quod & ex laudato Gregorii X. Cæremoniali cautum est, ut nempe nulla fiat examinatio primo, nec secundo illa consueta in Consecratione aliorum Episcoporum, quæ incipit: Antiqua &c. Unum est, quod in ipsis Cæremoniali Gregorii X. & Pierfantiiano Codice præsertim notandum occurrit, juxta istorum scilicet præscriptum debere consecrandum Pontificem inter alia indumenta recipere Chirothecas, cum alias hic noster §. expresse mandet, ut *Electus Chirothecas, & Anulum tantum non accipiat, alia autem omnia*.*

X. Ritus ipsum apparatusque luculentissime quidem recenset ms. Pontificale Romanum Colbertinæ Bibliothecæ ab Edmundo Martene editum Lib. I. De antiquis Ecclesiæ ritibus, Capite VIII. Articulo XI. estque Ordo XVII. qui in eo Capite, quod inscribitur, *Qualiter Romanus Pontifex apud Basilicam Beati Petri Apostoli debeat ordinari*, hæc ad rem habet: *In primis ipse, qui consecrandus est, mane diei Dominica veniat ad Basilicam B. Petri, in qua processionaliter a Canonicis recipietur, & facta reverentia eidem a Cardinalibus, & Prælatibus, sicut fieri solet Romano Pontifici, stans in medio dicat: Sit Nomen Domini benedictum, juxta morem. Deinde vadat in Capellam S. Gregorii, ubi dicta Tertia, calciabitur Caligis, & Sandaliis, dicendo Psalmos, Quam amabilia, & cæteros, qui solent dici. Deinde lotis manibus induatur ornamentis, quibus Romanus Pontifex uti solet in Missarum solemnibus, exceptis dumtaxat Palleo, & Annulo Pontificali. Erunt autem vestimenta coloris temporis congruentis. Deinde ordinata solemniori Processione, sicut in præcipuis Festis fieri solet, videlicet Cardinalium, Prælatorum, & ceterorum Ordinum, qui omnes debent habere indumenta coloris temporis congruentis, consecrandus ipse, extensa super eum mappa, idest delato super ejus caput baldachino,*

no, procedat signando, ut moris est, ad majus Altare, & stans post ipsum Altare faciat Confessionem. Notandum subdit, in Consecratione Romani Pontificis omitti illam examinationem fieri solitam in Consecratione aliorum Episcoporum, quæ incipit: *Antiqua Sanctorum Patrum* &c. de qua diximus nos Tomo 1. Romani Pontificalis in Commentariis ad Titulum xiii.

XI. Facta Confessione ex laudati Pontificalis præscripto, ipse consecrandus sedet in Faldistorio suo præparato inter Altare, & gradus Pontificalis Sedis, & Schola cantat Introitum Missæ scilicet, & *Kyrie eleison*. Interim vero Episcopus Ostiensis, qui Romanum Pontificem consecrare debet, in aliquo apto loco prope Altare calciat se Caligiis, & Sandaliis, dicendo Psalmos, *Quam amabilia* &c. accipit etiam omnia Pontificalia ornamenta, ac si Missam solemniter celebrare deberet; Mitram quoque simplicem, vel pretiosam juxta exigentiam temporis; & cantatis Introitu, & *Kyrie eleison*, Consecrator, & ceteri Episcopi Cardinales, necnon alii Archiepiscopi, & Episcopi, & qui de Presbyteris præsentibus sunt, accedunt ad exequendum Consecrationis officium. Rursus ut idem Pontificalis admonet, in consecratione Romani Pontificis non pronunciatur illud: *Episcopum oportet* &c. nec dicitur illa Oratio: *Oremus dilectissimi nobis* &c. quæ dicuntur in Consecratione aliorum Episcoporum; sed consecrandus versa facie ad Altare, assistentibus ei duobus Diaconibus Cardinalibus, incumbere debet super præparatum Faldistorium inter gradus Pontificalis Sedis, & majus Altare. Consecrator etiam, & ceteri Episcopi Cardinales, necnon alii Episcopi a dextris, & a sinistris super sua Faldistoria, vel si ea non habent, super tapetia, procumbere debent, & Prior Basilicæ, vel alius Capellanus Prior Subdiaconorum incipit, & prosequitur Litaniam cum cantu, respondentibus aliis Capellanis, & ceteris, qui assistunt.

XII. Huic ritui, quem ex laudato Pontificali Colbertinæ Bibliothecæ ad literam descripsimus, concinit quidem tum Cæremoniale Gregorii Papæ X. tum ms. Codex Pierfæctianus, tametsi in his paulo brevius ritus ipse recensatur: *Vadit*, inquit, *Electus ad Altare*, & facit Confessionem, interim Choro, vel Schola cantante Introitum, & *Kyrie eleison*. Quo facto, venit coram Altare, & ibi genuflectet super Faldistorium paratum, & omnes alii similiter Prælati, & duo Diaconi Cardinales, qui ad serviendum ei ad dextram levamque assistunt, & Capellanus Subdiaconus dicit Litaniam cantando, aliis Capellanis respondentibus. Ceterum licet ex Colbertino Pontificali non modo consecrandus, sed & ceteri Episcopi Cardinales, necnon alii Episcopi a dextris, & a sinistris super sua Faldistoria, vel si ea non habent, super tapetia procumbere debent; Cæremoniale tamen nostrum Romanum in hoc §. expresse edicit, ut Electus quidem in Litania procumbat cum Mitra in Faldistorio ante Altare, Consecrator vero ab ejus sinistris super aliquo scabello; alii autem in suis scabellis. Decet enim quammaxime, ut vel in ea actione præ ceteris Summus Pontifex honorificetur, sicut & in aliis, quæ in hac Consecratione occurrunt. Porro ubi in Litania ventum erit ad locum ubi dicitur, *Ut hunc Electum* &c. ex nostri Romani Cæremonialis præ-

To. I.

scripto, surgit Consecrator non tamen cum Baculo, & versus ad Electum tertio dicit, signans, Ut hunc Electum &c. & alii omnes Episcopi Cardinales cum suis Libris procumbentes tamen erecta aliquantulum facie idem faciant. Paulo aliter hunc ritum exprimunt Cæremoniale Gregorii X. & Pierfæctianus ms. Codex, ubi ita inquit: *Dum venerit ad illum locum*, Ut consecrandum &c. repetet bis, & quilibet Prælati una cum Ordinatore Electum ipsum signabit. Clarius Colbertinum Pontificalis, cujus hæc sunt verba: *Cum venerit ad illum locum*, Ut hunc consecrandum benedicere &c. debet hoc dicere bis, & tam Consecrator, quam omnes alii Episcopi assistentes elevata manu versus Consecrandum, faciant super eum bis signum Crucis. Sed de his ritibus videri possunt, quæ nos diximus in toties memorato Tomo 1. Romani Pontificalis, ubi Titulum xiii. qui est, *De consecratione Electi in Episcopum*, enarravimus.

XIII. Finita Litaniam, surgunt omnes, inquit nostrum Cæremoniale, & Electus revertitur ad Sedem suam: Consecrator venit ante eum, & aliis prætermisissis stans cum Mitra, simul eum adjuvantibus Episcopis assistentibus Cardinalibus, imponit Librum Evangeliorum supra cervicem Electi sine Mitra sedentis &c. Juxta præscriptum Cæremonialis Gregorii X. & ms. Pierfæctiani Codicis, Litaniam dicta, Ordinator venit coram eodem Electo, & dicit illud quod est in Pontificali, nempe, *Episcopum oportet* &c. ut habet Codex Pierfæctianus; quo dicto, redeunt post Altare omnes, & tunc venit unus ex Episcopis Cardinalibus, & dicit illam Orationem: *Adesto*; & postea venit alius Episcopus Cardinalis, & dicit illam Orationem: *Oremus dilectissimi*; & additur, in ea, Utilitati universalis Ecclesiæ; & demum venit Ordinator, sive Consecrator, & ponit apertum Codicem Evangeliorum super caput Electi versus collum, & Codex sic apertus tenetur a duobus Diaconis Cardinalibus, & omnes Prælati stant in circuitu induti, quilibet cum suo Libro; & Ordinator incipit, & procedit, ut continetur in Libro &c. Sed audiamus Colbertinum Pontificalis, in quo Cæremonia ipsa ita exprimitur: *Finita Letania*, erigant se omnes, & Consecrator stet in infimo gradu sub Sede Papali, quæ est post Altare, verso vultu ad ipsum Altare. Consecrandus vero stet sub gradu prædicto versa facie ad ipsum Consecratorem, assistentibus ipsi consecrando Diaconibus Cardinalibus, & Acolythis; stabunt autem juxta Episcopum Ostiensem a dextris, & a sinistris. Episcopus Albanensis, & Episcopus Portuensis induti Pluvialibus, & habentes Oraria, sive Stolas, & omnes alii Episcopi in circuitu stabunt ad instar coronæ, tenentes singuli Libros Pontificales, in quibus scriptum est Consecrationis officium, quod singuli dicere debent submissa voce.

XIV. Ex eodem Pontificali Colbertino tunc Episcopus Albanensis dat primam Orationem cum nota dicens: *Oremus*. Propitiare Domine supplicationibus nostris &c. Post hæc Ostiensis Episcopus ponit apertum Librum Evangeliorum super cervicem consecrandi, sicut fit in Consecratione aliorum Episcoporum, tenentibus ipsum duobus Diaconibus Cardinalibus usque ad Consecrationem finitam. Libro sic proposito, tunc Consecrator imponat manam dextram super caput

N 2

put Consecrandi, nihil dicendo, & similiter faciant omnes Episcopi, qui assistant. Variat nonnihil Colbertinum Pontificale a nostro Romano Cæremoniali, ex cuius præscripto Librum Evangeliorum, quem Consecrator imponit supra cervicem Electi sine Mitra sedentis, duo Diaconi retinent usque in finem; & Consecrator, atque assistentes Episcopi ponunt ambas manus super caput Electi dicentes: Accipe Spiritum Sanctum; quod tamen Consecrator alte dicit, alii submisisse, ut alia omnia. Additque mox: Si aderunt alii Episcopi parati, poterunt & ipsi manus imponere, & omnia legere, ut Cardinales assistentes. Verba illa, Accipe Spiritum Sanctum &c. quæ Consecrator Episcopus, & ejus assistentes proferunt, dum manibus tangunt Caput consecrandi, jam non sunt forma Episcopatus, ut putant Scholastici recentiores, toti enim ea antiquitati ignota fuerunt, altumque de ipsis verbis silentium fit non modo in Cæremoniali Gregorii Papæ X. jussu edito, & in ms. Codice Pierisæntiano, ac præsertim in Colbertino Pontificali, ex cuius præscripto nihil nunc dicere Consecrator debet, verum etiam apud antiquiores Scholasticos, qui licet absolutas Sacramentorum formas undecumque expiscari studuerint, nullam tamen eorum verborum mentionem faciunt; uti notat eruditus Martene, Lib. 1. De antiquis Ecclesiæ ritibus, Cap. viii. Articulo x. Num. xiv. in fine, postquam dixit, formam quidem Episcopatus constitui in proluxa illa oratione, quæ ad modum Præfationis a Consecratore pronuntiatur, de qua nos dicemus inferius.

XV. Plura scitu digna de ipsa Præfatione, ac de impositione Codicis Evangeliorum super caput consecrandi in Episcopum explicuimus jam nos nostro 1. Tomo Romani Pontificalis in Commentariis ad toties citatum Titulum xiii. De consecratione electi in Episcopum; viderique etiam ea possunt, quæ de eadem sacri Codicis impositione diximus in Opere, De Codice Sancti Evangelii &c. Lib. i. Cap. xv. Sane circa ipsam impositionem sacri Evangeliorum Codicis triplicem varietatem observat Morinus, De sacris Ordinationibus, Parte i. Exercitatione 1. Cap. 1. Prima, inquit, respicit ipsum Evangelium. Clemens Romanus, Simeon Thessalonicensis, & Rituales omnes Græci, uno excepto, qui variare videtur, diserte docent, apertum imponi. Ita quoque Maronitarum, & Jacobitarum Rituales. Latini vero omnes nihil definiunt, dicunt simpliciter, Evangelium imponendum; sed duo antiqui, Constantini scilicet Cajetani, & Ordo Romanus editus, diserte expriment, clausum esse imponendum. Pontificale Romanum hodiernum jubet, esse apertum, cui præter Græcos, & Syros Codices, suffragatur unus Victorinus Codex antiquus. Huic etiam accedunt Libri duo Pontificales Moguntini, & Matthæus Paris ad annum MXCIII. Arelatenfis clausum, vel apertum imponere permittit, sed itaut si aperiatur, litera, seu pars interior Evangelici Codicis caput Electi tangat; operculum vero, seu pars exterior respiciat Consecrantes, uti notat laudatus Martene citato loco, Numero xv. ubi etiam testatur, se id quidem animadvertisse in aliis quibusdam Libris Pontificalibus.

XVI. Varietas altera, ut idem Morinus docet, locum respicit, cui Evangelium imponitur: Græci Rituales, inquit, ut Simeon Thessaloni-

ensis, dicunt, imponi super caput, & cervicem ejus, hoc est, occiput, & inferius: Nestoriani super dorsum; Clemens, & Dionysius hac minutiora non definiunt. Unus Codex, sed recentior videtur hoc de syncope accipere, sed improbabile est. Latini variant; alii & antiquissimi dicunt generaliter, super caput ejus, alii scapulis imponendum esse, alii distinctim super verticem ejus, & inter scapulas. Ita ille, qui mox tertiam ejus ritus varietatem explicat, atque ipsam Evangelium tenentes spectare: Hoc officium, inquit, tribuit S. Clemens Diaconis, Rituales vero Episcopis assistantibus. Archiepiscopus Librum aperit, & imponit Capiti, alii Episcopi sustinent. Sic quoque Rituales Latini pene omnes. Ceteri vero Episcopi, qui adsunt, manus imponunt. Sic etiam disertissime Victorinus Codex. Ab hac etiam cæremonia non dissentiant Syri, Maronita, Nestoriani, & Jacobita. In hac postrema cæremonia ab omnibus differt Pontificale Romanum hodiernum. Hucusque Morinus, quem in eo refellit laudatus Martene, quod scribat, hunc ritum in pluribus olim Ecclesiis prætermisum fuisse. Fuit & hujus opinionis Jueninus in Opere De Sacramentis, Dissertatione ix. Quæstione 1. De Episcopatu, Capite i. ubi ita scribit: Ecclesiam Romanam illo eodem ritu, imponendi scilicet Evangelium super caput consecrandi in Episcopum, primis seculis usam non fuisse, docet Alcuinus in Libris De divinis Officiis, quem circa annum Christi DCCLX. conscripsit. Germanos ineunte ix. Seculo eum ritum non adhibuisse, testatur Amalarius Lib. II. De Officiis Ecclesiasticis, Cap. iv. ubi hac habet: Dicit Libellus, idest, Ordo Romanus, secundum cujus ordinem celebratur Ordinatio apud quosdam, ut duo Episcopi teneant, Evangelium super caput ejus, quod neque vetus auctoritas intimat, neque Canonica auctoritas.

XVII. At vero non modo Morinus, & Jueninus, verum etiam creditus Alcuinus, & Amalarius omnino labuntur, quibus refragatur quidem omnium Pontificalium Librorum, ac veterum Patrum, & Conciliorum auctoritas. Nam omnes, ne uno quidem excepto, eum ritum præscribunt, meminitque ipsius ritus celebre antiquum Carthaginense iv. Concilium anno Christi CCCXCVIII. Can. II. Episcopus, inquit, cum ordinatur, duo Episcopi ponant, & teneant Evangeliorum Codicem super caput, & cervicem ejus; & uno super eum fundente benedictionem, reliqui omnes Episcopi, qui adsunt, manibus suis caput ejus tangant. Atque ut alia veterum testimonia, & exempla omittam, meminit & ejus ritus Palladius in Vita S. Joannis Chrysostomi, ubi agens de ordinatione Eunuchi Victoris Tribuni in Ephesinum Episcopum facta a Theophili sectatoribus, inter alia asserit, quod non horuerunt Evangelium scelesto capiti imponere. Porro absoluta Consecrationis Præfatione, mos ille & olim invaluit, aperiendi scilicet, revolvendique ipsum Evangelii Codicem, ut ex occurrenti in prima pagina sacri Textus sententia prognosticum conjiceretur, uti jam notavimus citato nostro 1. Tomo Romani Pontificalis. Certe, ut tradit Martene, Hugoni ex Monacho Cisterciensi, & Abbate Pontiniacensi in Episcopum Antissiodorensis a Paschali II. Summo Pontifice consecrato præsagium fuit prognosticum divinitus destinatum... Ave Maria gratia plena &c.

Quæ

Quæ quidem verba, subdit Martene, veluti certa ejus virginitalis signa considerata sunt. Sed de his nunc satis.

XVIII. Ex nostro Romano Cæremoniali post prolata illa verba, *Accipe Spiritum Sanctum &c.* quæ in Pontificali Romano leguntur, ubi agit de Consecratione Electi in Episcopum, *Consecrator sine Mitra dicit super eum Orationem*; Propitiare Domine &c. *Deinde voce mediocri extensis manibus ante pectus dicat Præfationem &c.* Præfatio ista in antiquis Pontificalibus dicitur Consecratio, in eaque doctissimi Theologi Episcopatus formam constituunt. Quicquid sit, quod ritum spectat, edicit Colbertinum Pontificale, ut ipse *Ostiensis Episcopus elevata voce dicat in modum Præfationis*, Per omnia secula seculorum. R. Amen. *Et proseguatur Præfationem illam*, Deus honor omnium dignitatum, *ut supra in Consecratione Episcopi, in qua Oratione fit eleganter hæc additio ubi dicitur*: Et iccirco huic famulo tuo N, quem Apostolicæ Sedis Præsulem, & Primatem omnium, qui in Orbe terrarum sunt, Sacerdotum, ac universalis Ecclesiæ Doctorem dedisti, & ad Summum Sacerdotii ministerium elegisti, hanc quæsumus Domine gratiam largiaris &c. *ut ibi usque*, de profectu omnium consequatur. *Consequenter vero, ubi dicitur*: Tribuas ei Domine &c. *in Consecratione Romani Pontificis dicatur sic*, Tribuas ei Domine Cathedram Pontificalem ad regendam Ecclesiam tuam, & plebem tuæ sortis intra mundi limites universam. Sis ei auctoritas &c. Meminit plane & hujus ritus Cæremoniale Gregorii X. itemque Codex Pierfanctianus his verbis: *Ordinator incipit, & procedit, ut continetur in Libro, omnibus aliis Prælati secum dicentibus in voce depresso, & Ordinatore in cantu*, Deus honor &c. *prout in Libro; eo tamen salvo, quod mutatur in loco suo illud*; Et idcirco, *quod specialiter ponitur in Consecratione Papæ*. Mabillonius in Ordine Romano XIII. qui est Cæremoniale ipsum Gregorii X. male legit, *Deus homini*, legendum est, *Deus honor &c.* ut in ipso Pierfanctiano Codice, & in omnibus Libris Pontificalibus passim.

XIX. Juxta ejusdem nostri Romani Cæremonialis præscriptum, post prolata illa Præfationis verba, *Comple in Sacerdote tuo ministerii tui summam, & ornamentis totius glorificationis instructum caelesti unguenti rore sanctifica*, quæ verba etiam in aliis multis priscis Pontificalibus leguntur, tunc Consecrator genuflexus, & sine Mitra versus ad Altare incipit Hymnum, *Veni Creator Spiritus; & tam Electus, quam alii genuflectunt eodem modo*. Hymni istius neque in Sacramentario S. Gregorii, neque in antiquo Ordine, neque in priscis Pontificalibus, imo neque in Cæremoniali Gregorii X. aut in ms. Codice Pierfanctiano, in quibus Consecratio electi Papæ in Episcopum deferibitur, ulla mentio habetur. Constat tamen ex recentiori Lugdunensi Pontificali, cujus meminimus in Commentario

ad §. XXI. Tituli XIII. Tomo I. Romani Pontificalis, consuevisse olim in aliquibus Ecclesiis in Ordinatione Episcopi dici Missam de Spiritu Sancto; imo non modo ex Romanis editis, sed & ex aliarum Ecclesiarum mss. Pontificalibus, recentioribus tamen, præscribi constat, ut ipse Hymnus diceretur, per quem invocatur Spiritus Sanctus. Et quidem recte; ipsa enim Sancti Spiritus invocatione Ordinationem Episcoporum perfici, docent non semel Sancti Ecclesiæ Patres tam Latini, quam Græci; docetque Pontificale Romanum, Consecrationi Episcopali tribui Spiritum Sanctum; juxta illius siquidem præscriptum Consecrator, & Assistentes Episcopi, ut supra dictum est, caput consecrandi tangunt, dicentes; *Accipe Spiritum Sanctum*. Item juxta quoddam Allatiani Euchologii exemplar, post recitatam ab ordinando in Episcopum Fidei professionem, statim Pontifex Consecrator Crucis signo ipsum benedicens ait: *Gratia Sancti Spiritus tecum sit, illuminans, confirmans, & intellectum tribuens omnibus diebus vitæ tuæ*.

XX. Quicquid sit de origine memorati Hymni, *Veni Creator Spiritus*, in Consecratione Episcoporum, celebris sane est in ipsorum Ordinatione cæremonia sacre unctionis, quam ita peragendam mandat nostrum Romanum Cæremoniale, ubi electus Papa consecrandus est in Episcopum: *Finito primo versu, prædicti nempe Hymni, surgunt omnes, & Chorus proseguitur Hymnum*. Interim caput Electi sedentis in sua Sede circumligatur panniculo lineo subtili per Diaconum, ne oleum fluat super capillos, itaut panniculi extremitates retro super cervicem perdeant. Deinde Consecrator accedens ad Electum cum Mitra, & intincto pollice dextræ manus in sacro Chrismate, stans ungit caput Electi sedentis &c. De ipsa sacre unctionis cæremonia jam diximus Tomo I. Romani Pontificalis in Commentariis ad Titulum XIII. §. XXII. & seqq. Sed cum in præfenti de Consecratione agatur, describendum censeo, quod in hanc rem præscribit Cæremoniale Gregorii Papæ X. jussu editum, sive Codex Pierfanctianus, sic inquires: *Depositis, chirotecis Ordinator ponit unum (1) capitergium subtile in modum (2) serici super caput Electi, pendentibus capitibus (3) capitergii post collum, & sic mittit Crisma super caput ejus ad modum Crucis, & dicit illam Orationem*, Ungatur &c. & addit Orationem, *Hoc Domine, & in loco suo additur illud*, Tribue &c. *Quæ finita (4) ungatur manus Electi cum Crismate, & dicit illam Orationem*, nempe, *Deus &c.* ut habetur apud Mabillonium, cujus Codex multis scatet erroribus, a quibus etiam immunis non est Codex Pierfanctianus tametsi multo correctior. Porro præter caput, ungitur etiam Electo manus, sicut in Consecratione aliorum Episcoporum fit; sed & de hoc ritu videri plane possunt, quæ scripsimus in laudatum Titulum XIII. Tomi I. Romani Pontificalis, *De Consecratione electi in Episcopum*, §. xxv.

§. VIII.

De Benedictione Anuli, Evangelii traditione, & aliis usque ad finem.

Electus manus inunctas simul junctas in mappula pendenti a collo reponit. Baculus non da-

(1) Apud Mabillonium legitur, *capiturgium*. (2) scuti. (3) *capiturgii*. (4) *ungit manum*.

datur; mox Consecrator deposita Mitra benedicit Anulum preciosum imponendum Electo, dicens: *Creator & conservator humani generis, dator gratiæ spiritualis, largitor æternæ salutis: Tu Domine emitte tuam benedictionem super hunc Anulum, ut quicumque hoc sacrosancto Fidei signo insignitus incescrit; in virtute celestis defensionis, ad æternam sibi proficiat salutem. Per Christum Dominum nostrum. Amen.*

Electus etiam surgit dum dicitur Oratio; Anulum ipsum interea tenet manu dextera aliquis Acolythus ante Consecratorem genuflexus. Consecrator dicta Oratione aspergit Anulum aqua benedicta, & illum imponit digito anulari dextræ manus Electi sedentis dicens: *Accipe Anulum, Fidei scilicet signaculum, quatenus sponsam Dei, sanctam videlicet Ecclesiam intemerata Fide ornatur illibate custodias. Amen.* Et dum, imponit, osculatur manum Electi. Deinde adjuvantibus Episcopis assistentibus, Librum Evangeliorum ab ejus spatulis removens, dat ad manus Electi sedentis, dicens: *Accipe Evangelium, & vade prædica populo tibi commisso; potens est enim Deus augere tibi gratiam suam. Qui vivit & regnat cum Deo Patre in unitate Spiritus Sancti Deus per omnia secula seculorum. Amen.* His peractis, Consecrator redit ad suum Faldistorium, & lavat manus. Electo autem sedenti in sua Sede Diaconus Cardinalis tergit caput cum medulla panis diligenter, & cum panno mundo. Deinde cum pectine eburneo mundat, & componit capillos, & imponit illi Mitram; & tunc Electus lavat manus cum mica panis, & bene mundat. Quibus finitis, tam Consecrator, quam alii omnes Cardinales præsentés osculantur pedem, manum, & os Domini Electi; alii autem Prælati parati pedem, & manum; alii inferiores pedem tantum. Et mox Consecrator prosequitur Missam usque ad lectum Offertorium; & idem facit electus Pontifex in sua Sede stans. Dicto Offertorio, Consecrator accedit ad Electum sine Mitra, & de ejus manu accipit Offertorium, intorticia, panes, & vini vasa duo, & ad unumquodque istorum osculatur manum Electi. Tunc revertitur ad suum Faldistorium, & lavat manus tam ipse, quam Electus, & intrat ad Altare, & similiter D. Electus accedit ad Altare, & ponit se ad cornu Epistolæ, Presbytero Cardinale ministrante Librum, & ibi sine Mitra simul cum Consecratore celebrabit signando, & omnia dicendo submissa voce, ut Consecrator; non tamen se loco movebit usque ad Communionem, quam sumet sub utraque specie stans in ipso cornu aliquantulum procedens. Finita Missa, non imponuntur Chirotecæ, neque Mitra, quam habet cum illis benedictionibus consuetis, neque inthronizatur Electus; sed stans in medio Altaris sine Mitra, habens ante se Crucem Papalem, benedicit, dicens: *Sit Nomen Domini benedictum.* Et resumta Mitra vadit ad Sedem suam, & sedet; & tunc Consecrator accedit versus Dominum Electum, & tertio genuflectens dicet: *Ad multos annos, ut dictum est in Presbytero.* Et omnes deinde exuunt se sacris vestibus cum Orationibus consuetis.

COMMENTARIUS.

I. **C**onsecratione manuum facta, *Baculus non datur*, inquit nostrum Cæremoniale Romanum, concinitque Cæremoniali Gregorii Papæ X. & Pierfanctiano Codici, in quibus post citatam Orationem ad manuum unctionem dicendam, ita legitur: *Quæ finita, non datur ei Baculus, nec dicitur illa Oratio: Accipe Baculum; sed dat ei Anulum &c.* Baculus antiquum est Episcoporum insigne, de quo abunde diximus in Commentariis ad Romanum Pontificale, & ad Concilia Œcumenica. *Baculo Pastoralis non utitur Romanus Pontifex tum propter historiam, tum propter mysticam rationem*, inquit Innocentius III. in Cap. *Accepimus*, xlii. De sacra unctione, in fine. Propter historiam inquit Lib. i. Mysteriorum Missæ Cap. lxi. pro eo, quod Beatus Petrus Apostolus Baculum suum misit Eucharistia primo Episcopo Trevirensi, quem una cum Valerio, & Materno ad prædicandum Evangelium genti Theutonice destinavit, cui successit in Episcopatu Maternus, qui per Baculum Sancti Petri de morte fuerat suscitatus. Quem Baculum usque hodie cum magna veneratione Trevirensis servat Ecclesia. Addit deinde, propter mysticam rationem;

quia scilicet Baculus Pastoralis est signum limitatæ Jurisdictionis. Romanus autem Pontifex jurisdictionem universalem habet.

II. Quicquid sit, Baculo Pastoralis, seu Ferula, quæ ut docet Honorius Augustodunensis Lib. i. Cap. cccvi. idem est, ac Pastoralis Baculus, usum olim fuisse Romanum Pontificem, docet eruditissimus Altaferra in dicto Capite, *Accepimus*, prope finem, De sacra unctione, probatque ex historia degradationis Benedicti V. cui Leo VIII. antipapa Pallium discidit, & Ferulam, seu Baculum confregit, veluti insignia Pontificatus: *Tunc Leo Apostolicus, coadunata multorum Episcoporum Synodo, eundem Benedictum Romanæ Sedis invasorem, judicio omnium ab invaso gradu deposuit, & Pontificale Pallium, quod sibi imposuerat, abscidit, Ferulamque Pastoralem manu ejus abreptam coram omnibus in frustra confregit, & ad preces Imperatoris, Diaconatus ei tantum gradu uti concessit.* Tradit hæc Auctor Appendicis ad Reginsonem anno CMLXIV. eademque habet Luitprandus Lib. vi. Cap. xxi. & ultimo, ubi agens de Benedicto ipso Papa exauctorato, inquit: *Pallium sibi abstulit, quod simul cum Pontificali Fe-*

Ferula, quam manu gestabat, Domino Papa Leoni reddidit; quam *Ferulam* idem Papa fregit. Consuevit tradi *Ferula* in manu recens creati Papæ, etiam post annum millesimum, ejusque ritus testis est Anonymus Scriptor apud Baronium ad annum MC. ubi de electione Paschali Papæ II. ita scribit: *Est locatus in utrisque Curialibus, sedibus scilicet eburneis; data est ei Ferula in manu*. Cencius quoque Camerarius in Ordine Romano XII, Cap. XLVII, Num. LXXIX, sic eundem ritum enarrat servari solitum in electione Romani Pontificis: *Electus sedet ad dexteram in sede Porphyretica, ubi Prior Basilica S. Laurentii de Palatio dat ei Ferulam, quæ est signum regiminis, & correctionis*. Occurrit ea vox passim apud Scriptores passim, viderique potest inter alios Macrus in Hieroglyphico, verbo, *Baculus*, ubi inter alia affert figuram Sancti Gregorii Magni manu dextera *Ferulam* tenentis, quam ait ex monumentis Alphonsi Ciacconii a Laurentio de Mariis Romano donatam sibi fuisse. Aliam figuram Gelasii Papæ II. cum Baculo Pastoralis videre est apud eundem Scriptorem, verbo, *Mitra*.

III. Omissa in Consecratione Papæ in Episcopum Baculi traditione, *Consecrator, deposita Mitra*, inquit nostrum Cæremoniale, *benedicit Anulum pretiosum imponendum Electo, dicens, Orationem scilicet, Creator, & conservator humani generis &c.* Extat quidem formula hujus benedictionis in Romano Pontificali, ubi scilicet agitur de Consecratione electi in Episcopum, desideratur tamen non modo in Pontificali Colbertino, sed & in Cæremoniali Gregorii X. & in ms. Codice Pierfanctiano, tametsi in iis mentio fiat traditionis dicti Anuli: *Dat ei*, inquit, *Anulum, & dicit Orationem, Accipe &c. & addit, sanctam universalem Ecclesiam*. Hæc additio deest quidem in nostro Cæremoniali, ubi formula ejus traditionis eadem est, quæ legitur in Romano Pontificali, sed habetur tamen, ut notatum est, in ms. Colbertino Pontificali sic agente: *Consecratione manuum facta, Consecrator immittit Anulum in digitum anularem dextræ manus Papæ consecrati, dicens, nempe, Accipe Anulum, fidei scilicet signaculum, quatenus sponsam Dei, videlicet sanctam universalem Ecclesiam, intemerata Fide ornatus illibate custodias*. In Romano Pontificali anni MDLXXII. ubi post Titulum, *De Consecratione electi in Episcopum*, sequitur Titulus, *De Consecratione & Coronatione Summi Pontificis*, formula traditionis Anuli est absque illo additamento, *universalis*; sed hoc parum refert, ea enim vox passim occurrit in nostro hoc eodem Cæremoniali S.R.E. quod Augustinus Patricius ordinavit.

IV. Post Anuli impositionem sequitur traditio Codicis Evangelii, quem Consecrator adjuvantibus Episcopis assistentibus, ut ait nostrum Cæremoniale, ab ejus spatulis removens, dat ad manus Electi sedentis, dicens: *Accipe Evangelium, & vade prædica populo tibi commissio; potens est enim Deus augere tibi gratiam suam. Qui vivit & regnat &c.* Est & hæc eadem formula, quam Romanum Pontificale dicendam præscribit in ceterorum Episcoporum Consecratione; sed sciendum tamen, in Consecratione Papæ juxta præscriptum Colbertini Pontificalis, & ms. Pierfanctiani Codicis deberi apponi additamentum illud, quod in formula traditionis

Anuli notatum fuit: *Deinde dat ei*, inquit Pontificale Colbertinum, *secundum modum præscriptum, Librum Evangeliorum, dicens: Accipe Evangelium, & vade, prædica populo universo, potens est enim Deus &c.* Desunt hic ea verba, *tibi commissio*; sed leguntur tamen in laudato Codice Pierfanctiano: *Accipe: inquit, & addit, universali populo tibi commissio &c.* Idipsum habetur in Cæremoniali Gregorii X. cujus tamen verba mendose Mabillonius descripsit in Romano Ordine XIII. Num. VI. *Dat ei Librum Evangeliorum, & dicit: Accipe &c. & addit, universalem populum tibi committo*; legendum siquidem, *universali populo tibi commissio*. Quicquid sit, traditur Evangelii Codex Papæ in sua in Episcopum Consecratione sub ea formula, *Vade prædica populo &c.* ut vel inde addiscamus, ipsi præsertim incumbere ex munere commissum sibi populum pascere salutaris doctrinæ pabulo, ut non uno in loco testantur inter alios Sanctissimi Romani Pontifices, Leo I. & Gregorius itidem I. ambo cognomento *Magni*.

V. Facta Evangelii traditione, ex præscripto Colbertini Pontificalis *Archidiaconus imponat ei Pallium, dicens: Accipe Pallium*, plenitudinem scilicet Pontificalis officii, ad honorem Omnipotentis Dei, & Gloriosissimæ Virginis Mariæ Genetricis ejus, & Beatorum Apostolorum Petri & Pauli, & Sanctæ Romanæ Ecclesiæ. *Deinde ascendit Papa ad Sedem &c.* Juxta nostrum Cæremoniale in præsentis §. peracta Evangelii traditione, *Consecrator redit ad suum Faldistorium, & lavat manus; Electo autem sedenti in sua Sede Diaconus Cardinalis tergit caput cum medulla panis diligenter, & cum panno mundo &c.* Mentionem faciunt & hujus ritus Cæremoniale Gregorii X. & ms. Codex Pierfanctianus, in quibus tamen munus tergendis tunc Caput Papæ, non Diacono, sed uni Episcopo Cardinali committitur; sic enim inquit: *Quibus omnibus expletis per Consecratorem, idem Summus Pontifex sedet in Faldistorio, & lavat manus cum mica panis, & aqua, & unus Episcopus Cardinalis venit coram ipso, & tergit ejus caput, quod fuit unctum, cum mica panis, & cum cortice leviter, & tergit cum lintheamine, sive subtili tobalea*. Porro peracta hac Cæremonia, ex nostri Cæremonialis præscripto tam *Consecrator, quam alii omnes Cardinales presentes osculantur pedem, manum, & os Domini Electi; alii autem Prælati parati pedem, & manum, alii inferiores pedem tantum*. Cæremoniale Gregorii X. & Pierfanctianus Codex solum Cardinalium, & Consecratoris mentionem faciunt, eosque ajunt a Pontifice ad oris osculum recipi: *Quo finito, ipse Summus Pontifex recipit Consecratorem, & omnes Episcopos, Presbyteros, & Diaconos Cardinales ad osculum oris*. Ceterum juxta Colbertinum Pontificale, post acceptum quidem Pallium *ascendit Papa ad Sedem, & recipit ad osculum pedis, & oris, omnes Episcopos, Presbyteros, & Diaconos Cardinales, & alios Prælatos*.

VI. Expleta hac cæremonia, *Consecrator, inquit nostrum Cæremoniale, prosequitur Missam usque ad lectum Offertorium; & idem facit electus Pontifex in sua Sede stans*. Dicto Offertorio, *Consecrator accedit ad Electum, sine Mitra, & de ejus manu accipit Offertorium, intorticia, panes, & vini vasa duo &c.* Servatur hic

hic ritus in Consecratione Episcoporum, & si qua fides Lugdunensis Ecclesiæ Pontificali allato ab Edmundo Martene Libro I. *De antiquis Ecclesiæ ritibus*, Capite VII. Articulo XI. Ordine XVII. ex Melchiadis Papæ institutione, & antiquo Ecclesiæ more: *Tunc Consecratus offertur*, post Offertorium scilicet, *ex institutione Melchiadis Papæ, & de more offerat duos panes, duas amphoras vino plenas, & duos cereos accensos, & alia consueva*. Pontificale quoque Moguntinum ante annos CD. exaratum, uti videre est apud eundem Martene citato loco, Ordine XVI. ita & de eo ritu loquitur: *Procedat Consecratus ad Altare, & offerat duos cereos accensos, duos albos panes, & duas phialas plenas vino*. In margine recenti manu, ut idem Martene testatur, legitur: *Nota, hujusmodi oblationes portantur per familiam Electi, & in offerendo Electus tangat cum manu*. Egimus & nos de hac oblatione citato nostro I. Tomo Romani Pontificalis; sed notandum hic tamen generatim, quod ubi in aliorum Episcoporum Consecratione, Electi passim Consecratoribus suis reverentiam exhibent, in Consecratione tamen Papæ Consecrator ipse Papæ summam in omnibus exhibet reverentiam, ob gradum scilicet Summi Pontificatus, cujus multæ sunt prærogativæ supra cæteros Episcopos omnes. Atque hinc est, quod ubi ceteri electi Episcopi ad Altare accedunt, ut offerant Consecratori, in Papæ tamen Consecratione *Consecrator accedit ad Electum sine Mitra, & de ejus manu accipit Offertorium, intorticia, panes, & vini vasa duo, & ad unumquodque istorum osculatur manum Electi*; postquam scilicet in eadem Consecrationis actione, uti paulo superius notatum est, pedem etiam osculatus fuit ipsius electi Pontificis.

VII. Absoluta oblatione, procedunt ambo ad Altare, ponitque se Electus, ut ait nostrum Cæremoniale, *ad cornu Epistola, Presbytero Cardinale ministrante Librum, & ibi sine Mitra simul cum Consecratore celebrabit, signando, &*

omnia dicendo submissa voce, ut Consecrator, non tamen se loco movebit usque ad Communionem, quam sumet sub utraque specie stans in ipso cornu, aliquantulum procedens. Jam non modo Electum in Summum Pontificem, ubi in Episcopum consecratur, sed & ceteros omnes, qui in Episcopos consecrantur, Eucharisticam Communionem sub utraque specie percipere, ex antiquo ritu præscribit Romanum Pontificale Parte I. Titulo XII. §. XXXVII. in quem videri possunt, quæ scripsimus nos nostro I. Tomo Commentariorum. Porro quod reliquos Episcopos spectat, ex præscripto ms. Pontificalis insignis Ecclesiæ Apameensis in Syria, ubi enarratur Ordo ad consecrandum electum in Episcopum juxta morem Romanæ Ecclesiæ, *cum venerit ad communicandum, Pontifex porrigit ipsi consecrato sacram oblationem integram, quam ipse suscipiens dat ei osculum; & tunc accedens ad Diaconum, suscipit de manu ipsius Sanguinem Domini; deinde rediens ad locum, ubi fuerat in sacrificando peragit Missam suam*. Differt autem & in eo Consecratio electi in Papam a Consecratione Episcoporum, quod in ipsa Papæ Consecratione in Episcopum, *finita Missa*, ut ait hic noster §. *non imponuntur Chirotheca, neque Mitra, quam habet cum benedictionibus consuetis, neque inthronizatur Electus, sed stans in medio Altaris sine Mitra, habens ante se Crucem Papalem, benedicit, dicens: Sit Nomen Domini benedictum; & resumta Mitra vadit ad Sedem suam, & sedet; & tunc Consecrator accedit versus Dominum Electum, & tertio genuflectens dicit. Ad multos annos; ut dictum est in Presbytero*. Hactenus noster §. cui & alii antiqui Romanæ Ecclesiæ Cæremoniales Codices consentiunt, quos non est necesse hic recensere, sicut nec mss. veterum Apostolicorum Cæremoniariorum Diaria, in quibus multa præscripti ritus exempla in electorum Summorum Romanorum Pontificum Consecrationibus in Episcopos occurrunt.

§. IX.

Consecratio, Benedictio, & Coronatio simul Romani Pontificis.

Quod si electus in Romanum Pontificem voluerit eadem die consecrari Episcopus, benedici, & coronari, ut a superioribus Pontificibus plerumque servatum est, ita procedendum erit. Sed eadem servantur etiam in Electo, qui prius erat Episcopus, benedicendo, & coronando usque ad sequens Capitulum, ubi incipit: Cantores.

COMMENTARIUS.

I. **N**otandum hic primo illud, quod docet Jacobus Gajetanus in Ordine Romano XIV. Cap. XII. *Episcopus, inquit, qui in Papam electus est, non consecratur aenuo, sed benedicitur aliquo die Dominico, quo & coronatur*. Hæc benedictio, quod fieret loco Consecrationis, ubi a Formoso Papa, uti superius dictum fuit, consueverunt etiam Episcopi eligi in Romanos Pontifices, dicta est aliquando ab antiquis Scriptoribus Consecratio, ut recte admonet Pagius in Vita ejusdem Formosi, qui e Portuensi Episcopo creatus fuit anno Christi DCCCXCI. Romanus Pontifex Maximus; & in

Leonis Papæ IX. Vita, ex Tullensi Episcopo ad Romanam Cathedram anno MXLIX. electi. Sed & illud notandum, quod idem Pagius tradit in Vita Nicolai Papæ I. Stephani IX. aliis X. & aliorum plurium, Consecrationem olim electorum in Romanos Pontifices fieri semper consuevisse in Basilica S. Petri, & ut plurimum post inthronizationem, quæ in Lateranensi Basilica præcesserat, licet in hoc constans Ordo non fuerit. Certe Nicolaus I. postquam in Basilica Lateranensi inthronizatus fuisset, *postmodum a Nobilibus & populo, inquit Anastasius, in Basilicam Beati Petri deductus, præsentem Casare* con-

consecratur, Apostolicaque sublimatus in Sede, factus est Pontifex, & Missarum solemnita super sacratissimum Corpus Apostoli celebravit. Den-
sis tandem Optimatum, Populique agminibus, cum Hymnis, & canticis spiritualibus iterum Late-
ranum perductus coronatur. Urbs exultat, Cle-
vus latatur, Senatus, & Populi plenitudo magni-
fica gratulatur VII. Kalendas Maji. Ita legi-
tur in Labbeana Conciliorum editione, ubi in
Vita ipsius Papæ recensitus Anastasii locus affer-
tur, licet in editione Regia ille temporis chara-
cter desideretur.

II. Inter alios idem Pagius putat in ipsa
Nicolai I. Papæ Vita, hanc esse primam Coro-
nationis Summorum Pontificum mentionem; non
enim se legisse ait aliquem ex Romanis Pontifi-
cibus ante coronatum fuisse. Hæc præterea Co-

ronatio facta est in Ecclesia Lateranensi, licet
postea, ut idem Auctor notat in Paschali II. in
Cælestino III. & alibi, Pontifex semper coronatus
sit in Ecclesia Vaticana, e qua redibat corona-
tus in Lateranum. Quamobrem non immerito
suspiciatur, Anastasii locum, ubi legitur, *Late-
ranum perductus coronatur*, legendum esse, *Late-
ranum perductus coronatus*. Agemus nos de
hac Coronatione inferius, ac de ritibus in ea ser-
vatis, unum hoc loco monentes, consuevisse
quidem plerumque Romanos ipsos Pontifices, ut
in eorum Vitis legitur apud memoratum Pa-
gium, aliosque Scriptores, *eadem die consecrari
Episcopos, benedici, & coronari*. Id quod etiam
noscere licet ex Ordinibus præsertim Romanis,
XII. auctore Cencio, & XIV. auctore Jacobo
Gajetano,

§. X.

Quæ servantur in Coronatione etiam sine Consecratione Episcopali.

Primo ordinabuntur omnia ad hujusmodi solemnitatem opportuna convenienti tempore,
quæ ex lectione hujus Ordinationis facile colligi poterunt, & tandem constituto die
Dominico Pontifex si est in cubiculo, summo mane ad Cameram paramenti, quam
Papagalli appellant, ingreditur. Ibi a Diaconis Cardinalibus, Subdiaconis, Acoly-
this, & aliis Officialibus consuetis paratur Amictu, Alba longa, Cingulo, Stola,
Pluviali rubeo, & Mitra pretiosa. Cardinales alii circumstant, & omnes Prælati,
& Officiales cum suis Cappis laneis. Sic electus Pontifex paratus, Cruce præcedente,
progreditur ad S. Petrum ordine alias consueto, Diaconis Cardinalibus hinc & inde
fimbrias Pluvialis sustinentibus. Caudam autem Pluvialis portabit nobilior laicus, qui
erit in Curia, etiamsi esset Imperator, vel Rex; supra eum octo Nobiles, sive Ora-
tores portant Umbraculum hastilibus octo sustentatum, quod hodie baldachinum ap-
pellant. Ante eum duo servientes armorum portant Faldistorium cum magno cussi-
no. Forerius tapetum, & parvum scabellum, & cussinum.

COMMENTARIUS.

I. **E** lectum Romanum Pontificem in Eccle-
sia Lateranensi fuisse inthronizatum,
& proxima die Dominica in Vaticana
S. Petri Basilica de more consecratum, ac post-
modum Consecratione peracta, iterum ad La-
teranum processisse coronatum Seculo XI. ha-
bemus tum ex actis Vaticanis, tum ex Pandul-
pho in Vita Paschalis II. qui electus Pontifex
fuit Anno MXCIX. tum ex aliis Auctoribus,
tum denique ex variis Ordinibus Romanis Se-
culo XII. exaratis, qui extant apud Mabillonium Tomo II. Musei Italici. Quædam porro
hic essent explicanda, quæ tamen opportuno-
ri loco infra enarrabimus, præsertim vero in-
signem illum ritum jam a variis Regibus reli-
giose servatum, gestandi scilicet caudam Plu-
vialis Summi Pontificis, cum is illo indutus in-
cedit. Notandum autem præsertim hic illud,

quæ in hoc nostro §. tradit Patricius, consentire
iis, quæ de Coronatione Innocentii Papæ VIII.
refert Burchardus in suo Cæremoniali, sic in-
ter alia inquit §. CLXXXIV. *Dominica duode-
cima mensis Septembris, omnibus pro Coronatione
Pontificis ordinatis, Sanctissimus Dominus no-
ster Innocentius Papa Octavus Amictu, Alba,
Cingulo, Stola, Pluviali rubeis, & Mitra pre-
tiosis, descendens de Palatio ad Basilicam S. Pe-
tri sub Baldachino, quod per Nobiliores Curie
& Oratores portabatur, præcedente Cruce, &
post eam Cardinalibus in eorum Cappis Pontifi-
cem sequentibus, Officialibus quoque similiter
in suis ordine & loco euntibus, ut alias, per-
venit ad primam portam Palatii in sede qua por-
tabatur, demissus intra dictam portam Palatii,
sedens omnes Canonicos dicta Basilica ad pedis
osculum recepit.*

§. XI.

Ubi Pontifex electus recipit ad osculum pedis Canonicos & Capitulum Basilica S. Petri, & de preparatione ad Missam.

Cum Papa electus pervenerit ad portam ultimam Palatii, quæ est in capite porticus Ec-
clesiæ Sancti Petri, in plano apud portam extenditur tapetum, ponitur faldistorium,
To. I. O & su-

& super illud cussinum magnum, & ad pedes parvum scabellum, & sedens ibi Electus recipit ad osculum pedis Canonicos, & Capitulum Basilicæ S. Petri. Deinde surgens intrat Ecclesiam per portam, quæ est in medio, & progressus usque ad secundum circulum porphyreticum, detracta Mitra, orat versus ad Altare supra faldistorium a supradictis ibi paratum, & tunc supra scabellum parvum ponitur parvus cussinus. Facta oratione surgit, reasumit Mitram, & pergit ad Capellam S. Gregorii, quæ dicitur Capella S. Andræ, & sedens in sede sibi parata, recipit omnes Cardinales, & alios Prælatos cum suis Cappis ad reverentiam. Cardinales ad manus sub auriphrygio, Prælatos ad pedis osculum. Tunc surgens sine Mitra, adstante Cruce Papali, benedicit populo, dicens: *Sit Nomen Domini &c.* Subdiaconus dicturus Epistolam, depolita Cruce post benedictionem capit omnia sua paramenta, & simul cum eo Acolythi exuunt Cappas, & induunt Superpellicea super Rochettum, ad partem se retrahentes. Sedet deinde Electus aliquantulum cum Mitra; & iterum surgens sine Mitra, versus ad Altare sub silentio dicit: *Pater noster &c.* Tum alte incipit pro Tertia: *Deus in adjutorium &c.* Et sic stat quousque incipiatur Psalmus: *Legem pone*. Inde sedet cum Mitra, & assistentibus Episcopis cum Libro, adjuvantibus hinc inde Diaconis, ut moris est, incipit Psalmum: *Quam dilecta*. Interim Subdiaconus Apostolicus lecturus Epistolam, ut diximus, paratus omnibus suis paramentis, ex Altari subministrante Sacrista, accipit Sandalia, quæ reverenter portat ad Electum, sequentibus illum Acolythis cum Superpelliceis, & ea simul cum Cubiculario Cameræ imponit pedibus suæ Sanctitatis, Acolythis circumcirca fimbrias Pluvialis elevantibus supra illorum capita, Impositis Sandaliis, Diaconus lecturus Evangelium cum duobus aliis Diaconis, qui assistent Papæ, capiunt paramenta sua; ille Amictum, Albam, Cingulum, Stolam, Dalmaticam; Manipulum vero post capiet in Altari; alii vero duo capient Amictum, & Dalmaticas tantum. Induti reverenter simul ad Electum accedent, qui, finitis Psalmis, cum dicitur Capitulum pro Tertia, surgit cum Mitra, & finitis versiculis, depolita Mitra, & adstantibus duobus Ceroferariis, dicit: *Dominus vobiscum*; & orationem pro Tertia. Librum prior Episcoporum Cardinalium, qui ei assistere debet, sustinet supra caput; Episcopi vero assistentes juvant, & tenent candelam accensam. Dicto *Dominus vobiscum* post orationem, Liber removetur, Ceroferarii discedunt; & dicto a Cantoribus *Benedicamus Domino*, Papa sedet cum Mitra, & lavat manus, Episcopo Cardinale adjuvante, & reliqua ut alias. Lotis manibus, Episcopus Cardinalis redit ad locum suum, & Papa deponit Mitram, Pluviale, & Stolam; & Diacono lecturo Evangelium ante se stante, induitur consuetis paramentis, quæ per Acolythis hoc ordine portantur ex Altari, & ipsi Diacono porriguntur. Duo Diaconi assistentes, & post eos duo Subdiaconi adjuvant vestientem. Primum portatur Manipulus cum Subcinctorio, Crux pectoralis, Phanon, Stola, Tunicella, Dalmatica, Chirothecæ, Planeta, Mitra auriphrygiata. Anulus autem non datur, si non est consecratus Episcopus, quem si esset consecratus Episcopus, Cardinalis Episcopus assistens imposeret.

COMMENTARIUS.

I. **C**onsuevisse jam olim Canonicos, & Capitulum Basilicæ S. Petri recipi ad osculum pedis Summi Pontificis, ubi is recens electus Pontificiam Coronam accepturus, perveniebat ad portam ultimam Palatii, quærat in capite Porticus ipsius Basilicæ, edicit quidem hio noster §. ubi etiam alia notantur de loco, ubi a Pontifice Canonici ipsi ad prædictum osculum recipiebantur. Variant nonnihil hac in re antiqui Romani Ordines, in quibus tamen expressa fit mentio admittendi ad ipsum osculum Basilicæ Vaticanæ Canonicos. Legendus Romanus Ordo XI. seu Cæremoniale Romanum Gregorii Papæ X. jussu editum, itemque Ordo Romanus XIV. auctore Jacobo Gajetano apud eruditum Mabillonium Tomo II. Musæi Italici. Concinit autem hic noster §. iis quæ de Coronatione Innocentii Papæ VIII. tradit Burchardus in suo Cæremoniali §. CLXXXIV. cujus locum in fine Commentarii superioris attulimus.

Inter alia enim inquit, quod ipse Pontifex ubi pervenit ad portam Palatii in sede, qua portabatur, demissus intra dictam portam Palatii, sedens omnes Canonicos dictæ Basilicæ, Vaticanæ scilicet, ad pedis osculum recepit.

II. Pergit Burchardus, aliaque narrat in ipsa Coronatione Innocentii Papæ VIII. servata, quibus plane concinunt quæ in eodem hoc nostro §. præscripta sunt. Hæc autem Burchardi verba §. CLXXXV. *Deinde portatus in sede prædicta per portam consuetam mediam videlicet Basilicæ prædictæ usque ad secundum lapidem magnum porphyreum in terra positum, ubi in parato sibi Faldistorio cum scabello, & cussinis, & tapete subtus in terram prostrato, depolita Mitra, genuflexus ad Altare majus versus oravit. Faldistorium cum scabello, & tapete servientes armorum hinc & inde quo opus erat, portaverunt. Lapis magnus porphyreus, ut hic ait Burchardus, sive circulus porphyreticus, ut habet noster §. la.*

Japis marmoreus orbicularis est, in pavimento Basilicæ Vaticanæ positus, designabatque vel olim situm, seu locum, in quo functiones quædam a Pontifice peragebantur. Circulus iste, porphyreticus appellatur etiam *rota porphyretica* in hoc eodem nostro Cæremoniali, & longe ante a Cencio Camerario in Ordine Romano xii. Cap. xxxix. §. lxiv. ubi sic inter alia inquit: *Factaque oratione post Te Deum laudamus super rota in introitu quasi Ecclesiæ, Vaticanæ scilicet, pergit ad Secretarium &c.* Extant hodieque hujusmodi lapides porphyretici non modo in ipsa Vaticana Basilica, sed & in aliis Urbis Ecclesiis, de eisque videri inter alios potest eruditus Turrigius *De Cryptis Vaticanis*, Cap. viii. pag. 520. editionis ii.

III. Sed ut magis magisque ostendatur, ea quæ in præsentî §. præscripta sunt, accepta esse ex ritu servato in Coronatione Innocentii VIII. lubet describere quod mox idem Burchardus subdit §. clxxxvi. *Facta oratione, inquit, imposita est Mitra Pontifici, qui resedit in sede prædicta, in qua portatus est ad Capellam S. Gregorii, ubi in Faldistorio genuflexus sine Mitra oravit more solito. Faldistorium cum suis attinentiis portarunt servientes armorum, ut moris est, & facta oratione, Papa, accepta Mitra, sedit in sede Pontificali ibidem sibi parata, ubi accepit omnes Cardinales, & Prælatis in eorum Cappis ad reverentiam, primo Cardinales, qui osculabantur manum Papæ sub aurifrigio ei porrectam, Prælati deinde genuflexi pedem dextrum Papæ osculabantur. Juxta præscriptum nostri §. exhibita a Cardinalibus, & Prælatis reverentia Pontifici, tunc surgens, Pontifex scilicet, sine Mitra astante Cruce Papali, benedicit populo, dicens: Sit Nomen Domini &c. & deinde Subdiaconus dicturus Epistolam, deposita Cruce post benedictionem, capit omnia sua paramenta, & simul cum eo Acolythi exuunt Cappas, & induunt Superpellicea super Rochettum, ad partem se retrahentes; sedensque deinde Electus aliquantulum cum Mitra, & iterum surgens sine Mitra versus ad Altare, incipit Tertiam. Verum videtur fuisse omissa tunc illa Pontificalis benedictio in Coronatione Innocentii VIII. teste enim memorato Burchardo §. clxxxvii. *Reverentia, ut præmittitur, facta Pontifici, præstita suit sibi Mitra; qui surrexit, & stans detecto capite versus ad Altare dictæ Capellæ dixit secrete, Pater noster. Quo completo, voce intelligibili dixit cantando, & se a facie ad pectus signando, Deus in adiutorium meum iatende, & pro Tertiis sic manens, quousque Cantores incepissent Psalmum, Legem pone; quo incepto, sedit. Impositum est ei Birrettum, & Cantores proseguunt Tertiam.**

IV. Dum Tertia cantatur, Subdiaconus Apostolicus lecturus Epistolam, ut ait noster §. paratus omnibus suis paramentis, ex Altari, subministrante Sacrista, accipit Sandaliam, quæ reverenter portat ad electum Pontificem, sequentibus illum Acolythi cum Superpelliceis, & ea simul cum Cubiculario Cameræ imponit pedibus suæ sanctitatis, Acolythi circumcirca Fimbrias Pluvialis elevantibus supra illorum capita. Atque hic est ritus antiquus, quem fufius luculentiusque enarrat in suo Cæremoniali Burchardus loquens de electione, & Coronatione Innocentii VIII. hæc enim illius verba §. cxxxviii. *Tum Subdiaconus Latinus accessit*
To. I.

ad Altare, ubi Sacrista Capellæ nostræ mappulam sericam super brachia, & etiam caligas, & sandalia in manus dedit, quam ille manibus ad faciem elevatis portavit ante Pontificem. Eundem Subdiaconum sequuti sunt Acolythi Apostolici omnes, quibus Fimbrias Papæ extendentibus, retinentibusque, Subdiaconus ipse cum uno ex secretis Cubiculariis Papæ de subtus intravit, & calciamenta communia Papæ extrahentes, caligas, & sandalia prædicta ei imposuerunt. Interim Episcopi assistentes Librum, & candelam porrexerunt Diaconis assistentibus, qui illa in manibus tenentes hinc & inde cum Pontifice dixerunt more solito antiphonam: Ne reminiscaris, & Quam dilecta, & alia, prout in eodem Libro ordinatur.

V. Pergit in suo Cæremoniali Burchardus aliosque ritus recenset in laudata Innocentii VIII. Coronatione servatos, qui deinde in eodem nostro hoc §. præscripti fuerunt. Sic autem ille §. clxxxix. inquit: *Finitis Psalmis, Quam dilecta &c. Cum suis Responsoris, & Orationibus, Reverendissimi Domini Senensis & Sancti Georgii, qui assistebant Pontifici, & de Sabellis senior, post eos Diaconi Cardinales recesserunt a Pontifice, & retro Altare ibidem acceperunt paramenta albi coloris, videlicet Amictum, & Dalmaticam, ultraque Reverendissimus Dominus Cardinalis Senensis, quia dicturus erat Evangelium, accepit Albam, Cingulum, & Stolam; ante quorum discessum a Pontifice, accesserunt ad assistendum Reverendissimi Domini de Columna, & Ursinis, post prædictos seniores Diaconi Cardinales, & his tribus paratis, illi duo ad sua loca redierunt, & hi assisterunt more consueto. His adde, quæ & mox sequenti §. cxc. subjicit, sic inquit: *Interim Capellæ nostræ Cantores in angulo juxta murum extra dictam Capellam stantes proseguunt Tertiam usque ad Capitulum; quo per unum ex ipsis incepto, Papa surrexit cum Mitra; cum diceretur Versiculus post breve Responsorium venerunt ante Pontificem duo Acolythi Ceroferarii cum Socio meo competenti spatium. Finito Responsorio, ad versiculum Papa deposita sibi Mitra dixit: Dominus vobiscum, & orationem ex libro, quem subprior Presbyterorum Cardinalium, videlicet Reverendissimus Dominus Cardinalis Novariensis servabat, Domino Archiepiscopo Arelatenensi ipsum adjuvante, & Archiepiscopo Beneventanensi assistentibus candelam tenente. Qua finita Papa repetiit: Dominus vobiscum: & Cantores: Benedicamus Domino; & interim Ceroferarii redierunt ad Altare.**

VI. Tertia finita, ex antiquo ritu cujus non modo noster hic §. meminit, sed & idem Burchardus in memorata, toties Innocenti Papæ VIII. Coronatione, lavat Pontifex manus, dimissoque Pluviali, & Stola, Diacono lecturo Evangelium ante se stante, induitur consuetis paramentis, quæ per Acolythos hoc ordine portantur ex Altari, inquit noster §. & duo Diaconi assistentes, & post eos duo Subdiaconi adjuvant vestientem. Sane Ordo, quo tunc ipsa paramenta portantur, is est: *Primo portatur Manipulus cum Succinctorio, Crux pectoralis, Phanon &c.* Fufe de hisce, aliisque Pontificalibus vestibus, insignibusque diximus Tomo i. Romani Pontificalis in Prolegomenis, de iisdemque late inter alios differit Tomo i. liturgiæ Romani Pontifi-

cis eruditus Georgius . Quod Phanonem , seu , ut alii scribunt, Fanonem , spectat , varia licet sit ejus significatio , uti in Ordinibus Romanis videre est allatis a Mabillonio Tomo II. Musei Italici , & a memorato Georgio , ac aliis qui de Pontificalibus indumentis scripsere , Phano apud Macrum in Hierolexico , subtilissimum est sericum velum variegatum , quo utitur Papa cum Pontificaliter celebrat , quodque post Al-

bam induitur , & circa collum ligatur , ad modum caputii , ac supra caput ejus imponitur , usquequo Planeta induitur , supra quam deinde ad modum Mozzettæ adaptatur Pallio superposito , itaque pars Phanonis inferior infra Planetam conditur . Colores , quibus variegatur , quatuor esse , & quidem eosdem , qui in Ephod veteris Testamenti erant , testatur idem Auctor loco citato .

§. XII.

Quando, & qui accipiunt paramenta, & de colore.

In Consecrationibus utuntur hodiernis temporibus albis paramentis , quamvis antiqui secundum temporis exigentiam colore uterentur . Sed conveniens est , ut utamur secundum quod exigit Missa , quæ celebratur . In Processione autem erunt omnino albi coloris . Cum electus Papa incipit parari , Cardinales , & omnes Prælati , atque Officiales parantur . Episcopi Cardinales , Patriarchæ , Archiepiscopi , Episcopi , Abates , Pluvialibus , & albis Mitris . Presbyteri Cardinales Planetis , & Mitris similibus . Diaconi Cardinales Dalmaticis , & Mitris albis . Subdiaconi omnes Tunicellis . Auditores , & Clerici Cameræ Superpelliceis supra Rochettis . Secretarii , & Advocati super vestes communes habeant Pluviale cum apertura super humerum dextrum , & Almucia super sinistrum , alii ut alias .

COMMENTARIUS.

I. **Q**uatuor esse principales colores , quibus secundum proprietates dierum sacras vestes Ecclesia distinguit , album , rubeum , nigrum , & viridem , post Innocentium III. Libro I. Cap. LXV. notavit jam inter alios Gulielmus Durandus lib. III. sui Rationalis Divinorum Officiorum , Cap. XVIII. Juxta recentiores Missalis Romani Rubricas Parte I. Titulo XVIII. Romana ipsa Ecclesia quinque coloribus uti consuevit , albo , rubeo , viridi , violaceo , & nigro . Notat ibidem Gavantus , laudatum Innocentium III. colorem nigrum cum violaceo confundere , quatuorque & ipsum colores admittere jam enarratos , quatuor coloribus antiquarum vestium legalium respondentes , quales sunt byssus , purpura , hyacinthus , & coccus . Fuse de his coloribus disserit Clarissimus Dominicus Georgius in Opere , De Liturgia Romani Pontificis . Expressam plane quinque colorum mentionem facit Romanus Ordo XIV. Auctore Gajetano Cap. XLIX. & sequentibus . Sed his omissis , notandum quod ait memoratus Durandus loco citato , Num. III. in Consecratione Pontificis talibus esse indumentis utendum , qualia secundum diei proprietatem conveniunt ; quia scilicet in Consecratione Pontificis cantatur Missa de die .

II. Recte itaque noster hic §. ait quod in Consecrationibus utuntur hodiernis temporibus albis paramentis , quamvis antiqui secundum temporis exigentiam colore uterentur . Addit mox , conveniens esse , ut utamur secundum quod exigit Missa quæ celebratur . At vero juxta laudatas Missalis Rubricas , albo colore utendum non modo in Dedicatione , & Consecratione Ecclesiæ , vel Altaris , verum etiam in Consecratione Summi Pontificis , & in anniversario creationis , & Coronationis ejusdem , & electionis , & Consecrationis Episcopi . Putat Ga-

vantus , colorem album adhiberi in electione , & Consecratione Pontificum , ad indicandum candorem morum in illis . Porro adhibita fuisse paramenta albi coloris in Consecratione Innocentii Papæ VIII. testatur Burchardus in suo Cæremoniali §. cxcI. his verbis : *Finita Tertia, sedet, & accepta Mitra lavit manus more solito, Reverendissimo Domino Vicecancellario sibi serviente, & dante aquam; qui lotis, & extersis manibus, deposita sibi Mitra surrexit, & dimisso Pluviali, & Stola rubeis, accepit paramenta albi coloris, more & ordine consueto, Reverendissimo Domino Cardinale Senense parante.* Cardinales quoque , & Prælatos , aliosque Officiales albis tunc usos fuisse paramentis , idem Burchardus affirmat sequenti §. cxcII. ita inquires : *Interim dum Pontifex paramenta acciperet, omnes Reverendissimi Domini Cardinales, Prælati, & Officiales sua paramenta acceperunt alba; Cardinales in Capella prædicta in locis suis, videlicet Episcopi Superpellicum & Pluviale, Presbyteri Amictum & Planetam, Diaconi Amictum & Dalmaticam, & omnes Mitras albas ex damasco albo. Prælati vero extra Capellam Pluviale & Mitras planas albas; Officiales vero omnes extra Capellam, videlicet Subdiaconi Tunicas albas supra Rochettos, excepto quod Dominus Hugo de Bengiis, qui Epistolam dicturus erat, accepit Amictum, Albam & Cingulum; Auditores Rota, Clerici Camera, & Acolythi Superpellicea super Rochettos.*

III. Sed nec omittendum quod Burchardus §. cxcIII. subjicit de Secretariis , & Advocatorum , ac aliorum vestibus tunc ex recepto utique dudum ritu adhibitis : *Secretarii vero, & Advocati Pluvialia alba supra vestes suas communes accipiebant, aperturas Pluvialium super humeris dextris habentes. Cubicularii, Scutiferi Papæ, & alii incedebant in habitu consu-*

facto. Ita ille, ex quo addiscimus quod alias iterum iterumque notatum fuit, nempe quæ in

hoc nostro Cæremoniali ab Augustino Patricio ordinata sunt, jam olim usu recepta fuisse.

§. XIII.

Ad quos spectat Consecratio Romani Pontificis.

Consecratio Romani Pontificis secundum antiquas Patrum constitutiones spectare solebat ad Episcopum Ostiensem, qui etiam Pallio in ea Consecratione utebatur. Assistebant ei Portuensis, & Albanensis Episcopi, & hi tres in Benedictione Pontificis, quando alias esset consecratus, tres speciales Orationes super eum dicebant. Idem agebant in Coronatione Romanorum Imperatoris; sed, ut arbitror, ad tollendas contentiones, jam pridem introductum est, ut Prior Episcoporum Cardinalium cum duobus ex senioribus Episcopis id munus obire debeant, & in Pontifice, & in Cæsare. Sicque nostris temporibus servari videmus, ut non habeatur ratio Ecclesiarum, sed prioritatis Episcopalis. Consecratio nostris temporibus non accidit, nisi in Sixto Quarto, quæ tunc facta fuit secrete, & per Dominum Rothomagensem, qui erat Episcopus Ostiensis, & non Prior, sed non publicum. Prior igitur Episcoporum Cardinalium, sive alius, quisquis ille sit, qui electum Pontificem est consecraturus, procedat ad Altare majus S. Petri, ibique ad partem capiat Sandalia, & paramenta omnia Pontificalia, ac si celebraturus esset, cum Psalmis, & Orationibus consuetis, ibique expectet Pontificem. Interim Pontifici assistet subprior Episcoporum Cardinalium.

COMMENTARIUS.

I. **R**omanos Pontifices a tribus Episcopis, inter quos primum semper locum obtinebat Ostiensis, consecrari solitos, docent nos passim sacræ veterum ipsorum Pontificum inaugurationes. Liber Pontificalis, a S. Marco, qui creatus Romanus Pontifex fuit anno CCCXXXVI. institutum tradit, ut Episcopus Ostiensis, qui consecrat Episcopum Urbis, Pallio uteretur. Hinc primus, quem sciamus ex Episcopis hoc honore affectus, ut Pallio uteretur, est Episcopus Ostiensis, qui illud a memorato S. Marco Papa accepit. Pallium enim solis Patriarchis, & Archiepiscopis competit, uti jam fuisse diximus Tomo I. Romani Pontificalis in Commentariis ad Titulum xiv. *De Pallio*. Consueverunt tamen illud postea Romani Pontifices aliis etiam Episcopis concedere, vel intuitu meritum, vel alia iusta de causa, ut ibidem notavimus. Certe, ut aliqua exempla afferam, Siagrio Episcopo Augustodunensi a S. Gregorio Papa I. concessum Pallium est, cujus extat hac de re ad illum Epistola cxiv. Libri vii. itemque Actardo Nannetenensi ab Hadriano II. uti constat ex ejusdem Pontificis Epistola ad eum directa. Idem privilegium habuit Theodulphus Aurelianus, & plures alii, de quibus legendus doctissimus Joannes Cardinalis Bona, Lib. i. *Rerum Liturgicarum*, Cap. xxiv. Num. xvi. ubi addit, nunc eo uti, perpetuo privilegio Lucensem, & Ticinensem Episcopos in Italia, & Bambergensem in Germania.

II. His obiter notatis, ex eo quod Liber Pontificalis tradat, S. Marcum Ostiensi Episcopo Romani Pontificis Consecratori Pallium dedisse, Ciaconius in Leone II. qui electus fuit Pontifex anno DCLXXXII. & Sigonius in Historia de Regno Italiæ ad ipsum annum scribunt, Ostiensem Episcopum solum fuisse Romani Præfulis Consecratorem usque ad laudatum Leonem II. qui a tribus Episcopis scilicet, Portuensi, &

Veliternensi ordinatus est. Verba Anastasii in ipsius Leonis II. vita hæc quidem sunt: *Qui superscriptus sanctissimus Vir ordinatus est a tribus Episcopis, idest, Andrea Ostiensi, Joanne Portuensi, & Placentino Veliternensi, pro eo quod Albanensis Ecclesia Episcopum minime habuit.* Sed vel ex hoc recitato Anastasii loco corrui Sigonii opinio, & aliorum, qui ajunt, ante Leonem II. soli Episcopo Ostiensi tributum fuisse, ut seclusis aliis Episcopis Pontificem Romanum consecraret. Nam, cum Anastasius rationem reddat, quod pro Albanensi Episcopo, cujus Sedes vacabat, suffectus sit Veliternensis, id argumento profecto est, morem antea fuisse, ut cum Ostiensi, & Portuensi Episcopis, Albanensis etiam ordinationi Romani Antistitis ministraret. Notat hæc Mabillonius in Commentario prævio ad Romanum Ordinem, Capite xviii. ubi etiam recte observat, Ordinationes Episcoporum a tribus Episcopis etiam ante Nicenum Concilium Romæ factas fuisse; probatque ex facto Novati, qui, ut scribit Cornelius Papa ad Fabium Antiochenum apud Eusebium Libro vi. *Historiæ Ecclesiasticæ*, Cap. xxxv. accitos Romanos tres Episcopos temulentos, hora decima inclusos, adumbrata quadam, & inani manuum impositione, Episcopatum sibi tradere coegit, unico contentus quidem futurus, si unus ad consecrandum Romanum Antistitem tunc suffecisset.

III. Forte Sigonium aliosque in errorem induxit Augustini male intellecti auctoritas scribentis in Breviculo Collationis contra Donatistas, moris esse, ut Romanum Pontificem ordinet, *non aliquis Episcopus Metropolitanus, sed de proximo Ostiensis Episcopus.* Sed id non ita accipiendum, quasi Ostiensis solus fuerit, verum potius, quod præcipuus is Romani Pontificis Consecrator extiterit; ut idem Mabillonius scitissime advertit loco citato, ubi etiam Eulalii factum recenset, qui post Zosimi obitum, qui con-

contigit anno CDXVIII. de Pontificatu cum Bonifacio I. contendit. Is quippe, ut in Litteris Cleri Romani ad Honorium Augustum legitur, *circumventis paucissimis Presbyteris, exhibito etiam cum aliis Ostiensi Episcopo, in locum sibi non debitum, incustodito Religionis Ordine, per ambitum proruit*. Ubi cum audis, Ostiensem Episcopum cum aliis accitum fuisse ad Eulalium ordinandum, alios quoque Episcopos ejus Ordinationi cooperatos fuisse, vero proximum est. Ceterum longe ante Leonem II. Pelagius I. electus Papa anno DLV. cum in tota Italia, ut in ejus Vita scribit Anastasius, tertius inveniri non potuisset Episcopus, a quo consecraretur, a Perusino, & Ferentino Episcopis, ac Andrea Presbytero Ostiensi consecratus fuit; quia scilicet Ordinatio Romani Præfulis, sicut & aliorum Episcoporum juxta pervetustam Ecclesiæ disciplinam, a tribus Episcopis fieri semper solita fuit; quam disciplinam jam nos fuisse explicuimus Tomo I. Romani Pontificalis in Commentariis ad Titulum XIII. qui est, *De Consecratione Electi in Episcopum*.

IV. Sane illud ex veteribus Romanæ Ecclesiæ monumentis variisque Scriptoribus liquet, privilegium consecrandi Romanum Episcopum, ita Episcopo Ostiensi fuisse proprium, ut si hic eligeretur Pontifex, vel Consecrationi adesse non posset, Archipresbyter Ostiensis ejus loco ei interesse deberet. Id primum addiscimus ex Gaufrido Priore Vasiensi, qui in suo Chronico, quod extat Tomo II. Bibliothecæ Labbei, loquens de Lucio III. antea Episcopo Ostiensi ita ait: *Feria III. eligitur Humbaldus, qui Pontifex erat Ostia, & Veliternensis Urbium. Sequenti Dominica prima Septembris, anni scilicet MCLXXXI. coronatur, & insignitur a Theodino Episcopo Portuensi, & ab Archipresbytero Ostiensi juxta consuetudinem, & ab universo populo, & Clero laudatur, Lucius III. Lucensis Tuscus vocatus*. Recte dicit Gaufridus, Lucium III. insignitum, seu benedictum a Theodino Episcopo Portuensi, & ab Archipresbytero Ostiensi juxta consuetudinem; quia cum Consecratio Romani Pontificis specialiter pertineret ad Ostiensem Episcopum, & ipse Lucius esset Episcopus Ostiensis, debuit plane ab alio consecrari, seu benedici, sed cum assistentia Ostien-Archipresbyteri juxta consuetudinem; cujus etiam testem habemus Cencium Camerarium, qui postea fuit Honorius Papa III. in Ordine Romano XII. cujus partem Baronius anno MCXCI. & Mabillonius Tomo II. Musei Italici integrum publicavit. Sic autem ille inquit in eo Ordine Cap. XLVIII. *Post hac autem in proxima die, Dominica Electus cum omnibus Ordinibus Sacri Palatii, & Nobilibus Romanis vadit ad Ecclesiam B. Petri, ubi ad Altare majus, prout in Ordine continetur, ab Episcopo Ostiensi specialiter, & aliis Episcopis de Curia consecratur; hoc addito, quod si forte Episcopus Ostiensis præsens non fuerit, Archipresbyter Ostiensis, seu Veliternus interesse debet Consecrationi*.

V. Eandem disciplinam præterea nos docet Jacobus Gajetanus in Ordine XIV. Romano apud eundem Mabillonium ibidem. Loquens enim de Consecratione, seu de Benedictione, quæ dabatur Episcopo, qui in Papam electus erat, Cap. XIV. sic ait: *Electus sedet in Faldistorio in plano posito inter Altare, & Sedem emi-*

*nentiore, & ibi coram ipso veniunt Albanensis, Portuensis, & Ostiensis Episcopi, vel Archipresbyter Ostiensis, si non sit Episcopus. Qui Albanensis dat primam Orationem, scilicet: Oremus. Deus qui adesse &c. Secundam Episcopus Portuensis: Oratio, Supplicationibus Omnipotens Deus &c. Tertiam Episcopus, vel Archipresbyter Ostiensis. Rursus Capite XIV. Orationem primam dat Episcopus Albanensis: Deus, qui &c. secundam Orationem dat Portuensis Episcopus: Supplicationibus &c. tertiam Orationem dat Ostiensis Episcopus, vel Archipresbyter, si desit Episcopus. Ex quibus patet, deceptum esse Joannem Garnerium, cum in Notis ad Titulum VIII. Capitis II. Libri Diurni Romanorum Pontificum scripsit, fuisse privilegium Ecclesiæ Ostiensis consecrare Romanum Pontificem, antequam ulli Episcopi in numero Cardinalium censerentur. Nam cum prima mentio septem Episcoporum Cardinalium medio Seculo octavo occurrat; Seculo tamen decimoquarto ineunte, quo Jacobus Gajetanus laudatum Ordinem XIV. composuit, hoc privilegium Ostiensi Episcopo adhuc competeat, licet jam a longo tempore plures alii Episcopi in Cardinalium Collegium cooptarentur. Addit ibidem Garnerius: *Nunc vero, cum inter eos, scilicet Cardinales, plures sint Episcopi, qui tres aliis ætate præeunt, consecrandi Pontificis jure gaudent*. Verum ex dictis convincitur, aliam rationem quærendam esse, cum Consecratio Romani Præfulis devoluta sit ad tres S. R. E. Cardinales antiquiores.*

VI. Hoc porro privilegium Archipresbytero Ostiensis Ecclesiæ jam Seculo VI. fuisse concessum, uti notat Pagius in Præfatione ad Vitas Romanorum Pontificum, Num. VIII. ex eo deducitur, quod cum, teste Anastasio Bibliothecario, post electionem Pelagii, qui creatus Pontifex fuit anno DLV. non essent Episcopi, qui eum ordinarent, inventi sunt duo Episcopi, Joannes de Perusio, & Bonus de Ferentino, & Andreas Presbyter de Ostia, & ordinauerunt eum Pontificem. Licet enim Andreas ab Anastasio appelletur tantum Presbyter, norunt tamen Eruditi, Archipresbyterum Presbyteri, sicut Archidiaconum Diaconi nomine, sæpe ab antiquis exprimi. Eadem sine dubio de causa, ut citato loco idem Pagius subdit, Joannes Veliternensis Episcopus, qui Romanam Sedem medio Seculo XI. sub Benedicti X. nomine invasit, a Presbytero Ostiensi consecratus, seu benedictus est. Ceterum licet Consecratio ipsa Romani Pontificis secundum antiquas Patrum constitutiones spectaret maxime ad Episcopum Ostiensem, qui etiam Pallio in ea Consecratione utebatur, eique assisterent Portuensis, & Albanensis Episcopi; ac præterea licet hi tres in Benedictione Pontificis, quando alias esset consecratus, tres speciales orationes dicerent, idemque agerent in Coronatione Romanorum Imperatoris; tamen, ut notat in hoc Romano Cæremoniali Patricius, *ad tollendas contentiones jampridem introductum est, ut Prior Episcoporum Cardinalium cum duobus ex senioribus Episcopis id munus obire debeant, & in Pontifice, & in Casare*. Sic suis fervari ait se vidisse temporibus, ut non haberetur scilicet ratio Ecclesiarum, sed prioritatis Episcopalis. Consecrationem addit suo ævo non accidisse, nisi in Sixto IV. quæ tunc

tunc facta fuit secreta, & per Dominum Rothomagensis, qui erat Episcopus Ostiensis, & non Prior, sed non publicum.

VII. Ceterum, quamvis ea esset vetus Romanæ Ecclesiæ disciplina, ut Episcopus Ostiensis Romanum Pontificem consecraret, qui etiam Pallio in ea Consecratione utebatur, eique assisterent Portuensis & Albanensis Episcopi, sciendum hic tamen illud, quod ubi die xxx. Novembris anno mccc. in Festo S. Andreæ Apostoli Clemens XI. consecratus fuit in Episcopum (erat enim Presbyter Tituli S. Silvestri in Capite, ubi electus fuit Pontifex) in Basilica Vaticana apud Altare S. Petri, Consecrationem ipsam accepit a Cardinale Bulliono Episcopo Portuensi, cum Episcopus Ostiensis Cardinalis Cybo Sacri Collegii Decanus propter gravem ætatem annorum LXXXVIII. omnino inhabilis esset ad consecrandum Pontificem. Episcopi assistentes fuerunt Car-

dinales Acciajoli Episcopus Tusculanus, & Carpineus Episcopus Sabinensis; sacræque huic actioni Cardinales omnes Cappis violaceis amicti interfuerunt, uti rem narrat in suo ms. Diario Apostolicus Cæremoniarius Candidus Cassina, qui etiam ait, in ipsa Consecratione Bullionum nequaquam usum fuisse Pallio, quod ipsum scilicet competit Episcopo Ostiensi, cujus ille gerebat vices. Qui plura de hac disciplina, quæ Consecrationem spectat Romani Pontificis, scire desiderat, legere inter alios potest eruditissimum Lupum Tomo vi. Operum editionis Venetæ, ubi Concilium Brixienfe enarrans multa vetera monumenta affert. Non recte tamen ait, Consecrationem ipsam Romani Summi Pontificis non per quosvis, sed per solos Ostiensem, Portuensem, & Albanensem Episcopos posse fieri, esse antiquissimum Romanæ Ecclesiæ morem, & haud dubie Apostolicum Institutum.

§. XIV.

Ordo procedendi ex Capella S. Gregorii ad Altare, & quæ fiant antequam Electus intret ad Altare.

Paratis omnibus Ordinibus, Pontifex incensum mittet in thuribulum, & Prior Diaconorum cum Ferula Processionem ad Altare majus ordinabit hoc modo. Familiares Papæ, minores Nobiles, Cubicularii; Nobiles majores, & Barones, Conservatores, & Oratores laici, & non Prælati; Secretarii, & Advocati mixtim, ita ut duo antiquiores ex utroque ordine sint in digniori loco; Acolythi, Clerici Cameræ, Auditores, Acolythus thuriferarius, Acolythi ceroferarii, qui septem numero esse deberent; Subdiaconus cum Cruce Papali, & aliis Subdiaconis; Subdiaconi duo Latinus & Græcus cum Libris Evangeliorum; Diaconus Græcus; & nota, quod pro Epistola, & Evangelio in lingua Græca solebant vocari in hac celebritate Monachi ex Monasterio Cryptæ ferratæ. Deinde Abbates forenses, Episcopi, Archiepiscopi, Oratores, Prælati, Abbates Urbis, qui in hoc die sunt privilegiati, Episcopi assistentes Papæ, Patriarchæ; Diaconi, Presbyteri, & Episcopi Cardinales; Diaconi duo assistentes, & inter eos medius Diaconus lecturus Evangelium; demum ipse Pontifex, qui si pedibus suis incedet, ipsi Diaconi assistentes fimbrias Pluvialis portabunt, & major Princeps caudam. Octo Nobiles, seu Oratores baldachinum supra ejus caput ferent. Deinde sequetur Auditor, qui Mitram ministrat medius inter duos Cubiculares secretos, & inter eos est Secretarius Papæ, si non est Prælatus. Deinde Protonotarii, & Curiales Clerici non parati. Ante Pontificem immediate minister Cæremoniarum præcedit cum duabus arundinibus, super alteram stupam, super alteram vero candelam ardentem portans. Et cum Pontifex Capellam S. Gregorii exierit, Cæremoniarius ad eum conversus, ignem stupæ immittit, & genuflexus alta voce dicit: *Pater Sancte, sic transit gloria mundi*; quod tertio facit distincto æquali spatium, antequam perveniant ad portam Capellæ. Procedunt deinde omnes per navim ipsius Capellæ S. Gregorii, ubi sepulchra sunt Romanorum Pontificum, & cum illam exierint, flectunt ad dextram, & per portam, quæ est ante Altare, ingrediuntur Capellam, & ascendunt etiam ad dextram, antequam Papa cancellos Capellæ intret. Tres ultimi Presbyteri Cardinales veniunt ei obviam, & osculantur os, & pectus Pontificis a seniori incipientes; deinde ante Diaconos assistentes procedunt. Cum autem perventum fuerit ad Altare, Pontifex deposita Mitra facit orationem super Faldistorium; deinde surgens remoto Faldistorio, facit Confessionem more solito, stans hoc ordine. A Pontificis dextra stat Episcopus Cardinalis Consecrator, vel assistens, si non est Consecrator; & post eum Diaconus Cardinalis assistens; a sinistris stat Diaconus Cardinalis lecturus Evangelium, & post eum Diaconus Cardinalis assistens, post quem genuflexus manet Subdiaconus Latinus cum Libro Evangeliorum, & Manipulo Pontificis, quem illi imponit, dicto, *Indulgentiam &c.* Interim Cantores cantant Introitum Missæ, & *Kyrie eleison*. Et hæc quidem supradicta circa descensum ex Palatio ad Ecclesiam, & quæ in Capella S. Gregorii, & usque ad factam Confessionem superius dicta sunt, præterquam de parando Consecrante, servantur

tur etiam, quando electus Episcopus non est consecrandus, sed benedicendus, & coronandus tantum. Nunc de ipsa Coronatione subjungemus.

COMMENTARIUS.

I. Dem quod in hoc §. præscribitur, servatum jam antea legimus ante nostri hujus Cæremonialis editionem ab Augustino Patricio concinnatam. Teste Burchardo diu Apostolicarum Cæremoniarum Magistro in suo Cæremoniali, ubi enarrat electionem Innocentii Papæ VIII. cujus deinde jussu Patricius Cæremoniale hoc nostrum ordinavit, §. cxciv. & sequenti: *Omnibus paratis, ministrante Reverendissimo Domino Vicecancellario naviculam, Papa imposuit incensum pro Processione, ut moris est. Tum Reverendissimus Dominus Cardinalis Senensis Prior Diaconorum, accepta Ferula, sive Baculo albo longitudinis palmorum quatuor, vel circa, ordinavit Processionem de Capella prædicta ad Altare majus &c.* Est plane antiquus ritus, ut in hac Processione thuribulum adhibeatur, incensumque in illud ponat Pontifex; id enim expresse edicunt Cæremoniales antiqui codices, ac præsertim Romanus Ordo XIV. Auctore Jacobo Gajetano, Capite XII. Episcopus, inquit, *accepta navicula cum incenso de manu Acolyti, porrigit eam Papa, & osculatur manum ipsius, & imposito incenso in thuribulum per Papam, Episcopus vadit ad locum, ubi sunt alii Episcopi Cardinales processionaliter ordinati &c.* Gestari etiam jam olim consuevisse Romæ Ferulas in Processionibus ab Archidiacono, & Priore Subdiaconorum, qui Processiones ipsas dirigebant, docet Romanus antiquus Ordo XII. Auctore Cencio Cap. XXXIX. afferrique in eum ritum possent innumera veterum Scriptorum testimonia, quæ supervacaneum est hic recensere. Sane meminit Processionis fieri solitæ ante Coronationem Papæ Ordo Romanus XIV. Auctore Jacobo Gajetano Cap. XI I. ubi inter alia docet, ordinari ipsam Processionem ab Archidiacono, si ve Priore Diaconorum.

II. Ordo solemnissimæ hujus Processionis, quam consentaneæ huic nostro §. describunt Burchardus in suo Cæremoniali, ubi enarrat Coronationem Innocentii VIII. & ut alias Apostolicos Cæremoniarios mittam, Grassus in ms. suo Diario, ubi Leonis Papæ X. Coronationem recenset, juxta præscriptum laudati Romani Ordinis XIV. Cap. XI I. is erat: *Procedit, inquit, Subdiaconus cum Cruce indutus Tunicella propter solemnitatem. Hunc sequuntur Abbates, Episcopi, & Archiepiscopi. Post hos vadunt Presbyteri Cardinales, quos sequuntur Episcopi Cardinales secundum prioritates suas. Post hos vadunt Acolyti in navicula, thuribulo, & incenso. Post ipsos septem Subdiaconi cum Tunicellis portantes septem candelabra cum facula; in medio quorum vadit ille, qui dicturus est Epistolam portans Librum Evangeliorum, & cum eo qui dicturus est Epistolam Græcam; & post eos qui lecturus est Evangelium Græcum. Diaconi Cardinales sequuntur ordine suo; inter quos est ille, qui dicturus est Evangelium, ultimus vel cum ultimo, duo Diaconi Cardinales, unus a dextris, & alius a sinistris ducunt Dominum Papam; circa quos est Subdiaconus, qui servit de Mitra portans tobaleam.* Ita memoratus Romanus Ordo

xiv. apud laudatum Mabillonium Tomo II. Musei Italici pag. 225.

III. Nulla in hoc Ordine, sicut nec in Cæremoniali Davantriæ mentio illius ritus, quem hic noster §. commemorat, ut nempe in ipsa Processione ante Pontificem immediate Minister Cæremoniarum præcedat cum duabus arundinibus, super alteram stupam, super alteram vero candelam ardentem portans; & cum Pontifex Cappellam S. Gregorii exierit, Cæremoniarus ad eum conversus, ignem stupæ immittat, & genuflexus alta voce dicat: *Pater sancte sic transit gloria mundi &c.* Fuisse in usu hunc ritum anno MCCCCIX. quo Pisus ubi electus fuit Alexander V. recepit insignia coronationis Nonis Julii, testantur Acta Concilii Pisani Tomo. VI. Spicilegii Dacheriani relata, in quibus ita legimus: *Die Dominica immediate sequente, quæ fuit dies septima Julii, dictus Dominus Papa Alexander fuit coronatus in Ecclesia Cathedrali, ubi fuit celebrata Missa sollemnis. Ex illa die fuerunt multa sollemnia, ut puta de stupis combustis, dicendo: Sic transit gloria mundi; de Epistola, & Evangelio in Missa Græce, Hebraice, & Latine; de impositione Tiaræ &c.*

IV. Quo ritu fieret ipsa stupæ combustio in Summi Pontificis Coronatione, diserte exponit Burchardus in suo Cæremoniali, ubi enarrat Coronationem Innocentii Papæ VIII. sic enim inquit §. cxcviii. *Quum primum Papa fuit extra Capellam S. Gregorii prædictam, imposui parvum manipulum stupæ in summitate cannæ meæ, & genuflexi, cannam ipsam dextra manu erectam tenens, quam Socius meus accendit, me interim ad Pontificem verso, & alta voce dicente: Pater Sancte sic transit gloria mundi.* Ter id consuevisse fieri, & quidem a Cæremoniario Apostolico, canendo ea verba, *Pater Sancte, sic transit &c.* tradit Grassus in suo ms. Diario, ubi describens Coronationem Leonis X. hæc habet: *Ego stupam ardentem ter Papæ obtuli, in cantu dicens: Pater Sancte sic transit gloria mundi.* Eadem legere est in Coronationibus aliorum Pontificum Romanorum, ut videre est in mss. Cæremoniariorum Apostolicorum Diariis, in quibus una cum aliis ritibus in nostro hoc §. descriptis fit & mentio combustionis stupæ sub ea verborum formula: *Pater Sancte, sic transit gloria mundi.*

V. Similem huic ritum adhibitum fuisse Seculo VI. in Coronatione Imperatorum, addiscere ex eo licet, quod scribit Leontius in Vita S. Joannis Eleemosinarii Alexandrini Episcopi Cap. XVII. his verbis: *Postquam coronatus est Imperator, nullus universi Senatus & adstantium exercituum antiquum memoriale aliquod nunciat, sed mox illi, qui dicuntur monumentorum edificatores, sumunt quatuor, aut quinque minutias marmorum pusillas de diversis coloribus, & ingrediuntur ad eum, & dicunt: Domine, quali metallo Imperium tuum jubes fieri monumentum tuum? insinuantes videlicet ei, quia tanquam homo corruptibilis, & transitorius curam habeto tuæ ipsius animæ, & pie regnum dispone.* Hanc fuisse seculi VI. in Oriente praxim,

xim, quo vivebat laudatus Joannes Eleemofynarius notat, Martene Lib. II. *De antiquis Ecclesiasticis ritibus*, Cap. IX. Num. IV. ubi etiam observat simile aliquid viguisse ibidem adhuc Seculo XI, probatque ex Epistola XVII. Libri I. S. Petri Damiani, ubi hæc habet: *Apud Græcos hæc teneri consuetudo perhibetur, ut, cum Imperator quis dignitate creatur, mox, ut Imperialibus fuerit infulis redimitus, Corona simul ac Sceptri gloria decoratus, cum denique Procerum vallatur obsequiis, cum excipitur modulantibus psallentium choris, quidam sibi præsto fit obviis, qui videlicet una manu vasculum plenum mortuorum ossibus, ac pulveribus offerat; in alia vero stuppam lini subtiliter pexam, ac pili pensilibus moliter demolitam, cui protinus ignis adhibetur, & repente in ictu oculi flamma subito vorante consumitur; ut in altero considerare debeat quod est, in altero valeat videre quod habet. In cineribus siquidem se cinerem recognoscit; in stuppa jam colligit in die Judicii quam subito mundus ardebit: quatenus dum se simul, ac sua, tam vana, tam floccipendenda considerat, de Imperialis culminis ascenso fastigio nullatenus insolescat.*

VI. Quod Pontificiæ Coronationis Cæremonias attinet, commenti plane sunt quidam, in Pontificis Romani Coronatione dici solitum aliquando fuisse: *Pater Sancte, non videbis dies Petri*. Verum uti observat Viçtorellus in Notis ad Ciaconium in Vita Benedicti XII. dicti XIII. Antipapæ, Augustinus Patritius, qui in hoc Titulo II. sui Cæremonialis, seriem & ritum Pontificiæ Coronationis diligenter recenset, ne verbum quidem de hac re habet, unde id inter fabulas reputatur, & ab aliquo non bene feriato Viro scripta esse oportet. Licet enim mysterio non vacare quidam credant, quod nullus in tanto numero legitimorum Pontificum,

quamvis juniori ætate permulti creati fuerint, inventus hætenus aliquis sit, qui annos XXV. Romanæ Sedis S. Petro attributos, non solum non sit prætergressus, sed nec quidem attigerit, non tamen propterea inde inferri potest, consuevisse dici Pontificibus in Coronatione: *Non videbis dies Petri*. Quis enim, ait Spondanus anno MCDXXIV. Num. III. futurorum adeo securus, ut nulla præcedente revelatione Divina, rem tantam possit asserere?

VII. Porro de ea re interrogatus ab Alexandro II. Pontifice S. Petrus Damiani, citato Lib. I. Epistola XVI. respondit, tribus de causis id accidere. Primo, ut Ecclesiæ Caput supremum agnoscens, brevibus periodis ejus vitam concludi, sanctum timorem exinde conciperet, ac laudato fine innocenter morti occurrere præparetur. Secundo, quia Mundus totus in Pontificis Vitam oculos collimat, qui tanquam obscuratus sol ad se cunctorum lumina trahit. Tertio, dum Papa vitæ usura fruitur, ad spirituale animarum regimen peculiari incumbat studio, de cujus custodia post tempus breve erit Summo Pastori Deo arctam rationem redditurus. His addi & possunt quæ S. Bernardus scripsit in Epistola sua CCXXXV. ad Eugenium III. Papam; *Quantorum, inquit, in brevi Romanorum Pontificum mortis tuis oculis aspexisti? Ipsi te Prædecessores tui citissima, & certissima decessionis admovent; & modicum tempus dominationis eorum, paucitatem dierum tuorum nunciat tibi*. Concludit tandem cum hoc utilissimo documento Epistolam, dicens: *Quibus successisti in Sedem, ipsos sine dubio sequeris ad mortem*. Atque hæc satis sint de ritu combustionis stupæ; quod autem reliquos spectat ritus in hoc præscriptos, jam partim supra, partim infra in sequentibus Commentariis opportunius enarrabimus.

§. XV.

Hoc totum caput prætermittitur, si Papa erat prius Episcopus consecratus; in eo namque Consecratio Episcopalis continetur.

Cantores ut finierint *Kyrie eleyson*, quiescent. Electus procumbet super Faldistorium ante Altare, ad ejus dextram Consecrator, & ad sinistram Diaconus Evangelii super scabellum, Diaconi assistentes post Pontificem, duo Episcopi Cardinales seniores hinc inde super scabellum, alii omnes ubi comodum erit; genuflexi procumbent omnes cum Mitris in capite, & Diaconus Evangelii incipiet sine Mitra Litaniam, & omnes respondent replicando. Cum perventum fuerit ad locum ubi dicitur, *Ut hunc Electum*, & etiam tertio dicitur ab eodem Diacono, & tam Consecrator, quam omnes alii in Episcopali dignitate constituti præsentem, & parati, erecto capite, & extensa dextra, non tamen moventes se de locis suis benedicunt consecrandum tertio, ut in Ordinario. Finita Litaniam, omnes surgunt, & Consecrator stat ad infimum gradum Sedis Papalis, vertens faciem ad Altare, medius inter duos seniores Episcopos Cardinales, qui etiam Stolum habere debent, & Librum. Electus Pontifex ante eum stabit medius inter assistentes Diaconos vertens faciem suam ad faciem Consecrantis. Episcopi, Archiepiscopi, Patriarchæ, qui aderunt parati cum suis Libris, omnes accedent, & circulum facient, & omnia cum Consecratore dicent voce tamen submissa, depositis Mitris, & omnibus stantibus. Episcopus Cardinalis a sinistris super Pontificem dicit hanc Orationem: *Oremus. Adesto supplicationibus nostris Omnipotens Deus, ut quod humilitatis nostræ gerendum est mysterio, tuæ virtutis compleatur effectu*. Deinde Episcopus Consecrator Orationem cum nota. *Oremus. Propitiare quesumus Domine supplicationibus nostris, & inclinato super hunc famulum tuum cornu Sacerdotalis gratiæ, benedictionis tuæ infunde in eum virtutem. Per Dominum nostrum &c.* Qua finita usque in unitate Spiritus

ritus Sancti Deus, ponit Librum Evangeliorum apertum inter cervicem, & spatulas Electi, quem Diaconi Cardinales retinent usque ad finem; & tam Consecrator, quam alii duo Episcopi Cardinales ponunt primo manus super ejus caput nihil dicentes, & similiter faciant omnes præsentés parati, in Episcopatus ordine constituti. Consecrator autem extensis manibus dicit Præfationem consuetam; *Per omnia sæcula sæculorum &c. Honor omnium dignitatum*, ut supra notavimus, quum electus Papa consecratur alio die quam isto. Et ungit Electi Caput, deinde Manus. Tum imponit ei Anulum, & demum dat ei Librum Evangeliorum, & tandem ambo lavantur, & mundantur, ut diximus plene in eodem loco. Pontifex sedet in Faldistorio sibi parato in plano inter Sedem eminentem, & Altare, dum lavat; Consecrator in alio loco sibi comodo, & lotus deponit paramenta Pontificalia, & cum Pluviali, ac Mitra assistit Pontifici, ut prius. His finitis, non dicuntur illæ tres Orationes, quæ dici solent, quando Electus non consecratur, quia erat Episcopus. Sed mox mundatis manibus, & capite, ducitur ante Altare; & de manu Prioris Diaconorum accipit Pallium de Corpore, & Altari Beati Petri sumtum, ut inferius dicemus. Et hæc quidem omnia ab eo loco, ubi incipit, *Cantores ut finierint Kyrie eleyson, quiescent*, dimittuntur, si electus erat prius consecratus Episcopus.

N O T A.

Quum de iis, quæ in hoc continentur §. nonnulla superius, alia vero inferius explicata jam

fuerint, supervacaneum propterea censemus hoc loco immorari, actumque iterum, ac sæpius agere.

§. XVI.

De Benedictione, electi Pontificis jam consecrati Episcopi.

Sic electus Pontifex jam Episcopus, est tantum benedicendus, & coronandus hac die, hoc modo proceditur. Servatis omnibus, quæ supra diximus usque ad cantatum Introitum & *Kyrie eleyson*, Papa facta Confessione, accipit immediate Mitram, & sedet in Sede sive Faldistorio sibi parato inter Sedem eminentem & Altare, vertens faciem ad ipsum Altare, & tres primi Episcopi accedunt ad Pontificem, & faciem ante illius faciem tenentes sine Mitra, illorum junior super Pontificem stantem sine Mitra, ipse in medio duorum stans primam dicit Orationem, videlicet: *Oremus. Deus qui adesse non dedignaris ubicumque devota mente invocaris, adesto quæsumus invocationibus nostris, & huic famulo tuo N. quem ad culmen Apostolicum (1) iudicium tuæ plebis elegit, ubertatem supernæ benedictionis infunde, ut sentiat se tuo munere ad hunc apicem pervenisse.* Secundam dicit immediate secundus Episcopus Cardinalis stans & ipse in medio, videlicet: *Supplicationibus nostris Omnipotens Deus effectum consuetæ pietatis impende, & gratia Spiritus Sancti famulum tuum N. perfunde, ut qui in Capite Ecclesiarum nostræ servitutis ministerio constituitur, tuæ virtutis soliditate roboretur.* Et tertiam antiquior, idest Prior Episcoporum Cardinalium in eodem loco stans, videlicet: *Deus qui Apostolum tuum Petrum inter ceteros Apostolos Primatum tenere voluisti, eique universæ Christianitatis molem super humeros imposuisti: respice quæsumus propitius hunc famulum tuum N. quem de humili Cathedra violenter sublatum in Thronum ejusdem Apostolorum Principis sublimamus, ut sicut profectibus tantæ dignitatis augetur, ita virtutum meritis cumuletur, quatenus Ecclesiasticæ universitatis onus te adjuvante digne ferat; & a te, qui es beatitudo tuorum, vicem meritam recipiat. Per Christum Dominum nostrum.* Dictis Orationibus, Papa etiam sine Mitra accedit ad Altare, & Prior Diaconorum, secundo adjuvante, videlicet partem Pallii pendentem elevante, capit Pallium de Altari, & imponit Pontifici, & solus dicit: *Accipe Pallium, scilicet plenitudinem Pontificalis Officii ad honorem Omnipotentis Dei, Gloriosissimæ Virginis Mariæ ejus Matris, Beatorum Apostolorum Petri, & Pauli, & Sanctæ Romanæ Ecclesiæ;* & firmat cum spinulis. Accepto Pallio accedit ad Altare sine Mitra, illud osculatur primum, & deinde Librum Evangeliorum, quem Subdiaconus a sinistra parte offert; imponit incensum in thuribulo, Diacono Evangelii offerente naviculam; incensat Altare more solito, & accepta Mitra in cornu Altaris, stans a Diacono incensatur, & (2) non recipit Diaconos tunc ad osculum, ut alias, sed ascendit ad Cathedram eminentem, & sedens recipit ad reverentiam Cardinales, & Prælatos omnes paratos; Cardinales ad osculum pedis, manus, & oris; alios

(1) Ita legitur in Editione Romana anni 1560. Sed in Veneta anni 1516. & Coloniensi anni 1557. *inditium*.

(2) Sic in ipsa editione Romana, sed in Veneta & Coloniensi: *& in os recipit Diaconus tunc osculum*.

alios paratos ad osculum pedis, & manus. Finita reverentia, surgit Papa sine Mitra, & legit Introitum, & *Kyrie eleison*, sustinente Librum Cardinali Episcopo cum aliis assistentibus. Deinde in voce dicit: *Gloria in excelsis Deo. Pax vobis*; & Orationes opportunas, videlicet de die, & de Spiritu Sancto, & ultimo dicit secretam Orationem pro se, quæ habetur in Consecratione Episcoporum.

COMMENTARIUS.

I. **N**Otatum jam superius compluries fuit, quod in Romano Ordine XIV. docet Jacobus Gajetanus, Cap. XI. Episcopum scilicet, qui in Papam electus est, non consecrari denuo, sed benedici aliquo die Dominico, quo & coronatur. Ergo, *servatis omnibus, quæ supra diximus, usque ad Introitum, & Kyrie eleison, Papa facta confessione*, inquit nostrum Cæremoniale, *accipit immediate Mitram, & sedet in Sede, sive in Faldistorio sibi preparato inter Sedem eminentem, & Altare, vertens faciem ad ipsum Altare, & tres primi Episcopi accedunt ad Pontificem &c.* Est hic plane antiquus Ritus, cujus mentionem faciunt Cæremoniale Gregorii X. & Codex ms. Piersanctianus, ubi ita inquit: *Facta confessione, ascendit Sedem preparatam, & ibi coram ipso veniunt Episcopi Cardinales, & dicunt Orationes illas tres, quæ sunt in Ordinario secundum ordinem in ipso Ordinario scriptas.* Loquitur & de eodem ritu expressius Romanus Ordo XIV. auctore memorato Jacobo Gaetano, Cap. XIV. ubi sic inter alia inquit: *Inde procedens, a Choro scilicet, vadit processionaliter usque ad Altare, sed non ascendit ad Altare. Tunc facta Confessione ascendit Sedem preparatam, non eminentiorem, sed sedet in Faldistorio in plano posito inter Altare & Sedem eminentiorem; & ibi coram ipso veniunt Albanensis, Portuensis, & Ostiensis Episcopi, vel Archipresbyter Ostiensis, si non sit Episcopus. Qui Albanensis Episcopus dat primam Orationem, scilicet: Deus qui ad esse &c. secundum Episcopum Portuensis: Supplicationibus &c. tertiam Episcopus, vel Archipresbyter Ostiensis: Deus qui Apostolum tuum Petrum &c.*

II. Quamquam vero memorati hi tres Episcopi, Albanensis, Portuensis, & Ostiensis, in benedictione Pontificis, quando alias esset consecratus, tres speciales Orationes super eum dicebant, ut docet supra Cæremoniale nostrum Romanum in §. XII. ad tollendas tamen contentiones, uti ibidem dictum fuit, jam pridem introductum est, ut Prior Episcoporum Cardinalium cum duobus ex senioribus Episcopis id munus obire debeant. Quandonam ritus iste invaluit, non audeo definire, videtur tamen invaluisse labente seculo XIV. quando scilicet scriptus est laudatus Codex Piersanctianus, in quo nulla fit mentio memoratorum Episcoporum Cardinalium Albanensis, Portuensis, & Ostiensis. Quicquid sit, antiquæ sunt ipsæ Orationes, legunturque non modo in recitato Romano Ordine XIV. Capite XIV. sed & in Pontificali Colbertino, & in aliis, ac præsertim in Cæremoniali Burchardi, in quibus tamen ad primam Orationem post illa verba, *ad culmen Apostolicum*, legitur, *commune iudicium tuæ plebis &c.* Verbum, commune deest in nostro Cæremoniali, quod a Patricio ordinatum est, in ejusque prima editione Veneto anni MDXVI. & Colonienfi anni MDLVI. non legitur *iudicium*, sed *inditium*. Præterea ubi ad

To. I.

secundam Orationem in nostro Cæremoniali in fine legitur, *nostræ servitutis ministerio*, in Romano Ordine XIV. apud Mabillonium habetur, *nostræ servitutis mysterio*. Sed forte hæc varietas exscriptori Codicem minime intelligenti tribuenda est. Ubi tandem ad tertiam Orationem in citato nostro Cæremoniali dicitur, *eique universa Christianitatis molem super humeros imposuisti*, in eodem Romano Ordine XIV. & in Colbertino Pontificali legitur: *eique universa Christianitatis molem superimposuisti*.

III. Dictis Orationibus, ex præscripto nostri Cæremonialis Papa etiam sine Mitra accedit ad Altare, & Prior Diaconorum, secundo adjuvante, videlicet partem Pallii pendentem elevante, capit Pallium de Altari, & imponit Pontifici, & solus dicit: *Accipe Pallium &c.* & firmat cum spinulis. Est hic plane antiquus ritus, quem ita recenset Romanus Ordo XII. auctore Cencio Cap. XLV III. Num. LXXXI. *Consecratione, finita Prior S. Laurentii Sacri Palatii ponit Pallium super Altare, quod ipse Prior propria manu debet parare, & statim Archidiaconus cum secundo Diacono dant in manu Pontificis, & solus Archidiaconus dicit Pontifici: Accipe Pallium &c. & nihil aliud; statimque ipse Archidiaconus cum Priore Basilicario aptat idem Pallium super Pontificem, & intromissis spinulis aureis tribus ante & retro & sinistro latere, in capite quarum sunt innixi tres hyacinthini lapides, & sic ornatus accedit Pontifex ad Altare, & ibi celebrat honorifice Missam.* Juxta præscriptum Cæremonialis Gregorii Papæ X. cui concinit Codex Piersanctianus, dictis Orationibus, Pontifex *Sedet in sede, & recipit dictos Cardinales, & Prælatos alios, & facit ea quæ hic continentur a verbo illo*, omnes alios Prælatos ad pedem & osculum: quibus receptis, venit ad Altare, & inibi desuper summat Palliam paratum per Priorem Subdiaconorum Cappellanorum, sive per Priorem Basilicæ Sanctæ Sanctorum; & duo Priores Diaconi Cardinales tenent Pallium ipsum; & tunc Prior illorum duorum solus dat Pallium Summo Pontifici sub his verbis: *Accipe Pallium &c.* & aptato Pallio ipso super eum cum tribus spinulis aureis, ut est moris, ascendit Summus Pontifex ad Altare &c. Eadem sunt, quæ de Pallio dando Papæ per Priorem Diaconorum Cardinalium, docet nos citatus Romanus Ordo XIV. auctore Jacobo Gajetano, Cap. XV.

IV. Rituum praxim, quos nostrum Cæremoniale in hoc §. XVI. præscribit, expressius docet Burchardus in suo Cæremoniali §. CC. & seq. ubi enarrat ritus in Ordinatione Innocentii Papæ VIII. servatos. Facta Confessione, inquit, Papa non ascendit ad Altare, sed ad Sedem in plano sibi paratam inter eminentem, & Altare, juxta infimum gradum Solii, ubi ad Altare versus sedit, Mitram in capite tenens, quam recepit, facta Confessione, antequam de loco Con-

P 2

sef-

fessionis recederet, & cum ea ante recessum. Cruci prædictæ in Altari positæ fecit reverentiam. Papa sic in dicta Sede sedente, accesserunt ante eum tres primi Episcopi Cardinales, videlicet, Vicecancellarius Episcopus Portuensis Collegii Decanus, Neapolitanus Episcopus Sabinenfis, & Sancti Marci Prænестinus, omnibus Prælati, ac aliis in suis locis remanentibus. Hi tres ante Pontificem inter ipsius Sedem prædictam, & Altare, juxta tamen infimum gradum Altaris, ad ipsum Pontificem versi se locarunt, quisque eorum suum Capellanium de Mitra sibi servientem post se habens. Omnes etiam alii Cardinales, videlicet, Episcopi, & Presbyteri ad dextram, Diaconi vero ad sinistram Papæ accesserunt inter Solium & Altare stantes, Capellanos suos de Mitra eis servientes post se habentes. Omnibus sic stantibus, depositis Papæ, ac omnibus Mitris, surrexit Pontifex, & Cardinalis Sancti Marci tertius & ultimus ex prædictis tribus, stans in medium ante dictum gradum Altaris, facie ad Pontificem versa, & ad dextram suam habens Vicecancellarium, atque ad sinistram Neapolitanum Cardinales, qui quasi sibi ipsis facies vertebant, sicuti assistentes Episcopi in Consecrationibus Episcoporum altare solent, magis tamen ad Pontificem tendentes, dixit hanc Orationem, nullum versiculum præmittens, neque *Dominus vobiscum*, absolute incæpit dicens in tono Orationum solemni & festivalium consueto: *Oremus. Deus qui adesse &c.* Addit mox idem Burchardus, ad Orationis conclusionem respondisse tunc Cardinales, *Amen*, ipsumque tenuisse Librum prædicto Cardinali Orationem dicenti, stantem ad ejus sinistram.

V. Teste eodem Burchardo, dicta Oratione prædicta per Cardinalem Sancti Marci, Cardinalis Neapolitanus venit ad locum, in quo ille steterat, qui etiam accessit ad locum, in quo Neapolitanus steterat, Papa, & aliis omnibus, ut prius stabant, sine Mitris manentibus, & ipse Neapolitanus, eodem Burchardo Librum, ut ipse testatur, juxta ejus sinistram tenente, similiter absolute incipiens dixit in tono prædicto. *Oremus. Deus qui Apostolum &c.* ad conclusionem inquit respondisse Cantores, *Amen*. Quicquid sit, finitis Orationibus supradictis, ut idem Burchardus narrat in §. ccvi. amota fuit Sedes Papæ in plano, ut supra dictum est, posita, & omnes Cardinales, demtis Assistentibus, ad sua loca sunt reversi. Papa vero cum bireto sine Mitra, accessit ad inferiorem gradum Altaris, quo ibidem constituto, Cardinales Senensis, & Sancti Georgii ad sinistram Papæ coram eo elevatum Pallium tenuerunt, quod Senensis Prior Diaconorum solus in ambas manus apertum accipiens, Papæ illud imposuit dicens: *Accipe Pallium &c.* Tum idem Prior, adjuvantibus ipsum aliis Diaconis, & Subdiaconis, tres spinulas ipsi Pallio infixit more consueto. Atque hæc sunt quæ narrat idem Burchardus testis oculatus, & tunc temporis Apostolicarum Cæremoniarnum director.

VI. Accepto Pallio, ut inquit nostrum Cæremoniale, *Pontifex accedit ad Altare sine Mitra, illud osculatur primum, & deinde Librum Evangeliorum, quem Subdiaconus a sinistra parte offert, imponit incensum in thuribulo, Diacono Evangelii offerente naviculam, incen-*

sat Altare more solito &c. Paucis ritus hos omnes complexus est Romanus Ordo xii. auctore Cencio, ex cujus præscripto, *Pallio ornatus accedit Pontifex ad Altare, & ibi celebrat honorifice Missam*. Pauca etiam sunt, quibus ritus ipsos recenset Cæremoniale Gregorii X. Romanus Ordo xiv. & Codex Pier sanctianus: *Ascendit, inquit, Summus Pontifex ad Altare, & facit incensum*. Sane ex Cæremoniali Joannis Burchardi, ubi enarrat ritus Sedis vacantis post obitum Sixti IV. & electionem Innocentii VIII. §. ccviii. *Dato Pontifici Pallio, ut præmittitur, Cantores incaperunt Introitum pro Missa, & Kyrie eleison, & Papa ascendit ad Altare, & illud detecto capite osculatus est; deinde etiam Librum Evangeliorum per Subdiaconum more solito sibi oblatum; tum ibidem imposuit incensum, Priore Diaconorum Evangelium dicturo naviculam ministrante, & incensavit Altare, deinde per eundem Priorem incensatus fuit ibidem ipse Papa in cornu Epistolæ cum Mitra stans; quo incensato, non accepit Diaconos assistentes ad osculum, ut moris est, sed ascendit ad Sedem eminentem, & Prælatos paratos omnes ad reverentiam venientes accepit, Cardinales ad pedis & oris, Prælatos vero ad pedis & manus osculum*. Mos ergo ante Burchardum erat, ut incensatus Pontifex tunc Diaconos assistentes ad osculum exciperet. Porro in Nota ad nostri Cæremonialis Textum jam advertimus, in editione Veneta anni mdxvi. & Colonienfi anni mdlvii. post ea verba, *a Diacono incensatur*, ita legi: *& in os recipit Diaconos*, non vero Diaconus, *tunc ad osculum*, assistentes scilicet, ut ait Burchardus; *sed ascendit ad Cathedram & sedens recipit ad reverentiam Cardinales, & Prælatos omnes paratos &c.* ut in nostro Cæremoniali. Ratio porro ejus moris ea esse videtur, quod in hac actione Cardinales nondum præstiterunt obedientiam Papæ; tunc enim juxta receptum ritum eos ad osculum recipit in Altari peracta thurificatione, cum scilicet illi jam antea odedientiam ipsi Pontifici præstitissent.

VII. Finita reverentia, *surgit Papa sine Mitra*, uti idem nostrum Cæremoniale inquit, *& legit Introitum, & Kyrie eleison, sustinente Librum Cardinali Episcopo, cum aliis assistentibus; deinde in voce dicit, Gloria in excelsis Deo. Pax vobis, & Orationes opportunas &c.* Incensato Altari, ex præscripto Cæremonialis Gregorii X. itemque Ordinis Romani, auctore Gajetano, & ms. Pier sanctiani Codicis, *Pontifex demum sedit ad eminentem Sedem, & dicit, Dominus vobiscum, vel Pax vobis, cum Gloria in excelsis, ut dies requirit, & postea dicit Orationem Dominicæ alte, & aliam dicit pro se secreta*. Recensetur Oratio Dominicæ in his Cæremonialibus, quia scilicet juxta eorum præscriptum Ritus ipse Consecrationis, Benedictio-nisve novi Pontificis die Dominica peragebatur, Sed audiamus laudatum Burchardum, qui enarrans ritum servatum post electionem Innocentii Papæ VIII. §. ccix. ita scribit: *Facta reverentia, Cardinalium scilicet & Prælatorum, ut supra, surgit Pontifex, deposita Mitra, & cum assistentibus tantum Cardinalibus dicit Introitum, & Kyrie eleison, Cantoribus interim continuo Kyrie eleison cantantibus. Missa dicta est de Octava Nativitatis Beatæ Mariæ Virginis, Tum ve-*

ro sequenti §. ccx. ita subicit: *Dictis per Pontificem, Introitu, & Kyrie eleison, cessarunt Cantores, & Papa dixit: Gloria in excelsis Deo, quod cum assistentibus complevit more solito; tum in dicta Sede dixit: Pax vobis, & Orationem de Octava; qua sub sua conclusione completa, dixit aliam Orationem, etiam alta voce dicens: Oremus. Deus qui corda fide-*

lium &c. quam etiam sub sua conclusione complevit; & ea completa interim, quoad Cantores responderent, Amen, dixit secrete aliam pro se, stans, ut prius, videlicet: Adesto supplicationibus nostris Omnipotens Deus, & quod humilitatis nostræ gerendum est ministerio, tuæ virutis impleatur effectus. Per Dominum. Sed de hac oratione jam supra.

§. XVII.

De Laudibus faciendis Pontifici ante Epistolam.

Dictis Orationibus, sedet Pontifex, & Prior Diaconorum cum Ferula descendit ad Confessionem Beati Petri cum Subdiaconis, Auditoribus, Scriniariis, idest, Secretariis, & Advocatis; quibus in duas acies distributis, ita ut in qualibet acie sint ex omnium ordine, faciunt Laudes Pontifici stantes capitibus detectis. Papa, & omnibus aliis sedentibus in locis suis, Prior Diaconorum incipit solus alta voce quasi legendo, *Exaudi Christe*. Subdiaconi, Auditores, Scriniarii, & Advocati respondent: *Domino nostro Innocentio a Deo decreto Summo Pontifici & universali Papæ vita*; & sic tertio dicitur per Priorem, & toties per illos respondetur. Subsequenter idem Prior Diaconorum dicit: *Salvator Mundi*; & illi respondebunt: *Tu illum adjuva*; & sic ter dicitur, & ter respondebitur. Deinde idem Prior dicit: *Sancta Maria*; & illi respondebunt: *Tu illum adjuva*; & bis dicitur, & bis respondebitur. Inde Prior idem subjunget: *Sancte Michael*; & illi respondebunt: *Tu illum adjuva*. Et tunc deinceps semel dicitur, & semel respondebitur. Sequitur Prior. *Sancte Michael. Sancte Gabriel. Sancte Raphael. Sancte Joannes Baptista. Sancte Petre. Sancte Paule. Sancte Andrea. Sancte Stephane. Sancte Leo. Sancte Gregori. Sancte Benedicte. Sancte Basili. Sancte Sabba. Sancta Agnes. Sancta Cecilia. Sancta Lucia*. Finitis Laudibus, dicitur Epistola Latine, & deinde Græce, & proceditur in Missa ut alias usque ad finem. Datur Benedictio, sed non publicantur tunc Indulgentiæ.

C O M M E N T A R I U S.

I. **F**Actas acclamationes, ac Laudes olim in electionibus Episcoporum, notavimus Tomo I. Romani Pontificalis in Commentariis ad Titulum XIII. *De Consecratione electi in Episcopum*. Id quammaxime servatum in Consecratione, & Coronatione Romanorum Pontificum, docent jam nos passim in eorundem Vitis Anastasius, Baronius, Pagius, alique Scriptores. Juxta Romanum Ordinem xi. auctore Benedicto Basilicæ S. Petri Canonico scriptum ante annum mclxi. ut notat Mabillonius in sua ad ipsum Ordinem Nota, in usu plane erant Laudes ipsæ, quæ in hoc nostro §. recensentur; sic enim inquit Num. xxii. *Cum autem venit Pontifex ad Basilicam Zachariæ Papæ, antequam descendat, descendunt Cardinales ad faciendum Laudes. Tunc Prior Cardinalis Sancti Laurentii foris muros deposita Mitra dicit: Jube domne benedicere. Pontifex benedicit eum; qui alta voce dicit: Summo, & egregio, ac ter Beatissimo Papæ Innocentio vita. Respondent Cardinales omnes: Deus conservet eum, tribus vicibus. Salvator Mundi. Cardinales respondent: Tu illum adjuva, & vicibus tribus. Sancta Maria, tu illum adjuva, per omnem Chorum Sanctorum tres Sanctos. In fine: Omnes Sancti adjuvate illum, tribus vicibus. Kyrie, tribus vicibus. Et pro laude accipiunt tres solidos. Judices vero se representant, & dicit Primicerius: Jube Domne benedicere. Pontifex benedicit eum; & alta voce dicit: Hunc diem. Res-*

pondent Judices: Multos annos, tribus vicibus. Tempora bona habeas. Respondent Judices: Tempora bona habeamus omnes. Tunc Dominus Pontifex descendit de equo. Primicerius Defensores, & Secundicerius suscipiunt eum per manus, & ducunt usque in Cameram.

I. Ordini xi. Romano addimus Romanum Ordinem xii. auctore Cencio, qui non modo Laudum Ritus meminit quæ fieri solitæ erant in novi Pontificis inauguratione, sed & Epistolæ, atque Evangelii, quæ tunc in Missa Latine, & Græce pronunciabantur; sic enim ille inquit: *Laudes ab Archidiacono cum Cardinalibus, & Subdiaconis, & Scriniariis; Epistola Latina cum Græca, & Evangelium Latinum cum Græco, & omnes aliæ solemnitates tunc fiunt. Pauca quidem hæc sunt, sed tamen satis exprimunt antiquum ritum, quem multo luculentius recensuit seculo xiii. Cæremoniale Gregorii X. & ineunte Seculo xiv. Romanus Ordo xiv. ac deinde etiam Codex Pierfantianus: Oratione finita, inquit laudatum Gregorii X. Cæremoniale, Dominus Papa residet in Sede, & Prior Diaconus Cardinalis portans Ferulam in manibus cum Diaconis, Subdiaconis, Scriniariis, & Judicibus, omnes induti solemniter, descendit ante Altare, & facit duas acies, sive fila, unam ex una parte, & unam ex reliqua, aqualiter dividendo, & ponit primo Diaconos juxta Altare, secundo Subdiaconos, tertio Judices, quarto Scriniarios in ordine; & ipse Prior Diaconus*

conus incipit *Laudem sic alta voce, tamen quasi legendo*: Exaudi Christe; & *Judices, & Scriniarii procedunt similiter in cantu quasi legendo*: Domino nostro Papæ a Deo decreto Summo Pontifici, & universali Papæ Vita. *Item idem Prior dicit secundo*: Exaudi Christe; & *Judices, & Scriniarii Antiphonam, ut prius, & sic facit tertio. Idem Prior dicit*: Salvator Mundi; & *Judices, & Scriniarii Antiphonam*: Tu illum adjuva; & *cetera facit. Tertio item idem Prior dicit bis*: Sancta Maria; & *illi Antiphonam*: Tu illum adjuva. Eodem modo dicit tamen *semel*: Sancte Gabriel, Sancte Raphael, &c. *aliis respondentibus*: Tu illum adjuva. *Quibus finitis, Prior dicit*: Kyrie &c. & *hoc facit tertio, & postea omnes similiter dicunt alta, & una voce*: Kyrie &c.

III. Hactenus Cæremoniale Gregorii X. cui pene ad verbum concinunt Romanus Ordo XIV. & Pierfanctianus Codex. Nomen S. Michaelis desideratur quidem in citato Cæremoniali, & in Pierfanctiano Codice, atque in Cæremoniali Burchardi, sed legitur tamen in Romano Ordine XIV. & in aliis omnibus Cæremonialibus editis. S. Andreæ nomen extat non modo in Cæremoniali Gregorii X. Romano Ordine XIV. & Pierfanctiano Codice, sed & in nostro Romano Cæremoniali juxta editionem Romanam anni MDLX. desideratur tamen in editione I. Veneta, ejusdem Cæremonialis anni MDXVI. & in Coloniensi anni MDLVII. Sed his omissis, describendum hic ritum censeo, quem servatum docet Burchardus in Ordinatione Innocentii VIII. Papæ, ita in suo Cæremoniali inquires ad §. ccxii. & seqq. *Finitis, ut supra, orationibus prædictis, Papa sedet in Sede eminenti prædicta, imposita sibi Mitra, & Prior Diaconorum Cardinalium, videlicet Senensis Ferulam in manu accipiens, & portans, sequentibus ipsum Subdiaconis, Auditoribus, & Secretariis, ut supra dictam est, indutis, descendit ad portam cancelli, ubi in plano ibidem inter Altare, & portam fecit duas lineas ab Altari ad portam, ad dextram, & sinistram, in qualibet linea de quolibet ex dictis tribus Ordinibus, Officiales collocans, primos versus ad Altare Subdiaconos, tum Auditores, & Secretarios, ita quod de linea ad lineam sibi invicem facies vertant. Quibus sic ordinatis, & omnibus detectis capitibus existentibus, Cardinalis Senensis stans & ipse detecto capite, medius inter duos primos Subdiaconos, ad Altare versus dixit alta voce quasi legendo, Exaudi Christe. Subdiaconi, & Secretarii, & Auditores responderunt suo ordine stantes: Domino nostro Innocentio a Deo decreto Summo Pontifici, & universali Papæ vita. Quod tertio dictum est per Cardinalem prædictum, & toties ab aliis prædictis responsum. Deinde idem Cardinalis Senensis dixit: Salvator Mundi. Subdiaconi, & alii prædicti responderunt: Tu illum adjuva. Quod bis per Priorem dictum, & toties per illos responsum; sicque Laudes continuata, prout infra, nempe, Sancte*

Gabriel, Sancte Raphael &c. Porro mirum videri debet, in recitato Burchardi loco, sicut & in Pierfanctiano Codice, & in Colbertino Pontificali, non modo nomen Sancti Michaelis, sed etiam Sanctæ Mariæ desiderari, cum alias utrumque nomen expresse recensetur in Cæremoniali Gregorii X. in Romano Ordine XIV. & in aliis multis Cæremonialibus Libris.

IV. Quicquid sit, finitis Laudibus, ut ait nostrum Cæremoniale, *dicitur Epistola Latine, & deinde Græce, & proceditur in Missa, ut alias usque ad finem.* Ritus est plane antiquissimus, ut in Missa Papali, Summo Pontifice Sacra facienti, non modo duo Subdiaconi interserviant, quorum alter Græcus Græca lingua, Latinus alter lingua Latina Epistolam canit, verum & duo Diaconi, quorum alter Latinus Latine Evangelium, alter Grecus Græce pronunciat. Quod olim & in Constantinopolitana Ecclesia usurpatum fuisse, liquet ex Nicolai I. Papæ Epistola ad Michaellem Imperatorem, qui Latinam linguam ex contemptu barbaram appellabat. At nedum Græce, & Latine, sed & Hebraice Sacri Evangelii lectionem publice in Papali Missa, ac præsertim in Summi Pontificis inauguratione, certis etiam constat monumentis Historiæ. Ut alia fileam exempla, in solemni inauguratione Alexandri Papæ V. celebrata in Concilio Pisano anno MCCCCIX. Epistolam, & Evangelium tribus linguis pronunciatum esse, nimirum Græce, Hebraice, ac Latine, testantur Acta ejusdem Concilii apud Dacherium Tomo VI. Spicilegii, pag. 334. Porro quod nostrum §. spectat, eidem plane concinit, quod de Coronatione Innocentii Papæ VIII. scribit in suo Cæremoniali Burchardus §. ccxvi. *Laudibus sic expletis, quæ dum dicerentur, Papa sedet in Solio suo, ac Cardinales, ac Prælati omnes in suis locis cum Mitris sedebant, Prior, Diaconorum scilicet Cardinalium, & alii prædicti redierunt ad loca sua, videlicet Prior in cornu Epistolæ Altaris in scabello suo sedit, alii in terram; & Subdiaconus in loco solito dixit Epistolam Latinam, & post alius Græcam, & concinnata est Missa ordine consueto, Papa celebrante nihilo penitus immutato; qua finita, Papa in Altari sine Mitra dedit benedictionem, & non Indulgentiam.* Indulgentia quippe publica deinde fuit data a duobus Diaconis Latina primum, & postea vulgari lingua, postquam scilicet a Priore Diaconorum impositum fuit Capiti Pontificis Regnum triplici Corona ornatum, populo acclamante, *Kyrie eleison*, ut infra in §. sequenti. Ceterum consuevisse olim in nonnullis nostri Regni Neapolitani Ecclesiis Epistolam, atque Evangelium Græce, ac Latine pronuciari in Missa, diximus jam in nostro Opere, *De Codice Sancti Evangelii &c.* Lib. II. Cap. II. ubi etiam notavimus, semel in anno Dominica Palmarum Brundisii in Sallentinis Epistolam item & Evangelium Græca lingua ex prisca, & immemorabili ejusdem Latine Ecclesiæ consuetudine recitari consuevisse.

§. XVIII.

De Coronatione Papæ super gradus Ecclesiæ.

Sacris Missarum solemniis rite peractis, proceditur ad Coronationem. Pontifex reasumtis Chirothecis, & Anulis, cum omnibus paramentis suis, in quibus celebraverat, & cum

& cum Cardinalibus, Prælatibus, & Officialibus omnibus, ut in Missa paratis, procedit ad suggestum super gradus Basilicæ Apostolorum Principis ex materia constructum, & ornatum, ibique in Sede eminenti sibi parata sedet, & cum omnes Prælati convenierint, & populus ex Basilica in plateam exierit, Diaconus a sinistris deponit Mitram consuetam e Capite Pontificis, & Diaconus a dextris Tiaram, quod *Regnum* appellant, & triplici corona ornatum, Pontificis Capiti imponit, populo acclamante, *Kyrie eleison*, & Diaconus a dextris Latine, a sinistris vero vulgariter publicant plenarias Indulgentias. Tum paratur Processio ad Lateranum; sed quoniam plerumque antequam hæc completa sint, hora est satis tarda, & longa ad Lateranum restat via, multaque ibi adhuc sunt peragenda, consueverunt aliquando Pontifices, & Patres sustentationis gratia aliquantulum Cibi sumere. Paratur refectio in Atrio Domus Archiepresbyteri Basilicæ pro Pontifice, & Cardinalibus; pro aliis Prælatibus in vicinis Domibus Canonorum. Coronato Pontifice veniunt ad refectorem, & interim parantur, quæ ad Processionem sunt opportuna.

COMMENTARIUS.

I. **N**otavimus jam alias supra, primam Coronationem Summorum Pontificum videri illam, quæ facta est Nicolao Papæ I. in Romanum Pontificem electo, & consecrato anno DCCCLV. Testatur quippe in ipsius Pontificis Vita eruditus Pagius, atque in Historia Romanorum Pontificum summe versatus, minime se legisse aliquem ex Romanis Pontificibus antea coronatum fuisse. Certe, postquam Nicolaus ipse in Basilica Lateranensi inthronizatus fuisset, postmodum a Nobilibus, & populo, ait in ejus Vita Anastasius, in Basilicam Beati Petri deductus, Apostolicæque sublimatus in Sede, factus est Pontifex, & Missarum solemniam super sacratissimum Corpus Apostoli celebravit. Additque mox ad rem nostram: *Densis tandem Optimum, populique agminibus, cum Hymnis, & Canticis spiritualibus, iterum Lateranum perductus coronatur. Urbs exultat, Clerus latatur, Senatus, & populi plenitudo magnifice gratulatur.* Facta videtur hæc Coronatio in Ecclesia Lateranensi, licet postea Pontifex semper coronatus sit in Vaticana Basilica, e qua redibat coronatus in Lateranum. Unde idem Pagius suspicatur, in Anastasio, ubi legitur, *Lateranum perductus coronatur*, legendum esse, *Lateranum perductus coronatus*.

II. Puto equidem, longe ante Nicolaum I. coronari consuevisse Romanos Pontifices post suam Consecrationem, eo capitis ornamento, quod dicitur Regnum, cujus meminit Romanus Ordo IX. Num. VI. apud Mabillonium Tom. II. Musei Italici, ubi etiam scriptum fuisse existimat Ordinem ipsum tempore Leonis III. electi Romani Pontificis anno Christi DCCXCV. Ergo laudatus Ordo IX. Romanus de Coronatione novi Papæ agens, sic inter alia inquit: *Ingressus in Sacratarium jam tunc sedet in Sella Apostolica. Egrediens inde, cum ad inferiores gradus Sancti Petri descendit, ibi stat equus, vel sella præcessoris Pontificis, & ad sedendum paratus. Et accedunt Patroni Regionum, uno incipiente, ceteris respondentibus, in hunc modum canunt ei laudem: Dominus Leo Papa, quem Sanctus Petrus elegit, in sua Sede multis annis sedere: Hoc usque ter dicto, accedit Prior stabuli, & imponit ei in capite Regnum, quod ad similitudinem cassidis ex albo fit indumento; & tunc demum ascendit super equum, & vallatur a fudicibus, constipanturque plateæ cuneis populorum,*

expectantium eum, & cantantium laudem. Antiquum itaque est Papale Regnum jam ante Nicolaum I. usitatum, eratque ad similitudinem Cassidis factum ex albo indumento. Antiqua pariter est illa laudis formula, quæ dicebatur in creatione, sive inauguratione novi Pontificis, nempe, *Dominum N. Papam S. Petrus elegit*; uti præter allatum Leonis Papæ III. exemplum, constat ex Actis Vaticanis, ubi narrant inthronizationem, & Coronationem Gregorii Papæ VII. Et continuo universitate Cleri, & Populi acclamante: *Dominum Gregorium Papam Sanctus Petrus elegit; indutus rubea chlamyde, sicut moris est, & Papali Mitra insignitus, inivit, & moriens in B. Petri Cathedra fuit inthronizatus*; in Basilica nempe Lateranensi, uti alibi dictum fuit.

III. Omissis aliis id genus exemplis, certum plane illud est, Paschalem II. electum in Romanum Pontificem anno MXCIX. non modo in Vaticana Basilica consecratum fuisse, sed etiam coronatum. Scribit siquidem in ejus Vita Pandulphus, sex Episcopos, nempe Oddonem Ostiensem, Mauritium Portuensem, Galterium Albanensem, Bozonem Lavicanum, Milonem Prænestinum, & Ottonem Nepefinum, inter Missarum solemniam in Basilica S. Petri Paschali manum imposuisse, ibidemque ipsum etiam coronatum fuisse: *Primus, inquit, in consecratione Oddo Ostiensis, qui ad hoc, utitur Pallio, & benedixit, & linivit cum Chrismate. Catholice igitur a Catholicis, & Orthodoxis Episcopis in Pontificem consecratus, translato in se Pallio, expletisque, quæ restabant, Missarum solemnibus, cum plenitudine laudum, cum ingenti applausu Populi, plebisque, cum alacritate Patrum, ac devotione, Dominus Paschalis Papa II. coronatus in Urbem rediit*; id est, ad Lateranensem Patriarchium, quod Romæ situm dicitur, cum Basilica Vaticana, totaque Urbs Leonina trans Tiberim extra Romam etiamnum sita censeatur. Paschalis itaque electus, ut in ejus Vita idem Pagius notat, in Basilicam Lateranensem deductus est, ibique inthronizatus die Sabbati XI. Augusti, anni MXCIX. postridie XIV. ejusdem mensis consecratus est in Basilica Vaticana Sancti Petri, ibique coronatus, ad Patriarchium Lateranensem ductus est: contra quod factum in Nicolao I. insinuat Anastasius Bibliothecarius, cujus locum supra attulimus; cum Pandulphus di-

dicat, Paschalem II. in Vaticana Basilica coronatum, indeque in Lateranensem Palatium rediisse. Atque hic est ritus, quem recenset Cencius in Ordine Romano XII. Cap. XLVIII, Numero LXXXII. ubi ita inquit: *Missæ autem celebrata, in Basilica scilicet S. Petri, revertitur ad Palatium, Lateranensem scilicet, coronatus cum Processione, & honore arcuum &c.*

IV. His notatis, quod ritum attinet in nostro hoc præsentis §. XVII, expressum, luculentissime jam olim ipsum recensuit Cæremoniale Gregorii X. Num. VIII. & non multo post Romanus Ordo XIV. Cap. XIX, Omnibus, inquit, *rite peractis, ipse Summus Pontifex, & omnes Cardinales, & alii Prælati, & Subdiaconi, quilibet in gradu suo induentur vestimentis pretiosis albi coloris, Episcopi Pluvialibus, Presbyteri Casulis, Diaconi Dalmaticis, Subdiaconi Tunnicellis, Acolythi Superpelliceis, & alii Capellani; Episcopi, Archiepiscopi, Abbates, Patriarchæ Pluvialibus; & Judices, & Scriniarii, similiter Præfetti, & Advocati erunt induti Pluvialibus, & Primicerius in Pluviali, & Mitra, & Cantores in Superpelliceis; & Papa omnia pretiosa ornamenta habebit, & Pallium, & Mitram optimam, & Chirobeccas, & Anulum Pastoralem, & sic cum omnibus venit vel ad portam, vel ad gradus Ecclesiæ, & ibi Prior Diaconorum Cardinalium extrahit sibi Mitram, & ponit ei Coronam, quæ vocatur Regnum, in capite, toto populo acclamante, Kyrie eleison; & sic cum omni ornatu &c.* Hactenus Romanus Ordo XIV. auctore Jacobo Gajetano, a quo aliquantulum variant Cæremoniale ipsum Gregorii X. Codex Pierfancianus, ac demum, ut alla omittam, Pontificale Colbertinum, quod exscriptum fuit ab erudito Martene, qui illud inseruit Libro I. *De antiquis Ecclesiæ ritibus*, in Capite VIII. Articulo XL. estque Ordo XVII.

V. Est hic porro antiquus ritus, ut recens ordinati Romani Pontifices Corona, quæ Regnum dicitur, exornarentur, ejusque exemplum habemus quidem non modo in laudato superius Leone III. sed & in Alexandro III. electo anno MCLIX. qui, ut inquit Auctor Anonymus hujus temporis in Codice Vaticano a Baronio laudatus, *præeunte Spiritus Sancti gratia, consecratus est in Summum Pontificem, & secundum solitum Ecclesiæ morem, Regno de more insignitus, Mitra turbinata scilicet cum Corona.* Sed & ipsemet Alexander in Epistola ad Gerardum Episcopum Bononiensem data, testatur, se die Dominico apud Nymphas munus consecrationis accepisse, *& sicut in Romana Ecclesia moris est, ibidem Pontificali Regno magnifice fuisse, & solemniter coronatum.* Mos ergo ille coronandi Romanos Pontifices antiquissimus erat, licet ante Nicolaum I. uti jam quidam putarunt, nullum ejusmodi Coronationis exemplum occurrat, sicut nec ante hæc tempora *Mitra turbinata*, cujus meminit auctor ille Anonymus; quam Mitram verisimile est, ut in ejusdem Alexandri Papæ III. Vita notat Pagius, fuisse Mitram Pontificalem hodiernam, cum eo tamen discrimine, quod recentes Scriptores Nicolaus Alemannus in Dissertatione historica, *De parietinis Lateranensibus*, & ex eo alii adducunt, quod tunc scilicet Mitra illa, seu Tiara esset cum unico coronamento, cui Bonifacius VIII. secundum addiderit, Urbanus vero V. tertium,

VI. Sed antequam de hisce additamentis dicamus, observandum hic cenfeo, ac notandum quod idem Pagius docet loco citato, Romanum scilicet Pontificem non solum post suam Electionem, & Consecrationem, sed etiam pluribus aliis diebus in anno, etiam ante hæc tempora, fuisse coronatum, ut constat ex Benedicto Vaticanæ S. Petri Basilicæ Canonico, cujus Romanum Ordinem XI. vulgavit Mabillonius Tomo II. Musei Italici sub nomine *Polliciti*, qui Auctor sub Innocentii II. Pontificatu vixit. In eo enim Ordine plures recensentur solemnitates, in quibus coronari mos erat Romanum Pontificem, quas simul refert Petrus Manlius, seu Mallius S. Petri item Canonicus in Libro, quem Alexandro III. dicavit, cujus excerpta refert idem Mabillonius citato Tomo II. pag. 158. *Hæc sunt Festivitates, inquit, in quibus Dominus Papa solebat coronari. In Festo videlicet Sanctorum quatuor Coronatorum; in Festivitate S. Martini Papæ, qui dicitur Titulus Equitii; in Festo S. Clementis; in Dominica de Adventu ad Sanctam Mariam in Præsepe; in Dominica de Jerusalem, seu secunda Adventus ad Sanctam Crucem; in Dominica de Gaudete, seu tertia Adventus ad Sanctum Petrum; in Nativitate Domini; in Festo S. Stephani; in Epiphania Domini ad Sanctum Petrum; in Dominica Ego sum Pastor bonus (seu secunda post Pascha); in Ascensione Domini; in Pentecoste; in Festivitate S. Petri; in Festivitate Sancti Silvestri; in Anniversario suo. Ubi tamen desiderantur aliquot dies a Pollicito memorati, scilicet Dominica, Latere Jerusalem, seu quarta Quadragesimæ, dies Resurrectionis, ac Feria secunda Paschatis.*

VII. Alexander itaque III. post suam Consecrationem coronatus est *Pontificali Regno, vel Regno de more insignitus, Mitra turbinata scilicet cum Corona*, ut ait Anonymus Vaticanus laudatus. Romanus porro Pontifex tres Mitras diversas habebat, de quibus loquuntur Cæremoniale Gregorii X. jussu editum, & Romanus Ordo XIV. Jacobi Gajetani S.R.E. Cardinalis Diaconi Tituli S. Georgii ad Velum aureum a Bonifacio Papa VIII. creati. Certe in prædicto Gregorii X. Cæremoniali ita quidem Num. XII. legitur: *Primo notandum est, quod Dominus Papa Mitras diversas habet, quibus diversis temporibus utitur, scilicet unam albam totam, unam cum aurifrisio in titulo sine circulo, & Mitram aurifrisiatam in circulo, & in titulo. Mitra aurifrisiata in circulo & in titulo utitur in Officiis Festivis, & aliis, excepto a Septuagesima usque ad Pascha, & ab Adventu usque ad Natale, & quando cantat pro Defunctis. Et est illa ratio, quia Coronam representat, & activa, & contemplativa vitæ discursus. Mitra vero cum aurifrisio in titulo sine circulo utitur, cum sedet in Consistorio, & judicat; unde Coronam Regalem representat. Alba utitur diebus Dominicis, & aliis non festivis ab Adventu Domini ad Vigiliam Nativitatis Domini, in Vesperis, præterquam in tertia Dominica de Adventu, quæ dicitur Dominica de Gaudete, in quo die in Laudibus est quinta Antiphona Iuste, quia tunc Dominus Papa facit quandam solemnitatem, quæ talis est. Enarrat mox eam solemnitatem, & ait, tunc Papam equitare ad Sanctum Petrum, & portare Mitram aurifrisiatam in eundo, & redeundo. Eadem tres Mitras mo-*

morat inter alios laudatus Jacobus Gajetanus in citato Romano Ordine XIV.

VIII. At vero licet Summus Romanus Pontifex his tribus tantum Mitris per annum uteretur, in die tamen Coronationis suæ utebatur Phrygio, quod a Suggestio Abbate San-Dionysiano qui claruit anno MCCCX. in Vita Ludovici VI. Francorum Regis, pag. 318. dicitur *Ornamentum Imperiale instar galeæ circulo aureo concinnatum*; & ab Auctore Aëtorum Alexandri Papæ III. *Regnum*, seu *Mitra turbinata cum Corona*. Mitram quidem cum Regno, seu Phrygio confundunt aliqui; sed Phrygium, seu Regnum diversum fuisse a Mitra, constat ex memorato Jacobo Gajetano, qui Libro II. de Coronatione Bonifacii VIII. apud Bollandianos ad diem XIX. Maii in Vita S. Petri Cælestini, postquam versu CL. ex fabulosa, ut videtur, Constantini Magni donatione retulit, Constantinum proprium sibi Phrygium, seu Regnum Silvestri, in vertice pressisse, versu deinde CCCX. Ita canit.

Progrediens Princeps Lateranum summus in Orbe

Appulit, baud Phrygium, Mitram sed vertice gestans,

Pondere confectus nimio.

Idem Gajetanus in citato Romano Ordine XIV. Cap. XIX. eundem ritum confirmat, ubi agens de Corona, quæ vocatur Regnum, imponenda Papæ per Priorem Diaconorum, sic inter alia inquit: *Prior Diaconorum Cardinalium extrahit sibi Mitram, & ponit ei Coronam, quæ vocatur Regnum, in capite &c.* Idem legitur in Cæremoniali Gregorii X. uti notavimus supra Num. III. ubi etiam integrum Romani Ordinis XIV. locum descripsimus.

IX. Mitra itaque diversa erat a Phrygio, seu Regno, quod, ut ex dictis patet, erat Corona, seu ut loquitur Auctor Aëtorum laudati Alexandri Papæ III. *Mitra turbinata cum Corona*. Cum ergo Pontifex ante Coronationem haberet *Mitram optimam*, ut ait Cæremoniale Gregorii X. vel, ut inquit Romanus Ordo XIV. cap. XII. *Mitram pretiosissimam*: eaque deposita, ut coronaretur, acciperet *Coronam, quæ vocatur Regnum*, aut *Mitram turbinatam cum Corona*, scitissime inde idem Pagius notat in Alexandri Papæ III. Vita, Phrygium, seu Regnum, seu Coronam, seu Mitram turbinatam cum Corona, esse Tiaram Pontificalem hodiernam, quæ tunc erat cum Corona, seu cum unico coronamento, cui Bonifacium VIII. secundum, Urbanum vero V. tertium addidisse, ex eo deducitur, quod a S. Silvestro ad Bonifacium VIII. in effigibus antiquis Romanorum Pontificum Tiara unico, a Bonifacio VIII. ad Urbanum V. duplici, & ab Urbano V. triplici coronamento amittantur. Denique Innocentius III. in Sermone de S. Silvestro, *Romanus Pontifex*, inquit, *in signum Imperii, utitur Regno, & in signum Pontificis utitur Mitra*. Regnum itaque diversum erat a Mitra, sed non differebat tamen a Mitra turbinata.

X. Hac Mitra turbinata utebatur Pontifex non solum in die Coronationis, sed etiam in die suæ inthronizationis, ut constat ex Actis Vaticanis, quæ de electione Gregorii Papæ VII. sic inquirunt: *Indutus rubea Chlamyde, sicut moris est, & Papali Mitra insignitus invitatus & mærens in Beati Petri Cathedra fuit inthronizatus.*

To. I.

tus; anno scilicet MCLXXI. in Basilica Lateranensi, in qua exequiæ Alexandri II. celebrabantur, ut in laudati Gregorii vita Pagius docet; qui etiam deinde in Vita Alexandri III. observat, in recitato Aëtorum Vaticanorum loco per Mitram Papalem intelligi videri Mitram turbinatam, quæ a Pandulpho Auctore Vitæ Paschalis II. diferte vocatur *Tiara*; ipsique imposita dicitur in sua inthronizatione: *Chlamyde coccinea*, inquit, *induitur a Patribus, & Tiara Capiti ejus imposita, comitante turba cum cantu Lateranum versus &c.* Eadem Mitra turbinata, seu Tiara, seu Phrygio, seu Regno utebatur Pontifex in multis aliis magnis Festivitatibus, ut nos docet Chronographus Mauriniacensis, qui describens solemnem pompam inaugurationis Ludovici VII. Francorum Regis ab Innocentio II. factæ in Concilio Remensi anno MCCCXI. ait: *Innocentius Romani Pontificis omnibus insignibus indutus, ac, ut sibi consuetudinis est in sacris magnisque Festivitatibus, Phrygio coronatus &c.* Suggestius quoque Abbas San-Dionysianus loquens de eodem Innocentio II. solemnem Paschalem in Monasterio S. Dionysii celebrante sic habet: *More Romano se ipsos præparantes, multo & mirabili ornatu circumdantes Capiti ejus Phrygium, ornamentum Imperiale instar galeæ circulo aureo concinnatum imponunt &c.* Denique idem Suggestius in Vita Ludovici VI. Francorum Regis, Cap. IX. loquens de Paschale II. in Francia existente, *Cumque Turonis*, inquit, *apud S. Martinum, ut mos est Romanus, Phrygium ferens, Latere Jerusalem celebrasset &c.* seu Dominicam IV. Quadragesimæ. In multis aliis Festivitatibus anni consuevisse olim Romanos Pontifices Phrygio coronari, docent nos Romani Ordines a Mabillonio editi, atque exempla multa illustra ab Eruditissimo Sacre penitentiæ antiquitatis indagatore Petro Moretto allata in celeberrimo Opere, *De Presbyterio*.

XI. Verum quidem est, Mitram illam turbinatam, seu Tiaram, non videri differre a Mitra illa aurifrisiata in circulo, & in titulo; quia juxta laudatum Cæremoniale Romanum Gregorii X. jussu editum, Pontifex utebatur *in officiis festivis, & aliis*, sed Jacobus Gajetanus Cardinalis in Ordine suo XIV. Romano non obscure indicat, ipsam Mitram aurifrisiatam, diversam fuisse a Regno, seu Phrygio, & consequenter a Mitra turbinata, seu Tiara; nam Cap. XII. ubi agit de Episcopo in Papam electo, ait: *Electus in Papam induitur omnibus paramentis pretiosis, & solemnibus aptis tempori, & diei, & ponitur pretiosissima Mitra in Capite*; quæ certe alia non videtur a Mitra aurifrisiata in circulo & in titulo; illam tamen postea distinguit a Phrygio, seu Regno. Capite enim XIX. loquens de Coronatione Papæ, quæ fiebat in Ecclesia S. Petri post Consecrationem: *Post Missam*, inquit, *idem Summus Pontifex . . . cum omnibus venit ad portam, vel ad gradus Ecclesiæ, & ibi Prior Diaconorum extrahit sibi Mitram, & ponit ei Coronam, quæ vocatur Regnum, in capite*. Distinguit igitur Gajetanus pretiosissimam illam Mitram aurifrisiatam in circulo, & in titulo a Phrygio, seu Regno, ideoque & a Mitra turbinata, seu Tiara Pontificali. Quod spectat ad Mitram cum aurifrisio in circulo sine titulo, qua juxta citatum Cæremoniale utebatur Pontifex in Consistorio, cum hæc Coronam regalem repræ-

Q

repræsentaret, ut ibidem habetur; & ex alia parte Innocentius III. mox laudatus dicat, Pontificem in signum Imperii uti Regno; Sugerius vero Phrygium fuisse ornamentum Imperiale circulo aureo concinnatum scribat; forsitan hæc Mitra diversa non erat a Mitra turbinata, seu a Regno, & Phrygio.

XII. Sed quicquid de hac re sit, licet hujus Mitræ turbinatæ, five Papalis, five Tiaræ, ante Gregorium VII. Paschalem II. & Alexandrum III. nulla nobis occurrat mentio, non inde tamen sequitur, eam non fuisse antiquiorem, quod satis indicant tum Acta Vaticana de Gregorio VII. tum Pandulphus de Paschali II. tum Auctor Actorum Alexandri III. dum scribunt, eos Pontifices Mitra Papali, vel Tiara, vel Mitra turbinata fuisse insignitos, *sicut moris est*, vel *de more*, quem valde antiquum fuisse, eruitur, ut cum Annotatore Baronii notavit Pagius in Vita Gregorii VII. ex Auctore fabulosæ donationis Constantini, qui scribit, S. Silvestrum ab eodem Imperatore proprio Regno, seu Phrygio fuisse ornatum; ex quo id saltem evincitur, eo tempore, quo illa donatio supposita est, Romanos Pontifices Phrygio, seu Regno, seu Tiara Pontificali fuisse coronatos, alioquin ejus mentionem fabulosæ suæ donationi non inferuisset impostor, ne se impostorem proderet. Cum autem hæc suppositio antiqua sit, & quam tardius facta sub finem Seculi VII. vel ipso Seculi IX. initio, quo Ridulphus Archiepiscopus Moguntinus Collectionem Decretalium Pontificum ex Hispania in Galliam detulit, cui hæc falsa donatio inserta erat, evidenter patet, jam ante finem Seculi VII. Pontifices Romanos Phrygio, seu Regno, seu Tiara Pontificali fuisse coronatos; ex quo & sequitur, eorum Coronationem esse valde antiquam, quamvis, uti jam notatum superius fuit, ante Leonem III. & Nicolaum I. seu ante Seculum VII. & medium Seculum IX. ejusdem vestigia non invenerimus.

XIII. Ex his porro patet, Ægidium Viterbiensem S. R. E. Cardinalem a Leone Papa X. creatum, deceptum esse, quando de Paulo II. anno MCDLXIV. Pontifice electo ita scripsit: *Incredibili pretio emit, sacravitque Mitram maximam, insolito pretiosissimarum gemmarum pondere opplevit; qua ornatus cum prodiret, oculos omnium luce radiisque feriebat. Vocari cæpta est maxima illa Mitra Regnum Mundi, quam Paulus sublimi fastigio surgentem regna... pretio superantem primus reddidit, primus lectissimarum gemmarum toto Orbe quasitarum luce exornavit ambitum trium Coronarum, quarum usus ex arcanis agnoscere solum potest.* Ex superius enim dictis liquet, Mitram illam Seculo VIII. jam fuisse vocatam Regnum, & post Urbanum V. fuisse cum triplici coronamento. Corruit & quod Cardinalis Papiensis, licet tempore Pauli II. vixerit, de eo scribit Libro II. Commentariorum: *Porro autem gemmis, lapillisque admodum delectatus, conquisitis undique pretiosissimis, Mitram, qua tribus educta Coronis, Regnum appellatur, atque a Pontificibus, multis ante seculis desita erat gestari, novam confecit, atque adhibuit.* Regnum enim non multo ante Paulum II. a Romanis Pontificibus gestatum constat ex Ordine Romano XV. Auctore Petro Amelio, qui anno MCCCXCI. vivebat. Loquens enim hic Auctor Cap. XII. de secundis Vesperis

Nativitatis Domini, sic ad rem recte inquit: *Ibi Dominus Papa descendit, & deposito Regno, accipit Mitram.* Tum Capite sequenti loquens de die S. Stephani: *Ascendens equum, ait, & de manu Diaconi, qui stat a dextris, Regnum accipiens, induit ipsum &c.* Pontificia itaque triplicis coronamenti Corona antiquior est, quam putavit Ægidius Viterbiensis, & a Romanis Pontificibus seculo ante Paulum II. gestata. Porro non omittendum hoc loco, quod de ipso Regno, Tiara Pontificia scribit Grassus in suo ms. Diario, ubi agit de Coronatione Leonis X. anno MDXIII. *Fecimus fieri novum Regnum levissimum alioquin ditissimum, & spectabile, & Cardinalis de Farnesio lectis prius verbis ad id facientibus illud imposuit, & Socius meus voluit, quod Cântores cantarent, Kyrie eleison; & quoniam solet esse mos, quod Pontifex in illo loco & actu non soleat aliquid aliquibus denegare, præsertim Cardinalibus, & Cardinales diversi tot & tanta petissent; Papa respondit eis ridens, quod potius acciperent suam Tbiaram, & ipsi Pontifices facti concederent, aut caperent illud quod volebant.*

XIV. His de origine, ac vario usu Regni, seu Coronæ Romanorum Pontificum explicatis, redeo nunc ad nostri §. Textum, quem lubet praxi illustrare Coronationis Innocentii Papæ VIII. de qua sic inter alia in suo Cæremoniali scribit Burchardus §. CCXVII. *Data in Altari Benedictione, Papa, retento Pallio, ac omnibus aliis paramentis, reassumit Mitram pretiosam, Chirothecas, & Anulum Pontificalem, ac alios Anulos, & accessit Sella portatus sub Baldachino ad suggestum in loco Benedictionis præparatum, præcedentibus ipsum omnibus Cardinalibus, Prælatibus, & aliis paratis in suis paramentis, & Mitris, ac ornamentis, seu habitibus, prout Missæ interfuerunt, processionaliter, sine tamen luminaribus, & incenso. Papa in suggesto constituto sedit in Sede eminenti ibidem parata, ubi expectato, quod Populus Ecclesiam exiret, & in platea congregaretur, extracta per Cardinalem Sancti Georgii Papæ Mitra, Cardinalis Senensis Prior prædictus, Cardinalium scilicet Diaconorum, imposuit Papæ Regnum, nobis circumstantibus acclamantibus, Kyriæ eleison, alta voce semel tantum.* Additque mox idem Burchardus oculatus testis, & qui, ut erat Apostolicarum Cæremoniarum Magister, sacram actionem dirigebat, §. CCXVIII. *Papa sic coronato, idem Senensis pronunciavit populo plenarias Indulgentias populo concessas verbis Latinis, & post eum Cardinalis Sancti Georgii verbis vulgaribus ad populum versi stantes.* Similia legere est in ms. Diario Paridis Grassi, ubi enarrat Coronationem Leonis Papæ X. & apud Novidium Lib. II. Sacrorum Fastorum, ubi poeticis coloribus depingit solemnitatem Coronationis Pauli Papæ III. quæ acta fuit die V. Novembris anno Christi MDXXXIV.

XV. Quoniam tandem plerumque, ut ait nostrum Cæremoniale, *antequam hæc completa sint, hora est satis tarda, & longa ad Lateranum restat via, multaque ibi adhuc sunt peragenda, consueverunt aliquando Pontifices, & Patres, sustentationis gratia, aliquantulum cibi sumere.* Parari ait refectionem in Atrio domus Archipresbyteri Basilicæ, Vaticanæ scilicet, pro Pontifice, & Cardinalibus, pro aliis Prælatibus

in

in vicinis Domibus Canonorum. Teste Burchardo in descriptione Coronationis Innocentii Papæ VIII. pronunciatis Indulgentiis, de quibus dictum superius fuit, *descenderunt omnes de suggesto, & Papa cum Cardinalibus tantum, & paucis servitoribus intravit domum residentia Reverendissimi Cardinalis Sanctæ Mariæ in porticu Archipresbyteri Basilicæ prædictæ, idest Vaticanæ, in cuius Curia, sive horto ordinata fuit collatio pro eisdem Pontifice, & Cardinalibus; Prælati vero, & Officiales, ac alia digna persona intrarunt Domum Canonicalem Domini Celsi de Melinis ejusdem Basilicæ Canonici, prædicti Domui Cardinalis contiguam, ubi & pro ipsis collatio ordinata erat, & ibidem collationem fecerunt cum pinochiatis confectioibus, malvasia, & hujusmodi paratis. Fuerat tamen pridie ordinatum, quod collatio hæc fieret, antequam Papa suggestum ascenderet, & coronaretur, itaque postmodum coronatus sine mora ad Lateranum equitaret, quod & magis convenisset; sed hoc mane nobis de Basilica exeuntibus, aliquibus visum est id magis placere, sic quod ordo prius datus perversus est, & male facta collatione, Papa, Cardinales, Prælati, & alii omnes parati, prout in suggestu fuerunt, descenderunt per gradus ad plateam Basilicæ prædictæ, ubi equos sibi paratos, & coopertis ornatos, prout supra in præparatione dictum est, equos ascenderunt iuxta ad Lateranum. Hucusque Burchardus narrans Coronationem Innocentii VIII. quem ait eadem die profectum fuisse Lateranum cum solemnī Processione, de qua nos inferius dicemus in*

Commentario ad §. sequentem, in quo plurā scitu digna adnotabimus.

XVI. Notandum hic vero illud, peracta Coronatione apud Vaticanam S. Petri Basilicam non semper Pontifices statim processisse ad Basilicam Lateranensem, sed multos post dies, uti addiscimus ex ms. Diario Paridis Grassi, qui enarrans Coronationem Leonis Papæ X. apud eandem Basilicam S. Petri peractam, solemnem ejusdem ad Lateranum Processionem dilatam in aliud tempus fuisse scribit. Teste eruditissimo Petro Moretto in celebri Lucubratione, *De Presbyterio*, Parte III. Sectione VIII. Numero VII. *Paulus III. post Coronationem suam, quæ acta fuit ad Sancti Petri die v. Novembris anno MDXXXV. minime processit ad Lateranum, sed parata pompa stetit ibidem, ibidemque jactus habendi per viam, traditio Presbyterii, convivium, aliaque completa sunt. Ut alia exempla omittam, nostris temporibus Benedictus XIII. electus Pontifex die XXI. Maji anno MDCCXXIV. licet die IV. Junii in Dominica Pentecosten coronatus fuerit, non nisi die XXIV. Septembris solemnem Lateranensem Basilicæ possessionem cepit: Descendens hora XX. ex Cameris Quirinalis Palatii ad Atrium, equumque album de more descendens, præcedente Cruce, cum consuetis Ordinibus Prælatorum, ac sequentibus Dominis Cardinalibus equitantibus, ceterisque de more &c. uti rem narrat in suo ms. Diario Franciscus Bolza Cæremoniarius Apostolicus ad diem ipsam. XXI. Septembris anni MDCCXXIV. Et in ejusdem Vita Alexander Borgia.*

§. XIX.

Ordo Processionis ad Lateranum.

Sumta refectione, Pontifex, & omnes descendunt ad equitandum, & hoc ordine proceditur ad Lateranum. Primi incedent Valisarii Cardinalium suo ordine, & deinde eorum familiæ, & omnes laici mixtim, ut eis placuerit. Tum per ordinem isti sequuntur, Barbitonsor, & Sartor Papæ cum valisiis rubeis, in quibus sunt vestes, quæ pertinent ad Sanctissimum Dominum nostrum, Familiares, & Scutiferi Papæ, Nobiles Curiae minores, & nepotes, affinesque Dominorum Cardinalium, scala Papæ panno rubeo cooperta, quam portat equus albus ductus per unum ex Parafrenariis purpurea veste indutum; qui postquam Papa ascendit equum cum ista scala, vadit in ordine suo, dextra equi habenas, sinistra rubrum ferens baculum. Hunc sequuntur duodecim Cursores Papæ etiam rubris vestibus induti equestres portantes duodecim Vexilla rubra bini & bini. Inde tredecim Vexilliferi capitum Regionum Urbis cum suis Vexillis. Deinde (1) duo Cursores cum vexillis Cherubin aliquantulum majoribus aliis Vexillis, etiam vestibus rubeis, & equestres omnes Vexilliferi. Tum Vexillifer Populi Romani cum Vexillo, & insigniis Populi Romani. Deinde Vexillum album cum Cruce nigra, quod portat Procurator Ordinis Beatæ Mariæ Theutonicorum. Vexillum cum armis Papæ, quod aliquis magnus Nobilis portat. Vexillum (2) Ecclesiæ etiam magnum alius Nobilis portat. Et demum Vexillum Ordinis Hierosolymitani rubeum cum alba Cruce, quod Procurator ejus Ordinis portat. Isti quinque Vexilliferi habebunt equos cataphractos, sive bardatos, & coopertos tela sericea usque ad talos equorum cum insignibus suis. Ipsi autem erunt armati, ac si prælium essent ingressuri, denita galea cum lacernis ex tela etiam sericea cum (3) insigni, & singuli (4) Vexilliferi habebunt quatuor pedites cum lacernis bocalinis cum insignibus Dominorum. Hunc Ordinem Vexillorum inveni servatum; sed mihi non placet, neque

Q 2

vi-

(1) In editione Veneta anni 1516. & Colonienſi anni 1557. desunt ea verba, deinde duo Curſores cum vexillis, quæ tamen habentur in editione Romana anni 1560. (2) In citatis primis editionibus desiderantur & ea verba, Vexillum Ecclesiæ etiam magnum alius Nobilis portat; sed leguntur in ipsa Romana editione. (3) In editione Romana legitur, cum divisa. (4) In eadem, & quinque Vexillifer habebit.

videtur debitus ordo, nam non honoramus signum, nec signi figuram, sed signati dignitatem; unde ponimus Vexillum Civitatis, in qua est Pontifex, in principio, ut minus dignum, deinde Vexillum Ordinis Militaris Beatæ Mariæ Theutonicorum, in quo est Crux nigra in albo campo. Tum Vexillum Papæ, inde Vexillum Ecclesiæ, & bene hætenus. Demum in loco honorabiliori Vexillum Ordinis Militaris Hierosolymitani cum alba Cruce in rubeo campo, quod mihi videtur præter omnem convenientiam, nam signum Crucis albæ in campo rubeo non est signum universitatis Christianorum, sed illius tantum Ordinis Militaris, sicut & nigra in albo alterius Ordinis est signum; Universitatis autem Christianæ signum est Crux rubea in albo. Ergo Vexillum Ordinis Hierosolymitani non est præferendum signo Papæ, aut signo Ecclesiæ; locus igitur suus esset post Vexillum Ordinis Theutonicorum, & non post omnes. Si autem adesset Vexillum Cruciatæ, Crux rubea in albo campo, quia est universale omnium Christianorum, illud jure optimo ponendum esset in loco digniori. Post Vexilla procedunt duodecim equi albi sine fessoribus, phaleris aureis, coopertisque de cremesino ornati, quos duodecim Parafrenarii ducunt rubea veste, induti, & baculum rubeum in sinistra portantes. Hos sequuntur quatuor Nobiles Pileæ quatuor de cremesino supra baculos quosdam deferentes, qui Scutiferi honorarii vocantur, Cubicularii deinde sequuntur equitantes in suo habitu, Oratores laici, & non Prælati simul cum Baronibus, & majoribus Nobilibus. Tum Subdiaconus Apostolicus cum Cruce Papali, & suis Collegis pariti, ut in Missa, & apud Crucem duo Magistri Ostiarii cum suis virgis. Post hos duodecim Familiares Papæ rubea veste induti portantes duodecim intorticia accensa ante Sacramentum Corporis Christi pedites. Inde duo Familiares Sacristæ equestres etiam rubeo induti portantes laternas argenteas cum lumine ante Sacramentum; & post eos ducitur per Familiarem Sacristæ rubeo etiam indutum, & baculum in sinistra habentem equus albus mansuetus ornatus, ut illi duodecim, portans Sacramentum, habens ad collum tintinnabulum bene (1) tinniens, & supra portatur Baldachinum cum armis Papæ, & Sacramento per Cives Romanos, qui inter se mutantur ter decies, ut unaquæque Regio habeat suam partem. Post Sacramentum equitat immediate Sacrista, qui, ut ceteri Prælati, habet equum totum coopertum de bocasino, & ipse, & omnes alii parati sunt, ut in Missa cum paramentis, & Mitris. Sacrista in manu gestat album baculum. Sequuntur deinde duo Præfecti navales, & in eorum absentia duo Nobiles induti, ut Advocati, & Secretarii præter Almutium; & post eos ipsi Secretarii, & Advocati cum Almutiis. Cantores deinde equitant cum Superpelliceis. Tum Acolythi, Clerici Cameræ, & Auditores cum Superpelliceis supra Rochettum. Subdiaconus Græcus, & Latinus, & Diaconus Græcus, ut in Missa. Sequuntur dehinc Prælati cum equis coopertis, & ipsi cum Mitra, & Pluviali. Abbates Forenses, Episcopi, Archiepiscopi, Abbates Urbis, Episcopi assistentes Papæ, Patriarchæ, Diaconi cum Dalmaticis, Presbyteri cum Planetis, Episcopi Cardinales cum Pluvialibus. Procedunt deinde duo Diaconi assistentes Papæ, & inter eos medius Prior Diaconorum, si ipse dixit Evangelium. Prior Diaconorum Ferulam in manu portare debet, & totam Processionem ordinare, & illa ordinata equitare in loco suo. Procedit tandem Summus Pontifex super equum album phaleratum coopertum a parte posteriori stragula (2) purpurei coloris, qui vulgo dicitur Cremesino, sub Baldachino, quod octo magni Nobiles, sive Oratores Principum portant. Tum Papa per scalam, quam superius diximus, ascendit equum, major Princeps, qui præsens adest, etiam si Rex esset, aut Imperator, stapham equi Papalis tenet, & deinde ducit equum per frenum aliquantulum. Si Imperator, aut Rex soli essent, idest, non adesset alius Rex, soli equum ducerent cum dextra manu. Sin vero esset alius Rex, Dignior a dextra, alius a sinistra frenum tenerent. Si non sint (3) Reges, digniores ducant equum. Et postquam Imperator, Rex, sive alius magnus Princeps aliquantulum aquum duxerit, substituantur alii duo magni Nobiles eorum loco, & mutantur. Si vero Pontifex non equo, sed sella veheretur, quatuor majores Principes, etiam si inter eos Imperator, Rex, (4) aut quivis Maximus Princeps adesset, in honorem Salvatoris Jesu Christi sellam ipsam cum Pontifice humeris suis portare aliquantulum debent; sed aderunt etiam quatuor validi Pontificis Familiares, qui pondus sustinent, itaut Principes in signum piæ Religionis ac reverentiæ, magis quam ad onus subeundum, manus apposuisse videantur; qui

(1) Ita in laudatis editionibus Veneta, & Colonienſi; in Romana autem legitur: *tintinnabulum bene sonantem*. (2) Ita in Romana editione, in aliis aut supra laudatis legitur: *stragiola cremesina*. (3) Ita quoque in ipsis Veneta & Colonienſi editionibus, in Romana, si vero sint Reges duo, plures digniores &c. (4) Rex deest in editionibus Veneta & Colonienſi.

etiam mutabuntur pro hominum & itineris dispositione. Similiter & octo Nobiles, qui Baldachinum super caput Pontificis ferunt, mutabuntur post aliquod spatium, & equos suos ascendentes in ordine suo equitabunt; eorum loco Nobiles Cives Romani usque ad Lateranum Baldachinum portabunt, mutabunturque per vices, sicut de Baldachino Sacramenti diximus. Ante Pontificem Conservatores, capita Regionum, & alii Magistratus, ac Nobiles Urbis pedites præbunt, & Prætoriani Milites cum eis accincti ensibus circiter centum, & baculum in manibus portantes ad custodiam (1) & defensionem corporis Pontificis. Circa Pontificem aliquando ante, aliquando post equitabit Marescallus, sive Soldanus Curie cum duobus sacculis pecuniarum ante sellam, & ipsas pecunias projiciet super populum ad pressuram dimovendam, ut infra dicemus.

COMMENTARIUS.

I. Solemnis Processionis, qua ipse Romanus Pontifex Maximus post suam Coronationem peractam, uti dictum est, apud Basilicam Vaticanam, ab ea procedit deinde ingenti cum pompa ad Lateranensem Basilicam, exemplum plane insigne, & per vetustum habemus in Nicolao I. Pontifice electo anno DCCCLVIII. de quo ita inquit in ejus Vita Anastasius Bibliothecarius: *In Basilicam Beati Petri deductus, præsentem Casarem consecratus, Apostolicaque sublimatus in Sede, factus est Pontifex, & Missarum solennia super Sacratissimum Corpus Apostoli celebravit. Densis tandem Optimatum, popule agminibus, cum Hymnis, & canticis spiritualibus iterum Lateranum perductus coronatur.* (legendum forte coronatus, uti alias notavimus.) *Urbs exultat, Clerus latatur, Senatus, & populi plenitudo magnifice gratulatur.* Occurrunt id genus exempla & in aliis sequioris ævi Romanis Pontificibus, & ut alios omittam, summo quidem honore deductus fuit post suam Consecrationem ad ipsam Lateranensem Basilicam Paschalis II. electus Pontifex anno MCXCIX. ut testatur in ejus Vita Pandolphus, sic inter alia inquit: *Catholicæ igitur a Catholicis, & Orthodoxis Episcopis in Pontificem consecratus, translato in se Pallio, expletisque, quæ restabant, Missarum solenniis, cum plenitudine laudum, cum ingenti applausu populi, plebisque, cum alacritate Patrum, ac devotione, Dominus Paschalis Papa II. coronatus in Urbem rediit,* id est, ad Lateranensem Patriarchium, ubi primum intronizatus fuerat, quod Romæ situm dicitur, cum Basilica Vaticana, totaque Urbs Leonina trans Tiberim extra Romam etiamnum sita censeatur. Paschalis itaque electus in Basilicam Lateranensem primo deductus est, ibique intronizatus die Sabbati XIIII. Augusti anno MCXIX. postmodum XIV. ejusdem mensis consecratus est in Basilica Vaticana, ibique coronatus, ad Patriarchium Lateranensem cum Processione solenni deductus est.

II. Præter exempla, mentionem & ejus ritus faciunt Romani antiqui Ordines, ac præsertim Ordo XII. auctore Cencio, Cap. XLVIII. itemque Ordo XIII. & XIV. apud Mabillonium Tomo II. Musei Italici. Sed audiamus primum Cæremoniale Gregorii Papæ X. jussu editum, quod idem Mabillonius appellat Romanum Ordinem XIIII. Ergo ex hujus Cæremonialis præscripto ubi imposita fuit Corona Pontifici, quæ vocatur Regnum, in capite, toto Populo clamante, *Kyrie eleison* &c. ut supra, cum omni or-

natu quilibet Cardinalis, & Prælatus equitat equum opertum panno albo: Subdiaconi vero, Capellani, Scriniarii, & alii equitant ornate vestiti, non tamen habent equos coopertos. Papa equitat equum magnum phaleratum, & coopertum tantum ex parte posteriori, & de scarlato, in parte vero anteriori non coopertum. Pergit Cæremoniale, & ita mox ad nostram rem subjicit: *Sic omnibus equos ascendentes, Prior Diaconorum cum ferula ordinat Processionem hoc modo. Primo procedit equus Domini Papæ phaleratus; secundo vadit Subdiaconus cum Cruce; tertio duodecim (2) Bandonarii cum duodecim Vexillis rubeis, & duo alii cum duobus Cherubin (3) cum lanceis; quarto duo Præfetti navales induti Pluvialibus; quinto Scriniarii; sexto Advocati; septimo Judices; octavo Cantores; nono Diaconi & Subdiaconi, qui legant Epistolam & Evangelium in Græco; decimo Abbates Forenses; undecimo Episcopi; duodecimo Archiepiscopi; decimosextio Abbates Urbis; decimoquarto Patriarcha, & Episcopi Cardinales; decimoquinto Presbyteri Cardinales; decimosexto Diaconi Cardinales; decimosextimo Dominus Papa, & Subdiaconi cum tobalea, & serviens qui portat (4) Umbraculum, & sic venit usque ad Palatium suum, sive ad Ecclesiam juxta Palatium suum. Atque hic idem ordo Processionis iisdem fere verbis legitur etiam in ms. Codice Pierianiano, in Ordine XIV. Romano auctore Jacobo Gajetano, atque in Colbertino Pontificali, in quo tamen tertio loco leguntur non bandonarii, aut brandonarii, ut in Codice Pierianiano, sed *banderarii*.*

III. Nobiliorem hujus Processionis apparatus ac ordinem describunt quidem in suo Cæremoniali Burchardus, & Paris de Grassis in suo Diario, quorum alter Innocentii Papæ VIII. alter Leonis Papæ X. solemnem post ipsorum coronationem ad Lateranum processionem recensent. Sed sollemnis æque est apparatus, quem nostrum Cæremoniale in hoc §. præscribit, in quo nonnulla notabimus magis scitu digna, & curioso lectori gratiora. Sciendum autem primum, quod licet in hoc §. mentio fiat tredecim Regionum Urbis, dum ordinem prædictæ Processionis describens, sic inter alia inquit: *Inde tredecim Vexilliferi capitum Regionum Urbis cum suis Vexillis;* Sixtus deinde V. ut in ejus Vita refert Ciaconius, *Romana Urbis XIIII. Regionibus aliam apposuit: Burgum enim, ut populari voce utar, quartamdecimam Regionem esse voluit, & pro insigni Leonem pyra tenentem*

(1) In editionibus Veneta & Colonienſi deest, & defensionem; legitur in Romana. (2) In Pierianiano Codice legitur, brandonarii. (3) Ibid. in lanceis. (4) Ibid. unum Umbraculum.

concessit; idest gentis suæ Perettæ stemmata. Sane legendus Floravantes Martinellus in sua Roma ex ethnica Sacra, Cap. iv. inscripto, *De Regionibus Urbis*, ubi inter alia notat, ipsam Gentilium Romanorum Urbem jam ab Augusto Cæsare in Regiones xiv. fuisse divisam, probatque testimoniis Svetonii in citati Augusti Vita Cap. xxx. Eiusdem numeri mentionem facit Tacitus dum scribit Urbem ipsam in Neroniano incendio arsisse, sic inquit; *In Regiones xiv. Roma dividitur, quarum quatuor integræ manebant; tres solo tenus dejectæ; septem reliquis testarum vestigia supererant lacera & semiuista*. Licet autem eandem decimo Neronis anno suis resurrexisse e flammis historici testentur, Scriptores nihilominus sacri veteres de septem Regionibus tantum verba faciunt, quod duabus forsitan simul junctis, per has a Ministris sua munia exerceri Summi Pontifices decreverint, uti idem Martinellus citato loco observat, ubi etiam ait, in Urbe Roma nostro hoc seculo Regiones xiv. numerari, sed ab antiquis tamen diversas.

IV. Præ ceteris vero notatu dignus ritus est ille, gestandi scilicet in ipsa equitatione Sanctissimum Eucharistiæ Sacramentum; Tum Subdiaconus Apostolicus, ait noster §. cum Cruce Papali, & suis Collegis parati, ut in Missa procedunt, & apud Crucem duo Magistri Ostiarii cum suis virgis. Post hos duodecim Familiares Papæ rubea veste induti, portantes duodecim intorticia accensa ante Sacramentum Corporis Christi pedites; inde duo Familiares Sacristæ equestres rubeo induti portantes laternas argenteas cum lumine ante Sacramentum; & post eos ducitur per familiarem Sacrista rubeo etiam indutum, & baculum in sinistra habentem equus albus mansuetus, ornatus, ut illi duodecim, portans Sacramentum, habens ad collum tintinabulum bene tinniens, & supra portatur baldachinum cum armis Papæ, & Sacramento per Cives Romanos, qui inter se mutantur ter decies, ut unaquæque regio habeat suam partem. Eiusdem ritus mentionem faciunt Burchardus, & Paris de Grassis, in Diariis suis, ubi alter Innocentii VIII. alter vero Leonis X. equitationem enarrat, ad capiendam Lateranensis Basilicæ possessionem. Sed & ante hos Pontifices servatum fuisse eum ritum in solemnibus per Urbem equitatione Pauli II. cum Friderico III. Imperatore, testis est Augustinus Patricius in descriptione adventus ipsius Friderici Romam ad eundem Paulum II. Pontificem, Num. xxi. *Incedebat*, inquit, *Subdiaconus Crucem præferens*. Tum vero paulo post: *Crucem vero sequebantur primo Clerici Pontificalis Capellæ, quorum alter laternam cum lumine præferebat in honorem Sacræ Eucharistiæ, alter vero loculum Pontificalis Mitræ*. Paucis tandem interjectis, subjicit: *Post hos ducebatur equus albus Sacratissimum Christi Corpus vehens in capsula ornatissima reconditum, quem præcedebat Sacrista Pontificis baculum teretem manu ferens; & supra Sacram Hostiam sericeum umbraculum ferebatur; circumcirca vero funalia multa accensa*.

V. Occurrunt passim & alia exempla, quæ nobis eundem exhibent ritum servatum non modo Seculo xv. sed ineunte etiam seculo xvi. ac præsertim anno Christi mxxx. in solemnibus equitatione Clementis VII. & Caroli V. per Civitatem Bononiæ, ubi celebrata fuit hujus Im-

peratoris Coronatio festo die S. Matthiæ Apostolo dicato. Delata tunc enim fuit & Sacra Eucharistia, teste Paulo Jovio Lib. xxv. i. Historiæ sui temporis, ubi ita inquit: *Nec multum inde succedebat Eucharistia sub aurea umbella loculo crystallino inclusa, & sella generosi, & tamen pacati equi superimposita, laterna ingens ante, & circum dena funalia ferebantur*. Porro de Sacrosancto Christi Corpore Romanis Pontificibus iter conficientibus præferendo Commentarium edidit eruditus Sacrarum Apostolici Præfectus ac Episcopus Tegastensis Angelus Rocca, legiturque Tom. i. ejus Operum pag. 33. & seqq. ubi inter alia scite notat, quod alias & iis, qui saltem a limine Annales, & mores priscos Ecclesiæ salutarunt, exploratissimum est, complures scilicet olim Fidelium, maxime Clericorum, dum longinquo se darent itinere, hoc se Eucharistiæ Viatico instruere solitos fuisse. Hoc tandem antiquitatis Ecclesiasticæ monumentum sane pulcherrimum in Ecclesia hæsit omnium principe, & magistra, alibi prorsus oblitteratum, Certe Archiepiscopus Beneventanus dum suam Diocesim visitaret, Sanctissimum Sacramentum publice ante se deferre solebat, eaque consuetudo ad Pauli II. usque tempora duravit, ut ms. Codex in Archiepiscopio Beneventano asservatus testatur apud memoratum Roccam loco citato pag. 42.

VI. Ceterum tametsi antiquus ritus sit, ut Romano Pontifici Urbe alio proficiscenti Sacra Eucharistia prægestetur, idque idem Rocca variis exemplis ostendat, recentior tamen est ille, ut per Urbem procedenti ipsa Divina Eucharistia præferatur. Censet laudatus Auctor, ritum deferendi Sacramentum in solemnibus Romanorum Pontificum equitatione ad capiendam post suam ipsorum Coronationem Lateranensis Basilicæ possessionem, admissum fuisse ab iis, qui non pro Viatico, sed ad solam maiestatem Pontificiam representandam Sanctissimum Sacramentum longo itinere asportari solitum opinati sunt. Quicquid sit, gestatio ipsius Sacramenti in solemnibus per Civitatem equitatu jam diu in desuetudinem abiit, *vel quia multis ab hinc annis, ut ajunt, equitatio sine paramentis Ecclesiasticis, minusque proinde solemnibus fieri solet; vel quia in hujusmodi equitatione id ita, re magis perspecta, faciendum videtur*. Præclarum namque ac Venerabile Sacramentum præter Sacrosanctum Viaticum a Romanis Pontificibus in itinere, & a Parochis ad ægrotos pie ac religiosa asportari consuetum; singulis annis per publicas Civitatum, & Oppidorum, ceterorumque locorum vias, in Festo Sacratissimi Corporis Christi die, singulari veneratione, ac solemnitate, ut Sancta Synodus Tridentina inquit, in Processionibus circumferri solet, ac debet. Ita idem laudatus Rocca in citato erudito Commentario pag. 46. & seqq.

VII. Sed age enarremus nunc alium ritum, quem & hic noster §. recenset, ut nimirum si Pontifex non equo, sed sella veberetur, quatuor majores Principes, etiamsi inter eos Imperator, Rex, aut quivis Maximus Princeps adesset, in honorem Salvatoris Domini Nostri Jesu Christi, sellam ipsam cum Pontifice bumeris suis portare aliquantulum debeant. Addit mox, adesse tunc etiam debere quatuor validos Pontificis familiares, qui pondus sustineant, ita ut Principes

in signum piæ Religionis, ac reverentia magis, quam ad onus subeundum, manus apposuisse videantur. Fuit hic plane antiquus ritus, ut vel novus Episcopus in Throno Pontificali constituendus, ad eum in *Sella aurea* secundum veterem Ecclesiæ Gallicanæ usum manibus Episcoporum deportaretur, ut colligimus ex Eddio in Vita S. Wilfridi Eboracensis Archiepiscopi, qui in Francia sacrum Episcopalis Ordinationis munus consequutus fuerat, claruitque Seculo VII. Sic enim ille Cap. XII. inquit: *Ibi que statim conventio magna facta est non minus quam duodecim Catholicorum Episcoporum, e quibus unus erat Ægelberthus Episcopus, qui eum propter fidem suam indicatam in Sella aurea sedentem more eorum sursum elevaverunt, portantes in manibus soli Episcopi intra Oratoria, nullo alio attingente, Hymnosque & cantica in Choro canentes.* Atque huc forte respicit S. Gregorius Turonensis Lib. III. *Historia Francorum*, Cap. II. ubi de Ordinatione S. Quintiani in Arvernensem Præfulem, sic loquitur: *Convocatis Pontificibus, & populo, eum in Cathedra Arverna Ecclesiæ locaverunt.*

VIII. Notat hæc eruditus Martene Libro I. *De antiquis Ecclesiæ ritibus*, Cap. VIII. Articulo x. Num. XIX. ubi etiam censet, mutatum postmodum fuisse eum ritum in solemnem illam deportationem, qua recens consecrati Episcopi cum primum accederent ad suam Ecclesiam Cathedralē, nobiliorum Virorum humeris deportabantur, ipsumque ritum ab annis circiter DCCCL. viguisse in Ecclesia Antissiodorensi, ut patet ex Historia Episcoporum Antissiodorensium, Cap. XXII. ubi Gerannus delatus dicitur *humeris Religiosorum ad Aulam primicerii Martyrum Christi Stephani.* Rursus Cap. L. de Heriberto, qui septem ab hinc seculis claruit legitur, quod ipse *in die ordinationis suæ secundum Ecclesiasticam consuetudinem Cathedra innixus Episcopali ad S. Protodiaconi matrem Sedem nobilium humeris deportatus est.* Quinam essent illi Nobiles, discimus ex Cap. LXVII. ubi recensentur *Comes Antissiodorensis, Baro de Donzejo, Dominus de Thocejo, Dominus de Verano in Pusaja.* Atque hic ritus, uti concludit memoratus Martene, in omnibus passim Galliarum Ecclesiis vigeat, ut patet ex gestis Guillelmi Majoris Andegavenſis Episcopi, ex Metropoli Turo-nensi Joannis Maan, ex Historia Ecclesiæ B. Mariæ Carnotensis, Auctore Sebastiano Rovillar, aliisque, vigetque etiam nunc in Aurelianensi.

IX. Ridendi itaque sunt Novatores hæretici, qui ritum ipsum sustollendi super humeros Pontificem Maximum ignoranter temereque

impugnare conantur. Non est profecto fastus, vel superbiæ nota, ut ipsi obtendunt, sed potius pastoralis vigilantia mysterium, ut docet Macrus in suo Hierolexico, verbo *Sellare*. Nam quid aliud nomen Episcopi, quam super inspectorem, ac invigilantem curæ Græce sonat? Dum ergo Papa tanquam Episcoporum Episcopus ab universo Christiano grege colitur, consentaneum profecto est, ut eminentiori sella deferatur, & a nobis ejus subditis tanquam itineris gloriæ director, Fideique pharus, ac mundi lux videatur. Fidelis enim populus non abscondit suam hanc Pontificiam lucernam, nec ponit eam sub modio, sed super candelabrum erigit, ut luceat omnibus, qui in Domo Christi sunt. Sed supervacaneum est Novatores duræ cervicis refellere his rationibus, cum inferiores Romano Pontifice Maximo Antistites, uti ostensum est, jam soliti fuerint, vel longe ante annum Christi millesimum aurea sella deferri, gestata non modo laicorum Virorum nobilium humeris, sed aliquando etiam Episcoporum, nullusque fuit, qui eum ritum reprehenderet. Porro teste Burio in Vita Stephani III. qui electus Pontifex fuit anno DCCLXVIII. *suorum humeris est deportatus ad Basilicam Lateranensem; unde mos profluxit in nonnullis solemnitatibus Papam humeris deportandi.* Sella, seu Sellari deferri consuevisse Summos Romanos Pontifices jam longe ante annum Christi millesimum, & quidem cum ad Ecclesiam peragebant ad celebrandam Missam Pontificalem, docent nos inter alios duo pervetusti Romani Ordines, primus nempe, Num. VI. & secundus, Num. II. apud Mabillonium Tomo II. Musei Italici, ubi prædicti Ordines ita ad rem inquirunt: *Cum vero Ecclesiam introierit Pontifex, non ascendit continuo ad Altare, sed prius intrat in Secretarium, sustentatus a Diaconibus, qui eum susceperint de Sellari descendente, ubi cum intraverit, sedet in Sella sua.*

X. Jam vero mirum videri non debet, si sellam ipsam, qua ex antiquo more deferri in quibusdam solemnitatibus Romanus Pontifex solet, humeris suis Imperatores, Reges, ac magni Principes gestent. Exhibetur enim id obsequium in honorem Salvatoris Domini nostri *Jesu Christi*, cujus ille vices gerit in Terris, sicut in honorem ejusdem Christi Domini nostri obsequia illa referuntur, genuflectendi ante Pontificem, deosculandi ipsius pedes, eidemque equitanti stratoris officio perfungendi, uti infra dicemus in Commentariis ad Titulum IV. ubi enarrabimus ritus solemnem equitationis novi Imperatoris, & Summi Pontificis post ipsius Cæsaris Coronationem.

§. XX.

Ubi & quando Marescallus, sive Soldanus Curia projiciat pecunias super populum.

Primum jactum pecuniarum faciet, cum Summus Pontifex incipiet se movere, alium apud Pontem Hadriani, tum in (1) Platea apud Montem Jordanum, inde in Platea Parionis, deinde alium apud S. Marcum, postea apud S. Hadrianum, & demum ubique magnam pressuram apud Pontificem viderit, ut facilius possit pertransire, ad partem transversam jaciatur pecunias. Post Pontificem immediate sequuntur duo Cubicularii secreti medium tenentes Auditorem Rotæ Decanum, qui servit de Mitra, & dein-

(1) In editione Veneta anni 1516, & Colonienſi anni 1557. legitur, *in area.*

deinde duo Medici cum Secretario principali in medio, si ille non est Prælatus. Subsequitur deinde Umbella rubei (1) coloris, quam unus serviens armorum præter galeam totus armatus eques portat. Postremo equitant Vicecamerarius, si non est paratus, & omnes Prælati non parati, Protonotarii, Auditor contradictorum, si non sit paratus, & similiter Corrector Litterarum, qui si sint parati, equitant in loco suæ promotionis, & omnes Togati. Vicecamerarius baculum in manu portat, & pertinet ad eum curare, ut ordo a Priore Diaconorum datus servetur in processione. Et secundum antiquas consuetudines Camerarius Papæ non portat Ferulam, si est Cardinalis, sed ejus Vicarius, & Vicecamerarius; quia non ad Cardinalem, sed ad Camerarium id pertinet. Hoc igitur ordine ad Lateranum procedunt.

COMMENTARIUS.

I. **V**arios pecuniarum jactus in populum factos in solemnī equitatione novi Pontificis possessionem Lateranensi Basilicæ capturi commemorant passim tum veteres Codices Cæremoniales, tum varii Scriptores. Introducitur fuisse eum morem, non tam causa Pontificiæ liberalitatis, quæ alias summa erat in ea celebritate, quam, ut sic multitudo populi, quæ impedimentum præstat Domino Papæ, removeri possit, denariis ipsis colligendis intendens, jam longe ante hoc nostrum Cæremoniale ab Augustino Patricio ordinatum, testatus est Cencius Camerarius in Ordine Romano XII. Capite XVI. Num. XXXVIII. ubi etiam ait, munus illud projiciendæ pecuniæ ad Seneschallum pertinuisse: *Incipiente*, inquit Pontifice, *equitare, Seneschallus post eum vadens, facit de denariis jactum unum, ut sic multitudo populi &c.* Ob eandem causam ad impediendam scilicet multitudinem, ne Pontificem opprimeret, factos etiam variis in locis alios pecuniarum jactus, idem Auctor citato loco affirmat; confirmavitque deinde Joannes Burchardus Apostolicus Cæremoniarius in suo Cæremoniali Sedis vacantis post obitum Sixti IV. usque ad Innocentium VIII. in Pontificem electi die XXIX. Augusti anno Domini MCDLXXXIV. processum ad Lateranum, adnexosque ritus expletos die Dominica XII. Septembris, qua idem Innocentius coronatus est.

II. Ergo Ordinibus, qui Papam antecederant, ipsoque equitante memoratis, ita laudatus Burchardus ibidem inquit: *D. Philippus de Canonicis Bononiensibus Scutifer Papa, & Mareschallus, Curia Soldanus nuncupatus equester duas scartellas (legendum scarfellas) sive duos faccos monetæ, videlicet, carolenis, bajocchis, quatenis, & denariis plenos, ad sellam equi ante se habens pecunias ejusmodi, in locis deputatis, & aliis ubi oppressionem videbat, populo projiciebat; idque factum narrat, procedente Pontifice de platea S. Petri; & ubi a Judæis exceptus, & ad Montem Jordanum, S. Marcum, S. Adrianum, alibique. Memorat deinde & alios jactus, quibus omisissis, notandum illud, quod de impetu, atque insolentia populi, & de Pontificis periculo subdit: Cum Papa pervenisset juxta Ecclesiam S. Clementis, descendit de equo, & ascendit Sedem, in qua . . . dimisso baldachino portatus est. Quod factum est pro eo, quod in Laterano pro equo Pontificis habendo, & baldachino, quæ Romani sibi deberi prætendunt, tanta insolentia, & impetu fieri solent non sine Pontificis periculo; ad id evitandum, quod Pontifex sic portaretur, ordinatum fuit. Sed non minus pe-*

riculum exinde evenit; nam Soldati, qui Pontificem portabant, & alii socii sui circa eos existentes, tanto furore Pontificem portarunt, quod Pontificis receptio in ostio, sive porticu Lateranensi, & ejus locatio in Sede stercorearia, & jactus pecuniarum fieri non potuerunt. Addit mox etiam Burchardus, Pontifice descendente de sede, eam Soldatos vi rumpentes, & lacerantes, sibi vindicasse.

III. Quamquam vero eruditi Auctores nos doceant, solemnem istam equitationis pompam, qua dudum sacro habitu induti, & infulati Summi Pontifices, Cardinales, Prælati, alique Romanæ Curia Officiales ad Lateranum eodem die Coronationis ipsorum Pontificum, procedere solebant, prætermisam tandem fuisse post Leonis Papæ X. Pontificatum, tum pro majori commoditate, tum etiam propter nimiam, & excessivam impensam, quæ in tali pompa fieri necesse erat, licet re vera nobilissimum spectaculum, & tanto Pontificatu dignum esset, uti notat in suo ms. Diario Franciscus Mucantius enarrans Gesta Gregorii Papæ XIII. viguit tamen mos usque ad Pium V. Pontificem, ut ipsa celeberrima Coronationis hora inconditæ multitudini in S. Petri aream confluenti, publicæ lætitiæ causa pecuniæ dispergerentur. Verum, quod ruente quantummulto sissime turba, atque aliis alios opprimentibus, & in præripienda pecunia collidentibus, ætate tantum, & viribus validiores, & audaciores hoc munere potirentur, reliqui vero non solum ea liberalitate excluderentur, sed ex his plures obtriti, & conculcati miserabiliter interirent: *his incommodis, ut mederetur Pius*, inquit in ejus Vita Gabutius Libro I. Cap. IX. *atque, ut sublato periculo turbulenta largitionis instituto, pauperum tenuitati prudentius consuleret, destinatam huic operi pecuniam, ac præterea mille aureos, quibus quotannis eodem die convivium magnifice, & splendide Cardinalibus, & Regum, Principumque Legatis instruebatur, piorum Cænobiis egentibus, & aliis inopibus erogavit, eo convivii more deinceps omnino sublato. Atque hæc fuit una ex rebus præclare gestis a laudato S. Pontifice Pio V. initio suo Pontificatus.*

IV. Sed hisce omisissis, ut ritum nostri Cæremonialis enarremus, fiebat jactus juxta ipsius præscriptum a Mareschallo, sive Soldano Romanæ Curia. Mareschallorum mentio quidem occurrit in Ordine Romano XII. Auctore Cencio Cap. XXXIX. Num. LXVI. viderique de ea voce possunt Macrus in Hierolexico, & Dufresne in mediæ, & infimæ Latinitatis Glossario, Quod

(1) In Romana editione anni 1560. legitur, *rubei croceique coloris.*

Quod vero Soldani vocabulum spectat, jam ante editionem nostri Cæremonialis a Patricio ordinatam, illius meminit in suo Cæremoniali Burchardus, cujus locum supra attulimus, expresseque docet, in solempni illa equitatione Innocentii Papæ VIII. ad Lateranum, jactum pecuniæ factum fuisse a D. Philippo de Canonicis Bononiensibus Scutifero Papæ, atque Mareschallo, Curia Soldano nuncupato. Quod foret deinde princeps Soldani munus, explicatur Motu proprio Julii Papæ II. familiarem suum ad ejusmodi munus affumentis, anno MDVII. ejusque tenorem legere est apud eruditissimum Morettum in Appendice 111. ad Lucubrationem, *De Presby-*

terio, pag. 373. & seqq. Notat autem idem Morettus in citato Opere, Parte III. Sectione VIII. in Nota ad Num. II. in calce paginae 268. Soldani dignitatem postremis temporibus evasisse venalem, & antequam extingueretur, propriam fuisse illustri familiae de Capite ferreo. Extincta vero est per Pontificem Gregorium XIII. proventu ad Sodalitii S. Hieronymi Caritatis commodum translato, in beneficium pauperum potissime detentorum carceribus erogando, uti ostendunt Litteræ Apostolicæ apud Scannarolam, *De visitatione Carceratorum*, in Appendice §. 1. Capite 1x. Georgius in Vita Nicolai V. ait officium Soldanatus sublatum fuisse a Pio V.

§. XXI.

De Judæis, & Lege.

Cum Pontifex pervenerit ad Montem Jordanum, Judæi illi obviam veniunt, & genuflexi Legem Pontifici offerunt, lingua Hebraica Legem laudantes, & hortantes Pontificem, ut illam veneretur. Pontifex vero, illis auditis, in hanc sententiam respondet: *Sanctam Legem, Viri Hebræi, & laudamus, & veneramur, utpote quæ ab Omnipotenti Deo per manus Moysis Patribus vestris tradita est, observantiam vero vestram, & vanam Legis interpretationem damnamus, & improbamus, quia Salvatorem, quem adhuc frustra expectatis, Apostolica Fides jam pridem advenisse docet, & prædicat Dominum nostrum Jesum Christum, qui cum Patre, & Spiritu Sancto vivit & regnat Deus per omnia secula seculorum.* Sed quoniam nonnumquam accidit, ut Judæi, populi multitudine opprimantur, solent aliquando impetrare pro eorum securitate, ut hoc faciant super antemurali Arcis Sancti Angeli in angulo ad viam, qua itur ad Palatium.

COMMENTARIUS.

I. **M**Os & ille antiquus fuit, ut novo Romano Pontifici post Coronationem ad Lateranum solempni cum pompa progredienti obviam venirent Judæi, eique genuflexi Legem offerrent, ut eam veneretur. Cæremoniale Gregorii X. Num. x. post relatum pecuniæ jactum ad *Turrim Stephani Petri, qui est Parionis, & hodie dicitur Turris de Campo*; ita deinde subjicit: *Ibi Dominus Papa stat, & veniunt illuc Judæi cum Lege, facientes ei laudem, & offerunt sibi Legem, ut adoret.* Idem tradit Romanus Ordo XIV. Auctore Jacobo Gajetano, Cap. x. ubi etiam & hæc addit: *Et tunc Papa commendat Legem, & damnat observantiam Judæorum, sive intellectum, quia quem dicunt venturum, Ecclesia docet, & prædicat jam venisse Dominum nostrum Jesum Christum.* Teste Burchardo, ubi agit de Coronatione Innocentii VIII. ejusque solempni ad Lateranum processione, §. CCXLVI. cum Papa pervenisset prope Castrum Sancti Angeli, se firmavit, & Judæi, qui ad inferiores merulas in angulo dicti Castris versus Plateam se cum ornatu, & Lege sua receperant, obtulerunt Papæ Legem adorandam, & honorandam verbis Hebraicis in hanc ferme sententiam Papam acclamantes. Addit verba Hebræorum, ac responsum Pontificis. Ceterum quod ait, peractam fuisse hanc cæremoniam in angulo Castris S. Angeli, cum alias juxta antiquum ritum peragi illa debuisset ad Montem Jordanum, causam fatis explicat idem Burchardus.

To. I.

Idem §. CCXLVII. ubi ita inquit: *Solebat tamen alias id in Monte Jordano fieri, sed propter insolentiam, quæ a Romanis, & aliis, Judæis fiebat, concessum est ipsis, fieri hic; nempe in angulo Castris S. Angeli.* Idipsum docet & nostrum Cæremoniale in fine hujus §. quia scilicet nonnumquam accidit, ut Judæi, populi multitudine opprimerentur, ideoque aliquando obtinere pro eorum securitate, ut eam cæremoniam facerent super antemurali arcis S. Angeli in angulo ad viam &c.

II. Quicquid sit de hoc abusu, antiqui illius ritus, ut Judæi scilicet in ea solempni Papæ ad Lateranum deductione, Legem illi suam offerrent, jam ante Cæremoniale Gregorii X. meminit Romanus Ordo XII. auctore Cencio apud doctissimum Mabillonium Tomo II. Musei Italici, Cap. XVI. Numero XXXVIII. Sciendum, inquit, quod Domino Papæ ante turrim primo dictam, Stephani scilicet, Judæi occurrunt, & ei Legem suam præsentant, faciuntque laudes; pro quibus laudibus recipiunt a Camerario in Presbyterium viginti solidos proventus. Rursus Capite XLVIII. Num. LXXXII. ait: *Missæ autem celebrata, in Basilica scilicet S. Petri, ubi Papa coronabatur, revertitur ad Palatium, Lateranensem scilicet, coronatus cum processione, & honore arcuum, præsentatione Legis a Judæis &c.* Fuisse hunc ritum longe antiquiorem Cencii ætate, constat plane ex occurso, & plausu facto ab ipsis Judæis Eugenio Papæ III. ut in illius Vita

R

tra-

(1) In editione Romana anni 1560. post Palatium sequitur, *respicienti.*

tradit Nicolaus Cardinalis Rossellius Aragonius apud Muratorium Tomo III. Scriptorum rerum Italicarum pag. 439. col. 2. *Judæi quoque non deerant tantæ latitiæ, portantes in humeris suis Legem Mosaicam*. Porro, ut memoratus Cencius nos docet, Cap. XXXII. Num. LVI. præter Legis præsentationem, præstabant Judæi ipsi & aliam obsequii speciem Pontifici die ipsa Coronationis suæ: *Judæi representant Domino Papæ in die Coronationis suæ Legem in via, & ei faciunt laudes, & tres libras, unam piperis, & duas libras de cinnamomo afferunt ad Cameram*.

III. Inter alia antiqua exempla, quæ ad improbandum eum ritum, occursum scilicet Judæorum Pontifici Lateranum progredienti cum præsentatione Legis, & laudum celebratione, celebre est illud quod in Bonifacii VIII. Coronatione maxima pompa ad Lateranum contendentis, in suo Poemate narrat Cardinalis Cajetanus Stephanesius, quod insertum est a Sociis Bollandianis Tomo IV. mensis Maji sub die XIX. sic enim Poeta hic historicus de ipso Judæorum obsequio scribit.

*Ecce super Tyberim positum de marmore pontem
Transierat provectus equo, turrique relicta
De campo, Judæa canens, quæ cacula corde est,
Occurrit vesana Duci Parione sub ipso,
Quæ Christo gravidam Legem plenamque sub
umbra*

Exhibuit Moysi: veneratus & ille figuram

Hanc post terga dedit cauto sermone locutus.

Non modo hoc ritu occurrisset Judæos Romanis Pontificibus, sed & aliorum quoque Ecclesiarum Episcopis, vestigia quæ supersunt moris hujus apud alias Nationes, satis declarant. Vir profundæ eruditionis Petrus Moretus in sua Lucubratione, *De Presbyterio*, Parte III. Sectione IV. in Nota ad calcem paginæ 236. testatur ex relatione sibi a Viro fide digno facta, non

diffimilem occursum factum fuisse ingredienti pompa solemnî Olomucensi Episcopo, ac Principi Wolfango Hannibali Cardinali de Schrattembach Oppidum ditionis suæ populosissimum, *Chremfieri* appellant.

IV. Quod verba attinet, quæ in ea Legis præsentatione Judæi Pontificem alloquebantur, referente laudato Burchardo §. CCXLVII. hæerant: *Beatissime Pater, nos Hebræi nomine Synagoga nostra supplicamus S.V. ut Legem Mosaicam ab Omnipotenti Deo Moyse Patri nostro in Monte Sinay traditam nobis confirmare, & approbare dignemini, quemadmodum alii Summi Pontifices S.V. Prædecessores confirmarunt, & approbarunt*. Responsum Pontificis affert quidem nostrum Cæremoniale, quod tamen nonnihil variat ab eo responso, quod citato loco refert Burchardus: *Commendamus, inquit, Legem, vestram autem observantiam, & intellectum condemnamus, quia quem venturum dicitis, Ecclesia docet, & prædicat venisse Dominum nostrum Jesum Christum*. Ceterum expertos tunc fuisse & ipsos Judæos liberalitatem Pontificis, constat ex recitato superius Cencii testimonio, ubi ait: *Pro laudibus recipiunt a Camerario in presbyterium viginti solidos provectinos*. Rursus scribit idem Auctor Cap. XLVII. Num. LXXXII. *Judæis pro præsentatione Legis, facta scilicet Pontifici in solemnî illo ad Lateranum processu, tale presbyterium dari, & taliter, quale datur in Coronationibus Domini Papæ*. Sed de Presbyterio, variisque Romanorum Pontificum largitionibus factis præsertim occasione suæ Coronationis, ac solemnî ad Lateranum professionis, videri possunt, quæ in unum congeffit, digessitque amicus noster eruditissimus Petrus Moretus in celebri Tractatu, *De presbyterio*, in quo plane invenitur totius penitioris sacræ antiquitatis thesaurus.

§. XXII.

De iis, quæ fiunt ad Ecclesiam Lateranensem, & primo de Sede Stercoraria ante Portam Ecclesiæ.

Cum Pontifex ad Ecclesiam Lateranensem pervenerit, descendit in porticum Ecclesiæ, & a Canonicis illius Ecclesiæ honorifice paratis excipitur cum Cruce. Descendit Pontifex ex equo, & Prior Canonicorum Lateranensium offert Crucem osculandam Pontifici, quam Diaconus Cardinalis accipit, & ad os Pontificis, cui prius Tiaram extraxit, ponit. Osculata Cruce, Pontifici ponitur Mitra, & Regnum datur in manibus Auditoris; ipse vero Pontifex a Priore, & Canonicis prædictis ducitur ad marmoream Sedem ante Portam principalem a sinistra stantem, quæ *Stercoraria* appellatur, & ibi eum sedere faciunt; qui ita tamen sedet, ut jacere potius videatur; ad quem mox accedentes Cardinales, elevant eum honorifice, dicentes: *Suscitat de pulvere egenum, & de stercore erigit pauperem, ut sedeat cum Principibus, & Solium gloriæ teneat*. Surgens Pontifex accipit de gremio Camerarii sibi assistentis quantum pugno potest complecti pecuniarum; ubi tamen nihil prorsus sit argenti, aut auri, & spargit inter populum dicens: *Argentum, & aurum non est mihi, quod autem habeo, hoc tibi do*. Pons ligneus recta linea a porta Ecclesiæ principali ad Altare majus excitatur cum pluteis hinc inde pectoribus tenus, altitudo circiter quinque pedum, latitudo sex, aut septem, qui alteri ponti conjungitur simili modo constructo a porta qua ascenditur per Ecclesiam ad Sancta Sanctorum venienti; quod fit, ut Pontifex a populi multitudine non opprimatur; circa Altare a gradibus & supra omnia circumcirca tabulis clausa esse debent, ut per pontem tantum ad Capellam intretur. Præsidentibus igitur Canonicis, & cantantibus, *Te Deum laudamus*, Pontifex cum Cardinalibus intrat

trat Ecclesiam, & ante Altare majus supra Faldistorium procumbens sine Mitra aliquantulum orat. Deinde surgens benedicit populo, dicens: *Sit nomen Domini benedictum &c.* Inde cum Mitra ascendens ad Sedem eminentem, sedens recipit ad osculum pedis Canonicos Lateranenses.

COMMENTARIUS.

I. **E**xplicandi nunc sunt varii ritus, qui servari olim consueverunt, ubi post solemnem Processionem novus Pontifex ad Basilicam Lateranensem pervenerat: *Descendit*, inquit nostrum Cæremoniale, *in porticum Ecclesiam, & a Canonicis illius Ecclesie paratis excipitur cum Cruce.* Tum statim addit: *Descendit Pontifex ex equo, & Prior Canoniorum Lateranensium offert Crucem osculandam Pontifici.* Periculosus erat iste descensus ob pravam morem, atque insolentiam Romanorum qui aliquando gladiis decertabant, ut equum ipsum Pontificis raperent. Testem ejus rei habemus Auctorem Commentariorum Pii II. Lib. II. de ipso Pio ita scribentem: *Pius II. Pontifex Maximus Roma coronatus est apud Basilicam S. Petri 111. Nonas Septembris anno salutis quinquagesimo octavo supra mille quadrigentos, petiitque ipsa die Lateranum solemni pompa; quo in loco vix necem evasit inter eos, qui propter equum, quo infederat, gladiis decertabant; servatus est divina ope &c.* Erat equus primo occupantis, abusu scilicet ejus ævi, nam alias juxta antiquum morem, quem recenset Romanus Ordo XIV. Auctore Jacobo Gajetano, Cap. XXII. quod inscriptum est, *De officio Senatorum Urbis in ipsa solemnitate*, Processionis scilicet Coronati Pontificis ad Lateranum, Senatores ipsi, *postquam Dominus Papa De equo falerato descendit juxta Sedem stercorariam, ipsum equum recipiunt, & adducunt, quem Curialiter reddant Camerario, ut moris est.*

II. Neque vero solum ob equum, verum etiam ob Baldachinum, sub quo deducebatur Pontifex ad Lateranum, certari quammaxime consuevisse vel Seculo XV. labente, testatur Burchardus in suo Cæremoniali, ubi Innocentii VIII. electi in Pontificem anno MCDLXXXVI. processum ad Lateranum ipsum describit, sic inter alia inquit §. CCLXVII. *Cum Papa pervenisset juxta Ecclesiam S. Clementis, descendit de equo, & ascendit Sedem, in qua . . . dimisso Baldachino portatus est. Quod factum est pro eo, quod in Laterano pro equo Pontificis habendo, & Baldachino, Romani sibi deberi prædunt, tanta insolentia, & impetus fieri solent, non sine Pontificis periculo; ad id evitandum, quod Pontifex sic portaretur, ordinatum fuit; sed non minus periculum exinde venit; nam Soldati, qui Pontificem portabant, & alii socii sui circa eos existentes, tanto furore Pontificem portarunt, quod Pontificis receptio in ostio, sive porticu Lateranensi, & ejus locatio in Sede Stercoraria, & jactus pecuniarum fieri non potuerunt; imo & tanta vebementia per balthrescam a porta Basilicæ ad majus Altare paratam, favore populi subsequente, portarunt, quod ipse Pontifex, & Cardinales fuerunt in periculo cadendi cum balthresca. Cardinalis Senensis, & quidam alii periculum videntes, de balthresca saltarunt, propterea non fuerunt omnia hic suo ordine observata. Addit mox §. CCXLVII. quod ubi Pa-*

To. I,

pa ad Altare majus pervenit, tunc Sedem, de qua descendit, *Soldati vi rumpentes, & lacerantes sibi vendicarunt.*

III. Hinc tantæ insolentiæ coercendæ, teste Paride Grassio in suo ms. Diario, ubi agit de sacra Processione ad Lateranum cum Pontifice Leone X. recens electo, & coronato, inter alia *ordinatum fuit, & factum bannimentum, quod nullus portaret arma cujusque generis; & quod nullus impediat transeuntem pompam, sub pena suspendii, & maxime nequis diripiat aliqua exposita pro hoc more pompæ:* Tum paulo inferius subjicit: *Nequa scandala apud Lateranum orientur propter raptum Baldachini, & equi, ac Sedis Papalis, Papa ordinavit Conservatoribus, & Capurionibus, ut illa quiete recuperarent, ipsi eis donarent solitum, ac aliquid plus, sed vix cessatum est a scandalis.* Est antiquus abusus, qui & in aliis Ecclesiis invaluit, ubi scilicet ad eas recens Episcopi ordinati primum accedebant, uti ostendimus Tomo I. Cæremonialis Episcoporum in Commentario ad §. III. Capituli II. ubi inter alia ex veteribus monumentis relatis ab Ughello Tomo II. Italiæ Sacræ in Episcopis Mutinensibus, Num. XXXI. mentionem fecimus celebris de equo controversiæ, super quo Episcopus infederat, dum post Consecrationem ad suam Civitatem primum accederet, inter Episcopum Mutinensem, & Canonicos acriter agitatur. Unum est, quod & hoc loco addam, quod nempe scribit Paris de Grassis in ms. Diario Leonis X. de equo scilicet, quo usus hic Pontifex fuit in suo primo ad Basilicam Lateranensem processu: *Pontifex, inquit, etiam albo equo vectus est, cui non contradixi, quia sic expedit ei triumphanti . . . & equus ejus fuit ille idem, super quo captus fuit in prælio Ravennatum; sic enim ipse in eo triumphare voluit, in quo etiam victus fuerat; statuitque, ut deinceps nemo mortalis illum ascenderet quoad moreretur naturaliter; frenum ejus duxerunt quatuor, hi videlicet, Dux Ferraria, Dux Urbini, Dominus Camerini, & Magnus Dominus Laurentius de Medices nepos ejus, Papæ scilicet Leonis X. Equi frenum, quo vehi soliti fuerunt Summi Pontifices, teneri ex antiquo more consuevisse a Magnis Principibus, docent nos passim Ecclesiasticæ Historiæ Scriptores, ex quibus etiam addiscimus, equo, quo aliquando usus fuit Romanus Pontifex Maximus, nulli usui fuisse, præsertim vero mulieri, uti de S. Joanne I. Papa & Martyre legimus in Breviario Romano ad diem XI. Maji, ubi ita inquit: *Cum ei nobilis vir ad Corinthium equum, quo ejus uxor mansueto utebatur, itineris causa commodasset, factum est, ut Domino postea remissus equus ita ferox evaderet, ut fremitu, & totius corporis agitatione semper deinceps Dominam expulerit, tanquam indignaretur mulierem recipere, ex quo sedisset in eum Jesu Christi Vicarius; quomobrem illi equum Pontifici donaverunt.**

IV. Sed his omisiss, ubi Pontifex ad Ecclesiam

R 2

siam Lateranensem pervenerit, descendit in porticam Ecclesiæ, inquit nostrum Cæremoniale, & a Canonicis illius Ecclesiæ honorifice paratis excipitur cum Cruce, Antiqui & hujus ritus meminit Cæremoniale Gregorii Papæ X. jussu editum, Num. x, sic inter alia inquit: *Venit, Papa scilicet coronatus, ad plateam Lateranensem, & ducitur ad porticum, quæ vadit ad Ecclesiam S. Joannis Laterani; & ibi ante porticum stat Prior Laterani, & Canonici cum eorum comitiva, induti solemniter, & cum Crucis Processionali Papam, cum descendit, recipiunt.* Eundem ritum legere est in Ordine xiv. Romano Auctore Jacobo Gajetano, Cap. xx. in Pierfantiano ms. Codice, in Pontificali Colbertino, & in aliis hujusmodi Libris. Rursus ex nostro Cæremoniali ubi descendit Pontifex ex equo, Prior Canonice Lateranensium offert Crucem osculandam Pontifici &c. juxta ritum scilicet, qui & cum Episcopis servatur, quum primum ad suas Ecclesias jam consecrati perveniunt, uti diximus Tomo I. Cæremonialis Episcoporum in Commentariis ad Titulum II. qui inscriptus est, *De primo accessu Episcopi, vel Archiepiscopi, ad suam Diocesim, vel Provinciam.* Videri etiam & de eo ritu possunt, quæ scripsimus Tomo III. Romani Pontificalis in Commentariis ad Titulum xx. Teste Paride Graffo in suo Diario anni MDXIII, Leo X, ubi ad Lateranum pervenit, *osculatus est Crucem, & aspersus, atque incensatus.* Porro notat Franciscus Mucantius in suo ms. Diario ubi enarrat gesta Pontificatus Gregorii Papæ XIII, qui electus fuit anno MDLXXI, tunc temporis non fuisse observatum, quod in nostra Cæremoniali cavetur, *ut cum Summus Pontifex Ecclesiam ingreditur, primus Diaconus Cardinalis offerat illi Crucem & incensum; hodie enim id a primo Presbytero Cardinali fit.* Subditque mox idem Auctor Cæremoniarius & ipse Apostolicus: *Quid magis congruit, cogitandum.*

V. Quod nostram rem attinet, teste Burchardo in Cæremoniali Electionis, & Coronationis Innocentii Papæ VIII. §. ccxlix. ob populi tumultum hic aliique ritus omitti fuerunt; sic enim inquit: *Erat autem ordinatum, quod Papa ad Lateranum pervento per scalam suam, quæ ibi parata erat, de equo descenderet, & Prior, & Canonici Lateranenses qui processionaliter ibidem aderant, in Superpelliceis, & Almutiis ipsum reciperent, & in Sede marmorea Stercoraria nuncupata collocarent, ut jacere potius, quam sedere videretur, ac deinde Cardinales ipsum elevarent dicentes: Suscitatus de pulvere &c. & Pontifex tres jactus ibidem faceret, & diceret: Argentum & aurum &c. & cum Prior Crucem, quam manu gestabat, Cardinali Mediolanensi Archiepiscopo Lateranensi, si interesset, & propter podagram officium hujusmodi peragere posset, alioquin Priori Diaconorum Cardinalium, offerret, qui eam Pontifici porrigeret osculandam, & inde eam ipsi Priori restitueret: post hæc Priore ipso, & Canonicis Antiphonam, Ecce Sacerdos magnus &c. deinde, Te Deum laudamus, decantantibus, processionaliter incedentibus, ad Altare majus procederent, ubi Papa deposito Regno oraret in Faldistorio genuflexus; deinde accepta Mitra in Altari populo benediceret solemniter, dicens: Sit Nomen &c. absque Indulgentiarum publicatione: Benedictione data*

cum Mitra ad Sedem marmoream eminentem prædictam accederet, & in ea sedens, Priorem, & Canonicos prædictos ad pedis osculum reciperet, deinde ad Palatium Lateranense duceretur. Sed propter tumultum prædictum hæc sic ordinata observari non potuerunt, quæ, ut prius dictum est, acta sunt. Ita citato loco Burchardus.

VI. Deosculata Cruce, Pontifex a Priore & Canonicis prædictis, Basilicæ scilicet Lateranensis, ducitur ad marmoream Sedem ante portam principalem a sinistra stantem, quæ Stercoraria appellatur, & ibi cum sedere faciunt &c. inquit nostrum Cæremoniale, quod quidem concinit Romanis antiquis Ordinibus XII. XIII. & XIV. priscisque Scriptoribus qui de ea solemnè Pontificum Romanorum ad Lateranum profectioe scripserunt. Certe laudatus Ordo XII. Auctore Cencio, Cap. XLVIII, Num. LXXVIII ita inquit: *Ducitur a Cardinalibus ad Sedem lapideam, quæ sedes dicitur Stercoraria, quæ est ante porticum Basilicæ Salvatoris Patriarchatus Lateranensis, & in ea eundem electum ipsi Cardinales honorifice ponunt &c.* Item Cæremoniale Gregorii X. quod a Mabillonio Tomo II. Musei Italici appellatur Romanus Ordo XIII. Num. x. hæc habet: *Postquam Papa descendit, faciunt eum ibi sedere in quadam sede marmorea, quæ vocatur Stercoraria &c.* Ordo demum Romanus XIV. Auctore Gajetano Cap. xx. ait: *Descendit ad dictam Sedem Stercorariam, & deponit Regnum, & accipit Mitram, & postquam Papa descendit, sedet in dicta Sede marmorea, quæ vocatur Stercoraria, & veniunt omnes Cardinales &c.* Similia leguntur in Colbertino Pontificali, Pierfantiano Codice, in Cæremoniali Burchardi, & in antiquis Pontificum Romanorum Diariis, ubi agitur de solemnè ipsorum ad Lateranum processu.

VII. Porro de hujus Sedis, quæ tot imposturis hæreticorum præbuit ansam, ut notat eruditus Moretus, *De Presbyterio*, Parte III. Sectione VI. ad calcem paginæ 249. origine, conditione, & fortuna quamplures quidem Auctores scripserunt, sed multa paucis complexus est doctissimus Mabillonius in Commentario prævio ad Romanum Ordinem, Cap. XVIII. ubi primum recte docet, eos, qui istius Sedis originem ad pseudopapissam Joannam referunt, facile ex hoc revinci, quod nulla hujusmodi Sedis mentio ante Seculum duodecimum facta invenitur. Quod ut melius intelligatur, notare juvat, quod idem laudatus Auctor advertit, hunc scilicet morem ab aliquot seculis in novorum Pontificum institutione observari solitum, ut electus in Ecclesiam Lateranensem introductus, primo in Throno Pontificali, qui in apside illius Basilicæ ante hac extabat, collocaretur, ubi omnes Episcopos & Cardinales, ut loquitur in memorato Ordine XII. Romano Cencius, *ad osculum admitteret*; deinde vero *ad Sedem lapideam, quæ dicitur Stercoraria*, in porticu ejusdem Basilicæ inter duas fores existentem adduceretur, in eaque sederet, cum interim caneretur hic versiculus ex Psalmo CXI. *Suscitatus de pulvere egenus, & de stercore erigit pauperem.* Postea perductus ad Capellam S. Silvestri prope Lateranense Palatium, ubi duæ erant sedes porphyriticæ, primo sederet ad dexteram in una ex illis sedibus, ubi a Priore Basilicæ S. Laurentii Ferulam acciperet, quæ est signum regiminis, & correctionis,

tionis, & claves ipsius Basilicæ, quia specialiter Petro Principi Apostolorum data est potestas claudendi & aperiendi, & ligandi atque solvendi, & per ipsum Apostolum omnibus Romanis Pontificibus; demum cum ipsa Ferula, & clavibus accederet ad alteram Sedem similem, & ejusdem lapidis, & tunc redderet eidem Priori tam Ferulam, quam etiam ipsas claves.

VIII. Hæc ex ipso Cencii Libro ad verbum fere referre visum est (male enim locum ipsum in citato Commentario prævio ad Romanum Ordinem Mabillonius retulit) ut omnes intelligant, Sedem illam, quæ Stercoraria dicta est, non ita fuisse appellatam, quasi esset perforata, neque enim pertusa erat, uti aliquando propriis oculis agnovit idem Mabillonius, sed quod Pontifice in ea stante, hæc Psalmi cxii. verba canerentur: & de stercore erigit pauperem. Hæc sedes ex marmore constat, aliæ vero duæ ex Porphyrite. Non alia de causa sedes ipsas pertusas fuisse, quam quod in antiquis Romanorum thermis repertæ, ob materiæ pretium, non ob formam, aptæ judicatæ sunt, quæ ad novi Pontificis sessionem adhiberentur, notavit idem laudatus Auctor in suo Itinere Italico, Tomo I. Musei Italici, pag. 58. Quicquid sit, harum sedium primus videtur meminisse Pandulphus in vita Paschalis II. cujus locum mox inferius referemus. In creatione siquidem Romanorum Pontificum post Leonem IV. cui pseudopapissam illam successisse fabulantur, qui electi sunt, omnes in Solio Patriarchali intra Basilicam posito collocati perhibentur, non vero in istis sedibus, quæ extra Basilicam positæ erant. Sic Benedictum III. Leonis IV. successorem electum anno dcccclv. Electores teste in ejus Vita Anastasio, cum hymnis, & canticis spiritualibus, ampla exultatione, & ineffabili gaudio, in Patriarchium Lateranense perducentes, Pontificali Solio, ut mos est Pontificum, canaque consuetudo demonstrat, posuerunt. Idem contigit in Nicolao I. Benedicti Successore, quem electum anno dcccclvi. Electores, ut idem Anastasius tradit in ejus Vita, sacris acclamationibus in Lateranum introducentes, Solio imposuerunt Apostolico. Ex quo intelligitur, nihil tum novatum fuisse.

IX. Primus, ut mox dicebam, notatque Mabillonius in citato Commentario ad Romanum Ordinem, Cap. xvi. Pandulphus istarum sedium mentionem facit in Paschale II. cujus creationem, quæ jam contigit anno MXCIX. hoc modo commemorat: Sic eo diu renitente, a Primiscriiniis, & Scribis Regionariis, mutato nomine, sibi acclamatum est: Paschalem Papam S. Petrus elegit. His aliisque laudibus solemniter peractis, Cblamyde coccinea induitur a Patribus; & Tiara capiti ejus imposita, comitante turba cum cantu, Lateranum ventus, ante eam porticum, quæ ducit ab Australi plaga ad Basilicam Salvatoris, quam Constantinianam dicunt, adducitur. Equo descendit, locaturque in sede, quæ ibidem est; deinde in Patriarchali; ascendensque Palatium, ad duas Cureles devenit. Hic baltheo succingitur, cum septem exinde pendentibus clavibus, & septem sigillis; ex quo sciat, se secundum septiformem Spiritus Sancti gratiam, Sanctarum Ecclesiarum, quibus Deo auctore præest, regimini, in claudendo, aperiendoque, tanta ratione providere debere, quanta solemnitate id quod intenditur, operatur. Et locatus in

utrisque, data sibi Ferula in manum, per cetera Palatii loca solis Pontificibus Romanis destinata, jam Dominus, vel sedens, vel transiens, electionis modum implevit. Et mox; Die altero, mense vi. xiiij. die, primo consecrandus in Pontificem, consecraturique Pontificem Pontifices cum frequentia populi plebisque, Basilicam Beati Petri invadunt &c. Addit & alia, sed hæc ad rem nostram sufficiunt.

X. Duo præsertim in recitato hastenus loco occurrunt animadvertenda. Primum est, Pontificem Lateranum equo vestum, ad portam Australem, quæ primaria est, equo descendantem, locatum fuisse in sede, quæ ibidem erat, deinde in Patriarchali. Ubi vides, sedem illam, quæ in porticu Basilicæ Lateranensis extabat, distinguui a Patriarchali Solio, quod sub apside Basilicæ positum erat. Alterum est, Electum ipsum Pontificem, deductum ad Palatium Lateranense, devenisse ad duas cureles, in quibus vicissim sedit, accepitque baltheum cum septem clavibus, totidemque sigillis. Atque hæc sunt duæ sedes illæ porphyreticæ, & quidem pertusæ, quas ait Mabillonius in citato suo Commentario, se vidisse in Claustro Canonorum Lateranensium cum prædicta Sede Stercoraria, quo nomine Cencius primo usus invenitur in memorato Romano Ordine xii. Idem Pandulphus in Honorio II. qui electus Pontifex fuit anno mxxiv. nulla hujus Sedis mentione facta, tradit Pontificem ipsum electum in syrnis, quæ ante Ecclesiam Beati Silvestri sita sunt, compositum fuisse, quo vocabulo Pandulphus duas illas Sedes porphyreticas significat. Sane post Cencium Sedes illa, in qua primum Pontifex, ubi ad Basilicam Lateranensem pervenit, sedet, Stercoraria est appellata, eoque nomine ipsam appellarunt passim sequioris ævi Romani Ordines, atque Scriptores passim, qui ritum processionis ad Lateranum cum novo Pontifice coronato describunt.

XI. Ex his intelligi par est, quod & idem Mabillonius notat, prædictarum sedium usum, jam longe ante natam putidam illam Joannæ pseudopapissæ fabulam, in creatione Summi Pontificis investum fuisse, tametsi hujusce ritus causa ignoretur. Porro perseveravit ritus ipse ad Leonem X. qui pro more vestus Lateranum, sedit in sede illa apud portam Ecclesiæ jacente ad latus dexterum, uti Paris de Grassis in ejus Diario scribit. Postea itum est ad Capellam S. Silvestri; & primo sedens, quasi jacens, Papa accepit a Priore Canonorum claves, deinde Ferulam; & deinde illico Papa surgens, ivit ad aliam Sedem, & jacuit; accepitque ab eodem Priore Canonorum cingulum rubeum cum bursa, in qua sunt duodecim lapides vitrei, qui etiam nunc ostenduntur; & statim Papa surgens consignat Ferulam, & claves eidem Priori; cingulum vero retinet, donec acceptam pecuniam argenteam de manu, vel gremio Cameraarii, ter projicit, dicens: Disperfit, dedit pauperibus &c. Et mox deponit cingulum cum bursa, & vadit ad Capellam Salvatoris. Hastenus Paridis Diarium, in cujus verbis quædam occurrunt paulo diversa a laudati Pandulphi narratione de electione Paschalis II. Hic enim mentionem facit de baltheo cum septem clavibus, totidemque sigillis; ille vero cum baltheo conjungit bursam, in qua duodecim lapilli erant. Paridi consentit Cencius in Ordine xii. Romano, ubi ait, Electum cingi

zoua

zona rubea de serico, in qua dependet bursa purpurea, in quo sunt duodecim sigilla pretiosorum lapidum, & muscus. Eadem metricè redidit Cardinalis Gajetanus Stephanesius, ubi de Coronatione Bonifacii VIII. sic inter alia inquit,

..... Zonæque Pater succingitur illic,
Ad quam purpurea bursa est appensa, lapillos
Bis senos referens pretiosos, sculpta sigilla,
Et muscum, quæ magna notant præfagia....

XII. Sed tandem, ut rectè Mabillonius monet, totus ille sedium ritus penitus abolitus est post Leonem X. cum Romanos fabula tam male inventa, quam facile credita, pudere cepit; cuius ritus origo hanc fabulam uno, vel altero seculo præcessit. Hinc scite notat eruditus Moretus, De Presbyterio, Parte III. Sectione VIII. Num. VI. certo falsum esse, quod scribit Guilelmus Burius, ut cæteros præteream maxime heterodoxos Auctores, in sua brevi Notitia Romanorum Pontificum, ubi in Joanne VIII. ita scribit: *Adhuc, nimirum nostris temporibus, Sedi, stercorariæ scilicet, imponitur Papa cum deportatur ad Basilicam Lateranensem pro Pontificatus possessione accipienda, & paulo post in altera..... a Cardinalibus adorandus*. Abolitus enim, ut dictum est, fuit hic mos alias antiquus, post Leonem X. Papam, Leo siquidem ipse, ut in suo Diario ms. scribit Paris de Grassis, *sedit in Sede illa apud portam Ecclesiæ, ad quem jacentem in latus dextrum tres Priores ordinum Cardinalium dixerunt super eum, dum elevarent*: Suscitatus de stercore, Desiisse hunc ritum post Leonem docet post Mabillonium idem Moretus citato loco, additque etiam Num. VII. Paulum III. post Coronationem suam, quæ acta fuit apud S. Petrum die V. Novembris anno Domini MDXXXIV. minime processisse Lateranum, sed paratam pompam stetisse ibidem, ibidemque iactus pecuniarum habendos per viam, traditionem presbyterii, convivium, aliaque, de quibus inferius suis locis dicemus, completa fuisse. Ceterum & illud hoc loco notandum, quod observat Franciscus Mucantius Cæremoniarius Apostolicus in suo ms. Diario, ubi enarrat gesta Pontificatus Gregorii Papæ XIII. ad diem XXV. Maji anni MDLXXII. quo nempe capta fuit ab ipso solemnitas possessio Basilicæ Lateranensis, celebrem illam ad Lateranum equitationem, quam recenset nostrum hoc Cæremoniale, ultimo loco a Leone Papa X. cum omnibus suis circumstantiis observatam fuisse, tum pro majori commoditate, tum etiam propter nimiam excessivam impensam, quæ in tali pompa fieri necesse erat, licet re vera nobilissimum spectaculum, & tanto Pontificatu dignum esset.

XIII. Sed persequamur ordinem nostri Cæremonialis in hoc §. XXI. expressum: *Surgens Pontifex*, inquit, *accipit de gremio Camerarii sibi assistentis, quantum pugno potest complecti pecuniarum, ubi tamen nihil prorsus sit argenti, aut auri, & spargit inter populum, dicens, illud scilicet, quod Apostolorum Princeps claudendo pauperi petenti ab eo elemosynam, dum Templum ingrederetur, ut in Actis Apostolicis Cap. I. I. Argentum & aurum non est mihi; quod autem habeo, hoc tibi do*. Esse & hunc antiquum ritum in Romani Pontificis inauguratione usitatum, docet nos antiquus Ordo Romanus, Auctore Cencio, Cap. XLV. Num. LXXV. ubi postquam retulit sessionem Pontificis in memo-

morata Sede Stercoraria, & Psalmi cxi. verba tunc dicta, *Suscitat de pulvere egenum, & de stercore erigit pauperem, ut sedeat cum Principibus, & Solium gloriæ teneat*; ita mox subiicit: *Post aliquantulum stans juxta eandem sedem, Electus accipit de gremio Camerarii tres pugillatas denariorum, & projicit dicens, Argentum & aurum non est mihi ad delectationem; quod autem habeo hoc tibi do*. Tunc autem accipit &c. Eundem ritum legere est in Cæremoniali Gregorii X. Pontificali Colbertino, Codice Piersanctiano, & Romano Ordine XIV. Auctore Jacobo Gajetano, in quibus omnibus expresse habetur, stantem Pontificem juxta ipsam Sedem accipere tres pugillatas denariorum de gremio Camerarii, & projicere inter populum, dicendo scilicet *Argentum & aurum non est mihi &c.* Verbum illud, *ad delectationem*, quod legitur in Romano Ordine, Auctore Cencio, in his omnino desideratur. Factum ter pecuniæ iactum a Bonifacio Papa VIII. ubi ad Sedem ipsam Stercorariam sedit, testatur etiam in suo Poemate Cardinalis Gajetanus Stephanesius sic dicens.

.... En sedes capiens a stercore nomen
In platea est circa Templum despecta parumper
Visa novis, quia fœda loco, quia Maximus Heros
Hoc fortasse die recubans ubi primitus illic
Adforet adventu positus ter missile jactat
In populum, faturque dicens: Non aurea nobis
Argentumve nitens nobis ad gaudia non sunt.
Quod tamen est, hoc prompta manus dispergere
tentat.

Dicitur ea Sedes fœda loco, quod in porticu Basilicæ inferiori constituta esset, ut ex antecedentibus intelligitur. Ceterum licet Augustinus Patricius Auctor nostri Cæremonialis, quod dedicavit Innocentio Papæ VIII. dicat, surgentem Pontificem de Sede Stercoraria accipere de gremio Camerarii sibi assistentis quantum pugno potest complecti pecuniarum; ipse nihilominus Innocentius Papa VIII. ut testatur in Cæremoniali Electionis, & Coronationis illius Joannes Burcharius §. CCXLVIII. *accepit de gremio D. Falconis Thesaurarii sui tres pugillatas quârenorum, & denariorum minorum successive, & inter populum projecit, dicens, nempe: Argentum & aurum &c.* Item teste Paride Grassio in suo Diario, ubi enarrat ritus servatos in eo solemniori processu Leonis Papæ X. ad Lateranum anno MDXIII. *Papa stans accepit de gremio Camerarii tres pugnos quârenorum, & projiciens dixit: Argentum & aurum &c.*

XIV. Peracta cæremonia largitionis pecuniæ per Papam juxta Sedem Stercorariam stantem, per pontem ligneum recta linea a porta Ecclesiæ principali ad Altare majus excitatum, cum pluteis hinc inde pectoribus tenus, altitudinis circiter quinque pedum, latitudinis sex, aut septem, qui alteri ponti conjungitur simili modo constructo a porta qua ascenditur per Ecclesiam ad Sancta Sanctorum venienti, quod fit, ut Pontifex a populi multitudine non opprimatur, præcedentibus Canonicis, & cantantibus, Te Deum laudamus, cum Cardinalibus intrat Ecclesiam, & ante Altare majus supra Faldistorium procumbens, sine Mitra aliquantulum orat &c. Ita plane inquit nostrum Cæremoniale, concinens plane antiquo ritui, cuius mentionem faciunt Romanus Ordo XII. Auctore Cencio, alique sequioris ævi Cæremoniales Libri Ec-

Ecclesiæ Romanæ, ex quibus recte notavit Doctissimus Morettus, *De Presbyterio*, Parte III. Sectione VI. Num II. *intra Ecclesiam multifarias*, Papam honorari tunc consuevisse *per Hymnum*, Te Deum, a *Canonicis cantatum*, quos ad pedem, & osculum excipiebat, *super eminenti Sede constitutus*. Sane juxta nostri hujus Cæremonialis præscriptum surgens deinde Pontifex a Faldistorio, supra quod procumbens aliquantulum oravit, *benedicit populo, dicens: Sit Nomen Domini benedictum &c. Inde cum Mitra ascendens ad Sedem eminentem, sedens recipit ad osculum pedis Canonicos Lateranenses.*

XV. Atque hic est plane antiquus ritus, cuius inter alios mentionem facit Cencius in Romano Ordine XII. Cap. XLV III. Num. LXXX III. ubi ita inquit: *Ducitur per porticum ipsam ad Ecclesiam Basilicæ Lateranensis, & ascendens Sedem post Altare, recipit Canonicos ejusdem Ecclesiæ ad pedes, & deinde ad osculum pacis.* Expressius ritum ipsum recenset sequenti Numero LXXXIV. ubi agens de Papa electo & consecrato extra Urbem, sic inquit: *Intrat Ecclesiam Lateranensem, & fiunt alia omnia, sicut superius est enarratum, hoc excepto, quod cum descenderit ad Sedem Stercoratam, & per porticum vadens, Ecclesiam Lateranensem intraverit, non statim ascendit ad Altare, seu ad Sedem, sed veniens interius ex Choro majori ante Cruces, finito, Te Deum laudamus, dicit, Adjutorium nostrum in Nomine Domini &c. Sit Nomen Domini benedictum &c. Benedictio Dei Omnipotentis Patris & Filii & Spiritus Sancti descendat super vos, & maneat semper. Hoc facto, ducitur ad Altare & prostratus orat; qui postquam oraverit, Sedem majorem ascendit, & ibi Canonicos ejusdem Ecclesiæ ad pedes recipiet, & ad osculum pacis.* Juxta Cæremoniale Gregorii X. post projectas in populum tres pugillatas denariorum, de quibus paulo superius dictum fuit, *Priore, & Canonicis presentibus, cantando, ducitur per ipsam porticum, Papa scilicet, ad Ecclesiam Basilicæ Lateranensis, ubi orat, & dicit, Sit Nomen Domini; & deponit Regnum, & assumit Mitram, & sedet in magna Sede post Altare, ubi recipit prædictos Priorem, & Canonicos Lateranenses ad pedem, & ad osculum.*

XVI. Præstat nunc audire Romanum Ordinem XIV. Auctore Jacobo Gajetano Cap. XX. ubi memorati hætenus ritus prælatius fufiusque enarrantur. In hoc itaque Ordine post projectos denarios a Papa in populum, & dicta illa verba, *Argentum & aurum &c.* sine illo additamento, *ad delectationem*, ut in Romano Cencii Ordine, tunc duo Cardinales ministrant ei, & accipientes eum, ducunt ad Ecclesiam S. Salvatoris per viam, ubi erat dicta porticus. *Venientibus autem eis a dicta Sede Stercoraria acclamatur: D. N. Sanctus Petrus elegit. Sicque ducitur per dictos Cardinales usque post Altare, & ibi orat; quo intrante, & orante, cantatur a Canoniceis: Te Deum laudamus. Postquam vevro oraverit, dicit super Altare, & super populum: Sit nomen Domini benedictum. Respondetur: Ex hoc nunc & usque in seculum; & postea ducitur ad Sedem eminentem marmoream, & ibi recipit Lateranenses Canonicos ad pedem, & osculum.* Verba illa acclamationis: *D. N. Sanctus Petrus elegit*, occurrunt passim in electionibus veterum Romanorum Pontificum Gregorii

VII. Paschalis II. & aliorum plurium, uti videre est apud Pagium in illorum Vitis; præsertim vero apud Cencium in Romano Ordine XII. Capite XLV III. ubi dicta eadem verba leguntur in Cælestini III. inauguratione, postquam scilicet Papa ter in populum denarios projecit, dicens, *Argentum & aurum non est mihi ad delectationem &c.* Tunc enim accipit ipsum electum Prior Basilicæ Salvatoris Patriarchatus Lateranensis, cum uno de Cardinalibus, vel uno de Fratribus suis, & venientibus per eandem porticum juxta ipsam Basilicam Salvatoris exclamatur: *D. Cælestinum S. Petrus elegit.* Cælestinum nempe III. sub cujus Pontificatu Cencius Ordinem ipsum XII. Romanum scripsit, ut eruditus Mabillonius notavit ibidem.

XVII. His obiter dictis, non omittendus hoc loco ritus, quem describit in suo Cæremoniali Burchardus de electione & Coronatione Innocentii Papæ VIII. circa receptionem Capituli Basilicæ Lateranensis ad osculum pedis, & benedictionem solemniter impertitam. Sic enim ait §. CCXLV III. *Accepit deinde Priorem, & Canonicos prædictos tantum, & alios Beneficiatos ad pedis osculum.* Subditque mox: *Tum stans deposita Mitra propter suam Crucem, quæ per Subdiaconum more solito coram eo retinebatur, populo solemniter benedixit, dicens, scilicet, Sit Nomen Domini.* Ubi nota 1. non solum Canonicos, sed & Priorem, ac Beneficiatos receptos fuisse ad osculum pedis; cum alias nostrum Cæremoniale de solis loquatur Canonicis. 11. præmissam fuisse solemnem benedictionem eam ad pedis osculum receptionem; ex Cæremoniali siquidem nostro primum datur solemniter populo benedictio, & deinde admittuntur Canonici ad osculandum pedem Pontificis. 111. tandem expressam fieri a Burchardo mentionem ejus ritus, Crucis scilicet retinendæ per Subdiaconum coram Pontifice Benedictionem populo impertiente, cum alias Cæremoniale de eo ritu penitus fileat. Ceterum, quod Benedictionem spectat præmissam de osculationi pedis, quam Canonici facere debent Pontifici, concinit quidem nostrum Cæremoniale Cæremoniali Gregorii X. cujus verba supra attulimus; notandum tamen quod ex ejusdem Cæremonialis præscripto Papa tunc non solum Canonicos Lateranenses, sed & Priorem recipit ad pedem, & ad osculum.

XVIII. Teste Paride Graffo in suo ms. Diario, ubi enarrat ritus a Leone X. Papa servatos, post jactum pecuniæ ingressus est pedes Ecclesiam in ponte, & illico levati sunt cataractes pontis, ne populus sequeretur, & sic perrexit ad Altare majus, ubi facta super Faldistorio oratione solita, ascendit, & osculatus est, super quo in medio erat capsula cum Sacramento; deinde stans in cornu Epistolæ, versa facie ad Crucem suam inter ostium cancellorum ipsius Altaris benedixit more solito; & publicata est Indulgentiam plenaria in Latino solum, quia vilis plebs illa erat, cui esset interpretanda. Deinde obtulit super Altare eodem centos ducatos, asserens quod Thesaurarius postmodum daret eis ad partem solitum, & ultra xxv. plures solito. Inde ascendit ad Solium suum jam prius paratum, ubi solos Canonicos ad osculum pedum admisit. Quo facto, Prior Canoniceis nomine Capituli petiit certas gratias, quas Papa in parte concessit. Sed ut nihil omittamus a nostro Cæremoniali præscriptum

criptum, quod lignei pontis constructionem spectat, teste eodem Grassio, *pons ligneus erectus est a porta Basilicæ, quæ est apud porticum e regione Altaris, usque ad gradus Altaris Evangelii, altus pedes circa decem cum parapetis de super, & largus pedes xx. & gradibus; deinde*

usque ad portam, qua itur ad Aulam Concilii similiter factus est; hinc inde autem, quantum sit Tribuna major, posita sunt tabulata firmissima absque aliquo aditu, nisi illo, qui erat per pontem. Ita Grassius in laudato Diario ms. quod extat in celebri Bibliotheca Casanatensi.

§. XXIII.

De Laudibus, quæ fiunt Pontifici in Aula Concilii.

Deinde Pontifex per ipsum pontem ascendit ad Palatium Lateranum per portam, quæ est in Ecclesia; & cum perventum fuerit in prima Aula, quæ Aula Concilii appellatur, sedet Pontifex in Sede sibi parata, apud tabulam lapideam in capite Aulæ, quæ dicitur mensura Christi; & hinc inde apud eum stant Domini Cardinales. Prior vero Presbyterorum Cardinalium stans ante Papam convenienti intervallo, cum Subdiaconis, Auditoribus, Advocatis, & Scriniariis facit Laudes Domino Nostro, ut fecerat Prior Diaconorum in S. Petro, incipiens, *Exaudi Christe &c.* Prior Presbyterorum prædictus, & alii, qui faciunt Laudes, stant detecto capite. Pontifex vero sedet cum Mitra, & alii Cardinales stant cum Mitra. Hoc tamen fieri solebat in introitum ipsius portæ in primo plano, antequam ad Aulam prædictam veniatur; commode tamen in hunc locum translatus est hic actus propter illius loci angustiam.

COMMENTARIUS.

I. **D**ata per Pontificem Benedictione, ascendit mox Pontifex per ipsum pontem, de quo actum superius fuit, ad Palatium Lateranense, per portam, quæ est in Ecclesia; & ubi in Aulam primam pervenit, quæ Aula Concilii appellatur non modo in nostro hoc Cæremoniali, sed & in illo quod concinnavit Burchardus de electione, & Coronatione Innocentii Papæ VIII. *sedet Pontifex in Sede sibi parata apud tabulam lapideam in capite Aulæ, quæ dicitur mensura Christi; & hinc inde apud eum stant Domini Cardinales; Prior vero Presbyterorum Cardinalium stans ante Papam convenienti intervallo, cum Subdiaconis, Auditoribus, Advocatis, & Scriniariis facit Laudes Domino Nostro, ut fecerat in Sancto Petro &c.* Fuse de his Laudibus fieri novo Pontifici solitis egimus jam supra in Commentario ad §. xvi. Agit & de hoc ritu, repetendi scilicet Laudes Papæ, & quidem per primum Cardinalem Presbyterum, Cæremoniale Gregorii X. Num. x. ubi ita inquit: *Quo facto, idest receptis Canonicis Lateranensibus ad pedis osculum, ut dictum est ad finem Commentarii præcedentis, ducitur ad Palatium, & dum venerit ad portam Palatii, unde intratur Palatium per Ecclesiam, ponitur ibi Faldistorium, & ibi Papa sedente, Prior Presbyterorum Cardinalium, ordinatis Judicibus & Scriniariis in filo, facit ibi Laudem, sicut Diaconi Cardinales fecerant in Missa ante Epistolam post Orationem, in Basilica scilicet S. Petri.*

II. Meminit & ejus ritus Pontificale Colbertinum, iisdemque illum verbis describit, quibus a Cæremoniali Gregorii X. relatus fuit; sed in eo tamen variat, quod ubi Cæremoniale ipsum ait, *sicut Diaconi Cardinales fecerant; Pontificale Colbertinum inquit, sicut Diaconus Cardinalis fecerat*, Singulari etiam numero utitur Romanus Ordo xiv. Auctore Jacobo Gajetano, Cap. xx. ubi prædictum ritum ita recenset: *Quo facto, ducitur per Cardinales ad Palatium Za-*

chariæ Papæ, quod vulgariter dicitur Casa-major, & venit ad portam Palatii. Inde intrat Palatium per Ecclesiam. Intra portam, qua ascenditur ad dictum Palatium, & portam ipsius Palatii ponitur Faldistorium, ubi sedet Dominus Papa, in illis scilicet gradibus, ubi solet sedere, quando cantatur Gloria, Iesus &c. & ibi Papa sedente, Prior Presbyterorum Cardinalium, ordinatis Judicibus, & Scriniariis in filo, facit ibidem Laudem, sicut Diaconus Cardinalis fecerat in Missa ante Epistolam post Orationem in Basilica S. Petri. Præclarior ceteris enarravit hunc plane ritum Burchardus in suo Cæremoniali electionis & Coronationis Innocentii Papæ VIII. §. ccl. ubi ita inquit: Benedictione per Pontificem, ut supra, data, ascendit per Basilicam prædictam ad Palatium Lateranense, & cum pervenisset ad primam Aulam magnam, quæ Aula Concilii nuncupatur, positum fuit Faldistorium ante gradus lapidis supra quatuor columnas positi, quæ mensura Christi appellatur, ubi Papa sedit, renibus ad dictum lapidem versis. Tum vero mox ita subjicit sequenti §. ccl. i. Interim Reverendissimus D. Cardinalis Novariensis Subprior Presbyterorum Cardinalium loco Cardinalis Mediolanensis Prioris eorundem Presbyterorum, qui infirmus erat, sine Ferula, ordinatis coram Pontifice in dicto Faldistorio cum Mitra sedente, & Cardinalibus hinc & inde circa ipsum cum Mitris stantibus, Subdiaconis, Auditoribus, Secretariis, & Advocatis eo ordine, prout Prior Diaconorum in Basilica S. Petri fecerat, ita quod inter Pontificem & eos esset spatium circa trium cannarum, stans sine Mitra inter primos Subdiaconos cum aliis prædictis discopertis capitibus stantes, ad Pontificem versus fecit Laudem alta voce quasi legendo dicens: Exaudi Christe; illis respondentibus: Domino Nostro Innocentio &c. tribus vicibus, & eo ordine, ac de verbo ad verbum voce, & tono, prout Prior Diaconorum superius in dicta Basilica S. Petri fecerat.

§. XXIV.

§. XXIV.

De duabus Sedibus perforatis apud Capellam S. Silvestri.

Finitis Laudibus, procedit ad Capellam S. Silvestri. Ibi ante portam Capellæ sunt duæ Sedes porphyreticæ perforatæ, & ibi sedet Pontifex (1) super primam; ad quem Prior Ecclesiæ Lateranensis accedit, & genuflexus dat Pontifici Ferulam in manu in signum correctionis, & regiminis, & claves ipsius Ecclesiæ, & Palatii Lateranensis in signum potestatis claudendi & aperiendi, ligandi atque solvendi. Surgit deinde Papa cum Ferula, & clavibus, & sedet in alia Sede porphyretica ad aliam partem, & ibi restituit eidem Priori Ferulam, & claves; & ab eodem præcingitur super Planetam sedens cum Cingulo quodam sericeo rubeo cum bursa etiam sericea & rubea, in qua sunt duodecim lapides pretiosi cum musco. Tum Pontifex præcinctus, & sedens, e gremio Camerarii capit denarios argenteos omnifariam quotquot potest manu continere, & super populum spargens, dicit: *Dispersit, dedit pauperibus, iustitia ejus manet in seculum seculi*; & hoc tertio facit. In his duabus Sedibus Pontifex sedet, ut in prima Stercoraria.

COMMENTARIUS.

I. **L** Audibus peractis juxta antiquum ritum, cujus mentionem faciunt Romanus Ordo XII. Auctore Cencio, Capite XLVIII. Cæremoniale Gregorii X. Num. x. Romanus Ordo XIV. Auctore Jacobo Gajetano, Cap. xx. Pontificale Colbertinum, aliique passim Cæremoniales Codices, procedit Papa ad Capellam S. Silvestri; sive, ut ait laudatus Ordo XII. *Judices eundem Electum*, Papam scilicet, accipientes, ducunt eum per Palatium usque ad Basilicam S. Silvestri. Ex præscripto autem Cæremonialis Gregorii X. Colbertini Pontificalis, & Romani Ordinis XIV. ducitur Papa ab ipsis Cardinalibus per Palatium usque ad portam Ecclesiæ S. Silvestri, ubi sunt duæ Sedes porphyreticæ &c. Egimus nos jam & de his Sedibus supra in Commentario ad §. XXI. ubi de illa famosa Sede tractavimus, quæ Stercoraria appellatur; sed agendum hic iterum de ipsis censemus, tanquam in proprio, & opportuniori loco.

II. Ergo, ut nostrum Cæremoniale inquit, ante portam Capellæ sunt duæ Sedes porphyreticæ perforatæ, & ibi sedet Pontifex super primam &c. Ita plane legitur in Cæremonialis editione Veneta anni MDXVI. & in Colonienfi anni MDLVII. perperam vero in Romana anni MDLX. legitur, *duæ sedes porphyreæ perforatæ, & nuda sedet Pontifex super primam*. Fœdus est typographi error, legendum enim nudæ cum diptongo, & deinde ponendum est punctum, hoc modo: *Ante portam Capellæ sunt duæ Sedes porphyreæ perforatæ, & nuda. Sedet Pontifex super primam* &c. Atque hæc est lectio, qua usus est Burchardus in Cæremoniali Electionis, & Coronationis Innocentii VIII. §. cclii. sic dicens: *Laudibus finitis, Papa ductus est ad Capellam portam S. Silvestri, juxta quam positæ sunt duæ Sedes porphyreæ nuda, ad quarum primam a dextris portæ positam Papa sedit* &c. Oportuit locum illum Romanæ editionis notare, ingerit enim sensum turpissimum, occasionemque præbet calumniatoribus, credulive ignorantibus dicendi, adinventas fuisse has Sedes ad cognoscendum Pontificem an esset masculus. Fuit hæc

To. II.

(1) Ita in 1. Veneta editione anni 1516. in Romana vero anni 1560. *Et nuda sedet Pontifex super primam*.

plane inepta Platinæ opinio, eaque impostura conati sunt malevoli aliam pseudopapissæ Joannæ imposturam confirmare. Platinam confutans Panvinus, scite inquit: *De Sedibus porphyreticis Laterani, ex quibus Papa, an esset masculus cognoscebatur, aliquid dicere superfluum est, & inane existimo, cum omnia fabulosa sint, & ab imperito vulgo ficta*. Ceterum non alia de causa Sedes illas perforatas verisimile est, quam quod in antiquis Romanorum thermis repertæ, ob materiæ pretium, non ob formam, aptæ judicatæ sunt quæ ad novi Pontificis sessionem adhiberentur, ut scite notarunt Martinellus, & Mabillonius, & deinde Sarnellius Libro VII. Epistola xxxi. & Pagius in Vitis Romanorum. Pontificum Tomo I. ubi de Joanna pseudopapissa agit post Leonis Papæ IV. vitam.

III. His ita explicatis, quod nostrum attinet ritum, antiquus profecto ille est, ut nimirum in his Sedibus novus Pontifex fedeat, & quidem ante portam Ecclesiæ S. Silvestri. Audiendus est primus Cencius, qui in citato Romano Ordine XII. Cap. XLVIII. & ritum refert, & rationem etiam docet, ita inquit: *Ubi vero ventum est ante Basilicam ipsum, nempe S. Silvestri, super cujus arcum, qui sustentatur de duabus columnis porphyricis, est Imago quadam Salvatoris, quæ a quodam Judæa percussa olim in fronte sanguinem emisit, sicut bodie cernitur, idem Electus sedet ad dexteram in Sede porphyrica, ubi Prior Basilicæ S. Laurentii de Palatio dat ei Ferulam, quæ est signum regiminis, & correctionis, & claves ipsius Basilicæ, & sacri Lateranensis Palatii; quia specialiter Petro Principi Apostolorum data est potestas claudendi & aperiendi, & ligandi atque solvendi, & per ipsum Apostolum omnibus Romanis Pontificibus; & cum ipsa Ferula, & Clavibus accedit ad alteram Sedem similem, & ejusdem lapidis; tunc reddit eidem Priori tam Ferulam, quam etiam ipsas Claves; in qua dum aliquantula mora quiescit, cingitur ab eodem Priore zona rubea de serico, in qua dependet bursa purpurea, in qua sunt xij. sigilla pretiosorum lapidum, & muscus. Qui siquidem electus in illis duabus Sedi-*

S

bus

bus sic sedere debet, ac si videatur inter duos lectulos jacere, idest, ut accumbat inter Principis Apostolorum Præmatum Petri, & Pauli Doctoris Gentium prædicationem. In zona notatur continentia castitatis; in bursa gazophylacium, quo pauperes Christi nutriantur, & vidua; in xij. Sigillis xij. Apostolorum potestas designatur: muscus includitur ad percipiendum odorem, ut ait Apostolus: Christi bonus odor sumus Deo. In qua secunda Sede dum sedet electus, recipit omnes Officiales Palatii ad pedes, & postea ad osculum; & deinde sedens ibidem recipit de manu Camerarii denarios argenteos val. x. sol. pro ves. & projicit eos super populum, & hoc facit tertio, dicendo: Disperfit dedit pauperibus, justitia ejus manet in seculum seculi. Ter factum a Bonifacio VIII. Papa in ea Sede composito argenteorum nummorum jactum, tradit Cardinalis Gajetanus Stephanesius in suo Poemate, ubi sic inter alia inquit.

*Susceptos effusa manus ter spagere nummos
Inchoat, ac fatur: Justus disperfit abunde
Pauperibusque dedit; manet hæc in secula seculi
Justitia virtus.....*

IV. Eadem plane, quæ in recitato superius loco Romani Ordinis xii. statuta & deinde fuerunt in Cæremoniali Gregorii X., Ordine Romano xiv. citatis locis, & in Colbertino Pontificali, in quibus etiam hæc leguntur: *Ei istis duabus Sedibus Papa taliter se habet, ut videatur potius jacens, quam sedere, & nulla istarum Sedium, nec etiam Stercoraria est cooperta, vel parata, sed nuda.* Quæ verba etiam extant in Pierianiano Codice, & in aliis Cæremonialibus Libris. Cur in his Sedibus sederet Pontifex, jam audivimus ex descripto paulo superius Cencii testimonio, qui etiam, & zonæ, & bursæ, & sigillorum, ac musci, quæ in ea cæremonia adhibebantur, mysticam rationem reddit. Quando primum & harum Sedium usus cœperit, non constat. De his ait Mabillonius, nihil inveniri ante xii. Seculum, quo tempore illarum fit mentio apud Cencium uno seculo ante fabulam de Papissa Joanna, idest, ante Martinum Polonium, qui primus eam fabulam vulgasse dicitur; sive potius alium Auctorem qui claruit post medium Seculum xiii. Quisquis autem ejus fabulæ primus Auctor fuerit, rectissime notat Pagius,

hallucinatos fuisse recentes Criticos, qui fabula a tribus, aut ad summum a quatuor seculis exco-gitata magnam antiquitatem tribuerunt. Ceterum ritus ille, qui ad altius insinuandam novo Pontifici humilitatem primum inductus fuerat, post receptam apud malevolos, nimiumve credulos de pseudopapissa fabulam, ita infamis evasit, ut ob hoc commentum penitus abrogaretur; quod Seculo xvi. post Leonem X. factum jam alias notavimus.

V. Teste Grasso servatus fuit hic ritus a Leone Papa X. initio Pontificatus: quo tamen omisso, lubet profecto describere hoc loco, quod de eodem ritu Burchardus tradidit in suo Cæremoniali de Electione, & Coronatione Innocentii Papæ VIII. sic enim inquit §. ccli. *Laudibus finitis, Papa ductus est ad Capellam portam S. Silvestri, juxta quam posita sunt duæ Sedes porphyreæ nuda, ad quarum primam a dextris portæ positam, Papa sedit quasi jaceret; quo sic sedente, Prior Lateranensis prædictus dedit Papa Ferulam in manu in signum reominis, & correctionis, & claves ipsius Basilicæ, & Lateranensis Palatii in significationem potestatis claudendi & aperiendi, ligandi atque solvendi.* Pergit laudatus Auctor, additque deinde §. ccli. *Pontifex, receptis, ut supra, Ferula, & Clavibus, surrexit de Sede prædicta, & accessit ad aliam a sinistris dictæ portæ positam, in qua similiter sedet, quasi jaceret. Sicque sedens, Ferulam, & claves Priori prædicto restituit; qui Prior deinde Pontifici adhuc, ut præfertur, sedenti, super Planetam junxit zonam de serico rubeo cum bursa purpurea illi appendente, in qua erant duodecim lapides pretiosi modici valoris cum duodecim sigillis, & muscho; licet antiqui Libri ponant, prædicta fieri debere per Priorem Basilicæ S. Laurentii, quæ Sancta Sanctorum dicitur; tamen quia hodie illa, & Lateranensis Basilica idem sunt, & illa nullum Priorem habet, prædicta fiunt per Priorem Lateranensem.* Sed nec omittenda, quæ statim subjicit sequenti §. ccliv. *Papa sedens, inquit, cinctus, ut præfertur, accepit de gremio D. Falconis de Sinibaldis Prototarii Thesaurarii sui tres pugillatos carlenorum, & alterius moneta argentea, quas populo projecit, dicens: Disperfit, dedit pauperibus justitia ejus manet in seculum seculi.*

§. XXV.

De deductione Pontificis ad Sancta Sanctorum, & de Presbyterio.

Ducitur deinde Pontifex ad Sancta Sanctorum, ubi supra Faldistorium sine Mitra genuflexus orat. Inde surgens cum Mitra revertitur ad Capellam S. Silvestri, in quam intrans, sedet super Sedem ibi paratam; tum deponit Mitram, Chirothecas, Pallium, Planetam, & assumit Pluviale, ac Mitram simplicem, & sedens dat Presbyterium hoc modo. Cardinalibus duos aureos, & duos grossos argenteos. Veniunt Cardinales, & profunde caput inclinant ante Pontificem, porriguntque ei Mitram apertam, in qua Pontifex immittit pecuniam. Illi, accepta pecunia, manum Pontificis osculantur; pecunias capit Pontifex e gremio Camerarii. Alii Prælati genuflectunt ante Pontificem & accipiunt unum aureum, & unum grossum, & osculantur dextrum genu Papæ. Alii vero Prælati, & Officiales (1) non parati accipiunt in manu tantundem, & osculantur pedem. Dato Presbyterio, Pontifex cum Cardinalibus ascendit ad Palatium Lateranense, & si non facit solemne convivium, deponit paramenta sua, intrat Came-

(1) Ita legitur in Romana editione anni 1560. In editione Veneta anni 1516. & Colonienfi anni 1557. ea vox, non parati, deest.

ram, quiescit, & prandet, seu coenat. Cardinales ducuntur ad Cameras sibi ordinatas, quiescunt, recreantur, & expectant Pontificem, si vult redire ad S. Petrum eadem die; sin autem revertuntur Domum.

COMMENTARIUS.

I. **P**eractis cæremoniis in duabus Sedibus porphyreticis perforatis apud Capellam S. Sylvestri, de quibus actum fuit in Commentario præcedenti, ducitur deinde Pontifex ad Sancta Sanctorum, & quidem ex antiquo ritu, cujus mentionem facit Romanus Ordo XII. Auctore Cencio, ubi ita inquit: *His peractis ducitur per ipsam porticum sub iconas Sanctorum Petri & Pauli Apostolorum, quæ per mare Romam venerunt nullo ductore, & intrat Basilicam S. Laurentii &c.* hæc enim Basilica dicta est vulgo deinde Sancta Sanctorum, uti notat Romanus Ordo XIV. auctore Jacobo Gajetano, Cap. XXI. ubi antiquum ipsum ritum his verbis recenset: *Deinde ducitur ad Sancta Sanctorum, quæ per mare venerunt, nemine ducente, & intrat dictam Basilicam S. Laurentii, quæ vulgariter dicitur Sancta Sanctorum; & ante Altare suam orationem facit, cantantibus Priore & Canonicis Basilicæ ipsius Sanctæ Sanctorum, Te Deum laudamus; & postea reducit ad Capellam S. Sylvestri &c.* Deduci Pontificem ad Sancta Sanctorum, ibique ante Altare Orationem facere, tradunt quidem Romanus Ordo XII. Cæremoniale Gregorii X. Colbertinum, Pontificale, Codex Pierfanctianus, alique Libri Cæremoniales, in quibus tamen nulla fit mentio ritus illius, quem memorat laudatus Ordo XIV. Romanus decantandi scilicet ibidem Hymnum, *Te Deum laudamus*. Porro teste Burchardo in Cæremoniali Electionis & Coronationis Innocentii VIII. §. CCLIV. non modo hic Pontifex ductus fuit ad Basilicam S. Laurentii Sancta Sanctorum appellatam, in qua coram Altari genuflexus sine Mitra oravit in Faldistorio; verum etiam finita Oratione voluit offerre super Altare, & nullus de suis Cubiculariis pecunias secum habentibus aderat, neque Thesaurarius. Additque mox mutuo se dedisse Pontifici Florenos renenses duos, & unum ducatum, quod plures secum non haberet, quos Pontifex contulit super Altare.

II. Facta Oratione in Basilica S. Laurentii dicta deinde Sancta Sanctorum, de qua peculiariter Librum penitioribus notitiis refertum non ita pridem scripsit, edditque Romæ in publicam lucem Clarissimus Joannes Marangonius jam nostri Oratorii S. Hieronymi Charitatis Presbyter; inde surgens cum Mitra, inquit nostrum Cæremoniale, revertitur ad Capellam S. Sylvestri, in quam intrans, sedet super sedem ibi paratam, tum deponit Mitram, Cbirothecas Pallium, Planetam, & assumit Pluviale, & Mitram simplicem, & sedens dat Presbyterium &c. Juxta Romanum Ordinem XII. auctore Cencio, Cap. XLVIII. Num. LXXXII. Papa postquam in memorata Basilica S. Laurentii, seu Sancta Sanctorum, peregerit prolixam ante proprium & speciale Altare Orationem, pergit ad Papalem Cameram, ubi cum sua voluntate pausaverit, vadit ad mensam. Ex præscripto autem Cæremonialis Gregorii X. Papa post factam in Basilica S. Laurentii Orationem, postea reducit ad

To. II.

Capellam S. Sylvestri, in qua intrat, & sedet in loco prapaparato, & facit Presbyterium. Tum vero subdit: *Postea redit ad Cameram, in qua deponit Casulam, & Pallium, & assumit Mantum, & vadit comedere, ut supra dictum est. Primo tamen recipit juramentum secundum formam. Ego talis &c. a Senatore.* Variat ab his non nihil Romanus Ordo XIV. citato Capite XXI. ubi Papa post decantatum Hymnum, *Te Deum laudamus*, a Priore & Canonicis Basilicæ Sanctæ Sanctorum, reducit ad Capellam S. Sylvestri, in qua intrat, & sedet in loco parato cum ornamentis suis, tenente eo Mantum super Scapulas, & Mitram super Fanonem, seu Orarium, & dat Presbyterium. Additque mox: *Postea redit ad Cameram, in qua deponit Casulam, & Pallium, & assumit Mantum, & vadit comedere.* Concludit tandem & ait: *Solebat tum primo recipere juramentum a Senatore secundum formam, Ego talis &c. Verum hujusmodi juramenti receptio diu est quod fuit omissa.*

III. Antequam ultra progrediar, gratam rem facere Lectori eenseo describere hoc juramentum, quod olim novo Pontifici Senator Urbis præstabat, quodque in ipso Cencii Ordine Romano XII. Cap. XLVIII. Num. LXXXVI. legitur hoc modo: *Ego N. Urbis Romæ Senator ab hac hora in antea fidelis ero tibi Domino meo Papæ Urbano. Non ero in facto, atque in consilio, neque in consensu, ut perdas vitam, aut membrum, aut capiaris mala captione. Consilium, quod mihi credes per te, vel per Litteras aut nuntium, me sciente, ad damnum tuum nulli pandam. Tuum certum damnum si scivero, pro posse meo illud impediam: Quod si per me impedire non potero, illud tibi significabo per meipsum, vel per literas, aut nuntium, seu talem personam, de qua pro certo credam, quod illud tibi debeat fideliter insinuare. Papatum Romanum, & Regalia Beati Petri, quæ habes, ad retinendum, & defendendum: quæ vero non habes, ad recuperandum, & recuperata ad retinendum & defendendum contra omnes homines adjutor ero secundum posse ac scire meum; nominatim autem S. Petrum, Urbem Romanam, Civitatem Leoninam, Transyberim, Insulam, Castellam Crescentii, S. Mariam Rotundam, Senatum, monetam, honores, & dignitates Urbis, Portum Ostiensem, & tenimentum Tusculani, & generaliter omnia Regalia intra Urbem, & extra. Cardinalibus, familiis tuis, & eorum venientibus ad Romanam Ecclesiam, morantibus apud eam, & recedentibus ab ea, plenam, & veram securitatem præstabo. Hæc omnia juro me observaturum bona fide; sic me Deus adjuvet, & hæc Sancta Dei Evangelia.* Hactenus Juramentum fidelitatis a Senatore Urbis fieri jam solitum novo Pontifici, etiam longe post medium Seculum XIII. uti constat ex Cærimoniali edito jussu Gregorii X. qui electus Summus Pontifex fuit anno MCLXXI. Primo tamen, inquit, recipit Papa juramentum secundum formam, Ego talis &c. a Senatore. Necessarium autem fuit per ea tempora hujus-

S 2

huiusmodi iuramentum, quia tunc scilicet summa erat Senatoris Urbis non modo potentia, sed & insolentia, de qua jam diximus Tomo III. Conciliorum, & alibi.

IV. Quod Presbyterium attinet, quod ex antiquo ritu præberi tunc a Papa solitum fuit, fuisse ac erudite agit de ea re Vir Clarissimus Petrus Morettus in suo admirando Opere, *De Presbyterio*. Occurrit ea vox passim in Ordine Romano XI. & aliis sequentibus, præsertim ubi agitur de ea novi Pontificis ad Lateranensem Basilicam Processione. Ex nostri Cæremonialis præscripto Papa ubi ad Capellam S. Silvestri redit, *sedet supra Sedem ibi paratam, tum deponit Mitram, Chirothecas, Pallium, Planetam, & assumit Pluviale, & Mitram simplicem, & sedens dat Presbyterium hoc modo. Cardinalibus duos aureos, & duos grossos argenteos. Veniunt Cardinales, & profunde caput inclinant ante Pontificem, porriguntque ei Mitram apertam, in qua Pontifex immittit pecuniam &c.* Ritus huiusce largitionis exponit præsertim Romanus Ordo XIV. Jacobi Gajetani Cap. XLV. his verbis: *Ibi, nempe in Capella S. Silvestri, depositis, Pallio, Casula, & Chirothecis, & accepto Manto ad scapulas, sedet in loco præparato, & dat cuilibet Cardinali, & Prælato Presbyterium solitum hoc modo. Ipse Papa sedet in Sede, & quilibet Cardinalis, & Prælatus, extracta sibi met Mitra, deferens eam in manu, vadit coram eo; flexis genibus tenet Mitram apertam ante Papam, qui ponit in illam pecuniam, quam dat ei in uno scypho argenteo Camerarius, & quam dicit Liber Camera, qui vocatur Polypticus, & ille, qui recipit pecuniam in Mitra, osculatur genu Domini Papæ. Idem vero Camerarius habet ante se magnam mensam coopertam tobalea, ubi sunt huiusmodi moneta, & assistunt ipsi Camerario Clericus Camera, & duo mercatores. Ipsi vero Camerarius, & Clericus Camera sint induti Superpelliceis.* Eadem legere est apud eundem Gajetanum Cap. LXXXV. ubi agit de Presbyterii largitione facta a Papa post Vesperas, & pedum lotionem, quam appellant *Mandatum*, Feria V. majoris hebdomadæ. Consueverunt quippe olim Romani Pontifices in variis temporibus Presbyterium largiri, ut passim docent Romani Ordines a Mabillonio allati Tomo II. Musei Italici, & egregie explicati ab eruditissimo Petro Moretto in citato Opere, *De Presbyterio*.

V. Porro licet olim, ut ex recitato Gajetani Romano Ordine constat, Cardinales quoque flexis genibus Presbyterium a Papa acciperent, invaluit tandem deinde usus, ut stantes profunde caput inclinent ante Pontificem, eique Mitram apertam porrigant, in quam ille pecuniam immittit, acceptaque pecunia, manum Pontificis osculentur. Ita plane statuit nostrum Cæremoniale, & hic ritus servatus quidem jam fuerat in Electione, & Coronatione Innocentii Papæ VIII. teste in suo Cæremoniali Burchardo §. CCLV. ubi ritum ipsum ita describit: *Rediit deinde Pontifex ad Capellam S. Silvestri, in qua, depositis sibi Mitra, zona, Pallio, Planeta, Anulis, & Chirothecis, recepto Pluviali, & Mitra, & Anulis reassumptis, sedit in Sede eminenti ibidem in medio Capella sibi parata, versus ad ostium illius; quo sic sedente, accesserunt singuli Cardinales, Mitras ante se in manibus portantes, & post eos eodem modo omnes Prælati parati, quibus*

singulariter coram Papa constitutis, Papa dedit Presbyterium, videlicet singulo Cardinali duos ducatos, & duos carlenos, & cuilibet Prælato unum ducatum, & unum carlenum; totidem etiam dabat cuilibet, Officialibus, & Subdiaconis, Auditoribus, Clericis Camera, Acolythis, videlicet usque ad prædictos Navales inclusive, quos prius Papa recipiebat de gremio præfati Thesaurarii sui. Cardinales, recepto Presbyterio, osculabantur manus Papæ capite inclinato stantes; Prælati vero omnes similiter genuflexi osculabantur pedem Papæ. Post Subdiaconos, inter Auditores, quia magna conculcatio fuit, accessi & ego ad Pontificem, qui mihi dedit ducatum unum, & carlenum unum Papales cunei sui.

VI. Datum quoque a Leone Papa X. Presbyterium in ipsa Capella S. Silvestri, docet in ejus Diario ms. Paris de Grassis, ubi post enarratum ritum oblationis factæ ad Altare Capellæ Salvatoris, ita deinde subjicit: *Quo facto, rediit ad Capellam S. Silvestri, ubi postquam sederet, deposuit omnia Missalia Sacramenta (puto legendum, paramenta) usque ad Stolam exclusivè, & sine Fanone induit Pluviale leve, & simplex, ac Mitram levem ex damascino, sedensque dedit omnibus Cardinalibus duos ducatos, & duos julios, quod Presbyterium vocatur, ex quibus solus Camerarius percepit in duplo, alii omnes, ut dixi, duos; Prælati, & omnes alii usque ad Præfatos Navales, unum ducatum, & unum julium. Ex laicis nemo accepit; quod fuit bene factum; nam Presbyterium ideo vocatur, quia Presbyteris, aut Presbyterorum ministris datur. Consuevisse deinde nonnullos e Cardinalibus non modo duplicatam, verum etiam triplicatam Presbyterii portionem accipere, constat ex ms. Diario Joannis Pauli Mucantii, quod inferius nos describemus. Notandus autem hoc loco Grassus, qui ait ideo non datum fuisse laicis a Leone X. Presbyterium, quod Presbyterium ideo vocatur, quia Presbyteris, aut Presbyterorum ministris datur. Sed plane labitur, cum hoc genus Presbyterii ideo potius hoc nomine appelletur, quod a summo Presbytero, idest Pontifice Maximo donetur; fuitque ritus antiquus, ut Presbyterium ipsum a Papa non modo laicis, sed & Hebræis daretur.*

VII. Juxta antiquum quidem ritum jam non modo Cardinales, & Prælati, verum etiam alii Clerici, ac laici homines, imo & Judæi experiebantur tunc liberalitatem Summi Pontificis. Tradit id quidem non uno in loco Cencius in suo Ordine XII. præsertim Cap. XLVIII. Num. LXXXII. *Clericis Romanis pro thuribulis, Judæis pro representatione Legis, Laicis Romanis pro arcu tale Presbyterium datur, & taliter, quale datur in Coronationibus aliis Domini Papæ.* Longum esset alia citati Romani Ordinis loca afferre, videri enim possunt in eodem Ordine Romano apud Mabillonium Tomo II. Musei Italici, & apud Morettum in Opere, *De Presbyterio*, ubi etiam aliorum Ordinum loca in rem ipsam recenset. Porro mos erat antiquus, ut Papæ post Coronationem solemnem pompa ad Lateranensem Basilicam procedenti, Romani triumphales arcus erigerent, Clericique cum Crucibus, vexillis, & thuribulis occurrerent, Judæi vero cum representatione Legis, ac Laudibus eidem obviam irent; & hæc erant causæ

ob

ob quas Pontifex his Presbyterium largiebatur. Audiendus iterum Cencius in recitato Romano xii. Cap. xvi. Num. xxxviii. *Sciendum, quod Domino Papæ ante turrin primo dictam Judæi occurrunt, & ei Legem suam præsentant, faciuntque Laudes; pro quibus Laudibus recipiunt a Camerario in Presbyterium viginti solidos proveſinos. Notandum præterea, quod a S. Petro usque ad Palatium Domini Papæ fiunt arcus a Romanis honorabiles in via, per quam transit; & Clerici omnes Romani occurrunt eidem induti undecumque possunt, cum thuribulo; in remunerationem cujus honoris, Romanis pro arcubus datur Presbyterium triginta quinque librarum proveſinarum, & dimidia; Clericis vero pro thuribulis triginta trium librarum proveſinarum, ut in sequentibus plenius apparebit.*

VIII. Ritus quo Clerici eum novo Pontifici honorem exhibebant, docet Cæremoniale Gregorii X. Num. xi. ubi agit de adventu Papæ Romam extra Urbem consecrati, vel electi: *Omnes, inquit, Ecclesiæ Urbis ei obviant honorifice cum Processione, & veniunt omnes Clerici induti cum Crucibus, vexillis, & thuribulario, & capsâ cum thure; & qualibet Ecclesiâ occurrit ipsi Papæ cum thuribulo, & ipsa capsâ, & idem Dominus Papæ de thure cum cochleare in thuribulo ponit, & illi Papam cum eo incensant, & faciunt ita omnes Ecclesiæ. Nihil hic de largitione, sed & pauca memorantur ex agminibus, quæ Pontificem tum excipere consuevisse, varia submouent Historicorum testimonia allata ab eruditissimo Moretto in memotato toties præclarissimo Opere, *De Presbyterio*, Parte iii. Sectione vi. Num. xii. Certe venientem Callistum II. de prostrato Burdino pseudopontifice exultantem perhonorifice excepit Roma anno mccc. tertio Nonas Junii, in occursum effusis pueris cum ramis, Judæis, ceterisque Ordinibus, quemadmodum refert Epistola Eginonis apud Baronium Tomo XII. Annalium. Talem occursum breviter descripsit, quin & actionem initæ possessionis Nicolaus Cardinalis Rossellius Aragonius in Vita laudati Callisti II. Papæ apud Clarissimum Muratorium Tomo III. Scriptorum Rerum Italicarum sic inquit: *Idem Beatissimus Pontifex, secundum antiquam consuetudinem, solemniter est receptus, Romæ scilicet, & in Beati Petri Cathedra solemniter positus, atque Lateranense Palatium per mediam Civitatem, preparatis arcubus de more in ipsa via, cum gaudio magno deductus.**

IX. Pleniori sermone ab eodem Scriptore Nicolao Cardinali Aragonio narrantur occurſus, plaususque facti Pontifici Eugenio III. ubi Romam pervenit: *Occurrit ei, inquit, maxima, & frequens populi multitudo cum ramis . . . & ad ejus vestigia continuo corruentes, post pedum oscula elevabantur ad oris oscula; præcedebant signiferi cum bannis, (al. bandis); sequebantur Scriniarii, & Judices; Judæi quoque non decrant tantæ letitiæ, portantes in humeris suis Legem Mosaicam. Universus etiam Romanus Clerus psallebat in unum, dicens: Benedictus, qui venit in Nomine Domini. Sic itaque cum magno populorum gaudio, & clamore idem Pontifex in Palatium conscendere meruit. Hactenus ille edoctus a vetustiorum chartarum lectione, forte etiam Vaticani Codicis, e quo Eugenio ipsi Pontifici milites, Judæos, & Clericos obviam pro-*

cessisse, colligit memoratus Baronius ad annum Christi mccc. Tandem, ut alios omittam, quos idem Morettus citato loco recenset, Romam accedenti Alexandro III. *exiverunt obviam in longum spatium Clerus Romanus cum vexillis, & Crucibus, quod nulli Romanorum Pontificum recolitur factum, uti ajunt ejusdem Alexandri Papæ III. Acta apud eundem Baronium. Neque vero solus Clerus Alexandro occurrit, verum etiam, ut tradit laudatus Cardinalis Aragonius, Senatores, & Magistratus populi cum concrepantibus tubis, Nobiles cum militia in apparatu decoro, & pedestris popularitas cum ramis olivarum, Laudes Pontificis consuetas vociferarunt.*

X. Vere autem & tunc qui occurrebant, liberalitatem Pontificum, ut in die primæ Coronationis, sentiebant; quamquam non illa suam omnem promebat amplitudinem, ut scite notat Morettus ibidem, Num. xiii. probatque ex hoc celebri Cencii testimonio, qui in Romano Ordine xii. Cap. xlviii. Num. lxxxv. ita scribit: *Sciendum, quod Presbyterium Scholarum non ita datur, sicuti si fuerit Papa consecratus in Urbe; de Presbyterio enim eorum tunc medietas refecatur, exceptis Judæis, & Clericis Urbis, & Addextratoribus. Præterea Senatores Urbis Dominum Papam debent addextrare, si venerit consecratus, si non, a porta Civitatis usque ad locum, ubi fuerit descensus, si deſcenderit ad Ecclesiam Lateranensem, si ad Ecclesiam B. Petri; in remunerationem cujus servitii x. sol. pro equo debent habere; verumtamen Schola Addextratorum debet habere xx. sol. Verbum addextrare, unde Addextratores veniunt, idem est, ac a lateribus stare incedentium maxime Principum vectorum equis, quos dextrarios, magnosque vocant litteræ Anglorum Regis Eduardi III. Plura de ea voce videri possunt apud Dufresnium in suo mediæ & infimæ Latinitatis Glossario. Sane quotquot aliquando Pontificem incedentem equitantemque comitarentur, addextratores dici potuisse, notavit Morettus, *De Presbyterio* Parte iii. Sectione iii. pag. 220. in Nota, ubi & alia scitu digna curiosus Lector inveniet.*

XI. Quamquam vero una cum aliis ritibus Presbyterii largitio in Processione Lateranensis Basilicæ observata fuerit ab Innocentio Papa VIII. ut ex citato superius testimonio Burchardi liquet, itemque a Leone Papa X. ut docet in ejus Diario Paris de Grassis, ac deinde etiam a Paulo III. sed ubi is vero coronatus fuit apud Basilicam Vaticanam: multum tamen postea, sub Pontificibus ipsi Paulo III. & Clementi VIII. intermediis variatum est, omiſſa maxime non semel Presbyterii largitione; uti addiscere licet ex ms. Diario Joannis Pauli Mucantii Apostolici Cæremoniarii, præcipue ubi pompam ejus largitionis describit datæ a Clemente VIII. cum possessionem iniret: *Usus iste, inquit Mucantius, dandi Presbyterium jam in dissuetudinem abierat, sicut & alia multa, quæ in hoc possessionis actu fiebant, ut ex Lectione Libri Cæremonialis advertere unicuique licebit. Reverendissimus D. Cardinalis Gesualdus Sacri Collegii Decanus tanquam Sacra Congregationis Rituum Præfectus hunc in pristinum restitui curavit, ne bonæ & laudabiles Cæremoniæ, cujusmodi hæc est, omnino perirent, & ut hæc renovaretur, jam inde a creatione Gregorii XIV. & Innocentii IX. fel.*

fel. record. Pontificum procuraverat. Sed, quia prænotati Pontifices statim post Coronationem ad Lateranum equitaverunt, non superfuit tempus statim ad numismata cudenda, prout nunc factum fuit, cum ultra duorum mensium spatium a Coronatione Sanctissimus Dominus noster Clemens VIII. ad hunc possessionis actum interfuerit. Quare hæc omnia Reverendissimo Cardinali Gesualdo debemus, qui propterea maxime laudandus est, tamquam hujus antiquæ cæremoniæ, & laudabilis consuetudinis restitutor. Atque hic adnotare lubet, quod & ante observavit Doctissimus Morettus, De Presbyterio, Parte III. Sectione VII. Num. VII. per intermedia tempora fuisse jam multa abolita ex præscriptis in Cæremoniali, qualia sunt occurfus Judæorum, ac Processio Pontificis cum sacris habitibus, jactus pecuniæ per viam, convivium solemne, & alia olim servata.

XII. Tunc plane, ut sequenti Numero IX. idem Auctor subjicit, in reliquis universæ actionis partibus novi plures paulatim non dubie inventi mores. Sed qua methodo Presbyterii cum affinis Cæremoniis ab instauratore Clemente VIII. celebrata sit, idem refert Mucantius. Ait ergo, descriptis equitationis pompa, gestis circa Ecclesiam Lateranensem a Capitulo cum Archipresbytero, de cujus quoque oratione loquitur, recitata, cum claves juxta Cæremoniale presentaret, & nonnullis intra Ecclesiam actis, præsertim præstita obedientia per Cardinales, quod, ea tunc finita, Pontifex ad Altare, majus nempe, accessit, eoque, deposita Mitra, in medio osculato, super illud aurea scuta L. obtulit, quæ inclusa in rubra crumena sericea R. P. D. Bartholomæus Casus suæ Sanctitatis Generalis Thesaurarius Pontifici ministravit. Notat inde, Papam ex Altari solemnem benedictionem populo impertivisse, ac deinde subdit: *Data Benedictione, præcedente Cruce, & Cardinalibus, rediit Pontifex versus Altare Sanctissimi Sacramenti, ante quod, deposita Mitra, genuflectit, sed non oravit. . . . Facta genuflectione, ascendit iterum Sellam gestatoriam, & loco Mitra Thiaram, seu Regnum, accepit, licet secundum institutionem debuisset cum Mitra ire usque ad Salam. Sed ita melius fuit, & convenientius, ut Pontifex cum Thiara duceretur ad Aulam prædictam, & cum Thiara, seu Regno, daret Cardinalibus Presbyterium.* Addit mox quædam de accessu ad Aulam, de collocatione Papæ super Sedem eminentem, de Cardinalibus quasi circum hinc inde facientibus, ac de laudibus cantatis per antiquiorem Presbyterum Cardinalem, quæ omnia consentanea plane antiquis sunt ritibus a nobis supra explicatis.

XIII. His ergo omisissis, quod Presbyterium spectat, de quo in præsentī agimus, hæc habet idem Mucantius: *Laudibus expletis, Pontifex singulis Cardinalibus dedit Presbyterium; hoc est, duo numismata, alterum aureum, alterum argenteum, quæ Sanctitatis suæ Thesaurarius Reverendissimo D. Cardinali Sfortia, Diacono assistenti a dextris porrigebat, & ipse Pontifici, qui illa in vacuum Mitra singulorum Cardinalium accedentium ponebat, prout fit in distributione Agnorum Dei.* Decanus vero portionem duplicatam accepit, idest, duo numismata aurea, & duo argentea, sicut & alii Cardinales Officiales, ut solet fieri in distributione cande-

larum, palmarum, & Agnorum Dei. Quam duplicatam portionem accepit etiam Reverendissimus Ascanius Columna, quem ob orationem factam, dum Pontifici claves Ecclesiæ tradidit, ut supra dixi, tamquam celebrantem tractare voluit, sicut expresse dixit, dum ei numismata tradidit. Reverendissimus Dominus Cardinalis Montaltus triplicatam portionem accepit, tamquam Vicecancellarius, & Summistæ, quam & triplicatam prætendebat Reverendissimus Rusticucci, sed non habuit, nisi duplicatam. Numismata autem prædicta erant in duabus crumenis, quas tenebat Thesaurarius prædictus; sed decentius fuisset, si in bacili argenteo locata essent, & Thesaurarius genuflectus ante Pontificem illa sustinisset, & Diaconus Cardinalis a dextris ad manus Pontificis porrexisset, & Pontifex Cardinalibus; licet in Libro Cæremonialis dicatur, quod Papa de gremio Camerarii pecunias accipiat, & distribuat &c. Sed Thesaurarius ad cautelam, ne facile possent sibi numismata subripi, illa in crumenis conservabat, & opportune distribuebat. Fuit autem hoc Presbyterium datum solis Cardinalibus, quamvis post Cardinales non solum Episcopis, sed etiam ceteris Officialibus dandum fuisset, ut in eodem Cæremoniali dicitur. Pontifex vero quandiu (melius, quia diu) fatigaverat, noluit amplius continuare. Ordinavit autem, ut Episcopis Presbyterium prædictum daretur per Thesaurarium, prout factum esse credo. An vero aliis Officialibus datum sit, ignoro. Hæc Mucantius in citatis Diariis a pagina 149. ad paginam 153. Tomo II. seu Tomo XVII. Diariorum, quæ occulit Archivum Secretum Vaticanum, sub die XII. Aprilis, quæ possessionem cepit Clemens VIII. electus Pontifex III. Kalendas Februarii anno MDXCII.

XIV. Post Clementem Papam VIII. servatum fuisse religiosissime ab ejus Successoribus Presbyterium dandi ritum in possessione Basilicæ Lateranensis, testes habemus seculi præcedentis Scriptores. Tres erunt ceterorum specimen, quorum primus sit Paulus Alaleo Cæremoniarius Pontificius, qui in ms. Diario, quod servatur in Archivo secreto Vaticano, captam possessionem describens die XIX. Decembris anni MDCXXIII. ab Urbano VIII. in Papam jam pridem Electo, & Coronato, ita inquit: *Reliquit, data Benedictione, supra Altare unam bursam sericeam rubram, intusque erant quinquaginta dupla aurea in totum c. aur. &, recepta Mitra, accepit Regnum tunc, quia pro commoditate Papæ non fuerunt cantata laudes in Aula magna, & data medalia, prout tempore fel. record. Pauli V. sed Papa fecit medalias* (Presbyterii, ut notat Morettus) *dare Illustrissimis Dominis Cardinalibus hodie mane, & sic ante operam factam solvit per manus Domini Thesaurarii Generalis juxta distributionem, quæ fit in distributione palmarum, & candelarum pro Cardinalibus, qui habent officium, & etiam fecit illas dare Dominis Canonicis Basilicæ Lateranensis argenteas tantum pro sua liberalitate, quia tempore fel. record. Pauli V. fuerunt data tantum Illustrissimis Dominis Cardinalibus per manus suas, & Oratoribus de Solio per manus Thesaurarii. Oratores non habuerunt medalias sicut tempore fel. record. Pauli V. Ita Alaleo, ex quo addiscimus ritum servatum non modo tempore Urbani Papæ VIII. sed etiam Pauli V.*

XV. Ri-

XV. Ritum ipsum ut servavit Alexander VII. ubi amplissima pompa, & solemnī processione die 1x. Maji anni MDCLV. cepit possessionem ejusdem Basilicæ Lateranensis, tradit Carolus Valesius in Libello Pontifici ipsi oblato, ubi inter alia ita scribit: *Ante principem Aram gestatus Alexander, preces Deo fudit, & in Solio . . . considens purpuratos Patres solemnī ritu demissa obsequia deferentes excepit; tum ad Aram, qua inclusa est lignea Ara, in qua D. Petrus Sacra peragere consueverat . . . accedens, mediæque impresso sacro osculo, marsupium ab Aerarii Prasæcto porrectum nitentibus refertum aureis Chisio stemmate pretiosissimis, illi imposuit, demissique in æternum Numen obsequii æternum pignus & monumentum dimisit . . . Cardinales, in Aula scilicet Palatii post Laudes Papæ cantatas, dimissa ex augustis capitibus Mitra, singuli ordine suo, flexis (quod tamen fortasse verum non est, genibus, in ea aureum, argenteumque majoris formæ numismata Alexandri effigie, & stemmatibus nitentia, quæ vocantur Presbyteria, in amoris pignus, & præmium obsequii, in gestæ rei monumentum, ex amantissima, & liberali manu Alexandri acceperunt. Tum vero paulo post ita subjicit: Restitutis Religiosi agminis Ordinibus ex Aula Pontificia ad Lateranensis Basilicæ superiorem porticum, pompa ducta est, atque e sublimi a Cardinalibus, & Prasæcto Aerarii argenteus imber in confertissimam populi multitudinem . . . effusus est, Alexandro VII. adjungimus Alexandrum VIII. de quo eruditissimus Ciampinus in Libro, *De Abreviatoribus*, pag. 104. ita ad rem nostram scribit: In porticu, Basilicæ nempe Lateranensis, solita scamna pro Eminentissimis Cardinalibus, & Solium pro Pontifice parata erant, in quibus iidem confederunt; & Pontifex, Lateranensi Capitulo ad pedis osculum admissus, deinde Eminentissimis Cardinalibus solitum Presbyterium distribuit.*

XVI. Labentis Seculi xviii. usum testatur doctissimus ipse Morettus in sua citata toties Lucubratione, *De Presbyterio*, Parte III. Sectione VIII. Num. XII. ubi cursim exponit proxim novissimam integræ solemnitis possessionem, re deducta ex iis, quæ vel oculis excepit suis, vel in divulgatis authenticis descriptionibus, & ineditis Codicibus Magistrorum Cæremoniarum Sanctæ Sedis, Candidi Cassinæ, & Placidi Ghezzi gesta legit sub Clemente XI. Innocentio XIII. ac Benedicto XIII. Ergo nunc, postquam distinctis diebus Papæ electus, adoratusque publice a Sacro Senatu, & consecratus, si forte consecrandus sit, coronatusque est ad S. Petrum, dies ex ejus placito indicitur agendæ solemnī equitationi ad Lateranum. Ut illa advenit, hora præstituta, cunctorum Ordinum, qui procedere tenentur, populique accurrere volentis commoditati opportuna, inchoatur equitatio a Palatio Vaticano, nisi aliud placuerit Pontifici, ut sane Benedicto XIII. placuit, cui propter nimios diei xxiv. Septembris anni MDCCXIV. calores, qua possessionem iniiit, melius visum, dedisse celebritati exordium a Palatio Quirinali. Ordines Romanæ Curia, & Laici Senatum, populumque repræsentantes, Papam aut albo insidentem equo, quod factum per Clementem XI. die x. Aprilis anni MDCCI. & Benedictum XIII. mox memoratum, aut Sella; Lesticave delatum, quod factum per Innocentium XIII. die xvi. No-

vembris anni MDCCXXI. præcedunt, subsequuntur, comitanturque ea ratione, quam explicatam quivis intueri poterit in Epistola LXXX. Jani Nicii Erithræi, Tomo I. Epistolarum, ubi gesta in possessione capta per Innocentium X. die xxiii. Novembris anni MDCXLIV. eleganter minutimque describit, & in laudati Caroli Valesii Opusculo legitur a pagina 68. ad 76.

XVII. Qua transit pompa (transit autem per Burgum novum appellatum, pontem S. Angeli, viam Parionis, Forum Pasquilli, Maximorum, ac Cæsarinarum Palatia, Domum Professorum Societatis Jesu, Capitolium, Arcus Septimii, & Titi, latus Colossæi, Titulumque S. Clementis) Domus, Palatia, Tempia, rudera antiquitatis, arbores, incultique muri circumpositis stromatis, viridantibus foliis, auricalcho in bractæas redacto, aliisque ornamentis, quorum aliqua Romanæ plebis, atque etiam Hebræorum expensis aptantur, peramenum ingerunt spectaculum. Cum Pontifex superavit elegantissime circumvestiti Capitolii verticem, quem aliquando Romanus Magistratus illustriorem reddit, Arcu excitato veterum magnificentiam æmulante, subsistit ad gradus Palatii principis ob occursum Senatoris, qui verbis, factisque claves enim porrigit Domino, Quirinæ gentis lætitiā, jugemque obedientiam proficitur, polliceturque. Quod ut recenti exemplo ostendam, ubi Benedictum XIII. ad Lateranum solemnē possessionis capiendæ gratia procedentem, teste in ejus Vita Alexandro Borgia Archiepiscopo Firmano, Num. xxx. Marius Marchio Frangipani in Capitolio excepit, his verbis gratulatus est: *Vetustos Capitolii triumphos instauras, & refers, Beatissime Pater; hic olim Senatus, Populusque Romanus lati excipiebant cives suos in patriam reduces, bellica virtute conspicuos; hic modo Senatus, Populusque Romanus Te præclarissimo civium suorum sanguine genitum venerabundi excipiunt, ad patriam veluti reducem, eximiis virtutibus, & dignitate omnium maxima ornatum. Tibi itaque, Sanctissime Pater, Civi, Principi, Pastori que suo omnia venerationis, obsequii, fidelitatis argumenta pollicentur, & offerunt.* Deceverat Senatus, Populusque Romanus triumphalem Arcum optimo Civi, Principi, ac Parenti, quem statuere consuevit Summis Pontificibus Romano sanguine progenitis, erigere, sed Benedictus XIII. mira humilitate, ac modestia hos honores inhibuit.

XVIII. Pone hortos Farnesios sub Arcu impensis extrui solito Ducis Parmæ ac Placentiæ hortorum possessoris non uno titulo Romæ obstricti, est enim Romanæ Ecclesiæ Feudatarius, procedit Pontifex, procedensque faciles præbet aures Ablegato ejusdem Ducis in Urbe degenti perpaucis subjectionem Heri sui rememoranti, adprecantique prospera, diuturnamque dominationem. Laudato Benedicto XIII. Franciscus Farnesius Parmæ, & Placentiæ Dux ad Palatinos hortos suos triumphalem Arcum erexit hoc titulo.

BENEDICTO XIII. PONT. MAX.

Heroum, Pontificum, Divorum,

Virtute, Sacerdotio, pietate,

Nepoti, Successori, Hæredi,

Christiani Orbis Principi,

Parentique Optimo

Franciscus Farn. Parmæ & Plac. Dux &c.

Le-

Legebatur autem & in ipso Arcu hæc inscriptio, quæ & in figuris ejus Arcus legitur, & in Diariis Cracassianis, & apud memoratum Borgiam loco citato.

*Ad supremam Petri Cathedram
Triumphantis, militantisque Ecclesiæ votis
Jam diu evocatum*

*Sacras cum Ecclesiarum omnium Matre,
Cælo, Terraque plaudentibus
Feliciter nuptias adeuntem*

BENEDICTUM XIII.

*Læticia, ac veneratione prosequitur
Farciscus Farnesius Dux,*

XIX. Ubi novus Pontifex inter lætas, ac faustas acclamantes populi voces ad Lateranum pervenit, occurrentem sibi reperit Clerum Lateranensem cum Archipresbytero, qui tamen illico retrocedunt, præstolanturque in propyleo Basilicæ descendentem ex equo, sellave Pontificem. Ut descendit, genuflectit, osculaturque Jesu Christi crucifixi imaginem ab Archipresbytero oblatam; dein surgit, paratoque Solio sedet, induitur sacris albis pretiosis vestibus, aureaque redimitur Mitra, & Cardinalem ipsum Archipresbyterum audit Urbi, atque Orbi gratulantem de assumptione sua, dum binas ei Claves porrigit, auream unam, alteram argenteam, in aureo scypho per Vicarium dicti Archipresbyteri, aut eo absente, per antiquiorem Canonicum delatas. Alloquutione finita, admissoque Cardinale oratore ad osculum pedis, manusque, atque amplexum, admissis etiam Canonicis, aliisque de Clero ad pedis osculum, mandatoque facto Thesaurario, ut singulis Canonicis numisma unum argenteum concedat, descendit e Solio, cum Cardinalibus, ac ceteris Patribus, qui interea ad scamna ibi disposita confederant, & sacra assumerant indumenta, aliisque qui steterant, Basilicam tanquam Sponsam Viro suo ornatam ingressurus. Ingressus ad ostium ab eodem Archipresbytero accipit aspersorium, quo se, & circumstantes aspergit, terque thurificatur. Ascendit postmodum gestatoriam Sellam, proceditque sub Baldachino, quod sustinent Ecclesiæ Canonici, præeunte Papali Cruce delata per juniorem Rotæ Romanæ Auditorem Subdiaconum Apostolicum Tunica fericea amictum, mediumque inter duos Signaturæ votantes Acolythos Pontificios candelabra gestantes, & concinentibus Hymnum, *Te Deum laudamus*, Palatinis Psaltribus. Ad adorandum primo devehitur Augustissimum Eucharistiæ Sacramentum, inde ad veneranda Petri & Pauli Capita, demum ad orandum inter Aram maximam. Quæ ut agat, de Sella semper descendit, quam prorsus dimittit perrecturus ad Solium, sub abside erectum.

XX. Solio affidens strepentes inter acclamationes, precationesque, seu *Laudes* a Priore Presbyterorum Cardinalium Planetam induto, cum Auditoribus Rotæ, & Advocatis Consistorianis, omnibus Pluviali circumvestitis, elata voce cantatas, singulis solisque Cardinalibus Presbyterium distribuit. Quod ita conficitur, Thesaurarius Generalis Cappa indutus manet a dextris Solii in ejusdem plano flexis genibus, tenetque ante se, sive manu sinistra sustinet reclusa marsupia duo, seu potius unum duplicis sectionis, quarum altera aurea continet, altera argentea numismata, singula papyraceo invo-

lucro obducta, quæ ipse ordinate proferat, porrigatque proximiori assistenti Diacono Cardinali, qui eadem tradit Pontifici Cardinalibus accessuris dispensaturo. Accedunt Cardinales, & prorsus more modoque, quo ad obedientiam, ut ajunt, accedere consueverunt, manum Pontificis aurifrisio Pluvialis testam osculantur, vacuum Mitræ præsentant, in eam projicit Pontifex numisma unum aureum valoris quinque circiter ducatorum auri de Camera, & unum argenteum pondus quinque juliorum non excedens, manum illi osculantur, redeuntque ad sedilia Chori, stantesque expectant actionis finem. Ea autem expleta, secedit Thesaurarius, cujus curæ permittitur, ut horum numismatum participes fiant quotquot ex Ordinibus Curia, aliisque descripti sunt in Catalogis Cameræ Apostolicæ, veluti dignatione tali honorandi. Pontifex vero se confert ad Aram maximam, populoque illinc solemniter benedicto, deponit super mensam pretiosam crumenam cum oblatione centumquinquaginta scutorum monetæ argenteæ recens cusæ sibi per laudatum Aerarii Præfectum traditam, Regno coronatur, parilique paulo ante notatæ pompa defertur ad superiorem porticum ubi populo subjacentem aream oppleti, lætisque vocibus acclamanti Benedictionem impertit. Quo facto, pergit ad thalamum paramentorum, exutusque sacris vestibus, grates agit Cardinalibus, & minus solemniter, vel ad Vaticanum, vel ad Quirinale domicilium revertitur.

XXI. Porro nequid omittam de hac sacra actione possessionis Basilicæ Lateranensis, quam novi Pontifices inire ex antiquo ritu solent post Coronationem in Basilica Vaticana peractam, ornatur tunc quammaxime Lateranensis ipsa Basilica una cum variis inscriptionibus tam foris, quam intus in laudem novi Pontificis solemnem possessionem capientis. Ut alia exempla omittam, pro Benedicto XIII. præ foribus Basilicæ hæc legebantur inscripta, teste in ejus Vita laudato superius Alexandro Borgia Firmano Archiepiscopo.

*Occurre Sponso, gratulare Principi,
Excipe Patrem, venerare Pontificem*
BENEDICTUM XIII.

*Primogenita Christi, Domina Gentium
Omnium Mater, & Caput Ecclesiarum
Lateranensis Ecclesia.*

*Reclode hos postes aneos, illosque repera,
Qui plausibus exultantium respirantibus
Inclitum roboent, quo decorantur.*

Nomen Cælestini III.

*Ut sacros Atavi hic quiescentes cineres
Virtutum omnium triumphans comitatu
Et fauste nunc feliciterque ingrediens
Exbiletet Pronepos.*

Intus vero,

*Ingrederere Sanctam Hierusalem novam
O Doctor Optime, Maxime Principum,
Tot tantisque meritis ipsis a cunis.*

Sanctissime Pontifex

BENEDICTE

*Id omnium una vox & singulorum omnis
Plurimis & ex innumeris firmat argumentis.
Sed Populi sileant, mirentur Principes.*

Et sacri tantum resonent concentus

Ne sublimis, & constans tua

Humanis, quas semper respuit, laudibus

Tri.

Tristetur Humilitas.

*Hac Te nam docuit Avitos fugere,
Sed ut celsissimo, licet invitum
Muneraret Principatu.*

*Ad Aram vero maximam hæc habebantur.
Ascende primum Majestatis Solium
Summos & plures quod adhuc Pontifices
Gemino tibi sanguine cognatos redolet Parentum,
Utrisque dignus, ac non impar Avis,
Quos inter satis Felix, & Gregorius.
Sanctorum, & Magni celebres insignibus
Apostolorum Petri, ac Pauli Capita,
Et Christum Pacis hic largitorem
Pari quo Proavus tuus
Nicolaus III.*

*Cultu supplex adora,
Ut Pacem Tibi, Sponsaque servet Tua.
Quam in Te uno, plurimosque in annos
Mire dum datas es proximiori*

Et experimur, & deprecamur omnes.

De ipso Benedicto XIII. ubi se se mihi præbet occasio, libenter loquor, quod eum noverim Pontificem numeris omnibus absolutum, Ecclesiasticæ disciplinæ tenacem custodem, atque antiquorum sacrorum rituum servatorem.

XXII. Tandem, ut ad nostrum §. redeam, dato, inquit, Presbyterio, Pontifex cum Cardinalibus ascendit ad Palatium Lateranense, & si non fuit solemne convivium, deponit paramenta sua, intrat Cameram, quiescit, & prandet, seu cœnat. Cardinales ducuntur ad Cameras sibi ordinatas, quiescunt, & recreantur, & expectant Pontificem, si vult redire ad S. Petrum eodem die; sin autem revertantur Domum. Est & hic antiquus ritus, ut Presbyterii nempe largitionem & alia largitio exciperet, videlicet solemne convivium, testemque habemus ejus ritus Romanum Ordinem XIV. Auctore Jacobo Gajetano, Capite XLV. cui etiam concinit Colbertinum Pontificale, ubi ita inquit: Dato Presbyterio, idem Dominus Papa a duobus Cardinalibus Diaconibus ducitur ad mensam solemner paratam, & sedet ibi, Episcopo Cardinale sibi dante aquam, duobus Diaconibus tobaleam tenentibus; & eo loto, factaque benedictione mensæ, vadunt omnes sedere. Sedet autem Papa in una Sede eminenti solus, diversis, & magnis vasis aureis, & argenteis super mensam positis. In alia vero mensa, quæ est ad dextram, sedent Episcopi, & post eos Presbyteri Cardinales; in parte sinistra Diaconi Cardinales; & post mensas Cardinalium erunt mensæ omnium Prælatorum, & aliorum Nobilium. Et attende, quod Papa stabit, dum comedit, indutus, & calceatus, ut dictum est, cum Mitra. Cardinales vero omnes habebunt Superpellicea cum Camiseis, & Mantellis, & Mitris albis simplicibus, & ita comedent; & omnes Prælati similiter. Coram Papa servient laici majores natu, & Nobiliores qui præsentem erunt. Comestione sumpta, Papa lavabit manus ut prius; & quilibet Cardinalis similiter sedendo lavabit se, serviente fundente aquam Cardinali lavanti. Cardinales autem, qui assistunt, teneant tobaleam, unus ex sua parte lavantis, alter ex altera, & sic sibi invicem mutuo serviant. Quibus omnibus lotis, & redditis gratiis, Papa reducitur a duobus Cardinalibus ad Cameram, ubi sacris exutus vestibus quiescit. Cardinales vero, & alii Prælati redeunt ad hospitia sua equites cum Mitris parati, sicut in To. I.

comestione steterunt. Hucusque Gajetanus in citato Romano Ordine XIV. apud Mabillonium Tomo II. Musei Italici.

XXIII. Morem esse antiquum, & quidem longe vetustiore Gajetani ætate, ut Papa post Consecrationem peractam in Basilica Vaticana, uti suo loco diximus, pergens ad Lateranum, ibidem lauto parato convivio cibum sumeret, ac Presbyterio non modo sacros homines, sed & laicos quoque donaret, præter jam adducta superius, docet nos Anastasius in Vita Valentini Papæ electi anno DCCCXXVII. sic inquit: Ejus Consecrationis die sereno jam illucescente cum lumine jam dictum Antistitem ad Beati Petri Apostolorum Principis Ecclesiam omnes pariter Romani a Palatio deducunt, Lateranensem scilicet, eum Majestate divina auxiliante, in alto Throno Summum consecravere Pontificem, qui mox almificæ Sedis culmina scandens Beati Petri Apostoli & celestis Regni Clavigeri, Divinis Deo Laudibus, & Sacrificiis pie oblati, amplo & magnifico Romanorum cœtu ad Palatium, nempe Lateranensem, cum ingenti gaudio remeavit, atque lautissimis dapibus sumtis, multis, & diversis munerum donis sacram plebem, & Senatum, populumque Romanum optime ditavit. Tunc ergo, ut in ejusdem Valentini Papæ Vita notat Pagius Num. III. post relatum hunc Anastasii locum, hi erant Consecrationis ritus, nempe, ipsa novi Pontificis Consecratio ad Sanctum Petrum, impositio ejusdem in Sedem S. Petri, oblatio Sacrificii per novum Pontificem, Convivium, munera in sacram plebem, & Senatum, ac populum erogata, quæ Presbyteria vulgari nomine appellabant. Addit & huic possent aliorum Pontificum exempla, quæ ritus hosce magis magisque confirmant, sed sat erit hoc loco describere quod de Innocentio III. electo anno MXXCVIII. scribit apud eundem Pagium in illius Vita Auctor Anonymus, sic dicens: Processit solemniter coronatus per Urbem a Basilica S. Petri usque ad Lateranensem Palatium, comitantibus Præfecto, & Senatore, cum Magistratibus, & Nobilibus Urbis. Populus autem cum Psalmis, & floribus, cum Hymnis & Canticis obviam illi catervatim venerunt, factaque Laude tam infra Ecclesiam S. Petri, quam ante Lateranensem Palatium, postquam ascendit in Domum majorem, quæ Leonina vocatur, Presbyterio per Ordinem distributo, solemne convivium celebravit. Atque hæc iis simillima plane sunt, quæ de quibusdam Romanis Pontificibus in illorum Vitis Pagius refert, ubi eorundem inaugurationis, Coronationis, atque possessionis pompam enarrat.

XXIV. Sed, ut quod hæcenus diximus, recentiorum temporum exemplis comprobemus, teste Auctore Commentariorum Pii Papæ II. Libro II. peractis solemnibus ejus Processionis, regale convivium apparuit, non Cardinalibus tantum, sed omnibus Legatis Principum, & qui aderant, Proceribus Urbis, & Optimatibus. De Innocentio Papa VIII. ita scribit Burchardus §. CCLVI. Dato Presbyterio Papa sic paratus ascendit ad Palatium Lateranense ad Cameram sibi paratam, ubi quiescit aliquantulum, & fecit prandium solus cum suis Domesticis. Tum postquam dixit §. CCLVII. quod Cardinales fuerunt ad Cameras in Canonica, & alibi pro eis paratas, & similiter fecerunt prandium, ita demum subjicit

T

se.

sequenti §. cclviii. *Pro Romanis, & Officialibus Curie parata fuerunt multa mensa, & cibaria in abundantia in Palatio Lateranensi in inferiore illius parte, ubi omnes cum magna confusione pransi sunt; ego remansi in prandio in Camera Reverendissimi Domini Cardinalis S. Marci. De Leone X. scribit in ejus Diario ms. Paris de Grassis hunc in modum: Denique, post datum scilicet Presbyterium, de quo supra dictum est, ascendit ad Palatium, scilicet Lateranense, ubi in Aula Paramenti deposuit paramenta more solito; & prandio parato, pransus est simpliciter absque cæremoniis. Cardinales forte decem in alia mensa comederunt, cum tamen in copia exuberanti prandium pro omnibus factum fuisset. Intermissam consuetudinem instruendi hujusmodi convivii restauratam fuisse a Paulo Papa IV. tradit inter alios in Notis ad Ciaconium eruditus Viçtorellus in Vita hujus Pontificis: Die Coronationis, intermissa consuetudine revocata, nobile convivium Paulus extrui jussit.*

XXV. Cum iterum de Convivio Pontificis cum Cardinalibus, & Prælati dicendum sit mox in sequenti Titulo, omittis hic aliis, quæ eam in rem dici plenius possent, notanda sunt demum ea nostri Cæremonialis verba, ex quorum præscripto Cardinales postquam quieverint, recrea-

tique fuerint, expectant Pontificem, si vult redire ad S. Petrum; sin autem revertuntur Domo. Sane ne a memoratis Pontificibus recedamus, de Pio II. citato loco refertur, quod eadem nocte in suas Ædes ad Vaticanum rediit. Teste Burchardo §. cclix. Innocentius Papa VIII. eadem die circa horam vigesimam indutus Amictu, Alba, Cingulo, Stola, alba pretiosa, Capellum habens ex veluto cremesino, præcedentibus Cruce, & Cardinalibus, equester rediit ad Palatium Apostolicum apud Sanctum Petrum eo ordine quo fel. rec. Sixtus Papa Quartus in hujusmodi habitu equitare solebat. De Leone X. tandem scriptum reliquit in ms. Diario memoratus Grassus, quod facto prandio, quia hora tarda erat, Papa reversus est ad Palatium per eandem viam, nisi quod a Domo de Maximis divertit ad Campum Floræ, ubi quasi non inchoavit, & tunc per vias omnes luminaria accensa sunt, & perveniens ad pontem licentiavit Cardinales, & ipse in Castro S. Angeli remansit, & pernoctavit, Porro de Paulo IV. jam dictum est, eum minime processisse ad Lateranum, sed peractam pompam stetisse apud S. Petrum, ubi coronatus fuit, ibidemque & pecuniæ jactus habendos per viam, & Presbyterii traditionem, & convivium ipsum completa fuisse.

DE CONVIVIO SOLEMNI PONTIFICIS CUM CARDINALIBUS, ET PRÆLATIS.

TITULUS III.

§. I.

Sed quoniam Majores nostri consueverunt in die Coronationis, & Feria Quinta in Cœna Domini solemne convivium celebrare iisdem ferme cæremoniis, aliquid etiam de solemni Papali convivio hoc loco dicemus; maxime cum etiam nostra ætate factum sit à Pio Secundo, & Paulo item Secundo Summis Pontificibus.

COMMENTARIUS.

I. **F**ieri consuevisse a novo Pontifice solemne convivium, & quidem post suam ipsius Coronationem, non modo Cardinalibus, sed & Oratoribus Principum, atque Optimalibus Urbis, docent nos inter alia jam superius adducta, Pii II. & Pauli II. exempla, de quibus mentio fit in hoc Titulo. Certe peractis cæremoniis captæ possessionis Basilicæ Lateranensis ab ipso Pio II. anno MCDLVIII. regale convivium apparuit, non Cardinalibus tantum, sed omnibus Legatis Principum, & qui aderant, Proceribus Urbis, & Optimatibus. De splendidis, magnificisque conviviis Pauli II. fuse agit nuperus Auctor Vindiciarum, quas memorati Papæ Vitæ ex Codice Angelicæ Bibliothecæ deductæ præmisit, Cap. IV. & VI. ubi etiam addit, solitum illum fuisse in anni decursu aliquem ex Cardinalibus, seu Principum Oratoribus convivam habere, una adhibitis plerisque non vulgaris auctoritatis Prælati, ac Viris doctis, magnamque diei partem in iis conviviis peragendis consumere, tum pro diversorum ordine ferculorum, tum etiam exacto convivio pro joca-

libus, elegantissimisque aliis rebus ostentandis, ut loquitur Canensius, qui Vitam Pauli II. scripsit. Quo Auctore pariter comperimus, convivium cunctis Sacri Senatus Patribus, ac cæterorum Ordinum Prælati ingenti rerum apparatu publice exhibuisse die Coronationis suæ in Palatio Lateranensi. Adeo autem ea convictus voluptate Paulus capiebatur, ut, eodem Canensio teste, cum ei renunciatum fuisset, ipsos Senatorii Ordinis Patres una omnes convenisse in Palatio Riccardi Cardinalis Tituli S. Eusebii juxta Templum S. Petri ad convivium testamento ipsius legatum, tacitus ipse, atque insperatus adveniens, ipse quoque festivus ac faceris discubuerit, collocata sibi Sella in ultima mensæ parte, omnibusque prohibitis suo loco amoveri.

I. Convivia quoque, ut idem Auctor Vindiciarum ejusdem Pauli Vitæ ex eodem Canensio narrat Cap. IV. ante Ædes quas Paulus juxta Basilicam S. Marci construxerat, publice Romanis Magistratibus, & universo populo, post diem Agonalium tanta dapum vinorumque omnis generis copia exhibuit, ut post Magistratum, populique refectioem, ea reliquiarum vis super-

perfuerit, unde pauperum turba lances scyphos scutellas plenas deportaret. Præerant his epulationibus Marcus Barbus Cardinalis, alique Pontificii Prælati, quorum erat discumbentes circumlustrare, ac certatim hortari, ut se se ex appositis dapibus abunde reficerent, quod esset Pontifici quamgratissimum. Ipse autem Pontifex ad maiorem erga Romanum Populum benevolentiam, atque animi hilaritatem ostendendam, nummos argenteos passim, ut tradit idem Canensius, in omnem plebem diffundebat. Hæc omnia fat oportune a Paulo instituta fuisse, testatur Platina in laudati Pauli Vita, postquam scilicet bellicis rebus compositis ad otium conversus fuisset, & apertius præterea declarat, octo fuisse pallia, quæ cursu certantibus in carnisprivo proponebantur singulis diebus; cursum, & stadium fuisse ad Arcu Domitiani usque ad Ædes S. Marci, unde Pontifex ipse Paulus voluptatem percipiebat; additque, vel pueris cæno oblitis post cursum, carlenum singulis unum condonatum.

III. Adversus hæc ipsa Pauli convivia asperum monitorem se quidem præbuit Jacobus Cardinalis Papiensis in Epistola sua ad ipsum Paulum, numismata, quæ ille fundamentis ædificiorum parietibusque admiscebat, titulos, quos iisdem ædificiis incidi jubebat, ludos, & epulas una simul sententia condemnans: *Similia, inquit, his moliris, multa illuc uno affectu tendentia, ut Pontificatus tuus post te non sileatur. Ignosce, Paule, veram laudem ista non habent, Sacerdotalis non putantur officii. Vanitas est his intendisse. Sapiens nemo numismata, & titulos, & lasciva plebis delinimenta probavit. Peccatum etenim continent. Videntes ea, audientesque posterius, sectatorem quendam inanis gloriæ te fuisse conjicient. Ita quod minime quæris, ignominiam pro laude invenies. Enumerat postea Sacerdotalis officii munera, & tandem subdit: His titulis, & numismatibus, & ludis, & epulis paratur solida, & perennis gloria, illa secularia, ut inania sunt, ita evanescent quamprimum, nec fructum acceptabilem habent. Quis non miretur, adeo non libere dicam, sed accusatorie in Romanum Pontificem scribere potuisse? Scite autem laudatus Auctor Vindiciarum Vitæ Pauli II. Papæ, Cap. vi. Litteras hæc, aliasque hujusmodi, scriptas quidem a Cardinali Papiensi, non vero missas ad Paulum fuisse, qui utique sui officii putasset tantam non libertatem modo, sed asperitatem reprimere.*

IV. Sane non defunt Sanctorum veterum Episcoporum exempla, qui convivio Optimates excipiebant, idque, ut alios omittam, ex S. Ambrosii Mediolanensium Præsulis Vita addiscimus, ubi teste Paulino, Cap. xv. Comes Arbogastes gloriabatur, quod ab eo sæpius mensæ adhibitus fuisset: *Nosse se virum, & diligere ab eo, atque frequenter cum illo convivari solitum.* Unde & tunc ei adgratulati sunt amici, hinc in illum derivatas esse tot victorias, qui conjunctus esset peculiari necessitudine cum eo Episcopo, cui Cæli propitii essent, cujus ad jussionem sol staturus esset: *Ideo vinci omnes, quia ab illo Viro diligeris, qui dicit soli, sta, & stat.* Alia tamen fuit ratio, quam tenuit S. Martinus Turo- num Episcopus, quippe qui, ut in ejus Vita narrat Severus Sulpitius Dialogo i. Cap. xvii. interpellatus aliquando a Vincentio Galliarum

To. I.

Præfecto, ut in Monasterio prandium ei præberet, exemplo Ambrosii, qui Consules, & Præfectos domi frequenter & convivio excipiebat, consolari eundem noluit: *Memini, Vincentium Præfectum Virum egregium, & quo nullus sit intra Gallias omni virtutum genere præstantior, dum Turones præteriret, a Martino sæpius poposcisse, ut ei convivium in suo Monasterio daret; in quo quidem exemplum B. Ambrosii Episcopi præfererat, qui eo tempore Consules, & Præfectos subinde pascere ferebatur; sed virum altioris ingenii, nequa ex hoc vanitas, atque inflammatio obreperet, noluisse.* Si vero non acquieverit S. Martinus, cum ultro obviis prodiret Ambrosius optimatibus secum pransuris, nihilo magis id stupendum inquit Thomassinus Parte III. *Disciplina*, Lib. iii. Cap. xxxvi. Num. viii. quam quod Joannes nec manducans nec bibens, & Christus mensæ cum publicanis accumbens, eodem tamen utrobique collimabant, ut omnibus omnia fierent, quo omnes Deo lucrarentur. Ambrosius civilem & humaniorem vivendi rationem, Monasticam Martinus profitebatur; mores in speciem diversissimi ab una charitatis cælesti radice efflorescunt.

V. Teste Palladio, solus consuevit vesci Chrysostomus, variisque adductus est rationibus, ne Optimates convivio exciperet. I. ut minore sumptu id faceret. II. ne administratoribus rerum Ecclesiæ ansam daret, expensas exaggerandi, & ex rebus Ecclesiæ suas augendi. III. ne si quos ex Proceribus invitaret ad prandium, alii offenderentur, & si omnes alliceret, ingens Ecclesiasticæ substantiæ fieret jactura: *Frangi erat nimium, inquit, deliciarumque omnium adversarius, sacrilegum existimans, siquid in ejusmodi impenderetur; simul ut dispensatoribus furti occasiones amputaret, ne obsoniorum pretia in brevibus suis multiplicantes, quæ erant in usus pauperum deputata, sibi ipsis vindicarent. Præterea Civitatis ingenia cogitans, considerabat, oportere, se ut Christi dispensatorem, aut dignitates omnes ex æquo honorare, aut se subicere nemini. Inspiciens autem & mensæ tumultus, & impensarum magnitudinem, exhorruit rem.* Optabile quibusdam fuisset, Episcopos ut saltem, aut Clerum saltem suum mensæ adhiberet Chrysostomus, sed respondet Palladius in ejusdem S. Antistitis Vita Capite xiii. nec hæc quidem nisi magnis expensis fieri posse, in quas nollet Sanctissimus Pater effundi pauperum alimenta, & solatia ægrorum: *Si quam celerrime illi multo cum apparatu exquisitas epulas sectarentur, iniquum, & indignum erat, infirmorum, & pauperum cibos, eorum qui sani essent, libidini exponere.*

VI. Quicquid sit de hisce exemplis, consuevisse jam olim Romanos Pontifices Maximos doctrina ac pietate etiam conspicuos publico ac solemni convivio præsertim celebritatem Coronationis suæ ac possessionis capte Basilicæ Lateranensis decorare, jam abunde in Commentariis superioribus ostendimus, præsertim vero ex celeberrimo testimonio Auctoris Cæremonialis jussu Gregorii Papæ X. editi, & Jacobi Gajetani qui in Romano Ordine xiv. Cap. xlv. ritum in hisce conviviis servandum enarrat. Cui addi & potest quod in suo Ordine Romano xv. scribit Petrus Amelius Cap. lxx. & seqq. ubi agit de comestione seu convivio fieri jam olim solito

T 2

a Pa.

a Papa Feria v. in Cœna Domini, atque de Cæremoniis in eo servandis. Ceterum, ut rem altius repetamus, docet quidem eruditissimus Moretus in sua Lucubratione, *De Presbyterio*, Parte III. Sectione III. §. XI, morem fuisse Amelii ætate antiquiorem, ut sanctioris hebdomadis dies, potissimum vero quintam in Cœna Domini per publicam Papalem magnificentiam pariter decorari; probatque primum auctoritate Benedicti Canonici Basilicæ S. Petri, qui in Ordine Romano XI. exarato, ut notavit Mabillonius, ante annum MCXLIII. Num. XI. congestis pluribus super Cœna Domini, & lotionem pedum XII. Subdiaconorum per Pontificem agenda, ac descriptis variis modulationibus Primicerii Cantorum, & Cardinalium, ita inquit: *Finitis Vesperis, cantant: Dominus Jesus postquam cœnavit; & Dominus Papa dat unicuique Episcopo quatuor solidos; unicuique Cardinali tres solidos. Quibus finitis, in Basilica scilicet Sancti Laurentii prope Palatium, vadunt ad Cœnam in Basilicam Theodori, quæ est Panetaria, ubi fit continua lectio a Subdiacono. Perfecta Cœna, redit in Cameram, ubi se expoliat.*

VII. Ubertiore eloquio largitiones præfatæ diei significavit Cencius Camerarius in Ordine Romano XII. Capite XII. quod inscriptum est, *Quomodo datur Presbyterium in Cœna Domini*, ubi inter alia mentionem facit convivii, quod ipsa quinta die in Cœna Domini fieri a Pontifice consueverat: *Sicque Dominus Papa, ait, cum aliis omnibus supradictis vadit indutus ad Basilicam Zachariæ, quæ Panetaria diebus his nuncupatur, ibique induti cum Dalmatica, & Pluviali sedent ordinati cum Mitris, lavantes manus supra mensam, sicut meris est. Sed Dominus Papa solus est in mensa. Archiepiscopus vero si adfuerit, debet ex uno latere primus sedere; deinde Episcopi, & Presbyteri Cardinales; ex alio latere Diaconi Cardinales cum Primicerio; ex alio latere Acolythus repræsentat Librum, & minor Diaconorum legit versus duos ad mensum.* Meminit & hujus ritus Cæremoniale jussu Gregorii Papæ X. editum Num. XXII. sed audiendus est Jacobus Gajetanus, qui in Romano Ordine XIV. Cap. LXXXVI. inscripto, *De comessione in Cœna Domini*, sic ad rem inquit; *Dato Presbyterio, Dominus Papa sic paratus, ut diximus, a duobus Diaconibus Cardinalibus ducitur ad mensam solemniter paratam, & ibi sedet, Episcopo Cardinale sibi dante aquam, & duobus Diaconibus Cardinalibus, uno a dextris, alio a sinistris tobaleam tenentibus, ipsoque qui a dextris, atiam anulum tenente, dum lavatur.* Agit deinde Capitibus sequentibus de ordine sedendi in mensa, de inservientibus, ac de aliis ritibus in eo convivio servandis, qui totidem fere verbis leguntur apud laudatum Petrum Amelium a Capite LXIX. usque ad LXXIV. Fuisse porro convivium istud splendidum, opiparumque iidem Auctores nos docent, ubi agentes de secunda lotionem manuum in Cœna Domini, hæc addunt: *Omnibus lotis dantur species, & vinum.* Species res aromaticæ erant, ut pluribus ostendit Dufresne in suo Glossario, ubi etiam addit, species dici, *quicquid diebus jejuniorum vespere apponitur, ut bellaria, fructus, cichoreum aceto, & oleo conditum &c.* Quicquid sit, convivium illud fuisse splendidum, prædicti Auctores Gajetanus & Amelius citato loco testantur

his verbis: *Memorandum, quod omnes Capellani Domini Nostri Papæ commensales quasi non commensales debent eo die comedere cum Domino Camerario splendide.* Ita Amelius Capite LXXII. a quo non nihil variat Gajetani Ordo Romanus, Capite LXXXIX. ubi legitur, *commensales, & non commensales.*

VIII. Porro Feriam quoque VI. Parasceves consuevere Summi Pontifices alia largitione sed conditioni tamen diei consona honestare. Agens enim de ea die Cencius in Romano Ordine XII. Cap. XII. in fine ait: *Notandum, quod Dominus Papa nulli de familia dat ad potandum, nec coctum ad comedendum: dat vero ei tantummodo panem, & aquam, & herbas de consuetudine, nimirum, ut notat Moretus in Lucubratione, De Presbyterio, Parte III. Sectione III. Num. XVI. lactucas agrestes, quarum edendarum consuetudinem sua quoque ætate perseverantem deferens de usibus ejusdem diei Novidius expressit Lib. III. Fastorum Sacrorum eo versiculo.*

Nos & amara dies lactuca pascit agresti.

Quamquam veteres Christiani duobus integris diebus Parasceves, & Sabbati Sancti, vel nihil omnino gustarent, vel pane, herbis, & leguminibus contenti essent, ut docet eruditus Filescus in Opella, *De Quadragesima Christiana*, Cap. xv. consueverunt nihilominus ipsa quinta Feria Cœnæ Domini non modo cibis delicatioribus vesci, verum etiam aliquando ea die prorsus jejunium solvere, forte in memoriam Cœnæ a Christo cum Apostolis celebratæ. Sed hic abusus, qui vel primis Christianæ Religionis seculis in Oriente invaluit, correctus jam primus fuit a Patribus Concilii Leodiceni, quod habitum fuit anno CCCIV. Can. I. cujus verba juxta Editionem Dionysii Exigui hæc sunt: *Quod non oporteat in Quadragesima in ultima septimana quinta Feria jejunium solvere, totamque Quadragesimam sine veneratione transire, magisque conveniat omnem Quadragesimam districto venerari jejunio.* Plura in hunc Canonem notavimus nos nostro II. Tomo Conciliorum in Commentario ad Canonem XXIX. Concilii Trullani, ubi etiam fuse explicuimus Canonem XXIX. Concilii III. Carthaginensis, quo edicitur, *ut Sacramenta Altaris non nisi a jejunis hominibus celebrentur, excepto uno die anniversario, quo Cœna Domini celebratur.*

IX. Quod tandem ea consuetudo, ut Fideles nempe ipsa V. Feria in Cœna Domini antea ederent, & satiarentur, postea vero communicarent, magis magisque augeretur, memoratæ Trullanæ Synodi Patres citato Canone XXIX. post allatum Chartaginensem Canonem, & explicatam rationem ejus consuetudinis, agentes, *tunc fortasse propter aliquas in iis locis occasiones Ecclesiæ utiles*, Patres Carthaginenses ea dispensatione usos fuisse; statuunt mox, *Apostolicas & paternas traditiones sequentes non oportere in Quadragesimæ postrema septimana, Quinta feria jejunium solvere, & totam Quadragesimam iniuria afficere.* Sane dum Africanum illum morem, cibi sumendi ante sacram Synaxim Feria v. ante Paschæ diem solemnem exponit S. Augustinus, quem nec plane probat, aut damnat, rationem peculiarem affert cur id Africani Christiani facerent, sic scribens in Epistola sua CXV. ad Januarium sub finem: *Sed nonnullos probabilis quædam ratio delectavit, ut uno*

certo

certo die per annum, quo ipsam Cœnam Dominus dedit tanquam ad insigniorem commemorationem post cibos offerri, & accipi liceat Corpus, & Sanguinem Domini &c. Quicquid sit, ob eam rationem Cœnæ scilicet a Christo cum Apostolis celebratæ, videtur mos ille invaluisse vel apud

Monachos ipsos, uti constat ex eorum antiquis usibus apud Martene Lib. III. *De antiquis Monachorum ritibus*, Cap. XIII. ut feria V. Cœnæ Domini, servato quidem jejunio, cibi tamen lautiores ab ipsis Monachis fumerentur. Id quod alii quoque Scriptores nos docent.

§. II.

De preparatione Aulae, sedium, & mensarum.

Parabitur igitur Aula convivii aulæis, & pannis sericeis, aureisque pro temporis & loci conditione. In capite Aulæ erit Suggestum, (1) ad quod triplici gradu ascendetur, longum pro latitudine aulæ. In medio surget quadratus thalamus palmi altitudine, super quo mensa paratur Pontificis. Apud parietem erit Sedes Papalis, ad quam parvo, & deinde magno scabello ascendetur, ornabiturque Sedes cum panno aureo pendente supra caput. Mensa erit alta ad justam proportionem a sinistra super suggestum: Parabitur alia mensa pro credentia Papæ cum vasis aureis, & argenteis, vino, & aqua, & aliis consuetis. Credentiam appellant mensam, supra quam vasa argentea, sive aurea, & instrumenta ad convivium opportuna præparantur. Et similiter in divinis, supra qua ad sacrificandum necessaria continentur. Dicitur & credentia actus ipse prægustrationis cibarium, & aliarum rerum. Hæc exponere voluimus, quoniam crebro in hoc Opere de credentia mentionem facturi sumus. Antiqui Cæremoniarum Codices Drefatorium dixerunt. A dextra parte Aulæ infra Suggestum parantur mensæ pro Episcopis, & Presbyteris Cardinalibus, & paulo inferius pro aliis Prælati; sed (2) pro Cardinalibus erunt aliquanto altiores, & sedilia habebunt gradum unum, super quem tenebunt pedem Cardinales. A sinistra e regione mensæ Cardinalium parabitur mensa pro Diaconis Cardinalibus ejusdem altitudinis, & cum gradu; & inferius aliæ mensæ pro Oratoribus, Nobilibus, & Officialibus. In fine Aulæ, vel in Aula præcedente, si erit commoda, parabitur magna credentia cum pluribus gradibus ad magnificentiam, & alia super longam mensam cum vasis, quibus in (3) convivio utentur.

COMMENTARIUS.

I. **Q**UÆ in hoc §. statuuntur de præparatione Aulae, sedium, atque mensarum in Papali convivio, explicata jam ante fuerunt in Cæremoniali Gregorii X. jussu edito, Num. IX. in Romano Ordine XIV. Jacobi Gajetani, Cap. LXXXVI. & seqq. ac in Romano pariter XV. Ordine Petri Amelii, Cap. LXX. & seqq. Ergo juxta istorum præscriptum *sedet in una mensa eminente solus Papa cum diversis & magnis vasis aureis & argenteis: in alia mensa sedent Episcopi, in alia Presbyteri post eos: in alia parte ad sinistram Diaconi Cardinales; & postmodum mensa omnium Prælatorum, & aliorum Nobilium.* Ita plane in citato Gregorii X. Cæremoniali, sed audiamus Jacobum Gajetanum, qui in ipso Romano Ordine XIV. rem ipsam luculentius descripsit, Capite LXXXVII. ita inquit: *Sedet autem Papa in una mensa eminente solus, diversis & magnis vasis aureis & argenteis super mensam positis. In alia vero mensa, quæ est ad dextram Papæ in longum Aula, sedent Episcopi Cardinales; inter quos etiam sedent, si sint Patriarchæ quatuor Ecclesiarum Patriarchalium principalium secundum ordinem prioritatis, & posterioritatis Ecclesiarum suarum; ita tamen quod quilibet Patriarcha sedeat inter duos Episcopos Cardinales, & post eos in alia mensa Presbyteri Cardinales. In parte autem sinistra, quæ etiam est in longum Aula, sedent Diaconi Cardinales omnes secundum*

dum ordinem prioritatis singulorum in statu, in quo sunt Cardinalatus; nam priores primo in mensa sedent, & post mensas Cardinalium erunt mensa omnium aliorum Prælatorum, & Nobilium, &c.

II. Eadem pene ad verbum docet in suo Romano XV. Ordine, Cap. LXXI. Amelius, qui tamen postquam dixit, primum Patriarcham sedere inter primum Episcopum Cardinalem, & secundum Episcopum, ita statim subdit: *Nisi esset ibi Rex, quia ille sederet inter duos Episcopos, Cardinales scilicet, & Patriarcha inter secundum Episcopum, tertius post tertium, & sic deinceps, ita tamen quod semper inter duos Episcopos quilibet eorum sedeat; & ita in Missa.* Consuevisse olim Patriarchas quatuor principalium Ecclesiarum, nempe Constantinopolitanum, Alexandrinum, Antiochenum, & Hierosolymitanum, poni mixtim inter Episcopos Cardinales, notavit etiam in nostro hoc Cæremoniali Augustinus Patricius infra §. VII. qui inscriptus est. *De quatuor Patriarchis*, ubi etiam ait, sublatum suo ævo fuisse eum morem, propter declinationem, sive potius extinctionem illarum, nempe Ecclesiarum, cum sint quadammodo titulares; ideoque poni eos dicit immediate post Cardinales. Ceterum si veterem Ecclesiæ disciplinam spectemus jam non modo Patriarchæ, sed & Episcopi præcedebant S. R. E. Cardinales, qui tamen ex quo cæperunt foli Romanum Pontificem

eli-

(1) In editione 1. Veneta anni 1516. & Colonienſi legitur, *Suggestus ad quem &c.* (2) Ibid. &. (3) Ibid. in communi.

eligere, & quidem circa medium Seculum XI. tunc quoque cœperunt ipsorum Patriarcharum, & Primatum jura transcendere, ut alibi diximus ex celebri testimonio S. Petri Damiani, qui eodem Seculo claruit.

III. Quod tandem credentiæ apparatus spectat, de qua hic noster §. loquitur, dicitur

passim in antiquis editis, manuque exaratis Cæremonialibus Abacus, Tabula, seu Mensa, in qua vasa ad convivia reponuntur, vel etiam mensula, quæ vasa Altaris continet, de qua plura videri possunt in nostro Cæremoniali Episcoporum Lib. I. Cap. XI. ubi de ea re, sicut & de aliis multis locuti fuimus.

§. III.

De Imperatore, & Rege, si sunt in Convivio.

Si huic convivio interesset Imperator, paratur pro eo Sedes ad dextram Pontificis, & mensa super plano suggestus, super quam solus comedit Imperator. Sedes habebit scabellum parvum viride, & erit ornata panno aureo, non tamen habebit pendentem super caput. Similiter parabitur pro eo credentia juxta credentiam Papæ a sinistris, & ibi erunt Familiares Imperatoris pro suo servitio. Si vero adesset Rex aliquis, paratur etiam credentia pro eo paulo remotior ab ea. Sedes vero nulla paratur, quia sedet in mensa post primum Episcopum Cardinalem. Imperator, sive Rex habebunt tot servitores, quot eis opportunum videbitur. Cardinalibus vero (1) singulis sufficiunt quaterni ministri, quorum unus vinum propinet, alter carnes concidat, alter de cultello fercula inferat, quartus prægustet vinum, & aquam, & alia subministret. Pontifici servire solent nobiliores qui sunt in Curia laici, etiam si sint Fratres, aut Filii Regum, præsertim in illorum præsentia.

COMMENTARIUS.

I. **C**onsuevisse una cum Papa & Cardinalibus, in diversis tamen mensis convivari Imperatores, ac Reges, non modo Ecclesiasticæ Historiæ, & Romanorum Pontificum Vitæ, sed & Cæremoniales Libri luculenter nos docent, præsertim vero Romanus Ordo xv. auctore Amelio, Cap. LXXI. ubi postquam dixit, *coram Papa servire laicos majores natu, & Nobiliores, qui præsentis erunt, secundum officia illis distributa per Magistrum Hospitii*, ita mox subjicit: *Notandum tamen, quod in mensa primo primum ferculum ponit coram Papa aliquis de principalioribus & Nobilibus, etiam si esset Rex; quo posito, si Rex foret, vadit ad sedendum inter duos primos Episcopos Cardinales, nisi Romanorum Imperator, adesset; quia tunc iret ad mensam suam a latere dextro Papæ paratam cum thalamo gradu minori & basiori illo de Papa, & secundum ferculum portaret Rex; quo etiam posito, vadit ad sedendum in mensa a sinistris inter primos duos Diaconos Cardinales; & sic faciebat Dominus Carolus primus Rex Sicilia, & omnes descendentes ab eo Reges.* Notandum quoque & illud, quod laudatus idem Amelius subjicit: *Quoniam tunc Imperator Constantinopolitanus erat in Curia, & sedebat inter duos primos Episcopos Cardinales, qui primo & primum ferculum coram Papa posuerat: secundum Rex Sicilia qui tunc erat præsens; alii autem Nobiles majores, qui, si essent Filii Imperatoris, vel Regum, serviunt Papæ in mensa, videlicet unus de cupa, alius de cutellis ad incipiendum, (legendum, de cultello ad incidendum, ut in Romano XIV. auctore Jacobo Gajetano, Cap. LXXXVIII.) alii adstant comedenti, alii sequuntur portantem ferculum; sive ut legitur*

in citato Ordine, *sequuntur fercula, portantes & ipsi incisoria Papæ &c.* Porro, ut Sicilia, & Hungariæ Reges Coronis Regiis redimiti epulanti Pontifici Bonifacio VIII. inservierint, ac primis ferculis ab ipsis appositis, inter Cardinales mensæ accubuerint, notat Raynaldus ad annum MCCXCV. Num. VI. in fine, & ex eo Thomassinus Parte I. *Disciplina* Lib. II. Cap. CXIV. Num. V. ubi etiam tradit, quod cum ipse Rex Sicilia Carolus ad Perusiam venisset una cum filio Carolo Martello Rege Hungariæ, & in Consistorium ingressus esset, inter Cardinales Episcopos sedit, filius vero ejus Rex Hungariæ inter Cardinales Diaconos, probatque ex testimonio ejus ævi Poetæ Jacobi Cardinalis Stephansenii sic scribentis:

“Pontificum patrem medium, mediumque secundum.

Inter Levitas primos

II. Extat in ms. Cæremoniali Davantriæ ritus servandus, ubi Rex cum Summo Pontifice convivatur. Sic etenim inter alia inquit, ubi Ordinem, & modum exponit, servatum in Regis Navarræ adventu Perpinianum ad pseudopontificem Benedictum XIII. sive Petrum de Luna: *Post ibunt ad mensam, & Dominus Noster Papa scilicet, sedebit in mensa sua, prout consuevit; & dictus Rex sedebit in mensa sua solus cum panno aureo ad spatulas, & coxino de panno auri, & alio non de panno auri ad pedes; & portabuntur dicto Regi omnia cibaria cooperta, sed coram eo non fiet proba, & ponentur in mensa Papæ cibaria per Camerarium suum, & coram Rege per Thesaurarium Domini Nostri.* Tum paulo inferius, ubi agit de collatione, & speciebus dari post prandium solitis: *Item Domino Regi*

(1) Ita plane legitur in prima Editione Veneta anni 1516. & in Colonienfi anni 1557. In Romana vero anni 1560. *Cardinalibus vero quatuor quilibet sufficiunt, quorum unus serviat de vino, alius de cultello, alius fercula inferat, alias sit ad credentiam, qui vinum & aquam & alia subministret.*

gi servietur de speciebus cum dragerio cooperto, cui non fiet proba, & sedebit inter primum Dominum Cardinalem & secundum; qui Rex tenebit coxinum panni auri subtus se, & hoc de prima die. Additque mox: Aliis autem diebus Rex si comedat coram Papa, & sint ibi Domini Cardinales, sedet inter primum & secundum Dominorum Cardinalium cum panno aureo ad spatulas Regis solius, & coxino de panno auri, & alio ad pedes non de panno aureo &c. Porro dragerium, cujus meminit hoc Cærimoniale, teste erudito Dufresne, patera erat, vel pyxis, ubi drageæ servabantur; drageja autem erat pastillus saccharatus.

III. Quod ministros spectat convivis intervenientes, varios recenset eruditus Julius Cæsar Bulengerus, Lib. iv. De Conviviis, Carptores Scissores, Structores, Architiclinos, Prægustatores, Pocillatores, aliosque complures. Carptorem scindendi obsonii magistrum vocat Seneca in Libro, De vita beata, Cap. xvi. ejusque officii meminit etiam in Epistola xlvii. ad Lucilium, ubi sui ævi conviviorum luxum describit: *Alius, inquit, pretiosas aves scindit, pettus, & clunes certis ductibus circumferens, eruditam manum in frustra excutit.* Tum vero paula inferius: *Adjice Obsonatores, quibus Domini Palatii notitia subtilis est, qui sciunt, cujus rei illum sapor excitet, cujus delectet aspectus, cujus novitate nauseabundus erigi possit, quid jam ipsa satietate fastidiat, quid illo die esuriant.* Sed, ut alios omittam convivii ministros, moris antiqui fuit, ut Prægustatores essent, qui Principum cibos, ac potus explorarent, quique idcirco dicti sunt Exploratores, Prætentatores, aliisque id genus nominibus appellati. Primum Romæ Augustum, ac deinde Tiberium Prægustatores adhibuisse, asserit memoratus Bulengerus Libro iv. citati Opusculi, Cap. v. probatque ex hac veteri inscriptione: *Tiberius Claudus flamma clausus Tiberii Augusti Prægustator*; & ex alia, quæ est hujusmodi: *Genio Calius Herodinus Prægustator D. Augusti.* Occurrit id officii apud Tacitum non uno in loco, ac præsertim Lib. xii. Annalium in fine,

ubi dicitur *Halotus inferre epulas, & explorare gustu solitus*, veneno occidisse Claudium mandante Agrippina; idque etiam ex quorundam traditione asserit Suetonius in Claudio Cæsare, Cap. xlv. ubi ita scribit: *Veneno quidem occisum convenit; ubi autem, & per quem datum, discrepat. Quidam tradunt, epulenti in arce cum Sacerdotibus, per Halotum spadonem Prægustatorem; alii domestico convivio per ipsam Agrippinam, quæ boletum medicatum avidissimo ciborum talium obtulerat.*

IV. Sane quod ut plurimum Principum vita veneni insidiis obnoxia esset, mos pene omnium nationum fuit, ut in eorum mensis Prægustatores essent, qui non modo cibos, sed etiam potus explorarent. Apud Q. Curtium Libro x. Historiarum, *Philippus, & Cottas potum Regis prægustare soliti erant.* Teste Xenophonte Lib. i. *Pædiæ Cyri Persarum Regis, Pocillatores Regum postquam dederint phyalam Principi haurientes cyathos ex ea in manum dexteram effusa sorbent.* Pocillatores, seu Pincernæ, ministri a poculis sunt, ænochoi etiam dicti, qui vinum convivis aqua mistum præberent. At vero, licet ipsi Prægustatores instituti jam olim fuerint in Principum mensis, ut explorarent scilicet, an cibi, seu potus veneno infecti essent, constat tamen ex antiquis Scriptoribus, ac præsertim ex memoratis Tacito, ac Suetonio, Prægustatores ipsos insidiatos fuisse Principum vitis, eosdemque veneno occidisse. Innumera pene hac in re afferri possent exempla tum vetera tum recentiora, quibus docemur, Summos ipsos Pontifices, ac S. R. E. Cardinales propinato ipsis veneno a suis Pincernis, seu ministris a poculis, periisse. Certe de Leone X. tradunt Scriptores, eum obiisse ex lento veneno ipsi a quodam ejus cubiculario, atque a poculis ministro propinato, cuius tamen inquisitionem, ut Jovius ait, *Cardinalis Medicus sopitam voluit, ne forte in nomen alicuius magni Principis inexpressibili cum invidia redundaret.* Ita Spondanus ad annum MDXXI. Num. x. ubi Leonis Papæ x. obitum narrat, qui Romæ contigit anno ipso MDXXI. quarto Nonas Decembris.

§. IV.

De habitu Pontificis, & Prælatorum.

Pontifex igitur cum paramentis Pontificalibus si celebravit illa die usque ad Dalmaticam inclusive, & cum Sandaliis indutus, supra Dalmaticam Manto rubro aperto a parte anteriori, & Mitram habens in capite supra Fanonem, medius inter Diaconos ducitur ad mensam. Cardinales, & Prælati omnes habent Superpellicum super Rochettum, sive supra vestes sui Ordinis, si sint Religiosi, & Mitram albam in capite. Supra Superpellicum Cardinales, & Prælati seculares habent Mantellum sine cauda, apertum a parte ante, & coloris violacei, sive obscuri: Religiosi vero coloris sui Ordinis, sed eodem modo aperto. Ceteri omnes in suo habitu quotidiano. Aderunt Familiares Pontificis, & alii servitores in copia. Aderunt etiam servientes armorum bene ornati cum suis baculis argenteis, qui præire debent ante fercula, & removeere multitudinem a via.

COMMENTARIUS.

I. Quæ in hoc §. statuuntur de habitu Pontificis, Cardinalium, ac Prælatorum in solemnibus convivio, jam fusius luculentiusque longe ante hoc no-

strum Cærimoniale ab Augustino Patricio ordinatum præscripta fuerunt in Romano Ordine xv. Auctore Amelio, Cap. lxx. ubi inter alia ita inquit: *Papa dum comedit, sit paratus, ut distum*

Etum est supra, usque ad Dalmaticam inclusive, habens Mantum rubeum ad scapulas, Fanonem, sive Orate in capite, & Mitram aurifrisatam super Fanonem, & Anulum pretiosum non Pontificalem in digito, & Sandalia in pedibus, prout in Missa, demtis Chirothecis, Pallio, & Casula. Recenset deinde Cardinalium, ac Prælatorum tum Regularium, tum Secularium vestes, sic dicens: *Cardinales vero omnes tam seculares, quam Religiosi, habebunt Cottas sine superpelliciis cum subtis, seu Rochettis tantum, & Mitras simplices de garnello in capite, & Mantellos de brunetto ad scapulas; sed seculares habebunt Mantellos de brunetto rosaceo: Religiosi vero habebunt Mantellos coloris suæ Religionis, & ita parati comedunt, & omnes alii Prælati simpliciter sic induti, facta tamen inter eos discretione de secularibus, & Religiosis quoad Mantellos in colore, sicut dictum est de Cardinalibus.* Sed nec omittendum, quod idem Amelius ad nostram rem subijcit: *Sed nota, ait, modum Mantellorum omnium tam secularium, quam Religiosorum. Retro inter duas scapulas conjunguntur due partes chlamydis, & bene sumitur per spatium palmi, & stat dissutum; & illud, quod est sutum, quod conjungit duas partes chlamydis, stat super collum, & chlamys pendet ante pectus ab utraque parte usque ad terram, & etiam retro usque ad terram dumtaxat & sine cauda, sed in forma circulari, & sphaeri-*

ca, nec partes conjunguntur chlamydis ante pectus. Hactenus laudatus Amelius in citato Ordine xv. cujus testimonio addiscimus, ritum in hoc nostro §. præscriptum jam olim fuisse usitatum, & quidem etiam ante ipsum Amelium, cujus testimonium totidem fere verbis legitur in Romano Ordine xiv. auctore Jacobo Gajetano, Capite lxxxviii. cujus verba supervacaneum est hoc describere.

III. Sed & ante hos Scriptores mentionem profecto facit de habitu Pontificis, Cardinalium, Prælatorumque in mensa convivii, Cæremoniale antiquum Gregori Papæ X. jussu editum Numero ix. ubi postquam dixit, Papam duci a duobus Cardinalibus Diaconis ad mensam solemniter paratam, & ibi sedere &c. deinde ita subdit: *Et attende, quod Papa stabit, dum comedit, indutus, & calceatus, ut dictum est, & cum Mitra: Cardinales vero omnes habebunt Superpellicem cum Camisiis, & Mantello, & Mitra alba simplici in capite, & comedent omnes Prælati similiter cum Mitra.* Eadem leguntur in aliis multis sequioris ævi Cæremonialibus. Hinc non mirum videri quibusdam debuit, quod receptis nuper Romæ a Societate Confalonis hospitibus quibusdam Regnicolis, qui ad Urbem Jubilæi gratia venerunt, Presbyteri, qui eis præerant, Rochetto, & Mozetta, ac Bireto induti, prout venerant, mensæ assidissent, & ita cibum sumissent.

§. V.

De Magistris Sacri Hospitii, & Domus Pontificiæ.

Magister Sacri Hospitii, & Magister Domus provideant in tempore de modo & ordine ferculorum; de servitoribus, qui prius, & qui posterius, & quod quælibet mensa habeat Præfectos suos; quæ vina (1) prius & quæ deinceps, & per quos ferenda, & sic de aliis rebus opportunis.

COMMENTARIUS.

I. **I**nter alios conviviorum ministros relatos ab erudito Bulengero Lib. iv. *De conviviis*, recensetur, Cap. iv. *Structor*, idest, *mensa Magister*, cui cura est totius ministerii. Habuerunt jam olim Romani Pontifices hujusmodi Officiale, qui dicebatur, *Dominus Hospitii*, uti videre in Ordine Romano xi. Auctore Benedicto Canonico Basilicæ S. Petri, Num. vii. sive Magister Hospitii, uti nos docet Romanus Ordo xiv. Auctore Jacobo Gajetano, Capite lxxxviii. *Coram Papa*, inquit, *serviunt laici majores natu, & nobiliores, qui præsentent erunt, secundum officia illis distributa per Magistrum Hospitii.* Dicitur nunc Magister Sacri Hospitii, cujus adhuc aliqua est, licet levissima, cura in publicis Papalibus epulis, ut ex hoc nostro §. liquet. Idem etiam reputatur veluti nobilis laicus in primariis sacris functionibus exceptor introductorque Ordinum Pontificii Sacelli, necnon custos interior augusti confessus, & nonnihil ageret, si qui Romam convenientes Principes supremi introduci publice deberent in Palatium. Notat hæc eruditus Morettus in Nota ad Lucubrationem, *De Presbyterio*, Parte i. Sectione

vi. pag. 65. ubi etiam ait, proprium esse hujus Magistri ministerium Familiæ Comitum, quam nobilioribus Romanis passim vetusti Scriptores accensent. Post Columnesios Urfinos, Sabellios, primi sunt in Ordine viii. ritum Coronationis Imperatoris Occidentis Romæ habendæ per manus Papæ describente apud Martene Lib. II. *De Benedictionibus Imperatoris*, pag. 181. Jacobus quoque Cardinalis Stephanesius inter clariores laicos, qui Bonifacii VIII. Coronationi interfuerunt, Romanos etiam nobiles Comites recenset, sic in suo Poemate scribens:

*Interea titulis redimiti, sanguine, & armis,
Illustresque Viri Romana ex stirpe trabentes
Nomen in emeritis tanta virtutis honores
Intulerat se se medios, festumque colebant.
Ex ipsis devota domus præstantis ab urse
Ecclesiæ; vultumque ferens demissius altum
Festa Columna jocis; necnon Sabellia mitis,
Stephanides Senior; Comites: Aniballica proles.*

II. Ex præscripto hujus §. cautum est, ut non modo *Magister Sacri Hospitii*, sed & *Magister Domus provideant in tempore de modo & ordine ferculorum, de servitoribus, qui prius, & qui*

(1) Ita in editione Romana anni 1550. in Veneta i. & in Colonienſi: *Quæ vero prius &c.*

posterius, & quod qualibet mensa habeat Præfectos suos &c. Magister domus, idem est, ac Major Domus, seu Præfectus Palatii Apostolici, cujus antiqua munia, & conditionem describit eruditus Dufresne in suo Glossario verbo, *Vicedominus*, & verbo, *Major Domus*, ubi ita inquit: *Quidam præterea observarunt, Majores Domus a Summo Pontifice ex ordine Cleri, interdum etiam Episcopali electos, Viros scilicet prudentia, & rerum gerendarum peritia insignes, quibus Episcopii, vel Patriarchii Lateranensis cura, & administratio committebatur, in gubernanda Domus, domesticis, & hospitibus excipiendis, eorumque causis rite, & ordine cognoscendis, quos Vicedominos appellabant, quod fuit Senescallorum officium &c.* Ergo Vicedominus olim in Ecclesia Romana idem erat, ac hodie Major Domus, ut etiam advertit Morettus, *De Presbyterio*, Parte III. Sectione I, pag. 202. in Nota, postquam scilicet locum Romani Ordinis ex collectione Hittorpiana recensuit, qui est hujusmodi: *Descendunt Primates Ecclesiæ ad accubita invitante Notario Vicedomini, & bibunt ter de graco, primo; de patysii secundo; de procavia tertia; postquam biberint omnes Presbyteri, & Acolythi per singulos titulos, redeunt ad faciendos Vesperos &c.* Extant hæc verba in antiquo Romano 1. Ordine apud Mabillonium Tomo II. Musei Italici, Num. XII. cum aliqua tamen varietate descripta in hunc modum: *Descendunt Primates Ecclesiæ ad accubita, invitante Notario Vicedomno, & bibunt ter, de graco semel, de patysii semel, de procoma semel. Postquam biberint omnes Presbyteri, & omnes Diaconi, seu Subdiaconi, vel omnes Acolythi per singulos titulos, redeunt ad faciendos Vesperos, & bibent de dato Presbyteri.* Ex quibus addiscimus, antiquum fuisse Vicedomini, seu Majoris domus Pontificiæ munus, quæ vina elargiri deberent.

III. Apud accubita expletam fuisse prænotatam largitionem, memorati Ordines Romani nos docent. Erant autem illa accumbentium sedilia disposita per Aulam magnificentissimi ædificii, quod *Triclinium* vocabant frequentius, aliquando vero *Accubitus*; neque unum erat Romæ præsertim ad Vaticanum, & Lateranum, ut docet Morettus citato loco, Num. XVI. Amplissimum certe extructum a Gregorio IV. ad princeps Patriarchium Lateranensem: *Fecit, inquit Liber Pontificalis, in Patriarchio Lateranensi Triclinium miræ magnitudinis decoratum cum absida de musivo &c.* Sed magnificentius posteritas censuit, cui construendo amplificandoque vacarunt Leones duo Romani Pontifices

Maximi, a quibus appellatum novimus Leonianum. Fuerunt autem Leo III. & Leo IV. ut ex eodem Pontificali Libro addiscimus, qui quidem in Leone III. hæc habet: *Fecit in Patriarchio Lateranensi Triclinium miræ magnitudinis decoratum cum absida de musivo . . . in quo loco, & accubita collocavit, & in medio concham porphyreticam aquam fundentem, & pavimentum ipsius marmoribus diversis stravit.* De Leone autem IV. ita scribit: *De priscis, vel antiquis Sacri Palatii usibus, atque ordinibus, qui . . . diversa consuetudine fuerant delata . . . omnia ordinare avide conatus est. Nam & accubitus, quod Dominus Leo bonæ memoriæ III. Papa a fundamentis construxerat, & omnia ornamenta, quæ ibi paraverat, quæ nimia vetustate, & oblivione antecessorum Pontificum deleta sunt, &c.* Plura de Triclinio ad usum convivii videri possunt apud Bulengerum Libro I. *De conviviis*, Cap. XXXIV. & alibi.

IV. Sed his omissis, quod Præfectum Palatii Apostolici, seu Majorem Domus Pontificiæ, ejusque munia, ac dignitatem spectat, differit inter alios Cardinalis de Luca, Parte II. Relationis Romanæ Curie, Discursu VII. Quantum vero ad Magistrum Sacri Hospitii attinet, pervetustum est hoc officium in Ecclesia Romana, & variis nominibus jam olim vocatum, variaque ipsius munia recensentur passim in hoc nostro Cæremoniali a Patricio ordinato, & in aliis etiam antiquioribus. Porro quod ipsum Magistri Sacri Hospitii munus summæ dignitatis, atque auctoritatis sit, hinc Summi Pontifices pluribus jam ab hinc seculis eidem præfecerunt nobilissimam, ac pervetustam Romanam Comitum Gentem, unde Pontifices plures extiterunt, nostroque hoc ævo, ut alios omittam, non sine elogio memorandus Innocentius XIII. qui ob res in brevi Pontificatu duorum annorum, mensium novem, & dierum undetriginta, egregie gestas, sui posteris desiderium reliquit. Ergo eximium Magistri Sacri Hospitii munus, quod jam olim præstantissimæ Romanæ Comitum Gentis donarunt Romani Pontifices Maximi, & inter alios Julius II. anno MDXII. Clemens VII. anno MDXXXVII. Gregorius XV. anno MDCXX. & Innocentius XI. peculiaribus Apostolicis Diplomatum, quæ in Archivo memoratæ Comitum Domus asservantur, BENEDICTUS XIV. a primordio sui gloriosissimi Pontificatus novo muniit robore, Apostolicis de ea editis Litteris, in quibus, & ipsam illustrem Comitum Gentem de Ecclesia optime meritam commendat, & prædictorum Diplomatum, quæ & rata habet, mentionem facit.

§. VI.

De prima lotione manuum Pontificis, & ordine sedendi in mensa.

Pontifex, remota prius mensa sua, ad partem sedeat in Sede sua cum Mitra, & Mantum post collum (1) aptetur, ut nihil ante pectus dependeat. Cardinales, Principes, & Prælati, & alii convivæ stent ante mensas paratas. Nobilior laicus etiam Imperator, aut Rex aquam ad lavandas Pontificis manus primo ferat hoc ordine. Magister Sacri Hospitii cum Clerico Cæremoniarum, quem adesse oportet in ordinandis his rebus omnibus cum servientibus. Et si Imperator, aut Rex aquam ferre debet, cum aliquibus etiam Principibus (2) sociatus, Imperatorem, aut Regem ad credentiam ducit. Si est Nobilis inferior, solus erit, & in credentia aquam prius a Ministris probatam

To. I.

(1) Ita in editione Romana; in Veneta autem 1. legitur, *apertum*.

(2) In ipsa Veneta, *sociatis*.

batam accipit in pelvibus, fertque consuetis cæremoniis ad Pontificem, præeunte uno ex Auditoribus cum mantili ad tergendum manus. Prior Episcoporum Cardinalium, & duo Diaconi assistentes, depositis in manibus servitorum mantellis, sic in Rocheto serviunt Papæ dum lavat, Episcopus aquam cum portante infundendo, & Diaconi mantile, quod ab Auditore acceperant, hinc inde tenendo. Dum Papa lavat manus, non Prælati, sed laici omnes genuflectunt. Cardinales, & Prælati stant capite detecto. Cum Papa laverit, reaptetur mensa ante eum, & tres Cardinales, qui illi servierant, capiunt suos mantellos, & Mitras, & vadunt ad loca sua, & Imperator apud sedem suam primo stans lavetur suis cæremoniis, deinde Domini Cardinales laventur stantes ante mensas cum Mitris in capite; post eos laventur Prælati stantes sine Mitris, & seculares siqui sunt, detectis capitibus. Stabunt ante mensas lavantes eo ordine quo sedere debent in mensa, Prior Episcoporum in capite ad dextram; si aderit Rex aliquis, erit in secundo loco; si plures Reges, mixti erunt cum primis Cardinalibus, primo Cardinalis, deinde Rex successive. Si erunt (1) Maximi Principes, aut Filii, vel Fratres Regum, si non serviunt Papæ, debent sedere inter Diaconos Cardinales, vel post eos, pro eorum dignitate, & conditione; primogenitus autem Regis, quia Rex futurus putatur, post primum Presbyterum Cardinalem erit, sed nullo modo inter Episcopos. Et hoc tam in conviviiis, quam aliis publicis actibus, quamvis nostro tempore, aliquorum sive ambitione, sive ignorantia aliquando sit servatum contrarium.

COMMENTARIUS.

I. **Q**uibus indutus vestibus Papa olim sederet in mensa convivii, ex antiquis Romanis Ordinibus dictum superius fuit. Quod primam lotionem manuum spectat, de qua primum in hoc §. agitur, juxta Romanum Ordinem xiv. auctore Gajetano, Capite lxxxvi. cui concinit Amelius in Ordine Romano xv. Cap. lxx. Papa paratus, ubi a duobus Diaconibus Cardinalibus ductus est ad mensam solemniter paratam, ibi sedet, Episcopo Cardinale sibi dante aquam, & duobus Diaconibus Cardinalibus, uno a dextris, alio a sinistris tobuleam tenentibus, ipsoque, qui a dextris est, etiam anulum Papæ tenente, dum lavatur. Moneant præterea memorati Ordines, quod prædicti tres Cardinales in prima, & secunda manuum lotionem, & mensa benedictione, debent esse sine mantellis, & Mitra, dum Papæ ministrant, sed in gratiarum actione resumunt mantellos suos, & Mitras loco suo; & facta per Papam primam manuum lotionem, & mensa benedictione, de qua infra serius dicetur, in secunda lotionem vadunt omnes ad sedendum; & tunc omnes Cardinales, cum sederint, manus suas supra mensam in platellis suis lavant, & sibi mutuo serviunt. Ita laudati Romani Ordines xiv. & xv. ex quibus desumptum videtur, quod in hoc præsentis §. de manuum lotionem ante comestionem præscriptum est, tametsi aliæ additæ sint cæremoniæ, quæ ipsam Summi Pontificis manuum lotionem spectant. Ceterum moris fuisse antiqui, ut convivæ antequam accumberent lavarent, pluribus docet eruditus Bulengerus Libro 1. De conviviiis, Capite xli.

II. Teste Paride Grassio in suo ms. Diario, ubi acta Julii II. Papæ enarrat anno II. de solemnino convivio Papæ agens, nobilior ex omnibus laicus etiam Imperator, aut Rex aquam ad la-

vandas manus Papæ deferre debet hoc ordine: Duo Scutiferi cum torciis quatuor, Mazzorrii quatuor, Magister domus, Magister Cæremoniarum, duo alii Scutiferi cum torciis, unus Cæremonarius, aut Nobilis cum mantili ad tergendas manus, & postea Nobilis, aut Princeps portans fontes, idest boccalia duo Papalia, adjuvante Magistro Cæremoniarum, sive Aula, idest, Scalco, aut alio. Prior Cardinalium, & duo Diaconi assistentes, depositis in manibus servitorum suorum mantellis, sic in Rocchetto serviunt Papæ, dum lavat manus. Prior Cardinalium, aquam cum portatore infundendo, & Diaconi mantile tenendo. Addit mox, quod etiam in nostro hoc præsentis §. edicitur: Dum autem Papa lavat manus, non Prælati, sed laici omnes genuflectunt. Cardinales & Prælati stant capite nudo. Tum vero demum subjicit: Cum autem Papa laverit manus, recomponatur mensa ante eum, & tres Cardinales, qui illi servierunt, capiunt sua mantella, & vadunt ad loca sua, & lavant etiam ipsi, sed stantes ante suas mensas, & dum Cardinales lavant manus, unus eis servit de mantile illud explicando, & tenendo, dum alius lavat. Vide infra §. xii. ex quo ea verba desumpsit Grassus, ubi ait, quod dum Cardinales lavant manus, unus eis servit de mantile &c. Ceterum quod alteram lotionem spectat, de qua nos infra in Commentario ad ipsum §. xii. ita idem Grassus scribit: Finita cæna fit secunda lavatio manuum, & tunc secundus Nobilis laicus etiam si Rex sit, portet aquam manibus Papæ cum prioribus cæremoniis. Sed neque omittendum, quod de ipsa manuum lotionem docet ms. Cæremoniale Davantriæ, ubi agit de Rege convivante cum Papa: Excepta, ait, prima die, serviet idem Rex de speciebus Domino Papa, & de aqua ad lavandum manus &c.

§. VII.

De quatuor Patriarchis, & aliis.

Consueverunt antiqui ponere Patriarchas quatuor Ecclesiarum principalium inter Episcopos

(1) Ita quoque in Romana editione, in aliis autem prædictis legitur: si erunt mixtim principes &c.

scopos Cardinales mixtim; nostro tempore, credo propter declinationem, siue potius extinctionem illarum, cum sint quodammodo titulares, ponuntur immediate post Cardinales. Deinde Assistentes Papæ, tum Oratores Prælati, inde Archiepiscopi, Episcopi, Protonotarii, Abbates, Subdiaconi, Auditores, Clerici Camera, & Acolythi. Ad sinistram vero erunt (1) Diaconi Cardinales, & cum eis Principes, quos prius diximus, si aderunt; post eos autem, si præsentibus erunt, alii Principes inferiores, illi tamen qui solent præcedere Oratores Regum. Deinde erunt Oratores laici, & non Prælati, & cum eis Senator, & tres Conservatores Urbis. De aliis autem laicis, quia (2) sunt extraordinarii, nihil ponimus, nam admitti solent ad voluntatem Pontificis, & non ordinariæ. Advertat autem Magister Domus, ut prius simul cum Clerico Cæremoniarum ponat in scriptis nomina, & ordinem invitatorum ad convivium, & maxime laicorum; & si quæ sunt contentiones de præsentia, componantur prius; quod si ibi orirentur, & nolint componi, ambo contententes honeste jubeantur exire; si tamen esset colorata contentionis causa, & non temeraria, quia tunc solus temerarius ejiciendus esset. Quod autem de Imperatore dicimus, intelligimus de Imperatore Romanorum, non autem Græcorum, nam ille, ut Rex tractatur. Poterunt lavari post primos plures eodem ordine.

COMMENTARIUS.

I. **Q**uatuor Patriarchæ, sunt Constantinopolitanus, Alexandrinus, Antiochenus, & Hierosolymitanus, de quibus diximus Tomo I. Conciliorum in Commentario ad Canonem v. Concilii IV. Œcumenici Lateranensis. Insignia fuerunt eorum olim privilegia, unde non mirum, si consueverunt antiqui, ut ait hic noster §. *ponere Patriarchas quatuor Ecclesiarum principalium inter Episcopos Cardinales mixtim*. Ait in hoc eodem §. Patricius hujus Cæremonialis ordinator, poni debere ipsos Patriarchas *immediate post Cardinales*, ob eam nempe rationem, quod *propter declinationem, siue extinctionem illarum*, Patriarchalium scilicet Ecclesiarum memoratarum, *sint quodammodo Titulares*. Sed inepta hæc ratio est, tanta enim est S. R. E. Cardinalium dignitas, ut quemadmodum docet S. Petrus Damiani, qui claruit Seculo XI. Patriarcharum, & Primatum jura transcendant. Quamobrem etiam si laudati quatuor Patriarchæ Ecclesias suas regerent, inferiores Cardinalibus forent ob insignes præroga-

tivas, quibus a Romanis Pontificibus Maximis donati fuerunt. Sed nec puto, recte loquutum Patricium, cum in hoc eodem §. subdit, quod de honore dicitur exhibendo Imperatori cum Pontifice convivanti, intelligi *de Imperatore Romanorum, non autem Græcorum, nam ille, ut Rex, tractaretur*. Quis enim persuadere sibi id posset, Græcos Imperatores omnium superbissimos ei cæremoniæ subjici; præsertim cum sciamus Imperatorem, qui ad Generalem Florentinam venit magnis sumptibus Sedis Apostolicæ, multum honorificentia non modo a Cardinalibus, sed ab ipso Pontifice Maximo Eugenio IV. exegisse. Nota hæc sunt ex Historia ipsius Concilii; unumque addiderim, quod de Regibus hoc loco præscribitur, non ita facile obtineri posse ab eisdem, tametsi & Apostolicæ Sedi, & Romano ipsi Pontifici obsequium omne exhibere non dedignentur. Sed hujusmodi convivia, cæremonialve præscriptas, usu aliquando comprobata fuisse, nusquam legi; multo minus cæremoniæ ipsæ hodie haberent locum.

§. VIII.

De benedictione mensæ.

Postquam omnes laverint, Pontifex benedicit mensam stans sine Mitra, & tunc Diaconi assistent. Finita benedictione, sedet, imponitur Mitra, & Diaconi vadunt ad loca sua, & sedentibus omnibus ordine quo steterant, portantur fercula.

COMMENTARIUS.

I. **B**enedictio mensæ, seu ciborum, est ritus plane antiquissimus, ejusque frequens apud historicos mentio. Extat antiquissimi Aristæ de LXX. Interpretibus Commentarius Tomo VII. Bibliothecæ Patrum, in eoque sic inter alia legimus: *Ut a mensis inceptamus, recte jussit Moses, tunc Deum laudari, cum mensæ accumbimus*. Idipsum Judæos, & primos ex Judæis Christianos, cum summa gravitate stantes, To. I.

antequam discumberent decenter sublatis ad Cælum oculis, & manibus, factitasse, refert Philo Judæus oculatus eorum, quæ de his scripsit, testis. Porro utilitatem, quæ ex benedictione orationeque ante cibi sumtionem facta proficiscitur, exponit S. Joannes Chrysostomus in Homilia, *De Fide Annæ*, docens, eam tum ad dæmones abigendos, tum etiam ad nos ipsos in sobrietate continendos valde prodesse. Tertiam hu-

(1) Ita in editione Romana; in Veneta vero I. & Colonienſi, defunt ea verba, *erunt Diaconi Cardinales*.

(2) Ita quoque in Romana editione, in aliis vero citatis legitur, *qui*.

hujus sancti instituti rationem adjecit S. Basilius Magnus in Epistola I. Gregorio Theologo scribens, ut scilicet non solum pro his caducis escis laudetur Deus, sed etiam pro iis, quæ in posterum nobis in Cælis repositæ sunt, spiritualibus escis, sanctisque deliciis. Observat hæc eruditissimus Antonius Caracciolus Clericus Regularis Parte II. Constitutionum sui Ordinis, Cap. III. Num. VII. ex iisque addiscimus, benedictionem mensæ, seu ciborum, jam olim fuisse in usu non modo apud Monachos, & Clericos, ut patet ex Regula S. Benedicti Cap. XLIII. ubi plura notavit Martene, sed etiam apud omnes Christianos, exemplo Christi Domini, qui, ut sæpe in Evangeliiis legimus, cibum benedicere solitus fuit, quem vel ipse sumsit, vel aliis distribuit: *Acceptis panibus*, inquit S. Marcus Cap. VI. *intuens in Cælum benedixit*. Lucæ quoque Cap. IX. *Respexit in Cælum, & benedixit, ac fregit, & distribuit discipulis &c.* Post resurrectionem denique, ut testatur Lucas Cap. XXIV. *accepit panem, & benedixit, & porrigebat illis*. Atque his adde quod scribit Apostolus in Epistola I. ad Timotheum Cap. IV. ubi ait, *nihil rejiciendum, quod cum gratiarum actione percipitur; sanctificatur enim per verbum Dei, & orationem*.

II. Hinc itaque mos inolevit benedicendi mensam, seu cibos, priusquam sumantur, verbis sacris, & salutari signo Crucis, ad quod alludit S. Cyrillus Hierosolymitanus Catechesi XIII. ubi ait: *In quibus Crux fiat, & in panibus comedendis, & in poculis bibendis*. Formula benedictionis mensæ, quæ in fine Breviarii Romani legitur, est profecto antiqua, eamque explicat Durandus Lib. IV. *De Divinis Officiis*, Cap. LX. ubi ita inquit: *Benedictio mensæ dupliciter inchoatur. Primo quia major incipiens dicit, Benedicite, & ceteri respondent, Dominus; quia sicut debemus Domino per gratiarum actiones benedicere, ad quod major dicendo Benedicite, hortatur; sic & indigemus benedicti a Domino suæ gratiæ infusione, quam illi optantes postulant respondendo, Dominus, supple, nos benedicat suæ gratiæ infusione. Secundo modo, majore incipiente, Benedicite, ceteri similiter respondent, benedicite, ad ostendendum, quod ad Dei benedictionem debemus mutuo nos hortari. Potest etiam dici, quod in priori modo reverentia Dei consideratur; cum enim respondetur, Dominus, supplendum est, benedicat, quia nos digni non sumus benedicere. In secundo vero reverentia Superioris; cum enim respondetur, Benedicite, supplendum est, Vos Pater; quia minor, majore præsentem, benedicere non debet; deinde majore versus inchoante, ceteri coadjuvant, ad notando, quod inferiores coadjutores sunt Præpositorum in oneribus supportandis. Ita Durandus citato loco, ubi etiam morem reprehendit, qui suo ævo in nonnullis Ecclesiis invaluerat, in quibus pueri benedicebant mensas Prælatorum, pro eo quod Lectoris officium est benedicere panem. Convenientius id fieri ait per Prælatos, exemplo Christi, qui in Emmaus mensam coram duobus discipulis benedixit, Lucæ Cap. XXIV.*

III. Quamvis vero benedictio mensæ non sit adnexa sacro Ordini, possitque & peragi a laicis, atque ab ipsis feminis, uti docet Quartus, *De Benedictionibus*, Titulo III. Sectione VII. in Doctrina morali, Dubitatione I. decet quammaxime, ut, ubi præsens est Sacerdos, is benedicat mensam, non vero alius eo inferior; meritoque S. Hieronymus in Epistola LXXXV. Diaconos Romanæ Ecclesiæ carpit, qui supra Presbyteros se efferentes, etiam coram illis mensas benedicebant: *In Ecclesia Romæ Presbyteri sedent, & stant Diaconi. Licet paulatim increbescantibus vitis, inter Presbyteros, absente Episcopo, sedere Diaconum viderim, & in domesticis convivii benedictiones coram Presbyteris dare*. Certe Gillebertus Lunicensis Episcopus de Usu Ecclesiastico, ait, Sacerdotem præsentem Episcopo benedicere posse prandium, sed ejus tamen jussu, ut apud Regulares dari solet ea benedictio ab hebdomadario, qui tamen benedictionem non incipit, nisi a Superiore jussus, ob reverentiam Superiori debitam, ut inquit laudatus Quartus loco citato. Ceterum antiquus est mos, ut in Regum ac magnorum Principum mensis, Cappellani eorum majores eam benedictionem præbeant, teste Theodulpho, qui officium Archicappellani Regii describens, ita inquit:

Stat benedicturus Regis potumque cibumque.

IV. Ex aliorum Magnatum conviviiis, ubi Magnates vere christiani sunt, benedicit mensam domesticus eorum Cappellanus, qui etiam cum eisdem in mensa, ut fas est, sedet; dammandusque est quorundam Magnatum abusus, qui Christi Sacerdotem instar famuli habent, eumque mensæ cum aliis aulicis servire cogunt. Acriter illos reprehendit eruditus Saussayus in sua Panoplia Sacerdotali, ubi de hac benedictione agit, exemplumque adducit S. Martini Episcopi, qui invitatus ad mensam a Maximo Imperatore focium sibi adhibuit Presbyterum, eundemque Imperatori prætulit. Cum enim is jussisset Martino prius poculum offerri, quasi ab eo recepturus, non sine ingenti stupore vidit sibi prælatum Presbyterum Martini comitem, cui Martinus poculum prælibatum in manum prius dedit. Sed his omis, de memorata benedictione mensæ seu convivii, quod dari olim solitum fuit a Papa, præsertim Feria V. sanctioris hebdomadæ, agunt Romani Ordines XIV. Capite LXI. & XV. Capite XXXVII. *In Cæna Domini*, inquit, *ad benedicendam mensam dicitur absolute sine Gloria Patri, Versiculus, Christus pro nobis factus est obediens usque ad mortem, & non amplius; & deinde dicitur, Pater noster, secrete; quo completo sine pronuntiatione aliqua Dominus Papa signat tam mensam suam, quam alias. Hodie non dicitur, Jube Domne benedicere, nec, Tu autem; sed mensis signatis, ut dictum est, vadunt ad sedendum, prout est superius ordinatum. Porro quod in hoc §. edicatur, faciendam esse mensæ benedictionem a Papa stante sine Mitra, in citato ms. Diario Julii II. composito a Paride Grasso Papalium Cæremoniarum Magistro legitur, stante capite nudo.*

§. IX.

De ordine & modo portandi fercula.

Primum ferculum portabit nobilior Princeps, sive Imperator, sive Rex sit. Secundum

dum alius dignior post eum, & sic successive; & si erunt ex illis, qui debeant sedere in mensa, portato ferculo, sedeant in loco suo. Et notandum, quod Imperator, Rex, seu maximus Princeps capit ferculum, quod portare debet ad Pontificem, extra portam Aulæ convivii ab aliquo familiari Pontificis illuc apportatum. Alii inferiores pro ferculo ad coquinam vadunt. Magister Sacri Hospitii, & Magister Domus baculos in manibus tenentes, & in habitu sibi condecienti deducunt portantes fercula; quæ quidem fercula ad Pontificem; & Imperatorem tantum cooperta portari debent; aliis autem etiam Regibus detecta, & similiter vinum; possunt (1) tamen portari cooperta fercula & maxime Principibus usque ad Aulam convivii, & deinde antequam appareant in conspectu Papæ, detegi.

COMMENTARIUS.

I. **V**aria præscribit hic noster §. & quidem non addubito, quin in convivio Papæ, si Imperator, vel Rex adesset, primum ferculum ad ipsum deferret. Si enim hi summi Principes ex pervetusto ritu, de quo alias dictum est, vel postremis hisce seculis non indignati sunt genuflectere Pontifici Maximo, pedem ejus osculari, ac stapham equi tenere, multo minus, illud eidem exhibere obsequium recusabunt, portandi scilicet primum ferculum. Porro difficultas in eo consistit quod de Regibus in mensa Pontificis una cum Imperatore convivantibus in hoc §. edicitur; ut nimirum id inter illos discrimen servetur, ut ad Pontificem qui-

dem, & ad Imperatorem tantum cooperta fercula portari debeant, *aliis autem etiam Regibus detecta &c.* Vix enim Reges, qui Imperatore inferiores se minime recognoscunt, tunc ferrent sibi in ea cæremonia præferri Imperatorem, cui quidem nostris hisce præsertim temporibus in nulla re cedunt. Notæ sunt diuturnæ, ac repetitæ contentiones causa præcedentiæ inter maximorum Principum Oratores; notumque omnibus est, quam diminuta sit hodie majestas Imperatoris, cui alias olim omnia fere Regna subdita erant. Sed vicit tamen, debetque omnes vincere Majestas Imperatoria, uti ex variis exemplis probari posset.

§. X.

De proba cui & quomodo facienda.

Item in præsentia Pontificis nulli omnino fit publice prægustatio, nisi ipsi Pontifici, & Imperatori tantum. Pro Rege autem, aut maximo Principe poterit fieri a suis, si voluerint, in credentia, vel ubi capiunt fercula. Pro Pontifice, & Imperatore fiet ibi, unde capiuntur a dantibus, & in mensa a portante, & de omnibus rebus.

COMMENTARIUS.

I. **P**roba, probatio, probamentum, idem sunt, ac prægustatio, de qua supra, & aliis in locis nos fuisse jam disseruimus. Meminit inter alios ejus vocis Joannes Carrerius Anticardinalis, quem quidam de Thurena appellant in Epistola ad Joannem Armaniaci Comitem data anno mccccxxix. apud Martene Tomo II. Anecdotorum, col. 1732. ubi agens de electione novi Pontificis post Benedicti XIII. seu Petri de Luna obitum peractæ, sic ad rem inquit: *Post completas locutiones, dictus Dominus Rodericus*, erat is unus ex pseudocardinalibus creatis ab ipso Benedicto, *in comessionibus mutuis faciebat fieri probam, sive credentiam dicto Domino Ægidio, licet sibi non consuevisset fieri proba, sive credentia, nec esset status, seu dignitatis, quod ei fieri deberet; unde assistentes præsumserunt sicut ex post apparuit, fore verum, quod dictus Dominus Rodericus promiserat Domino Ægidio ipsum facere Papam.* Is Ægidius dictus Sancii Munionis Canonicus Barcinonensis, suffectus in locum pseudopapæ Benedicti XIII. appellari se fecit Clementem VIII. uti videre est apud Pagium in Vita Martini Papæ V. Num. LI. Quicquid autem de iis sit, ex recitato Joannis

Carrerii testimonio illud addiscimus, prægustationem illam, quam in comessionibus mutuis prædictus pseudocardinalis Rodericus de Luna volebat fieri ipsi Ægidio, fuisse profecto indicium ejus cæremoniæ, quæ ex antiquo ritu in mensa Summi Pontificis, ac magnorum Principum solita est exhiberi.

II. Certum vero & illud est, quod & nos alias abunde ostendimus, introductos primitus fuisse Prægustatores in Principum mensis, ob veneni periculum, cui ipsi obnoxii sunt; ad ipsumque periculum alludit Juvenalis Satyra VI. ubi ita pupillos ditiores admonet:

*Vos ego pupilli moneo, quibus amplior est res,
Custodite animas, & nulli credite mensæ,
Livida materno fervent adipata veneno
Mordeat ante aliquis quicquid porrexerit illa,
Qua peperit, timidus prægustet pocula pappas.*

III. Porro ut notat Scholiastes in ipsos Juvenalis versus, ipsa mater, ut gratificetur secundo marito, veneno non raro tollit filios ex priore marito, ut ad illum rem integram deferat. Pappas vero pro eo hic accipitur, qui puerum alit, vel qui illius tutor est, uti ex Lexicis addiscere licet.

§. XI.

(1) Ita quidem in Romana editione; in Veneta, & Colonienſi legitur: *possunt tamen portari, & debent maximis Principibus &c.*

§. XI.

De lectione Scripturæ in mensa.

Cum primum convivium incipietur, in loco convenienti ponatur pulpitem, & Subdiaconus, sive Capellanus Papæ aliquid de Sacra Scriptura legat usque in finem convivii. Interim cum silentio, & sine strepitu omnia administrentur quamdiligentissime.

C O M M E N T A R I U S.

I. **M**oris antiqui legendi in mensa sacros Codices, testes sunt Patres, ac Synodi passim, qui eam lectionem inculcant. De S. Augustino ita scribit in ejus Vita Possidius Capite XXI. *In ipsa mensa magis lectionem, vel disputationem, quam epulationem, potationemque diligebat; & contra pestilentiam humana consuetudinis in ea scriptum ita habebat.*

Quisquis amat dictis absentium rodere vitam, Hanc mensam indignam noverit esse sibi.

Et ideo omnem convivam a superfluis, & noxiis fabulis, & detractionibus se se abstinere admonerat. Nam & quosdam suos familiarissimos Coepiscopos illius scriptura oblitos, & contra eam loquentes, tam asperè aliquando reprehendit, commotus ut diceret, aut delendos esse illos de mensa versus, aut se de media refectioe ad suum cubiculum surrecturum. Quod ego, & alii, qui illi mensa interfuimus, experti sumus. Noxiarum, otiosarumque confabulationum vitandi gratia in mensa, institutum a Sanctis Viris fuisse, ut sacra semper adhiberetur lectio, locuples testis est Cassianus Lib. IV. De institutis Renunciantium, Cap. XVII. ubi ita inquit: Illud autem, ut reficientibus Fratribus, sacra lectiones in Cænobiiis recitentur, non de typo Ægyptiorum processisse, sed de Cappadocum, noverimus; quos nulli dubium est, non tam spiritualis exercitii causa, quam compescenda superflua, otiosæque confabulationis gratia, & maxime contentionum, quæ plerumque solent in convivii generari, hoc statuere voluisse, videntes, eas aliter apud se cohibere non posse.

II. Ex recitatis hætenus Cassiani verbis manifeste apparct, Monachos Cappadoces aliis præbuisse exemplum, ut sacra lectio adhiberetur in mensa, eumque ritum didicisse ipsos a Magno Basilio Cæsareæ in Cappadocia Episcopo. Unde quemadmodum Basilio hæc laus debetur, quod primus in Oriente eam laudabilem invenit consuetudinem, ita parem promeruit laudem S. Augustinus, qui in Africanis Ecclesiis eandem consuetudinem vel instituit, vel firmavit, & inter alios S. Hilarius Arelatenis de quo ita scribit in ejus Vita Honoratus Massiliensis, Capite XII. *Cibum sine lectione non sumsit. Ab eodem in Civitatibus, nempe Galliæ, ita est inventa (vel, ut legit Lirinensis Codex, inventa) primitus consuetudo. Quod Hispanias spectat,*

statuit quidem Toletana Synodus III. habita. anno DLXXXIX. Can. VII. lectionem sacræ Scripturæ debere in omni Sacerdotali convivio haberi, vitandi causa ociosas fabulas: Pro reverentia Dei Sacerdotum, id universa Sancta constituit Synodus, ut quia solent crebro mensis otiosa fabula interponi, in omni Sacerdotali convivio lectio Scripturarum divinarum misceatur. Per hoc enim & anima adificatur ad bonum, & fabula non necessaria prohibentur. Inter alias hujus instituti causas jam hucusque allatas affertur & hæc alia ab Eutychiano, qui creatus Romanus Pontifex fuit anno CCLXXV. legiturque in Pœnitentiali Romano Titulo V. Capite II. *Recitetur sacra lectio, inquit, ut non tantum corporali cibo, imo verbi celestis alimento convivantes se refectos gratulentur.* Cui concinit S. Augustinus, qui in sua Regula mandat adhiberi eam in mensa Sacrorum Codicum lectionem, *ne sola nobis fauces sumant cibum, sed & aures esuriant verbum Dei.* Augustinum imitatus est S. Cæsareus Arelatenis Episcopus, cujus prandia, cœnasque spiritualibus semper lectionis sacræ epulis abundasse, ut utriusque hominis epulo lætitia conduplicaretur, tradit illius Vitæ Scriptor, sic inter alia inquit: *Ad prandium vero, & ad cœnam mensa sua sine cessatione quotidie legebatur, ut uterque interior exteriorque homo satius, refectioe duplici lætaretur.*

III. Porro ut alia exempla Sanctorum Pontificum omittam, & varias eorum Constitutiones de sacra lectione habenda in mensa, constitutum & illud est in nostro hoc præfenti §. ut dum aliquid de Sacra Scriptura legitur in solemni illo Papæ convivio, *interim cum silentio, & sine strepitu omnia administrentur quamdiligentissime;* impediretur enim auditio ejus lectionis, ideoque merito in Religiosorum mensis juxta eorum Constitutiones a Martene allatas in Opere, *De antiquis Monachorum ritibus,* & ab aliis Auctoribus, qui de Regulari disciplina scripserunt, servari silentium rigide præceptum est, pœna etiam contra contumaces constituta. Certe præscripsit in Regula sua S. Pachomius, *quod si quis vel loquutus fuerit, vel riserit in vescendi tempore, aget pœnitentiam, & in eodem loco mox increpabitur, & stabit donec surgant alii de vescendo.* Similia legere est in aliis priscis Monachorum Regula.

§. XII.

De cæremoniis servandis cum Papa bibit.

Cum Pontifex bibit, consueverunt omnes adstantes præter Episcopos, & superioris dignitatis

tatis Viros genuflectere; quod servari nostris temporibus vidimus, quamvis in nullo Cæremoniarum Libro id legerimus.

COMMENTARIUS.

I. **I**psum, quod in hoc §. refertur, confirmat in ms. Diario Julii II. anno II. Paris de Grassis Apostolicarum Cæremoniarum Magister, ubi de solemnii convivio Papæ agit: *Similiter*, inquit, *vinum cum Papa bibit, consueverunt omnes adstantes præter Episcopos, & superioris dignitatis viros genuflectere*. Mirum plane videri potest, quod Episcopi excipiantur, cum constet, quo tempore ordinatum est hoc nostrum Cæremoniale ab Augustino Patricio Apostolico Cæremoniaro, Episcopos vile erga Cardinales ministerium exercuisse, teste eodem Patricio infra Lib. III. Cap. XIII. quod inscriptum est, *De reverentia Episcoporum erga Cardinales*; de quo abusu jam diximus. nos Tomo

IV. Conciliorum in Commentario ad Sessionem IX. Concilii V. Lateranensis, dicemusque iterum opportunius in explicatione prædicti Capituli XIII. Libri III. Cæremonialis. Quid quod non sine turpi abusu, ac superbo fastu alicubi Barones id ab aulicis suis obsequiis exigunt, ut ubi ad eos ad mensam assidentes vinum deferunt, medii incedentes inter duo funalia accensa gestantes, genuflectant deinde omnes, caputque inclinent, dum ipsi bibunt? Dicitur nequit, quanta sit Baronum quorundam superbia, qui etiam æmulantes prærogativas Summi Romani Pontificis osculari sibi pedes a subditis non verentur. Sed de hujusmodi Baronum insania supervacuum est amplius loqui.

§. XIII.

De secunda lotione, & gratiarum actione.

Epulis abunde subministratis, fit secunda lotio manuum, & tunc secundus nobilis laicus portat aquam consuetis cæremoniis. Prior Episcoporum Cardinalium, & duo Diaconi, dimissis mantellis, & Mitris, ut supra, serviunt, deinde revertuntur ad loca sua. Lavantur & alii ordine suo, quo supra, sedentes tamen; & dum Cardinales lavant, unus servit alteri de mantili, illud explicando, & tenendo, dum alius lavat, & sic successive. Ponuntur deinde vinum & confectioes, sive species, ut habent antiqui Codices; & deum, finito convivio, Lector dicit: *Tu autem Domine miserere nobis*, nisi sit in Coena Domini, quia tunc non profertur: *Tu autem*. Surgit Pontifex sine Mitra, assistunt ei Diaconi, & redduntur gratiæ, ut in Ordinario. Omnibus completis, reducitur ad cameram suam, & alii ad propria divertuntur.

COMMENTARIUS.

I. **N**otandum hoc loco primum est, ritus in hoc §. præscriptos, desumptos pene ad verbum esse ex Romano Ordine XIV. Cap. LXXXIX. atque ex Ordine XV. Capite LXXII. *Comestione sumpta*, inquit, *Papa lavat manus, ministrantibus sibi Episcopo, & duobus Diaconibus Cardinalibus, ut prius: qui tres Cardinales, resumptis mantellis, & Mitris suis, redeunt sedere cum aliis Cardinalibus in suis mensis. Tunc tam singuli ipsorum, & quilibet Cardinalis, & unusquisque similiter sedendo lavabit manus suas, serviente fundente aquam Cardinali lavanti. Cardinales autem, qui assistunt, teneant tobaleam, unus ex una parte lavantis, alius ex altera, & sic sibi invicem mutuo serviant*. Subdunt mox etiam & alios ritus in eodem hoc nostro §. relatos: *Quibus omnibus lotis, dantur species, & vinum. In fine, remotis mensis, surgit Dominus Papa, & omnes, & ipso stante super scabellum suum, ministrantibus sibi duobus Diaconibus, & Episcopo Cardinalibus, redduntur gratiæ, ut infra sequitur. Illis autem redditis, Papa reducitur a duobus Diaconibus prædictis ad cameram, vel anticameram suam, ibique sedet in Faldistorio cum Cardinalibus tantum Fratribus suis, ipso, & eis paratis, ut fuerat in mensa; consequenter sacris exutus vestibus, discalciatis sandaliis requiescit. Cardina-*

les vero, & alii Prælati redeunt ad hospitia sua parati cum Mitris, sicut in comestione steterunt. Hactenus memorati Romani Ordines XIV. & XV. quorum tamen alter nonnihil a primo variat, præsertim in postremis recitati loci verbis, quæ quidem in ipso Ordine Romano XV. citato Capite LXXII. ita leguntur: *Cardinales vero, & alii Prælati redeunt ad eorum hospitia cum Mitris eques* (forte legendum, equites) *tamen equis non paratis, nec alias coopertis; sicut in comestione steterunt, ita recedunt*.

II. Lotis manibus, ponuntur deinde vinum & confectioes, sive species, ut habent antiqui Codices. Confectiones, sive etiam confectæ, quæ etiam, ut ait hic noster §. in antiquis Codicibus species appellantur, sunt dulciaria, seu fructus saccharo conditi, qui hodieque apponi in fine convivii solent. Porro consueverunt jam olim Romani Pontifices diebus jejunii vinum, & species largiri ad cœnam, ut docet nos Ordo Romanus Romanus XIII. sive Cæremoniale jussu Gregorii Papæ X. editum, Num. XIV. in fine, ubi de Vigilia Nativitatis Domini, & de Vesperis ea die cantatis agit; iis enim finitis, Cardinales, alique procedebant ad Aulam Papæ, ubi parata erant vina multa, & diversa, & claretum, & species. Claretum vinum erat optimis aromatis conditum, quod ita explicat Bartholomæus An-

Anglicus, Libro xix. De proprietatibus rerum, Cap. lvi. sic inquit: Claretum ex vino, & speciebus aromatis confectum; nam species aromatica in subtilissimum pulverem conteruntur; & in sacco lineo, vel mundo cum melle, vel zaccara reponuntur. Vino autem optimo species perfunduntur, & reperfunduntur, quemadmodum fit lenivia, & tandiu renovatur perfusio, donec virtus specierum vino incorporetur, & optime clarificetur, unde a vino contrahit fortitudinem & acumen; a speciebus autem retinet aromatisatam, & odorem, sed a melle dulcedinem mutuatur, & saporem. Jam non omnia clareta, de quibus frequentissime loquuntur Romani antiqui Ordines, fuisse fictitia, scite admonet eruditus Morettus, De Presbyterio, Parte 1. Sectione v. in Nota ad Num. xii. viderique de iis possunt, quæ inter alios scribit Andreas Baccius Libro vi. historiarum vinorum pag. 310. & Libro vii. pag. 357. Ceterum quod etiam extra convivium soliti essent Romani Pontifices species, & vinum die Natalis Domini Pœnitentiariis, aliisque donare, docet nos laudatum Cæremoniale Gregorii X. Num. xv. in fine, ubi sic ait: Eodem die omnes Pœnitentarii cum eorum famulis, & Eleemosynarius Hebdomadarius, & Vicecancellarius cum tota Cancellaria veniunt videre Papam, & Papa dat omnibus species, & vinum &c.

III. Demum juxta nostri §. præscriptum, finito convivio Lector dicit, Tu autem Domine miserere nobis; nisi sit in Cœna Domini, quia tunc non profertur, Tu autem. Surgit Pontifex cum Mitra, assistunt ei Diaconi, scilicet Cardinales, & redduntur gratias, Deo scilicet post absolutum convivium, ut in Ordinario, idest Libro Rituali. Sane ritus actionis gratiarum servatus in prandio dari solito a Papa Feria v. in Cœna Domini ita enarratur in Romano Ordine xv. Auctore Amelio, Capite lxxiii. In fine prandii in re gratiarum actione repetitur Versiculus, Christus factus est obediens, ut supra (scilicet usque ad mortem, & non amplius) dicitur immediate, Pater noster; quo finito, Papa dicit absolute Orationem, Respice quæsumus Domine &c. nec pronunciat, Qui tecum; nec, Fidelium animæ; sed solum sine aliqua pronuntiatione Dominus Papa signat se, & omnes alios devote, nihil dicendo. Antè Amelium meminit hujus ritus Jacobus Gajetanus in suo Ordine Romano xiv. Cap. xc. In fine prandii, inquit, repetitur Versus, Christus factus est &c. ut supra. Postea immediate dicitur hinc inde Psalmus, Miserere mei Deus, sine Gloria Patri. Postea secreto dicitur, Pater noster. Quo finito, dicit Papa absolute Orationem, Respice quæsumus Domine super hanc familiam &c. & non pronuntiat, Qui tecum; nec Fidelium animæ; sed solum sine aliqua permutatione Dominus Papa signat se, & omnes devote. Consentanea hæc sunt memorato Romano Amelii Ordini xv. sed luculentius tamen explicata.

IV. Gratiarum actio refectionem immediate consequitur, & quidem ex pervetusto ritu, cujus mentionem facit Moyse in Deuteronomio Cap. viii. his verbis: Cum comederis, & biberis, & satiatus fueris, memor esto Domini Dei tui. Quem locum egregie explanans S. Joannes Chrysostomus Homilia x. in Genesim, ita inquit: Absurdum fuerit, si cum famuli nostri, si quan-

do partem aliquam eorum, quæ apposita nobis sunt, acceperint, nobis gratias agant, beneque nobis precantes abeant, nos cum tot tantisque fruamur bonis, ne hoc quidem honoris Deo persolvamus; præsertim cum hinc multam simus assequuturi securitatem. Ubi enim precatio, & gratiarum actio, eo Sancti Spiritus advenit gratia, abiguntur demones, & omnis adversaria potestas diffugit, ac discedit. Servavit hunc ritum Christus ipse, quippe qui post Cœnam illam postremam, & magnam ab eo cum Apostolis prius quam pateretur, sacratissime celebratam surgens, stansque una cum eis Hymnum cecinit, gratias agens, ut Matthæus refert Capite xxvi. Hinc inter alias Namnetensis Synodus Can. liv. postquam edixit, ut quando Presbyteri ad convivium conveniunt, prior eorum aliquis versum ante mensam incipiat, cibum autem, potumque per vices benedicant, tum secundum ordinem sedeant, ex eorum Clericis aliquis de Scriptura Sancta aliquid legat; ita deinde subjicit: Post refectionem Hymnum, Domini exemplo, dicant, seque talibus in locis contineant, ut ne ministerium vituperetur.

V. Neque vero Monachis solum, Clericisque, verum etiam Christianis omnibus usitatissimum olim fuisse priscis Christianæ Religionis sæculis, meritoque observatum, ut tam ante quam post cibum Hymni, precesque adhiberentur, tradit Lib. 1. Stromatum S. Clemens Alexandrinus, ostendens Ethnicis quænam Christianis Viris vivendi norma esset. Alii quoque prisci Scriptores, ac Patres, S. Basilii, Eusebii, & ut alios omittam, Prudentius, tam crebro memorant hunc ritum, ut superfluum sim, plura si velim addere. Certe Prudentius inter alios Hymnos, duos composuit, quorum alterum, ante cibum, alterum post cibum dixit, cujus primi versus hi sunt.

Pastis visceribus, ciboque sumto,
Quem lex corporis imbecilla poscit,
Laudem lingua deo Patri rependat.

Differit de eodem ritu non uno in loco S. Joannes Chrysostomus, præsertim vero in laudata Homilia xi. in Genesim, & ubi agit de Fide Annæ; institutum enim probat laudandi Deum post sumtum cibum, exemplo Annæ Samuelis Prophetæ matris: Surrexit, inquit, Anna, postquam illi comederant, & biberant in Silo, & constitit in conspectu Domini. Quod omnes faciunt tempus relaxationis, illa fecit tempus deprecationis, post convivium accurrens ad supplicationem: fontes lacrymarum emisit, mentemque prætulit sobriam, & vigilantem; ac post epulas adeo intente oravit, ut donum acciperet supra naturam, solveretque sterilitatem, ac natura imbecillitatem corrigeret. Hoc igitur a femina lucri consequuti sumus, ut sciamus & post convivium orare. Quisquis enim ad hoc præparatus fuerit, numquam in ebrietatem, ac vinolentiam incidet, numquam edacitate distendetur; sed quoniam expectationem deprecationis habet pro freno impositam animo, conveniente mensura attinget, ex omnibus, quæ fuerint apposita, multaque benedictione tum animam, tum corpus implebit. De antiquis Monachorum ritibus agendi gratias post refectionem videri potest eruditus Martene Lib. 1. Cap. ix. Num. xx. Ceterum quod quidam eum ritum olim negligerent, mox ita ipsos redarguit idem Chrysostomus

mus Homilia LXXXIII. in Matthæum, ubi sui, nostrique ævi abusum perstringit, sic inquit: *Audiant omnes, qui quasi porci, cum jam comederint, temulenti consurgunt, quando gratias agere Deo deberent.*

VI. Omnibus tandem completis, ut in nostro hoc §. notatur, *reducitur Pontifex ad Cameram suam, & alii ad propria revertuntur.* Juxta Romanum Ordinem XIV. Cap. LXXXIX. uti superius dictum fuit, redditis gratiis, *Papa reducitur a duobus Cardinalibus Diaconibus prædictis ad Cameram, vel anticameram suam, ibique*

sedet in Faldistorio cum Cardinalibus tantum Fratribus suis, ipso & eis paratis ut fuerant in mensa; consequenter sacris exutus vestibus, discalciatis Sandaliis, requiescit. Cardinales ait, & alios Prælatos redire ad hospitia sua paratos cum Mitris, sicut in comestione steterunt. Similia docet Amelius in suo Ordine Romano xv. Cap. LXXIII. ubi etiam ait, *Papam actis gratiis, reposito Fanone, & Mitra super caput ejus, cum Manto ad scapulas reduci a duobus Diaconibus Cardinalibus ad Cameram, vel anticameram, quæ vocatur Camera paramenti.*

§. XIV.

De habitu Pontificis, Cardinalium, & Prælatorum in convivio factò in die, quo Sacra ille publice non celebraverit.

Si autem solenne convivium hujusmodi fiet in die, quo Pontifex Sacra publice non celebraverit, omnia, ut prædicta sunt, servabuntur, nisi de sacris vestibus. Papa indutus Amictu, Alba longa, Cingulo, Stola pretiosa, & Manto rubro cum parvo caputio subtus, sive, si calores erunt, sine Manto cum caputio tantum, ducetur ad mensam. Cardinales, & Prælati erunt cum mantellis consuetis sine Superpelliceis, & sine Mitris: alia omnia, ut supra.

§. XV.

De mulieribus in convivio Pontificis non admittendis.

Advertendum tamen, quod nunquam in convivio Pontificis admittuntur mulieres, etiam si Imperatrix, Regina, vel Pontificis consanguinea esset.

COMMENTARIUS.

I. **N**ihil dicendum occurrit in explicationem §. XIV. quod vero §. XV. spectat, notandum plane illud est, quod in tuo Romano Ordine xv. Cap. LXXIV. docet Petrus Amelius, nempe non licere, quod aliqua mulier, quacumque dignitate præfulgeat, interveniat in comestione Summi Pontificis: *Item notandum, inquit, quod aliqua mulier numquam comedit in præsentia Romani Pontificis, etiam si esset Imperatrix, vel Regina.* Ita extitit observatum tempore Domini Clementis V. & Domini Joannis XXII. Domini Benedicti XII. Clementis VI. nec fuit auditum, quod aliquo tempore fuerit factum. Reprehendit mox idem Amelius morem contrarium quorundam Pontificum, qui vel suo ævo mulieres in con-

viviis admiscere: *Contrarium tamen tempore Domini Urbani V. Domini Gregorii XI. aut Urbani VI. contrarium autem ejus etiam fuit observatum tempore Bonifacii IX. & Joannis XXIII. Summorum Pontificum, & male.* Ita Amelius in suo Ordine xv. Romano, in cujus tamen codice non nemo recentiori manu scripsit: *Imo optime servare; nam & Christus comedit cum mulieribus. Itaque recte fecerunt Innocentius, Alexander, & reliqui.* Loquitur plane hic auctor de Innocentio VIII. & Alexandro VI. verum id magnopere improbat in ipso Alexandro ejus Diarii auctor, uti in citatum locum Romani Ordinis xv. Mabillonius notavit. Cæterum quod edicit hic noster §. legitur etiam in aliis Cæremonialibus Libris.

QUÆ MUTANTUR SI CORONATIO PONTIFICIS FIAT EXTRA URBEM

TITULUS IV.

§. I.

Quæ supra diximus de Consecratione, Benedictione, & Coronatione Romani Pontificis, omnia servabuntur etiam si extra Urbem Romanam fient, præter infra scripta. Cum Papa ad Ecclesiam venerit, ubi ea fieri debent, Canonici, & Capellani illius Ecclesie illi obviam exhibunt processionaliter, sed non recipiuntur ad osculum pedis, ut

Canonici S. Petri, Intrabit Pontifex in Ecclesiam, & in medio genuflexus orabit versus Altare majus, Deinde ibit ad Capellam, ubi paramenta capere debet convenienti spatio ab Altari majore distante, ut commode Processio possit inde explicari. Alia omnia usque ad actum Coronationis fient, ut dictum est; sed ipsa Coronatio fiet vel supra gradus, vel loco commodiori, & magis in conspectu populi; nam ibi parandum erit suggestum, ubi majus erit spatium ad capiendam multitudinem. Pontifex (1) coronatus poterit equitare cum solemnibus Processione, ut ad Lateranum consuevit, ad aliquam aliam Ecclesiam, & in via fient jactus pecuniarum, & Judæi obviabunt cum Lege, & respondebitur, & fiet, ut in via ad Lateranum. Et cum pervenerit ad dictum locum, descendet, & super Sedem in loco honesto sibi introitu Ecclesiæ præparatam sedebit, & tunc extrahetur sibi Regnum, & imponetur sibi Mitra, & adstantibus sibi hinc inde Diaconis, & deinde in ordine aliis Cardinalibus, a priore Presbyterorum Cardinalium cum Subdiaconis, & aliis Officialibus consuetis fient Laudes, *Exaudi Christe*, ut dictum est superius. Tum Pontifex ascendit ad Altare majus, præcedente Clero illius Ecclesiæ, & cantante, *Te Deum laudamus*. Procumbet super Faldistorio ante Altare majus ad Orationem sine Mitra; & finito, *Te Deum*, factaque oratione, ascendet ad Altare, & benedicet populo. Deinde assumpta Mitra ascendet ad Sedem eminentem, & dat Præbyterium Cardinalibus, & Prælatis; & finitis omnibus vadit ad locum, ubi ordinatum est convivium, vel ad Cameram suam, si privatim prandet; & omnia servantur, ut in Urbe, quæ servari possunt.

COMMENTARIUS.

I. **C** Reati extra Urbem Summi Pontifices, jam multi a Scriptoribus recensentur, ac novissime ab erudito Sandino ad calcem Libri, de Romanorum Pontificum Vitis; fuerunt autem illi Callistus II. Urbanus III. Gregorius VIII. Clemens III. Honorius III. Innocentius IV. Alexander IV. Urbanus IV. Innocentius V. Nicolaus III. Martinus IV. Honorius IV. Bonifacius VIII. Clemens V. Alexander V. Joannes XXIII. Martinus V. His & illi addi possunt, qui post Clementem V. creati in Gallia fuerunt Papæ Avenionenses, nempe Joannes XXII. Benedictus XII. Clemens VI. Innocentius VI. Urbanus V. & Gregorius XI. de quorum omnium electione, benedictione, & coronatione extra Urbem Romam peracta videri possunt in ipsorum Vitis Spondanus, Raynaldus, Giacomius, Pagius, alique complures, qui vel in Annalibus Ecclesiasticis, vel peculiaribus Libris Romanorum Pontificum gesta narrarunt. Sane Martinus V. postremus e Romanis Pontificibus extra Urbem creatis, electus fuit in Concilio Constantiensi die xi. Novembris anni Domini MCDXVII. & cum tantum esset Diaconus S. Georgii ad velum aureum Cardinalis, die xx. ejusdem mensis a Joanne Episcopo Ostiensi in Presbyterum, & sequenti die Dominica in Episcopum consecratus est, ac statim more solito per Raynaldum Cardinalem Brancatium Archidiaconum grandi celebritate coronatus, exindeque de more per Civitatem ductus, regentibus hinc inde equi ejus frenum Sigismundo Romanorum Rege, & Friderico Marchione Brandeburgensi, Imperii Electore Archicamerario.

II. Ritum ejus celebritatis enarrant acta, relata a Pagio in Vita ejusdem Martini V. Papæ, Num. IV. his verbis: *Die Dominica vigesima prima supradicti mensis Novembris idem Sanctissimus Dominus noster more solito, & in Coronationibus Romanorum Pontificum hætenus*

*observari consueto, fuit apud Ecclesiam Constantiensem honorifice coronatus, & demum per Dominos Sacrosanctæ Romanæ Ecclesiæ Cardinales, Patriarchas, Archiepiscopos, Episcopos, Abbates, aliosque Prælatos, Ambassatores, & Romanæ Curie Officiales, in Sacrosancta Synodo prædicta præsentibus, necnon Illustrissimum Principem Dominum Sigismundum Romanorum Regem a dextero, & Illustrissimum Principem Dominum Fridericum Marchionem Brandeburgensem Sacri Romani Imperii Archicamerarium & Electorem a sinistro lateribus ejusdem Domini nostri Papæ, per equi frenum, in quo sedebat, una cum populo multitudine processionaliter ab Ecclesia Constantiensi prædicta usque ad Monasterium S. Augustini conductus, & per circuitum ad Constantiensem prædictam fuit solemnissime reductus. Hætenus memorata acta. Summis autem mox ille sigilli symbolum, sive sententiam versum illum Psalmi 53. *Averte mala inimicis meis, & in virtute tua disperde illos*; uti idem Pagius notat loco citato.*

III. Sed ut rem altius repetamus, electus est quidem absens Callistus II. anno MCXIX. dum esset Archiepiscopus Viennensis, & Cluniaci tunc moraretur; non multo enim postquam electus est, Cluniaco discessit, & Viennam perrexit, ubi in Dominica Quinquagesimæ, quæ anno MCXIX. in diem nonum mensis Februarii incidit, coronatus est. Pandolphus quidem in Vita Callisti consecrationis vel coronationis ejus neque diem neque locum notavit, solum enim scribit, quod *Papa solemniter a Lamberto Episcopo Ostiensi, & aliis quamplurimis in Dei nomine consecratus est*. Diem porro & locum coronationis habemus in Epistola Hugonis Prænestini Episcopi Apostolicæ Sedis Legati ad Hugonem Nivernensem Episcopum sine die & mense datam, quæ refertur Libro I. Historiæ Vezeliacensis, Tom. III. Spitilegii Dacheriani, in qua ita inquit; *Die ipsa, qua ab in-*

vicem

(1) Ita in editione Romana; in Veneta vero & Colonienſi legitur, *ornatus*.

vicem discessimus cum electo nostro, Callisto scilicet II. Papa, duce misericordia Dei, ad partes Lugdunensium properavimus. Antequam autem Lugdunum perveniremus, Dominus Lugdunensis Archiepiscopus, Humbaldus, electioni nostræ assensit, & Lugduni subscripsit. Ibi facta processione solenni Dominum Papam Callistum, & nos honorifice suscepit. Nam & Engolismensis Episcopus, nempe Gerardus, antequam a nobis discederet, subscripserat, & Domino Papæ se subdiderat. Inde venimus Viennam, ubi in Dominica Quinquagesima Dominus Papa coronatus est. Ex his corrumpit opinio Papebrochii scribentis, Callistum II. Cluniaci coronatum fuisse, post reditum Nunciorum Roma, adulto Martio, aut fortassis ipso die Paschatis XXX. ejusdem. Corruit & illud quod ait, Callistum die 14. Februarii electum; cum enim die 14. Februarii Viennæ coronatus fuerit, vix post suam electionem Viennam pervenire potuisset ante eundem diem, uti notat Pagius in ipsius Callisti Papæ II. Vita, Num. 14.

IV. Urbanum III. anno MCLXXXV. Veronæ eodem die, quo Lucius III. ibidem obiit, & sepultus est, ex Archiepiscopo Mediolanensi electum fuisse Summum Pontificem die xxv. Novembris, & deinde die 1. Decembris prædicti anni MCLXXXV. coronatum, Scriptores passim docent, inter quos Radulphus de Diceto, qui eodem seculo claruit, postquam asseruit, Lucium III. septimo Kalendas Decembris Veronæ sepultum esse, mox ita subdit: *Humbertus Mediolanensis Archiepiscopus ipsa die Cardinalium assensu communi Papa creatus est, vocatus Urbanus. Kalendis Decembris coronatus est in Ecclesia S. Petri montis in supercilio collocata.* Successit Urbano III. Gregorius VIII. electus Ferrariæ, ibidemque consecratus Pontifex anno MCLXXXVII. ubi nempe Urbanus e vivis excefferat. Defuncto eodem anno Gregorio, & quidem morbo intempestive oppresso xv. Kalendas Januarii, seu die xv. mensis Decembris, substitutus est ei Paulus Prænestinus Episcopus, genere Romanus, vocatus Clemens tertius, XIV. Kalen. Januarii, inquit Radulphus de Diceto; sed præter diem electionis, coronationis etiam diem expressit Annalista Mailrosensis, sic inquit: *XVI. Kal. Januarii obiit Gregorius Papa VIII. & XIV. Kal. ejusdem electus est Clemens IV. & in crastino consecratus, nempe die vigesima mensis Decembris, quæ cum Dominica concurrebat, coronatus est.* Appellat hunc Pontificem Clementem IV. Annalista Mailrosensis, quia scilicet Guibertus antipapa Clementis III. nomen sumserat, sed præterquam quod Guibertus non est numerandus inter Romanos Pontifices, quia cum magno Ecclesiæ scandalo viventi Gregorio VII. legitimo Pontifici sacrilege superinductus, ex Bullis hujus Clementis Papæ patet se ipsum vocasse Clementem III. ut videre est apud Ughellum, qui Tomo 14. Italiæ Sacræ, Romanæ editionis col. 673. unam exhibet, quæ data dicitur *Laterani. . . IX. Kal. Julii, Indiæ VIII. Incarnationis Dominicæ mxc. Pontificatus vero Clementis Papæ III. anno III.* Diferte etiam dicitur Clemens III. a Radulpho de Diceto, & a Matthæo Parisio, a Guillelmo Nangio, ab Auctore brevis Chronici Pisani, & ab aliis passim.

V. Erepto e vivis Innocentio III. Perusii 20.1.

die xv. Julii anni MCCXVI. & die sequenti sepulto, statim, scilicet die xv. ejusdem mensis Cencius Presbyter Cardinalis electus est in eadem Civitate Romanus Pontifex, & deinde die xxiv. ejusdem mensis, quæ cum Dominica concurrebat, consecratus, dictusque est Honorius III. Mansit Perusii usque ad exeuntem mensis Augusti prædicti anni MCCXVI. quo iter in Urbem est aggressus, nimirum pridie Kalendas Septembris, ut ad eum annum affirmat Auctor Chronici Fossæ Novæ his verbis: *Pridie Kalendas Septembris reversus est apud Romam ad S. Petrum. Pridie Nonas Septembris receptus est in Ecclesia Lateranensi cum tanto gaudio, & veneratione, gloria, & jucunditate, quod omnes videntes, dixerunt, quod nullus de Prædecessoribus suis in receptione similis ei fuisset.* An Romæ tunc Honorius fuerit coronatus, Scriptores silent; non desunt tamen exempla Romanorum Pontificum, qui licet extra Urbem electi, & consecrati fuerint, cum primum tamen post electionem, consecrationemque Romam accesserunt, coronari voluerunt more Majorum ad S. Petrum, & Lateranum maxima cum pompa contendere. Sane Bonifacius Papa VIII. licet electus Neapoli fuerit anno MCCXCIV. die xxiv. Decembris post renunciatum scilicet Papatum a S. Celestino V. ubi Romam pervenit, Romæ consecrari, & coronari voluit solenni ritu, ac processu ad Basilicam Lateranensem.

VI. Ergo Bonifacius Pontificii decoris arbitratus Romæ supremæ suæ dignitatis insignia accipere profectus Neapoli die II. mensis Januarii anni MCCXCV. seu in crastino circumcissionis Domini, uti refert Jacobus Cardinalis Stephanescus, seu Gajetanus in Præfatione ad Poema de Actis S. Celestini, Parte II. Cap. xiii. qui etiam Lib. 1. Cap. v. de coronatione Bonifacii VIII. agens, postquam dixit, Pontificem Anagninæ magna pompa exceptum, subdit, Romanos in occursum ejus effusos, eum excepisse, & quidem Laterani primum, sic inquit.

Roma velut sponsū remeantem carcere ab hostis Exceptura foret, frontem vestita coronas Vadit in occursum, ludæque excurrit in arvis Miles, Eques, Clerusque canens sua thura ministrat

Pontifici. Primum Laterani Templum novellum Suscipiunt Patrem, confestim Principis Aula Clavigeri Petri gaudens suscepit euntem.

Hic locus, hic thalamus, Sedes quoque Festa sacrando.

Quibus verbis claudit primum Librum. Secundo autem Libro Consecrationis ejus, & Coronationis pompam, & cæremonias fuse describit; nam a longis retroactis temporibus nullius Romanæ Urbis Antistitis, sic celebris, sic præclara Coronatio memoratur; inquit laudatus Auctor in præfatiuncula ad Librum primum. Post hæc describit ordinem Precessionis a S. Petri Basilica ad Lateranum, & cæremonias in ea servatas, quas nos jam recensuimus supra in Commentariis ad Titulum II.

VII. Sed ut hoc loco de ritibus Coronationis Summorum Pontificum factæ extra Urbem, & in ipsis Civitatibus, ubi fuerunt electi, agamus, facta Perusii, ubi obierat Benedictus Papa XI. electione Clementis Papæ V. & misso ad ipsum ejus electionis Decreto in Aquitaniam, ubi is apud Lisiniacum in Pictonibus (erat enim

Archiepiscopus Burdegalenſis, & incumbēbat tunc viſitationi Provinciæ) nuntium ejus rei acceperit. Burdegalam regressus, receptum Decretum Sacri Collegii die XXI. mensis Julii, die sequenti publicavit in ipsa Ecclesia Burdegalenſi, assumpto Nomine Clementis ejus nuncupationis Quinti. Rem narrat Bernardus Guidonis his verbis: *Rediit autem de Pictavia Burdegalam Idibus mensis Julii subsequētis, receptusque fuit Burdegala processionaliter a toto Clero & populo cum ingenti gaudio & honore totius Civitatis & Patriæ, undique concurrentibus Baronibus & Prelatis. Adhuc tamen more tantum Archiepiscopi se gerebat ut prius, electionis suæ Decreto nondum recepto, quod postea missum sibi a Cardinalibus de Perusio recepit in Burdegala in crastino S. Mariæ Magdalena secrete; sed palam & publice sequenti die XI. Kalendas Augusti (legendum IX. Kalendas Augusti) in præsentia Prælatorum, & Magnatum, in Burdegalenſi Ecclesia Cathedrali, ubi sedens in Cathedra vocari Clemens voluit, & elegit, & ex tunc capit agere, & se gerere sicut Papa. His consentanea scribunt alii ejus Vitæ Scriptores apud Baluzium Tom. I. Paparum Avenionensium.*

VIII. Ubi primum Legationem Cardinalium, deque sua electione Decretum accepit Clemens Pontifex, iisdem Cardinalibus mandavit, ut omni abjecta mora Lugdunum, ubi Pontificali Diademate redimiri firmum erat animo, se conferrent; quod plerisque gravissimum extitit, inquit S. Antoninus Titulo XXI. sui Chronici Cap. I. Partis III. Paruere tamen Pontifici Cardinales, exceptis duobus, qui, ut ait Westmonasteriensis in Historia, senio graves iter suscipere non potuere, additque, duos ex iis, qui itineri se dederant, ex corporis jactatione, mutationeque aeris e vita excessisse. Porro Clemens in fine mensis Augusti Lugdunum perrexit, quo Philippus Francorum Rex, ac plures Principes amplissima stipati clientela confluerant: *Fuit autem coronatus solemniter in Lugduno in Ecclesia S. Justii, Dominica infra octavas S. Martini, in crastino S. Briccii, scilicet XVIII. Kalendas Decembris, Litera Dominicali C tunc currente, ubi Philippus Rex Franciæ fuit cum sua nobili comitiva;* inquit Bernardus Guidonis in ejusdem Clementis Vita quarta apud laudatum Baluzium, & apud Pagium Num. VII. ubi ex recitato testimonio Raynaldum, aliosque Scriptores refellit, qui factam Clementis Coronationem scribunt die XI. Novembris, cum alias die XIV. peracta fuisset.

IX. Quicquid sit, Philippus Franciæ Rex initio pompæ Coronationis modico spatio pedes frenum equi Pontificis tenens, stratoris officio functus est; postea vero Joannes Britannicæ Dux, & Carolus Valesius Philippi Regis Frater id officii pedites Pontifici exhibuerunt. Sed illud funestum in ea solemnitate contigit, quod dum coronatus Clemens per Urbem de more in equo procederet, muri cujusdam vetustate, atque onere superstantis ad celebritatem conspiciendam multitudinis ruina, dum illac transiret, contingente, Dux Britannicæ collisus paucis post diebus obierit, & Carolus Regis Frater graviter læsus fuerit. Perierunt pariter quidam alii Nobiles, ac alii plurimi, periculumque vix evasit Rex, qui ad latus Pontificis equitabat. Hæc referunt Auctores passim Vitæ Clementis V. inter quos

Bernardus Guidonis post recitata superius verba, ita subdit: *Cumque de loco Coronationis ut Pontifex procederet coronatus cum comitiva Papali & Regali, concurrentibus & comprimentibus se turbis, ut viderent eum tanquam Regem Salomonem in suo diademate coronatum, depulsa maceria cujusdam muri non magni corruit prope Papam, ac etiam circumstantes; ceciditque Corona de capite ejus, & in casu avulsus fuit carbunculus pretiosus, cujus pretium dicebatur sex millia florenorum, & ipse Papa depositus est de equo, sed minime fuit læsus &c.* Illum carbunculum, seu rubinum pretiosum fuisse postea inventum, scribit in secunda Clementis Papæ Vita apud laudatum Baluzium Ptolomæus Lucensis. Addit autem memoratus Bernardus Guidonis citato loco, ex ea clade miratos tunc fuisse universos, & more vulgi multos plurima præfagiisse.

X. Clementi V. successit Joannes XXII. electus anno Christi MCCCXVI. Lugduni die VII. Augusti, coronatus vero die V. Septembris, quæ cum Dominica concurrebat: *Fuitque coronatus,* inquit Bernardus Guidonis, *more Pontificum Romanorum Lugduni in Ecclesia Cathedrali Nonis Septembris, Dominica prima ejusdem mensis.* Joanni ipsi Pontifici Avenione substitutus anno MCCCXXXIV. Benedictus XII. die XX. Decembris, suam Coronationem usque ad diem VIII. Januarii anni sequentis MCCCXXXV. distulit, de qua ita scribit inter alia ejus Vitæ Auctor, quem Raynaldus citat sub nomine Ptolomæi Lucensis: *Anno Domini MCCCXXXV. Benedictus XII. descendit de Palatio, in quo electus fuit, & ivit associatus cum Cardinalibus, ut moris est, ad locum Fratrum Predicatorum VII. Idus Januarii, & VI. Idus Januarii in crastinum ibidem coronatus est per Dominum Neapolionem Cardinalem Diaconum &c.* Rursus qui Benedicto XII. successus est, Clemens nempe VI. Avenione electus die VII. mensis Maji anni MCCCXLI. die XIX. ejusdem mensis in Festo Pentecostes in Ecclesia eorumdem Fratrum Predicatorum cum maxima solemnitate coronatus est, adstantibus, & servientibus ei, ut scribunt Auctores secundæ, & tertiæ ejus Vitæ apud Baluzium, Duce Normanniæ Philippi VI. Francorum Regis primogenito, & postea successore, Jacobo Duce Borboni, Philippo Duce Burgundiæ, Imberto, seu Humberto tunc Delphino Viennensi, & multis aliis tam Franciæ, quam Vasconiæ, ac partium aliarum Comitibus, innumerisque Baronibus, & eisdem omnibus adextrantibus sequenti die Lunæ ad Palatium Apostolicum honorifice reductus est.

XI. Omitto alios Avenionenses Pontifices extra Urbem electos & coronatos, & devenio ad illos, qui extra Urbem tempore schismatis Avenionensis creati sunt, quales inter alios recensentur Alexander V. & Joannes XXIII. quorum primus Pisis die XXVI. Junii anni MCDIX. electus fuit, & deinde VII. die Julii coronatus est solemniter, uti nos docet Theodoricus Niemus, qui hoc tempore claruit in Libro, *De schismate*, Cap. XXV. ubi ita inquit: *Hic Dominus Alexander recepit insignia coronationis suæ in Pisis Nonis Julii anno Domini MCDIX.* Quæ in ea Coronatione acta sint, referuntur in Actis Concilii Pisani ex Spicilegii Dacheriani Tomo VI. in Collectionem Conciliorum translatis, in quibus

bus ita legitur: *Die Dominica immediate sequente, quæ fuit dies septima Julii, dictus Dominus Papa Alexander fuit coronatus in Ecclesia Cathedrali, ubi fuit celebrata Missa solennis. Ex illa die fuerunt multa solemnia, ut puta de stupis combustis, dicendo, Sic transit gloria mundi; de Epistola, & Evangelio in Missa Græce, Hebraice, & Latine; de impositione Tiaræ, cum qua revestitus equitat per Villam, & omnes Prælati revestiti cum equis de panno albo coopertis; de Lege Judæorum, quæ Papa per Judæos præsentatur; & de similibus. Quæ omnia fuerunt debite, & solemniter expedita.*

XII. Suffectus in Alexandri V. locum Joannes XXIII. die Sabati xvi. Maji anni MCDX. statim per Cardinales inthronizatus est, Bononiæ scilicet, ubi ille obierat, die vero sequenti coram eo Cardinalibus, qui in conclavi fuerant, præsentibus, Episcopus Ostiensis Missam in Pontificalibus solemniter celebravit, Joanne in Capella magni Palatii Apostolici Bononiensis in Cathedra in statu & habitu Papali existente. Deinde die Sabbati xxiv. ejusdem mensis in Presbyterum ordinatus fuit per dictum Episcopum Ostiensem, erat enim tantum Diaconus, & die Dominica sequenti xxv. per eundem Ostiensem consecratus in Ecclesia S. Petronii Bono-

nienfis, & demum ante, & extra dictam Ecclesiam in Scadafalco alto, & eminenti, Missa prius post ipsam Consecrationem per eum dicta, sive celebrata, per primum Diaconum Cardinalem de Brancaciis, absente Cardinale de Saluciis, publice & solemniter coronatus fuit. Postquam Coronationem in statu & habitu Papali, comitantibus ipsum Cardinalibus, multis Prælatibus, Nobilibus, & Civibus Bononiensibus, & aliis sine numero, honorifice, & solemniter per Civitatem Bononiensem more solito equitavit, & demum rediit ad Palatium. Hæc ex Petri Tillii monumentis, a Raynaldo ad annum MCDX. Numero xx. relatis constant, a quibus non dissentiant Niemus in ejus Vita, & Gobellinus, quorum prior ait, eum in Festo S. Urbani, seu die xxv. Maji insignibus Papalibus decoratum, seu coronatum per Bononiam publice incessisse, per vicos & plateas equitando, prout moris est Summorum Pontificum in die Coronationis eorundem. Gobelinus pariter ætate vi. Cap. xc. scribit eum coronatum viii. Kal. Junii; additque, multos in ejus electione scandalizatos esse, quia ut tyrannus rexisset Bononiam, & vitæ mundanæ deditus dicebatur. Atque hæc ad nostri hujus §. eruditionem adnotare placuit, nam cætera, quæ in eo continentur, jam alibi abunde explicata fuere.

DE ADVENTU ET CORONATIONE ELECTI IN IMPERATOREM ROMANUM

TITULUS V.

§. I.

Electus Rex futurus Romanorum Imperator primum consuevit electionem suam per suos solemnes Oratores Summo Pontifici intimare, & Decretum electionis ostendere, devotionem, ac fidelem (1) reverentiam exhibere, favorem, & gratiam Apostolicæ Sedis implorare, offerre se ad quæcunque fidelitatis juramenta Romanæ Ecclesiæ præstanda, & demum unctionem, consecrationem, & Imperii Diadema humiliter postulare. Pontifices vero consueverunt viso Decreto, & examinata electione in Sacro Senatu, habitaque sufficienti informatione tam super forma electionis, quam super idoneitate, & habilitate personæ electi per Commissarios a se constitutos ad instantiam dicti Electi, ipsum Electum in spiritualem filium suum, & Ecclesiæ Romanæ suscipere, illique (2) favorem & gratiam concedere, & ipsius Regis electi persona idonea reputata, eum nominare, denunciare, assumere, & declarare Regem Romanorum, ac etiam habilem, & sufficientem declarare ad suscipiendam Imperialis Celsitudinis dignitatem, decernere, consecrationem, & coronationem per manus suas esse impendendas, & supplere omnes defectus &c. Hoc servatum legimus (3) in Karolo IV. a Clemente VI. & antea in Henrico VII. a Clemente V. & in Alberto ejus prædecessore, & Rodulpho Patre a Bonifacio VIII. & a pluribus aliis, & in Venceslao Karoli IV. filio, quem Pater adhuc vivens in Romanorum Regem ab Electoribus designari procuraverat, cujus rei approbationem cum Gregorius XI. ad quem delata erat, morte præventus decernere non posset, Urbanus VI. ejus Successor legitime confecit.

COMMENTARIUS.

I. Imperator olim Dux exercitus is dictus est, qui aliquot hostium millibus prostratis, post insignem victoriam a militibus suis, eo nomine donabatur, ut cum Pompeus in Africa superasset Domitium. Scipio in Hispania rejiciens oblatum Re-

gis nomen, testatus est, id quod alibi magnum erat, Romæ exosum, & intolerabile esse; sibi que maximum videri nomen Imperatoris. Pluribus verbis explicat quidem Dion Lib. xxxiii. quomodo Julio tributa sit appellatio Imperatoris, quæ & ad Successores pertineret, sicut & Cæ-

(1) Ita in Veneta editione anni 1516. in Romana legitur, *filialem*. (2) In Romana legitur, *sibi que suos favorem, & gratiam*. (3) In Romana quoque legitur, *in personam Karoli IV.* & ita deinceps semper legitur *in personam*.

Cæsaris nomen. Certe, ut ajunt Romanæ Historiæ Scriptores, victis Pompei filiiis, & confectis bellis civilibus, Senatus Romanus Julio Cæsari singulares honores decrevit, in primis autem, ut Pater Patriæ diceretur, Consul in decennium, Dictator in perpetuum, Sacrosanctus haberetur, Quintilis mensis a suo nomine Julius appellaretur, Comitia etiam tributa in potestate haberet, in acta sua Magistratus ineuntes jurarent, ut Imperator nuncuparetur, & potentiam auctoritatemque in Rempublicam obtineret; ex eoque factum est, ut qui summum jus in Republica haberent, Imperatores dicti sint, ut inter alios notat Valentinus Forsterus Lib. 1. *Historiæ Juris Civilis Romani*, Cap. xxviii. Num. 111. & seq. Ceterum nostris moribus receptum est, verum Imperatorem illum fieri, qui Germaniæ Septemvirorum, quos Electores vocamus, suffragiis, atque consensu, ad Christiani populi monarchiam evehitur, ut docet aurea Bulla Caroli IV. Titulo II.

II. Sunt qui ad Romanam Gregorii V. Synodum, qui electus Pontifex fuit anno cmxcvi. referunt institutionem Electoralis Collegii, seu Septemvirorum, penes quos solos esset Imperatoris eligendi potestas. Sed, ut inter alios notat Pagius in Vita ipsius Gregorii V. Num. v. silentium omnium antiquorum usque ad medium Seculum xiii. sufficeret ad eam opinionem everendam, etiam si aliæ probationes deessent, ex quibus etiam nonnullas laudatus Auctor affert. Primo quidem Wippo Presbyter testis oculatus electionis Conradi Salici Imperatoris, quæ facta est anno Mxxiv. in Vita ejusdem Conradi refert nomina sive Pontificum, sive secularium Principum, *qui tunc in Regnis vigeant, quorum consiliis consuevit Francia*, nempe Teutonica, *Reges eligere*; pauloque post scribit: *Italiam transeo, cujus Principes in brevi convenire ad Regiam electionem, nempe Conradi Salici, quam describit, nequiverunt, qui postmodum in Urbe Constantiensi cum Archiepiscopo Mediolanensi, & reliquis Principibus occurrentes Regi, sui effecti sunt, & in fidelitatem libenti animo juraverunt*. Post pauca pergit Wippo: *Condicta est dies, notatusque locus, sit publicus conventus, qualem me vidisse antea non memini &c. Inter Moguntia confinia, & Wormatia locus est amplitudine planitie causa multitudinis maxime receptabilis &c. Ibi dum convenissent cuncti Primates, & ut ita dicam vires & viscera Regni cis & citra Rhenum castra locabant. Qui dum Galliam a Germania dirimat, ex parte Germania Saxones cum sibi adjacentibus Sclavis; Franci Orientales Norici, Alemanni convenere. De Gallia vero Franci, qui super Rhenum habitant, Ribuarii, Lotharingi coadunati sunt*, Refert postea Wippo Conrados duos inter multos, qui eligendi essent sequestratos: *In his duobus, inquit, idest, in majore Chunone, ita Conradum appellat, & juniore diu pendebat reliqua nobilitas &c. Archiepiscopus Moguntinensis, cujus sententia ante alios accipienda fuit . . . elegit majorem Chunonem suum in Dominum, & Regem &c. Hanc sententiam ceteri Archiepiscopi, & reliqui sacrorum Ordinum Viri indubitanter sequebantur &c. Tunc singuli de singulis Regnis eadem verba electionis sapissime repetebant*. Hæc fusius ex Scriptore, qui electioni præfens fuit, narrata, sat docent, Conradi Sa-

lici electionem, quæ viginti sex circiter annis post Gregorii V. mortem facta est, ad solos septem Electores non fuisse coarctatam, & ipsos etiam Italos ad eam evocatos, ideoque jure suffragii potitos esse, quia nempe Rex Germaniæ, qui eligendus erat, Longobardorum Regno præesse debebat.

III. Lotharius etiam Saxonum Dux, mortuo Henrico hujus nominis V. absque prole, electus est Imperator ab Episcopis, & Proceribus Germaniæ: *Moguntinus enim Archiepiscopus, inquit Ordericus Vitalis Lib. xi. i. qui potentia, & strenuitate pollebat, providentiaque sua, ne schisma, vel inordinata surreptio Imperii fieret, præcavebat, Episcopos, & Proceres totius Regni cum exercitibus suis convocavit, cum quibus una collectis de Imperatore constituendo tractavit. Insignia quidem ab Imperatrice procuraverat ornamenta Imperii, antequam de tanto præsumisset negotio fari. Excellentissimi, inquit, Barones, qui assistitis in hac planitie, me, quaeso, solerter audite, & prudenter intendentes his, quæ dicam, obedite. Pro commoditate omnium vestrum, & plurimorum, qui non adsunt, laboro . . . Imperator noster sine prole defunctus est: cui Deo fidelis, & devotus, Ecclesiæque filiis utilissimus successor sapienter inquirendus est*. Ita plane peroravit tunc Archiepiscopus Moguntinus, teste laudato Orderico Vitale, qui etiam postea refert, electum esse Lotharium, qui, teste Dodechino Abbate in Chronico, *tertio Kalendarum Septembris, anno MCXXV. electus, ac Aquisgrani Idibus Septembris inunctus est Germania Rex*. Ex quibus destruitur commentum adstruens, septem Electores Imperii a Gregorio Papa V. in Romana Synodo fuisse institutos, tamen ejus opinionis sint Baronius, omnesque fere Gestorum Pontificalium Scriptores, imo & ipsi Collectores Conciliorum.

IV. Sed nec Seculo xiiii. ineunte Electorum numerus ad septenarium coarctatus erat. Arnoldus enim Lubecensis, qui anno MCCIX. finem Chronico suo imposuit, ad annum Christi MCCVIII. de Ottonis IV. electione loquens, ita scribit: *Indicta est Curia in Halberstad, ubi convenerat maxima pars Prælatorum, & Principum Saxoniæ, & Thuringiæ, nec defuit Heribipolensis Chonradus. Omnes igitur Principes, qui convenerant, unanimi consensu Ottonem Romanum Principem, & semper Augustum elegerunt. Archiepiscopo, qui primam vocem habere videbatur, inchoante, prosequente vero Bernhardo Duce cum Marchione Misnensi, & Landgravio Thuringiæ, ad quos electio Regis pertinere videbatur. Fridericus item II. in publicis Comitibus anno MCCX. electus fuit, ut ad eum annum his verbis docet Abbas Urspergensis: Tunc Principes Alemanniæ, Rex videlicet Bohemiæ, Dux Bavariæ, & Landgravius Thuringiæ, & alii quamplures convenientes Fridericum Regem Siciliae elegerunt in Imperatorem coronandum. Sed Principes illi, & Officiales valde diversi erant ab Electoribus, & Officialibus hodiernis, ut videre est apud Leibnitzium in Præfatione Codicis Diplomatici, ubi fuse agit de Electorum origine, & observat, sub Friderico II. formam aliquam accepisse Electorale munus, primamque veterum Electorum mentionem legi in Brevi Alexandri IV. Gerardo Moguntino directo; & in eo septem Electorum numerum non notari, qui*

qui expressis verbis legitur in Litteris Urbani IV. *Richarðo electo Regi Romanorum, datis apud Urbem veterem secundo Kalend. Septembris, sine ulla Chronologica nota. Refertur hoc Rescriptum in prodromo novi Codicis Diplomatici Sectione IV. & in eo hæc verba leguntur: Propone curaverunt quasdam consuetudines circa electionem novi Regis Romanorum in Imperatorem postea promovendi, apud Principes vocem in hujusmodi electione habentes, qui sunt septem numero, pro jure servari; & fuisse hætenus observata a tempore, cujus memoria non existit. Sectione autem VII. diserte dicuntur Electores, Archiepiscopus Trevirensis, Archiepiscopus Colonienfis, Bohemia Dux, Comes Palatinus, Saxonia Dux, & Marchio Brandeburgicus; narraturque, Archiepiscopum Coloniensem procuratorio nomine agere pro Archiepiscopo Moguntino, ad quem pertinet electionis diem præfigere, & ejus defectu ad Comitem Palatinum.*

V. Egregium hoc monumentum ostendit, electioni Alphonsi Castellæ Regis, & Richardi Comitis Cornubiæ, Angliæ Regis fratris, quæ facta est anno MCCLVII. septem Principes Electores interfuisse. Sed Matthæi Parisii Auctoris cœvi testimonium luculenter demonstrat, numerum septem Electorum fuisse tunc rem novam, & sine contradictione non admissam; ait enim ad annum MCCLVIII. *Hi sunt maximi Principes in Alemannia, ad quorum nutum pendet Electio ipsius Regis, quod est quasi arrha Imperii Romanorum. Archiepiscopus Colonienfis, Archiepiscopus Moguntinus, Archiepiscopus Trevirensis, Rex Bohemiæ, Comes Palatinus, Dux Austria, Dux Suevia, Dux Polonia, Marchio Brandeburg, Dux de Meran, Dux Barbantia, qui & Lovanii, Landgravius Thuringiæ, Marchio Misnia; qui omnes proinde electionis jure potiri contendebant, ideoque septem Electorum possessio nondum plene stabilita erat. Septem Virorum numerum adhuc eo tempore difficultatem passum esse, liquet etiam ex Alberto Stadenfi, & ex Erkone de Repkavio in Speculo Saxónico, qui uterque Scriptor circa annum MCCLX. floruit. Ex quibus omnibus evidenter constat, institutionem Septemvirorum, seu septem Imperii Electorum Gregorio V. Papæ perperam fuisse adscriptam.*

VI. Certum tamen est, quod & omnes fere Scriptores fatentur, tam ante, quam post septenarium illum numerum Electorum in usum vocatum, Pontifices Romanos, a quibus renovatum est Imperium Occidentale, jus suum illæsum conservasse, & electiones aut approbasse, aut reprobasse. Jus illud Romani Pontificis, ut idem Pagius post alios notat in Vita Gregorii V. Num. IX. recognoverunt Successores Caroli Magni, qui Imperatoris nomen sibi assumere non præsumebant, antequam a Summo Pontifice coronati benedictique essent, quod testatur Ludovicus II. Imperator, Caroli Magni abnepos, ad Basilium Imperatorem Græcorum scribens apud Duchesnium Tomo III. *Historia Francorum*, ubi ita inquit: *Francorum Principes primo Reges, deinde vero Imperatores dicti sunt, ii dumtaxat, qui a Romano Pontifice ad hoc Oleo Sancto perfusi sunt.* Idem non obscure indicat Monachus Anonymus Auctor Vitæ S. Adalberti Pragenfis Episcopi, qui sedente Gregorio V. scripsit. Sic enim ait: *Roma autem cum caput Mundi, &*

Urbium domina sit, & vocetur, sola Reges imperare facit; cumque Principis Sanctorum Corpus sinu suo foveat, merito Principem terrarum ipsa constituere debet. Antea autem dixerat, Ottonem III. Imperatoriam sibi exposcentem dignitatem, Romam profectum esse, ut eam assequeretur. Ideo porro hic Auctor vocat Imperatorem Principem terrarum, quia Germaniæ Reges jus habent, ut Imperatores appellentur, utque primum inter Principes Christianos locum obtineant; quod jus promanat a Romanis Pontificibus, qui se ad eos confirmandos & coronandos obstrinxerunt, modo nullus occurreret in electione defectus, ut ait Innocentius III. cujus locum mox afferemus.

VII. Illud præterea certum pariter est, jus eligendi Imperatores a Romanis Pontificibus emanasse. Diserte id quidem testatur laudatus Pontifex Innocentius III. in Epistola ad Bertholdum Zaringiæ, sive, ut alibi legitur, Laringiæ, aut Carinthiæ Ducem post Ottonis IV. Imperatoris electionem. In ipsa enim Epistola, quæ relata est in Cap. *Venerabilem* xxxiv. *De electione* &c. sic idem Innocentius scribit: *Illis Principibus jus, & potestatem eligendi Regem, & Imperatorem postmodum promovendum recognoscimus, ut debemus, ad quos de jure, & antiqua consuetudine noscitur pertinere; præsertim cum ad eos jus, & potestas hujusmodi ab Apostolica Sede pervenerit, quæ Romanum Imperium in personam magnifici Caroli a Græcis transtulit in Germanos. Sed & Principes recognoscere debent, & utique recognoscunt, sicut iidem in nostra recognovere præsentia, quod jus, & auctoritas examinandi personam electam in Regem, & promovendam ad Imperium, ad nos spectat, qui eum inungimus, & coronamus. Est enim regulariter & generaliter observatum, ut ad eum examinatio personæ pertineat, ad quem impositio manus spectat. Numquid enim si Principes non solum in discordia, sed etiam in concordia sacrilegum quemcumque, vel excommunicatum, tyrannum, fatuum, vel hæreticum eligerent, aut paganum, nos inungere, consecrare, aut coronare hominem hujusmodi deberemus? Absit omnino.* Idem asserit Clemens V. in Clementina sua Constitutione, *Romani Principes, De jurejurando.*

VIII. Porro species laudatæ Epistolæ Innocentii III. quæ est celeberrima de electione Imperatoris, multumque illustratur ab Urspergenfi Abbate, qui hanc ipsam Decretalem laudavit, hæc est, juxta notata ab erudito Altaferra in suo ad eam Decretalem Commentario. Mortuo Henrico VI. Imperatore, Principes Electores juramenti immemores, quod præstiterant Henrico adhuc superstiti de eligendo Frederico ejus filio adhuc in cunis vagiente, & fide ei præstanda, de electione Imperatoris tractare cœperunt. In hoc tractatu votis in diversa divisus, alii Philippum fratrem defuncti, alii contra Othonem e Ducibus Saxonie ortum in Regem Romanorum elegerunt; & quod suppleendum est ex Urspergenfi, Bertholdus Dux Varingiæ, seu Carinthiæ, qui ante in Conventiculo Colonienfi a quibusdam in Regem electus fuerat, rebus suis diffusus ad Philippum accessit, & in eum jure suo ultro cessit Imperii. Schismatis componendi causa Pontifex misit Legatos in Germaniam, Sutrinum Episcopum, & Abbatem S. Anastasii Cisterciensis Ordinis. Sutrinus Epi-

Episcopus, causa minime cognita, electionem Othonis confirmavit, repulso Philippo. Quæ de re apud Pontificem per Legatos conquesti sunt Principes Germaniæ, qui Philippi partes tuebantur, quorum rationes exponuntur in citata Innocentii Epistola, sive in Capite, *Venerabilem*. Legatus Pontificis aut Electoris, aut Cognitoris, idest Judicis, gessit personam; si Electoris palam falcem immisit in messem alienam, & sibi perperam arrogavit jus Principum Germaniæ, ad quos eerti juris est pertinere electionem Imperatoris; si Cognitoris, perperam videtur processisse, absente, nec legitime vocato Philippo. Auditis Legatis Principum, Innocentius electionem Othonis, in quem propensior erat, ratam habuit, submoto Philippo per hanc Epistolam Decretalem, quæ hac occasione scripta est ad Bertholdum Ducem Carinthiæ, quod de numero Electorum esset, & unus e potioribus partium Philippi.

IX. Itaque vel ex hac Innocentii III. Epistola comprobatur, quod superius notatum fuit, ante Innocentium III. electionem Imperatoris fuisse non penes Septemviros, sed penes omnes Germaniæ Principes. Id juris servatum in electione Friderici Ænobarbi, testatur Guntherus Poeta Ligurinus Lib. 1.

Teutonicæ Sedes Chunradi morte vacabat.

Acturi sacra de successore Corona

Conveniunt Proceres totius viscera Regni.

Non ante Innocentium rem redactam ad septem Electores, satis argumento est, quod inter alios Auctores Matthæus Parisius, & Albertus Stadenfis, uti jam notatum fuit, & Hostiensis in citato Cap. *Venerabilem*, qui per hoc tempus vixerunt, primi sunt, qui septem Electorum meminere. Ceterum ne Pontifex jus Electorum tentare videatur, & ut eosdem sibi conciliet, primum profitetur, jus, & potestatem eligendi Regem Romanorum, in Imperatorem postmodum promovendum, de jure, ac antiqua consuetudine pertinere ad Principes Germaniæ; ejusque testimonio suffragatur memoratus Guntherus Lib. vi. sic inquit:

*..... Ad Proceres electio pertinet, in qua
Præcipuam vocem Præsul de jure vetusto
Moguntinus habet.*

Id juris sibi Romanum Imperium, ut non successione, sed electione deferatur, ex singulari prærogativa vindicare tradit Otho Frisingensis Lib. II. *De rebus gestis Friderici*, Cap. 1. *Id juris*, inquit, *Romani Imperii apex, videlicet non per sanguinis propaginem descendere, sed per Principum electionem Regem creare, sibi tanquam ex singulari vindicat prærogativa.*

X. Unde manarit jus istud electionis, valde ambigitur. Aliis placet hujus juris auctorem fuisse Othonem III. quo inclinare videtur Martinus Polonus in Chronico, ubi postquam de Othone III. meminit, statim subdit hæc verba: *Tamen postea fuit institutum, ut per Officiales Imperii Imperator eligeretur.* Communis sententia est, uti jam notavimus, electionem Imperatoris institutam constitutione Gregorii V. non sine assensu Othonis, & Principum Germaniæ edita, quæ tamen non extat. Sed hanc sententiam jam confutavimus. Quicquid sit, docet plane Innocentius III. maxime hoc jus ad Germanos Principes pervenisse a Sede Apostolica, quod iisdem verbis asseruit etiam postea

Clemens V. subditque mox etiam ille, non esse, quod Principes inficiantur, quin examinatio, & confirmatio electi pertineat ad Romanum Pontificem, cum & ad eundem pertineat consecratio, idest, inunctio, & coronatio. Sane spectat ad Germanicos Principes electio, ad Coloniensem Archiepiscopum Regia inunctio, Imperialis autem Coronatio ad Summum Romanum Pontificem, uti loco modo laudato idem Guntherus tradit.

..... Pastori prima recentis

Agrippina tuo conceditur unctio Regis:

Imperii nitidam summo sacrare Coronam,

Pontifici jus est; ut vero nomine possit

Non dator Imperii, sed confirmator haberi.

Et Fridericus ipse apud Rodericum Lib. 1. de gestis ejus, Cap. xvi. *Debitam*, inquit, *Patri nostro reverentiam libenter exhibemus; liberam Imperii nostri Coronam divino tantum beneficio adscribimus; electionis primam vicem Moguntino Archiepiscopo, deinde quod superest, ceteris secundum ordinem Principibus recognoscimus; regalem unctiorem Coloniensi; supremam vero, quæ Imperialis est, Summo Pontifici.*

XI. Ad Romanum ipsum Pontificem spectare Imperatoris electi confirmationem, unctiorem, & coronationem, æque comprobatur ex Canone, *In Nomine Domini*, Distinctione xxiii. & ex Clementina, *Romani*, *De jurejurando*. Imo & vacante Imperio Romano Pontifex ipse Romanus succedere dicitur in Jurisdictione Imperiali, uti idem Innocentius III. docet relatus in Cap. *Licet X. De foro competente*, & Clemens V. in Cap. *Pastoralis* §. ultimo, *De re judicata*. Ceterum quod nostram rem spectat, mos plane antiquus fuit, ut electus Rex futurus Imperator soleret primum electionem suam per suos solemnes Oratores Summo Pontifici intimare, & Decretum electionis ostendere, devotionem ac fidelem, seu filialem, ut alias, reverentiam exhibere, favorem, & gratiam Apostolicæ Sedis implorare, offerre se ad quæcumque fidelitatis juramenta Romanæ Ecclesiæ præstanda; & demum unctiorem, consecrationem, & Imperii diadema humiliter postulare. Docet hæc quidem nostrum Cæremoniale, quibus mirifice suffragatur ms. Pontificale Ecclesiæ Apamiensis in Syria anno MCCXIV. scriptum, apud eruditum Martene Lib. II. *De antiquis Ecclesiæ ritibus*, Cap. ix. quod est, *De benedictione Imperatorum*, Ordine VI. ubi ita legimus: *Postquam a Principibus suis electus fuerit in Regem, & juxta morem inunctus, debet mittere honoratos Nuncios de Principibus quidem Viros Ecclesiasticos, & seculares ad Romanum Pontificem, significans eam tam per eos, quam per Litteras suas promotionem suam, & quod velit sibi omnino obedire tanquam Patri, & ad defensionem Ecclesiæ secundum scire suum, ac posse omni vitæ suæ tempore viriliter stare &c.* Celebre est de eodem ritu inter alia exemplum Rudolphi Romanorum electi Imperatoris, qui anno mclxxiv. legationem misit ad Grægorium X. Papam tempore Concilii Lugdunensis II. ad sacramenta Rudolphi nomine nuncupanda, ac privilegia Romanæ Ecclesiæ a veteribus concessa Imperatoribus confirmanda, & hoc postquam Pontifex Oratores Alphonsi Castellæ Regis, qui de Imperio decertabant, re infecta, dimisisset.

XII. Hæc vero, ut majori celebritate fierent,

rent, adhibiti sunt Principes Ecclesiastici electores, alique insignes Germaniæ Præsules, qui Imperialia diplomata perlegere, atque ad rem sequuturis ætatibus mandandam, solemnes tabulæ confectæ sunt, quas in Molis Hadrianæ Archivo asservari asserit Raynaldus, qui eas recitat ad ipsum annum MCCLXXIV. Num. VI. & seqq. ex quibus constat, Othonem Præpositum Ecclesiæ S. Guidonis, Spirensis Diœcesis, Imperialis Aulæ Cancellarium Rudolphi nomine confirmasse privilegia ab Othone IV. & Friderico II. Ecclesiæ Romanæ concessa: promississe Rudolphum ditionem Ecclesiæ non invasurum: bellum Siciliæ Regi non illaturum; & acceptis Imperialibus ornamentis Romæ promississe ea corroboraturum, eoque pacto obedientiam, & fidelitatem Rudolphi nomine, solemnem iurejurando spondidisse Othonem. *Acta sunt hæc Lugduni*, ut legitur in fine diplomatis ea de re confecti, *in prædicto Consistorio anno MCCLXXIV. mense Junio, die Martis, VI. mensis ejusdem, Pontificatus vero anno III. Porro ad certitudinem præsentium, & memoriam futurorum, nos memorati Archiepiscopi, Episcopi, Burclavius, & Comes, præsentibus litteras fieri fecimus, & nostrorum sigillorum munimine roborari*. Legendum plane, *die Martis, V. mensis ejusdem*; nam dies VI. mensis Junii concurrebat eo anno cum die Mercurii, ad quem errorem nec Bzovius nec Raynaldus animum adverterunt, ut notat Pagius in Vita Gregorii Papæ X. Num. XLIV.

XIII. Joannes Mariana Lib. XIII. *Rerum Hispanicarum*, Cap. XXI. scribit, Pontificem antequam electionem Rudolphi confirmaret, Legatum ad Alphonsum Castellæ Regem, inanem Imperii umbram ostentantem misisse, qui nomine ejus redituum Ecclesiasticorum decimas in Bellum Mauricum illi polliceretur, modo vano Imperii juri cederet. Quod tantum commodum Alphonsus lubenti animo acceptans, totam controversiam arbitrio Pontificis permisit, sicque Pontificem Rudolphi electionem ratam fecisse post Synodi dimissionem VIII. Idus Septembris, eaque de re Litteras dedisse ad universos Principes Christianos, atque inprimis Rudolphum monuisse, ut quantocius Romam ad se veniret, confirmaturus ea quæ Otho Legatus ejus nomine jurasset, & Coronam Imperii suscepturus. Hieronymus vero Surita Scriptor & ipse Hispanus in Indiculo Lib. II. ait, Pontificem ratam habuisse Rudolphi electionem VI. Kalendas Octobris. Qui Auctores, ut notat ibidem Pagius Num. XLV. ita conciliandi sunt, ut Gregorius ipse octavo Idus Septembris Rudolphi electionem confirmarit, die vero VI. Kalendas Octobris ad eum ut ad Regem Romanorum scripserit; Litteræ enim laudati Pontificis *Rudolpho Regi Romanorum illustri* inscriptæ, datæ dicuntur *Lugduni VI. Kalendas Octobris anno III.* uti videre est apud memoratum Raynaldum ad prædictum annum MCCLXXIV. Num. LV. Porro errat Auctor nostri Cæremonialis Augustinus Patricius, cum Rudolphi imperium ad Pontificatum Bonifacii Papæ VIII. refert.

XIV. Sane anno MCCLXXXV. Rudolphus ipse Imperator Oratores ad Honorium IV. misit cum litteris datis *Lausana X. Kal. Decemb. Indictione XIV. anno Domini MCCLXXXV.* apud Raynaldum, Num. XXI. quibus proponebat, aut simulabat se Romam venturum ad Coronam

To. I.

Imperii recipiendam, & stabitabat, ut diem ejus consecrationis constitueret. Quare Pontifex Litteris ad eum datis *Romæ apud S. Sabina II. Kal. Junii anno II.* ideoque anno Domini MCCLXXXVI. diem Purificationi B. Virginis sacrum anni MCCLXXXVII. ei præfixit ad accipienda ornamenta Imperialia in Basilica S. Petri, & si nova aliqua emergeret difficultas, consilio Joannis Cardinalis Episcopi Tusculani Apostolicæ Sedis Legati ea componeretur, & interim hortatus est, ut qua par erat pompa, & apparatus, ad celebritatis augendam Majestatem se compararet. Ceterum Rudolphus licet toties promississet Romam petere ad Imperialem coronam accipiendam, nunquam tamen promissis stare, sive legitime impeditus, sive volens neglexit, ut sunt qui excusent, & accusent. Nam & tradunt alii, eum aliquando interrogatum a suis, cur non iret Romam, apologo Æsopico respondisse, invitatis quondam animalibus diversi generis a leone, ut suam adirent Regiam, cæterisque accedentibus, solam vulpem, cum redire nullum ex eis animadvertisset, pedem retulisse, ex eaque fabula conclusisse, multos ante se Reges lætos intrasse Italiam, paucos vero sine luctu, & mœrore reversos esse. Rem narrat Pagius in Vita Honorii IV. Num. VI. ex quo addiscimus, nullo modo Rudolphi Imperium referri posse ad Bonifacii VIII. Pontificatum, ut in nostro §. habetur.

XV. Certe ad ipsum Bonifacii Pontificatum spectat Alberti Austriaci filii Rudolphi electio in Regem Romanorum, quam ita recenset Pagius in ejusdem Bonifacii Papæ VIII. Vita, Num. XI. anno MCCXCVIII. Adolphus Romanorum Rex Regno & Imperio depositus est a quibusdam electoribus, Gerardo scilicet Archiepiscopo Moguntino, & a Saxoniarum, ac Brandeburgensi Ducibus in vigilia Nativitatis S. Joannis Baptistæ, idque Moguntiarum, eademque die ab eisdem electus est in Regem Romanorum Albertus Austriæ, Rudolphi quondam Romanorum itidem Regis filius, qui cum eodem Adolpho die II. Julii congressus, eum in prælio occidit. Post cujus mortem, cum priorem suam electionem illegitimam reputaret, eo quod facta esset vivente Adolpho, & nonnullis electoribus absentibus, eam specie tenuis illis resignavit, & ab omnibus uno consensu iterum electus est VI. Kalendas Augusti. Hujus secundæ electionis confirmationem per solemnes Nuncios a Pontifice petiit Albertus, qui tamen ab eo repulsam passus est, ut scribit Ptolomæus Lucensis Lib. XIV. *Historia Ecclesiastica*, Capite XXXVII. sic inquit: *Albertus prædictus Dux Austriae filius quondam præfati Rudolphi Regis fuit electus in Regem Alemanniæ ab electoribus congregatis Aquisgrani anno MCCXCVIII. misitque solemnes Nuncios ad Bonifacium Papam VIII. pro confirmatione electionis suæ, quam idem Bonifacius Papa primo multis juris & facti rationibus allegatis repulit prima vice, & asseruit nullam esse*. Non solum autem ejus electionem confirmare renuit, sed etiam anno Domini MCCCI. electoribus Germanici Imperii scripsit Litteras, quibus Albertum in Judicium accersivit, & Moguntino, Colonienfi, ac Trevirenfi Archiepiscopis provinciam tradidit ei denunciandi, ut Oratores suos ad Sedem Apostolicam mitteret, ad impositum sibi læsæ Majestatis

Y

statis crimen, quo casu Adolpho se devinxerat, purgandum, ut constat ex ejus Epistola, quæ extat apud Raynaldum ad ipsum annum mccc. Num. 11.

XVI. Porro anno mccc. idem Bonifacius, ob gravissimum cum Philippo Galliæ Rege dissidium, ut haberet quem ei opponeret, ipsam Alberti Romanorum Regis electionem, quam ante rejecerat, confirmavit, recepta ab eo promissione satisfactionis omnium injuriarum, ac facinorum a se commissorum, & juramento fidelitatis, ac confirmatione privilegiorum, & donationum ab aliis Imperatoribus, Regibusque Romanorum concessarum; omnes defectus, qui in ea electione intervenerant, aut tulit, aut Apostolica auctoritate supplevit, Litteris de ea re datis *Laterani II. Kalendas Maji anno IX.* Pontificatus, quas recenset Raynaldus ad prædictum annum mccc. Num. II. ubi & Num. IX. refert Litteras Alberti, quibus fidem Pontifici obstringit, veteraque Ecclesiæ Romanæ jura illi asserit, datas *apud Nuremberg anno Domini MCCCIII. Indictione prima, XVI. Kalendas Augusti.* Iisdem Litteris suis Bonifacius omnia, quæ ab Alberto a sua electione ad hujusmodi confirmationem gesta fuissent in Regni administratione, rata habuit; sed aliis Litteris eadem die datis, quas post Bzovium recenset Spondanus, omnes uniones, confederationes, societates, & pactiones cum quibuscumque Regibus, atque Principibus in præjudicium Romanæ sedis, & Imperii ab eodem Alberto factas etiamque juramento firmatas irritavit, nullas dixit, & quæcumque juramenta quibuscumque verbis concepta relaxavit. Fuisse autem illa omnia contra Philippum Regem, testari Scriptores omnes, qui de iis egerunt, ait Pagius in Bonifacii VIII. Papæ Vita, Num. LXIV. Sane hanc inter ceteras prætexuisse Philippum offensionis causam in Bonifacium, scribit Joannes Villanius Lib. VII. Cap. LXI. quod cum Pontifex pollicitus ei fuisset Romanum Imperium a Germanis in Gallos reducere, & primum Carolo Valesio fratri Regis assignari, nihilominus illud Alberto asseruisset.

XVII. Mortuo Alberto, & quidem occiso anno mcccviii. a proprio nepote Joanne Sueviæ Duce filio Rudolphi olim fratris sui, successit Henricus Dux Lucemburgius, sex, aut septem mensibus post Alberti mortem; coronatusque est eodem anno Aquigrani in die Epiphaniæ, anno mcccix. ut scribit Ptolomæus Lucensis in Vita Clementis Papæ V. & dicendus est Rex Romanorum eo nomine septimus, si nulla habeatur ratio Lantgravii, qui anno mccciv. electus fuit contra Fridericum II. ut notat Pagius in ejusdem Clementis Vita, Num. XXII. Porro Henricus anno mcccix. solemnes Nuncios, scilicet duos Episcopos, & tres Comites, Avenionem ad ipsum Clementem V. misit, qui peterent confirmationem electionis, & coronationem Imperii ab eodem Papa sibi dari. Pontifex ejus electionem admisit, & confirmavit mense Julio, volens ipsum nominari Regem Alemanniæ, & Romanorum, & quod posset agere quæ Regis erant, coronationem vero Imperii promisit, tempus eidem assignans, ut a Festo Purificationis ad duos annos Romam pergeret, Coronam ibidem Imperii recepturus. Id constat ex Ptolomæo Lucensi, & Bernardo Guidonis in secunda, & quarta Vita

Clementis Papæ apud Baluzium. Litteras quas de hac re scripsit Henricus ad Pontificem, legere est apud Raynaldum ad annum mcccix. Num. x. ex quibus constat, Nuncius illos fuisse numero septem, qui ibidem recensentur. Edidit quoque citato loco idem Raynaldus instrumentum sacramenti per Procuratorem dicti Regis præstiti, factum anno Domini MCCCIX. die Sabbati vigesima sexta mensis Julii, Indictione septima, Pontificatus Sanctissimi Patris & Domini nostri Domini Clementis divina providentia Papæ V. anno quarto in Palatio Papali Avenion. videlicet in Domo Fratrum Prædicatorum ejusdem loci, in qua scilicet Pontifex residentiam faciebat. Edidit demum Litteras Clementis ad Henricum, quibus Imperialem ei Coronam promittit datas *Avenioni VIII. Kal. Augusti anno IV.* Ceterum Albertus Mussatus in Vita Henrici VII. Libro I. Cap. III. postquam dixit, Legatos Diadema Imperiale petiisse, ita deinde subdit: *Quod & facile sui obtinuerunt Legati, Litteris patentibus, termino ad hoc in certam diem præfixo, constitutione solemni, emologata etiam electione cum sacra benedictionis præconio, cujus & Diadematis appositioni se ipsum Roma in Sedem Pontificalem comparaturum, & effecturum despondit.* Sed de hac coronatione dicemus alio loco inferius.

XVIII. Obiit demum anno mcccxiii. die xxiv. Augusti ipse Henricus, electique sunt anno sequenti mcccxiv. Ludovicus Comes Palatinus Dux Baviaræ, & Fridericus Austrius, quo capto, & occiso, ut ait Ludovicus Ignatius Lib. III. *Romanorum Principum*, in Vita ipsius Ludovici Baviaræ, rerum potitur, parique temeritate Imperatorem se citra Pontificis auctoritatem appellat. *Qua injuria offensus Joannes XXII. illi Sacris interdixit, quem etiam iterum iterumque excommunicatum Clemens tandem VI. hæreticum declaravit, omnique dignitate privavit, ac fidelitatis sacramento omnes, qui se ei adstrinxerant, absolvit anno MDXLVI. Bavarum exauctorato, curavit mox Clemens, Carolum Moraviæ Ducem, Joannis Bohemiæ Regi filium, Henrici VII. quondam Imperatoris nepotem, in Regem Romanorum eligi, ejusque electionem confirmavit, Decreto ea de re edito anno ipso mcccxlvi. quod legere est apud Bzovium Num. IX. & apud Raynaldum Num. xxxiv. Extat præterea in Codice Sermonum Clementis VI. collatio facta per eum eodem die, nempe v. Idus Novembris, quo electionem confirmavit, in cujus calce ista leguntur: *De Fratrum nostrorum consilio dictum Karolum in specialem nostrum, & Ecclesiæ filium suscipimus, & nostros favorem, & gratiam concedentes, ipsiusque persona idonea reputata, eundem nominamus, denunciamus, assumimus, & declaramus ad suscipiendam Imperialis Celsitudinis dignitatem, ac decernentes Unctionem, Consecrationem, & Coronationem Imperialem per manus nostras sibi opportuno loco, & tempore impendendas: supplentes nihilominus omnem defectum, si quis aut ratione formæ, aut ratione personæ suæ, aut personarum Electorum suorum, seu ex quavis alia ratione, sive causa hujusmodi in electione intervenerit quovis modo, ex certa scientia, & de Apostolicæ plenitudine potestatis; præcipientes etiam omnibus Fidelibus, & Vassallis, ut sibi sicut Regi Romanorum in Imperatorem promovendo pareant efficaciter, & in-**

intendant. Quæ verba etiam leguntur in Decreto Confirmationis, eique plane concinunt, quæ in nostri Cæremonialis textu statuuntur.

XIX. Fuit hic Carolus IV. qui etiam deinde Litteris ad Gregorium XI. datis, eum rogavit, ut permetteret filium suum primogenitum Wenceslaum jam olim in consortium Regni Bohemiæ adlectum, etiam in Regem Romanorum, Imperii futurum Successorem, annum licet tantummodo decimumquintum ætatis agentem, ab Electoribus evehi permetteret, cum ad hujusmodi electionis celebrationem, inquit Carolus in ipsis Litteris scriptis Nuremberg anno Christi MCCCXXVI. Indictione XIV. secundo Nonas Martii, quæ extant apud Raynaldum, Num. XIII. nobis viventibus procedi non valeat, sine vestris beneplacito, assensu, & gratia, ac favore. Spondanus Num. V. addit, permisisse id quidem Gregorium, sed ea conditione, ut Wenceslaus ante omnia exemplo Henrici VII. ipsius proavi, & Caroli patris, ex formula præscripta juraret,

se bona Ecclesiæ Romanæ non occupaturum, libertatem Ecclesiasticam non violaturum, in administrationem Regni, & Imperii ante solemnem inaugurationem a Pontifice, vel ejus licentia ab alio factam, se se non intromissurum, quinimo nec ipsos Regis, aut Imperatoris titulos sine Sedis Apostolicæ consensu suscepturum; scriptis ea de re Litteris ad eisdem Carolum, Wenceslaum, & Principes Imperii ad principium mensis Maji. Post hæc Wenceslaus electus est Romanorum Imperator die X. Junii Francfurti, sed ejus electionem, mortuo Gregorio XI. confirmavit deinde ante exortum schismæ Urbanus VI. ac postea etiam Urbani æmulus Clemens VII. ut in ejusdem Papæ Urbani VI. Vita pluribus tradit Pagius Num. XXI. & sequenti. Atque hæcenus dicta satis sint ad explicandum antiquum morem in nostro Cæremoniali descriptum de auctoritate Summi Romani Pontificis in confirmanda Imperatorum electione, & aliis ad eam spectantibus.

§. II.

Quod veniente Imperatore mittuntur Legati Apostolici.

Electus igitur Romanorum Imperator, cum statuerit Urbem petere ad Imperiale Diadema de manu Summi Pontificis suscipiendum, primum convenit per Nuncios suos cum Romano Antistite de modo, & tempore intrandi, ut Pontifex rebus opportunis consulere possit. Deinde cum Pontifex noverit, Cæsarem in Italiam intrasse, mittit illi obviam duos Legatos de latere, qui illum convenient antequam Terras Romanæ Ecclesiæ ingrediatur. Et post gratulationes, salutationem, & benedictionem nomine Pontificis, honesto modo exigunt ab illo (1) Juramentum solitum præstari ab electis Imperatoribus antequam intrent Agrum Romanæ Ecclesiæ in forma, qua in Decretis cavetur, videlicet.

§. III.

Juramenti formula præstandi per Imperatorem.

Sanctissimo Domino nostro Domino N. Divina providentia Papæ. Ego B. Rex Romanorum promitto, & juro per Patrem & Filium & Spiritum Sanctum, & per lignum vivificæ Crucis, & per has Reliquias Sanctorum, quod si permittente Domino Romanam venero, Sanctam Romanæ Ecclesiam, & Sanctitatem suam Rectorem ipsius exaltabo secundum meum posse, & vitam; aut (2) membrum nunquam, neque ipsum honorem, quem habet, mea voluntate, meo consilio, meo consensu, aut mea exhortatione perdet, & in Roma nullum placitum, aut ordinationem faciam de omnibus, quæ ad Sanctitatem suam, aut ad Romanos pertinent sine (3) Sanctitatis suæ consilio. Et quidquid de Terra S. Petri ad nostram potestatem pervenerit, suæ Sanctitati reddam, & cuicumque Italicum regimen commiserò, jurare faciam illum, ut adjutor suæ Sanctitatis sit ad defendendam Terram S. Petri secundum suum posse. Sic me Deus adjuvet, & hæc sancta Dei Evangelia.

COMMENTARIUS.

I. Juxta antiquum ms. Pontificale Ecclesiæ Apamiensis in Syria anno MCCXIV. exaratum, de quo in præcedenti Commentario mentionem fecimus, Romanus Pontifex non modo Nuncios, quos ad ipsum de sua promotione electus in Romanorum Regem misit, recipere debet honorifice, & eorum dictis clementer, & honorifice respondere; verum etiam, si iidem

To. I.

Nuncii ex parte Domini sui petant, quod Romanam venire velit in Imperatorem coronandus; tunc Romanus Pontifex unum, vel duos de Fratribus suis Cardinalibus ad ipsum mittere debet circa tempus, quo ipse Rex venturus est, ut simul cum ipso Romanam veniant. Additque mox, eam esse consuetudinem, ut antequam ingrediatur Italiam in præsentia Cardinalium super sancta

Y 2

Fran-

(1) Ita in editione Veneta anni 1516. & Colonienfi anni 1517. in Romana vero anni 1540. legitur, a sua Majestate.

(2) Ita in Romana editione, deest vero, aut in aliis citatis. (3) Ita in Romana, in aliis legitur, sine vestro consilio.

Evangelia manu propria juret, cujus juramenti tenor, & forma in Registris Romanorum Pontificum continetur. Juxta antiquum morem, cui nostrum Cæremoniale concinit, idem plane ritus, quem in hoc §. & seqq. idem ipsum Cæremoniale præscribit, servatus fuit in adventu Friderici III. Imperatoris Romam anno MCDLII. ad Coronam Imperialem de manu Pontificis Nicolai V. accipiendam. Placuit autem Friderici Coronationem præ ceteris hoc loco enarrare, quia scilicet nostrum hoc Cæremoniale in hoc Titulo, qui est, *De adventu & coronatione electi in Imperatorem Romanum*, ejusdem Friderici coronationis sæpe ritum recenset.

II. Ergo anno MCDLII. ipsis Kalendis Januarii, ut ait Naclerus Generatione XLIX. Fridericus Cæsar Romam petiturus ad Coronam Imperialem de manu Pontificis accipiendam, Italiam intravit, secum ducens Ladislaum pupilum Hungariæ, & Bohemiæ Regem, atque Albertum fratrem suum, splendidumque nobilitatis comitatum, sed pacatum, & inermem, nequid formidinis inferret, cum multi exemplis territi antecedentium Imperatorum, suspectum ejus adventum habuissent, adeout etiam Nicolaus ipse Papa V. ut in ejus Vita narrat Platina, portas Urbis, ac turres, Capitolium, Arcem S. Angeli, muris firmissimis munierit, tam ab eo sibi, quam ejus occasione a populo, cum esset natura formidolosus, timens, eamque ob rem milites omnes suos cum collectitiis copiis Romam acciverit. Honorificentissime ubique, atque lautissime Fridericus exceptus est, subministrato etiam omnibus copiis abundanti comœatu. Venetiis cum discessuro abacus ex vitro elegantissimo ei offerendus paratus fuisset, annuit ille morioni suo, ut mensam, in qua repositus erat, commovens, vitra everteret, quibus sic confractis, arridens Fridericus, dicensque, nunquam aurea, vel argentea vasa, ad tam levem casum comminuta fore, pro vitreis, aurea a Venetis munera extorfit, ut tradit Dubravius Lib. XXVIII. & ex eo Spondanus ad annum MCDLII. Num. 1. Pervenit deinde Ferrariam die XVII. Januarii, ubi a Borsio Atestino Marchione, qui in Ducem creari a Cæsare petiit, magnifice, splendideque habitus, xeniisque donatus est. Hic est ille Borsius, qui deinde statis ritibus creatus fuit Dux a Paulo II. Pontifice, ut dicemus infra in Commentario ad Titulum VII. ubi ejus creationis ritus & ordo describitur.

III. Ferraria discedens Fridericus pervenit Bononiam, ibi a Bessarione Cardinale illius Civitatis Legato Apostolico pari magnificentia receptus, & Nicolai Perotti oratione laudatus, quem propterea Fridericus laurea corona donavit; ibi Francisci quoque Sfortiæ Oratores audivit, invitantes illum ad Coronam ferream de more Mediolani suscipiendam. Qui renuens, infensus enim illi erat, Florentiam profectus est, ubi quo ritu in accessu ad eam Urbem a S. Antonio tunc Archiepiscopo Florentino, & Florentinis sit exceptus, quo die illuc venit, scilicet XXI. Januarii, idem S. Antoninus litteris consignavit, Parte III. Titulo XXI. Cap. XII. §. III. Quid vero ei præstitum per eos dies, quibus Florentiæ demoratus est, idem narrat, aitque etiam per idem tempus venisse duos Cardinales a Pontifice missos, ut eundem usque ad Urbem socierent. Fuere hi Apostolicæ Sedis e latere Legati

duo a Pontifice in eam rem creati, nimirum Philippus Tituli S. Susannæ Bononiensis Antistes, ipsius Pontificis frater, & Joannes Carvajalius S. Angeli Cardinalis, uti docent Æneas Sylvius in Historia Friderici III. & Auctor Commentariorum Pii Papæ II. Porro laudati Cardinales, ut iidem Auctores narrant apud eruditum Georgium in Vita Nicolai V. anno MCDLII. Num. 1. in fine, *ubi Cæsarem adivere, eundem Pontificis nomine Romam invitarunt, parata esse omnia ad Coronationem necessaria nunciantes.* Aditque mox, eosdem cœvos Auctores citans: *Monuerunt etiam Cæsarem Legati, vetusti moris esse, ut antequam Cæsares Patrimonii Beati Petri Provinciam ingrederentur, fidem, atque obsequium Romano Pontifici jurarent.* Fridericus hujus moris ignarus, quamquam id alienum esse diceret, se tamen pariturum respondit. Itaque Senis juramentum præstitit, ut Liber Cæremoniarum S. R. E. nos docet, in hoc scilicet præsentis Titulo, sequenti §. IV.

IV. Qua vero die Cæsar Florentiam intravit, & Leonora Lusitana eidem Cæsari desponsata, navibus vecta, ad Liburni portum appulit. Imperator interea, ut rem narrat Auctor Commentariorum Pii II. Lib. 1. *Senas venerat, ibique sponsam manebat, quam postquam propere cognovit, emissis primum Civibus obviam, deinde Alberto germano Duce Austria, post Ladislao patruæ Hungariæ, ac Bohemiæ Rege, quarto loco cum Reliquiis Sanctorum, Clero, postremum & ipse medius inter duos Legatos Apostolicos, S. Susanna Nicolai Pontificis germanum, & S. Angeli Cardinales, intra secundam, & tertiam Urbis portam egressus, conjugem expectavit, ibique ambo ex equis descendentes, in spatioso, & patenti loco se se mutuis amplexibus exceperunt.* Addit tum etiam memoratus Auctor, ibi paulo post Senenses marmoream columnam erexisse, memoriale diuturnum, quo posthac Imperatorem ab Oriente, Imperatricem ab occidua solis parte venientes, illic se primum vidisse posterius cognoscant. Sed his omissis, certe, dum Senis esset, Imperator, in manibus Legatorum Apostolicorum juramentum illud §. III. descriptum præstitit, ut in sequenti §. IV. nostrum Cæremoniale testatur, ex quo etiam docemur, ipsum juramentum jam ante hunc Fridericum III. plures alios præstitisse, juxta scilicet antiquum ritum cujus passim mentionem faciunt Auctores Vitarum Imperatorum, & Ecclesiasticæ historiæ Scriptores. Ceterum præter hoc juramentum legitur infra & alia juramenti formula, quod æque ex pervetusto ritu solet Imperator Romæ in sua Coronatione præstare Summo Romano Pontifici, & Successoribus suis, de quo nos suo loco dicemus.

V. Porro præscribendo illi juramento occasionem dedit, quod Imperatores non semel Romam venientes ad suscipiendam Imperii Coronam molesti essent Pontifici, Sedisque Apostolicæ ditionem, ac jurisdictionem invaderent. Hinc, ut scribit Auctor secundæ Vitæ Innocentii Papæ VI. apud Baluzium, *Karolus Rex Alemanniæ, & Bohemiæ descendens in Italiam, Coronam Imperialem de manibus Domini Petri Episcopi Ostiensis ad hoc missi, ab Innocentio nempe VI. Avenione commorante, in Basilica Sancti Petri in die Sancto Paschæ, seu die V. Aprilis anni MCCCLV. honorabiliter suscepit, & uxor*
ejus

eius cum eo, statim Romam exiens eo die. Quia scilicet, ut notat Pagius in ejusdem Innocentii Vita, Num. xiv. jam antea juramento se adstrinxerat, quod ante diem Coronationis assignatam non ingrederetur Romam, eademque Coronationis die, legitimo cessante impedimento, recederet, & nulla mora in Terris Ecclesiæ facta, continuatis itineribus ad Terras Imperii se se reciperet, ad vitandas videlicet occasiones rixarum cum Ecclesiæ subditis, & pruriginem occupandi aliquid, aut quidquam aliud contra Sedem Apostolicam agendi, sicut a plerisque aliis actum fuerat, quæ inextricabilia inter Ecclesiam & Imperium diffidia generare possent, sicut etiam agnovisse Krantzium Lib. viii. Capite xxxvi. scribit Spondanus ad annum mcccclv. Num. II. ubi & addit, Franciscum Petrarcham has rationes concoquere non valentem, solita calami libertate, Lib. II. *De vita solitaria*, Sectione iv. Cap. iii. graviter questum esse, Cæsarem hunc Carolum IV. veluti rapto Diademate in Germaniam abiisse, patriis latebris, & nomine contentum Imperii; cujus extrema membra complecteretur, caput sperneret; nulloque persequente fugientem, sponsæ sacros amplexus, & pulchræ faciem horrere Italiæ. Excusare quidem Cæsarem se Ecclesiæ jurasse, ne amplius quam unum diem Romæ ageret: Sed ò, inquit, *infamem diem! ò pudendum factus! ò superi! en iusjurandum, en religio, en pietas! Romanus Pontifex ita suam Romam deseruit, ut eam nolit ab alio frequentari, & de hoc cum Romano Imperatore paciscatur*. Sed, ut subdit Spondanus, excusandus in homine liberrimæ linguæ impotens amor Urbis Romæ, & Italiæ, præ quo nihil pensi habuit; etiam alioqui parum Pontificibus æquus, ob desertam ab iis præcipuam ipsorum Sedem Romanam.

VI. Esse autem pervetustum ritum, ut Imperatores suscepturi Imperialem Coronam, in Urbe a Romano Pontifice, iterum atque iterum juramentum præstarent, tum ante quam Urbem ingrederetur, tum etiam actu Coronationis, docet nos celebre Henrici V. exemplum, qui teste Petro Diacono, Libro iv. Chronici Casinensi, Cap. xxxv. cum in Tusciam devenisset, demissis Romam in porticu S. Petri Nunciis, solemne juramentum edidit, juxta formulam ibidem descriptam; idemque juramentum præstiterunt Al-

bertus Cancellarius, Hermannus Fridericus, & Gotfridus Comites, Fridericus Saxo, & Cuono frater Berengarii, Sigebodo de Bavoaria, Henricus Dux Carinthiæ, Bertulfus filius Ducis Bertulfi, atque Albertus Cancellarius. Ita plane habet laudatus Petrus Diaconus loco citato Chronici Casinensis, juxta editionem Angeli de Nuce, additque mox etiam sic: *Hi omnes post Imperatorem eo ordine juraverunt, ut si Imperator hoc implere nollet, ipsi cum omnibus suis tenerent se ad Romanam Ecclesiam*. Rursus, ut ibidem Cap. xxxvii. legitur, ubi Pontifex Paschalis scilicet II. Imperatorem venisse cognovit, directis Nunciis, securitatem ab eo, & obsides expetebat, cui Cæsar obsides tradens, & ab eo obsides recipiens, jurejurando firmavit de ipsius Apostolici vita, de honore, de membris, de mala captione, de regalibus etiam, & patrimoniis B. Petri, & nominatim de Apulia, Calabria, Sicilia, ac Capuano Principatu, factis etiam sacramentis, quod omnem investituram Ecclesiarum, & earum res omnino quietas dimitteret. Confirmavit iterum iterumque hujusmodi juramentum Henricus Paschali Papæ II. & quidem juxta antiquum morem, ut dicemus inferius in Commentario ad §. vi.

VII. Ut alia exempla omittam, jam ante Fridericum III. ubi Sigismundus de Corona Imperiali recipienda Romæ Eugenium Pontificem IV. sollicitè urgebat, his tandem conditionibus res constituta est inter eundem Pontificem, & Sigismundi Nuncios Matikonem Comitem Recomensem, & Gasparem Slick Vicecancellarium suum die vii. Aprilis anni MCDXXXIII. ut Rex Viterbium, vel in Urbem concederet ad Pontificem, præstaretque ei, vei ipsius Legato ad hoc instituto omnia juramenta, aliaque cuncta, quæ tam de consuetudine, quam de jure facere teneretur juxta formam Clementinæ Constitutionis, accederentque solum cum comitatu suo, & familia, nec ullum secum duceret scienter hostem, aut inimicum Ecclesiæ, aut ipsius Pontificis, vel populi Romani rebellem; si vero inadvertenter aliquis ejusmodi inter ceteros reperiretur, illum ad indicationem remitteret. Atque hæc quidem narrat ex Appendice Concilii Basileensis Spondanus ad annum ipsum MCDXXXIII. Num. v. itemque Pagius in Vita Eugenii IV. Summi Pontificis, Num. xliii.

§. IV.

De liberalitate Pontificis erga Imperatorem, cum Ecclesiæ territorium ingressus est.

Aliquando Oratores electi quando veniunt ad intimandam electionem, & ad petendam confirmationem nomine electi Regis, solent præstare supradictum juramentum, si habent ad hoc speciale mandatum. Hoc Juramentum Federicus Tertius Imperator, qui adhuc regnat, dum Senis esset, in manibus Legatorum Apostolicorum anno salutis quinquagesimo primo supra mille & quadringentos præstitit, & ante eum plures alii præstiterunt. Dehinc, ut primum Ecclesiæ territorium ingressus est Cæsar, consuevit cum sua familia expensis Pontificis ali, quandiu & Romæ, & in Agro Romano fuerit. Nicolaus Quintus quamvis Federico prædicto cum familiaribus quingentis tantum expensas promiserit, longe tamen plures ære suo aluit. Ut Sutrium venit Cæsar, vel locum Urbis vicinum, ita ut postridie (1) applicare ad Urbem possit, Le.

(1) Ita in Romana editione, in Veneta vero legitur, *pridie post*.

Legati Apostolici illum cum aliquibus Prælati a Pontifice missis qui necessaria curent, dimittunt, ut Romam perveniant.

COMMENTARIUS.

I. **E**xplicari vix potest, quanta fuerit semper Romanorum Pontificum, & Apostolicæ Sedis erga Imperatores, ac Principes liberalitas in ipsis subveniendis, quum indigerent. Ut alios omittam Reges, certe nostris hisce temporibus Austriaci Imperatores occasione belli Turcici, ne sua Regna amitterent, plurima centena aureorum millia ab ipsis Pontificibus obtinuerunt. Mirum autem videri debet, aliquando Principes inter se belligerantes iniquissima violentia duris, longisque exactionibus Ditionem Sanctæ Romanæ Ecclesiæ, quæ nulli unquam molestiam fecit, prægravasse. At vero licet Principes ipsi, & Apostolicam Sedem, & Romanos Pontifices injuria afficerent; hi tamen a Christo Domino edocti, cujus vires gerunt in terris, studuere semper eximia illos liberalitate superare, præsertim vero ubi Romam adveniebant. Testatur id quidem hic noster §, qui loquens de Friderico III. appropinquante ad Urbem, ut a Nicolao V. Papa coronam Imperii acciperet, sic inquit: *Dehinc, ut primum Ecclesiæ territorium ingressus est, consuevit cum sua familia expensis Pontificis ali, quandiu & Romæ, & in Agro Romano fuerit. Additque mox: Nicolaus Quintus quamvis Federico prædicto cum familiaribus quingentis tantum expensas promiserit, longe tamen plures ære suo aluit.* Testem ejus Pontificiæ liberalitatis habemus etiam Æneam Sylvium, qui in Historia laudati Friderici III. sic inter alia scribit: *Pontifex qui se quingentis equitibus ex comitiva Cæsaris sumtus pollicitus fuerat, mille & amplius pavit, ubertim singula ministravit, pluribus, quos vel amore singulari coluit, vel Cæsari cariores putavit, seorsum providit.*

II, Legendus idem Aëtor nostri hujus Cæremonialis Augustinus Patricius in Epistola ad Joannem Manellum Cremanum, ubi describit

adventum ejusdem Friderici III. Romam ad Paulum Papam II. præsertim vero Num. xxvii. ubi insignem hujus Pontificis liberalitatem erga Fridericum enarrans, hæc habet: *Omni hoc tempore, quo Cæsar Romæ fuit, & quandiu Ecclesiæ Romanæ Agrum peragravit, Pontifex illum, & omnem ejus comitatum hospitio, victuque suo ære continuo excepit, magna liberalitate, & rerum omnium ingenti copia. Non equis, non hominibus quicquam defuit; ubique benigne comiterque omnes habiti sunt. Gratias spirituales, quas plurimas, & magnas a Pontifice impetrarunt omnes, sine pecuniis redemit. Omnia enim Pontifex gratis jussit expediri. Donatus est præterea Cæsar a Pontifice albo equo falerato, & aurea toga, quibus in solemni pompa usus est; & præter hæc decentibus quibusdam munusculis, lapillis, unionibusque pretiosissimis ornatis, quæ supra dictum militem aureorum nummum aestimata sunt. Longum esset varia id genus exempla recensere hoc loco. Notum plane est, quanta munificentia, atque eximia liberalitate Pontifex Maximus BENEDICTUS XIV. non ita pridem Carolum Regem utriusque Siciliæ exceperit, qui post fugatos apud Velitras Germanos, Romam ad ipsum Pontificem venit, ut ejus pedes deoscularetur. Summa quippe est laudati Caroli Regis religio, atque devotio erga Apostolicam Sedem, & Jesu Christi in terris Vicarium Romanum Pontificem Maximum, quem ejusdem Caroli Majores Galliarum æque, ac Hispaniarum Reges Christianissimi, atque Catholici, summis semper obsequiis venerati sunt, præsertim vero illius parens Philippus V. Rex Hispaniarum, qui aliquando in suæ egregiæ humilitatis indicium erga Vicarium Christi manu propria ac genibus flexis scripsit sanctæ memoriæ Benedicto XIII. quem ob egregiam ejus pietatem semper plurimi fecit.*

§. V.

Ingressus Cæsaris in Urbem, & ordo obviandi, & de statione extra Urbem.

Sequenti die electus Imperator Romam versus capit iter, cui honoris gratia obviam, mittuntur a Pontifice Prælati, Barones. & Curiales hoc ordine, ut in Federici adventu servatum est. Primi ad sextum lapidem Columnenses Proceres cum suis amicis, & clientulis (1) & mox Ursini, atque alii Barones Urbis; tum Pontificis copiæ, quæ adsunt cum illarum Præfecto; inde Vicecamerarius cum Præfecto Urbis, Senatore, Conservatoribus, Officialibus, & aliis nobilibus civibus Romanis; deinde Ordines Curiae cum Regente Cancellariæ sine aliquo alio Prælato; demum alii Prælati domestici Pontificis cum omni ejus familia; & tandem Sacrum Cardinalium Collegium ad radices montis juxta Domum Leproforum Cæsarem expectabunt. Hi omnes distinctis intervallis Imperatori electo obviabunt. Oratores vero Principum, siqui in Urbe erunt, pro suo libito obviam procedent. Cardinales ut Cæsarem convenient, congratulationibus, & oblationibus factis nomine Pontificis, & Collegii, illum habentes medium inter duos primos Episcopos Cardinales deducunt usque ad tentorium, sive alium locum sibi deputatum extra Urbem, nam Cæsar non consuevit ea die, qua

(1) Ita in Romana editione anni 1560. legitur, in Veneta vero 1. anni 1516. *clientella*.

qua appulit, Urbem intrare, sed pernoctare saltem una nocte extra moenia in campis. Cardinales, & alii omnes, postquam Cæsar ad locum deputatum pervenerit, in Urbem revertuntur.

COMMENTARIUS.

I. **S**enis profectus Fridericus electus Imperator iter Romam versus suscepit, cui magnus apud Viterbium mandante Pontifice, fuit honor exhibitus, teste Ænea Sylvio in Historia Friderici III. Cardinales Legati ex Viterbio Romam præcessere, ad eamque Urbem iter etiam suum Fridericus movit. Describit autem raptim memoratus Æneas in citata Historia, quo ritu Cæsar extra Urbem sit exceptus. Ubi enim ait, de colle *Montis mali*, seu *Marii* descendit, occurrit ei Senatus Apostolicus, ac ea nocte Cæsar extra moenia Urbis in Domo Marci Spinelli negociatoris Florentini pernoctavit. His similia, sed fusius tradit Cornelius Zantissietus in Chronico ad annum MCDLII. cuius locum describit in Nicolai Papæ V. Vita Georgius ad prædictum annum MCDLII. Num. II. *Cum igitur feria quarta post Dominicam, Reminiscere*, quæ est secunda Quadragesimæ, idest die VIII. Martii, quæ eo anno in feriam IV. incidit, *Dominus Fridericus cum sua comitiva circa crepusculum noctis appropinquasset ad Urbem Romam, iverunt ei obviam Senator Urbis, & Soldanus, una cum Nobilibus, & Consulibus, & Electis Urbis primo. Subsequenter omnes Cardinales cum Episcopis, Prælati, & Doctoribus, circiter unum milliare; a quibus magnifice & honorifice susceptus est, & ductus ante Urbem, retro Palatium S. Petri juxta viam communem in campis, in quibus Dominus Nicolaus Papa figi fecit decem tentoria, in quibus hospitati sunt omnes fere Magnates, & Satellites Regis. Porro Rex, & Regina, necnon & Rex Hungariæ prædicti hospitati sunt illic in Domo nova cujusdam Florentini recenter constructa.* Haftenus ille.

II. Ad sextum vero lapidem, ut nostrum Cæremoniale ait, Friderico occurrerunt primum *Columnenses Proceres* eum suis amicis, deinde *Ursini*, quos alii Urbis Nobiles, Pontificis copiæ, Vicecamerarius cum Præfecto Urbis, Senatore, Capitolinis Magistratibus, Romanis Civibus, & Pontificiæ Aulæ Præsulibus consequuti sunt. Sed audiamus Æneam Sylvium, qui in citata Historia Friderici III. postquam retulit ingentem apud Viterbium Imperatori ipsi honorem exhibitum, ita inferius subdit: *Legati Romam præcessere. Ipse, Imperator scilicet Fridericus, ad Idus Martias ex Sutrio iter Romam summo mane accepit, cui jam Romæ proximo quidquid Nobilitatis in Urbe fuit, obviam datum est. Primi omnium, qui nomine digni viderentur, Columnenses fuere, duo Martini Papæ V. nepotes, quorum ille alterum Principem Salerni, alterum Marforum Ducem creaverat. Hos plurimi sequebantur, domo nobiles & opulenti cives, Nec minore comitatu secundum locum tenuere præpotentes Ursinorum Proceres, inter quos etiam Prælati aderant. Tertio loco Perusinus Episcopus Thesaurarius Papæ militiam omnem, cui Præfectus erat, secum adduxit. Intervallo deinde competenti Nicolaus Placentinus Episcopus Vicecamerarius Apostolicus, qui postea Mediolanensem Ecclesiam ade-*

ptus est, cum Senatore Romano, primariisque civibus Urbis Imperatori occurrit; cunctique Cæsaris adventum latis animis accipere verbis, ut Itali solent, suavibus, atque ornatissimis ostenderunt.

III. Haftenus dictis addit mox etiam ipsum nostrum Cæremoniale, Apostolicum S.R.E. Cardinalium Senatum *ad radices montis juxta Domum leproforum Cæsarem expectasse*. Omnium temporum, omnium nationum honoris genus fuisse occursum Viris Principibus, ut & Ecclesiarum Præsulibus, non uno in loco nostrorum Operum jam nos adnotavimus, viderique inter alios de eo ritu differentes potest eruditissimus Morettus in Lucubratione, *De Presbyterio*, tum alibi, tum Parte III. Sect. IX. pag. 283. Num. V. & in Nota (a) ejusdem paginae. Ut alia exempla omittam, consuevisse antiquitus Imperatori venienti ad Urbem fieri occursum Romanorum, jussu Pontificis ad montem *Marii*, docet nos Chronicon Casinense Lib. IV. Cap. XXXVII. juxta editionem Angeli de Nuce, ubi enarrat occursum, plaususque factos Henrico V. anno MCXI. a Paschali Papa II. ordinatos: *Obviam ei misit Pontifex in montem Gaudii, qui & Marii dicitur, Bajulos, Pereostatorios, Stauoserarios, Aquiliferos, Leoniferos, Lupiferos, Draconarios, Candidatos, Defensores, Stratores, & maximam populi multitudinem cum floribus, & palmis.* Vide laudatum Angelum de Nuce loco citato, ubi Bajulos ipsos, aliosque in occursum Henrici a Paschali II. directos fuisse exponit. Videri etiam de his vocibus potest eruditissimus Carolus Dufresne in suo mediæ & infimæ Latinitatis Glossario.

IV. Audiendus nunc iterum Æneas Sylvius in Historia Friderici III. in qua quidem cæremonia omnes ad eam coronationem Imperatoris spectantes præsentem hoc Titulo præscriptæ, luculentissime explicatæ sunt: *Venit deinde Cæsar, inquit, in eminentem collem, unde Urbem spectare potuit.... Ubi de colle descensum est, ibi Sacer Senatus Apostolicus extra ordinem occurrit. Nam cateris Cæsaribus id honoris negatum ferunt. Credo equidem, postquam Cæsarea Majestas attenuata; nam priscis temporibus non Cardinales solum, verum & ipsos Romanæ Urbis Maximos Pontifices obviasse constat. Quippe ad Fridericum h. usque ad Sutrium Pontifex venit. Sed est omnium potestatum vicissitudo; Olim Cæsarea dignitas ingens fuit, nunc Sedes Apostolica major est. Cujus auctoritatem post traditas Petro claves Regni Cælorum semper fuisse majorem putaverim. Sane occurrit Friderico I. Imperatori cum exercitu Romam properanti Hadrianus Papa IV. testaturque Anonymus Vaticanus apud Pagium in Vita ejusdem Hadriani Num. X. Pontificem in præparata sibi Sede confidentem, cum Fridericus ad ejus vestigia procidisset, & deosculatis pedibus ad pacis osculum accedere voluisset, Pontificem illud ei denegasse, ob non impensum sibi ab eo consuetum ab Orthodoxis Imperatoribus, pro Apo-*

Apostolorum Petri & Pauli reverentia, reddi Romanis Pontificibus stratoris obsequium, Respondente autem Rege, se ad hoc non teneri, sequenti die investigata diligenter antiqua consuetudine, & veteribus monumentis, iudicio Principum, qui aderant, decretum fuisse, totiusque Regalis Curie consensu confirmatum, Regem debere Pontifici strequam, seu suppedaneum tenere, dum conscenderet equum, & stratoris officium exhibere; idque Fridericum Imperatorem in conspectu universi exercitus sui alacriter præstitisse, & postea ad pacis osculum admissum fuisse.

V. Ergo vel Friderici I. exemplum satis nos docet, olim, & semper Apostolicæ Sedis dignitatem, ejusque potestatem, ingentem ac superiorem fuisse Regia & Imperatoria Majestate. Sed ordinem persequamur nostri Cæremonialis, ubi edicitur, Cardinales ut Cæsarem Romam preperantem convenient, *congratulationibus, & oblationibus factis nomine Pontificis & Collegii, illum habentes medium inter duos primos Episcopos Cardinales, deducere usque ad tentorium, sive alium locum sibi deputatum extra Urbem*. Additque mox: *Nam Cæsar non consuevit ea die, qua appulit, Urbem intrare, sed pernoctare saltem una nocte extra mœnia in campis &c.* Eadem tradit in Historia Friderici III. Æneas Sylvius, qui etiam antiqui ejus moris rationem explicare conatur, ita inquires: *Cardinales postquam Cæsarem salutaverunt, secum familiariter aliqua tractaverunt; reversi Romam eum extra Urbem reliquerunt. Cujus rei causam non aliam arbitrari possum, nisi quod ea*

dies Papa cedat ad providendum, nequid, ingrediente Cæsare, tumultus fiat; sive id spatium sibi Cæsares ipsi assumerent, ut explorato Urbis statu, tutius ingrederentur; seu bis terque aliqua vel causa, vel casu res gesta vim consuetudinis accepit. Addit, Cæsarem, & Imperatricem mansisse ea nocte in domo Marci Spinelli negotiatoris Florentini, quam sibi deliciarum causa extra Urbem edificaverat; ceteros vero ait in castris mansisse.

VI. Teste eodem Ænea Sylvio, multis Cæsar indulgit Urbem introire, inter quos, ut idem Auctor scribit, *Æneas fuit, qui mox ad Pontificem vocatus, multa de mente Cæsaris interrogatus, omnia tuta, quieta, sinceraque dixit, neque timore ullo fuisse opus, affirmavit. Ad quem Pontifex, Ut tibi verum manifestem, ait, cum Fridericum tuum adversum nobis, & Ecclesiæ multi venientem affererent, quamvis non haberemus omnibus fidem, maluimus tamen salvari timentes, quam perire audaces. Atque his dictis eum remisit in domo, quam sibi egre-giam assignaverat juxta Tiberim. Castellanus eam quondam construxerat, quæ Arcem S. Angeli per multos annos ab Eugenio, IV. scilicet Pontifice, tenuerat. Forte antiquum morem, sequutus est Carolus Rex utrusque Siciliæ, ubi anno MDCCXLV. apud Velitras devictis fugatisque hostibus Romam die II. Novembris perveniens, ut Summo Romano Pontifici obsequia sua exhiberet, & pedes deoscularetur, nocte in Suburbano nobilis Patriciorum familiæ, extra portam Numentanam, quæ hodie Pia dicitur a Pio Papa IV. ejus instauratore, mansit.*

§. VI.

De juramento, quod Cæsar Urbem ingressurus præstat Romanis.

Consueverunt etiam electi Imperatores hac die, antequam ponticulum, qui primus ante ingressum Urbis post descensum montem occurrit, pertranscant, præstare juramentum Romanis in hanc formam: *Ego Karolus Rex Romanorum futurus Imperator juro me servaturum Romanis bonas consuetudines suas. Sic me Deus adjuvet.*

COMMENTARIUS.

I. **M**orem plane fuisse antiquissimum, ut electi Imperatores inter alia juramenta, quæ Romano Pontifici, Seditque Apostolicæ præstare solent, Romanis etiam ante ingressum Urbis juramentum præstent, de servandis scilicet bonis consuetudinibus suis, docet nos Henrici V. exemplum, ubi Romam accessit III. Idus Februarii anno MCXI. Teste, siquidem Petro Diacono Lib. IV. Chronici Casinensis, Capite xxxvi. *Romanis instantibus, ut honorem, & libertatem Urbis sacramento firmaret, callide illos Cæsar circumvenire cupiens, Teutonica lingua juxta suum velle juravit. Quicquid autem sit de hujusmodi juramento, teste eodem Petro Diacono, Libro citato Cap. xxxvi. idem Henricus duo juxta priorum Imperatorum consuetudinem juramenta, unum juxta Ponticulum, prope montem scilicet Martii, ubi, uti jam dictum superius est, solemnissima pompa occursum jussu Pontificis Henrico fuit, alterum ante portam porticus, Romanorum*

populo fecit. Notanda potissimum ea verba sunt, quibus dicitur, præstita fuisse populo Romano duo hæc juramenta ab Henrico, *juxta priorum Imperatorum consuetudinem*; erantque hæc plane diversa ab iis, quæ Romano Pontifici, Seditque Apostolicæ præstari solita erant, & quidem iterum iterumque, ut exemplo ejusdem Henrici addiscimus, qui, ut ait memoratus Petrus Diaconus, ingressurus Urbem, directis ad eum a Paschali II. Papa Nuntiis, *jurejurando firmavit de ipsius Apostolici vita, de honore, de membris, de mala captione, de regalibus etiam, & patrimoniis B. Petri, & nominatim de Apulia, Calabria, Sicilia, ac Capuano Principatu, factis etiam sacramentis, quod omnem investituram Ecclesiarum, & earum res omnino quietas dimitteret.* Vide quæ de hujusmodi investituris diximus nos Tomo III. Conciliorum in Historia Œcumenici I. Lateranensis Concilii. Ibi enim & earum originem, & progressum, & extinctionem invenies.

§. VII.

§. VII.

De Imperatoris ingressu in Urbem.

Postera die (1) summo mane Cæsar per portam, quæ est sub Arce S. Angeli, hoc ordine: quasi triumphans ingreditur. Primi duo Equites vexilla duo Cæsaris portant, alterum S. Georgii, quod ad Svevorum pertinet custodiam, Aquilæ alterum. Hos sequuntur Cæsaris cohortes armatæ, tum Nobiles Proceres, & Togati ejus. Inde Oratores Regum, & Principum, qui adsunt. Tum si quis adest Rex, aut maximus Princeps, ut fuit cum Federico Rex Ungariæ, & Bohemiæ Ladislaus; & tunc sequitur Præfectus Urbis, & Senator. Et ad Præfectum quidem pertinebat nudum ense ante Cæsarem ferre, Federico tamen Marecallus suus, non Præfectus, gladium prætulit. Inter istos autem, & Cæsarem nemo equitare debet, nisi Marecallus, si Præfectus non præfert ense. Incedit deinde Cæsar solus equitans, & post eum Prælati Consilarii, Proceres inermes, & alii Togati sui. Deinde modico intervallo Imperatricis familia; si uxor Virum sequitur, succedere debet; ante illam Nobiles, & Prælati, & post Matronæ, Virgines, & pedissequæ; circa illam vero solam equitantem pedites multi; ultimo incedunt Ecclesiasticæ copię pompam claudentes. Portam ipsam qua sub arce ingrediuntur, nostri Codices falso Collinam appellant. Collina autem porta non est in novis Leonis Papæ suburbiis, sed in antiqua Roma. Quirinalis primum dicta, deinde Collina, ut scripsit Varro, a pluribus montibus, qui in Quirinali monte continebantur, hodie Salaria nuncupatur, quia inde via Salaria itur. In porta igitur, quæ sub arce est, non Collina, Clerus Urbis sacris vestibus ornatus cum Crucibus, & Sanctorum Reliquiis, præsidente Vicario Urbis, & aliis Ecclesiarum Prælati infulatis, Cæsarem expectant, adveniendi Cruces deosculandas offerunt, & eum incensant; ac cantantes, *Ecce mitto Angelum meum &c.* procedunt usque ad gradus Basilicæ Principis Apostolorum. Civēs autem digniores baldachinum supra Cæsaris caput portant. Conservatores freno equum ducunt. Cum vero est in magna arca ante gradus, Præfectus, & Senator id gerunt. Et descendente ex equo Cæsare, Præfectus stapham tenet; deinde ante eum præcedit. Inter equitandum autem, Cæsaris Camerarius pecuniam spargere consuevit, ut diximus in Coronatione Papæ de Soldano.

C O M M E N T A R I U S.

I. **J**Am alibi diximus, omnium temporum, omniumque nationum honoris genus fuisse occursum. Viris Principibus, fieri eisdem etiam ab ipsis Summis Sacerdotibus solitum. Egregiam Iaddi Sacerdotis pompam, qua occurrit Magno Alexandro Hierosolymas subituro, inter alios describit Josephus Libro xi. *Antiquisatum Judaicarum*, Cap. viii. Penetrantem Athenas Regem Attalum exhibens Livius Lib. xxxi. Historiarum, ita inquit: *Civitas omnis obviam effusa cum conjugibus, ac liberis; Sacerdotes cum insignibus suis intrantem Urbem, ac Divi prope exciti adibus suis exceperunt.* Exhibitum passim hujusmodi honoris genus a Summis Romanis Pontificibus fuisse Regibus ad Urbem venientibus, præsertim cum suscepturi essent Imperialem Coronam, multis posset ostendi exemplis, quæ in Ecclesiastica Historia, & in Romanorum, atque Imperatorum Vitis occurrunt. Certe Carolo Magno, qui Romam ob eam causam venit circa diem octavum Kalendas Decembris anni dccc. prodiit in ejus Vita. Ademarus, Leonem Papam III. & Romanos cum eo, apud Nomentum, duodecimo ab Urbe lapide occurrisse, eum summo cum honore suscepisse, statimque eundem ad Urbem præcessisse. In crastino vero in gradibus Basilicæ B. Petri Apostoli stans Leo, missis obviam Romanæ Ur-

To. I.

bis vexillis, ordinatis etiam per congrua loca, tam peregrinorum, quam civium turmis, qui venienti Carolo laudes dicerent, ipsum cum Clero, & Episcopis equo descendente, gradusque ascendente suscepit, dataque oratione, in Basilicam ipsam B. Petri, psallentibus cunctis, introduxit.

II. Longum esset alia hic recensere exempla veterum Imperatorum, quibus solemnissima cum pompa Urbem ingredientibus suscipienda causa Imperii Coronæ, cum solemnæ æque Processione Romani Pontifices occurrerunt. Ut alios omittam, jam ante Fridericum III. Sigismundo Urbi appropinquanti Eugenius IV. Pontifex anno MCDXXXIII. *obviam destinavit aliquos Cardinales, ac plures Prælatos, & Proceres Romanorum, qui magno honore eum deduxerunt, Clero, populoque ingenti pompa, ac plausu comitante*, uti ex cœvis Scriptoribus refert Spondanus ad ipsum annum MCDXXXIII. Num. xiv. Quo autem ritu, & apparatu laudatus Fridericus III. ingressus Urbem fuerit, & qua comitate, atque dignitate a Romanis Ordinibus, & Pontifice Nicolao Papa V. exceptus, ut Corona scilicet Imperii donaretur, pluribus Æneas Sylvius describit in Historia ipsius Friderici III. pag. 75. & seqq. & inter alios Cornelius Zantflietius in suo Chronico ad annum MCDLII. ubi ita inquit: *In-*

Z

cra-

(1) Verba ista, *summo mane*, leguntur quidem in editione Romana; desunt in Veneta, & Colonia.

erassino, nempe die 1x. Martii, præfatus Romanorum Rex cum omni sua comitiva ductus est in Urbem per portam S. Angeli per viam Papæ usque ad Ecclesiam S. Petri a Clero universo cum Crucibus, Vexillisque, & Sanctorum Reliquiis, Senatuque, & populo Romano, Sanctissimo Domino nostro Papa una cum toto Collegio Cardinalium eum ante januas Ecclesiæ Sancti Petri expectante.

III. Teste laudato Ænea Sylvio, qui præ ceteris ingressum ipsum luculentius enarravit, introeundi hic ordo habitus est. Duo Cæsaris Vexilla fuerunt. Alterum, quod S. Georgii vocitant, id veteri more Suevorum custodiæ deberi ajunt, apud quos militia S. Georgii robur Imperii non parvum ducitur. Deinde Vexillum Aquilæ dictum, & circa ipsum egregii quamplures Equites, quorum ductor fuit Comes Magdeburgensis. Tum Principum, atque Civitatum Legati, sed inter hos nata contentio est, inter Venetos scilicet, & Mediolanenses, qui circa locum litigabant, dataque Venetis præcedentia, ac præcedentibus, qui signa tulerunt, Equitibus, Nobiles ex Alemannia, Bohemia, Hungaria sequuti sunt, qui togati aderant. Eos Italici generis insignes Viri, ab inde Romani Cives, tum Barones, demum Legati Lucani, Ferrarienses, Montisferrati, Senenses, Florentini, Mediolanenses, Veneti, Portugaleses, Aragonenses. Subinde Rex Ladislaus venit suos circa Ministros habens, & aliqui apud eum ex Germania generosi Comites fuere. Inter ipsum autem, & Cæsarem Senatori, & Præfecto Urbis datus est locus, quippe quod his ex officio competere ajebant, postquam Urbem Cæsar intrasset, ejus equum manu regere. Marefcallus nudatum enssem ante Cæsarem tulit. Post Cæsarem proximi fuere Episcopi, Senensis, Gurcensis, Ratisponensis, Trigestinus, & reliqui Confiliarii, Comites, ac Barones. Vacuus exinde ad decem passus locus mansit, in quo primo fuere Ministri Nobiles Imperatricis, demum Colimbriensis Episcopus, ac Marchio Valentinus Imperatricem proximi antecedeabant, & cum his Albertus Pocendorffius Magister Curie. Ipsam vero multi pedites solam ducebant. Post plurimæ Matronæ, Virginesque non minus facie, quam vestimentorum ornatu demirandæ sequebantur. Novissimus omnium equitatus Apostolicus incedebat. Tubarum clangor multis in locis assiduus exaudiebatur.

IV. Hæc Æneas Sylvius in citata Friderici III. Imperatoris Historia, ubi etiam mox addit, quod, *ubi ad portam Urbis ventum est, Episcopus Spoletanus, Vicarius Pontificis, ac plurimi Coepiscopi, & Abbates infulati venerabiles Sanctorum Reliquias in Processione ferentes occurrerunt; Cæsaremque sub aureo panno, quem sive Umbraculum vocitant, sive baldachinum, introduxere usque ad gradus Basilicæ S. Petri.* Portam ipsam, qua sub arce ingrediuntur, quidam Codices falso Collinam appellant, ut notat nostrum Cæremoniale: *Collina autem porta non est in novis Leonis Papæ suburbiis, sed in antiqua Roma. Quirinalis primum dicta, deinde Collina, ut scripsit Varro, a pluribus montibus, qui in Quirinalis monte continebantur, hodie Salaria nuncupatur, quia inde in via Salaria itur.* Viam Sariam ideo appellatam, quod per eam Sabini sal a mari deferrent, notavit eruditus Floravan-

tes Martinellus in sua Roma ex Ethnica sacra, Cap. II. Num. 111. Ceterum in porta, quæ sub Arce Hariani, seu S. Angeli est, & vulgo porta Castelli dicitur, non autem Collina, *Clerus Urbis, ut ait noster §. sacris vestibus ornatus cum Crucibus, & Sanctorum Reliquiis, præfidente Vicario Urbis, & aliis Ecclesiarum Prælati infulatis, Cæsarem expectant, Urbem scilicet solemni pompa ingressurum; adveniienti Cruces deosculandas offerunt, & eum incensant, ac cantantes, Ecce mitto Angelum meum &c. procedunt usque ad gradus Basilicæ Principis Apostolorum.* Juxta ritum in Romano Pontificali præscriptum Parte 111. Titulo xx11. qui inscriptus est, *Ordo ad recipiendum Processionaliter Imperatorem*, quem nos in Commentariis nostris ad ipsum Pontificale fusc explicuimus, *Imperator ex equo, vel, quod magis convenit, descendens in terra super tapete stratum genuflexus osculatur ibidem Crucem*, illam nempe Crucem, quam ei præcipuus Prælati deosculandam porrigit, non autem plures, ut nostrum Cæremoniale innuit.

V. Porro nostro huic §. concinit Romanus Ordo xiv. Auctore Jacobo Gajetano, Cap. cv. quod inscriptum est, *Ordo ad benedicendum Imperatorem, quando coronatur*, cujus verba hæc sunt: *Cum Rex in Imperatorem electus pervenerit ad portam Collinam, quæ est juxta Castellum Crescentii, recipiatur honorifice a Clero Urbis cum Crucibus, & thuribulis, & processionaliter deducatur usque ad gradus Basilicæ S. Petri, cantantibus universis, Ecce mitto Angelum meum. Camerariis ejus missilia spargentibus ante ipsum, & Præfecto Urbis gladium præferente.* Eadem leguntur in ms. Pierfantiiano Codice Cæremoniali; atque hi sunt antiqui Codices, quos nostrum Cæremoniale merito refellit, quod falso portam Collinam appellant portam illam, quæ est sub Arce Hadriani; cum alia esset Collina porta juxta notata a nobis paulo superius. Fuit hic error vulgi, in quem & alii Scriptores impeerunt. Sed agenda nihilominus gratiæ memoratis Codicibus sunt, quod nobis antiquos ritus conservarunt, qui deinde in meliorem formam redacti novo huic Cæremoniali ab Augustino Patricio, qui ipsum ordinavit, inserti fuere.

VI. Ex testimonio tandem nostri hujus §. in quo solemniter Imperatoris ad Urbem ingressus describitur, *inter equitandum, Cæsaris Camerarius pecuniam spargere consuevit.* Etiam Reges quum Romæ coronarentur, consuevisse pecuniam effundere in plebem, docent nos quidem vetera earum Coronationum monumenta. Certe in habita ad S. Petrum die vi. Januarii anno MCCLXVI. per Cardinales a Clemente IV. deputatos Coronatione Caroli Andegavensis Regis, & Beatricis Reginae utriusque Siciliæ, effusos ab his nummos in plebem, & quidem ea opportunitate cufos, conjicit Floravantes ad paginam 31. Libri, *De antiquis Romanorum Pontificum denariis*, dum elucidat nummum Tabulæ xv11. Num. xi, sic inquit: *Non inverisimile est, hujus formæ nummos, quos missiles non inepte dixeris, populo ea occasione sparsos fuisse.* Teste Blasio Cæsenate Cæremoniario Apostolico in ms. Diario, ubi enarrat solemnem Caroli V. Imperatoris Coronationem per Clementem VII. more prorsus Romano Bononiæ peractam, Cæsar ipse per Ministros suos in populum pecuniam effudit tum ingrediens Civitatem, tum per eandem

dem equitans celeberrime cum Pontifice, Coronatione absoluta. Scitissime animadvertit Morettus in sua Lucubratione, *De Presbyterio*, Parte III. Sectione IX. Num. IX. nullum in hoc nostro §. fieri verbum de ea largitione, quæ proprie dicitur Presbyterium, jam olim ab Imperatoribus restaurati in Occidente Imperii, elargiri solitum, quoties publico apparatu Romam, accedere, & vel manu Romani Pontificis, ejusve Legatorum coronati sunt. Ejus ritus silentii, quod sit in hoc nostro §. consecrarium videri ait ibidem Morettus, quod a laudato Carolo per Clementem VII. coronato, licet sparsi nummi fuerint in plebem, Presbyterium tamen datum non fuerit.

VII. Siquis autem sciscitetur, cur ea retroactis seculis observata consuetudo sileatur in hoc nostri Cærimonialis §. Respondet memoratus Auctor præstantissimus, *fortassis id factum, ut omnino ex libito pendere Pontificum ejusmodi actionis permissionem ostenderetur*. Tum etiam, mox addit: *Fortassis creditum, e dignitate non esse Romanæ Curie, maxime supremorum post Pontificale capitulum, Cæsareis, Regalibusque donari rogis*. Quicquid sit, addubitari nequit, quin prius Summi Romani Pontifices laicis Principibus aliquando indulserint, ut integri Presbyterii Papalis donandi honorem participarent.

Donatum fuisse eo honore a Benedicto Papa III. qui ad Petri Cathedram erectus fuit anno Christi DCCCLV. Ethelvulphum Anglo-Saxonum Regem, docet nos Liber Pontificalis in Benedicti III. Vita sic inquit: *Rex Saxonum, postulante Domino Benedicto Papa, ut faceret Rogam in Ecclesia B. Petri Apostoli publicam de pondere auri, vel argenti librarum Episcopis, Presbyteris, Diaconis, & universo Clero, & Optimatibus Romanis tribuit aurum, populo vero minimum argentum*. Roga, teste Dufresne, idem est, ac donativum, seu honorarium, quod Proceribus, & Magistratibus, atque adeo etiam populo ab Augustis, vel Clero a Summis Pontificibus erogari consuevit. De Tiberio II. Historia miscella ex editione Canisii pag. 770. ita inquit: *Duxit Anastasiam uxorem suam, & coronavit eam Augustam, & jactavit Rogam multam*. Anastasius quoque in Vita Deusdedit Papæ hæc habet: *Hic divisit per obsequia, & ad omnem Clerum Rogam unam integram*. Alibi etiam dicitur Presbyterium, uti ibidem notat Dufresne in ipsa voce Roga, & in voce Presbyterium. Sed supervacaneum est alios Auctores recensere, quum unus præ omnibus eruditissimus Petrus Morettus Lucubrationem omnigena eruditione refertam concinnaverit, quam *De Presbyterio* inscripsit.

§. XIII.

Quomodo Papa excipit Imperatorem ad osculum pedis supra gradus Basilicæ S. Petri.

In plano supra gradus Basilicæ ante primam porticum ad dextram ascendentibus erigitur suggestus ornatus cum Throno Pontificali, & sedilibus Cardinalium, Prælatorum, & aliorum Officialium, ut supra descripsimus in Coronatione Pontificis; supra quem suggestum Pontifex Pluviali, & Mitra pretiosis indutus ascendit cum Ordinibus Curie paulo antea quam Cæsar appareat. Electus Imperator cum suis omnibus servato ordine, ut equum descendit, per gradus ascendit suggestum; & ut primum Pontificem videt, detecto capite illum, genu terram tangens, veneratur. Et iterum cum appropinquat ad gradus Sedis, genuflectit. Denum cum ad Pontificis pedes pervenit, illos in reverentia Salvatoris devote osculatur. Pontifex hilari vultu Cæsarem aspiciens ad osculum manus, & oris recipit. Tum Cæsar iterum genuflexus auri massam ad pedes Pontificis offert, habetque (1) verba ad Pontificem, gratias agens pro honore suscepto, prout ei videbitur. Pontifex benigne illi respondens, illum sublevat, & summæ caritatis declaratione amplectitur. Et stante ibi ad dextram Pontificis Cæsare, Pontifex recipit Imperatricem ad osculum pedis & manus; Regem vero, siquis adest, ad osculum pedis, manus, & oris; alios autem Prælatos, Proceres, & Nobiles Cæsaris ad osculum pedis tantum. His finitis, surgit Pontifex, & manu sinistra Cæsarem capiens e suggestu descendit, & pariter ad secundam usque Ecclesiæ porticum cum eo progreditur. Deinde Pontifex Palatium ascendit ad Cameram suam reversurus, & Cæsar duobus, aut quatuor Cardinalibus associatus Templum ingreditur, Apostolorum sacras Reliquias veneraturus, cum suis omnibus. Inde ad loca cuique destinata revertuntur. Cæsar ipse in Palatio Apostolico recipi consuevit. Augusta vero in aliquo loco vicino.

COMMENTARIUS.

I. **R** itum hic §. noster describit, quo Papa excipit Imperatorem ad osculum pedis supra gradus Basilicæ S. Petri. Certe antiquus hic ritus est excipiendi maximos

To. I,

(1) Ita in editione Veneta, & Colonienfi; in Romana vero legitur: *dicitque aliqua verba reingratiatoria pro honore suscepto, ac reverentia, prout ei videbitur*.

Principes in ipsis Basilicæ Principis Apostolorum gradibus. Nam, ut prodit Ademarum in Vita Caroli Magni, ubi is advenit Romam anno DCCC. circa diem VI II. Kalendas Decembris,

Z 2

Leo

Leo Papa III. & Romani cum eo primum apud Nomentum, xli. ab Urbe lapide Carolo occurrerunt, eumque cum summo honore suscipientes, statim ipsum ad Urbem præcesserunt. Deinde vero in crastino, ut post Ademarus notavit in Vita ejusdem Leonis Pagus Num. xvi. *in gradibus Basilicæ Beati Petri Apostoli stans Leo, missis obviam Romana Urbis Vexillis, ordinatis etiam per congrua loca, tam peregrinorum, quam civium turmis, qui venienti Carolo laudes dicerent, ipsum cum Clero & Episcopis equo descendente, gradusque ascendente suscepit, dataque Oratione, in Basilicam Beati Petri, psallentibus cunctis, introduxit.* Omissis aliis id genus exemplis veterum Principum, lubet hoc loco ritum describere, quo primum a Pontifice Nicolao V. in Basilicæ Vaticanæ gradibus acceptus fuit Fridericus III. Imperator juxta relationem Æneæ Sylvi testis oculati, qui in ipsius Friderici Historia sic inter alia inquit: *Ibi Nicolaus Pontifex Sede sedens eburnea Pontificalibus ornamentis indutus, Senatu Cardinalium circumstante, multisque aliis Prelatis, ac Magistratibus Italiæ coronam facientibus, gratissimo vultu, verbisque paternis, & supra modum benignis Fridericum suscepit, qui pedibus ejus ob reverentiam Salvatoris Christi, Beatique Petri memoriam exosculatis, auri massam obtulit.* Deinde pauca verba suo nomine Æneam Episcopum dicere jussit, ut in congressu duorum Orbis Caput convenire videbantur. Tum quoque, & Rex Ladislaus, & Albertus Austria Dux, atque ipsa demum Imperatrix sacros Pontificis pedes, & alii quamplures tum viri, tum mulieres nobiles basiauerunt.

II. Præter alios, qui eundem ritum litteris consignarunt, audiendus est alius oculatus testis, videlicet Jannoctus Manettus, qui tunc Romæ adfuit, alter ex Legatis Florentinorum ad Cæsarem causa suscipiendi Imperatorii Diadematis destinatus. Sic autem hic Auctor inquit: *Ut igitur commemoratus Fridericus cognomento Tertius, in Sacrosanctum Summi Pontificis Soglio Pontificali gravissime simul atque dignissime residentis conspectum, magna undique Prælatorum cœterva adornatum, apparuit, primo genibus flexis ipsum veneratus est, ac deinde ubi propius adbasit, dextrum pedem, talemque manum, & similem genam devotissime osculabatur.* Atque his & hujusmodi ceremoniis de more habitis, parvam quandam oratiunculam precibus, supplicationibusque refertam habuit, grataque, & humana responsione recepta, a sancto Pontifice conspectu abiit, atque ad ordinariam habitationem rediit. Quod postmodum Leonora Imperatrix pariter fecit. Discrepant hæc profecto aliquantisper a relatione Cornelli Zantflieti, & Æneæ Silvii, qui eodem quo Cæsar tempore ad Pontificem accessit, ipsam etiam Leonoram Reginam accessisse referunt, non postmodum, ut habet Manettus, uti notat Georgius in Vita Nicolai V. anno MCDLII. Num. iv. ubi etiam ait, *nonnulla ab iis, nempe a Zantflieto, & ab Æneæ Sylvio, de ritu osculationis pedum, manus, & genæ prætermitti, quæ a Manetto narrantur.* Sed labi videtur Georgius, nam quod Æneam Sylvium spectat, disertè is ejus deosculationis pedum Pontificis ab Imperatore, Imperatrice, & ab aliis quampluribus tum Viris, tum mulieribus nobilibus factæ meminit, in allato supe-

rius a nobis ejusdem Æneæ Silvii testimonio.

III. Ritus autem est antiquissimus, ut Imperatores, magnique Princeps Romani Pontificis pedes deosculentur. Pluribus id probant Lupus in Scholio ad Canonem ix. Dictatus Sancti Gregorii VII. & Thomassinus Parte II. *Disciplina*, Lib. III. Cap. LX. & LXV. ubi etiam scite notat, eum cultum honoremque fuisse quidem ab exordio liberum, ac voluntarium, sed diuturniore usu in legem convalescente necessarium evasisse. Indubitatum enim est, Christo ipsi hunc honorem impendi, ubi ejus in Terris Vicario exhibetur; idque docet noster §. ubi de Imperatore ad Romanum Pontificem accedente, ita inquit: *Cum ad Pontificis pedes pervenit, illos in reverentia Salvatoris devote osculatur.* Cernere enim est in ipso Summo Pontifice Christum ipsum cum tota Pontificatus Regique Sacerdotii majestate fulgurantem; nihilque refert, si non in omnibus Romanis Pontificibus fulgeat semper sanctitatis gloria, nam Fidei nostræ cœlitus oculatæ semper in illis splendet, & cœlestis dignitas, & exuberantia quædam Regalis Christi Sacerdotii. Quidquid ipsorum proprie, & privatim est, illud hoc veluti luminis fonte absorbetur, & non apparet. Non quid ipsi sibi sint, sed quod in ipsis Christus sit, spectare debent Fidelium oculi, & eo pasci.

IV. Porro ex præscripto nostri §. Imperatores, ac Reges nedum ad osculum pedis, sed & manus quoque, ac oris Pontifex recipit. Teste Raynaldo, ubi anno MDXV. convenere Bononiæ Leo X. & Franciscus I. Galliarum Rex genu flexo pedes quasi jocabundus, manuque, & genam Pontificis osculatus est, Gallicoque Sermone testificatus est, incredibili se gaudio perfundi, qui Christum in Vicario suo contueretur, eique obedientiam illam, quam filius Patri, devoveret; *Ridens, ac jubilans pedem, ac manum, & faciem osculatus est, dicens in vulgari Gallico se latissimum, quod videret faciem ad faciem Pontificem Vicarium Christi, cujus se filium, & servitorem proferebat, deditissimumque ad omnia ejus mandata.* Responso suo id confirmavit Papa, honores eos omnes ad Deum referri: *Omnia hæc in Deum transferens, & omnia Deo attribuens;* ut ait idem Raynaldus ad prædictum annum MDXV. Num. xxx. Rursus cum Carolus V. Imperator anno MDXXIX. Bononiam venisset a Clemente Papa VII. coronandus, ut ad annum MDXXX. scribit laudatus Auctor, Num. xxxix. genuflexit, pedes, manum, genamque Pontificis osculo coluit. Expleto Coronæ ritu, prohibere voluit Pontifex, ne, dum ipse equum conscenderet, Imperator stapedam manu terneret; persistente Imperatore, cessit, contestatus, id Christo, non sibi honoris haberi: *Pontifex toleravit, referendo talem actum humilitatis ad honorem Salvatoris, cujus vices in terris gerebat.* Sed passus non est Pontifex, ut Imperator equum aliquantulo viæ spatio deduceret. Quando tandem anno MDXXXIII. idem Clemens VII. & Franciscus I. congressi sunt, non aliter res, quam Bononiæ se habuere,

V. Ex dictis itaque perspicuum est, quod inter alios notavit Thomassinus Parte II. *Disciplina*, Lib. III. Cap. LXV. Num. x. & Pontificibus, & Principibus omnibus, in confesso æque fuisse, religiosum totum eum honorem haberi debuisse, ut qui Christo in Vicariis suis ea fide, & pie-

& pietate exolveretur, qua Romæ Imperatores & Reges provolverentur ad Petri & Pauli monumenta. Id rursus nos docet Sugerius Abbas, ubi Paschalis II. Romani Summi Pontificis in Gallias professionem describit, cui Philippus Augustus Rex una cum filio suo Ludovico cultum non abfimilem impendit; *Occurrit ei ibidem Rex Philippus, & Dominus Ludovicus filius ejus gratanter & votive, amore Dei majestatem Regiam pedibus ejus incurvantes; quemadmodum consueverunt ad Sepulcrum Piscatoris Petri Reges submisso Diademate inclinari.* Ubi semel convenit, non alium hunc, quam Religionis cultum esse, jam nihil offensionis creari potest aut Regibus, aut Patriarchis, aut Episcopis quibuscumque, si pedes Summi Pontificis, Jesu Christi in terris Vicarii, Successoris Principis Apostolorum, cum iidem proni accedere Tumulis Apostolorum non cunctentur, & Presbyterorum, qui eorum Confessiones audiunt, pedibus se advolvant. Non ergo mirum, si, ut alia exempla omittam, cum anno MCDLXXIV. Christiernus Daniæ Rex Romam perrexisset, Sixto IV. in genua procidit, nec adduci potuit, ut surgeret, quandiu illum affatus est.

VI. Præteriri tandem ille ritus hic nequit servatus olim in Coronatione Henrici VI. a Cælestino III. anno mxcxi. celebrata, cujus parte II. Annalium meminit Rogerius Hovedensis, ubi ait, ipsum Henricum supra gradus Basilicæ S. Petri præstitisse juramentum Summo Romano Pontifici, antequam in Ecclesiam introduceretur, & sacra unctione donaretur: *Dominus vero Papa ante ostium Ecclesiæ B. Petri supra gra-*

duſ recepit sacramentum a prædicto Alemanno- rum Rege, quod ipse Ecclesiam Dei, & jura Ecclesiastica fideliter servaret illibata, & quod rectam justitiam teneret, & quod patrimonium B. Petri, siquid inde ablatum esset, in integrum restitueret, & quod Tusculanum ei redderet. Deinde introduxit eum Dominus Papa in Ecclesiam, & unxit eum in Imperatorem, & uxorem suam in Imperatricem. Ceterum quod initio hujus §. nostri edicatur de Throno Papæ, & Cardinalium sedilibus erigendis supra gradus Basilicæ S. Petri, & de adventu Imperatoris ibidem, consentaneum profecto est ritui quem olim præscripsit Romanus Ordo xiv. Cap. cv. Cum autem pervenerit, Imperator scilicet, ante Basilicam in Platea, quæ cortina vocatur, dextrandus est a Senatoribus usque ad gradus prædictos; ubi & descendente, tradendus est equus, cui Rex infederat, illis. Interim Summus Pontifex cum omnibus Ordinibus suis præparet se in Secretario tanquam celebraturus Divina; & processionaliter exiens usque ad suggestum arcæ, quæ est in capite graduum, super Paldistorium, ibi sedeat, consedentibus super gradus a parte dextra Episcopis, & Presbyteris; a sinistra Diaconibus Cardinalibus, & in proximiori gradu Subdiaconis, & Acolythis, Primicerio, & Cantoribus astantibus circa illos cum Magnatibus & Officialibus, & Nobilibus, & Ministris Aulae Papalis. Eadem ad verbum leguntur in ms. Cæremoniali Joannis Davantriæ, in ms. Piersanctiano Codice, & in aliis, in quibus etiam multa habemus, quibus §. hic noster magis magisque illustratur.

§. IX.

Quæ ante Coronationem curari debeant.

Cæsar postera die opportuno tempore ad Pontificem accedet, & cum sua Sanctitate de incumbendis ad solemnitatem pertractabit. Statuent de die Coronationis, & si quæ erunt prius peragenda, deliberabunt, ut Federici tempore factum est, qui ante diem Imperialis Coronationis inter Missarum solemniam benedictionem (1) nuptialem cum sponsa sua Heleonora Regis Portugalliæ filia suscepit. Et Corona Regni Longobardici, sive Italici, quam superiores Imperatores Modœtiæ suscipere consueverunt, cum Federicus pestis timore illuc accedere non potuisset, Pontificis Nicolai manibus coronatus est in Basilica Petri apud Altare majus, quæ Corona ferrea, licet aurea sit, nuncupatur. Cæremonias in coronandis Regibus servandas in Libro Pontificali, quem nuper emendavimus, plene conscripsimus. Proinde (2) de his in hoc loco aliquid ponere supersedebimus. Et notandum, quod Cæsar antequam coronetur Imperiali Diademate, sedet post primum Episcopum Cardinalem. Et si quis Rex adest, sedet tunc post primum Presbyterum Cardinalem. Cum vero Cæsar erit coronatus, tunc sedebit in sede sibi parata inter Papam, & primum Episcopum Cardinalem, & tunc Rex erit post primum Episcopum Cardinalem.

COMMENTARIUS.

I. **A**Ntequam ea explicemus quæ in hoc §. notantur, præmittenda quædam sunt, quæ antiquum solemnem Imperatorum benedictionis ritum spectant; ea quippe fuit veterum Christianorum Imperatorum pie-

tas, & religio, ut quo Sceptrum, & Imperium Deo acceptum referre se testarentur, cælestique gratiæ adjutorium ad commissos sibi populos ea, quæ Christianum Principem decet, prudentia, & æquitate regendas promereri vale-

rent,

(1) Ita in editione Romana, Librariorumque vitio in editione Veneta 1. & in aliis legitur, benedictionem Imperialem; nam Imperialis benedictio non ante diem, sed ipsa Benedictionis die suscipitur. (2) Ita quoque in editione Romana, in citata autem Veneta & Colonienſi legitur: Proinde eo diligentem lectorem relegamus.

rent, solemnem ab Ecclesiæ Præsulibus benedictionem accipere, Imperialemque Coronam capiti suo ab eis superimponi, voluerint. Atque hic quidem usus etsi antiquissimus, non tamen a primis Imperatoribus Christianis usurpatus legitur, ut scite observat eruditus Martene Lib. II. *De antiquis Ecclesiæ ritibus*, Cap. IX. Nihil enim hujusmodi de Philippis, nihil de Constantino Magno, eumque proxime subsequutis Successoribus apud aliquem Auctorem reperire est. Sed illi ut primum Imperii dignitatem adepti erant, in Clypeos elati, Purpura, & Diademate ornati populo sistebantur. Atque hic fuit ritus, qui apud paganos Imperatores vigeat; cum enim ex iis nonnulli essent tantum Catechumeni, aut certe omnino impii, Ecclesiasticæ benedictioni haudquaquam judicati essent idonei.

II. Primus, qui ab Episcopo Regalem Coronam percipit, memoratur Theodosius Magnus, sed is tamen in somno, uti narrat Theodoretus Lib. V. *Historiæ Ecclesiasticæ*, Cap. VI. *Videbatur*, inquit, *sibi videre divinum Meletium, Antiochenis Ecclesiæ Præsulem, qui Imperiali Chlamyde ipsum indueret, & Regalem Coronam Capiti ipsius imponeret*. Hæc in somnis peracta sunt, ut idem Martene observat; at non in visione, sed re vera a Proclo Patriarcha Constantinopolitano coronatus est alter Theodosius, junior dictus, Imperatorum optimus, ac sanctissimus, ut testatur Theodorus Lector Lib. II. Qui ejus pietati non minus quam Imperio successit Martianus, ab Anatolio Patriarcha Constantinopolitano & ipse est coronatus, ut innuit Nicephorus Lib. XIV. *Historiæ*, Cap. LVIII. idemque de Leone, qui post Martianum Imperii culmen ascendit, diserte asserit Lib. XV. Cap. XV. Eadem extitit sequentium Imperatorum religio, Zenonis, Anastasii, & Justinii, qui etiam non semel a Joanne Patriarcha, & iterum a Joanne Papa I. coronatus benedictusque est. Extant utriusque benedictionis præclarissima testimonia, & primæ quidem in Epistola Joannis Patriarchæ ad Hormisdam Romanum Pontificem, ubi ita inquit; *Cum magna voce Deum omnium Principem glorificaverunt, quoniam talem verticem, Justinii scilicet Imperatoris, meis manibus tali Corona decoravit*. Secundæ vero apud Anastasium in Vita Joannis I. Papæ, cui Constantinopolim profecto occurrit a milliario XII. omnis Civitas cum cereis, & Crucibus in honorem Beatorum Petri & Pauli; & paulo post: *Tunc Justinus Augustus dans honorem Deo, humiliavit se pronus in terram, & adoravit Beatissimum Joannem Papam*. Additque demum, quod nostram rem spectat: *Justinus autem Imperator gaudio repletus est, quia meruit temporibus suis Vicarium Beati Petri Apostoli videre in Regno suo, de cujus manibus cum gloria coronatus est Justinus Augustus*. Succinit Anastasio Aimonius Lib. II. Cap. I. ubi de eodem Joanne I. Papa scribit, quod *Justinus Augusto ut Vicarius Beati Petri Imperialem imposuit Coronam*.

III. Quicquid sit de ritu in benedictione & coronatione Imperatorum Orientis servato quem fuse explicant Joannes Cantacuzenus Lib. I. *Historiæ* Cap. XLII. & Codinus Curopalata in Libro, *De Officiis, & Officialibus Ecclesiæ, & Aula Constantinopolitana*, Cap. XVII. quod Occidentis Imperatores spectat, primus quidem in Occidente Imperialem dignitatem adeptus est

Carolus Magnus, ob liberatam a Longobardorum oppressione Ecclesiam, ea donatus a Leone Papa III. qui in Basilica Sancti Petri sacro Natalis Domini die Oleo Sacro inunxit, ac ritu solenni coronavit. Post Carolum Magnum ejus Successores coronati etiam fuere a Romanis Pontificibus, Ludovicus quidem Pius a Stephano V. anno DCCCXVI. Lotharius ejus filius a Paschali I. anno DCCCXXII. & Ludovicus II. Lotharii filius anno DCCCL. a Leone IV. & post hos illorum Successores. Neque enim Imperatoris nomen sibi assumere præsumebant Francorum Reges antequam Romæ a Summo Pontifice coronati benedictique essent. Quod testatur Ludovicus II, Imperator ad Basilium Græcorum Imperatorem ita scribens apud Duchesnium Tomo III. *Historiæ Francorum: Francorum Principes primo Reges, deinde vero Imperatores dicti sunt ii dumtaxat, qui a Romano Pontifice ad hoc Oleo Sancto perfusi sunt*. Carolus item Calvus a Joanne VIII. Imperii Coronam accepit, sicut & Carolus Crassus anno DCCCLXXX. Imperatores postea Germani triplici benedictione, triplicique Corona donari consueverunt, prima argentea Aquisgrani, tanquam Reges Alemanniæ; secunda ferrea vel Modætiæ, vel Mediolani, ut Reges Longobardiæ; tertia Romæ, ut Imperatores. Quartam denique Coronam Arelate dandam addit codex Bigotianus, eaque ordine secunda novo Imperatori imponebatur, ut tradit Martene loco citato, & post eum Pagius in Vita Leonis Papæ III. Num. XX.

IV. Prima benedictio, seu coronatio Imperatoris tametsi Aquisgrani celebrari solet, aliquando tamen Moguntiæ fieri solita fuit. Ibi enim S. Henricus, ibi Conradus in Germaniæ Reges ordinati, ut discimus ex Vita S. Meinverci, Cap. XI. & XCII. apud Surium die V. Junii. In ea regimen, Regiæque potestas per hastam tradebatur, ut docet nos Vita S. Bernardi Hildesheimensis Episcopi, Cap. XXXII. ubi de Corona S. Henrici sic inquit: *Omnibus ergo pari voto in electione illius concordantibus, Willigisus Archiepiscopus, & B. Bernardus cum ceteris Regni Principibus Dominum Henricum Moguntiam cum summo honore ducentes, Dominica octava Pentecostes regimen & Regiam potestatem cum Dominica hasta illi tradiderunt, ac deinde omnibus rite peractis, cum maximo tripudio universorum solemniter cum Dei gratia unxerunt*. Agit de his Ditmarus, pariterque de vita ejusdem optime instituta sub educatione S. Wolfgangi Ratisponensis Episcopi, ac de iis, quos post electionem passus est adversarios, cui quidem ex prædictione ejusdem Wolfgangi Regnum delatum esse, testatur ejus temporis Auctor, qui res ab eodem Sancto præclare gestas conscripsit, ut ad annum MII. notavit Baronius.

V. His omissis, secunda benedictio Modætiæ ex jure fieri debebat cum ferrea corona, sed decursu temporum hoc sibi privilegium arrogarunt Mediolanenses: *De altera*, inquit Krantzius Lib. IV. *Saxonie* Cap. XXXVII. *Modæcenses cum Mediolanensibus disceptavere, sed prevaluit amplitudo Mediolani*. Sunt qui tradunt, Carolum Magnum antea quam Romæ coronaretur, fuisse Modætiæ a Thoma Episcopo Mediolanensi coronatum; sed hoc non satis constat, uti citato loco docet laudatus Martene, Num. V. Certe Mediolani Henricus VI. & VII. alii-

aliique coronati sunt. Nonnulli tamen utraque in Urbe fuerunt inuncti, forte ut suum cuique Civitati jus servaretur. Unde idem Krantzius agens ibidem de coronatione Conradi II. *Constitutum erat*, inquit, *ut qui coronandus in Urbem Imperator adveniret, duas in medio itinere Coronas acciperet; ex palea primum Modætia, ex ferro autem alteram Mediolani ab Archiepiscopo imponendam*. Hinc etiam forte Modætia primus locus Coronæ Regis dicitur in Chronico Mediolanensi Landulfi de S. Paulo, Cap. xxxix. apud Ughellum Tomo IV. Italiæ sacræ. Et certe postquam Anselmus Archiepiscopus Mediolanensis, in Ecclesia S. Michaelis, quæ est Modætia, benedixit, & unxit, & Coronam electo Conrado in Festo S. Petri posuit, postmodum eandem quoque solemnitate coronationis idem Pontifex in Ecclesia S. Ambrosii celebravit; ut scribit idem Landulfus.

VI. Quo ritu ea Coronatio aliquando perageretur, tradit Ripamontius in Historia Ecclesiæ Mediolanensis, Decade I. Lib. ix. Ceterum, inquit, in aliis annalibus reperi diversos hujus cæremoniæ ritus, quandocumque Mediolani in Ambrosiana Æde solempne illud celebraretur. Extra Basilicam est columna longitudine, ac diametro, quam lapidicini nostri temporis admirantur. Creditur esse veteris Romani Palatii fragmentum, jam inde ab eo tempore, quo Cæsares collocato hic domicilio, Urbem Mediolanum, sicut alteram Romam incolebant. Ad eam columnam futurus Rex ut accesserat, munus erat Anglericæ Comitum afferre candidato primum Volumen, in quo Ritus Ambrosiani, preces, & sacra continentur. Id Volumen, sive Missale Princeps Anglericæ gentis postquam obtulerat Regi, jurabat ille quam sancte, fore se in Romani Pontificis auctoritate, sive status Imperii, sive Ecclesiastica res ageretur, ejusque sacramenti consecrati statim tabulæ vinculum erant & monumentum. Evinciebat deinde Mediolanensis Archiepiscopus ferreo diademate caput Regis, & præferente Crucis trophæa Comite Anglerico, Templum ingrediebantur, ad Aram maximam accedebant. Ibi nudato capite, poplite flexo, Rex pie Numen veneratus, expiatur ab Archiepiscopo solempni Crucis nota; deinde collocabatur in Solio, res tota testato describebatur. Atque hic est ritus, qui olim fervatus est Mediolani, quemque ex veteribus munimentis huc usque descripsit laudatus Ripamontius loco superius citato.

VII. Addenda hæcenus dictis sunt quedam ex Actis in Coronatione Henrici VII. quæ leguntur apud Ughellum Tomo IV. Italiæ Sacræ, pag. 118. in ea quippe Coronatione Uberius Vercellensis Episcopus, locata Sede sua in loco competenti, a dextris Domini Mediolanensis Archiepiscopi stetit, sedit, & legit primam Lectionem, seu Orationem, quæ sibi per Archiepiscopum delata, & ordinata extitit, primo ante alios Episcopos Lombardia, de his, quæ lecta, & dicta fuerant in Officio Coronationis jam dicto. Idem recepit de manu ejusdem ense, quem Imperatori accinxit, & Sceptrum Regale, Virgam, Pomum aureum, sive deauratum. Quod quidem Sceptrum, Virgam, & Pomum postea manu sua dextra porrexit, & dedit ipsi Regi, insuper Coronam benedictam per præfatum Mediolanensem Archiepiscopum idem Episcopus Ver-

cellensis cum Domino Archiepiscopo supradicto capiti ejusdem Regis imposuit, & firmavit solus post Archiepiscopum signis tam in unctione Henrico Regi facta, quam in aliis ad solemnitate Coronationis Imperialis culminis, opportunis eidem Regi factis, & impositis, ad latus dicti Regis dextrum sedit. Nec prætereundum est illud, eundem Henricum non ferrea, sed ex calyce composita Corona fuisse insignitum, eo quod Corona Regum antiqua ex negligentia esset amissa, nam a nullo Regum de tempore Frederici Imperatoris fuerat requisita, inquit Auctor Lib. II. De gestis Baldevini Luczemburgensis Trevirensis Archiepiscopi, apud eruditum Baluzium Tomo I. Miscellaneorum.

VIII. Docet autem & illud hic noster §. Corona Regni Longobardici, sive Italici, quam superiores Imperatores Modætia suscipere consueverunt, Fridericum, quod pestis timore illuc accedere non potuisset, Pontificis Nicolai manibus coronatum esse in Basilica Petri apud Altare majus. Romam Fridericus venerat Regni Longobardici Corona minime donatus, quod, ut est nonnullorum sententia apud Raynaldum anno MCDLII. Num. XXI. & Fontaninum, De corona ferrea, Cap. VII. §. III. Francisco Sfortiæ Mediolanum occupante, deque Mediolanensi ditione tum cum eo disceptantibus Carolo Aurelianensi Duce, Alphonso Aragonum & Sicilia Rege, illiusque Ducatus jura sibi etiam Cæsare vindicante, ad eam recipiendam tutum esse Friderico Mediolanum usque progredi visum non est. Alii apud eundem Raynaldum prædicto anno MCDLII. Num. II. & III. scribunt, Cæsarem invitatum quidem a Sfortia fuisse, detrectasse vero ipsum Cæsarem Mediolanum pergere ob turbas in Cisalpina Gallia motas, ac sperasse illius ritus defectum a Pontifice suppletum iri auctoritate Apostolica. Contra vero Zantflietus in suo Chronico ad eundem annum ideo Romæ corona Regni Longobardorum Cæsarem donatum tradit, quod Mediolani Dux eam illi præberi negaverit. Aditum Cæsari ad Mediolanensem tractum minime patuisse, aut consultum id factum, ex Auctore Commentariorum Pii Papæ II. Lib. I. colligitur, qui Friderici iussu, ubi primum ipse Cæsar in conspectu Pontificis fuit, verba fecit, ac Cæsaris nomine postulavit, ut in receptione Mediolanensis Coronæ eundem Cæsarem & Leonoram conjugio jungeret. His precibus Pontifex annuit, & honestiori titulo usus, in Litteris, quibus a Corona ferrea Mediolani, aut in proximioribus eidem Urbi locis recipienda Cæsarem dispensavit, eaque Romæ eum Pontifex ornavit, pestis causam, quæ in iis regionibus grassabatur, affert. Cui sententiæ adhærens nostrum Cæremoniale ita in præsentis §. inquit: Cum Federicus pestis timore illuc accedere non potuisset, Pontificis Nicolai manibus coronatus est in Basilica Petri apud Altare majus.

IX. Ergo Longobardicæ Coronæ insignia, ab ipsomet Pontifice Nicolao V. die xvi. Martii Fridericus III. in Basilica Principis Apostolorum inter Missarum Solemnia ad Altare majus accepit. Cornelius Zantflietus loco citato receptam tradit a Friderico Coronam Longobardicam in Basilica Vaticana quinta feria, ut loquendi ei mos est, post Dominicam, Oculi; ac mox ab eodem Pontifice benedictionem nuptiarum eiusdem

dem Principis cum Leonora, licet Quadragesimale tempus esset, fuisse peractam, Dominica, *Oculi*, est tertia Quadragesimæ, & Feria quinta post eam Dominicam hoc anno MCDLII. fuit dies xvi. Martii, ut notat Georgius in Vita Nicolai V. eodem anno MCDLII. Num. v. Apostolicæ de huiusmodi Coronatione Litteræ eadem die exaratae sunt, quas recenset Raynaldus; in iisque Pontifex narrat, Fridericum a Longobardici Regni Corona, Mediolani, vel in proximioribus ei Urbi locis e manibus Archiepiscopi Mediolanensis recipiendâ, se absolvisse, propterea quod idem Fridericus Mediolanum ire ob pestis luem, quæ in iis regionibus grassabatur, non potuerit: iccirco *hodie*, hoc est, die xvi. Martii, eundem Fridericum Corona Regni Longobardici inter Missarum solemniam in Basilica S. Petri coram Altari majore decorasse. Datae sunt hæc Litteræ, *Apud S. Petrum, anno Incarnationis Dominicæ MCDLII. xvi. Kalendas Aprilis, Pontificatus anno v. idest xvi. Martii anni MCDLII. a Christi Natali*, ut idem Georgius notat. Hinc memoria lapsus est Æneas Sylvius in Historia Friderici III. ubi *Idibus Martii* diem præstitutam fuisse ad Coronam Longobardicam, atque ad desponsationis celebritatem scribit. Mirum est etiam, Raynaldum ipsum, qui Apostolicas huius rei Litteras præ oculis habuit, ediditque ad annum MCDLII. Num. II. eam Friderici coronationem, aliorum errorem sequutum, iisdem *Idibus Martii* consignasse.

X. Teste Ænea Sylvio in memorata Friderici III. Historia, *in hac Coronatione Mediolanensi*, quæ, uti dictum est, peracta fuit Romæ, collocatus est Rex Ladislaus inter Cardinales longe ab Apostolico Throno. Neque enim post eum nisi duo Cardinales sederunt. Ait, rem multis indignam visam esse in Rege uncto, & coronato Regni amplissimi Hungarorum, subditque mox: *Sed neque Imperator ipse ante Romanam Coronam cunctis Cardinalibus prælatus est. Sedit enim supra Imperatorem primus Cardinalis, qui tum fuit Vicecancellarius Franciscus Condulinario Venetus Eugenii Quarti nepos. Nam Friderico locus non ut Imperatori, sed ut Regi Theutonicorum in Imperatorem electo datus est. Refellit deinde illam complurium opinionem, qui imperite putant, Romanorum Regem aliquem dici, quamvis id usu receptum sit: Non enim Rex Romanorum est Aquisgrani coronatus, sed*

Alemanorum, sive Theutonicorum. Romani enim post exactum Urbe Tarquinium, Regum nomen adeo detestati sunt, ut nullus Caesarum quamvis sæva tyrannide populum oppressisset, se Regem appellare fuerit ausus. Nec Carolus Magnus, qui primus Germanorum suscepit Imperium, Romanorum Rex, sed Imperator Augustus vocatus est. Concludit tandem, aitque, Romanam Sedem minime in hoc errare, quod ante coronationem, neque Imperatorem appellat, neque locum ei velut Imperatori tribuit; sed in eo tamen eam consuetudini deservire inquit, quod Romanorum Regem Aquisgrani coronatum appellat, quem Theutonicorum melius nominaret in Imperatorem electum, sicut ex Præcessoribus fecisse nonnullos invenimus. Sed & digna notatu sunt, quæ tandem subjicit: Sed nulla, ait, de his rebus tradi certa regula potest. Nulla in rebus humanis soliditas. Consuetudini omnia serviunt, quæ sæpe a malis initiis ortum habet.

XI. Quicquid autem de hac re sit, ingenue fatetur Æneas Sylvius, nequaquam errare Romanam Sedem, cum ante coronationem Imperii solemnem, electum in Imperatorem, neque Imperatorem appellat, neque locum ei velut Imperatori tribuit. Ritus enim antiquus est, notatusque in hoc nostro §. quod Caesar antequam coronetur Imperiali Diademate sedet post primum Episcopum Cardinalem; & si quis Rex adest, sedet tunc post primum Presbyterum. Cum vero Caesar erit coronatus, tunc sedebit in Sede sibi parata inter Papam, & primum Episcopum Cardinalem, & tunc Rex erit post primum Episcopum Cardinalem. Ceterum nequid omittamus, quod in nostro hoc eodem §. edicitur, notandum illud, Regni Longobardici coronam, quamvis aurea sit, ferream nuncupari. Huc facit, quod nostrum Cæremoniale hoc eodem Titulo in §. ultimo, qui inscriptus est, *De pluralitate coronarum*, de ipsa Longobardici Regni corona adnotavit, sic inquit: *Quæ quidem Corona ideo appellatur ferrea, quod laminam quandam habeat ferream in summitate, alioquin aurea, & pretiosissima. Idem docet Æneas Sylvius in Historia Friderici III. eruditus autem Georgius in Vita Nicolai V. anno MCDLII. Num. v. ferream dici ait eam Coronam, ob clavum Dominicæ Coronæ illi orbiculatim inditum. Sed videri præ ceteris potest doctissimus Fontaninus in peculiari Tractatu, De Corona ferrea.*

§. X.

De Cæremoniis in die Coronationis servandis.

Adveniente die statuta Imperialis Coronationis, quæ convenientissima est in Dominica *Latære*, in medio Quadragesimæ, ut Durantes in Rationali Divinorum Officiorum scripsit, & ita a Nicolao V. in Federici Coronatione servatum est. Ecclesia S. Petri, & Capella major erunt decenter ornatae, ut in maximis solemnitatibus, cum Pontifex est celebraturus Divina, solent ornari, & præter consueta, eriguntur duo suggestus (1) hinc & inde extra cancellos Capellæ; alter pro Imperatore electo ad sinistram venientibus, alter a dextra pro Imperatrice, & ornetur tapetis, aulæis, sedibus, scabellis, & aliis opportunis. Ecclesia tota, & maxime Capella (2) S. Gregorii, S. Mauritii, & quæ S. Mariæ in Turribus appellata extra Ecclesiam in prima porticu sub turri campanaria est, bene mudentur, orneturque. Imperatrix vero, antequam

(1) Ita in Veneta, & Colonienſi editione, in Romana legitur, *suggesta*.

(2) Ubi in Romana legitur S. Gregorii &c. in Veneta legitur D. Gregorii &c.

quam Pontifex descendat ad Ecclesiam, cum suis ornata præveniens suggestum sibi paratum conscendit. Summo igitur mane Pontifex cum Cardinalibus, Prælatibus, & aliis Officialibus, paramentis colore temporis, & Missæ congruis (1) processionaliter, & sub baldachino descendat ad Ecclesiam, & præmittat duos Diaconos Cardinales cum suis Cappis laneis ad Cæsarem, qui eum congruo tempore ad Ecclesiam deducant. Pontifex, facta reverentia ante Altare, accedit ad sedem, ubi consuevit accipere paramenta, & ibi recipiet ad reverentiam omnes Prælatos paratos. Incipiet Tertiam, & accipiet Sandalia, ut alias; & dicta Oratione induitur omnibus paramentis Pontificalibus. Interim Cardinales, qui sunt cum Cæsare, ut primum cognoverunt, Pontificem intrasse Ecclesiam, & ipsi cum Cæsare, & omni sua comitiva ad Ecclesiam descendant, & egressi primam Palatii portam, per primas Ecclesiæ portas, quæ super gradus Basilicæ patent, ingrediuntur porticum ad Capellam, quæ vocatur Beatæ Mariæ inter Turres. Ibi a Canonicis & (2) Capitulo Ecclesiæ processionaliter recipietur Cæsar, & ductus ad Altare dictæ Capellæ, in manibus primi Cardinalis præsentis, & nomine Pontificis recipientis, Beato Petro, Summo Pontifici, & suis Successoribus solitum juramentum præstabit in forma subscripta, videlicet.

COMMENTARIUS.

I. **V**etus plane est mos, ut electi in Imperatores Coronam Imperialem in Vaticana Principis Apostolorum Basilica a Summo Romano Pontifice acciperent, & sacro oleo rite ungerentur. Probari id exemplis plurimis potest, quorum primum est Caroli Magni exemplum, cui, cum ad Missam ante Confessionem B. Petri ab Oratione surgeret, Leo Papa III. ob egregia illius in Romanam Ecclesiam, Christi que Vicarios Pontifices Maximos merita nihil tale suspicanti Coronam imposuit, & a populo ter unanimi voce acclamatum est: *Carolo piissimo Augusto, a Deo coronato, Magno, Pacifico Imperatori vita & victoria*; antea enim dicebatur tantum Patricius Romanorum; sed & post laudes idem Carolus a Domino Apostolico more antiquorum Principum adoratus est, at ablato Patricii nomine, Imperator & Augustus est appellatus; ut produnt Ademarus, & Eginhardus in Caroli Magni Vita, & post ipsos Auctores Pagius in Vita Leonis Papæ III. Numero xviii. Celebre quoque est Lotharii exemplum filii Ludovici Pii, qui anno dcccxxiii. ut scribit in suis Annalibus Eginhardus, cum secundum patris sui iussionem in Italia iustitias faceret, & jam se ad revertendum de Italia properaret, rogante Paschale Papa, Romam venit, & honorifice ab illo susceptus in Sancto Paschali die apud S. Petrum, & Regni, Longobardici scilicet, & Imperatoris Augusti nomen accepit. Auctor etiam Vitæ Ludovici Pii prodit, Lotharium rogatu Paschalis Papæ Romam imminente Sancta Paschalis solemnitate rediisse, atque ab eodem carissima ambitione susceptum, ipso sancto die apud S. Petrum Diadema Imperiale suscepisse.

II. Teste Bertiniano Annalista, Carolus Calvus Romam, invitante Papa Joanne, VIII. ejus nominis, perrexit & xvi. Kal. Januarii ab eodem cum gloria magna susceptus est, & in die Natalis Christi ab eodem Pontifice coronatus in Basilica scilicet Sancti Petri Festo die Nativitatis Christi, ut idem Annalista non obscure innuit: Anno Domini DCCCLXXVI. in die Nativitatis Domini Beato Petro multa & pretiosa munera offerens in Imperatorem unctus & coronatus, atque Romanorum Imperator appellatus est. Ca-

To. I.

rolo Calvo successit in Imperio Carolus Crassus, qui & ipse ab eodem Joanne Papa VIII. in die Nativitatis Domini in Imperatorem consecrari obtinuit, ut refert laudatus Annalista Bertinianus ad annum dcccclxxx. & quidem in Vaticana Basilica, ut testatur Baronius ad annum dcccclxxxii. Coronavit deinde Stephanus VI. in eadem Basilica in Imperatorem Widonem anno dcccxcii. & non multo post Formosus Stephani Successor anno scilicet dcccxcvi. in memorata pariter S. Petri Basilica Arnulpho Imperialem Coronam tradidit, ut refert Annalista Friherianus, qui Annales Fuldenses continuavit, sic inter alia inquires: *Jam Apostolicus paterno amore diligendo Regem . . . honeste ad Basilicam Beatorum Principum Apostolorum latificando introduxit, & secundum morem Antecessorum suorum Imperialem consecrationem capiti suo imponens, Cæsarem Augustum appellavit*. Vide Pagium in Vita Formosi, Num. xi. ubi deceptum ait Baronium, quando scripsit, Arnulphum per surreptionem a Formoso Papa unctum fuisse Imperatorem, cum Litteris, & Missis contra Lambertum tyrannidem evocatus ab eodem Pontifice Romam venerit. Falso etiam dici idem Pagius notat, Formosum prius coronasse Widonem, & Lambertum Filium in Imperatores, Wido enim ex superius dictis a Stephano VI. Coronam Imperii acceperat.

III. Quicquid autem de hac re sit, illud constat, ubi Romæ coronabantur Imperatores, coronatos ut plurimum, & fere semper fuisse in Basilica Vaticana, ut præter adducta exempla, aliorum sequentium Imperatorem coronationes nos docent, quas longum esset omnes recensere hoc loco. Porro præter morem diu servatum Henricus VII. anno mcccxi. die xxix. Junii in Festo Sanctorum Apostolorum Petri & Pauli, non quidem in Vaticana Basilica, sed in Lateranensi inunctus & coronatus est, quia tunc temporis ipsi Henrico ad Basilicam S. Petri non patuit aditus. Cum enim Romam pergeret, Robertus Rex Siciliæ cernens eum omnibus viribus & artibus in Guelforum perniciem vehi, timensque, ne prætextu Coronationis Romæ suscipiendæ, Urbem occupare, & Pontificiam auctoritatem

A 2

(1) Ita in Romana, in Veneta vero, veluti ad supplicationem.

(2) Sic quoque in Romana habetur; in Veneta autem, & Collegio Ecclesiæ occurrenti recipitur.

tatem minuere præsumeret, pro munere, quo fungebatur Vicarii status Ecclesiastici, & Guelforum Protectoris, eo misit fratrem suum Joannem cum copiis specie quidem pompam Coronationis Henrici ornatiorem reddendi, revera autem ut una cum Urfinis, aliisque Guelfis conatus Henrici infringeret. Henricus Ludovicum Sabaudum Senatorem Romam etiam præmiserat cum copiis, unde multa intra Urbem inita fuerunt certamina cum Columnensibus, qui Guelfos Urbe pellere contendebant. Mansit tamen portior Urbis pars penes Guelfos, Civitas nempe Leonina una cum Ecclesia, & Palatio Vaticano S. Petri, reliquam Urbis partem Gibellinis occupantibus una cum Lateranensi Ecclesia, in qua idem Henricus inunctus, & coronatus est; constantque hæc ex Villanio Lib. ix. Cap. xxxviii, & seqq. ex S. Antonino, & aliis.

IV. Constat autem & illud ex dictis hucusque, Coronationes Imperatorum nullis adstrictas diebus fuisse, factæ enim aliquando leguntur festo die Natalis Dominici, aliquando solemnibus Paschatis die, vel in Sanctorum celebritatibus, aut aliis diebus, tametsi nostrum Cæremoniale in hoc §. x. convenientissimum esse dicat, ut fierent *in Dominica, Latare, in medio Quadragesima*, probatque testimonio Gulielmi Durandi, qui in suo Divinorum Officiorum Rationali, Libro vi. Cap. lxi. quod inscriptum est, *De Dominica quarta Quadragesima*, quæ ideo Dominica, *Latare*, appellatur, quod Introitus Missæ ejus Dominicæ incipit, *Latere Jerusalem &c.* ita in fine inquit; *Hæc etiam die Christianus coronatur Imperator*. Subdit mox idem nostrum Cæremoniale Friderici III. exemplum, quem coronatum dicit in ipsa Dominica, *Latare*, quæ anno MCDLII. quo coronatus Fridericus fuit a Nicolao V. Pontifice, in diem xix. Martii incidit, qua die Pontifex sextum Pontificatus annum inibat. Post Fridericum nullus Imperator legitur a Romano Pontifice coronatus, præter Carolum V. qui tamen non in Dominica, *Latare*, sed die natali suo, festo S. Matthiæ Apostoli anno MDXXX. Imperii Coronam a Clemente VII. Pontifice Maximo Bononiæ sumxit. Nec enim desunt veterum exempla Romanorum Pontificum, qui non modo Romæ, sed in locis etiam longe ab Urbe distitis Imperatores coronarunt. Certe, ut alios omittam, Stephanus V. dictus ab aliis iv. in Gallias tendens pro stabilienda, ut Anastasius ait, Ecclesiæ pace, in Rhemeni Ecclesia ante Missarum solemnias, ut ex Thegano in Vita Ludovici Pii tradit Baronius anno dcccxvi. coram Clero & omni populo Ludovicum ipsum in Imperatorem unxit, & Irmingardam ejus uxorem coronavit, & Augustam appellavit.

V. Notandum præterea hic illud est, consuevisse aliquando Romanos Pontifices Avenione degentes Cardinalibus committere Imperatorum Coronationem Romæ peragendam, uti factum est in Coronatione Henrici VII. qui cum Clementem V. urgeret, ut Cardinales Romam dirigeret ad eum coronandum, Pontifex preces ipsius admittendas ratus, hanc provinciam quinque Cardinalibus delegavit, scilicet Arnaldo de Falqueriis Sabinensi, Leonardo Albanensi, Nicolao Ostiensi Episcopis, Francisco S. Lucie in Silice, & Lucæ S. Mariæ in Via lata Diaconis Cardinalibus, ut constat ex Diplomate ab ipso eam in rem dato *in Prioratu de Grausello prope*

Malasfanam Vastionensis Diæcesis, xlii. Kal. Julii, anno sexto, seu mense Junii anni mcccxi. quod refertur a Raynaldo Num. vii. & seqq. qui tamen in eo deceptus est Num. vii. quod hunc Arnaldum Sabinensem confundat cum Arnaldo de Pelagrua, qui nunquam fuit Cardinalis Episcopus, sed Diaconus S. Mariæ in Porticu. Cum autem disceptatio orta esset inter Episcopos Sabinensem, & Ostiensem, quis eorum deberet coronare Imperatorem, *allegante Ostiensi, quod, cum Papam coronare suum esset, sic & consequenter Imperatorem, Sabinensis ex adverso dictabat, certum esse, ut Imperatorum Coronationibus, Sabinensis semper Papæ proximior Coronam erigat officiosior aliis, illic præsertim; sicque Papa pronunciante obtentum est, ut Sabinensis illo fungatur officio, ceterisque præsit*, inquit Albertinus Mussatus in Vita Henrici VII. Lib. iv. Cap. i.

VI. Hic autem observandum venit quod notat Pagius in Vita Clementis V. Num. lxxvi. Cardinalem Sabinensem non ideo obtinuisse a Clemente, ut coronaret Imperatorem, quod jus illud sibi competeret, sed quia cum esset princeps Legationis, ipsam Pontificis personam representabat; quod quidem eruitur ex ipso Clementis Diplomate, in quo apud Raynaldum Num. xvi. ait Pontifex: *Verba vero dicenda in impositione Diadematum, scilicet: Accipe gladium gloriæ, quoad Regem; item: Accipe Coronam Imperialis excellentiæ, quoad Reginam, dicas tu Sabinensis; licet enim ratione prioratus hoc tibi non competat; quia tamen in Legatione nostram representas personam, hoc per te volumus adimpleri*. Ex quo patet, jus coronandi Imperatorem, & Imperatricem, absente Pontifice, competiisse Ostiensi Episcopo, & illud translatum fuisse hac vice ad Sabinensem, quia ipse Pontificem utpote Legationis princeps representabat. Observandum præterea, ad eundem Ostiensem Episcopum pertinuisse etiam Imperatorem inungere, & de facto Nicolaum Ostiensem inunxisse Henricum VII. quod constat ex eodem Diplomate, in quo apud eundem Raynaldum, Num. ix. Pontifex scribit: *Quocirca discretionis vestræ per Apostolica scripta mandamus, quatenus vos ad dictam Urbem die assumptionis prædictæ personaliter conferentes, ac ibidem convenientes in unum, tu Frater Ostiensis Episcope Missam celebres, & Regem inungas eundem, Et infra Numero xv. Tu vero Frater Ostiensis, ut præmittitur, Missam celebres, & Regem prædictum inungas, prout in Ordinario continetur. Quod si te impediri contingat, hoc tu facias Albanensis, & si ambo impedirimi, hoc facias Sabinensis, Episcopi*. Secundum hæc Henricus VII. anno mcccxi. die xxix. Junii in Festo Sanctorum Apostolorum Petri & Pauli, in Basilica Lateranensi inunctus & coronatus est. Cur præter morem ea Coronatio perfecta fuerit in ipsa Lateranensi Basilica, non vero in Basilica Vaticana, jam nos superius explicuimus.

VII. Neque vero hic omittenda Coronatio Caroli IV. ejusque Uxoris Romæ perfecta sedente Avenione Innocentio VI. Pontifice. Scripsit sane Pontifex Alvaro Cardinali Apostolicæ Sedis in Italia Legato, ei mandans, ut efficacibus auxiliis Carolo adesset, & opportunis favoribus assisteret. Cum vero Carolus intrasset Italiam circa finem anni mccc, & die vi. Januarii in Festo

sto Epiphaniæ anni mccciv. in Ecclesia S. Ambrosii Mediolani Corona ferrea fuisset coronatus, Innocentius alio Diplomate dato *Avenione II. Kalendas Februarii anno Pontificatus II.* apud Raynaldum ad annum mccciv. Num. 111. & seqq. Petrum Bertrandi juniorem Episcopum Ostiensem Legatum Romam misit ad inungendum, & coronandum Corona aurea Carolum, & Annam ejus uxorem: *Karolus Rex Alemannia*, inquit Auctor secundæ Vitæ Innocentii VI, apud Baluzium, *descendens in Italiam, Coronam Imperialem de manibus Domini Petri Episcopi Ostiensis ad hoc missi in Basilica S. Petri Romæ in die Sancto Paschæ*, seu die quinta Aprilis, *honorabiliter suscepit, & uxor ejus cum eo &c.* Cur solum Episcopum Ostiensem Romam miserit Innocentius ad inungendum, & coronandum Imperatorem, Collega addito Ægidio Alvari Presbytero Cardinali Tituli S. Clementis Apostolicæ Sedis in Italia Legato, cum hoc tamen, ut si alter ei rei vacare non posset, alter solus eam cæremoniam exequeretur, cum alias Clemens V. ad coronandum Henricum VII. Caroli IV. Avum, quinque Cardinales miserit, & ex Ordine Romano XIV. Cap. cv. atque ex ms. Codice Pierfanctiano, & ex Matthæo Villanio Lib. iv. Cap. lxxi. constet, jus coronandi Imperatorem, ad Episcopos Cardinales Ostiensem, Portuensensem, & Albanensem pertinuisse: rationem tradit idem Villanius loco citato, & Lib. 111. Cap. ciii. ubi narrat, cum de eligendis ad id operis Cardinalibus una cum Petro Bertrandi Episcopo Ostiensi, & Talayrandus Episcopus Albanensis, & Guido de Bologna Portuensis eum etiam honorem sibi deberi contenderent, ex privilegio suarum Ecclesiarum, statutum esse a laudato Innocentio die decima Novembris, eos de jure debere esse Legatos, ut docet Liber Episcopi Ostiensis de ea Legatione conscriptus: verum Talayrandum, & Guidonem licet magnis animis, & magna contentione eum honorem expetissent, & obtinuissent, remisisse tamen, quia Papa, & Cardinales noluerunt suppeditare sumtus ad iter illud Romanum, sicut alias moris erat; ideoque ipsos, considerata inopia Caroli, qui non erat eis satisfaciendo, a cæpto destituisse cum opprobrio ambitionis & avaritiæ: quod ne augeret Pontifex, noluisse alios mittere, sed rem commississe prædicto Ægidio Alvari, qui tamen & ipse negotium integrum Petro Ostiensi dimisit.

VIII. Plura de Coronatione Imperatoris, absente Papa, dicemus infra opportuniori loco sequentes ordinem nostri Cæremonialis, quod quidem peculiari §. de eo ritu agit, estque §. xxviii. Quod autem præsentem §. spectat, mandat hic inter alia, ut *Ecclesia tota*, Vaticana scilicet, & maxime Capella S. Gregorii, S. Mauricii, & qua S. Maria in Turribus appellata extra Ecclesiam in prima porticu sub turri campanaria est, bene mundentur, ornenturque; quia scilicet, ut infra dicemus, multæ cæremonix, quæ ad Coronationem Imperatoris spectant, in his Capellis peragi vel olim solebant. Teste Panvinio in Tractatu, *De septem Urbis Ecclesiis*, Cap. iv. Altaris S. Mauricii Martyris illa singularis dignitas fuit, quod Imperator designatus, antequam ad Altare S. Petri a Romano Pontifice coronaretur, ibi primum ab Episcopis Cardinalibus inungi & benedici solebat.

To. I.

Notat hæc Paulus de Angelis in Basilicæ veteris Vaticanæ descriptione pag. 22. aitque, in veteri vestigio ejusdem Sacrosanctæ Basilicæ hæc legi verba: *Oratorium S. Mauricii, ad quod Imperator, & Imperatrix ab Episcopis Cardinalibus benedicuntur, & in brachio dextero Oleo Sancto unguntur, antequam a Romano Pontifice coronentur*. Fieri solitam hujus unctionis cæremoniam in ipso S. Mauricii Sacello, docent nos etiam Romanus Ordo xiv. & ms. cæremonialis Codex Pierfanctianus, ut infra suo loco dicemus.

IX. Quantum vero ad Ecclesiam, seu Capellam spectat S. Mariæ in Turribus, de qua crebro Romæ Sacræ descriptores mentionem faciunt, ita de ea scribit eruditissimus æque ac Religiosissimus Josephus S. R. E. Cardinalis Thomafius in suis ad II. Responsoriale & Antiphonale Romanæ Ecclesiæ Scholiis, pag. 117. *Oratorium erat a Paulo I. edificatum, vocatum S. M. inter Turres, aut in Turribus, aut in Atrio; extabat in Atrio S. Petri inter turrim Campanariam, alteramque turrim dictam S. Justini, ob proximam ejusdem Sancti Ecclesiam*. Creatus fuit S. Paulus I. Pontifex Maximus anno dcccvi. ut vel inde intelligas, quanta sit ejus Capellæ antiquitas. Teste Romano Canonico in descriptione Vaticanæ Basilicæ Num. lrv. pag. 153. Innocentius Papa II. *Condidit privilegium, in quo concessit Canonicis Basilica S. Petri medietatem omnium ministeriorum omnium Altarium, quæ sunt in Ecclesia B. Petri, & S. Mariæ in Turri, præter Altare S. Leonis IX. Papæ*. Forte hoc privilegio, quod extare adhuc in Archivo Canonorum monet Turrigius, *De Cryptis Vaticanis*, secundæ editionis, pag. 115. solatus est Innocentius plurima passos nobilissimi Vaticani Templi Ministros per sævitiam ac rapacitatem pseudopontificis Anacleti II. de quibus agit Baronius ad annum mxxx. ut notat Clarissimus Morettus in sua, *De Presbyterio*, Lucubratione, Parte 1. Sectione v. Num. 1.

X. Extant apud Ughellum Tomo 1. Italiæ Sacræ, Joannis Papæ XIX. Litteræ ad Episcopum Sylvæ Candidæ scriptæ, quibus dolens, quod in Ecclesia S. Petri, a qua omnes Ecclesiæ doctrinam acceperere, sicut a Magistra & domina, dies Dominica Palmarum, & dies Cænæ Domini tam irreverenter colerentur, ut nec Processio cum Palmis in ipsa die Dominica ibi fieret, neque in die Cænæ Domini, *Gloria in excelsis Deo* diceretur, & in Parasceve non tam reverenter, uti decebat, Officium ibi fieret, statuit, *ut omni annua die Dominica Palmarum cum Processione ab Ecclesia S. Mariæ Transiberim exirent &c.* Datæ sunt Litteræ ipsæ Joannis, XVI. Kal. Januarii Pontificatus anno 111. idest, Christi anno mxxvi. easque integras describit Mabillonius Tom. II. Musei Italici in Appendice ad Romanum Ordinem xi. pag. 154. & seqq. Porro lapsus est Ughellus, ubi Litteras ipsas describens dixit, *ab Ecclesia S. Mariæ Transiberim*; meritoque secunda Ughelliani Operis editio legit, *S. Mariæ in Turribus*, sive, ut alii habent, *inter Turres*, Fefellit enim Ughellum explicata perperam nota *intres*, qua Veteres Amanuenses *inter turres* designare consuevere, uti post laudatum Thomafium adnotavit idem Morettus in citata Lucubratione, Parte 1. Sectione VII. in Nota ad §. 1. ubi etiam ita inquit:

A a 2

Q. i s

Quis enim credat, e Titulo S. Mariæ Transyberim Vaticanæ Templi functionum consequentem Processionem prodiiſſe? E Titulo, inquam, tam longe posito, nec ullo modo Basilicæ Principis Apostolorum subiecto? Rubrica præfixa numero 8. Orationalis antiqui S. Petri pag. 8. Cod. Responsorial. &c. S. R. E. Card. Thomasi: Dominica in Palmis dicimus Tertiam ad S. M. in Turri, ubi Palmæ benedicendæ sunt. En unde vere prodiret post benedictionem Processio.

XI. Placuit hæc adnotare, quod eadem abunde nos docent non modo antiquitatem, sed &

præstantiam laudatæ Capellæ S. Mariæ in Turribus, seu inter Turres, cujus etiam posterioribus seculis, ac præsertim labente Seculo xv. quo Augustinus Patricius nostrum hoc Cæremoniale ordinavit, ea fuit singularis dignitas ut ibi a Canonicis, & Capitulo Ecclesiæ Vaticanæ Imperator processionaliter reciperetur, & ductus ad Altare dictæ Capellæ, in manibus primi Cardinalis præsentis, & nomine Pontificis recipientis, Beato Petro, Summo Pontifici, suisque Successoribus solitum juramentum præstaret, uti in nostro §. edicitur.

§. XI.

Juramentum, quod Cæsar præstat in die Coronationis.

Ego N. Rex Romanorum, adjuvante Domino, futurus Imperator, promitto, spondeo, & polliceor, atque juro Deo, & Beato Petro, me de cetero Protectorem, atque Defensorem fore Summi Pontificis, & Sanctæ Romanæ Ecclesiæ in omnibus necessitatibus, & utilitatibus ejus, custodiendo, & conservando possessiones, honores, & jura, ac jus, quantum divino fultus adjutorio fuero secundum scire & posse meum recta & pura fide. Sic me Deus adjuvet, & Sancta Dei Evangelia.

COMMENTARIUS.

I. **E**Xtat hæc formula juramenti in Romano Ordine xiv. Cap. cv. & in ms. Cæremoniali Codice Pierſanctiano, in quibus etiam edicitur, ut Rex futurus Imperator cum Archiepiscopis, & Episcopis, Principibus, & Magnatibus suis ascendens ad Summum Pontificem, reverenter osculetur pedes ipsius, & offerens ei aurum, quantum sibi placuerit, benigne accipiat ab eo ad osculum, & ad amplexum. Quo demum surgente, Papa scilicet, ipse Rex a parte dextra, & Prior Diaconorum a parte sinistra, deducant eum usque ad Ecclesiam S. Mariæ in Turribus, ubi ante Altare, Subdiacono Evangelicum Textum tenente, Rex super eum corporaliter præstet hujusmodi juramentum, nempe, Ego N. Rex Romanorum, annuente Domino, futurus Imperator &c. ut in hoc nostro §. xi. Præter hoc juramentum, quod fidelitatis dicitur, consuevere futuri Imperatores antequam coronarentur, aliud edere juramentum juxta formam quæ apud Gratianum legitur, Canone xxxiii. Distinctione lxiii. ediditque utrumque Henricus VII. in sua Coronatione, peracta Romæ in Lateranensi Basilica anno Domini mcccxi. die xxix. Junii in Festo Apostolorum Petri, & Pauli, uti superius notatum fuit. Utriusque juramenti ab ipso Henrico editi meminit inter alios Pagius in Vita Clementis Papæ V. Num. lxxvi. ubi ita inquit: *Antequam autem coronaretur, præter Fidei professionem, juramentum etiam fidelitatis, secundum formam in Decretis, Distinctione lxiii. Cap. xxxiii. quæ incipit, Tibi Domino, comprehensam, aliudque in Pontificali Romano contentum, quod incipit, Ego N. Romanorum Rex, ediderat.*

II. Porro eam juramenti formulam, quæ incipit, *Tibi Domino*, legiturque apud Gratianum loco citato, primus edidit Otto I. Germaniæ Rex ob res tam in bello, quam in pace præclare gestas Magnus dictus. Cum enim Joannes Papa XII. multa indigna pateretur a Berengario

Italiæ Rege, ejusque filio Adelberto a Patre in Regni societatem adscito, Legatos misit ad ipsum Ottonem, Joannem Diaconum Cardinalem, & Azonem Scriptorium Sanctæ Romanæ Ecclesiæ, vocans eum ad defendendam Italiam, & Romanam Ecclesiam ab eorum tyrannide, simulque promittens, se illum Augustalibus insignibus ornaturum, & Imperatorem Romanorum appellaturum, modo tamen ille ante Legatis Apostolicæ Sedis se se juramento obligaret de conservandis integris ipsius Pontificis, Romanæque Ecclesiæ juribus, cujus juramentum apud memoratum Gratianum in citata Distinctione lxiii. Can. xxxiii. est hujusmodi: *Tibi Domino Joanni Papæ Ego Rex Otto promittere, & jurare facio per Patrem & Filium & Spiritum Sanctum & per Lignum hoc vivificæ Crucis, & per has Reliquias Sanctorum, quod si, permittente Domino, Romam venero, Sanctam Romanam Ecclesiam, & te Rectorem ipsius exaltabo secundum meum posse, & vitam, aut membra numquam, neque ipsum honorem, quem habes, mea voluntate, aut meo consilio, aut meo consensu, aut mea exhortatione perdes; & in Roma nullum placitum, aut ordinationem faciam de omnibus, quæ ad te, aut ad Romanos pertinent, sine tuo consilio; & quicquid de Terra S. Petri ad nostram potestatem pervenerit, tibi reddam; & cuicumque Italicum regimen commiserò, jurare faciam illum, ut adjutor tui sit ad defendendum Terram Sancti Petri secundum suum posse. Meminit hujus juramenti Baronius anno Christi CMLX.*

III. Teste Lamberto Schafnaburgensi ad annum cmlxi. *Otto Rex perrexit Romam, cumque Joannes Papa, nempe xii. ejus nominis, gratanter suscipiens, honorifice super Cathedram Augustalem posuit, & benedictione, atque consecratione sua Imperatorem fecit. Luitprandus ait, Ottonem miro ornatu, miroque apparatu susceptum esse ab eodem Summo Pontifice, cui non*

non solum propria restituit, verum etiam ingentibus auri, & argenti, gemmarumque muneribus ipsum muneravit. Jusjurandum vero ab eodem Papa Joanne supra pretiosissimum Corpus S. Petri, atque ab omnibus Urbis Proceribus, se nunquam Berengario, atque Adalberto ejus filio auxiliaturum, accepit. Hæc porro Ottonis Coronatio facta est ante diem XIII. mensis Februarii ejusdem anni CMLXII. eo enim die Otto Diploma edidit, in quo se Imperatorem appellat. Scribit Baronius, autographum ipsius Diplomatis, quo idem Otto sacris Imperii Insignibus, & Infulis exornatus, Joanni XII. Pontifici Oppida Ecclesiæ ad id tempus recuperata restituit, servari adhuc Romæ in Castello S. Angeli aureis exaratum litteris, & tam ipsius Ottonis, quam ejus Episcoporum, & Comitum subscriptionibus firmatum, datumque anno Domini CMLXII. Indictione V. die XLII. Februarii; anno vero Domini Ottonis Imperii invictissimi Imperatoris vigesimo septimo. Erat quidem tum annus tantum XXVI. Regni ejus Germanici, sed in hoc Diplomate annus primus Imperii cum anno Regni ejus XXVI. conjungitur, sicque fit annus XXVII. ut notat Pagius in Vita Joannis XII. Num. VII.

IV. Quicquid sit de hac re, juxta formulam juramenti in hocce §. descriptam, promittit futurus Imperator, antequam coronetur, *se de cetero Protectorem, ac Defensorem fore Summi Pontificis, & Sanctæ Romanæ Ecclesiæ in omnibus necessitatibus &c.* Principum maxime officii, & dignitatis est Ecclesiam tueri & fovere quasi sponsam Christi, memoria accepti summi in rebus humanis beneficii, & tanquam nobilissimam partem Reipublicæ. Ecclesia enim est in Republica, ut docet optatus Milevitanus Lib. III. adversus Donatistas. Teneri autem Principes, ac præsertim Imperatores tueri Ecclesiam, discimus vel ex propria eorum confessione, ejusque rei locupletem testem habemus Valentinianum, qui S. Ambrosio ex laico electo Mediolanensi Episcopo, & contristanti de electione de se facta, *Noli timere, inquit, quia Deus, qui te elegit, semper te adjuvabit, & ego adjutor, & defensor tuus, ut meum Ordinem decet, semper existam.* Quæ verba ex Historia tripertita referuntur a Gratiano in Canonem, *Valentinianus*, Distinctione LXIII. Hac laude commendantur præ ceteris Carolus Magnus & Ludovicus Pius pater & filius, quorum alter dictus est Advocatus, idest Defensor S. Petri, nempe Romanæ Ecclesiæ, ut in Caroli Vita scribit Ademarus his verbis: *Itaque post Pipinum pius regnavit Dominus Carolus filius ejus, quem postea Romani elegerunt sibi Advocatum S. Petri contra Reges Longobardorum.* Porro teste Baronio, non omisit Carolus Magnus in sua Coronatione peracta Romæ anno DCCC. Pontifici Leoni III. juramento tunc se obligare Romanæ Ecclesiæ Defensorem. Quod tamen Juramentum irrationabiliter impugnavit in suo Rationali Goldastus, cujus tamen ineptias refellit Gretserus in Apologia quam pro Baronio conscripsit, Cap. IV.

V. Præter hoc juramentum consuevere jam olim novi Imperatores, antequam benedictione Pontificali donarentur, Fidei professionem voce, & scripto, coram omnibus emittere. Hanc primus ab Anastasio exegit Euphemius Patriar-

cha; ut enim ait Evagrius Lib. III. Cap. XXXII. *Cum Ariadne Anastasium Imperiali Purpura vestire vellet, Euphemius Regiæ Urbis Episcopus consensum suum accommodare renuit, priusquam Anastasius cautionem propria manu scriptam, & jurejurando firmatam ipsi dedisset, qua pollicebatur, Fidem se illibatam servaturum, neque quicquam novi in Sanctam Dei Ecclesiam investurum esse, si Imperii compos fieret.* Addit Evagrius, hæc idcirco egisse Euphemium, quod Anastasius Manichæorum secta additus esse a pluribus crederetur. Idem testatum reliquit Theodorus Lector Lib. II. *Historia Ecclesiastica*; similique prorsus modo, cum Phocas, occiso Mauritio, Imperium invasisset, & Senatui, ac Patriarcham, ut ab eo coronaretur, in Septimium accersisset, tunc Patriarcha Cyriacus a tyranno de Orthodoxa Fide, & ut sine perturbatione servaret Ecclesiam, extorsit Professionem, inquit Paulus Diaconus Lib. XV. sua Historia. Idem & ab aliis non coacte, sed sponte præstitum est, qui non solummodo Fidei professionem, sed solemne quoque sacramentum illud edere solebant, quo jura Ecclesiæ omnia, ac privilegia, intacta, & illibata se habituros, commissosque sibi populos paterne, & absque tyrannide recturos promittebant. Hinc est, quod cum Leo Isauricus Ecclesiæ, & sacris Imaginibus bellum indixisset, *reducebat ad memoriam ejus Patriarcha sponsiones ejus ante Imperium factas, qualiter sibi Deum dederit vadem, in nullo commoturum Ecclesiam a suis Apostolicis & divinitus traditis ritibus,* ut ait iterum in sua Historia, Lib. XXI. laudatus Paulus Diaconus.

VI. Consuevisse Imperatores Coronam Imperialem Romæ a Summo Pontifice accepturos juramentum ipsum, de quo scilicet loquitur hic noster præfens §. emittere super gradus Basilicæ S. Petri, docet nos in sua Historia Rogerius Hovedenus; postquam etenim dixit, Celestinum III. anno MCCC. consecratum fuisse die Paschatis in Romanum Pontificem, addit mox, *in crastino Papam venisse ad Ecclesiam Sancti Petri, ubi ante ostium Ecclesiæ supra gradus accepit sacramentum ab Henrico Alemanorum Rege, quod ipse Ecclesiam Dei, & jura Ecclesiastica fideliter servaret illibata, & quod rectam justitiam teneat, & quod Patrimonium Beati Petri, siquid inde ablatum esset, in integrum restitueret, & quod Tusculanum ei redderet.* Hic porro Henricus est Germaniæ Rex hujus nominis VI. Imperator vero hujus nominis V. Invaluit vero tandem mos, ut juramentum ipsum in ipsa Capella S. Mariæ in Turribus a novo Imperatore præstaretur, uti inter alia exemplum nos docet Friderici III. qui, ut scribit in illius Historia Æneas Sylvius, *per aliquos Cardinales ad Capellam ductus, quæ intra Turres dicitur, ibi jusjurandum B. Petro, & Nicolao Pontifici, scilicet V. ejus nominis, suisque Successoribus in ea forma præstitit, quæ Ludovicum Magni Karoli filium jurasse, Decreta confirmant; quæ legere est apud Gratianum in suo Decreto, Distinctione LXIII. in qua etiam refertur juramenti formula. quod exhibuit Otto Imperator Joanni Papæ XIII. sed de hujusmodi juramentis ab Imperatoribus fieri solitis jam nos alias diximus; viderique etiam possunt quæ scripsimus I. Tomo nostri Romani Pontificalis in Commentariis ad Titulum XX.*

§. XII.

De receptione Imperatoris in Canonicum S. Petri.

Tum indutus Superpelliceo, & Almutia recipitur a Canonicis S. Petri in Canonicum & in Fratrem, quos omnes stans ante Altare dictæ Capellæ recipit ad osculum pacis.

C O M M E N T A R I U S.

I. **O**ccurrunt passim jam apud Scriptores, quos recenset in suo Glossario eruditus Dufresne, Canonici honorarii, seu laici, qui ex quodam privilegio hac dignitate in Ecclesiis Canonicalibus gaudebant. Id enim juris interdum sibi reservarunt Principes in iis Ecclesiis, quas aut a fundamentis erexerant, aut amplius dotaverant redditibus, aut prædiis, ut in tesseram, & notam quandam Patronatus, Canoniconum Catalogis adscriberentur, & cum isthuc proficiscerentur, secularibus depositis insignibus, lineum supparum, seu Superpelliceum, aliasque vestes Canonicales cum aliis Canonicis fungerentur Ecclesiastico munere. Interdum etiam ab ipsis Ecclesiis donabantur ejusmodi Præbendis, ut essent, qui earum bona, ac prædia tutaerentur. Hoc Jure gaudebant jam olim Comites Andegavenses in Ecclesia S. Martini Turonensis, ut testatur Chronicon Turonense his verbis: *Quia tempore Ingelgerii Comitis Ecclesia S. Martini carebat Thesaurario, & Aedituo, Consulem Ingelgerium, & Thesaurarium constituerunt, & Defensorem Ecclesiæ fecerunt, & tutorem omnium possessionum ejus, ubicumque esset, delegaverunt, qui sedem Thesaurarii, & domos cum redditibus, quandiu advixit, obtinuit.* Ministrasse hujusmodi Canonicos in Choro Canonicali veste indutos, vetera exempla nos docent. Teste siquidem Radulfo de Diceto anno cmlx. *Fulco Bonus tertius Comes Andegavensium in Ecclesia S. Martini de Castello novo Canonicus adscriptus fuit. In Festo Sancti ejusdem in Choro inter psallentes Clericos cum veste Clericali, & sub disciplina eorum adstabat &c.* Idem de Arturo Andegavensi Comite refert memoratum superius Chronicon Turonense ad annum mcc. *In Paschali, inquit, Arturus puer Turonis veniens, more debito in Ecclesia B. Martini in Canonicum est electus, & in Stallum Decani in vestibus Chori, sicut Canonicus, installatus.*

II. Transiit postmodum id jus ad Galliæ Regem tanquam Comitem Andegavensem; sicque anno mdcxiv. die xxv. Julii Ludovicus XIII. Rex Galliæ eandem S. Martini ingressus Ecclesiam, in Canonicum honorarium, tanquam Abbas secularis, & Protector ejusdem Ecclesiæ receptus est ratione sua Corona, & juramentum, quod Reges Franciæ in ejusmodi prima receptione facere consueverunt, præstitit; ut in ejusdem Ecclesiæ monumentis legitur. Scribit Coquillius in Historia Nivernensi pag. 158. Herveum Comitem Nivernensem in Canonicum ejusdem Ecclesiæ S. Martini Turonensis admissum anno mcccvi. Idemque juris concessum posteris Comitibus Nivernensibus, & firmatum deinceps Litteris anno mclxxx. & mccc. & Ludovicum Gonzagam Ducem Nivernensem in eadem Ecclesia ut Canonicum

sedisse anno mdlxxxvi. Ex Actis denique Capitularibus ejusdem S. Martini notatum est, Petrum Britannicæ Ducem cupiisse, ut ipse, suiue Successores in Ordinem Canoniconum, ejusdem Ecclesiæ cooptarentur anno mcdlv. dieque II. Septembris ejusdem anni Canonicos statuisset, *præfutum Dominum Ducem ad hujusmodi Canonicatum recipere cum solemnitatibus decentibus.* Sed aliis omiſſis, constat illud, jam a multis seculis Galliæ Regem in multis Regni sui Ecclesiis esse Canonicum; legiturque in quodam Regeſto Cameræ Comput. Paris. Carolum VII. Regem Francorum, Urbem Andegavensem ingressum die xix. Octobris anno Domini mcdxxiv. a Canonicis exceptum Superpelliceo, & Cappa auro texta indutum, tanquam Canonicum. Auctor est quoque Hemeſæus in Augusta Viromand. anno mcccxiv. Regi Franciæ venienti in Ecclesiam S. Quintini, & in Custodis loco sedenti Decanum Almutiam offerre, stante pro Aulæ consuetudine in subſellis Eleemofynario.

III. Viguit hic ritus in aliis Ecclesiis non modo Galliæ, sed & aliorum Regnorum, atque Provinciarum, in quibus Principes Canonici erant, & aliquando etiam ministrabant insignibus Canonicalibus induti, ut pluribus docet Thomassinus Parte 1. Lib. III. Cap. lxxiv. quamobrem videri mirum non debet, si in nostro hoc §. edicitur, novum Imperatorem post præstitum juramentum, *Superpellicio, & Almutia indutum recipi a Canonicis S. Petri in Canonicum, & in Fratrem &c.* Tradit Marquardus Freherus, eandem dignitatem obtinere in Ecclesiis Aquigranensi, Colonienſi, & Bambergensi; describitque Joannes Noppius in Chronico Aquigranensi Lib. 1. Cap. xii. juramentum, quod Imperator tanquam Canonicus ejusdem Ecclesiæ facere solitus est. Superest adhuc sacramentum, quod Capitulo Pictaviensi B. Hilarii præſtabat Galliæ Rex ibidem Canonicatu insignitus, cum primum illuc accedebat: *Juramentum, quod facere, & præſtare tenetur Rex Abbas Ecclesiæ B. Hilarii, quum primum personaliter ad eam acceſſerit.* Legi id ad calcem Annalium Aquitaniconum tradit Thomassinus loco citato, Numero vii. ubi etiam observat, Reges ipsos quandoque pro Canonicis dictos esse Abbates.

IV. Quod nostrum §. spectat, ubi edicitur recipi novum Imperatorem a Canonicis S. Petri in Canonicum, & in Fratrem, concinit plane Romano Ordini xiv. Cap. cv. & ms. Cæremoniali Codici Pierſanſtiano, ubi post recitatum juramentum, quod in Sacello S. Mariæ in Turribus fieri solitum fuit, ita legitur: *Deinde Summus Pontifex cum omnibus Ordinibus suis ad Altare procedit; & facta ibi Oratione, ad Sedem ascendit, Rege cum suis, & tribus Episcopis.*

pis, videlicet Ostiensi, & Portuensi, & Albanensi in Ecclesia S. Mariæ in Turribus remanente, ubi a Canonicis S. Petri receptus in Fratrem &c. Teste Spondano ad annum MCDLII. Fridericus III. Imperator post præstitum Papæ sacramentum, Alba indutus, primum in Canonicum S. Petri admissus fuit, tum denique Corona cinctus: *Alba indutus, & in Canonicum S. Petri receptus*. Verba ista sunt Naucleri, quæ Romualdus etiam Historiæ suæ intexuit. Meminit & ejus cæremoniæ Æneas Sylvius in Historia ipsius Friderici, ubi etiam ait, dedisse tunc Fridericum Canonicis; qui aderant, osculum pacis. Sic enim inquit post juramentum ab eo præstitum in Capellæ S. Mariæ in Turribus, de quo nos superius diximus: *Ibi quoque & Alba indutus, in Canonicum S. Petri receptus, Fratribus, qui aderant, Canonicis osculum dedit*. Nec aliter factum est in Coronatione Caroli V. peracta Bononiæ anno MDXXX. ut enim ipsa Coronatio Imperialis Romæ fieri videretur, ritusque minime omitteretur cooptationis Imperatoris in Canonicum Lateranensem, & Vaticanum S. Petri, juxta antiquam consuetudinem, acciti sunt nonnulli ex utriusque Ecclesiæ Canonicis cum Vicariis, atque insuper duæ Bononienses sacræ Aedes ad repræsentandas Romanas illas nobilissimas Basilicas delectæ. Notat hæc eruditissimus Canonicus Petrus Morettus in Lucubratione, *De Presbyterio*, Parte II. Sectione x. pag. 188. Nota ad §. XII. ubi citat Opus Marci

del Guazzo, & Raynaldi Annales ad annum MDXXX. quibus addi & possunt, quæ in eandem rem scribunt Spondanus ad eundem annum MDXXX. Num. I. & II. Thomassinus Parte 1. *Disciplina*, Lib. III. Cap. LXIV. Num. IX. & alii, quos ibidem recenset Spondanus.

V. Tandem nequid sacræ eruditionis hic omittamus, notandum & illud est, quod docet idem Morettus in alio celebri Opusculo, quod inscripsit, *De ritu ostensionis sacrarum Reliquiarum*, laicos nempe Principes Romam advenientes, ubi recepti erant in Canonicos S. Petri, solitos etiam fuisse sacras insigniores ejusdem Basilicæ Reliquias populo ostendere. Sic Fridericus III. Imperator Canonicus declaratus S. Petri Veronicam monstravit anno MCCC. uti conjicere licet ex Monumentis Maffei Veggii, *De mirabilibus Basilicæ Vaticanæ*. Uladislauum Regis Poloniæ, & Sueciæ filium, qui Romam venit anno MDCXXIV. Urbano VIII. Pontifice Maximo, inter Canonicos S. Petri adscriptum, Odæum ascendisse, & Veronicam, Lanceam, ac Domini Crucem ostendisse, narrat Paulus Alaleo in suis mss. Diariis ad diem xxx. Decembris prædicti anni MDCXXIV. Eodem Canonici privilegio ornatus Magnus Hetruriæ Dux Cosmus III. ab Innocentio XII. Vaticanas Reliquias habitu Canonicali indutus anno Jubilei MCCC. monstravit III. Nonas Junii. Vide laudatum Morettum in citato Opusculo §. xxxiv. ubi ritum enarrat, quo laudatus Princeps Reliquias populo ostendit.

§. XIII.

De precibus, & oratione in dicta Capella S. Mariæ in Turribus super novum Imperatorem dici solitis.

Inde præcedente Clero, & cantante Responsum, *Petre amas me? Tu scis Domine, quia amo te. Pasce oves meas*. Versus: *Simon Joannis amas me plus his? Tu scis Domine, quia amo te. Pasce &c.* alii Cæsaris Proceres suo ordine deveniunt ad portam principalem ipsius Basilicæ, quæ argentea nominatur, & ex quinque media est. Interim duo Episcopi Cardinales post priorem antiquiores, facta reverentia Pontifici, cum suis Mitris, & Pluvialibus veniunt ad prædictam portam, dum Cæsar adhuc est in dicta Capella inter Turres; & ante eum junior Episcopus Cardinalis stans sine Mitra supra Cæsarem genuflexum orantem dicit hanc Orationem.

Oremus.

Deus, in cujus manu corda sunt Regum, inclina ad preces humilitatis nostræ aures misericordiæ tuæ, & huic famulo tuo Regi veram appone sapientiam, ut haustis de tuo fonte consiliis, & tibi placeat, & super omnia præcellat. Per Christum Dominum nostrum. Amen.

COMMENTARIUS.

I. **C**oncinunt hæc Ordini XIV. Romano, & ms. Cæremoniali Codici Pierfanctiano, in quibus edicitur, ut ubi novus Imperator in Ecclesia S. Mariæ in Turribus a Canonicis S. Petri receptus fuit in Fratrem, Imperialibus induatur insignibus, dato ipsius pallio Camerario Domini Papæ. *Qui, præcedentibus illis Canonicis cantantibus, Petre amas me? cum ad ostium Basilicæ Principis Apostolorum pervenerit, quæ porta argentea nuncupatur, deducant eum hinc inde Comite Lateranensis Palatii, & Primicerio Judicum Romanorum* (ita legendum, non vero Judicum Canonicorum, ut perperam in citato Ordine XIV. apud Mabillonium

legitur) *Albanensis Episcopus ante ipsam portam argenteam, hanc super eum benedictionem infundat*. Oratio. *Deus in cujus manu &c.* Esse hunc antiquum ritum, ut in porta argentea Vaticanæ Basilicæ ab Albanensi Episcopo prædicta Oratio dicatur super Imperatorem ibi præsentem, docet ms. Pontificale Ecclesiæ Apamienfis in Syria anno MCCXIV. scriptum apud eruditum Martene Lib. II. *De antiquis Ecclesiæ Ritibus*, Cap. IX. Ordine VI. ubi postquam mentionem fecit juramenti, quod novus Imperator in memorata Ecclesia S. Mariæ in Turribus facit *super sancta Evangelia juxta morem Prædecessorum suorum in præsentia Cardinalium*, ita dein-

de subdit: *Quo facto, deducitur processionaliter, sicut prius; & cum intraverit portam Basilicæ B. Petri, quæ quondam fuit argentea, & nuno quoque argentea vocatur, Episcopus Albanensis primam super caput ipsius dat orationem, dicens: Dominus vobiscum. Oremus. Deus in cujus manu corda sunt Regum &c.*

II. Eadem Oratio dicenda ab ipso Albanensi Episcopo ante portam argenteam Basilicæ B. Petri, legitur etiam in mss. Pontificalibus, Constantinopolitano annorum circiter DL. & Arelatensi annorum CDL. apud laudatum Martene Ordine VII. Mirum itaque videri debet; quod circa hanc cæremoniam scribit Æneas Sylvius in Historia Friderici III. ubi enarrat ejus Coronationem Romæ peractam a Nicolao Papa V. anno MCDLII. Ait enim, quod cum ad præcipuam Ecclesiæ portam venisset, ibi per Subdiaconum S. Mariæ Novæ Cardinalem Eugenii IV. nepotem sollemni benedictione coopertus est. Fuit hic Petrus Barbus Venetus Eugenii Papæ ex sorore nepos, qui ex Canonico Patavino, & Protonotario Apostolico, imo affirmante Aubery, ex Archidiacono Ecclesiæ principis Bononiensis, Episcopus Cerviensis primo, mox Vincentinus, demum Patavinus, ab Eugenio avunculo Purpuram accepit, & Diaconus Cardinalis S. Mariæ Novæ, postea a Nicolao V. successore Eugenii Presbyter S. Marci, & Archipresbyter S. Petri renunciatus, fuit tandem sub nomine Pauli II. Romanus Pontifex Maximus. Hic itaque Petrus Barbus Diaconus Cardinalis S. Mariæ Novæ primam orationem effudit super Fridericum ad præcipuam Ecclesiæ portam, ut ait Æneas Sylvius, cum alias juxta antiquos recentioresque Cæremoniales Codices id ad Cardinales Episcopos pertineret.

III. Quicquid autem de hac re sit, quod argenteam portam spectat, quæ ex quinque portis Basilicæ Vaticanæ media est, ut ait hic noster §. antiqua illa profecto est, sicut & aliæ quatuor, quarum omnium nomina explicat in sua brevi descriptione Vaticanæ Basilicæ Romanus Canonicus Num. XLIV. sic inquit: *In honorem Basilicæ B. Petri Apostolorum Principis scribimus nomina quinque portarum, quæ sunt in ingressu B. Petri Basilicæ. Quarum media, & major, vocatur porta argentea, quoniam optimo argento tota deargentata fuit, & variis picturis a S. Leone Papa IV. depicta. Porta vero, quæ est juxta eam, & quæ vadit ad S. Leonem IX. Papam, vocatur porta Ravenniana, quoniam antiquitus Ravennates, & omnes Lombardi, & Tusci de consuetudine per eam intrabant, vel quia Translyberim per eam intrare solebant, cum Translyberim Civitas Ravennantium vocaretur. Tertia porta juxta eam, quæ vadit ad S. Gregorium, vocatur porta Judicii, quoniam per eam tantum mortui, qui sepeliendi sunt in Ecclesia B. Petri, mittuntur a Domino judicandi. Ab alia parte supra, Porta, quæ est juxta Portam argenteam, dicitur Porta Romana, quoniam, ut a nostris Majoribus accepimus, Romanæ mulieres antiquitus, & adhuc frequenter per eam intrant. Porta illa, quæ est juxta eam, & quæ vadit per porticale juxta Veronicam, dicitur Porta Guidanea, quoniam Guidones, qui ducebant Oratores venientes per porticale, quod est juxta nolarium majus, frequenter per eam intrabant. Unde usque ad nostra tempora facule,*

& cerei ibi vendebantur. Hucusque Romanus Canonicus Portas ipsas Vaticani Templi describens.

IV. Basilicæ itaque Vaticanæ Portæ a Romano enumeratæ sunt quinque, totidemque in nostro hoc §. recensentur. Verum notat Paulus de Angelis in sua ad ipsum Romani locum annotatione pag. 136. fuisse postea sextam Portam in angulo Basilicæ apertam, quæ a Christifidelibus vocata est Porta Sancta. Copiose de his Portis tractat Panvinus in suo Opusculo, *De septem Urbis Ecclesiis*, ubi etiam ait, in Basilicæ Vaticanæ anteriori parte sex esse Portas, quas ita describit: *Media omnium major argentea vocata a laminis argenteis calatis, quibus totam eam cooperuit Honorius Papa, quas a Saracenis dirutas restituit Leo IV. & iis postremo etiam ablati, aneam refecit Eugenius IV. cum Martyrio Sanctorum Apostolorum, & rebus ab se gestis expressis, ut hæc carmina indicant.*

Ut Græci, Armeni, Æthiopes, hic aspice ut ipsam Romanam amplexa est gens Jacobina Fidem.

Sunt hæc Eugenii monumenta illustria Quarti
Excelsi hæc animi sunt monumenta sui.

Pergit Panvinus, ceterasque Portas sic describit: *Proxima Porta a parte dextera, vocatur Ravenniana a Ravennatibus Translyberim incolentibus, vel quia Translyberini Ravennates vocabantur; quo nomine Tusci, & Transpadani homines comprehenduntur, quia eo ingredi Ecclesiam consueverant. Tertia versus S. Mariam de Febre vocata Porta Judicii, quoniam ea vita functi ad sepulturam inferebantur. A parte sinistra proxime post Argenteam sequitur Porta Romana a Civibus Romanis dicta. Quinta Guidonea vulgari verbo a Guidonibus nuncupata, qui Peregrinos ad Limina Apostolorum venientes in Ecclesiam introducebant, cuncta illis memoratu, aut visu digna ostendentes. Sexta est Porta Sancta recens addita, quæ vigesimoquinto quoque anno Jubileo redeunte aperitur, & eo exacto clauditur. Hactenus Panvinus, qui etiam addit, super his Portis appensas fuisse catenas Portus Smyrnenis, & veteres ejus Urbis, Sixto IV. Pontifice Maximo, a classe Ecclesiastica, cui Oliverius Carafa Cardinalis Neapolitanus cum imperio præerat, de Turcis captas; itemque vexilla alia iisdem Dei hostibus erepta.*

V. Porro quod in Porta Argentea juxta antiquum ritum Albanensis Episcopus super novum Imperatorem primam Orationem dicit, operæ pretium ducimus de eadem hoc loco anotare, quæ Anastasius scripsit in Vita Honorii Papæ I. *Hic erudit Clerum, inquit, temporibus suis renovavit omnem Cimiliam B. Petri Apostoli, & investivit Confessionem B. Petri ex argento puro, quod pensat libras centum octuaginta & septem. Investivit Regias januas in ingressu Ecclesiæ majores, quæ appellantur medianæ, ex argento, quæ pensant libras nonigintas septuaginta quinque. Ceterum quod dictum superius fuit de renovatione facta Portæ Argenteæ a Leone Papa IV. audiendus est idem Anastasius, qui in ipsius Pontificis Vita sic inter alia inquit: Ipse insignis Præsulque præcipuus cum innumera summi decoris opera in Basilica B. Petri Cali Clavigeri perfecisset, Portas, quas destruxerat Saracena progenies, argentoque nudarat, erexit, multisque argenteis tabulis lucifluis, salutiferisque historiis sculptis, & in meliorem speciem, quam prius fuerant, reparavit, ut omnes, qui in eandem*

dem Basilicam ingredi volunt, laudes Deo omnipotenti, sanctoque suo Prasulatu referant, & exposcant, ut multa annorum sua vita curricula extendantur, qui tanti fulgoris opere, tantoque

pulchritudinis pondere Aulam Dei argento pensante libras septuaginta ornavit. Ita Anastasius; atque hæc de Portis Basilicæ Vaticanæ iufficiant, de quibus & alios Scriptores vide.

§. XIV.

De accessu Imperatoris ad Capellam S. Gregorii, & de altera Oratione super eum dicenda.

Finita prima Oratione, intrant Ecclesiam, Cæsare incedente semper inter duos Diaconos Cardinales prædictos, & immediate præcedentibus duobus Episcopis Cardinalibus præfatis, & flectentes ad sinistram, perveniunt ad Capellam S. Gregorii, ubi Imperator sedens, deposita Almutia, primo induit Sandalia, deinde stans Tunicellam, & demum Imperiale Paludamentum, & mox inde procedens, ad medium Ecclesiæ, ubi rota est porphyretica, venit, & ibi ab alio Episcopo Cardinali sibi assistente, dicitur super eum alia Oratio, videlicet. Oremus.

Deus inenarrabilis Auctor mundi, Conditor generis humani, gubernator Imperii, confirmator Regni, qui ex utero fidelis amici tui Patriarchæ nostri Abrahamæ prælegisti Regem seculis præfuturum, Tu præsentem Regem hunc cum exercitu suo per intercessionem Sanctorum uberi bene & dictione æternitatis circunda, ut semper (1) maneant tripudiantes in pace victores. Per Christum Dominum nostrum. Amen.

COMMENTARIUS.

I. **L**egitur & hæc Oratio in ms. Pontificali Ecclesiæ Apamiensis in Syria anno Domini MCCXIV. exarato apud Martene citato superius loco, ubi post factam mentionem primæ Orationis, quam dixit Albanensis Episcopus, ita mox subdit: *In eundem quoque modum Episcopus Portuensis dat secundam Orationem in medio rota majoris, quæ primum occurrit infra Ecclesiam B. Petri: Dominus vobiscum. Oremus. Deus inenarrabilis auctor Mundi &c. ut in Ordine Romano usque ad illa verba inclusive; nempe: ut semper maneant tripudiantes in pace victores. Quod ipsi præstare dignetur &c.* In mss. quoque Pontificalibus, Constantinopolitano annorum DL. & Arelatensi annorum CDL. fit mentio ejus Orationis dicendæ scilicet ab Episcopo Portuensi *intra Ecclesiam B. Petri in medio rota*. Sed audiamus Romanum Ordinem XIV. in quo etiam secunda ipsa Oratio est longe prolixior: *Cum autem intra Ecclesiam, inquit, in medio rota pervenerit, Portuensis Episcopus hanc Orationem super ipsum decantet. Oratio autem ita concepta est: Deus inenarrabilis auctor mundi, conditor generis humani, gubernator Imperii, confirmator Regni, qui ex utero fidelis amici tui Patriarchæ nostri Abrahamæ prælegisti Regem seculis profuturum: Tu præsentem Regem hunc cum exercitu suo per intercessionem omnium Sanctorum uberi bene & dictione locupleta, & in Solium Regni firma stabilitate connecte. Visita eum sicut visitasti Moysen in mari rubro, Jesum Nave in pralio, Gedeon in agro, Samuelem in Templo, & illum cum bene & dictione sydereæ, ac sapientia tuæ rore perfunde, quam beatus David in psalterio, Salomon filius ejus te remunerante percepit de Calo. Sis ei contra inimicorum acies lorica, in adversis galea, in prosperis patientia, in protectione clipeus sempiternus; & præsta, ut gentes* To.I.

illi teneant fidem, Proceres sui habeant pacem, diligant caritatem, abstineant se a cupiditate, loquantur, justitiam, custodiant veritatem; & ita populus iste pullulet coalitus bene & dictione æternitatis, ut semper maneant tripudiantes in pace victores. Per. Ita in Romano laudato Ordine XIV. in ms. vero Cæremoniali Codice Piersanctiano secunda ipsa Oratio eadem est, ac illa in hoc nostro §. descripta.

II. Juxta præscriptum ejusdem nostri §. ubi Imperator pervenit ad Capellam S. Gregorii, ibi sedens deposita Almutia, primo induit Sandalia, deinde stans Tunicellam, & demum Imperiale Paludamentum. Fuit jam ante in usu, ut laici Principes sacris induti vestibus tanquam Subdiaconi, & Diaconi rebus divinis ministrarent, ac præsertim Imperatores in sua ipsorum Coronatione, uti constat ex Romano Ordine XIV. Cap. cv. ubi inter alia edicitur, ut, Pontifice descendente, scilicet de Sede, pro perficiendis Missarum Mysteriis ad Altare, Imperator more Subdiaconi offerat Calicem, & ampullam, & stet ibi, donec Pontifex ad Sedem reversus communicet. Sane refert ad annum MCDXIV. Num. x. Spondanus, Sigismundum Imperatorem ipso anno Constantiam venisse in pervigilio Natalis Domini, Missæ Romani Summi Pontificis adfuisse, & Evangelium recitasse Diaconorum veste indutum: *Ad Missam Pontificalem habitu Diaconali legit de more Evangelium, nempe, Exiit edictum a Cæsare Augusto.* Teste Ænea Sylvio in Historia Friderici III. postquam Fridericus ipse solemnem benedictionem donatus fuit a Cardinale Diacono Tituli S. Mariæ Novæ in præcipua Vaticanæ Basilicæ porta, uti supra notavimus, deinde Capellam S. Gregorii ingressus, Sandalia tulit, Tunicellam induit, & Angustale paludamentum accepit. Tum vero mox etiam addit: *Mox ei in medium Basilicæ*

B b

(1) Ita in Romana editione; in Veneta prima, & Colonienſi legitur; *ut semper maneant laeti, & triumphantes in pace victores.*

lica profecto per alium Cardinalem benedictio superfusa est. Atque hic ritus in nostro hoc §. præscriptus servatus est in Coronatione laudati Friderici III. peracta anno MCDLII. Anno quoque MCDLXVIII. quum idem Fridericus III. Natale Christi Romæ ageret, a Diaconibus Cardinalibus veste sacra Diaconi indutus fuit, & ita Evangelium recitavit in Nocturnis Officiis, reliquam lectionem ab alio decantandam dimittens: *Camiseum, vestemque albam, & Pluviale, ministrantibus Diaconibus Cardinalibus, sumpsit, & Evangelium lectionis septimæ non injucunde cantavit*. Commemorat & illud Sigonius Lib. VII. *De Regno Italia*, cum Lombardiam peragraret Imperator, in more positum fuisse, ut secundam accepturus Coronam, in vestibus Subdiaconorum Archiepiscopo Mediolanensi ministraret.

III. Teste Thomassino Parte I. *Disciplina*, Lib. III. Cap. LXIV. Num. IX. *hoc veluti privilegium Imperatoribus indultum commentantur Canonistæ*; sed tamen longe probabilius laudatus Auctor censet, plurimas Diaconorum, & Subdiaconorum vestes, Imperatorum proprias olim fuisse, & ab illis fuisse Sacerdotio communicatas; subditque mox etiam, hac convenientia antiquissima, & cognatione Regiarum vestium cum Sacerdotalibus adductum olim fuisse Robertum Regem, ut solemnioribus Festis pretiosissimam indutus Cappam, permisceretur Cantoribus Ecclesiæ S. Dionysii, ut constat ex antiquo Codice ejus Abbatiae, quem laudat Mollæti in Tractatu, *De Canonicis*, Reflexione x,

ubi ita inquit: *Inter Missarum solemnias stans in Choro cum Cantore, ceterisque Chorum tenentibus, indutus Cappa serica pretiosa, quam sibi ad hoc ipsum comparaverat, tenens Sceptrum, Regale aureum in manibus, totum Chorum, imo totam Ecclesiam illustrabat, psallens cum psallentibus*. Puto equidem, labi Thomassinum, cum ait sacras Diaconorum, & Subdiaconorum vestes, proprias olim fuisse Imperatorum, & ab iis communicatas Sacerdotio fuisse. Constat enim ex veteribus monumentis, consuevisse Romanos Pontifices Principibus laicis sacra indumenta, elargiri. Certe, uti nos docet Gregorius VII. Lib. I. Epistola XXXVIII. ad Uratislaum Boemiæ Ducem data, ipsi Uratislao de Apostolica Sede optimemerito laicis hætenus inconcessum Mitræ usum largitus est. Hoc exemplum sequutus est Lucius II. de quo Romani in Epistola sua ad Conradum Romanorum Regem apud Ottonem Frisingensem Libro I. *De gestis Friderici I.* Cap. XXVIII. ita inquiunt: *Concordiam inter Siculum & Papam hujusmodi esse accepimus. Papa concessit Siculo Virgam, & Annulum, Dalmaticam, & Mitram, atque Sandalia*. Hujusmodi largitio erat gratia specialis Romanorum Pontificum, uti constat ex Innocentio Papa III. qui & ipse Regi Aragoniæ inter alia Regalia insignia, *Colobium, & Mitram* concessit. Legi de ea re possunt, quæ scribunt Pagius in Vita Alexandri II. Num. LI. Raynaldus MCCIV. Numero LXXI. & quæ dicemus nos infra in Commentario ad §. XXI. ut ea omittamus, quæ in aliis Operibus nostris diximus.

§. XV.

De processu Imperatoris ad Confessionem S. Petri, ac de Litaniis, precibus, & orationibus super ipsum dicendis.

Procedunt deinde ad Confessionem Beati Petri sub Altare, ubi procumbit super Faldistorium Imperator, & duo Episcopi Cardinales ascendunt Capellam, & vadunt ad sedes suas. Prior autem Diaconorum, ac Prior Presbyterorum parati descendunt ad eum, atque hinc inde genuflectunt; & Diaconus ipse facit Litaniam procumbens ad sinistram, omnibus alta voce replicantibus, & flexis genibus permanentibus. Finita Litania, surgit Prior Presbyterorum, & super Cæsarem adhuc procumbentem dicit: *Pater noster &c. Et ne nos &c. Salvum fac servum tuum. R. Deus meus sperantem in te. Versus. Eslo ei Domine turris fortitudinis. R. A facie inimici. Versus. Nihil proficiat inimicus in eo. R. Et filius iniquitatis non apponat nocere ei. Versus. Domine exaudi orationem meam. R. Et clamor meus ad te veniat. Versus. Dominus vobiscum. R. Et cum spiritu tuo. Oremus.*

Præterde quæsumus Domine famulo tuo dextram cælestis auxilii, ut te toto corde perquirat, & quæ digne postulat, assequatur.

Actiones nostras quæsumus Domine aspirando præveni, & adjuvando proseguere, ut cuncta nostra oratio, & operatio a te semper incipiat, & per te cæpta finiatur. Per Christum Dominum nostrum. Amen.

Et cum Diacono his finitis revertitur ad locum suum inter alios Cardinales.

COMMENTARIUS.

I. **J**uxta præscriptum ms. Pontificalis Apamiensis Ecclesiæ in Syria anni MCCXIV. finita Oratione, *Deus inenarrabilis auctor Mundi*, de qua in superiori Commentario dictum est, deinde deducitur, Cæsar scilicet,

ante Confessionem B. Petri, ibique prostermit se primum in terram, & Archidiaconus facit Litaniam. Idem præscribunt mss. Codices Pontificales Constantinopolitanus annorum circiter DL. & Arelatenfis annorum CDL. ubi mandant,

dant, ut deinde vadant ante Confessionem S. Petri, & coronandus prosternat se primum in terram, & Archidiaconus faciat Letaniam. Nulla in his Pontificalibus mentio illarum precum, Pater noster &c. *Salvum fac servum tuum* &c. mentio nulla quoque illarum duarum orationum, quæ in hoc nostro §. descriptæ sunt; sed statim mandant, ut finita Litania, Episcopus Hostiensis ungat ei de oleo exorcizato brachium dextrum, & inter scapulas &c. De qua cæremonia dicemus nos infra juxta ordinem nostri hujus

Cæremonialis. Porro preces ipsæ, & orationes extant in Ordine Romano XIV. in Cæremoniali Pierfanctiano Codice, & in eo quem refert Raynaldus ad annum mcccxi. ubi recenset cæremonias in Coronatione Henrici VII. servatas jussu Clementis Papæ V. præscriptas. Loquitur & de tertia hac oratione, seu benedictione Æneas Sylvius in Historia Friderici III. *Tertiam quoque benedictionem*, inquit, *apud cancellum S. Petri suscepit*. Idem & apud alios Auctores legere est quos non est opus hic recensere.

§. XVI.

De accessu Cæsaris ad Altare S. Mauritii, & ejus sacra unctione.

Dum ultimæ Orationes dicuntur per Presbyterum Cardinalem, prior Episcoporum Cardinalium cum Pluviali, Stola, & Mitra descendit ad Imperatorem, & simul cum duobus Diaconis, finitis Orationibus, ducit illum ad Altare S. Mauritii, ubi stans cum Mitra inungit brachium dextrum Cæsaris, & scapulas cum oleo exorcizato in modum Crucis, & deposita Mitra dicit. Oremus.

Domine Deus Omnipotens, cujus est omnis potestas, & dignitas, te supplici oratione, atque humillima prece deprecamur, ut huic famulo tuo N. prosperum Imperatoriæ Majestatis concedas effectum, ut in tua protectione constituto, ad regendam Ecclesiam tuam sanctam, nihil ei præsentia officiant, futura nihil obsistant, sed inspirante Sancti Spiritus dono, populum sibi subditum æquo justitiæ libramine regere valeat, & in omnibus operibus suis te semper timeat, tibi quoque jugiter placere contendat.

Deus Dei filius Jesus Christus Dominus noster, qui a Patre oleo participationis unctus est præ participibus suis, ipse per præsentem sacri unguenti infusionem Spiritus Paracliti super caput tuum infundat benedictionem, eandemque usque ad interiora cordis tui penetrare faciat, quatenus hoc visibili, & tractabili dono invisibilia percipere, & temporali Regno justis moderationibus executi, aternaliter conregnare ei merearis, qui sine peccato Rex Regum vivit cum Deo Patre in unitate Spiritus Sancti Deus per omnia secula seculorum. Amen.

C O M M E N T A R I U S.

I. **A**ntiquissima est Principum unctio, & certe suam a veteri Testamento ducit originem, in quo non solum ungebatur Sacerdos, sed etiam Rex, & Propheta, ut notat Innocentius III. in capite unico, *De sacra unctione*. Ungebantur quidem in veteri Testamento Reges in capite, fuitque unctio propria & singularis Regum Judæorum, ut observat S. Augustinus in Psalmum xliv. ubi etiam ejus singularitatis rationem docet, sic inquit: *Hoc nomen, quod appellatur Christus, unctio- nis est, nec in aliquo alibi ungebantur Reges, & Sacerdotes, nisi in illo Regno, ubi Christus prophetabatur, & ungebatur, & unde venturum erat Christi Nomen, nusquam est alibi omnino, in nulla Gente, in nullo Regno*. In novo Testamento per vetustum esse ritum ungendi sacro Oleo Reges, abunde ostendimus Tomo I. Romani Pontificalis in Commentariis ad Titulum xx. Docet Altaferra in citato Capite unico, *De sacra unctione*, serius unctionem recepisse Imperatores, eamque Conradum non quidem sprevisse, sed tamen minime suscepisse. Verum, quicquid sit de priscis Romanis Imperatoribus, & de iis, qui in Oriente imperarunt, plane constat, translato in Occidentem Imperio, Carolum Magnum, qui post Imperii renovationem primus dicitur Imperator, in sua Coronatione

To. I.

peracta Romæ die xxv. Decembris anno dccc. a Leone Papa III. non in quibusdam duntaxat partibus, sed toto corpore fuisse sacro Oleo perfusum: Tum vero vicem Carolo referens Leo, inquit Constantinus Manasses, *Romæ veteris eum Imperatorem renuntiat, neque tantum Corona caput ejus more Romano cingit, verum etiam legibus Judæorum usus, a capite ad pedes totum oleo perungit*.

II. Peculiaris profecto fuit hic ritus, nam alias juxta præscriptum Pontificalium, & Innocentii III. testimonium loco citato, *Principis unctio a capite ad brachium est translata, ut Princeps ex tunc non ungatur in capite, sed in brachio, sive humero, vel in armo, in quibus Principatus congrue designatur, juxta illud quod legitur, Isaiæ scilicet Capite ix. Factus est Principatus super humerum ejus &c.* Ad quod etiam significandum, ut idem Pontifex subjicit, *Samuel fecit poni armum ante Saul, cui dederat locum in capite ante eos, qui fuerant invitati*. Notandum hic vero illud, ipsam Principum unctionem non esse Sacramentum, nec imprimere Characterem, sed esse mere cæremonialem, ungique ipsos, ut fiant augustiores, & tutiores ab insidiis nefariorum. Differt autem Principis unctio a Pontificum unctione, ut etiam laudatus Innocentius Papa III. docet, quia

Bb 2

quia caput Pontificis Chrismate consecratur, brachium vero Principis oleo delinitur; ut ostendatur, quanta sit differentia inter auctoritatem Pontificis, & Principis potestatem. Cæterum ritus in hoc nostro §. præscriptus concinit quidem Romano Ordini XIV. & ms. Codici Pierfantiano, ut nimirum post dictas orationes in §. præcedenti descriptas, procedat Cæsar ad Altare S. Mauritii, ubi Ostiensis Episcopus sibi ungit de oleo exorcizato brachium dextrum, & inter scapulas, hanc orationem dicendo, nempe, Domine Deus Omnipotens &c. atque aliam, Deus Dei Filius &c. ut in nostro §. quibusdam verbis tantisper variatis.

III. Extant & hæ Orationes in ms. Pontificali Apamiensi anno MCXIV. scripto, ex cujus tamen præscripto, Episcopus Ostiensis, vel in eodem loco, ante Confessionem scilicet S. Petri, vel ante Altare S. Mauritii, sicut aliquando a multis actum esse dicitur, debet ei inungere brachium dextrum de oleo exorcizato, & inter scapulas. Juxta Pontificales Codices, Constantinopolitanum annorum circiter DL. & Arelatensem CDL. inunctio fiebat ante ipsam S. Petri Confessionem, ubi scilicet facta fuerat Litania; statim enim mandant, ut, ipsa Litania finita, Episcopus Ostiensis ungit ei de oleo exorcizato brachium dextrum, & inter scapulas. Quamobrem

ritus recens videtur, quem infra in fine sequentis §. nostrum Cæremoniale præscribit, ubi loquens de ipsa Imperatorum inunctione, ita inquit: Et hæc quidem fiunt ad Altare B. Mauritii, nam ad Altare Beati Petri nemo inungitur, nemo ordinatur, nisi Romanus Pontifex solus. Sed de hac re fusius alias.

IV. Porro ex dictis hætenus illud constat, ad Episcopum Ostiensem pertinere sacro oleo inungere Imperatorem; sed notandum tamen hic cenfeo, Fridericum III. Imperatorem in sua Coronatione, sicut & ejus conjugem Leonoram inunctum fuisse a Francisco Cardinali Condulmerio Episcopo Portuensi, quod tunc temporis Joannes Cervantes Episcopus Ostiensis in Hispaniis versaretur, uti observat eruditus Georgius in Vita Nicolai Papæ V. anno Domini MCDLII. Num. VIIII. ubi etiam merito reprehendit Zantflietum, qui Fridericum ipsum, & Leonoram ab Ostiensi Episcopo inunctos fuisse perperam scripsit. Meminit & ejus cæremoniæ Aeneas Sylvius in Historia Friderici III. ubi ita inquit: Exinde ductus ad Altare S. Mauritii, per Cardinalem Portuensem tunc Vicecancellarium . . . in scapulis, atque in dextro brachio pro veteri more oleo sacro delinitus, iisdemque locis inuncta est conjux ejus Leonora. Plura de hac re vide citato loco nostri Pontificalis.

§. XVII.

De Imperatricis inunctione.

Interea Imperatrix, si adest, & similiter perungitur in eisdem locis, deinde dicitur per eundem Cardinalem Episcopum Oratio super eam cum Mitra, quia ad eam non ad Deum sermo dirigitur: *Spiritus Sancti gratia nostræ humilitatis officio copiosa in te descendat, ut sicut manibus nostris licet indignis oleo materiali oblinita pinguescis exterius, ita ejus invisibili unctione delibuta impinguari merearis interius, ejusque spiritali unctione perfectissime semper imbuta, & illicita declinare tota mente, atque spernere discas, & valeas, & utilia animæ tuæ jugiter optare, atque operari queas, auxiliante Domino nostro Jesu Christo, qui cum Patre, & Spiritu Sancto vivit & regnat Deus &c.* Et hæc quidem fiunt ad Altare S. Mauritii; nam ad Altare Beati Petri nemo inungitur, nemo ordinatur, nisi Romanus Pontifex solus.

COMMENTARIUS.

I. **U**Na cum Imperatoribus consuevisse & eorum uxores sacro oleo rite inungi, ac deinde etiam coronari, & Ecclesiastici Annales, & Cæremoniales antiqui Codices docent, Romanus Ordo XIV. Auctore Jacobo Gajetano, Cap. CL. ms. Codex Pierfantianus, Arelatensis Liber Pontificalis annorum circiter CDL. & alii. Sed audiamus memoratum Romanum Ordinem, & Pierfantianum Codicem, qui ita ad rem inquirunt: Si vero Regina fuerit coronanda, debet super lectorium ex opposito thalamus preparari, ubi cum duabus ad minus puellis, & aliquibus ex Principalibus Imperii tam Ecclesiasticis, quam mundanis &c. Sequuntur mox variæ orationes, inter quas etiam recensetur illa, quæ in hoc nostro §. legitur. Dicemus de iis inferius sequentes nostri Cæremonialis Ordinem, in quo extat peculiaris §. De Coronatione Imperatricis sine Imperatore. Ceterum quod una cum Imperatore con-

sueverit etiam Imperatrix illius conjux Romæ solemniter coronari, præter exemplum Friderici III. & Leonoræ ejus uxoris, quos Nicolaus Papa V. anno MCDLII. Imperiali Corona donavit, docet nos exemplum Caroli IV. qui una cum sua uxore Anna Romæ Coronam suscepit a Cardinali Episcopo Ostiensi Legato Innocentii Papæ VI. qui tunc Avenione sedebat: *Karolus Rex Alemannia & Bohemia, inquit Auctor secundæ Vitæ laudati Innocentii apud Baluzium, ascendens in Italiam Coronam Imperialem de manibus Domini Petri Episcopi Ostiensis ad hoc missi in Basilica S. Petri Romæ in die Sancto Paschæ, seu die v. Aprilis, honorabiliter suscepit, & uxor ejus cum eo.*

II. Sed ut alia exempla omittam, jam longe ante Fridericum III. & Carolum IV. Henricus V. una cum sua uxore Constantia Rornæ in Basilica S. Petri a Cælestino Papa III. anno MCXCI. secunda Feria post Pascha inunctus & coronatus fuit.

fuit. Rem narrat Arnoldus Lubecensis hujus temporis Scriptor Lib. iv. Cap. iv. ubi sic inter alia inquit: *Dominus Papa*, scilicet Cælestinus III. *in die Paschæ solemni ter consecratur*, & *proxima secunda Feria cum summa pacis tranquillitate Dominus Imperator*, nempe Henricus V. *cum Imperatrice*, Constantia scilicet, *benedicitur*, & *coronatur*. Eadem docet Rogerius Hovedenus; postquam enim dixit, Cælestinum in die Paschæ fuisse consecratum, ait, *in crastino Papam venisse ad Ecclesiam S. Petri*, ubi *ante ostium Ecclesiæ supra gradus accepit sacramen-*

tum, ab Henrico scilicet Alemanorum Rege, *quod ipse Ecclesiam Dei, & jura Ecclesiastica fideliter servaret illibata &c.* Deinde introduxit eos, Henricum nempe ipsum, & uxorem ejus Constantiam, *in Ecclesiam*, & *unxit eum in Imperatorem*, & *uxorem suam in Imperatricem*. Narrat deinde cæremoniam, & quidem notatu dignam, qua tum Imperator, tum ejus uxor Coronam auream Imperialem a Pontifice receperunt; sed de hac cæremonia dicemus nos infra loco suo, sicut & de aliis multis, quæ ad eam rem pertinent.

§. XVIII.

De Imperialium insignium delatione ad Altare, & de Missa Pontificis in Coronatione Imperatoris.

His completis, Imperatrix ad suum suggestum revertitur, & Cæsar cum Episcopo Cardinali, & Diaconus ad Pontificem. Diaconi acceptis suis Dalmaticis, & Mitris in manibus, vadunt ad reverentiam Papæ, qui descendens de Sede sua, procedit ad Altare processionaliter (1) more solito, & recipit ad osculum oris, & pectoris tres Presbyteros Cardinales. (2) Deinde facit Confessionem Cæsar ad dexteram Episcopi Cardinalis Assistentis, genuflexo super suum Faldistorium permanente. Facta Confessione, Pontifex accedit ad Altare, osculatur, & incensat, ut alias. Deinde recipit ad osculum oris, & pectoris, primo Cæsarem, deinde tres suos Diaconos Cardinales; & mox ad eminentem Sedem ascendit, & Cæsar ad suum suggestum cum suis Principalibus, & Ministris deducitur. Cum vero Pontifex decessit (3) ab Altari, Ministri Cæsaris afferunt Gladium cum sua vagina, & Cingulo, Coronam, Sceptrum, & Pomum danda suo tempore Imperatori, & Imperatrici, quæ per Sacristam, & Clericum Cæremoniarum locantur super Altare. Interim vero dum Pontifex facit Confessionem, incipit Chorus Introitum, & *Kyrie eleison*. Pontifex vero in Sede eminenti stans sine Mitra legit Introitum, & procedit in Missa, ut alias, usque ad dictam Epistolam, & Graduale; sed post Orationem diei dicit pro ipso Imperatore hanc Orationem.

Oremus.

Deus Regnorum omnium, & Christiani maxime Protector Imperii, da Servo tuo N. Imperatori nostro triumphum virtutis tuæ scienter (4) excolere, ut qui tua constitutione est (5) Princeps, tuo semper munere sit potens.

Pro secreta.

Suscipe Domine Hostias Ecclesiæ tuæ pro salute famuli tui N. supplicantis, & protectione Fidelium populorum antiqua brachii tui operare miracula, ut superatis pacis inimicis, secunda tibi serviat christiana libertate. Per Dominum nostrum Jesum Christum Filium tuum &c.

Post Communionem.

Deus qui ad prædicandum æterni Regni Evangelium, Romanum Imperium præparasti, præstende famulo tuo Imperatori nostro N. arma cælestia, ut pax Ecclesiæ nulla turbetur tempestate bellorum. Per Dominum nostrum Jesum Christum &c.

COMMENTARIUS.

I. **P**eracta sacra unctione tam Imperatoris, quam Imperatricis, juxta antiquum ritum descriptum in Pontificali Ecclesiæ Apamiensis in Syria anno mccciv. exarato, ubi agitur de ritu ad benedicendum Romæ Imperatorem, cui etiam concinunt alii duo Pontificales ms. Codices, Constantinopolitanus annorum circiter DL. & Arelatenfis annorum circiter CDL. antequam Missa celebretur, Romanus Pontifex, *ad Alare B. Petri* dat novo Imperatori nudum Ensem, aliaque Imperialia insignia

sub quibusdam verborum formulis, de quibus dicemus nos infra. Verum juxta præscriptum Romani Ordinis xiv. Cap. cv. & ms. Cæremonialis Codicis Piersanctiani, quibus nostrum hoc Cæremoniale in multis concinit, peractis unctionibus Imperatoris, ejusque conjugis, *ascendit, Rex*, Imperator scilicet coronandus, *ad Altare Beati Petri, ubi Summus Pontifex recipiat eum ad osculum, sicut unum ex Diaconibus, ipseque procedat ad pulpitem, vel ambonem, ubi thalamus constructus de lignis, & orna-*

(1) Ita in Romana editione, in Veneta r. legitur. *supplicabundus*. (2) Ita quoque in editione Romana, in Veneta vero desunt ea verba: *Deinde facit Confessionem Cæsar ad dexteram Episcopi Cardinalis assistentis*. (3) In Veneta legitur, *a latere*. (4) In Veneta, *recolere*. (5) In Veneta, *sit*.

natus de palliis debet ei esse paratus, cum suis Archiepiscopis, & Episcopis, Principibus, & Magistratibus secundum capacitatem loci consistat, Primicerius autem, & Schola Cantorum in Choro ante Altare decantet Introitum, & post Kyrie eleison, & Hymnum Angelicum decantatum, Papa dicit orationem, quæ competit illi diei, & hanc orationem pro ipso Imperatore, Sequuntur tres Orationes in hoc nostro & descriptæ, eademque leguntur in memoratis missis. Pontificalibus, Apamiensi, Constantinopolitano, & Arelateni ab Edmundo Martene allatis Lib. 1. De antiquis Ecclesiæ ritibus, Cap. 14. Ordine VI. qui est ad benedicendum Romæ Imperatorem. Leguntur autem ipsæ orationes in Missa pro Imperatore, sed postquam scilicet ille imperii insignia accepit, Ensem, Sceptrum Diadema; Et tunc Romanus Pontifex induitur vestimentis Pontificalibus, & peragit Missam ordine suo &c.

II. Ceterum in Coronatione Friderici III. servatus est ritus, qui jam invaluerat, ut nimirum inter Missarum solemnities novo Imperatori Imperialia insignia traderentur. Sic enim Æneas Sylvius in Historia laudati Friderici III. post memoratas ejus, & Leonoræ conjugis unctiones subjicit: Quibus peractis, ambo in sua tribunalia transierunt. Pontifex autem rem divinam inchoavit, interque celebrandum diversæ solemnitates a priscis inventæ Patribus servatæ sunt. Sceptum, quo Regia potestas indicatur; Pomum, quod mundi Dominium ostendit; Ensis, qui belli jura demonstrat, per varias vices data. Postremo Corona aurea infulata, pretiosisque cooperta gemmis, Casareo capiti imposita. Imperatrix quoque post Casarem Coronam ex manibus Pontificis accepit, quam conjugis Sigismundi fuisse constabat. Ita ille; sed nos jam infra fusius suis locis de hisce insignibus ordinem nostri Cæremonialis sequentes differemus. Unum vero est, quod hoc loco notabimus, quod

nempe scribit idem Æneas Sylvius de insignibus a Friderico III. in sua solempni ipsius Coronatione adhibitis: Cæsar, inquit, quamvis ornamenta sibi pretio incredibili comparasset, in hanc tamen solemnitate, Pallium, Ensem, Sceptum, Pomum, Coronamque Karoli Magni, ut fama fuit, ex archivis Norenbergensium ad se deferri curaverat, hisque usus est. Datur enim hoc vetustati, ut plus majestatis habere videantur.

III. Pergit mox idem præstantissimus Auctor Æneas Sylvius, eamque opinionem de Imperialibus Karoli Magni insignibus solide egregieque refellit argumento plane insolubili: Verum mihi singula exactius contemplanti, cum Ensem inspexi, non Magni illius primique Karoli, sed Quarti visus est, qui Sigismundi genitor fuit. Nam Leo Bohemicus sculptus in eo visebatur, quo ille tanquam Rex Bohemiæ utebatur. In plebe tamen rumor mansit, Magni Karoli ornamenta fuisse. Ingens enim tanti Viri fortuna, etiam sua vult esse, quæ sunt aliorum Karolorum. Queadmodum Thebanus Hercules aliorum sui nominis Virorum illustria facta ad se se trahit; & Julii Cæsaris multa dicuntur, quæ post eum alii Cæsares patravere, adeo multum est, locum occupasse priorem. Sed nec omitti hic debent quæ idem eruditus Æneas Sylvius ea in re observat: Quod si Karoli Quarti, ait, ut mihi persuadeo, illa fuere, est quod amplius admiremur, tam brevi tempore in tantum crevisse luxuriam, ut vestimenta Karoli rusticana putes, si ad Friderici nostri ditissimam, & ornatissimam compararis. Utinam Veteres tam virtute superarem, quam illis vanitate præstamus. Optima plane sententia, quam utinam multi Viri æque ac mulieres, laici ac sacri homines inteligerent, qui virtutem spernentes, dici nequit, quantum in vestibus luxurientur, contra proprium statum, & repugnante domestica facultate; sed de hoc abusu jam non uno in loco nostrorum Operum abunde diximus.

§. XIX.

De Gladii traditione, & ejus cæremonia.

Dum cantatur Graduale, Cæsar descendens e suggestu venit ad pedes Sanctissimi Domini nostri, deducuntibus eum duobus Diaconibus Cardinalibus paratis, & unus ex Clericis Cameræ ex Altari accipit Gladium cum sua vagina, & illum ad priorem Diaconorum stantem ante Pontificem ad dextram portat, quem Pontifex vagina extractum de manu ipsius Diaconi accipiens, Imperatori ante se genuflexo in dextra manu tradit, ipse cum Mitra sedens, ac dicens: Accipe Gladium desuper Beati Petri Apostoli Corpore sumtum per manus nostras licet indignas, vice tamen, & auctoritate Dei Omnipotentis, & beatorum Apostolorum consecratas Imperialiter tibi concessum, nostræque benedictionis officio in defensionem Sanctæ Matris Ecclesiæ divinitus ordinatum ad vindictam malefactorum, laudem vero bonorum. Et memor esto de quo Psalmista prophetavit dicens: Accingere gladio tuo super femur tuum potentissime; ut in hoc vim æquitatis exercens, per eundem molem iniquitatis potenter destruas, & Sanctam Dei Ecclesiam, ejusque fideles propugnes, atque protegas, neque minus sub fide falsos, quam Christiani nominis hostes execres, ac dispergas; viduas, atque pupillos clementer adjuves, atque defendas; desolata restaures, restaurata conserves, ulciscaris injusta, conserves bene disposita, quatenus hoc agendo, virtutum triumphator gloriosus, justitiæ cultor egregius, cum Mundi Salvatore, cujus typum geris, in nomine ejus sine fine regnare merearis. Qui cum Patre & Spiritu Sancto vivit &c. Finita oratione Diaconus accipit Gladium, & reponit illum in vagina, quam habebat in manu, & simul

simul cum Pontifice, accingit illo Cæsarem, dicente Pontifice: *Accingere Gladio tuo super femur tuum potentissime; & attende, quia Sancti non in gladio, sed per Fidem vicerunt Regna.*

COMMENTARIUS.

I. **T**Radi consueviffe jam olim novo Imperatori Imperialia insignia, docent nos passim antiqui Libri Pontificales, in quorum tamen nonnullis, quales sunt Romanus Ordo XIV. Cap. cv. & ut alios omittam, ms. Cæremonialis Codex Pierfanctianus, cum lecta fuerit Epistola, & Graduale cantatum, Imperator procedit processionaliter ad Altare, ubi Summus Pontifex imponit ei Mitram Clericalem in capite, ac super Mitram Imperatorium Diadema, dicens, ut sequitur, Accipe signum gloriæ, Diadema Regni, Coronam Imperii &c. Deinde Sceptrum, & Pomum aureum &c. Sed non desunt alii antiqui Codices Pontificales, juxta quorum præscriptum, Imperatori primum traditur Gladius, seu Ensis; uti constat ex ms. Pontificalibus, Apamiensi in Syria anno mcccxiv. scripto, & Constantinopolitano annorum circiter xl. quorum primum ita inquit: *Deum vero ascendit, Imperator scilicet, sursum ad Altare B. Petri, ibique Romanus Pontifex dat ei nudum Ensem, sic dicens: Accipe Gladium Imperialem ad vindictam quidem malorum, laudem vero bonorum, in nomine Patris, & Filii, & Spiritus Sancti, Amen; & dat ei osculum: Accingere Gladio tuo super femur tuum potentissime, in nomine Patris, & Filii, & Spiritus Sancti, Amen; & dat ei osculum. Ipse autem Imperator acceptum Gladium de manu Pontificis primum vibrat, & statim in vaginam reponit.* Juxta præscriptum Pontificalis Constantinopolitani primum etiam Ensis Imperatori

traditur hunc in modum: *Interpolata ergo cancellena, coram Altari B. Petri præsentatur inunctus Domino Papæ in supereminenti specula residenti. Is itaque tunc ad ipsum Altare descendit, & Gladium vaginatum de Altari sumit, inuncto tradit, curam intelligens Imperii totius in Gladio, sic dicens: Accipe Gladium desuper B. Petri Corpore sumtum. His verbis expletis, accingit illi Ensem, iterans ita dictum: Accingere Gladio tuo super femur &c. Mox ut coronandus accinctus Ense fuerit, eximit eum de vagina, viriliterque ter illum vibrat, & vagina continuo recommendat.*

II. Ordo Romanus XIV. in quo, uti dictum est, post lectam Epistolam, & Graduale cantatum Summus Pontifex novo Imperatori primum imponit Mitram Clericalem in capite, ac super Mitram Imperatorium Diadema; monet tamen, sciendum illud esse, quod in aliquibus Libris primo datur Gladius, postea Diadema; sed dato Gladio ponitur ista Rubrica: *Mox autem ut coronandus accinctus Ense fuerit, eximit eum de vagina, & viriliter ter eum vibrat, & vagina continuo recommendat.* Verba hæc plane eadem sunt, quæ in paulo superius allato a nobis Pontificali Constantinopolitano leguntur. Ceterum formula traditionis Gladii tamen brevis sit in ms. Pontificali Apamiensi, cujus verba supra attulimus, prolixior tamen est, & quidem ut in hoc nostro §. legitur, in citato Romano Ordine XIV. & in aliis multis Cæremonialibus Libris.

§. XX.

De traditione Pomi, & Sceptri.

Accinctus Gladio Imperator, & Miles B. Petri effectus, surgens evaginat Gladium, ter illum vibrat, deinde reponit in vagina, & iterum genuflectit, cui Pontifex Pomum de Altari, & Sceptrum, ut de Gladio diximus, ad eum portata, in manu dextra Pomum, & in sinistra Sceptrum ponit, dicens: *Accipe Virgam virtutis, atque veritatis, qua intelligas te obnoxium mulcere pios, terrere reprobos, errantes viam docere, lapsis manum porrigere, disperdere superbos, & relevare humiles. Et aperiat tibi ostium Jesus Christus Dominus noster, qui de semetipso ait: Ego sum ostium, per me si quis introierit, salvabitur. Qui est clavis David, & Sceptrum Domus Israel; qui aperit & nemo claudit; claudit & nemo aperit. Sitque tibi Auctor, qui eduxit vincitum de domo carceris sedentem in tenebris, & umbra mortis, & in omnibus sequi merearis eum, de quo David Propheta cecinit: Sedes tua Deus in seculum seculi, virga æquitatis virga Regni tui. Et imitando ipsum, diligas justitiam, & odio habeas iniquitatem, quia propterea unxit te Deus tuus ad exemplum illius, quem ante secula unxerat oleo exultationis præ participibus suis Jesum Christum Dominum nostrum, qui cum eo vivit & regnat Deus &c.*

COMMENTARIUS.

I. **D**ato Gladio, mox ut eo fuerit Cæsar accinctus, debere eum Cæsarem ipsum eximere de vagina, & viriliter ter eundem vibrare, & in vagina continuo reponere, jam diximus ex præscripto non modo

Romani Ordinis XIV. verum etiam ex ms. Constantinopolitano Pontificali annorum circiter xl. & Pontificali Apamiensi anno mcccxiv. exarato, in quo tamen deest vox illa *ter*. Sic enim inquit: *Ipse autem Imperator acceptum Gladium de manu*

nu Pontificis primum vibrat, & statim in vaginam reponit. Id quod ait hic noster §. accinctum Gladio Imperatorem fieri Militem Beati Petri, docent ms. ipsum Pontificale Constantinopolitanum, Romanus Ordo xiv. Pierfantianus ms. Codex, & alii plures Libri Cæremoniales, in quibus tamen illud desideratur, quod de traditione Pomi, & Sceptri in hoc præsentī §. edicitur. Porro mentio fit traditionis Sceptri in Apamiensi Pontificali, & quidem post traditum Ensem, de quo supra dictum est: *Consequenter*, inquit, *dat ei Sceptrum dicens*: Accipe Sceptrum Regni, virgam videlicet virtutis, & æquitatis, quo intelligas mulcere pios, & terrere superbos, virga æquitatis, virga Regni tui, in nomine Patris, & Filii, & Spiritus Sancti. Amen.

II. Neque vero Sceptri solum, sed & Pomi traditio desideratur in multis Cæremonialibus Libris, quos vidi. Mentionem tamen Pomi facit ms. Codex Pierfantianus; postquam enim

descripsit formulam, qua Diadema Regni, seu Corona imponitur, ita mox subdit: *Deinde Pomum aureum tradit ei*. Sceptrum æque, ac Pomum una cum aliis Imperialibus insignibus tradita fuisse Friderico III. Imperatori in solemnī sua ipsius Coronatione, tradit Æneas Sylvius in Historia ejusdem Friderici, ubi etiam eorundem insignium significationem docet, sic inquit: *Pontifex autem rem divinam inchoavit, interque celebrandum diversæ solemnitates a priscis inventæ Patribus servatæ sunt. Sceptrum, quo Regia potestas indicatur; Pomum, quod mundi dominium ostendit; Ensis, qui belli jura demonstrat, per varias vices data*: Significationem quoque Imperialis Coronæ tradit, de qua nos infra dicemus. Ceterum quid ipsa Imperialia Insignia denotent, sat docere abunde nos possunt verborum antiquæ formulæ, quibus illa traduntur, quæque in hoc Cæremoniali, & in aliis antiquioribus leguntur.

§. XXI.

De Imperialis Coronæ traditione.

Demum Imperialem Coronam cum sua Tiara allatam sibi ex Altari, ut de aliis diximus, imponit super ejus caput, dicens: *Accipe signam gloriæ, & Diadema Regni, Coronam Imperii. In nomine Patris & Filii, & Spiritus Sancti, ut spreto antiquo hoste, spretisque contagiis vitiorum omnium, sic justitiam, misericordiam, & judicium diligas; & ita juste, pie, & misericorditer vivas, ut ab ipso Domino nostro Jesu Christo in consortio Sanctorum æterni Regni Coronam percipias, qui cum Patre &c.* Et mox Imperator osculatur pedes Pontificis, & surgens discingitur Gladio, eumque armigero suo tradit. Et ipse cum Corona, Sceptro, & Pomo procedens, ab illis duobus Diaconibus ducitur ad sedem Imperialem paratam sibi ad dextram Pontificis inter Pontificem, & priorem Episcoporum Cardinalium; quæ sedes altior erit sedibus Cardinalium, & humilior Papali sede, habebitque aureum pannum post tergum, & parvum scabellum ad pedes, & ibi sedebit, quousque Imperatrix coronetur.

COMMENTARIUS.

I. **P**Ræ ceteris Coronationis Imperatorum cæremoniis, antiquissima est haud dubie cæremonia illa, de qua agitur in hoc §. imponendi scilicet Coronam Imperialem novo Imperatori. Mentionem passim faciunt ejus Ritus antiqui æque, ac recentiores Scriptores, Codicesque omnes Cæremoniales, ubi enarrant ritus coronandi novos Imperatores. Certe, ut ex Ademaro, & Eginhardo in Vita Caroli Magni scribit Pagius in Vita Leonis III. Carolo ipsi Magno laudatus Pontifex Coronam imposuit, & quidem anno dccc. in Basilica Vaticana die Natalis Christi. Teste Thegano, profectus in Galliam Stephanus V. & honorifice exceptus a Ludovico Pio Rhemis, ibidem ante Missarum solemniam coram Clero, & omni populo consecravit eum, & unxit in Imperatorem, & Coronam auream mira pulchritudinis, & pretiosissimis gemmis ornatam, quam secum apportaverat, posuit super caput ejus, & Irmingardam Reginam appellavit Augustam, & posuit Coronam auream super caput ejus.

II. Notabilis profecto est cæremonia illa, qua Cælestinus Papa III. anno MCXCI. Feria II. Paschatis in Basilica S. Petri Henricum VI. Alemanniæ Regem, & uxorem ejus coronavit. In-

de enim palam fit, quanta fuerit tunc temporis, & in Pontifice auctoritas, & in Imperatore humilitas, Cæremoniam narrat Rogerius Hovedenus hunc in modum: *Sedebat Dominus Papa in Cathedra Pontificali tenens Coronam auream Imperialem inter pedes suos, & Imperator inclinato capite recepit Coronam, & Imperatrix similiter de pedibus Domini Papæ, Dominus autem Papa percussit cum pede suo Coronam Imperatoris, & dejecit eam in terram, significans, quod ipse potestatem ejiciendi eum ab Imperio habet, si ille demeruerit. Sed Cardinales statim arripientes Coronam imposuerant eam capiti Imperatoris*. Ita Rogerius, cujus testimonium utpote Auctoris tunc temporis viventis eloquentius est ad probandam hujus facti veritatem, quam aliorum omnium silentium ad eam denegandam; uti notat Pagius in Vita laudati Pontificis Cælestini III. Num. iv. Ceterum quid amplius in eo facto mirari debeat, interritum Pontificis animum, an demissionem Imperatoris, se haud fatis scire fatetur inter alios Scriptores doctissimus Edmundus Martene Lib. II. De antiquis Ecclesiæ ritibus, Cap. ix. Num. xii. in fine.

III. Quod formulam verborum spectat, qua novo Imperatori Imperialis Corona imponetur,

tur, cautum est quidem ex ms. Codice Gemundenſi, quem recenset memoratus Martene loco citato, Ordine 111. ut qui Imperatorem benedicit, post Consecrationem, seu Orationem, quæ incipit, *Prospice Omnipotens Deus*, legiturque in Romano Ordine xiv. & in aliis etiam quibusdam Pontificalibus Libris, *mittat Pontifex Coronam auream super caput ejus, his verbis*: Per eum, cui est honor, & gloria per infinita secula seculorum, Amen. Similis pene Ordo habetur ad benedicendum Imperatorem in ms. Codice annorum circiter DCL. Bibliothecæ Regis Francorum, in quo tamen dum Corona aurea benedicto Imperatori imponitur, hæc verba dicenda præscribuntur: *Accipe Coronam a Domino Deo tibi prædestinatam. Habeas, teneas, possideas, ac filio tuo post te in futurum ad honorem Deo auxiliante derelinquas*. In mss. Pontificalibus, Apamienſi anno MCCXIV. scripto, Constantinopolitano annorum circiter DL. & Arelatenſi annorum CDL. formula in traditione Coronæ eadem fere est, ac illa in hoc §. nostro descripta, nempe, *Accipe signum gloria, in Nomine Patris, & Filii, & Spiritus Sancti, ut spreto &c*. Legitur quoque eadem formula in Romano xiv. Ordine, in ms. Codice Pierſanctiano, & in aliis passim Cæremonialibus, in quibus etiam edicitur, quod in nostro §. præscriptum est de cæremonia ab Imperatore servanda post acceptam Coronam Imperialem: *Illico procedens nuper coronatus osculatur Apostolicos pedes; quibus gloriosissime gestis, Apostolicus ad eminentiam redeat specula tribunalis, & Imperator ad Faldistorium scandit, ei in amplo gradu sub Apostolici dextera præparatum. Qui coronatus incedens, Pomum in dextera manu portat, in sinistra Sceptrum, & sic ad thalamum redeat*. Verba sunt citati Romani Ordinis, & ms. Codicis Pierſanctiani.

IV. Porro Auctor est Jannottus Manettus Lib. II. pag. 941. Nicolaum V. Pontificem, Ecclesiasticarum cæremoniarum solertissimum observatorem, post impositum Friderici III. capiti Diadema, post Regium Sceptrum, & pilam auream ei traditam, post aurei Gladii præcinctiorem, hanc super eum Orationem dixisse: *Omnipotens, & sempiternus Deus, qui ad prædicandum æterni Regni Evangelium, Romanum Imperium præparaſti, præſta, quaſumus, huic Friderico Tertio novello Imperatori fideli famulo tua arma caeleſtia, ut superatis barbaris, & inhumanis gentibus, ac Catholicæ Fidei inimicis, securus, & intrepida tibi ſerviat humana libertas*. Concinit hæc Oratio ei Orationi, quæ ex præscripto nostri Cæremonialis dicitur post Communionem Miſſæ illius, quæ celebratur die, quo coronatur Imperator, uti videre est supra in §. xviii. Addidit tamen quædam ei Orationi Nicolaus Papa V. suorum temporum conditioni accommodata. Ceterum tradit idem Manettus Fridericum Imperatorem tunc respondiſſe hac sua Oratione: *Exaudi, quaſumus, Omnipotens, & sempiternus Deus, & devotas preces Nicolai tui Summi Pontificis, ut cuncti Eccleſiaſtici, & ſeculares populi, Prælati, Republica, & Principes, omnibus Chriſtiana Fidei hoſtibus penitus abolitis, atque ad ultimam internicionem uſque deletis, liberius ſervire, atque efficacius famulari valeant, & per hunc certum, ac ſecurum omnium Fidelium noſtrarum gentium famulatum, cuncti Chriſtiani homines digna utriusque, & præſentis, & futura vita præmia conſequi mereantur*. Hanc precum formulam, quam in Vita Nicolai Papæ V. deſcripſit Georgius ad annum MCDLII. Num. vi. in fine, tum etiam recitandam forte cenſuit Pontifex, ut preces ipſas temporum conditioni accommodaret, uti dictum fuit.

§. XXII.

De Coronatione Imperatricis.

Imperatrix vero ducetur ab eiſdem ad Pontificem, qui ſurgens ſine Mitra ſuper eam genuflexam dicit hanc Orationem.

Deus, qui ſolus habes immortalitatem, lucemque habitas inacceſſibilem, cujus ſapientia in ſua diſpoſitione non fallitur: qui feciſti ea, quæ futura ſunt, & vocas ea quæ non ſunt, ſicut ea quæ ſunt: qui ſuperbos æquo moderamine de principatu dejiciſ, atque humiles dignanter in ſublime provebis: ineffabilem miſericordiam tuam ſupplices exoramus, ut ſicut Heſter Reginam Iſraeliticæ cauſa ſalutis de captivitatis ſuæ compede ſolutam, ad Regis Aſſueri thalamum, Regniſque ſui conſortium tranſire feciſti: ita hanc famulam tuam N. humilitatis noſtræ bene & diſtione Chriſtiana plebis ſalutis gratia ad dignam ſublimemque Imperatoris noſtri copulam, & Imperii ſui participium tranſire concedas, & ut in Imperialis fœdere conjugii ſemper permanens pudica, proximam virginitati palmam continere queat, tibiſque Deo vero, & vivo, in omnibus, & ſuper omnia jugiter placere deſideret, & te inſpirante, quæ tibi placita ſunt, toto corde perficiat. Per Chriſtum noſtrum. Amen.

Deinde ſedens cum Mitra accipit Coronam Imperialem de manu prioris Diaconorum Cardinalium ex Altari allatam, & imponit ſuper illius caput, dicens: *Officio noſtræ indignitatis in Imperatricem ſolemniſter benediſta, accipe Coronam Imperialis excellentiæ, quæ licet ab indignis, Epiſcopalibus tamen manibus, capiti tuo imponitur, ut ſicut auro & gemmis redimita entes, ita & interius auro ſapientiæ, virtutumque gemmis te Omnipotens decorari concedat, quatenus poſt occaſum huius ſæculi cum prudentibus Virginibus Sponſo perenni Domino noſtro Jeſu Chriſto digne, & laudabiliter occurrens, Regni Cæleſtis Aula ingredi merearis januam, eodem Domino noſtro Jeſu Chriſto au-*

To.I.

Cc

xilian-

allante, qui cum Patre &c. Et coronata statim osculatur pedes Pontificis, & surgens reducit tam ipsa, quam Cæsar simul ad sua suggesta, ubi in sedibus sibi paratis locantur.

COMMENTARIUS.

I. **R** Itum fuisse antiquum, ut una cum Imperatore conjux ejus Imperatrix a Romano Pontifice coronaretur, inter alia, vetera exempla nos docent Irmengardæ, & Constantiæ, quarum prior una cum Ludovico Pio Imperatore ejus Viro a Stephano V. anno MCCXVI. altera quæ uxor Henrici V. fuit, a Cælestino III. anno MCXCI, uti non uno in loco jam superius notavimus, solemniter ritu coronatæ fuerunt. Sicut autem in priscis æque, ac recentioribus Libris Pontificalibus præscripti sunt ritus coronandi Romæ Imperatores, ita etiam Imperatrices. Ut autem allos omittam, agit de Coronatione Imperatricis Romanus Ordo XIV. Capite CVI. & ms. Codex Pierfanctianus: *Si vero Regina fuerit coronanda, inquit, debet super lectorium ex opposita thalamus præparari, ubi cum duabus ad minus puellis, & aliquibus ex Principibus Imperii, & Ecclesiasticis, quam mundanis resideat.* Describunt mox orationem, quam etiam ad illius ingressum in Ecclesiam dicendam præscribit ms. Codex Pontificalis Constantinopolitanus annorum circiter DL. incipitque, *Omnipotens sempiterne Deus fons, & origo totius bonitatis &c.* ut infra in §. xxx. ac deinde cæremoniam præscribunt, quæ plane eadem est, ac ipsa, quæ in hoc nostro §. præscripta est. Sic ergo inquit: *Post Coronationem Imperatoris* (ita legendum, ut in Codice Pierfanctiano, non autem *Imperatricis*, ut habet citatus Ordo Romanus apud Mabillonium) *deducatur Imperatrix scilicet, ad Altare ante Summum Pontificem amicta regalibus indumentis, & Summus Pontifex det super eam hanc benedictionem, dicens: Deus, qui solus habes immortalitatem &c.* ut in nostro §.

II. Quod vero impositionem Coronæ spectat, & verborum formulam, quæ in ea imponenda dicitur, memoratus Romanus Ordo XIV. aliique Cæremoniales Libri sic ipsam præscribunt: *Deinde Summus Pontifex ei, nempe Imperatrici, Mitram imponat, ita quod cornua Mitra sint a dextris, & a sinistris, & super Mitram Coronam imponat, dicendo, nempe formulam, quæ in hoc nostro §. & in aliis passim Pontificalibus Libris legitur, ab erudito Martene allatis, Officio nostræ indignitatis &c.* Sane quod ajunt Ordo Romanus XIV. & ms. Pierfanctianus Codex de Mitra una cum Corona capiti Imperatricis imponenda, respondet ritui Coronationis Imperatoris, quæ quidem juxta eosdem Codices ita peragitur: *Summus Pontifex, in-*

quit, imponit ei, nempe Imperatori, Mitram Clericalem in capite, ac super Mitram Imperatorium Diadema &c. Mitrae usus primo ex laicis Principibus concessus ab Alexandro Papa II. fuit Uratislao Bohemiæ Duci de Sede Apostolica benemerito, idque constat ex testimonio Gregorii Papæ VII. Lib. I. Epistola xxxviii. ad ipsum Uratislaum data, ita agentis: *Longa jam temporis intervalla transacta sunt, ex quo Nobilitas tua B. Petro Apostolorum Principi non modicæ devotionis animum spondit, & studium, & tibi in Apostolica Sede inter ceteros Principes larga benignitas, præ multis etiam singularis, & egregia fuit astricta charitas. Cujus rei fidem, & indicium ex benevolentia Domini, & Antecessoris nostri Alexandri Papæ satis percipisse potes, qui petitionibus tuis non unquam sine sua, & filiorum suorum Sanctæ Romanæ Ecclesiæ sollicitudine, & labore condescendit, & ad signum intimæ dilectionis, quod laicæ personæ tribui non consuevit, Mitram, quam postulasti, direxit.* Ita Gregorius Papa VII. qui & confirmat, quod præstiterat Alexander II. Pontifex.

III. Hoc exemplum sequutus est Lucius Papa II. de quo Romani in Epistola ad Conradum apud Ottonem Frisingensem Lib. I. *De gestis Frederici I.* Cap. xxviii. ita scribunt: *Concordiam inter Siculum & Papam hujusmodi esse accepimus, Papa concessit Siculo Virgam, & Annulum, Dalmaticam, & Mitram, atque Sandalia.* Mitram etiam Regi Aragoniæ concessit Innocentius III. uti videre est in gestis ejusdem Pontificis pag. 135. *Regalia, inquit, insignia universa, Mantum videlicet, & Colobium, Sceptum, & Pomum, Coronam, & Mitram ad opus tuum non minus pretiosa, quam speciosa fecimus præparari, & ea liberaliter tibi donavimus in signum gratiæ specialis.* Si itaque teste Innocentio III. Pontifice, inter regalia insignia, Mitra etiam computatur, non ergo mirum, si Imperatoribus in sua ipsorum Coronatione Mitra etiam imponeretur. Ceterum tamen in Coronatione Imperatoris juxta nostri Cæremonialis præscriptum §. XXI. recitatum, Pontifex *Imperialem Coronam cum sua Tiara allatam sibi ex Altari... imponit super ejus caput; ubi tamen in hoc §. de Coronatione Imperatricis agit, Coronæ solum Imperialis meminit; Deinde sedens cum Mitra, Pontifex scilicet, accipit Coronam Imperialem de manu prioris Diaconorum Cardinalium ex Altari allatam, & imponit super illius, nempe Imperatricis, caput, dicens &c.*

§. XXIII.

De Laudibus Imperatori cantandis.

Sedentibus Imperatore, & Augusta in Sedibus cum Imperialibus ornamentis, prior Subdiaconorum Apostolicorum cum aliis Subdiaconis, & cum Capellanis Aulae Imperialis descendit ad Confessionem B. Petri, alta voce simul cum ipsis facit Laudes Imperatori, dicens: *Exaudi Christe, Scrinarii vero Urbis cum Cappis sericeis stantes superius apud Chorum respondent: Domine Federice invictissima Romanorum Imperator, &*

sem-

semper Augusto salus, & victoria. Qua laude tertio repetita, prior Diaconorum cum suis, tribus vicibus dicat: *Salvator Mundi*; & Scriniarii vicissim respondeant: *Tu illum adjuva*. Et deinde iste cum suis, duabus vicibus dicat: *Sancta Maria*; & illi vicissim respondeant: *Tu illum adjuva*; & sic deinceps. *S. Michael. S. Gabriel. S. Raphael. S. Joannes Baptista. S. Petre. S. Paule. S. Andrea. S. Stephane. S. Laurenti. S. Vincenti. S. Silvester. S. Leo. S. Gregori. S. Benedicte. S. Basili. S. Sabba.* (1) *S. Maria Magdalena. S. Agnes. S. Cecilia. S. Lucia.*

COMMENTARIUS.

I. **A**ntiquissimæ plane sunt Laudes in Coronationibus Imperatorum a Romano Pontifice peractis. Ubi Leo III. Papa anno DCCC. die Natalis Domini Carolo Magno, ob egregia illius in Romanam Ecclesiam, Christique Vicarios merita, capiti Coronam imposuit in Basilica Vaticana, a populo ter unanimi voce acclamatum est: *Carolo piissimo Augusto a Deo coronato, Magno, Pacifico Imperatori vita & victoria*; antea enim dicebatur Patricius Romanorum. Sed & post Laudes Carolus ipse a Domino Apostolico more antiquorum Principum adoratus est, salutatus scilicet, atque ablato Patricii nomine, Imperator, & Augustus est appellatus; uti produnt Ademarus, & Eginhardus in Caroli Magni Vita. Plura scitu digna de Patriciatu Caroli Magni docet in suo egregio Opere, De Patriciis, eruditissimus amicus noster Octavianus Gentilius. Hic tandem subita, & immatura morte e vivis abreptus diem suum clausit extremum die 1. Junii hujus anni MDCCCL. circa mediam noctem non sine animi mei mœrore; plurimi enim eum faciebam, præsertim quod unus ipse ex primis adolescentibus fuisset, qui Academiæ Conciliorum a me anno MDCCXXXIV. in Domino S. Hieronymi Charitatis institutæ nomen dederit. Fuit Gentilius Vir optimæ indolis, magnique a Viris Summis habitus. Cæterum quod Laudes spectat sub verborum formula in hoc nostro §. probari posset & ex aliis Imperatorum exemplis, & antiquis Pontificalibus Libris, quos recenset Edmundus Martene Libro II. De antiquis Ecclesiæ ritibus, Cap. IX. Ordine III. & seqq.

II. Porro juxta ms. Codicem Gemundensem, ubi agit de benedictione ad ordinandum Imperatorem secundum Occidentales, expleta Oratione a Pontifice, quam habuit in traditione Gladii: *duo Diacones, sive Cantores, respondente illis Schola Scriniariorum*, pronunciabant Laudes hoc modo: *Exaudi Christe*. Respondebat Schola: *Domino nostro ill. a Deo decreto Summo Pontifici, & universali Papæ vitam*. Cantores: *Exaudi Christe*. Respondebat Schola similiter: *Exaudi Christe*. Item Cantores: *Salvator mundi*. Respondebat Schola: *Tu illum adjuva*. Cantores: *Exaudi Christe*. Respondebat Schola: *Domino nostro ill. Augusto a Deo coronato, Magno, & Pacifico Imperatori vitam*. Item Cantores per tres vices: *S. Maria*. Respondebat Schola: *Tu illum adjuva*. *S. Maria*. Respondebat Schola: *Tu illum adjuva*. Cantores: *Exaudi Christe*. Respondebat Schola: *Tuisque præcellentissimis filiis Regibus vitam*. Item Cantores per tres vices: *S. Petre*. Respondebat Schola: *Tu illos adjuva*. Iterum Cantores: *Exaudi Christe*. Respondebat Schola: *Exercitui Francorum, Romanorum, & Teutonicorum vitam*, To. I.

& victoriam. Iterum Cantores: *S. Theodore*. Respondebat Schola: *Tu illos adjuva*. Iterum Cantores: *Christus vincit, Christus regnat, Christus imperat*. Respondebat similiter: *Christus vincit, Christus regnat, Christus imperat*. Cantores: *Christus vincit, Christus regnat, Christus imperat*. Respondebat similiter, *Rex Regum, Christus vincit, Christus regnat*. Respondebat similiter, sed tantum semel: *Rex noster, Christus vincit, Christus regnat*. *Spes nostra Christus vincit. Gloria nostra Christus vincit. Misericordia nostra Christus vincit. Fortitudo nostra Christus vincit. Victoria nostra Christus vincit. Liberatio & redemptio nostra Christus vincit. Victoria nostra Christus vincit. Anima nostra Christus vincit. Murus noster inexpugnabilis Christus vincit. Defensio nostra, & exaltatio Christus vincit. Lux, via, & vita nostra Christus vincit. Ipsi soli imperium, gloria, & potestas per immortalia secula. Amen. Ipsi soli virtus, fortitudo, & victoria per omnia secula seculorum. Amen. Ipsi soli honor, laus, & jubilatio per infinita secula seculorum. Amen.* Similis pene Ordo habetur in ms. Codice Bibliothecæ Regis Francorum annorum circiter DCL. ut docet idem Martene; ex iisque addiscimus, in solemni Imperatorum Coronatione, Laudes non modo ipsi Imperatori fuisse decantatas, sed etiam Romano Summo Pontifici, & primum quidem huic, deinde vero illi.

III. Aliis Cæremonialibus Libris omissis, audiendus est nunc Ordo Romanus XIV. Capite CV. ubi ea Laudum cæremonia ita præscripta est. Postquam dixit, ut *Coronatus*, Imperator scilicet, *incedens Pomum in dextera manu portet, in sinistra Sceptum, & sic ad thalamum redeat*, hunc in modum statim subjicit: *Ipsoque ibi cum suis Principibus consistente, prior Subdiaconorum cum Subdiaconis Romanæ Curia, & Capellanis Aula Imperialis ad pectorale dextrum, ad cancellum scilicet, ut notat Mabillonius, ante Crucifixum argenteum Laudem Imperatori alta voce dicant hoc modo: Exaudi Christe. Scriniarii vero Urbis sericis cappis induti ante pectorale consistentes in Choro respondeant: Domino N. invictissimo Romanorum Imperatori semper Augusto salus, & victoria. Qua Laude tertio repetita, prior Subdiaconorum cum suis, tribus vicibus dicat: Salvator Mundi. Et Scriniarii vicissim respondeant: Tu illum adjuva: Deinde iste cum suis, duabus vicibus dicat: S. Maria; & illi vicissim respondeant: Tu illum adjuva: & sic deinceps, Sanctæ Michael &c. ut supra. Quibus finitis, isti bis cantent, Kyrie eleison; ac deinde simul omnes dicant. Kyrie eleison. Eadem legere in ms. Codice Pierfantiano.*

C c 2

§. XXIV.

(1) Ita in editione Romana. In Veneta 1. & Colonienfi, *S. Sabba*, & *S. Maria Magdalena* desiderantur.

§. XXIV.

De Oblationibus Imperatoris, & Imperatricis in Missa, & eorum Communione.

Post hæc omnibus ad locum suum revertentibus, cantatur *Alleluja*, vel *Tractus*, & deinde *Evangelium*, *Credo*, & *Offertorium*. Deinde *Imperator*, & *Corona*, & *Manto* depositis, sine *Sceptro*, aut *Pomo*, descendit, & ad Pontificis pedes aurum offert quantum sibi placet; & similiter post eum facit *Imperatrix*, quæ deinde non revertitur ad ad suggestum, sed procumbit super *Faldistorium* a dextra parte *Altaris* sibi paratum in loco, ubi non impediat credentiam, & ibi expectat usque ad *Communionem*. *Imperator* vero Pontificem ad *Altare* descendentem sequitur, & illi in locum *Subdiaconi Calicem*, & *Patenam* cum *Hostiis* offert, deinde aquam infundendam vino; & retrahens se ad partem dextram, stat usquequo Pontifex ad *Sedem* eminentem communicaturus revertatur, quem *Imperator* sequitur; & ab ejus manibus ipse primo, deinde *Augusta* sacram *Corporis Christi Communionem* sumant, postquam Pontifex cum *Diacono*, & *Subdiacono* communicaverint. Nam *Subdiaconus* postquam cum *Diacono* communicavit de *Corpore*, & *Sanguine Christi*, accipit de manu *Diaconi* apud *Altare* cum *circulis*, & cæremoniis consuetis duas *Hostias* consecratas pro *Imperatore*, & *Augusta*, & eas ad Pontificem portat; & percepto *Sacramento*, *Imperator* quidem Pontificis faciem osculatur, *Augusta* vero manum; & descendentes ad *Altare*, de manu *Diaconi* vinum purificationis sumunt, & discedunt (1) ambo ad suos suggestus, ibique resumunt *Imperialia* signa. Poterit tamen Pontifex, si ei videbitur, super *Imperatorem* ante se genuflexum immediate, postquam illum cum *Augusta* communicaverit, *infrascriptas* *Orationes* dicere, videlicet.

Respice quæsumus Omnipotens Deus serenis obtutibus hunc gloriosum famulum tuum N. ut sicut benedixisti Abraham, Isaac, & Jacob, sic illi largiaris benedictionem spiritalis gratiæ, eumque plenitudine tuæ potentiæ irrigare, atque profundere digneris, ut tribuas ei de rore Cæli, & de pinguedine terræ abundantiam frumenti, vini, & olei, & omnium frugum opulentiam; & ex largitate divini muneris longæva tempora, ut illo regnante sit sanitas corporis, Imperii pax inviolata sit in Regno, & dignitas gloriosa regalis Palatii maximo splendore Regiæ potestatis oculis omnium fulgeat, luceque clarissima coruscare, atque splendescere quasi splendidissimi fulgoris maximo perfusa lumine videatur. Tribue ei omnipotens Deus, ut sit fortissimus Protector, & Consolator Ecclesiarum, atque Cænobiorum Sanctorum, maxima (2) pietate regalis munificentiæ; atque ut sit fortissimus triumphator hostium ad opprimendas rebelles, & paganas Nationes; sitque suis inimicis facie terribilis maxima fortitudine regalis potentiæ; Optimatibus quoque, ac præcelsis Proceribus, & fidelibus sui Regni sit munificus, amabilis, & pius; & ab omnibus timeatur, & diligatur; & post gloriosa tempora, atque felicia vitæ præsentis gaudia, in perpetua beatitudine habitare mereatur. Per Dominum nostrum Jesum Christum &c.

Benedic quæsumus Domine hunc Principem nostrum N. quem ad salutem populi nobis a te credimus esse concessum; fac annis esse multiplicem, salubri corporis robore vigentem, ad senectutem optatam pervenire felicem. Sit nobis fiducia obtinere gratiam populo, quam Aaron in Tabernaculo, Heliseus in fluvio, Ezechias in lecto, Zacharias vetulus impetravit in Templo. Sit illi regendi auctoritas, qualem Josue suscepit in Castris, & David (3) sumisit in præliis, Petrus accepit in clave, Paulus est usus in dogmate. Et ita Pastoris officium perficiat in Christi ovile, sicut Isaac perfecit in fruge, & Jacob est dilatatus in grege. Quod ipse præstare dignetur, qui cum Patre &c. Deus Pater æternæ gloriæ sit adjutor tuus & protector, & Omnipotens bene & dicat tibi; preces tuas in cunctis exaudiat, & vitam tuam in longitudinem dierum adimpleat; thronum Regni jugiter firmet; & gentem, populumque tuum in æternum conservet, & inimicos tuos confusione induat; & super te sanctificatio Christi floreat; ut qui tribuit in Terris Imperium, ipse in Cælis conferat præmium; qui vivit & regnat in secula seculorum. Amen.

C O M M E N T A R I U S.

I. **A**ctum jam a nobis iterum atque iterum in nostris Operibus fuit de Oblationum ritu, quæ a priscis Fide-

bus solitæ offerri fuerunt in Missa; operæ tamen pretium censemus de iis hoc loco Oblationibus aliquid dicere, quæ ex antiquo Ecclesiæ ritu,

(1) Ita in Romana editione, in Veneta vero 1. descendant. (2) Ita & recte in Ordine Romano XIV. Tomo 2. Musei Italici apud Mabillonium pag. 401. In editione Cæremonialis legitur, maxima pietas; in Veneta, & Colonienſi editione maxima pietatis. (3) Ita in Veneta 1. editione, & Colonienſi; in Romana vero Gedeon.

cujus, & priscae Historiae, & Cæremoniales Libri mentionem faciunt, ab Imperatoribus in sua ipsorum Coronatione fieri solent. Mandat sane Romanus Ordo XIV. Cap. cv. cui concinit ms. Cæremonialis Codex Pierfantianus, & hic noster §. ut *Evangelio decantato, Imperator, Corona, & Manto depositis, accedat ad Summum Pontificem, & offerat ad pedes ejus aurum, quantum sibi placuerit.* Rursus Cap. cvi. ubi agit de Coronatione Imperatricis, mandat, ut *coronata reducat ad thalamum, & post Evangelium ducatur ad oblationem Summo Pontifici exhibendam.* Servatum hunc olim fuisse ritum in Coronatione Henrici Luxemburgici anno Domini mcccxi. & Caroli IV. anno mccciv. docet ad ipsos annos Raynaldus, qui etiam ad prædictum annum mcccxi. Litteras Clementis V. describit, qui Avenione sedens, Henrici Coronationem Cardinali Ostiensi, & aliis commiserat. Sic autem ille inter alia in suis Litteris inquit: *Decantato Evangelio Rex coronandus offerat aurum, quod ad pedes Romani Pontificis consuevit offerri, ad pedem majoris Altaris, quod vos omnes nostro recipiatis nomine Cardinales.* Ceterum in Coronatione Caroli V. Bononiæ anno MDXXX. die xxiv. Februarii, Romano prorsus ritu peracta per Clementem VII. Pontificem, Carolus ipse inter Missarum solemniam præbuit Papæ xxx. aureos, quorum quilibet erat ponderis quatuor ducatorum auri largorum, aut ait Apostolicus Cæremoniarius apud Raynaldum ad citatum annum MDXXX. Numero xxxi. seu *trenta doppioni di quattro ducati l'uno*, ut ex Historia Marci del Guazzo rerum memorabilium per Europam gestarum &c. notat doctissimus Morettus in Lucubratione, *De Presbyterio*, Parte II. Sectione xxix. Num. vi.

II Ritus quoque antiquus est ille, quem hic noster §. recenset, ut nimirum Imperator post factam auri oblationem ad pedes Pontificis in Throno sedentis, Pontificem inde ad Altare descendentem sequatur, & illi in locum Subdiaconi Calicem, & Patenam cum Hostiis offerat, deinde aquam infundendam vino. Meminit enim hujus ritus Romanus Ordo XIV. citato Cap. cv. ubi edicit, ut ipso Pontifice descendente, a Soglio scilicet, *pro perficiendis Missarum Mysteriis ad Altare, Imperator more Subdiaconi offerat Calicem, & ampullam, & stet ibi donec Pontifex ad Sedem reversus communicet.* Porro quod Coronatio Henrici Luxemburgici peragenda esset non per ipsum Pontificem, sed per ejus Legatos, scripsit in laudatis Litteris suis Clemens V. omittendum esse eum ritum oblationis Calicis & ampullæ: *Oblatio vero Calicis, & ampullæ per Imperatorem jam coronatum, decantato Evangelio, Corona, & Manto depositis, more Subdiaconi, Romano fienda Pontifici, & assistentia eidem fienda per Imperatorem, donec Romanus Pontifex ad sedem propriam revertatur, quia solo Romano Pontifici competunt, omittantur.* Legi hæc possunt apud memoratum Raynaldum ad annum mcccxi. Num. xvii.

III. Explicandus nunc ritus est ille Eucharisticæ Communionis, quam in sua Coronatione Imperator Imperatrixque de manu Pontificis sumunt, postquam Pontifex, inquit noster §. cum Diacono, & Subdiacono communicaverint. Nam Subdiaconus, postquam cum Diacono communicavit de Corpore, & Sanguine Christi, accipit de

manu Diaconi apud Altare cum circulis, & cæremoniis consuetis duas Hostias consecratas pro Imperatore, & Augusta, & eas ad Pontificem portat; & percepto Sacramento, Imperator quidem Pontificis faciem osculatur, Augusta vero manum; & descendentes ad Altare, de manu Diaconi vinum purificationis sumunt; & discedunt ambo ad suos suggestus, ibique resumunt Imperialia signa. Concinunt & hæc quidem Romano Ordini XIV. Cap. cv. ubi agit de Coronatione Imperatoris; mandat namque, ut communicato Pontifice in sua Sede, de quo ritu nos suo loco dicemus, Imperator Communionem de manu ejus suscipiat cum osculo pacis, & sic ad thalamum rediens in ambonem resumat Mantum pariter, & Coronam. Idem deinde edicit Capite cvi. de Imperatrice, mandans, ut facta oblatione, de qua supra diximus, *stet in gradibus juxta absidam versus Altare S. Leonis, donec de manu Summi Pontificis post Imperatorem sacram Communionem accipiat;* non vero Coronationem, ut perperam legitur apud Mabillonium Tomo II. Musei Italici pag. 406. Porro notandum hoc loco, ritum Communionis servari quidem modo prædicto, ubi Imperator ipsam de manu Pontificis sumeret, nam alias si a Pontificis Legatis coronatus Communionem acciperet, omittendum plane est illud osculum pacis; uti expresse habetur in memoratis superius Clementis V. Litteris apud Raynaldum ad annum mcccxi. Num. xvii. ubi sic inter alia inquit: *Idem tamen Imperator, si voluerit, Sacram Communionem de manu recipiat Celebrantis, osculo tamen omisso.*

IV. Quamquam vero mos olim fuerit, & quidem ex vetusto Romanæ Ecclesiæ ritu, ut cessata jam Communionem Eucharisticam sub utraque specie antiquitus laicis etiam quibuscumque fieri solita, qua die Rex, aut Imperator a Romano Pontifice sacrabatur, Eucharistiam sub utraque specie sumeret, videtur tamen ex hoc nostro §. dandum esse Eucharisticum Sacramentum Imperatori sub una tantum specie, scilicet panis; quia nempe, uti ex supra dictis constat, nostrum Cæremoniale ritum præscribens Coronationis, illum desumpsit ex Coronatione Friderici III. Romæ peracta anno mcdlii. a Nicolao Papa V. In Friderici autem sacra inauguratione satius visum est Communionem ei sub una tantum specie tradere ob hæresim Hussitarum, qui tunc temporis Calicis sumtionem omnino necessariam esse contendebant. Observat hæc doctissimus Mabillonius Tom. II. Musei Italici in Commentario prævio ad Romanum Ordinem pag. lxii. & lxiii. ubi etiam notat, idem etiam observatum fuisse, cum Fridericus ipse, Paulo II. Pontifice, Romam venit; ut enim scribit Augustinus Patricius Auctor nostri Cæremonialis, testisque oculatus in Libello de adventu laudati Friderici in Urbem, quem idem Mabillonius retulit Tom. I. Musei Italici: *Communicavit Summus Pontifex Altaris Sacramentum cum Imperatore; Diacono, & Subdiacono de pane tantum; de Calice autem, etsi consuetudo sit, communicantes cum Pontifice participare, propter insurgentem tamen Hussitarum, ac Bohemorum damnatam hæresim, quæ Calicis potationem ad salutem necessariam putat, præter Pontificem, bibit nemo.*

V. Quo ritu Carolo V. Imperatori Com-

mu-

munio paulo ante ejus Coronationem a Clemente Papa VII. data sit, ms. Diarium Paridis Grassi, qui tunc Apostolicarum Cæremoniarum Magister erat, sic refert: *In Natali Domini anno MDXXIX. dicto Agnus Dei in Missa, Cardinalis Farnesius assistens accepit pacem a Papa, distribuens aliis, osculato prius Altari, & Papa ipso in facie, & in pectore, tum Casare, quem, cum vellet osculari Altare ad suasionem Sacristæ, ego expresse, inquit Paris, prohibui, quia neque Casari, neque Diaconibus Cardinalibus licet osculari in tali casu Altare, sed solum Episcopis, & Presbyteris Cardinalibus. His sic peractis, Pontifex detecto capite ex Altari venit ad Solium suum, ubi stans cum devotione expectavit Sacramentum. Cardinalis vero Evangelii in Altari genuflexus capiens Sacramentum cum Patena, in altitudine oculorum suorum gyravit circum Altare, & illud dedit Subdiacono Epistola in cornu Evangelii genuflexo expectanti; qui consurgens, ad Papam detulit, fimbrias altero Magistro, Cæremoniarum scilicet, elevante; & ad sinistram Papæ cum Sacramento se firmavit. Tum idem Cardinalis genuflexus Calicem cum Sanguine accipiens pari modo gyravit, & ipse, me, ait idem Paris, fimbrias elevante, portavit ad dexteram Papæ, ubi se firmavit. Tum Pontifex, lectis Orationibus, ut in Libro, sumsit partem Sacramenti, inde partem Sanguinis ex Calice cum calamo aureo. Casar, & alii Principes voluerunt communicare. Pontifex alteram partem Sacramenti fregit, & unam Cardinali Cibo, aliam Subdiacono dedit, osculata manu, & facie Papæ prius. Qui inde recesserunt ad Altare, ubi partem Sanguinis quilibet eorum sumsit cum particula intus posita, ut moris est. Hactenus Diarium Paridis Grassi, quod refert Mabillonius loco citato.*

VI. At vero, quod ante Hussitarum hæresim, Regi, & Imperatori, sub utraque specie Communio Eucharistica a Pontifice præberetur, docet nos Ordo Romanus XIV. auctore Jacobo Gaetano, qui claruit labente seculo XIII. & ineunte seculo XIV. Sic enim is inquit Cap. CVI, ubi de unctione, & Coronatione Regis tractat; postquam scilicet ritum Communionis a Diacono & Subdiacono acceptæ retulit: *Et tunc Sacram Communione Rex genuflexus de manu Papæ sedentis, & Mitram tenentis in capite suscipiat cum osculo pacis; ante tamen osculetur Pontificis manum, & tunc reverenter Hostiam sumat; reversusque ad Altare idem Rex sacratissimum Sanguinem Domini nostri Jesu Christi sumat de Calice per ministerium Diaconi cum calamo &c.* Idem confirmat Cap. CX. ubi tamen expresse ait, Reginæ tradi Communionem sub specie tantum panis: *Post Communionem Papæ, & postquam Rex communicaverit, & sacrum Sanguinem Domini nostri Jesu Christi susceperit, Regina genuflexa, de manu Romani Pontificis sedentis, & Mitram tenentis in capite, consecratam Hostiam reverenter sumat, & ad suum thalamum revertatur.* Eadem plane ad verbum referuntur etiam in ms. Cæremoniali Codice Pierfanctiono, ubi scilicet ritus Coronationis Regis, & Reginæ recenset.

VII. Ceterum Clemens VI. anno tertio sui Pontificatus Philippum Franciæ Regem, & Joannam Reginam ejus uxorem, filiumque Joannem Normanniæ Ducem, ac postea Successorem ea

singulari prærogativa ornavit, ut quandocumque vellent, sub utraque specie sacram Eucharistiam susciperent. Raynaldus ad annum Domini MCCCXLIV. Num. LXII. Diploma Pontificium refert hanc in rem Joanni primogenito Philippi Regis Franciæ, Duci Normanniæ concessum, datum Avenione, XI. Kal. Julii anno III. & laudat Epistolas LXVIII. & LXIX. Tomi III. Epistolarum secretarum, quibus idem privilegium eidem Philippo Regi, & Joannæ Reginæ conceditur. Ea tamen prærogativa Reges Franciæ jam non uti, nisi in sua inauguratione, & in articulo mortis, ut id se posse significant, notat Pagius in Vita Clementis VI. Num. XI. Hinc agitata controversia in Concilio Tridentino, utrum scilicet aliquibus esset usus Calicis permittendus, postularunt Oratores Galli, ut si id demum statueret, absque præjudicio fieret prærogativæ Regum suorum, qui in sua inauguratione Calicem accipere consueverunt, & consuetudinis receptæ ab antiquo in quibusdam Regni Gallici Monasteriis Calicem Monachis non conficientibus statim temporibus ministrandi; uti jam nos notavimus Tomo IV. Conciliorum, ubi enarravimus Sessionem XX. Concilii Tridentini Num. CXXXII. in fine. Teste Mabillonio in citato prævio Commentario ad Romanum Ordinem, Cap. XI. pag. LXIII. & seq. non modo ex privilegio concessa est Communio sub utraque specie Regibus Francorum, verum etiam Diacono & Subdiacono Ecclesiæ S. Dionysii prope Parisios in Dominicis & diebus solemnibus, & Ministris Altaris apud Cluniacum in singulis Dominicis, & Festis; quæ prærogativa a Concilio Tridentino probata est.

VIII. Si veterem disciplinam inspiciamus, illud plane constat, quod inter alios docet, solidisque argumentis probat eruditus Ineninus in celebri Opere, *De Sacramentis*, Dissertatione IV. Quæstione IX. Cap. IV. Art. II. §. I. ab ipsis Ecclesiæ incunabulis ad duodecimum usque seculum Fideles etiam laicos publicis in conventibus passim & ordinarie sub duplicis panis & vini specie communicasse; eundemque morem labente etiam seculo XIII. in quibusdam Occidentalium Ecclesiis viguisse. Testem hujus moris habemus quidem S. Thomam, qui obiit anno MCCLXXIV. Is autem Parte IV. Quæstione VIII. Articulo XII. ubi quærit, *Utrum liceat Corpus Christi sumere sine Sanguine*, affirmativam sententiam tuetur hoc argumento: *Sed contra est multarum Ecclesiarum usus, in quibus populo communicanti datur Corpus Christi sumendum, non autem Sanguis.* In omnibus igitur Ecclesiis S. Thomæ ævo, idest seculo XIII. quo ipse claruit, diemque extremum clausit, nondum vigebat consuetudo laicis unam tantum speciem porrigendi. Porro post Concilium Constantiense habitum ineunte seculo XV. de quo nos fuso diximus Tomo IV. Conciliorum, nullis in Ecclesiis Latinis, sine obtenta speciali dispensatione, Laicis tum intra, tum extra Missarum solemnias, utraque panis, & vini species porrecta fuit. Ne prioris autem disciplinæ vel umbra superstes esset, eo quod hæretici Communionem sub utraque specie jure divino necessariam esse contenderent, cautum est in Conciliis, quæ post Tridentinum habita sunt, ne vas purificatorium, quod post Communionem laicis sufficiebatur, Calicis, in quo Consecratio peragitur, formam

ex-

exhiberet. Ut alia omittam, ita plane statuit Provinciale Concilium Bituricense habitum anno MDLXXXIV. Can. XII. *In exhibenda laicis sacra Communione, paratum sit vas, quod formam Calicis non praeferat, ex quo sumatur ablutio post Communionem Eucharistia.*

IX. Ubi ea disciplina vixit communicandi sub utraque specie, jam non semper utraque species separatim, sed aliquando etiam permixta porrigi Fidelibus consuevit. Certe invaluit hic mos Seculo VII. quem tamen velut abusum, qui per Ministrorum ignorantiam irrepsisset, Bracharensis Synodus III. anno DCLXXV. habita Can. II. confixit: *Illud vero, inquit, quod pro complemento Communionis intinctum tradunt Eucharistiam Populis, nec hoc prolatum ex Evangelio testimonium recipit, ubi Apostolis Corpus suum, & Sanguinem commendavit; seorsum enim panis, & seorsum Calicis commendatio memoratur. Nam intinctum panem aliis Christum praeuisse non legimus, excepto illi tantum discipulo, quem intincta buccella, Magistri proditorum ostenderet, non quae Sacramenti hujus institutionem signaret.* Licet autem ea praxis Seculo VII. proscripta fuisset, prodiit tamen iterum Seculo XI. sed Paschalis Papae II. Decretis compressa mox evanuit ex Occidente, praeterquam in infirmorum, & parvulorum Communionem. Sic enim ille Epistola XXXI. ad Pontium Cluniacensem Abbatem scribit: *In sumendo Corpore, & Sanguine Domini, juxta Cyprianum Dominica Traditio servetur, nec ab eo, quod Christus Magister & praecepit & gessit, humana & novella institutione discedatur. Novimus enim, per se panem, per se vinum, ab ipso Domino traditum. Quem morem sic semper in Sancta Ecclesia conservandum docemus, atque praecipimus, praeter in parvulis, ac omnino infirmis; qui scilicet panem absorbere non possunt. Eodem spectant quae paucis ante annis edixerat Synodus Claromontana sub Urbano II. habita anno Christi MCV. Can. XXV. ubi ita ait: Nequis communicet de Altari, nisi Corpus separatim, & Sanguinem similiter sumat, nisi per necessitatem, & cautelam.* Quae tamen disciplina apud Occidentales tandem obsoleta, viget adhuc apud Orientales, apud quos fidei populo utraque species in cochleari commixta exhibetur, ut idem Jueninus citato loco observat.

X. Factam olim Calicis Communionem tribus modis, notavit eruditus Edmundus Martene Lib. I. *De antiquis Ecclesiae ritibus*, Cap. IV. Articulo X. Num. XIIII. Vel enim pretiosum Sanguinem cum calamo fugebant, vel Calicem ipsum ori admovebant, vel denique, uti paulo superius ostensum fuit, Corpus Dominicum Sanguine intinctum porrigebant. Tertium hunc modum damnarunt jam non modo Synodus III. Bracharensis, sed & Summi Pontifices, Urbanus II. & Paschalis itidem II. Circa alterum modum admovendi scilicet Calicem ipsum ori Fidelium, notandum illud est, quod ait Gregorius Turo-nensis Lib. III. *Historia Francorum*, Cap. XXXI. Arianorum consuetudinem fuisse, *ut ad Altarium venientes, de alio Calice Reges communicent, & de alio populus minor.* Ceterum consuevisse olim Fideles calamo, seu fistula, aut cannula argentea, vel aurea, ut hodieque solet Romanus Pontifex Maximus, Sanguinem Christi e Calice haurire, pluribus probat doctissi-

mus Joannes Cardinalis Bona Lib. I. *Rerum Liturgicarum*, Cap. XXV. Num. IV. *Fistulae usum* explicat in primis Romanus Ordo antiquus apud Hitorpium his verbis: *Diaconus tenens Calicem, & fistulam, stet ante Episcopum, usque dum ex Sanguine Christi, quantum voluerit, sumat; & sic Calicem, & fistulam Subdiacono commendat.* Conradus Episcopus in Chronico Moguntino de Missae apparatu scribens, ita ad rem ait: *Erant fistulae quinque ad communicandum argenteae deauratae.* Inter alia donaria, quae Casinensi Monasterio dereliquit Victor Papa III. recenset Leo Ostiensis in Casinensi Chronico Lib. III. Cap. ultimo fistulam auream cum angulo, & fistulas argenteas duas. Plura de usu fistularum in sumenda Communionem Calicis apud Monachos, videri possunt apud memoratum Cardinalem Bonam, & Angelum de Nuce in Excurso Historico, *De Sella lapidea, & fistula argentea Casini extantibus*, quem legere est Lib. IV. praedicti Chronici Casinensis, ab eodem editi, Notisque illustrati Cap. LXIV. Ceterum, ut alias fusius dicemus, utitur nunc fistula Summus Pontifex cum solemniter celebrat, illa hauriens quantum vult de Sanguine, reliquum Ministris relinquens, qui fistula quoque ipsum absumunt, ut idem Bona Cardinalis notat loco citato in fine, ubi etiam addit, eundem usum adhuc vigere in Celebrari Monasterio S. Dionysii in Francia Ordinis S. Benedicti, ubi Ministri Altaris more antiquo sub utraque specie communicant, & Sanguinem e Calice fistula hauriunt.

XI. Nequid demum in hoc Commentario omittamus, & illud notandum censemus, Orationes ipsas in §. praesenti descriptas, legi quidem in Romano Ordine XIV. Auctore Jacobo Gajetano, Cap. CV. apud Mabillonium Tomo II. Musei Italici, pag. 401. & seq. monetque idem Ordo, *peracta Communionem cum ipso Imperatore, si forte velit Apostolicus, Papa scilicet, posse eum dicere hujusmodi Orationes, quarum prima incipit: Prospice quasumus Domine Omnipotens Deus serenis obtutibus hunc gloriosum famulum tuum N. &c.* Altera: *Benedic Domine quasumus hunc Principem nostrum N. &c.* Tertia: *Deus Pater aeterna gloria &c.* Idem quod laudatus Ordo Romanus, edicit etiam ms. Pontificale Constantinopolitanum annorum circiter DL. *Sciendum, inquit, quod peracta communitio (puto legendum, communionem) cum impositione Diadematis, dicere, si forte velit Apostolicus, valet orationes hujusmodi, nempe, Domine vobiscum. Prospice quasumus Omnipotens Deus &c.* Porro in antiquo ms. Codice Gemundensi, in eo Titulo, qui inscriptus est, *Benedictio ad ordinandum Imperatorem secundum Occidentales*, apud Edmundum Martene Lib. II. *De antiquis Ecclesiae Ritibus*, Cap. IX. Ordine III. prima Oratio, quae incipit, *Prospice, Omnipotens Deus, serenis obtutibus &c.* dicitur *Consecratio*, praeceditque impositionem Coronae, aliasque Ceremonias, quas supra explicuimus. Mandat enim laudatus Codex, ut, expleta Consecratione, seu citata Oratione, *Prospice Omnipotens Deus &c.* mittat Pontifex Coronam auream super caput ejus, his verbis: *Per eum, cui est honor, & gloria per infinita secula seculorum, Amen.* Sequitur deinde Gladii traditio, aliique ritus jam a nobis superius enarrati.

§. XXV.

*De prosecutione Missæ die Coronationis Imperatoris celebratæ usque ad finem,
& aliis ritibus haberi tunc solitis.*

Post Communionem Pontifex descendit ad Altare, & prosequitur Missam more consue-
to, & in fine dat Benedictionem solemnem, dicens: *Sit Nomen Domini &c.* & publi-
cantur immediate Indulgentiæ per unum ex Diaconis assistentibus, sive plenariæ, sive
ut Pontifici placuerit. Tunc Cardinales, & Prælati deponunt paramenta, & accipiunt
lanceas Cappas. Pontifex vero, dimissis Missalibus indumentis, accipit Pluviale, & Mi-
tram pretiosam, & cum Imperatore descendit ad gradus Basilicæ sub eodem baldachi-
no. Si est Dominica, *Lætare Jerusalem*, Pontifex sinistra portat Rosam auream, &
dextra benedicit assistentibus, atque hinc inde elevantibus fimbrias Diaconibus. Hanc
autem auream Rosam Pontifex antequam ad Ecclesiam descendat, in Camera papagalli
benedicit cum Balsamo, & muscho, quod in singulis annis fit in tali die, prout infe-
rius in suo loco plene scribemus. Si vero esset alius dies, (1) cum dextra signat, &
cum sinistra tenebit dextram Imperatoris. Diaconus a sinistris retro erit inter Papam
& Imperatorem, & cum dexteritate elevabit fimbriam Pluvialis (2) caudam vero por-
tabit major Princeps, etsi erit Rex. Principes (3) vero, Rex, & Prælati, qui ve-
nerunt cum Cæsare, dum Missarum, & Coronationis solemnia fiunt, semper Cæsa-
rem sequuntur, & cum ipso in suo suggestu (4) consistunt semper. Et similiter qui
cum Augusta, eam semper comitantur, assistuntque (5) semper. Quæ, finita Missa,
dimissis Pontifice & Imperatore in Ecclesia, ad domum suam cum suis revertitur.

C O M M E N T A R I U S .

I. **I**llud quidem mandant tum Ordo Romanus
XIV, Auctore Jacobo Gajetano Cap. cv.
tum ms. Codex Pierfantianus, ubi de
Coronatione Imperatoris agunt, ut *Missæ finita
Pontificalem benedictionem reverenter accipiat,
& statim procedat ad locum, ubi debet Summus
Pontifex equitare*; juxta ritum scilicet, quem
nos mox infra in Commentario §. xxv i. sequen-
tis narrabimus, Plura, quæ in hoc Commenta-
rio dici possent, jam alias opportunius expli-
cata fuere, Quod ait hic noster §. *Si est Domi-
nica, Lætare Hierusalem, Pontifex sinistra por-
tat Rosam auream &c.* alludit plane ad ritum
servatum in Coronatione Friderici III, peracta
a Nicolao Papa V, anno mcdlii, in Dominica
iv. Quadragesimæ, quæ dicitur, *Lætare Hie-
rusalem*, ob Introitum Missæ, qui ex ipsis ver-
bis incipit, Aptissima visa est Dominica ipsa,

quæ prædicto anno in diem xix. Martii incidit,
qua die laudatus Pontifex Nicolaus V. sextum
Pontificatus annum inibat. Ceterum, Corona-
tione solemnè ritu in Basilica S. Petri peracta, ut
Zantflietus in suo Chronico ad memoratum an-
num scribit, idem Pontifex ante gradus ejusdem
Basilicæ Friderico ipsi Imperatori dono dedit
Rosam auream ea die benedictam, deinde eum
usque ad Hadriani Molem, seu Castrum S. An-
geli comitatus est. Sed de Rosa aurea benedici
solita a Romano Pontifice in ipsa Dominica *Læ-
tare Hierusalem*, & ritu eam tradendi, vide quæ
dicemus infra in Commentariis ad Titulum vii.
ubi scilicet Caput illud explicabimus, quod in-
scriptum est, *De benedictione Rosæ, quæ fit Do-
minica, Lætare Hierusalem, & ejus traditio-
ne*. Multa enim ibidem dicemus, quæ & ad hunc
Titulum spectant,

§. XXVI.

*Processio Pontificis, & Cæsaris per Urbem, & de honore a Cæsare Pontifici
exhibito stapham illius equi tenente.*

Cæsar vero cum Corona in capite, Sceptro, & Pomo in manibus ad latus Pontificis in-
cedens, nisi illius manu ducatur, quia tunc Pomum, tantum in sinistra retineret.
Cum ad finem graduum pervenerit, traditis Sceptro & Pomo uni ex suis, prævenit
ad equum Pontificis, & in honorem Salvatoris nostri Jesu Christi, cujus vice Ponti-
fex in terris gerit, tenet stapham, quoad Pontifex equum ascenderit; & deinde acce-
pto equi freno, per aliquos passus ducit equum Pontificis. Pontifex, dum Imperator
hæc humilitatis officia vult exhibere, debet aliquantulum modeste recusare, & tan-
dem cum aliquibus bonis verbis honorem non in personam suam, sed illius, cujus lo-
cum tenet, recipiendo, permittit illum aliquantulum progredi, tum firmat se, &
nullo

(1) Ita in Romana editione in Veneta vero i. perperam legitur; *dextra sicut sinistra tenebit &c.* (2) In ipsa quoque
editione Veneta additur, *a dextris*. (3) In eadem legitur, *vel*. (4) Ibidem, *constituunt*. (5) Deest ibidem *semper*.

nullo pacto permittit, Cæsarem ulterius ire, qui mox consenso equo suo, ad sinistrum latus Pontificis, & sub eodem baldachino equitat, & hoc ordine procedunt. Primum præcedant Familiæ Cardinalium cum suis valisiis, & simul mixtæ familiæ Prælatorum Principum, & omnium Curialium, tam Cæsaris, quam Pontificis. Deinde duo cum valisiis Pontificis. Inde familiares domestici Imperatoris, & post eos familiares Papæ, tum Nobiles, Barones, & Comites minores utriusque. Equus Papæ cum scala Papæ. (1) Postquam Papa equitavit, post illum duodecim Vexilla rubea, quæ duodecim Cursores portant. Deinde Vexillum populi Romani, Vexilla Imperii, Vexillum Papæ, Vexillum Ecclesiæ, Vexillum Crucis cum Vexilliferis armatis, & ornatis, ut in Coronatione Papæ. Hos sequuntur duodecim equi albi phalerati sine fessoribus. Deinde quatuor Nobiles portantes Pilea ex cremesino quatuor Papæ cum baculis. Quibus succedunt Advocati, & Secretarii mixtim secundum prioritatem officii præcedentes cum suis caputiis circa collum, quos tamen præcedunt Secretarii Imperatoris. Tum sequuntur Cubicularii etiam cum suis caputiis. Inde Acolythi Clerici Cameræ Apostolicæ, & post eos statim Auditores cum Rochetis, & Cappis. Deinde Subdiaconus (2) cum Cruce Papali cum (3) Capello indici coloris, & cum aliis Subdiaconis cum Cappis, ut alii. Tum duo portantes laternas cum lumine ante Sacramentum equitantes. Deinde equus albus phaleratus cum tintinnabulo portans Sacramentum, & supra Sacramentum baldachinum per Cives Romanos portatur, & circa duodecim intorticia, quæ portantur per duodecim familiares Papæ, sive per duodecim Beneficiatos S. Petri cum Superpelliceis; & melius, ut vidi servari per Dominum Paulum Papam secundum. Post Sacramentum equitat Sacrista cum ferula alba. Inde siqui sunt maximi Domini, Principes, aut Duces. Principes Electores immediate ante Cardinales procedunt. Et siquis adesset frater, aut filius Imperatoris, iret medius inter juniores Diaconos Cardinales. Rex erit a sinistris senioris Episcopi Cardinalis. Et si plures adessent Reges, locarentur cum aliis Episcopis Cardinalibus. Post hos sequuntur duo Diaconi Cardinales assistentes Pontifici. Et si cum Cæsare essent duo Principes Electores, qui præferrent Gladium, & Pomum Cæsaris, isti deberent ire immediate ante Cæsarem, sicut Diaconi ante Pontificem; & quando via esset arcta, irent ante ipsos Diaconos assistentes. Si vero non sint Principes Electores, qui portant illa, videlicet Gladium, Pomum, seu Sceptrum, nam alterum istorum duorum portabit Imperator, illi duo vadant simul cum Subdiacono, qui portabit Crucem, & illum in medio habeant. Sequitur Pontifex sub baldachino, & Imperator cum sua Corona, & Imperiali habitu a sinistris. Post Pontificem sequuntur duo Cubicularii secreti cum serviente de Mitra; & duo Medici cum Secretario, si non sit Prælatus; & post Imperatorem duo Camerarii sint cum uno Secretario. Inde equitabit serviens armorum cum uno Secretario cum umbella; deinde Prælati assistentes Papæ. Et siquis Archiepiscopus Princeps Elector Imperatoris adesset, iret ante assistentes Papæ. Post hos ibunt Prælati assistentes, sive Consiliarii Imperatoris cum Cappis, & Capellis, ut alii Prælati; alioquin non irent inter Cappatos. Sequuntur deinde Prælati, Oratores, Archiepiscopi, Episcopi, Protonotarii, & Abbates Cappati, & Pileati, & demum alii Curiales togati, tam Papæ, quam Cæsaris.

COMMENTARIUS.

I. **E**sse antiquum ritum, ut finita Missa, in qua coronatus Romæ fuit a Summo Pontifice novus Imperator, is statim præceat ad locum, ubi debet Summus Pontifex equitare, & cum ipse Pontifex equum ascenderit, teneat stapedium sella ejus, & arrepto freno, aliquantulum ipsum addextret; moxque suum equum ascendens, procedat juxta Summum Pontificem usque ad Ecclesiam S. Mariæ in Transpadina, ubi dato sibi osculo ad invicem, non corde, sed corpore separentur, docet nos Romanus Ordo xiv. Cap. cv. cujus locum legere pene ad litteram est in Cæremoniali Codice Pierfanctiano, & in Rituali descripto a Clemente Papa V. pro Coronatione Henrici Luxemburgici apud Raynaldum ad annum mcccxi. Num. To. I.

(1) Ita in editione Romana, in Veneta vero 1. desunt ea verba; *Postquam equitavit, post illum* (2) In eadem Veneta. *Subdiaconi*. (3) Ibidem, *Galero*.

xiii. ubi etiam ad verbum illud *in Transpadina* in margine notat, *Transpontina*.

II. Inter alios honores Romanis Pontificibus exhibitos ab Imperatoribus, & Regibus, pervetustus, & longa consuetudine probatus quidem est ille, quo ipsi Imperatores, ac Reges, Papa equitante, officio stratoris, aut habenas equi regentium fungerentur. Narrat Anastasius in Vita Stephani Papæ II. Stephanum ipsum in Gallias profectum, anno dccciv. ut a Pipino Rege auxilii aliquid impetraret adversus Longobardos, jamdiu Italiam, Romamque ipsam populantes. Regem porro ipsum illi obvium prodisse tribus passuum millibus, equo exiliisse, humi se abjecisse cum Regina, cum prole, & Proceribus Aulicis, denique stratoris obisse munia, ali-

D d quan-

quanto itineris spatio pedibus juxta illum equo vehementem incessisse: *Ad trium fere millium spatium descendens de equo suo, cum magna humilitate terræ prostratus, una cum sua conjuge, filiis, & Optimatibus Sanctissimum Papam suscepit, cui & vice stratoris in aliquantulum locum juxta ejus sellarem properavit.* Ab eodem ipso Anastasio commemoratum est, ut Carolus Magnus Romæ ascendens ad B. Petri Basilicam, gradus omnes exosculatus sit, & in vestibulo demum Ecclesiæ exceptus sit ab Hadriano I. Papa. Verum & Hadrianum I. & Leonem III. non coluit Carolus Magnus, nisi amplexu, & osculo: *Pariter se amplectentes osculati sunt*, ut idem Anastasius tradit.

III. At vero ut in Agro Remensi Stephano Papæ IV. aliis V. obviis prodierit Ludovicus Pius anno DCCCXVI. narrat Theganus in Vita ejusdem Ludovici. Ait enim, utrisque equo descendentes, Imperatorem ter se in terram prostrasse coram Pontifice: *Descendit uterque de equo suo, & Princeps se prosternens omni corpore in terram tribus vicibus ante pedes tanti Pontificis, tertia vice erectus salutavit Pontificem istis verbis, dicens: Benedictus, qui venit in Nomine Domini; & respondens Pontifex: Benedictus sit Dominus Deus noster, qui tribuit oculis nostris secundum David Regem videre. Amplexantes enim se, & osculantes pacifice, perrexerunt ad Ecclesiam &c.* Teste Anastasio in Vita Sergii II. ubi anno DCCCXLIV. Romam venit Ludovicus Lotharii Imperatoris filius, mutuo quidem se complexi sunt, & tenuit idem Ludovicus Rex dexteram antedicti Pontificis; ac cum postea ipsomet Imperii Diademate cinctus fuisset, Romamque perrexisset, eo tempore, quo Nicolaus I. in Pontificem electus, & ordinatus est, eodem illo reveritus est humillimo obsequio, quo olim Pipinus Stephanum II. stratoris officio perfunctus: *Augustus obviis occurrit, frangumque equi Pontificis suis manibus apprehendens, pedestri more, quantum sagittæ jactus extenditur, traxit.* Tum equo vectus Imperator, cum Pontifice aliquantum viæ confecit, ac rursus in pedes se conjiciens, stratorem se egit, Pontificis equum habenis deducens.

IV. Jam nec eadem semper, nec continuæ fuere istæ obsequii, & cultus significationes erga Summos Romanos Pontifices a Principibus exhibiti. Liberæ primum, & arbitrariæ fuerunt, nec ulla certa lege præscriptæ. Ex quo & illud quoque efficitur, quod alias notavit Thomassinus Parte II. *Disciplina*, Libro III. Cap. LXII. Num. II. ceteros etiam Episcopos, qui & ipsi Vicarii quoque erant Christi in sua quisque Diœcesi, non multo dissimilem cultum a Magnatibus, ceterisque Laicis, imo & a Regibus ipsis consequutos esse. Ut alia exempla omittam, permixtum illud est, quod quamquam de pace deliberaretur adhuc inter Henricum II. Angliæ Regem, & S. Thomam Cantuariæ Archiepiscopum, quando Rex, & Archiepiscopus simul conscendebant equos, Rex habenas equi Archiepiscopi manu tenebat, ut testatur Matthæus Parisius: *Cum Rex, & Archiepiscopus in partem secessissent, & bis equos ascendissent, bis habenam Archiepiscopi Rex tenuit, cum equum ascendisset.* Jam non desunt & alia exempla hujusmodi obsequii Episcopis a Principibus impensæ, sed tamen præ ceteris summi semper honores exhibiti fuerunt

ab Imperatoribus, ac Regibus præcipuo Jesu Christi in Terris Vicario, Apostolorum Principis Successori, Romano Pontifici Maximo.

V. Præter superius adducta exempla, longe plura occurrunt post annum Christi millesimum. Teste Bertholdo apud Baronium anno MXCV. Conradus Romanorum Rex apud Cremonam obviam progressus Urbano II. Papæ, stratoris officium eidem exhibuit, ac juramento fidelitatem promisit: *Cremonam veniens, Papæ obviam progreditur, eique stratoris officium exhibuit &c.* Idem præstitit anno MCXX. Wilhelmus nostræ Calabriæ, & Appuliæ Dux Callisto II. & eo obsequio ad Ecclesiam illum deduxit pedes, ut inter alios refert Baronius, ac deinde anno MCXXXI. Lotharius Imperator Innocentio II. quando Leodii cum eodem Pontifice congressus est, ut narrat Sugerius sic inquit: *Humillime seipsum stratorem offerens pedes per medium sanctæ processions ad eum festinat, alia manu virgam ad defendendum, alia frangum albi equi accipiens, tanquam Dominum deducebat.* Atque in hoc potissimum exemplo, ut scite notat laudatus Thomassinus citato loco, Cap. LXX. Num. v. habemus occultis oculis Fidem illustrem & sane magnificum humilitatis triumphum, & Crucis Christi æterni Pontificis nostri, de universa insolentissimi seculi pompa. Id itaque officium, quod unius contemplatione & charitate Christi, sive, ut ait hic noster §. *in honorem Salvatoris Jesu Christi*, Summo Pontifici, qui ejus vices in terris gerit, exhibetur, jam non modo offensionem non est, sed admirationi non potest non esse, & amoris iis, qui gustu aliquo, & sapore pietatis, & Religionis imbuti sunt.

VI. Quamquam vero Imperatores, Regesque, ubi cum Summo Pontifice congressi sunt, numquam id obsequii detraxerint; Fridericus tamen I. cum in Italiam adventaret, Imperiali Corona cingendus eo humili obsequio exemplis tot prædecessorum Principum comprobato in Hadrianum IV. Papam fungi perperam recusavit. Teste inter alios Scriptores Anonymo Vaticano apud Baronium anno MCLV. Cardinales, qui Pontificem cingebant, usque adeo consternati fuere, ut alii alio dilapsi sint, Pontifice solo dimisso. Qui tamen ingentis, & infracti animi Vir Imperatorem ad osculum pedum admisit, assurgenti mox ad osculum oris abiecit, donec ab eo præstitum esset Successori Petri, quod Imperatores omnes dependerant prædictis Pontificibus Summis tanquam Petri, Paulique successoribus: *Quem honorem Prædecessores tui Imperatores Orthodoxi pro Apostolorum Petri & Pauli reverentia Prædecessoribus nostris Romanis Pontificibus exhibere usque ad hæc tempora consueverunt.* Mirari subit, qui Pontifex cultum religiosum ab origine liberum, & arbitrium tanto vigore extorquendum ab invito Imperatore, extundendumque censuerit. Sed illud quoque menti recurrere debet, quod idem Thomassinus observat, quodque etiam iterum iterumque a nobis inculcatum est, nempe quæ officia spontanea primum & libera ab exordio sunt, longo usu, & consuetudine confirmari, inveteratas autem, & ita confirmatas consuetudines in Leges valere demum. Sive jura, sive officia appelles, tum civilia, tum Ecclesiastica, id genus complurima sunt. Multa possunt, & jure suo possunt Principes terreni in causis rebusque Ecclesiasti-

fasticis, quæ tamen potestas non aliter illis parata, quam longa consuetudine, & antiquissima possessione, connivente præsertim Summo Romano Pontifice. Sunt consimiliter Summis Pontificibus, & Prælatibus jura non pauca in res civiles, & temporales, de quibus controversia illis fieri jam non potest, ubi diutina illis possessione firmata sunt.

VII. Alienas denique suspiciones obrectationesque Friderici purgavit dissipavitque Adrianus Pontifex, quando rei totius judicium ad ipsos Imperii Principes retulit. Cum inter Principes autem diu, & mature disceptatum esset, constitutum ab iis est tandem, eisdem a Friderico honores Pontifici nunc exhibendos esse, quos prisca Imperatores Lotharius aliique prisca Pontificibus perfolvisent. Quod eo recidit, ut illud quoque pronunciatum esse videatur, usque adeo justas fuisse hujus obsequii, & necessarias causas exhibendi Pontifici ab Imperatore, ut justæ, ac necessariæ fuerint Pontifici causæ ejus exigendi: *Tandem requisitis antiquioribus Principibus, qui cum Rege Lothario ad Papam Innocentium venerunt, & prisca consuetudine diligenter investigata ex relatione illorum, & veteribus monumentis, judicio Principum decretum est, & totius Regalis Curie communi favore roboratum, quod idem Rex pro Apostolorum prædictorum reverentia Papæ Hadriano exhiberet stratoris officium, & ejus strequam, suppedaneum scilicet teneret ad conscendendum in equum.* Functus est denique eo officio Fridericus I. Imperator, easque implevit Religionis partes, in quas nuper præverat Imperator Lotharius, sed cui Pipinus, Ludovicus Pius, & alii Carolinæ Reges familiæ auctoritatem conciliaverant, firmissimæque posuerant posterioris consuetudinis fundamenta. Quæ omnia ex supparibus ejusdem Friderici I. Scriptoribus a Cardinali Baronio ad annum mclv. excerpta sunt.

VIII. Sed ut aliis exemplis rem comprobemus, auctor est in Appendice ad Siebertum Robertus de Monte, qui suorum temporum res gestas summa fide breviter perstrinxit, Ludovicum VII. Galliarum Regem, & Henricum II. Regem Anglorum super Ligerim fluvium anno mclxii. convenientes, Alexandrum Papam III. in honore congruo suscepisse, & usos officio stratorum, pedites dextra lævaque frenum equi ipsius tenentes, eum usque ad præparatum habitaculum perduxisse, eoque mediante, partem inter eos firmam restitutam esse. Hæc Robertus. In occursum autem Regum Francorum, & Anglorum admiranda porro est summa Dei potentia, & admirabilis providentia, ut duo potentissimi Reges inter se ipsos jugiter dissidentes ad cultum, & venerationem Vicarii sui convenerint pacifici, eidemque adeo humili obsequio concordēs infervierint, spectaculum Deo, Angelis, & hominibus gratissimum exhibentes, quale hactenus nunquam in Orbe visum fuerat. Quamquam enim alias sæpe a singulis seorsum, sive Regibus, sive Imperatoribus, ejusmodi viderimus exhibitum Romanis Pontificibus stratoris ministerium; ut tamen ad hoc duo simul convenerint adeo magni Principes alias inter se dissidentes, nusquam antehac scriptum invenimus, ut notavit Spondanus ad ipsum annum mclxii. Num. iv.

IX. Longum esset omnia velle hujusmodi obsequii Papæ a Principibus impensæ exempla

To. I.

percurrere. Teste Thomassino citato loco, Numero vii. Carolus Siciliæ Rex frater S. Ludovici Regis Galliarum Urbano IV. Pontifici stratorem se exhibuit, eoque postea exemplo usi sunt Neapolitani & Siculi Reges. Hinc cum S. Cælestinus V. electus Pontifex anno mccciv. nequaquam equo vestus, sed humili asello sedens Aquilam pergeret, ut ornamenta Pontificalia susciperet, a Carolis patre, & filio Regibus Siciliæ, & Hungariæ, aliisque Magnatibus deductus, eam Urbem ingressus est, iisdem Regibus asini frena tenentibus, ut tradit Jacobus Cardinalis in suo de S. Petro Cælestino Poemate apud Bollandianos die xix. mensis Maji, sic inter alia inquires:

*Intumidus vilem Murro conscendit asellum,
Regum frana manu dextra lævaque regente Pontificis.*

Tenuisse eundem Carolum II. Siciliæ Regem, & Carolum Martellum ejus filium Regem Hungariæ equi frænum in Coronatione Bonifacii Papæ VIII. docet idem Jacobus Cardinalis Stephaneus, seu Gajetanus, ubi describit ordinem processionis, quæ facta est a S. Petri Basilica ad Lateranum, quæ ex dictis superius in Commentariis ad Titulum II. fiebat statim post Consecrationem. Ait autem laudatus Auctor, Bonifacium Pontificem equo albo infidentem Frigio, seu Thiara Pontificali insignitum processisse ad Lateranum, Carolo II. Siciliæ, & Carolo Martello ejus filio Hungariæ Regibus frænum æqui tenentibus.

... Tunc lora tenebant

*Illustres Gallique Duces, Carolusque Secundus
Rex Siculus, Carolusque puer prolesque juvenis
Floridus, Ungariæ materno e stipite nomen
Regis habens: dextram pater accipit, atque sinistram*

Filius.

Rurfus, ubi Clemens V. creatus Pontifex anno mcccv. Lugdunensem Civitatem solemni iniit pompa, Philippum Pulchrum Franciæ Regem stratoris munus obiisse, testis est ad ipsum annum Raynaldus, Num. xiii. Item Neapolis Rex Carolus Dyrrachinus Urbano VI. stratorem & ipse se exhibuit. Sigismundus quoque Imperator Martino V. & deinde Eugenio IV. ut idem Raynaldus in Annalibus refert.

X. Restat ut posteriorum Imperatorum exempla promamus, ac præsertim Friderici III. qui quidem quum anno mcdlii. Romam Imperii Corona decorandus venisset, usitatis officiis Nicolaum V. Papam incunctanter prosequutus est, pedes ejus cum Imperatrice conjuge exosculatus, & stratoris impleto munere, ut in Historia ejusdem Friderici Æneas Sylvius tradit: *Ut autem Coronationi, divinisque rebus impositus modus, Leonora, conjux scilicet Friderici, in suas Ædes secessit. Papa, & Imperator ad gradus Basilicæ, nempe S. Petri, ubi peracta fuerat Coronatio, venerunt. Ibi Pontifex palafredum ascendit, eique Caesar dextratoris officium per aliquot passus exhibuit; equoque deinde conscenso, usque ad Ecclesiam S. Mariæ in Cosmodin una profecti sunt.* Atque hæc est Ecclesia, ad quam coronatus Imperator, & Pontifex solemni pompa & processione equitantes sub baldachino procedebant juxta ritum in nostro §. præscriptum, & in sequenti §. xxvii. ubi inter alia sic inquit: *Hoc ordine recta via per Campum*

D d 2

pum

pum Floræ, & Judæorum plateam devenient ad Ecclesiam S. Mariæ in Cosmedin. Sed de hac Ecclesia, & de ceremoniis in ea habitis occasione ejus processionis dicemus infra in Commentario ad sequentem ipsum §. xxvii.

XI. Ceterum quod stratoris officium spectat a Friderico impensum Nicolao V. Papæ, notandum & illud hoc loco cenſeo, voluisse quidem Fridericum ipsum eodem rursus officio fungi erga Paulum II. anno MCDLXIX. quo iterum Romam venit, sed abnuisse Pontificem, cujus nutu in solemni per Urbem equitatione ambo simul equo conscenderunt, uti rem narrat Augustinus Patricius Actor nostri hujus Cæremonialis in descriptione adventus Friderici III. Imperatoris ad Paulum Papam II. quam legere est apud Mabillonium Tomo 1. Musei Italici, pag. 156. & seqq. Sic enim inquit laudatus Patricius, Num. xx. *Cæsar, ut pia Religioni satisfaceret, venerareturque pro viribus Jesu Christi Vicarium, illique se se humiliaret, cum Pontifex equum vellet inscendere, cito accurrit, staffamque equi Pontificalis arripiens, tanquam unus esset ex Pontificis servis, eam quoad Pontifex inscenderet, tenere volebat. At Pontifex humanitatem religiosi Principis collaudans, negat, se equum ascensurum, nisi prius ille discedat; pariterque & ipse inscendit equum, quem Pontifex ei dono dederat. Laudata est ab omnibus, & admirationi a plerisque habita ea Cæsaris in Romanum Pontificem observantia, ac devotio. Atque hic iterum nota, quod sæpius dictum fuit a nobis, Christo ipsi impensum fuisse hujusmodi honorem, quem Imperatores, Regesque ex pervetusta consuetudine religiosorum Principum Summo Romano Pontifici, qui Christi vices gerit in terris, soliti semper fuerunt perſolvere.*

XII. Denique cum Carolus V. anno MDXXIX. Bononiam venisset, a Clemente VII. ad eam Urbem profecto coronandus, ut inter alios narrat Raynaldus ad annum MDXXX. non modo Pontifici genuflexit, ejusdem pedes, manum, genamque osculo coluit; verum etiam expleto Coronationis ritu, voluit, dum Pontifex equum conscenderet, stapedam manu tenere, tametsi id vetaret Clemens, qui tamen tandem, persistente Imperatore, cessit contestatus id Christo, non sibi honoris haberi: *Pontifex toleravit, referendo talem actum humilitatis ad honorem Salvatoris, cujus vices in terris gerebat.* Sed passus non est Pontifex, ut Imperator equum aliquantulo viæ spatio deduceret; sicque nonnihil variatum est ab eo, quod in nostro hoc §. edicitur, cujus verba abs re non erit hoc loco repetere: *Prævenit ad equum Pontificis, nempe Imperator, & in honorem Salvatoris nostri Jesu Christi, cujus vices Pontifex in terris gerit,*

tenet staffam quoad Pontifex equum ascenderit; & deinde accepto equi freno, per aliquos passus ducit equum Pontificis. Tum vero hæc subjicit: Pontifex, dum Imperator hæc humilitatis officia vult exhibere, debet aliquantulum modeste recusare, & tandem cum aliquibus bonis verbis honorem non in personam suam, sed illius, cujus locum tenet, recipiendo, permittit illum aliquantulum progredi; tum firmat se, & nullo pacto permittit Cæsarem ulterius ire; qui mox conscenso equo suo, accedit ad sinistram latus Pontificis, & sub eodem baldachino equitat.

XIII. Notatu vero inter alios dignus est ritus ille, qui in ea solemni Pontificis equitatione cum Imperatore servari aliquando solitus fuit: recensentur enim in hoc nostro §. duo portantes *laternas cum lumine ante Sacramentum equitantes; deinde equus albus phaleratus cum tintinnabulo portans Sacramentum, & supra Sacramentum baldachinum per cives Romanos portatum, & circa duodecim intorticia, quæ portantur per duodecim familiares, sive per duodecim Beneficiatos S. Petri cum Superpelliceis.* Similis huic ritui est plane & ille, qui in solemnissima Romanorum Pontificum equitatione olim observabatur, dum Romæ Summus Pontifex coronatus e Vaticana Basilica ad Lateranensem ad possessionem capiendam ipsius Basilicæ Lateranensis splendidissima pompa proficiscebatur, uti dictum est supra Tit. II. in Commentario ad §. xix. Agit plane & de hoc ritu eruditissimus Angelus Rocca Sacrarum Apostolici Præfectus & Episcopus Teggastensis in suo Commentario, *De Sacrosancto Christi Corpore Romanis Pontificibus iter conficientibus præferendo*, Parte II. Teste Augustino Patricio in descriptione adventus Friderici III. ad Paulum II. Pontificem, Num. xxiii. in solemni equitatu ipsius Pontificis cum Cæsare, *ducebatur equus albus Sacratissimum Christi Corpus vehens in capsula ornatissima reconditum, quem præcedebat Sacrista Pontificis, baculum teretem manu ferens, & supra sacram Hostiam sericeum umbraculum ferebatur; circum circa vero funalia multa accensa.* Rursus de sacra Eucharistia per Civitatem Bononiæ, peracta Caroli V. Imperatoris Coronatione anno MDXXX. delata mentionem facit Paulus Jovius Lib. xxvii. Historiæ sui temporis, dum Clementis Papæ VII. ac Cæsaris per Civitatem ipsam equitantium admirabilem apparatus, ac pompam describit, sic dicens: *Nec multum inde succedebat Eucharistia sub aurea umbella, loculo crystallino inclusa, & sellæ generosi, & tamen pacati equi super imposita, laterna ingens ante, & circa dena funalia ferebantur.* Sed hic ritus tandem in desuetudinem abiit, uti supra notavimus citato Titulo II. in Commentario ad §. xix.

§. XXVII.

De processu Imperatoris ad Ecclesiam S. Mariæ in Cosmedin, & de creatione Militum, seu Equitum ab eodem fieri solita ad Pontem Hadrianum.

Hoc ordine recta via per Campum Floræ, & Judæorum plateam devenient ad Ecclesiam S. Mariæ in Cosmedin, & ibi Pontifex, si Rosam habet, illam eques Imperatori equiti dono dat. Et ad dexteram conversus in Transtyberim cum suis omnibus ad Palatium revertitur. Cæsar autem via, qua sibi melius placet, Rosam manu gestans ad Pontem

tem Hadrianum redit, ubi viros complures, & de se optime meritos equestri dignitate insignire solet.

C O M M E N T A R I U S.

I. **J**uxta Romanum Ordinem XIV. cui concinit ms. Cæremonialis Codex Pierfanctianus, solemnissima illa equitatio Papæ, & Imperatoris agebatur, usque ad Ecclesiam S. Mariæ in Traspadina, ubi dato sibi osculo ad invicem, non corde, sed corpore separabantur. Sed notanda est cæremonia hoc loco servata in Coronatione Friderici III. Imperatoris a Nicolao Papa V. celebrata anno MCDLII. ex ea enim desumptum est, quod in hoc nostro Cæremoniali præscriptum habemus. Ergo peracta solemniter in Basilica S. Petri Coronatione, Nicolaus Pontifex, ut Zantflietus in suo Chronico tradit, ante gradus ejusdem Basilicæ Friderico Imperatori dono dedit Rosam auream ea die benedictam, deinde eum usque ad Hadriani molem, seu pontem comitatus est. Ibi Imperator inter idem Castrum, & Ælium pontem CCLXXXI. milites, idest equites creavit, & mox Imperatoriis insignibus ante eum prælatis, videlicet Pomo, seu pila aurea, Sceptro &c. magno comitatu ad Lateranensem Basilicam equitavit, ubi prandium sumsit, & sub nocte ad Vaticanas Pontificis ædes rediit. Imperatrix vero e Vaticano pedem non movit. Hæc Zantflietus, quæ legere est apud eruditum Scriptorem Dominicum Georgium in Vita Nicolai V. anno MCDLII. Num. VIIII.

II. Puto equidem, labi Zantflietum, cum ait Pontificem comitatum fuisse Imperatorem usque ad Hadriani molem, profecti enim ambo sunt simul usque ad Ecclesiam S. Mariæ in Cosmedin, uti expresse nos docet oculatus testis Æneas Sylvius in Historia ipsius Friderici, ubi inter alia ita inquit: *Pontifex palafredum ascendit, eique Caesar dextratoris officium per aliquot passus exhibuit, equoque deinde conscenso, usque ad Ecclesiam S. Mariæ in Cosmedin una profecti sunt.* Additque mox etiam, inde Pontificem in Palatium rediisse, Cæsarem vero in pontem Hadriani profectum, ibi Albertum Fratrem, pluresque Duces, & Comites ad militia provexisse honorem, ter quemque gladio percutientem. Teste laudato Sylvio, trecenti eo die percussi Milites referuntur, cum Zantflietus Milites CCLXXXI. tunc creatos referat. Quicquid sit de Militum, sive Equitum numero, tradit mox idem Æneas Sylvius, Alemanos ejus esse opinionis, in eo ponte, qui manu Cæsaris percussi sunt, cæteros milites antecedere; quia scilicet hos primo loco, secundo qui Aquisgrani creantur, tertio loco Hierosolymitanos ponunt, reliquos Milites minores habent.

III. Sed hanc opinionem egregie refellit memoratus Historiæ Friderici Auctor Æneas Sylvius, cujus verba digna sunt, ut hoc loco describamus: *Verum, inquit, id hodie ab usu remotum. Ut quisque natu melior, opibus ditior est, eo dignior habetur. Virtutis præmia pecunia recipiunt. Apud omnes peræque gentes primus honor divitiis datur, pauper ubique jacet. Quod si recta ratio nos duceret, nemo militia cingulum ferret, qui præclarum aliquod in armis facinus non egisset, aut stravisset provocantem hostem, aut murum ascendisset, aut vallum transilivisset, aut civem servasset. Qui sci-*

rent ordinem in bello tenere, signa sequi, Imperium observare, hostem ferire, præsidia agitare, humi dormire, eodem tempore inopiam & laborem tolerare, astatem & hyemem juxta pati, nihil metuere, nisi famam turpem, hos milites assumere deceret. Sed nos hodie delicatos, & in plumis nutritos, qui nudatum enses nunquam videre, quin & infantes in cunis jacentes militaribus decoramus honoribus. Quid quod homines docti, atque inter litteras educati, qui se debili corpore, & animo pavido sciunt, sumere insignia militia non verentur? Quod si Milites exercitati bellis mei animi essent, peterent & ipsi Doctoratus honorem. Quippe non minus isti Leges, quam illi arma noverunt. Sed neque Doctoratus ipse sincerus est. Indoctos quamplures Doctores novimus, multosque Cæsar in Italia promovit, quibus aurum pro scientia fuit. Hætenus Æneas Sylvius, qui etiam ad rem nostram mox subjicit, Fridericum III. Cæsarem, sui temporis errorem sequutum, quamvis nonnullos Viros fortes, ac bello exercitatos, plurimos tamen ineptos armis Milites percussisse, seu equites ad ipsum Hadrianum pontem creasse. Is enim erat creandi equites ritus, illos ter Gladio leviter percutere; de quo ritu videri possunt quæ diximus Tomo I. Romani Pontificalis in Commentario ad Titulum XXI.

IV. Celebris plane est Hadriani pons ob istam Equitum creationem, quam non modo recens coronati Imperatores in solemnissima illa equitatione, quam supra enarravimus, peragebant, verum etiam in aliis equitationibus, quæ solemniter quoque ritu fieri solitæ aliquando fuerunt, cum scilicet Coronatione jam donati Imperatores ipsi Romam iterum veniebant. Exemplum ejus rei habemus in memorato Friderico III. qui coronatus Romæ a Nicolao Papa V. anno MCDLII. iterum ad Urbem se contulit Pontifice Paulo II. factaque tunc etiam solemniter equitatione, quam narrat Augustinus Patricius in descriptione adventus Friderici III. ad ipsum Paulum II. apud Mabillonium Tomo I. Musei Italici: *ubi ad pontem sub Mole Hadriani perventum est, Cæsar ibi subsistens cum Pontifice, & Cardinalibus, Nobiles Viros supra centum Germanos, fere omnes, militaribus insignibus donavit, nudo, ac plano ense quemque ter verberans levissime; ut ibidem testatur Patricius Num. XXIV. Porro pons, de quo loquimur, qui hodie S. Angeli dicitur, olim vero Ælius ab Ælio Hadriano prope sepulchri sui molem factus, ab ipso Nicolao Papa V. restitutus est, ut ejus nomen in pilis inscriptum indicat; idemque illius ingressum, domibus aliquot solo æquatis, ampliavit; ibidemque Clemens VII. statuas Sanctorum Petri & Pauli locavit, in quarum prima ad basim legitur: *Hinc humilibus venia*, in altera vero: *Hinc retributio superbis.* A lateribus ipsius pontis Clemens IX. locari fecit marmoreas variorum Angelorum statuas, qui manibus suis insignia Dominicæ Passionis ostendunt. Plura alia de ipso ponte omnium celeberrimo legi apud varios & eruditos Auctores possunt, qui de ædificiis Urbis varia opuscula scripsere.*

§. XXVIII.

De Cæsaris profectione ad Lateranum, & de cæremoniis ibidem peragi solitis.

Quo facto, ad Lateranum cum suis progreditur. Canonici & Capitulum Ecclesiæ processionaliter (1) Cæsari in porta principali occurrentes, illum honorifice suscipiunt, & postquam Crucem, & Reliquias osculatus fuerit, incensant, & præcedentes, atque Cantantes *Te Deum laudamus*, ad Altare majus deducunt, ubi procumbens super Fal-distorium orat detecto capite; deinde surgens osculatur Altare. Tum resumta Corona recipitur in Canonicum, & in Fratrem Ecclesiæ Lateranensis, & Canonicos omnes recipit ad osculum pacis. Quibus finitis, ascendit ad Palatium Lateranense, & cum suis celebrat solemne convivium suis moribus, & cæremoniis. Deinde si placet revertitur (2) ad Palatium Apostolicum ad Cameras suas.

C O M M E N T A R I U S.

I. **R**itum in §. præsentis præscriptum servatum adamussim fuisse in Coronatione Friderici III. Imperatoris celebrata a Nicolao Papa V. anno MCDLII. testis est sæpe a nobis laudatus Æneas Sylvius in Historia ejusdem Friderici, ubi postquam retulit Militum, seu Equitum creationem ab eo factam ad pontem Hadriani, de qua in Commentario præcedenti dictum fuit, ita subjicit: *Deinde cum jam sol occideret, ad noctem enim pertracta solemnitatis est, ad Lateranum se contulit, ubi in Canonicum Basilicæ S. Joannis receptus, quæ prima Orbis Ecclesiæ dicitur, splendidum ibi convivium habuit, in quo & nos ad mensam Cæsaris sedimus cum Nicolao Placentino Episcopo, cujus supra meminimus. Cæna in medium noctis tracta est. Demum ad Palatium Apostolicum multa nocte reditum, in quo fuisse hospitium Cæ-*

saris, ante demonstravimus. Cæsar qui jejunus totam diem, gravissimam gemmis & auro Coronam gestaverat, indutusque trabea trecentos Milites gladio percusserat, idest equestri dignitate donaverat, libenter quievit. Ritum esse antiquum, ut Imperatores recens Romæ coronati in Canonicos reciperentur in insignibus Ecclesiis S. Petri, & S. Joannis Lateranensis, jam supra, atque alibi ostendimus, ubi etiam notavimus, eum etiam ritum servatum fuisse in Coronatione Caroli V. tametsi Bononiæ celebrata. Canonici siquidem Lateranenses, & S. Petri Roma Bononiam profecti sunt, ut ipsum Carolum Collegiis suis, seu Capitulis adjungerent, & in Concanonicum, & Confratrem reciperent, cum ibi Corona Imperii donatus est a Clemente Papa VII. anno MDXXX. uti post alios narrant Spondanus, & Raynaldus ad annum MDXXX.

§. XXIX.

De Coronatione Imperatoris absente Papa.

Si quando autem accideret, quod propter absentiam Summi Pontificis ab Urbe, Cæsar non posset ab ipso Pontifice coronari, consuevit Pontifex mittere ad Urbem aliquem Episcopum Cardinalem, qui simul cum Legato Apostolico, qui Urbi præest, Imperatorem electum coronet. Si autem Legatus esset iste Episcopus Cardinalis, non esset necessarium mittere alium Episcopum, sed quemcumque vellet alium Presbyterum Cardinalem, & tunc procedetur hoc modo. Electus Imperator ad Urbem veniens pro Corona Imperiali habebit obviam Barones, Nobiles, Officiales, Civesque Urbis, & Officiales Curix Romanæ, & remanebit extra moenia illa nocte, ut supra dictum est. Sequenti die intrabit per portam sub arce S. Angeli, quæ, ut diximus, non est Collina, cum suis Principibus ordine prædicto. Et in porta recipietur a Vicario Pontificis cum suis Prælatiis, & Clero Urbis (3) processionaliter paratis; & deducetur, ut supra, ad gradus Basilicæ S. Petri, ibique non super suggestum, sed ante primas portas recipietur ad osculum tantum per Episcopum Cardinalem Coronatorem, & Legatum, qui ibi aderunt cum aliis Prælatiis Curix parati cum Pluvialibus, & Mitris. Aderunt etiam cum Cardinalibus Officiales Curix, Subdiaconi, Auditores, Acolythi, & si qui sunt alii, & etiam Barones, aliique Nobiles Sanctæ Romanæ Ecclesiæ. Et statim post osculum offerat aurum duobus Cardinalibus, quod offerre debet Pontifici, & dicat hæc verba: *Si Sanctissimus Pater Dominus noster N. Summus Pontifex præsens hic esset, offerrem illi aurum istud* (4) *præsentialiter; sed per ejus absentiam*

(1) Ita in editione Romana; in Veneta vero 1. legitur *supplicabundi*. (2) Ita etiam in Romana editione, sed in citata 1. Veneta, *recurrat*. (3) Ita in Romana editione; in Veneta 1. legitur, *in modum supplicantium*.

(4) In eadem Veneta editione legitur, *præsens*.

offerro ipsum aurum vobis Dominis Episcopo, & Legato Cardinalibus recipientibus illud vice & nomine dicti Domini nostri Papæ. Quo facto, intrabunt porticum, & si tunc erit procedendum ad solemnitatem Coronationis, quod commode, & decenter fieri potest, ibi supra Altare S. Mariæ in Turribus præstabit juramentum fidelitatis, in manibus Cardinalium. Et similiter si illud juramentum esset innovandum, seu confirmandum, tunc immediate innovabit. Deinde recipietur in Canonicum Ecclesiæ Sancti Petri, ut superius dictum est. Intrabit deinde Ecclesiam, & ibi ante portam argenteam Episcopus Cardinalis dicet super eum primam Orationem. Deinde ducitur ad Capellam S. Gregorii ad capienda sua paramenta, & Episcopus Cardinalis vadit ad Altare majus, & super Faldistorium capit Sandalia, & paramenta omnia Pontificalia. Et nota, quod debet habere expresse facultatem a Pontifice super Altare B. Petri celebrandi, ut moris est. Cæsar indutus Imperialibus indumentis venit ad medium Ecclesiæ, & ibi super eum Legatus Apostolicus dicet secundam Orationem. Veniet deinde ad Confessionem B. Petri, & procumbet in Faldistorio, & Diaconus, qui servit in Missa, facit super eum Litaniam, Orationem autem cum Versiculis, & *Pater noster* dicet Legatus Apostolicus. Deinde ducetur ad Altare S. Mauritii, & ibi inungitur a Cardinali celebrante tam ipse, quam Augusta, si adest, cum Orationibus opportunis. Revertentur deinde ad Altare, & facta Confessione, Imperator ad suggestum sine osculo pacis, Celebrans (1) ad Faldistorium suum revertitur, & proceditur in Missa usque ad Graduale. Dum cantatur Graduale, Imperator descendit ad Altare, & Celebrans Cardinalis ante Altare stans cum Mitra Gladium sumit de Altari, & illum nudum tradit Imperatori, dicens: *Accipe Gladium &c.* & idem dicet Legatus submissa tamen voce. Det eidem mox Pomum, & Sceptrum cum sua Oratione eodem modo. Mitras (2) autem, & Coronas Imperiales ambo imponent Cæsari, & Augustæ; sed Legatus alta voce profert verba: *Accipe signum &c.* & Celebrans dicet eadem voce submissa. Coronati Augustus, & Augusta revertuntur ad suos suggestus sine osculo pacis; & ad Offertorium veniunt cum Coronis, & habitu Imperiali, & oblato auro, revertuntur ad suggestus, neque ministrabit Imperator Calicem & ampullam, sed tempore congruo veniet ad Communionem sine Manto, & Coronis. Post Communionem Imperatori non dabitur osculum pacis a Celebrante; sed revertetur ad suum suggestum Imperator. Finita (3) Missa, ipse cum suis, & cum Legato, si placebit, ibit Lateranum, & ibi perficiet suas solemnitates. Cæremoniæ omnes, quæ pertinent ad personam Pontificis dimittantur, ut oscula pedum, manuum, oris. Quin (4) etiam nec in Missa illi deserviet Imperator, quod Pontifici præstitisset præfenti, nec stapham illi, dum equum inscendit, tenet, nec equum ducit. Hæc fere omnia servata fuerunt cum Carolus IV. Imperator coronatus fuit Romæ per Dominum Petrum Episcopum Ostiensem, quem ex Avenione Innocentius Sextus Nuncium Apostolicum ad hoc miserat, & per Dominum Ægidium de Albernozio Tituli S. Clementis Presbyterum Cardinalem, ac Legatum Apostolicum in Italia anno Salutis millesimo trecentesimo quinquagesimo quinto (5), Nonis Aprilis, ut ex Litteris ipsius Caroli, quæ adhuc extant, & registratæ sunt in Archivii Ecclesiæ, publice patet. Voluit tamen idem Pontifex, quod Cardinales prædicti publice protestarentur Domino Imperatori, quod propter omissionem reverentiarum, obsequiorum, & multarum cæremoniarum, quæ pertinent ad personam Romani Pontificis, non esset aliquo modo derogatum privilegiis, & honorificentis Romanæ Sedis, & suorum Successorum; & de hac protestatione, & consensu Imperatoris exigenter quadruplices Litteras Regalibus, & Imperialibus sigillis munitas, sicut & factum est.

COMMENTARIUS.

I. **P**AUCIS hic me expediam, quod ritus ipsos in Coronatione Imperatoris absente Papa servandos, in Commentariis superioribus, ubi se se nobis dedit occasio, jam enarravimus. Porro docet inter alia hic §. ritus omnes, quos ipse descripsit, servatos fuisse, cum Carolus IV. coronatus fuit Romæ per Dominum Petrum Episcopum Ostiensem, quem ex Avenione Innocentius VI. Nuncium Apostolicum ad hoc miserat, & per Dominum Ægidium de Albernozio Tituli S. Clementis Presbyterum Cardinalem, ac Legatum Apostolicum in Italia anno salutis millesimo trecentesimo quinquagesimo quinto Nonis Aprilis. Labuntur qui coronatum ajunt fuisse Carolum anno mcccclv. nisi dicamus, computari in nostro §. annos ab Incarnatione Christi.

Chri-

(1) Deest Celebrans in Veneta 1. editione. (2) Mitras ibidem deest. (3) Ita in ipsa Veneta editione, in Romana vero legitur; *Finietur Missa, & ipse &c.* (4) Ita in citata editione 1. Veneta, in Romana autem post illa verba & oris, legitur, *servitium in Missa, servitium in equitando, ducendo equum, & similia.* (5) Ita in Romana editione, in Veneta 1. legitur, *anno Salutis millesimo trecentesimo quinquagesimo sexto.*

Christi, non vero ab ejus Nativitate. Quicquid sit, solvenda est hic ea primum difficultas, cur nempe Innocentius Papa VI. ad inungendum, & coronandum Carolum IV. Imperatorem, solum Episcopum Ostiensem Romam miserit, collega addito Ægidio Alvari Presbytero Cardinali Tituli S. Clementis, Apostolicæ Sedis in Italia Legato, permittens etiam, ut si alter ei cæremoniæ vacare non posset, alter solus eam exequeretur; cum alias Clemens V. ad Coronandum Henricum VII. Caroli IV. avum, quinque Cardinales miserit, & ex Ordine Romano XIV. Capite CV. & ex Matthæo Villanio Lib. IV. Capite LXXI. constet, jus coronandi Imperatorem ad Episcopos Ostiensem, Portuensem, & Albanensem pertinere? Difficultatem solvit ipsemet Villanius loco citato, & Lib. III. Cap. CIII. ubi narrat, cum de eligendis ad eam peragendam. Coronationis cæremoniam Cardinalibus una cum Petro Bertrandi Episcopo Ostiensi, & Talayrandus Episcopus Albanensis, & Guido de Bologna Portuensis eum etiam honorem sibi deberi contenderent ex privilegio suarum Ecclesiarum, statutum fuisse ab Innocentio VI. die X. Novembris, eos de jure debere esse Legatos, ut docet Liber Episcopi Ostiensis de ea Legatione conscriptus: verum Talayrandum, & Guidonem, licet magnis animis, & magna contentione eum honorem expetiissent, & obtinuissent, remisisse tamen, quia Papa, & Cardinales noluerunt suppeditare sumtus ad illud iter Romanum, sicut alias moris erat: ideoque ipsos considerata inopia Caroli, qui non erat eis satisfaciendo, accepto destituisse cum opprobrio ambitionis, & avaritiæ; quod ne augeret Pontifex, noluisse alios mittere, sed eam rem commisisse prædicto Ægidio Alvari, qui tamen & ipse negotium integrum Petro Cardinali Episcopo Ostiensi dimisit. Sed & de hac re jam nos alias diximus, viderique possunt citati Spondanus & Raynaldus.

II. Ante Carolum IV. jam Romæ fuit coronatus absente Pontifice, sed ejus tamen jussu, Henricus VII. jussu scilicet Clementis Papæ V. qui Apostolicam Sedem in Gallias transfulerat, quique ritus etiam e veteribus Romanæ Ecclesiæ monumentis excerptos in ea Coronatione servandos præscribit, dato de ea re Diplomate ad quinque S. R. E. Cardinales, ad Arnaldum scilicet Sabinensem Apostolicæ Sedis Legatum, Leonardum Albanensem, & Nicolaum Ostiensem Episcopos, itemque ad Franciscum S. Lucie in Silice, & Lucam S. Mariæ in Via lata Diaconos Cardinales Nuntios. Extat hoc Diploma apud Raynaldum ad annum MCCCXI. Num. VII. & seqq. ubi inter alia protestatur, & Apostolica auctoritate decernit Clemens Papa V. ex eo quod multæ observantiæ, multaque solemnities, multæque reverentiæ Romano Pontifici competentia, propter ejus absentiam omittuntur, *nullum ex hoc juris, vel facti Romanæ Ecclesiæ, ac nobis, nostrisque Successoribus præjudicium generari, quin cum casus Regis Romanorum in Imperatorem coronandi occurreret, omnia exhibeantur, & fiant per coronandos Romanis Pontificibus, sicut in forma, qua in Archivio Ecclesiæ, & Pontificali Ordinario continetur, superius descripta, serius est expressum.* Additque mox: *Ad ejusdem autem Ecclesiæ Romanæ, nostram & Successorum nostrorum conservationem juris, atque cautelam volumus per vos ab eodem tam Rege coro-*

nando, quam Imperatore coronato expresse his nostris protestationi, & Decreto consentiente recipi patentes Litteras quadruplicatas, de verbo ad verbum tenorem præsentium continentes, suo Regali primum sigillo, ac postmodum sua Imperiali Bulla aurea communitas; quas vos Albanensis, Ostiensis, & Lucas, duo, aut alter vestrum nobis, aut Camera nostra fideliter assignetis. Hactenus Clementis V. Papæ Litteræ datæ in Prioratu de Grausello prope Malausanam Vassonensis Diocesis, xiiij. Kal. Julii anno vi. Pontificatus sui scilicet, Christi Domini autem anno MCCCXI.

III. His plane concinunt, quæ deinde a Carolo IV. Romæ coronando exegit Innocentius Papa VI. Voluit enim, ut ait noster §. in fine, *quod Cardinales prædicti (nempe Petrus Episcopus Ostiensis, & Ægidius de Albernoziq Tituli S. Clementis Presbyter Cardinalis, quibus facultatem coronandi Carolum IV. Imperatorem dederat) publice protestarentur Domino Imperatori, quod propter omissionem reverentiarum, obsequiorum, & multarum cæremoniarum, quæ pertinent ad personam Romani Pontificis, non esset aliquo modo derogatum privilegiis, & honorificentis Romanæ Sedis, & suorum Successorum; & de hac protestatione, & consensu Imperatoris exigent quadruplices Litteras Regalibus, & Imperialibus sigillis munitas, sicut & factum est.* Porro, ut inquit Auctor secundæ Vitæ Innocentii VI. Pontificis apud Baluzium in Vitæ Paparum Avenionensium, *Karolus Rex Alemannia, & Bohemia descendens in Italiam Coronam Imperialem de manibus Domini Petri Episcopi Ostiensis ad hoc missi, a laudato nempe Innocentio Papa VI. in Basilica S. Petri Romæ, in die Sancto Paschæ, seu die V. Aprilis anni MCCCIV. honorabiliter suscepit, & uxor ejus cum eo, statim Romam exiens eo die.* Quia scilicet jam antea se juramento adstrinxerat, quod ante diem Coronationi assignatam non ingrederetur Romam, eademque Coronationis die, legitimo cessante impedimento, Roma recederet, & nulla mora in Terris Ecclesiæ facta, continuatis itineribus ad Terras Imperii se se reciperet, ad vitandas videlicet occasiones rixarum cum Ecclesiæ subditis, & pruriginem occupandi aliquid ditionis ejus, aut quidquam aliud contra Sedem Apostolicam agendi, sicut a plerisque aliis factum fuerat, quæ inextricabilia inter Ecclesiam, & Imperium dissidia cum universali Christianorum detrimento generare possent. Sed de hac re jam superius diximus, viderique possunt Spondanus, & Raynaldus ad prædictum annum MCCCIV. & inter alios Scriptores Pagius in Vita Innocentii VI. Numero XIV.

IV. Siquis autem quærat, cur sedentibus Avenione Pontificibus, ab iis minime celebrata fuerit Coronatio ibidem, cum alias constet, Ludovicum Pium a Stephano IV. aliis V. Rhemis fuisse coronatum Imperatorem. Responsio in promptu est, quia scilicet id Galli minime permisissent. Teste siquidem Spondano, anno Domini MCCCXXVII. non potuit Carolus IV. a Rege Galliæ impetrare, ut Natale Christi ad Sanctum Quintinum ageret; quod cum moris illi esset, ut ad Nocturna Officia septimam Lectionem in veste Imperatoria recitaret, molestissime laturo essent Galli, ea vel umbra jurisdictionis eum in Galliis gaudere, in quas nil unquam ju-

ris

ris fuit Germanis Imperatoribus; Quoniam cum moris esset, Imperatorem nocte Natalis septimam Officii Matutinalis lectionem in habitu, & Insignibus Imperialibus recitare, nequaquam id licuisset ei intra Regnum Francia nihil Imperio debens exercere. Verba sunt memorati Spondani ad prædictum annum MCCCXXVII. Num. xv. Ce.

terum quæ dici in hunc §. possent, cum alias explicata a nobis jam fuerint, consulto omittimus, ne actum iterum agamus. Videri tamen potest Raynaldus ad annum MCCCXI. ubi Ritus coronandi Imperatoris Romæ absente Papa recenset descriptum a Clemente V. Romano Pontifice in Gallia residente,

§. XXX.

De Coronatione Imperatricis sine Imperatore.

Imperatrix, si venerit Romam pro Corona Imperiali suscipienda sine Imperatore, vel quod non potuit venire cum Imperatore, vel post ejus Coronationem ei est conjuncta, hoc ordine coronabitur. Die, qua Urbem intrabit, procedent ei obviam Nobiles, & Officiales Urbis, & Ordines Curia, ut de Cæsare dictum est. Sacer Senatus ante portam Urbis eam expectabit, & media inter duos primos Cardinales Diaconos introducetur. In fine autem & sub baldachino Clerus cum Processione in porta (1) illi occurret; ducetur ad Pontificem, qui eam in publico Consistorio in prima Aula ad pedes, & manus osculum recipiet, ut alii Reges recipi consueverunt; non tamen sedebit inter Cardinales, sed post osculum pedes, & manus discedet, (2) & sociabitur ad suum hospitium. Deinde parabitur in Ecclesia S. Petri suggestus extra cancellos pro Imperatrice, & dicta die Pontifex procedet ad Ecclesiam processionaliter (3) sub baldachino, cum paramentis temporis congruis ascendit ad Altare, orat, sedet, ubi solet capere paramenta; cui fit reverentia a Prælati. Incipitur Tertia, & accipiet Sandalia, & procedet usque ad finem Tertiæ, & capit omnia Pontificalia indumenta. Interim duo juniores Diaconi Cardinales cum suis Cappis laneis ducunt Augustam ad Ecclesiam; & prior Episcopus Cardinalis cum Pluviali, Stola, & Mitra accedens in tempore, expectat eam in porta Ecclesiæ principali, & ibi super eam genuflectentem deposita Mitra legit hanc Orationem.

Omnipotens sempiterne Deus fons & origo totius bonitatis, qui feminei sexus fragilitatem nequaquam reprobando avertis, sed dignanter comprobando potius eligis, & quod infirma mundi, ut fortia confunderes, eligenda decrevisti: quique etiam gloriæ, virtutisque tuæ triumphum in manu feminae Judaicæ olim plebis de hoste sævissimo reservare voluisti; respice quæsumus ad preces humilitatis nostræ, ut supra hanc famulam tuam N. quam supplici devotione Imperatricem eligimus, benedictionum tuarum dona multiplices, eamque dextera tuæ potentia semper, & ubique circumda; & ut dono tui Numinis undique firmiter adjuta, ut visibilis, seu invisibilis hostis nequitias triumphaliter expugnare valeat, & una cum sacra Rebecca, Lia, atque Rachele, beatissimis, reverendisque feminis, fructu uteri sui secundari, seu gratulari mereatur ad decorem totius Imperii, statumque Sanctæ Ecclesiæ regendum, necnon protegendum. Per Christum Dominum nostrum, qui ex intemeratæ B. Mariæ semper Virginis alvo nasci, visitare, & renovare (4) hunc dignatus est mundum; qui tecum vivit, & gloriatur Deus in unitate Spiritus Sancti, per immortalia secula seculorum. Amen.

Ducitur deinde ad Confessionem B. Petri, & procumbit supra Faldistorium sibi in eo loco paratum, & a Subdiacono Apostolico fit Litania; & ea finita, prior Presbyterorum cum suis paramentis ad Confessionem descendens, stans sine Mitra dicit super eam: *Pater noster*; & deinde: *Et ne nos inducas in tentationem. R. Sed libera nos a malo. V. Salvam fac ancillam tuam Domine. R. Deus meus sperantem in te. V. Esto ei Domine turris fortitudinis. R. A facie inimici. V. Nihil proficiat inimicus in ea. R. Et filius iniquitatis non apponat nocere ei. V. Domine exaudi orationem meam. R. Et clamor meus ad te veniat. V. Dominus vobiscum. R. Et cum spiritu tuo.*

Oremus.

Præstende quæsumus Domine famulae tuæ dextram cælestis auxilii, ut te toto corde perquirat, & quæ digne postulat, consequi mereatur.

Actiões nostras quæsumus Domine aspirando præveni, & adjuvando prosequere, ut cuncta nostra operatio, & oratio a te semper incipiat, & per te cæpta finiatur. Per Christum Dominum nostrum. Amen.

Finitis Orationibus, revertitur Presbyter ad locum suum, & prior Episcoporum Cardinalium

To. I.

E e

nalium

(1) Ita in Veneta 1. editione, in Romana vero, *obviabit*. (2) Deest in ipsa editione Veneta, & *sociabitur*. (3) Ita in Romana; in citata Veneta legitur, *processione præeunte*. (4) In eadem Veneta editione deest, *hunc*.

nalium procedit ad Altare S. Mauriti, quem Augusta media inter Diaconos sequitur; & ibi apud Altare Episcopus ipse inungit illam stantem de oleo exorcizato, brachium dextrum, & scapulas, stans cum Mitra, & dicens:

Spiritus Sancti gratia nostræ humilitatis officio copiosa in te descendat, ut sicut manibus nostris licet indignis oleo materiali oblinita pinguescis exterius, ita ejus invisibili unguimine delibuta impinguari merearis interius, ejusque spirituali unctione perfectissime semper imbuta, & illicita declinare tota mente, & spernere discas, & valeas, & utilia animæ tuæ jugiter optare, atque operari queas, & opereris, auxiliante Domino nostro Jesu Christo, qui tecum vivit, & regnat in unitate &c.

Reducitur deinde ad suggestum suum Imperatrix, & Cardinales revertuntur ad Pontificem, & Diaconi quidem depositis Cappis capiunt paramenta sibi convenientia, & faciunt reverentiam Pontifici. Deinde Pontifex accedit ad Altare processionaliter, obviant tres Presbyteri, cantatur Introitus a Cantoribus, & proceditur in Missa usque ad Graduale more consueto. Dum cantatur Graduale, Imperatrix a Diaconis illis quamvis paratis ducitur ante Pontificem, qui surgens, deposita Mitra, super eam ante se genuflexam dicit hanc Orationem. *Oremus.*

Deus, qui solus habes immortalitatem, lucemque habitas inaccessibilem, cujus (1) providentia in sui dispositione non fallitur, qui fecisti ea, quæ futura sunt, & vocas ea quæ non sunt; qui superbos æquo moderamine de principatu ejicis, atque humiles dignanter in sublime provebis; ineffabilem misericordiam tuam supplices exoramus, ut sicut Hester Reginam Israeliticæ causæ salutis de captivitatis suæ compede solutam ad Regis Assueri thalamum, Regnique consortium transire fecisti; ita hanc famulam tuam N. humilitatis nostræ benedictione plebis salutis gratia, ad dignam sublimemque Imperatoris nostri copulam, & Imperii sui participatum transire concedas, ut & Imperialis federe conjugii semper permanens, pudicitia proximam virginitati palmam continere queat; Tibique Deo vivo, ac vero, in omnibus, & super omnia jugiter placere desideret, & te inspirante, quæ tibi placita sunt, toto cordo perficiat. Per Christum Dominum nostrum. Amen,

Deinde sedens cum Mitra imponit illi Tiaram cum Corona Imperiali allatam sibi ex Altari, ut diximus de Imperatore, & dicit: *Officio nostræ indignitatis in Imperatricem solemniter benedicta (2) accipe Coronam Imperialis excellentiæ, quæ licet ab indignis, Episcopalibus tamen manibus capiti tuo imponitur; unde sicut auro, & argento redimita enites, ita & interius auro sapientiæ, virtutumque gemmis decorari concedat, quatenus post occasum hujus sæculi cum prudentibus Virginibus Sponso perenni Domino Jesu Christo digne, & laudabiliter occurrens, Regni cælestis Aulae ingredi merearis januam, eodem Domino nostro Jesu Christo auxiliante, qui cum Patre, & Spiritu Sancto vivit &c.*

Coronata Imperatrix mox osculatur pedem Pontificis cum Corona, & surgens reducit a Diaconis ad suggestum, & cum cantatur deinde Offertorium, revertatur ad Pontificem, & illi offerat aurum, quantum placet; deinde si vult communicare de Sacramento Altaris, ut congruum est, procumbet super Faldistorium ad partem convenientem situm, ut superius diximus, & oret quousque sit tempus, sine Corona (3) tamen; & cum Pontifex in Sede sua eminenti communicaverit, ducatur Imperatrix sine Corona ad ejus pedes, & communicet, osculeturque manum Pontificis, & descendens ad Altare, purificet cum vino, Communicabitur Imperatrix post Diaconum, & Subdiaconum, & a Diacono accipiet vinum purificationis. Deinde assumpta Corona, reducit ad suum suggestum. Et nota, quod Imperatrix deducetur semper eundo, & redeundo ab illis duobus Diaconis sive paratis, sive non paratis; & illam sociabunt sui Prælati, & Proceres, atque Matronæ, & aliæ mulieres. Finita Missa, Imperatrix deducitur ad suum hospitium. Pontifex cum suis Prælati non paratis revertitur ad Cameram suam; nam Cardinales, & Prælati dimittunt in Ecclesia paramenta, & capiunt Cappas laneas.

COMMENTARIUS.

I. **C**ontinet hic quidem §. ritum in Coronatione Imperatricis Romæ servandum, cum sine Imperatore corona-

tur, vel quod non potuit venire cum Imperatore, vel post ejus coronationem ei est conjuncta, legitimo scilicet matrimonio. Supervacaneum.

(1) Ita legitur in Ordine Romano xiv. Cap. cvi. in nostra hoc tamen Cæremoniali tam juxta Venetam, quam Romanam editionem legitur, *prudencia*. (2) In editionibus nostri Cæremonialis Veneta 1. & Romana, ac Coloniensis legitur, *benedicta*, ut in Ordine xiv. Romano: (3) Ita in Veneta 1. & Coloniensi, in Romana, *tantum*, pro-

profecto est pluribus eam cæremoniam explicare, de qua supra abunde diximus. Orationes quæ in hoc occurrunt §. si unam & alteram excipias, quales sunt, *Pratende quasumus Domine*; & *Actiones nostras* &c. totidem fere verbis leguntur in Ordine Romano xiv. Cap. cv. & in aliis mss. Cæremonialibus Libris. Porro mirum videri debet, nihil in hoc nostro Cæremoniali a Patricio concinnato, vel obiter memorari de Coronatione Elenoræ Imperatricis uxoris Friderici III. Imperatoris, cujus Coronationem Patricius ipse in hoc Titulo descripsit, veluti regulam in posterum servandam, ubi a Summo Romano Pontifice coronandi essent Imperatores.

De unctione coronationeque prædictæ Leonoræ subobscurè loquutus est Manettus in Vita Nicolai V. ubi tantum habet, Reginam post Imperatorem Diademate super caput imposito redimitam fuisse. Quicquid sit, antiqua est & benedictio, seu coronatio Imperatricis, ejusque mentionem faciunt antiqui Auctores, atque Pontificales Codices allati ab erudito Martene Libro II. *De antiquis Ecclesiæ ritibus*, Cap. ix. ubi inter alia recenset mss. Pontificalia, Constantinopolitanum annorum circiter DL. & Arelatense annorum circiter cdl. in quibus Orationum in hoc §. nostro descriptarum fit mentio. His adde ms. Codicem Pierfancianum.

§. XXXI.

De pluralitate Coronarum Imperatoris.

Et quoniam vulgari opinione fertur, Romanorum Imperatorem tribus Coronis ornari oportere variorum metallorum, argentea Aquisgrani in Germania, ferrea Modœtiæ in Lombardia, & aurea Romæ, super qua re clarissimus Jurisconsultorum sui temporis Baldus Opusculum edidit, mysticas metallorum significationes solertissime interpretando, non videbitur forte absurdum aliquid de ea re pro veritate ostendenda disserere. Et ut omittamus priscos illos Romanorum Imperatores, qui toti fere Orbi imperabant, ante Aurelianum, ut Eutropio placet, nulla Corona, nisi laurea, aut ex alia aliqua felici arbore usos fuisse, nihilque gravius (1) odisse populum Romanum, quam Regium Nomen; hoc vero affirmamus, ante Carolum Magnum, in cujus personam Imperium translatum est a Græcis in Latinos, neminem Imperii Romani Coronam ex manu Romani Pontificis Romæ suscepisse; & ut sæpe a Pio Secundo audivimus rerum Germanicarum peritissimo, cui a manu servivimus, & in Historia ejus Austriaci legimus, Cæsar nullam omnino Coronam accipit, nisi auream, & alias quidem Coronas pro variis Regnis. Romæ vero, & a Romano Pontifice Romani Imperii Coronam suscipit. Otho Frisingensis Episcopus, & Federici primi patruus, vir doctus, & eloquens Historiam scripsit suorum temporum. In ea tradit, Fridericum ipsum Coronis quinque aureis decoratum fuisse; prima de Regno Francorum apud Aquisgranum, secunda Ratisponæ de Regno Germaniæ, tertia Papiæ de Regno Longobardico; quartam Romæ suscepit pro Romano Imperio ab Hadriano Quarto Pontifice; quintam vero Modœtiæ pro Regno Italico illam suscepisse testatur. Quæ quidem Corona ideo appellatur ferrea, quod laminam quandam habet ferream in summitate, alioquin aurea, & pretiosissima. Sed differt forma Coronæ Imperialis ab aliis, nam ea sub se Tiaram quandam habet in modum fere Episcopalis Mitræ, humiliores tamen (2) magis apertam, & minus acutam; estque ejus apertura a fronte non ab aure, & semicirculum habet per ipsam aperturam aureum, in cujus summitate Crux parvula eminet, eam Tiaram aliæ coronæ non habeant; & quoniam hanc Imperialem Coronam bis, aut ter in Germania vidimus, dum Cæsar Regalia quibusdam Principibus concederet, ideo illam exprimere conati sumus. Legimus & in aliis Historiis, quosdam Imperatores Arelate etiam Coronam suscepisse de Regno Arelatenfi, & alibi alias pro aliis Regnis. Nam & Carolus IV. anno salutis mccc. lvi. (3) Avinionem venit ad Urbanum V. (4) jam pridem jussu Innocentii VI. Romæ coronatus, qui rebus, quarum gratia ad Pontificem venerat, absolutis, Arelate profectus est. Sciant ergo qui de tribus Coronis fabulantur, & Romanorum Imperatorem unam tantum pro Romano Imperio Coronam suscipere, & eam quidem Romæ a Romano Pontifice, alias autem alibi pro aliis diversis Regnis.

COMMENTARIUS.

I. **A** Ntequam de Coronis dicamus, quibus ornari soliti fuere Imperatores, præstat hoc loco insignem locum descri-

bere Æneæ Silvii in hoc §. laudati, qui in citata toties Historia Friderici III. Imperatoris ita de ipsa Coronarum pluralitate inquit: *Libet hic*

E e 2

(1) Ita in Veneta 1. editione, in Romana legitur, *perus*. (2) In ipsa Romana editio ne, *tantum*. (3) ibidem legitur: 1361. (4) Ita in Romana ipsa, in Veneta vero 1. *multo ante jussu Innocentii VI. Roma Imperator coronatus*.

pauca de Coronis dicere, ne stulte videamur eorum opinioni consentire, qui tres Coronas Imperatori necessarias ajunt, Theutonicam, Mediolanensem, Romanam; & unam argenteam, alteram ferream, tertiam auream esse contendunt; multaque de metallis sermocinantur, inter quos etiam Legum Interpretes delirant, quid ferrum, quid argentum, quid significet aurum, plurimis verbis explicare laborantes. Atque, ut aurum ceteris metallis, sic Romanum Imperium ceteris Regnis præstabilius esse confirmant. Verum eujuscumque materia Corona fuerit, ad parabolisandum idonea videri poterit. Pergit Auctor, suamque opinionem de ea re exponit, sic diens: Nos autem Coronarum numerum nullum esse certum novimus, priscosque Cæsares ab Augusto usque ad Aurelianum nulla usos Corona didicimus. Siquidem hic primus fuit, ut Eutropio placet, qui apud Romanos Diadema capiti vinxerint, gemmisque, & aurata omni veste, quod adhuc fere incognitum Romanis moribus videbatur, usus est.

II. Lubet & alia hoc loco adnotare, quæ & idem Æneas Sylvius paulo inferius scribit,

nonnulla enim ibidem docet, quibus noster hic §. quammaxime illustratur: *Has autem Coronas omnes, ait, aureas esse compertum habeo, quamvis per medium circulum Coronæ Mediolanensis lamina quadam parvula ex ferro ducatur, quæ stultæ interpretationi efficit locum. Quippe Daniel Propheta quatuor Orbis Regna majora describens, ultimum, quod Nostri Romanum esse volunt, ferro comparavit; quoniam sicut ferrum omnia metalla comminuit, sic omnia Regna Romanum Imperium detrivit. Subdit & alia paulo asperius, & deinde describit Coronationem Mediolanensem Romæ factam. Ceterum cur Fridericus Imperator Romam venerit Regni Longobardici Corona minime donatus, jam nos alio loco explicuimus in Commentariis superioribus. Videri autem & de ea re potest eruditus Georgius in Vita Nicolai V. Pontificis Maximi ad annum MCDLII. Num. v. Omittimus vero nos & alia plurima, præsertim quæ varias Imperatorum Coronas spectant, quia scilicet & de iis in nostris ad hunc Titulum Commentariis abunde loquuti fuimus, supervacaneumque est, quod actum est, iterum agere.*

DE CANONIZATIONE UNIUS SANCTI T I T U L U S VI.

I. **C**anonizatio in præsentī hoc Titulo nihil aliud est, quam alicujus in album, & catalogum Sanctorum relatio. Juxta pervetustum Ecclesiæ morem fiebat ea relatio in Canone Missæ; quippe longe antequam Martyrologia conderentur, in ipso Missæ Canone fieri primitus solita fuit commemoratio Sanctorum, non quod pro iis oraretur, sed potius, ut ii pro populo orarent, ut passim Sancti Patres docent, ac præsertim S. Cyrillus Hierosolymitanus inter Græcos, & S. Augustinus inter Latinos. Sic enim ille Catechesi v. inquit: *Postea facimus mentionem etiam eorum, qui ante nos obdormierunt; primum Patriarcharum, Prophetarum, Apostolorum, Martyrum, ut Deus orationibus illorum, & deprecationibus suscipiat preces nostras.* Augustinus autem Tractatu in Joannem hæc habet: *Ideo ad mensam Domini non sic Martyres commemoramus, quemadmodum alios, qui in pace requiescunt, ut etiam pro eis oremus, sed magis ut ipsi orent pro nobis.* Item Sermone xvii. De verbis Apostoli, idem S. Doctor ita ad rem ait: *Habet Ecclesiastica disciplina, quod Fideles noverunt, cum Martyres eo loco recitentur ad Altare Dei, ubi non pro ipsis oratur, pro ceteris autem commemoratis defunctis oretur.* Vetustissimam plane esse Sanctorum commemorationem in Sacrificio Missæ, pluribus docet eruditissimus Stephanus Duranti Lib. II. De ritibus Ecclesiæ Catholicæ, Cap. xxxv. ubi etiam scite admonet, ubi apud Patres aliquando legitur, & præsertim apud S. Epiphanium Hæresi lxxv. & apud S. Cyrillum Hierosolymitanum in Catechesi v. Mystagogica, offerri Sacrificium Deo pro Patriarchis, Apostolis, Prophetis, Evangelistis, & Martyribus, non id intelligi, quod eos Deo commendemus, verum quod ipsos in oblatione commemoramus, in eorum gloriam, & gratiarum actionem, gratias agentes pro glo-

ria, qua donati sunt. Id enim est, quod S. Augustinus dicit in Enchiridio, Cap. cx. *Pro valde bonis gratiarum actiones sunt.*

II. Quod vero in quibusdam Sanctorum Orationibus legitur, *Sumamus Domine Sancta Mysteria, quæ sicut Sanctis tuis prosunt ad gloriam, ita nobis quasumus proficiant ad medelam*, id profecto explicat Innocentius Papa III. in Capite, *Cum Martha VI. De celebratione Missarum &c.* ubi requisitus a Lugdunensi Archiepiscopo, quare fuerit mutatum quod in Secreta B. Leonis secundum antiquiores Codices continetur, sic videlicet, *Annue nobis Domine, ut anima famuli tui Leonis hæc profit oblatio*; cum in modernis Sacramentariis habeatur, *Annue nobis quasumus Domine, ut intercessione B. Leonis, hæc nobis profit Oblatio*? respondit Pontifex, quod cum Sacra Scriptura dicat auctoritas, quod injuriam facit Martyri, qui orat pro Martyre; idem est ratione consimili de Sanctis aliis sentiendum, quia orationibus nostris non indigent pro eo quod cum sint perfecte beati, omnia eis ad vota succedunt; sed nos potius orationibus eorum indigemus, quos, cum miserissimus, undique mala nostra perturbant. Unde quod in plerisque Orationibus continetur, *prolit, vel proficiat huic Sancto, vel illi talis oblatio ad gloriam, & honorem*; ita debet intelligi, ut ad hoc profit, quod magis ac magis a Fidelibus glorificetur in terris, licet plerique reputent non indignum, Sanctorum gloriam usque ad Judicium augmentari. Ita Innocentius III. in cujus locum videri possunt Canonici Juris Interpretes, ac Theologi, qui ex professo tractant de Canonizatione Sanctorum.

III. Siquis autem forte hic quærat, cur in Canone Missæ nulla fiat Confessorum commemoratio, cum inter Sanctos eorum memoriam magnifice veneretur Ecclesia, adeo ut juxta recentiore Ecclesiæ morem plerique Sancti Confesso-

efflores, Sanctæque Virgines, ac Viduæ, ritu duplici, ut ajunt, sive solemniori celebrentur, cum alias Sancti Martyres, ipsique prisca Sancti Romani Pontifices Martyrio coronati vix simplici ritu colantur? Proposito Dubio jam occurrat memoratus Innocentius Papa III. Lib. III. *Mysterium Missæ*, Cap. xx. ubi ait, *Canonem ipsum Missæ fortasse prius editum fuisse, quam memoriam Sanctorum Confessorum Ecclesia solemniter celebraret. Nam omnes fere Sancti, qui commemorantur in Canone, præcesserunt Silvestrum, præter Joannem & Paulum, Marcellinum & Petrum, qui proxime successerunt. Ecclesia vero forte post tempus B. Silvestri capit Sanctorum Confessorum memoriam solemniter venerari.* Egregie hoc argumentum inter alios tractat eruditissimus Josephus de Pezio nunc Ordinis Clericorum Regularium Præpositus Generalis in celebri Opusculo, quod tacito ejus nomine Panormi anno Christi MDCCXXIII. editum est, Italico idiomate scriptum, cui Titulus Latinitate donatus, est, *Defensio Librorum Liturgicorum Ecclesiæ Romanæ, & sacra Persona Venerabilis Cardinalis Josephi Mariae Tomasi Clerici Regularis eorundem illustratoris & vulgaris, adversus quasdam observationes sparsas*, a Jacobo scilicet Laderchio, qui per summam audaciam Viros omnes doctos, qui ejus ineptiis adversabantur, Janfenistas, hæreticosque appellabat, adeo ut nec ipsi Pontifici Maximo Sanctæ memoriæ Innocentio XI. pepercerit, quem summa nonnisi temeritate, atque impietate in Libro, cui Titulus, *I congressi d'oggi di*, Venetiis edito anno MDCCXXXIV. a Janfenistis hallucinatum dixit, variisque calumniis perperam laceravit.

IV. At vero ut rem nostram agamus, jam diximus, Canonizationem aliud non esse, quam in Canonem, seu in Aibum Sanctorum relationem. Licet autem antiquus sit ritus canonizandi Sanctos, vocabulum tamen Canonizationis, quod jam in vulgarem ac solemnem usum venit, illud minus antiquum est, quam res ipsa, nec ante Seculum XII. inventum, postquam videlicet ad authenticam inter Sanctos relationem, Summi Romani Pontificis suffragium requisitum est, uti notat præstantissimus Mabillonius in sua Præfatione ad Seculum V. Benedictinum §. VI. Eo quippe vocabulo usus est inter primos Udalricus Constantiensis Episcopus in Epistola ad Callixtum II. pro Canonizatione Conradi Episcopi, & aliquanto post Alexander III. in Bulla de Canonizatione S. Eduardi Angliæ Regis anno MCLXI. itemque S. Thomæ Cantuariensis Archiepiscopi post annos undecim. Sed & eodem tempore eo usi sunt vocabulo alii Auctores, inter quos Nicolaus Anglicanus Monachus in Epistola ad Petrum Cellensem, ita scribit: *Sanctus ille Bernardus, quem dicis me debita exuere veneratione, & post eum verborum jacula emittere, quondam Sanctorum Catalogo adscriptus, nuper est in Ecclesia canonizatus, & ab humano judicio exemptus.* Legitur integra Epistola apud laudatum ipsum Petrum Cellensem Lib. IX. estque Epistola IX.

V. Hoc notato, nunc sciendum primo est, quod idem Mabillonius docet, præter Canonem Librorum, qui etiam canonizati non raro leguntur, cum in Librorum approbatorum classem referuntur, esse & Canonem personarum,

qui duplex est, unus virorum, & alius mortuorum; isque bipartitus, nempe Sanctorum, & aliarum personarum illustrium. Canon Missæ, seu Sacra Diptycha Sanctos. Alius Canon, seu alia Diptycha promiscua & minus sacra ceteros complectebantur. Canonis etiam nomine censenda sunt tum Kalendaria, tum Martyrologia, in quibus Sanctorum Nomina descripta sunt publica auctoritate. Sciendum præterea & illud, Canonizationem aliam generalem, aliam particularem dici posse. Hæc ab aliquo Episcopo, seu ab Ecclesia, vel Synodo particulari fiebat. Illa ab Œcumenico Concilio, aut a Summo Pontifice Sanctum aliquem toti Ecclesiæ declarante. Generalis ejusmodi Canonizationis, ut eruditi Auctores notant, nullum vestigium ante Seculum X. apparet. Particularis sola in usu erat, quæ tamen accedente totius Ecclesiæ consensu, & approbatione, generalis evadebat. At quædam generalis communi omnium Ecclesiarum consensu Canonizatio facta est Sanctorum quorundam maxime illustrium, qualis est Beatissima Virginis Deiparæ, & Apostolorum. Quælibet porro Ecclesia particularis descriptum habebat Sanctorum suorum Catalogum, donec, confirmata Ecclesiæ pace, omnium collectio facta est, primo quidem per Eusebium, deinde per quemdam sub nomine Hieronymi, postea per Bedam, Wandalbertum, Uuardum, Adonem, Notkerum, atque alios, de quibus idem Mabillonius in Præfatione ad Seculum IV. Benedictinum fuse differit, ubi etiam observat, Ecclesiam Romanam proprium habuisse Martyrologium ante Seculum VII.

VI. Primum indubitatæ fidei monumentum de solemnibus per Romanum Pontificem Canonizatione, est Diploma Joannis XV. qui in frequenti Episcoporum conventu, ad preces Liutolfi Episcopi Augustani, Udalricum ejusdem Ecclesiæ Episcopum anno Christi CMXCIII. in Sanctorum album retulit. Has Joannis Litteras integras refert memoratus toties Mabillonius in fine Vitæ S. Udalrici; sed fragmentum huc adducere juvat ad probandam Canonizationis formam: *Cum Conventus esset factus in Palatio Lateranensi pridie Kalendas Februarias, residente Joanne Sanctissimo Papa cum Episcopis, & Presbyteris, adstantibus Diaconibus, & cuncto Clero, surgens Reverendissimus Liutolfus Augustæ Episcopus inquit: Domine Sanctissime Præsul, si vobis placeat, & omnibus Episcopis, & Presbyteris hic residentibus, Libellus, quem præ manibus habeo, coram vobis legatur de Vita & miraculis Venerabilis Udalrici Sanctæ Augustanæ Ecclesiæ dudum Episcopi, & quid libitum fuerit vobis, decernatur.* His perlectis, sanxit Pontifex, *quatenus memoria Udalrici jam præfati Venerabilis Episcopi, divino cultui dicata existat, & in laudibus Dei diutissime persolvendis semper valeat proficere.* Id vero a Liutolfo ea ratione jam factum existimandum est, ut Sancti Udalrici cultus, quem ipse in sola Augustana Ecclesia instituere poterat, latius propagaretur auctoritate Romani Pontificis Maximi; quod alii postea in religionem verterunt. Hanc esse primam Canonizationem per Romanum Pontificem solemniter celebratam, tradit etiam Pagius in Vita ipsius Joannis XV. Papæ, Num. VII. ubi etiam notat, per errorem typographi legi apud Mabillonium peractam fuisse eam Canonizationem anno Christi

fti c̄mxcv. quod ex ipſius Joannis Diplomate conſtet, celebratam fuiſſe anno c̄mxciii. & quidem tertio Nonas Februarias, ut ex ipſomet Reſcripto Apoſtolico deducit.

VII. Tradit Baronius, deducitque ex Epiſtola S. Ludgeri Epiſcopi Monafterienſis, jam longe ante Joannem XV. Leonem III. anno Domini dccciv. in Germania exiſtente S. Suidbertum in Catalogum Sanctorum retuliſſe. Sed tota illa narratio, & Vita S. Suidberti poſteriorum commentum eſt, ut Henſchenius ad diem xxvi. Martii in Vita S. Ludgeri, & Mabillonius Seculo III. Benediſtino Parte I. in Elogio Hiſtorico S. Suidberti demonſtrarunt. Certe Leo Papa III. non potuit pridie Nonas Septembris Werdæ in Germania Suidbertum Sanctorum Faſtis adſcribere, præſente Carolo Magno Imperatore, cum conſtet, hunc medio tantum menſe Novembri de adventu Leonis edoſtum fuiſſe, uti obſervat inter alios Pagius in Vita ejuſdem Leonis Papæ III. Num. xxviii. Deinde, ut inquit Morinus in Opere, *De adminiſtratione Sacramenti pœnitentiæ*, Lib. x. Cap. xx. ſancti Suidberti in Sanctorum numerum relatio eo modo, atque ordine narratur, quo nunc, & ab annis quadringentis celebrari ſolet. Certum eſt autem, hanc celebrationem cœpiſſe trecentis poſt Leonem III. annis, & amplius. Tertio Auctor ejus Epiſtolæ, qua nititur Baronius, ſæpius recitat Epiſcopos, Archiepiſcopos, Cardinales, & Proceres Pontifici aſſidentes, contra morem illius temporis, & ſequentium ſeculorum. Quarto, commemorat Cap. xii. Severinum quendam patrem familias adoleſcentem filium propter morbum a ſtudio Bononiienſi revocaſſe, quaſi vero regnante Carolo Magno Bononiæ litterarum ſtudia flourerint, & eo ex variis provinciis confluerent adoleſcentes. Ita quidem vivente Gregorio IX. qui Decretalium compilationem ad Doctores Scholares Bononiienſes direxit. Plura alia ſunt ſuppoſitionis argumenta apud laudatos Aucto-

res legenda. Porro autem labitur Morinus, ubi citato loco ait, primum, quem perhibent antiqua documenta ſolemniter canonizatum a Pontificibus Romanis, fuiſſe Hugonem Grationopolitanum Epiſcopum; ſecundum vero S. Bernardum, nam ut diximus, Joannes XV. anno c̄mxciii. canonizavit S. Udalricum Auguſtanum Epiſcopum, Innocentius vero II. Hugonem ipſum Grationopolitanum. Sed ante hunc jam aliæ Sanctorum inſigniores Canonizationes a Romanis Pontificibus celebratæ fuerunt, ut videre eſt apud clariffimum Fontaninum in ſuo Codice Canonizationis Sanctorum.

VIII. Plura alia in hujus Tituli limine eſſent notanda, ſed ſupervacaneus foret labor in ipſo Titulo diu immorari, poſtquam ſcilicet omnium doctiſſimus, & Doctorem Magiſter, nunquam ſine elogio nominandus, Proſper S. R. E. Cardinalis Lambertinus nunc BENEDICTUS XIV. Pontifex Maximus inſigne Opus atque abſolutiſſimum concinnaſcit, quod inſcriptum eſt, *De ſervorum Dei Beatificatione, & Beatorum Canonizatione*, quod quidem ob profundam doctrinam, omnigenamque eruditionem, quam continet, paucorum annorum ſpatio ter typis elegantiffimis, Bononiæ primum, tum Patavii, & nunc Romæ vulgatum eſt, ut ſcilicet multorum deſiderio, qui in ipſo præclariffimo Opere erudiri cupiebant, fieret ſatis. Nobis proſecto ea aliquando mens fuit, ut eam ob cauſam Titulum hunc noſtri Cæremonialis abſque ullo Commentario deſcriberemus. Sed ne videremur Opus hoc noſtrum qualecunque illud ſit, imperfectum vulgare, ſtatuiſſe tandem omnia fere, quæ ad ipſius præſertim Tituli explicacionem pertinent, ex iis accipere, quæ memoratus Pontifex ſolide copioſeque in citato egregio Opere docuit. Atque hæc una eſt ex præcipuis cauſis, ob quas & hoc noſtrum novum Opus coacti ſumus eidem BENEDICTO XIV. Pontifici Maximo dedicare,

§. I.

De inquisitione, & Commiſſione Cauſæ in Canonizatione alicujus Sancti.

Postquam increbſcente fama de excellentia Vitæ, opinione Sanctitatis, & miraculorum coruſcatione, Summus Pontifex ſæpe fuerit per Reges, Principes, ſeu populos interpellatus, rogatusque, ut aliquem vita jam pridem functum deſcribendum in Sanctorum Catalogo, & venerandum ut Sanctum decernat: re cum Fratribus mature tractata, ſi procedendum ad inquisitionem cenſuerit, committat aliquibus Prælatiſ in illis partibus, ubi vitam duxit, & mortuus jacet ille, de quo agitur, ut ſe diligenter informant, & ſolenter inquirent de fama, opinione, & devotione populorum circa illum talem; quam inquisitionem in genere, & ſine teſtium juridica examinatione facere debent, & quæ invenerunt, ſuis Litteris ad Summum Pontificem fideliter referre. Pontifex, intellecta Commiſſariorum relatione, proponit omnia Sacro Collegio, & cum eis deliberat, an ſatis digna videantur, quæ relata ſunt, ad ulterius inquirendum. Quod ſi placuerit, committatur eiſdem, vel aliis Prælatiſ, ut diligentiffime inquirent de veritate rei, teſtes examinent, & omnia perſcrutentur, quæ ad veritatem eliciendam ſunt opportuna; & debent his Commiſſariis articuli, & interrogatoria mitti ſub Bulla Apoſtolica, cum quibus examinare debent teſtes de excellentia, & ſanctimonia vitæ, de puritate Fidei, de patracione miraculorum, & illiſ mandare, ut de poſitiones teſtium, & omnia fideliter per Litteras ſuis ſigillis ſignatas ad Curiam transmittant. Quibus receptis, Pontifex committat illa examinanda aliquibus Auditoribus

Sa-

Sacri Palatii, qui videant, & ordinent processum, & videant, an inquisitio, & probatio est legitima, & sufficienter facta.

COMMENTARIUS.

I. **C**oncinunt hæc quidem Romano Ordini XIV. sive potius antiquo ritui, quem ille recenset Cap. cxv. quod inscriptum est: *Modus qui servari consuevit circa Canonizationem alicujus Sancti*. Sic autem, deinde inquit: *Audita per Dominum nostrum Papam fama alicujus Sancti, & ab aliquibus honestis, & authenticis personis eidem Domino nostro Papæ negotio denunciato, ac supplicato eidem continuatis vicibus, ac pluries instanter pro Canonizatione hujusmodi Sancti faciendæ, Dominus noster Papa consuevit hoc proponere inter Fratres scilicet Cardinales, & de ipsorum consilio committit aliquibus Episcopis Patriæ illius, qui dicitur Sanctus, vel aliis personis authenticis, honestis, discretis, & incorruptibilibus, ut inquirent de fama, & devotione populi, quem habent ad illum, qui dicitur Sanctus, & de miraculis, & aliis, quæ eidem Domino nostro Papæ sunt nunciata, & illi, quibus commissum fuerit, debent inquirere, & referre de fama, & devotione populi, & aliis, quæ super miraculis illius, qui dicitur Sanctus, invenerint in genere, & non in specie, & quoad famam, non quoad veritatem; & an videatur eis, quod super veritate, & specie sit inquisitio committenda; & si rescribant talia, propter quæ inquisitio veritatis committi debeat, Dominus noster Papa requirit iterum consilia Cardinalium, & de ipsorum consilio diffinit in Consistorio, utrum secundum relata, sit inquisitio prædicta super veritate committenda, vel non; & si committenda videatur, iterum scribit Dominus Papa eisdem, vel aliis, de quibus sibi videbitur, quod veritatem de prædictis inquirent, videlicet de Fide, & excellentia vitæ, & miraculis, ac operatione miraculorum illius, qui petit canonizari (legendum qui petitur, ut in ms. Codice Pierfantiano) exacte, diligenter fideliter, & prudenter, secundum articulos, & interrogatoria, quæ sub Bulla sua transmittit eisdem, & aliis; & illi, quibus committitur, facta hujusmodi inquisitione, eam remittere debent dicto Domino Papæ sub sigillis suis fideliter interclusam. Quæ inquisitione sic remissa, Dominus Papa consuevit ipsius inquisitionis examinationem committere in Curia aliquibus Capellanis suis, vel aliis personis authenticis, & discretis, & in talibus expertis, quæ ordinent, & forment rubricas super inquisitione prædicta. Huc usque laudatus Ordo Romanus XIV. auctore Jacobo Gajetano, Cap. cxv. cui fere ad verbum concinit inter alios memoratus Codex ms. Pierfantianus.*

II. Ergo canonizari potest is tantum de cuius Fide, & excellentia vitæ, & miraculis probationes constent, & oportet tantam esse debere vitæ excellentiam, ac talia miracula, ut excedant vires, & potentiam naturæ, uti communiter ajunt Canonici Juris Interpretes in Cap. *Venerabili, De testibus &c.* præsertim vero Hostiensis, qui etiam inter alia docet, ad canonizandum Sanctos, inquirendum esse, an ei, de quo canonizando agitur, ante acta vita testimo-

nium præbeat pro laboribus multis, moribus castis, actibus strenuis, Oportet enim hoc præfenti testificatione prædicari, & bonæ famæ præconiis non taceri, Maxime vero quæri debet de simplicitate, & humilitate, quia *Deus superbis resistit, humilibus autem dat gratiam*, ut ait S. Jacobus Cap. IV. itemque inquire, an in vita persecutiones passus fuerit, & an eas passus fuerit ex charitate. Ita pene ad verbum Hostiensis, cujus verba inter alios transcribere Auctor Glossæ in Capite unico, *De Reliquiis, & veneratione Sanctorum*, in Sexto, & S. Antoninus Parte III. Titulo XII. Cap. VIII. §. aliique passim Canonici Juris Interpretes, qui post Hostiensem claruerunt, in citato Cap. *Venerabili, De testibus &c.* ubi inter alios varia scitu digna doctissimus Fagnanus notavit. Præ ceteris autem legendus Sanctissimus Dominus noster Pontifex Maximus BENEDICTUS XIV. in celeberrimo Opere, *De Servorum Dei Beatificatione, & Beatorum Canonizatione*, ubi rem ipsam Canonizationis fuscè, doctè, solideque pertractans, Canonistas omnes Theologosque antiquos, recentioresque de eadem Canonizationis re agentes longe superavit.

III. Quamvis autem ordo judiciarius, qui jam pluribus ab hinc seculis tenetur; in primitiva Ecclesia minime observaretur, quia scilicet Sancti eo tempore ut plurimum Martyrio erant insigniti, in quibus canonizandis tot examinanda non erant, quot hodie in Sanctis Confessoribus, uti post Viguerium notat eruditus Rocca in Commentario, *De Canonizatione Sanctorum*, Capite xxxvi. addubitari tamen nequit, quin magna fuerit olim in recipiendis ipsorum Martyrum Actis cautio Episcoporum, ac præsertim Romani Summi Pontificis, uti ex celebri de ea re Decreto Gelasii I. Papæ docet Mabillonius in Præfatione ad Seculum V. Benedictinum §. VI. Etiam Fideles ipsi vix olim aliquem pro Martyre coli ferebant, nisi Acta Martyrium indubitata contestarentur. Hinc etenim est, quod Lucilla matrona Hispana præpotens, & ambitiosa, quæ Carthagine versabatur, a Cæciliano Carthaginensis Ecclesiæ Archidiacono correpta est, quod ossa cujusdam Martyris nondum vindicati, idest nondum rite canonizati, deferret, & ante Sacram Communionem exoscularetur: *Quæ ante spiritualem cibum, & potum, os nescio cujus Martyris, si tamen Martyris, libare dicebatur; & cum præponeret Calici salutari os nescio cujus hominis mortui, etsi Martyris, sed nec dum vindicati*; ut legere est apud Optatum Milevitani Lib. I. contra Donatistas. Hujus porro correctionis impatiens Lucilla, ulciscendi de Cæciliano inde captata occasione, ultro se Donatistis adjunxit, & quicquid opibus, & auctoritate valebat, magno studio contulit ad novi, pertinacisque Donatistarum schismatis fulcimentum, & propagationem.

IV. Celebre est & illud, quod in Collatione Carthaginensi dicitur de Mensurio Carthaginensi Antistite, quippe qui, cum Fideles nonnulli persecutoribus sponte se offerentes necati essent,

ab

ab eis honorandis prohibuit Christianos. Non enim colendi erant ut Martires, nisi *vindicati*, idest ab Episcopis, agniti, & approbati; quamquam apud S. Cyprianum in Libro, *De lapsis*, *vindicatus Martir* idem sit atque mortuus, & de sua jam Corona securus. Sed & memoratu dignum est, quod Cyrillo Hierosolymitano contigit occasione Ammonii Monachi, quem cum, seditionis in Orestem Præfectum apud Alexandriam a Monachis ipsius Cyrilli causa excitatæ confcius, ob idque ad mortem usque suppliciis Præfecti jussu excruciatum esset, mutato nomine *Tbaumasum*, imo & *Martyrem* vocari jussit, corpore ejus in Ecclesia deposito. Sed qui modestiores erant ex ipsis etiam Christianis, hoc Cyrilli studium in Ammonium non probarunt, sompertum habentes, hunc temeritatis suæ pœnas dedisse. Quam ob rem & Cyrillus ipse hujus rei memoriam paulatim silentio obliteravit; uti hæc fusius narrat Socrates Lib. VII. *Historiæ Ecclesiasticæ*, Cap. XIV. Porro non omittendum, quod de S. Martino Turonensi Episcopo in ejus Vita, Cap. VIII. legitur; suspectum enim habens cultum, qui falso cuidam Martyri impendebatur *ab his, qui majores natu erant, Presbyteris, vel Clericis, flagitabat nomen sibi Martyris, & tempora passionis ostendi, grandi se scrupulo permoveri testatus, quod nihil certi constans sibi majorum memoria tradidisset*. Itaque Oratione adhibita, falsi martyris larvam detexit. Eadem ratione Sancto Patroclo Martyri Tricassino tametsi miraculis coruscanti, *loci homines parvum exhibebant famulatum, quod historia passionis ejus non haberetur in promptu*; teste Gregorio Turonensi, Lib. I. *De gloria Martyrum*, Cap. LXIV.

V. Notat hæc Mabillonius loco citato, aitque hanc quidem cautionem nostro hoc tempore quibusdam in locis fortasse necessariam esse, in quibus honorantur pro Martyribus, aut Sanctis nonnulli, quorum vita penitus ignoratur, nec ab Ecclesia universa auctoritatem eorum cultus accepit. Teste eodem Auctore, observatione digna est hac in re Gregorii diligentia & religio, qui cum videret S. Benignum Martyrem Divionensem in magno sarcophago reconditum fuisse, putabat cum aliis, *ibi aliquem positum fuisse gentilem*. Eo tamen rustici convenientes vota dissolvebant, & multa beneficia impetrabant. His nullo modo credebat Gregorius, sed magis, ne ibidem adorarent, fortiter testabatur; donec tandem veritatis revelatione factus est certior,

& a quibusdam in Italiam abeuntibus historiam adlatam Beatus Confessor accepit. Huc spectat quod de S. Martiale Lemovicensium Apostolo memoriæ proditum est in Concilio Lemovicensi anno cxxxI. nempe Anglos quosdam, cum S. Martialem in Litaniis, & Martyrologiis Cænobii Cantuariensis Apostoli titulo donatum animadvertissent, non reperto Libro de ejus Actis, hac de re apud Patrem Monasterii exposulasse, quod Martialem scilicet diceret Apostolum, cum ejus Acta penes se minime haberet. Huc etiam referri potest pervetustus Canon LX. Concilii Illeberitani, juxta editionem Ferdinandi Mendozæ, cujus hæc sunt verba: *Siquis idola fregerit, & ibidem fuerit occisus, quia in Evangeliiis non est scriptum, nec invenitur ab Apostolis unquam factum, placuit, eum in numerum non recipi Martyrum*.

VI. Magna profecto discretionem prædita semper fuit ratio, quam tenuerunt, tenentque etiam nunc Summi Romani Pontifices. Ut omittam celebre de eadem re Gelasii I. Papæ Decretum, quod Tomo II. Conciliorum enarravi, notanda hoc loco est omnia S. Gregorii Papæ Magni responsio ad Augustinum Anglorum Apostolum, quæ legitur Lib. XII. Epistola XXXI. Petierat Augustinus, ut Reliquiæ S. Sixti Martyris sibi transmitterentur, quæ in quadam Ecclesia recondi possent, ubi Corpus cujusdam S. Sixti non satis sibi noti asservari dicebatur. Respondit in hunc modum ad interrogationem IX. ipse Augustinus: *Fecimus quod petisti, quatenus populus, qui in loco quodam S. Sixti Martyris Corpus dixerunt venerari, quod tua Fraternitati nec verum, nec veraciter sanctum videtur, certa sanctissimi & probatissimi Martyris beneficia suscipiens colere incerta non debeat. Mihi tamen videtur, quod si Corpus, quod a populo cujusdam Martyris esse creditur, nullis ille miraculis coruscat; & neque aliqui de antiquioribus existunt, qui se a parentibus passionis ejus ordinem audisse fateantur; ita Reliquiæ, quas petisti, seorsim condendæ sunt, ut locus, in quo præfatum Corpus jacet, modis omnibus obstruatur, nec permittatur populus certum deferere, & incertum venerari*. Atque hanc religionem, & prudentiam, exempla Prædecessorum suorum sequentes tenent hodie observantque Summi Romani Pontifices, uti pluribus docet in suo Celeberrimo Opere, *De Servorum Dei Beatificatione, & Beatorum Canonizatione*, Sanctissimus Dominus noster BENEDICTUS XIV.

§. II.

De commissione tribus Cardinalibus, & prima definitione.

Deinde si retulerunt, rem bene esse paratam, iterum de consilio Fratrum committat tribus Cardinalibus, Episcopo, Presbytero, & Diacono, qui diligenti (1) examinent inquisitione probationes, & depositiones testium, & considerent solertissime omnia consideranda. Et cum placuerit Sanctissimo Domino nostro, referant in secreto Confistorio, & primo de excellentia vitæ, & Fidei puritate, quæ si judicabuntur Collegio bene probata, & digna Sanctificatione, tunc procedent ad narrationem, & probationem miraculorum, & de consensu Cardinalium definit Summus Pontifex, vitam, & miracula, quæ ita erunt, sufficienter esse probata. Deinde deliberabunt, an quæ pro-

(1) Ita in Romana editibus, in Veneta vero I. & Colonienſi legitur, *diligenter examinent inquisitionem, probationes &c.*

probata sunt, videantur talia, propter quæ merito sit decernenda Canonizatio. Tunc ex consilio Fratrum diffinit Pontifex, Canonizationem esse faciendam.

C O M M E N T A R I U S.

Nostrum hunc §. spectant, quæ Summus Pontifex BENEDICTUS XIV. feliciter regnans in celeberrimo Opere, *De Servorum Dei Beatificatione &c.* docet Tomo I. Lib. I. Cap. XXI. de Consistoriis, quæ olim cogebantur pro definiendis causis Canonizationis. Expletis omnibus, inquit, quæ erant extra Consistorium explenda, quæque enarrata sunt in §. superiori, causæ proponebantur in Consistorio coram Summo Pontifice. Tum docet duplex tunc habitum fuisse Consistorium; alterum, in quod conveniebant soli S. R. E. Cardinales; alterum subsequens, in quo conventus fiebat S. R. E. Cardinalium, Archiepiscoporum, Episcoporum, & Præfulum apud Sedem Apostolicam degentium. Agimus nos in præsentī de primo Consistorio, in quo examinabatur causa, pro qua Capellani Papæ, seu Rotæ Romanæ Auditores laboraverant, & Summus Pontifex Cardinalium consilia requirebat, an esset ad Canonizationem procedendum; quatenus autem visum fuisset, procedendum esse, definitio hæc sub secreto inter Cardinales permanebat, teste Otiensi in Cap. *Audivimus, De Reliquiis, & veneratione Sanctorum*, Num. v. ubi ita inquit: *Rubrica sic facta examinatur cum exacta diligentia per Dominum Papam, & Fratres; & requiritur Papa consilia eorumdem, an videantur probata talia, propter quæ sit Canonizatio non immerito facienda. Si videatur Domino Papæ, quod facienda sit, definit hoc secreto promittit inter Fratres.* Atque ad hoc Consistorium respexisse videtur Jacobus Cardinalis Stephanenscus in Poemate de Canonizatione S. Petri Cælestini apud Bollandianos die XIX. Mensis Maji, sic inquiens.

*Intulit hunc celebrem mūdo, terrisque colendum
Esse Patrem, Sanctum, Confessoremque vocari
Decrevit, prudenter agens, cauteque recensens
Præteritum. Clausum sunt hæc decreta &c.*

II. In hoc ipso Consistorio, ut scite observat memoratus Scriptor Operis, *De Servorum Dei Beatificatione &c.* non solum Pontifex Cardinales alloquebatur, & eorum consilia requirebat, verum etiam legebantur testium depositiones, tam super virtutibus, quam super miraculis, ut habetur in Ordine XIV. Romano, Auctore Jacobo Gajetano, Cap. CXV. in quo quidem quod in hoc nostro §. edicitur, præscriptum jam antea fuit, & quidem luculentius expressiusque, cujus verba juvat & in hoc nostro Commentario describere. Ergo postquam dixit, invaluisse hunc in Canonizationibus morem, ut Pontifex inquisitionis jam factæ illius auctoritate examinationem comittat in Curia aliquibus Capellanis suis, idest Sacræ Romanæ Rotæ Auditoribus, qui & eo nomine appellabantur, qui ordinant, & forment rubricas super inquisitione prædicta, ita deinde subjicit: & ipsis rubricis cum exacta diligentia ordinatis, & formatis, committitur per Dominum Papam examinatio ipsarum rubricarum, & totius inquisitionis tribus Dominis Cardinalibus, videlicet uni Episcopo, alii Presbytero, & alteri Diacono. Qui Domini Cardina-

To. I.

les, visis per eos, & diligenter examinatis contentis in commissionibus, rubricis, & inquisitione prædictis, debent referre in Consistorio Domino Papæ plene in genere omnia supradicta, & quæ invenerint in eisdem, hoc excepto, quod super vita, & miraculis, & depositionibus testium super ipsis productorum nihil tunc in speciem referunt; sed postea in Consistorio in præsentia Domini Papæ, & aliorum Dominorum Cardinalium singulariter, & singillatim leguntur depositiones testium super vita, & miraculis productorum. Lectis, & diligenter auditis per Dominum Papam, & Cardinales, antequam ad aliud procedatur, Dominus Papa de consilio Cardinalium determinat, utrum vita excellentia illius, de quo agitur, sit plene probata, vel non, & ipsa determinatione facta, proceditur modo prædicto ad lecturam miraculorum, & depositionem testium super ipsis miraculis productorum. Hactenus laudatus Ordo Romanus, ubi vides, ut fusius luculentiusque ea enarrantur, qui in nostro hoc §. præscripta sunt.

III. Constat id plane magis magisque ex iis, quæ idemmet Romanus Ordo XIV. subjicit: *Notandum tamen, inquit, quod lecta in Consistorio depositione cujuslibet testis super quolibet articulo, vel saltem testium melius probantium, Dominus Papa de consilio Cardinalium definit, utrum illi testes plene probent articulum, de quo agitur, vel non, vel utrum adminiculentur, & hæc scribi debent ibidem per unum de Dominis Cardinalibus, de quo Domino Papæ placuerit. Quibus omnibus factis, & diligenter per Dominum Papam, & Cardinales examinatis, Dominus Papa debet inquirere consilia ipsorum Cardinalium, & petere ab eis, an videantur probata talia, propter quæ sit Canonizatio merito facienda; & si facienda videatur, Dominus Papa ibidem in Consistorio secreta inter Cardinales definit, ipsam Canonizationem esse faciendam.* Similia leguntur in ms. Cæremoniali Codice Pierfanctiano, ex quo supplevimus verbum illud *adminiculentur*, quod quidem in citato Romano Ordine XIV. desideratur; itemque apud Auctorem, qui rituum formulis præerat anno MCCCXLVI. juxta Raynaldum ad annum prædictum, atque in Ordine Canonizationis Sanctorum anno MCDXLIV. Tomo III. Collectionis Conciliorum Britannicæ, uti notavit Sanctissimus Dominus noster BENEDICTUS XIV. *De Servorum Dei Beatificatione &c.* Tomo I. Lib. I. Cap. XXI. ubi etiam docet, in eodem hoc Consistorio onus fuisse Cardinalium deputatorum, causæ merita exponere, quemadmodum legitur in Bulla Canonizationis S. Bernardini Senensis sub Nicolao V. & in Bulla Canonizationis S. Catharinæ etiam Senensis sub Pio II. ubi inter alia ita hic Pontifex ait: *Sed pro veteri consuetudine tribus ex Fratribus nostris S. R. E. Cardinalibus, uni Episcopo, alteri Presbytero, reliquo Diacono viva vocis oraculo commisimus, ut debitis habitis processibus de vita, & moribus ipsius Catharinæ, deque miraculis ejus sive in vita, sive post mortem patratis, & de reliquis ad*

F f

Ca-

Canonizationem necessariis diligenter inquirerent, nobisque in secreto Consistorio, ut moris est, fidelem relationem facerent.

IV. Vetus itaque regula est id quod in hoc nostro §. statutum est, ut nempe causam Canonizationis jam bene discussam, atque paratam a Capellanis Papæ, sive sacræ Rotæ Romanæ Auditoribus, iterum Papa *de consilio Fratrum*, ut ait noster §. *committat tribus Cardinalibus, Episcopo, Presbytero, & Diacono, qui diligenti examinent inquisitionem, sive, ut habet alia editio,*

diligenter examinent inquisitionem, probationes, & depositiones testium; & considerent solertissime omnia consideranda; & cum placuerit Sanctissimo Domino nostro, referant in secreto Consistorio &c. Atque hunc veterem morem sequuti sunt non modo laudati Summi Romani Pontifices Nicolaus V. & Pius II. uti ex citatis Bullis Canonizationum S. Bernardini Senensis, & S. Catharinæ itidem Senensis addiscimus, verum etiam alii Pontifices, uti constat ex aliis Bullis, quas non est opus recensere hoc loco.

§. III.

De publico Consistorio, propositione Advocati, & Pontificis responsa.

Fit post hæc publicum Consistorium, in quo Pontifex cum Pluviali rubeo, & Mitra, pretiosis relidet, & Advocatus Causæ longa oratione proponit vitam, gesta, & miracula Canonizandi, & demum supplicat nomine Principum, & populorum, qui de ea re scripserunt, bonæ memoriæ talem adscribendum esse a sua Sanctitate in Catalogum Sanctorum Christi, utque a cunctis Fidelibus pro Sancto veneretur, decernendum. Pontifex, audito Advocato, laudat ejus facundiam, dicit, libenter se audivisse, tam miranda illius Viri præconia, velle tamen super hac re maturius cum Fratribus suis deliberare, hortari, atque monere omnes, ut divinam Clementiam implorent, quatenus dignetur inspirare in mente sua, & Fratrum suorum Sanctæ Romanæ Ecclesiæ Cardinalium, atque omnium Prælatorum, quorum consilio in tanto negotio sit usus, ea quæ suæ placitura sunt Divinitati, neque permittat errare Ecclesiam suam Sanctam. Prælatos vero monet, ut super his cogitare debeant, ut cum requisiti fuerint, mature possint respondere, & his dictis finitur Consistorium.

§. IV.

Antiqua consuetudo Prælatorum Canonizationem petentium.

In hujusmodi Consistorio, ut apud antiquos Codices legimus, solebant sex, aut octo Prælati successive orare, narrantes merita Canonizandi, & supplicantes pro Canonizatione. Advocatus autem in principio tantummodo petebat a Pontifice, ut Prælati audirentur, & supplicabat, ut Canonizatio decerneretur.

COMMENTARIUS.

I. **E** Gimus jam in Commentario superiori de Consistorio in quod soli Cardinales conveniebant, agimus nunc de altero Consistorio, cui juxta veterem etiam ritum præter Cardinales intererant Episcopi, & Præsules apud Sedem Apostolicam degentes, ut his insuper innotesceret status causæ Canonizationis, & comperta essent merita ejusdem. Sermo in eo habebatur a Summo Pontifice, ejusque ritus mentionem inter alios facit Ostiensis, qui claruit medio Seculo XIII, in Capite, *Audivimus, De Reliquiis, & veneratione Sanctorum*, Num. v. sic inquit; *Coadunatis Episcopis, qui sunt presentes in Curia, narrat publice in Consistorio ea, quæ acta sunt, & probata, secreta definitione jam facta suppressa, & requirit consilia Prælatorum.* Eadem fere ad verbum legere est in Romano Ordine XIV. Cap. cv. & in ms. Cæremoniali Codice Pierfantiano, qui ita ajunt; *Postea vero definitione hujusmodi facta, per Dominum Papam, Canonizationem scilicet esse faciendam, debent vocari omnes Prælati, qui tunc in Curia sunt presentes; & Dominus*

Papa narrat eis publice in Consistorio ea, quæ facta sunt, & probata, secreta definitione prædicta jam facta suppressa, & requirit consilia eorundem Prælatorum.

II. Meminit quoque ejusdem ritus, seu sermonis haberi soliti a Papa in hoc Consistorio Jacobus Cardinalis Stephaneschus in suo Poemate ubi agit de Canonizatione S. Petri Cælestini apud Bollandianos die XIX. Maji.

..... deinceps

Advocat in medium, quæ se protendit in Aulam Regia, Pontifices varios, cunctosque Ministros Romanæ Sedis, necnon præsentem Senatu, Fatur: Et immensos suscepimus esse labores, Et Fratres nostri pariter, quod nosse putamus Vos etiam. Quæ sita prius depromimus ecce, Et vitam, moresque sacros, firmataque scimus Testibus indubie Petri miracula quondam Murronis, quæ scita palam, nec clausa tenemus Ad Fidei incrementa sacræ, vestramque salutem. Pauca tamen reclusit apex; quin cautius idem, Neve magis, vel forte minus dicendo laboret, Singula diffuso promi dictamine jussit.

III. Por-

III. Porro tametsi juxta recentiorem morem in hoc Consistorio, in quo Pontifex cum Pluviali rubeo, & Mitra pretiosis residet, *Advocatus Causa*, ut ait noster §. 111. *proponit vitam, gesta, & miracula Canonizandi, & deum supplicat nomine Principum, & populorum, qui de ea re scripserunt, bona memoria talem adscribendum esse a sua Sanctitate in Catalogum Sanctorum Christi, utque a cunctis Fidelibus pro Sancto veneretur, decernendum*; testatur tamen sequens §. iv. apud antiquos Codices legi, in *hujusmodi Consistorio*, consuevisse olim sex, aut octo Prælatos successive orare, *narrantes merita Canonizandi, & supplicantes pro Canonizatione*. Advocatum autem in principio tantummodo petiisse a Pontifice, ut Prælati audirentur, & supplicasse, ut Canonizatio decerneretur. Teste Jacobo Cardinali Stephanesco in Poemate, ubi enarrat Canonizationem S. Petri Cælestini, ubi Papa sermonem habuit, de quo superius dictum fuit, tunc Episcopii suffragia sua ferebant in laudem Canonizandi.

*Illicet ardentes positi sub limine sedum
Pontifices laudanda cæcunt, mirandaque pandunt,
Quisque loco residens, alternatimque resurgens
Quisque loco, & rogitant. Pensum procedere rectum*

*Judicium Ecclesiæ, cunctis gaudentibus una
Rustavere omnes, dignū & conscendere Divum.*

IV. Recte autem admonet memoratus noster iv. §. apud antiquos Codices legi, consuevisse sex, aut octo Prælatos successive orare, *narrantes merita Canonizandi, & supplicantes pro Canonizatione*. Id enim plane constat ex antiquo Romano Ordine xiv. Cap. cxv. cujus hæc sunt verba: *Deinde assignatur per Dominum Papam certa dies ad aliquem locum aptum ad hoc, ubi convenire habeant idem Dominus noster Papa, & Cardinales, & alii Prælati de Curia, ac Clerus, & populus, & interim extra Consistorium deputantur per Dominum Papam octo, vel septem Prælati ad minus, de quibus eidem Domino nostro Papa videbitur faciendum, qui dicta die assignata habeant publice prædicare. Habet etiam idem Dominus noster Papa ordinare gradus inter ipsos Prælatos, qui prædicare habebunt, ut videlicet talis primo prædicet, & talis secundo, & sic de aliis. Consuevit enim dicta dies assignari per unum mensem ante, vel per tres septimanas ad minus, ad finem quod prædicti Prælati diligenter collationes suas potuerint studuisse, quas ipsa die assignata succincte, & breviter in publico facere habebunt. Conclusiones vero dictarum collationum debent esse tales, videlicet quod ostendant per rationes, quod dicta Canonizatio est merito facienda, & supplicent dicto Domino nostro Papa, ut facere dignetur eandem. Eadem legere est in ms. Pier-sanctiano, qui etiam deinde iisdem verbis, quibus laudatus Ordo Romanus xiv. proseguendo narrationem suam, modum exponit, quo ipsis Præsulum orationibus initium dabatur.*

V. Modus ille, ut alia omittam, referente citato Romano Ordine xiv. is erat: *Quibus residentibus (loquitur de Papa, Cardinalibus, Episcopis, & aliis) surgere habet Procurator hujusmodi negotii, existens ex opposito dicti Domini Papæ, & assumpta sibi aliquali auctoritate, narrare debet aliqua de hujusmodi negotio, & supplicare ipsi Domino nostro, ut Sanctitas sua*
To. I.

*audire dignetur aliquos Prælatos, qui super prædictis prædicare intendunt; & nihilominus quod placeat Sanctitati suæ definire illum, de quo agitur, esse Sanctum, & Sanctorum Catalogo adscribendum, & tanquam Sanctum esse a Fidelibus venerandum, ac Festum ejus anno quolibet perpetuo certa die, de qua ipsi Domino nostro Papa videbitur, celebrandum; & hujusmodi supplicatione per dictum Procuratorem facta, surgat ille Prælatus, qui primo prædicare, seu collationem suam facere debet juxta ordinationem jam dictam; & incipiat collationem suam, & eam prosequatur succincte, & breviter; quæ finita, surgat secundus, & faciat similiter, & sic de aliis. His concinit citatus ms. Cæremonialis Codex Pier-sanctianus, aliusque relatus a Raynaldo ad annum mcccxlvi. Num. xxxvi. & seq. Atque ad hunc antiquiorem ritum respexit quidem noster §. iv. ubi ita inquit: *In hujusmodi Consistorio, ut apud antiquos Codices legimus, solebant sex, aut octo Prælati successive orare, narrantes merita Canonizandi, & supplicantes pro Canonizatione; itemque ubi statim deinde subjicit: Advocatus autem in principio tantummodo petebat a Pontifice, ut Prælati audirentur, & supplicabat, ut Canonizatio decerneretur.**

VI. Quia vero, fortasse experientia teste, ut docet nos doctissimus Pontifex Maximus BENEDICTUS XIV. Libro 1. *De Servorum Dei Beatificatione &c.* Cap. xxi. Num. vi. deprehensum fuit difficile in uno eodemque Consistorio Præsulum perorationes fieri, & suffragia Cardinalium, & Episcoporum apud Sedem Apostolicam degentium exquiri posse, tertium superadditum fuit duobus supra recensitis Consistoriis; in quorum primo, sicuti dictum est, Papa scrutabatur consilia Cardinalium, in secundo fiebant perorationes, in tertio denique perquirebantur suffragia Cardinalium, & Episcoporum apud Apostolicam Sedem existentium; tum in locum tot perorationum, quæ a Præsulibus fiebant, substituta fuit Oratio unius ex Advocatis Consistorialibus, in qua vita, miracula, & series Actorum totius causæ copiose exponerentur; & quia propter strepitum adstantium aliquando accidebat, ut Episcopi, qui suffragium in ultimo Consistorio ferre debebant, Advocati Consistorialis Orationem habitam in secundo Consistorio bene intelligere non possent, introducta fuit consuetudo, ut Consistorialis Advocatus in tertio Consistorio summam referret ea, quæ fusa in secundo exposuerat, ut insuper Summus Pontifex de statu, ac meritis causæ sermonem faceret, & ut Rotæ quoque Auditores, sed præsertim causæ Commissarii, interessent, qui difficultatibus, quæ excitarentur, possent satisfacere.

VII. De substitutione Orationis faciendæ ab Advocato Consistoriali in locum tot Orationum, quæ fiebant a Præsulibus, loquitur Penia in Vita S. Raymundi Lib. 111. in observatione ad Caput xxxvi. his verbis: *Ceterum in melius hanc consuetudinem reformatam satis docet sacrarum Cæremoniarum usus, quo cessat multiplicatus ille tot Prælatorum orantium strepitus. Quod autem ad Advocatum Consistorialem attinet, id ex antiqua satis consuetudine receptum est. Cum enim ante aliquot secula causæ graves in Consistorio tractarentur, solis Advocatis Consistorialibus dicendi in Consistorio facultas erat. Atque inde retenta consuetudo, ut nonnisi aliquis de Colle-*

gio Advocatorum Consistorialium has Orationes habere soleat. Sed illud præterea observari vidimus, si in Collegio Advocatorum Consistorialium sit aliquis Advocatus de Dominio illius Principis, qui Sanctum petit canonizari, ille eligitur, ut oret, ut in hac Causa, nempe S. Raymundi, Bernardinus Scottus Mediolanensis, pro qua intereedebat Rex Hispaniæ Dux Mediolani. Laudat citato loco BENEDICTUS XIV. Numero VII. hoc testimonium Peniæ, aitque, merito quidem ab ipso Penia dictum fuisse, id ex antiqua satis consuetudine, habita scilicet ratione temporis quo scribebat, receptum, quod Advocatus Consistorialis in publico Consistorio de Canonizatione peroraret. In Canonizatione enim solemnè S. Bonaventuræ sub Sixto Papa IV. celebrata, Oratio facta fuit in publico Consistorio ab Octaviano celebri & docto tunc temporis Advocato Consistoriali, teste Jacobo Volaterrano

Auctore contemporaneo apud Raynaldum ad annum MCDLXXXII. Num. XLVI. & apud eruditissimum Muratorium Tomo XXIII. Rerum Italicarum. In Canonizatione quoque Civis mei S. Francisci de Paula sub Leone X. Pontifice anno MDXIX. Angelus Cæsius oravit in publico Consistorio, quemadmodum legitur in Bulla Canonizationis ipsius §. xxxvii. Ceterum scitissime idem docet loco citato, de Advocato pariter Consistoriali intelligenda esse illa nostri §. III. verba: *Fit post hæc publicum Consistorium, in quo Pontifex cum Pluviali rubeo, & Mitra pretiosis residet, & Advocatus causæ longa oratione proponit vitam, gesta, & miracula Canonizandi, & demum supplicat nomine Principum, & populorum, qui de ea re scripserunt, bonæ memoriæ talem adscribendum esse a sua Sanctitate in Catalogum Sanctorum Christi, utque a cunctis Fidelibus pro Sancto veneretur decernendum.*

§. V.

Consistorium secretum cum Prælati Curia.

Post hæc, cum placuerit Sanctissimo Domino nostro, vocentur omnes Prælati Curia in secreto Consistorio cum Pontifice, & Sacro Collegio, & ibi proponat breviter Sanctitas sua, ad quid vocati sint; deinde, si placet, per Advocatum faciat summam repeti vitam, & miracula Canonizandi, & quæ sunt probationes in genere tantum. Post hæc narret, quanta cum diligentia, & fide inquisitio, & processus super hac re factus sit de multiplici, & canonica attestazione, de instanti Principum, & populorum attestazione; & demum conscientiam illorum onerando, exquirat sigillatim a quolibet suam in ea re sententiam; & cum omnes finierint, agit gratias de bono consilio, & hortatur eos orare Deum, ne sinat, se errare in tanto negotio, & sic omnes recedunt. In hoc Consistorio debent interesse Patriarchæ, Archiepiscopi, Episcopi, Abbates, ad quos tantum pertinet dicere sententiam suam. Poterunt interesse aliqui Protonotarii Ordinarii, ut sint rogati de his, quæ rogantur. Aderunt etiam Auditores Rotæ, & maxime Commissarii Causæ, ut si quid esset declarandum, possint, ut bene informati, mentes aliorum declarare. Summus Pontifex erit cum Mitra, & Pluviali. Procurator Fiscalis aderit, & faciet rogatos Protonotarios de consilio, & consensu Prælatorum.

COMMENTARIUS.

I. Illustrant quammaxime hunc nostrum §. quæ de repetitione compendiaria facienda ab Advocato Consistoriali in tertio Consistorio, postquam in secundo fusam habuerat orationem de statu, & meritis causæ, docet Jacobus Volaterranus apud Raynaldum ad annum MCDLXXXII. Num. XLVI. ubi Canonizationem S. Bonaventuræ a Sixto Papa IV. peractam describit. Postquam etenim, juxta superius exposita, Jacobus retulit, fuisse in secundo Consistorio habitam Orationem ab Advocato Octaviano, quæ propter strepitum frequentissimi Senatus vix potuit audiri, licet maximopere fieri commendata ab illis, qui eam audierunt, ita deinde prosequitur: *Paucis cum respondisset Pontifex, commisit Prælati omnibus in Romana Curia existentibus, ut & ipsi de meritis B. Patris edocti in primo Senatu ea tantum causa cogendo sententiam dicerent. Die igitur Veneris, qui sequutus est (fuit enim duodecima mensis Aprilis) vocati in consilium fuere non Cardinales modo, sed Episcopi omnes. Abbates, & Ju-*

dices Rotæ Palatina, Religionum quarundam Prælati, & Procuratores earundem Generales. Consilii locus fuit major Aula supra primam Palatii portam, quæ in S. Petri arcam spectat. In Senatu iterum oravit Octavianus, quem dixi; & quia priori Senatu a paucis fuerat per strepitum auditus, eandem, ut audio, orationem recitavit cum summa attentione, & commendatione. Rogati postmodum Episcopi, & ceteri sententiam dicere, Cardinalibus silentibus, Præsulibus quisque, prout loco præerat, ita sententiam dixit &c. Hæc Volaterranus, quibus etiam consentit Bulla Canonizationis ejusdem Sancti Bonaventuræ.

II. Clarius profecto iidem ritus in §. hoc nostro præscripti, apparent ex Canonizatione Civis mei S. Francisci de Paula celebrata a Leone Papa X. anno MDXIX. fuseque enarrata in suo ms. Diario a Paride Grassio tunc Apostolicarum Cæremoniarum Magistro, cujus locum descripsit Raynaldus ad annum ipsum MDXIX. Numero LXXVII. & sequenti. Ait siquidem Grassus in

in secundo Consistorio ita loquutum fuisse: Cum in publico proximo Consistorio coram tua Beatitudine, Reverendissimis Dominis Cardinalibus... de patria, parentibus, vita, moribus, ac vigin-tiquinque illustribus in specie, aliisque fere in-numerabilibus in genere miraculis B. Francisci de Paula, ut ex Actis liquido apparet, dixis-sem Tua Beatitudo pro sua singulari pie-tate, & clementia, desuper mature deliberare, velle, dignata fuit respondere; eosdemque Pra-latos, ut ea in re cogitarent, diligenterque ad-verterent, Deumque orarent, ne Ecclesiam er-rare pateretur, monuit. Cum autem, Pater Beatissime, non dubitem, per omnes monitioni tua Beatitudinis satisfactum, hancque rem jam tot testibus probatam, totque oculis spectatam, totque etiam palpatam manibus, totiesque, ac etiam a multis praestantissimis Viris, & ultimo a tribus Reverendissimis Cardinalibus diligenter, studioseque cognitam, & examinatam, ulteriori discussione nullatenus indigere, sed ad expedi-tionem ipsam veniendum sit; propterea suppli-co ut ad eam expeditionem devenire, opus-que tam sanctum, Leoneque X. dignum perficere dignetur. Ita in sua oratione Advocatus, cui, ut idem Grassus tradit, nonnulla Pontifex sub-didit de causae gravitate, & de negotii arduita-te, tunc dixit, se audire velle suffragia Cardi-nalium, & Episcoporum, tandemque ita con-cludit: Quo circa vos universos Fratres, & prae-sentes, quos jampridem desuper mature prae-co-gitare monuimus, in Domino affectuose requiri-mus, conscientias vestras onerantes, ut secun-dum Deum, cujus res principaliter agitur, quic-quid singuli sentitis, libere proferre velitis.

III. Quod vero spectat Romanae Rotae Au-ditores, & Protonotarios, de quibus mentio-nem facit hic noster §. eorum munia in Consisto-rio, de quo in praesenti loquimur, explicat Pe-nia in Actis Canonizationis S. Didaci Lib. III. Cap. xv. sic inquit: Non oportuit tunc quidem ab Auditoribus Rotae aliquid rogare cum super Processu nulla exorta fuerit, aut excitata con-troversia, quae illorum explicatione, & industria indigeret. Hoc enim consilio Auditores potissi-mum illi, ad quos judicandi processum cura mandata est, advocari solent. Protonotarii ve-ro ad fidem exhibendam circa ea decreta, quae in Consistorio censentur, solum rogandi erant. Munus olim fuisse Protonotariorum Apostolicae Sedis, Decreta adnotare, quae fiebant in sacro Consistorio, testem habemus Cardinalem Pa-piensem in Epistola ad Volaterranum data, ubi ita scribit: Volo, si possum, notare nonnulla ejusmodi Senatus nostri Decreta, quorum recor-datione, & exemplis in plerisque actionibus no-stris instrui, & admoneri quandoque possimus. Adjuvat, mihi crede, hac diligentia multum ministerium nostrum. Consueverant olim Roma-ni Pontifices eam curam mandare Notariis Apo-stolicae Sedis. Sed obsolevit mos ille, ut alii per-multi, tam Pontificibus utiles, quam Romanae Sedi honorifici. Olim quoque munus Secretarii in Causis Canonizationum delatum fuisse uni ex Collegio Protonotariorum Apostolicorum, doc-et laudatus Penia Lib. III. De vita, miraculis, & actis Canonizationis S. Didaci, Cap. xi. cu-jus verba digna sunt, ut hic describamus: Ad decreta, inquit, quae in his Conventibus per Cardinales fiebant, conscribenda, Petrus Geor-

gius Odescalchus Sedis Apostolica Notarius (Protonotarium Romana Curia vocat) accitus est. Quod prudentissime constitutum fuisse con-stat, ut septem antiquorum Notariorum Roma-nae Ecclesiae, quos Clemens I. divisa Urbe in sep-tem Regiones, ad Martyrum gesta solaciter, & fideliter inquirenda, & conscribenda instituit, & Anterus, Fabianusque, Pontifices confirma-runt, vestigium aliquod in his Sanctorum Ca-nonizationibus servari videatur, cum imitanda, & conservanda, quantum fieri potest, non vio-landa sint, aut contemnenda aliqua Ecclesiae in-stituta. Tum vero paulo post subdit: Hoc ergo consilio Odescalchus desumptus est, in his Cardi-nalium conventibus pro Canonizatione S. Didaci faciendis Secretarii officio functus est. Id ipsum idem Auctor confirmat in Vita S. Raymundi Lib. III. Capite xxvi. sic dicens: De his omnibus R. P. D. Anselmus Dandinus Protonotarius Apo-stolicus, & in causis Canonizationis Secretarius, rogatus instrumentum recipit.

IX. At vero hodie, uti docet Sanctissimus Dominus noster BENEDICTUS XIV. De Servo-rum Dei Beatificatione &c. Lib. I. Cap. xvii. cura adnotationis Decretorum Consistorii dela-ta ad ejus Secretarium, unus assumitur e Col-legio Protonotariorum Participantium, qui non solum Consultor Sacrae Congregationis Rituum est, sed aliqua alia peragit, quae sunt ipsi peculia-ria, & reliquis Consultoribus minime commu-nia. Fusa de iis agit laudatus Pontifex non uno in loco sui citati Operis; sed ut hic aliqua note-mus, praecipuum illud profecto est, quod re-feritur in decretis generalibus Urbani Papae VIII. in quibus, Sanctissimo Domino nostro sic annuen-te, indultum est Protonotariis de numero Parti-cipantium; primo, quod in processibus fabrican-dis, & praecipue in examinandis testibus super Martyrio alicujus Servi Dei, hic in Curia omnino intervenire debeat R. P. D. Protonota-rius pro tempore Sacrae Congregationis; secun-do, quod examen praedictum debeat esse subscri-ptum ab ipso Domino Protonotario, alias examen nullam faciat fidem; tertio, quod Notarius, qui examen praedictum recipiet, in hoc actu ipsi Do-mino Protonotario subordinatus censeatur, & reputetur. Porro docet BENEDICTUS Papa XIV. in citato Opere Lib. I. Cap. xvii. si Secre-tarius Sacrae Congregationis aegrotet, aut absit ab Urbe, congruum videri, ut annuente San-ctissimo, ejus vices a Protonotario suppleantur; & ita sane factum inquit tempore absentiae Ti-grini Secretarii; interfuit enim Protonotarius de Ruvere tanquam Secretarius uni Congrega-tioni, ut adnotatur in regestis die 6. Septembris mdcxxx. totoque tempore aegritudinis Bernar-dini Inghirami Sacrae Rituum Congregatio-nis Secretarii; & usque ad ejus obitum, Secre-tarii munere functum fuisse subjicit, ex permis-sione Papae, Carolum Colliculam tunc Protono-tarium Congregationis, & deinde S. R. E. Car-dinalem.

V. Longum esset fusius de Protonotario, & Secretario Sacrae Congregationis Rituum, ac de Rotae Romanae Auditoribus, aliisque eidem Congregationi adscriptis differere. Videri pla-ne potest de iis, ac de omnibus ad Canonizatio-nem spectantibus laudatissimus Sanctissimus Do-minus noster BENEDICTUS XIV. in admirando Opere omnigena eruditione referto, ac omni-bus

bus numeris absoluto, *De Servorum Dei Beatificatione, & Sanctorum Canonizatione*. Unum est, quod in hoc Commentario omitti a nobis nullatenus debet, constare scilicet ex dictis huc usque, summas fuisse diligentias, quæ antiquiori tempore, & ante institutam Sacrorum Rituum Congregationem a Sixto Papa V. a Romanis Pontificibus adhibebantur, antequam Beatificationis, aut Canonizationis honores Servis Dei, aut Beatis indulgerentur. Pluribus id plane ostendit idem Pontifex BENEDICTUS Libro I. Capite XXI. Num. XI. & seqq. refellitque inter alia sædum illud effatum, quod Cardinalem Bessarionem dixisse ferunt, se valde dubitare, utrum vera essent, quæ a Majoribus de Sanctis antiquis prodita fuerunt, cum nonnullos suo tempore vidisset in Sanctorum album relatos, quorum vitam ipse in eorum causis suffragium ferens improbaverat. Primus qui effatum illud Bessarioni supposuerit, nullo tamen prolato testimonio, fuisse dicitur Guillelmus de Bellai, qui longe post Bessarionem vixit; ideoque penitus contemnendus, sicuti juxta bonæ critices regulas contemni debent, quæ a recentiori Auctore, præsertim ubi ei probitas desit, de factis, aut dictis antiquorum, nullo adducto contemporanei, & fide digni Scriptoris testimonio, referuntur.

VI. Cum denique juxta nostri hujus §. præscriptum, *in hoc Consistorio debeant interesse Patriarchæ, Archiepiscopi, Episcopi, Abbates, ad quos tantum pertinet dicere sententiam suam*; antiquum morem canonizandi Sanctos in Synodis, de quo diximus Tom. III. Conciliorum in Appendice ad Historiam Concilii IX. Œcumenici Lateranensis I. etiam hodie servare videtur Apostolica Sedes; numquam enim cum suo solo Consistorio, sed semper cum ampla Episcoporum Synodo, qui in Urbe reperiuntur, solet Papa Dei Servos Sanctorum Fastis adscribere. Esse hunc antiquum ritum ab Apostolica Sede servatum, docet apud Philippum Labbeum Rothomagensis Ecclesiæ Chronicon ad annum Christi MCCXXV. ubi enarrans Canonizationem sancti Laurentii Dublinensis Archiepiscopi ab Honorio III. factam, modum etiam exponit, sic inquit: *Beatus Laurentius quondam Dublinensis Archiepiscopus a Domino Papa Honorio Tertio, probatis per testes omni exceptione majores signis, & virtutibus, quas per illum Dominus operari dignatus est, & convocatis Cardinalibus, & omnibus Archiepiscopis, & Episcopis, & omnibus aliis, qui in Curia præsentibus aderant, canonizatus est solemniter, omnibus approbantibus, & Deum collaudantibus, qui in Sanctis suis semper mirabilis, & in Catalogo Sanctorum Confessorum scriptus*. Sancti hujus Præfulis res præclare gestæ, & sincere scriptæ legi apud Laurentium Surium possunt ad diem XIV. mensis Novembris.

VII. Ex præscripto nostri hujus §. jam non solum Patriarchæ, Archiepiscopi, & Episcopi huic Consistorio interesse debent, verum etiam Abbates, ad quos tantum pertinet dicere sententiam suam. Sed sciendum tamen, jam diu in defuetudinem abiisse eam disciplinam, ut Sanctorum Canonizationibus Abbates intersint, & suam sententiam proferant. Putat sane doctissimus Pontifex BENEDICTUS XIV. in suo Opere *De Servorum Dei Beatificatione &c.* Lib. I.

Cap. XXXIV. Num. XIII. quod cum a Summo Pontifice Gregorio XIII. insignissimæ quædam Abbatæ fuerint Collegiis ab ipso institutis unitæ, & earum Abbatiarum, quæ sunt in locis Urbis conterminis, fiat ut plurimum collatio Cardinalibus; hinc forte evenit, ut fere nullis in Urbe, aut circa Urbem Abbatibus extantibus, habentibus territorium separatum, & jurisdictionem in Clerum, & populum, de quibus quidem Cæremoniale hoc nostrum loquitur, qui Cardinalitia dignitate non fulgeant, non amplius facta sit, nec fieri potuerit Abbatum utilium advocatio ad hæc Consistoria, ut in eis suam proferant sententiam. In ms. Diario Paridis Grassi legimus quoque Leonem Papam X. in hoc Consistorio, de quo agimus, suffragia Pœnitentiariorum requisivisse, dum agebatur de Canonizatione civis mei S. Francisci de Paula; sed tamen post dictum Pontificem id amplius factum non est; ut idem laudatus Papa BENEDICTUS XIV. notavit loco citato.

VIII. Neque Abbates solum, verum etiam Auditores Rotæ, Protonotarios, ceterosque omnes sententias suas in Canonizatione S. Didaci tulisse, tradit Petrus Galefinus in Actis Canonizationis ejusdem S. Didaci, Parte III. Cap. XXI. Pontifex, inquit, *de Beato Didaco in Sanctorum numerum adscribendo sententias dici jussit. Tum suo quique ordine Cardinales, postea Patriarchæ, Archiepiscopi, Episcopi, Auditores Rotæ, Abbates, ceterique omnes, qui aderant, uno consensu, ac libere dixerunt, illud cujus vita sanctitas, ac miracula nota, ac testata erant, dignum esse, qui in Sanctis ascriberetur*. Sed quod attinet ad Rotæ Auditores, & ad Protonotarios, sapientissime docet Sanctissimus Dominus noster citato loco, Num. XII. certum esse, eos suffragia non tulisse. Vocati etenim fuere Auditores Rotæ ad semipublicum Consistorium, cum tunc Canonizationum causæ eorum examini committerentur, ut si forte aliqua difficultas fuisset excitata, parati essent ad opportunas responsiones suppeditandas: Protonotarii vero vocati fuerunt, sicuti etiam nunc vocantur ad conficienda instrumenta de gestis, & definitis in eodem Consistorio, teste Francisco Penia in iisdem S. Didaci Actis jam etiam superius relatis: *Non oportuit, ait, tunc quidem ab Auditoribus Rotæ aliquid rogare, cum super processu nulla exorta fuerit, aut excitata controversia, quæ illorum explicatione, & industria indigeret*. Hoc enim Consilio Auditores potissimum illi, ad quos judicandi processum, cura mandata est, advocari solent. Protonotarii vero ad fidem exhibendam circa ea Decreta, quæ Consistorio censentur, solum rogandi erant. Atque hæc quidem consona iis sunt, quæ edicit hic noster §. *Poterunt interesse aliqui Protonotarii, ut sint rogati de his, quæ gerantur*. Tum mox: *Aderunt etiam Auditores Rotæ, & maxime Commissarii causa, ut siquid esset declarandum, possint ut bene informati, mentes aliorum declarare*. Vide eruditum Roccam in Commentario, *De Canonizatione Sanctorum*, Cap. XXXVII. ubi de tertio Consistorio agit.

IX. Sed ut aliquod generalis Canonizationis, quæ dicitur illa facta ab œcumenica Synodo, aut a Summo Pontifice Sanctorum aliquem toti Ecclesiæ declarante, exemplum afferamus, imo & initium ejus ritus, certe primus, qui eum-

mo-

morem invenit, fuit Joannes XV. qui, ut tradit Mabillonius in Præfatione ad Seculum V. Benedictinum §. vi. anno Christi c̄mxciii. Synodum exeunte mense Martio Romæ celebravit, in qua Udalricum Augustensem Episcopum Canonizavit. Rogante Liutolfo Augustano Episcopo perfecta est quidem prima hæc Canonizatio S. Udalrici a Summo Pontifice & in Concilio Lateranensi complurium Episcoporum, ut nimirum S. Udalrici cultus, quem ipse Liutolfus Augustanus Episcopus in sola Ecclesia augustana juxta disciplinam ejus temporis instituere poterat, latius propagaretur auctoritate Romani Pontificis, quod alii postea in religionem verterunt. Addiscimus autem & illud ex memorata S. Udalrici Canonizatione, atque ex aliis complurium

aliorum Sanctorum Canonizationibus, Romanam Ecclesiam Synodale examen Semper huic Judicio impendisse. Præter enim exemplum adductum Joannis XV. qui in Lateranensi Concilio S. Udalricum canonizavit anno, ut dictum est, c̄mxciii. Callistus II. in generali I. Lateranensi Synodo S. Conradum, & Innocentius II. in Synodo itidem II. Lateranensi Œcumenica S. Sturmium Abbatem Fuldensensem canonizarunt. Sed & idem Innocentius II. jam ante II. Generalem Synodum Lateranensem, in Remensi Synodo anni m̄cxxxj. Godehardum Episcopum Hildesheimensem Sanctorum Fastis adscripserat, ut ejusdem Pontificis Litteræ nos docent relatæ a nobis Tomo III. Conciliorum pag. 18. & seqq. in quo etiam Tomo nonnihil de Canonizatione diximus,

§. VI.

De preparatione suggesti, & aliarum rerum pro Canonizatione

Deliberatur deinde dies Canonizationis, & interim in Ecclesia construitur suggestus ligneus tantæ amplitudinis, ut super illum instituatur, apteturque Capella cum Altari, Credentiis, Throno Pontificali, Sedibus Cardinalium assistentium Papæ, Oratorum, Prælatorum; Choro pro Cantoribus, & omnium Ordinum Romanæ Curia adinstar Capellæ Palatii Apostolici a cancellis, & supra quoad formam sedilium, & capacitatem. In eo suggestu erunt duæ Sedes Papales, una eminens ad sinistram partem, & alia erit amovibilis. Ascendetur ad suggestum per pontem cum duplici ostiolo a capite, & in imo. Ornabitur suggestus in extremitatibus circumcirca cum herbis, & floribus; & intus cum pannis, & tapetis opportunis ornabitur Ecclesia, & suspendentur per totum arma (1) Pontificis, Ecclesiæ, & Imago Canonizandi, atque etiam arma procurantium Canonizationem. Fiet baldachinum novum cum insignibus Pontificis, Procuratorum Canonizationis, & Imagine Sancti, quod debet suspendi supra Altare, ubi Pontifex celebrat. Fiet etiam Vexillum magnum cum Imagine Sancti, quod portabitur ante Religiosos, sive illos, qui procurant Canonizationem, & ponitur apud (2) ostium superius suggesti. Cum Pontifex venit ad Ecclesiam, ponantur circumcirca super deambulatorium intorcia numero octoginta, vel circa, sex librarum pro qualibet, quæ ardeant, dum fit officium.

COMMENTARIUS.

I. IN solemnitate Canonizationis, uti opportunè adnotavit BENEDICTUS XIV. *De Servorum Dei Beatificatione &c.* Lib. I. Cap. XLVI. §. VII. Num. xxxix. amplum fit tabulatum in Basilica Vaticana, in quo nedum Thronus Pontificius, verum etiam sedilia pro Cardinalibus, Archiepiscopis, Episcopis, Pœnitentiariis, Præfulibus, & Officialibus Romanæ Curia collocantur, cujus porro ligna, expleta solemnitate, traduntur Canonicis ejusdem Vaticanæ Basilicæ, qui eorum pretium instar Chori distributionum inter se dividere consueverunt. Egregia canonizandi facinora, & insignia miracula depicta per universam Basilicam conspiciuntur, & horum pariter icones eidem Basilicæ Capitulo, perfecta celebritate, tribuuntur. Ingens funalium, cereorum, & candelarum accensarum numerus tabulatum ipsum, Altare, Apostolorum Confessionem, & universum Basilicæ ambitum circumdat; itemque quicquid funalium eorundem, cereorum, & candelarum post Missam reliquum est, ad modo dictum pertinet ejusdem Basilicæ

Capitulum, sed ita tamen, ut horum omnium pretium, adhibita debita proportionè, participant etiam Beneficarii, necnon Clerici Beneficarii, qui Choro intersunt ejusdem Basilicæ. Pergit Sanctissimus Pontifex, aitque Num. xli. impensas pro tabulato, luminibus, atque pretiosis supellestilibus, quæ in Canonizationibus adhibentur, inter necessarias computatas fuisse; quia scilicet majestas solemnitati deesset, si tabulatum, ut de eo primum dicamus, non fieret, atque adeo sine eo pauci solemnitatem videre possent, & cæremonias, ritusque, quibus solemnitas ipsa Canonizationis peragitur. Atque hæc quidem, & alia longe plura docet laudatus Pontifex, quæ tamen recentiorè morem, quo Sanctorum Canonizationes in Vaticana Basilica celebrantur, spectant.

II. Juxta præscriptum nostri §. *ornabitur suggestus*, seu tabulatum ipsum, *in extremitatibus circumcirca cum herbis, & floribus*. Itaque plane factum est in Canonizatione S. Francisci de Paula, teste Paride Grassi, qui in ms. Diario, ubi

(1) In editione Romana, in Veneta vero I. & Colonienſi legitur *insignia*, & ita etiam paulo post. (2) In citatis Veneta, & Colonienſis editionibus legitur, *super*.

ubi ipsam Canonizationem describit, sic inter alia inquit: *Feci optime deputari unum Festajolum expertum, & unum ex meis Capellanis præfidentem deputavi super paratum festivum, & obtinui a Papa, quod omnes muliones Palatii ad libitum Festajoli mitterentur pro frondibus ex myrto, & floribus hujusmodi, quando, & quoties ipse Festajolus vellet. Feci fieri frasconos in gyrum suggesti, & super porta principali Ecclesiæ cum armis quinque, & bene fuit.* Consuevisse olim sacras Aedes præsertim in summis celebritatibus Sanctorum ornari floribus, ac frondibus arborum, docet Nos Nepotiani Presbyteri exemplum, qui teste S. Hieronymo in ejus Epitaphio, seu funebri oratione, *Basilicas Ecclesiæ, & Martyrum conciliabula diversis floribus, & arborum comis, vitiumque pampinis adumbravit, ut quicquid placebat in Ecclesiâ, tam dispositione, quam visu, Presbyteri laborem, & studium testaretur.* Hujusmodi diligentia laudem meruit S. Severus, de quo S. Gregorius Turonensis in Libro, *De Gloria Confessorum*, Cap. I. ita scribit: *Solitus erat flores liliorum tempore quo nascuntur colligere, ac per parietes hujus Aedis appendere.* Addi & his potest S. Guido Lakenis Ecclesiæ Clericus, quem incertus, sed verus Scriptor iisdem pene verbis, quibus S. Hieronymus Nepotianum, celebrat apud Surium die XII. Septembris: *Siquis eum quæreret, in Templo reperiebat. Diversi autem generis floribus, & arborum comis cancellos, & thecas Sanctorum vestiebat &c.*

III. Templum, Altaria, sacras Imagines, & Sanctorum Reliquiaria floribus decorabat & prisca ætas, ut pluribus docet eruditissimus Caracciolus in Notis ad Constitutiones Clericorum Regularium, Parte I. Cap. III. Certe apud Hebræos antiquissima est florida religio, præcipue in celebri festoque die: *Constituite*, ait in Psalmo CXV. *Regius Vates, diem solemnem in condensis usque ad cornu Altaris*, hoc est, ut Agellius e Symmacho, & LXX. erudite adnotavit, *diem festum agentes, Templum densis frondibus, florumque sertis ornate usque ad Altaris angulos.* Itaque Hebræis mos iste sollemnis; & cum flores per hyemem deessent, ramos, frondesque sufficiebant. Ita ad ingressum Simonis Machabæi in arcem Hierosolymitanam festivitatem celebrarunt cum laude, & ramis palmarum, ut constat ex Libro I. Machabæorum Cap. XIII. Christum quoque, uti legitur Matthæi Capite XXI. Hierosolymam regaliter ineuntem similiter exceperunt. E Judæis igitur ad nos ornatum istum, ut & pleraque alia, transiisse, recte arbitratum idem Caracciolus loco citato. Porro Sanctorum Martyrum Aedes, atque Altaria floribus inspergi solita; sæpe S. Augustinus Lib. II. *De Civitate Dei*, Cap. VIII. & seqq. aliique Patres, atque Historici meminerunt. Ut alios omittam, Prudentius, rosas, floribusque aliis, sacrorum Ossium thecas, sive Aras, vel media hyeme purpurandas piissime meditatur, sic inquit Hymno III. *De Coronis,*

*Carpite purpureas rosas,
Sanguineosque crocos metite.
Non caret his genialis hyems,
Laxat & arva repens glacies,
Floribus ut cumulet calathos,
Sic venerarier ossa libet,
Ossibus Altar & impositum.*

Quod nostram rem spectat, ut alia exempla omittam, ubi anno Domini MCCCXCI. die Sabbati VII. mensis Octobris a Bonifacio Papa IX. facta fuit Canonizatio B. Brigida in magna Capella sacri Palatii Roma prope S. Petrum, teste Petro Amelio in Ordine Romano XV. Capite CLIII. *parata fuit Capella circumquaque de pannis, & sternata de frondibus.*

IV. Præterea, ut ait noster §. *intus cum pannis & tapetis opportunis ornabitur Ecclesiâ.* De ornanda Ecclesiâ, in qua solemnitas Canonizationis celebratur, loquitur Romanus Ordo XIV. Cap. cv. mandans inter alia, ut Canonizationis die adveniente, *sternatur tapetis Ecclesiâ, & paratur &c.* Sacram ipsam Aedem, in qua S. Brigida anno MCCCXCI. canonizata fuit a Bonifacio Papa IX. paratam fuisse *circumquaque de pannis*, jam paulo superius audivimus ex testimonio Petri Amelii, qui in suo Romano Ordine xv. Cap. CLIII. ejus Sanctæ Canonizationem describit. Sequioribus seculis multum auctus fuit ipsius Basilicæ Vaticanæ ornatus, in qua fere semper peragi consueverunt Canonizationes Sanctorum; afferrique possent varia exempla; sed puto, nunquam Vaticanam ipsam Basilicam elegantius, nobilisque fuisse ornata, quam in postrema Canonizatione Sanctorum Fidelis a Sigmaringa, Camilli de Lellis, Petri Regalati, Josephi a Leonissa, & Catharinæ de Riccis celebrata a Sanctissimo Domino nostro feliciter regnante BENEDICTO XIV. die XXIX. Junii anno Christi MDCCXLVI. ut videre est in Actis Canonizationis laudatorum Sanctorum Romæ editis anno MDCCXLIX. pag. 585. & sequentibus, ubi fuscè eleganterque ornatus Vaticanus Templi describitur cum variis figuris ære incisis, quæ ornatum ipsum prædictæ Canonizationis spectant.

V. In ornatu Basilicæ mandat noster §. *ut suspendantur per totum arma Pontificis Ecclesiæ, & Imago Canonizandi, atque etiam arma procurantium Canonizationem.* Varia antiqui hujus ritus exempla legimus passim in Actis Canonizationis Sanctorum, servatumque ritum ipsum vidimus nos in iis Canonizationibus, quas celebrarunt Benedictus XIII. Clemens XII. & novissime feliciter regnans BENEDICTUS XIV. in solemnibus Canonizationibus quinque Sanctorum, quam fuscè eleganterque enarrant Acta ejusdem Canonizationis. Porro, cum juxta antiquum ritum, cujus in suo citato egregio Opere idem BENEDICTUS XIV. non semel meminit, in Canonizationibus alta voce legerentur miracula canonizandorum, præ magna autem hominum multitudinē, qui illis intererant, vix pauci legentem audire possent, hinc, ut illorum pietati satisfaceret, in ejus lectionis locum, picturæ substitutæ sunt, quæ ab utroque Ecclesiæ latere appensæ, ab omnibus videri possent; repræsentantque insigniora probata Canonizandorum miracula. Rursus ex præscripto ejusdem nostri §. *fiet baldachinum novum cum insignibus Pontificis, Procuratorum Canonizationis, & Imago Sancti, quod debet suspendi supra Altare, ubi Pontifex celebrat.* De usu Imaginum in Altaribus, jam fuscè diximus nos in Operibus nostris, præsertim vero Tomo II. Conciliorum in Commentariis ad Generalem Synodum VII. Quod autem hunc §. spectat, legenda Acta Canonizationum, in quibus ritus ipse luculentur describitur.

VI. Cau-

VI. Cautum quoque & illud est ex nostro eodem §. ut fiat etiam *Vexillum magnum*, quod portabitur ante Religiosos, sive illos, qui procurant Canonizationem, & ponitur apud ostium superius suggesti. Solet plane ex antiquo ritu in Processione, quæ fit in Canonizatione Sanctorum, & de qua diximus supra in Commentario ad §. VIII. deferri Vexillum cum Imagine ejus Beati, qui est canonizandus, & plura utique feruntur Vexilla, si plures Beati sint illi, qui debent unico actu canonizari, uti sapientissime notat Sanctissimus Dominus Noster in Opere insigni, *De Servorum Dei Beatificatione &c.* Lib. I. Cap. xxxvi. ubi etiam docet, eam Vexillum ipsum deferendi consuetudinem initium habuisse videri a citata Canonizatione S. Stanislai Cracoviensis Episcopi, de qua sic inquit Joannes Longinus apud Bollandianos loco citato: *In ipso Canonizationis articulo, Innocentio Papa, ejus scilicet nominis IV. qui eum canonizavit anno mcliii. consistente adhuc in Cathedra, Vexillum de rubro colore, & puniceo contextum, Pontificalem personam habens pro insigni, in alto pendens, Angelico gestatum ministerio, apparuit, a pluribus Christifidelibus, quibus id clementia Divina revelare voluit, non sine admiratione conspectum; rubro colore sanguinis effusionem significans, & Pontificali persona Beatissimum Stanislaum apertissime figurans.* Ad quæ verba ita ad rem nostram Papebrochius notavit: *Eo miraculo præbitum exemplum Vexillum exponendi in Canonizatione novorum Sanctorum.* Sunt autem qui putant, inter quos Phæbeus ex Notis Baronii ad Martyrologium Romanum, Vexilli usum in solemnī Processione Canonizationis deferendi originem duxisse a Concilio Constantiensi, ubi ex Patrum Decreto ad propulsandam ingruentem luem, S. Rocho honores Sanctis debiti fuere impensi, solemnique pompa ejus Imago omni comitante populo per Urbem Constantiensem gestata fuit. Adhæret Phæbeo Pagius in Vita Joannis xxi. Num. xxix. sed tenenda est potius sententia BENEDICTI XIV. qui Lib. I. citati Operis, Cap. xxxvi. recte docet, *Vexilli delationem in solemnitate Canonizationis, causam & originem nequaquam habuisse a gestatione Imaginis S. Rochi, sed a prædicta potius apparitione Imaginis in Vexillo depictæ, quæ contigit in Canonizatione S. Stanislai.*

VII. Quicquid sit, invaluit præsertim post editionem nostri hujus Cæremonialis mos in ea Processione gestandi Vexillum cum Imagine illius Beati, qui est canonizandus; Vexillumque ipsum in Canonizatione S. Francisci de Paula, civis mei facta a Leone Papa X. delatum fuisse a Generali Ordinis Minimorum medio inter Oratorem Hispaniæ, & Oratorem Portugalliæ, testatur in suo ms. Diario Paris de Grassis. Ceterum in Sacrorum Rituum Congregatione decernebatur olim, atque præscribebatur forma pingendi Beatum in Vexillo, seu Vexillis pro Canonizatione. Ita quippe factum est in Canonizatione S. Caroli Borromæi teste Mucantio Secretario prædictæ Congregationis. Docet autem inter alia idem Sanctissimus Dominus Noster in suo laudatissimo Opere, jam non unum, sed plura consuevisse fieri Vexilla pro unoquoque Sancto Canonizando, quorum alterum e Templi Vaticani fornice pensile manet ad perennem rei memoriam; alterum vero, Canonizatione

To. I.

expleta, quando primum Festum Sancti recens canonizati fit in Ecclesia Ordinis, quem Sanctus, si fuerit Regularis, professus est, vel nationis, ex qua ortum habuit, ad eandem deferatur Ecclesiam. Processio demum, quæ instituitur in hac Vexilli delatione, luculenter descripta est a Chiappono in Actis Canonizationis quatuor Sanctorum peractæ a Clemente Papa XI. quibus addi possunt ea, quæ luculentissime de ipsa Processione novissime descripta sunt in Actis Canonizationis quinque Sanctorum celebratæ a Sanctissimo Domino Nostro BENEDICTO XIV.

VIII. Unum restat, ut nempe de Vexillo & ea hic describamus, quæ leguntur in Cæremoniali inedito Capituli & Cleri Vaticanæ Basilicæ scripto a Michaeli Angelo Matthæo, in cujus Capite xxvi. quod inscriptum est, *De modo tradendi Vexilla Sancti canonizati*, sic habetur: *Vexilla Sancti canonizati delata in Canonizationis Processione, in nostra Basilica remittuntur, quorum unum in Templi fornice pensile ad maximam rei memoriam perennat, & alterum eorum, vel plura, festo die Sancti canonizati Religioni, vel concivibus traduntur. Statuta igitur die ab Hebdomadario Canonico una cum quatuor Ministris Pluvialibus indutis, etiamsi diei solemnitas non exigat, cantantur solennes Vesperæ ad Altare Sanctorum Apostolorum. Vesperis expletis, omnes in Choro sedent. Interim ordinatur Processio ante præfatum Altare transitura. Sancti canonizati Vexillum, seu Vexilla deferunt ejusdem Sancti Regulares, vel Concives, vel Confratres, quibus Chorum ingredientibus, omnes assurgunt. Canonicus celebrans, stans accipit cordulas e Vexillo pensiles, quæ in singulis Vexillis sunt quatuor, & eas Religiosis paratis tradit. Deinde noster Chorus præmanibus facem gestans ordinatim procedet ad Ecclesiæ Atrium, ubi sistit hinc inde, & transeuntibus Vexillis, omnes genuflectunt. Canonicus vero paratus, traditis cordulis, & descendentes Vexillis, una cum Ministris genuflectat, & postmodum in Sacrum redeat. Atque hæc satis sint de Vexillis Sanctorum recens canonizatorum; qui autem plura desiderat, legat Acta Canonizationis quinque Sanctorum a Sanctissimo Domino Nostro magna cum pompa peractæ. Unum est, quod & hoc loco ostendam, quod alias superius memoratum fuit, plura nempe adhibita fuisse Vexilla in Canonizatione Sanctorum, ac præsertim in Canonizatione Sancti Francisci de Paula, ut testatur in suo ms. Diario Paris de Grassis, ubi eam Canonizationem enarrat, ubi inter alia ait, quod intelligens Canonicos S. Petri velle omnia Vexilla, & alia multa, fecit, quod Papa, Leo nempe X. concluderet; quod ipsi habeant suggestum ligneum præter sedilia, quæ ex Capella, aut ex Palatio commodabuntur, & etiam baldachinum novum, & unum Vexillum, quæ duo conservabunt in Ecclesia pro honore Ecclesiæ, & pro memoria actus, & nihil aliud penitus habeant, aut petant, & sic ipsi fuerunt contenti, licet postea voluissent more solito rapere, sed nihil habuerunt.*

XI. Denique mandat noster §. ut, cum Pontifex venit ad Ecclesiam, ponantur circum circa saper deambulatorium intorticia numero octuaginta, vel circa, sex librarum pro qualibet, quæ ardeant dum fit officium. Parandam esse in Canonizationum celebritate Ecclesiam tapetis, au-

G g

laif.

læisque, ac cereis multis illuminandam, præscripsit jam Romanus Ordo XIV. auctore Jacobo Gajetano, Cap. cxv. ubi inter alia mandat, ut Canonizationis die adveniente, *sternatur tapetis Ecclesiæ, & paretur, & illuminentur in ea cerei multi*. Idipsum docet ms. Codex Cæremonialis Piersanctianus, præscribens, ut *extendatur tapetus in Ecclesiæ, & paretur, & illuminentur in ea cerei multi*. Cereorum numerum designat hic noster §. ubi mandat, ut *ponantur circumcirca super deambulatorium intorticia numero octuaginta, vel circa, sex librarum pro quolibet, quæ ardeant dum fit officium*. Meminit ejus ritus Paris de Grassis in suo ms. Diario Leonis X. anno MDXIX. ubi enarrans solemnitatem Canonizationis civis mei S. Francisci de Paula Ordinis Minimorum Fundatoris, quam ipse ut Apostolicus Cæremoniarius direxit, sic inter alia inquit: *Feci deputari duos Fratres de Trinitate (sunt hi Religiosi Minimi) qui ante diem Canonizationis funalia ponerent in alto Basilicæ in buxulis suis, quot erant disposita ad sustinenda ista funalia, quæ erant numero septuaginta, quoniam Ecclesiæ erat rupta propter fabricam novam Ecclesiæ. Ad-ditque mox: Hi autem duo Fratres in die Canonizationis manserunt superius, ubi funalia in buxulis erant, & custodierunt illa, ut semper arderent: quod maxime displicuit Clero S. Petri, quia ipsi volebant facere modo suo, & illuminare, ac extinguere, quando eis placebat*.

XII. Carpit plane sæpe Grassus, ac præsertim, ubi enarrat Canonizationem S. Francisci de Paula, Vaticanum Clerum, quem etiam non uno in loco rapacem vocat, quod nempe ea, quæ in ipsa Canonizatione adhibebantur, præter morem, vendicare sibi vellet. Sed omissa Grassi audacia, sive invidia, quod cereos spectat, quibus in hujusmodi celebritatibus illuminari solita fuit Vaticana ipsa Basilica, seu Capella, in qua Canonizatio celebrabatur, teste Petro Amelio in Ordine Romano xv. Cap. clxiii. *circumquaque per totam Cipellam, ubi scilicet canonizata fuit anno Christi mcccclxxx i. S. Brigida a Bonifacio IX. Pontifice, fuerunt tortitia, seu brandones, quilibet de undecim libris ceræ in summa LXXXVI. Tortitia, sive tortitii, vel tortifii, idem sunt, ac brandones, ut ex recitato Amelii loco addiscimus, & significant faces, tædasve, seu funalia. Tortifiorum meminit quidem Exoniensis Synodus anno mcccclxxxv i. habita, Cap. iv. De Parochiarum eleemosynis, inquit, Sacerdotes procurent duos fieri tortifios, in Canone Missæ ardentes, prout in Ecclesiis multis hætenus fieri consuevit. Vox torticii occurrit etiam in Ordine Romano XIV. Auctore*

Jacobo Gajetano, Capite xc i. ubi agit de ritu excommunicationis die Cænæ Domini: *Circa ultimum verborum, habens aliquos torticios accensos in manu, projicit ipsos Dominus Papa versus populum ad terram &c.* Quos Ordo Romanus XIV. dicit torticios, Romanus Ordo xv. non modo citato loco, verum etiam Cap. cxlv. torticias vocat. Agens enim de exequiis Papæ, sic inter alia inquit: *In die prima sepultura ad minus debent esse cc. tortitia, qualibet de sex libris ceræ*. Tum paulo post mentionem facit brandonum, qui, uti dictum est, idem sunt ac funalia, uti ex veteribus monumentis docet eruditus Dufresne, verbo, *Brando*. Ceterum ex descripto superius Amelii loco adnotandum censeo, jam longe ante editionem nostri Cæremonialis, in una sola Capella, ubi celebrata est S. Brigidæ Canonizatio, fuisse adhibita intorticia, sive tortitias, seu brandones LXXXVI. quorum quilibet fuit de undecim libris ceræ.

XIII. Non ergo mirum, si nostris temporibus, aucto magis magisque Sanctorum cultu, majorique celebritate, ac olim, peragi solita ipsorum Canonizatione, ad compescendam scilicet magis magisque hæreticorum perfidiam, qui & cultum ipsum, & Canonizationis ritum ex constanti Patrum traditione probatos, diabolico adacti spiritu improbant, ingens funalium multitudo in Sanctorum solemnitatibus, ac in eorum præsertim Canonizationibus in Ecclesiæ, ubi celebrantur, adhiberi soleat. Mos quippe invaluit, ut in ipsis Canonizationum celebritatibus ingens Cereorum accensorum numerus tabulatum, Altare, Apostolorum Confessionem, & universum Vaticanæ vastæ Basilicæ ambitum, in qua Canonizationes ut plurimum fiunt, mirabili dispositione circumdet. Consuevisse autem vel olim in Ecclesiis, ubi Sanctorum solemnitates, & Festa celebrabantur, innumeros pene accendi cereos, testem inter alios veteres Patres habebus S. Paulinum, qui in Natali III. de S. Felice Nolano hæc habet.

*Clara coronantur densis Altaria lychnis,
Lumina ceratis adolentur odora papyris,
Nocte dieque micant; sic nox splendore diei
Fulget, & ipsa dies caelesti illustris honore*

Plus micat innumeris lucem geminata lucernis. Testis est vel ipse hæreticus Vigilantius, quem cereorum usum perperam improbantem egregie confutavit S. Hieronymus in Epistola adversus ipsum scripta, jam IV. seculo consuevisse in Ecclesiis, *sole adhuc fulgente, moles cereorum accendi*. Sed de hoc argumento jam nos alias differuimus, ac præsertim in Commentariis ad Cæremoniale Episcoporum.

§. VII.

De preparatione ceræ distribuenda.

Paretur (1) cera distribuenda, in primis pro Pontifice duo cerei albi, duodecim librarum pro quolibet, pro Cardinalibus quatuor (2) librarum. Item pro elevatione Sacramenti duodecim intorticia librarum sex pro quolibet, pro Altari septem cerei, & duo pro credentia duarum librarum. Item pro Offertorio duo magni cerei duodecim librarum (3) pro quolibet, quos offert primus Cardinalis. Item tres cerei sex librarum, quos offerent tres Oratores, seu Deputati cum tribus Cardinalibus. Et om-

(1) Ita in editione Veneta 1. & Colonienſi; in Romana, paratur.
(2) In Veneta deest, pro quolibet.

(3) Ita in Romana; in Veneta, libra.

nes cerei supradicti erunt albi præter octuaginta intorticia Ecclesiæ. Item ordinentur cerei de cera communi pro Prælatiis, Oratoribus, & magnis Nobilibus duarum librarum; pro Officialibus, & Cantoribus unius libræ; pro Clero, & aliis, ut placuerit. Intimetur etiam Clero Urbis, ut summo mane conveniant processionally (1) in porticu Ecclesiæ S. Petri.

COMMENTARIUS.

I. **M**Ultam ceram fuisse jam olim adhibitam in celebritate Canonizationis Sanctorum, non uno in loco nostrorum Commentariorum ad hunc Titulum diximus. In ipsa Processione, quæ vel olim ea occasione haberi solita fuit, magnam ceræ copiam adhibitam fuisse, docent vetera Acta hujusmodi Canonizationum, præsertim vero S. Stanislai Episcopi Cracoviensis, quem Innocentius Papa IV. anno MCCLIII. Martyrum Fastis adscripsit; de qua ita inquit in ejusdem Actis Joannes Longinus Libro III. Num. XII. apud Bollandianos ad diem XI. mensis Maji: *Omnibus autem rite perfectis, Cantico, Te Deum laudamus, a Summo Pontifice, Innocentio IV. inchoato, & a Clero universo ad finem expleto, facta est generalis candelarum in homines utriusque sexus, qui conveniant, distributio adeo liberalis, & prodiga, ut illius modi liberalitatem singuli testarentur se nullo unquam tempore vidisse, sed nec ab ætate defluxa audisse.* Vide quæ & de Processione peragi solita in celebritate Canonizationis, diximus in Commentario ad §. VII. satisque erit hoc

loco adnotare, quod edicitur in fine nostri hujus §. ut nempe *intimetur etiam Clero Urbis, ut summo mane conveniant processionally in porticu Ecclesiæ S. Petri.*

II. Ingentem cereorum copiam adhibitam fuisse in ipsa Processione, docent nos passim Acta Canonizationum, & mss. Apostolicorum Cæremoniariarum Diaria. Paris de Grassis in suo ms. Diario, ubi enarrat Canonizationem S. Francisci de Paula ita inquit: *Item ordinavi, quod capsula duæ cereorum funalium, ac candelarum cera alba pro Papa, Cardinalibus, & Prælatiis, ac aliis, essent superius in parva Capella Cantorum & Hippolitus nepos meus primus Magister Cæremoniæ daret candelas Cardinalibus, Prælatiis, ac aliis Oratoribus, & omnibus.* Pergit Grassus, aliasque duas cereorum capsas recenset, qui in ea Processione distributi fuere: *Item duas alias capsas posui inferius cum candelis pro Clero, & quod secundus Magister Cæremoniæ distribuat, præsentibus duobus aliis Fratribus, & bene fuit, & quod omnes prius in cuspide combusti sint &c.*

§. VIII.

De his, quæ fiunt in die Canonizationis, ac de Processione, & Sermonem.

Statuta igitur die Canonizationis, Pontifex paratur Pluviali rubeo, & Mitra pretiosis cum Cardinalibus, Prælatiis, & Officialibus paratis, processionally descendit ad Ecclesiam sub baldachino. In Camera paramenti distribuuntur cerei, & ab omnibus portantur accensi. Cum vero Pontifex pervenerit ad porticum S. Petri, excipitur ibi a Clero Urbis processionally parato. Intrat Ecclesiam Pontifex, & ascendit suggestum cum Prælatiis, & aliis Officialibus; Clerus vero suggestum circumstat. Pontifex, oratione facta ante Altare, ascendit eminentem Sedem, & accipit Cardinales, & Prælatos paratos ad reverentiam; qua facta, descendit, & super aliam Sedem sibi ante Altare, paratam sedet versus renes ad Altare, ubi facit Sermonem, referens quæ gesta sunt, & Vitam, ac miracula Sancti summarie, & in genere. Demum hortatur omnes, ut secum pariter Domino pias preces fundant, orantes, ne permittat errare Ecclesiam suam in hoc negotio. Surgit deinde Pontifex; removetur Sedes, & procumbit super Faldistorium cum Mitra. Cantatur Litaniam a Cantoribus, & nulla fit mentio de Canonizando, omnibus in terram genuflexis orantibus. Finita Litaniam, Diaconus a dextris surgit, & versus ad populum, alta voce dicit: *Orate.* Iterum genuflectit, & omnes prolixius orant. Tum Diaconus a sinistris surgens, eodem modo dicit: *Levate;* & omnes surgunt. Tunc Pontifex stans sine Mitra, incipit in voce: *Veni Creator Spiritus;* & tam ipse, quam alii omnes genuflectunt ad primum versum; Cantores prosequuntur Hymnum; & Pontifex cum Mitra ascendit ad Sedem eminentem, & Mitra deposita expectat finem Hymni. Quo completo, duo Cantores dicunt versum: *Emitte Spiritum tuum, & creabuntur,* & alii respondent: *Et renovabis faciem terræ,* & Pontifex.

Oremus.

Deus, qui corda Fidelium Sancti Spiritus illustratione docuisti, da nobis in eodem Spiritu recta sapere, & de ejus semper consolatione gaudere. Per Dominum nostrum Jesum Christum Filium tuum. Qui tecum &c.

Tunc procurator causæ instanter petit a Pontifice nomine Procuratorio, & nomine Principum

To.I.

G g 2

(1) Ita in Romana, in Veneta legitur, supplicantes.

cipum &c. pronunciari, & declarari Beatum N. in Sanctorum Catalogum adscribendum, & ut Sanctum venerandum a Christifidelibus,

COMMENTARIUS.

I. **O**ccasione solemnæ Canonizationis solemnæ item instituitur Processio, de qua antiqui Auctores, & Codices Rituales loquuntur. Meminit quidem ejus Ritus Cardinalis Ostiensis in Capite, *Audivimus, De Reliquiis, & veneratione Sanctorum*, sic inter alia inquit: *Conveniunt Papa, & Fratres, & totus Clerus, & populus*, Ex præscripto Romani antiqui Ordinis, Cap. cxv. ubi exponitur modus, qui servari consuevit circa Canonizationem alicujus Sancti, *mane descendente dicto Domino nostro Papa ad eandem Ecclesiam*, ubi nempe Canonizationis solemnitas celebratur, *occurrit ei Processio Cleri illius Ecclesiæ*, Præter Clerum illius Ecclesiæ, ubi fiebat Canonizatio, consuevisse Urbis Religiosos, & quidem ante editionem nostri hujus Cæremonialis ab Augustino Patricio ordinati, obviam ire Pontifici ad Ecclesiam processionally sub baldachino venienti, testem habemus Volaterranum, qui in suo Diario apud Muratorium Tom. xxiii. Rerum Italicarum, & apud Raynaldum ad annum mcdlxxxii. ubi agens de Canonizatione S. Bonaventuræ a Sixto IV. peracta, sic inquit: *Tunc Papa descendit in Basilicam processionally cum baldachino; in porticu ei obviam iverunt Religiosi Urbis, & Clerus ipsius Ecclesiæ Sancti Petri*.

II. Processionis quoque ante Canonizationem fieri solitæ accurata descriptio legitur in ms. Diario Paridis Grassi, ubi agit de Canonizatione civis mei S. Francisci de Paula, & in Actis Canonizationis S. Didaci collectis a Petro Galefinio, Parte iii. Cap. xiv. Sed audiamus Clementem Papam VIII. qui in Bulla Canonizationis S. Hyacinthi, quem ipse inter Sanctos retulit, ipsam rem plenius, luculentiusque exponit: *Ipsa Dominica in Albis*, dies enim erat habitæ ab ipso Canonizationis, *illuxit. Nos, & iidem Cardinales, necnon Patriarchæ, Archiepiscopi, & Episcopi, qui in Capellam nostram Pontificiam nobiscum ad id convenerant, sacris vestibus induti, Hymno, Ave Maris stella, ad honorem Beatissimæ Virginis Mariæ, cujus opem tunc maxime invocandam duximus, inchoato, eodemque illo ab ejusdem Capellæ nostræ Cantoribus ad finem usque deinceps decantato, aliisque etiam Romanæ curiæ Prælati, & Officialibus, Familiaribusque nostris, una cum ceteris totius Ecclesiastici secularis, & Regularis Ordinis Viris longo pioque ordine præeuntibus, omnes cum ardentibus cereis ad illius gloriam, qui sua luce, & splendore Cælos complet, ex Palatio nostro Apostolico summa cum celebritate processimus ad Basilicam Principis Apostolorum tunc magno undique ornamentorum apparatu instructam. Candelarum, & funalium cereorum distributionem factam fuisse aliquando omnibus qui Canonizationi intererant, probavimus supra in Commentario ad §. viii. ex actis Canonizationis S. Stanislai Cracoviensis Episcopi, quem Innocentius IV. anno mcliii. Sanctorum Martyrum catalogo adscripsit.*

III. Hodie quoque solemnitas Canoniza-

tionis initium ducit ab ipsa Processione. Qui ordo servatus sit a Sanctissimo Domino Nostro BENEDICTO XIV. in Canonizatione quinque Sanctorum, Acta ipsius Canonizationis luculentissime enarrant, ubi sic inter alia inquit pag. 478. *Summo mane, quotquot ex utroque Clero erant, ut præsto essent futura supplicationi, ad constituta in Vaticanis Aedibus Atria contenderunt. Præceperat autem Sanctissimus Dominus noster, ut Clerus non, quemadmodum prius factum erat, compositus hinc inde a Palatii porta, quam Ferream vocat, usque ad Obeliscum, & ab eo per forum usque ad primarium Basilicæ ostium duas inflexas continuasque formaret lineas, & ita consisteret, descensum, & transitum sua Sanctitatis per earum medium præstolaturus, sed ut composite graviterque intendens, canens præterea Hymnum, Ave Maris stella, recta introiret in Divi Petri Templum &c.* Fuse eam Processionem recensent, quam etiam ære figura incisa exprimunt. Ceterum ut nihil de Processione nos hoc loco omittamus, sciendum est plane illud, consuevisse aliquando peragi ipsam Processionem, non quidem ante, sed post peractam Canonizationem, ut docet nos Petrus Amelius in suo Romano Ordine xv. Cap. ciiii. ubi agit de Canonizatione S. Birgittæ factæ a Bonifacio Papa IX. *Tunc incepta fuit Processio*, nempe pronunciata Canonizationis sententia, de qua inferius, *& omnes tenebant faculas suas accensas in manibus, quilibet in ordine suo; & duo Patriarchæ ibant cum Cardinalibus. Item Dominus Papa subtus pallium*, idest, baldachinum; *sed Milites portabant extra pallium tortitia Papæ accensa; & sic ivimus per totam Capellam usque ad aliam Capellam, & reversi fuimus processionally ad magnam Capellam*.

IV. Nunc ut de Sermone dicamus habendo a Pontifice in honorem Beati inter Sanctos referendi, ex præscripto quidem nostri hujus §. Pontifex postquam facta oratione ante Altare ascendit eminentem Sedem, & accepit Cardinales, & Prælatos paratos ad reverentiam, *descendit, & super aliam Sedem sibi ante Altare paratam sedet versus renes ad Altare, ubi facit Sermonem &c.* Est antiquus ritus, cujus meminit Cardinalis Ostiensis in Capite, *Audivimus, De Reliquiis &c.* sic inquit: *Et facit Sermonem Summus Pontifex, processum recitans, & probata.* Ordo quoque Romanus ita eum ritum enarrat: *Papa prout de Camera venit, scilicet cum Pluviali rubeo, & Mitra aurifrigiata cum perlis, vadit ad Cathedram eminentem ante Altare cum scabello paratam, & ibi sedendo facit Sermonem, Mitram tenendo in capite, ut est moris, processum recitando, & probata.* Insigne Concionis habitæ a Clemente V. in Canonizatione S. Petri Cælestini monumentum legere est apud Auctorem, qui ipsam Canonizationem versibus exaravit penes Bollandianos ad diem xix. Maji. Afferri possent & alia monumenta, quæ possunt videri apud Sanctissimum Dominum Nostrium in laudato toties Opere, Libro i. Capite xxxv i. §. xi i. Porro licet Bonifacius IX. Canonizationem

nem fecerit S. Birgittæ in Capella Palatii prope S. Petrum, Missam vero eadem die non celebraverit, sed die sequenti descenderit ad Basilicam Vaticanam, in qua cum omnibus solemnitatibus Missam ipsam celebravit, eadem nihilominus Canonizationis die Sermonem habuit de S. Birgitta, teste Petro Amelio in suo Romano Ordine xv. Cap. CLIII. ubi ita inquit: *Facto silentio, & luminaribus accensis, Papa tenendo Mitram in capite, fecit collationem, & Sermonem suum sub isto themate: Viduam ejus benedicam, & florebit super ipsam sanctificatio mea.*

V. Hæc, & longe plura insigni ac penitiori eruditione referta docet laudatus Pontifex BENEDICTUS XIV. qui etiam notat, introducta temporibus subsequentibus ea consuetudine, & quidem longe post Bonifacium IX. (habuerunt enim Sermonem Pius II. in Canonizatione S. Catharinæ Senensis, Innocentius VIII. in Canonizatione S. Leopoldi Marchionis Austriæ, Leo X. in Canonizatione S. Francisci de Paula, & ut alios omittam, Hadrianus VI. in Canonizatione S. Bennonis, & S. Antonini, ut ex earundem Canonizationum Bullis, & ex mss. Cæremoniariarum Apostolicarum Diariis constat) ut Secretarius Brevium ad Principes Advocato Consistoriali pro Canonizatione supplicanti respondeat, Pontifices ut plurimum a Concione abstinuisse. Hinc in Actis Canonizationis S. Hyacinthi scribit Severinus de Cracovia, primæ pro Canonizatione petitioni Silvium Antonianum a Secretis Brevium ad Principes tam longa nomine Clementis Papæ VIII. respondisse oratione, ut per illam Pontifex ipse solitum de Canonizatione, & Canonizando Sermonem obisse videretur. Ceterum Sanctæ memoriæ Clemens XI. qui ut plurimum in solemnibus Missis, quas celebrabat certis anni Festis, Homiliam habebat, laudabilem antiquum morem retinuit in Missa, quam celebravit occasione Canonizationis quatuor Sanctorum, Pii V. Andreæ Avellini, Felicis a Cantalicio, & Catharinæ de Bononia, & hæc utique ipsa edita est cum inter ceteras egregias ejusdem Pontificis Homilias, tum in Actis memoratæ Canonizationis a Justiniano Chiappono collectis. Novissime in Canonizatione quinque Sanctorum solemnissimo ritu, ac Pompa a Regnante Pontifice BENEDICTO XIV. celebrata in Festo Sanctorum Apostolorum Petri & Pauli, sedens & ipse elegantissimam Homiliam habuit ad circumfusam multitudinem inter Missarum solemnias post Canonizationem celebrata, in qua luculenter exprimit, & ob oculos ponit utriusque solemnitatis memoriam, legiturque ipsa. Homilia in Actis prædictæ Canonizationis Romæ editis anno MDCCXLIX.

VI. Quod Sermonem spectat, quem olim Pontifices habere ad populum soliti erant, ubi Sanctos canonizabant, præterire hoc nefas puto, quod in suo ms. Diario scribit Grassus de Sermone habito a Leone X. in Canonizatione Sancti Francisci de Paula: *Papa eleganti Sermone disseruit cum admiratione assistentium & audientium præ multitudine Sermonis sui cum pietate & justificatione sua, ac cum tanta devotione, & puritate cordis, quod etiam lacrymatus fuerit, ita ut vix aut difficulter verba proferre posset, præsertim quando Deum oravit, ut parceret sibi, si ausus fuisset ad ponendum os in Cælum, & ad tantam præsumptionem, ut ipse, qui*

summus est peccator, & vix mereretur numerari inter Christianos Servos Dei, nunc auderet referre aliquem inter Sanctos. Quæ verba cum diceret, non pluraliter more Papali, sed simpliciter tanquam homo, quod similiter cum aliis ab omnibus circumstantibus fuit approbatum, & in fine conclusit, adhuc orare velle, & sic surgens de Faldistorio, & Subdiaconus medius inter duos Cantores cantavit Litaniam, & alia, prout in Ordinario. Noverat Leo ipsum Franciscum, qui etiam illi dum puer esset vaticinatus fuerat Summum Pontificatum, ut Auctores Vitæ ejusdem Sancti referunt.

VII. Juxta §. nostri præscriptum, facto Sermone in honorem Beati canonizandi, Pontifex demum hortatur omnes, ut secum pariter Domino pias preces fundant, orantes, ne permittat, errare Ecclesiam suam in hoc negotio. Longum esset hic monumenta referre, quæ de ea re in antiquis Cæremonialibus, & apud priscos Auctores occurrunt. Ostiensis in citato superius Capite *Audivimus*, ita habet: *Facit Sermonem Summus Pontifex, processum recitans, & probata, inducens populum ad orandum, quod Deus non permittat, ipsum errare in hoc negotio.* Eadem fere leguntur in Romano Ordine xv. Cap. cxv. cui mori concinit etiam Auctor, qui Canonizationem S. Petri Cælestini factam a Clemente Papa V. versibus descripsit, ita alloquentem Pontificem inducens:

..... Vos ergo rogate,
Nosque oraturos cognoscite, quod Deus adsit,
Omne bonum tribuens, perfectum quodque re-
pendens;

Nec tantis errare sinat, Sponsamque redemptam Sanguine, sed nostros miseratus dirigat actus. De Canonizatione S. Birgittæ facta a Bonifacio IX. loquitur sic inter alia Petrus Amelius in Ordine Romano XV. *Completo Sermone, & facta admonitione, ut omnes deberent Deum orare, quod non permetteret eum errare &c.* De Canonizatione S. Bonaventuræ facta a Sixto Papa IV. anno MCDLXXXII. ita scribit Jacobus Volaterranus apud Raynaldum ad prædictum annum: *In fine hortatur omnes, ut orent Deum, ne permittat, errare Ecclesiam suam in hoc negotio; ipse quoque identidem dicit, se oraturum.*

VIII. Eam ob causam præter orationem, indicta quoque fuisse jejunia, testis est Leo X. Papa in Bulla Canonizationis S. Francisci de Paula, ubi compendio memoratis vitæ ejusdem meritis, & miraculis, asserit, rogasse omnes, qui aderant in Consistorio, ut suis orationibus, ac jejuniis Ecclesiam Dei juvarent, ac, ne eam Altissimus modo aliquo in hujusmodi Canonizationis officio errare permetteret, instanter orarent. Fuisse in triduum orationes ipsas, ac jejunia indicta, addiscimus plane ex Bulla Canonizationis S. Bonaventuræ, in qua Sixtus IV. diserte inquit, se in triduum orationes, jejuniisque indixisse, ut Deus Omnipotens ipsi, quod factum optimum in hac re esset, ostendere dignaretur, nec pateretur, Ecclesiam suam militantem errare, qua se triumphantem conformare studeret. Clemens quoque VII. in Bulla Canonizationis S. Antonini, quem Sanctorum Fastis adscripsit Hadrianus VI. narrat, eum in triduum preces, & jejunia indixisse, ut Deus Omnipotens ipsi Hadriano Prædecessori, quod factum optimum in hac re foret, ostendere dignaretur, nec pateretur, militan-
tem

tem Ecclesiam suam errare, quæ se triumphanti conformare consuevit. Similia leguntur apud alios Scriptores, ex quibus tamen nihil inferri potest adversus Romanorum Pontificum infallibilitatem in Canonizatione Sanctorum, ut inter alios recte argumentatur Ricciolius a Regnante Pontifice allegatus Lib. 1. Cap. xlv. Num. xx, in fine: *Neque huic fiducia*, ait ille, *obstant orationes, jejunia, & eleemosyna præmitti a Pontificibus solita, ne Altissimus Ecclesiam suam modo aliquo in hoc Canonizationis officio errare permittat, sicut non obstant infallibilitati Absolutionis, aut Consecrationis Hostia preces præmitti solita a legitimo Sacerdote, si forma debita super materiam idoneam utatur, nec oratio repugnat fiduciæ de infallibili impetratione, aut fiducia orationi.*

IX. Itaque non mirum videri debet, si ex præscripto nostri §. *cantatur Litania a Cantoribus*, & deinde Pontifex stans sine Mitra incipit in voce, *Veni Creator Spiritus &c.* Cujus ritus mentionem facit Romanus Ordo xiv. Cap. cxv. *Flexis genibus*, inquit, *fit devota oratio*, & *Papamet debet incipere cantando Hymnum*, Ve-

ni Creator Spiritus; quo incepto genuflectit &c. Idem ritus servatus olim jam fuit in Canonizatione S. Petri Cælestini, de qua ita legitur apud Bollandianos ad diem xix. mensis Maji.

Dixerat, & surgens, nobis adstantibus, inquit, Proclamatque: Veni replens pia corda Creator Spiritus; & genibus stravit se in pulvere, flexis quoque alii &c.

Mentionem facit & ejus ritus Cardinalis Ostiensis in memorato Capite, *Audivimus*, ubi tamen docere videtur, esse in arbitrio Papæ, si velit cantari ipsum Hymnum, vel alium, sive Antiphonam convenientem: *Flexis genibus*, inquit, *fit devota oratio, & cantatur*, *Veni Sancte Spiritus, vel alius Hymnus, sive Antiphona conveniens &c.* Sane cantari consuevisse ipsum Hymnum, *Veni Creator Spiritus*, in Canonizationibus Sanctorum, præsertim vero in iis, quæ post editionem nostri hujus Cæremonialis peractæ fuerunt, testantur passim earundem Canonizationum Acta a variis Viris doctis collecta, & mss. Apostolicorum Cæremoniariorum Diaria, quæ supervacaneum est describere hoc loco.

§. IX.

De protestatione Pontificis, & ejus forma.

Pontifex, antequam pronunciet, consuevit protestari in hanc formam, quod invenimus servatum a multis Pontificibus. Sunt tamen aliqui clarissimi Viri, qui dicunt, hoc introductum ex quadam causa, quæ nunc cessat, quia Papa tunc quodammodo cogebatur ad canonizandum quendam contra suam opinionem, & propterea (1) protestabatur; nunc autem non videri congruam illam protestationem. Sed de hoc statuat Summus Pontifex, & Sacer Senatus.

Forma protestationis.

Antequam ad pronunciationem veniamus, protestamur publice apud vos omnes hic præsentibus, quod per hunc actum Canonizationis non intendimus aliquid facere, quod sit contra Fidem, aut Ecclesiam Catholicam, sive honorem Dei.

COMMENTARIUS.

I. **C**onsuevisse olim Pontifices, antequam Decretum Canonizationis pronunciant, Deum orare, populumque ad orandum hortari, *pro eo quod Deus non permittat eum errare in hoc negotio*, constat plane ex recitato superius loco Romani antiqui Ordinis xiv. Capite cxv. in quo tamen nulla fit mentio formæ ejus protestationis, quam describit hic noster §. Fuisse autem in usu eam protestationis formam Seculo xiv. & quidem longe ante nostri hujus Cæremonialis editionem, quam Augustinus Patricius ordinavit, dedicavitque Innocentio Papæ VIII. addiscere licet ex Ordine xv. Romano, Auctore Petro Amelio, qui fuit Urbani V. Sacrista, tum Gregorii XI. Pœnitentiarius, & Bibliothecarius, postea Senogalliensis Episcopus, Archiepiscopus Tarentinus, Patriarcha Gradenfis, & Alexandrinus, atque Aquisgranensis Ecclesiæ Administrator, uti docet Mabillonius in sua ad ipsum Ordinem xv. admonitione. Petrus itaque Amelius in ipso Romano Ordine Capite clxiii. ubi refert cæremonias Canonizationis sanctæ Birgittæ, quam unno mcccxc. die Sabbati vii. Octobris, Bonifacius Papa IX. solemniter ritu

Sanctorum Fastis adscripsit, luculentissimum de ea protestatione tunc facta testimonium exhibet, sic inquit: *Completo Sermone, & facta admonitione, ut omnes deberent Deum rogare, quod non permetteret eum errare; protestatione etiam facta, quod ipse non intendebat facere contra Sacrosanctam Romanam Ecclesiam.... pronuntiavit, Beatam Brigidam fore Sanctam, & adscribendam in Catalogo Sanctorum &c.*

II. Illud vero operæ pretium est, ut hic enarremus, quod de ipsa protestatione, quam ante Canonizationis judicium proferre jam Pontifex solitus erat, ait memoratus nostri Cæremonialis Ordinator in præsentibus §. *Sunt tamen*, inquit, *aliqui clarissimi Viri, qui dicunt hoc introductum ex quadam causa, quæ nunc cessat, quia Papa tunc quodammodo cogebatur ad canonizandum quendam contra suam opinionem, & propterea protestabatur; nunc autem non videri congruam illam protestationem.* Puto equidem, uti notavi Tomo III. Conciliorum in Historia Concilii ix. Œcumenici, Lateranensis I. Numero xxii. perperam a Patricio Sacrarum alias Papalium Cæremoniarum peritissimo eam opinionem

(1) Ita in editione Veneta 1. in Romana autem legitur, *fuit protestatus.*

nionem afferri Virorum aliquorum clarissimorum, quam potius confutare debuerat. Quis enim unquam id somniavit, coactum vel semel quodammodo fuisse Romanum Pontificem Maximum ad Sanctum Canonizandum contra suam opinionem? Si tota versetur Ecclesiastica Historia, vel Acta Sanctorum perlegantur, nullum plane ejus rei exemplum occurreret. Clarissimi isti Viri, quos suppresso nomine Patricius citat, quosque tenebricosos potius appellaverim, cum minime intelligerent sensum ejus protestationis, qua utebantur Summi Pontifices, antequam Canonizationis sententiam proferrent, suo ex cerebro rationem illam Romanis non modo ipsis Pontificibus, sed & toti Catholicæ Ecclesiæ injuriosam excogitarunt; similes profecto quibusdam ignorantissimis, effrontibusque hujus ævi hominibus, qui interrogati aliquando de origine, & causa sacrarum quarundam rerum, quas omnino ignorant, celeritate dicendi, ut eruditissimi videantur, multa suo ingenio confingunt a doctrina, & sensu Ecclesiæ longe aliena; cum alias certa sit illa Jurisconsulti sententia in Lege, *Non omnium*, ff. *De Legibus*, quæ dicit, non omnium, quæ a Majoribus nostris definita sunt, certam rationem reddi posse.

III. Ceterum, si ad examen revocetur formula protestationis, in qua olim Summus Pontifex agebat, se *per actum Canonizationis non intendere aliquid facere, quod sit contra Fidem, aut Ecclesiam Catholicam, sive honorem Dei*, nihil profecto formula ipsa continet, quod ingenia clarissimorum Virorum, quos Patricius laudat, torquere potuerit. Quis enim nescit, eam esse complurium Theologorum sententiam, Canonizationem scilicet Sanctorum ad Fidem minime pertinere: *Pie credendum est*, inquit Angelicus Doctor Theologorum omnium Princeps atque Magister S. Thomas, Quodlibet. Libro IX. Articulo XVI. *quod nec etiam in his judicium Ecclesiæ errare possit*. Hæc Viris doctissimis, ac Theologis plurimis magni nominis æquissima ac pia visa est sententia, cui etiam adhæsit Sixtus Papa IV. qui, ubi in Sanctorum Catalogum sanctum Bonaventuram retulit, in Bulla ejus Canonizationis, quæ incipit, *Superna Cælestis*, edita VII. Kalendas Maji anni MCDLXXXII. & relata a Viro doctissimo Justo Fontanino in suo Codice Canonizationis Sanctorum, hunc in modum loquutus est: *Confidentes, quod in hac Canonizatione non permittat nos Deus errare*.

IV. Scitissime itaque inter alios Scriptores Lamindus Pritanius, sive potius Ludovicus Antonius Muratorius, qui illud sibi nomen imposuit in celeberrimo Opere, *De ingeniorum moderatione in Religionis negotio*, Lib. I. Cap. XVII. docet Ecclesiasticæ disciplinæ legibus Sanctorum cultum ita indici posse, & ad universam Ecclesiam extendi, ut non solum pium, ac laudabile sit hujusmodi Sanctos invocare, sed etiam impietatem sapiat eorum cultum improbare, atque contemnere. Eam ob causam a suspitione hæresis illum non abesse inquit, atque intolerandam, & pœnis dignam temeritatem, ac impudentiam præferre, qui rite Cælitum Catalogo adscriptos, & in iis, ut ajunt, canonizandis Ecclesiam re ipsa, & Romanum Pontificem errasse dicat. Recte autem suspitioni hæresis, non vero hæresi formali eum obnoxium dixit, quod vix conciliari cum regulis traditis ad credendum de Fide

aliquid illorum sententia valeat, qui firmissimo assensu, divinaque Fide credendum censeat, Ecclesiam, aut Romanos Pontifices talia decernentes falli nunquam posse: *Videant ipsi*, subjicit laudatus Auctor, *an non inde sequatur, novas revelationes, nova de factis Dogmata in Ecclesiam induci; quod abhorre a Catholica Doctrina, & ipsi non negant*. Eandem sententiam jam ante Muratorium tradidit, comprobavitque Theologus omnium judicio præstantissimus atque Religiosissimus Melchior Canus Dominicanæ Familiæ decus, & Episcopus Canariensis Lib. V. *De locis Theologicis*, Cap. V.

V. Addubitari insuper nequit, quin ritus Canonizationis ab Apostolica Sede eo semper peractus fuerit accurato diligentique studio, ut pie credendum sit, nullum ea in re fuisse errori locum, aut deinceps futurum. Pluribus id quidem docet feliciter regnans Sanctissimus Dominus noster BENEDICTUS XIV. in doctissimo Opere suo, *De Servorum Dei Beatificatione, & Beatorum Canonizatione*. Notum autem omnibus est, quod alias diximus nos citato Tomo III. Conciliorum in Historia Concilii I. Lateranensi, Num. XXV. adeo summam ac rigidam esse in Canonizandis Sanctis Apostolicæ Sedis diligentiam, ut in discutiendis eorum Actis nihil prorsus vel enixæ magnorum Principum, aut Regum preces prævaleant, quo minus minutissima quæque ad rigidissimum examen revocentur. Quamobrem falsum est, quod aliqui olim dixere, introductam fuisse protestationem, quod Papa olim quodammodo cogeatur ad canonizandum quendam contra suam opinionem. Falsum quoque & illud est, quod ait Paris de Grassis in suo ms. Diario Leonis Papæ X. anno MDXIX. ubi enarrat Canonizationem S. Francisci de Paula, ideo nempe in Sanctorum Canonizatione *expensum sic amplam ab Ecclesia, sive a Sede Apostolica, & a Pontificibus non solum tolerari, sed etiam quodammodo præcipi, ut ex ea quasi impossibili, vel saltem dura absterreantur Principes & Populi ad petendum hujusmodi Canonizationes fieri, quæ aliquando non ex meritis ejus, qui canonizatur, sed ex intercessione Communitatis, ac Populi, vel Principis supplicantis, qui vel affinis, vel devotus illius fuit, aut sit, sunt &c.* Fædum & hoc plane commentum est, factam aliquando Canonizationem non ex meritis ejus, qui canonizatus fuit, verum ex Principum intercessione; nullum enim unquam ejus rei exemplum afferri potest.

VI. Fateor equidem, ingenti opus esse impensa in peragenda Sanctorum Canonizatione, sed tamen nego pernegoque, impensam ipsam a Sede Apostolica, & a Pontificibus non solum tolerari, sed etiam quodammodo præcipi, ut ejus causa absterreantur Principes a petendis Sanctorum Canonizationibus. Magna profecto impensa necessaria est, ut ea solemnitas, ea qua decet majestate, peragatur, celebreturque. Id more suo egregie ostendit laudatus Pontifex BENEDICTUS XIV. in citato Opere, Libro I. Cap. XLVI. §. VII. additque Num. XI. Romanos Pontifices ejus moderationi maximopere studuisse, nedum rejecta nimia superfluitate, & abundantia, verum etiam facta conjunctione plurium Sanctorum, quos unica Canonizatione comprehendere consueverunt. Legendum quod idem sapientissimus Scriptor notavit §. VII. in fine,

finē, expensās utique esse necessarias ad pertrahendas; atque ad exitum perducendas Beatificationum, & Canonizationum causas, sed & Romanos Pontifices, earum moderationi studuisse, ac studere, & plerasque immodicas, ac superfluas, quæ paulatim irrepsérant, sublatas fuisse; atque adeo aliquas, quæ remanserunt, necessitati, ac solemnitati congruentes, ac debitas esse. Quibus porro omnibus si insuper addatur, pecunias ut plurimum constari ex eleemosynis, quæ universo ex Orbe colliguntur, nec modicas eas esse, quæ a Romana pietate subministrantur, nulla profecto apparebit vis expensarum tanta, quæ tolerari non possit. Hæc, & alia longe plura sapientissimus Pontifex locis citatis, in quibus etiam ipsius Grassi testimonia recenset, agentis, pecuniam ipsam, licet summam, solere impendi in varia ornamenta pro solemnitate Canonizationis comparanda.

VII. His obiter dictis, quod protestationem spectat fieri aliquando a Pontifice solitam, antequam Decretum Canonizationis proferret, quod ea minime necessaria esset, sublata demum penitus fuisse videtur a Leone X. non enim apud Grassum lego, formulam ipsam protestationis a laudato Pontifice pronunciatam in Canonizatione S. Francisci de Paula, quam Grassus ipse descripsit. Ceterum quod eidem Auctori necessaria minime videretur ea protestatio, ex ipsius ms. Diario addiscere licet, ubi sic

inter alia inquit: *Si Papa protestatur, ut in Libro, tunc Fiscalis rogat, alias nequaquam.* Porro plura scitu digna, theologicisque fundamentis innixa de ipsa protestatione notavit explicuitque Sanctissimus Dominus noster in eodem laudatissimo Opere Libro I. Capite XLIV. Num. xvii. & seqq. ubi inter alia refellit heterodoxos impiosque Scriptores Albertum Fabritium, & Joannem Launojum, qui ex dicta protestatione perperam inferebant, Romanos Pontifices confessos fuisse, in Canonizatione Sanctorum falli posse. Scitissime docet Num. xx. Pontificem protestando, per actum Canonizationis non intendere aliquid facere, quod sit contra Fidem, & Catholicam Ecclesiam, sive honorem Dei, nullatenus vereri, se in Canonizatione errare posse: verborum sensum hunc rectum & legitimum videri: *Protestor, me non decernere cultum Sanctis, qui Deo debetur, esse impendendum; quod quidem esset contra Fidem, & Ecclesiam Catholicam, & contra honorem Dei; & protestatio hoc modo declarata, similis est protestationi Septimæ Synodi, in qua Patres declararunt, se Sanctorum Imaginibus colendis Latrariam non asserere soli Deo debitam.* Ita sapientissimus Pontifex, qui etiam paulo post aliam ejus protestationis declarationem enarrans, diserte ait, ipsam protestationem nihil aliud fuisse, quam precationem Deo a Pontifice fusam, ne ipse eum fineret in errorem incidere.

§. X.

Pronunciatio Pontificis.

Deinde alia voce, sedens tamen cum Mitra, pronunciat in hunc modum: *Ad honorem Sanctæ, & individue Trinitatis, & exaltationem Fidei Catholicæ, ac Christianæ Religionis augmentum, auctoritate ejusdem Dei Omnipotentis Patris & Filii & Spiritus Sancti, & Beatorum Apostolorum Petri & Pauli, & Nostra, de Fratrum nostrorum consilio decernimus, & diffinimus, bonæ memoriæ N. Sanctum esse, & Sanctorum Catalogo adscribendum, ipsamque Catalogo hujusmodi adscribimus. Statuentes, ut ab universa Ecclesia anno quolibet in die tali Festum ipsius, & Officium sicut pro uno Confessore (si sit Confessor) vel Martyre (si sit Martyr) devote & solemniter celebretur. Et si Domino Papæ placuerit, poterit addere ista verba: Insuper eadem auctoritate omnibus vere pœnitentibus, & confessis, qui annis singulis ad Sepulturam ejusdem in die tali devoti accesserint, unum annum & quadraginta dies; accedentibus vero annis singulis infra Octavas dicti Festi ad Sepulturam quadraginta dies (1) de injunctis sibi pœnitentiis misericorditer relaxamus.*

COMMENTARIUS.

I. **M** Eminit formulæ hujus pronunciationis absque ulla prævia protestatione Romanus Ordo XIV. Auctore Gætano Cap. xv. his verbis: *Dominus Papa tenendo Mitram in capite, definit publice illum, de quo agitur, esse Sanctum, & Sanctorum Catalogo esse adscribendum, & tanquam Sanctum esse ab omnibus venerandum, ipsique Sanctorum Catalogo adscribit, statuens, ut ab universali Ecclesia in die tali Festum ejus, & Officium devote, & solemniter celebrentur.* Sequitur mox formula ipsa pronunciationis, quæ tamen non nihil variat ab illa in nostro §. descripta. Sic

enim inquit: *Ad honorem Dei Omnipotentis Patris & Filii & Spiritui Sancti, & exaltationem Fidei, & Christianæ Religionis augmentum, auctoritate ipsius Omnipotentis Patris & Filii & Spiritus Sancti, Beatorum Petri & Pauli, & nostra, de Fratrum nostrorum Consilio decernimus, & definimus, bonæ memoriæ N. quondam Episcopum Sanctorum Catalogo adscribendum, & tanquam Sanctum esse ab omnibus venerandum.* Eadem fere est formula, quæ legitur in ms. Codice Pierfantiiano pag. 47.

II. Ergo in recitata formula initio pronunciationis singulæ Personæ Sanctæ Trinitatis nomi-

(1) Dies deest tam in editione Veneta, quam Romana, legitur tamen in Romano Ordine XIV. & in ms. Codice Pierfantiiano.

minantur, eumque ritum servavit Bonifacius IX. in Canonizatione S. Birgittæ, itemque Pius II. in decreto Canonizationis S. Catharinæ Senensis, & deinde Leo X. in Canonizatione S. Francisci de Paula, & Sixtus V. in Canonizatione S. Didaci, longeque ante hunc Pontificem, & Leonem X. Sixtus IV. in Canonizatione S. Leopoldi simili fere formula usus fuit, quæ est hujusmodi: *Ad laudem æterni Dei individua Trinitatis Patris & Filii & Spiritus Sancti, ac Fidei Catholica robur, & ornamentum, ad Religionis Christianæ cultum augendum &c.* Verum non nominant singillatim tres Personas sequioris ævi Pontifices, Hadrianus VI. in Canonizatione Sancti Bennonis Episcopi Misnensis, sicut nec Clemens VIII. in Canonizatione SS. Hyacinthi, & Raymundi, nec Paulus V. in Canonizatione S. Franciscæ Romanæ, & S. Caroli Borromei, nec Gregorius XV. nec, ut alios omittam, Urbanus VIII. Hi siquidem non initio formulæ, sed postea singillatim Personas Divinas nominant, post illa scilicet verba: *Auctoritate &c.* Verba illa, *Ad exaltationem*, adhibuit quidem Bonifacius IX. in Canonizatione S. Birgittæ, Pius II. in Canonizatione S. Catharinæ Senensis, Innocentius VIII. in Canonizatione S. Leopoldi, & alii in aliorum Canonizationibus.

III. Notandum quoque nunc illud, quod ubi in hoc §. dicitur, sicut etiam in Romano Ordine XIV. *Auctoritate ejusdem Dei Omnipotentis Patris & Filii & Spiritus Sancti &c.* Pius II. Innocentius VIII. Leo X. Hadrianus VI. in memoratis Canonizationibus, hac usi sunt clausula: *Auctoritate Domini nostri Jesu Christi &c.* Atque ea est formula, qua utuntur hodie passim Pontifices, ubi Decretum Canonizationis pronunciant, uti videre est in Actis Canonizationis quatuor Sanctorum peractæ a sanctæ memoriæ Clemente XI. a Justiniano Chiapponi editis pag. 224. & novissime in Actis Canonizationis quinque Sanctorum habitæ a regnante Summo Pontifice BENEDICTO XIV. Merito enim ea adhibetur formula, quia scilicet Romanus Pontifex Maximus est Christi Domini in Terris Vicarius, atque adeo illius, qui Pontifex, & Sacerdos est in æternum, & invisibile Caput Ecclesiæ, auctoritate agit, & quidem non modo in Canonizationibus Sanctorum, sed in aliis multis Decretis Ecclesiasticis.

IV. Præter auctoritatem Christi Domini, & Apostolorum Petri & Pauli, jam ex antiquo ritu addit Pontifex, *ac nostra*, uti videre est in citato Romano Ordine XIV. & in Codice ms. Pierfanctiano. Certe in Bulla Canonizationis S. Petri Martyris Ordinis Prædicatorum, quam die xxv. Martii anno mcllii. edidit Innocentius Papa IV. incipitque, *Magnis, & crebris*, sic inter alia inquit: *Confisi de Omnipotentis Dei virtute, auctoritate quoque BB. Petri & Pauli Apostolorum ejus, ac nostra, eum Sanctorum Martyrum Catalogo duximus adscribendum.* Verbum ipsum, *ac nostra*, legitur passim in aliis Sanctorum Canonizationibus celebratis ab aliis Pontificibus, quales sunt, Alexander IV. in Canonizatione S. Claræ, Clemens V. in Canonizatione S. Petri Cælestini, Joannes XXI. in Canonizatione S. Ludovici, Joannes XXII. in Canonizatione S. Thomæ Aquinatis, Bonifacius IX. in Canonizatione S. Birgittæ, Eugenius IV. in Canonizatione S. Nicolai Tolentini, Pius II. in

To. I.

Canonizatione S. Catharinæ Senensis, & alii passim; eaque formula concinit quidem verbis illis S. Petri Apostolorum Principis, qui in Concilio Hierosolymitano, uti in Apostolorum Actis Cap. xv. legitur, dixit: *Visum est Spiritui Sancto, & nobis.*

V. Explicanda nunc reliqua sunt ejus formulæ verba, quibus Decretum ipsum Canonizationis pronuncians Pontifex, sic ait: *De Fratrum nostrorum consilio decernimus, & diffinimus, bonæ memoriæ N. &c.* Eadem plane sunt verba, quæ leguntur in Ordine Romano XIV. & in ms. Codice Pierfanctiano. Verum mutatus est iste loquendi modus, & luculentius explicari solet hac alia dicendi formula, quæ legitur in Actis Canonizationis quatuor Sanctorum factæ a Clemente XI. & novissime in Canonizationis Actis quam de quinque Sanctis solemniter ac pompa peregit Sanctissimus Dominus noster BENEDICTUS XIV. ubi post ea verba, *Auctoritate Domini nostri Jesu Christi, Beatorum Apostolorum Petri & Pauli, ac Nostra*, ita statim subjicit, *matura deliberatione præhabita, & Divina ope sæpius implorata, ac de Venerabilium Fratrum nostrorum Sanctæ Romanæ Ecclesiæ Cardinalium, Patriarcharum, Archiepiscoporum, & Episcoporum in Urbe existentium consilio, Beatos &c. Sanctos esse decernimus, & definimus, ac Sanctorum Catalogo adscribimus.*

VI. Concinit hic loquendi modus antiquo ritui, qui in usu erat jam longe editionem nostri hujus §. Etenim Innocentius II. anno Christi mxxxiv. in Canonizatione S. Hugonis Episcopi Gratianopolitani celebrata in Concilio Pisano sic inquit: *Vita ejus, & auditis, quæ per B. Hugonis merita sunt, miraculis, supernæ Majestatis Clementiam collaudavimus, & Archiepiscoporum, Episcoporum, & Cardinalium, atque aliorum, qui nobiscum aderant, communicato consilio, ipsum inter Sanctos, & electos honorari præcipimus &c.* Ubi nota, præponi in recitato Decreto Archiepiscopos, Episcoposque Cardinalibus. Sed & Eugenius III. ubi anno mclii. S. Henricum Imperatorem canonizavit, nulla facta Cardinalium mentione, *Fratrum nostrorum Archiepiscoporum*, ait, *& Episcoporum, qui præsentibus aderant, communicato consilio, memoriam inter Sanctos de cetero fieri censemus &c.* Eadem legere est passim in aliis Canonizationis eo seculo, & aliis sequioribus celebratis, ut constat ex variis variorum Summorum Pontificum constitutionibus, quas de Canonizationibus Sanctorum ediderunt.

VII. Sed & antiquum pariter illud est quod hodieque dicitur: *matura deliberatione præhabita &c.* occurritque is modus loquendi in Bulla Canonizationis S. Bernardi data Anagninæ ab Alexandro III. Papa, xv. Kal. Februarii anno mclxi. *Quibus omnibus pia consideratione pensatis, & in Concilio Fratrum nostrorum expositis &c.* Alexandro III. adjungimus Innocentium III. qui in Canonizatione S. Homoboni Cremonensis celebrata in Lateranensi Basilica anno mxcviii. ita loquutus est: *De Fratrum nostrorum consilio post multam deliberationem habitam, cum eisdem Archiepiscopis, & Episcopis, quos super hoc ad consilium nostrum admisimus, de divina misericordia, & ejusdem Sancti meritis confidentes, ipsum Sanctorum Catalogo conscribendum duximus.* Nequis autem putet, Roma-

H h

num

num Pontificem solis niti hominum attestationibus in canonizandis Sanctis, lubet hoc loco referre formulam, qua usus est Honorius III. ubi anno MCCXXIV. S. Laurentium Archiepiscopum Dublinensem Sanctorum Fastis adscripsit: *De ipsius igitur sanctitate tantis certificati miraculis, Divinumque sequuti iudicium, per quod ejus glorificatio nobis tam evidentibus innotuit argumentis, eundem Beatum Virum Catalogo Sanctorum adscripsimus &c.* Notanda sunt ea verba, *Divinum sequuti iudicium*; validissimum enim argumentum præbent, ad probandum, falli non posse in ea re magni momenti Summum Romanum Pontificem.

VIII. Omissa hac quæstione, testatur Gregorius IX. in Bulla Canonizationis S. Francisci de Assisio edita XIV. Kal. Augusti anni MCCXXVIII. *se habito Fratrum consilio, & assensu, ipsum adscribi decrevisse Sanctorum Catalogo venerandum.* Ubi nota, fieri in hac Bulla mentionem non modo Fratrum idest Cardinalium, & Episcoporum, consilii, verum etiam assensus. Porro passim occurrunt in sequioris ævi Pontificum Canonizationibus ea verba, *ac de Venerabilium Fratrum nostrorum S. R. E. Cardinalium, Patriarcharum, Archiepiscoporum, & Episcoporum in Urbe presentium consilio*; quinimo in Canonizationis Decreti forma, quam ex antiquis Libris descripsit eruditissimus Angelus Rocca, inseruitque suo *De Canonizatione Sanctorum* Commentario, Cap. xxxviii. post illa verba: *De Venerabilium Fratrum nostrorum Sanctæ Romanæ Ecclesiæ Cardinalium, Patriarcharum, Archiepiscoporum, & Episcoporum in Romana Curia existentium consilio*, statim hæc alia adjuncta sunt: *& unanimes consensu, matura deliberatione præhabita, summaque diligentia ex Majorum institutis, etiam abundantius adhibita &c.*

IX. Ex præscripto demum nostri §. in Decreti pronuntiatione inquit Pontifex: *Decernimus, & definimus, bonæ memoriæ N. Sanctum esse, & Sanctorum Catalogo adscribendum, ipsumque Catalogo hujusmodi adscribimus.* Ita fere legitur in Ordine Romano XIV. & in ms. Codice Pierfanctiano. Juxta recentiorum ritum, ut alios omittam, regnans Pontifex Maximus BENEDICTUS XIV. in Canonizatione quinque Sanctorum ita pronuntiavit: *Beatos Fidelem a Sigmaringa &c. Sanctos esse decernimus, & definimus, ac Sanctorum Catalogo adscribimus.* Variatum nonnihil & ea in re jam olim fuit, ut constat ex Canonizatione S. Birgittæ, in qua Bonifacius IX. ita pronuntiavit: *Decernimus, declaramus, definimus, pronunciamus, Sanctam esse, & Catalogo Sanctorum &c.* Pius II. in Canonizatione S. Catharinæ Senensis dixit: *tantumquam Sanctam colendam decernimus, & definimus*; atque hæc verba passim adhibita fuerunt in Sanctorum Canonizationibus, quæ a sequentibus Pontificibus celebratæ fuere, longumque esset hoc loco ea testimonia referre.

X. Sed nec omittenda ea Decreti verba, quibus juxta §. nostri præscriptum statuit Pontifex, *ut ab universali Ecclesia anno quolibet in die tali Festum ipsius, & Officium, sicut pro uno Confessore, si sit Confessor, vel Martyre, si sit Martyr, devote, & solemniter celebratur.* Festum, quod ad ritus Ecclesiasticos attinet, ut scite docet Guyetus in sua Heortologia Lib. I. Cap. I. Quæstione I. in duplici sensu usurpari

solet. Primo quidem pro feriacione, seu cessatione a strepitu forensi, servilibusque operibus, quæ certis diebus ex præcepto, seu generali totius Ecclesiæ, seu particulari loci alicujus populo indicitur, eoque sensu accipitur Festum in Canone, *Pronunciandum, De Consecratione, Distinctione III. & Cap. Conquestus, De Feriis.* Secundo Festum accipitur pro Officio, quod est de festo, cujus oppositum est Officium de tempore, & in hac acceptione sumi debent verba nostri §. quæ deinde mutata fuerunt in hunc alium modum, qui legitur in Actis Canonizationis quatuor Sanctorum peractæ a Clemente XI. & in Canonizationis Actis, quam de quinque Sanctis non ita pridem celebravit regnans feliciter Pontifex BENEDICTUS XIV. *Statuentes, ab Ecclesia universali illorum memoriam quolibet anno die eorum natali . . . pia devotione recolere.*

XI. Sanctis Canonizatis septem deberi honores, notavit jam post Bellarminum eruditus Rocca in suo Commentario, *De Canonizatione Sanctorum*, Cap. xxxviii. sunt autem sequentes. I. Canonizati Catalogo Sanctorum adscribuntur, hoc est, jubetur, ac statuitur, ut ab omnibus publice colantur, ac dicantur Sancti. II. Canonizati in publicis Ecclesiæ precibus invocantur. III. Tempa, & Aræ Deo in eorum memoriam, & honorem eriguntur. IV. Sacrificia tam Sacrosanctæ Eucharistiæ, quam laudum, & precum, quod passim Officium, sive Horæ Canonice nuncupatur, Deo in honorem eorundem publice offeruntur. V. Dies festi in eorundem honorem celebrantur. VI. Imagines eorundem pinguntur, addito certo quodam lumine, in signum gloriæ, quam habent in Cælo. VII. Eorundem Canonizatorum Reliquiæ pretiosis thecis inclusæ publice in Ecclesia honorantur. Legendus laudatus Bellarminus Lib. I. *De Beatitudine Sanctorum*, sed præ ceteris Auctoribus Sanctissimus Dominus Noster BENEDICTUS XIV. Libro I. *De Servorum Dei Beatificatione &c.* Cap. xxxviii. quod inscriptum est: *De actibus cultus Servis Dei post Beatificationem deferendis*, ubi rem ipsam fuse, ac solide, doctissimeque pro more dilucidavit.

XII. Restat nunc, ut aliquid de Indulgentiis dicamus, quarum ex antiquo ritu in ejusdem Decreti pronuntiatione fit mentio: *Et, si Domino Papæ placuerit, poterit addere ista verba, ait hic noster §. Insuper eadem auctoritate omnibus vere pœnitentibus & confessis, qui annis singulis ad Sepulturam ejusdem in die tali devoti accesserint, unum annum & quadraginta dies, accedentibus vero annis singulis infra Octavas dicti Festi ad Sepulturam, quadraginta dies de injunctis sibi pœnitentiis misericorditer relaxamus.* Concinit Romano XIV. Ordini, atque ms. Cæremoniali Codici Pierfanctiano quod & in §. nostro edicatur circa Indulgentias, quas soliti erant Pontifices ei pronuntiationi adjungere: *Insuper eadem auctoritate omnibus vere pœnitentibus, & confessis, qui annis singulis ad Sepulchrum ejusdem in die tali devote accesserint, unum annum & quadraginta dies; accedentibus vero annis singulis infra Octavas dicti Festi ad Sepulchrum ipsius, quadraginta dies de injunctis sibi pœnitentiis misericorditer relaxamus.* Ita memorati Romanus Ordo XIV. & Cæremonialis Codex ms. Pierfanctianus.

XI II. Se-

XIII. Seculo XIII. cœpisse primum, sed parce tamen, dari Indulgentias in Canonizatione Sanctorum, notat Vanespen, Parte II. *Juris Ecclesiastici universi*, Titulo VII. Cap. II. Num. XX. Primus, qui eas concessisse legitur, fuit Honorius III. qui anno MCCXXV. in Canonizatione S. Laurentii Archiepiscopi Dublinensis, omnibus vere pœnitentibus, & confessis, qui ad Ecclesiam, ubi Corpus ejus Sancti requiescit, in die solemnitatis ejusdem, vel infra Octavas cum devotione accesserint, ejus Orationum suffragia petaturi, viginti dies de injunctis sibi pœnitentiis misericorditer relaxavit; uti legitur in Bulla laudati Pontificis, quæ incipit, *Ineffabilis*. Ejusdem seculi anno XXXIII. Gregorius IX. in Canonizatione S. Antonii de Padua, omnibus vere pœnitentibus & confessis Sepulchrum hujus Sancti in Festivitate ipsius usque ad octavum diem cum reverentia visitantibus, unum annum de injuncta eis pœnitentia relaxavit. Similem concessit in Canonizatione S. Dominici peracta anno MCCXXXIV. at paulo post, nempe anno Domini MCCXXXV. in Canonizatione S. Elifabethæ, quam celebravit Perusii in Ecclesia Fratrum Prædicatorum, ad annum addidit dies quadraginta: *Unum annum & quadraginta dies de injuncta sibi pœnitentia relaxat*; uti legitur in ejusdem Papæ Epistola data Perusii Kalendis Junii anno nono Pontificatus. Similem huic Indulgentiam concessit deinde Clemens IV. in Canonizatione S. Hedwigis Ducissæ Poloniæ anno MCCLXVII. visitantibus scilicet Sepulturam illius Sanctæ, in die Festivitatis ejusdem; infra Octavas vero prædictæ festivitatis *centum dies*.

XIV. Itaque sensim crevit Indulgentiarum liberalitas, quas in Canonizatione Sanctorum soliti erant Romani Pontifices largiri; id quod multo luculentius ostendi potest ex seculis posterioribus. Constat enim Callixtus III. Seculo XV. in Canonizatione S. Vincentii Ferrerii, accedentibus ad Sepulchrum, & Ecclesiam hujus Sancti, septem annos, & totidem quadragenas de injunctis eis pœnitentiis relaxasse; uti habetur in Litteris a Pio II. de ea re expeditis. His addidit Sixtus IV. eodem seculo in Canonizatione S. Bonaventuræ, *Dominicis singulis per annum, dies centum*; uti in Bulla ipsius legitur, quæ incipit, *Superna*. Seculo tandem XVI. Leo X. in Canonizatione S. Francisci de Paula anno MDXIX. celebrata Indulgentiam plenariam dedit omnibus, qui Officio divino-solemnis ejus Canonizationis astiterant; qualem nullus ante hunc Pontificem hujusmodi causa dedisse legitur. Quod autem hic Pontifex concessit assistentibus solemnæ Canonizationis officio, hoc subsequentes tandem Pontifices extenderunt ad visitantes Ecclesias Sanctorum, ut hodie passim observari videmus. Ceterum ex dictis hætenus liquet, Pontifices etiam Seculo XIII. in concedendis Indulgentiis moderatos fuisse, sensimque earum liberalitatem crevisse; verissimum autem esse id, quod notavit Lupus eruditissimus in Dissertatione, *De peccatorum ac satisfactionum Indulgentiis*, Cap. VIII. posteriores Pontifices in largiendis Indulgentiis longe liberales fuisse prioribus.

XV. At vero silentio premendum non est, quod tradit Petrus Amelius in Romano Ordine XV. Cap. CLIII. de Indulgentia concessa a Bonifacio Papa IX. in Canonizatione S. Birgittæ.

To. I.

Postquam enim reassumta Mitra sedendo pronunciavit Beatam Brigidam fore Sanctam, & adscribendam in Catalogo Sanctorum, ut in citato Ordine Romano legitur, ore proprio concessit Indulgentiam ista die, & in sequenti visitantibus Ecclesiam S. Petri, & S. Laurentii in Panisperna, & qui interfuerint in divino Officio isto illam Indulgentiam Jubilei, & multas alias in terris. Peculiaris fuit hæc indulgentia, quam in Canonizatione S. Birgittæ laudatus Bonifacius concessit in modum Jubilei. Porro sunt qui censent, datas ad Jubilei modum Indulgentias, esse Institutum Bonifacii, sed uti notat memoratus Lupus citato loco Cap. IX. labuntur, quia scilicet gratia hujusmodi est antiquior; etenim quod Clemens VI. Basileensi, in quo Frater Thomas Argentinensis fuit electus in Priorem Generalem Fratrum Augustinensium, Generali Capitulo dederit *plenas in Jubilei formam Indulgentias*, testatur idem Lupus ex testimonio gravis Scriptoris Alberti Argentinensis. Quidquid vero de hac re sit, testatur quidem & hoc nostrum Cæremoniale infra in sequenti §. *Bonifacium Nonum Pontificem, cum canonizavit Beatam Brigidam, dedisse plenariam Indulgentiam visitantibus Ecclesias Beati Petri, & S. Laurentii in Panisperna, ubi jacebat Corpus illius Sanctæ*.

XVI. Fuit haud dubie celeberrima illa Indulgentia, quam Leo X. concessit in Canonizatione civis mei S. Francisci de Paula, postquam enim ipse in sua Constitutione, quam de ea Canonizatione edidit, narravit, se tunc Missam celebrasse, ita mox de Indulgentia subdit: *Indulgentiam plenariam omnibus Officio hujusmodi tunc assistentibus devote concessimus, ac etiam in loco Sepulturæ ejusdem S. Francisci de Paula in depositionis suæ die, videlicet secunda Aprilis hujusmodi perpetuo duraturam quadraginta annorum, totidemque quadragenarum Indulgentiam annuatim condonavimus*. Hodie demum uti nos docet Sanctissimus Dominus noster in suo Opere, *De Servorum Dei Beatificatione &c.* Lib. I. Cap. XXXVI. §. V. Summi Pontifices plenariam elargiuntur Indulgentiam omnibus utriusque sexus Christifidelibus, qui confessi, & sacra Communione refecti, vel propositum habentes intra hebdomadam confitendi, & sacram Eucharistiam recipiendi, solemniter interfuerint Canonizationi Sanctorum; tum autem Indulgentiam septem annorum, ac totidem quadragenarum visitantibus natali eorum die ipsorum Sepulcra, uti legitur in Actis Canonizationis quatuor Sanctorum peractæ a Clemente XI. & a Justiniano Chiapponi collectis.

XVII. Jam non defunt qui cum Baronio autumant, ex fide Epistolæ S. Ludgeri Episcopi Monasteriensis, quæ extat ad calcem vitæ ejusdem Sancti apud Bollandum die XXVI. Martii, in qua scribitur Leonem Papam III. anno DCCCIII. cum Carolo Magno Imperatore Verdum se contulisse, ac ibidem S. Suibertum Sanctorum Catalogo adscripsisse, & *speciales indulgentias cunctis Fidelibus celebrantibus Festum S. Suiberti, & ad Divina confluentibus concessisse*. Verum, ut alibi notavimus, ejus Epistolæ fides, ob varia, quæ in ipsa occurrunt, apud Eruditos non tantum vacillat, sed uno pene consensu censetur conficta, & S. Ludgero ab aliquo recentiore falso supposita.

Hh 2

§. XI.

§. XI.

De ritibus post ipsam pronunciationem, & Indulgentiarum concessionem servandis.

Quibus finitis, Procurator Fiscalis rogat Protonotarios &c. de protestatione facta per Papam, & Procurator Causæ similiter (1) rogat de solemnî pronunciatione Canonizationis, & petit instrumentum, & a Papa decerni Bullas super his opportunas; & mox surget Pontifex sine Mitra, & incipit: *Te Deum laudamus*; & Chorus profequitur. Diaconus a dextris in fine dicit: *Ora pro nobis beate N.* Respondet (2) Chorus: *Ut digni efficiamur promissionibus Christi*. Et Pontifex deinde dicit orationem de communi, Sancto Canonizato convenientem, si non habetur propria, & concludit: *Per Christum Dominum nostrum*. Finita oratione, Diaconus a dextris stans ante Pontificem dicit alte: *Confiteor Deo omnipotenti &c.* & post Apostolos nominat Sanctum N. & Papa sine Mitra, Cruce sua præsentem, dicit: *Precibus, & meritis &c.* & in fine dat Indulgentias, ut sibi placet. Legimus, Bonifacium Nonum Pontificem, cum canonizavit Beatam Brigidam, dedisse plenariam Indulgentiam visitantibus Ecclesias Beati Petri, & Sancti Laurentii in Panisperna, ubi jacebat Corpus illius Sanctæ.

C O M M E N T A R I U S.

I. **Q**uod initio hujus §. edicitur, ut facta nempe pronunciatione a Pontifice, & concessione Indulgentiæ, de quibus dictum superius fuit, Procurator Fiscalis roget Protonotarios de protestatione facta per Papam, & Procurator Causæ similiter roget de solemnî pronunciatione Canonizationis, & petat instrumentum, & a Papa decerni Bullas super his opportunas, desideratur quidem non modo in Ordine Romano xiv. Auctore Jacobo Gajetano, Cap. cxv. verum etiam in ms. Cæremoniali Codice Pierfantiano: fit tamen aliqua ejus ritus mentio in Romano Ordine xv. Auctore Petro Amelio, Cap. cliii. ubi enarrans Canonizationem S. Birgittæ, sic inquit: *Post hoc Procuratores dicta Sancta petierunt publica instrumenta de hoc &c.* Sed audiamus primum enarrationem ritus, quem memoratus Ordo Romanus xiv. describit loco citato: *Quibus verbis per Dominum Papam prolatis, pronunciationis scilicet Canonizationis, & Indulgentiæ, ipse Dominus Papa incipit cantando Psalmum, Te Deum laudamus, quem ceteri cantando prosequuntur. Quo finito, Diaconus Cardinalis a sinistris Papa assistens dicat versiculum, Ora pro nobis Beate N. alleluja; & ceteri respondent: Ut digni efficiamur gratia Dei, alleluja. Si vero hujusmodi solemnitas fuerit a Septuagesima usque ad Pascha, in prædicto versiculo omittitur, alleluja. Deinde Dominus Papa cantando dicat: Dominus vobiscum; & responso, & cum spiritu tuo, dicat, Oremus, & post Orationem, quæ competat illi Sancto, finiendo ipsam Orationem, Per Christum Dominum nostrum; & respondeatur, Amen. Sed ipsa oratione finita, dictus Diaconus Cardinalis a sinistris Papa assistens dicat, Confiteor &c. ut moris est, & locis debitis, scilicet immediate post Apostolos faciat mentionem de dicto Sancto. Quæ confessione finita, Dominus Papa dat Indulgentiam gratiosam septem annorum, & septem quadragenarum; & data Indulgentia per Dominum nostrum Papam, ac Mitra eidem deposita, facit*

absolutionem, & dat benedictionem more consuetudo dicendo, Precibus & meritis &c. faciendo mentionem loco suo de Sancto Canonizato.

II. Hactenus Romanus Ordo xiv. in quo ritus ipsi luculentius ac in nostro §. enarrantur. Sane digni notatu sunt ritus in Canonizatione S. Birgittæ jam longe ante editionem nostri Cæremonialis a Patricio ordinatam servati. Postquam enim Procuratores Causæ ipsius Canonizationis petierunt publica instrumenta, ut tradit Petrus Amelius in suo Romano Ordine xv. Cap. cliii. *tunc omnes Cardinales, & Prælati receperunt paramenta alba, Episcopi Pluvialia, Presbyteri Planetas, Diaconi Tunicellas, & Dalmaticas, & iterum venerunt ad reverentiam Papæ. Post hoc, deposito Pluviali rubeo, recepit chirothecas pretiosas, & anulum Pontificalem, & Pluviale album pretiosum cum Mitra solemnî, & deposita Mitra, incepit cantando, Te Deum laudamus; & tunc data sunt duo magna tortitia de cera alba, qualibet de octo libris ceræ, & cuilibet Cardinali, ac Patriarchæ de VII. libris ceræ alia non alba, & omnibus Prælati de duabus libris, & aliis Clericis, & Cantoribus, Auditoribus, & Nobilibus, & aliis de una libra ceræ; & tunc incepta fuit Processio, & omnes tenebant faculas suas accensas in manibus, quilibet in ordine suo, & duo Patriarchæ ibant cum Cardinalibus; item Dominus Papa subtus pallium, idest Baldachinum, sed Milites portabant extra pallium tortitia Papæ accensa, & sic ivimus per totam Capellam usque ad aliam Capellam, & reversi fuimus processionaliter ad magnam Capellam &c.* Consuevisse in Sanctorum Canonizatione solemnem peragi Processionem, constat etiam ex Actis Canonizationis S. Bonaventuræ apud Volaterranum in suo Diario ad annum mcdlxxxii. ubi expressa fit mentio ejus Processionis, mirumque idcirco videri debet, cur ejus ritus, qui jam in usu erat, nostrum hoc Cæremoniale nullam fecerit mentionem.

III. Dicemus de hujusmodi Processione infra, operæ enim pretium censemus prosequi hoc

(1) Ita in Romana editione, in Veneta legitur, *simpliciter*. (2) In ipsa Veneta deest tota hæc Chori responsio.

hoc loco filum narrationis memorati Petri Amelii, qui post descriptum Processionis ritum factæ in Canonizatione S. Birgittæ, ita deinde subjicit: Dominus Summus Pontifex ascendit ad Cathedram ante medium Altaris, ubi fecerat Sermonem suum prius, & stando Diaconus a dextris, dixit cantando: Ora pro nobis Beata Brigida, alleluja; & Papa dixit: Dominus vo-

biscum; & aliam Orationem de Beata Brigida; & cantato per Cantores: Benedicamus Domino, Diaconus a sinistris dixit: Confiteor; & Papa dedit benedictionem more solito; & prior Episcoporum Cardinalium pronunciavit Indulgentias. De Indulgentiis in Canonizationibus Sanctorum dari solitis, jam fuse differuimus supra in Commentario ad §. x.

§. XII.

De Missa Canonizationis, & Oblationibus.

His finitis, Pontifex incipit Tertiam, & accipit Sandalia, vel, si magis placet, dimissa Tertia, accipit paramenta omnia Pontificalia, & cantat Missam solitis suis cæremoniis, vel de Sancto, vel, si aliqua Solemnitas esset, cantat de die cum commemoratione de Sancto; & si non posset, aliquis Cardinalis celebrat pro eo. Dum cantatur Credo, tres Cardinales Commissarii descendunt ad portam inferiorem suggestus, & ordinant Offertorium; & debito tempore, antequam Papa lavet manus in Sede eminenti, veniunt ordinate; & primus, idest Episcopus Cardinalis, offert duos magnos cereos, & cum eo primus Orator offert cereum suum, & canistellum deauratum cum duabus turturibus. Tum Presbyter Cardinalis offert duos magnos panes cum mappulis, & secundus Orator cereum suum, & canistellum argentatum cum duabus columbis albis. Ultimo Diaconus Cardinalis offert duo vasa vini, & tertius Orator suum cereum, & canistellum diversorum colorum cum variis aviculis. Cardinales osculantur genu, & pedem Summi Pontificis; proceditur deinde in Missa, ut alias.

COMMENTARIUS.

I. **R**itum esse antiquum, ut peractis cæremoniis in Commentario ad §. præcedentem explicatis, accedat Dominus Papa ad locum consuetum, ubi recipiat Pontificalia paramenta, scilicet alba, & postea more solito Missam celebret solemniter in honore dicti Sancti canonizati, docet nos Romanus Ordo xiv. Cap. cxv. Teste Petro Amelio in Ordine Romano xv. Cap. cliii. die ipsa, in qua canonizata est S. Birgitta, Papa, idest Bonifacius Papa IX. non potuit dicere magnam Missam de Sancta, causa infirmitatis, sicut debebat, sed in crastinum celebravit, ubi istum ordinem tenuit. Dominica ergo die viij. mensis Octobris bono mane post parvam Missam, Dominus Papa indatus cum Pluviali descendit ad Ecclesiam S. Petri cum omnibus Cardinalibus, duobus Patriarchis Constantinopolitano scilicet, & Gradensi, & cum Prælati, & toto Clero; & in porta Ecclesia venerunt ei obviam omnes Canonici S. Petri cum Cruce, Pluvialibus, Pavilione, & Campana processionaliter, cantando, Te Deum laudamus, duxerunt cum ad majus Altare; & facta aliqua Oratione ante Altare, recessit ad Cathedram, ubi consueverunt Romani Pontifices induere se, & sedendo, Cardinales, & omnes Prælati venerunt ad reverentiam, & ipse voluit, quod cantaretur Tertia. Missa fuit de S. Brigida cum commemoratione de Dominica. Ita Amelius loco citato, ex quo præsertim addiscimus, I. debuisse Pontificem in Canonizationis solemnitate celebrare Missam. II. ubi causa infirmitatis celebrare die ipsa non potuit, distulisse Missæ celebrationem in diem sequentem. Sed invaluit tamen mos, ut nempe, ubi Papa ea die celebrare non posset, aliquis Cardinalis celebraret pro eo, ut ait hic noster §.

II. Esse autem antiquum ritum, ut in Canonizatione Sanctorum Missarum Solemnia a Summo Pontifice celebrentur, docet nos exemplum Alexandri Papæ III. qui in Canonizatione S. Thomæ Cantuariensis factæ ab ipso post medium Seculum XII. Missam celebravit, ut colligitur ex ms. Codice Vaticano de Vita ejusdem Alexandri, ubi ita inquit: In die Purificationis B. Mariæ, convocatis Episcopis, & Abbatibus, Campaniam apud Signiam, ad honorem ipsius specialiter Missarum Solemnia celebravit. Meminit & ejus ritus Cardinalis Ostiensis in Capite, Audivimus, De Reliquiis &c. ubi verba faciens de ritibus in Canonizatione servari solitis, sic inter alia inquit: Cantatur Te Deum laudamus, & celebrat Missam idem Papa in honorem ejusdem Sancti. Servatum fuisse hunc ritum in Canonizatione S. Petri Cælestini, in qua Missam Clemens V. celebravit, testis est Auctor, qui dictam Canonizationem Carmine exposuit apud Bollandianos die xix. mensis Maji.

Signataque manu turba, prædicit aperte
Se Petri memorem, celebris solemnia Missæ
Festa impleturum, verbis & facta repensat.

Nam celebrat sollemnis apex, & canduit albis. Sane eruditus Phœbeus in sua Dissertatione typis impressa post Acta Canonizationis Sanctorum Petri de Alcantara, & Mariæ Magdalænæ de Pazzis, solide ostendit ex vetustioribus Canonizationum Actis, non esse de essentia Canonizationis, ut Missa a Summo Pontifice tunc celebretur, licet in magnum decus tantæ rei cedat, si eam ipse celebret, vel alius eo impedito. Sed de hoc ritu, sicuti & de aliis Canonizationem spectantibus legi possunt quæ Magister omnium docet BENEDICTUS XIV. in Opere, De Servorum Dei Beatificatione &c. Lib. I. Cap. xxxvi. §. i.

III. Di-

III. Dignum notatu in hac Missa Canonizationis illud profecto est, quod juxta veterem ritum docet idem §. noster, ex cujus præscripto, dum cantatur Credo, tres Cardinales Commissarii descendunt ad portam inferiorem suggestus, & ordinant Offertorium, & debito tempore, antequam Papa lavet manus in Sede eminenti, veniunt ordinate; & primus, idest Episcopus Cardinalis, offert duos magnos cereos. Esse plane antiquum ritum offerendi in Missa Canonizationis Pontifici cereos, panem, vinum, turtures, columbas, aliasque aviculas, testis est memoratus Ordo Romanus xv. Cap. cl. lll. ubi enarrat ritum Canonizationis S. Birgittæ celebratæ anno mcccxcx. a Bonifacio Papa IX. sic inquires: *Post Evangelium Diaconus a sinistris dixit: Confiteor; & dicto, Credo in unum Deum, & post Offertorium sedebat Papa super bassam Cathedram cum scabello ante regias ferreas Papa, ubi lectum fuit Evangelium, versa facie ad Sedem, in qua fuit indutus. Tunc Domini Commissarii tres Cardinales de Canonizatione istius Sanctæ exierunt de Sacristia S. Petri cum oblationibus suis. Pergit idem Ordo, narratque cæremonias, quibus oblationes ipsæ delatæ fuere ad Pontificem: Primo, ait, Dominus de Francia cum duobus magnis tortitiis accensis coopertis de auro, obtulit osculando pedem & manum: secundo Dominus Anglicanus cum duobus panibus coopertis cum robaleis, & armis, & scudetis S. Brigide, & trium Cardinalium Commissariorum, & osculatus est pedem, & manum Papæ: tertio Dominus Baren-sis cum duobus magnis bacilibus de vino, & malvatico, quæ vocantur Romæ scyphi deaurati, & cum armis, & scudetis Domine, & Cardinalium prædictorum, & osculatus est pedem, & manum Papæ: ultimo venerunt quinque Procuratores istius Sanctæ cum Advocato, & quilibet obtulit unam magnam candelam de una libra ceræ albæ modicum laboratam cum rosis, & floribus, viridis, albæ, & ruberæ: item unum parvum canistrellum totum depictum de colore viridi, in quo fuerunt duæ columbæ albæ, & duæ turtures.*

IV. Ejus ritus plurima afferri exempla possunt, quæ passim occurrunt in Canonizationibus Seculo xiv. & deinceps celebratis. Ut alia omit-tam, ita eundem ritum enarrat Grassus in ms. Diario, ubi refert gesta Leonis Papæ X. ubi nempe exponit Canonizationem S. Francisci de Paula ab ipso Pontifice anno mdxix. peractam: *Dicto Offertorio, fit solemnitas oblatio Papæ per tres Cardinales Commissarios cum tribus Oratoribus Christianissimi Regis, & primo primus Cardinalis Episcopus adveniat solus, idest, sine aliquo laterali, quem sequuntur duo scutiferi ejusdem, singuli cereos magnos albæ ceræ portantes illuminatos, & post hos veniunt Procuratores non Prælati hoc ordine, videlicet, primo post Cardinalem veniat primus Orator, seu Procurator portans in dextera cereum album illuminatum, & sinistra par turturum in canistrello pulchre laborato, & inaurato. Deinde sequatur secundus Cardinalis Presbyter ducens duos Scutiferos duos panes inauratos, & mappatos portantes, quos alius Orator, seu Procurator sequatur, portans in dextera cereum album, ut primus, & sinistra duos pullos columbarum canistrello similiter inclusos; & demum sequatur tertius Cardinalis Diaconus post se ducens duos Scutiferos duo barilia vini portantes, & post hoc tertius Procu-*

rator cum cereo in dextera, & sinistra canistro pleno avibus vivis, extensa reticula desuper, & circumcirca rosis & floribus diversorum colorum; & cum omnes tres sunt ante Papam, offerunt successively, Cardinales osculantes manum & genu, & Oratores similiter offerunt cereos, & canistrum cum osculo manus, & pedis, nihil dicentes. His similia legere est in aliis sequioris ævi Canonizationibus, ac præsertim in illa, quam nostro seculo celebravit Clemens XI. anno mdccxii. quo in Sanctorum numerum retulit Pium Papam V. Andream Avellinum, Felicem a Cantalicio, & Catharinam de Bononia, teste Justiniano Chiapponi, qui Acta ipsa Canonizationis collegit, auxitque Dissertatione super mysteriis Oblationum, quæ fieri in Missa Canonizationis solent. Sed de ista Oblationum significatione videri possunt quæ jam ante Chiapponum docuerunt Angelus Rocca in suo Commentario, De Canonizatione Sanctorum, Joannes Baptista Marus in sua Diatriba, De mystica rerum significatione, quæ in Sanctorum Canonizatione ad Missarum Solemnia Summo Pontifici offerri solent, Petrus Ruifius a Visitatione Ordinis Minimorum S. Francisci de Paula in suo Discursu hac de re edito, Franciscus Viætonus ejusdem Ordinis in Tractatu, De Canonizatione Sanctorum, Penia in Notis ad Vitam S. Raymundi Lib. lll. Cap. xlii. Observatione II. alique eruditi Auctores.

V. Porro Benedictus XIII. eam turturum, columbarum, aviumque aliarum oblationem fieri noluit in Canonizationibus Sanctorum, quas ipse peregit anno mdccxxvi. octo Sanctorum, & S. Margaritæ de Cortona anno mdccxxvii. ac S. Joannis Nepomuceni anno mdccxxix. Testis est hujus rei Justus Fontaninus in suo Canonizationum Codice, in Notis ad Litteras Bonifacii IX. scriptas Clarissis Urbanis S. Laurentii in Panisperna super Canonizatione S. Birgittæ, ubi postquam ait, *in hac Cæremonia, post consuetas ex veterrima Ecclesiæ disciplina, panis, vini, & ceræ oblationes de more Summo Pontifici factas, columbas, & turtures primum visas fuisse arbitrio Petri Amelii Pontificii Sacristæ, ita sub-jicit: Hac tamen avium oblatio in Domo Dei facta displicuit Summo P. N. Benedicto XIII. cumque accepisset, eam quoque displicuisse vener. mem. Cardinali Josepho Maria Thomasio sacrorum rituum peritissimo; prætereaque idem Sanctissimus Pontifex eam esse minime consonam reperisset sanctiori Ecclesiæ disciplinæ, quam summe callet, hujusmodi avium oblationem fieri noluit in solemnibus Canonizationibus, quam habuit in Basilica Vaticana sub finem elapsi anni 1726. & initio hujus anni 1727. Morem a Benedicto XIII. Papa servatum probat comprobaturque Sanctissimus Dominus Noster BENEDICTUS XIV. in suo Opere, De Servorum Dei Beatificatione, & Sanctorum Canonizatione, Libro I. Capite xxxvi. §. xii. Num. xxxv. ubi inter alia post relata Fontanini verba, sic inquit: *Revera, si antiquiora Ecclesiæ monumenta, & ad ea a nobis non adeo remota manum admoveamus, inveniemus, oblationes in Missa Sacrificio fieri consuevisse, & etiam nunc fieri, rerum tantum ad Sacrificium ipsum pertinentium, ideoque panis, & vini, & ceræ: una quippe pars harum oblationum in materiam Sacrificii assumebatur, secunda pro eulogiis benediciebatur, & alia pars in usus Ministrorum, & pauperum cedebat.**

VI. Ad.

VI. Addit & alia doctissimus Pontifex N. BENEDICTUS XIV. aitque, priscis innixum monumentis sanctæ memoriæ Benedictum XIII. noluisse in Canonizationibus, quas solemniter variis peregit temporibus, fieri turturum, columbarum, & avium oblationem. Aiebat enim Benedictus XIII. proscriptam fuisse oblationem avium, atque animalium in Canone III. vulgo Apostolorum, & quamvis lactis, mellisque oblatio vetita in Canone Apostolico, permessa esset Canone III. Concilii III. Carthaginensis anni CCCXCVII. subdebat idem Benedictus Pontifex, id ex speciali ratione fuisse pro die Paschæ admissum, quod prædicta nempe die lac & mel infantibus recens baptizandis juxta antiquum morem infundendum speciali benedictione benedicebatur: *Ut in Sacramentis Corporis & Sanguinis Domini nihil offeratur, quam quod ipse Dominus tradidit, hoc est, panis, & vinum, aqua mixtum: primitia vero, seu lac, & mel, quod uno die solemnissimo in infantum mysterio solet offerri, quamvis in Altari offeratur, suam tamen habeant propriam benedictionem, ut a Sacramento Dominico Corporis & Sanguinis distinguantur.* Extat hic Canon in pervetusto Africane Ecclesiæ Codice, estque Canon XXXVII. quem nos explicuimus Tomo II. Conciliorum in Commentario ad Canonem LVII. Trullanum pag. 152. & seqq. Concludebat denique laudatus Pontifex Benedictus XIII. se regulæ generali velle adhærere, nec ab ea se posse recedere, nulla speciali urgente circumstantia, nec ullo existente antiquioris Ecclesiæ documento, quod recessum ab ipsa regula fuaderet.

VII. Notat & hæc recitato loco probatque BENEDICTUS PAPA XIV. ubi & illud observat, morem illum oblationis turturum, columbarum, & avium resumtum fuisse postea a suo decessore Clemente XII. in Canonizatione ab ipso peracta anno MDCCXXXVI. quatuor Sanctorum Vincentii a Paulo, Joannis Francisci Regis, Julianæ de Falconeriis, & Catharinæ Fliscæ Adurnæ. Ceterum eum Benedicti XIII. morem sequutus est BENEDICTUS XIV. in Canonizatione Fidelis a Sigmaringa, Camilli de Lellis, Petri Regalati, Josephi a Leonissa, & Catharinæ Ricciæ, quam celebravit die XXIX. Junii anno MDCCXLVI. *Ab hac enim solemnitate hoc genus oblationis, turturum scilicet, columbarum, aviumque versicolorum, omnino tolli Sanctissimus imperavit, ut habent Acta Canonizationis memoratorum quinque Sanctorum a diligentissimo & peritissimo primo Apostolicarum Cæremoniarum Præfecto Ignatio Reali ordinata, pag. 508.* Sane digna præ ceteris lectu sunt Acta ipsa, in quibus admiratus sum præstantissimi Auctoris elegantiam non modo, ac præclarissimam methodum, verum etiam eximiam diligentiam in quibusque minutissimis cæremoniis referendis, dicique iccirco merito possunt Cæremoniale numeris omnibus absolutissimum ad peragendas rite recteque in posterum Sanctorum Canonizationes, tum præsertim quod ipsa Acta contineant Canonizationem celebratam a Sanctissimo Domino Nostro feliciter regnante Pontifice BENEDICTO XIV. qui in ipsa Canonizationis præsertim materia censerit merito Magister omnium debet.

VIII. Juxta antiquum ritum, cujus meminit in Romano Ordine xv. Cap. CLIII. Petrus Amelius, jam non modo in Missa Canonizationis San-

ctæ Birgittæ oblatum fuit Bonifacio IX. Papæ parvum canistrellum totum depictum de colore viridi, in quo fuerunt duæ columbæ albæ, & duæ turtures, verum etiam Executores ipsius Canonizationis, celebrata Missa, miserunt unam pintolam de auro Papæ, valoris C. ducatorum, & unum vitulum, XXIII. Capones, XXIII. pullos, XXIII. columbos, duo barilia de vino. Morem hunc servatum etiam fuisse in Canonizatione S. Nicolai de Tolentino Ordinis Eremitarum S. Augustini peracta anno MCDXLVI. ab Eugenio Papa IV. ad quem celebratis Missarum solemniis, ejusdem Ordinis Fratres miserunt duo doliola vini, quod Græcum vocant, multos hædos, multos phasianos, multos pullos, multas gallinas, multos anseres, multas turtures, & coturnices, & unam vitulam, docet nos ad ipsum annum MCDXLVI. Paulus Petronus in sua Historia Italico idiomate scripta, quam ex ms. Codice Bibliothecæ Vaticanæ vulgavit eruditissimus Ludovicus Antonius Muratorius, Legiturque Tomo XXIV. *Rerum Italicarum*, Columna 1103. & seqq.

IX. Reliquum est, ut ad calcem Tituli hujus aliquid de magnis impensis dicamus, quæ fieri in Sanctorum Canonizationibus solent, quasque heterodoxo calumniatores perperam ad Romanæ Curie referunt avaritiam, inter quos impius apostata Marcus Antonius de Dominis Lib. VII. *De Republica Ecclesiastica*, Cap. v. Num. LVIII. ita inquit: *Eos enim Papæ canonizant, hoc est, ferme deificant, quos ambitio Romana, quos avaritia deificandos suadet.* Sed hanc calumniam egregie refellit Sanctissimus Dominus noster in citato Opere Lib. I. Cap. XLVI. ubi per varios paragraphos dilucide exponit eorum sumtum necessitatem, refertque inter alia celebre testimonium incogniti Auctoris, qui in Discursu dogmatico, *De Sanctorum Canonizatione*, Parisiis impresso anno MDCCXXXIX. pag. 65. ita impensas ipsas defendit: *Expensæ, inquit, si statuta fuissent, ut difficilior, & exactior esset causarum discussio, prudentia laudanda esset. Sed quis est, qui ignorare possit, quod Commissarii accedentes ad locum, ubi Sancti vixerunt, vel in quo miracula facta sunt, ut sumant informationes, multitudo testium examinandorum, multitudo scripturarum imprimendarum, bonoraria solvenda negotiorum gestoribus, Congregationis Officialibus, magni Festi celebratio, necessario immensas quodammodo requirunt expensas, ex quibus nullum Camera Apostolica percipit emolumentum, & quarum magna pars fit extra Urbem.* Sed vide quæ de ipsis expensis laudatus Pontifex citato loco deferit, præsertim vero §. VII. ubi agit de apparatu Basilicæ Vaticanæ, & de pretiosis vestibus Pontificalibus ad Canonizationis solemnitatem necessariis.

X. Neque defunt antiqui Auctores, qui expensarum magnitudinem excogitatam ajunt fuisse a Romanis Pontificibus, *ut absterreantur Principes, & Populi*, ad petendum, hujusmodi Canonizationes fieri. Hæc fuit quidem sententia Paridis Grassi Apostolicarum Cæremoniarum Magistri, qui in suo ms. Diario, ubi enarrat gesta Pontificatus Leonis Papæ X. agens de Canonizatione S. Francisci de Paula hæc habet: *Cum dixissem ipsi, nempe Leoni Papæ, multam esse expensam in Canonizatione ordinaria faciendam,*

dam, præterquam credibile sit, quæsit a me Pontifex, quanta ea expensa esse soleat; respondi, me recordari, tempore Sixti quarti canonizatum fuisse B. Bonaventuram, & vidisse multum peratum, & pulcherrimum, similiter & tempore Innocentii octavi vidisse, & interfuisse, quando canonizatus fuit Beatus Leopoldus, cujus etiam pompa fuit maxima, legisse autem in Libro Babioli, & Augustini Patricii tunc Magistrorum cæremoniarum pro Bonaventura fuisse expositos ducatos auri 27. m. & pro Leopoldo fuisse 25. m. expositos, sicut expresse scripsit idem Augustinus Patritius, & Joannes Bruccardus tunc Magister Cæremoniarum, quam excessivam summam cum audiret a me Pontifex, & quasi de illa rideret, ut impossibilem factum, interrogavit, in quibus rebus tanta pecunia expenderetur; dixi, hanc expensam sic amplam ideo ab Ecclesia, sive a Sede Apostolica, & a Pontificibus non solum tolerari, sed etiam quodammodo præcipi, ut ex ea quasi impossibili, vel saltem dura, absterreantur Principes, & Populi ad petendum, hujusmodi Canonizationes fieri, quæ aliquando non ex meritis ejus, qui canonizatur, sed ex intercessione communitatis, ac Populi, vel Principis supplicantis, qui vel affinis, vel devotus illius fuit, aut sit, sicut modo est Cardinalis de Jacobatis, qui etiam petit, Beatam Cecolletiam, idest Franciscam Romanam, affinem suam canonizari, & sicut Communitas Florentia Patria sua Sanctitatis, quæ petit Beatum Antoninum Archiepiscopum Florentinum, & sicut Natio Alemanna quæ nunc instat pro Canonizatione Beati Benonis, & sicut Dux Venetiarum, qui petit & instat pro expeditione sui antecessoris Ducis Venetiarum, & sicut Rex Ungariæ qui petit Beatum Ladislaum Prædecessorem & affinem suum, & sicut Rex Polonia, qui petit

Beatum Casimirum avum suum; & alii multi sunt, qui similiter petunt, & instant pro Canonizationibus suorum affinium, & devotorum suorum, quos si Sanctitas sua velit omnes audire, & exaudire canonizando, profecto talis Sanctitas veniet in contemptum, vel omnino relinquitur. Itaque consultissime, ut opinor, Sedes Apostolica tantos, ac tam excessivos sumtus tolerat, & quidem hæc pecunia expendi solet sic, nam omnia requisita paramenta, vestimenta, ornamenta, tam sacra, quam non sacra, emuntur, & sunt nova.

XI. Hactenus Paris de Grassis, sed scitissime docet Sanctissimus Dominus Noster citato Cap. XLVI. Num. v. *Beatificationum*, & *Canonizationum difficultatem nequaquam petendam esse*, aut peti ab expensarum magnitudine, sed utique a longo & rigido examine, quo causa pertractantur, ut testari poterunt quotquot hujusmodi negotiorum expeditioni tanquam Postulatores in Romana Curia vacarunt, & quemadmodum plane desumitur ex his, quæ nonnulli inter ipsos scripta reliquerunt. Refert mox doctissimus Pontifex eorum testimonia, quibus omisfis, dicimus nos, falli in ea sua opinione Grassum, qui licet peritissimus fuerit Apostolicarum cæremoniarum Magister, non pauca in Diariis scripsit, quibus adhærere nullatenus possum. Quis autem nescit, juste petitam fuisse canonizationem illorum, quos ipse commemorat, quosque deinde Sedes Apostolica, post diligentissimum virtutum & miraculorum examen, Sanctorum Catalogo adscripsit. Certum profecto illud est, nunquam ipsam Apostolicam Sedem falli posse, aut errare in Canonizatione Sanctorum, nec unquam Principum preces valuisse, aut valituras ad hujusmodi Decreta ab Apostolica Sede extorquenda.

DE PLURIBUS BENEDICTIONIBUS T I T U L U S VII.

I. **B**enedictio in Scripturis & Deo & hominibus tribuitur. Benedicere Dei est benefacere; qui enim quod vult facit, cui bene vult, aut benedicit, eo ipso benefacit.

In hominibus autem benedicere, est alteri bene precari; seu, ut bona proveniant, optare. Ex quo patet, quod docet eruditissimus Jacobus Eveillon in Libro, *De Processionibus Ecclesiasticis*, Cap. xxxi. discrimen inter benedictionem divinam, & humanam. Etenim illa suo effectu numquam frustratur; unde Genesis Cap. xii. dicit Deus Abraham: *Benedicam tibi, erisque benedictus*: hæc vero sæpe inefficax, & inanis est, quia non est in potestate hominis præstare bona quæ alteri optat, sed ea a Deo petenda sunt, qui solus omnium bonorum auctor & largitor est, ut docent passim Scripturæ; & fateatur Ecclesia in plurimis suis Orationibus. Plura de Benedictionibus in peculiari de eo argumento Tractatu tradit Paulus Maria Quarti, explicatque varia humanæ Benedictionis genera; idque etiam videri potest apud memoratum Eveillonium loco citato.

II. Omisfis variis humanæ benedictionis ge-

neribus, dicimus nos brevi pauca, quæ publicam Ecclesiasticam Benedictionem spectant, quando quis scilicet ratione muneris sacri, quo fungitur, petit a Deo, ut personis, seu rebus aliquibus bona convenientia tribuat; hæc enim est, quæ benedictio Ecclesiastica proprie appellatur, quippe quæ nomine Ecclesiæ, & ex auctoritate ei, ejusque Ministris a Deo concessa, fiat. Posuit namque Deus Sacerdotes, & Ministros Ecclesiasticos dispensatores Benedictionum suarum, uti addiscimus ex Numerorum Cap. vi. ubi per Moysen ita Deus ait Aaroni, & filiis ejus: *Sic benedicetis filiis Israel, & dicetis eis*: Benedicat tibi Dominus, & custodiat te. Ostendat Dominus faciem suam tibi, & misereatur tui. Convertat Dominus vultum suum ad te, & det tibi pacem: *invocabuntque Nomen meum super filios Israel; & ego benedicam eis*. Quem locum sic exponit S. Petrus Damiani in Epistola ad Florentinos data, quæ est xi. Lib. viii. *Dominus in Libro Numeri de Sacerdotibus ait*: Invocabunt Nomen meum super filios Israel, & ego benedicam eis. *Sacerdos quippe Dominum super hominem verbis invocatur, sed ipse super eum Dominus benedictionem efficaciter format*. Effectus ita-

itaque benedictionis non in merito Sacerdotis constat, sed hanc invocatio Divini Nominis administrat; ut quod ex ore sonat hominis, intus impleat Creator; & per indigni saepe hominis ministerium, divina virtus suum veraciter efficiat Sacramentum.

III. Quod hucusque docuit S. Petrus Damiani, consentaneum plane est doctrinae S. Augustini, qui eundem Scripturae locum exponens in Libro Quaestionum Veteris Testamenti, Capite XI. ita inquit; *Per quod ostenditur, Spiritum gratiarum non personam sequi, aut digni, aut indigni, sed ordinationem traditionis, ut quamvis aliquis boni meriti sit, non tamen possit benedicere, nisi fuerit ordinatus, ut officium ministerii exhibeat. Dei autem est effectum tribuere benedictionis.* Eadem docent ceteri Patres, atque Theologi passim. Deo itaque operante in ministerio Sacerdotali, benedictio Ecclesiastica habet effectum, non quidem ex opere operato ad instar Sacramentorum, sed ex vi precum Ecclesiae, quae cum sit Sponsa Christi dilecta, non potest non exaudiri ab eo pro merito, & dignitate sua, quando aliquid pro filiis petit. Totavis igitur benedictionum Ecclesiasticarum est in oratione, & invocatione Ecclesiae, quae fit per ejus Ministros, ut de omni genere ciborum, qui a Christianis ante esum benedicuntur, dicit Apostolus in Epistola I. ad Timotheum, Capite IV. *Sanctificatur enim per verbum Dei, & orationem.* Ideo quemadmodum loco citato e Libro Numerum Deus certam formulam populo benedicendi, Aaroni, & Sacerdotibus veteris Legis praescripsit, ita Ecclesia Divino Spiritu edocta, omnium rerum benedicendarum formulas conceptis verbis definivit in Libris Ritualibus, ut sciant Sacerdotes, quid in singulis, & quomodo petendum sit; ne videlicet temere, & pro arbitrio loquendo, ab ejus institutione, proposito, & fine aberrant, & sic optatis decident.

IV. Omni itaque ratione cavendum est Sacris Ministris, ne alias benedictionum formas, ritus, aut caeremonias usurpent, quam quae in Libris Ecclesiasticis, utpote, Missali, Pontificali, & Rituali suprema auctoritate probatis continentur. Circumferuntur enim non paucae a superstitionis, & maleficis hominibus compositae, & arte daemonum excogitatae, quae ut latens venenum non facile produnt, ita multos incautos decipiunt, & in impietatem praetextu devotionis, aut remedii necessarii, facile pertrahunt.

Cavendum etiam, ne benedictiones Ecclesiasticae quocumque praetextu ad alios fines detorqueantur, quam ad quos ab Ecclesia institutae sunt. Cum enim illae vim non habeant, nisi ex intentione, & invocatione Ecclesiae, non autem ex proposito, & voluntate utentium; certum est, ex communi ordine providentiae divinae, easdem neque effectum sortiri alium, quam ab Ecclesia institutum, neque sine piaculo ad alienos, & particulari praesumptione excogitados usus posse applicari. Qui autem sint legitimi fines & effectus singularum benedictionum, intelligitur ex earundem verbis, atque sententiis, quibus concipiuntur.

V. Rursus benedictiones ipsae Ecclesiasticae sunt in duplici differentia, nam aliae constitutivae, aliae invocativae a Theologis appellantur. Constitutivae dicuntur, per quas res, seu personae benedictae constituuntur in esse permanenti rei sacrae, religiosae, & sanctae, adeo ut eum statum deinceps non mutant, neque ad profanum usum redire possunt. Quicquid autem sit de hisce benedictionibus, de quibus fusa differunt memorati Auctores, Jacobus Eveillon, & Paulus Maria Quarti; invocativae dicuntur illae, quibus Dei benignitas invocatur, ut personis, seu rebus benedicendis, pro cujusque conditione, usu, aut necessitate, aliquid boni tribuat, eaeve a malo vindicet, non immutato earundem statu, cujusmodi sunt, benedictio Episcopalis, benedictio, quae datur initio Confessionis, quae post Baptismum, & Communionem, quae in fine Missae, quae ante Lectiones Divini Officii, quae Diacono lecturo Evangelium; benedictio Regis & Reginae, benedictio Sponsi & Sponsae, Anuli sponsalis, novi Militis, armorum, & Vexilli bellici, vestium Monachorum, & Monialium, puerperae novae, novae navis, vinearum, frugum, atque adeo omnium esculentorum, & poculentorum, & aliarum ejusmodi rerum, quarum benedicendarum formulae habentur in Libro Sacramentorum S. Gregorii Papae, & in aliis antiquis Ritualibus Libris, quos recenset inter alios eruditissimus Martene in suo Opere, *De antiquis Ecclesiae ritibus*. Nam licet harum benedictionum virtute, nova quaedam bona, seu temporalia, seu spiritualia divinitus conferantur rebus, seu personis, pro quibus Nomen Dei invocatur; relinquuntur tamen illae sibi, & suae conditioni pristinae, atque usui consueto, neque ob hoc in ordinem rerum sacrarum transeunt.

C A P U T I.

Ordo servandus in creatione novi Ducis a Paulo II. institutus.

I. **N**Ovo huic ritui constituendo, ut hoc Caeremoniale admonet in §. sequenti, causam dedit Borfius Marchio Ferrariensis, qui anno MCDLXXI. die I. Aprilis Romam magna cum pompa ad Paulum II. Pontificem venit, ut Titulum Ducis ab ipso obtineret. Rem inter alios narrat Joannes Baptista Pigna in Historia de Principibus Atestinis, & ex eo Andreas ViSTORELLUS in Notis ad Claconium in Vita Pauli II. Ergo Borfium a Paulo Romam accitum, ajunt, & tertio Idus Martii Ferraria discessisse, divina ope expetita. Nicolaus Corrigii, Marcus Pius Carpi, Galeottus Picus Mirandulae, & Ma-

To. I.

thaeus Maria Scandiani Domini Borfium comitati sunt, & cum his quingenti circiter honesto orti genere amiculis auro argentoque distinctis oblecti, quos familiares sequebantur. Sarcinae a ducentis mulis ornatis deferebantur. Juvenes LXXX. pedibus incedentes, singuli quatuor canes ut plurimum molossos loris vinctos ducebant. Cum Urbem iniit, ccl. hominum millia ad spectaculum confluerant; dictum a nonnullis fuit, nullum Regem, aut Augustum pompam, splendoreque tam insigni Romam advenisse. Borfius die Christi Resurrectione celebri Pontificae vestis fyrma, quam vocant caudam, dum Paulus in-

Ii

Va-

Vaticanam Basilicam Sacris operaturus iret, gestavit. Tertiæ Horæ precibus absolutis, a Mediolanensi, & Cretenfi Archiepiscopis ductus, Gladium a Pontifice pro Ecclesia dimicaturus accepit. Thomas Peloponensis Despotæ baltheo, Neapoleo Urfinus, & Constantius Pisauriensium Reguli filius calcaribus eum exornarunt, & D. Petri Miles effectus est. Pontifici deinde Angelorum pane refecto manus abluturo aquam præbuit; & deinde ab ipso vestem damascenam murium alpinorum pellibus ornatam, acutamque Infulam binis eximiis pretii lapillis insignem, Virgam etiam auream manu tenendam, & torquem collo inferendum Ducis insignia accepit. Ducem duo Cardinales deduxerunt ad Sedem, Senatus universus, Paulo jubente, Domum singulari honore prosequutus est. Postridie Ducali ornatu honestatus Paulum ad Vaticanum comitatus inter duos Cardinales sedit, & a duobus aliis ad Paulum ductus, Rosa aurea donatus est, quam iterum in limine Basilicæ Vaticanæ, populo inspectante, Pontifex eidem Borfio dedit. Qui eodem Pontifice imperante a Senatu universo præeunte, inter Cardinales Vicecancellarium, & Mantuanum ad insignes D. Marci Ædes, in quibus lautissimo convivio exceptus, perductus est, ante discessum multas gemmas Pontifici donavit. Pauli autem II. sumtibus in Ecclesiastica ditione Borfius iter habuit.

II. Borfil pompam, ac Pontificiam erga eum Pauli II. Papæ liberalitatem memorant passim Scriptores Vitæ ipsius Pauli, inter quos Michael Canensis Viterbiensis in ejusdem Vita, quam ex ms. Codice Bibliothecæ Angelicæ apud Fratres Augustinanos desumptam pietate, doctrina, ac dignitate Vir Eminentissimus Romæ edidit anno MDCCXL. præmissis ipsius Sanctissimi Pontificis vindictis adversus Platinam, aliosque obrectatores ita inquit. Per idem tempus Borfius Ferrariæ Marchio ac Mutinæ Dux ingenti Nobilitate, & equestri Ordinis frequentia consociatus Romam ad ipsum Pontificem adventavit. Inter cetera autem supra trecentos equos forma, & ornamentis conspicuos, ac centum & eo amplius triginta mulorum impedimenta, tegumentis sericeo apparatu, ac laneis pannis miro opificio confutis, desuper extensis secum deduxit: quem Pontifex per omnem ejus ditionem summo cum honore, ac lautissime cum universa ipsius familia suscipi, aliquæ fecit, demandata ad id opera cunctis Provinciæ Quæstoribus. Adventanti autem Borfio in Agrum Romanum omnes absque delectu Cardinalium familiæ, aliorumque Ordinum Prælati, & omnis simul Romanorum Nobilitas obviam eunt. Sed Urbi jam appropinquanti circiter mille passus, Marcus Barbus Cardinalis in Titulo S. Marci, & Joannes Michael Diaconus Cardinalis tum S. Lucie, Pontificis jussu læti occurrunt, mediumque ad ipsum Pontificem, & sacrum Senatorium Ordinem honorificentissime deducunt; a quibus quidem ingenti cum jucunditate, ac benevolentia susceptus est. Tum interjectis plerisque diebus eum Ferrariæ Ducem instituit, suppresso in posterum Marchionis nomine; Ducalemque Coronam, & sericeam vestem auro undique contextam suis impensis Pontifex ei tradidit. Venationes quoque publicas in Agro Romano in ejus oblationem fieri mandavit, ubi absque alia Nobilitate pene incredibili multitu-

dine nonnulli ex sacri Senatus Patribus intervenire. Tantis autem rerum omnium elu ac potu opportunorum apparatus extitit, ut omni multitudine affatim satiata, complures reliquiarum salinæ, atque optimi vini vegetes superfuissent. Ludos insuper agonales more vetusto, adhibitis indomitis tauris, in Campo Testaceo ei splendidissime agi fecit. Ante ipsius tandem discessum, ipse, suæque omnis familia, Pontificis præstantiam liberaliter, gratissimeque habuit. Cui quidem Borfio Pontifex dignissima elargitus est munera, quæ supra octo millia aureorum pretium excedebant. Impensæ autem pro eo, atque ejus universa familia exhibita quatuordecim millia aureorum capiebant. Ipse quoque Dux plerasque gemmas, & aulicos pannos ingentis existimationis sericeo aureoque opere undique contextos Pontifici donavit. Demoratus est autem ipse Dux Borfius Romæ mensem unum, de hinc magna cum Pontificis, ac ceterorum gratia Ferrariam rediit.

III. Ex dictis huc usque judicet Lector, an recognosci Borfius possit, ejusque nobilissimus comitatus in luridis ac pannosis viris, quos exhibet Numisma Pauli II. Papæ cum hac inscriptione: AUDIENTIA PUBLICA PONT. MAX. Borfium Atestinum Marchionem Ferrariensem, quem ipse Paulus II. Pontifex Maximus Ducis Titulo insignivit, significari, sibi suavit Molinettus, qui supplex Pontificis pedes deosculatur; eundem indicari posse, seu potius Fridericum Imperatorem, qui & ipse anno MCDLXVIII. in Italiam venit voti solvendi causa, teste Cardinali Papiensi in Epistola CCCX. affirmavit Joannes Baptista Palatius. Verum nullum ex illis expressum, scite observat eruditus Philippus Bonannus in expositione ejus Numismatis, quia scilicet plures in lacera veste seminudos exhibet manibus ante pectus implexis supplicantium instar ante Pontificium Solium prostratos; indignos profecto, qui & Imperatorem, & Borfium Ducem repræsentent. Borfius enim, ut memorati superius Scriptores narrant, & inter ipsos Alphonsus Ciacinius, tanto apparatu progressus est, qualis nunquam eo Seculo visus. Venit enim DCC. fere equitibus comitatus, & ornatus serico villosa cælestini coloris, a Pontifice deinde honorificentissime exceptus, & ab eodem solemniter ac pompa Ducis Titulo insignitus, juxta perveustum Romanorum Pontificum morem, qui Regum etiam Titulo Principes, Ducesque aliquando donarunt.

IV. Fateri porro cogimur, Benedictionem Ducum non ita esse antiquam, ac illam Imperatorum, ac Regum; paulo enim serius Benedictio illa obtinuit, fuitque communis Seculo XII. uti docet Martene, Lib. II. *De antiquis Ecclesiæ ritibus*, Cap. XI. probatque ex Ordine Benedictionis Ducis Aquitanie circa finem memorati Seculi XII. conscripto ab Elia Præcentore Lemovicensi. Circa eadem tempora Joannes in Ducem Normannorum benedictus est a Walterio Rothomagensi Archiepiscopo, cujus Benedictionis meminit Chronicon Rothomagensis ad annum MCLXXXIX. & MCXCIX. apud Labbeum. Bibliothecæ novæ Tomo I. illiusque ritus ad annum ipsum MCXCIX. Matthæus Paris describit. Benedictionis vero preces in Ducum Normannorum Coronatione recitari solitas edidit Andreas Chesnæus cum antiquis rerum Normannica-

earum Historicis apud laudatum Martene loco citato, Ordine 1. de quibus dicemus nos infra in hoc eodem Titulo. Loquuntur & de eadem re alii Autores, quos infra alio loco laudabimus.

§. I.

De Missa in creatione novi Ducis, & de ritu, quo idem prius fit Miles S. Petri.

Creandus in Ducem per Summum Pontificem veniet ad Cameram Pontificis indutus Manto aureo panno contexto, aperto a dextro humero ad terram usque, & sequitur Pontificem ad Ecclesiam descendantem, portabitque caudam Pluvialis. Facta oratione ante Altare, Pontifex statim faciet Confessionem cum Celebrante; deinde ascendet ad Sedem eminentem, & recipit Cardinales ad reverentiam, non tamen imponit incensum, nec Cantores incipient Introitum; & interim creandus Dux sedet ad pedes Pontificis super primum gradum, & Celebrans osculato Altari, accedet ad suum Faldistorium, & ibi expectabit. Finita reverentia, creandus Dux accedit ad pedes genuflexus Sanctissimi Domini nostri, & fit Miles S. Petri, etiamsi prius erat Miles.

COMMENTARIUS.

I. **Q**uo olim ritu benedicerentur ab Episcopis Duces, docet eruditus Edmundus Martene, Lib. II. *De antiquis Ecclesiae ritibus*, Cap. XI. ubi inter alia describit ritum ipsum ex ms. Codice S. Stephani Lemovicensis, cujus hæc sunt verba: *Primo debet venire Episcopus indutus Pontificalibus, cum Cappa serica, & totus Chorus indutus Cappis sericis, ad maiorem januam Ecclesiae, sicut in solemnibus Processionibus cum Textu, idest cum sacro Evangelii Codice, & thuribulo, & aqua benedicta, & ibidem ante januam Ecclesiae debet Dux assistere, & datur ei ab Episcopo aqua benedicta, & induit eum Chlamide serica &c.* Sed quicquid sit de ritibus ab Episcopis in Benedictione Ducum servatis, juxta ritum a Paulo II. præscriptum in creatione novi Ducis Ferrariæ, qui fuit Borsius, de quo plura diximus supra, *creandus in Ducem per Summum Pontificem veniet ad Cameram Pontificis indutus Manto aureo panno contexto, aperto a dextro humero ad terram usque, & sequitur Pontificem ad Ecclesiam descendantem, portabitque caudam Pluvialis.* Ritus est plane antiquus, ejusque mentionem faciunt passim Cæremoniarum Apostolicarum in suis mss. Diariis, ut ubi Romæ adefsent magni Principes, Regesque, ipsi in sacris Pontificiis functionibus Pluvialis caudam deferant.

II. Ut alia omittam, notandum est illud, quod ait hic noster §. in fine: *Creandus Dux accedit ad pedes genuflexus Sanctissimi Domini nostri, & fit Miles S. Petri, etiamsi prius erat*

Miles. Milites creare, & ordinare, proprie ad Principes pertinet, qui eos cum solempni pompa, & lætitia, præcipuis festisque diebus, Cingulo militari donare solebant, ut scite observat memoratus Martene citato loco, Cap. XII. Certe quod Ecclesia abhorreat a sanguine, ideo Benedictio novi Militis in antiquis Pontificalibus Libris minime reperitur, nam quæ in fine Romani Ordinis apud Hitorpium edita habetur, extra ordinem ex recentiori aliquo Codice desumpta videtur. Imo plerique Christianæ pietatis æmuli militiam in Viro Christiano tamquam rem illicitam suspexerunt, uti constat ex illa S. Martini ad Julianum voce intrepida, cujus meminit illius Vitæ Auctor: *Christi enim sum Miles, pugnare mihi non licet.* Obtinebat tamen jam sexto fere ab hinc seculo Militum ab Episcopis Benedictio, uti constat ex Epistola Willelmi Cardinalis apud Chesnium Tomo IV. Historiæ Francorum ad quendam suum amicum ita scribentis: *Ceterum nepotem tuum, de quo affectuosissime rogasti, homini honesto, & religioso Episcopo de Salib. tradidimus, quatenus usque ad Festum S. Mariæ ipsum Militari Cingulo honoret.* Ritus, & preces in creatione novi Militis recenset inter alios ms. Pontificale Guillelmi Durandi, qui claruit Seculo XII. Quod Milites autem S. Petri attinet, de quibus mentio in hoc §. habetur, occurrunt hi passim in mss. Apostolicorum Cæremoniarum Diariis, de iisque nonnihil dicit eruditus Franciscus Mennenius in suo Opusculo, quod inscripsit, *Militarium Ordinum Origines &c.* pag. 81.

§. II.

Ordo benedicendi novum Militem, ac primo illius Ensem.

Pontifex primo stans sine Mitra benedicit Ensem, quem unus ex Acolythis nudum tenet in manu, dicens: *Ps. Adjutorium nostrum in Nomine Domini. R. Qui fecit Cælum & Terram. Ps. Domine exaudi orationem meam. R. Et clamor meus ad te veniat. Ps. Dominus vobiscum. R. Et cum spiritu tuo. Oremus.*

Exaudi quæsumus Domine preces nostras, & hanc Ensem, quo hic famulus tuus circumcingi desiderat, Majestatis tuæ dextera dignare benedicere, quatenus esse possit defensor.

defensio Ecclesiarum, viduarum, orphanorum, omniumque Deo servientium, contra sævitiam paganorum, aliisque sibi insidiantibus sit terror, & formido, præstans ei quæ in persecutionis, & justæ defensionis sint effectum. Per Christum Dominum Nostrum. Amen.

Benedic Domine Sancte Pater omnipotens æterne Deus per invocationem Sancti tui Nominis, & per adventum Christi Filii tui Domini nostri, & per donum Sancti Spiritus Paracleti, hunc Ensem; ut hic famulus tuus, qui hodierna die, eo, tua concedente pietate, præcingitur, invisibiles inimicos sub pedibus conculcet, victoriæque per omnia potitus maneat semper illæsus. Per Christum Dominum nostrum. Amen.

Deinde aspergit aquam benedictam. Tum stans sine Mitra dicit: *Benedictus Dominus Deus meus, qui docet manus meas ad prælium, & digitos meos ad bellum. Misericordia mea, & refugium meum, susceptor meus, & liberator meus, protector meus, & in ipso speravi, qui subdit populum meum sub me. Gloria Patri, & Filio &c. R. Sicut erat in principio &c. V. Salvum fac servum tuum Domine. R. Deus meus sperantem in te. V. Esto ei Domine turris fortitudinis. R. A facie inimici. V. Domine exaudi orationem meam. R. Et clamor meus ad te veniat. V. Dominus vobiscum. R. Et cum spiritu tuo. Oremus.*

Domine Sancte Pater Omnipotens Æterne Deus, qui cuncta solus ordinas, & recte disponis; qui ad coercendam malitiam reproborum, & tuendam justitiam, usum Gladii in terris hominibus tua salubri dispositione permisisti, & Militarem Ordinem ad populi protectionem institui voluisti; quique per Beatum Joannem Baptistam Militibus ad se in Deserto venientibus, ut neminem concuterent, sed propriis stipendiis contenti essent, dici fecisti: Clementiam tuam Domine suppliciter exoramus, ut sicut David puero tuo Goliath superandi largitus es facultatem, & Judam Machabæum de feritate gentium Nomen tuum non invocantium triumphare fecisti: ita & huic famulo tuo, qui noviter jugo militiæ colla supponit, pietate cælesti vires, & audaciam, ac Fidei, & justitiæ defensionem tribuas, & præstes ei Fidei, Spei, & Charitatis augmentum, & tui timorem pariter & amorem, humilitatem, perseverantiam, obedientiam, & patientiam bonam, & cuncta in eo recte disponas; ut neminem cum Gladio isto, vel alio injuste lædat, & omnia cum eo justa, & recta defendat; & sicut ipse de minori statu, ad novum militiæ promovetur honorem, ita veterem hominem deponens cum actibus suis, novum induat, ut recte retineat, & recte colat; perfidorum consortia vitet, & suam in proximum charitatem extendat. Præposito suo in omnibus recte obediat, & suum in cunctis justè officium exequatur. Per Christum Dominum nostrum. Amen.

COMMENTARIUS.

I. **D**esumpta hæc quidem sunt ex Romano Pontificali, Parte 1. ubi agitur de Benedictione novi Militis, cujus ritum jam nos fuscè explicuimus Tomo 1. Commentariorum ad ipsum Romanum Pontificale Titulo xxiii. Eadem legere est in ms. Pontificali Guillelmi Durandi, Titulo inscripto, *De Benedictione novi Militis*, apud Edmundum Martene, Lib. II. Cap. xii. *In benedictione novi Militis*, inquit laudatum Pontificale Durandi, *hoc modo proceditur. Pontifex enim, priusquam dicatur Evangelium, benedicat Ensem.* Sequitur benedictio Ensis, quæ eadem est ac illa in §. nostro præscripta, nempe: *Exaudi quæsumus Domine &c.* ex qua oratione addiscimus, finem

Ecclesiæ in ea instituenda benedictione fuisse, ut Miles Ense benedicto accinctus, esse possit defensio Ecclesiarum, viduarum, orphanorum, omniumque Deo servientium, contra sævitiam paganorum &c. Rursus quales esse debeant Milites, docet nos alia nostri hujus §. oratio, quæ incipit, *Domine Sancte Pater Omnipotens &c.* legiturque in citato Durandi Pontificali, & in aliis quoque priscis mss. Codicibus; contenti quippe debent esse stipendiis sibi assignatis, & neminem prorsus concutere, juxta S. Joannis Baptistæ admonitionem factam aliquando ad Milites sui temporis, qui ad eum audiendum in Deserto prædicantem confluebant. Sed de his jam alibi diximus.

§. III.

De impositione Gladii.

Deinde sedens cum Mitra Pontifex imponit nudum Gladium in ejus manu, dicens: *Accipe Gladium istum in Nomine Patris & Filii & Spiritus Sancti & utaris eo ad defensionem tuam, & Sanctæ Ecclesiæ Dei, & confusionem inimicorum Crucis Christi, & Fidei Christianæ, & quantum humana fragilitas tibi permiserit, cum*

eo

eo neminem injuste lædas. Quod ipse præstare dignetur, qui cum Patre, & Spiritu Sancto vivit & regnat in secula seculorum. Amen. Et reposito Gladio in vagina per eundem Militem, accingitur eodem Gladio per duos nobiliores Milites præsentem, Pontifice dicente: *Accingere Gladio tuo super femur tuum potentissime, in Nomine Patris Domini nostri Jesu Christi. Et attende, quod Sancti non in Gladio, sed per Fidem vicerunt Regna.*

C O M M E N T A R I U S.

I. **E**stat hic ritus tradendi Gladium novo Militi in ms. Pontificali Codice Vaticanæ Bibliothecæ, Num. 4744. in Pontificali Guillelmi Durandi, & in Romano Pontificali Parte 1. Tit. xxiii. In Ordine Romano apud Hitorpium hæc exhibetur formula, ubi Pontifex novum Militem accingit Gladio: *Accipe hunc Gladium cum Dei benedictione tibi collatum, in quo per virtutem Spiritus Sancti resistere, & ejicere valeas omnes inimicos tuos, & cunctos Sancta Dei Ecclesiæ adversarios, adjuvante Domino nostro Jesu Christo, qui cum Deo.* Hunc ensen quo Miles accingebatur, ab ipso met Altari sumebat Pontifex, ponebatque illum in dextera manu ipsius ex præscripto ms. Pontificalis Vaticanæ Bibliothecæ, & Guillelmi Durandi. Imponebatur Militi Ensis, præstito prius ab ipso Milite juramento de defendenda Ecclesiâ, viduisque, pupillis, ac orphanis; ad quem ritum alludens Joannes Saresberienfis Lib. vi. *Policratici*, Cap. x. ita inquit: *Inolevit consuetudo sollemnis, ut eo die, quo quisque militari Cingulo decoratur, Ecclesiam solemniter adeat, Gladioque super Altari posito, & oblato, quasi celebri professione facta, seipsum obsequio Altaris devoveat, & Gladii, id est, officii sui jugem Deo spondeat famulatum.* Quæ ipsissima verba descripserunt Helinandus Sermone 111. in Festo omnium Sanctorum, Vincentius Belluacensis, Lib. xxix. Cap. cxxx1. Nicolaus Uptonus Libro 1. *De Militari Cingulo*, Cap. xiv. & Petrus Blesensis, qui in Epistola cxiv. ita scribit: *Sed & bodie Tyrones Enses suos recipiunt de Altari, ut profiteantur se filios Ecclesiæ, atque ad honorem Sacerdotii, ad tuitionem pauperum, ad vindictam malefactorum, & Patriæ liberationem, Gladium accepisse.* Gladius quippe, quo accingebatur novus Miles, præcipuum fuit semper militaris Ordinis argumentum.

II. Iis quæ diximus ex memoratis hucusque Auctoribus mirifice suffragatur quod legitur in alio ms. Pontificali Codice Vaticanæ Bibliothecæ, Num. 4748. ubi hæc habet: *Deinde spondeat suo sacramento Militandus in manibus dicti Domini Archipresbyteri, vel Prioris dictæ Basilicæ, omnium aliarum Ecclesiarum, viduarum, pupillorum, & orphanorum esse defensor, atque in necessitatibus propugnator, & virilis adjutor. Quo facto, procedant ad Altare majus, vel si maluerit ex devotione ad Altare Confessionis B. Petri Apostoli, in quo Altari ejusdem evaginatum (Gladium) reperiant, quem Dominus Archipresbyter, si voluerit, vel dictus Prior, eidem jam*

Militi donet, dicens: Accipe Gladium desuper Beati Petri Corpore sumtum per nostras manus licet indignas, vice tamen, & auctoritate Apostolorum consecratas militariter tibi concessum, nostræque bene & ditionis officio in defensionem hujus universalis Ecclesiæ divinitus ordinatum ad vindictam malorum, laudem vero bonorum. Et memor esto, de quo Psalmista prophetavit dicens: Accingere Gladio tuo circa femur tuum potentissime; ut in hoc per eundem vim æquitatis exerceas, molem iniquitatis potenter destruas, & Sanctam Dei Ecclesiam, ejusque Fideles propugnes, ac protegas; nec minus sub Fide falsos, quam Christiani Nominis hostes excres & dispergas. Viduas, ut pollicitus es, & pupillos, & orphanos clementer adjuves, & defendas, desolata restaures, restaurata conserves; ulciscaris injusta, confirmes bene disposita; quatenus in hæc agenda, virtutum triumpho gloriosus, justitiæ cultor egregius, cum Mundi Salvatore, cujus typum geris in nomine, merearis sine fine regnare. Qui cum Deo Patre, & Spiritu Sancto &c.

III. Hactenus laudatus ms. Codex Pontificalis Bibliothecæ Vaticanæ, Num. 4748. qui usui certe fuit Romanæ Ecclesiæ, ejusque Summo Pontifici. Addit mox etiam illud quod alias legitur in Pontificali Guillelmi Durandi, & in vulgato Romano Pontificali præscriptum est, ut scilicet, ubi Pontifex accingit novo Militi Ensem, hæc verba proferat: *Accingere Gladio tuo super femur tuum potentissime; & attende, quia Sancti non in Gladio, sed per Fidem vicerunt Regna.* Aliud Pontificale ms. laudatæ Vaticanæ Bibliothecæ Num. 4744. & illud Guillelmi Durandi, diserte mandant, ut post prolatam tradendi Ensis formulam, *Ense in vagina reposito*, accingat Pontifex Militem, dicens: *Accingere Gladio tuo &c.* Ceterum notatu illud dignum est, quod docet in Historia sua Ingulfus, Gladium quidem super Altare obtulisse Militem, ejusque collo post Evangelium a Sacerdote cum benedictione fuisse impositum: *Anglorum erat consuetudo, inquit, quod qui militiæ legitime consecrandus esset... Missam auditurus, Gladium super Altare offerret, & post Evangelium Sacerdos benedictum Gladium collo Militis cum benedictione imponeret &c.* Quicquid sit de hoc ritu, ex dictis huc usque addiscere licet, ordinem a Paulo II. in creatione novi Ducis institutum, ac ritus in ea creatione servatos, jam olim ab antiquioribus Pontificalibus fuisse præscriptos, & in creatione novorum Militum adhibitos fuisse.

§. IV.

De Ense ter a Milite vibrando, & de pacis osculo eidem tradendo a Pontifice.

Novus igitur Miles Ense accinctus, illum de vagina ter vibrat nudum viriliter, & eo

fu.

super sinistrum brachium terfo, mox in vaginam recondit. Deinde Pontifex insigniens illum caractere militari, dat sibi osculum pacis, dicens: *Pax tibi*:

COMMENTARIUS.

I. **U**bi Ense Miles fuerat accinctus, ex præscripto antiqui Romani Ordinis apud Hitorpium, Clerici hæc Antiphonas decantabant: *Speciosus forma præ filiis hominum, diffusa est gratia in labiis tuis. V. Accingere Gladio tuo super femur tuum potentissime, cum Gloria. Antiphona: Specie tua, & pulchritudine tua intende, prospere procede, & regna; cum Psalmo: Propter veritatem, & mansuetudinem, & justitiam deducet te mirabiliter dextera sua. Sagitta tua acuta, populi sub te cadent, cum Gloria, & repetitione Antiphonæ, Specie tua. Tum hæc Oratio sequebatur: Omnipotens sempiterne Deus, qui famulum tuum N. eminenti mucrone circumcingi voluisti: fac illum contra cuncta adversantia ita celestibus armari prædiis, quo hic, & in ævum nullis tempestatibus bellorum turbetur, nec inimicorum hominum insidiis terreatur. Per. Ex eodem Romano Ordine tradebat Pontifex novo Militi scutum, quod prius quidem benedicebat, & post ipsius traditionem, orationem ad Deum fundebat, ut per merita Sanctorum Martyrum, & Militum Mauricii, Sebastiani, Georgii, Militi novo victoriam de hostibus suis præstaret.*

II. His omissis, ritui in nostro Cæremoniali præscripto, ac præsertim in hoc §. iv. concinit quidem, quod ante ipsius Cæremonialis editio-

nem præscripserant antiqui Codices Pontificales Vaticanæ Bibliothecæ superius laudati, Guillelmi Durandi, ac Romanus hodiernus, citato Titulo, *De Benedictione novi Militis*, in quibus edicitur, ut Ense novus Miles accinctus, illum de vagina educat, & evaginatum ter in manu viriliter vibret, & eo super brachium terfo, mox illum in vaginam reponat. Dari etiam ipsi Militi osculum pacis, antiqui ritus est, quippe cuius meminere memorati Libri Pontificales annorum ut minimum CD. uti jam dixi Tomo I. Commentariorum ad Partem I. Romani Pontificalis, Titulo XXI I. qui inscriptus est, *De Benedictione novi Militis*, in Commentario ad §. v. ubi inter alia notavi, ex ipsis Pontificalibus annorum CD. dari osculum pacis novo Militi sub hac formula: *Esse Miles pacificus, strenuus, fidelis, & Deo devotus*; ex ms. autem Pontificali Vaticano annorum D. ipsum pacis osculum tradi Militi ab Archipresbytero, vel Priore Canonico- rum Vaticanæ Basilicæ sub ista verborum formula: *Vade, & age, ut bonus Miles Christi, Beatique Petri celestis Regni clavigeri. R. Amen.* Occurrit hæc eadem formula in variis mss. Cæremoniariorum Apostolicorum Diariis, ubi ritum creandi Militem S. Petri enarrant. Sane, plura de Militibus S. Petri videri possunt apud Cohellium in Notitia Cardinalatus, Cap. xxx.

§. V.

De terna Militis percussione cum ipso Gladio, & alapa ei danda.

Tum accipiens illius Ensem nudum, ter Militem percutit plane super spatulas, dicens: *Esse Miles pacificus, strenuus, fidelis, & Deo devotus*; & mox dat sibi leniter alapam, dicens: *Exciteris a somno malitiæ, & vigila in Fide Christi, & fama laudabili.*

COMMENTARIUS.

I. **Q**uod ternam ipsam Militis percussio- nem, & alapam ei impigendam spectat, notandum illud hic primo est, fieri passim eorum rituum mentionem in citatis superius Pontificalibus, & apud Scriptores mediæ ævi, a quibus etiam alapa ipsa Militaris dicitur ictus, qui Tyronis ad Militarem dignitatem promovendi collo, aut humeris Ense, vel Gladio, quo Miles fiebat, infligebatur, uti addiscimus ex magno Chronico Belgico ad annum MCCXLVII. cujus hæc sunt verba: *Plerique Milites moderni temporis patrimoniis intendentes, omissis sumtuosis solemnitatibus, saltem per impactum colaphum, Militarem consequuntur dignitatem.* Apud Lambertum Ardensensem expresse dicitur, in novi Militis inauguratione inter alios ritus alapam collo ejus fuisse inflictam; *Fidem Comiti in signum Militiæ Gladium lateri, & calcaria sui Militis aptavit, & alapam collo ejus inflixit.* Id quod alio etiam loco Auctor ipse laudatus repetit.

II. Agit & de hujusmodi alapa inter alios

Auctores Joannes de Beka in Ottone III. Episcopo Trajectensi, ubi refert Militarem inaugurationem Willelmi Comitis Hollandiæ in Regem Romanorum electi, qui in Æde Colonia Urbis præcipua, militari Cingulo accinctus est anno MCCXLVII. ubi ita inquit: *Illis itaque dictis, Rex Bohemia grandem dedit ictum in collo Tyronis, ita dicens*: Ad honorem Dei Omnipotentis te Militem ordino, ac in nostro Collegio te gratanter accipio, sed memento, quoniam Salvator mundi coram Anna Pontifice pro te colaphizatus, & illusus, coram Pilato Præside, & flagellis cæsus, ac spinis coronatus, coram Hærode Rege vestitus chlamide, & coram omni populo nudus, & vulneratus in Cruce suspensus est, cujus opprobria meminisse te suadeo, cujus Crucem acceptare te consulo, cujus mortem ulcisci te moneo. Hactenus laudatus Auctor. Ceterum antiquus hic ritus dandi alapam novo Militi concinit cæremoniæ illi pariter antiquæ, quæ hodieque servatur in Confirmationis Sacramento in quo recens confirmatum leviter in maxilla cædit

dicit Episcopus, dicens: *Pax tecum*; de quo ritu videri & possunt quæ diximus nos citato Tomo I. in primam partem Romani Pontificalis, Titulo I. in Commentario ad §. xv.

III. Quod hunc præsentem nostrum §. spectat, præter memoratas verborum formulas in alapa Militi infligenda usitatas, notanda hic insuper est formula illa, quam legimus in Historia Cortusiorum Lib. XI. Cap. II. *Imperator . . . sedens in equo fecit* (Franciscum de Carraria) *Militem, & cum palma eum percutiens super collum*

ait: Esto bonus Miles, & fidelis Imperii. Affert & alia hanc in rem veterum loca eruditissimus Dufresne in suo Glossario, verbo, *Alapa militaris*; ex iisque colligit, errasse Duchesnium in Notis ad Alanum, qui putavit, ejusmodi alapas militares manu, non Gladio in collum Tyronis impactas. Quicquid sit, ex nostro §. uterque ritus præscriptus est, & percussione cum Gladio nudo super spatulas Militis, & inflexione levis alapæ in illius scilicet maxilla; de quo ritu jam & alio loco nos diximus.

§. VI.

De calcarum impositione.

Tunc Nobiles assistentes imponunt sibi calcaria, & Cantores, sive Pontifex, si magis placet, dicit Antiphonam: *Speciosus forma præ filiis hominum, accingere Gladio tuo super femur tuum potentissime*. Deinde dicit Pontifex versiculum: *Dominus vobiscum*. R. *Et cum spiritu tuo*. Oremus.

Omnipotens sempiterne Deus super hunc famulum tuum N. qui hoc eminenti mucrone circumcingi desiderat, gratiam tuæ benedictionis infunde, & cum dextræ tuæ virtute fretum, fac contra cuncta adversantia cælestibus armari præfidiis, quo nullis in hoc seculo tempestatibus bellorum turbetur. Per Christum Dominum nostrum. Amen.

COMMENTARIUS.

I. **R**itus imponendi calcaria novo Militi, & quidem post impactam ei leviter in maxilla alapam, mentionem faciunt Pontificales ms. Codices Guillelmi Durandi, & Vaticanæ Bibliothecæ Num. 4744. in quibus ita legimus: *Et mox dat*, Pontifex scilicet, *ei*, idest Militi, *alapam leviter, dicens*: Exciteris a somno malitiæ &c. *Tunc Nobiles adstantes imponunt sibi*, nempe Militi, *calcaria, ubi hoc fieri mos est, & cantatur Antiphona &c.* Ex alterius ms. Pontificalis ejusdem Bibliothecæ Num. 4748. præscripto, ubi alias nulla fit mentio de danda Militi alapa, recipiebat quidem Romæ ipse novus Miles de manu alicujus antiqui Militis adstantis calcaria deaurata super gradus Basilicæ S. Petri. Propria fuisse Militum calcaria aurea, seu deaurata, eorumque pedibus aptari consuevisse, quum armis accingebantur, docent passim Latini Scriptores. Joannes Monachus Majoris-Monasterii de Gaufridi Ducis Normanniæ militia agens, *calcaribus*, inquit, *aureis pedes ejus adstricti sunt*. In Historia Caroli VI. de Ludovici II. Regis Siciliæ, & Caroli fratris militis dicitur, quod eos accinxit *balthreo militari, & per Dominum de Chauvigniaco calcaribus deauratis jussit Rex Carolus insigniri*. Ita fuisse veterum Francorum

calcaria, Auctor est Joannes Puricellus in monumentis Ambrosianæ Mediolanensis, pag. 71. ubi tumulum detectum & apertum Bernardi Regis Italiæ, Pipini filii describit. Porro, quod ipsa calcaria amputari solerent Militibus, quum ipsi degradabantur, testis est Thomas Walsinghamus, ubi agit de Andrea de Harclei Comite Carlileni exauthorato, & propter læsæ Majestatis crimen suspenso: *Primo degradatus est, amputatis securi ad talos suos calcaribus, & sic vicissim discinctus est balthreo militari*.

II. Quod orationem spectat, quæ in hoc nostro §. legitur post calcarum impositionem, legitur plane & ipsa una cum antiphona, quæ ipsam orationem præcedit, in edito Romano Pontificali, Parte I. Titulo XXIII. §. VI. juxta editionem ipsius Pontificalis, quod nos Commentariis jam illustravimus, itemque legitur in Pontificali Guillelmi Durandi, & in aliis Pontificalibus Codicibus Vaticanis. Est illa plane antiqua, extatque in ms. Codice Valicellano annorum ut minimum DCCC. contractius tamen hunc in modum: *Omnipotens sempiterne Deus, qui famulum tuum N. eminenti mucrone circumcingi jussisti: fac illum contra cuncta adversantia, ita cælestibus armari præfidiis, quo nullis hic, & in ævum tempestatibus bellorum turbetur*.

§. VII.

De Missa, ac juramento in creatione Ducis.

Finita oratione, novus Miles osculatur pedem Papæ; tum surgit, deponit Ensem, & calcaria, & redit ad sedendum ubi prius. Cantores incipiunt Introitum. Incensatur Altare, & procedit in Missa usque ad cantatum Graduale; quod dum cantatur, futurus Dux ducitur ante Pontificem, ubi genuflexus præstabit juramentum: *Ego N. annuente Domino futurus Dux promitto, spondeo, polliceor, atque juro coram Deo, & Beato*

Beato Petro Apostolorum Principe, me de cetero reverentiam, & obedientiam servaturum, etiam si alias obligatus sum, Sacrosanctæ & Apostolicæ Ecclesiæ, & Vobis Domino meo, Domina N. divina providentia Summo Pontifici, & Successoribus vestris Canonice intransibus, nec deficiam in omnibus necessitatibus vestris, & utilitatibus juxta (1) posse meum, & quantum potero, divina auxilio fultus, pura & bona fide custodiendo etiam & conservando omnes possessiones, terras, loca, honores, jurisdictiones, & jura vestra, & Sanctæ Romanæ Ecclesiæ in omnibus, & per omnia, & propter honorem, & reverentiam Ducalem, quam hodie a Vobis recepturus sum, etiam promitto in recognitione tantæ susceptæ gratiæ pro me, & Successoribus meis, perpetuo dare Vobis, & Successoribus vestris, singulis annis in die Festivitatibus Beatorum Apostolorum Petri & Pauli unum palafrenum album bene & decenter ornatum. Sic me Deus adjuvet, & hæc Sancta Dei Evangelia.

COMMENTARIUS.

I. **C**onstat ex varlis Pontificalibus Libris, atque ex illis, qui Historias scripserunt, consuevisse in novorum Militum Benedictione, seu creatione, juramentum ab ipsis præstari. Patet id quidem ex dictis huc usque, ac præsertim ex recitatis superius Joannis Sarisberienfis, & Petri Blesensis testimoniis. Quod formulam juramenti spectat in hoc §. descriptam, quod novus Dux in sua ipsius creatione exhibere debet Summo Pontifici, desumpta profecto est ipsa formula ab antiquis juramenti formulis, de quibus alias abunde diximus. Porro teste Matthæo Parisio ad annum mxcix. ubi enarrat ritus servatos in benedictione in Ducem Normannorum peracta a Walterio Rothomagensi Archiepiscopo, Dux coram Clero, & populo juravit super Reliquias Sanctorum, & super Evangelia sacrosancta, quod ipse Sanctam Ecclesiam, & ejus dignitates sine malo ingenio defenderet, & ordinatos honoraret. Juravit etiam, quod leges iniquas, si quæ essent, destrueret, & bonas subrogaret. Ex ms. Codice S. Stephani Lemovicensis, apud eruditum Martene, Lib. II. *De antiquis Ecclesiæ Ritibus*, Cap. xi. Ordine 1. qui benedicebatur in Lemovicensium Ducem, debebat vovere, & sub juramento promittere, se pro posse suo conservaturum, & defensurum jura Lemovicensis Ecclesiæ. Inter alios ritus ad benedicendum Ducem servatos, celebrationis etiam Missæ meminit quidem prædictus ms. Codex, ubi inter alia edicitur, ut præstito juramento, Dux redeat in Chorum, & Præcentor collocet eum in Sede Decani, & audiat Missam cum devotione, in qua dicet Episcopus hæc orationes &c.

II. Nihil frequentius in mss. Diariis veterum Apostolicorum Cæremoniariarum, ac præsertim Joannis Burchardi, & Paridis Grassi occurrit, quam creatio novorum Militum a Romanis Pontificibus facta. Missæ in ea actione celebratæ meminit Grassus in ms. Diario ubi enarrat gesta Leonis Papæ X. anno mdxiii. Die

Dominica III. Julii, inquit, Sanctissimus Dominus noster creavit unum Militem, qui erat Julius Pompei de Vitellis Perusini, & non donavit ei aliquid, quia sic ipsemet petiit a Papa nihil velle, & deinde die Luna sequenti, quæ fuit quarta, creavit alium, qui fuit Dominus N. de Burgeriis, Senensem, ac etiam, ut dicunt, creavit eum Senatorem Urbis futurum, & huic donavit characterem, & torquem satis notabilem, & hujusmodi Militum creatio per Pontificem semper fuit facta in Capella minori, audita parva Missa, aut magna, secundum quod congruebat; & quisque Miles semper donavit nobis ducatos decem auri, si non plures, & Mazzariis quandoque duos, quandoque tres, aut ad summum ducatos quatuor, & nullis aliis Officialibus nunquam datum est aliquid. Rursus, ut alias Militum creationes omittam, ait Grassus eodem anno mdxiii. Leonem ipsum Papam X. creavisse in parva sua Capella quinque Milites, videlicet primo duos Ravennates Dominos, & tres Mantuanos, videlicet duos Oratores, qui præstiterant obedientiam, & alium concivem. Nulli horum quinque Papam aliquid donasse, nec signum, nec torquem, excusantem se, quod non esset paratus, idem Grassus testatur, qui statim mox, quod rei suæ erat, hæc subdit: Hi autem quinque donarunt nobis decem ducatos singuli, & ne nos deciperent, ut multorum mos est, accepimus torques ex collo eorum pro pignore.

III. Notatis his obiter, creationem Militum S. Petri Romæ jam olim peragi a Summis Pontificibus consuevisse, ex dictis superius patet. Fuerunt autem varia hujusmodi Militum genera, testisque inter alios est Oldoinus in Additionibus ad Ciaconium in Vita Leonis X. hunc scilicet Pontificem, ne administratione thesauri aluminis apud Forum Glodii Tulpha nuncupatum, sedente Pio II. inventi fraus aliqua committeretur, Collegium certorum hominum, qui Milites S. Petri dicerentur, instituisse, & erexisse, quibus ea potissimum cura demandata est.

§. VIII.

De Litania & orationibus in creatione Ducis.

Præstito juramento, Pontifex descendit ad Faldistorium, & procumbit super illud ante Altare cum Mitra. Dux futurus prosternit se ad sinistram Papæ aliquantulum supra-

(1) Ita in editione Romana, in Veneta vero 1. & Colonienfi legitur, *juxta vires meas*.

scabellum viride. Subdiaconus vero Apostolicus facit Litaniam, cæteris cum Choro respondentibus, *Kyrie eleison &c.* Ubi autem dixerit: *Ut obsequium servitutis &c.* & replicatum fuerit, surgit Pontifex, & signans super Ducem, alte dicit: *Ut hunc famulum tuum in Ducem eligere digneris, te rogamus audi nos.* Et iterum: *Ut hunc famulum tuum benedicere digneris, te rogamus audi nos.* Et tertio: *Ut hunc famulum tuum ad Ducale fastigium perducere digneris, te rogamus audi nos.* Et semper Chorus respondet replicando. Recumbit deinde iterum Pontifex, & Subdiaconus, atque alii finiunt Litaniam. Qua finita, Papa revertitur ad Sedem eminentem, & futuro Duce permanente prostrato, Papa, deposita Mitra, stans dicit super eum: *Pater noster.* Deinde: *Et ne nos inducas &c.* *V. Salvum fac servum tuum.* *R. Deus meus sperantem in te.* *V. Eslo ei Domine turris fortitudinis.* *R. A facie inimici.* *V. Nihil proficiat inimicus in eo.* *R. Et filius iniquitatis non apponat nocere ei.* *V. Domine exaudi orationem meam.* *R. Et clamor meus ad te veniat.* *V. Dominus vobiscum.* *R. Et cum spiritu tuo.* Oremus.

Pratende quæsumus famulo tuo N. Duci dexteram celestis auxilii, ut te toto corde perquirat, & quæ digne postulat, consequi mereatur.

Actiones nostras quæsumus Domine aspirando præveni, & adjuvando prosequere, ut cuncta nostra oratio, & operatio a te semper incipiat, & per te capta finiatur. Per Christum Dominum nostrum. Amen.

COMMENTARIUS.

I. **D**esumptus hic ritus est ex antiquo benedicendi Regem ritu, uti videre est nostro i. Tomo Romani Pontificalis, Titulo xx. qui inscriptus est, *De Benedictione & Coronatione Regis*, in Commentario ad §. vi. ubi non Litaniam modo, sed & earundum precum, atque orationum in hoc nostro §. descriptarum fit mentio. Ritus itaque in hac Ducis Benedictione a Paulo II. adhibiti, antiqui sunt, non tunc temporis adinventi, sed ab antiquioribus Pontificalibus accepti; prolixæque referuntur in celebri Epistola, quam supra memoratus Borsius de ea re scripsit, quamque mihi

obtinuit Vir Clarissimus Josephus Antonius Scalabrinius Canonicus inclytæ Cathedralis Ferrariensis ab humanissimo Viro Ferrante Borsetto a secretis Magistratus Ferrariensis, & Archivi Custode. Certe rem gratissimam Litterariæ Reipublicæ fecissem, si ipsam Epistolam tametsi vulgari Idiomate exaratam ad calcem hujus Capituli ad majorem ipsius explicationem descripsissem. Sed facultatulae meæ tantæ non sunt, ut me majore impensa ob novi hujus Operis editionem onerem. Neque enim decet, ut Auctoribus quibusdam contigit, Libros disperdere, ut fieri satis typographo possit.

§. IX.

De Bireti, seu Ducalis capitis ornamenti impositione.

Sedebit deinde Pontifex cum Mitra, & Dux futurus ducetur ad ejus pedes; & tunc Pontifex accipiens Ducale Biretum, imponit ejus capiti ante se genuflexi, dicens: *Accipe insigne Ducalis præminentiae, quod per nos capiti tuo imponitur. In Nomine Patris & Filii & Spiritus Sancti, Amen; & intelligas te amodo ad defensionem Fidei, Sacrosanctæ Ecclesiæ, viduarum, pupillorum, & quarumcumque aliarum miserabilium personarum fore debitorem, velisque deinceps utilis esse executor, perspicuusque dominator coram Domino, & inter gloriosos Athletas virtutum merito ornatus appareas: quam gratiam tibi concedere dignetur Dominus noster Jesus Christus. Qui cum Patre & Spiritu Sancto vivit & regnat in secula seculorum. Amen.*

COMMENTARIUS.

I. **B**iretum, seu Birretum, ut docet Dufresne in suo Glossario, capitis tegmen est, lineum, tenue, strictum, forma ipsius capitis, Pontificumque proprium fuit, probatque variis veterum testimoniis. Eodem teste Auctore, fuit etiam Biretum, Doctorum insigne, ejusque meminit Nicolaus de Clemangis in Libro, *De Studio Theologico*, ubi ita inquit: *Non Cappa quippe doctorem facit, non Birreti magistralis impositio, non Cathedra sublimior, aut* To. I.

locus superior. Pluribus jam ab hinc seculis invaluit mos, ut cujusvis ordinis Clerici in sacris functionibus Bireto utantur, quod quidem, ut notat Grancolas in Breviarium Romanum. Cap. XLVII. ab origine rotundum erat, & laeum, adinstar ingentis galericuli. Hoc deinde Biretum cum digitis assidue apprehenderetur, sensim cornua quædam, seu angulos adeptum est, qui cum tres essent, in Gallia ut majorem symetriad nancisceretur, additus est quartus,

K x

tus, & ita e rotundo quadratus evasit, in Gallia scilicet, nam alias in nostra Italia, aliisque in locis passim Biretum ipsum sacrorum hominum tres habet angulos.

II. Notandum vero hic illud est, Biretum in nostro hoc §. nihil aliud esse, quam Insigne Ducale, quod in antiquis Codicibus, & apud veteres Scriptores *Circulus aureus* appellatur, eratque Coronæ simplicioris species, quæ Patriciatus Insigne erat apud Romanos sub Imperatoribus Occidentalibus, uti addiscimus ex Leone Ostiensi, qui Lib. II. Chronici Casinensis, Cap. LXXIX, hæc habet: *Eidem Henrico IV. Patriciatus honorem Romani contribuant, eumque præter Imperialem Coronam, aureo Circulo uti decernunt.* In eodem Casinensi Chronico Lib. IV. Cap. CXIX. Petrus Diaconus de Lothario Imperatore loquens, sic ad rem inquit: *Ipse vero in Civitate Coronam Circuli Patricialis accepturus remansit.* Notabile est autem, quod ad rem ipsam scibit in sua Historia Rerum Laudensium Acerbus Morena pagina 117. de Friderico I. Imperatore, his verbis: *Sequenti igitur proximo die Dominico prædictus Papa Paschalis cum suis Cardinalibus in ipsa Ecclesia S. Petri Missam honorifice, & cum magno gaudio celebravit, ipsoque die in capite Imperatori Circulum aureum tantummodo imposuit. Sequenti vero die Martis, in quo fuit Festum S. Petri ad Vincula, prædictus Dominus Papa Paschalis Dominum Fridericum Imperatorem, & Serenissimam Augustam Beatricem conjugem suam ex Coronis auro purissimo, & multis pretiosissimis gemmis decoratis coronavit in ipsa Ecclesia S. Petri.*

III. Circulum etiam, non Coronam Regibus tribuit Chronicon Montis-Sereni anno MCXXXIV. ubi de Lothario II. Imperatore agit: *Imperator, inquit, celebrat Pascha Halverstat, ubi quidam de Principibus Danorum Magnus nomine, hominum ei faciens, Regnum Dania ab ipso suscepit, & postquam præstitit juramentum Imperatori ad Ecclesiam procedenti, Circulo decoratus aureo, Gladium præportavit.* Rursus anno Christi MCLII. ut idem testatur Chronicon, Imperator Fridericus I. dictus Ænobarbus, proximum Pentecoste Merseburg celebrans, *Sueno Regi Dacia Circulum Regium concessit.* Et anno MCLVIII. *Dux Bohemiæ concessit sibi ab Imperatore Circulo*

nominatur. De quo Ducum Bohemiæ Circulo Wladislao Duci a Friderico Imperatore indulto multa commentatur Bohuslaus Balbinus in Epitome Rerum Bohemicarum Lib. III. Cap. x. & alibi. Ceterum, ut alia ejusdem rei vetera monumenta omittam, quibus dicitur, Circulum aureum concessum ab Imperatore Regibus, Ducibusque, constat plane ex ms. Codice S. Stephani Lemovicensis, ubi agitur de Ordine ad benedicendum Ducem, apud eruditum Martene Lib. II. *De antiquis Ecclesiæ ritibus*, Cap. XI. Ordine 1. inter alios ritus in ipsa Ducum Benedictione servatos, quam scilicet solemnem cum pompa Episcopus peragebat, recenseri Circuli aurei impositionem, quam Episcopus ipse capiti Ducis faciebat, hanc dicens Orationem: *Omnipotens sempiterne Deus, qui famulum tuum Ducatus honore dignatus es sublimare, tribue ei quesumus, ut ita in hujus seculi cursu Subditos in communem salutem disponat, quatenus a tua veritatis tramite non recedat. Per Dominum nostrum &c.*

IV. Quod formulam spectat in hoc nostro §. præscriptam in Bireti Ducalis impositione, desumpta videtur ex formula ipsa, quæ in impositione Regiæ Coronæ adhibetur in Regum Benedictione juxta præscriptum Pontificalis Romani, uti videre est Parte 1. ejusdem Pontificalis, Titulo xx. §. XI. in quem nos jam plura adnotavimus. Videri etiam potest quod de Coronis Ducum, & Comitum scripsit Dufresne in suo Glossario, verbo, *Coronæ Ducum &c.* & verbo, *Circulus aureus*, ubi inter alia notat, aureis ipsis Circulis, non vero Coronis, usas etiam fuisse aliquando Augustas apud Occidentales, probatque ex testimonio Arnoldi Lubecensis, qui Lib. VI. Cap. II. de uxore Philippi Suevi Imperatoris hæc habet: *Ibi quoque Regina Regio Diademate non tamen coronata, sed Circulata processit.* Varia id genus exempla occurrunt & apud alios Scriptores medii & infimi ævi, quorum loca, in quibus de eadem re fit mentio, supervacaneum putavi in hoc Commentario describere. Videri autem possunt quæ de ipso Circulo aureo notavit eruditissimus laudatus Dufresne in suo mediæ & infimæ Latinitatis Glossario, ubi etiam fuscæ & alias voces enarrat, quæ in hoc Capite occurrunt.

§. X.

De Sceptri traditione.

Post hæc immediate dat sibi Sceptrum in manu dextra, dicens: *Accipe Virgam directionis, & justitiæ. In Nomine Patris & Filii & Spiritus Sancti, Amen.* Per quam valeas unicuique secundum merita sua tribuere, sive boni fuerint, sive mali, semper Deum ante oculos habens, non declinans a dextris, vel a sinistris; sed cum omni bonitate, & charitate bonos foveas, malos coerceas; ut omnes intelligant, & sciant, te justitiam dilexisse, & iniquitatem odio habuisse: quam gratiam tibi concedere dignetur, qui est benedictus in secula seculorum. Amen. Et mox cum Bireto, & Sceptro, osculatur pedem Pontificis; qui deinde surgens sine Mitra, dicet super novum Ducem adhuc genuflectentem cum suo habitu hanc Orationem. *Deus Pater æternæ gloriæ sis adjutor tuus, & Protector tuus, & Omnipotens benedicat tibi: preces tuas in cunctis exaudiat, & vitam tuam longitudine dierum adimpleat: statum domini tui jugiter firmet; & gentem, populumque tuum in æternum conservet, & inimicos tuos confusione induat, ut super te sanctificatio Christi floreat,*
ut

ut qui tibi tribuit in terris dominium, ipse in Caelis conferat præmium. Qui vivit, & regnat per omnia secula seculorum. Amen.

COMMENTARIUS.

I. **P**ost impositum capiti Ducis Biretum, traditur in dextera ejus manu Sceptrum, cujus tamen nulla fit mentio in ms. Codice S. Stephani Lemovicensis, cujus Ordo ad benedicendum Ducem ab Elia Præcentore S. Stephani digestus est, prout ab honorabilibus, & providis Viris, qui noverant, acceperat, ut idem Codex ms. docet. Vivebat autem Elias sub finem Seculi XII. aut ineunte Seculo XIII. ut notat Martene ad ipsum Ordinem, quem refert Lib. II. *De antiquis Ecclesiæ ritibus*, Cap. XI. ad calcem Ordinis x. qui desumptus est ex ipso ms. Codice S. Stephani Lemovicensis. Porro Sceptrum est Regale Insigne, de quo fuse diximus Tomo I. Romani Pontificalis, Titulo xx.

in Commentario ad §. XII. Plura de Sceptro videri possunt apud eruditum Dufresne in suo mediæ & infimæ Latinitatis Glossario, ubi inter alia docet, Sceptro etiam significari auctoritatem ipsam, cujus Sceptrum insigne est. Porro traditum fuisse Borfio Duci Sceptrum, seu Virgam sub verborum formula in §. nostro descripta, docet Borfius ipse in citata superius Epistola, quam de sua ad Ducalem dignitatem promotione scripsit. Teste insuper laudato Borfio, post illam Orationem, quæ incipit, *Deus Patet aterna gloria*, Papa ipsi Borfio pulcherrimum torquem imposuit ad collum, quem eidem una cum Manto donavit valoris mille ducatorum.

§. XI.

De prosecutione Missæ, & oblatione Ducis ad Offertorium.

Surgit deinde novus Dux, & fociatus per duos juniores Diaconos Cardinales ducitur in locum suum ad sedendum, idest, inter duos ultimos Diaconos Cardinales. Quod recipiatur ad osculum a Cardinalibus, non videtur convenire, cum non sit ex ordine illorum, neque par. His finitis, proceditur in Missa usque ad Offertorium; & tunc novus Dux deposito Bireto accedet ad pedes Pontificis, & offert aurum, quantum voluerit, & recipietur ad osculum pedis, manus, & oris, & mox revertetur ad locum suum; & finita Missa procedet inter ipsos juniores Diaconos Cardinales.

COMMENTARIUS.

I. **R**itus celebrandæ Missæ in Benedictione novi Ducis antiquus plane est, ejusque meminit laudatus superius ms. Codex S. Stephani Lemovicensis ab Elia Præcentore S. Stephani digestus sub finem Seculi XII. vel ineunte Seculo XIII. Dictam fuisse Missam in Benedictione Borfii Ducis Ferrariæ, quem creavit Paulus II. Pontifex, testem habemus Borfium ipsum in memorata sua epistola, ubi

etiam inquit, factam tunc ab ipso fuisse oblationem, de qua loquitur hic noster §. aliasque caeremonias recenset, quæ tunc in ipsa Missa, & deinde post Missam observatæ fuere. Ait inter alia Borfius, magnam tunc fuisse populi multitudinem in Basilica Vaticana, eique tunc ostensum fuisse sanctissimum Sudarium, & datam ab ipso Summo Pontifice Paulo II. Pontificalem benedictionem.

§. XII.

Quæ servantur in Duce minoris potentia.

Et hæc quidem servantur, ut supra dictum est, si Dux est, & magnæ nobilitatis, & potentia, ut fuit tempore Domini Pauli Papæ Secundi Borfius Ferrariæ. Si vero esset mediocris potentia, ut fuit tempore Domini Sixti Papæ Quarti Fridericus Dux Urbini, omnia servarentur, nisi quod non duceretur a Cardinalibus, sed a duobus Assistentibus Papæ principalibus, & federet ultimus post omnes Cardinales. Quod si adhuc esset inferior, tunc omnia alia servarentur, nisi quod non daretur ei Sceptrum, neque federet in banco Cardinalium, sed ad pedes Papæ in supremo gradu, & eundo incederet ante Crucem post Oratores, & alios Principes.

COMMENTARIUS.

I. **E**xplicuimus jam supra ritum, quem in creatione novi Ducis instituit Paulus Papa II. ubi Borfium Ducem Ferrariæ magnæ nobilitatis, & potentia Principem bene-

dixit. Agitur nunc in hoc præfenti §. de ritu servato a Sixto IV. in creatione Friderici Ducis Urbini, quem vocat Principem *mediocris potentia*. Neque enim iidem honores exhibendi sunt

K k 2

sunt omnibus Ducibus, Principibusque, sed attendenda semper eorum summa, vel minor potentia, fuitque hic semper Romanæ Ecclesiæ mos, ut ampliori honore Imperatores coleret, quam Reges, uti ex dictis in superioribus Commentariis constat. Porro laudatus Pontifex Sixtus IV. ut erat magni animi Vir, ut aliquot in Umbria Tyrannos tumultuantes, & adversus Ecclesiam magis quam Beneficiarios deceret, contumaces tollere cupiens, magno coactio exercitu Fridericum ipsum Feltrium ex Comite Urbini jam Ducem creatum tum absentem militiæ Imperatorem præfecit, Julianumque S. Petri ad Vincula Cardinalem Legatum creavit, qui quidem, Friderico Duce non expectato, Tudertinos primum, & deinde Spoletinos Pontifici rebelles adortus

est; quos, Camertium Duce opitulante, sedatis intestinis discordiis, factiosorumque principibus in exilium pulsus non sine magna Spoletinorum strage, in Ecclesiæ Romanæ fide continuit. Movit deinde arma in Nicolaum Vitellium Regulum Typhernatem, auditoque is Friderici Urbini Ducis adventu, Urbem Legato ea conditione dedit, ut sibi in ea liceret tuto privati hominis vitam agere, & Ducis fretus amicitia, cavet sibi, ut accepto a Pontifice, quanti bona vendi possent pretio, exularet quo vellet. Rem narrat Ciaconius in Vita Sixti IV. viderique alii Auctores possunt, præsertim Auctor memoriarum Historicarum Italico idiomate exaratarum, in quibus refertur, ut tandem Urbini Ducatus fuerit ad Apostolicam Sedem devolutus.

C A P U T II.

Ordo servandus in Benedictione, & investitura novi almae Urbis Præfecti a Sixto Quarto institutus.

I. **P**ræfectus Urbis Romæ ab Augusto restitutus potius, quam inventus est, ut ex Tacito Libro vi. Annalium docet eruditus Pitiscus in suo Lexico Romanarum antiquitatum, ubi etiam allato Dionis testimonio ait, institutum fuisse a memorato Augusto ipsum Præfectum Mæcenatis consilio: *Præfectus etiam Urbis*, inquit Dio, *ex primariis Viris quidam creandus est, qui omnes Magistratus, quos geri ante hunc convenit, gesserit; non ut per absentiam Consulum Rempublicam administret, sed ut cum reliquis in rebus Urbi præsit, tum causas quoque eas, in quibus ab omnibus indicatis Magistratibus appellare licet, itemque capitales, iis exceptis, quas post dicam, in Urbe, ac extra eam dijudicet*, pro centum scilicet passuum millibus, ut patet ex Lege i. §. iv. ff. *De Officio Præfecti Urbis*; ubi hæ partes ab Ulpiano procuratori ipsius attributæ sunt. Primo scilicet ut servorum de dominis querelas, vicissimque horum in illos criminationes audiret. II. ut patronis de libertis ingratis querentibus jus diceret. III. ut de Tutorum, Curatorumve criminibus cognosceret. IV. ut numulariorum, argentariorumque fraudes coerceret. V. ut carnis curam gereret. VI. ut quietem in populo procuraret, & illicita puniret, VII. ut spectaculorum disciplinæ præfesset. VIII. denique ut quicquid non modo intra Urbem, verum etiam intra centesimum ab Urbe lapidem commissum esset animadverteret, sicut & Urbe, & Italia interdici potestatem haberet, itemque in insulam deportandi, uti constat ex Lege vi. ff. *De Interdictis*. Porro ut ex priscis recentioribusque Auctoribus docet idem Pitiscus, omnibus Magistratibus Feriis Latinis in Albanum Montem proficiscentibus, ne Urbs sine Magistratu foret, ac ut petentibus jus dici posset, Præfectus Urbis introductus est, simulacro quasi quodam, & imagine illius creationis, quæ fiebat ab initio propter Magistratum ab Urbe in Provincias protectionem belli gerendi causa.

II. Plura scitu digna de Præfecto Urbis, ejusque muniis videri possunt apud eruditissimos Romanarum antiquitatum Scriptores, præsertim vero apud Virum undequaque doctissimum, conterraneum meum Vincentium Gravinam in celeberrimo Opere, *De origine Juris*. Sane

quicquid sit de ipsis Præfectis tempore Romanæ Reipublicæ, & primis nostræ Christianæ Religionis seculis, varia fuit variis temporibus illorum fortuna. Ut enim notat Ciaconius in Vita Joannis XIII. qui electus Pontifex fuit anno Domini dcccclxv. *Petrus Præfectus Urbis, Consul, Tribuneque plebis, qui Decarchontes dicebantur, opes suas ab Othone fractas acerbè ferentes, varia moliri instituerunt ad libertatem suam recuperandam, & potentiam Pontificis, quæ Othonis favore creverat, infringendam, in primis autem Joannem ipsum antiqui exempli Pontificem, cum conatibus eorum se adversarium ostendisset, vetere instituto, comprehenderunt, ac nihil de sententia remittentem Urbe depulerunt, Rosfredo Comite ex campania summæ potentia Viro in auxilium advocato*. Constant hæc quidem ex Reginonis Continuatore, & ex Baronio ad ipsum annum dcccclxv. atque ex aliis etiam Auctoribus, post quos idem Ciaconius tradit, laudatum Othonem, ut importunam Romanorum audaciam insigni aliquo edito severitatis exemplo in posterum coerceret, Romam progressum post Natalitios dies judicio de Ecclesiæ turbatoribus constituto, severe animadvertisse in omnes. Ergo Consules fuerunt tunc Italia pulsi, Tribuni, qui Decarchontes appellabantur, suspendio enecati: Petrus vero Præfectus Urbis malorum omnium fons, & origo vestibus exutus, atque utre redimitus, per frequentiora Urbis loca asino ad ludibrium aversus circumvehitur, ac demum virgis cæsus, macerandus tetro carceri traditur, & post in Germaniam exul victus mittitur.

III. Eodem teste Ciaconio, sunt qui scribunt, Petrum ipsum excarnificandum abrafa barba, capillis suspensum, ad caput equi Constantiniani aliquandiu stetisse, ut ejus exemplo talia facinora malefici declinarent; inde autem ablatum, asinoque superimpositum, verso ad clunes vultu, & manibus sub cauda ligatis, atque ita per Urbem ductum, & virgis cæsum fere usque ad interitum fuisse. Rosfredi cadaver, & ejusdem filii ex sepulcro extracta, passim sunt dissipata, Pandulpho Principe Capuano auctore, ad quem Joannes ipse Pontifex Roma pulsus Capuam venerat, ibique a Pandulpho honorifice exceptus, illius precibus, *tunc primum in eadem Civitate Archiepiscopatum constituit*, ut ait Leo Ostiensis

sis in Chronico Lib. II. Cap. 1x. Porro Sirmondus in ea, quam contra Salmasium scripsit, *Adventoria*, existimat, jam inde a Constantii Imperatoris temporibus Capuam fuisse Metropolim. Verum ut Cantelius in Historia Metropolitanarum Urbium Parte III. Dissertatione II. Capite v. alique observarunt, ejus rationes evincunt tantum, Capuam fuisse Metropolim in Ordine Civili, non vero Ecclesiastico. In eo tamen fallitur Cantelius, quod scribat, anno tantum nongentesimo sexagesimo octavo eam Urbem a memorato Joanne XIII. Metropolitana dignitate auctam. Id enim ex recitatis Leonis Ostiensis verbis, quibus innititur Cantelius, aperte refellitur, ut legere est in Critica Baroniana apud Pagium seniore ad annum Christi DCCCCLXV. & DCCCCLXVIII.

IV. Præfectum Urbis, cujus vel diu post Joannis XIII. Pontificatum summa dignitas fuit, omnino extinguere conatus est Arnaldus Brixiensis hæreticus, sive Arnoldus, vel Arnolphus, ita varie nominatus reperitur, qui e Gallia reversus, ubi studiis operam navarat, Petro Abaelardo præceptore usus, Brixiae, & Romæ præsertim rem Christianam turbavit, assumpta larva sanctitatis, Monastico scilicet habitu, cujus vitam, turpesque mores, ac falsa dogmata, retulimus jam nos confutavimusque Tomo III. Conciliorum in Commentario ad Canonem XXIII. Concilii II. Œcumenici Lateranensis. Is itaque cum novas turbas Romæ cieret, populumque Romanum incitasset, ut Præfectura Urbis omnino sublata, ceteri Magistratus Patricio subjicerentur, pertinacissime inelamans, administrationem Urbis ad Pontificem non pertinere, ipsumque Ecclesiastico jure contentum esse oportere; curante tandem Eugenio Papa III. jussu Friderici Imperatoris captus, a Petro Urbi Præfecto ad ignem damnatus est, cineresque in tyberim projecti, *ne a stolidæ plebe corpus ejus venerationi haberetur*, ut ait Otho Episcopus Frisingensis, Lib. II. *De gestis Friderici*, Cap. xx. cui concinit Guntherus Ligurinus Lib. III. sul Poematis, ita de eodem Arnaldo scribens:

*Unde etiam (neque enim reor esse silendum,
Neu de funesto repetatur postea sermo)
Judicio Cleri, nostro sub Principe victus,
Adpensusque cruci flammaque cremâte solutus*

*In cineres tyberine tuas est sparsus in undas,
Ne stolidæ plebis quem fecerat improbus error,
Martyris ossa novo cineresve foveret honore.*

IV. Ante Eugenium III. sua potestate fuisse abufos Urbis Præfectos, notavimus nos citato Tomo III. Conciliorum in Commentario ad Canonem XII. Concilii Generalis I. Lateranensis. Inter alias enim extorsiones ipsorum Præfectorum, (qui & Sententiales Præfecti dicebantur, vel quod Sententias pronunciarent, vel quod per Sententias decretam pœnam exequutioni mandarent) famosa illa fuit extorsio, quod nempe Præfecti ipsi minime vererentur de oblati Basilicæ Vaticanæ participare, quæ alias Viris Ecclesiasticis, vel pauperibus solita erant concedi. Unde non mirum, si ipsi etiam, qui rebus Ecclesiæ minime parcebant, Porticanorum, idest peregrinorum, & advenarum, seu alterius conditionis hominum, in porticibus Vaticanæ Basilicæ habitantium bona usurparent, quum Romæ absque hærede moriebantur. Hanc plane turpem consuetudinem abolevit Callistus II. in citato Canone XII. Lateranensi, & quidem, ut ait, *de Fratrum nostrorum*, idest, Cardinalium, & *totius Curie consilio*, idest, Civium Romanorum, non vero Clericorum, ut ea verba scite explicat Antonius Augustinus Lib. II. *De emendatione Gratiani*, Dialogo v. *necnon & voluntate, atque consensu Præfecti*; quia scilicet Imperatori is addictus magna pollebat auctoritate, eoque invito prudenter Pontifex Callistus II. abstinuit consuetudinem pravam illam abolere. Abrogavit tandem eum abufum Callistus, sed adjecta hac conditione: *Ita tamen, ut Porticani in Romana Ecclesia, & nostra, nostrorumque Successorum obedientia, & fidelitate permaneant*. Quia scilicet inducta ab Imperatoribus in Ecclesiam divisione, ac Civitate ipsa Romana in duas factiones scissa, ab obedientia Ecclesiæ, & legitimi Pontificis, Porticani etiam defecerant, præsertim tempore Schismatis a Præfecto Urbis in partes Burdini Antipapæ tracti. Sed de his vide quæ fusc diximus in laudatum Canonem XII. Concilii I. Lateranensis nostro Tomo III. Conciliorum. Alia scitu digna de ipso Urbis Præfecto, ejusque variis prærogativis dicemus mox infra in nostris ad sequentes Paragraphos Commentariis.

§. I.

De indumentis Præfecti Urbis, & ritu, quo creari solitus fuit.

In primis præparentur hora competenti vestes Præfecturæ, videlicet Tunicella serica ornata fimbriis aureis, & Mantum etiam aureo limbo circumtextum, apertum a parte dextra, & Infula ad similitudinem Bireti Ducalis, & omnia portentur ad Ecclesiam, ubi est celebrandum. Pontifex autem procedit ad Ecclesiam, ut consuevit, cum Pluviali & Mitra pretiosis, orat ante Altare, facit Confessionem cum Celebrante, ascendit Sedem eminentem, & Cardinales exhibent consuetam reverentiam. Deinde duo ex Proceribus Romanis præsentant novum Præfectum in suis vestibus Summo Pontifici; qui genuflectit super infimum gradum Solii Pontificalis, & Pontifex surgens sine Mitra dicit super eum Orationes, quæ in novo Milite creando dicuntur, & alia omnia facit, quæ ad creationem novi Militis pertinent. Si autem antea esset Miles, illis dimissis procedit ad benedictionem in hunc modum. Surgit sine Mtra, & dicit. *V. Adjutorium nostrum in nomine Domini. R. Qui fecit Cælum, & terram. V. Dominus vobiscum. R. Et cum spiritu tuo.*

Ore-

Oremus.

Deus qui in Nomine tuo congregatis famulis tuis te medium esse dixisti, corona valente, da gratiam huic famulo tuo Præfecto nostro, quam Abraham in holocausto, Moyses in exercitu, Hieremias in eremo, Samuel meruit crinitus in Templo: concede Domine concordiam, quam inspirasti Patriarchis, prædicasti populis, tradidisti Apostolis, mandasti victoribus: bene I dic quasumus Domine hunc Præfectum nostrum, quem ad salutem populi nobis a te credimus esse concessum. Fac eum esse annis multiplicem, ingenti, atque salubri corporis robore vigentem, & ad senectutem optatam, atque demum ad finem pervenire felicem. Sit nobis fiducia eam obtinere gratiam pro populo, quam Aaron in tabernaculo, Eliseus in fluvio, Ezechias in lecto, Zacharias vetulus impetravit in Templo. Sit illi regendi virtus, atque auctoritas, quam Josue suscepit in castris, Gedeon sumpsit in præliis, Petrus accepit in clave, Paulus est usus in dogmate; & ita Pastoris cura proficiat in Ovile, sicut Isaac profecit in fruge, & Jacob est dilatatus in grege. Quod ipse præstare dignetur, qui cum Patre, & Spiritu Sancto vivit, & regnat Deus per omnia secula seculorum. Amen.

C O M M E N T A R I U S.

I. **Q**uamquam præteritorum seculorum inciticia, atque barbaries parvam nobis notitiam reliquerit de indumentis Præfecti Urbis, fateri nihilominus cogimur, plura in ipsis præteritis seculis de ea re inveniri, quæ in hoc nostro Cæremoniali desiderantur. Sane, ubi Innocentius Papa III. creatus Pontifex Maximus die v 111. Januarii anno MCCXCVIII. & consecratus die xx 11. Februarii, sequenti die post suam Consecrationem Petrum Urbis Præfectum ad ligiam fidelitatem recepit, eum per Mantum de Præfectura publica investivit; ad illud enim usque tempus juramento fidelitatis Imperatori fuerat obligatus, & ab eodem Præfecturæ honorem tenuerat. Id plane inter alia enarratur in Actis Vitæ ejusdem Pontificis, quibus consentiunt, quæ in Regesto Pontificio habentur, secundo nempe die a sua Consecratione Præfectum ipsum Urbis in Cardinalium Consistorio fiduciarium viri officia laudato Innocentio detulisse, ac scypho argenteo accepti gratissimi obsequii ergo donatum fuisse. Notant hæc Ciaconius, ac Pagi in Vita Innocentii, quorum prior sic ad rem inquit: *Petrus Præfectus Urbis accessit*, nempe ad Innocentium Papam III. *atque in Consistorio Palatii Lateranensis publice juravit, se ei, & Successoribus ejus, & Romanæ Ecclesiæ fidelem contra omnes homines fore, & investituram ab eo Præfecturæ per Mantum recepit, atque in manibus ejus ligium hominum fecit, ut vocabant, poculo ab eo aureo insignis benevolentia monumento donatus.* Pagi loco citato ait, poculum ipsum, seu scyphum, fuisse argenteum.

II. Ad ornamenta quod attinet, quibus indui Præfectus ipse Urbis olim solitus fuit, ut ab inferioribus ordiamur, caligas, sive ocreas, sive calceos, quos antiqui Scriptores nonnulli minus usitato vocabulo *zancas* appellarunt, Præfecto ipsi tribui, & quidem non unicolores, alteram nempe auream, alteram rubeam, docent nos Romanus antiquus Ordo xi. Auctore Benedicto, Num. xx 1. & Romanus Ordo xi 1. Auctore Cencio, Cap. II. ubi agitur de ritu dandi Presbyterium per Papam tempore Adventus, & in Natali Domini: *Præfectus Urbis ab Ecclesiæ Sanctæ Mariæ Virginis usque ad Palatium indutus Manto precioso, & calceatus zanca una aurea, idest, una caliga, altera rubea, eadem die, & secunda die, & etiam in duabus diebus Pascha,*

& quando Papa eligitur, juxta Dominum Papam collateraliter, nullo medio, equitando incedit. Zanca, seu zanchæ, sive etiam tzangæ, uti ad hanc vocem videre est in Glossario eruditi Dufresne, calcei erant, sive potius cothurni, qui crura, & pedes tegebant. Formam vero hujusmodi calceorum, aliorumque Præfecti Urbani ornamentorum habes in Libro Felicis Contelorii, qui inscriptus est, *De Præfecto Urbis.* Cernuntur autem ibidem calcei ipsi, sive potius cothurni calcaribus muniti.

III. Utitur præterea Tunica laxioribus manicis, atque utroque ex latere aperta ex serico rubro cujus oræ phrygio opere auro exornatæ sunt. Eam qui de sacris cæremoniis tribus ab hinc seculis scripsere, & alii antiquioris ætatis Auctores aliquando Tunicellam, nonnunquam aurifrigiatam, aut Senatoriam dixerunt. Certe, ut alios omitam, Paris de Grassis Apostolicus Cæremoniarius in suo ms. Diario, ubi enarrat gesta Pontificatus Leonis Papa X. ad annum MDXX. agens de creatione Ducis Camerini in Præfectum Urbis facta ab ipso Leone Pontifice, post explicatam Præfecti Urbis dignitatem, & officium, sic de ejusdem vestibus, quibus equitare solitus fuit, inquit: *Equitat autem ipse veste indutus Senatoria, idest, primo Tunicella longa, & quasi Subdiaconali, & Paludamento desuper oloserico ad manum dexteram aperto, quod antiquitus latus clavus dicebatur, limbis circumcirca auro contextis, gestatque capite Infulam concolorem, pendentibus utrinque vittis, qui habitus ejus proprius, & singularis est, nec cum aliquo communis.* Porro notat idem Grassus, quoties Imperator ad Urbem venit, & per illam, sive pedester, sive equester incedit, a Præfecto Urbis, eo, quem dixi, induto habitu, duci consuevisse, prout sub Paulo II. Pontifice Præfectus Urbis sic vestitus equitavit ante Fridericum Imperatorem, auctore Augustino Patricio, qui eum Cæsaris ingressum pene triumphalem descripsit.

IV. Extat ea Patricii descriptio apud Maillonium Tomo I. Musæi Italici, distincta in varia Capita. De Præfecto autem Urbis sic inquit Cap. iv. *Præfectus rubro paludamento, quod Pluviale vocant, indutus, apertura tamen supra dextrum humerum existente, incedebat, Pileum in capite gestans oblongum, vittis ab aure pendentibus in modum Tiaræ Pontificalis, coloris*

loris autem rubei, ac signis quibusdam in longum porrectis distinctum, vehebaturque equo sericeo panno ejusdem coloris tecto. Itaque supra Tunicellam, Chlamidem, sive Paludamentum Præfectus induebat, quod aliqui Mantum, alii Pallium, nonnulli etiam Pluviale appellarunt, teste laudato Patricio. Id ex veste holoserica punicea confectum, auroque ad extremas oras distinctum circuli forma, una tantum ex parte apertum, ad talos usque consuevisse dimitti, ac supra dexterum humerum aurea ligula necti, notavit eruditus Contelorius in suo citato Opusculo, *De Præfecto Urbis*, Cap. II. In quo etiam Opusculo videre est ejus Paludamenti figuram ære incisam, sicut & aliarum vestium, quibus in certis solemnitatibus Præfecti Urbis induti, soliti erant incedere, præsertim vero quum equitabant; utebantur tunc enim equo ornatissimo, purpureaque veste instrato, cui aureum ephippium, aureæ phaleræ, aureæque fræni bullæ adhiberi solebant.

V. Jam vero quod capitis tegumentum spectat, quod alii Tiaram, alii Coronam, quidam Pileum ad modum Ducalis Bireti, nonnulli Infulam vocant, ex serico purpurei coloris, non unius semper formæ fuisse, compertum est. Aliquando enim, ut ex antiquis monumentis docet memoratus Contelorius loco citato, cubitali ferme altitudine in metam assurgens, aurea Cruce phrygii operis distinguebatur, tænilis utrinque pendentibus, quo usus est Florentiæ Franciscus Ursinus, quem Eugenius IV. Pontifex, XIV. Kalendas Novembris anno MCDXXXV. Præfectum Urbis creavit, uti ex ejusdem Eugenii Diplomate liquet; non vero Joannes Antonius, ut per errorem scripsit Contelorius; hic enim creatus fuit Urbis Præfectus a Callisto Papa III. anno MCDLV. i. uti apud eundem Contelorium vi-

dere est in Serie Præfectorum ad annum ipsum MCDLVI. Præterea ipsum capitis tegumentum Præfecti Urbis distingui solitum fuit apice in alteram partem obverso; & nonnumquam etiam depressius latiusque in summo usurpatum est. Sane quæ hætenus de Præfecti vestibus, ac præcipue de Pileo diximus, ea ex laminarum ænearum scriptura impressa videre curiosus poterit Lector apud laudatum Contelorium. Non enim idipsum a nobis sperari debuit, quippe qui vix potuimus, & quidem non sine rei familiaris incommodo, Libros hosce edere in lucem, nullo nos Mæcenate adjuvante.

VI. Quod tandem Orationem spectat in §. hoc nostro descriptam pro Benedictione, & investitura novi almæ Urbis Præfecti, antiqua profecto illa est, & in Benedictione Principis, seu Comitum Palatini usitata, uti liquet ex antiquo Arelatenfi Pontificali apud eruditum Martene Lib. II. *De antiquis Ecclesiæ ritibus*, Cap. XI. ubi etiam idem Auctor notat, eandem Benedictionem, seu Orationem, quæ incipit, *Deus, qui congregatis in tuo Nomine famulis &c.* exhiberi in ms. Pontificali Guillelmi Durandi, cui præmissus est etiam Versiculus, *Adjutorium nostrum &c.* & *Dominus vobiscum*. Porro variat tantisper Oratio ipsa descripta in nostro §. ab ea, quæ legitur in citatis Pontificalibus, uti videre est apud laudatum Martene, ubi ex memorato Arelatenfi Codice refert Ordinem benedicendi Principem, seu Comitem Palatinum, ejusque Pontificalis auxilio correximus nos Orationem ipsam in nostro §. tam juxta editionem 1. Vene- tam, quam Romanam, mendose descriptam; in quarum prima ita legitur: *Deus in nomine tuo congregatis famulis tuis te medium esse Christi &c.* In altera quoque occurrit vox *Christi*; sed legendum, *dixisti*, ut in Pontificali Arelatenfi.

§. II.

De benedictione vestium Præfecti Urbis.

Benedicat deinde vestes, quæ per aliquem Acolythum ad dexteram Pontificis tenentur.

Pontifex vero stans sine Mitra dicat *Ÿ. Adjutorium nostrum in Nomine Domini. R.*

Qui fecit Cælum & terram. Ÿ. Dominus vobiscum. R. Et cum spiritu tuo.

Oremus.

Deus omnium bonarum virtutum dator, omnium bonorum largus infusor, supplices te rogamus, ut manibus nostris opem tuæ benedictionis infundas: Tunicellam, Mantum, & Regnum præparatum virtute Sancti Spiritus benedicere ✠, & sanctificare ✠ digneris ✠ & omnibus eis utentibus gratiam.

§. III.

De ipsarum vestium impositione.

His dictis, sedet Pontifex cum Mitra, & sine alia vestium benedictione, quoniam secularium Principum vestes non benedicuntur, exiit Præfectus veste communi ab illis Proceribus, & adducitur ad pedes Pontificis cum stricta veste. Qui illi primo imponit Tunicellam, & deinde Mantum cum apertura super humerum dexterum, dicens: *Induat te Dominus vestimento salutis, & indumento lætitiæ circumdet te. In Nomine Patris, & Filii, & Spiritus Sancti. Amen.* Imponit deinde ei genuflexo Infulam, sive Biretum Præfecturæ, dicens: *Accipe insigne Præfecturæ præeminentiæ, quod per nos capiti tuo imponitur. In Nomine Patris, & Filii, & Spiritus Sancti*

Sancti. Et intelligas, te amodo ad defensionem Fidei, & Sacrosanctæ Ecclesiæ fore debitorem. Quod ut opere perficere valeas, ille tibi concedere dignetur, qui est benedictus in secula seculorum. Amen.

C O M M E N T A R I U S.

I. **T** Ametst antiquissima sit institutio Præfecti Urbis, uti superius notatum jam fuit, docet nos nihilominus Auctor nostri hujus Cæremonialis Augustinus Patricius, ritum huc usque præscriptum servandum in Benedictione, & investitura ipsius Præfecti, institutum a Sixto IV. primum fuisse, una cum cæremoniis, orationibusque, ac formulis, in benedictione, atque impositione Insignium Præfecturæ adhibendis, qualia sunt Tunicella, Mantum, & Regnum, de quibus jam diximus supra in Commentario ad §. I. Regnum hic idem est, ac Corona, seu Biretum, vel Infula, idest tegumen-

tum capitis Præfecti Urbis, quod etiam aliis nominibus appellatum est. Porro quod Orationes spectat, ac formulas benedictionis, ac impositionis vestium Præfecti Urbis, occurrunt illæ in prisca Pontificalibus, sed tamen ad alias functiones adhibitæ, præsertim vero formula illa verborum imponendi Tunicellam, & Mantum, *Induat te Dominus &c.* quæ quidem legitur in variis antiquis Pontificalibus, & in Pontificali etiam hodierno Romano, ubi agitur *de ordinatione Diaconi*, uti videre est nostro primo Tomo ejusdem Pontificalis Commentariis a nobis illustrati, Titulo XI, §. X.

§. IV.

De aliis ritibus in Benedictione Præfecti Urbis servatis.

Surgit demum Pontifex, & sine Mitra dicit super Præfectum genuflexum hanc orationem.

Oremus.

Deus Pater æternæ gloriæ sit adjutor tuus & protector, & Omnipotens benedicat tibi, preces tuas in cunctis exaudiat, & vitam tuam longitudine dierum adimpleat, inimicos tuos confusione induat, & super te sanctificatio Christi floreat, & qui tibi in terris contulit Præfecturam, ipse tibi in Cælis conferat æternam gloriam. Qui vivit & regnat in unitate Spiritus Sancti Deus per omnia secula seculorum. Amen.

His finitis, Cantores incipiunt Introitum. Imponitur incensum a Pontifice, & incensatur Altare, & reliqua ut alias. Novus Præfectus cum suo habitu sedet ad pedes Pontificis in supremo gradu.

C O M M E N T A R I U S.

I. **E** St & antiqua oratio illa, *Deus Pater æternæ gloriæ &c.* legiturque, ut alia mittam, in ms. Pontificali insignis Ecclesiæ Laudensis apud Clarissimum Edmundum Martene, Lib. II. *De antiquis Ecclesiæ ritibus*, Cap. XI. Ordine II. qui orationes continet pro Duce recipiendo, ideoque tantisper variat ab oratione in §. nostro descripta; post illa enim verba, *& vitam tuam longitudine dierum adimpleat*, ita statim subdit; *Thronum Ducatus tui jugiter firmet, & gentem in æternum, populumque tuum conservet &c.* In fine quoque ipsius orationis, ubi in nostro §. dicitur: *qui tibi in terris contulit Præfecturam &c.* in citato Laudensi Pontificali habetur: *qui tibi tribuit in terris Ducatum*. Ex quibus omnibus licet addiscere, quod alias superius iterum iterumque notatum fuit, ordinem servandum in Benedictione, & investitura novi almæ Urbis Præfecti institutum a Sixto IV. Pontifice, compactum esse ex antiquis probatis cæremoniis, orationibusque alias usitatis.

II. Teste Contelorio in Opusculo, *De Præfecto Urbis*, Cap. V. Pontifex inter Missarum solemniam eum quem Urbis Præfectum delegerit, insignibus Magistratus vestibus, sacro, ac veteri ritu, induere solet, Quo die autem ipse Præfectus, ut idem Auctor notat, in Sacello Pon-

tificio Præfecturæ Insignia fuscipit, ad osculum oris a Pontifice admittitur, atque eodem ipso ornatu in supremo Solii gradu ad Papæ dexteram parieti innixus consistit, Diacono Cardinali, qui adsidet, proximus; idemque facit, quotiescumque, vel in eodem Sacello, vel in Templo coram Pontifice res sacra solemniter peragitur. Ita Julio II. Pontifice anno MDIV. in Epiphania, & Dominica die Palmarum Franciscus Maria Feltrius ibidem inferiorem habuit Robertum Salernitanum Principem. Iterum eodem anno in Templo S. Mariæ super Minervam die Beatæ Virginis Annunciationi sacro, ac de novo anno MDVI. tum festo die Purificationis Deiparæ, tum Dominica Palmarum. Ita quoque Leone X. Pontifice anno MDXXI. Joannes Maria de Varano Camerini Dux, Urbis Præfectus die Purificationis Beatæ Virginis in Pontificis Solio ipsi propior stetit, quam Nolanus Comes. Atque hæc constant ex ms. Diariis Apostolicorum Cæremoniariorum, Joannis Burchardi, & Parridis Grassi, quos idem Contelorius recenset.

III. Porro, ut contendit laudatus Grassus in suo ms. Diario, ubi enarrat Pontificatum Leonis X. ad annum MDXX. ubi agit de creatione prædicti Joannis Mariæ de Varano Ducis Camerini in Præfectum Urbis facta ab ipso Leone Papa X. die VI. Augusti, Præfectus ipse Urbis non nisi

nisi in Urbe investiri debet, sicut ipse Imperator non nisi in Urbe per Pontificem, aut ejus Legatum investitur, & coronatur. Conatur suam hanc opinionem pluribus argumentis probare, quia scilicet ipse Joannes Maria de Varano, ut idem Grassus rem narrat, intendebat se in civitate Camerini per aliquem Commissarium Apostolicum investiri facere, prout etiam in eodem loco de Ducatu Camerinesi similiter investitus fuerat, existimans ipse, simili modo hoc fieri posse, sicut etiam illud fieri potuit in dicta Civitate. Addit Grassus tunc Apostolicus Cæremoniarum, se, quod dixisset procuratoribus ejusdem Ducis, qui ipsum de hac re consulebant, quod non eadem ratio esset, sed longe diversa hac Præfecturæ investitura ab illa Ducali, irritum ab eisdem fuisse, putantibus ipsum ideo contendere, investituram scilicet Præfecturæ Urbis non Camerini, sed in Urbe peragendam, ut Officiales Papæ, ac ipse præsertim Grassus propinam caperent. Ceterum inter alia argumenta pro sua propugnanda sententia ait Grassus, Præfecti Urbis investituram nihil aliud esse, nisi meram quandam equitationem per Urbem, solemnem, ac pompasam, cum Magistratibus, & Proceribus Romanis ipsum Præfectum paludatum & insulatum festiviter comitantibus; eamque equitationem, si Camerini, & non in Urbe fieret, profecto non Urbis, sed Camerini Præfectum vocari debere, & esse.

IV. Quicquid sit, hac Præfecturæ nostro tempore, inquit Grassus, idest initio Seculi xvi. quo ille scribebat, nullam, aut pusillam in Urbe jurisdictionem retinuit respectu illius antiquæ, de qua in Libris Digestorum & Codicis fit mentio; sed tantummodo titulo tenuis dignitatem suam retinet, ut sit supra omnes Urbis Magistratus; nam & Præfectus iste cum investitur dignitate sua, equitat per Urbem cum pompa, & solemnitate, comitantibus universis Urbis Magistratibus, ac Senatore, Conservatoribus, Confalonario, Regionariis, Proceribusque, & Civibus Romanis. Jam superius notatum fuit a nobis, quod ubi Imperator per Urbem eques, vel pedes incederet, illum proxime Præfectus sui Magistratus ornatus insignibus præire solet; idque factum fuisse non modo ubi Fridericus III. Imperator peregrinationis gratia anno Christi MDLXV. Romam venit Paulo II. Pontifice in magno equitum comitatu; verum etiam cum ad ipsam Urbem Ludovicus Bavarus accessit, de cujus ad Vaticanum deductione ita scribit in Historia sua Florentina Joannes Villanius, Lib. x. Cap. lvi. Urbis Præfectus, quod sui muneris

erat, illum semper præivit. Item cum Imperator Coronam suscipiturus, vel post illam susceptam, aut alio quovis tempore, solemni pompa Urbem ingreditur, Præfectus insignibus suis indutus nudatum ensen eidem præferre consuevit; idque Clemens V. in Coronatione Henrici VII. atque Innocentius VI. in Coronatione Caroli IV. servari præcipiunt, Diplomatum ea de re ad Legatos Cardinales missis, uti apud Raynaldum videre est.

V. Tandem ut alias omittam antiquas Præfecti Urbis prærogativas, quæ notantur variis locis nostri hujus Cæremonialis, Præfectus ipse cum ex itinere ad Urbem olim veniret, atque ingenti equitum multitudine, & Nobilium celebritate exciperetur, præcedere solebant multi bene exornati atque itinerariis sarcinis onusti, quas stragula intebat vestis gentilitiis ejusdem insignibus opere phrygio depicta: hos regebant agasones laxioribus sagis coloratis induti; subsequerantur tubicines, tum Pontificiæ custodiæ Equites; mulæ purpureis dorsualibus instratæ, auratisque bullis decoræ, quibus insidebant famuli a pedibus cum Cardinalitiis Galeris secundum humeros dependentibus; deinde honestiores Cardinalium famuli, alique nobiles viri permiste. Hos excipiebat familia Pontificis suis muneribus ordinibusque distincta; de hinc tympanistæ, tum Romani Proceres, ac Dynastæ ingenti circumpedum turba associati, quos sequebatur Præfectus peditibus famulis veste confimili ornatis, magno numero stipatus, interque duos principis dignitatis Viros medius, Helvetiis Pontificis Custodibus utrinque ad latera procedentibus. Agmen clauderant Præfules, alique insignes Togati complures. Atque in hunc ferme modum intrarunt Romam Joannes Ruverus Præfectus, & Franciscus Maria ejus Filius, uti ex Burchardo, & Grassio notavit laudatus Contelorius, Cap. v.

VI. Novissime cum Taddæus Barberinus Prænestinus Princeps, Eretanorum Dux, & copiarum Ecclesiæ Generalis Ductor ab Urbano Papa VIII. ejus Patruo absens in Consistorio, IV. Idus Maji anno MDCXXXI. Præfectus Urbis creatus esset, captaque Sedis Apostolicæ nomine Urbinatis ditionis possessione ad Urbem rediret, III. Kalendas Augusti, qui dies festo illius ingressui dicatus erat, obviam ad portam Flaminiam processere familiæ, tum Pontificis, tum Cardinalium, atque Oratorum, omnesque, qui Romæ aderant Proceres, ac Dynastæ singuli, ingenti famulorum peditum numero stipati, equisque generosis, ac vestibis insignes.

C A P U T III.

De benedictione Rosæ, quæ fit Dominica, Lætare Jerusalem, & ejus traditione.

§. I.

Consueverunt Romani Pontifices in Dominica quarta Quadragesimæ, in qua cantatur in Ecclesia, Lætare Jerusalem, Rosam auream benedicere, & illam post Missarum Solemnia alicui magno Principi, si præsens est in Curia, dono (1) dare. Si autem (2) non esset in Curia Princeps tanto munere dignus, mittitur extra ad aliquem.

To. I.

L I

Re-

(1) Ita in editione Romana; in Veneta vero I. deest vox dono. (2) In ipsa Veneta legitur, si minus esset &c.

Regem, vel Principem, ut placuerit Sanctissimo Domino nostro cum consilio Sacri Collegii. Nam consuevit Summus Pontifex ante, vel post Missam convocare Cardinales ad Circulum in Camera sua, vel ubi sibi placet, & cum eis deliberare, cui danda, vel mittenda sit Rosa,

COMMENTARIUS.

I. **S**citissime docent qui de divinis officiis tractant, quartam Dominicam Quadragesimam, ideo consuevisse appellari Dominicam, *Lætare Jerusalem*, quia ab hisce verbis incipit in ipsa Dominica quarta Introitus Missæ. Dicta est etiam *Dominica in Rosa*, seu *de Rosa*; eratque Romæ admodum celebris, quinimo ab ea tantum fiebat Officium de Quadragesima, quod deinceps ad Dominicam primam Quadragesimæ anticipatum est, ut tradit Amalarius, quem citat Grægorius in Commentario Historico ad Breviarium Romanum, Capite LI, ubi etiam notat, celebrari hoc Festum externis lætitiæ signis, quæ a Feria quinta in media Quadragesima ad hanc diem translata sunt, ut populi in jejuniorum cursu solatium invenirent, Plura de hac Dominica apud Durandum, in suo divinatorum Officiorum Rationali, Lib. VI. Cap. LIII. ubi etiam observat, hodiernum Officium totum lætitia plenum esse, & in omni verborum clausula jucunditatem exuberare, gaudium resonare, hilaritatem inculcari; additque, fieri etiam in hac Dominica Coronationem Christiani Imperatoris, & solemnem per Romanum Pontificem Rosæ aureæ benedictionem.

II. Nicolaus Harpsfeldius in Historia Anglorum Seculo xv, Cap. IV, apud Theophilum Raynaudum, in Tractatu quem de Rosa mediana Romani Pontificis benedictione consecrata scripsit, refert quidem ex Diplomate Eugenii IV, ad Henricum VI, Anglorum Regem, juxta antiqua Romanorum Pontificum scita non alia die, quam Dominica, *Lætare* benedici solitos Romanorum Reges in Augustos, nec nisi post Rosam auream illis ea die a Pontifice traditam Imperii insignia, & Diadema capere. Idem tradere Durandum in Rationali scribit Raynaudus, qui hujus rei unicum exemplum adducit, nempe Friderici III, qui fuit a Nicolao V, eadem die coronatus Imperator. Verum cum, ut scite ait Pagius in Vita Innocentii IV, Num. xxx, post Carolum Magnum nullus ex Imperatoribus ea die Coronam Imperii acceperit, hæc observatio rejicienda, & Durandus aliter interpretandus. Hic sane postquam de Rosa aurea loquutus est Lib. VI, Cap. LIII. ubi diei Dominicæ IV. Quadragesimæ ritum explicat, ita Caput ipsum claudit; *Hac etiam die Christianus coronatur Imperator, ut semper corona superna Jerusalem meditemur*. Sed hoc tantum Durandus vult, ut, sicut Pontifices Romani in præcipuis anni festivitatis coronabantur, inter quas una erat Dominica de Rosa, seu IV. Quadragesimæ, ut ostendit Pagius in Vita Alexandri III, & sicut Reges Franciæ in præcipuis Festis Coronam solemni ritu accipiebant, ut idem Auctor in Vita Eugenii III, notavit; ita etiam Imperatores die ipsa Dominica, *Lætare*, Corona Imperiali solemni fuerint redimiti.

III. Quicquid autem de hoc ritu sit, de Coronatione Imperatoris jam diximus supra in Commentariis ad Titulum V. Quod autem

benedictionem ipsius Rosæ aureæ spectat, sciendum hic primo illud, ritum plane esse antiquum in Ecclesia Romana servatum, Seculo nempe XI. ut in Dominica quarta Quadragesimæ Rosam auream musco & balsamo plenam Papa gestaret. Sunt qui autumant, primum auctorem ejus ritus fuisse Urbanum II, de quo ita scribit Fulco Andegavenensis Comes apud Lucam Holsternium in Collectione Romana Parte II. pag. 222. *Venit & inde Turonum, ibique datis venerabili Concilio decretis, media Quadragesima coronatus est; & cum solenni Processione ab Ecclesia S. Mauricii ad Ecclesiam Sancti Martini deductus; ubi mibi florem aureum, quem manu gerebat, donavit; quem ego etiam ob memoriam, & amorem illius, in Osanna, idest in Dominica die Palmarum, semper mibi, meisque Successoribus deferendum constitui*. Spectant hæc ad annum Mxcv. Sed constat tamen ritum ipsum esse Urbano II. Pontifice vetustiore, ut docet Raynaudus in parvo Tractatu, quem de Rosa mediana Romani Pontificis benedictione consecrata edidit, qui extat Tomo X, ejus Operum. Et quidem fit apud Cencium Camerarium in Libro, *De censibus*, mentio S. Leonis IX, insigne Monasterium Bambergæ exædificantis, & multis privilegiis, amplissimaque immunitate donantis anno Ml. imposita ejusdem Monasterii monialibus a se sub speciali S. Petri protectione constitutis, obligatione pendendi quotannis Romanæ Ecclesiæ, aut Rosam auream a Pontifice benedicendam Dominica quarta Quadragesimæ, aut quantum auri in ipsius Rosæ confectioem esset infundendum.

IV. Si hæc admittatur narratio, constat plane quod dictum est, hunc ritum non modo esse vetustiore Urbano II, verum etiam ante laudatum Pontificem S. Leonem IX, inductum. Nec enim, ut scite observat Pagius in Vita Urbani II, Num. LVI, qui de divinis Officiis post Carolum Magnum tractarunt, agentes de Dominica quarta Quadragesimæ, hujus, aut alterius peculiaris ejus Dominicæ ritus ullam mentionem fecere. Porro post Seculum XI, loquuntur passim de Rosa ipsa Romani antiqui Ordines, inter quos Ordo XI, scriptus anno MCLIII, Auctore Benedicto, Num. XXXVI. ita inquit; *Dominica, Lætare Jerusalem, Statio ad Jerusalem in Palatio Sessoriano, ubi Dominus Pontifex honorifice cantat Missam, habens in manu sua Rosam de auro cum musco. Post Evangelium ascendit pulpitem, & prædicat de flore, & de rubore Rosæ, & odore, ostendens eam populo. Deinde tractat de Evangelio. Factis Laudibus, & finita Missa, ibi accipit Coronam, & coronatus cum Processione, sicut mos est, redit ad Palatium. Longe ante descensum Pontificis descendit Præfectus, & pedester adextrat eum usque ad locum, ubi Pontifex descensurus est, ibi dat ei Rosam, & Præfectus osculatur pedes ejus*. Sane Dominica ipsa quarta Quadragesimæ, in qua Statio fiebat in Basilica S. Crucis

ad

ad Jerusalem, Pontifices una cum Cardinalibus Roseo colore indutis solebant agmine instructo progredi ad memoratam Ecclesiam S. Crucis, ubi dicebatur Missa, & fiebat Rosæ aureæ benedictio, uti inter alios laudatus Grancolas docet; post Evangelium prædicabatur, & Rosæ istius significatio allegorica explicabatur; extatque unus ex his sermonibus inter habitos ab Innocentio Papa III. qui electus Pontifex fuit labente Seculo Christi XII. idest anno MCCCXVIII.

V. Eadem fere quæ Romanus Ordo XI. Auctore Benedicto, tradit & de ipsa aurea Rosa Ordo Romanus XII. Auctore Cencio, Seculo XIII. labente exaratus, uti videre est apud Mabillonium Tomo II. Musei Italici. Sic enim ille Cap. VIIII. in fine inquit: *Dominica vero, qua cantatur, Lætare Jerusalem, Camerarius representat Domino Papæ in Camera Rosam auream cum musco, & balsamo: quam Dominus Papa portat in manu propria usque ad Sanctam Crucem, ubi ea die debet Missam celebrare; eandem deferens in reversione sua similiter usque ad locum, in quo descendit, ubi debet esse Præfectus, cui Dominus Papa: tunc dat Rosam ipsam; & eadem die portat Mitram aurifrisiatam.* Additque mox: *Sciendum est, quod ipsa hora, qua Camerarius representat Rosam, Dominus Papa debet accipere Mitram aurifrisiatam.* His concinit Romanus Ordo XIII. seu Cæremoniales Romanum jussu Gregorii Papæ X. editum, post medium Seculum XIII. scriptum, Num. XX. ubi ritum ipsum luculentissime enarrat his verbis: *Dominica, Lætare Jerusalem, Papa portat Mitram cum aurifrisio, & vadit cantare ad Sanctam Crucem, si est Roma; & si est alibi, ubi placet; & portat in manu quandam Rosam auream miro opere operatam, in qua intus sunt muscus & balsamum, & tenet ipsam in manu dum dicit Tertiam; & dum calciatur, & cum induitur, servat eam Camerarius, & juxta ipsum hodie servat eam Diaconus: Si Papa non celebrat, & induitur preciosis, quibus induitur in Dominica de Gaudete, & tenet ipsam Rosam, cum sermocinatur, & in Missa servat ipsam Subdiaconus juxta ipsum, qui servit de tobalea, & dicta Missa, reportat eam in manu, & Præfecto Urbis, vel alteri, cui placet eam dare, qui adextrat Papam tenendo frenum equi pedes ad locum, in quo Papa descendit, & præcedit subsequendo usque ad Cameram, & Papa dat ei Rosam, & ille osculatur ejus manus & pedes, & recedit ad Domum suam cum Rosa decenter.* Hactenus laudatus Ordo XIII. ex cuius etiam præscripto, si Papa celebrat, dat Rosam post descensum suum; si vero non celebrat, dat Rosam in Camera sua.

VI. Constat plane ex dictis huc usque, Præfectum Urbis, cujus, uti supra dictum fuit a nobis in Commentariis ad Caput II. magna fuit olim dignitas, donari olim solitum fuisse Rosæ aureæ, tametsi consueverint etiam antiquitus Romani Pontifices ipsam Rosam ad Reges, ac Principes mittere, ut inferius dicemus. Hic enim potissimum examinanda est Quæstio illa, an Benedictio Rosæ aureæ fieri solita Romano Pontifice in ipsa Dominica, *Lætare &c.* æque antiqua sit, ac ejus usus jam primo introductus Seculo XI. uti notatum superius fuit. Porro licet ritum ipsum Rosæ aureæ tam Durandus in Rationali divinorum Officiorum, Lib.

To. I.

VI. Cap. LIII. quam varii Ordines Romani, ante & post Seculum XIII. exarati, quorum loca jam nos retulimus, plene luculenterque describebant, nulla tamen in iis reperitur mentio benedictionis istius Rosæ, quam ab Innocentio IV. institutam fuisse tradit Auctor ipsius Vitæ apud Labbeum, inquit Edmundus Martene in Opere, *De antiqua Ecclesiæ disciplina &c.* Cap. XIX. Num. XVII. ubi recitat verba illius Auctoris, quæ sunt hæc: *Primus Rosam auream solemniter benedixit, ac ritu benedixit, eamque Canonicis S. Justii hospitibus suis Lugduni dono dedit.* Sed hæc verba, ut notat Pagius in Vita laudati Innocentii IV. Num. XXVIII. sunt ipsius Labbei, vel Cossartii, qui cujuslibet Pontificis Vitam in Collectione Conciliorum edidit; vel sunt verba Cæsaris Engenii Caraccioli Seculi XVI. Auctoris, qui, teste laudato Raynaudo in suo de Rosa mediana Tractatu, in Neapoli sacra, pag. 29. scripsit, Innocentium IV. fuisse primum, qui Rosam auream benedixit; vel potius hæc sunt verba Ciaconii in Vita ejusdem Innocentii IV. qui ea sine dubio desumpsit ex Federico Federicio, qui ea refert in Tractatu, *De familia Flicca*, teste Augustino Oldoino in suis ad Ciaconium adnotationibus.

VII. At vero sive Labbeus ex Ciaconio, sive ex Federico Federicio, sive quispiam alius Auctor fuerit prædictæ vitæ Innocentii, certe Auctor hic est valde recens, cum citet Platinam, qui exeunte Seculo XV. scripsit, ideoque fidem omnem non meretur; cum præsertim in recitatis Romanorum Ordinum locis, & apud Auctorem Romani Ordinis XV. Petrum Amelium, qui adhuc vivebat anno MCCCXCVIII. ut in sua ad ipsum Ordinem Adnotatione observat Mabillonius Tomo II. Musei Italici, ejusmodi sollemnis benedictionis Rosæ aureæ ne levis quidem mentio reperitur, uti notat inter alios memoratus Pagius loco citato, ubi etiam ait, non male inde deduci posse, ipsius Rosæ benedicendæ consuetudinem post annum MCD. invaluisse. Sane scribit & Victorellus apud Ciaconium in Additionibus ad Vitam Alexandri III. de more benedicendi Rosam auream agere laudatum Durandum, itemque Innocentium III. in Sermone, *De Dominica, Lætare*, & Petrum Blesensem, Sermone XV. sed neque in Durando, neque in Papa Innocentio III. neque in Petro Blesensi, locis ab eo laudatis, ullum ejus benedictionis apparet vestigium, ut legentibus manifestum est. Citat etiam Victorellus Augustinum Patricium Auctorem hujus Cæremoniales, & Collectorem Antiquitatum Liturgicarum, sed cum prior vixerit Seculo XV. & Collector ille sit sine dubio recentior, neuter officere videtur ei opinioni, seu sententiæ, quam inter alios tenet Pagius, eam nempe consuetudinem Rosam auream solemniter benedicendi, inductam esse post annum MCD. cum Petrus Amelius, qui vivebat anno MCCCXCVIII. in recitato Romano Ordine XV. de ea non loquatur, de benedictione scilicet ipsius Rosæ, tametsi fuisse de Rosa ipsa differat Cap. XLVIII. quod inscriptum est, *De quarta Dominica Quadragesimæ, quæ vocatur de Rosa.*

VIII. Porro inter alia ita inquit laudatus Amelius Romani Ordinis XV. Auctor: *Si Papa sue rit in Urbe, paret se in Camera more solito cum Mitra aurifrisiata nobile, non preciosa; alias portaret aurifrisiatam simplicem; sed pro-*

L I 2

pter

pter Processionem portat nobilem illam cum imaginibus. Quo induto, venit Camerarius cum Rosa aurea; & flexis genibus præsentat Papæ, & osculatur ei minum; & Sacrista præsentat balsamum cum musqueto; quæ debent recipi ab aliquo Cubiculariorum Papæ; & Papæ infundat super Rosam balsamum, & musquetum; & sic bajulans Rosam; exit de Camera; & vadit ad Capellam suam; vel; si in Urbe fuerit, ad Sanctam Crucem in Jerusalem: In manu sinistra eam tenet, & cum alia signat; & sic eam tenet, quando facit Confessionem; etsi non celebrat: quoniam dum incipiet; Confiteor; dictam Rosam tradet Diacono Cardinali; qui eum servit à dextris; & post osculationem Altaris; & incensationem; iterum recipit; dicto prius Introitu Missæ, de manu prædicti Diaconi, & sic tenet eam. Quod si aliquis celebrat coram eo; illam non dimittit in tota Missa, nisi dum flectit genua ante medium Altaris, & in elevatione Corporis Christi, & dicitur; Lætatus sum; & etiam dum dicit illas Orationes; dimittit: Monet mox, quod semper Diaconus Cardinalis in capiendo, & dando dictam Rosam; debet osculari manum Papæ.

IX. Pergit Amelius, aliaque docet servanda in Missa ejus diei, præsertim si adesset aliquis Rex; tum vero ita rem nostram subdit: Missa vero finita; Dominus Papa dictam Rosam in manu portat usque ad Cameram suam; vel, si sit in Urbe usque ad Lateranense Palatium; & dum revertitur; sequuntur eum omnes Nobiles in Curia presentes; & dum ad Cameram suam redierit, si sit extra Urbem; dat ipse Dominus Papa Rosam nobiliori; vel illi soli; cui magis placet; & ille incontinenti flectit genua, & osculatur pedem Papæ; dato etiam si esset Rex; deinde Papa recipit ipsum ad osculum oris; quo facto; ille recedit eum comitantibus duobus Diaconibus antiquioribus Cardinalibus; & cum illo equitant aliquantulum per Civitatem; quantum sibi placet &c. Rursus, ut idem Auctor docet, si Papa sit Roma; Rosam prædictam desert Papa usque ad gradus Palatii Lateranensis, ubi quiescere debuit nocte præcedente, & in descensu equi, Præfectus Urbis indutus scarleto; vel pura

pura habens unam Caligam (forte deest, rubeam) & aliam deauratam; tenet Papa stapham, & Dominus Papa cum descendit; dat ei auream Rosam; & ille flexis genibus osculatur pedem Papæ dextrum; & Dominus Pontifex eum recipit ad osculum oris: Quo facto, Papa ascendit Palatium; & ille incontinenti cum Nobilibus equitat cum magno triumpho per Urbem: Sed nec omittenda, quæ paucis interjectis deinde idem Amelius de ipsa Rosa differens subjicit: Notandum, ait, quod Papa; antequam det Rosam; debet dicere aliqua verba breviter de conditionibus, & proprietatibus Rosæ; quia habet colorem gaudiosum; odorem confortativum, aspectum lætificum; prout est in Libro Rationali Divinorum Officiorum; Guillelmi Durandi scilicet Libro Libro VI. Capite l i i i.

X. Ergo nullum in citato Ordine xv. Petri Amelii de benedictione ipsius Rosæ vestigium; tametsi fuse de eadem Rosa differat; nulla quoque ejus benedictionis mentio in ms. Cæremoniali Codice Brunonis Joannis de Davantria; quem mihi commodavit humanissimus Præsul Ignatius Reali primus Apostolicarum Cæremoniarum Præfectus, cui multum me debere profiteor, ob suam erga me benevolentiam. In citato autem Cæremoniali nihil aliud reperi; nisi quod in suo Romano Ordine xv. descripsit laudatus Amelius. Labitur itaque inter alios Græncolas, quippe qui in suo Commentario historico ad Breviarium Romanum, Cap. l i. ubi de Dominica quarta Quadragesimæ agit, benedicendæ aureæ Rosæ ritum ad primam ipsius Rosæ institutionem refert: Perperam enim veterum monumenta de benedictione intellexit, perperamque conclusit: Itaque fallitur Auctor vitæ Innocentii IV. qui de eo Papæ tradit, quod primus Rosam auream benedixerit; eamque Canonicis S. Justii Lugdunensibus miserit. Fallitur porro ipse Græncolas sic loquens; nam uti superius ostensum est, longe post Innocentium IV. instituta fuit Rosæ aureæ benedictio, & quidem; uti ex dictis, & ex silentio memorati Petri Amelii, qui vivebat anno Christi mcccxcv l i i. licet conjicere, non ante annum MCD.

§. II.

De loco, in quo Rosa ipsa benedicatur, & de oratione ad benedictionem illius.

Pro ejus igitur benedictione juxta lectum paramenti, ubi Sanctissimus Dominus noster accipit sua paramenta, paratur parvum Altare, & super illud duo candelabra, & Pontifex indutus Amictu, Alba, Cingulo, Stola, Pluviali, & Mitra, accedit ad ipsum Altare; & deposita Mitra dicit: *Adjutorium nostrum in Nomine Domini. R. Qui fecit Cælum, & terram. V. Dominus vobiscum. R. Et cum spiritu tuo.*

Oremus.

Deus, cujus verbo, & potentia facta sunt omnia, & cujus nutu universa diriguntur, qui es lætitia, & gaudium omnium Fidelium: Majestatem tuam suppliciter exoramus, ut hanc Rosam odore, visuque gratissimam, quam hodierna die in signum spiritualis lætitie in manibus gestamus, bene ✠ dicere, & sancti ✠ ficare tua pietate digneris, ut plebs tibi dicata ex jugo Babylonice captivitatis educta, per Unigeniti Filii tui gratiam, qui est gloria, & exultatio plebis Israel, illius Jerusalem, quæ sursum est mater nostra, sinceris cordibus gaudium repræsentet. Et quia ad honorem Nominis tui Ecclesia tua hoc signo hodie exultat, & gaudet, Tu ei Domine verum, & perfectum gaudium largiaris, & devotionem ejus accipiens, peccata dimittas, Fide repleas, indulgentia foveas, misericordia protegas, adversa destruas, prospera cuncta concedas: qua-

quatenus per fructum boni operis in odorem unguentorum illius floris transeat, qui de radice Jesse productus, Flos campi, & Lilium convallium mystice prædicatur, cum quo in superna gloria cum Sanctis omnibus sine fine lætetur: qui tecum vivit & regnat in unitate Spiritus Sancti Deus per omnia secula seculorum. Amen.

COMMENTARIUS.

I. Sicut olim ex præscripto Romanorum Ordinum in Dominica iv. Quadragesimæ, quæ Dominica *Lætare* appellatur, uti supra jam diximus, Camerarius præsentabat Papæ in ejus Camera Rosam auream, ita & ibidem juxta ritum recentiorum parato parvo Altari idem Pontifex *indutus Amitu, Alba, Cingulo, Stola, Pluviali, & Mitra, accedit ad ipsum Altare*, & ipsam auream Rosam benedicit peculiari oratione in hoc nostro §. descripta, & confecta ex iis, quæ jam olim inter alios Durandus de eadem Rosa loquens Libro vi. Rationalis Divinorum Officiorum, Cap. liii. adnotavit. *Tria, inquit, designantur in tribus proprietatibus hujus floris, charitas in colore, jucunditas in odore, & satietas in sapore. Rosa quippe præ ceteris floribus colore delectat, odore recreat, & sapore confortat. Delectat in visu, recreat in olfactu, & confortat in gustu. Nempe Rosa in manu Ro-*

mani Pontificis gaudium Israelitici populi designat, quando per gratiam Christi data est illi de Babylonica captivitate redeundi. Tum vero post pauca & hæc addit, quibus magis magisque mysticus sensus orationis descriptæ illustratur: *Spiritualiter autem flos iste florem illum significat, qui de se dicit in Canticis: Ego Flos campi, & lilium convallium; & de quo Propheta: Egre dietur Virga de radice Jesse, & Flos de radice ejus ascendet. Qui vere est Flos florum, idest, Sanctus Sanctorum, quia præ ceteris floribus, idest, Sanctis colore delectat in visu.* Nam speciosus forma præ filiis hominum; in quem desiderant Angeli prospicere. *Qui odore recreat in olfactu, quia sicut legitur in Canticis: Meliora sunt ubera tua vino fragrantia unguentis optimis. Qui sapore confortat in gustu; quia panis, quem ipse dat, caro est pro mundi vita; omne delectamentum habens, & omnis saporis suavitatem.*

§. III.

De inunctione balsami, & impositione musci, ac aliis, quibus Rosa aurea benedicatur.

Finite Oratione, inungit cum balsamo Rosam auream, quæ est in ipso ramusculo, & superimponit muscum tritum, quæ per Sacristam ei ministrantur, & imponit incensum in thuribulo more consueto, & demum aspergit Rosam aqua benedicta, & adolet incenso. Interim Clericus Cameræ Apostolicæ sustinet Rosam, quam deinde dat ad manus Diaconi Cardinalis a dextris, & ille ad manus Pontificis, qui manu sinistra Rosam gestans, & dextra benedicens, progreditur ad Capellam, & Diaconi Cardinales hinc inde elevant fimbrias Pluvialis. Cum pervenerit ad Faldistorium, dat Rosam Diacono prædicto, qui eam Clerico Cameræ tradit, & ille eam super Altare ponit.

COMMENTARIUS.

I. Cœva est balsami inunctio, & musci impositio primæ Rosæ aureæ institutioni, uti addiscimus ex recitatis superius Romanis Ordinibus, quorum undecimus Auctore Benedicto, Num. xxxvi. ita inquit: *Dominica, Lætare Jerusalem, Statio ad Jerusalem in Palatio Sessoriano, ubi Dominus Pontifex honorifice cantat Missam, habens Rosam de auro cum musco.* Musci non modo, sed & balsami mentionem facit sequens Ordo Romanus xii. Auctore Cencio, Cap. viii. in fine, ubi agens de ipsa Dominica, ita inquit: *Camerarius representat Domino Papæ in Camera Rosam auream cum musco, & balsamo.* Idem legere est in aliis Ordinibus, & Romanæ Ecclesiæ Cæremonialibus, mysticumque ejus ritus sensum explicat Durandus Libro vi. sui Rationalis divinorum Officiorum, Cap. liii. Num. x. sic inquit: *Triplex autem est in hoc flore materia, aurum videlicet, muscus, & balsamum, quia triplex est in Christo substantia, Deitas, Corpus, & Anima. Sed balsamo mediante muscus auro conjungitur,*

quia anima mediante Corpus conjungitur Deitati. Divina enim natura tantæ subtilitatis est, ut corpori de limo terræ formato non congrueret uniri, nisi rationabili spiritu mediante. Tum vero mox addit: *Rursus flos ipse aureus est, quia Rex Regum, & Dominus Dominantium, cujus rabor apparuit in insigniis Passionis, & odor in gloria Resurrectionis &c.* Scio flocci a nonnullis pendere mysticas hujusmodi explicationes, sed dico omnino hujusmodi homines contemnendos arguendosque, tum quia Ecclesia passim in suis Orationibus mysticis hisce utitur significationibus, tum etiam quia antiqui non modo Patres, sed & ipsæ Sacræ Scripturæ, ac præsertim Liber Apocalypsis easdem adhibuerunt.

II. Quod Rosam auream spectat, jam longe ante Durandum, mysticam ipsius significationem docuit Alexander Papa III. in Epistola cviii. secundæ Appendicis apud Labbeum Tomo xii. Conciliorum editionis Venetæ, ad Ludovicum VII. Galliæ Regem data anno MCLXIII. cui illam misit. Sic enim Pontifex inter alia in ipsa Epi-

Epistola scribit: *Quia vero floris bujus significantiæ, tuam Celsitudinem credimus tanto libentius nostra velle expositione cognoscere, quanto te constet corde, & opere, divinis obsequiis, & piis actibus ferventius inharere: prudentia Regia serenitatis agnoscat, quod flos iste Christum Regem exprimit, ac designat, qui de se ipso loquitur, dicens: Ego Flos campi, & Lilium convallium. Aurum namque Regem non immerito dicitur adnotare, cum ad hoc designandum a Magis figuraliter oblatum fuerit Salvatori, ut per hoc Rex Regum, & Dominus Dominantium demonstraretur. Rubor autem, quo aurum coloratum est, & suffusum, Passionem significat Redemptoris, de quo utique scriptum legitur. Quis est iste, qui venit de Edom, tinctis vestibus de Bosra? Et iterum: Quare rubrum est indumentum tuum, & vestimenta tua sicut calcantium intorculari?*

III. Pergit Alexander Pontifex mysticum Rosæ sensum exponere, sic subdens: *Odor autem bujus floris, Resurrectionis ejus gloriam præfigurat; ut sicut ipse Primogenitus mortuorum ex multis Fratribus, & resurgens a mortuis, jam non possit mortis vinculo detineri; quia & mortem nostram moriendo destruxit, & vitam resurgendo in immortalitatis gloriam reparavit. Sane bujusmodi anfractus, & climata omnium scelerum scditate concreta tantus odor Dominica Resurrectionis aspersit, ut nulla pars Orbis alienam se ab odore sentiat, vel expertem: sed omnes se gaudeant odore hoc suavissimo spirituales nequitias in caelestibus jam vicisse. Porro si ad ipsius Christi resurrectionem figuraliter denotandam sancta illa Mulieres ad Sepulcrum aromata*

detulerunt, suavitate redolentium unguentorum gloriam præsignantes; quæ utique terrorem inferis, Calis gaudium, terris intulit sanctitatem. Hac sunt filii in Christo carissime, quæ in flore isto novæ eris figurari &c. Hanc Alexandri III. Papæ epistolam non videtur legisse auctor Cæremonialis Gregorii X. Papæ jussu editi, qui loquens de ipsa Rosa, Num. xx. ita in fine inquit: *Quid vero Rosa hæc, aurum, muscus, & balsamum, quæ sunt intus in ea, & quod tali die portatur, significant, diligenti inquisitori servatur.* Sed tandem post Alexandrum Durandus citato superius loco eandem mysticam significationem huic Rosæ tribuit, & insuper explicat quare portatur Dominica iv. Quadragesimæ: *Hujus floris bajulus, inquit, est Vicarius Salvatoris, Romanus videlicet Pontifex, Successor utique Petri, & Vicarius Jesu Christi, qui hunc florem fidelibus populis demonstrat, non omni tempore, sed in hac Dominica tantum, quæ septima est ab illa, quæ Septuagesima nuncupatur; quia Christus non in qualibet hora, sed in septima tantum ætate videtur ab illis, qui beata requie consolantur.*

IV. Porro quamvis & balsami inunctio, & mulci impositio cœva sit Rosæ aureæ institutioni, recens tamen est ille ritus, ut Rosa ipsa aqua benedicta aspergatur, & incensetur. Nullam profecto mentionem hujus ritus facit vel Romanus Ordo xv. auctore Petro Amelio, qui vivebat anno mcccxcviii. ubi fufe de ea loquitur Cap. xlviii. putoque iccirco cœpisse hunc ritum, cum cœpit benedictio istius Rosæ, nempe Seculo Christi xiv. uti jam a nobis notatum superius fuit.

§. IV.

De ritu donandi, vel mittendi alicui magno Principi auream Rosam.

Finita Missa, Pontifex, facta Oratione ante Altare, recipit Rosam, ut supra, & eam defert ad Cameram suam; & si ille, cui eam dare velit, est præsens, vocatur ad ejus pedes, & genuflexo dat ei Rosam, dicens: *Accipe Rosam de manibus nostris, qui licet immeriti, locum Dei in terris tenemus; per quam designatur gaudium utriusque Jerusalem, triumphantis scilicet, & militantis Ecclesiæ; per quam omnibus Christifidelibus manifestatur Flos ipse speciosissimus, qui est gaudium, & corona Sanctorum omnium. Suscipe hanc tu dilectissime Fili, qui secundum seculum nobilis, potens, ac multa virtute præditus es; ut amplius omni virtute in Christo Domino nobiliteris tanquam Rosa plantata super rivos aquarum multarum, quam gratiam ex sua uberanti clementia tibi concedere dignetur, qui est trinus, & unus in secula seculorum. Amen. In Nomine Patris, & Filii, & Spiritus Sancti, Amen.* Hoc aliquando in Capella factum fuit, finita Missa, antequam Papa descenderet de Sede sua; sed convenientius est, ut Papa revertatur ad Cameram suam cum Rosa; & ita apud Majores factitatum reperio.

COMMENTARIUS.

I. **D**onari consuevisse a Romano Pontifice auream Rosam Principi Viro, nobiliorive, docent nos allati superius Romani Ordines, ac varia tum vetera, tum recentiora ejus rei exempla. Fulconi Comiti Andegavensi donasse Urbanum II. anno MXCV. Rosam auream in Turonensi Civitate, ubi tunc Pontifex morabatur, testatur idem Fulco in ms. Libello relato a Luca Holstenio in Collectione Romana,

Parte II. his verbis: *Venit & inde Turonum, ibique datis venerabili Concilio Decretis, media Quadragesima coronatus est, & cum solempni Processione ab Ecclesia S. Mauricii ad Ecclesiam Beati Martini deductus, ubi mihi florem aureum, quem manu gerebat, donavit, quem ego etiam ob memoriam, & amorem illius, in Osanna, idest in Dominica Palmarum, semper mihi, meisque Successoribus deferendum constitui. Ex præscripto Ro.*

Romani Ordinis XIII. five Cæremonialis jussu Gregorii Papæ X. editi, ubi Papa dat alicui Rosam, ille osculatur manus ejus, & pedes, & redit ad domum suam cum Rosa decenter. Ceterum docet Romanus Ordo xv. auctore Amelio, Capite XLVIII. quod dum Pontifex ad Cameram suam redierit dat ipse Dominus Papa Rosam nobiliori, vel illi soli, cui magis placet, & ille incontinenti flectit genua, & osculatur pedem Papæ, dato etiam si esset Rex; deinde Papa recipit ipsum ad osculum oris. Idem docet in suo ms. Cæremoniali Joannes Bruno de Davantria in eo Capite, quod inscribitur, De officio quaritæ Dominica, qua vocatur de Rosa, ubi ita inquit: Dicta vero Missa, prout est consuetum, Dominus Papa eandem Rosam reportat usque ad Cameram suam; dum autem revertitur, sequuntur eum Nobiles in Curia existentes, & cum ad Cameram suam redierit, dat ipse Dominus Pa-

pa ipsam Rosam Nobili uno, de quo ei placuerit; & ille, cui data fuit per eum in Camera, statim ea recepta, osculatur pedem ipsius Papæ, & postea Papa recipit eum ad osculum oris.

II. Ergo ex recitatis locis, genuflexo Nobili datur a Pontifice Rosa aurea, quam etiam ille, qui accipit, osculatur pedem Pontificis. Rursus, ut ajunt Codices Cæremoniales, cum ad Cameram suam redierit Pontifex, Nobili Viro tradit mox auream Rosam; atque ad hunc ritum in citatis Codicibus notatum, & ad varia exempla, quæ ipsum ritum comprobant, alludit nostrum Cæremoniale, ubi in præsentî §. ait, licet aliquando in Capella, finita Missa, antequam Papa descenderet de Sede sua, tradita fuerit ab ipso Rosa aurea; convenientius tamen esse, ut Papa revertatur ad Cameram suam cum Rosa, & ita apud Majores factitatum reperiri. Id quod etiam deinceps factum etiam constat.

§. V.

De ritu servando ab eo, cui Rosa ipsa donatur.

Ille, cui Rosa data est, postquam manum, & pedem Pontificis osculatus est, eique pro tempore gratias egit, cum Papa in Camera vestes sacras deposuerit, ipse Rosam manu gestans, associatur usque ad Domum suæ habitationis a Collegio Cardinalium medius inter duos antiquiores Diaconos, post omnes alios Cardinales equitantes. Circa illum sunt pedites cursores Romanæ Curia cum suis baculis, qui solent illa die strenas ab eo, qui Rosam habuit, accipere.

COMMENTARIUS.

I. Juxta Romanum Ordinem XIII. seu Cæremoniale jussu Gregorii Papæ X. editum, Num. xx, ille qui Rosam auream a Summo Pontifice accepit, osculatur ejus manus, & pedes, & redit ad Domum suam cum Rosa decenter, Deferri consuevisse Rosam ipsam ab eo, qui illam a Pontifice accepit, ad propriam Domum, magno comitante equitatu aliquorum, etiam S. R. E. Cardinalium, docent Cæremoniales antiqui Codices, inter quos Romanus Ordo xv. auctore Amelio, Cap. XLVIII. ita eum ritum enarrat: Ille recedit, a Pontifice scilicet post acceptam Rosam, eum comitantibus duobus Diaconibus antiquioribus Cardinalibus, & cum illo equitant aliquantulum per Civitatem, quantum sibi placet. Addit tum mox: Sic etiam, si sit Rex, vel Imperator, aliqui de aliis Cardinalibus eum modicum equitando associare consueverunt; & sic revertitur ille ad comedendum cum Papa; & facto prandio cum gente sua, equitat per Civitatem absque Cardinalibus, cum suis Nobilibus, & Principibus. Cardinales ipsos equitantes Virum etiam Nobilem, qui non esset Rex, vel Imperator, comitari consuevisse aliquantulum per Civitatem, docet quidem laudatus Ordo xv. loco citato, ubi etiam notandum ait, quod Cardinales non consueverunt in Urbe associare Præfectum, cui donari scilicet solita fuit Rosa a Pontifice, quia satis habet de comitalibus. Porro Præfectus ipse, ut idem Ordo inquit, incontinenti cum Nobilibus Romanis equitat cum magno triumpho per Urbem.

II. Cæterum ut alia exempla omittam, tradit Auctor primæ Vitæ Urbani Papæ V. apud

Baluzium, & apud Pagium in ipso Urbano V. Numero xxxiv. Joannam Reginam Sicilia anno mcccclxviii. venisse Romam, ubi & aderat Petrus Rex Cypri, & cum tunc occurreret Dominica, Latere Jerusalem, in qua consuevit dari per Papam Rosa aurea Viro nobili tunc in Curia existenti, dictam Rosam memorata Joana tanquam nobiliori, majori, & excellentiori, licet Vir non existeret, dedisse, Regi prædicto ipsam in hoc præferendo, qua more solito domum cum Cardinalibus, & aliis Nobilibus per Urbem equitavit. Baluzius in Notis ad hunc locum columna 1015. observat ex Garosco de Ulmoisca veteri factum illud displicuisse quibusdam Cardinalibus. Sed quicquid de ea re sit, ubi Martinus V. Pontifex Florentiæ existens Rosam auream in Dominica quarta Quadragesimæ, seu Latere Jerusalem, a Romano Pontifice gestari solitam Florentino populo donavit, Thadæus Gherardinus nomine Confalonerii tunc ægrotantis eam recepit, & a civibus, ac populo, & quindecim S. R. E. Cardinalibus, aliisque Prælati stipatus eandem ad Palatium Minorum detulit. Ita Oldoinus in Additionibus ad Ciaconium in Vita laudati Pontificis Martini V.

III. Possem in hoc Capite & plura alla adnotare de ipsa Rosæ aureæ benedictione, & de ritu eam ad Principes transmittenda, sed videri de iis possunt docti Auctores Chartarius, & Rocca, ac præ ceteris doctissimus amicus noster Josephus Carafa Clericus Regularis in celeberrimo Opere, De Capella Regis utriusque Sicilia, & aliorum Principum, Cap. xi. Vide nostrum Romanum Pontificale Tomo II. in Commentario ad

ad §. II. Tituli xxiii. pag. 38. & seq. ubi inter alia retulimus doctam Epistolam in qua Reginaldus Cardinalis Polus mysticam significationem

ejus ritus, ac Ensis & Pilei benedici soliti a Romano Pontifice in nocte Natalis Domini, pie solideque exponit,

C A P U T IV.

De Ense in nocte Nativitatis Domini dando, & benedicendo.

§. I.

De origine ejus ritus.

In nocte Nativitatis Domini nostri Jesu Christi consueverunt Romani Pontifices Ensem benedictum cum quodam Capello Ducali ornatum candidis margaritis in formam columbæ, alicui magno Principi, si præsens est, dare, vel, si non sit præsens, ad aliquem Regem, vel alium Principem per aliquem ex suis transmittere. Sed quamvis Ensis benedictus vocatur, non tamen reperi ejus benedictionem. Sixtus Papa Quartus aliqua verba ordinavit, cum Ensis datur, dicenda, quæ subjiciam.

C O M M E N T A R I U S.

I. **S**I qua fides Libro diversarum Chronicarum Regni Siciliae ms. in Archivo Vaticano, Num. 454. juxta Bzovium anno MCCCLXIII. Num. IV. in Festo Paschatis, seu die IX. Aprilis benedictum inter sacrificandum *Ensem auratum* Urbanus Papa V. qui eo anno Romæ erat, Joannæ Siciliae Reginae Romæ tunc immoranti donavit, postquam scilicet eidem, uti dictum est in Commentario ad §. v. Capituli præcedentis, Rosam auream largitus fuerat. Sed & ex eodem Codice ms. docemur, ipsam Reginam Joannam Ense ipso donasse Petrum Cypri Regem, qui eo accinctus Nicolaum Spinellum Juvenatum Reginae Cancellarium baltheo militari ornavit. At vero, ut ait hic noster §. in nocte Nativitatis Domini nostri Jesu Christi consueverunt Romani Pontifices Ensem benedictum cum quodam Capello Ducali ornatum candidis margaritis in formam columbæ alicui magno Principi, si præsens est, dare, vel, si non sit præsens, ad aliquem Regem, vel alium Principem per aliquem ex suis transmittere. Ceterum ut id aliquo exemplo comprobemus, Urbanus Papa VI. Lucæ existens labente anno MCCCLXXXVI. nocte Natalis Domini, Divinis peractis, *supremum Magistratum Lucensem Ensem & Pileo gemmis auroque exornatis donavit*, ut inquit Ciaconius in ejusdem Urbani Vita in fine. Quæ Ciaconii verba esse Nicolai Tugrini Lucensem Oratoris in Oratione ad Alexandrum VI. qui Ensem & Pileum a Pontifice datos, *libertatis, & justitiæ, sine qua libertas stare non potest, insignia vocavit*, observat Andreas Viſtorellus in suis ad Ciaconium Notis.

II. Usus benedicendi Ensem auratum jam ante Urbanum VI. invaluisse, probat allatum exemplum Urbani Papæ V. qui, ut superius diximus, anno MCCCLXIII. Joannæ Siciliae Reginae Romæ dedit. Benedixit quidem illum Urbanus ipse V. in Festo Paschatis; consuevitque deinde in nocte Nativitatis Dominicæ benedici una cum Pileo, ut præter allatum Urbani VI. exemplum docent nos aliorum Romanorum Pontificum exempla, qui vel ante Sixtum IV.

claruerunt. Certe Ensem & Pileum benedictos Paulum II. anno MCDLXIII. Friderico III. Imperatori Romæ dedisse in ipsa nocte Natalis Domini, scribit ipse ordinator nostri hujus Cæremonialis Augustinus Patricius in descriptione adventus Friderici ad laudatum Paulum Pontificem, Num. XI. ubi etiam ita inquit: *Gladium sacrum, quo eum volebant accingi, non accinxit; sed armigero suo jussit dari, & Pileum cuidam ex adstantibus. Donatur enim & Pileum quoddam cum Ense, ut nosti. Imperator post hæc ante Pontificis Thronum accedens, detecto capite strictum Ensem ex armigero manu accipiens, eum tertio vibrat, redditque statim armigero. Cantavit deinde Evangelium in Matutino ipsius noctis Natalis Domini, septimam scilicet lectionem, quæ principium habet Evangelii secundum S. Lucam, ubi dicitur: Exiit Edictum a Cesare Augusto &c. quo lecto, Imperator sacras exuit vestes, & inclinata rursus cervice coram Pontifice, ad Sedem suam rediit. Ille autem, qui Gladium tenebat sacrum, eum in aurea vagina condidit, superposuitque Pileum. Descriptio Friderici adventus Romam ad Paulum II. data ad Joannem Manellum Cremanum extat apud Mabillonium Tomo I. Musei Italici Parte II. pag. 256. & seqq.*

III. Sed & ante Paulum II. Pius itidem II. ejusdem generis Ensem dono misit Philippo Burgundiæ Duci, & alium alterius anni benedictione sacrum Ludovico XI. Galliarum Regi, cum Pragmaticam Sanctionem, quam Carolus VII. promulgaverat, ab ipso, pio animo damnatam, sublatamque intellexisset. Ensis ipse, ut idem Viſtorellus ait in Additionibus ad Ciaconium in Vita Urbani VI. gemmis, & auro, ac hisce versibus ornatus erat.

Exerat in Turcas tua me Ludovico furentes

Dextera: Grajorum sanguinis ultor ero.

Corruet Imperiū Mahumetis, & incluta rursus.

Gallorum virtus, te, petit astra, Duce.

Porro quod vel nostris temporibus Ensis ipse ac Pileus non modo in nocte Natalis Domini, sed & alio quocumque Festo solemni benedici consueverit, docet nos Exemplum Clementis Pa-

Papæ XI. qui Ensem, Pileumque, quos anno MDCCXVI. ad Principem Eugenium de Sabaudia misit ob victoriam ab eo de Turcis ad Varadinum eodem anno relatum, benedixit in Ecclesia S. Mariæ de Populo die VII. Septembris. Porro ut huic Commentario finem faciam, tamen si benedici olim Ensis consueverit, ut docuimus supra exemplis variorum Pontificum, fateatur nihilominus Auctor hujus nostri Cæremonialis Augustinus Patricius, se ejus benedictionem, seu benedictionis formulam non reperisse, quæ scilicet dicebatur in benedictione Ensis, quæ fieri consuevit in nocte Natalis Domini; nam alias antiqua est benedictio Ensis, occurruntque variæ ejus formulæ in antiquis mss. Pontificalibus allatis ab erudito Martene in Li-

bris, *De antiquis Ecclesiæ ritibus*. Quicquid sit recenset quidem Patricius in hoc Capite benedictionem, & verba præscripta à Sixto IV. dicenda, cum Ensis datur, & Pileus. Sed teste Victorello loco citato, Urbanus VIII. anno Jubilei MDCCXV. Poloniæ Principi hujusmodi Ensem Pileumque dedit, præscripsitque egregias sacras preces, quas idem Victorellus affirmat, eas se mss. vidisse in Libro ms. Benedictionum Sacrarum Apostolici. Addit autem & illud mox, non vetuisse tamen Urbanum ipsum Papam VIII. quin institutis a Sixto IV. precibus scilicet in hoc nostro Cæremoniali descriptis, *Successores uti possint, si velint*; nemo enim est qui Romano Pontifici possit legem præscribere, nam est in ejus arbitrio ritus Prædecessorum mutare.

§. II.

Ritus benedicendi ipsum Ensem cum Pileo.

Benedictio autem poterit fieri hoc modo, si placebit. Pontifex indutus Alba, Cingulo, Amictu, & Stola, antequam sumat Cappam purpuream, qua in hac nocte uti solet, benedicit Ensem, quem Clericus Camerae in manu tenet, dicens. *V. Adjutorium nostrum in Nomine Domini. R. Qui fecit Cælum & terram. V. Dominus vobiscum. R. Et cum spiritu tuo.* Oremus.

Benedicere digneris, quæsumus Domine Jesu Christe, hunc Ensem in defensionem Sanctæ Romanæ Ecclesiæ, & Christianæ Reipublicæ ordinatum nostræ benedictionis officio ad vindictam malefactorum, laudem vero bonorum, ut per eum, qui te inspirante, illo accingetur, vim æquitatis exerceas, molemque iniquitatis potenter evertas, & Sanctam Ecclesiam ejusque Fideles, quos ut pretioso Sanguine tuo redimeres, hodie in terris descendere, & carnem nostram sumere dignatus es, ab omni periculo protegas, atque defendas; & famulum tuum, qui hodie Gladio in tuo Nomine armatus erit, pietatis tuæ firma custodia manias, illæsumque custodias. Qui vivis & regnas cum Deo Patre in unitate Spiritus Sancti Deus per omnia secula seculorum. Amen.

Aspergit deinde Gladium, & Capellum aqua benedicta, & incenso adolet. Deinde sumit Cappam, & præcedente Clerico Camerae cum Ense benedicto immediate ante Crucem, Pontifex descendit ad Capellam, & omnia servantur, ut in Officio noctis Nativitatis Domini dicitur.

COMMENTARIUS.

I. **A**git & de ipsa benedictione Ensis fieri solita a Summo Pontifice in nocte Natalis Domini Grassus in suo ms. Diario, ubi enarrans gesta Pontificatus Leonis X. ad diem XXV. Decembris anni MDXIII. hæc habet: *Papa venit, ad Capellam scilicet, cum prius benedixit Spatam in Camera sua. Ego dixi sibi, non bene fuisse, quia Papa id facit in Camera sua, quando ipse non venit ad Missam, aut quando non celebrat. Ipse dixit, esse solitum benedicere in nocte. Respondi, non bene esse, nisi quando aliquis Princeps est præsens, qui debeat cantare Lectionem cum nudo ense, quia tunc Papa benedicit in nocte; alias Papa regulariter semper debet in die benedicere apud lectum paramentorum, cum primum ipse paratus est totaliter, absque Regno, & jussit Papa, ut de cetero sic faciam servari. Sed audiamus uti ritum ipsum recenset Franciscus Mucantius in suo ms. Diario ad annum MDLXXIII. ubi refert gesta Pontificatus Gregorii Papæ XIII. In nocte Nativitatis Domini nostri Jesu Christi circa & ante tertiam horam Sanctissimus Domi-*
To. I.

nus noster descendit per scalas secretas in Sacristiam Capella Palatina..... Pontifex in ipsa Sacristia paratus Amictu, Alba, Cingulo, & Stola, & imposito incenso in thuribulo, ministrante Priore Presbyterorum Cardinalium, benedixit Ensem, & Pileum more solito. Mox accepta Cappa sericea, & Ense ante ipsum per Clericum Camera delato, processit ad Capellam. Ensis autem cum Pileo fuit traditus a prædicto Clerico in manibus unius Clavigeri, qui illud tenuit per totum Officium super cornu sinistro Altaris, prout a quibusdam annis circa introductum fuit.

II. Reprehendit hunc morem Macantius, minusque id convenire inquit, quia debet poni simpliciter super Altare, nec decet ipsum Clavigerum armatum adharere continuo Altari, sed posset aliquo modo provideri, ut Ensis prædictus sustentaretur aliquo ferreo, vel ligneo instrumento super Altari, ne caderet, quod erit in Congregatione resolvendum. Huc usque Mucantius Apostolicus Cæremoniarius. Sane ritum nostro hoc ævo a Benedicto XIII. ea in re

M m ser-

servatum enarrat in suo ms. Diario Franciscus Bolza Novocomensis Cæremoniarius Apostolicus ad annum MDCCXXIV. sic inquit: *Descendit paulo post per gradus secretos Sanctissimus Dominus noster ad cubiculum Sacrarii, indutusque usque ad Stolum inclusive a Cardinalibus Diaconis, benedixit de more Ensem cum Pileo, quo ante Crucem procedente, venit cappatus, caputioque testus ad Sixtinam, ubi Clericus Camera Ensem Mazzerio consignavit in cornu Epistola supra Mensam Altaris sustinentum. Eadem legere est in aliis Apostolicorum*

Cæremoniariorum Diariis passim, ubi agitur de ritu servando in Pontificia Capella nocte Natalis Christi.

III. Quod orationem autem spectat in hoc nostro §. descriptam, quæ incipit, *Benedicere digneris &c.* compacta & ipsa est ex antiquis Orationibus, seu verborum formulis, quæ in traditione Ensis dici jam olim consuevere, ubi Imperatores, Regesque coronabantur, imo & in benedictionibus Ducum, ac Militum, uti supra suis locis diximus in nostris ad eos Titulos Commentariis.

§. III.

De oratione à Sixto IV. instituta in ipsius Ensis traditione.

Cum vero Pontifex dat Ensem prædictum alicui præsentem, dicit hæc verba, quæ, ut diximus, Sixtus IV. instituit: *Solent Romani Pontifices in præclara Natalis Domini celebritate Christianissimo, Clarissimoque alicui Principi ornatum Ensem dare, aut destinare, quæ res profecto non caret mysterio. Unigenitus namque Dei Filius, ut humanam naturam suo reconciliaret Auctori, eam assumere dignatus est; ut inventor mortis diabolus per ipsam, qua vicerat, vinceretur, quæ quidem victoria per Ensem congrue designatur. Fuerunt insuper infideles Arianæ, qui non veriti sunt Dei Filium puram creaturam affirmare; cum tamen hodierni Evangelii Scriptura testetur, Deum omnia fecisse per Verbum. Largitur igitur præsentem die Maximus Pontifex Ensem Dei infinitam potentiam signantem in Christo Deo vero, Patrique aequali, & vero homini residentem, per quem facta sunt omnia, juxta Davidicum illud: Tui sunt Cæli, & tua est Terra, Orbem Terræ, & plenitudinem ejus tu fundasti, aquilonem & mare tu creasti. Sedes denique Dei, Apostolica videlicet Sedes, a Christo suum sumpsit stabilimentum, extititque præparata Dei justo judicio, præmio, atque justitia, quibus Salvator noster verus Jesus Deus, & homo profligavit Sedis ipsius adversarios, hæreticos videlicet, & tyrannos, juxta id quoque Propheticum: Justitia, & judicium præparatio Sedis tuæ. Figuratur denique Pontificalis hic Gladius potestatem summam, temporalem a Christo Pontifici ejus in Terris Vicario collatam, juxta illud: Data est mihi omnis potestas in Cælo, & in terra. Et alibi: Dominabitur a mari usque ad mare, & a flumine usque ad terminos orbis terrarum. Quam & declarat Cappa illa sericea, quam Pontifices gestare solent in nocte Nativitatis Domini. Nos ergo volentes, ut æquum est, approbatas Sanctorum Patrum consuetudines observare, statuimus, & Principem Catholicum, Sanctæque Sedis a Deo utrumque Gladium habentis filium devotissimum hoc nostro præclaro munere insignire, necnon & hoc Pileo in signum muniminis, & defensionis adversus inimicos Fidei, & Sanctæ Romanæ Ecclesiæ protegere. Firmetur igitur manus tua contra hostes Sanctæ Sedis, ac Christi Nominis, & exaltet dextera tua, eos veluti ipsius assiduus, intrepidusque propugnator de terra deprendendo, & armetur caput tuum Spiritus Sancti per columbam (1) perleam figurati protectione adversus eos, in quos Dei justitia, atque judicium pro Romanæ Sanctæ Ecclesiæ, & Apostolica Sede præparatur. Quod tibi præstare dignetur idem Dei Filius, qui cum Patre & Spiritu Sancto vivit & regnat Deus per infinita secula seculorum. Amen.*

COMMENTARIUS.

I. **T**amet si hæc oratio, seu concio instituta primum a Sixto IV. qui electus Pontifex fuit anno MCDLXXI. antiquiora tamen sunt ipso argumenta, quibus ea oratio nititur. Ut alia omittam, notatu dignum est illud, quod idem Pontifex docet, sic inquit: *Figurat denique Pontificalis hic Gladius potestatem summam temporalem a Christo Pontifici ejus in Terris Vicario collatam juxta illud: Data est mihi omnis potestas in Cælo, & in Terra. Et alibi: Dominabitur a mari usque*

ad mare; & flumine usque ad terminos orbis terrarum. Quam & declarat Cappa illa sericea, quam Pontifices gestare solent in nocte Nativitatis Domini. Primum, qui ex Romanis Pontificibus in Officio noctis Natalis Christi Cappam laneam rubei coloris adhibuerit, fuisse Bonifacium IX. testis est Petrus Amelius in Ordine Romano xv. Cap. vii. ubi ita inquit: *In Matutinis Papa venit indutus Cappa lanea. Modernis temporibus est de veluto cremesino foderata de ermelinis. Hoc adinvenit Bonifacius IX.*

(1) Ita legitur in editione Romana, deest vero vox perleam in Veneta 1. & in Colonienfi editione.

cus IX. Cappa lanea de scarlato rubeo, clausa usque ad medium pectoris cum bireta connodata subtus barbam propter frigus; & sine Mitra sedet in dictis Matutinis, quas ipse incipit more solito. Nec stant ante ipsum, nec ad latera Cardinales Diaconi, sed sedens in scamnis suis iuxta ordinem suum. Rursus Cap. cxxxvi. ita in eandem rem ait: Nota bene, & bene nota, prout est in Rubrica de Mitra portanda; quia quandocumque Papa indutus portat Mitram in capite in officio, duo Diaconi stant ante ipsum, & unus Presbyter Cardinalis. Sed ut alia omit- tam ejusdem Auctoris loca, non omitendum, quod mox subjicit Cap. cxxxvii. Sed nota quod in Parasceve, quando Papa stat in Cappa lanea a medio pectoris aperta usque ad pedes, tunc non stant ante eum, quoniam non consuevit Mitram portare, neque caputium replicatum super caput, nec etiam nocte Nativitatis.

II. Plura scitu digna docet de Cappa eru- ditissimus Petrus Morettus in celebri Opusculo, seu in Disceptatione Epistolari, quæ inscripta est, De ritu variandi Choralis indumentum &c. Mysticam vero Cappæ significationem tradit inter alios Macrus in suo Hierolexico, verbo, Cappa, ubi ex Ruperto in Cap. i. Apocalypsis, ait, Cappam significare Sacerdotalis dignitatis eminentiam; caudæ vero illius longitudinem denotare, quod usque ad diem extremum Judi- cii sit dignitas Sacerdotalis duratura. Quod Cappam spectat, quam in ipsa nocte Nativitatis Dominicæ Summus Pontifex gestat, Gladium- que ab eo tunc benedictum, docet in hoc no- stro §. Sixtus Pontifex IV. iidem denotari pote- statem summam temporalem a Christo Pontifici ejus in Terris Vicario collatam juxta illud, Mat- thæi scilicet Cap. xxviii. Data est mihi omnis potestas in Cælo, & in terra; & alibi, nempe in Psalmo lxxi. Dominabitur a mare usque ad mare, & a flumine usque ad terminos orbis ter- rarum. Certe hæc fuit jam longe ante Sixtum IV. multorum Theologorum, & Jurisconsulto- rum sententia, Summum scilicet Romanum Pontificem jure divino plenissimam habere po- testatem in universum terrarum Orbem, tum in rebus Ecclesiasticis, tum in politicis. Ita docent Alvarus Pelagius Lib. i. De planctu Ecclesiæ, Cap. xiii. Augustinus Triumphus in Summa, De potestate Ecclesiæ, Ostiensis in Capite, Su- per his, De voto & voti redemptione, Panormi- tanus in Capite, Novit, De judiciis, & alii non pauci. Quin etiam Ostiensis ulterius pro- grediens asserit, per Christi adventum omne- Dominium Principum infidelium translatum esse ad Ecclesiam, & residere in Summo Pontifice ut Vicario Summi & veri Regis Christi, & ideo posse Pontificem Regna infidelium jure suo do- nare quibus voluerit fidelium.

III. At vero communis Catholicorum Theo- logorum sententia est plane illa, quam propu- gnat etiam Cardinalis Bellarminus Lib. v. De Summo Pontifice, Cap. i. & seqq. Romanum, nempe Pontificem, ut Pontificem, non habere directe & immediate ullam temporalem potesta- tem, sed solum spiritualem, ratione autem spiritualis habere saltem indirecte potestatem quandam, eamque summam in temporalibus. Atque hanc sententiam tenent Hugo de S. Victo- re, Lib. II. De Sacramentis, Parte II. Cap. iv. Alexander Alensis, Parte III. summæ, Quæ- To. I.

stione xi. & Parte iv. Quæstione x. in explica- tione Canonis Missæ in illud: Et pro Rege N. itemque S. Bonaventura, De Ecclesiastica Hie- rarchia, Parte II. Cap. i. Durandus in Libro, De origine jurisdictionum, Quæstione III. in fine, Joannes de Parisio in Tractatu, De pote- state Regia & Papali, Cap. vi. & vii. Jaco- bus Almain, De suprema potestate Ecclesiastica, Cap. vi. Gabriel Biel in explicatione Canonis Missæ, Lectione xxiii. Henricus de Gandavo Quodlibeto vi. Quæst. xxiii. Joannes Driedo Lib. II. De libertate Christiana, Cap. II. Car- dinalis Turrecremata Lib. II. Summæ, Capite cxiii. & seqq. & alii plures, quos recenset laudatus Bellarminus loco citato Cap. i. qui etiam sententiam ipsam Theologorum, Papam scilicet habere summam temporalem potestatem indirecte, eaque verba Matthæi xxviii. Data est mihi omnis potestas in Cælo & in terra, in- telligi debere ait Capite V. non de potestate temporali, sed spirituali, uti exponunt S. Hie- ronymus, & S. Anselmus, qui esse volunt sen- sum eorum verborum, ut sicut in Cælo Chri- stus est Rex Angelorum, ita per Fidem regnet in cordibus hominum.

IV. Celeberrimum pro contraria sententia, quæ dicit, Summum Pontificem jure divino ha- bere plenissimam potestatem in universum Ter- rarum Orbem, tum in rebus Ecclesiasticis, tum in politicis, argumentum illud est, quod Chri- stus Lucæ xxii. versu xxviii. duos gladios Petro concedat. Cum enim discipuli dicerent: Ecce duo gladii hic. Christus non ait: nimis est, sed, satis est; quare S. Bernardus Lib. iv. De consideratione, & Bonifacius VIII. in Extra- vagante, Unam sanctam, De majoritate & obe- dientia, ex eo loco deducunt, Romanum Pon- tificem S. Petri Apostolorum Principis Successo- rem duos gladios ex Christi institutione habe- re. Sed respondet Bellarminus, juxta littera- lem ejus loci sensum, nullam fieri ibidem men- tionem de gladio spirituali, vel temporali Pon- tificis, sed solum Dominum illis verbis admo- nere voluisse discipulos, tempore passionis suæ in iis angustiis, & metu ipsos futuros fuisse, in quibus esse solent, qui tunicam vendunt, ut emant gladium; ut ex Theophylacto, aliisque Patribus colligitur. Porro S. Bernardus, & Bo- nifacius Papa VIII. ut memoratus Auctor notat, mystice interpretati sunt eum Evangelii locum; volunt enim significare, Pontificem habere per se gladium spiritualem; & quia gladius tem- poralis subiectus est spirituali, posse Pontificem Regi imperare, aut interdicare usum gladii temporalis, quando nimirum id requirit Eccle- siæ necessitas.

V. Sed audiamus verba S. Bernardi, quæ Bonifacius VIII. imitatus est. Sic enim ille cita- to Lib. iv. De consideratione, inquit Papam Eugenium III. alloquens: Quid tu denuo usur- pare gladium tentes, quem semel jussus es pone- re in vaginam? quem tamen qui tuum negat, non satis mihi videtur attendere verbum Domi- ni, dicentis sic: Converte gladium tuum in vaginam. Tuus ergo & ipse, tuo forsitan nu- tu, etsi non tua manu evaginandus; alioquin si nullo modo ad te pertinet & is, dicentibus Apostolis: Ecce gladii duo hic; non respondisset Dominus: Satis est; sed: Nimis est. Uterque ergo Ecclesiæ, & spiritualis scilicet gladius, &

materialis; sed is quidem pro Ecclesia, ille vero & ab Ecclesia exercendus est. Ille Sacerdotis, is militis minu, sed sane ad nutum Sacerdotis, & iussu Imperatoris. Ubi etiam notandum, quod cum hæretici reprehendunt Bonifacii Extravagantem, ut erroneam, arrogantem, tyrannicam, sic enim de ea passim loquuntur, monendi sunt, ut cogitent eadem esse Bernardi verba in Libris, *De consideratione*, ubi tamen sine adulatione loquitur, ut Calvinus Lib. IV. *Institutionum*, Cap. XI. §. X. dicat, ita loqui in Libris illis Bernardum, ut veritas ipsa loqui videatur. Porro Petrum Apostolorum Principem jam non solum supra totum Orbem auctoritatem accepisse, sed etiam utriusque gladii potestatem fuisse assequutum, docuit inter alios Josephus Stephanus Valentinus Lib. I. *De potestate coactiva, quam Romanus Pontifex exercet in negotia secularia*, Cap. VIII. quem Romæ edidit anno Christi MDLXXXV¹, dedicavitque Sixto Papæ V.

VI. Mysticum Cappæ sericeæ sensum, quam Romani Pontifices gestare solent in nocte Nativitatis Domini, ad declarandam scilicet potestatem summam temporalem a Christo Pontifici ejus in terris Vicario collatam, ut ait in hoc

nostro §. Sixtus IV. nonnulli forte improbaverint, qui scilicet morem medii, & infimi ævi ignorant, quo magis magisque mysticæ rerum cæremonialium significationes invaluerunt. Sed politici ipsi, qui easdem irrident, ridendi potissimum sunt, quippe qui non semel & ipsi ineptis usi sunt argumentis ad ampliandam laicorum Principum vel in rebus Ecclesiasticis potestatem. Ut alia exempla omittam, an non ridendi sunt illi, qui jus Regaliæ competere Francorum Regi contendebant ob rotunditatem ejus Regiæ Coronæ, quasi alii Principes Coronam quadratam gestent. Porro nusquam auditum est, Regum, aut Imperatorem aliquem quadratam Coronam gestasse; imo licet Reges omnes rotundam seu sphericam Coronam deferant; contendunt tamen non pauci Auctores Galli, jus Regaliæ non ad alios, quam ad solos Galliæ Reges spectare: *Franci contendunt, nihil ipsis peculiariter esse inter jura Coronæ, quam illud illustre, & excellens jus Regaliorum &c.* Verba sunt Arnulphi Ruzæi in Tractatu, *De jure Regaliorum*. Sed de his vide, quæ scripsimus Tomo IV. Conciliorum in Commentario ad Canonem XII. Generalis Concilii II. Lugdunensis, ubi fuse de ea re diximus.

§. IV.

De ritibus servandis ab eo, qui Ense ipso donatus est.

Princeps, qui Ense donatus est, ut primum illum de manu Pontificis accepit, pedem, & manum ejus osculatur, & pro tempore gratias agit; deinde discedens, deducitur ad domum habitationis suæ a familiaribus, & domesticis Prælati Papæ, & ab Amicis, Oratoribus, & Nobilibus, qui voluerint illum honorare. Servientes armorum præcedunt illum, qui Ensem cum Pileo ante Principem præfert, & in hoc actu ipsi debent habere præcipuam strenam, sicut Cursores in Rosa.

COMMENTARIUS.

I. **E** Nsem, & Pileum benedictum in nocte Natalis Christi anno MCDLXVIII. donasse Paulum II. Pontificem Friderico III. Imperatori, qui Matutino ipsius noctis interfuit, cantavitque Stola ac Pluviali indutus septimam Lectionem, idest principium Evangelii secundum Lucam, *Exiit Edictum a Cæsare Augusto, ut describeretur universus Orbis*, docet nos Auctor hujus Cæremonialis Augustinus Patricius in Epistola ad Joannem Manellum Cremanum, in qua describit adventum ipsius Friderici Romam ad laudatum Paulum Papam, sic inter alia inquires: *Imperator post hac ante Pontificis Thronum accedens, strictum Ensem ex armigeri manu accipiens, eum tertio vibrat; reddiditque statim armigero, vadensque deinde ad ornatum plateum, quo Liber sustinebatur, inclinato capite benedictionem petiit a Pontifice; qua accepta cantavit Evangelium usque ad principium Homeliæ. Homeliæ vero prosecutus est Cardinalis Diaconus, qui ministrabat a sinistris. Evangelio lecto, Imperator sacras exuit vestes; & inclinata rursus cervice coram Pontifice, ad Sedem suam rediit. Ille autem, qui Gladium tenebat sacrum, eum in aurea vagina condidit, superposuitque Pilleum.* Hactenus Patricius. Videri autem potest figura ipsius Gladii, & Pilei,

sicut & aureæ Rosæ, apud eruditum Angelum Roccam Tomo I. ejus Operum Romanæ ultimæ editionis in Commentario, *De aurea Rosa*, ubi inter alia descripsit Epistolam Reginaldi Cardinalis Poli ad Philippum Regem, & Mariam Reginam Angliæ, in qua de Rosa ipsa aurea, & Ense, muneribus ad ipsos Regem & Reginam a Julio III. Papa missis fuse differit. Videri etiam potest quid & de eisdem Ense, ac Pileo dono ad Reges, & Principes missis fuse docte solideque scripsit amicus noster præstantissimus Auctor Josephus Carafa Clericus Regularis in Opere, quod inscripsit, *De Capella Regis utriusque Sicilia, & aliorum Principum*, Cap. XI. Porro nefas esse puto omittere hoc loco auream Allocutionem Sanctissimi Domini Nostri BENEDICTI Papæ XIV. habitam in Consistorio secreto die xxxi. Julii MDCCXLVII. *De Ense, & Pileo ad Fratrem Emmanuelem Pintum Ordinis Hierosolymitani Magnum Magistrum dono transmittendis.* Est autem hujusmodi.

VENERABILES FRATRES.

Nemo Vestrum fortasse reperietur, qui præsens aliquando non interfuerit, cum Nos ipsi, vel aliquis ex Pontificibus Prædecessoribus nostris Gladio benedictionem impertivit, priusquam die Natalis Salvatoris sacra solemnia perage-

agerentur. Equidem vulgi vocabulo *Gladium* nuncupavimus, sed in Ritualibus libris *Ensis* appellatur; nam inter reliquas illius Festivitatæ ceremonias, ac ritus, *Benedictio Ensis, ac Pilei* recensetur.

Porro hunc ritum Ecclesiasticum commemorat Liber de Sacris Romanæ Ecclesiæ Ceremoniis, qui in lucem editus fuit, cum Leo Decimus Prædecessor noster Summum Pontificatum gereret, a Christophoro Marcello Corcyrensi Archiepiscopo, quem universa fere antiquitas ejusdem Libri auctorem censuit, quod plures etiam hac ætate verum arbitrantur, qui nempe ignorant, eum Librum confectum fuisse ab Augustino Patricio Piccolomineo, Pientino Episcopo, cum Innocentius Octavus hanc Sedem Apostolicam obtineret.

Hic libenter prætermittimus hujus Ecclesiastici ritus mysterium explanare; cum Theophilus Raynaudus de illo satis erudite copioseque disferuerit. Id etiam satis per se explicatur ex verbis, quibus in benedictione *Ensis, & Pilei* a Sixto Quarto ad Urbanum Octavum Summi Pontifices utebantur. Idem aperte constat ex verbis, quæ substituit Urbanus Octavus, & quæ in ea benedictione peragenda ad hanc usque diem proferuntur. Hæc, inquam, libenter omittimus, sed eximiam Reginaldi Poli Cardinalis Epistolam Angliæ Regi, Reginæque inscriptam, præterire nullo modo debemus. In ea symbolum *Ensis Pileique* declarans, quæ a Julio Tertio Prædecessore nostro iisdem Principibus dono missa fuerant, Justitiæ exercitium per *Ensem* significari testatur; benedictione autem illum sacrari die Natali Salvatoris, ut Reges intelligant, a Christo Domino *Ensem* se accipere, qui Justitiæ Rex a Prophetis nuncupatur: *Pileum* vero gemmis exornatum, Columbæ effigie superaddita, Reges potissimum admonere, ne unquam prava cupiditate adducti *Ensem* distringant, atque adhibeant, sed ea solum mente, animoque, quem Salvator in terris gerebat, qui margaritas ipsas candore superavit, in quem etiam Spiritus Sanctus Columbæ figuram præferens descendit, ut sedem in eo figeret, & suorum munerum amplitudine cumlaret.

Missam quoque facimus veterem Romanorum Pontificum consuetudinem, qui Imperatori, Regi, aut Principi præsentibus *Ensem, & Pileum* largiebantur. Id clare desumitur ex Libro, quem superius nominavimus, *De Sacris Romanæ Ecclesiæ Ceremoniis*. Ejusdem autem rei testimonium vetustius continetur in Actis Concilii Constantiensis celebrati coram Pontifice Joanne Vigessimotertio, & Imperatore Sigismundo. Theodoricus quippe Urie, qui totius Concilii historiam posteritati commendavit, illud scriptum reliquit, ab eodem Imperatore lectum fuisse cum cantu Evangelium, *Exiit Edictum*, cum die Natali Domini Pontifex rem Divinam Sacro solemniter conficeret: quo peracto, *Ensem* manu Pontificis accepit Imperator, qui simul admonitus de Ecclesia tuenda, ac defendenda, id se facturum majori, quo posset, studio, & contentione, jure jurando confirmavit. Et in Libro Ceremoniali Cardinalis Rothomagensis, qui anno millesimo quadringentesimo trigesimo nono in vestrum Collegium ab Eugenio Quarto cooptatus fuit, memoriæ posterorum traditum est, a Clericis Apostolicæ Camerae ornatissimum Pluviale pa-

rari consuevisse, quo Princeps indutus, Gladioque districto sæpius aerem verberabat; deinde cum *Pileus* ipsi imponeretur, caput Pontifici inclinabat, ut ab illo benedictionem exposceret; postremo, lectione cum cantu absoluta, in locum suum revertebatur.

In eodem quoque memorato Libro *De Sacris Romanæ Ecclesiæ Ceremoniis* aliquid innuitur de *Ense, & Pileo*, qui ad absentes Principes transmittuntur. Ante vero hæc tempora deprehendimus, Callixtum Tertium Prædecessorem nostrum anno millesimo quadringentesimo quinquagesimo septimo ea munera Henrico IV. Regi Castellæ, ac Legionis misisse, qui ex Mauris Granatensibus post acerrimum bellum victoriam reportaverat. Biennio peracto, Pius Secundus Prædecessor noster eodem munere Fridericum Tertium Imperatorem Roma absentem cumulavit. Ex quibus desumi posse videtur, ejusmodi honorem absentibus traditum fuisse ob singularia beneficia, quæ sua virtute, atque armis in Religionem contulerant.

His exemplis adducti Sanctus Pius Quintus, ac Sixtus Quintus Prædecessores nostri, idem munus concesserunt Ferdinando Duci Albenfi, & Alexandro Farnesio absentibus: quorum primus in Belgio, devictis hæreticis, maximam sibi gloriam comparaverat; alter vero, rebus præclare ac fortiter gestis, ditionem Ernesti Bavari Coloniensis Archiepiscopi, & Electoris ab hæreticis vindicaverat. Iisdem vestigiis insisterunt posteriori tempore Innocentius Undecimus, qui *Ensem, & Pileum* ad Joannem Tertium Polonorum Regem dono misit, qui Viennam in Austria diuturna Turcarum obsidione liberaverat; & Alexander Octavus Prædecessor noster ad Ducem Venetorum Franciscum Maurocenum, qui Corcyram armis subactam in potestatem suæ Reipublicæ redegerat; & postremo Clemens Undecimus ad præclarissimum Virum Eugenium Sabaudia Principem, postquam incredibili gloria Temisvarium expugnauerat.

Ab eo tempore, quo Nos, licet immerentes, ad hanc Sedem Apostolicam ascendimus, si perpaucos menses secernamus, nulla fere dies præterit, qua bellorum diversa nuncia ac tumultus ad aures nostras minime pervenerint. In maxima fortunæ varietate, nunc victoriæ, nunc cædes delatæ sunt, quæ cum inter Christianos Principes carissimos nobis in Christo Filios contigerint, nihil profecto Nobis, præter acerbissimum mærorem atque tristitiam, attulerunt. Nec cogitationes nostras usque adhuc convertere potuimus, ut Principem Catholicum aliquem *Ense Pileoque* donaremus, etiamsi plures, ob virtutem militarem hac benevolentia nostræ significatione dignissimi visi sint. Nobis tantum datum est Deum Optimum Maximum quotidie precari, ut Pacem Christiano populo impertiat; etiamsi, nostris ita exigentibus peccatis, in pace amaritudo nostra deberet esse amarissima.

At, cum subinde diligenter expenderimus, Ordinem Hierosolymitanum gravissimis expensis bellum cum Turcis gerere perpetuum, & nobilissimos Equites sacramento addictos vitam suam periculis ita objicere, ut incredibilis utilitas Christiano populo afferatur, & jure merito Catholicæ Religionis firmissimum propugnaculum contra Barbaros appellentur in Constitutionibus Apostolicis Summorum Pontificum Innocentii Octa-

Octavi, Pii Quarti, & Quinti, Sixti Quarti, Gregorii Decimiquarti, & postremo Clementis Undecimi; inhærentes quoque exemplo Benedicti Decimiterti Prædecessoris nostri, ac de Nobis optime meriti, qui *Pileum, & Ensem* Magno tunc Ordinis Hierosolymitani Magistro dono misit, constituimus idem munus largiri Fratri Emmanuelli Pinto ejusdem Sacri Ordinis Magistro, ut benevolentiam nostram in Ordinem

universum ob res præclarissime gestas testemur, utque majora, quæ possumus, in Magistrum ipsum honoris ornamenta conferamus, cæjus virtute, prudentia, & æquitate Hierosolymitanus Ordo feliciter administratur, & universi Equites ad egregia facinora pro Religionis defensione suscipienda magnopere inflammantur. Quod, ut Vobis innotescat, retulimus. Hactenus Allocutio regnantis Papæ BENEDICTI XIV.

C A P U T IV.

De Benedictione, & Traditione Vexilli bellici.

I. **E**st haud dubie antiqua Vexilli bellici Benedictio, & quidem sub præscripta verborum formula in §. 1. hujus Capituli, *Unipotens sempiterne Deus, qui es cunctorum &c.* legiturque in variis antiquis Pontificalibus Vaticanis, & in ms. Codice Vallicellano signato D. S. annorum circiter DCCC. uti notavimus Tomo I. Romani Pontificalis in Appendice ad Titulum XXI. Sed potissimum legendus Titulus XXIV. *De benedictione, & traditione Vexilli bellici*, qui extat Tomo II. ejusdem Pontificalis, in quem Titulum jam nos plura adnotavimus, quæ abs re non erit iterum hoc loco describere. Ritus Pontificalis atque exempla veterum Romanorum Pontificum, atque Episcoporum sequutus præstantissimus, & religiosissimus Archiepiscopus Genuensis Josephus Maria Saporiti, benedixit & ipse Vexilla bellica, in celebri Templo Sanctissimæ Annunciatæ Virginis, Nationis Gallicæ, occasione belli, quo nuper exercitus Germanus Genuensem Rempublicam dire vexabat, & ad extremam angustiam redegerat; extatque ea de re insignis ac docta laudati Antistitis Notificatio Italico idiomate exarata, & Genuæ edita anno MCCXLVIII. Sed ut rem nostram agamus, & de Vexillo tractemus, quod benedici, ac dari, seu mitti Principibus solitum fuit a Summo Romano Pontifice; primum Carolo Martello Gallicæ Regi missum fuisse a Gregorio III. Papa Vexillum una cum Clavibus Confessionis, seu Sepulcri sancti Petri, quo tempore illum Patricium delegit, testatur in ejus Vita Pagius; qui etiam, ubi agit de Leone III. affirmat, non modo ipsum Pontificem Vexillum, & Claves prædictas, sicut antea Adrianus I. fecerat, ad Carolum Magnum misisse, sed & Pipinum ejus patrem a Stephano II. eo munere fuisse donatum. Id quod disertè etiam docet Pagius alter in Critica Baroniana, & novissime amicus noster eruditissimus Romanæ Curie Advocatus Octavianus Gentilius in suo insigni Opere, *De Patriciis*, Lib. III. Cap. II. Numero vi. ubi egregie ostendit, Gallicæ Regibus uti Romanorum Patriciis missum fuisse Vexillum Ecclesiæ Romanæ, quod ejus Defensores, & Advocati essent.

II. Quicquid autem sit de ea Patriciatus dignitate, de qua ex professo loquitur memoratus Gentilius, erat Vexillum defensionis, & patrocinii ita proprium, ac præcipuum insigne, ut nec Carolo Magno, quando renunciatus est Imperator, missum constet, nec aliis Imperatoribus, quorum majestati conjuncta, ac individua erat Ecclesiæ Romanæ protectio, ut ad annum DCCXXIV. scribit criticus Pagius. Figuram Vexilli, quo Carolum Magnum donavit Leo III. musivo opere expressam vidimus in celebri per-

vetusto Triclinio, quod ipse Leo prope Lateranensem Basilicam extruxit, atque exornavit. Cernebatur in ipso Triclinio Apostolorum Princeps S. Petrus Solio insidens, dextera Stolum Leoni porrigens, Carolo sinistra Vexillum, ut ita Defensor Ecclesiæ factus indicaretur, uti explicat Everardus Otto Dissertatione I. *Juris publici & privati*, Cap. II. §. IV. Jam non sine venerandæ antiquitatis studiosorum mœrore, initio Pontificatus Clementis Papæ XII. æquatum solo Triclinium ipsum vidimus, quod peramplam prædictæ Basilicæ Lateranensis plateam impediret, cujus Basilicæ extimam faciem summa impensa laudatus Clemens Pontifex a fundamentis crexit, ac mirifice ornavit. Agendæ autem gratiæ Viris clarissimis Ciampino, Alemanno, Pagio, ac memorato Gentilio, qui ipsam figuram æri incisam in suis Operibus exhibuerunt. Potissimum vero agendæ sunt gratiæ Sanctissimo Domino BENEDICTO XIV. qui celeberrimum ipsum monumentum restituit, ubi etiam in laudem hujus Pontificis hæc posita est inscriptio.

BENEDICTUS XIV. P. M.
*Antiquissimum ex vermiculato opere
 Monumentum
 In Occidentali Apside
 Lateranensis Cœnaculi
 A Leone III.
 Sacro cogendo Senatui
 Aliisque solemnibus peragendis
 Extructi
 Quod ad Templi Aream laxandam
 Clemens XII.
 Integrum loco moveri
 Et ad proximum Sancti Laurentii Oratorium
 collocari jussit
 vel Artificum imperitia
 Vel rei difficultate
 Diffractum, ac penitus disjectum
 Ne illustre adeo
 Pontificiæ majestatis authoritatisque
 Argumentum
 Litterariæ Reipublicæ damno interiret.
 Ad fidem exempli
 Ipsius Clementis Providentia
 Stantibus adhuc parietinis
 Accurate coloribus expressi
 Et simillima in Vaticano Codice
 Veteris Picturæ
 Nova Apside
 A fundamentis excitata
 Eruditorum Virorum Votis occurrens
 Urbi aterna
 Restituit
 Anno MDCCCLXIII.
 Pont. sui III.*

III. Et si

III. Etsi autem una cum Vexillo Galliæ Regi Carolo Martello, aliisque ejus Successoribus missæ & Claves Sepulchri Sancti Petri a Romanis Pontificibus fuerint, sciendum nihilominus est, morem quidem fuisse, ut ex Confessione S. Petri acceptæ Claves Christianis Principibus mitterentur, uti complures Sancti Gregorii Magni, aliorumque Pontificum Epistolæ nos docent; at vero Vexillum ad Romanos tantum Patricios, qui adversus infideles, schismaticos, & hæreticos pugnaturi erant. Sic Alexander II. illud Willelmo Notho Duci Normanniæ in Bello contra Haroldum deferendum tradidit, ut legitur apud Ingulsum pag. 9. Ita quoque, ut alios mittam Pontifices, Victor III. Ruberto Guiscardo in Grecos schismaticos bellum moventi, ut notat Guillelmus Apulienfis Lib. iv. *De gestis Normannorum*. Tradit Gentilius Lib. iiii. *De Patriciis*, Cap. II. Num. vi. quod cum circa initium nostri hujus seculi vetus Basilica S. Matthæi Apostoli ab ipso Roberto magnificentissime olim extructa Salerni in nostro Regno Neapolitano, ex pia munificentia Bonaventuræ Poerii Calabri ex Ministro Generali Ordinis Minorum Archiepiscopi Salernitani instauraretur, multi ærei & argentei inter rudera nummi fuerint inventi, quorum pars altera effigiem S. Matthæi, altera Roberti equo insidentis, gerentisque Vexillum Cruce insignitum exhibent.

IV. Una cum Vexillo missas jam olim fuisse Carolo Magno a Leone III. Claves aureas ex S. Petri Sepulchro acceptas, tradit ad annum dcccxcvi. Cardinalis Baronius, ubi etiam Novatores ignorantie redarguit, quod per Claves Carolum in possessionem immisum Romanæ Ecclesiæ esse contendunt, per Vexillum autem Romanæ Urbis. Constat siquidem, hujusmodi dona a Pontificibus, ac præsertim a S. Gregorio I. mitti consuevisse, ut testantur ejusdem Gregorii, & aliorum Pontificum multæ Epistolæ, quarum meminit eruditus Dufresne in suo Glossario, verbo, *Claves*. Tradit etiam ad annum dccc. memoratus Baronius, & quidem ex Annalibus Francorum in Vita Caroli Magni, a Joanne Patriarcha Hierosolymitano ad eundem Carolum, loco benedictionis, missum Vexillum una cum Clavibus Locorum Sanctorum. Dictæ sunt vero Claves S. Petri, quod ipsius Principis Apostolorum Confessio, sive Sepulchrum, iisdem Clavibus clauderetur. Hinc Poeta Saxonicus Lib. iiii. *De rebus Caroli Magni*, ita secinit.

Confestim Claves, quibus & Confessio Sancti Conservata Petri, Vexillaque miserat Urbis Romuleæ Carolo, pariterque recentia dona. Sane soliti erant Summi Pontifices de limatura Catenarum S. Petri, quæ religiose Romæ asservantur in celebri Templo, quod S. Petri ad Vincula dicitur, ad Reges, & Principes, aliosque Viros summos pro ingenti munere mittere, quam in aurea Clavi instar illarum, quibus Confessio S. Petri claudebatur, efficta, ab Altari ipsius Principis Apostolorum accepta, includebant. Eam vero ad quos illa transmittebatur, suspendebant ad collum veluti sacrum contra mala imminetia amuletum. Præter Gregorium Magnum in suis Epistolis passim, & Gregorium VII. Lib. vi. Epistola vii. ac alios Romanos Pontifices, transmissarum ejusmodi Clavium meminit antiquus Scriptor Gregorius Turonensis Lib. i. *De miraculis*, Cap. xxviii. Sed de his videri potest, quod præstantissimus amicus noster Michael Angelus Monsacratus in celebri Dissertatione, *De Catenis S. Petri &c.* §. vi. scripsit, ubi pro sua erga me benevolentia, mei Romani Pontificalis Commentarios laudavit.

V. Sed hisce omiſſis, quod Benedictionem Vexilli bellici spectat, de qua in præſenti §. agimus, solitos etiam fuisse Episcopos in suis Diœcesibus Vexilla benedicere, suisque Principibus profecturis ad bellum tradere, innumera exempla nos docent, quorum aliqua legere est nostro II. Tomo Romani Pontificalis in Commentario ad Titulum xxiv. qui inscriptus est, *De Benedictione, & traditione Vexilli bellici*. Addi his potest recens, ac celebre exemplum Religiosissimi Genuensis Archiepiscopi Josephi-Mariæ Saporiti, de cujus zelo diximus initio hujus Capituli. Gesta illustria tanti Viri supervacaneum est hoc loco describere; nota enim omnibus sunt, donarique merito eo Evangelii elogio potest, nempe boni Pastoris, quippe qui non dubitavit non modo rem suam dispergere, sed & animam suam ponere pro ovibus suis. Ceterum quod ipsa Vexilla benedicantur, eos procul dubio spectat, qui sunt illis usuri; ut nimirum Deus det ipsis prosperum belli exitum, & secundet consilia suscipientium prælium; nam alias ipsa per se arma, aut Vexilla idoneum benedictionis subjectum non sunt, nullumque eis benedictione bonum conciliari, aut malum ab illis averti potest, ut scite admonet eruditissimus Theophilus Raynaudus in suis Heteroclitis, Tomo II. pag. 218.

§. I.

Benedicendi Vexilli bellici ritus.

Pontifex consuevit Vexilla Ecclesiæ, & armorum suorum benedicere, & Capitaneo, seu Vexillifero Sanctæ Romanæ Ecclesiæ dare in fine Missæ, sedens in sede sua. Vexillum unum, sive plura, tenent brachiis plicata sine hastis aliqui Clerici Camera ante Sanctissimum Dominum nostrum, qui deposita Mitra surgit, & dicit. *Ps. Adjutorium nostrum in Nomine Domini. R. Qui fecit Cælum, & terram. Ps. Dominus vobiscum. R. Et cum spiritu tuo.*

Oremus.

Omnipotens sempiternæ Deus, qui es cunctorum benedictio, & triumphantium fortitudo, respice propitius ad preces humilitatis nostræ, & hoc Vexillum, quod bellico usui præparatum est, celesti benedictione sanctifica, ut contra adversarias, & rebelles Nationes sit validum, tuoque munimine circumseptum; sique inimicis Christiani populi

ter-

terribile , ac intercedentibus Sanctis tuis solidamentum , & victoriæ certa fiducia . Tu enim es Deus , qui conteris bella , & cælestis præsidii sperantibus in te præstas auxilium . Per Christum Dominum nostrum .

COMMENTARIUS.

I. **C**apitaneus , & Vexillifer , seu Vexillarius , antiqua sunt in Romana Ecclesia officia , uti constat ex testimoniis , quæ ad eas voces recenset eruditus Dufresne in suo mediæ & infimæ Latinitatis Glossario . Quod orationem spectat in hoc §. descriptam , jam nos adnotavimus in Commentario superiori , illam plane esse antiquam , & legi in variis priscis mss. Pontificalibus , præsertim vero in ms. Codice Vallicellano annorum circiter dccc. & in antiquo Romano Ordine apud Hitorpium . Porro ex ipsa orationis formula addiscimus benedici Vexillum , ut nempe contra adversarias , & rebelles Nationes sit validum , divinoque munimine circumseptum ; sitque inimicis Christiani populi terribile , atque in Deo confidentibus solidamentum , & certa fiducia victoriæ . Hanc certæ Pontificiæ Benedictionis virtutem plerique Christiani Reges , & Principes experti sunt , qui ad prælium contra Christiani Nominis , atque Fidei hostes profecturi , pia præparatione illud a manu Pontificis accipientes , victorias reportarunt . Varia ejus rei exempla attulimus jam in Commentario præcedenti , quibus addi & potest quod apud Baronium ad annum mxcxi. & apud Pagium in Alexandro II. legitur de S. Herlembaldo , cui etiam Pontifex , laudatus nempe Alexander II. & Cardinales ex B. Petri parte mirificum Vexillum dedere ; ut quoties hæreticorum vesania ultra modum infamaret , illud in manu tenens eos reprimeret : quod constanter per decem & octo fere annos implevit .

II. Simile Vexillum pari effectu Wilhelmo Normanniæ Duci contra Araldum tyrannum idem Alexander II. Pontifex misit . Cum enim Haraldus S. Eduardo Angliæ Rege mortuo anno clxvi. eidem Wilhelmo qui in Regnum successit , se Regis insignia non affectaturum jurasset , postridie vero mortis S. Regis , ipso Epiphaniarum die , paucorum Procerum fide impetrata , Coronam , & Regis insignia sumisset , Wilhelmus tandem , ut refert Ordericus Lib. iii. Historiæ , Gislebertum Lexoviensem Archidiaconum Romam misit , & de his , quæ acciderant , ab Alexandro Papa consilium requisivit . Papa vero , auditis rebus , quæ contigerant , legitimo Duci favit , audaciter arma sumere contra perjurum præcepit , & Vexillum S. Petri Apostoli , cujus meritis ab omni periculo defenderetur , transmisit . Ergo Wilhelmus , accepto Vexillo , iiii. Kal. Octobris mare transfretavit , prælioque commisso , Haraldus peremptus est , & Wilhelmus in ipso die Natalis Domini anni mxcvi. ab Aldredo Archiepiscopo

Eboracensi in Regem Anglorum est consecratus . Est hic Wilhelmus , seu Guillelmus Dux Normanniæ II. *bastardus* vulgo , & *conquestor* cognominatus , de quo plura videri apud utrumque Pagium possunt .

III. Seculo tandem xvi. Joannes Austriacus Summus Belli Dux ex simili benedictione per S. Pium V. Pontificem Maximum collata , nobilissimum de Turcis triumphum , atque omnium seculorum maxime memorabilem ad Echinadas insulas victoriam retulit , uti rem narrat Gabutius in Vita ejusdem Pii Lib. v. Cap. i. ubi inter alia de Vexillo a Laudato Pontifice ad ipsum misso ita scribit : *Joannes interea Neapoli ab Antonio Cardinale Granvellano Neapolitani Regni per id tempus Prorege honorifice acceptus , ibi in Æde S. Clara de ipsius Cardinalis manibus inter Sacrorum Solemnia , Sceptrum , Vexillumque dati honoris insignia a Pio Pontifice missa , singulari religione , ac cæremonia suscepit . Quo quidem in Vexillo Jesu Christi affixi Cruci Imago mire auro & argento adumbrata erat ; sub qua locata in medio Pontificis Maximi , a dextra Philippi Regis , a lava Senatus Veneti , atque ex iis quibusdam annexa catenulis ipsius Joannis pendebant insignia . Ita ille , ex quo etiam addiscimus , qualis fuerit hujus forma Vexilli .*

IV. Summa itaque est benedictionis Vexilli virtus , si tamen is , qui illud accipit , pia præparatione contra Christiani Nominis , vel Fidei hostes , aut violatores justitiæ bellum suscipiat . Unde non mirum videri debet , si Ludovicus VII. Galliæ Rex fractus maris tempestatibus in Palæstinam appulsus , nihil ibidem perfecerit , etsi Vexillum ab Altari S. Dionysii antequam se ad iter accingeret , sumisset : *Tunc enim per totam Galliam facta est exactio generalis ; nec sexus , vel ordo , vel dignitas quempiam excusavit , quin auxilium Regi conferret . Unde factum est , ut ejus peregrinatio multis imprecationibus persequeretur .* Verba sunt Matthæi Parisii anno mxcxvi. qui etiam alia his consona habet ad annum mcl. Sunt qui docent , Ludovicum ipsum Galliæ Regem primum omnium induxisse auxilium pro subsidio Terræ Sanctæ , quandam scilicet tributi , & vectigalis speciem , quod Regibus subditi solvere tenebantur , quoties ipsi in Terram Sanctam bellandi gratia contra Fidei hostes proficiscerentur . De hujusmodi exactionibus frequenter questi sunt Populi , præsertim vero ubi Terræ Sanctæ prætextu Ministri Regum quæ sua erant , quærebant , non vero quæ Jesu Christi .

§. II.

Ritus tradendi bellicum Vexillum .

Finita benedictione , aspergit Vexilla cum aqua benedicta , & adolet incenso , quæ mox hastis infiguntur , & erecta simul cum hastis dantur per Summum Pontificem sedentem

tem cum Mitra Capitano genuflexo ad ejus pedes cum his verbis dicens: *Accipe Vexillum caelesti benedictione sanctificatum, sique inimicis populi Christiani terribile, & det tibi Dominus gratiam, ut ad ipsius Nomen, & honorem cum illo hostium cuneos potenter penetres incolumis & securus*. Capitaneus, accepto Vexillo, osculatur pedes Sanctissimi Domini nostri, & surgens recedit cum suis.

COMMENTARIUS.

I. **J**uxta Ordinis antiqui Romani praescriptum apud Hitorpium, post benedictum Vexillum, sequitur statim benedictio lanceae, seu hastae, cui Vexillum alligabatur, sub ista Orationis formula, cujus jam mentionem fecimus Tomo II. Romani Pontificalis, Titulo xxiv. in Commentario ad §. II. *Domine Deus Omnipotens lux, & vita fabrica Mundi, qui per manus Tubalcaïn ad usus hominum fabrilia opera instituisti: respice propitius nostri deprecationem officii, ad benedicendam hanc lanceam militaris instrumenti, qui a milite latus Filii tui Domini nostri Jesu Christi pro nostra salute in Cruce pendentis permisisti lancea perforari, & per Nomen ejusdem Filii tui, eam sic consecrare, & benedicere digneris, ut is, qui eam tulerit, des ei prosperum signum tuae defensionis, sicut dedisti Gedeoni, Sauli, David quoque Regi, ut tuis semper fultus auxiliis, congau-deat, & latetur in te in omnibus prosperitatibus suis. Per eundem*. Eandem Orationem lege-re est in aliis antiquis mss. Pontificalibus.

II. Recitata hac Oratione, mandat tum ipse antiquus Ordo Romanus, ut deinde alligetur Vexillum lanceae, & tenente eam milite, aspergat eam Episcopus aqua benedicta, & dicat, aliam scilicet Orationem, quae ita dicit: *In-clina Domine Jesu Salvator omnium, ac Redemtor animarum aures tuae pietatis ad preces nostrae humilitatis, & per interventum B. Michaelis Archangeli tui, omniumque caelestium Virtutum, presta nobis auxilium dextera tua, ut sicut benedixisti Abraham universos quinque Reges triumphantem, atque Davidem Regem in tui Nominis laude triumphales congressus exer-centem, ita benedicere, & sanctificare digneris hoc Vexillum, quod ob defensionem Regni, &*

Sancta Ecclesia contra hostilem rabiem defertur; quatenus in Nomine tuo Fideles, & defensores Populi Dei illud consequentes, per virtutem Sanctae Crucis, triumphum, & victoriam, se ex hostibus acquisisse latentur. Qui cum Patre, & Spiritu Sancto &c. Porro formula traditionis Vexilli in hoc §. nostro descripta desideratur quidem in Ordine antiquo Romano, extat tamen in ms. Pontificali Gulielmi Durandi anno-rum circiter 500. & in aliis multis.

III. Tandem juxta nostri ejusdem §. praescriptum finita benedictione Vexilli, antequam ipsum tradatur, non modo aqua benedicta aspergitur, sed & incenso adoletur, deinde vero hastae infigitur. Ceterum tradito Vexillo juxta formulam jam descriptam, *Capitaneus accepto Vexillo osculatur pedes Sanctissimi Domini nostri, & surgens recedit cum suis*. Juxta praescriptum Romani Pontificalis, Parte II. Titulo ultimo, ubi agitur de traditione Vexilli, quae, uti superius dictum fuit, fieri & ab Episcopis in Dioecesium suis consuevit, facta Vexilli traditione, Episcopus *dat ei osculum pacis, dicens, Pax tibi, qui accepto Vexillo osculatur manus Pontificis, surgit, & discedit*. Si veterem disciplinam spectemus, consuevere & olim Fideles pedes Episcoporum deosculari, suntque eam in rem innumera apud Ecclesiasticos Scriptores exempla; statuit tamen demum in suo Dictatu, Can. ix. S. Gregorius VII. qui floruit labente Seculo xi. ut solius Papae pedes omnes Principes osculenter. Quod quidem reverentiae indicium Christi in Terris Vicario a Christianis jure exhiberi validissimis argumentis Catholici Auctores propugnant adversus haereticos, ac praesertim protestantes, qui ritum ipsum perperam carpunt.

C A P U T V.

De consecratione Agnus Dei.

§. I.

Agnus Dei soliti sunt benedici a Summo Pontifice primo anno sui Pontificatus, & deinde septimo quoque anno, dum vivit.

COMMENTARIUS.

I. **N**otandum primum hoc loco censemus, quod alias docuimus Tomo II. Conciliorum in Commentario ad Canonem lxxxii. Trullanum, posse nimirum quasdā uno tempore admitti Imagines, & alio tempore improbari, sive etiam posse easdem Imagines, seu picturas, pro vario hominum ingenio, & interpretatione, ab una Ecclesia probari, quae ab alia ob periculum erroris mini-To. I.

me admittuntur. Itaque cum prisci Fideles, Scriptura praeeunte, non modo apud Latinos, sed & apud Graecos Christum Dominum nostrum in figura Agni soliti essent adumbrare, quia scilicet Agnus, qui ab Hebraeis, Moyse praecipiente, immolatus est, cujusque sanguine consignata domorum limina, Primogenitorum interfectori inaccessa fuere, is Christi Jesu typum, ac imaginem referebat; ac praeterea N n quia

quia S. Joannes Baptista, cum Christum populo indicaret, dixit: *Ecce Agnus Dei, ecce qui tollit peccatum mundi*. Ceterum contra statuit memoratus LXXXII. Trullanus, nempe, Agni loco, ut umbra veritati cedat, substituendam Christi Imaginem humano habitu, ac figura expressam: *Ut ergo quod perfectum est*, ait Canon *vel colorum expressionibus omnium oculis subjiciatur, ejus qui tollit peccata mundi, Christi Dei nostri humana forma characterem etiam in imaginibus deinceps pro veteri Agno erigi ac depingi jubemus*.

II. At vero moris esse Ecclesiæ antiqui, ut Christus in figura Agni depingeretur, egregium testimonium suppeditat S. Paulinus, ubi ad Severum scribens, sic inter alia inquit in sua Epistola XXXII.

Sub Cruce sanguinea niveo stat Christus in Agno, Agnus ut innocua injusto datus hostia leto.

Si vera sunt Acta S. Silvestri, jam ante S. Paulinum erat in usu exprimendi Christum in figura Agni; etenim apud ipsa legimus, Constantium Magnum in Baptisterio, quod ipse Romæ prope Basilicam Lateranensem construi jussit, apponi fecisse Agnum aquam fundentem, & figuram S. Joannis Baptiste Agnum digito monstrantis, quasi diceret: *Hic est, qui baptizat*. Sane sæpius in Vitis Romanorum Pontificum apud Anastasium Bibliothecarium occurrit Christus Agni specie effictus. Porro Agnus sub Cruce stat in lapide Altaris Vefontione, ejusque figura videri apud Chiffletium potest pag. 208. alia in hanc rem exempla legi possunt apud eruditissimum Muratorium in Notis, & Observationibus Variorum ad ipsam Epistolam XXXII. S. Paulini.

III. In Ecclesia Romana quam antiquus sit usus ille conficiendi, & consecrandi per Summum Pontificem cereos Agnos, constat sane ex ipsis Agnis Dei cereis, quos vel a priscis seculis Romani Pontifices benedicere consueverunt. Commentum sunt quidem nonnulli, ac præsertim hæretici, Philippus Morneus, Petrus Paulus Vergerius, & alii ejusdem farinae homines, ritum ipsum non esse antiquiorem Urbano V. Papa, qui floruit post medium Seculum XIV. Verum invictè aliam hanc opinionem refellunt, Victorellus in Notis ad Ciaconium, ubi de ipso Urbano V. agit, Antonius Baldassarrius in Opusculo Italice scripto, *De Agnis Dei dilucidatis*, & ut alios omittam, Josephus-Maria Suarez Episcopus Vafioneasis in Libello Romæ evulgato anno MDCLVI. cui Titulus: *De Baptismo Paschali, & origine, ac ritu consecrandi Agnos Dei*, ubi inter alia pluribus ostendit, ritum ipsum usurpatum quidem fuisse ab exordio nascentis Ecclesiæ. Tum Cap. VII. citat Ordinem antiquum Romanum a Gelasio Papa circa annum CXXII. concinnatum, in quo ita legitur: *Mane itaque primo venit Archidiaconus, & fundit ceram in vas mundum majus, & miscet ibidem oleum, & benedicit ceram, & ex ea fundit similitudinem Agnorum, & servat in loco mundo*. Hæc Titulo de Sabbato Sancto, seu ordine benedicendi Cerei; & postea Titulo, In Octavis Paschæ: *In Dominica*, inquit, *post Albas infra Civitatem Romanam dantur Agnus Dei ab Archidiacono post Missam, & Communionem populo &c.* Eadem verba leguntur in Appendice primi omnium Romani Ordinis, quos doctissimus Mabillonius publicavit Tomo II.

Musei Italici. Merito itaque *consecrandorum Agnorum Dei usum inductum primis Christiana Religionis seculis*, docet etiam Clarissimus Paulus M. Paciaudus in suo singulari Libro, *De sacris Christianorum balneis*, Cap. IX. ubi exponit schema in fronte ejus libri adjectum, quod est theca cerei Agni, in cujus altera parte legitur versus.

Agne Dei miserere mei, qui crimina tollis.

IV. Scripsit eruditissimum carmen labente Seculo XVI. de hisce Agnis Dei, earumque virtute Andreas Frusius Societatis Jesu, ubi etiam ex veterum testimonio tradit, Leonem III. Pontificem Maximum Seculo IX. ad Carolum Magnum hujusmodi munus misisse, ab eoque magni æstimatum.

Ante octingentos ferme Leo Tertius annos

Optimus, exhibito munere, testis adest.

Carolus hoc Magnus magna pietate recepit,

Thesaurum reputans calitus esse datum.

Fuit enim vel antiquus mos, ut hujusmodi cerei Agni a Summo Pontifice consecrati, non modo præsentibus dispensarentur, verum etiam ad Imperatores, & Reges, atque ad Magnates abentes mitterentur, ut infra dicemus. Prisci autem ritus benedicendi per Papam ipsos Agnos, testes sunt Romani antiqui Ordines a laudato Mabillonio citato Tomo II. Musei Italici descripti, præsertim vero Ordines XI. XII. ac alii sequentes, itemque veteres æque multi, ac recentiores Scriptores, qui de divinis Officiis Tractatus scripserunt, Amalarius, Alcuinus, Durandus, & alii.

V. Pati illud non potest memoratus impius Vergerius, Romanum Pontificem soli sibi hanc facultatem arrogasse benedicendi Cereos Agnos, temereque debacchatur, *summam esse indignitatem, & facinus intolerandum, quod solus Papa horum Agnorum consecrandorum potestatem sibi arroget*. Verum scitissime hanc ineptiam refellit Cl. Theophylus Raynaudus in Libro, cui Titulus, *Agnus Cereus Pontificia benedictione consecratus*, ubi sic inter alia argumentatur: *An non in omni bene constituta Communitate quadam sunt præcipue reservata sublimioribus, prout postulat decencia, & commune bonum? Mirum igitur esse non debet, quod in Ecclesiastica quoque Politia quadam, inter qua est Cereorum Agnorum consecratio, reserventur Summo Sacerdoti Christi in Terris Vicario, nec cum inferioribus Antistitibus communicentur*. Huc referri possunt quæ Theologi passim docent in comprobanda quorundam criminum absolute jam vel secundum veterem receptamque Ecclesiæ disciplinam Romano Pontifici Maximo reservata.

VI. Illud quoque perperam commentus est Vergerius, ejus fuisse opinionis Baronium, consecrationem scilicet, ac benedictionem cereorum Agnorum, suam a paganismo ducere originem. Baronius enim anno Christi LVIII. illud scitissime docet, Agnorum Dei usum, ad tollendam superstitionem Gentilium, fuisse introductum, recensque baptizatos consuevisse suspensos illos ferre ad collum, mutata videlicet in religionem superstitione, qua suis infantibus Gentiles Bullas ad avertendas fascinationes re turpicula consignatas, vel aliter superstitionibus auctas, collo appenderent. Cum autem & idem cordis figuram in bullis suis ferre consuevisent, quo sic noscerent, se esse homines, si corde præ-

præstarent: ita Christiani Imaginem Christi Agni susceperunt, ut discerent ejus exemplo esse mit-tes & humiles corde. Ita Baronius ad annum LVIII. quem perperam hæretici allegant. Sed audiamus & de eadem re laudatum Superius Raynaudum sic agentem: *Erant bullæ quædam in cordis effigiem efformatæ, quas Macrobius testatur nobilium puerorum collo appendi consue-*

visse, ut viri esse recordarentur. Ad eas itaque ethnicas quisquiliis convellendas, censet Baronius, Ecclesiam instituisse cereas Christi Agni Imagines collo Christianorum appendendas, quæ substituerentur inanibus illis, nec raro diabolicis amuletis, aut monumentis inter Eth-nicos usu receptis. Ita laudatus Auctor, qui & alia in eandem rem refert.

§. II.

Qui olim efformarent Cereos Dei Agnos, & quibus demum eorundem conficiendorum data est provincia.

Sed antiquitus cera alba munda pro illis formandis per Magistrum ceræ Palatii Aposto-lici, & per illos, qui volebant pro se fieri Agnus Dei, ponebatur super Altare Beati Petri, quam Subdiaconus Apostolicus de Altari accipiebat, & in aliqua Camera ca-paci & idonea in Palatio ipse cum aliis Subdiaconis, & Acolythis Papæ, inanibus propriis formabant Agnus Dei cum magna devotione, reverentia, & munditia: ha-bebant aliquos servitores, qui necessaria ministrabant; & omnia fiebant impensis Ca-meræ; ceram albam mollificabant cum Oleo Sancto, & Oleo Chrismatis, quod super-fuerat de anno præterito. Deinde cum facta erat tota quantitas, præsentabantur cap-sæ plenæ Agnus Dei, & benedicebantur per Papam. Hodie autem Sacrista cum suis Capellanis, & Clericis Capellæ, format ipsos Agnus Dei.

COMMENTARIUS.

I. **C**onsuevisse primum, & quidem longe ante annum Christi millesimum, Ar-chidiaconum Romanæ Ecclesiæ mane Sabbati Sancti ceram fundere in vas mundum majus, miscere Oleum utique sanctum, bene-dicere ceram, & ex ea fundere *similitudinem Agnorum*, docet nos pervetustus Ordo r. Ro-manus, cujus locum descripsimus supra in Com-mentario præcedenti, Num. III. in fine. Me-minit ejusdem ritus Pollicitus, qui vixit sub In-nocentio Papa II. in Ordine Romano x. apud Mabillonium Tomo II. Musei Italici pag. 138. sic inquit: *In Sabbato Sancto mane surgit Archidiaconus, & miscitat Oleum, & Chrisma annotinum in cera munda. Acolythus conficit eam, & colat, & facit ex ea similitudinem Agnorum, quos Dominus Pontifex expendit in Sabbato in Albis.* Papa itaque solum cereos Agnos Sabbato in Albis populo distribuebat, quos scilicet Acolythus conficiebat ex cera be-nedicta ab Archidiacono mane Sabbati Sancti, cui idem Archidiaconus solitus fuit Oleum San-ctum, & Chrisma immiscere. Seculo etiam XIII. labente, quo claruit Durandus, consuevisse Acolythos Romanæ Ecclesiæ conficere Agnos de cera nova benedicta, vel de cera Cerei Pas-chalis anni præcedentis admisto Chrismate, qui in Sabbato in Albis in Ecclesia per Dominum Papam populo distribuuntur, tradit laudatus Auctor Lib. VI. *Rationalis divinarum Officio-rum*, Cap. LXXIX.

II. Ineunte Seculo xv. quo Martinus V. Ec-clesiam regebat, consuevisse Fideles ceram al-bam nitidamque deferre ad Subdiaconum Apo-stolicum, qui Agnos ipsos efformabat, addi-scere licet ex ejusdem Martini Papæ V. Edi-cto, quod solitum erat Basilicarum valvis af-figi his verbis conceptum: *Sanctissimus in Chri-sto Pater, & Dominus, D. Martinus divina To. I.*

providentia Papa Quintus intendit in die Jovis proximo instanti conficere, & consecrare sacrum Chrisma, & sacros Agnos Dei, & alia solem-niter facere, quæ Summi Pontifices ipsa die post suam consecrationem de septennio in septen-nium facere consueverant. Quare omnes volen-tes habere Agnos Dei, deferant bona hora ce-ram albam, puram, & mundam ad Domum Domini nostri Subdiaconi. Vel ex recitato ha-ctenus testimonio comprobatur, quod supra in §. I. edicitur, nempe Agnos Dei solitos esse be-nedici a Summo Pontifice, primo anno sui Pon-tificatus, & deinde septimo quoque anno, dum vivit. Constat id quidem ex Vitis Romanorum Pontificum, præsertim vero ex mss. Apostoli-corum Cæremoniariorum Diariis, in quibus & initio cujusque Pontificatus, & anno ejusdem quoque septimo fit ejus ritus mentio.

III. Notatu porro hoc loco digna sunt illa, quæ de Agnorum Dei consecratione a Leone X. anno Christi MDXII. initio Pontificatus peracta tradit in suo ms. Diario Grassus: *Ut Pontifex, inquit, primo hoc anno sui Pontificatus voluit Agnorum Dei solemnia peragere, jussit mihi, ut tot Agnos Dei ad summam confici facerem, quot antecessor Julius, nempe Secundus, confecerat, idest mille ac ducentas libras ex omni sorte, nec plures; & licet mihi Aromatarii, & alii pleri-que jam pridem formas fabricassent pro consecra-tione ipsorum Agnorum, tamen hoc ego indi-gnum reputans, suasi Auditori Camera, ac Ur-bis Governatori, ut per publica bannimenta sub pænis, & censuris, ac pecuniariis prohiberent, nequis etiam Cardinalis, aut Princeps quivis Agnos conficeret, aut emeret, sive venderet, quia solus Pontifex ad tollendas causas, & alia-rum malarum occasionum peccandi, volebat per suum Aromatarium Agnos fieri facere. Itaque Pontifex, ut omnia servarentur, fecit Agnos Dei*

Dei omnes per aliquos fabricatos emi sub pretio carlenorum quatuor quamlibet eorum libram. Addit etiam mox Grassus, alias fuisse ab ipso Leone Papa X. diligentias adhibitas ad avertenda sacrilegia, quæ in hujusmodi Agnorum Dei consecratione committebantur. Quicquid autem de iis sit, ex memorato Grassi loco multa addiscere licet, sed notandum illud, suo tempore consuevisse confici Agnos ab Aromatario Palatii Apostolici.

IV. Audiendus iterum Grassus, qui in eodem ipso ms. Diario, ubi agit de altera Agnorum Dei consecratione facta ab eodem Leone anno VII. Pontificatus, ejusdem usus mentionem facit, sic inquit: *Hoc anno MDXIX. qui est septimus in Pontificatu Sanctissimi Domini nostri Leonis Papæ X. facta est sollemnis benedictio Agnorum Dei per Sanctitatem suam die Mercurii vigesima septima Aprilis in Aula magna, quæ est supra audientiam Rotæ, in quam nunc Cardinalis de Cybo habitat, & in die inquam Mercurii, licet in die Jovis consueverit fieri; sed sic placuit Sanctitati suæ, tum quia hac tali die ipse jejumat, & studiose vult tempus trahere, tum etiam quia Jovis est plenilunium, & tum maxime, quia cum omnis populus se præparaverit ad Agnorum hujusmodi copiam innumerabilem benedicendam, vult prævenire, ne tanta esset copia benedicendi, sed hoc frustratorium fuit, quia innumerabilis copia facta fuit per omnes, non obstante, quod Sanctitas sua per multos dies ante factum fecerat bandiri: Nequis Agnos Dei conficeret, aut confici faceret præter suum Aromatarium. Et sic me Commissarium in hoc fecit, & ego, convocatis Consulibus, & aliis artificibus, mandavi: Ut nulus faceret, nec minus factos venderet sine licentia mea, præter Aromatarium Palatii Papæ.*

V. Verum non obstante hoc Edicto, teste laudato Grassi, quatuor Aromatarii iverunt ad Maglianam, ubi forte Papa resederat, & supplicarunt, ut liceret cuique unam capsam

conficere diversarum formarum usque ad summam centumquinguenta librarum pro quolibet, & sic concessit; & Aromatarius Palatinus fecit usque ad summam mille librarum; itaque in capsis 16. facta sunt libræ 2000. Præterea, cum Cardinales etiam quererentur, non posse habere se hanc facultatem, Papa concessit eis, ut quisque Cardinalis posset habere tres, aut quatuor libras; senioribus autem concessit quinque libras, ut idem Grassus testatur, qui etiam mox subjicit, dedisse ipsum licentiam Aromatariis, ut sic facerent; & quod etiam nonnullis Orationibus, & Prælati concessa est similis licentia; & in totum fuerunt circa viginti capsæ. Quicquid sit de quantitate Agnorum Dei, quæ sequiori ævo pene in immensam crevit, constat ex hætenus dictis, Aromatarii Palatii Pontificii fuisse provinciam, aliorumque etiam Aromatariorum Urbis, ubi scilicet id eis Papa concederet, Agnos cereos Dei conficere.

VI. Ceterum abusus ipse, quod Aromatarii, aliique passim Agnos ipsos conficerent, ut ex Grassi didicimus, videtur jam paulo ante illum invaluisse; nam alias tempore Augustini Patricii, qui nostrum Cæremoniale hoc ordinavit sub Pontificatu Innocentii VIII. qui creatus fuit anno MCDLXXXIV. Sacrista cum suis Capellanis, & Clericis Capella formabat ipsos Agnus Dei, ut ait hic §. noster. Licet autem non multo post invaluerit mos, ut Aromatarii, aliique efformarent cereos Agnos, data est demum ea provincia Monachis, quos vocant Reformatos Sancti Bernardi, Ordinis Cisterciensis, Congregationis Fulienfis a Clemente Papa VIII. confirmatumque id privilegii eidem fuit a Leone XI. ac deinde a Paulo V. ut hic idem Pontifex testatur suo Diplomate Romæ dato apud S. Petrum die XXVIII. Martii anno MDCVIII. ipsumque Diploma ex Latino in Italicum Idioma translatum legere est apud eruditum Baldassarrium, in Opusculo Italice scripto, cui Titulus: *Pontificii Agnus Dei dilucidati*, Cap. 111.

§. III.

De materia, & ritibus quibus Agni Dei conficiuntur, & a Pontifice consecrantur, & primum de benedictione aquæ.

Ceram ipsam sumit, vel ex Cereo benedicto in Sabbato Sancto anni præteriti, vel aliunde, expensis Papæ. Non miscentur Oleo sancto, aut sacro Chrisinate, sed puri, & mundi præsentantur in capsis Sanctissimo Domino nostro in Camera sua. Pontifex aliquo die post Pascha ante Sabbatum in Albis, dicta, vel audita Missa in sua privata Capella, indutus Amictu, Alba, Cingulo, & Mitra simplici, benedicit aquam benedictione communi, sicut fit in Dominicis diebus a Sacerdotibus, in aliquo vase ibi præparato; & si magis placet, potest illa aqua prius benedici ab aliquo Episcopo domestico Papæ. Deinde Pontifex accedit ad vas prædictum, deposita Mitra stans dicit *V. Adjutorium nostrum in Nomine Domini. R. Qui fecit Cælum & terram. V. Dominus vobiscum. R. Et cum spiritu tuo. Oremus.*

Domine Deus Pater Omnipotens statutor elementorum omnium, & conservator humani generis, datorque gratiæ spiritualis, & largitor salutis æternæ, qui aquas ex Paradisi fonte manantes totam Terram irrigare jussisti, super quas Unigenitus tuus siccis pedibus ambulavit, & in eis baptizari dignatus est; quæ una cum suo Sanguine de latere sacratissimo perfluxerunt, & baptizare in ipsis præcepit Discipulis omnes gentes: adesto benignus, & clemens, & nobis tua hæc magnalia recolentibus gratia tuæ benedictionis adveniat, ut ea, quæ in hoc aquarum vasculo ad gloriam Nominis tui præpara-

parato infundere decrevimus, & immergere, bene & dicas, & benedicta sancti & fides, quatenus ipsorum veneratione, & honore nobis famulis tuis crimina diluantur, abstergantur macula peccatorum, impetrentur venia, gratia conferantur, & tandem una cum Sanctis, & electis tuis vitam percipere mereamur eternam. Per eundem Christum Dominum nostrum. Amen.

COMMENTARIUS.

I. **D**ocet eruditissimus Jacobus Sirmondus in suis ad Ennodium Notis, morem fuisse antiquum, ut ex Cereo Paschali, qui Sabbato Sancto conceptis precibus sacratu fuerat, particulae decerperentur, ac populo die Dominica post Albas post sacram Communionem distribuerentur, unde suffitum in Aedibus facerent, vel agros, vineasque munirent adversus daemonum praestigias, aut contra fulgura, ac tonitrua. Addit hunc morem servatum dumtaxat fuisse extra Urbem; quia scilicet Romae Cerei Paschalis vice ceram oleo perfusam benedicebat Archidiaconus, particulasque inde in Agnorum effigiem expressas asservabat, populo similiter die, qua dictum est, dividendas. Atque hic antiquus Ecclesiae ritus originem dedit Cereis Agni Caelestis imaginibus, quae a Pon-

tificibus Maximis augustiore postea caeremonia consecrari coeperunt. Porro ex pervetusto Romano i. Ordine, cujus meminit Amalarius Lib. i. *De Divinis Officiis*, Cap. xvii. Sabbato Sancto benedicebat Archidiaconus ceram oleo mixtam, indeque Agni efformabantur. Nulla in hoc Ordine, sicut nec in aliis sequentibus Cerei Paschalis mentio; testatur tamen Durandus, qui claruit Seculo xiii. in suo *Rationali Divinorum Officiorum* Lib. vi. Cap. lxxix. consuevisse Acolythos Ecclesiae Romanae facere *Agnos de cera nova benedicta, vel de cera Cerei Paschalis anni praecedentis*. Docet, Agnos istos significare Agnum illum immaculatum, qui tollit peccata mundi; ceram autem, *eius humanitatem, sicut Beatus Gregorius dicit: Mel in cera, Divinitas in humanitate*.

§. IV.

De balsami, & Chrismatis in ipsam aquam benedictam infusione.

Resumit deinde Mitram Pontifex, & infundit balsamum ex ampulla in aquam in modum Crucis, dicens: *Consecrare, & sanctificare digneris Domine aquas istas per istam unctionem balsami, & nostram benedictionem. In Nomine Patris & Filii & Spiritus Sancti Amen*. Et ter signat. Deinde ex alia ampulla infundit in eandem aquam, & in modum Crucis, dicens: *Consecrare & sanctificare digneris Domine aquas istas per istam unctionem sacri Chrismatis, & nostram benedictionem. In Nomine Patris & Filii & Spiritus Sancti Amen*.

COMMENTARIUS.

I. **S**i primum veterem Romanum Ordinem perscrutemur, jam nulla ibidem balsami mentio in consecratione Agnorum Dei celebranda. Certe ipse Ordo Romanus i. Olei tantum meminit: *Mane primo venit Archidiaconus, & fundit ceram in vas mundum majus, & miscit ibidem Oleum, & benedicit ceram, & ex ea fundit similitudinem Agnorum*. Olei pariter & Chrismatis mentionem quidem facit Romanus Ordo xi. sed nihil tamen dicit de balsamo in ipsa benedictione adhibendo. Haec ejus verba: *In Sabbato Sancto mane surgit Archidiaconus, & miscit Oleum, & Chrisma annotinum in cera munda. Acolythus conficit eam, & colat, & facit ex ea similitudinem Agnorum, quos Dominus Pontifex expendit in Sabbato de Albis*. Sed nec apud ipsum Durandum, qui claruit labente Seculo xiii. & ineunte xiv. ulla mentio balsami, sed dumtaxat Olei, vel Chrismatis. Sic enim inquit Lib. vi. sui *Rationalis*, Cap. lxxix. *Acolythi Ecclesiae Romanae faciunt Agnos de cera nova benedicta, vel de cera Cerei Paschalis anni praecedentis, admisto Chrismate*. Subdit tum paulo post: *In cera admiscetur Oleum seu Chrisma, quia Dominus noster plenus est misericordia, quae per Oleum designatur*.

II. Porro Seculo ipso xiv. consuevisse balsamum adhiberi in ipsa Agnorum benedictione, testem habemus Urbanum V. qui electus Pontifex fuit anno mcccclxi. Is enim, ut vel hoc nostrum Caeremoniale docet in hoc Capite §. vii. ubi misit ad Joannem Graecorum Imperatorem tres cereos Dei Agnos, expressam balsami mentionem fecit, sic inter alia scribens suis rudioribus versibus, quos infra describemus.

*Balsamus, & munda cera cum Chrismatis unda
Conficiunt Agnum, quod munus do tibi magnum,
Fonte velut natum per mystica sanctificatum.*
Balsami aequae, ac Chrismatis, & aquae benedictae in consecratione Agnorum, diserte meminit Sixtus Papa V. in Apostolicis Litteris suis, quas una cum plurimis Agnis Dei cereis ad Paschalem Ciconiam anno mdlxxxvi. misit; in iisque non modo eorum virtutem explicat, sed etiam singula mystice exponit, quae in Agnorum Dei consecratione adhibentur: *Hi Agnus Dei*, inquit, *ex cera alba, pura, virginea conficiuntur, ad denotandum Christi humanitatem ex Sanctissimo Virginis utero absque ulla contagione, & sola Dei virtute sumtam. Imago Agni, quae in illis est, Agnum illum immaculatum representat, qui humani generis reparatione in ligno Cru-*
cis

eis est immolatus. Adhibetur aqua benedicta, cujus substantia ad maxima quaque Sacramenta in Veteri, & Novo Testamento usus est Deus. Aqua miscetur balsamum, unguentorum omnium præstantissimum, ad designandam famam optimam, quam Christianus veluti suavissimi odoris fragrantiam in sua conversatione debet redolere. Postremo superinfunditur Chrisma, quo charitas virtutum omnium maxima figuratur, & quo

eodem Tempora, Altaria, Vasa, & ipsi homines Dei cultui præparantur, & consecrantur. Eadem occurrunt in aliorum Pontificum Litteris, quibus ipsi ad Principes misere cereos Dei Agnos a se consecratos; eademque ad notarunt, varii pii doctique Auctores, qui de iisdem Dei Agnis Opuscula ediderunt; quorum loca supervacaneum putavi in nostro hoc Commentario describere.

§. V.

De variis Orationibus ad cereos Dei Agnos consecrandos.

Benedicta aqua, vertit se ad capfas, ubi sunt Agnus Dei, & sine Mitra stans dicit: Dominus vobiscum. R. Et cum spiritu tuo. Oremus.

Deus omnium sanctificationum dominator Dominus, cujus pietas sine fine sentitur: qui Abraham Patrem Fidei nostræ præcepto tuo filium Isaac immolare disponentem in figuram redemptionis nostræ per arietem vepribus inhaerentem, ejus sacrificium consummare voluisti; quique Moysi famulo tuo legifero jure holocaustum præcepisti in Agnis immaculatis offerri: te suppliciter deprecamur, ut nostræ vocis exoratus officio has cereas formas innocentissimi Agni imagine figuratas bene dicere, & per invocationem tui sancti Nominis sanctificare digneris, ut per ejus tactum, & visum Fideles invitentur ad laudes, fragor grandinum, procella turbinum, impetus tempestatum, ventorum rabies, infesta tonitrua temperentur; fugiant, atque tremiscant maligni Spiritus ante Sanctæ Crucis vexillum, quod in illis exculptum est; cui flectitur omne genu, & omnis lingua confitetur, quia (1) absorpta morte per Crucis patibulum, Jesus Christus regnat in gloria Dei Patris. Ipse enim tanquam ovis ad occisionem ductus in morte, tibi Patri sanctum sui Corporis obtulit sacrificium, ut ovem perditam diabolica fraude seductam reduceret, & reductam suis humeris ad Cælestis Patriæ gregem reportaret. Qui tecum vivit & regnat in unitate Spiritus Sancti Deus per omnia secula seculorum. Amen.

Deinde dicit aliam Orationem.

Omnipotens sempiterne Deus, qui legalium hostiarum, & ceremoniarum es institutor, & quæ pro restauratione humani generis fieri instituisti, ut plasmatio tua, quæ suggestionem diabolica decepta, tuæ majestatis imperium contemnendo, indignationem tuam incurrit, & his hostiis, atque sacrificiis obediendo placari voluisti, sicut in Sacrificio Agni primitiarum instituisti Abel, & in oblatione Melchisedech Sacerdotis tui, atque in immolatione hostiarum, agnorum, arietum, & taurorum pinguium, Abraham, Moysi, & Aaron, famulis tuis, quæ omnia illis in figuram contingebant, quia cum tua sancta benedictione sancta erant, atque salutifera humiliter offerentibus; & sicut ille, Agnus, de cujus sanguine postes, & superlimina domus immolatus, populum tuum a persecutione Egyptiaca media nocte liberavit; & quemadmodum ille Agnus innocens tuâ voluntate immolatus in Ara Crucis Jesus Christus Filius tuus protoplastum nostrum de diabolica potestate eripuit: sic isti Agni immaculati virtutem illam accipiant, quos consecrandos offerimus in conspectu divinæ majestatis tuæ. Tu eos bene dicere, sancti facere, & consecrare digneris, ut tua larga benedictione sanctificati eandem virtutem accipiant contra omnes diabolicas versatias, & fraudes maligni spiritus, ut illos devote super se ferentibus, nulla tempestas eisdem prævaleat, nulla adversitas dominetur, nulla aura pestilens, neque aeris corruptio, nullusque morbus caducus, nulla maris procella, & tempestas, nullum incendium, neque ulla iniquitas dominetur eis, neque prævaleat. Homo partus cum matre incolumis conservetur per intercessionem Unigeniti Filii tui Domini nostri Jesu Christi, qui tecum vivit & regnat in unitate Spiritus Sancti Deus &c.

Oremus tuam clementiam Omnipotens Deus, qui cuncta ex nihilo creasti, & post Adæ lapsum, Noe, & filiis ejus benedixisti, qui justî coram majestate tua comparuerunt, atque tua miseratione ab aquis diluvii salvî facti sunt; sic istos Agnos bene dicere, sancti facere, & consecrare digneris, quatenus eos devote deferentes, ob reverentiam, & honorem Nominis tui liberentur ab omni inundatione aquarum, & ab omni fluctuatione diabolicæ tempestatis, & a morte subitanea per virtutem Pas-

sonis

(1) Ita in Romana editione, in Veneta vero 1. legitur devicta.

honis Jesu Christi Filii tui benedicti, qui tecum vivit, & regnat in unitate Spiritus Sancti Deus, per omnia secula seculorum, Amen.

COMMENTARIUS.

I. **D**E hisce Orationibus, sicut & de aliis, quas in sequenti §. describemus, loquitur & in suis laudatis superius Literis Sixtus Papa V. quas una cum pluribus. Agnis Dei cereis a se benedictis misit ad Paschalem Ciconiam Venetiarum Ducem anno Christi MDLXXXVI. Sic enim ille inter alia inquit: *In aqua benedicta balsamo & Chrismate mixta hi Agnus Dei ab ipsomet Pontifice merguntur, & baptizantur, & tam ante, quam post merisionem, sanctissimis precibus, & orationibus idem Pontifex Deum obsecrat, ut easdem illas formas cereas imagine Agni impressa benedicere, sanctificare, consecrare, eisque virtutem caelestem infundere dignetur, ita ut qui illas pie, & devote, & cum fide habuerint, & detulerint, eorum crimina deleantur, macula peccatorum abstergantur, venia impetrentur, gratia conferantur; praeterea, ut fragor grandinum, procella turbinum, impetus tempestatum, ventorum rabies, & infesta tonitrua temperentur; fugiant & contremiscant maligni spiritus; nulla hic adversitas dominetur, nulla aeris corruptio, nullus morbus caducus, nulla maris tempestas, nullum incendium, nullave iniquitas noceat, parturientes cum partu incolumes conserventur; omnes denique ab aquarum inundatione, a morte subitanea, & a cunctis adversis liberentur.* Pergit Sixtus Pontifex, aitque, *hac propitiationis, & gratiarum dona a Deo misericordiarum Patre, & bonorum omnium largitore, vere tribui, atque concedi his cereis formulis sic benedictis, & baptizatis, praesertim Summa Sacerdote ipsius Christi in Terris Vicario tam pie orante, ac supplicante, firmiter credendum esse; sicut id ipsum sapissime magnis & variis miraculis, quae diversis temporibus divina bonitas per hac sacra operari dignata est, fuit saepius comprobatum.* Addit, mirum videri haud debere, si non semper idem contingat effectus, quoniam id ex infirma utentis fide, vel ex alia occulta causa, non ex defectu virtutis rei sacrae

accidere certum est. In probationem tandem mirabilia multiplicisque virtutis hujusmodi Agnorum Dei cereorum affert etiam egregium luculentissimumque Urbani Papae V. testimonium, qui magni muneris loco tres Agnos Dei ad Graecorum Imperatorem misit una cum versibus, quos leoninos vocant, virtutem ipsam exponentibus, quos in hoc Capite nostrum Caeremoniale §. ultimo descripsit.

II. Porro ut alia omittam, notabile est, quod in secunda Oratione edicitur; orat enim Pontifex, *ut quemadmodum ille Agnus innocens.... immolatus in ara Crucis Jesus Christus..... protoplastum nostrum de diabolica potestate eripuit; sic isti Agni immaculati virtutem illam accipiant.* Non enim tanta cereis istis Agnis tribuenda est virtus, quanta Passioni & Sanguini Jesu Christi tribuitur; quippe qui *lavit nos a peccatis nostris in Sanguine suo.* Passio quidem Christi Domini vera & sola est causa remissionis peccatorum, ut docet Angelicus Doctor S. Thomas Parte III. Quaestione XLIX. Articulo I. Sensus itaque verborum praedictae Orationis non alius esse potest, quam iste, ut nimirum sicut Passio Christi vere & efficaciter, ut Theologi loquuntur, a peccato & potestate diaboli eripuit, eam & isti cerei Agni consecrati virtutem consequantur modo, quo possunt. Fit in ipsa oratione comparatio inter Christum, & Agnos cereos, sed cum multa tamen differentia; sicut Christus cum nos hortatur, ut simus perfecti, sicut & Pater caelestis perfectus est, jam non aliud significavit, quam ut summo studio ad perfectionem tendamus, Patrique ejus caelesti, qui est infinitae perfectionis, quantum nobis permitti potest, assimilari conemur; uti inter alios docet eruditus Baldassarrius in Opusculo, cui Titulus, *Agni Dei dilucidati*, Cap. xv. ubi etiam versiculum illum exponit, qui de cereo Dei Agno dicit: *Peccatum frangit, ut Christi Sanguis, & angit.* Sed de hoc versu vide quae infra dicemus in Commentario ad §. VII.

§. VI.

De immersione Agnorum cereorum in aquam benedictam, & aliis Pontificis Orationibus.

His finitis, accingitur linteo Pontifex, & sumpta Mitra, sedet apud vas aquae, & Cubicularii ad eum portant Agnus Dei in pelvibus argenteis, quos Pontifex immergit in aquam, & Praelati adstantes eos extrahunt, & in pelvibus portant super mensas cum mappis mundis praeparatas, ut siccentur; & omnibus baptizatis per Pontificem, vel per ejus Praelatos, surgens Pontifex, & stans sine Mitra dicit super eos has Orationes.

Oremus.

O alme Spiritus, qui aquas fecundas, & cuncta vivificas, & in aquarum substantia, maxima quaque Sacramenta constituisti, quae a te sanctificante, amaritudine dimissa, in dulcedinem sunt conversae, & tuo flatu sanctificatae, atque imperante lavacri susceptione, Sanctae Trinitatis Nomine invocato, omnia peccata diluunt: quæsumus Domine, ut hi Agni sacra & perenni unda, balsamoque sacri Chrismatis perfusi, tu illos benedicere, sanctificare, & consecrare digneris, quatenus a te benedicti vir-
tu-

tutem accipiant contra omnia diabolica tentamenta, & omnes portantes tui esse possint inter adversa & prospera, ut tua consolatione accepta nullum periculum timeant, nullamque formident umbram; nulla scivitia diabolica, aut versutia humana eis noceat, sed fortitudine tuæ virtutis roborati tua consolatione glorientur, qui vere Paraclitus diceris, & in Trinitate perfectæ vivis & regnas per omnia secula seculorum. Amen.

Domine Jesu Christe Fili Dei vivi, qui vere es Agnus innocens, Sacerdos, & hostia, qui Prophetica voce vitis, & lapis angularis prædicaris; qui mundi peccata abstulisti; qui occisus nos redemisti Domine Deus in Sanguine tuo; atque postes pectoris, & frontis nostræ tuo cruore linivisti, ne diabolica nocturna versutia, & meridiani incursus, & populus scivians, & super domos nostras transiens, vires in nos exercerent. Tu vere es Agnus immaculatus pro nostra reconciliatione, & jugis voluisti a tuis Fidelibus in tui memoriam immolari, & in Agnum Paschalem sumi sub speciebus panis, & vini, in Sacramento in salutem, & remedium animarum nostrarum, ut mari, & præsentī seculo transacto, ad resurrectionis, & æternitatis gloriam venire possimus. Rogamus ergo clementiam tuam, ut hos Agnos immaculatos benedicere, sanctificare, & consecrare digneris, quos de cera virginea in tuum honorem formavimus per opera Crucis, & sacra unda, balsamoque, & sacri Chrismatis liquore confectos in sanctificationem tuæ conceptionis, quæ absque contagione, ac propagine humana, sola divina virtute suscepisti, sic eos deferentes tuearis, protegas, & defendas ab omni periculo incendii, fulguris, procellæ, & tempestatis, & ab omni adversitate custodias per mysterium Passionis tuæ, & sic eos liberare digneris ab omnibus periculis, & in puerperio laborantes, sicut Matrem tuam ab omni periculo liberaisti, & Susannam de falso crimine, & Beatam Teclam Virginem & Martyrem tuam ab incendiis, & Petrum a Vinculis absolutum illasum abire fecisti, ita nos ab hoc seculo illasos abire facias, ut tecum sine fine vivere valeamus. Qui vivis & regnas in unitate Spiritus Sancti Deus per omnia secula seculorum. Amen.

COMMENTARIUS.

I. **U**Ti olim in aquam benedictam cerei Agni immergerentur, quos scilicet quisque suos ad Pontificem consecrandos deferbat, docet nos in suo Diario Grassus ubi recenset benedictionem Agnorum Dei factam a Leone Papa X. anno Christi MDXIX. Pontificatus vero sui VII. sic inter alia inquit: *Retia etiam diversarum personarum fuerunt in copia infinita, & Papa jussit mihi, ut sub pena excommunicationis latæ sententiæ mandarem tunc quando Papa erat in actu benedictionis, ut nulli Agnos, quos portaverant in retibus, aut pannis, aut capsis, reportarent illos extra illam aulam, sed omnia illa retia consignarent Magistro domus, qui caperet illa, & scriberet, quot libra in unaquaque reticula essent, & cujus essent, quia Sanctitas sua volebat, aut solvere, aut restituere, & sic ego elevata voce publicavi hanc Sanctitatis suæ voluntatem, & omnibus placuit, & omnes consignarunt sua reticula eidem Magistro Domus, qui scripsit, & bene successit, quia Ordo positus fuit in ipsa aula, quæ Innocentii dicitur. Ita in suo memorato ms. Diario Grassus. Ceterum, quod linteum spectat, quo accingitur Pontifex ipsos Cæreos Agnos immerfurus in aquam prædictam, quamvis olim soliti essent illud sibi accipere Apostolicarum Cæremoniariorum magistri, invaluit tamen mos, ut linteum ipsum a Pontificatu Clementis XI. Præfectus Pontificii Cubiculi vindicaret, correctusque ab eodem Clemente fuit Candidus Cassina Apostolicus Cæremoniaris, quod linteum ipsum, quo ipse Pontifex in benedictione cereorum Agnorum usus fuerat, e manu Præfecti Cubiculi, qui illud sibi vindicave-*

rat, violenter eripiens, dilaceravit. Quicquid de ea re sit, lubet hoc loco describere quod refert idem Grassus in citato Diario de apparatu ab ipso ordinato in benedictione Agnorum Dei peracta a Leone X. anno MDXIX. sic autem inquit.

II. Feci poni bancalia tantæ longitudinis, ut a pariete usque ad alium parietem transversaret totam Aulam per medium; nam medium ipsius Aulæ disposui pro Altaribus, & mansionem Papæ, ac Cardinalium, & medium pro populo, dimisso tantulo spatio in angulo versus fenestras, ut esset aditus quasi ostium ante caminum; imo in ipso camino feci Altare ad parietem versus cornu Evangelii. Feci credentiam non Altari collateralem, sed coherentem parieti longo. Inter Altare, & credentiam, posui capsas Agnorum viginti. In medio ante conspectum Altaris posui Sedem Papæ, & concam magnam, ita ut Papa versa facie esset ad Altare; quatuor scabella erant pro duobus aliis adjuvantibus cum spatulis, sive coclearibus magnis argenteis, & ipsi Cardinales se per vices mutuo adjuvabant accincti omnes gremiali suo, & similiter Papa voluit habere suum gremiale. Feci apponi sedile transversum ad dextram Papæ pro Cardinalibus Episcopis, & aliquibus Presbyteris, & post sedile hoc feci poni duos ordines sedilium pro Prælatis, & omnia bene fuerunt. In Aula ulteriori fuerunt circumcirca mensæ latæ in duplo quam sit mensa communis, in qua communiter prandetur, & in medio sex similes latæ mensæ capientes totam Aulam, & omnes mensæ fuerunt novæ novis telis cooperatæ, quas telas Papa jussit post Agnorum repositionem debere aut comburi, aut quod melius esset,

esset, assignari pauperibus Ecclesiis pro Mappis Altarium, & similiter mensas ligneas aut comburi, aut fieri Altaria, aut aliquam sacram fabricam.

III. Papa hac die per semetipsum potius in sua Capella quotidiana parva celebravit. Deinde venit ad Aulam cum omnibus Cardinalibus, quos ipsemet prius invitaverat, licet ego dixerim, non debere nisi quatuor interesse, videlicet Priorem Episcoporum, Priorem Presbyterorum, & duos Priores Diaconorum. Sed Papa voluit eos invitare, & habere, ut ministrarent singuli per vices, devotionis causa. Scutiferi portantes bacilia Agnorum baptizandorum erant viginti, & totidem Cubicularii ferentes Agnos baptizandos ad mensas, & sex Cubicularii recipiebant in cribella, & macara, & omnia bene fuerunt ab hora decimaquarta usque ad decimam nonam. Papa in Aula voluit etiam

interesse Missæ parvæ, quam Sacrista celebravit, sed prius aquam benedixit, ut in Ordinario, & bene fuerunt omnia. Feci quod Papa mandavit Capitaneo Guardie, & vocatis sex, aut octo provilionatis, portaretur concha cooperta munda mappa, & cum eo esset Episcopus Astensis casu ibi receptus ad Basilicam S. Petri, & projiceretur aqua illa quæ superfuerat in concha simul cum aquis, quæ in diversis vasculis superfuerant benedictæ, & consecratæ, quod bene factum fuit. Ultimo scias quod cum balsamum in ampulla coagulatum superinfundi in aquas debet, est prius conficiendum, alias liquefieri non potest, nec diffuere; propterea ampulla ipsa balsami debet prius ibi in pila aquæ bullientis immergi, & deinde tolli, & conchæ aquarum infundi, alias, ut dixi, diffuere non potest, tanquam coagulatum & concretum, sed calefacta, ut supra, liquefit, & defluit.

§. VII.

De Agnorum Dei distributione, & versibus Urbani Papæ V. eorum virtutem docentibus.

His finitis, reponuntur Agni Dei in suis capsis, & deinde Sabbato in Albis post *Agnus Dei* in Missa dantur, ut in Cæremonia illius diei plenius dicemus. Legimus, Urbanum Quintum Pontificem Maximum misisse ad Imperatorem Græcorum tres Agnos Dei cum versibus infra scriptis.

*Balsamus, & munda cera cum Chrismatis unda
Conficiunt Agnum, quod munus do tibi magnum
Fonte velut natum per mystica sanctificatum.
Fulgura desursum depellit, & omne malignum,
Peccatum frangit, ut Christi Sanguis, & angit,
Prægnans servatur, simul & partus liberatur.
Munera fert dignis, virtutem destruit ignis,
Portatus munde de fluctibus eripit undæ.*

COMMENTARIUS.

I. **S**equentes ordinem nostri hujus Cæremonialis, dicemus Libro II. ubi nempe de Sabbato in Albis agendum erit, de Agnorum Dei distributione, quæ hodieque juxta antiquum ritum prædicta die fieri assolet. Quod autem alteram hujus §. partem spectat, Joannes Molanus, Jacobus Gretzerus, alique ex hoc nostri §. loco testantur, Urbanum V. ad Joannem Palæologum Græcorum Imperatorem tres particulas cere benedictæ, quas Agnos Dei communiter nominant, misisse tanquam ingens Donum cum rudioribus versibus in hoc §. descriptis, quibus eorum vis, & efficacia exprimitur in fulguribus depellendis, peccatis frangendis, tentationibus dæmonum superandis, prægnantibus, partibusque servandis, periculis ignis, & aquarum vitandis. Porro præter descriptos versus, sunt & alii quatuor, qui habentur in ms. Codice Benedictionum Pontificalium, quibus Papa utitur, asservato in Sacratio Apostolico, eosque recenset inter alios Pagi in Vita Urbani V. Num. xxxi. & sunt.

*Morte repentina salvat, sitanaque ruina.
Siquis honoret eum, retinet super hoste trophaum
Parque minor tantū tota valet integra quantum,
Aque Dei miserere mei, qui crimina tollis.*

To. I.

II. Ex recitatis versibus, quos passim Scriptores Urbano Papa V. tribuunt, jam quidam falso intulerunt, sacra amuleta ista ex cera confecta in usu esse cœpisse sub ipso Urbano V. verum hanc opinionem jam nos supra refutavimus, ubi ostendimus, Agnos Dei suam trahere a priscis Ecclesiæ seculis originem. Ut itaque id hoc loco omittamus, illud silentio minime prætereundum, quod nempe ait Victorellus in Notis ad Ciaconium in Vita laudati Urbani Papæ V. versum illum, *peccatum frangit, ut Christi Sanguis, & angit*, ab hæreticis, Illyrico, & Plessæo male intellectum, defendi, & explicari egregie a Joanne Molano, & ab aliis doctrina, & ingenio præstantibus. Particula enim, *ut*, non æqualitatem, sed similitudinem quandam analogicam ostendit, sicut & illa Christi ore prolata, *Estote perfecti, sicut & Pater vester celestis perfectus &c.* Finiti ad infinitum, nulla est proportio. Dei perfectio infinitatem complectitur, quæ in homine certis terminis circumscripto esse non potest. Cerea Agni Dei forma nequaquam abolet peccatum, ut Christi Sanguis; neque enim ea virtute præstat, qua divinus ille Sanguis in hominum lapsum redemptionem effusus; sed ab ipso Sanguine, &

mor-

morte Christi, precationibus, & benedictionibus Romani Pontificis, virtutem aliquam ad frangendum peccatum accepit. Aquæ lustralis asperisionem, Sacramentalem unctionem ad venialium culparum remissionem agere, scripsit S. Thomas Parte III. Quæstione LXXXVII. Articulo III. Ita Victorellus loco citato, ubi & de hac re plura adnotavit. Ceterum Bzovius ad annum MCCCXLVII. Num. IX. ait, si Urbanus eos cereos Dei Agnos vere Palæologo Imperatori misit, forte id eum eo consilio fecisse, ut Græcos ejurare doceret errores de Cæremoniis Ecclesiæ Romanæ. Nam & hi schismatici parum hæreticis temeritate hos Dei Agnos rident, inque locum vituli conflatilis apud Catholicos contra Canonem Concilii Nicæni successisse perperam ajunt.

III. Quanta sit denique virtus cereorum

Agnorum Dei, præter testimonium memorati Urbani V. qui multiplicem eorum virtutem verbis superius descriptis expressit, & aliorum Pontificum, qui eandem rem in Apostolicis litteris suis testati sunt, quotidiana ipsa miracula, quæ ipsorum Agnorum virtute experimur, nos docent. Unde non mirum, si Fideles eisdem magni æstiment, impense colant, ac venerentur, præsertim vero illos, quos sciunt a Pontificibus religiosioribus consecratos, quales inter alios sunt cerei Agni Benedicti XIII. ex quibus multa passim prodigia prædicantur. Fuit enim Benedictus Vir eximie pietatis, eique Deus hanc gratiam contulit, ut Christiani Populi, eo regnante Pontifice, summa pace gauderent, & rerum omnium copia abundarent; laici autem Principes ita eum colerent, ut quod eis scriberet, veluti Oraculum venerarentur.

DE CREATIONE NOVORUM CARDINALIUM

T I T U L U S VIII.

§. I.

Quibus temporibus Cardinales creandi.

Quamvis Romanus Pontifex de plenitudine potestatis, quando voluerit, & quos utiles Reipublicæ Christianæ putaverit, possit in Sanctæ Romanæ Ecclesiæ Cardinales assumere, tamen consuevit Cardinalium creationem celebrare in Quatuor Temporibus ad imitationem Sanctorum Patrum, qui illis diebus Ordinationes faciebant Clericorum Romanæ Ecclesiæ, sicut & hodie faciunt aliarum Civitatum Episcopi: aliquando tamen etiam nostris temporibus extra Tempora creati sunt Cardinales. Sixtus enim Papa Quartus anno salutis millesimo quadingentesimo septuagesimo tertio, & suo Pontificatus secundo, septima die Maji creavit octo Cardinales. Servatum tamen est (1) ut usque ad Tempora Pontifex non creet novos Cardinales, nisi de consensu majoris partis Sacri Collegii.

C O M M E N T A R I U S.

I. **A**Ntequam ritum novos Cardinales creandi juxta receptum ab aliquibus seculis Romanæ Ecclesiæ morem narrem, nonnulla hic censui de eorum origine præmittere, & de pervetusto Cardinalium nomine in Ecclesia quod quidem a recentioribus Ecclesiæ Romanæ Cardinalibus diversum est, ut non uno in loco ostendit eruditissimus Thomassinus, præsertim vero Parte III. *Disciplina*, Lib. II. Cap. cxv. Certe olim quisquis erat alicujus Ecclesiæ Presbyter Titularis, is ejusdem Ecclesiæ seu Romæ, seu alibi Presbyter Cardinalis dicebatur, Similiter quisquis erat alicujus Ecclesiæ Diaconus Titularis, vel primarius inter ejusdem loci, seu Romæ, seu alibi Diaconus Beneficiarius, appellabatur Diaconus Cardinalis. Videri possunt multa in hanc rem exempla apud laudatum Thomassinum, qui etiam docet, similem in modum fuisse antiquitus Subdiaconos Cardinales, itemque dictum etiam fuisse antiquitus Episcopum Cardinalem, Episcopum illum, qui Ecclesiæ alicui Cathedrali erat intitulus, sive incardinatus, hoc est proprius illius Ec-

clesiæ Episcopus. Itaque, ut notat Vanespen Parte I. *Juris Ecclesiastici* Tit. xxii. Cap. I. *Episcopi, Presbyteri, & Diaconi Cardinales in hoc unice ab aliis non Cardinalibus differabant, quod illi tanquam proprii, & quasi fixi, ac immobiles Ministri Ecclesiis suis essent intitulati: hi tanquam adventitii, & subsidiarii alicui Ecclesiæ essent assignati; atque ita juxta veterem Cardinalium nomenclaturam hodierni Parochi vere dicerentur Presbyteri Cardinales, Vicepastores vero non Cardinales*. Hoc sensu addit Gelasium I. in Litteris ad Cælestinum Episcopum apud Gratianum Distinctione xxiv. Canone IV. opposuisse Pontificem Cardinalem Pontifici, seu Episcopo Visitatori, qui scilicet dumtaxat ad tempus alicui Ecclesiæ tanquam Visitator invigilat.

II. Puto autem, labi memoratum Vanespen, aliosque eruditos, quos citat, agentes, ante Gelasium Papam, qui Pontificatum gessit sub finem Seculi V. *nomen Cardinalis non legi tributum Episcopis, Presbyteris, aut Diaconis*. Siquidem jam ante Gelasium Episcopi Cardinales dicti sunt in Collatione Carthaginensi inter Ca-

(1) Ita in editione Romana, in Veneta Vero legitur: *servatum tamen usque ad tempora, ut Pontifex*.

Catholicos, & Donatistas, S. Augustini ævo, qui Seculo iv. claruit. Petilianus enim Episcopus cum crimini verteret Catholicis, quod eisdem Ecclesiæ plures intrusissent Episcopos, *Cardinales, atque authenticos Episcopos*, eos dixit, qui vere & veri sponsi Ecclesiæ suæ essent; reliquos autem quasi redundantes, & supernumerarios, *imagines* vocavit. Ceterum occurrit quidem Cardinalis nomen in quadam Synodo, quæ habita dicitur sub Sylvestro Papa initio Seculi iv. sed hanc Synodum, ejusque acta ævo Caroli Magni conficta, & Sylvestro Papæ supposita esse, eruditi passim censent, quod multa scilicet in ea occurrunt, quæ id evidenter evincant. Quicquid sit, scite observat Thomassinus Parte i. Lib. II. Cap. cxv. jam ante Gregorium extare apud Pelagium Papam nomen Presbyteri Cardinalis, & apud Augustinum Episcopi Cardinalis, quamquam res illis nominibus designata omni ab ævo fuerat.

III. Temporis progressu cœperunt sensim Cardinales Romanæ Ecclesiæ ab aliis distingui ob prærogativas scilicet, quibus eos donabant Summi Pontifices. Refert Baronius ad annum DCCCLXXXII. ex Vaticanæ Ecclesiæ monumentis Joannis Papæ VIII. Constitutionem de jure Cardinalium S. R. E. qua statuit, ut bis in mense ad aliquem Titulum convenirent de reformatione Cleri, & Christianæ plebis acturi, Clericorum, & Laicorum querimonias audituri, jusque ipsis dicturi; quod sicut Pontifex Moyse, ita Cardinales septuaginta Seniorum, qui sub eo judicabant, formam gerant in Ecclesia. Monasteriorum dispositionem, atque Abbatum institutionem iis committit Cardinalibus, qui fuerant ex Monasteriis assumti. Jubet quoque, ut ob eandem Ecclesiasticæ disciplinæ sollicitudinem bis in hebdomada ad Palatium Apostolicum convenirent juxta Leonis IV. decessoris sui decreta, tandemque addit: *Sancimus de Parochiis nostris, quantumque Pontifici competit, Pontificali beneficio vos in perpetuum possidere, & in principalibus Ecclesiis juxta primatum vestræ consecrationis vicissim officia divina peragere, & eorum oblationibus, salva semper Cardinalium Diaconorum prisca consuetudine, æqualiter participare tam propter usum vestrum, quam in Ecclesiarum vestrarum luminarium concinnationes*. Notanda vero potissimum sunt, quæ ipsa Constitutione Joannes ipse VIII. de Cardinalibus edixit; declarat siquidem, *Romanæ Ecclesiæ Cardinales eodem fungi apud Romanum Pontificem officio in Sancta Dei Ecclesia, quo Seniores Septuaginta apud Moysen in Synagoga*. Ex quibus liquet, in Cardinalibus constitui universalis Ecclesiæ Senatam, atque ordinarium Summi Romani Pontificis Consilium. Nulla quippe tam præcellens sapientia est, quæ consiliorum adminiculis non egeat, adeo ut præclare observet S. Joannes Chrysostomus in Homilia ad Caput i. Actuum Apostolorum, Petrum Apostolorum Principem Sancti Spiritus donis cumulatissime ornatum, & munitum, nihil per propriam auctoritatem, aut imperium constituisse, sed in rebus gravis momenti agere solitum ex Fratrum consilio, ut liquet in electione Successoris Judæ Iscariotis ad Apostolicum munus, & in gravi disceptatione orta circa Legalium observationem.

IV. Crevit autem multum S. R. E. Cardinalium.

nalium dignitas, ubi ipsis in Concilio Romano Nicolai Papæ II. anno cxi. habito, Can. i. data est potestas eligendi Papam; sic enim scribit S. Petrus Damiani, qui eo ævo claruit Lib. i. Epistola xx. *Romanæ Ecclesiæ Cardinales Romanum Pontificem principaliter eligunt, & quibusdam aliis prærogativis non modo quorumlibet Episcoporum, sed etiam Patriarcharum, atque Primatum jura transcendunt; salvo quippe universalis Ecclesiæ sacramento, isti sunt oculi unius lapidis, ipsi lucerna unius candelabri*. S. Bernardi Lib. iv. *De consideratione*, Cardinales S. R. E. vocat Judices Orbis. Extat Rescriptum Eugenii IV. Papæ ad Henricum Cantuariæ Archiepiscopum, & Angliæ Primate, ubi hæc inter alia referuntur verba: *Ipsos præterea Cardinales honoris & dignitatis eminentia partem sui corporis Summi Pontifices appellant, ex quo sine ulla dubitatione ostenditur, post caput Ecclesiæ, quod est Papa, contigua sui corporis membra, qui sunt Fratres ejus Cardinales, præ ceteris Ecclesiæ membris, ac partibus honorari debere*. His etiam ista Eugenius adjungit, quoscunque Primates, & Episcopos a Cardinalibus Summo Pontifici assidentibus judicari, & singulos Episcopos singulis, ac particularibus Ecclesiis præesse, & providere; Cardinales autem universæ sub Papa Ecclesiæ. Profert demum Eugenius superiorum Generalium Conciliorum exempla, præsertim duorum Lugdunensium, in quibus Cardinales citra omnem ambiguitatem honoratiorem præ cunctis Episcopis locum tenuerint, teneantque etiam nunc in Concilio Florentino, quod tunc temporis agebatur. Insuper Leo Papa X. in Concilio Lateranensi v. Sessione ix. asserit, S. R. E. Cardinales dignitate, ac honore post Summum Pontificem reliquos omnes antecellere. Novissime Concilium Tridentinum Sessione xv. *De reformatione*, Cap. i. ait, Cardinalium consilio apud Summum Romanum Pontificem, universalis Ecclesiæ administrationem niti. Atque hæc sunt, quæ inter alios notavit eruditus Cabassutius in Notitia Conciliorum, Cap. lxxxv. ubi enarrat Concilium Generale xiv. & Lugdunense II. sub Gregorio X. Papa.

V. Quod vero creationem novorum Cardinalium spectat, admonet nostrum Cæremoniae initio hujus Tituli, quod *quamvis Romanus Pontifex de plenitudine potestatis quando voluerit, & quos utiles Reipublicæ Christianæ putaverit, possit in Sancta Romana Ecclesiæ Cardinales assumere: tamen consuevit Cardinalium creationem celebrare in Quatuor Temporibus ad imitationem Sanctorum Patrum, qui illis diebus Ordinationes faciebant Clericorum Romanæ Ecclesiæ, sicut & hodie faciunt aliarum Civitatum Episcopi*. Sacris Canonibus, Pontificumque Romanorum Decretis sancitum olim fuisse, ne Sacræ Ordinationes fierent extra Quatuor juniorum Tempora, jam abunde ostendimus Tomo i. Romani Pontificalis Titulo II. in Commentario ad §. xii. Eam sequutos fuisse disciplinam complures Seculi xiii. xiv. ac etiam xv. Romanos Pontifices, in Cardinalium creatione, quam scilicet peragere soliti erat Quatuor juniorum Temporibus, docent nos antiqui Auctores qui Gesta Pontificum scripsere. Certe Innocentius IV. qui electus Pontifex fuit anno mccxlii. sequenti anno, die xxix. Maji,

Sabbato quatuor Temporum Pentecostes duodecim Cardinales creavit, ut scribit in ejus Vita Nicolaus de Curbio, Cap. xii. ubi ita inquit: *Cernens igitur Dominus Papa, Innocentius IV. se plurimum Fratrum indigere consilio, cum non essent tunc, nisi septem in Ecclesia Cardinales, primo anno Pontificatus sui in Ecclesia B. Petri Apostoli de Urbe Sabbato infra octavam Pentecostes, XII. Cardinalium, videlicet trium Episcoporum, & trium Presbyterorum, ac sex Diaconorum ordinatione decentissime Ecclesiam adornavit.* Deceptus est itaque Ciaconius scribens, Innocentium in quatuor Temporibus Adventus Domini Lugduni primum tredecim S. R. E. Cardinales creasse.

VI. Innocentio IV. successit Alexander pariter IV. anno mcliv. sed cum hic licet annos sex, menses quinque, ac dies tredecim vixerit, nullum Cardinalem creasset, Urbanus IV. in ejus locum successit anno mclxi. quod Cardinalium numerus valde imminutus esset, quarto a suæ Electionis mense, in jejuniis nempe quatuor Temporum mensis Decembris ejusdem anni mclxi illum ampliavit, & septem præclaros Viros vita, & scientia, ad tam Sanctum Collegium promovit, ut scribit Monachus Paduanus in Chronico Lib. iiii. & Gregorius Decanus Bajocensis Urbani Vitæ Scriptor asserit, primam illam promotionem factam fuisse ab Urbano mense Decembri, nempe in quatuor ejus mensis Temporibus. Idem plane ritus servatus fuit, ut alia exempla omittam, Seculo xiiii. a Nicolao III. qui unica creatione novem Cardinales fecit, interque ipsos, duos ex Ordine Prædicatorum, & duos ex Ordine Minorum. Factam hanc promotionem fuisse anno mclxxviii. Pontificatus Nicolai primo, diserte asserit Ptolomæus Lucensis Lib. xxiii. *Historia Ecclesiastica*, Cap. xxvi. Panvinus annum quidem ejus promotionis non determinat, sed ait tamen, factam illam esse quarto Idus Martii, & quidem recte, ut notat Pagius in Vita ipsius Nicolai III. Num. xx. *is enim dies, scilicet duodecimus Sancto Gregorio Magno sacer, anno MCCLXXVIII. concurrebat cum Sabbato Quatuor Temporum, cum Pascha celebratum sit die decimaseptima Aprilis.* Longum esset alia id genus exempla afferre, constat enim, & alios Romanos sequioris ævi Pontifices eam ut plurimum disciplinam servasse, cujus ante nostrum hoc Cæremoniale ab Augustino Patricio scriptum, meminit etiam Pierfantianus ms. Codex Cæremonialis Romanæ Ecclesiæ labente Seculo xiv. exaratus. Seculo demum xv. anno scilicet mcdxlviii. Nicolaus V. Papa, XIII. Kalendas Januarii, hoc est die Veneris xx. Decembris in pervigilio Sancti Thomæ, & jejuniis quatuor Temporum veterem morem sequutus, sex Cardinalium promotionem fecit, ut ex Diario Consistoriali Jacobi Radulphi tradit in ejusdem Nicolai V. Vita Dominicus Georgius anno mcdxlviii. Num. xxii. Factas ut plurimum promotiones ipsas Cardinalium quatuor juniorum Temporibus, præsertim vero mensis Decembris, docet passim in Vitis Romanorum Pontificum Ciaconius.

VII. Porro, ut ait nostrum Cæremoniale, Seculo xv. quo ipsum ordinatum fuit ab Augustino Patricio, aliquando etiam extra tempora creati sunt Cardinales. Sixtus enim Papa IV. anno salutis millesimo quadringentesimo septuage-

simo tertio, & sui Pontificatus secundo, septima die Maji creavit octo Cardinales. Hoc idem fecisse alios etiam qui post ipsum Sixtum IV. Apostolicam Sedem tenuerunt, nullaque temporum habita ratione, sed quandocumque S. R. E. utilitatem esse putarunt, Cardinales creasse, res ipsa demonstrat apud Auctores, qui gesta Pontificum Litteris consignarunt. Ceterum variis exemplis ostendi potest, etiam ante Sixtum IV. Pontifices extra præscripta Tempora, ac dies Cardinalium creationem fecisse. Sane anno mccccxxv. die xx. mensis Decembris, quæ fuit dies Jovis ante Feriam vi. quatuor Temporum Gregorius Papa XI. ut ait Auctor primæ ejus Vitæ apud Baluzium, octo Cardinales Presbyteros, & unum Diaconum creavit. Observat autem laudatus Auctor, eam promotionem more consueti fieri debuisset Feria vi. quatuor Temporum, & sequenti die publicari, sed quia Festum Sancti Thomæ Apostoli, quo die non debuit fieri Consistorium, ut infra Lib. iiii. ex Cap. xiii. demonstrabimus, concurrebat cum Feria vi. creationem factam die Jovis, & publicatam die Sabbati sequenti: *Hic attendendum, inquit, quod ista creatio non fuit facta die Veneris secundum quod alias est fieri consuetum, & hoc ideo, quia illa die occurrit Festum B. Thomæ Apostoli, qua die non fuit tenendum Consistorium. Fuit etiam protelata dicta creationis publicatio usque ad diem Sabbati subsequenter propter dictum Festum, cum tamen alias in crastinum fieri debuisset.* Sed antiquato postea hoc more, subdit Spondanus ad ipsum annum, invaluit alius facilior, ut uno eodemque actu creentur Cardinales, & publicentur, sed tamen neque hic mos semper servatus fuit, ut infra suo loco dicemus.

VIII. Ait denique nostrum Cæremoniale, servatum esse, *ut usque ad tempora Pontificum non creentur novos Cardinales, nisi de consensu majoris partis Sacri Collegii.* Puto equidem, hujus novi instituti originem referri posse ad annum mccccii. quo in Conclavi post mortem Clementis VI. Conclave constructo, inter alias leges a Cardinalibus editas, quas renunciatus ab ipsis Pontifex sacramento confirmaturus esset, statutum fuit, *ut novus Pontifex non creet alios Cardinales donec eorum numerus ad sexdecim redactus fuerit, & tunc tot assumeret, quot ad plus ascenderent ad numerum viginti, & non ultra, prædictis sexdecim in eo numero computatis: quos quidem ab ipso creandos orinare deberet de omnium Cardinalium, seu duarum partium eorundem consilio, & consensu; hoc tamen salvo, quod extante numero, qui tunc erat, ordinet duos Cardinales de consilio omnium, vel majoris eorum partis.* Tradit hæc in Vita Innocentii Papæ VI. Pagius Num. II. ubi etiam addit, eas actiones se servaturos sacramento simpliciter alios spopondisse, alios vero cum hac clausula, *si jure niterentur.* Ceterum ipse Innocentius VI. anno mcccciii. memoratas leges, seu actiones a Cardinalibus in Conclavi editas, quas ipse, & quidam alii sub hac conditione juraverant, *si, & in quantum scriptura hujusmodi de jure procederet,* rescidit in cœtu quorundam Cardinalium, ac plurium Doctorum, & Jurisperitorum, quod Constitutionibus Gregorii X. & Clementis V. cautum esset, Cardinales Sede vacante de quibuscumque negotiis,

tiis, præterquam de provisione Romanæ Ecclesiæ facienda, se intromittere non posse, certis dumtaxat exceptis casibus, de quibus tamen aliquis contentus in scriptura hujusmodi non existeret; & quod scriptura ipsa in diminutionem, & præjudicium plenitudinis potestatis a Deo collatæ soli dumtaxat Romano Pontifici, redundaret, essetque temerarium, & insanum apud Catholicos asserere, quod Romanus Pontifex Successor Petri, & Vicarius Jesu Christi, non sit vocatus, & assumptus in plenitudinem potestatis; quæ profecto apud ipsum non esset, si ex aliorum consensu, arbitrio, vel adminiculo dependeret. Declaravit itaque, Cardinales contenta in scriptura nullatenus facere potuisse, ideoque nec Romanum Pontificem, nec Cardinales ipsos ad dicti juramenti observantiam aut fuisse, aut esse quomodolibet obligatos. Diploma hanc in rem editum refert Raynaldus ad annum ipsum MCCCLIII. Num. XXIX. datum apud Villam novam Avenionensis Diocesis, II. Kalendas Julii anno I. Pontificatus.

IX. Crevit magis magisque ea Cardinalium pactio fieri in Conclavibus solita, ne scilicet Papa Cardinales crearet ultra certum determinatum numerum, vel sine consensu duarum saltem partium Cardinalium, tempore Schismatis, idque statutum fuit in Conciliis Constantiensi, & Basileensi, uti jam diximus nostro IV. Tomo Conciliorum, ac renovatum etiam deinde in Conclavibus, & in eo præsertim, in quo electus fuit anno MCDLXIV. Paulus II. Inter alias siquidem leges a se aliisque Cardinalibus constitutas

& juratas in Conclavi, numero V. ita legitur: *Cardinales non ante crearet, quam ii, qui creati jam haberentur, intra XXIV. essent reducti, majoremque hoc numero non pati in Ecclesia esse; neminem quoque assumere, qui non trigessimum annum excederet, quique non professus esset, vel Pontificium jus, vel Civile, vel litteras sacras, nec nisi unum, eumque hujus generis hominem de cognatione sua eligeret; in omnibus autem eligendis, sententias Patrum non tacitas in aurem, ut ante, sed ex subselliis, ad declinandos errores, palam acciperet.* Cardinalium sententias, seu vota, five consilia circa novorum Cardinalium creationem, dicta olim fuisse ad aurem Papæ, ideoque appellata *auricularia*, docet nos ms. Cæremonialis Codex Pierfantianus Seculo XIV. exaratus, ubi recenset cæremonias, solemnitateque servari solitas in creatione novorum Cardinalium, in eo Capite, quod inscriptum est: *Quæ sunt per Papam die Veneris quatuor Temporum*, ubi ita inquit: *Die Veneris vero sequenti mandatur in Consistorio per Dominum Papam duobus Cardinalibus, quod vadant ad requirendum, & habendum consilium Cardinalium absentium super personis in Cardinales de novo creandis. Quo consilio habito, veniunt ad Consistorium dum Dominus Papa audit consilia auricularia Cardinalium, & referunt ad partem, dum est in Cathedra sua, consilia Cardinalium absentium.* Ut infirmorum Cardinalium vota exquirantur per duos Cardinales juxta præscriptum nostri Cæremonialis, dicemus infra in Commentario ad §. IV.

§. II.

De primo Consistorio, an sint creandi Cardinales, & quot?

Cum igitur Pontifex voluerit novos Cardinales creare, quarta FERIA Quatuor Temporum in Consistorio secreto proponit Fratribus suis Sanctæ Romanæ Ecclesiæ Cardinalibus causas, quæ mentem suæ Sanctitatis movent ad novos Cardinales faciendum; deinde exquirat sigillatim eorum sententiam, an videatur eis expedire nova Cardinalium creatio. Exponunt vota sua omnes per ordinem libere, & ut ab omnibus intelligantur, servato ordine dignitatis, & prioritatis, videlicet, primum Episcopi, deinde Presbyteri, ultimo Diaconi. Et quamvis antiquis temporibus in consiliis, & votis dandis, præterquam in electione Pontificis, ordine præpostero, inter Diaconos prior Diaconorum esset ultimus, & junior primus; tamen hodie res ad debitum ordinem redacta est, & prior est primus, & junior ultimus. Si major pars Collegii in sententiam Pontificis venit, tunc agitur de numero promovendorum, in quo si eadem die conveniunt, dimittitur Senatus, & indicitur ad sextam Feriam aliud Consistorium, & Pontifex monet Cardinales, ut cogitent de personis promovendorum.

COMMENTARIUS.

I. **A**git & de hoc ritu Romanus Ordo XIV. Cap. CXVI. & Codex ms. Cæremonialis Pierfantianus Seculo XIV. exaratus in eo Capite, quod inscribitur, *Quæ sunt per Papam die Mercurii Quatuor Temporum in creando Cardinales*, ubi ita inquit: *Die Mercurii Quatuor Temporum Dominus Papa in Consistorio consuevit querere a Cardinalibus, faciendo aliqualem brevissimam collationem, quod expediat creare novos Cardinales. Cardinales vero postea omnes, quilibet secundum ordinem suum, consueverunt respondere, & consulere, an*

expediat fieri, vel non. Quo facto, Dominus Papa consuevit dicere: Nos sequimur consilium dicentium, quod secundum quod ejus melius videbitur, fiant. Et ubi eligit viam quod fiant, immediate interroget Cardinales de quanto numero videtur eis fiendum. Quo responso per eos ut supra, Dominus Papa dicit: Nos sequimur consilia dicentium, quod fiat usque ad talem numerum. Deinde dicit ibidem: Cogitabimus, & vos cogitetis de personis nominandis. In die Veneris proxima agemus Deo dante super his. Ista sunt verba, quando Cardinales omnes in-
Con-

Consistorio sunt presentes; si autem aliqui sint in domibus suis infirmitate detenti, est consuetum ante Consistorium mandare duos Cardinales per Dominum Papam ad Cardinales absentes, & requirant, & habeant eorum consilium super prædictis duobus questionibus, & relatione facta postea Domino Papæ in Consistorio, audientibus omnibus Cardinalibus, per illos Cardinales Deputatos, ipse postmodum eligit in Consistorio, an velit sequi consilium Cardinalium, an non. Hactenus Romanus Ordo, & Pierfantianus Codex longe haud dubie ante hoc nostrum Cæremoniale exaratus, ex cuius postremis verbis addiscimus, consuevisse quidem vel olim Pontificem Cardinales novos creaturum vota antiquorum exquirere, non tamen ea sequi fuisse adstrictum, vel omnino duarum partium votis adhærere, ut non sine temeritate prætensum aliquando a Cardinalibus fuit.

II. Luculentissimum tamen antiquioris disciplinæ testimonium habemus quidem apud Raynaldum, qui ad annum mcccxxx. Num. xxxii. Litteras refert ad Joannam Galliæ Reginam datas, quibus se excusat, non posse se precibus Philippi Regis annuere, qui eum urgebat, ut Gallicæ suæ Nationis Cardinalem alium crearet: *Utinam filia carissima*, inquit, *mos servatus in creandis Fratribus circumspeditioni Regiæ esset notus. Ipsorum quidem creatio nunquam fit in Camera, sed in Consistorio votis Fratrum omnium exquisitis. Item non consuevit, nisi ex causa creatio fieri eorundem. Causa autem consueverunt existere, vel parvus eorum numerus, vel ipsorum impotentia ad suum officium exercendam; quæ si ad præsens considerarentur attente, profecto nec numerus parvus, nec ex parte illorum debet aliqua impotentia judicari. Ostendit id Pontifex exemplo Prædecessoris sui Clementis Papæ V. ac deinde hæc subjicit, quæ & rem nostram quam maxime spectant: Optaremus in super filia benedictionis & gratia, quod Regum aliorum te instantia non lateret. Adhuc desideramus, quod Celsitudo Regia dictum Sapientis dicentis, Omnia tempus habent; & quod cum negotio est tempus, & opportunitas, interdum ad memoriam revocaret. Credimus quidem, quod si hoc deduceret ad consistorium rationis, quod pro creatione novi Fratris isto tempore non instaret. Nos autem præmissis in consideratione deductis, ac cum venerabili Fratre nostro Petro Tituli S. Martini in montibus Presbytero Cardinale, ac Regio Nuncio conferentes, licet parati essemus Fratribus nostris vota exponere Regiæ; quia tamen ex iis, quæ in proximo præteritis ordinibus probavimus, ubi vota super hoc eodem negotio Regia eisdem fuerunt exposita, verebatur, quod attentis omnibus supradictis, eorum non haberemus assensum, visum fuit expedientius ad præsens istud negotium subterire. Quare habeat nos super hoc Celsitudo Regia excusatos. Datum VI. Kal. Octobris, anno XVI. id est Pontificatus, anno vero Christi mcccxxxviii.*

III. Edidit præterea Raynaldus excerptum ex Rituali anni mcccxxxviii. quo refertur, Feria quarta Quatuor Temporum Consistorium a Papa indici, & subductis Cardinalium suffragiis, ex majori eorum numero declarare, an novos creari Cardinales necesse sit, & quo numero. Sexta Feria in alio Consistorio deligi solitos Cardinales novos, Sabbato vero publica-

ri, ducto initio ab eorum absolutione a vinculis aliarum Ecclesiarum, siqui Prælatorum electi sint. Narrat idem Raynaldus, quod cum Eugenius IV. Summum Pontificatum consequutus esset, juramento confirmavit eosdem articulos, quibus se jam cum aliis Cardinalibus adstrinxerat. In his articulis ille ante alios memorandus erat, Cardinales a se creatum non iri ullos, nisi servatis regulis Concilii Constantiensis, & cum consensu Cardinalium. Concilium vero Basileense anno mcdxxxviii. Sessione xxiiii. ut essent re, quod nomine sunt Cardinales, & fulcimenta Ecclesiæ, *qui sicut nomine, ita re ipsa cardines sint, super quos ostia universalis versentur, & sustententur Ecclesia*, edixit, ut ex omnibus Christiani nominis Regnis, quantum fieri posset, eligerentur; ne eorum numerus supra vigintiquatuor excreset; ne ejusdem nationis esse ad summum posset nisi tertia pars; ne ejusdem Diœcesis nisi unus; non magis dignitate, quam pietate, & eruditionis sacræ copia emerent; triginta saltem essent annorum; tertia saltem eorum, vel quarta pars Graduatorum esset; essent aliqui, sed pauci stirpis Regiæ, Principumque; ea dignitate arcerentur nepotes Pontificis, vel Cardinalis cujuscumque, dum superstes ipse esset; nominaret eos Papa, non vota Cardinalium seorsim, taciteque scrutatus, sed suffragiis scriptis majoris eorum numeri; denique, ut illud animo altissime infixum haberent Cardinales, hac se Purpura ad Martyrium pro Ecclesia Christi subeundum authorari, animarique. Eadem pene erant quæ ante Basileense Concilium de eadem re statuerat Concilium Constantiense, ut notat Thomassinus Parte 1. *Disciplina*, Lib. II. Cap. cix. Num. xii.

IV. Rursus anno mcdlviii. ante creationem Pii II. Cardinales in plures quoque jurati sunt articulos, quos inter ille erat de non creandis Cardinalibus, nisi accommodate ad Statutum Concilii Constantiensis, uti ad eum annum tradit Raynaldus Num. v. Hinc ubi Pius II. anno mcdlx. tertio Nonas Martii Romæ ex Panvinio, & Ciaconio, ex Contelerio vero, aliisque, Senis in Palatio Episcopali primam Cardinalium creationem fecit, habito prius Cardinalium assensu, ea lege adjecta, ut unus tantum nepos esset, Cardinales novos renunciavit, & præter morem eadem Feria iv. quatuor Temporum Quadragesimæ publicavit Presbyteros Cardinales quinque, & Diaconum unum. Rem narrat Auctor Commentariorum Pii Papæ II. Lib. iv. cujus verba magis magisque nostrum hunc §. illustrant: *Aderant*, inquit, *Tempora Quadragesimalis jejunii, quæ veluti Cardinalium Comitia censentur, & jam fama vulgatior, novum Pontificem novos creare Cardinales velle, tanquam perfectus per omnia Pontifex non habeatur, nisi Cardinales assumerit. Tum preces multorum porrectæ sunt: Imperator unum efflagitavit, cui Pontifex cupide annuebat: Rex Franciæ duos: unum Rex Aragonum: Ferdinandus Rex Sicilia, & Franciscus Mediolanensis Dux plures: Dux Sabaudia unum: Dux Burgundia unum: Marchio Montisferrati unum: Florentini & Cosmas unum. Pontifici ex nominatis pauci placebant, & habebat ipse alios suo judicio digniores, & quos sibi fidos existimabat fore.*

V. Multa hic sunt, quæ adnotari possent, sed

sed digniora notatu sunt, multumque lucis afferunt nostro §. quæ mox idem Auctor subijcit: *Cæpit itaque*, Pius nempe II. Pontifex, singulos Cardinales alloqui, ut eorum præsentiret animos. Postquam vero magna ex parte sibi satisfactum iri cognovit, vocato Consistorio secreto ipsa quarta Feria, in qua creandis Cardinalibus sermo fieri solet, in hunc modum præfatus est: Messis quidem multa, Operarii autem pauci. Messis nostra, Fratres, animarum salus est, ager in quo metimus Ecclesia, quam vestro consilio regendam accepimus, hanc contra Turcas, & infideles alios tueri debemus, ex hac tribulos, & malas herbas, hoc est, hæreses, & pravos mores extirpare cogimur: si volumus messem ad aream Domini multam afferre, & denique puri, purgatique tritici in horreo multum recondere, vos ad hæc Operarii nobiscum estis constituti, sed pauci estis, & nonnulli ex vobis, aut senio, aut ægitudine impediti sunt, ne ipsis uti possimus. Necesse igitur est, ut numerum vestrum augeamus, & aliquos assumamus, qui debiliu vires suppleant: curare tamen oportet, quamvis est difficile, ut dignos tanto munere eligamus, ne dicat quispiam: *Multiplicasti gentem, & non magnificasti latitiam*: Verum si dignitas hæc merentibus danda est, in Cælo quæramus oportet, quos rubeo Pileo donemus: Nos tamen ut homines eligemus homines, quando non Cælum, aut Angelos, sed terram, & homines recturi sumus. Miramur autem, tantam esse petentium turbam. Nam quis est Clericali Characterè insignitus, qui non se dignum Cardinalatus honore dijudicet? qui non petat, qui non instet, & inter candidatos, ut ita dicamus, videri, & esse velit? Nimirum viluit hæc dignitas, quando vel pueri eam sibi debere existimant; sed incidimus in mores istos, non possumus prohibere petentes, non admittere facile possumus. Cogitate, qui sunt idonei, de numero ipsi judicabimus; curaturi. ne vel nimietate vilescat dignitas, vel paucitate Reipublicæ non satisfaciat.

VI. Hæcenus Pii concio ad antiquos Cardinales de novorum Cardinalium creatione; eaque finita, ut idem Auctor ait, *nominavit, quinam essent vel per se ipsos, vel per alios Cardinalatum petentes. Consensere Cardinales, quinque assumi novos, ea lege adjecta, ut nepos unus esset*. Pius, his obtentis, sextum, inquit, non negabit, quem nominavero omni exceptione majorem, & quem procul dubio laudabit nominationem. Illi nominationem petere, Pontifex consensum exquirere ante nominationem. Vicit tandem Pius, & assensu habito, sextum nominavit Alexandrum Oliva de Saxoferrato oriundum, Ordinis S. Augustini Generalem Magistrum, Virum Theologum Doctrina celebrem, & vita sanctitate illustrem, qui ubi nominatus est, non habuit aduersarium. Facta novorum Cardinalium electione, ut idem Auctor testatur, non expectavit Pontifex sextam Feriam, in qua pronunciari Cardinales, & publicari consueverunt, sed ipsa die, præter omnium opinionem, pronuntiationem, & publicationem fecit. Quæ res non parvam molestiam antiquis Cardinalibus abstulit, quibus ante ora competitorum nulla quies dabatur. Porro visus est Pontifex Italiæ optime consuluisse, quinque Cardinalibus ex ea creatis, sed, ut memoratus Auctor subdit, rem

quoque prius inauditam fecisse, qui duos ex familia sua Cardinales, & nepotem suum uno in Consistorio creasset. Illud vero laude dignum, sine controuersia cunctos judicasse inquit, & primo quidem, quod nominatus nemo tanta dignitate videbatur indignus, nec ullam aliquando creationem factam fuisse, quæ in tam parvo numero tot præstantissimos Viros complexa fuisset. Secundo, quod absque Principum intercessione, excellentissimi Viri electi fuerant.

VII. Quid post Pii II. Summi Pontificis obitum, ante electionem Pauli Papæ II. anno Christi MCDLXIV. statutum in Conclavi fuerit de Cardinalium electione, præsertim circa articulum illum consensus Cardinalium antiquorum, jam dictum superius fuit. Illud certe explicari satis nequit, quantam & ipsi Romani Pontifices, & Sacer Cardinalium Senatus, passi sint semper vexationem ob novorum Cardinalium creationem, præsertim vero sub Sixti Papæ IV. Pontificatu. Cum enim mense Maji anno Christi MCDLXXIII. ut narrat Spondanus, octo creatis Cardinalibus, reservatus fuisset Imperatori, Regi Francorum, & Ferdinando Neapolis Regi locus, uni creando, quem sibi quisque deposceret; petatum mox est, ut sequenti mense Junio nova fieret creatio, urgente maxime tanta instantia Ferdinando pro nescio quo penitus indigno, ut minas etiam intentaret obliterationis omnium in se meritorum Ecclesiæ, & remissionis singulorum Cardinalium amicitia. Vnde, & multæ ortæ inter ipsos etiam Cardinales, nec non Pontificem contentiones pene usque ad seditionem. Dilata tandem creatio usque ad Natale Domini, ingenti præcipue mœrore Ferdinandi, qui per plures Litteras Senatus Cardinalium suadendus fuit immoderatam suam cupidinem temperare, postea evanuit prudentiorum Cardinalium arte. De quibus sunt plurimæ Jacobi Cardinalis Papiensis Epistolæ, nempe DX. & aliæ sequentes multæ ad diversos datæ, quæ, & rem docent, & plane ostendunt, haud fuisse tunc solius Pontificis facultatis, nisi pleno, & summo jure agere voluisset, Cardinales quos vellet creare, uti observat ad ipsum annum MCDLXXIII. Spondanus Num. XIV. ubi etiam notat varias ejusdem Papiensis extare Epistolæ, quales sunt DCLVII. & aliæ sequentes, de simili controversia suscitata anno MCDLXXVI. Porro testante Panvinio, primus Papa Sixtus IV. nulla habita ratione Concilii Basileensis, supra omnes Prædecessores suos Cardinalium numerum maxime ampliavit, cujus exemplum optime sequutus est Alexander Papa VI. Nullus tamen horum Pontificum antiquum LIII. numerum excessit, ut essent videlicet plures quam LIII. quum nec eum numerum attigerint &c.

VIII. Præterea, ut idem tradit Panvinus, omnium Romanorum Pontificum primus fuit Leo X. qui antiqui Statuti ratione non habita in magna illa XXXI. Cardinalium creatione veterem, & antiquum, atque a nullo unquam Romanorum Pontificum excessum, numeramque longe superavit. Nam sub Leone X. plus minus LXV. Cardinales simul viventes fuerunt, quod nunquam alias contigerat post fundatam Romanam Ecclesiam. Ejus exemplum sequuti sunt Paulus III., & qui nunc vivit Paulus IV. Prior enim ad LXIII. numerum Cardinales auxit,

auxit, sequens ad lxx. quem quoque numerum nunquam fuisse satis constat. Hunc numerum tanquam respondentem septuaginta Viris, quos de Senioribus in suum adiutorium ex mandato Dei assumpsit Moyses, & septuaginta Discipulis, quos binos ante faciem suam misit Christus, retinendum decrevit Sixtus V. in Constitutione, quæ incipit, Postquam verus ille, statuens, ut in posterum connumeratis omnibus cujuscunque Ordinis, Episcopis, Presbyteris, & Diaconis Cardinalibus, qui nunc sunt, quique in futurum creabuntur, cuncti simul numerum septuaginta nullo unquam tempore excedant, ac talis numerus quovis prætextu, occasione, vel causa, etiam urgentissima minime augeatur; declarans, electionem, ac nominationem alicujus ultra dictum numerum nullam, irritam, ac inanem.

IX. Sicut circa numerum Cardinalium varia pro temporum varietate intercessit disciplina, quam explicuimus Tom. iv. Conciliorum in Sessionem xxiii. Concilii Basileensis, ita & in veterum Cardinalium assensu, ubi novi Cardinales creabantur. Licet enim juxta morem, qui potissimum post Avenionense Schisma invaluit, non fuerit solius Pontificis facultatis, nisi pleno, & summo jure agere voluisset, ut notat Spondanus ad annum mcdlxxiii. Num. xiv. Cardinales quos vellet creare, sustulisse tamen demum eum morem videtur Leo Papa X. de quo ita scribit in ejus Vita Ciaconius: *Inconsultis Patribus, quod eis valde acerbum fuit, præter quatuor Cardinales jam restitutos, & quatuor alios anno i. sui Pontificatus creatos, unum atque triginta Cardinales elegit. Recessit itaque, & merito quidem ab aula solemnitas illa, quam in Cæremoniali nostro, & in vetustioribus aliis monumentis legimus de antiquorum Cardinalium consensu in creatione novorum Cardinalium. Summus etiam Pontifex, nullo alio, seu paucorum postulato suffragio in unico Consistorio, & quocunque tempore, Viros sibi optime notos, Romanæ Sedi Consiliarios eligere, & sacra Purpura decorare potest, ut inter alios docet Jacobatius, De Concilio, Lib. vii. Articulo v. Num. cxvii., & post eum Cohellius in Notitia Cardinalatus, Cap. ix. ubi etiam notat, quandoque Sacro instante Collegio Cardinales creatos fuisse, probatque exemplo præstantissimi Gulielmi S.R.E. Cardinalis Sirleti, ex marmoreo lapide, qui hodieque extat in Ecclesia S. Laurentij in Panisperna, ubi aliis omis- sis legimus: A Pio IV. Pontifice Maximo, Sacro instante Collegio Cardinali creato.*

X. Unum est, quod in calce hujus Commentarii adnotem, id nempe, quod scribit Ciaconius de Cardinalium creatione facta a Leone X. Papa, *inconsultis Patribus*, intelligi quidem de aliis creationibus ab ipso Pontifice factis non autem de prima quatuor Cardinalium creatione habita anno i. sui Pontificatus, Christi mdxiii. die xxiii. Septembris, in qua, ut

scribit Grassus in suo ms. Diario, Cardinales antiqui præsentibus consenserunt voce, absentes autem Litteris, & quidem juxta Capitulum in Conclavi stabilitum, in quo Leo ipse fuerat electus: *Die Luna, ait Grassus, quæ fuit xxiii. Septembris mdxiii. Sanctissimus Dominus Noster Leo quatuor Cardinales creavit, sedentibus in Consistorio viginti Cardinalibus, atque aliis omnibus per Litteras consentientibus. Sic enim fuerat in Capitulo Conclavis stabilitum, ut Pontifex in Cardinalium creatione teneretur omnes Cardinales absentes a Bononia, citra vocare, ut adessent, aut saltem, ut consentirent. Itaque in hac prima creatione, quam initio Pontificatus Leo X. fecit, oportuit non modo præsentibus Cardinales voce, verum etiam absentes per Litteras consentire. Id quod etiam constat ex ipsius Leonis Oratione ad novos Cardinales habita, quam recenset idem Grassus loco citato; estque hujusmodi: Filii dilectissimi, profecto gratias agentes vos Deo in primis reddere oportet cum istis Reverendissimis Dominis Cardinalibus, qui vos ex infirmis, & simplicibus in tantum fastigium assumere dignati sunt, ut eisdem æquales fieri mereamini Cardinales, sicut ipsi; nempe maximam dignitatem ipsorum beneficio, & benignitate assequuti estis, quam si mente plena considerabitis, & agnosce- tis, nunquam cessabitis in Dei Optimi Maximi laudatione, & gratiarum actione adversus præfatos istos Reverendissimos Dominos. Nos quoque Personas vestras libenter proposuimus, quia maxime speramus, quod totis viribus incumbetis in honorem hunc, & onus digne sufferetis, & impleatis, quæ sunt ad id opportuna, quæ quamvis vos facturos speramus, hortamur tamen, & mandamus, ut ita vos in ipsa Cardinalatus dignitate geratis, quod nos de hujusmodi vestra promotione pænitere nullo unquam tempore contingat. In Nomine Patris &c.*

VI. Refert hæc in suo ms. Diario Grassus, subditque mox, quod, *his dictis, novelli singuli absque eo quod aliquid particulare responderent, assurrexerunt, & pedem, & manus, & faciem Papæ ab utroque latere osculati sunt, dicentes: Ago gratias Deo Omnipotenti, & Sanctitati vestræ. Et demum ad dextrum latus Papæ stantes se se locaverunt. Deinde ad Cardinales fecerunt inclinationem profundam, & osculati sunt ab utroque latere singulos; tum firmaverunt se se ad sinistram Papæ, ubi cum vellent iterum genuflectere, prohibuit &c.* Cardinales ipsi teste Grassus, fuerunt Laurentius Pucius Florentinus nuper Datarius, Julius de Medices Florentinus consobrinus Papæ, Dominicus Bernardinus de Bibiena Florentinus Alumnus Papæ, & Thesaurarius, Dominicus Innocentius Cybo nepos Papæ ex sorore natione Januensis ex Domino Francisco Cybo filio Joannis Banti- stæ Cybo, qui postea fuit Innocentius Papa VIII. Sed de his vide Ciaconium.

§. III.

De secundo Consistorio, & forma pronunciandi Cardinales.

Sexta FERIA iterum conveniunt Patres ad secretum Consistorium, & (1) proponit Pontifex nomina illorum, qui sibi videntur idonei ad talem dignitatem, & causas, cur ad

(1) deest & in editione Veneta, & Coloniaensi, sed legitur in Romana.

ad id moveatur, exponit, five sint merita personarum, five Principum justæ preces. Rogat (1) Patres sententiam, & in quibus major pars Collegii consentit, illi tantum Sanctæ Romanæ Ecclesiæ Cardinales a Pontifice pronunciantur in hanc formam: *Auctoritate Dei Patris Omnipotentis, Sanctorum Apostolorum Petri & Pauli, & nostra, N. Episcopum Firmanum absolvimus a vinculo, quo tenebatur, Ecclesiæ suæ Firmanen., & ipsum assumimus in Sanctæ Romanæ Ecclesiæ Presbyterum Cardinalem, & B. Protonotarium Senen. assumimus in Sanctæ Romanæ Ecclesiæ Diaconum Cardinalem; & sic de singulis. Sic vero aliquis non erat prius Episcopus, non dicit, absolvimus a vinculo, quo tenebatur, Ecclesiæ &c., sed simpliciter dicit, assumimus.*

C O M M E N T A R I U S.

I. **Q**UI ritus vel olim servaretur in secundo Consistorio fieri solito in Feria vi. Quatuor Temporum circa novorum Cardinalium pronuntiationem, docet nos Romanus Ordo xiv. Auctore Gaetano, Cap. cxvi. & ms. Codex Cæremonialis Pierfantianus, Capite inscripto, *Quæ fiunt per Papam die Veneris Quatuor Temporum*, sic inquit: *Die Veneris vero sequenti mandatur in Consistorio per Dominum Papam duobus Cardinalibus, quod vadant ad requiring, & habendum consilium Cardinalium absentium super personis in Cardinales de novo creandis. Quo consilio habito, veniunt ad Consistorium, dum Dominus Papa audit consilia auricularia Cardinalium, & ei referunt ad partem, dum est in Cathedra sua, consilia Cardinalium absentium. Pergit laudatus Ordo, & ms. Cæremonialis Codex, subditque: Quæ die Veneris, facta primitus reverentia Papa per Cardinales, Papa mandat, quod portetur Cathedra nuda. Quo dicto, Cardinales omnes exeunt Consistorium, & ponunt se in fine Aila, vel Camera, quæ est prope Consistorium, excepto priore Episcopo Cardinalium, qui remanet ibi, & ponit se ad sedendum supra Cathedram nudam, quæ debet esse ad latus Papæ dextrum parata. Neque omittenda, quæ in eodem Ordine, & ms. Cæremoniali leguntur, multum enim lucis afferunt explicando nostro Cæremoniali, priscumque ritum egregie enarrant: Dominus Papa, inquit, consuevit dicere illi Cardinali, & aliis post eum venientibus secundum ordinem suum: Nos cogitavimus de talibus personis, quas ibi nominat. Dicatis quid vobis de ipsis, vel aliis, videtur, esse fiendum. Tunc Cardinalis ille, & alii successive postea per ordinem suum venientes respondent quid eis videatur, secundum quod eis Deus ministravit; & cum omnes Cardinales successive secundum ordinem suum responderint, omnes redeunt ad sedendum in Consistorio secundum ordinem suum.*

II. Sapiunt præterea antiquum ritum quæ mox in laudato Romano Ordine, & Cæremoniali sequuntur, ubi non modo expressa fit mentio antiquorum omnium Cardinalium consensus, vel majoris eorum partis in novorum Cardinalium creatione, verum etiam verborum formulæ, quæ vel olim utebatur Pontifex, cum Cardinales creabat: *Quo facto, Dominus Papa consuevit eis dicere: Deo gratias, Nos habemus de personis concordiam omnium Fratrum; vel majoris partis, secundum quod fuit; nihil tamen aliud super ipsa concordia specificè exprimendo, & immediate ibi ipse creat Car-*

To. I.

dinales tam presentes in Curia, quam absentes, dicendo: Auctoritate Dei Patris Omnipotentis, Sanctorum Apostolorum Petri & Pauli, talem, si sit Prælatus, absolvimus a vinculo, quo tenebatur, Ecclesiæ suæ, & ipsum assumimus in Presbyterum Sanctæ Romanæ Ecclesiæ Cardinalem. Ubi ille non esset Prælatus, dicit: Talem assumimus in Presbyterum Cardinalem, vel in Diaconum Sanctæ Romanæ Ecclesiæ Cardinalem, secundum quod eidem Domino Papæ magis placebit super hoc ordinare. Vel ex hac antiqua creandi Cardinales formula addiscimus, cum quis olim Cardinalitia insigniebatur dignitate, omnibus suis ante habitis, ipsoque etiam Episcopatu illico illum fuisse exutum, nisi Pontificis interveniret dispensatio, qui etiam eidem Episcopatum suum ad aliquod tempus commendare solitus erat; uti nos docet exemplum Joannis Papæ XXII. qui cum anno Christi mcccxxx. ad preces Gallorum Regis Philippi, Cardinalium Collegio adscripsisset Episcopum Altisiodorensem Talarandum, veniam ei fecit, ut bimestri tantum spatio reditus Ecclesiæ suæ retineret, ad itineris expensas. Sic enim Joannes ipse Pontifex ad Regem scripsit, vii. Kalendas Junij anno mcccxxx. apud Raynaldum, Num. xxx. vii. Ut in veniendo possit expensas habilitè supportare, eidem dictam Altisiodorensem Ecclesiam de Fratrum nostrorum consilio usque ad instans Festum Mugdalene duximus commendandam.

III. Teste eodem Raynaldo, Clemens Papa VI. anno mcccxliv. cum Episcopum Atrebatensem Cardinalatus Purpura exornasset, a vinculo eum prioris absolvit Ecclesiæ, juxta formulam creandi Cardinalem, qui erat alicui Episcopatu alligatus: *A vinculo, quo Atrebatensi tenebaris adstrictus, per Nos de potestatis plenitudine absolutum ad Cardinalatus duximus assumendum.* Ex quibus verbis apertissime demonstratur quam non cohæreret olim Cardinalatus cum Episcopatu, exceptis iis Episcopalibus Ecclesijs, quæ Tituli Cardinalium ipsæmet sunt; estque hæc vetus disciplina, cui inhærens Innocentius Papa IV. circa annum Christi mccxli. ut tradit Synodocon Rotomagensis pag. 251. transtulit Episcopum Rotomagensis ad Ecclesiam Albanensem, qui Titulus est Episcopi Cardinalis, Successoremque dedit in Ecclesia Rotomagensi Abbatem Sancti Dionysii. Certe quod donatus Cardinalitia dignitate, illico Episcopatu, siquem habebat, exueretur, jam multi oblatam sibi Purpuram abnuebant. Refert Theodericus de Niem, Lib. I. De schismate, xlii. allectos Cardinalium Col-

P p

legio

(1) Ita in Romana editione, in Veneta, & Colonienfi legitur: *Rogantur Patres sententiam.*

legio ab Urbano Papa VI. tres Electores Imperii, eosdemque Archiepiscopos, cum aliis Germaniæ Episcopis, omnes abnuisse, & dissensu suo spem frustra Pontificis, licet is ultro largiretur, ut simul propriæ administrationem Ecclesiæ retinerent: *Cardinalatus honorem acceptare noluerunt, licet Papa Archiepiscopis, & Episcopis præfatis Ecclesiarum sibi commissarum administrationem in spiritualibus, & temporalibus, quoad viverent, eis etiam non petentibus conservasset.* Specialis erat gratiæ, & arbitrarii beneficii, quod Archiepiscopatus, & Episcopatus suos retinere permetterentur. Maluere ergo illi Germanici Principes Imperii Ecclesias suas jure suo, quam alieno beneficio; Titulo, quam Commenda, possidere, ut observat Thomassinus Parte II. *Disciplina*, Lib. III. Cap. v. Num. xii. ubi etiam ex eodem Scriptore Niemo refert, adscriptum a Gregorio XII. Cardinalium Collegio Episcopum Vormaciensem recusasse eam Eminentissimam Dignitatem, veritum, ne ea admissa daretur sibi Successor in Ecclesia Vormaciensi: *Episcopum Vormaciensem Gregorius XII. fecit Cardinalem, sed noluit acceptare, timens forte, quod si illum acceptaret honorem, alius sibi subrogaretur Antistes in Ecclesia Vormaciensi.* Verba sunt Theodorici de Niem, Lib. III. Cap. xxxix,

IV. Verum ut dilucidius adhuc fiat, quam non possit Episcopatus cum Cardinalatu consistere præter sex illos Cardinales Episcopos, scitissime idem Thomassinus notat, repulsam passos fuisse ab Innocentio Papa III. Ravennates, qui Cardinalem postulabant in suam Ravennatem Ecclesiam Episcopum, agente Pontifice, eum Cardinalem Romæ sedentem, non universali tantum, sed & ipsi Ravennati Ecclesiæ, utilitati, & ornamento majori futurum, quam si Ravennati Ecclesiæ affixus fuisset. Extat Pontificis Rescriptum in Capite, *Bona memoria, De postulatione Prælatorum*, ubi ita inquit: *Considerantes, quod ejusdem Cardinalis præsentia utilior sit, non solum Romana, sed etiam Ecclesiæ generali, tam apud Apostolicam Sedem, quam apud Ecclesiam Ravennatem. Unde non immerito præferentes speciali utilitati communem, & minori majorem, prædictum Cardinalem vestræ postulationi non duximus concedendum.* Non postulabantur, nisi qui ex Regulis Juris eligi non possent. Responsio Pontificis abnuentis, & ratio ab eodem deprompta eandem produnt legem non fociandi unquam Episcopatus cum Cardinalatu. Non dissimulabat enim Innocentius, si Ravennatis Ecclesiæ Sedem Cardinali indulgisset, Roma illi demigrandum, Ravennam concedendum post hac fuisse, & ab eis cessandum officiis, quibus de Ecclesia universa benemerabatur. Certissime tamen ejusdem Pontificis creberrimæ fuere Epistolæ ad Willelmum Archiepiscopum Remensem, & Episcopum S. Sabini Cardinalem, quem ea dignitate auxerat Alexander Papa III. Erat ille Ludouico VII. & Philippo Augusto Galliæ Regibus arctis cognationis nexibus vinctus, ideoque non mirum, si favori Regum, aut Archiepiscoporum, Episcoporumque splendidissimis natalibus donaretur, ut cum eis præter avitas Ecclesiæ leges, in ejusdem Ecclesiæ bonum, dispensaretur.

V. Sequioribus seculis ea certe fuit causa necessaria permittendarum Cardinalibus Eccle-

siarum, quas prius regebant, quod alioqui abnuebatur Cardinalatus, in quo tamen Ecclesiæ universæ operam industriamque suam utilius tum nauassent. Anno MCDXXVI. a Martino V. albo Cardinalium inscriptus est Joannes de Rochetaille Archiepiscopus Rotomagensis, solutusque vinculo, quo ei Ecclesiæ illigabatur, quamvis & eam retinere fineretur, quod jam sæpissima ea indulgentia utendum fuisset, ne a Cardinalatu resilirent, qui eo collato, prioribus omnibus Beneficiis excutiendi erant: *Quod aliquibus de Ecclesiis, quibus præerant evocatis ad statum Cardinalatus, ex hujusmodi causa eadem Ecclesiæ sunt dimissæ, per illos sicut antea in spiritualibus, & temporalibus gubernandæ; & hoc sæpius expertum est Ecclesiis talibus profuisse.* Verba ea ipsissima sunt Pontificii Rescripti. Invaserat tunc Rex Angliæ plerasque Gallicani Regni Provincias, & Civitates; concessumque iccirco fuit huic Cardinali, ut Archiepiscopatum retineret, ea cautione, ut cum primum assentiretur Cardinalatui accipiendo, a Regiis Ministris occuparetur Ecclesia Rotomagensis, ut jure Regaliæ vacans, nec ei restitueretur, nisi post novum fidei sacramentum in Cancellarii manus præstitum, pollicitoque Roma reditum, aut undecunque, quando a Rege reuocaretur, ut tradit Marcha in Præfatione Operis, *De Concordia*, Num. xiv.

VI. Priscam illam legem, quæ Cardinalatui vetat sociari Episcopatus, renovare conati sunt quidem Cardinales illi, & Consultores, quos initio Pontificatus percontatus est Paulus III. ad mores Ecclesiæ meliorem in formam revocandos. Fidenter hi inter alia Pontifici renunciarunt, una consistere, & sociari, non posse Cardinalatum & Episcopatum, quod ex officio tenerentur Cardinales apud Apostolicam Sedem residere, & Pontifici colloborare in regenda Ecclesia universali: *Alius abusus invaluit, inquit, ut Reverendissimis Cardinalibus Episcopatus conferantur, seu commendentur, non unus tantum, sed plures; quem, Beatissime Pater, putamus magni esse momenti in Ecclesia Dei.* Primo quidem, quia officium Cardinalatus, & officium Episcopi incompatibilia sunt. Nam Cardinalium est assistere Sanctitati tuæ pro gubernanda universali Ecclesia; officium autem Episcopi est pascere gregem suum, quod præstare bene, & ut debet, haud potest, nisi habitet cum ovibus suis, ut Pastor cum grege. Præterea, Pater Sancte, hic usus magis obest exemplo. Quomodo namque hæc Sancta Sedes dirigere & corrigere aliorum abusus poterit, si in præcipuis membris abusus non tollentur. Nec ob id, quod Cardinales sint, putamus, eis magis licere transgredi legem, imo longe minus. Horum enim vita debet esse aliis lex; nec imitandi sunt Pharisei, qui dicunt, & non faciunt, sed Christus Salvator noster, qui cepit facere, & postea docere. Amplius hic usus nocet in consultationibus Ecclesiæ. Nam hæc licentia fomentum est avaritiæ. Ambiunt Cardinales a Regibus, & Principibus Episcopatus, a quibus postea dependent, nec possunt sententiam dicere; imo si possent, & vellent, fallerentur tamen passione animi in iudicando perturbati. Ideo ultimum hic mos tolleretur, si prouiderentur Cardinalibus, ut possent honeste pro dignitate vivere, omnibus aequales reditus. Quod putamus, facile fieri posse, si vellemus

lemus abjicere servitutem mammonæ, & Christo tantum servire: Ita illi. Admirabilius autem illud est, quod Consultores ii, quorum plures Cardinales erant, tam vehementer exarserint adversus eam licentiam, qua Cardinales Episcopatus gerebant, vel Titulo, vel Commenda, & quidem plures quandoque.

VII. Utcunque demum obviatum est malo, quod maxime reformidabatur, aucto Cardinalium numero usque ad septuaginta, cum viginti circiter essent olim, quando vigeat ea lex, quæ eos Episcopatibus arcebat. Itaque, vti observat laudatus Thomassinus loco citato, Numero XIII. tam pauci numero cum essent, vix Roma, & Pontifici suffurari se poterant. At vero nunc, & satis magno numero, poterunt Roma superesse, & reliquis Episcopatibus Ecclesiis per Orbem, quibus affixi fuerint, præsidere, & Concilii Tridentini Decretis obsequi. Mandat enim Concilium tum alibi, tum Sessione XXIII. De reformatione, Cap. I. Episcopos, etiam si Sanctæ Romanæ Ecclesiæ Cardinales sint, obligari ad personalem in sua Ecclesia, vel Diœcesi residentiam, ubi injuncto sibi officio defungi teneantur. Inde est quod fatetur Fagnanus in Capite, Bona memoria, De postulatione Prælatorum, nulla jam dispensatione opus esse, ut Episcopatum priorem retineat, qui Cardinalatu decoratur. Fatetur tamen ipsemet, longe optatius, & conducibilius fore, ut alia suppeditarentur Cardinalibus vitæ, & dignitatis sustentandæ adminicula, Ecclesiis vero non assignarentur, nisi Pastores ii, qui illis abesse, & subducere nunquam cogerentur: Fateor tamen, inquit Num. XXXIII. consultius fore, ut aliunde suppeditentur S. R. E. Cardinalibus necessaria ad eorum dignitatem decenter sustinendam, & Metropolitanis, & Cathedralibus Ecclesiis præstentur Pastores, qui possint in illis assidue residere sine detrimento Ecclesiæ universalis &c. Ceterum docet ibidem Fagnanus, declaratum fuisse a Sacra Congregatione Tridentini Concilii Interpretum, non posse Cardinales retinere nisi unam Cathedralem Ecclesiam sive Titulo, sive Commenda, neutiquam autem alteram Titulo, alteram Commenda, quæ mera fuerat aliquando Juris ludificatio. Cum enim perpetuæ jam sint Commendæ, merito Tituli instar se habent, uti varii Auctores jam adnotarunt. Atque hæc satis sint ad explicationem primæ partis hujus nostri §.

VIII. Spectat & ad hunc nostrum §. Decretum Sanctissimi Domini nostri BENEDICTI XIV. Papæ, quod inter Apostolicorum Cæremoniariorum Diaria, & inter Acta Consistorialia jussu ejusdem Pontificis relatum est: Cum spirituale, inquit, conjugium, quod inter Episcopum, & Ecclesiam, cui præficitur, contrahitur, initum intelligatur in electione, ratum in confirmatione, & in consecratione consummatum, sibi vindicet locum etiam in Episcopis, qui Titulares vocantur, & Ecclesiæ præficiuntur ab Infidelibus occupata, qua de causa, cum hi ad aliam Ecclesiam transferuntur, a vinculo prioris Ecclesiæ a Romano Pontifice absolvuntur; cumque de hujus vinculi absolutione nulla fiat expressa mentio, quando aliqui ex dictis Titularibus Episcopis inter S. R. E. Cardinales cooptantur, quamvis de Ecclesiarum vacatione in terris Infidelium, quibus ante Cardinalatum fuerant præfecti, nulla sit dubitatio; Cardinales etenim eosdem non retinent cum Cardinalatu, Summique Pontifices alios iisdem Ecclesiis, cum volunt, præficiunt: Sanctissimus Dominus Noster BENEDICTVS PAPA XIV. ratus non decere, ut sine expressa vinculi absolutione in posterum præstentur alii Episcopatibus sitis in Terris Infidelium, quibus fuerant præfecti illi, qui in Sacrum Cardinalium Collegium cooptantur, nec in more positum esset, ut Cardinales prædictos retineant Episcopatus, mandat, ut in Decreto assignationis Tituli Cardinalitii hæc in posterum verba adhibeantur: Auctoritate Omnipotentis Dei, Sanctorum Apostolorum Petri, & Pauli, & nostra absolvimus Te a vinculo, quo tenebaris, Ecclesiæ N. & committimus Tibi Ecclesiam Sancti N. cum Clero, & Populo, & Capellis suis secundum formam, qua committi consuevit Cardinalibus, qui eandem Ecclesiam in Titulum habuerunt: In Nomine Patris &c. Quod Decretum Sanctitas Sua mandavit tum Secretarij Sacri Collegii, tum primo Magistro Sacrarum Cæremoniarum, ut inter Acta Consistorialia referatur, necnon inter Diaria, qua a Magistris Cæremoniarum describuntur, & quod hæc nova forma adhibeatur prima vice in Consistorio, in quo Titulus Cardinalitius assignabitur Cardinalibus Oddo, & Lanti, quibus hæc ipsa die in Consistorio publica traditur Pileum Cardinalitium. Hac die XI. Martii MDCCXLV. Ignatius Reali Apostolicis Cæremoniis Præfectus,

§. IV.

Infirmorum vota exquirenda per duos Cardinales.

Et advertendum, quod siqui antiqui Cardinales sunt in Curia, qui infirmitate detenti non possunt venire ad Consistorium, consuevit Pontifex duos alios Cardinales ad Domum infirmi mittere, qui ab illo exquirant votum suum, primo die, & secundo, an sint novi creandi, & de numero, & postea de personis, qui omnia fideliter referant Sanctissimo Domino Nostro in secreto Consistorio coram aliis Cardinalibus. Creatis novis Cardinalibus ipsa sexta FERIA, Pontifex, sive Cardinales antiqui solent per suos Nuncios id significare noviter creatis.

COMMENTARIUS.

I. **Q**uod hunc §. spectat, ubi primum edicitur, quod in creatione novorum S. R. E. Cardinalium, siqui antiqui

Cardinales sunt in Curia, qui infirmitate detenti, non possunt venire ad Consistorium, consuevit Pontifex duos alios Cardinales ad Domum

mum infirmi mittere, qui ab illo exquirant votum &c. jam nonnihil diximus in Commentario ad §. 11. ubi antiquum Pierſanctiani ms. Ritualis Codicis locum de ea re insignem retulimus. Unum autem hic addi potest, quod de absentium Cardinalium votis in suo ms. Diario tradit Franciscus Mucantius Cæremoniarius Apostolicus enarrans gesta Pontificatus Gregorii Papæ XIII. Sic enim scribit ad diem 11. mensis Junii anni MDLXXII. ubi agit de creatione Cardinalis Philippi Boncompagni, laudati Papæ ex fratre nepotis, ad instantiam Sacri Collegii: *Absentium autem Cardinalium vota, misso aliquo secreto Cubiculario suæ Sanctitatis, per singularem sigillo clausam capiuntur.* Sed hæc mera cæremonia est, vestigiumque moris antiqui, de quo supra in Commentario ad §. 11. abunde differuimus, ubi inter alia notavimus, non teneri Pontificem in creandis novis Cardinalibus, antiquorum vota sequi, etiamsi omnes ejus sententiæ se opponerent, multoque minus, si pauci aduersarentur, uti contigit in creatione Nicolai Cardinalis Cosciæ facta a Benedicto Papa XIII. anno MDCCXXV. die 11. Junii, quam, paucis quibusdam contradicentibus, ceteri commendarunt, ac nonnulli etiam summis laudibus extulerunt,

II. Sed his omissis, notanda sunt insuper, quæ hic noster §. docet; *Creatis, inquit, novis Cardinalibus ipsa sexta Feria, Pontifex, sive Cardinales antiqui, solent per suos Nuncios id significare noviter creatis.* Juxta præscriptum Romani Ordinis XIV. Cap. cxvi. & Pierſanctiani ms. Codicis Cæremonialis, quod plane antiquum est, & exaratum Seculo XIV. *Cardinalibus creatis, Dominus Papa vadit ad Cameram suam, & Cardinales ibidem publicant provisiones novorum Cardinalium quibus eis placet. Dominus vero Papa interdum ibidem cum ad Cameram suam redierit, consuevit novis Cardinalibus creationem de eis factam mandare per Domicellum suum, interdum non.* Domicellus hic idem est, qui Camerarius, Custosque Camere Papalis, uti ex recitato hætenus loco non obscure addiscimus, Domicelli etiam dicuntur nobiliores e familia Cardinalium, ut idem Romanus Ordo XIV. nos docet, Cap. xlii. ubi postquam dixit, comestione sumta, Papam lavare manus, ut prius, ministrantibus sibi duobus Diaconibus Cardinalibus, fundente sibi aquam Episcopo Cardinali, ita statim subjicit: *Et similiter quilibet Cardinalis lavabit manus, Domicello fundente aquam Cardinali lavanti.*

§. V.

Quod noviter creati Cardinales non sunt publice visitandi, antequam Capellum acceperint, & visitaverint.

Sed non debent prius visitari publice novi ab antiquis, quam Capellum acceperint a Pontifice, & alios ipsi visitaverint; possunt tamen ab aliquibus amicis visitari clam, & noctu, & non cum ostentatione. Vidimus tamen Sixti præfati tempore solitam Cardinalium gravitatem non fuisse servatam, qui non modo publice visitarunt aliquos novos creatos, ut primum e Consistorio sunt egressi, sed nonnullos, qui erant in Palatio, omnes simul collegialiter deduxerunt ad Domum suam cum Cappa Cardinalari, & Galero (1) nigro, quod tamen fuit a multis damnatum.

COMMENTARIUS.

I. **L** Ubet hoc loco referre quod usum sui temporis carpens, scriptum reliquit in suo ms. Diario Gregorii Papæ XIII. doctissimus Franciscus Mucantius Cæremoniarius Apostolicus, ubi ad diem II. mensis Junii anni MDLXXII. creationem describit Cardinalis Philippi Boncompagni laudati Pontificis ex fratre nepotis: *Die sequenti, inquit, secundæ dicti mensis fuit Consistorium secretum, in quo ad petitionem, & instantiam omnium Eminentiſſimorum Cardinalium creavit, Gregorius scilicet XIII. Cardinalem Reverendiſſimum D. Philippum Boncompagnum ejus ex fratre nepotem, & provisum fuit de multis Ecclesiis vacantibus. In fine Consistorii prædictus Reverendiſſimus Dominus Philippus fuit per Magistros Cæremoniarum introductus in Consistorium, ubi factis debitis reverentiis, genuflexus super scabello ante pedes Papæ, accepit ab eo biretum rubeum, & statim osculatus fuit pedem, & manus ejusdem, & sublatus ad osculum oris. Tum ivit ad singulos Reverendiſſimos Cardinales per ordinem, incipiendo a Decano, agens gratias, factis mu-*

tuis inclinationibus. Antiqui vero Cardinales ipsum amplexabantur, atque ab utroque facie latere deosculabantur, prout modernis temporibus fieri consuetum est. Hætenus ritus servatus anno MDLXXII. in creatione Cardinalis Boncompagni nepotis, ut dictum superius fuit, Gregorii Papæ XIII. & a laudato Mucantio descriptus loco citato.

II. Hæc autem facta præter ordinem in Cæremoniali Libro descriptum, ideoque addendum esse dicto Libro Cæremoniali, cum reformabitur, vel restituendum usum priorem, notavit ibidem memoratus Franciscus Mucantius. Nam in Libro I. inquit, Sectione VIII. expresse cævetur, Summum Pontificem, cum novos Cardinales creare intendit, quarta Feria Quatuor Temporum, convocatis omnibus Cardinalibus in Curia existentibus ad secretum Consistorium, generaliter proponere, an sint creandi Cardinales, & quot; quod si de voto eorum affirmative concludatur, indici in sextam Feriam sequentem aliud Consistorium, & in eo per Pontificem proponi nomina & merita promovendorum,

(1) Ita in editione Veneta & Colonienſi, in Romana legitur: *Capello.*

rum, ac de voto majoris partis Cardinalium, per eundem Pontificem pronunciari Cardinales per verba in eodem Libro descripta; & si forte aliqui Cardinales impediti, seu infirmi reperirentur in Curia, qui interesse Consistorio non possent, eorum vota per duos Cardinales a Pontifice missos exquiri. Qua electione & creatione conclusa, & dimisso Consistorio, significari illam per Nuncios Pontificis, seu etiam antiquorum Cardinalium ipsis noviter electis, qui, antequam eis in publico Consistorio detur a Pontifice Galeris, & ipsi alios visitaverint, non debent publice visitari ab antiquis Cardinalibus. Atque hæc plane sunt quæ in nostro Cæremoniali quod Patricius ordinavit, statuuntur, quæque partim jam a nobis explicata fuere in Commentariis superioribus.

III. Sed dolet Mucantius, quod suo tempore a Gregorio Papa XIII. in memorata Cardinalis nepotis sui creatione, ac etiam a nonnullis aliis Romanis Pontificibus Gregorii Prædecessoribus longe diversus, ac pene contrarius modus servatus fuerit, ac etiam servetur. Siquidem non semper adventus Quatuor Temporum expectatur, nec pluribus Consistoriis res agitur, sed omnia ad libitum Pontificum regulantur; & uno eodemque Consistorio ut plurimum expediuntur. Absentium autem Cardinalium vota, misso aliquo secreto Cubiculario suæ Sanctitatis, per singrapham sigillo clausam capiuntur. Quin etiam qui noviter creandi sunt, existentes in Curia, dum Consistorium fit, congregantur in aliquam Aulam Consistorio proximam; mox vocantur in Consistorium, ubi statim ingressi, ter versus Pontificem genuflectunt, ac demum genuflexi super scabello ante pedem Pontificis capiunt ab eo biretum rubeum; quo accepto, osculantur pedem, manum, & os Pontificis; deinde adeunt per ordinem singulos Cardinales in gyrum stantes quasi gratias agentes; ipsi vero seniores in signum fraterni amoris eos amplexantur, & facie ad faciem deosculantur; ac discedente demum Pontifice, unusquisque ad proprias mansiones revertitur. Hæc tamen non semper uno eodemque modo servata fuere, ut scite docet memoratus Mucantius, qui etiam mox diversorum Pontificum exempla in eam rem affert,

IV. Tempore quidem Sixti Papæ IV. ordo antiquus cæremoniarum prædictus in omnibus observabatur, nisi quod Cardinales novi, antequam recepissent Galeris, non solum visitabantur ab antiquis, sed nonnulli ex his, qui in Palatio erant tempore eorum promotionis, fuerunt a toto Collegio Cardinalium cum Cappa & Capello nigro associati usque ad eorum domos, sicut fieri solet in die Consistorii publici, prout de hoc in prædicto Cæremoniali Libro habetur mentio. Quod tamen a multis fuisse reprehensum, ibidem dicitur. De traditione autem bireti rubei nulla in eo Libro fit mentio. Tempore vero Innocentii Papæ VIII. ejusdem Sixti immediate Successoris in unica illa promotione octo Cardinalium, quam in toto ejus Pontificatu fecit anno MCDLXXXIX. die IX. mensis Martii, Pontificatus sui anno V. qui ex creandis præsentibus erant in Curia, congregarunt se in quibusdam Aulis Palatii, ubi expectarunt, donec vocarentur. Demum fuerunt introducti in Consistorium secretum, quibus Papa paucis-

simis verbis monitis, significavit, eos Cardinales creasse, cui ipsi Cardinales novi gratias egerunt, osculando pedem, manum, & os illius; mox ad Cardinales antiquos in gyrum stantes iverunt gratias agentes, & illis inclinatis, a quibus in amplexum fuerunt recepti ea forma qua supra dictum fuit. Et finito Consistorio, fuerunt ab universo Collegio Dominorum Cardinalium associati non quidem ad eorum domos, sed usque ad quandam Aulam Cardinalis tunc Auriensis in ipso Palatio existentis, sed in propriis eorum mantellis, & biretis, quibus ante promotionem utebantur, quæ bireta in die Consistorii publici dimittebant, & capiebant ex se ipsis rubra, ut notavit Joannes Brucardus Magister Cæremoniarum ejus temporis sub dicta die IX. Martii, & die XIV. ejusdem mensis.

V. Alexander VI. Innocentii VIII. Successor plures Cardinalium promotiones fecit, sed de prima, in qua unicum Cardinalem Joannem Borgiam, ac etiam de secunda, in qua XII. creavit, nihil se reperisse annotatum cæremoniarum ait Mucantius. In tertia vero, qua Gulielmum Briffonetam Gallum Episcopum Maclo-niensem ad instantiam Caroli VIII. Regis Franciæ ibi tunc præsentis Cardinalem creavit die XVI. Januarii anni MCDXCV. uno & eodem tempore dictus Episcopus indutus fuit Cappa Cardinalitia, introductus in Consistorium, creatus fuit Cardinalis, & recepit Pileum, teste Brucardo, qui nihil dicit de bireto rubro, sed imo refert, habuisse tunc illum biretum nigrum. Sic & in altera promotione alterius Cardinalis Galli ad instantiam ejusdem Regis sub die XXI. ejusdem mensis & anni nihil reperitur circa Cæremonias. In alia autem promotione, & quarta, qua publicavit quatuor Cardinales sub die XIX. Februarii anno MCDXCVI. tres ex his præsentibus in Curia introducti fuerunt in Consistorium, & osculati sunt pedem, manum, & os Papæ; deinde singulatim ab omnibus antiquis Cardinalibus ibi existentibus recepti ad osculum, & demum ab eisdem fuerunt associati usque ad Cameram Cardinalis Valentini in Palatio, Papa sic jubente, & male, ut annotavit idem Brucardus; qui etiam dicit in fine, eos accepisse biretum de scarlato, sed non dicit a Papa, putatque Mucantius, quod ex seipsis receperint, prout in altera promotione XII. Cardinalium ab eodem Pontifice Alexandro facta sub die XXV. Septembris anno MD. in qua pariter Cardinales novi præsentibus fuerunt in Consistorium recepti cum eisdem cæremoniis proxime dictis, & demum associati ad Cameras Ducis Valentini, cum quo fuerunt in prandio, & acceperunt ex seipsis bireta rubra, postquam egressi fuerunt Consistorium, ut ibidem Brucardus annotavit. Fecit idem Pontifex Alexander & alias promotiones, in quibus nihil circa cæremonias reperitur.

VI. Tempore vero Julii II. Papæ in prima promotione Cardinalium, qua creavit quatuor Cardinales, nullus ex eis etiam, qui in Urbe erant, venit in Consistorium ad agendas gratias Papæ, nec Cardinalibus, nec mutarunt bireta, nec vestes, usque ad diem Consistorii publici, quod factum fuit ex consilio Brucardi tunc Cæremoniarum Magistri, ut ipsemet notavit sub die IX. Novembris anno MDI. In secunda vero promotione novem Cardinalium ab eodem Julio Papa II. facta, licet idem Pontifex a dicto Bru-

Brucardo tunc Episcopo Ortano & Cæremoniarum Magistro admonitus fuisset, Cardinales novos non debere ingredi Consistorium, nec aliquas Cæremonias fieri, antequam ipsi Cardinales novi in Consistorio publico receperint de manu Papæ Galerum, voluit nihilominus, ut omnes coadunati in quadam Aula expectarent, donec vocarentur in Consistorium, prout postea vocati fuerunt, & unusquisque eorum suo ordine osculatus fuit primo pedem, deinde manum Papæ, & mox receptus a Pontifice ad osculum faciei, sedentibus interim Cardinalibus antiquis. Quo facto, iverunt omnes novi per ordinem ad Cardinales antiquos in gyrum stantes, illis gratias agentes, a quibus osculati fuerunt ab utroque latere faciei, & demum discedente Papa a Consistorio, omnes antiqui Cardinales associaverunt novos usque ad primam Aulam, & ibi denuo congratulationes, & gratiarum actiones inter eos habitæ, sic Papa jubente de voto Cardinalium seniorum, testantium, talem esse consuetudinem, quamquam præter regulas, & debitum Cæremoniarum ritum, ut notavit laudatus Mucantius.

VII. Demum cum Papa ipse Julius II. eisdem Cardinales novos habuisset secum in prandio in eorum habitu Prælatitio, ex persuasione prædicti Brucardi, peracto prandio, allata fuerunt plura bireta rubea nova, singulisque novis Cardinalibus ante se genuflexis unum ex illis capiti imposuit, nihil pro eo actu dicens, sed tantummodo jocosa quædam verba pro hilaritate proferens: Illi autem, biretis receptis, osculati fuerunt pedem Papæ gratias agentes. Nec puto, inquit Mucantius, ante hæc memoriam extare, Pontifices suis manibus bireta nova Cardinalibus imposuisse, vel eadem illis absentibus transmississe, prout hæc omnia, & alia multa ad eam rem pertinentia latissime in suis mss. Diariis descripsit Paris de Grassis Bononiensis tunc junior Cæremoniarum Magister sub die x. Decembris anni MDV. & pariter Brucardus sub eadem die & anno. Idem in omnibus aliis promotionibus observasse eundem Pontificem Julium II. legimus præsertim in ultima ejus promotione, quam fecit Ravennæ novem Cardinalium sub die x. Martii MDXI. eo tantum excepto, quod Cardinales novi præsentés post Consistorium non fuerunt a ceteris antiquis associati ad aliquam Aulam, sic Papa jubente, quia voluit illos apud se retinere & eos alloqui dimisso Consistorio, ac secum in prandio habere, ut idem Paris adnotavit sub dicta die x. Martii. Atque hæc sunt quæ in Pontificatu Julii II. servata fuerunt, cujus Successor Leo X. eundem ordinem servare voluit in promotionibus Cardinalium tempore sui Pontificatus, quem tenuit prædictus Julius II. ut idem Paris de Grassis scribit sub diebus xx. Septembris anni MDXIII. & 1. Julii anni MDXVII. quibus Cardinales numero xxxi. creavit. Porro qui Leoni successit Adrianus VI. creavit unicum Cardinalem, cui dedit Pileum sine Consistorio, & sine cæremoniis, vel paucis, cum esset graviter infirmus, ut Mucantius notavit.

VIII. At vero tempore Clementis VII. Pontificis, qui Adriano successit, licet plures Cardinales fuerint ab eo creati, tamen modica admodum de cæremoniis habita fuit ratio, nempe cum vel turbulentissimis direptionis Urbis temporibus, vel extra Curiam, dum idem Ponti-

fex diversis ex causis iter faceret, creati fuerint, & cæremoniæ abbreviatæ, cum ut plurimum, uno eodemque Consistorio, & tempore crearentur, & darentur eis bireta, & Galeri rubei absque multo apparatu, & pompa. Constat enim, eundem Pontificem cum Hippolito Medicem, ejus nepotem Cardinalem fecit, ei biretum, & Galerum simul dedisse, ac eidem statim clausisse, & aperuisse os in Congregatione Cardinalium coram se coadunatorum, cum esset infirmus, & timeret vitæ periculum, ut Blasius Cæsenas Cæremoniarum Magister annotavit sub die x. Januarii anno MDXXIX. Idem rursus servatum fuit ab eodem Pontifice Bononiæ in Consistorio, ubi creavit Cardinalem Barensem ad instantiam Caroli V. Imperatoris, die XXI. Februarii anni MDXXXIII. ut in Memorabilibus ejusdem Blasii legitur. Idem præterea Pontifex creavit quatuor Cardinales Gallos Massiliæ ad instantiam Regis Galliæ eodem anno MDXXXIII. die VII. Novembris, & die sequenti, quæ fuit Sabbatum, fecit Consistorium publicum, in quo dictis Cardinalibus tradidit Galeros, atque deinde die x. ejusdem mensis clausit & aperuit eisdem os in eodem Consistorio, ut refert laudatus Blasius Apostolicus Cæremoniarius in suo Itinerario prædicti anni; nulla tamen facta ibi mentione, quomodo, & quando fuerint eisdem tradita bireta rubea; putatque iccirco Mucantius, idem servatum fuisse, ut in superioribus promotionibus; & hunc arbitratur fuisse primum Pontificem, qui bireta rubea novis Cardinalibus in Consistorio dederit.

IX. Paulus Papa III. plures, ac sæpius, quam ceteri memorati Pontifices, Cardinalium promotiones fecit, & observantior quoque ceteris fuit cæremoniarum. Quotiescumque enim novos Cardinales in Curia præsentés creavit, numquam illos in Consistorium secretum ingredi voluit, nec bireta eisdem dedit, nisi peracto, & dimisso Consistorio, in suis Cameris, & Aulis secretis, ubi illi jam prius vocati expectabant absque eo ut publice videri possent, nisi cum ex aliqua causa sibi visum fuit simul & semel eodem Consistorio secreto Cardinales creare, & eisdem bireta & Pileos tradere absque alio Consistorio publico, velut in promotione, quam fecit die XII. Martii anni MDXXXVIII. duorum Cardinalium, videlicet Archiepiscopi Brundusini, & Nicolai Cajetani de Sermoneta, ut scribit in suis Memorabilibus Blasius sub dicta die XII. Martii, ubi etiam asserit, se de ea re longum sermonem habuisse cum Pontifice percontante ab eo, an id liceret facere, cui se respondisse ait, secundum rectas, & observatas cæremonias id fieri non debere, nisi ex urgenti, aut necessaria causa, prout in exemplis, quæ eo in loco adduxit.

X. At vero Pontifices subsequentes, videlicet, Julius Papa III. & Paulus Papa IV. quid, aut quomodo observaverint, satis non constat, cum nemo quod sciam eorum temporum cæremonias scripserit; id quod etiam notavit Mucantius, qui ait scire se, ac vidisse Pium IV. & Pium V. in promotionibus Cardinalium eam cæremoniam observasse, ut promovendi præsentés in Curia, die quo haberetur Consistorium pro eorum promotione, convenirent in aliquam Aulam proximam Aulæ Consistorii, & cum tempus esset, vocarentur in Consistorium, seu locum Con-

Congregationis Generalis, Magistris Cæremoniarum eos deducantibus in habitu quotidiano eorum Prælatuæ, hoc est, Mantello brevi, & Rocchetto; nam si forte quispiam eorum Episcopus, vel Prælatus non esset, consueverunt Pontifices, antequam ingrediantur Consistorium, creare eos Protonotarios supranumerarios, & eos induere habitu Prælatuæ prædicto; cumque essent Consistorium ingressi, factis debitis reverentiis erga Pontificem, & genuflexi ante eum, assistentibus duobus antiquioribus Diaconis, acciperent in capitibus bireta rubra de manu Pontificis, quibus acceptis, singuli pedem, & manum illius oscularentur, tum, vel etiam ante traditionem biretorum; siqua verba vellet Pontifex eos alloqueretur, & mox singulos Cardinales antiquos in suis locis stantes adire, & eis cum debitis reverentiis gratias agere in ipso Consistorio; antiquos vero ipsos amplexari cum osculo faciei solitos fuisse, prout superius coram Gregorio Papa XIII. in creatione nepotis sui Cardinalis Philippi Boncompagni observatum fuisse diximus. Absentibus vero promotis paulo post per aliquem ex eorum domesticis bireta rubra mittere consueverunt.

XI. Apparet igitur, regulas Libri Cæremonialis in hac parte minime observari, sed diversum, ac pene contrarium usum irrepsisse. Quare valde consentaneum fore docet laudatus toties Apostolicus Cæremoniarius Franciscus Mucantius, si ad antiquum usum, & regulas in Cæremoniali Libro descriptas res reduceretur. Siquidem eo pacto ejus actus majestas, & dignitas magis eluceret. Indignum enim, & indecorum videtur, ipsos Candidatos vix ad eum gradum cooptatos introduci in conspectum Pontificis, & Sacri Collegii, habitu ab ea dignitate alieno, nullisque cæremoniis instructos; nec decens videtur, tam subito in eodem Consistorio fieri congratulationes inter ipsos, & antiquos, quæ mox in Consistorio publico peragenda sunt. Accedit, quod dum novi Cardinales in Consistorium secretum introducuntur, fit concursus, & strepitus ingens populi, & Curialium illos intueri gestientium. Longe autem decentius esse ait Mucantius, si Cardinales recens electi domi se continerent absque ulla mutatione habitus præter biretum rubeum, quatenus tamen eis a Pontifice tradatur, vel gestari permittatur, & si omnino Pontifex velit biretum suis manibus novo Cardinali imponere,

laudare se eum ritum dicit idem Mucantius, si extra Consistorium, in loco remoto a turba, & conspectu multorum imponeret; convenientius tamen esse ait, si etiam bireti rubei usus eis interdiceretur usque ad diem Consistorii publici præsertim his, qui in Curia sunt præsentēs, & infra modicum tempus accepturi sunt Galerum rubrum in Consistorio publico, quo demum die permetteretur eis usus bireti, ac vestium, quas sub Cappa gerunt coloris rubei; omnino autem non permetterent interim se a quoquam visitari, præterquam ab aliquibus secretioribus amicis clam, & sine ostentatione, idque eis expresse ab ipsomet Pontifice præciperetur.

XII. Neceffe etiam esse ad hoc exactius observandum subdit Mucantius, ut idem Pontifex cunctis Cardinalibus antiquis vetaret etiam in virtute sanctæ obedientiæ, ne prorsus ullos ex novis visitarent, antequam receperint Galerum in Consistorio publico, & ipsi antiqui fuerint a novis visitati in suis Domibus, præter aliquos, qui consanguinitate, aut affinitate ipsis novis Cardinalibus forte conjuncti essent, quos permittere posset per Domos novorum accedere, dummodo secrete, & private, atque sine turba concomitantium. Jam enim eo pervenit abusus, verba ejusdem Mucantij sunt, ut vix pronunciatum sit aliquis Cardinalis, cum omnes antiqui certatim ad eorum Domos cursitant, ambiens unusquisque eorum primum apparere in hujusmodi visitationis officio, quod potius ambitiosum, quam honorificum ab æquis arbitratoribus judicatur, & est directe contra legem Libri Cæremonialis, maximoque incommodo ipsorum novorum Cardinalium sit, ut adhuc imparati, & curis impliciti, rebusque necessariis providendis occupati, parum admodum, vel prorsus nihil, in cæremoniis edocti, nullo ordine, nulloque decoro, paucos illos dies, qui præcedunt Consistorium publicum, sursum deorsum ambulantes consumant, ut Cardinalibus antiquis ad se venientibus debitum obsequium præstent. Atque hæc sunt, quæ post narratam Philippi Cardinalis Boncompagni creationem factam ab ejus patruo Gregorio Papa XIII. notavit Mucantius circa abusus, qui in promotione Cardinalium, contra antiquas nostri Cæremonialis regulas irrepsērunt; quæque nos describenda in hoc Commentario censuimus, quo magis magisque ritus creationis novorum Cardinalium, de qua in hoc Titulo agitur, illustrentur.

§. III.

De Consistorio publico, in quo publicantur Cardinales novi.

Sabbato sequenti fit publicum Consistorium; novi Cardinales veniunt summo mane ad Palatium in habitu, quo antea utebantur, & expectant in aliqua Camera sibi præparata, & hoc antequam Cardinales antiqui veniant. Deinde congregatis omnibus, Pontifex cum Pluviali, & Mitra pretiosis, præcedente Cruce, & Cardinalibus, exit ad publicum Consistorium, ascendit Cathedram suam, & recipit Cardinales antiquos ad reverentiam more solito. Deinde, considentibus omnibus, Pontifex verbis convenientibus exponit causas, quæ moverunt suam Sanctitatem, & Sacrum Collegium ad novos Cardinales creandos; deinde descendens ad particularia, nominat personas ad Cardinalatum assumptas, unumquemque laudans pro meritis, & qualitate sua; verbi gratia: *Assumimus dilectos filios, egregium Sacræ Theologiæ Professore N. tunc Episcopum Ulyssiponensem &c. Virum utique probum, modestum, & multa doctrina*

doctrina prudentem: & B. tunc Episcopum Urbinatem, Juris utriusque peritissimum, Virum integerrimum, & vitæ laudabilis, in Sanctæ Romanæ Ecclesiæ Presbyteros Cardinales. Simili modo assumimus dilectos filios, N. de Fuxo, tunc Apostolicæ Sedis Protonotarium, Virum, & majorum suorum gloria, & sua virtute Clarissimum; & demum Joannem nostrum secundum carnem nepotem, cujus merita dies ostendet, in Sanctæ Romanæ Ecclesiæ Diaconos Cardinales. His dictis, prout res, & tempus exigere videbitur, jubebit Summus Pontifex, novos Cardinales vocari. Diaconi Cardinales antiqui tot numero, si adsint, ut duo antiqui unum novum ducant, ad eos proficiscuntur, & illos ad conspectum Pontificis adducunt. Duo antiquiores Diaconi medium habent primo nominatum ex novis; quod si antiqui Diaconi non sufficerent, erit unus tantum antiquus cum uno novo, ita tamen, quod antiquus sit a sinistris; & si etiam non sufficiant antiqui, unus ducat duos, aut tres novos. Si autem nullus adesset Diaconus antiquus, aut unus tantum, juniores Presbyteri Cardinales, antiqui vnus vel duo debent supplere, ita ut non minus duobus sint antiqui Cardinales, qui novos ducant: primum tamen locum obtinebit Diaconus Cardinalis, ut prior illius Ordinis. Cum pervenerint in conspectum Pontificis, detecto capite se profunde inclinant, prout ductor eis ostendet; cum venerint ad introitum Consistorii, firment se post scamnum, ubi sedent ultimi Presbyteri Cardinales ante Pontificis faciem, & capite detecto persistent per ordinem suæ pronunciationis, itaut primo nominatus stet primus versus parietem, & alii successive sequantur. Pontifex in hanc ferme sententiam eos alloquitur.

COMMENTARIUS.

I. **A**ntiqui profecto & illi sunt Ritus, qui in hoc §. recensentur de Consistorio publico, in quo publicantur Cardinales novi. Siquidem jam longe ante ordinationem editionemque nostri hujus Cæremonialis in usu erant, uti addiscimus ex Ordine Romano XIV. Auctore Jacobo Gajetano, Capite CXVI. & ex Pierfanctiano ms. Cæremoniali Codice, in quo iidem Ritus fieri soliti in Consistorio publico, Sabbato Quatuor Temporum, sic referuntur: *Die Sabbati sequenti Dominus Papa, facta ei reverentia in Consistorio per Cardinales, mandat, quod aperiantur portæ Aula, ubi tenetur Consistorium, omnibus intrare volentibus, & infra Consistorium, & debent in terram sedere Camerarius, Notarii, Cappellani Domini Papa, & Auditores Palatii, & Clerici Camera Domini Papa; alii vero debent esse pedes extra Consistorium.* Variat nonnihil laudatus Gajetani Romanus Ordo XIV. ab hoc Cæremoniali Codice Pierfanctiano, cujus locum utpote nondum editum lubet describere. Sic enim deinde subjicit: *Domini Cardinales novi debent tunc temporis esse extra Consistorium in aliqua Camera ibi satis prope, quousque Dominus Papa, mandet eos vocari. Dominus vero Papa facit ibi in præsentia omnium unum brevem sermonem; in fine vero sermonis descendit per ordinem ad nominationem Cardinalium tam præsentium in Curia, quam absentium, quos creavit, quemlibet ipsorum commendando de scientia, fidelitate, & prudentia, & aliis, prout merita cujuslibet requirent; & in fine commendationis dicit cui-libet novorum Cardinalium sic: Talem absolvimus a vinculo, quo ipse Ecclesiæ suæ teneba-*

tur, & eum assumimus, & assumimus in Presbyterum Sanctæ Romanæ Ecclesiæ Cardinalem. Si non sint Prælati, non fit mentio de absolvimus; sed dicit: assumimus, & assumimus in Presbyterum, vel Diaconum Sanctæ Romanæ Ecclesiæ Cardinalem.

II. Pergit idem ms. Cæremonialis Codex Pierfanctianus, aliaque nos docet, quæ deinde in hoc nostro Cæremoniali ordinata ac descripta ab Augustino ejus Auctore fuerunt. Sic autem laudatus Codex inquit: *Quo facto, Dominus Papa facit vocari Cardinales novos, qui debent venire ad eum secundum ordinem, quem Dominus Papa dederit in eos nominando; & stare pedes retro Consistorium, & firmare se retro bancham, quæ est ab opposito Sedis Cathedræ Domini Papa, ubi sedent alii antiqui Cardinales, & tunc Dominus Papa debet dicere novis Cardinalibus aliqua de instructione eorum, quales debent esse in consiliis, & aliis agendis. Quibus dictis, vocat eos, quod veniant ad eum, & in introitu Consistorii duo Diaconi Cardinales antiquiores recipiunt novum Cardinalem primo nominatum per Dominum Papam; alii vero duo Cardinales antiquiores post primos recipiunt Cardinalem secundum, & sic deinceps faciunt alii Diaconi Cardinales per ordinem, si sint plures Cardinales de novo creati, & eos adducunt ad osculum pedis Domini Papa. Eadem fere ad verbum legi possunt in memorato Romano Ordine XIV. Auctore Jacobo Gajetano, qui clarebat labente Seculo XIII. ex quo addiscimus antiquos esse ritus in hoc nostro Cæremoniali præscriptos, tametsi in meliorem formam ab Augustino Patricio ordinatos.*

§. VII.

De monitione Pontificis ad novos Cardinales.

Maxima, dilectissimi Filii, & excellentissima dignitate donati estis, ad Collegium Apo-
stoli-

stolicum vocati Consilii nostri, & conjudices Orbis terrarum eritis: inter causam, & causam, inter sanguinem & sanguinem, inter lepram & lepram discernere vos oportebit: Successores Apostolorum circa Thronum sedebitis: Vos Senatores Urbis, & Regum similes eritis, veri mundi Cardinales, super quos militantis ostium Ecclesiae volvendum, ac regendum est. Cogitate animo, quos Viros, quae ingenia, quam integritatem haec dignitas requirat; humilitatem, non superbiam; liberalitatem, non avaritiam; abstinentiam, non ebrietatem; continentiam, non libidinem; scientiam, non ignorantiam; virtutes omnes, nullum vitium hic honor exposcit. Si fuistis hactenus vigilantes, nunc vigiletis oportet adversus malignum hostem, qui nunquam dormit, cogitans quem devoret. Si liberales fuistis, nunc opes in rebus honestis profundite, & maxime in alendis pauperibus Christi. Si cibi potusque abstinentes, nunc praecipue luxuriam fugite. Absit avaritia, facessat crudelitas, exulet arrogantia; sint libri sacri semper in manibus vestris; dies noctesque aut discite aliquid, aut alios docete; opera perficite, per quae lux vestra coram hominibus luceat; & denique tales estote, quales esse debere Cardinales didicistis, antequam hoc culmen ascenderetis. His verbis usus est Pius Secundus Pontifex Maximus, cum primos suos Cardinales creavit. Posterit Pontifex pro sua eloquentia & doctrina mutare & addere prout sibi expediens videbitur. Nos pro introductione & formula quadam haec posuimus; facile erit deinde inventis addere, & pro qualitate temporis & personarum variare.

COMMENTARIUS,

I. **E**ste antiquum ritum, ut ad novos Cardinales brevis sermo, seu concio a Papa haberetur, de instructione eorum, quales debent esse in consiliis, & aliis agendis, docet nos Romanus antiquus Ordo XIV, auctore Jacobo Gajetano, Cap. cxvi. & Cæremonialis ms. Codex Pierianianus, cujus locum in superiori Commentario, Num. II. descripsimus. Sermo a Pio II. habitus cum primos suos Cardinales creavit anno MCDLX. in hoc §. descriptus, legitur quidem Lib. IV. Commentariorum Pii Papae II. pag. 99. ubi etiam quaedam notantur, quibus idem hic noster §. magis magisque illustratur: *Sabbato deinde indicto Consistorio in Ecclesia Cathedrali, Pontifex iussit, Cardinales novos, qui aderant, tres acceriri, & priusquam venirent, de creatione facta,*

deque meritis singulorum pleraque locutus, ostendit omnibus, & dignam, & necessariam ordinationem fuisse. Post hac, adventantes illos ad cancellum stare praecipit, & dirigens ad eos verba, Maxima, inquit, Filii, & excellentissima dignitate donati estis &c.

II. Recte ait hic noster §. posse Pontificem pro sua eloquentia & doctrina mutare hanc in Cardinalium creatione admonitionis formulam, & pro qualitate temporis, & personarum variare. In mss. Apostolicorum Cæremoniariorum Diarlis variae occurrunt id genus formulae, viderique ea potest formula, qua usus est Leo X. in prima sua quatuor Cardinalium creatione, quam nos descripsimus supra in fine Commentarii ad §. I. hujus Tituli. De Cardinalium autem officiis jam alibi differuimus.

§. VIII.

De receptione novorum Cardinalium ad osculum pacis, & traditione Galeri.

Dum Pontifex novos Cardinales alloquitur, Diaconi, qui illos deduxerunt, in scamno suo sedent, & ut Pontifex dicendi finem fecit, surgunt, & rursus novos ordine, quo venerant, ad Pontificem ducunt. Procedit antiquus, & novo gestus, reverentiaque ostendit. Cum pervenerint ad Pontificem novi, pedem, deinde manum illius osculantur, & Pontifex eos allevans, ad osculum oris recipit; inde a Diaconis ad alios antiquos Cardinales deducuntur, & a primo usque ad ultimum stantibus recipiunt ad osculum pacis. Diaconi deductores suo loco & ipsi stantes in suis scamnis novos ad osculum suscipiunt, qui demum, exosculatis omnibus antiquis, a Ministro Cæremoniarum deducuntur ab subsellia Presbyterorum, seu Diaconorum, & sedent secundum ordinem factae pronuntiationis, & gradus. Ubi confederint, potest proponi aliqua brevis causa per Advocatos, si placuerit Sanctissimo nostro, & ea finita, surgent omnes Cardinales, & Cantoribus cantantibus, *Te Deum laudamus*, procedent ad Capellam minorem Palatii Apostolici, si fiet apud S. Petrum, si alibi, aliquam Capellam commodam, sive Altare in proximo praeparatum. Praecedent Episcopi, deinde Presbyteri, & Diaconi, & novi erunt medii inter ultimos. Duo Diaconi ex senioribus remanebunt apud Papam. Cum pervenerint ad Altare, prosternunt se novi omnes super tapetis ante Altare in terra, tenentes caput super brachia sua; & finito Hymno, Prior Episcoporum stans in cornu Altaris, ubi Epistola legitur, & ex Li-

bro super Altari parato dicit versiculos, & orationes infra scriptas. *Pater noster*, secrete prosequitur; & deinde alte, *Et ne nos inducas in tentationem*. R. *Sed libera nos a malo*. Versus. *Salvos fac servos tuos*. R. *Deus meus sperantes in te*. Versus. *Mitte eis Domine auxilium de Sancto*. R. *Et de Sion tuere eos*. Versus. *Domine, exaudi orationem meam*. R. *Et clamor meus ad te veniat*. Versus. *Dominus vobiscum*. R. *Et cum spiritu tuo*. Oremus.

Omnipotens sempiterne Deus miserere famulis tuis, & dirige eos secundum misericordiam tuam in viam salutis æternæ, ut te donante tibi placita cupiant, & quæ tibi placita sunt, tota mente perficiant.

Actiões nostras quasumus Domine aspirando præveni, & adjuvando prosequere, ut cuncta nostra oratio, & operatio a te semper incipiat, & per te cæpta finiatur. Per Christum Dominum nostrum. Amen.

Revertuntur Cardinales omnes ad Sanctissimum Dominum nostrum ordine quo venerant, & stantibus antiquis Cardinalibus in circulo ante Pontificem, prior nominatus ex novis genuflectit ante Pontificem, cui Pontifex imponit Galerum rubrum super caput ejus, dicens: *Ad laudem Omnipotentis Dei, & Sanctæ Sedis Apostolicæ ornamentum, accipe Galerum rubrum, insigne singulare dignitatis Cardinalatus, per quod designatur, quod usque ad mortem, & sanguinis effusionem inclusive, pro exaltatione sanctæ Fidei, pace, & quiete populi Christiani, augmento, & statu Sacrosanctæ Romanæ Ecclesiæ, te intrepidum exhibere debeas. In Nomine Patris & Filii &c.* Et sic unicuique sigillatim Galerum imponit secundum ordinationem, sive pronunciationem, & quisque ex deputatis a Pontifice, qui primo tenebant Galerum, cum Pontifex ipsum imposuit Capiti Cardinalis, finita oratione, resumit dictum Galerum, & ipsum portat quousque Cardinalis novus equitat.

COMMENTARIUS.

I. **Q**Uæ & in hoc §. primum statuuntur de receptione novorum Cardinalium ad osculum pacis, jam olim in usu fuerunt ex præscripto non modo Romani Ordinis xiv. Cap. cxvi. sed & ms. Pierfantiani Codicis Cæremonialis, ubi ritus iste sic recensetur: *Quibus, idest novis Cardinalibus, per Papam ad osculum pedis receptis, immediate omnes Cardinales antiqui, & ceteri supranominati surgunt, & Capellani Papæ, Te Deum laudamus, cantare incipiunt alta voce; & Cardinales antiqui secundum ordinem suum bini & bini primo vadunt ad Altare, quod debet esse in Aula paratum, ubi tunc temporis Dominus noster tenet Consistorium, sine Cruce tamen, & post eos duo Diaconi Cardinales antiquiores ducunt novum Cardinalem ad Altare primum nominatum per Pontificem, alii vero duo Diaconi Cardinales alium, & sic deinceps faciunt alii duo Diaconi Cardinales, si sunt plures Cardinales de novo creati, secundum ordinem supradictum, & cum pervenerint ad Altare, Cardinales novi debent stare flexis genibus ante Altare prostrati, quandiu cantatur, Te Deum laudamus. Quo completo, prior Episcoporum debet dicere submissa voce, Pater noster, postea cantando versiculum, Et ne nos inducas in tentationem &c. ut in nostro §. præscriptum est, una cum Orationibus, Omnipotens sempiterne Deus &c. & Actiões nostras &c. quæ quidem pro ea cæremonia leguntur in prædicto Romano Ordine xiv. & in ms. Codice Pierfantiano, in quo tamen oscitantia scriptoris multa verba ex iis desunt, quæ supra jam descripsimus in hoc Commentario, sed supplevimus tamen ex eodem Ordine Romano xiv.*

II. Juxta Cæremonialium prædictorum præscriptum, prædicta debent dici per Episcopum prædictum in Libro, qui supra Altare debet esse

paratus; iisque finitis, Capellani Domini Papæ, bini, & bini recipiunt novos Cardinales, & eos faciunt osculari Altare; deinde ipsos adducunt secundum suum ordinem ad osculandum os Cardinalium antiquiorum; & primo veniunt ad Episcopos, secundo ad Presbyteros, tertio ad Diaconos Cardinales, quemlibet eorum secundum ordinem suum osculando. Quo factò, antiqui Cardinales bini & bini redeunt ad Consistorium ad sedendum secundum ordinem suum. Diaconi vero Cardinales antiquiores ducunt iterum bini & bini novos Cardinales secundum ordinem supradictum ad osculum pedis, & oris Domini Papæ; & postea eos ducunt usque ad Sedem, in qua debent sedere in Consistorio secundum ordinem per Dominum Papam in nominatione eorum eis datum. Hactenus Romanus Ordo xiv. Capite cxvi. & Cæremonialis ms. Codex Pierfantianus, in quibus varii adnotari possunt Ritus, qui in nostro desunt Cæremoniali, dum interim alii desiderantur, & præsertim ille proponendi aliquam brevem causam per Advocatos, uti olim fieri consuevit, ac præsertim ubi Pius Papa II. primam fecit Cardinalium promotionem III. Idus Martii anno mcdlx.

III. Sed audiamus quæso quid de ipso ritu, sicut & de aliis ad hunc §. spectantibus, Lib. iv. Commentariorum ejusdem Pii II. Papæ legitur pag. 99. statim post recitatam superius in §. vii. laudati Pontificis orationem ad novos Cardinales habitam, quales nempe esse oporteat tanta in dignitate constitutos. Sic enim inquit: *Quibus dictis, vocavit eos, Pius Pontifex, ad osculum pedis, deinde manum, osque porrexit, & antiqui Cardinales ipsos pariter ad osculum exceperunt, locumque sedentibus præbuerunt. Mox Advocati causas aliquas perorarunt; quibus decisis, Cardinales antiqui stantes coram Papa sece-*

fecere coronam; novi genibus flexis votum pro veteri formula voverunt. Exin Pontifex uniuscujusque capiti insigne Cardinalatus imposuit, rubrum de more Galerum. Chorus Hymnum cantavit, gratias Deo reddens. Cardinales antiqui pompam ducentes, exceptis duobus, qui cum Pontifice remanserunt, novos ad Altare B. Virginis deduxerunt, ibique Senior Cardinalium orationem super capita illorum fundit, bona eis & Ecclesiae Sanctae multa precatus; atque ita rebus peractis, ad Pontificem Maximum reversi sunt, qui dissoluto Consistorio, in Palatium abiit. Tamen ordine inverso, omnes in recitato haftenus loco recensentur Ritus, quos nostrum Cæremoniale præscribit.

IV. Quod Galeri, seu Pilei rubei, qui est insigne singulare dignitatis Cardinalatus, traditionem spectat, notandum hic plane illud, fieri quidem ejus ritus mentionem non modo in citato toties Romano Ordine XIV. Cap. cxvi. sed & in ms. Codice Pierfanctiano, in quo etiam verborum formula recensetur, quæ tamen in ipso Romano Ordine desideratur. Juxta Cæremonialium istorum præscriptum fiebat ea cæremonia traditionis Pilei post cæremoniam claudendi oris, de qua dicemus infra §. xi. & post prandium, quod ea die parare Pontifex solitus erat omnibus Cardinalibus, tum antiquis, tum novis in suo Palatio. Sic ergo Pierfanctianus Codex in eo Capite, quod inscripsit, *De claudendo os, & de impositione, seu datione Capelli, & Romanus Ordo XIV.* inquit: *Papa surgit & vadit ad Cameram suam, & Cardinales omnes remanere consueverunt in domo Papæ, quousque mensæ pro prandio sunt paratæ; & illa die Cardinales omnes comedunt cum Papæ. Et cum Dominus Papæ exit de camera, & venit ad prandium, associant eum duo Diaconi Cardinales antiquiores usque ad mensam, ipsum præcedendo; & post prandium similiter associant eum usque ad cameram; & sedent Cardinales primo secundum ordinem suum a parte dextera Papæ, Episcopi & Presbyteri Cardinales tam antiqui quam novi; a parte vero sinistra sedent secundum ordinem suum tam antiqui quam novi Diaconi Cardinales juxta modum Consistorii. Docent mox, quando Pontifex novis Cardinalibus ipsum Pileum rubeum traderet: Post prandium, ajunt, eundem ordinem servant in sedendo tam antiqui, quam novi Cardinales; & cum fuerit tempus recedendi, Papa sedendo in Cathedra sua dat Capellum rubeum novis Cardinalibus secundum ordinem per eum eis in nominando eos datum; & ipsum Capellum cuilibet ipsorum capiti imponit, ipsis Cardinalibus novis stantibus coram eo genuflexis, dicente Papæ, ut inquit Codex Pierfanctianus: *Ad laudem Dei Omnipotentis, exaltationem quoque Catholica Fidei, pro qua etiam paratus sis, si expediat, proprium sanguinem fundere, damus, & capiti tuo imponimus Capellum rubeum.**

V. Hæc est antiqua formula in traditione Pilei, seu Galerii rubei; agendæque gratiæ Pierfanctiano ms. Codici, qui eam nobis conservavit, a qua non nihil variat formula, quæ in nostro hoc §. legitur, Quicquid sit de ea variatione, seu potius majori ejus cæremoniæ explicatione, juxta eundem Pierfanctianum Codicem, Romanumque Ordinem XIV. facta rubei Pilei impositione, immediate familiaris Papæ, qui debet

To. I.

ibi esse paratus. Capellum de capite ipsius Cardinalis recipit; & tunc quilibet eorum post prædictam impositionem Capelli, immediate secundum ordinem suum, pedem Domini Papæ osculatur; & postea Dominus Papæ quemlibet eorum ad osculum oris recipit secundum ordinem prædictum; & quilibet novorum Cardinalium, osculo per eum a Domino Papæ recepto, ad sedem suam ibi redit. Sed nec omittenda, quæ deinde iidem Cæremoniales Codices subjiciunt de alio ritu, quem lubet & hoc loco adnotare: Quo facto, Dominus Papæ surgit, & etiam omnes Cardinales; & postea si Ecclesia Cathedralis sit, ibi prope, novi Cardinales aliquotiens ad orandum consueverunt immediate ire, deinde ad domos suas redire. Ritui itaque antiquo adhærent Cardinales recens creati, qui ante alias visitationes Basilicam Principis Apostolorum solemniter pompa invisere solent.

VI. Ritibus hisce obiter notatis, redeo ad Pileum rubeum a Pontifice creatis recens Cardinalibus, si præsentibus sint, imponi solitum, cujus origo ad Innocentium Papam IV. refertur, uti diximus Tomo IV. Conciliorum in Historia Generalis I. Lugdunensis Concilii, Num. LIII. & seq. Ajunt ergo plerique, in ipso Concilio statuisse Innocentium, ut Cardinales Pileum rubrum deferrent. Certe Robertus Gaguinus, Lib. VII. *Historia Francorum*, loquens de Innocentio IV. Lugduni Concilium celebrante docet ipsum statuisse non solum ut Cardinales equo vecti Pileo rubro uterentur, sed etiam ut illum perpetuo gestarent: *Cardinalibus, inquit, Insigne dat, quod capite perpetuo deferant, hoc est, rubrum Galerum; idque diligenter servatur. Quo Pontifex eos admonitos esse voluit, paratos omni tempore esse debere sanguinem fundere pro Christiani populi libertate tuenda.* Nicolaus de Curbio in Vita Innocentii Papæ IV. Cap. XXI. loquens de Colloquio, quod hic Pontifex Cluniaci habuit cum S. Ludovico IX. Francorum Rege anno Christi MCCXLVI. disertè docet, ordinatum quidem fuisse in Concilio ut Cardinales Capellis rubris Pontificalibus uterentur, sed iis tantum anno sequenti uti cœpisse, in ipso scilicet Colloquio: *Interim Pontifex post Concilium, anno secundo* (quia scilicet, ut notat Pagius in Vita Innocentii IV. Num. XXXI. Concilium finitum est mense Julio anno MCCXLV. & Cluniaci habitum est Colloquium mense Novembri exeunte anni MCCXLVI. quo currebat annus secundus post Concilium) *Cluniacum ivit, cum Rege Francia & ipsius Fratribus loquuturus, ubi Domini Cardinales Capellos rubeos receperunt, sicut in ipso Concilio fuerat ordinatum.*

VII. Porro in id conveniunt Auctores passim, datum fuisse primum ab Innocentio Papæ IV. Pileum rubri coloris S. R. E. Cardinalibus, ut nimirum ad amorem invitarentur fundendi sanguinem pro Ecclesia, in quam dudum Imperatores, ac tum vel maxime sæviebat Imperator Fridericus II. cujus gesta impia jam nos aliqua ex parte in ipsa Concilii I. Lugdunensis Historia narravimus. Atque huc spectat formula, qua utitur Pontifex juxta antiquum Ecclesiæ ritum non modo in hoc nostro Cæremoniali, verum etiam in antiquiori ms. Pierfanctiano Codice præscriptum, ubi Pileum rubeum novis Cardinalibus imponit. Quod usum hujus Pilei spectat, memorat Viſtorellus in suis ad Ciaconium

Qq 2

Ad-

Additionibus, visas esse a se metallicas icones Pauli Papæ II, in quibus essent Cardinales omnes in Consistorio cum Galeris, seu Pileis suis. Ex quo ille infert, solitos tum eos in Consistoriis uti Galeris illis eisdem, quibus in solemnibus etiam nunc utuntur equitationibus. Id quod etiam tradit Macrus in suo Hierolerico, verbo, *Cardinalis*, pag. 125, ubi etiam figuram Consistorii expressit.

VIII. Præter Pileum rubrum, utuntur Cardinales non modo rubeis vestibus, sed & biretis ejusdem coloris, quæ eisdem concessit Paulus Papa II, ut passim in ejus Vita Auctores docent. Sed illud non omittendum, si ad Cardinalatus dignitatem assumantur Viri ex aliqua Monastica, seu Regulari disciplina, licet ejusdem formæ deferant indumenta ac ceteri Cardinales, colorem tamen Religionis, a qua fuerint assumpti non mutari, nec Rochetto eos posse uti, sed Superpelliceo, nisi sint Canonici Regulares, qui Rochettum ipsum in Religione deferunt. Porro sedente Gregorio XIV. permiffum est illis biretum coccineum deferre, cum ante nigrum de-

ferrent, licet Paulus II. istiusmodi capitis tegumentum primo anno Pontificatus sui dederit, uti varii Auctores in ejus Vita testantur. Gregorius siquidem XIV, die Dominico 19. Junii Feste Sanctissimæ Trinitatis in Aedibus Hortorum Quirinalium, antequam ad Sanctorum Apostolorum proximam Basilicam descenderet, ut ibi Pontificio more Sacra persolveret, in executionem Sanctionis in Consistorio secreto apud Sanctum Petrum die XXVI. Aprilis anni MDCXI. factæ, F. Michaeli Alexandrino, & F. Hieronymo Asculano Ordinis Prædicatorum, F. Constantino Sarnano Ordinis Minorum Conventualium, & F. Gregorio Montelporo nuncupato Ordinis S. Augustini rubra bireta perpetuo deferenda, more aliorum Cardinalium concessit, habitu tamen in ceteris nihil immutato, uti citans ejusdem Pontificis Constitutionem ait Cohellius in sua Cardinalatus Notitia, Cap. XI. Vide Sanctissimum Dominum nostrum BENEDICTUM XIV, in celebri Opere *De Servorum Dei beatificatione* &c. Lib. III. Cap. XXXIII. Num. X. aliosque Auctores, qui de eadem re differunt.

§. IX.

De novi Cardinalis deductione.

Cardinales acceptis Galeris deducuntur ab antiquis equitantes ordine, quo ad Altare ducti sunt. Prior ex novis erit medius inter duos antiquiores Diaconos, qui equitant ultimi. Secundus erit medius inter duos alios Diaconos illis prioribus succedentes, & sic de aliis; ita quod caput Diaconorum incipiatur ab ultimis, & ita deducuntur novi ab antiquis Cardinalibus usque ad domos suarum habitationum. Et primo vadunt non per ordinem promotionis, sed ut magis commodum erit, incipiendo a viciniore, & quemlibet dimittunt domi suæ. Quando perveniunt ad domos novi Cardinalis, antiqui firmant se ante ostium; antiquiores prope ipsum ostium, & alii Episcopi, & Presbyteri successive, Diaconi autem ab alia parte, & novus solus, deducente Clerico Cæremoniarum, equitat ad primum Cardinalem, & detecto capite agit ei gratias pro impenso honore & societate brevissimis verbis; & deinde sigillatim cuique ex antiquis. Revertitur post hæc ante ostium suum, & versus ad Cardinales semper detecto capite, cuique discedenti inclinatur caput; & cum omnes Cardinales, & Prælati decesserint, intrat domum suam. Idem fit cum omnibus aliis, tam Presbyteris, quam Diaconis.

COMMENTARIUS.

I. **Q**uanta olim cum pompa deducerentur Romæ recens ordinati ad Titulos suos, in quibus haud dubie habitabant, docet nos Romanus Ordo IX. cujus locum referemus infra in Commentario ad §. XII. Quod ritum spectat in hoc §. præscriptum, deducendi scilicet novum Cardinalem ad ejus domum, abiit ipse tandem in desuetudinem, uti notavit Franciscus Mucantius in suo ms. Diario, ubi enarrat gesta Pontificatus Gregorii Papæ XIII, ejusque loco hic alius inventus fuit, quem recenset ad annum MDLXXII. die XIX. Junii, ubi loquitur de Cardinali de Pelvi, qui

ipsa die *deductus ad Consistorium recepit de manibus suæ Sanctitatis Pileum rubrum more solito, & finito Consistorio omnes Cardinales comitati sunt eum usque ad caput prædictæ Aula majoris, ubi singulariter singulis Cardinalibus antiquis, procedens in gyrum, gratias egit, profunde unicuique inclinando caput, & remanens ibidem; singuli antiqui ante ipsum pari modo inclinantes recesserunt.* Ita laudatus Mucantius, sed notanda potissimum sunt, quæ mox ibidem subicit: *Qui mos introductus est loco associandi ad domum, prout in Cæremoniali cavetur Lib. I. Sect. 8. Cap. 5. quod est quidem hic noster §. IX.*

§. X.

De modo visitandi.

Postquam novi Cardinales acceperunt Galerum a Sanctissimo Domino nostro, sequenti die,

die, si possunt, visitant Summum Pontificem, deinde alios Dominos antiquos, non per ordinem, sed, ut eis commodum erit; & finita visitatione omnium, ipsi debent ab antiquis visitari in Domibus suis, Quando ipsi visitant alios, debent honorari a visitatis, & poni ad manum dexteram eundo; & cum intrant ostia, primo intrare debent, & tamen facere modestam reverentiam, & renitentiam de non accipiendo dextram, & non intrando prius; sed tamen tandem debent obedire; & similiter quando alij veniunt ad visitandum eos in domo sua, etiamsi sint post eum pronuntiati, aut inferioris ordinis, debent eos ponere ad dextram, & præmittere intrando; & cum veniunt, exire eis obviam usque ad fines scalarum, si potest; & cum recedunt, sociare eos, quousque ascendant equum, seu mulam; & hoc non debent dimittere, etiamsi sæpius a visitante rogentur, ut remaneant. Quod servatur & in novis, & in antiquis, cum se mutuo visitant; semper visitatus honorat visitantem.

COMMENTARIUS.

I. **J**uxta morem qui hodieque servatur, Cardinales, accepto mane Galero a Summo Pontifice secundum ritum superius descriptum, eadem die post meridiem visitant primo S. Petri Basilicam, & deinde solum Cardinalem Decanum. Quod visitationem Cardinalium sive activam, sive passivam, ut ajunt, spectant, jam varia notarunt Cæremoniarum Apostolici, præsertim vero in suis ms. Diariis Paris de Grassis, & Franciscus Mucantius, quorum loca longum esset in præsentem describere, Deberent profecto ipsi Cardinales eadem die, quo acceperunt Galerum, qui est insigne Cardinalatus, visitare Pontificem, eique pro tanto accepto honore gratias agere, sed ab ea visitatione dispensantur tunc ab eodem Pontifice per Præfectum Cubiculi, illos monentem, ut commodiori Pontifici tempore ejus visitationis officium persolvant, Sunt hi quidem ritus recentiores, sicut & ille, ut nempe Galeri, quos mane a Summo Pontifice novi Cardinales accipere, per Pontificium Familiarem curru vestum, quatuor Parasfrenariis funalia accensa,

gestantibus, fero ad eosdem Sanctæ Romanæ Ecclesiæ Cardinales recens creatos deferantur.

II. Adde & his alium recentiorum ritum, cujus nulla in hoc Cæremoniali, & in antiquis mss. Apostolicorum Cæremoniarum Diariis mentio. Sane ubi mane creati sunt Cardinales, pergunt post prandium ad Palatium Pontificis, ibique in Adibus Cardinalis nepotis Papæ, si adsit, vel Secretarii Status, barbitonsor barbam eisdem radit, & amplam facit Coronam in capite; ingressique deinde ad Pontificem, ab eodem accipiunt bireta rubra in capite, absque ulla verborum formula; egressi deinde a Pontifice, accipiunt a custode rei Pontificiæ domesticæ, quem vulgo *guarda roba* appellant, rubros pileolos. Rem late narrant recentiora Cæremoniarum Apostolicorum Diaria, longumque esset minutissimas cæremonias describere, quæ de ipsa novorum Cardinalium ad Pontificis Palatium professione ad accipiendum rubea bireta, in memoratis recentioribus Diariis referuntur. Sed vide quæ de iisdem diximus supra in Commentario ad §. v.

§. XI.

De modo & forma claudendi & aperiendi os novis Cardinalibus.

In primo Consistorio Pontifex novis Cardinalibus claudit os, inhibetque, nequid loqui præsumant in Consistoriis, aut consiliis, quousque de consilio Fratrum duxerit eis os aperire. In secundo Consistorio, aut tertio consuevit eisdem Pontifex aperire os in hunc modum. Postquam omnes tam antiqui, quam novi confederint, Pontifex jubet exire novos Cardinales; qui exeuntes expectant extra Consistorium in loco condecanti; & Summus Pontifex proponit antiquis Cardinalibus, an illis videatur, quod novis sit aperiendum os, & illis sigillatim consentientibus, vocantur intus novi Cardinales, & sedent in locis suis. Tunc Pontifex novos Cardinales stantes verbis paterna caritate plenis instruit, quomodo se in omnibus cum gravitate, modestia, humanitate, & prudentia gerere debeant; quod in Consistoriis cum reverentia & modestia loquantur, & cum ipso Pontifice, & cum omnibus aliis Cardinalibus, & in consultatione, aut colloctione respondeant, & mentem suam exponant, non per modum contradicendi, seu impugnandi aliorum dicta, sed cum omnium reverentia, & modestia sententiam suam explicant ea prudentia, quam Dominus eis subministrare dignabitur. Alios Cardinales & domi & foris honorent, venerentur, & colant. Prælatos omnes pro eorum dignitate, revereantur, & benigne tractent, & denique humanos, benevolos, & affabiles quantumcumque dignitati liceat, in omnes se præbeant. In consiliis, seu votis explicandis solum Deum præ oculis habeant, honorem Sanctæ Sedis Apostolicæ, & justitiam in animo suo gerentes; & semota omnium privata affectione amoris, odii, aut alterius

terius cujuscunque perturbationis, pura, & sincera mente sententiam suam dicant. Domum, atque familiam suam cum omni honestate & modestia gubernent. Non sint in ea lutores, rixatores, ganeones, & viri infames; sed studiosi, modesti, docti, & honesti. Familiæ namque vitia plerumque Dominis impingi solent. Unde illud: *Qualis Rex, talis & populus*. Incumbant, cum vacant a publicis negotiis, bonarum artium studiis, dicant Officium Divinum, & Missam quotidie audiant, & ita, ut non lateat domesticos, ut Divinum illud adimpleant: *Luceat lumen vestrum coram hominibus, ut videant opera vestra bona, & glorificent Patrem vestrum, qui in Cælis est*. Nam in his, quæ pertinent ad Religionem, oportet habere testimonium etiam ab his, qui foris sunt. Nisi enim alii viderint Cardinalem, Divinum Officium frequentantem, & Missam quotidie audientem, & re, & exemplo plurimum offendant. In mensa semper aliquid audiant de sacra Scriptura. Venationibus, choreis, ludis inhonestis minime indulgeant. Non exeant in publicum crebrius, non cursitent per Urbem, neque ad Palatium sine causa veniant; & super omnia caveant, ne turpis lucri cupidi esse censeantur. Hæc & alla pleraque in hunc modum poterit Sanctissimus Dominus noster novis Cardinalibus dicere, prout suæ Sanctitati videbitur expedire. Deinde aperit eis os, dicens: *Aperimus vobis os tam in colloquutionibus, quam in consiliis, atque in electione Summi Pontificis, & in omnibus actibus tam in Consistorio, quam extra, qui ad Cardinales spectant, & quos soliti sunt exercere. In Nomine Patris & Filii & Spiritus Sancti. Amen.*

COMMENTARIUS.

I. Antiquus profecto est ritus claudendi, & aperiendi os Cardinalibus recens creatis. Os Pontifex, ut vel ex hoc, addiscere licet, novis Cardinalibus claudere dicitur, cum eis inhihet, nequid loquantur in Consistorio, aut in Cardinalium cœtibus, quousque de consilio antiquorum Cardinalium, os eis aperiendum duxerit. Os autem aperire dicitur, quando eis indulget, ut in Consistoriis, aliisque Cardinalium conventibus sententiam dicant; idque ex Pontificis consilio pendet. Testes hujus ritus sunt Romanus Ordo XIV. & Cereemonialis ms. Codex Pierfantianus, qui ita ad rem inquirunt: *Dominus Papa imposuit silentium Dominis Cardinalibus, quousque ipse Dominus Papa de consilio antiquorum Cardinalium os duxerit eis aperire, & tunc dicit eis, qualiter debent cum reverentia loqui in Consistorio, cum loquuntur alijs Cardinalibus, & etiam cum loquerentur tam in viam consilii, quam in viam collationis, non contradicendo, seu impugnando dicta aliquorum Cardinalium, sed vel dicendo prudentius cum reverentia quod eis Dominus ministraverit; & qualiter etiam alios Cardinales debeant honorare; qualiter etiam in consiliis dandis debeant Deum præ oculis habere in mente & in ore tunc temporis sinceritatem & puritatem habere, remota omni partialitate amoris, odii, vel favoris*. Hactenus ms. Pierfantianus Codex, qui fere ad verbum memorato Ordini XIV. Romano concinit, additque statim: *Aliquando consuevit eis tamen silentium imponere illo tunc, & reliqua proximo præcedentia eis dicere, dum eis decreverit os aperire.*

II. Multa plane sunt, quæ in ipsam aperi-tionis oris cereemoniam adnotemus, ac primum, eam novis Cardinalibus simul creatis non uno eodemque tempore factam fuisse, uti nos docet exemplum Nicolai Papæ V. qui, ut in ejus Vita scribit Georgius ad annum MCDXLIX. die quidem Veneris tertia mensis Januarii prædicti anni MCDXLIX. in Consistorio secreto Cardinalibus, quos die XX. Decembris anni MCDXLV. cre-

verat, Titulos Presbyterales assignavit, nempe Astorgio Archiepiscopo Beneventano Titulum S. Eusebii, Latino Archiepiscopo Tranensi Titulum S. Joannis & Pauli, Alano Episcopo Avinionensi Titulum S. Praxedis, Joanni Episcopo Aduensi Titulum S. Stephani in Cælio monte, Philippo Episcopo Bononienensi Titulum S. Susannæ, Nicolao de Cusa Titulum S. Petri ad Vincula; eademque die tertia Januarii aperuit os Cardinalibus Latino Ursino, & Alano Avenionensi. Aliis autem aperiitio oris alio tempore facta est, nimirum Astorgio Archiepiscopo Beneventano die IX. mensis Junii, Spoleti; Philippo Episcopo Bononienensi die XXV. Julii, Fabriani, ut Jacobus Radulphi in Diario Consistoriali litteris tradidit, & post eum laudatus Georgius in Vita Nicolai Papæ V. anno MCDXLIX. Num. II. Sane constat, Clementem Papam VII. cum Hippolitum Medicem ejus nepotem Cardinalem fecit, ei biretum, & Galerum simul dedisse, ac eidem statim clausisse, & aperuisse os in congregatione Cardinalium coram se coadunatorum cum esset infirmus, & timeret vitæ periculum, ut Blasius Cæsenas cereemoniarum Magister notavit sub die X. Januarii MDXXIX. teste Francisco Mucantio in Diario ms. Gregorii Papæ XIII. die II. Junii anno MDLXXI.

III. Idem ritus servatus quoque fuit ab eodem Pontifice Clemente VII. Bononiæ in Consistorio, ubi creavit Cardinalem Barensem, ad instantiam Caroli V. Imperatoris die XXI. Februarii, ut ex Memorialibus ejusdem Blasii idem Mucantius tradit. Rursus idem Pontifex creatis quatuor Cardinalibus Gallis Massiliæ ad instantiam Galliæ Regis anno MDXXXIII. die VII. Novembris, & die sequenti, quæ fuit Sabbati, traditis eisdem in Consistorio publico Galeris Cardinalitibus, deinde die X. ejusdem mensis clausit & aperuit eisdem os eodem Consistorio, ut memoratus Mucantius scribit citato loco ex testimonio prædicti Blasii Cereemoniarii Apostoli, qui in suo Itinerario eam cereemoniam narrat. Sed omissis aliis id genus exemplis, con-

consuevit jam olim ipsa oris aperitio, sicut & Anuli, ac Tituli traditio extra Consistorium fieri, uti docent ms. Pierfantianus Codex Cæremonialis, & Romanus Ordo XIV. Cap. XVI. sic inter alia agentes: *Attendendum est etiam, quod præmissa quantum ad apertionem oris, & donationis Anuli, & Tituli, interdum consueverunt fieri extra Consistorium, quando Dominus Papa vocat omnes Cardinales ad cameram suam pro consilio super negotiis habendo; & tunc omnes præmissa solemnitates per omnia servantur secundum modum antedictum, prout factum fuit anno a Nativitate Domini MCCCXXXIX. XVI. mensis Januarii Avenione per Dominum Papam Benedictum XII. in personas Dominorum Cardinalium Ebredunensis, cui tunc fuit commissus Titulus S. Marci; & Albi, cui tunc etiam commissus fuit Titulus Quatuor Coronatorum, & Montis Olivæ, cui commissus fuit tunc etiam Titulus S. Stephani in Calio monte, in camera prædicti Domini Papæ Benedicti.*

IV. Sed notanda præsertim hoc loco sunt, quæ de apertione oris, & de ejus cæremonia juxta antiquum morem docet idem Romanus Ordo XIV. cujus hæc sunt verba: *Norma vero, quæ antiquitus consuevit servari in apertione oris novorum Cardinalium est infrascripta, videlicet, quod postquam sederint Cardinales tam antiqui, quam novi, in ordine suo in Consistorio, tunc quando Domino Papæ placebit, dicitur per eum novis Cardinalibus, quod sedent (sive, ut inquit Codex Pierfantianus, secedant) ad partem, & ipsis absentibus dantur consilia circularia (sive auricularia juxta Codicem Pierfantianum, per Cardinales antiquos, an ora ipsorum Cardinalium sint apertenda; & si consulant quod sic, revocantur ad Consistorium iidem Cardinales absentes, & sedent in locis suis, & tunc Dominus Papa, proposita aliqua auctoritate, si placet, cum brevi, vel modica, & quasi nulla ipsius prosecutione, ora ipsorum aperit, dicendo: Nos aperimus tibi os, vel vobis, si sint plures, tam in collationibus, quam consiliis, & in electione Romani Pontificis, & in omnibus actibus, tam in Consistorio quam extra, qui ad Cardinales spectant, & quos sunt soliti exercere. Ipsi vero ad proposita non respondent.* Legitur & hæc formula in ipso Pierfantiano ms. Codice, Capite inscripto, forma, quam debet Papa tenere in apertione oris Cardinalium; eaque, ut vides, eadem est ac illa in hoc §. nostro descripta, in quo tamen & ea clausula addita est: *In Nomine Patris & Filii & Spiritus Sancti Amen.*

V. Porro Sanctionem edidit Eugenius IV. quæ in Romano Bullario extat, ubi edixit, eos tantum Cardinalatus jure potituros, qui præsentibus Pileum rubeum, Titulum, Anulumque a Pontifice receperint, vel ad quos absentes rubeum Pileum Pontifex miserit, neque in renuntiando novo Pontifice, ceterisque rebus suffragia laturos, nisi postquam in Consistorio promendæ suæ sententiæ potestatem acceperint, seu postquam eis os clausum, & apertum fuerit. Verum putat Pagius in Vita Urbani Papæ V. Num. III. & in ipsius Eugenii IV. Papæ Vita, Num. XII. eam Sanctionem editam fuisse ab Eugenio, ut Dominicum Capranicam a Martino V. dictum Cardinalem dignitate exueret; cum alias jam longe ante hæc tempora in usu

positum fuerit, ut Cardinales vi suæ nominationis, licet ipsum Pileum rubeum non recepissent, nec Titulum, nec alia, ad electionem tamen Pontificis fuissent admissi. Hujus rei insignis exemplum refert Bernardus Guido in Catalogo Cardinalium assumptorum ex Ordine Prædicatorum apud Baluzium, Benedictus quippe XI. anno MCCCIV. in jejuniis Quatuor Temporum post Cineres Galterum Winkterburnum Confessarium Eduardi Angliæ Regis creavit Presbyterum Cardinalem, de quo ita ad rem nostram laudatus Guido scribit: *Hic post novem menses a die, qua fuit in Cardinalem nominatus, & post quinque fere menses ab obitu memorati Domini Benedicti Papæ, pervenit ab Anglia Perusium Civitatem, ubi adhuc Curia morabatur, Sede vacante, IV. Kal. Decembris, Sabbato scilicet ante Dominicam primam Adventus, anno Domini MCCCIV. fuitque exhibitus sibi magnus, & debitus honor a populo Perusino. & sine alio diverticulo declinavit ad Conclave Cardinalium, ubi inclusi propter electionem Summi Pontificis commanebant, a quibus cum magno favore, & honore susceptus est, & in sequenti crastino S. Andreae, scilicet in Kalendis Decembris ad scrutinium electionis Summi Pontificis tanquam Cardinalis admissus, quamvis nondum haberet Titulum, nec Anulum, nec Capellum; itemque nec ei os clausum apertumque fuisset.*

VI. Celebre est & aliud exemplum, quod etiam longe ante Eugenii IV. tempora occurrit. Androynus de Rocha, quem Innocentius Papa VI. ex Abbate Cluniacensi absentem anno Domini MCCCLXI. die XVII. Septembris, quæ eo anno concurrebat cum Feria VI. Quatuor Temporum, una cum aliis septem Viris egregiis S. R. E. Cardinalium Collegio adscripsit, quique gravissimis Reipublicæ Christianæ negotiis alibi occupatus a tempore suæ creationis, non acceperat Avenionem, nisi quando ipse Innocentius VI. laborabat in extremis, quique propterea licet haberet Pileum rubeum, quem ei absenti peculiari gratia idem Pontifex miserat, Titulum tamen non habebat, nec in Consistorio Sedem, quia nondum ei os clausum & apertum fuerat, nihilominus de communi Cardinalium consensu admissus est una cum aliis in Conclave, judicantibus illis concorditer, solam assumptionem, seu promotionem ad Cardinalatum, tribuere vocem in electione Pontificis; idque expresse denotari eo ritu, quo noviter promotus per Papam clauditur os, quousque Titulum acceperit, quando illud ei aperitur, ut imposterum vocem liberam in omnibus habeat; non autem claudi, nisi quod prius apertum est; ac proinde cum non fuisset clausum os Androyno a Pontifice, utique illud ei apertum, & liberum remansisse. Hæc constant ex Auctore primæ Vitæ Urbani V. qui in eo Conclavi electus fuit anno MCCCXII. ad quem annum scribit Spondanus, Num. X. eam Cardinalium explicationem argute inventam esse, additque contraria de his decreta reperiri sub Eugenio IV. Pontifice.

VII. Sed licet ab ipso Eugenio sancitum fuerit, Cardinalem, cui os solemniter apertum non fuerit, in electione novi Pontificis vocem activam non habere; derogavit tamen deinde Constitutioni Eugenii Pius Papa V. die XXVI. Ja-

Januarii anni MDLXXI. cujus decretum legere est apud Cherubinum juniorem in Compendio novi Bullarii in Nota ad Constitutionem 1. Eugenii IV. Tomo 1. pag. 55. & apud Cohellium in Notitia Cardinalatus, Cap. 1X. pag. 23. estque hujusmodi: Die XXVI. Januarii MDLXXI. Quia aliquando dubitatum est, utrum Cardinales, quibus os clausum fuisset, si antequam illud eis aperiretur, Sedis vacatio eveniret, utrum, inquam, in Summi Pontificis electione votum haberent, Sanctitas sua, requisitis Reverendissimorum Dominorum sententiis, de eorum consensu & assensu decrevit, quod cum potissima Cardinalis facultas in Romano Pontifice eligendo consistat, quæ sane ipsis propter insignium, & Cereemoniarum defectum auferri non debet, ob eam causam Sanctitatem suam statuere, ut postquam aliquis S. R. E. Cardinalis creatus fuerit, honoremque acceperit, & consensum suum dederit, is statim vocem, & jus eligendi Romanam Pontificem habeat, etiamsi Cardinalatus Galeris nondum illi traditus sit, neque os clausum, aut si clausum fuerit, nondum tamen apertum sit; videtur enim hujusmodi oris claudendi ritus ad præcipuam Cardinalium facultatem, quæ circa Summi Pontificis electionem versatur, non pertinere, sed cereemoniam quandam esse ea de causa introductam, ut Cardinales, antequam in Consistoriis, & Congregationibus suffragium ferant, de modestia, quæ ab ipsis in his, & aliis actibus adhiberi debet, admoneantur &c. Meminit hujus Decreti Cereemoniale Gregorii Papæ XV. jussu editum de electione Romani Pontificis, §. Porro Capitula, ubi ita inquit: De Cardinali autem, cui ante mortem Pontificis os fuit clausum, aliquando dubitatum est; verum a Pio V. fuit hæc dubitatio sopita per ejus Decretum edi-

tum XXVI. Januarii MDLXXI. quo declaravit hujusmodi oris clausuram, cereemoniam quandam esse ea de causa introductam, ut Cardinales, antequam in Consistoriis & Congregationibus suffragium ferant, de modestia, quæ ab ipsis in his, & aliis actibus adhiberi debet, quodammodo admoneantur; non autem pertinere ad præcipuam Cardinalium facultatem, quæ circa Summi Pontificis electionem versatur; quæ declaratio Pii V. semper hac usque observata fuit.

VII. Et quidem introductam fuisse eam cereemoniam, ut Cardinales officii sui admoneantur, ex hoc nostro §. constat, ubi habetur, quod cum iis aperiendum est os in secundo, aut tertio Consistorio, Pontifex novos Cardinales stantes verbis paterna caritate plenis instruit, quomodo se in omnibus cum gravitate, modestia, humanitate, & prudentia, gerere debeant; quod in Consistoriis cum reverentia, & modestia loquantur, & cum ipso Pontifice, & cum omnibus aliis Cardinalibus, & in consultatione, aut colloctione respondeant, & mentem suam exponant, non per modum contradicendi, seu impugnandi aliorum dicta, sed cum omnium reverentia, & modestia sententiam suam explicent ea prudentia, quam Dominus eis subministrare dignabitur &c. Ceterum teste Fagnano in Capite, Cum olim, XIV. De majoritate & obedientia, Num. XLVIII. post obitum Clementis VIII, Cardinalis de Comitibus, cui nondum os fuerat apertum, ad Pauli V. electionem admissus fuit. Idem quoque Fagnanus testatur, in electione Innocentii Papæ X. ante aperiitionem oris, vocem habuisse, ut ajunt, activam Cardinales Panzirolum, Rosssettum, & Estensem recens creatos. Alia exempla describere supervacanei esset laboris.

§. XII.

De dandis Titulis, & Anulis novis Cardinalibus.

Deinde accedentes novi Cardinales unus post alium ad Pontificem, primus genuflectit ante Pontificem, qui accipiens Anulum pretiosum ad hoc præparatum immittet indigito anulari dextræ manus Cardinalis, dans ei Anulum, & Titulum, dicens: *Ad honorem Dei Omnipotentis, Sanctorum Apostolorum Petri & Pauli, & Sancti N. committimus tibi Ecclesiam Sancti N. cum Clero, & populo, & Capellis suis secundum formam, qua comitti consuevit Cardinalibus, qui eandem Ecclesiam in Titulum habuerunt.* In Diaconis autem idem servatur, nisi quod non dicit, Tituli, nec adduntur Capellæ.

COMMENTARIUS.

I. **T**ituli Ecclesiæ dictæ sunt, quibus deserviendis ordinabantur Presbyteri itaut in iis stabilitatis promissionem facere tenerentur, & ab illis recedere ipsis non liceret, ut pluribus in suo medix & infimæ Latinitatis Glossario docet eruditus Dufresne, verbo, *Titulus*. Cur autem eo nomine Ecclesiæ a veteribus Christianis donatæ sint, variæ sunt Auctorum sententiæ. Baronius anno MCII. a titulis Fiscalibus desumptam hanc appellationem putat, quorum appositione rem aliquam sibi Fiscus vindicare solebat: Titulum autem Crucis fuisse, quo appposito, res sacra censebatur, quod pluribus observat in Notis ad Martyrolo-

gium Romanum die XXVI. Julii. Alii a Titulis seu Sepulchris Martyrum, vel Confessorum in Aedibus sacris reconditis. Nam Titulum sepulchri dixit Juvenalis Satyra VII. *Titulis decorare sepulchrum*. Sed audiendus Prudentius Poeta Christianus, qui Hymno v. de Sancto Vincentio ita scripsit.

*Jam nunc & ossa extinxero,
Ne sit sepulchrum funeris,
Quod plebs gregalis excolat
Titulumque figat Martyris.*

Et Hymno XII. de Coronis.

Parte alia Titulum Pauli via servat Ostiensis.
Alii denique dictam ajunt Ecclesiam Titulum, quod

quod Aedi sacrae vestibulis Sancti, cui dicata erat, Nomen inscriberetur, seu quod eo titularetur. Plura de his curiosus Lector inveniet apud eruditum Florentinum Exercitatione II. in vetustius Martyrologium, & apud laudatum Baronium loco citato, ubi etiam ait, veterem Romae obtinuisse loquendi usum, ut non omnis Ecclesia, Martyrumve Memoria Titulus diceretur, sed tantum insigniores Ecclesiae, quibus praeficerentur Presbyteri Cardinales.

II. His notatis, quod ritum spectat dandi Titulos, Anulosque Cardinalibus recens creatis, concinit plane nostro huic §. quod tradit de eare Ordo Romanus XIV. Cap. CXVI. sic inquit: *Post hac in fine Consistorii, vel ibidem post apertionem praedictam, oris scilicet, de qua ceremonia in Commentario superiori diximus, secundum quod Domino Papa videbitur, singuli Cardinales novi, singulariter unus post alium genuflectit coram Domino Papa; & tunc Dominus Papa recipit unum ex Annulis preparatis ad hoc, & immittit digito Cardinalis novi, dicendo tunc haec, vel similia verba, quae sequuntur: Ad honorem Dei Omnipotentis, Sanctorum Apostolorum Petri & Pauli, & Sanctae Priscæ, vel alterius Sanctae, vel Sancti, ad cujus honorem est fundata Ecclesia, quam Cardinali committit, commitimus tibi Ecclesiam Sanctae Priscæ cum Clero, & populo, & Capellanis suis, si est in Presbyterum Cardinalem assumptus, & sic in similibus, & interdum additur, secundum formam, quae committi Cardinalibus consuevit, qui eandem Ecclesiam intitulatam pro tempore habuerunt. Si vero esset in Diaconum Cardinalem assumptus, dicitur: Ad honorem &c. ut supra, committimus Ecclesiam Sanctae N.*

cum Clero & populo suis; & *omittitur*, Capellanis. Eadem leguntur in ms. Codice Pierfanctiano, qui tamen in recitata formula non dicit, *Capellanis suis*, ut in praedicto Romano Ordine, sed *Capellis suis*, ut in hoc nostro Ceremoniali.

III. Lubet hoc loco ritum describere, quo juxta Romanum Ordinem IX. relatum a Mabilonio, Tomo II, Musei Italici pag. 89. & seqq. Romae recens a Papa ordinati ad suos Titulos deducerentur: *Expletis omnibus, inquit, Missa rite completa, stant Regiones paratae ad singulos Titulos pertinentes cum candelabris, & thuribulis, ut proprium suscipiant Sacerdotem. Pontifex autem donat eis Sacerdotalia indumenta, & ministeria Missa, aurum, vel argentum, vinum, frumentum, & oleum. Egrescentes autem de Basilica S. Petri praecedent unumquemque vel triginta candelabra cum thuribulis. Ipse sedet super equum album. Praecedens, & subsequens populus canit & laudem. Similiter autem femina, Diaconissa, & Presbyterissa, quae eodem die benedicuntur. Platea autem Civitatis, unde transaturi sunt, coronantur lauro, & palis, & cum tanta gloria ad statutos Titulos deducunt proprios Sacerdotes, & ipse facit eis eo die convivium. Pervetustus est profecto Ordo iste IX. Romanus, quippe qui mentionem facit ritus ordinandi Diaconissas, & Presbyterissas, qui quidem, uti notavimus in Commentariis ad Concilia Ecumenica, & ad Romanum Pontificale, jam longe ante annum Christi millesimum abrogatus fuit, Ceterum quae sit hodie potestas S. R. E. Cardinalium in suos Titulos, legendae variae Romanorum Pontificum de eare Constitutiones,*

§. XIII.

Quod novi Cardinales non utuntur Anulis antequam habeant Titulum.

Et notandum, quod novi Cardinales, etiamsi antea erant Praelati, non debent portare Anulos antequam habeant Anulum a Summo Pontifice. Cum autem acceperint Anulum, & Titulum, osculentur pedem, & Pontificis manum; & Sanctitas sua eos elevet ad osculum oris, & revertantur ad sedes suas. Datis Anulis, & Titulis Cardinalibus praesentibus, consuevit etiam Pontifex ad contentiones tollendas etiam dare Titulos Cardinalibus absentibus, siqui sint noviter creati. Et haec omnia de ore aperiendo, Anulis, & Titulis dandis, possunt etiam fieri extra Consistorium ordinarium, videlicet in circulis, & Congregationibus, quando Cardinales vocantur pro aliqua causa, & tamen supradicta servantur, sicut in Consistorio.

COMMENTARIUS.

I. **C**oncinunt haec memoratis toties Pierfanctiano ms. Codici, & Romano Ordini XIV. Cap. CXVI. qui post descriptam superius in praecedenti Commentario caeremoniam traditionis Anuli, atque Tituli factae Cardinali recens creato, ita subdit: *Cardinalis vero, qui recipit anulum, osculatur manum, & pedem Domini Papa, & Dominus Papa ipsum post ad osculum oris recipit, & sic consequenter de aliis novis Cardinalibus observatur. Quibus completis, vadunt praedicti Domini Cardinales sedere in locis suis, nec tunc etiam Cardinales novi aliquid praedictis verbis & factis respon-*
To. I.

dent. Idem quod Ordo Romanus, dicit etiam Pierfanctianus Codex, qui etiam mox ajunt: Attendendum etiam, quod Dominus Papa tunc praesentibus omnibus Cardinalibus, ordinat quos Titulos habere debeant novi Cardinales absentes, ut inde sollicitudo tollatur. Attendendum denique & illud monent, quod praemissa quantum ad apertionem oris, & donationis anuli, & Tituli, interdum consueverunt fieri extra Consistorium, quando Dominus Papa vocat omnes Cardinales ad cameram suam pro consilio super negotiis habendo; & tunc omnes praemissae solemnitates per omnia servantur secundum modum

R r an-

antedictum, prout factum fuit anno a Nativitate Domini MCCCXXXIX. XVI. mensis Januarii Avenione per Dominum Papam Benedictum XII. in personas Dominorum Cardinalium, Ebre-dunensis, cui tunc fuit commissus Titulus Sancti Marci; & Albi, cui tunc etiam commissus fuit Titulus quatuor Coronatorum; & Montis Olivi, cui commissus fuit tunc etiam Titulus Sancti Stephani in Calio monte in camera prædicti Domini Papæ Benedicti. Hastenus laudati Codices Cæremoniales. Panvinius & Ciaconius hanc creationem revocant ad annum Domini MCCCXXVII. & quidem ad xv. Kalendas Januarii, qua die Bertrandus de Deucio Archiepiscopus Ebre-dunensis, Presbyter Cardinalis Tituli S. Marci; Frater Guillelmus Curti de Divano Abbas Montis Olivi, Presbyter Cardinalis Tituli Sanctorum quatuor Coronatorum, & Guillelmus Albus Presbyter Cardinalis Tituli S. Stephani in Calio monte renunciati dicuntur cum aliis tribus. Sunt etiam, qui eam creationem factam dicunt anno MCCCXXVIII. ejusque opinionis sunt Contelorius, & Anonymus Auctor Vitæ Benedicti Papæ XII. apud Bosquetum. Sed

præferenda est Pierfantiani ms. Codicis, & Romani xiv. Ordinis, sive Cæremonialis auctoritas, uti notat Mabillonius ad ipsum Ordinem ad calcem paginae 432.

II. Notato hoc obiter, notandum præsertim illud, quod initio nostri hujus §. edicitur, nos vos scilicet Cardinales, etiam si antea erant Prælati, non debere portare Anulos, antequam habeant Anulum a Summo Pontifice. Est is Anulus Cardinalitius, cujus quidem valor quingentis Cameræ ducatis æstimatur, & in assumptione ad Cardinalatus dignitatem, digito annullari illius per Summum Pontificem, ut diximus, imponitur; sequuta vero Cardinalis morte, non Anulus, sed valor Cameræ ipsi Apostolicæ debetur ex Constitutione VIII. Julii III. quæ legitur in Romano Bullario, licet hodie dictus Anuli valor non amplius Cameræ Apostolicæ, sed Congregationi de propaganda Fide a Gregorio XV. erectæ, eodem Pontifice ita mandante, non expectata Cardinalis morte, persolvitur, ut notat Cohellius in Notitia Cardinalatus, Cap. xvi. Privilegio xxxix. ubi & alia tradit, quæ eandem rem spectant.

§. XIV.

Dispensatio quod retineant Beneficia.

Et quoniam in assumptione ad Cardinalatum censentur omnia Beneficia promoti vacare, consuevit Pontifex per Litteras Apostolicas ad partem dispensare cum promoti, ut omnia Beneficia, quæ obtinebat, retineat, & decernere, illa non vacare.

COMMENTARIUS.

I. **P**er promotionem ad Cardinalatus dignitatem omnes Ecclesias, & Beneficia quæcumque, cujuscunque nominis, & tituli sint, ipsæque officia in Romana Curia, quæ vacabilia dicuntur, & pecunia comparantur, vacare, docet hic noster §. & sancitum etiam deinde fuit a Sixto Papa V. peculiari sua Constitutione LVII. quæ in Bullario Romano legitur. Plerumque tamen a Summis Pontificibus per Litteras Apostolicas dispensando conceditur ipsis ad Cardinalatum promotis eorundem Beneficiorum retentio, ut idem noster hic §. tradit; idque de consuetudine Curie servari dicit Lancelottus in

suo Templo omnium Judicum Lib. II. Cap. I. §. III. Num. xxxi. Hæc autem Beneficiorum retentio conceditur quidem, si talia sint Beneficia, quæ Cardinalitiæ dignitati non repugnent, ut in eadem Sixti V. Constitutione cavetur, ubi enarratur etiam, quæ sint Beneficia, in quibus dispensari non possit, Archipresbyteratus scilicet, Archidiaconatus, Decanatus, Canonatus, & familia, cum obtinens hujusmodi Beneficia teneatur residere in Choro, & locum habere post Episcopum, Cardinalis dignitati minime convenientem, ut notat Cohellius in Notitia Cardinalatus, Cap. viii. in fine.

§. XV.

Et notandum, quod, sicut apud omnes Cæremoniarum Libros invenimus, regulariter Pontifices non consueverunt mittere Galerum rubeum novis Cardinalibus extra Curiam, nisi essent in aliqua Legatione pro aliqua re magni momenti Sedis Apostolicæ, quia tunc mittitur, ut sint majoris auctoritatis, & reverentiæ, & tunc servantur inscriptæ cæremoniæ.

COMMENTARIUS.

I. **Q**uod in hoc §. edicitur, notarunt jam olim ms. Pierfantianus Codex, & Romanus Ordo xiv. Cap. cxvi. sic agentes: Regulariter autem Cardinali novo absenti Capellus rubeus per Dominum Papam non mittitur. Interdum tamen de gratia

speciali mitti ei per Dominum Papam consuevit, quando antea missus Legatus, vel Nuncius per eum fuerat pro pace inter Reges, vel Regem & Principes tractanda, ac etiam consummanda, ad finem, quod ipso Cardinalis per ipsos in majori reverentiâ habeatur, & ex hoc ad pacem me.

melius, & facilius inducatur. Hinc teste Raynaldo ad annum mcccxvi. Num. xx. cum Joannes XXII. interpellatus a Galliæ Rege Philippo, ut recens Cardinali creato Pileum mitteret, recusavit, excusavitque priscum morem, per quem id minus liceret: *Quia nec Prædecessores nostri Romani Pontifices consueverunt extracuriam hujusmodi Pileos mittere*; & a temporibus B. Ludovici, Pileum Cardinalitium non esse missum, nisi ad duos Angliæ Nuncios, quorum necesse esset dignitatem exaggerari, ut hinc pondus & auctoritas accederet eorum statutis. Clemens VI. ut notavit Thomassinus, Parte 1. *Disciplina*, Lib. II. Cap. civ. Num. xiv. cum sacro adscripsisset Collegio Abbatem S. Dionysii, Pileum misit, concediditque tribus Episcopis cum Epistola, qua significabat, quamvis inolevisset mos, ut Romam proficiscerentur Pileo donandi a Papa: *Licet imitanda servarit antiquitas, ut ad honorem Cardinalatus elevatus, non prius Capello rubeo uteretur, quam illum de manu Pontificis suscepisset.* Missum tamen a se esse, quem a tribus acciperet Episcopis, quod certior factus esset, esse gravissima negotia, propter quæ non posset tunc a Rege divelli: *Pro negotiis, in quibus Rex præsentia tua indigere se dixit diebus aliquibus in partibus istis de nostra licentia remanere.*

II. Clementis VI. Successor Innocentius itidem VI. creatis sex Cardinalibus die Veneris xxiii. Decembris anni mccclyi. inter quos duo tunc absentes erant a Curia, nempe Petrus de Foresta, & Nicolaus Roselli Catalanus Ordinis Prædicatorum tunc Inquisitor hæreticæ pravitatis Provinciæ Aragoniæ, rogatus a Petro Aragonum Rege, ut Pileum rubeum ei transmitteret, respondit, moris non esse, ut cuiquam Pileus ipse nisi ex Pontificia manu detur, seque de ea re Cardinales percunctatum, ut Regis votis morem gereret, neque illos ad suam sententiam allicere potuisse. Misit tamen Pileum Cardinalitium ipse Innocentius Petro de Foresta, idque ex eo colligitur, quod cum idem Petrus Aragoniæ Rex rescripsisset Pontifici, objicissetque exemplum memorati Petri de Foresta novi Cardinalis, ad quem Innocentius rubeum Pileum miserat, respondit Pontifex, disparem esse rationem, quia ille missus fuerat Burdegalam, ut de pace ageret inter Reges Francorum, & Anglorum, uti ex iis constat, quæ refert Raynaldus ad annum Christi mccclyi. Num. xli. & mccclyii. Num. II: ex quibus etiam eruitur, Talayrandum, & Nicolaum Capocium Cardinales, qui tum Legatione Sedis Apostolicæ fungebantur in Gallia, obtinuisse a laudato Innocentio VI. Pontifice, ut Pileum rubeum ad Petrum ipsum de Foresta mitteret.

III. Errant itaque illi Scriptores, qui putant, Cardinali absenti creato, propter regiam promoti nobilitatem, puta si fuerit filius, aut frater Imperatoris, vel Regis, nedum Biretum, sed etiam Galerum rubeum a Pontifice per suum Apostolicum Nuncium mitti. Tradit hæc quidem Cohellius in Notitia Cardinalatus Cap. x. in fine, probatque exemplo Pauli V. qui post cooptatum in sacrum Collegium Ferdinandum Austriacum Philippi III. filium Hispaniæ Infantem, eidem statim Diaconiam S. Mariæ in Porticu attribuit, Anulumque, & Pileum, amplissimæ Cardinalitiæ dignitatis insignia, mittendum decrevit;

itemque exemplo Urbani VIII. qui Joanni Alberto Poloniæ Regis fratri, post sacram delatam Purpuram, Diaconiam S. Mariæ in Aquiro à Cardinali Antonio Barberino dimissæ curam commisit, & Anulum, Pileumque speciali Nuncio in Poloniam misit. Addi & his alia exempla possunt, quæ longum esset enumerare. Ut alia omittam, ex quibus docemur, Romanos Pontifices, ubi filios Regum, ac Magnorum Principum Cardinales creant, ad eodem mittere solitos esse per aliquem Romanæ Aulæ Præsulem nondum Biretum, sed & Pileum rubeum, ac Anulum una cum Titulo: ea certe paucis ab hinc annis donatus fuit prærogativa Joannes Theodorus e Ducibus Baviaræ, Caroli VII. Imperatoris frater germanus, quem feliciter regnans BENEDICTUS XIV. Pontifex Maximus servatum, ut ajunt, in pectore, Cardinalem creavit die ix. Septembris anno Christi mdcxliiii. publicavitque postea die xvii. Januarii anno mdcxlv. Et deinde post publicationem prædicta omnia insignia misit una cum Titulo S. Laurentii in pane & perna per Lazarum Opitium Pallavicinum, Abbreviatorem, ut vulgo vocant, de Parco majori.

IV. Vera quidem hæc sunt, sed æque verum est, non soli Regiæ familiæ claritudini eum honorem a Pontificibus datum fuisse, ut aliqui putant; exemplum siquidem Petri de Foresta. Cardinalis superius allatum, ut notat Pagius in Vita Innocentii VI. Num. xvii. eam observationem destruit. Ex eo enim constat, antequam bireto rubeo uterentur Cardinales, rubeum Galerum ad absentes aliquando missum, etiam si non essent filii, aut fratres Imperatorum, aut Regum. Cujus rei extat aliud insigne exemplum ejusdem Innocentii Papæ VI. qui anno Pontificatus IX. Christi vero mcccxi. rubeum Pileum misit ad Androynum de Rocha in Gallia Nuncium, *licet non fuerit sine magna causa fieri consuetum*, ut idem Innocentius in Epistola sua inquit, quæ extat Tom. II. Thesauri novi Anecdotorum Col. 1068. Porro de gratia speciali mitti interdum absenti recens Cardinali creato Pileum rubeum a Pontifice consuevisse, quando scilicet antea missus ille Legatus, vel Nuncius per eum fuerat pro pace inter Reges & Principes tractanda, ac etiam consummanda, ut nempe Cardinalis accepto Pileo, majori in honore a Regibus ipsis, atque Principibus haberetur, docent nos quidem Romanus Ordo xiv. & Codex ms. Pierfantianus, quorum locum initio hujus Commentarii descripsimus. Petrus autem de Foresta missus fuerat pro tractanda pace inter Franciæ & Angliæ Reges; Androynus vero erat in Gallia de mandato Innocentii *pro prosecutione quorundam arduorum negotiorum, Regem, Joannem scilicet Regem Galliæ, ac Regni sui tranquillitatem, & pacem contingentium*, ut ipsemet Pontifex Innocentius VI. in laudatis Litteris asserit. Ceterum consuevisse etiam mitti Pileum rubeum ad eos, quorum præsentia Reges indigebant, jam supra ostendimus exemplo Clementis VI. qui anno mcccii. rubeum Galerum misit ad Ægidium Rigaudum, quem anno mccc. ex Abbate S. Dionysii in Francia Cardinalem creaverat, Litteris datis apud Villamnovam xvi. Kalendas Aprilis anno ix. in quibus expresse ait, se illum mittere, quod Rex Franciæ ejus præsentia indigere se diceret. Litteras

ras hæc refert Raynaldus ad annum mccc. videri possunt quæ in ejus Vita scribit Ciacconius cum Notis diversorum.

§. XVI.

Quæ servantur, cum mittitur Galerum extra Curiam.

Summus Pontifex cum Galerum rubrum alicui extra Curiam destinat, committit alicui Prælato in illis partibus primario, (1) & novo Cardinali grato per suas Litteras, ut publice Galerum rubrum, Apostolicæ Sedis nomine, novo Cardinali imponat, recepto ab eo prius fidelitatis juramento. Nam ab absentibus exigitur juramentum; de præsentibus autem aliquando fuit factum, aliquando non. Formam vero juramenti, & Litteras Apostolicas dabit illi, per quem mittet Galerum. Qui igitur illum nomine Pontificis ad novum Cardinalem deferet, cum ingreditur Urbem, sive Oppidum, ubi novus Cardinalis inhabitat, deducetur a Nobilibus, & amicis Cardinalis, & ipsum Galerum portabit palam, ut videri possit, sive super unum baculum, sicut portantur ante Papam, sive alias, quomodo sibi placuerit. Die Dominico, vel Festo, convenient ad domum novi Cardinalis, Episcopus cui committitur assignatio, (2) & Pontificis Nuncius, qui Galerum portavit, & simul omnes cum novo Cardinali ibunt ad Ecclesiam, Nuncio Apostolico ante Cardinalem Galerum portante, & tunc Cardinalis habebit Cappam Cardinalarem, & Galerum nigrum statui suo pristino congruentem. In Ecclesia postquam fecerint orationem ante Altare, audient Missam solemnem, sive simplicem, prout Domino Cardinali placebit. Finita Missa, Episcopus Commissarius induet super Rochetum, sive Superpelliceum Stolum, Pluviale, & Mitram preciosam, & sedebit supra Cathedram sibi paratam ante Altare vertens faciem ad populum. Nuncius autem, qui Galerum portavit, deponet illum super Altare, & si ad hoc erit idoneus, & paratus, stans in loco convenienti, ut ab omnibus audiat, facit brevem sermonem de dignitate Cardinalari, de meritis, & virtutibus novi Cardinalis, & de meritis Principis, qui pro eo supplicavit. Finito sermone, vel dimisso, accedet ad Episcopum Commissarium, & illi præsentabit Litteras Apostolicas, quas Episcopus reverenter suscipiet, & per unum ex suis publice legi faciet. Deinde convertens se ad circumstantes narrabit, qualiter Summus Pontifex volens Sanctæ Romanæ, & universali Ecclesiæ de novis Cardinalibus providere, in quatuor Temporibus proxime præteritis assumpsit ad Cardinalatus dignitatem octo Reverendissimos Patres omnium virtutum genere excellentes; inter quos voluit annumerare Reverendissimum in Christo Patrem tunc Episcopum Tornacensem cum suis præclaris meritis, tum maximis precibus, & intercessione Serenissimi Regis, seu Principis &c. & hic præsertim si Nuncius Apostolicus id non fecerit, laudet personam Cardinalis, personam intercedentis, & ipsam dignitatem. Demum exponat commissionem sibi factam, & concludat, se esse paratissimum ad exequenda Apostolica mandata. Novus Cardinalis, his dictis, accedat ad Altare, & genuflexus ante Episcopum juret, ut in forma ad Episcopum transmissa continetur. Quo facto, surgit Episcopus, & retrahens se ad cornu Epistolæ, deposita Mitra, ex Libro super Altare sibi parato dicit versiculos, & orationes infra scriptas super Cardinalem genuflexum in eodem loco, ubi juravit, permanentem: *Pater noster*, deinde prosequitur secrete, tum alte dicit: *Et ne nos inducas in tentationem*. R. *Sed libera nos a malo*. Versus: *Salvum fac servum tuum Domine*. R. *Deus meus sperantem in te*. Versus: *Mitte ei Domine auxilium de sancto*. R. *Et de Sion tuere eum*. Versus: *Domine exaudi orationem meam*. R. *Et clamor meus ad te veniat*. Versus: *Dominus vobiscum*. R. *Et cum spiritu tuo*.

Oremus.

Omnipotens sempiterne Deus miserere famulo tuo N. & dirige eum secundum Clementiam tuam in viam salutis æternæ, ut te donante tibi placita cupiat, & tota virtute perficiat.

Oratio.

Actiones nostras quæsumus Domine aspirando præveni & adjuvando prosequere, ut cuncta nostra oratio, & operatio à te semper incipiat, & per te cæpta finiatur. Per Christum Dominum nostrum. Amen.

Sedet deinde Episcopus Commissarius cum Mitra, & accipiens Galerum rubrum de manu Nuncii Apostolici, ipsum super caput novi Cardinalis ante se genuflexi bire-

tum

(1) Hæc verba, & novo Cardinali grato, leguntur in Romana editione; desunt in Veneta, & Colonienſi.

(2) In editione Romana additur, Cappelli.

tum & Cappam in capite tenentis imponit, dicens: *Ad laudem, & gloriam Omnipotentis Dei accipe rubrum Galerum magnæ Cardinalatus dignitatis insigne, quod per manus nostras, Apostolicæ Sedis nomine capiti tuo imponitur. In Nomine Patris & Filii & Spiritus Sancti Amen. Et sicut idem Paraclitus super capita Discipulorum Christi in figura ignis descendit, eorum corda Dei timore inflammans; ita & tu, qui illorum typum cum aliis Sanctæ Romanæ Ecclesiæ Cardinalibus in terris gesturus es, charitate ferveas, zelo domus Dei ardeas, & scias, te pro exaltatione, & tuitione Catholicæ Fidei, pro pace & quiete Christiani populi, pro defensione Ecclesiasticæ libertatis, pro honore, statu, commodoque Sanctæ Romanæ Ecclesiæ usque ad effusionem sanguinis, & ipsius corporis mortem perpetuo fore obligatum. Quod ut præstare valeas, ipse concedere dignetur, qui cum Patre & Spiritu Sancto vivit & regnat in secula seculorum. Amen.*

Et mox dat illi osculum pacis, dicens: *Pax tibi.* Et ille respondet: *Et cum spiritu tuo.* Extrahitur deinde Galerus, & traditur Nuncio Apostolico. Episcopus vero Commissarius surgens, detracta Mitra, genuflectit, & incipit: *Te Deum laudamus;* & Chorus prosequitur. Et Episcopus post primum versum surgit stans sine Mitra, usque in finem. Finito Hymno, Episcopus dicit: *Dominus vobiscum. R. Et cum spiritu tuo. Oremus.*

Omnipotens sempiterne Deus dirige actus nostros in beneplacito tuo, ut in Nomine dilecti Filii tui mereamur bonis operibus abundare.

Et in fine: *Dominus vobiscum.* Et Cantores dicunt: *Benedicamus Domino.* Alii respondent: *Deo Gratias.* His finitis, Episcopus, reassumta Mitra, stans in medio Altaris benedicat solemniter, dicens: *Sit Nomen Domini &c.* Deinde exiit se sacris vestibus, & assumpta Chlamyde deducet novum Cardinalem domum suam; qui si locus est idoneus, ascendit equum, & cum Galero rubro revertitur ad proprios lares.

COMMENTARIUS.

I. **Q**Uod ritus serventur quum mittitur Galerus Cardinalitius ad aliquem extra Curiam promotum, docet hic noster §. ad quem plane spectant, quæ fusc ac erudite adnotavit doctissimus Amicus noster Josephus Carafa Clericus Regularis in suo egregio Opere, quod inscripsit, *De Capella Regis utriusque Sicilia, & aliorum Principum*, Cap. XI. ubi inter alia late enarrat ordinem, quo Cardinales recens promoti donantur insignibus

sue dignitatis in Aula Regum Galliæ, Regum Hispaniæ, & Regum Lusitaniæ. Sed legenda præ ceteris sunt, quæ idem præstantissimus Auctor scripsit de ordine, quo Serenissimus Rex utriusque Siciliæ Carolus Borbonius contulit Cardinalatus insignia Dominico Urfino Graviensium Duci, quem in prima sua celeberrima Cardinalium promotione Sanctissimus Dominus Noster regnans Pontifex BENEDICTUS XIV. anno MDCCXLI. ea dignitate insignivit.

§. XVII.

De creatione Episcopi Cardinalis, & quod Cardinalis, de quo aliquid tractatur, exit Consistorio.

Vacante Titulo Episcopi Cardinalis, consueverunt Romani Pontifices regulariter ad Episcopatum promovere antiquiorem Presbyterum Cardinalem, si tamen ante suam promotionem ad Cardinalatum erat consecratus Episcopus, unde si Prior Presbyterorum non erat ante suam promotionem Episcopus, præmittitur secundus, vel tertius, si prius erant consecrati, quod servatum legimus a Joanne Vigesimo Secundo, & Clemente Sexto, & aliis. Sed nonnumquam præponuntur juniores Presbyteri propter Legationem, ut fecit Joannes Vigessimus Secundus prædictus, qui promovit ad Episcopatum Ostiensem Dominum Bertrandum de Pogeto, qui erat in Legatione, & novissimus Cardinalis. Legimus etiam apud antiquos, nonnullos ex Diaconatu ad Episcopatum promotos fuisse, ut Gregorius Undecimus, qui Cardinalem Lemovicensem promovit ad Episcopatum Prænestinum Diaconum existentem, & etiam ipsi nostris temporibus idem vidimus. Pius Secundus Joannem Curavayal Cardinalem Sancti Angeli ex Diacono Episcopum Portuensensem creavit propter ejus præclara erga Sedem Apostolicam merita; fuerat enim bis in Legatione contra Turcas cum maximo labore, & vitæ suæ discrimine. Et Sixtus Quartus Rodericum Borgiam S. Nicolai in carcere Diaconum Cardinalem, ac S. R. E. Vicecancellarium ad Episcopatum primum Albanensem, deinde Portuensensem promovit. Licet igitur videre, quod Pontifex pro

suo arbitrio cum consilio Fratrum de personis Presbyterorum, sive Diaconorum consuevit Titulis Episcopalibus Cardinalium providere. Igitur vacante Ecclesiâ Episcopali Cardinali, Pontifex in secreto Consistorio proponit personas, ut sibi videtur, benemeritas, quamvis ordinario antiquiores Presbyteros proponere debeat. Si præsens est ille, de quo agitur, debet exire Consistorio, & cum Pontifex habebit vota Fratrum, promovet illum talem ad Episcopatum per verbum, *providemus*, ut sit in aliis Episcopis, non per *assumimus*, ut in Cardinalibus. Deinde revocatus ad Consistorium provissus per Pontificem, intimatur sibi, qualiter de consensu Fratrum providerit Ecclesiæ Episcopali &c. de sua persona: tunc novus Episcopus agit gratias genuflexus Sanctissimo Domino nostro, & osculatur pedem, & manum ejus, & datur sibi Anulus preciosus, ut novis Cardinalibus, & elevatus recipitur ad faciem Pontificis. Inde per ordinem recipitur ad osculum ab omnibus aliis Cardinalibus, & sedet post ultimum Episcopum Cardinalem. Tum finito Consistorio deducitur a toto Collegio domum propriam suæ habitationis medius inter duos antiquiores Diaconos in ultimo loco equitantes. Cum pervenerit ad domum suam, agit gratias Dominis Cardinalibus singulariter singulis, ut de novis Cardinalibus diximus, visitat, & visitatur. Et adverte, quod ex laudabili, & debita observantia, quotiescumque in secreto Consistorio agitur de aliqua re specialiter tangente personam alicujus Cardinalis præsentis, ille talis debet exire Consistorio, & expectare in Camera ad partem, quoad finito suo negotio revocetur.

COMMENTARIUS.

I. **S**icuti certum est, fuisse vel priscis seculis in Ecclesiâ Romanâ Presbyteros, & Diaconos Cardinales, ita quoque multis seculis ignotos fuisse Romæ Episcopos Cardinales. Cum enim antiquitus Episcopus Cardinalis alius non esset, nisi proprius, & intitutus Ecclesiæ ejusque Episcopus; nullus in Urbe Roma præter Episcopum Romanum, sive Summum Pontificem dici potuit Ecclesiæ Romanæ Episcopus Cardinalis. Unde & multis seculis ignoti fuere alii Romanæ Ecclesiæ Episcopi Cardinales. Notat Vanespen Parte 1. *Juris Ecclesiastici universi*, Titulo xxii. Cap. 1. Num. lxxiv. admodum verisimile esse, nonnisi circa Seculum xi. aut xii. contigisse, quod narrat Onuphrius Panvinius, nimirum quod *Ecclesiâ Lateranensi, quæ est specialis Sedes Romani Pontificis, propter suam & Episcopi Romani excellentiam, septem Episcopi ex circumvicinis Civitatibus assignati sint, qui suis statis, solemnibusque diebus singuli coram Romano Pontifice in eadem Basilica celebrarent divina Mystéria, vel Pontifici celebranti assistentes essent, atque ob eam causam postea Episcopi, & Cardinales, idest Principales, quod huic Ecclesiæ, & Romani Pontificis ministerio adscripti essent, appellari cæperunt.*

II. At vero labi hos Auctores puto, constat enim Stephanum III. aliis IV. electum Summum Pontificem anno dclxviii. statuisse, ut *omni die Dominico a septem Episcopis Cardinalibus hebdomadariis, qui in Ecclesiâ Salvatoris, seu Lateranensi, observant Missarum solemniam, super Altare S. Petri celebraretur, & Gloria in excelsis Deo diceretur.* Testatur id quidem in ipsius Stephani Papæ Vita Anastasius, ad eumque locum Baronius observat, hic primam mentionem de septem Episcopis Cardinalibus reperiri, illis scilicet, qui proximos Urbi habentes Episcopatus, assisterent Pontifici, eidem Sanctæ Romanæ Ecclesiæ annexi cardini. Hos autem recenset Joannes Diaconus in Libro, *De Ecclesiâ Lateranensi*, Cap. viii. sic inquires:

Episcopus Ostiensis, qui debet consecrare, & benedicere Apostolicum præ omnibus aliis, Episcopus S. Rufinæ secundus, Episcopus Portuensis tertius, Episcopus Albanensis quartus, Episcopus Tusculanensis quintus, Episcopus Sabinenis sextus, Episcopus Prænестinensis septimus. Ex hoc etiam loco habemus, olim in Ecclesiâ Lateranensi septem illos Episcopos Cardinales hebdomadatim Missarum solemniam persolverisse; quam Ecclesiâ ob hanc prærogativam laudat & extollit S. Petrus Damiani, qui Seculo xii. claruit, Lib. II. Epistola 1. ad Sanctos Episcopos Lateranensis Ecclesiæ Cardinales, ut advertit eruditus Martene Lib. 1. *De antiquis Ecclesiæ ritibus*, Cap. iii. Articulo viii. Num. iii. ubi addit, ita de hac consuetudine scribere laudatum Joannem Diaconum: *Ad hoc igitur tam solemne sacrosanctum Altare..... nullus ad sacrificandum audet accedere præter Dominum Apostolicum, & septem Cardinales Episcopos ejusdem Ecclesiæ hebdomadarios, qui Missam in hac sacrosancta Basilica celebrant per hebdomadas suas.* In aliis vero Patriarchalibus Urbis Basilicis septem Presbyteri item Cardinales hebdomadarii fungebantur officio, quos idem Joannes Diaconus recenset Cap. xvi.

III. Licet autem septem essent olim Cardinales Episcopi, cujus septenarii numeri mysterium explicat S. Petrus Damiani in sua ad Cadolum antipapam Epistola, sciendum tamen S. Rufinæ, seu Sylvæ Candidæ Episcopatum a Callisto II. Pontifice anno mxxx. Episcopatui Portuensi fuisse unitum, redactusque est hodie in Pagum sub proprietate Hospitalis S. Spiritus in Saxia, uti notat Macrus in suo Hierolexico, Verbo, *Cardinalis*, ubi etiam memorat multa privilegia, atque amplas jurisdictiones, quas in Vaticana Basilica, atque per totam Leoninam Civitatem Joannes XIX. & Victor II. Sanctæ Rufinæ Cardinali Episcopo concesserant. Imo Pontifex solitus olim fuit, ut idem Auctor scribit, in secunda Paschæ die post ejus solemnem celebrationem in eadem Basilica, chirothecas cum

quibus celebraverat, eidem Episcopo donare, ad eumque spectabat sustinere stapham, quando Pontifex equitabat. Legendi de hoc Episcopatu, sicut & de aliis superius memoratis, Ughellus in sua Italia sacra, & Cohellius in Notitia Cardinalatus. Sed nec omittendus Thomassinus, qui & de his Episcopatibus agit Parte II. *Disciplina*, Lib. Cap. v. Num. VII. & XVII.

IV. His præmissis, quod nostrum §. spectat, agit quidem de ipsa cæremonia servari olim solita in creatione Episcoporum Cardinalium Romanus Ordo XIV. Auctore Jacobo Gajetano Cap. CXVII. ejus verba egregie ipsum §. nostrum illustrant. Sic enim inquit: *Quando Titulus Cardinalis Episcopi vacat tempore, quo novi Cardinales per Dominum Papam creantur, consuevit interdum Dominus Papa alicui de antiquis Presbyteris Cardinalibus in Curia Romana presentibus de illo per modum, qui sequitur, providere, & in die Veneris, quando Cardinales de novo creandos nominat, antiquis Cardinalibus per ordinem suum venientibus pro consilio ad Cathedram juxta Cathedram Domini Papæ pro ipsis Cardinalibus antiquis paratam, eos singulariter interrogat, de quo antiquo Presbytero Cardinali eis videretur Ecclesia, ut pramittitur, vacanti fore providendum, neminem tamen de Cardinalibus eis nominando, & responso per ordinem per eos, dum postea omnes Cardinales ad Consistorium ad sedendum secundum ordinem suum redierint, Dominus Papa antiquo Cardinali Presbytero ibidem presenti, vel absenti, providet de Ecclesia Episcopali, ut pramittitur, vacante, antequam creet alios novos Cardinales. Eadem legere est in aliis mss. Cæremonialibus libris, quos perhumaniter commodarunt mihi duo primi Apostolicarum Cæremoniarum Magistri Ignatius Reali, & Philippus Pierisantes.*

V. Juxta §. nostri testimonium, *vacante Titulo Episcopi Cardinalis, consueverunt Romani Pontifices regulariter ad Episcopatum promovere antiquiorem Presbyterum Cardinalem, si tamen ante suam promotionem erat consecratus Episcopus &c.* idque servatum ait idem noster §. a Joanne XXII. & Clemente VI. & aliis. Conciunt hæc laudato Romano XIV. qui ita de eare inquit: *Praferuntur etiam novissimi Presbyteri Cardinales in provisione dicti Tituli Episcopalis illi, qui ante promotionem ad Cardinalatum fuerint Archiepiscopi, vel Episcopi consecrati, aliis antiquorum Cardinalium, qui non fuerint Episcopi consecrati, ut tempore prefati Domini Joannis Papæ, nempe XXII. ejus nominis, quo tempore Dominus Petrus de Pratis tunc Presbyter Cardinalis, qui fuerat Archiepiscopus consecratus Aquensis, fuit factus Episcopus Praenestinus, licet prædicti Domini Santelmus, alias Santelinus, Joannes, & P. de Roblayo Presbyteri Cardinales praeceperent eum, & essent antiquiores in Cardinalatu; & tempore Domini Clementis Papæ VI. quando Dominus Dalbia, qui fuerat Episcopus Ruthenensis, fuit factus Episcopus Portuensis; & Dominus Cardinalis Bononiensis, qui fuerat consecratus Archiepiscopus Lugdunensis, factus fuit Episcopus Portuensis; & Dominus Cardinalis Claromontensis, qui postea fuit Papa Innocentius VI. fuit habitus Episcopus Ostiensis, licet Dominus Cardinalis Montis Olivæ praeceperet eos,*

& esset antiquior in Cardinalatu. Memorat laudatus Ordo & alia exempla, sed hætenus allata satis sunt ad nostri §. eruditionem.

VI. Rursus docet nos illud idem §. noster, nonnumquam in promotione ad Titulum Episcopatus præferri juniores Presbyteros Cardinales propter *Legationem*, ut fecit Joannes XXII. prædictus, qui promovit ad Episcopatum Ostiensem Dominum Bertrandum de Pogeto, qui erat in Legatione, & novissimus Cardinalis. Id ipsum jam antea asseruit memoratus Ordo XIV. *Praferuntur*, inquit, *ratione Legationis novissimi Presbyteri Cardinales in provisione Tituli Episcopalis antiquioribus Presbyteris Cardinalibus, prout factum fuit tempore Domini Joannis Papæ XXII. quo tempore erat Legatus Dominus Bertrandus de Poeto, alias Pogeto, qui stando in sua Legatione fuit factus Episcopus Ostiensis, licet Dominus Santelmas Joannes, qui postea lapsus temporis fuit Episcopus Albanensis, & P. de Roblayo, qui fuerat Cancellarius Francia Presbyteri Cardinales praeceperent eum.* Plura de hisce Cardinalibus videri possunt apud Ciaconium cum Notis diversorum, apud quos prædictus Bertrandus, qui in nostro §. dicitur de Pogeto, & in citato Romano Ordine apud Mabillonium, Tomo II. Musei Italici, appellatur de Porto, alias de Poyet, seu de Podietto, jam non Joannis XXII. Papæ filius, ut a quibusdam malevolis, & maledicis habitum illum fuisse absque veritatis titulo asserunt, sed Papæ sororis filius, natione Gallicus, Presbyter primo Cardinalis titulo S. Marcelli, mox Episcopus Ostiensis & Veliternus a laudato Joanne Pontifice electus est. Audita quippe ab ipso Joanne Atestinorum, & Ferrariensium rebellionem, Legatus summa cum potestate in Italiam anno MCCXVII. Bertrandus stipatus multis equitibus cisalpinis missus fuit, ut armis, & censura Ecclesiastica illos ad pacem compelleret.

XII. Docet præterea noster §. legi apud antiquos, nonnullos ex Diaconatu ad Episcopatum promotos fuisse, ut Gregorius XI. qui Cardinalem Lemovicensem promovit ad Episcopatum Praenestinum, Diaconum existentem &c. Subdit mox Pil II. & Sixti IV. exempla, quorum primus Joannem Carvayal, Cardinalem S. Angeli ex Diacono Episcopum Portuensem creavit propter ejus præstara erga Sedem Apostolicam merita &c. alter vero Rodericum Borgiam, S. Nicolai in carcere Cardinalem, ac S. R. E. Vicecancellarium ad Episcopatum primum Albanensem, deinde Portuensem promovit. Est is Rodericus Lenzolius Borgia Hispanus Patria. Valentinus Callisti III. ex sorore nepos, gentilitiis insignibus, & cognomine ab ipso Callisto avunculo donatus florenti adhuc ætate renunciatus est Diaconus Cardinalis S. Nicolai in carcere Tulliano die XX. Februarii anno MCDLVI. Fuit is deinde ad Episcopatum Albanensem promotus, & non multo post ad Portuensem, tandemque post Innocentii VIII. obitum in novis Comitibus Romanus Pontifex renunciatus, III. Idus Augusti anno MCDXCI. dictus est Alexander VI. de quo plura vide apud Spondanum, Raynaldum, Panvinium, & apud Ciaconium cum diversorum Notis.

VIII. Ubi ex Cardinalibus aliquis ad unum ex sex memoratis Episcopatibus promoveri debet,

bet, ex præscripto nostri §. si præsens est illè, de quo agitur, debet exire Consistorio, & cum Pontifex habebit vota Fratrum, promouet illum talem ad Episcopatum per verbum, providemus, ut sit in aliis Episcopatibus, non per assumimus, ut in Cardinalibus. Fusc enarrat hanc cæremoniam Romanus Ordo xiv. citato Capite cxvii. ubi sic inter alia inquit: *Sciendum etiam, quod quando Dominus noster Papa providet alicui Presbytero Cardinali de aliquo Episcopatu Cardinalari, tunc Dominus noster non dicit, committimus, sed providemus de tali Episcopatu &c. & hujusmodi provisione facta dictus Dominus noster Papa non in publico, sed ad partem dispensat cum ipso Episcopo Cardinali, ut Beneficia, quæ obtinebat ante dictam provisionem, una cum dicto Episcopatu possit obtinere.* His concinunt quæ & in aliis mss. Cæremonialibus leguntur, ex quibus omnia pene desumfit Augustinus Patricius in hoc adornando Romanæ Ecclesiæ Cæremoniali, quod Innocentio Papæ VIII. dedicavit, uti pluries jam notavimus.

IX. Fuit præterea antiquus mos, ut, quemadmodum ex toties laudato Romano Ordine xiv. addiscimus, ille, cui Titulus Cardinalitii Episcopatus committitur, extra Consistorium maneat, fuitque vetus, laudabilis, & debita observantia, cujus & hic noster §. meminit, *quod quotiescumque in secreto Consistorio agitur de aliqua re specialiter tangente personam alicujus Cardinalis præsentis, ille talis debet exire Consi-*

storio, & expectare in Camera ad partem, quoad finito suo negotio revocetur. Multa in hanc rem afferri possent exempla, sed his omisiss, notandum illud, quod idem §. monet, provisum nempe de Cardinalitio Episcopatu, ubi revocatus in Consistorium, notitiam suæ promotionis a Pontifice accepit, tunc debere genuflexum, Sanctissimo Domino nostro gratias agere, & osculari pedem, & manum ejus, & donatum Anulo pretioso, & elevatum recipi ad osculum faciei Pontificis, deinde vero per ordinem recipi ad osculum ab omnibus aliis Cardinalibus, & sedere post ultimum Episcopum Cardinalem; tum insuper finito Consistorio deduci a toto Collegio ad domum propriæ suæ habitationis, medium inter duos antiquiores Diaconos in ultimo loco equitantes; cum autem ad domum suam pervenerit, debere gratias *Cardinalibus singulariter singulis* agere, eosque visitare, ac visitari ab ipsis. Ita noster §. juxta cujus præscriptum multa exempla eandem in rem occurrunt in mss. Apostolicorum Cæremoniariorum Diariis. Cæterum, ut ait memoratus Ordo xiv. Romanus, interdum consuevit Pontifex illa die, qua Titulum Cardinalitii Episcopatus alicui Cardinali conferebat, omnibus Cardinalibus prandium facere, & Cardinalis ille de Episcopali Cardinalitio Titulo provisus debebat *in crastinum omnes Cardinales singulariter in eorum Domibus visitare.* Id quod etiam in aliis ms. Cæremonialibus cautum est.

§. XVIII.

De creatione Legati Apostolici de Latere.

Pontifex in secreto Consistorio primum proponit causas, propter quas sibi videatur necessaria Legatorum creatio, & exquirat vota, an sint creandi Legati, & quot; & postquam convenerit, nominat personas, quæ nominatæ exeunt Consistorio, & cum Patres concordaverint de personis, revocantur intro. Pontifex omnibus confedentibus, exponit, qualiter confusus de prudentia, virtute, &c. illius, de consilio Fratrum designaverit illum Legatum Apostolicum ad tales partes, injungitque ei onus Legationis. Ille ut primum Pontifex ad eum convertit orationem, assurgit, & ut Pontifex finivit, detecto capite agit gratias Sanctissimo Domino nostro, & sacro Senatui de bona eorum opinione erga suam insufficientiam, & verbis modestissimis excusat se, & rogat, ut id onus melioribus, & peritioribus committatur, & tandem instante Pontifice offert se paratum ad obedientiam, agitque iterum gratias, & accedens ad ejus pedes, & genuflexus osculatur pedem, & manum, & recipitur ad osculum oris; & similiter deinde ab omnibus Cardinalibus, & deducitur domum, ut de Episcopo Cardinali supra diximus. Deinde parat se ad iter, & interim omnes Cardinales visitat, antequam discedat. Adveniente die profectionis, fit secretum Consistorium, & in fine exiens a Latere Pontificis, deducitur ab omnibus Cardinalibus ordine prædicto usque extra portam Civitatis, & ibi postquam egit gratias, & osculatus est omnes Cardinales, proficiscitur in pace, alii autem revertuntur domum suam. Cardinalis Legatus postquam exivit territorium Civitatis, ubi Pontifex residet, incipit benedicere, capit Mantum rubrum, & præfertur ante eum Crux, & dum est in Legatione, non participat de emolumentis Camera Apostolicæ, sive Annatarum.

COMMENTARIUS.

I. **Q**uinam sint Legati a Latere & Apostolicæ Sedis, & quotuplex eorum genus, explicuimus Tomo i. Conciliorum in Prolegomenis, Cap. x. Fusc &

de iis agunt veteres Codices Cæremoniales Romanæ Ecclesiæ, præ ceteris vero Ordo Romanus xiv. Auctore Gajetano, Cap. cxviii. Sane tria esse Legatorum genera, nimirum Le-

ga-

gatos a latere, Legatos missos, & Legatos natos, ex Capite i. *De officio Legati* in vi. notavit inter alios Vanespen, Parte i. *Juris Ecclesiastici universi*, Titulo xx i. Cap. i. Quicquid autem de aliis generibus Legatorum sit, Legati a latere vocantur Legati Cardinales, & hoc ideo, ait Glossa in citato Cap. i. *quia assumuntur de latere Papæ. Nam sicut Imperator, & Patricii, sive Consilarii, faciunt unum corpus, cujus Imperator est caput, & Consilarii, qui sibi assistunt in secretis, dicuntur esse membra, ita similiter Papa, & Cardinales faciunt unum corpus, cujus Papa est caput, & Cardinales sunt membra. Ideo, quando aliquis assumitur ex Cardinalibus, ut mittatur Legatus, dicitur sumtus de latere, & appellatur Legatus de latere.*

II. Hoc prænotato, quod creationem Legatorum spectat, Pontifex in secreto Consistorio, ut ait hic noster §. *primam proponit causas, propter quas sibi videatur necessaria Legatorum creatio; & exquirat vota, an sint creandi Legati, & quot.* Est & hic antiquus ritus, quem ita describit memoratus Ordo Romanus xiv. *Sciendum est, inquit, quod quando Dominus Papa vult ordinare de Cardinali, vel Cardinalibus, Legato, vel Legatis, Nuncio, vel Nunciis, mittendo, vel mittendis, ad aliquas partes, seu regiones, Dominus Papa primo petit publice in Consistorio a Cardinalibus, utrum sit expediens mittere, vel non, dicendo aliqua, propter quæ mittendum videatur; & si expediens videatur mittere, ordinat etiam publice in Consistorio, utrum sint mittendi unus, duo, vel plures.* Postquam Cardinales convenerint, Papa, ait §. noster, nominat personas, quæ nominatæ exeunt Consistorio, & cum Cardinales ipsi concordaverint de personis nominatis, revocantur intro. Sed audiamus laudatum Romanum Ordinem, qui cæremoniam ipsam his verbis exponit: *Ordinato de mittendo, fiunt auricularia consilia de personis mittendis, ut in Cardinalibus creandis est fieri consuetum, & Dominus Papa petit tunc auriculariter a quolibet, de quo, vel quibus, videtur bonum ordinare mittendis.*

III. Juxta nostrum §. facta Cardinalium conventionem de Legato mittendo, ac de persona, eaque in Consistorium revocata, Pontifex, omnibus confedentibus, exponit, qualiter confusus de prudentia, virtute, &c. illius, de consilio Fratrum, designaverit illum Legatum Apostolicum ad tales partes, injungitque ei onus Legationis. Atque hæc etiam desumpta sunt ex Cæremonialibus mss. vetustioribus Libris, ac præsertim ex Ordine Romano xiv. cujus hæc eam in rem sunt verba: *Consiliis completis, postmodum per Papam interdum sumta aliqua auctoritate, sed ipsam parum prosequendo, regulariter tamen sine assumptione auctoritatis, ibidem, vel in crastinum, secundum quod Papæ placuerit, dicitur per dictum Papam: Omnes, vel major pars Fratrum nostrorum concordant, vel concordat in unam personam, vel duas personas, vel plures, si duæ, vel plures sint mittendæ; & nos de consilio ipsorum Fratrum ordinamus, quod vos talis, vel tales, si sint duo, vel plures, vadatis ad tales partes, & paretis vos ad eundem &c. Interdum vero Papa consuevit addere: Ordinamus, & injungimus.*

IV. Creatus Legatus, ex nostro hoc eo-
To. I.

dem §. *ut primum Pontifex ad eum convertit orationem, assurgit, & ut Pontifex finivit, detecto capite agit gratias Sanctissimo Domino nostro, & sacro Senatui de bona eorum opinione erga suam insufficientiam, & verbis modestissimis excusat se &c.* Olim, ut habet Ordo xiv. Romanus, Cardinalis ipse Legatus mittendus consuevit in ipso Consistorio sumere aliquam auctoritatem, & aliquam se excusare, quod ipse non est sufficiens ad id, quod Dominus Papa eum ordinavit mittendum, sed ejus excusatione non admissa per Papam, Cardinalis ipse venit ad osculum pedis, & oris Papæ, Cardinali antiquiori Diacono primitus pedes Papæ discooperiendo; quibus factis, Papa surgebat, ibatque ad Camera suam. Addit autem & alia ipse Romanus Ordo xiv. quæ in nostro §. desiderantur. Vult enim i. ut si Cardinalis aliquis est absens propter infirmitatem, mittantur duo Cardinales ad eundem pro consilio, seu voto ejus habendo, juxta modum servatum in creatione novorum Cardinalium, de quo nos supra diximus. II. ait, quod illa die, qua ordinantur Legati, vel Nuncii Cardinales, non consueverunt omnes Cardinales cum Papa comedere, sed tantum illi, qui ordinantur Legati, vel Nuncii. III. attendendum dicit, quod si forte sint duo Legati, vel Nuncii creati, & unus illorum processu temporis se excuset, vel excuset eum Papa, utrum illi qui remanet, sit alius Legatus, vel Nuncius adjungendus, vel non adjungendus, & de persona adjungenda, super hoc fiat auriculare consilium sicut prius. Ita ait fuisse observatum tempore Domini Clementis VI. Pontificatus sui anno IV. quando dictus Dominus Papa excusavit Dominum Cardinalem de Bologna, qui fuerat electus Legatus una cum Domino Cardinali Ebredunensi per eundem ad partes Italia, & Regni Sicilia. IV. demum ait, quod licet debet Papa ordinare, & facere, ut supra dictum est, hujusmodi Legatos, vel Nuncios in Consistorio; interdum tamen consuevit ipsos ordinare, & facere in Camera sua, vocatis omnibus Cardinalibus.

V. Sed redeamus ad nostrum §. in quo edicitur, ut creatus Cardinalis Legatus, post receptum osculum ab omnibus Cardinalibus in Consistorio, deducatur domum, a Cardinalibus scilicet, ut erat antiqui moris, cujus meminit in suo ms. Diario Franciscus Mucantius anno MDLXXII. ubi enarrans gesta primi anni Pontificatus Gregorii XIII. ita ad rem nostram inquit: *Die xxvii. Augusti fuit Consistorium in eodem Palatio S. Marci, fuit creatus Legatus de Latere Reverendissimus Dominus Cardinalis Ursinus ad Regem Gallia, & finito Consistorio fuit associatus a toto Collegio Reverendissimorum Cardinalium usque ad Aulam majorem dicti Palatii, & ibi apud Portam gratias egit singulis Cardinalibus, factis solitis inclinationibus de hujusmodi associatione, cui remanenti in dicta Aula singuli Cardinales ordine suo abeuntes inclinarunt tanquam ad domum suam illum deduxissent, prout olim fieri solebat juxta ritum desumptum in Libro Cæremoniarum; juxta ritum scilicet in hoc nostro §. descriptum.* Dolet mox & ipse Cæremoniarius Apostolicus Mucantius, jam suo ævo in defuetudinem abiisse eum ritum, ita subdens: *Quod hodie non fit, quia gaudent brevitate moderni; & paulatim cæremonia antiqua*

tiqua deferuntur, vel corrumpuntur magna ex parte: cum nec Pontifex, nec Cardinales, qui id facere possent sua auctoritate, illas in suo splendore conservare curent; quod dolendum est.

VI. Deducto Cardinali Legato ad propriam ejus domum a sacro Collegio, ex præscripto nostri hujus §. mox parat se ad iter, & interim omnes Cardinales visitat, antequam discedat. Idipsum docet, sed quidem luculentius prædictus Romanus Ordo XIV. Notandum, inquit, quod Cardinalis, vel Nuncius, ante recessum suum de Curia, debet omnes, & singulos Cardinales in eorum domibus visitare, & illud idem debet facere in regressu; ipse vero Legatus, vel Nuncius, non consuevit ab eis visitari, nisi per aliquos suos speciales. Sane, ut ait noster §. adveniente die professionis, fit secretum Consistorium, & in fine exiens Legatus a latere Pontificis deducitur ab omnibus Cardinalibus usque extra portam Civitatis, & ibi postquam egit gratias, & osculatus est omnes Cardinales, proficiscitur in pace, alii autem revertuntur domum suam. Atque hæc etiam concinunt Romano ipsi Ordini XIV. ita eam cæremoniam referenti: *In die recessus ipsius, Legati scilicet, omnes Cardinales debent extra villam in convenienti campo expectare ipsum, ab eo facto primitus osculo, depositis Capellis, & bireto per eosdem.*

VII. Porro instauravit ritum ipsum longo tempore intermissum Gregorius ipse XIII. in Consistorio habito die II. Septembris, quo Legatus prædictus Cardinalis Urfinus Roma discedens, associatus fuit a Cardinalium Collegio usque ad Portam Flaminiam, ut refert memoratus Mucantius his verbis: *Omnes Cardinales mulas ascendentes, Cappis, & Galeris Pontificalibus induti, associarunt Reverendissimum Dominum Cardinalem Urfinum Legatum usque ad Portam Flaminiam, & extra eam, ubi factis mutuis reverentiis, cum ibi reliquerunt juxta ritum antiquum in Cæremoniali Libro descriptum, ita Pontifice jubente in Consistorio hodierno, adeo ut fuerit opus ex improvviso mandare Parafrenariis Reverendissimorum Dominorum Cardinalium, ut statim adducerent mulas Pontificali ritu indutas, & vix adfuit tempus, cum hodie ex abusu moderno nemo fere ex Cardinalibus equitet ad Capellas, & Consistoria Pontificaliter, ut prius solebant, & maxime decebat, & propterea relinquunt mulas domi, accedentes ipsi ad Palatium in curribus, & attendentes potius privatam commoditatem, quam decus publicum, quod fieri non deberet, ut alias latius Deo dante exponam. His notatis, subdit idem. Mucantius consentaneæ ad nostrum §. laudatum ipsum Cardinalem Urfinum Legatum equitando fuisse medium in postremo loco, videlicet inter Reverendissimos Dominos Cardinales Estensem, & Medices Diaconos, præcedentibus aliis binis, & binis, non sine multo calore, & pulvere, cum esset hora jam decima octava,*

VIII. Ex præscripto etiam nostri §. Cardinalis Legatus postquam exivit territorium Civitatis, ubi Pontifex residet, incipit benedicere, capit Mantum rubrum, & præfertur ante eum Crux. Varia sunt privilegia Legatorum, quæ hic recensentur; longe plura sunt, quæ a Canonistis notantur, viderique inter alios possunt Thomassinus Parte 1. *Disciplina*, Lib. II. Cap. cxviii. & sequenti, Vanespen loco citato, ac

illi præsertim, qui de Legatis ipsis Apostolicis peculiare tractatus edidere. Illud nos hoc loco admonebimus, usum in fine hujus nostri §. descriptum, plenius luculentiusque referri in Ordine Romano XIV. Auctore Gajetano, Cap. cxviii. quod inscriptum est, *De creatione Cardinalium Legatorum, vel Nunciorum*. Sic enim inquit: *Est etiam notandum, quod Cardinalis Legatus vadens ad legationem suam, cum exit territorium Civitatis, vel loci, in quo Papa cum Cardinalibus residet, statim deponit Cappam communem, & recipit Cappam rubeam de scarleto, & biretum rubeum, quibus in tota Legatione sua utitur, & cum intrat territorium supradictum, statim dimittit signare, & deponit Cappam rubeam, & assumit Cappam communem, & biretum tale, sicut alii Cardinales portant &c.* Addit mox idem laudatus Ordo, cui & alii Cæremoniales Libri concinunt, *ista quoad assumptionem, necnon depositionem Cappæ rubei coloris, & bireti, & Crucis signationem, non habere locum quoad Nuncios, sed tantum quoad Legatos*. Qui quidem etiam si essent Cardinales ex Regularium Ordinibus assumti, qui & in Cardinalatu colorem vestium Ordinum, quos professi sunt, retinent, tamen si Legati de Latere crearentur, mutarent & ipsi colorem habitus Religionis suæ, & purpureo indumento uterentur teste Mamfredo, *De Cardinalatu*, Cap. v. quem, ut alios Auctores omitam, citat & sequitur Cohellius in sua Cardinalatus Notitia, Cap. xi.

IX. Cappam rubeam esse antiquum insigne Legatorum Apostolicæ Sedis, docent complures Canonici Juris Interpretes in Cap. *Antiqua, De privilegiis &c.* & inter alios Scriptores eruditus Pagius in Vita Innocentii III. Num. lxxxii. & Vanespen Parte 1. *Juris Ecclesiastici*, Tit. XXI. Cap. II. ubi etiam notat ex dicto Capite, *Antiqua*, tantam esse Legatorum dignitatem, ut nec Archiepiscopi, imo nec Patriarchæ, possint sibi jubere præferri Dominicæ Crucis vexillum, ubicumque præfens esset Summi Pontificis Legatus, utens insigniis Apostolicæ dignitatis; quia scilicet in præsentia majoris deponitur potestas reverentialis minoris, ut inquit Barbosa Lib. 1. *Juris Ecclesiastici*, Cap. v. ubi etiam & illud observat, Episcopum in Civitate, & Diocesi, cui præest, non posse, præfente Legato de latere, benedicere populum, & deferre vestes, scilicet Mozzettam significantem jurisdictionem illius ordinariam. Simili ratione, præfente Legato a latere, cessat aliorum Legatorum auctoritas, imo & ipsorum Patriarcharum, uti expresse edicit Gregorius IX. in Epistola ad Patriarcham Hierosolymitanum relata in Cap. viii. *De Officio Legati*, ubi ita inquit: *Fraternitati tuæ Legationis Officium in Provincia tua duximus committendum, ita tamen, quod si Legatus ad partes illas de latere nostro contigerit destinari, executionem ipsius Officii, quandiu Legatus ipse ibi fuerit, pro Sedis Apostolicæ reverentia omnino dimittas.*

X. Præter Cappam rubeam gaudet Legatus prærogativa præferendæ sibi Crucis, de qua fufe diximus Tomo 1. Romani Pontificalis Tit. xiv. *De Pallio*, in Commentario ad §. viii. atque hinc est quod ex recepto ritu, licet nulla in hoc nostro Cæremoniali fiat ejus mentio cum Cardinales præfentes in Curia creantur a Pon-

ſiſce in Conſiſtorio Legati a latere, ſolet is illis dare Crucem, uti nos docent mſs, Cæremoniales Codices Apoſtolicorum Cæremoniario- rum his verbis: Pontifex, finito Conſiſtorio, habens ante ſe Crucem a ſuo Capellano Crucifero delatam, depoſito birreto rubeo, ſtans, ſuper Cardinalem Legatum genuflexum dicit totam antiphonam: In viam ſalutis, proſperitatis, & pacis dirigat te, & grefſus tuos omnipotens, & miſericors Dominus; & Angelus Raphael comitetur tecum in via, ut cum pace, ſalute, & gaudio revertaris ad propria. Deinde dicit alternatim cum Cardinalibus Diaconis Aſſiſtentibus, totum Pſalmum: Benediſtus Dominus Deus Iſrael &c. Tum Pontifex repetit antiphonam ſupradictam: In viam ſalutis, proſperitatis, & pacis &c. Deinde dicit, reſpondentibus iſdem Cardinalibus Diaconis Aſſiſtentibus, Kyrie eleiſon, Chriſte eleiſon, Kyrie eleiſon. Pater noſter &c. ſecreto. V. Et ne nos inducas in tentationem. R. Sed libera nos a malo. V. Salvum fac ſervum tuum Domine. R. Deus meus ſperantem in te. V. Mitte ei Domine auxilium de Sancto. R. Et de Sion tuere eum. V. Eſto ei Domine turris fortitudinis. R. A facie inimici. V. Nihil proficiat inimicus in eo. R. Et filius iniquitatis non apponet nocere ei. V. Benediſtus Dominus die quotidie. R. Proſperum iter faciat ei Deus ſalutarium noſtrorum. V. Vias tuas Domine demonſtra ei. R. Et ſemitas tuas edoce eum. V. Utinam dirigantur viæ ejus. R. Ad cuſtodien- das juſtificationes tuas. V. Erant prava in directâ. R. Et aſpera in vias planas. V. Angelis ſuis Deus mandavit de te. R. Ut cuſtodiant te in omnibus viis tuis. V. Domine exaudi orationem meam. R. Et clamor meus ad te veniat. V. Dominus vobiſcum. R. Et cum ſpiritu tuo. Oremus. Aſſiones ſamuli tui, quaſumus Domine, aſpirando praveni, & adjuvando proſequere: ut cuncta ejus operatio a te ſemper incipiat, & per te capta finiatur, Per Chriſtum Dominum noſtrum. R. Amen. Oremus, Omnipotens ſempiternæ Deus, dirige actus ſamuli tui in beneplacito tuo, ut in nomine delecti Filii tui, me-

riatur bonis operibus abundare. Per Chriſtum Dominum noſtrum. R. Amen. Oremus. Adeſto quaſumus Domine ſupplicationibus noſtris, & viam ſamuli tui in ſalutis tuæ proſperitate diſpone: ut inter omnes viæ, & vitæ bujſus varietates, tuo ſemper protegatur auxilio. Per Chriſtum Dominum noſtrum. R. Amen. Addunt iſdem Codices: Mox Pontifex accepta Cruce per manum primi Diaconi, eam tradit Cardinali Legato adhuc genuflexo, & dicit: Procedatis in pace, In Nomine Patris, & Filii, & Spiritus Sancti. Amen: Poſt hæc ſedet Pontifex, & ſumpto birreto rubeo, Cardinalem Legatum ad oſculum pedis, manus, & oris admittit. Tandem Legatus ad locum ſuum redit, & Pontifex dimiſſa Stola, ad Cameras ſe confert, producto prius ſigno Crucis ſuper Cardinales, qui capati deſcendent ad atrium, equitaturi cum Legato, ſequentibus Prælatiſ, juxta miſſas intimationes, extra ſtatutam Portam Urbis.

XI. Reliquum eſt, ut nos & illud notemus, quod noſter §. de ipſo Legato de latere in fine edicit: Dum eſt in Legatione, non participat de emolumentis Camera Apoſtolice, ſive Annatarum. Quid ſint Annatæ, jam explicuimus Tomo IV. Conciliorum in explicatione ſeſſionis XXI. Concilii Baſileenſis. Ceterum concinit noſter §. Romano Ordini XIV. Cap. CXVIII. in fine, ubi expreſſe ait, quod Cardinalis Legatus, poſtquam receſſerit de Curia, quouſque redierit de Legatione ſua ad Curiam, nihil recipit de cenſibus Eccleſiæ, nec de ſervitiis Prælatorum per Dominum Papam medio tempore faſtorum, nec de aliis Camera Domini Papæ medio tempore debitis, in quibus Cardinales præſentes partem dimidiam habere & percipere conſueverunt, exceptis Anulis Cardinalium medio tempore decedentium, in quibus Anulis Cardinales Legati abſentes a Curia tantum recipiunt, ac ſi eſſent præſentes. Idem præſcribitur in Cæremoniali Davantriæ, & in aliis, in quibus notatur diſciplina ejus ævi, quæ deinde immutata fuit in multis, quorum explicatio longiorem Commentarium exigeret; ſed nolumus majore impenſa in edendo hoc Opere gravari.

§. XIX.

De habitu Pontificis in pronuntiatione Cardinalium, ſive Legatorum, & illorum, quos ad Eccleſias Cathedrales eligit.

Conſueverunt Summi Pontifices ſemper quando pronuntiabant novos Cardinales, ſive Episcopos Cardinales, ſive Legatos Apoſtolicos, ſive novos electos ad Eccleſias Cathedrales, ſive translatoſ, habere Pluviale, & Mitram Conſiſtoriam, & tunc Cardinales omnes faciebant reverentiam, ut in Eccleſia. Et nota, quod Papæ nunquam fit reverentia a Cardinalibus, quando non habet Pluviale, & Mitram. Hodie, ut audio, raro Pontifex iſta facit cum Pluviali, & Mitra; & reverentia nunquam fit in Conſiſtorio ſecreto.

COMMENTARIUS.

Moris antiqui teſtem habemus Romanum Ordinem XIV. Cap. CXVIII. ubi de creatione Legatorum loquens, inter alia ait, quod ſi forte Pontifex in dicta ordinatione non portat Pluviale, & Mitram, tamen in pronuntiatione ipſorum Legatorum, vel

Nunciorum, ipſe debet portare Pluviale aurifrigiatum, & Mitram Conſiſtoriam nuncupatam. Additque etiam mox: Si tempus ſit nimis frigidum, Papa in eadem pronuntiatione poteſt recipere Pluviale de Samitrio foderatum de pelli- bus, ſive ut ait in mſ. Cæremoniali Davantriæ,

Pluviale de samitrio foderatum de pellibus, & caputium de eodem; quo Pluviali recepto, ante dictam Legatorum, vel Nunciorum pronunciationem, omnes Cardinales debent venire ad reverentiam Papæ, prout est consuetum. Samitum, samittum, samitium, & exametum, Pannus holosericus dicitur apud eruditum Dufresne in suo Glossario. Quicquid autem de his vobis sit, jam Seculo xv. quo labente nostrum

hoc Cæremoniale ab Augustino Patricio ordinatum fuit, mos invaluit, ut Papæ nunquam fieret reverentia a Cardinalibus, quando non habet Pluviale, & Mitram; testaturque idem Patricius in hoc nostro §. suo ævo raro Pontificem fecisse pronunciationem Cardinalium, Legatorumve cum Pluviali, & Mitra; reverentiam autem nunquam fieri Pontifici in Consistorio secreto.

§. XX.

De ordinatione Cardinalium ad sacros Ordines.

Assumpti ad dignitatem Cardinalatus Minores Ordines, & Subdiaconatum accipiunt ab aliquo Episcopo Cardinali de commissione Pontificis; Diaconatum vero, & Presbyteratum de manu Summi Pontificis in loco, ubi suæ Sanctitati placuerit. Aderunt præsentibus duo Diaconi Pontifici assistentes, & unus Diaconus ministrans in Missa, si erit solemnis, & unus Presbyter Cardinalis parati, qui Pontifici ministrabunt, & servabuntur omnia, quæ in Ordinatione aliorum servantur. Senior Diaconorum dicet: *Postulat sancta mater Ecclesia &c.* Ordinati post Ordinationem osculantur pedem Sanctissimi Domini nostri & manum genuflexi, & recipiuntur ad osculum oris. Ad Offertorium offerent cereos, panes, & vinum, ut faciunt Episcopi; & in fine cum Mitra simplici in capite dicent: *Ad multos annos, ut in Episcopis.*

COMMENTARIUS.

I. **Q**Uæ & in hoc edicuntur §. descripta clarius jam antea fuere in Ordine XIV. Romano, Cap. CXVII. *Minores Ordines, inquit, consueverunt dari Cardinalibus per Episcopum Cardinalem ex commissione Papæ extra quatuor Tempora, Majores vero Ordines per Papam regulariter in quatuor Temporibus, & interdum extra quatuor Tempora, & secreto, præsentibus tantum tribus antiquis Cardinalibus, & paratis suis paramentis, uno Episcopo, vel Presbytero, & duobus Diaconibus. Addit mox, consuevisse etiam dari per Papam simul omnes Ordines Majores Cardinalibus supradictis. Eadem leguntur in ms. Davantriæ Cæremoniali. Fusc de Ordinatione, ejusque variis ritibus diximus nos Tomo I. Commentariorum in Partem I. Romani Pontificalis. Unum hic repetemus, quod & alias notavimus, quod nempe de Clemente VI. scribit in suis Annalibus ad annum MCCCLII. Henricus Monachus Rebdorffensis: *Hic Papa sacros Ordines plures etiam extra Tempora, & alia indifferenter contra consuetudinem olim in Ecclesia servatam contulit, & conferri mandavit. Ex quo lucet, quod notavit Lupus doctissimus Tomo IV. Operum editionis Venetæ in Scholio ad Decretum III. S. Leonis IX. in fine, nempe sententiam illam, quæ Romanum Pontificem affirmat, nullis ad faciendas Ordinationes temporibus alligari, tunc fuisse ignotam. Cunctis enim generalibus, licet ex causis dispensare, & moderari possit, Ecclesiæ Canonibus se adstringi Romani Pontifices fuere, semper professi.**

II. Ad majorem nostri hujus §. intelligentiam, abs re non erit ritum hoc loco describere, quo Leo Papa X. anno MDXIII. quatuor Cardinales ordinavit, quem describit in suo ms. Diacono ad ipsum annum Apostolicus Cæremonia-

rius Paris de Grassis sic inquit: *Sanctissimus Dominus noster Leo cum creasset superioribus diebus quatuor Cardinales, petiit, quomodo, aut quid facturus esset de illis, qui nullum Ordinem penitus haberent, præter unum, qui erat Cardinalis Sanctorum quatuor Coronatorum in prima Tonsura constitutus, suasi quod secrete iste Cardinalis haberet ab aliquo Prælato reliquos Ordines, ac etiam Presbyteratum etiam una die de mandato sua Sanctitatis, prout fuit, aliis autem tribus sua Sanctitas daret in Capella secreta, quod fecit in die Conceptionis B. Mariæ, præsentibus multis Palatinis secretis, prout ad longum in Libello Burchardi scriptum est, exceptis nonnullis levitatibus, quas ego prætermisi, ut ibi notavi. Postea consecravit eundem Cardinalem die S. Lucie, ut jam scripsi. Hos autem tres simul cum Cardinali Gurcensi ordinavit hodie qui est Sabbato quatuor Temporum decima septima mensis Decembris, & quia non videbatur convenienter, ut illum insigniret Minoribus Ordinibus in publico, suavisimus, quod similiter in Capella sua, paucis præsentibus, ordinaret, prout fecit, & etiam ibidem postea legit Psalmos cum orationibus paramentorum, & induit calciamenta, & venit ad locum, ubi in die S. Lucie consecravit illam, & ibi indutus de toto, sicut tunc, dixit Missam de Feria ad longum, & paramenta ejus fuerunt violacea, super quo etiam dubitavi, an potius deberent esse alba. Duo Diaconi Cardinales cum Planeta replicata cum uno Presbytero in Pluviali astiterunt; ipsi autem quatuor ordinandi fuerunt in albis subcinctis, & cum Mitris venerunt ante Altare genuflexi super cusinis, & habentes ante se scabella, sed opportune deponebant Mitras. Addit, Ordinationem ipsam peractam fuisse juxta præscriptum Pontificalis, sed tamen, uti mox subdit, nullus eorum legit Epistolam, nec Evangelium. Post offer-*

feretorium obtulerunt porcias, panes, & barilia vini scilicet, & fuerunt communicati, ac biberunt de Calice alio vinum, quod Diaconus assistens subministravit. Ultimo post Missam dixerunt Papa sedenti in Sede, Ad multos annos, ver cum Mitris sine Baculo, & demum deposita Mitra osculati sunt pedem, manum, & faciem Papæ.

III. Hactenus Paris de Grassis. Ceterum, quod Ordinationem Diaconi Cardinalis spectat fieri solitam olim a Papa, lubet & hoc loco describere, quod de ipsa Ordinatione tradit Romanus Ordo XIV, Cap. ciii. Die Sabbati in quatuor Temporibus Dominus Papa veniet ad Ecclesiam. Fit reverentia more solito, quam faciet Ordinandus cum aliis, si velit, & statim secedit ad partem, ubi suo tempore paramenta recipiet, & dicitur Tertia, Sexta, & Nona, Paratus Dominus Papa quadragesimalibus, progreditur versus Altare. Fit reverentia trium Presbyterorum ad osculum & ad pectus. Dicitur Introibo &c. ingreditur ad Altare; fit reverentia Diaconorum ad osculum, & ad pectus, Missa procedit suo ordine usque ad ultimum versum Tractus, in qua Missa sunt quinque Prophetiæ, & in qualibet dicitur, *Flectamus genua. Levate.* Ante ultimum versum Tractus, Ordinandus in Diaconum Cardinalem paratus more Subdiaconi, videlicet cum (1) scuta Cotta, parvo Amictu ad scapulas, Camiso, seu Alba, Cinctorio, seu Manipulo, Dalmatica vero, & super eam Stolum (2) sex manus & brachia portans a Priore Diaconorum, & alter Diaconus Cardinalis ducitur sine Mitra usque ad præsentiam Papæ, coram quo genuflectitur. Tunc Prior Diaconorum dicit: *Postulat mater Ecclesia Catholica, ut hunc præsentem Patrem Reverendum Dominum N. Subdiaconum, & Sanctæ Romanæ Ecclesiæ Cardinalem ad onus Diaconi ordinetis.* Papa cum Mitra: *Scitis, illum dignum esse?* Respondet offerens: *Quantum humana fragilitas esse sinit, & scio, & testificor, illum dignum esse ad hujus onus officii.* Papa sedendo cum Mitra dicit: *Diaconum oportet offerre &c.* Ordinando genuflexo, Tunc Papa legendo, & sedendo cum Mitra, dicit: *Auxiliante Deo &c.* Fiat Letania, Papa recumbente cum Mitra super Faldistorio, & Ordinando prostrato ante Altare, Dalmatica cum Stola interim, si velit, assignata alicui, Qua completa, Papa revertitur ad Sedem. Ordinandus stet ante faciem ejus reverenter. Papa stans cum Mitra dicit: *Commune votum &c.* Deinde Papa, Ordinando stante inclinato ante ipsum, dicat in modum Præfationis: *Oremus dilectissimi &c.* Papa dicit: *Oremus.* Diaconus dicit: *Flectamus genua.* Diaconus a sinistris: *Levate* Papa dicit: *Adesto quæsumus &c.* per modum Præfationis, licet aliqui dicant legendo, Qua completa, solus Papa ponat manum suam super caput Ordinandi, dicens cum Mitra: *Emitte &c.*

IV. Ad consummandum Diaconi Officium Dominus Papa accipiens Stolum, quam Ordinandus super Dalmaticam tenebat, dicat sine nota: *Accipe Stolum &c.* quam super humerum Ordinandi ponit, & a sinistris sub latere dextro circumdata ligatur. Deinde Dominus Papa dat Librum Evangeliorum in manibus Or-

dinandi, dicens sine nota: *Accipe potestatem &c.* Deinde dat benedictionem, seu Orationem, dicens cum nota: *Exaudi Domine &c.* Consequenter facta præfata oratione, Cardinalis tunc Ordinatus induitur a Ministris Tunicella alba, & statim idem Ordinandus Dalmatica alba induatur, Papa tangente ipsam Dalmaticam super humerum, & dicente sibi sine nota: *Induat te Dominus vestimento &c.* Ultimo Ordinatus osculetur pedem Domini Papæ, & Papa recipit eum ad osculum, Ordinatus vero statim recipitur ad osculum ab omnibus Diaconibus Cardinalibus, & etiam ab omnibus Episcopis, & Presbyteris Cardinalibus. Quibus factis, accipit Manipulum in armilla sinistra super Tunicellam, & Mitram in capite; vadit deposita Mitra ad reverentiam Domini Papæ more consueto; genuflectit etiam coram Altari, dicens basse: *Munda cor meum &c.* recipit Librum Evangeliorum de Altari, petit inclinato capite benedictionem a Domino Papa, dicens basse, *Sube Domne benedicere;* & recepta benedictione, vadit cum Libro ad pulpitum, & incipiens, dicit: *Dominus vobiscum. Et cum spiritu tuo, Sequentia Sancti Evangelii &c.* signando Librum, & se. *Gloria tibi Domine. In illo tempore &c.* Dicto Evangelio, osculetur principium dicti Evangelii, in cetero vero ministret ut Diaconus, & faciat quæ incumbunt. Dum dicitur Offertorium, offerat more consueto duos torticios magnos accensos, duos panes, & duas amphoras vini, & offerendo singula, manum Papæ osculetur. Papa vero oblata leviter tangit. In Oratione super populum Papa dicit: *Oremus.* Diaconus ordinatus dicit: *Humiliate capita vestra Deo.* In fine, completa oratione Missæ, Diaconus ordinatus dicit: *Benedicamus Domino,* versa facie ad Altare. Papa dicit: *Sit Nomen Domini benedictum &c.* Diaconus ordinatus stans in dextro cornu Altaris sine Mitra, dicit ter: *Multos annos,* qualibet vice altius, & qualibet vice genuflectendo coram Papa stante cum Mitra, In fine ordinatus osculetur pedem Papæ, & recipitur ad osculum a Papa.

V. Atquæ hæc sunt, quæ de Ordinatione Diaconi Cardinalis edicit memoratus Romanus Ordo XIV, Cap. ciii. apud Mabillonium Tomo II. Musei Italici, in eoque plures peculiare ritus in ipsa Ordinatione fieri olim solita a Papa curiosus Lector notabit. Ceterum ut Papa dederit quatuor minores Ordines tribus Cardinalibus die VII, Decembris anno MDXIII. exponit in suo ms. Diario Grassus, sic inquit; *Die S. Nicolai Confessoris Papa, finita parva Missa in sua Capella, per ordinarium Capellanum dicta, accepit Stolum, sedensque in Sede apud Altare contulit quatuor Minores Ordines suis novitiis tribus Cardinalibus, videlicet, de Medicis, de Bibiena, de Cibo; qui super Rochettis induerunt Superpellicea, & habuerunt singuli candelam albam auro laboratam in manu; & Papa, prætermisiss monitionibus omnibus, quæ solent in aliorum Ordinationibus dici, venit ad factum, videlicet dicens; Hoc agite &c. Similiter fecit in collatione Lectoris, & Exorcistæ, & Acolythatus, & dedit insignia omnia præter campanellam, & clausuram ostii, quæ mihi visa sunt actu levia, & Papa etiam*

sic

(1) Vestis Ecclesiastica species, de qua loquitur idem Romanus Ordo Cap. xcii. (2) Forte legendum, ut notat Mabillonius. per manus, & brachia portatus a Priore Diaconorum, & altero Diacone Cardinali.

se censuit, in persona Cardinalium omitti debere &c. Addit & alia idem Apostolicus Cæ-

remoriarius Grassus, quæ non opus est hoc loco referre,

§. XXI.

Quod apud Altare S. Petri solus Papa consecratur, & de Cardinalium indumentis Papa celebrante, antequam illi essent ordinati.

Et nota, quod secundum institutionem Gregorii Primi, hujusmodi Consecrationes non debent fieri apud Altare S. Petri, quia ibi solus Romanus Pontifex consecratur. Quando Papa aliquos vult ordinare publice in S. Petro, consuevit actus Ordinationis, & Consecrationis facere in Capella S. Andreæ, vel alia, & reliquum Missæ finire ad Altare S. Petri. Et adverte, quod Cardinales, si Papa celebraret publice, antequam illi essent ordinati, in suo Ordine non essent cum paramentis, sed cum suis Cappis laneis, & sederent ultimi post paratos in suo Ordine.

COMMENTARIUS.

I. **E**ste antiquum ritum, & quidem a Sancto Gregorio 1. institutum, ut solus Romanus Pontifex apud Altare S. Petri consecratur, alii vero in Capella S. Andreæ, ubi scilicet ab ipso Papa Ordinationem acciperent, edicit quidem hic noster §. qui quidem concinit præscripto veterum Ordinum Romanorum, inter quos Ordo XI. scriptus ante annum MCXLIII. ut notat ibidem Mabillonius, ubi agit de Sabbato quatuor Temporum mensis Decembris, hæc habet: *Sabbato Statio ad S. Petrum, ubi debet Ordinatio fieri a Pontifice, & celebrare Missam. Dum vero cantatur Officium celeberrime a Schola, & Hymnus trium puerorum: Benedicite omnia opera Domini Domino, descendit Pontifex ab Altari, & vadit ad S. Andreæ. Ibi facit Consecrationem, Facta Consecratione, revertitur ad Altare; quia ad hoc Altare, nempe S. Petri, nulla Consecratio debet fieri, nisi de Romano Pontifice. Et sic in omnibus quatuor Temporibus debet fieri.* Porro agit de prærogativa Altaris S. Petri Romanus Canonicus in descriptione Basilicæ Vaticanæ, sicque ad rem nostram ait Num, xxxvii, *Et quoniam B. Petrus fuit Princeps, & Caput omnium Apostolorum, dicente Domino, Tu es Petrus, & super hanc petram ædificabo Ecclesiam meam;*

& tu vocaberis Cephass, idest Caput, quadam prærogativa, nullus Patriarcha, nullus Archiepiscopus, nullus Episcopus, sive Sacerdos ad Sacrosanctum Altare ejusdem Apostoli consecratur, nisi tantum Successor ejus Romanus Pontifex.

II. Quantum ad Cardinalium habitum, ubi scilicet Papa celebraret publice, ait quidem & hic noster §. quod *antequam illi essent ordinati, in suo ordine non essent cum paramentis, sed cum suis Cappis laneis, & sederent ultimi post paratos in suo ordine.* Atque hic est antiquus ritus, quem plenius describunt Romanus Ordo xiv. Cap. cxvi, & Cæremonialis ms. Davantriæ Codex, qui ita ad rem inquirunt: *Notandum, quod quando Cardinalis, qui creatur per Papam in Presbyterum, vel Diaconum Cardinalem, non est Presbyter, vel Diaconus, si sit in Presbyterum electus, non portat in Vesperis, vel in Missa, quas Papa solemniter facit, & dicit, paramenta, quæ alii Cardinales antiqui portant tunc temporis, quousque de manibus Papæ receperit Ordinem Presbyteri; & si sit in Diaconum electus, ita non portat paramenta Diaconi, quousque de manibus Papæ receperit Ordinem Diaconatus, sed stat ultimus inter Cardinales gradus sui indutus Cappa de scarleto,*

§. XXII.

De novo Cardinali veniente ad Curiam sine Galero.

Novus Cardinalis die, quo perveniet ad Urbem, in qua est Pontifex, quiescit in aliquo loco circa portam Urbis intra, vel extra, secundum commoditatem locorum, ut Romæ apud S. Mariam de populo venientes per Tusciam, sive per viam Flaminiam, vel apud Lateranum venientes per Appiam, sive Latinam; & illo die, non vadunt ei obviam aliqui Cardinales, neque eorum familiæ; & cum est per unum miliare prope Civitatem, dimisso pallio itinerario, induit Cappam Cardinalarem, & Galerum nigrum secundum suam pristinam dignitatem; & illa nocte, ubi quiescit, summo mane ornetur ibi aliquis locus honestus, & capax, in quo Cardinales congregentur, expectantes adventum aliorum; & novus ponat aliquos ex suis, qui speculentur, quando Cardinales adveniunt, & sibi renuncient, ut in tempore possit eis occurrere. Cum vero Cardinales venerint, unus, vel plures, novus cum sua Cappa obviet eis in introitu loci, & reverenter, atque benigne eos excipiat, & ponat omnes ad dexteram suam, & eos honoret, tamquam si esset in domo sua; ducatque illos in locum præparatum, ubi debent alios expectare, & ipse sedeat semper

per ultimus; & sic unicuique venienti obviam ibit, & deducat ad alios. Cum vero omnes convenerint, discedant ad equitandum, & ipse cum suo Galero nigro equitabit medius inter duos antiquiores Diaconos in ultimis. Qui antequam perveniant ad Palatium, illi duo antiquiores Diaconi, dimisso novo Cardinali in medio aliorum duorum post eos Seniores, perveniunt ad Pontificem, & illum induunt Amictu, Alba, Cingulo, Pluviali rubeo, & Mitra pretiosis. Cum vero alii Cardinales perveniunt ad Palatium, descendunt ex equis, & omnes per ordinem ascendent Palatium, & novum Cardinalem dimittunt in aliqua Capella, sive Camera ad hoc parata cum duobus junioribus Diaconis Cardinalibus, & ipsi vadunt ad Summum Pontificem, qui paratus, ut diximus, præcedente Cruce, exit ad publicum Consistorium. Sedent omnes in locis suis, & fit reverentia a Cardinalibus præsentibus. Deinde Advocatus Consistorialis proponit aliquam causam. Interim tempore congruo duo antiquiores Diaconi vadunt ad locum, ubi expectat novus Cardinalis, & illi duo, qui erant, veniunt ad Consistorium, & facta ex more reverentia Pontifici, sedent in locis suis. Post paululum venit novus Cardinalis medius inter duos Diaconos, & cum venerit in conspectu Pontificis, profunde caput inclinet ante Pontificem simul cum suis ductoribus, quorum gestus animadvertit, & imitatur. Deinde præcedentem priorem Diaconum sequatur, & iterum ante gradum primum Sedis Pontificalis simul cum ductoribus Pontificem veneretur; & ascendens gradus genuflectat ad pedes Pontificis, osculetur pedem, & manum, & a Pontifice sublevetur, & ad osculum oris recipiatur. Tum a supradictis Diaconis ducitur ad osculum omnium Cardinalium præsentium per ordinem, & in fine ipsos Diaconos stantes in suis locis osculetur; & mox a Ministro Cæremoniarum ducitur ad locum, qui ei competit secundum ordinem pronuntiationis suæ, cum fuit assumptus in Cardinalem, & reliquis sedentibus, sedet & ipse. Advocatus autem prosequitur suam causam. Finita causa, surgunt omnes Cardinales, & ordinate vadunt ad parvam Capellam, seu ad Altare ad hoc paratum, præcedentibus Cantoribus cantantibus *Te Deum laudamus*. Duo vero antiquiores Diaconi vadunt ad assistentiam Summi Pontificis, & ducitur novus Cardinalis ad Altare, ubi prostratus orat. Dicuntur versiculi, & orationes per primum Cardinalem, reducit ad pedes Sanctissimi Domini nostri, accipit Galerum de manu Pontificis, & deducitur ab aliis Cardinalibus domum suam; & omnia fiunt, sicut diximus, quando datur Galerus præsentibus; visitat, & visitatur. Demum in primo Consistorio imponitur ei silentium, & in secundo, aut tertio, aperitur sibi os, & fit mentio, ut de aliis supradictum est.

COMMENTARIUS.

I. Am alibi docuimus, & quidem ex veterum Cæremonialium Pontificiorum præscripto, Galerum Cardinalitium non solemitti ad Cardinales recens creatos, nisi hi essent ex Summorum Principum genere orti; aut ob aliam rationabilem causam, quam recenset Romanus Ordo XIV. Cap. CXVI. cujus hæc sunt verba: *Regulariter autem Cardinali novo absenti Capellus rubeus per Dominum Papam non mittitur. Interdum tamen de gratia speciali mitti ei per Dominum Papam consuevit, quando antea missus Legatus, vel Nuncius per eum fuerat pro pace inter Reges, vel Regem, & Principes tractanda, ac etiam consummanda, ad finem quod ipse Cardinalis per ipsos in majori reverentia habeatur, & ex hoc ad pacem melius, & facilius inducatur.* Hoc notato, qui ritus servandus sit, ubi novus Cardinalis venit ad Urbem, nondum Galero accepto, & ut excipiendus sit extra Urbem a Collegio Cardinalium, docet hic noster §. juxta cujus præscriptum complures Cardinales fuerunt excepti, quos recensent Grassus, Mucantius, & alii Cæremoniarum in suis mss. Diariis. Sed his omis, abs re non erit ritum antiquiorem referre, quem eam in rem recenset laudatus Ordo XIV. Romanus, estque hujusmodi.

II. Sciendum, quod quando creatur Cardinalis novus aliquis, qui est extra Curiam, & fuit creatus cum aliis in Curia Romana præsentibus, die, qua intrare debet Curiam, omnes Cardinales, & Camerarius Papæ cum Clericis Camerae, & servientibus armorum ejusdem Domini Papæ, exeunt sibi obviam extra Villam, & in obviatione Cardinalis, alii amotis Capellis, & biretis, recipiunt ipsum ad osculum; quo facto, retrocedentes vadunt ad Consistorium, duobus tantum Diaconibus Cardinalibus junioribus cum ipso Cardinali novo remanentibus, & eum associantibus usque ad Aulam, ubi Papa tenet Consistorium. Et cum illuc pervenerit, & postea Dominus Papa de Camera sua ad Consistorium venerit, antiqui Cardinales præter duos Diaconos Cardinales juniores cum novo Cardinali extra Consistorium in fine Aulæ, ubi tenetur Consistorium, remanentes, faciunt reverentiam more solito Domino Papæ; qua facta, duo antiquiores Diaconi occurrentes, novum Cardinalem in introitu Consistorii recipiunt; & prædicti duo Diaconi Cardinales juniores, qui eum associaverunt, eum dimittunt, & accedunt ad reverentiam solitam faciendam; & ea facta redeunt ad sedendum in Consistorio in locis consuetis. Postea eum dicti duo antiquiores Diaconi

ni Cardinales deducunt ad Dominum Papam, qui eum ad osculum pedis, & postmodum oris recipit. Deinde iidem duo Diaconi Cardinales antiquiores eum ducunt ad sedem debitam, per Dominum Papam sibi secundum suæ creationis gradum & ordinem assignatam.

III. Postquam omnibus Cardinalibus sedentibus, ceteris repulsis aliis, Dominus Papa, allocutione, & collatione aliquolibet, ut est moris, factis ad instructionem ipsius, ut supra de Cardinalibus præsentibus in Curia Romana noviter creatis recitatum est, silentium novo Cardinali imponit, quousque de consilio aliorum Cardinalium os ei duxerit aperiri. Subsequently Dominus Papa cum omnibus Cardinalibus, cum fuerit tempus recedendi, dat in Camera sedendo novo Cardinali Capellum rubeum, vel ante prandium, si non esset in statu illa die solemne prandium faciendi. Reliqua vero debent per Dominum Papam in apertione oris, & datione Tituli, & Anuli, dici, fieri, & servari isti novo Cardinali, & per eundem Cardinalem in visitatione, & aliis præmissis per eum faciendis, prout in Cardinalibus novis creatis in Curia præsentibus, eis per Dominum Papam, & per eos dici, fieri, & servari, est superius recitatum.

IV. Dari consueviffe a Pontifice novis Cardinalibus ad Urbem venientibus Pileum rubeum in Consistorio, docent nos passim & Cæremoniales Codices, & mss. Cæremoniariorum Apostolicorum Diaria. Thomam Bononiensem Antistitem ex Germania reducem *Presbyterum Cardinalem Tituli S. Sussannæ xvij. Kal. Januarii* anno MCDXLVI. creatum ab Eugenio IV. eique ad Portam Flaminiam rubeum Galerum obviam missum, scribit quidem Sigonius, *De Episcopis Bononiensibus*, pag. 187. quod quidem ex Platina hausit, & ex eo alii apud Raynaldum ad ipsum annum MCDXLVI. Num. IV. & seq. Sed falsum profecto est, quod rubeus Galerum ipsi Thomæ missus obviam sit. De die creationis Cardinalium, ac de ritu, quo Thomas, & Joannes Carvajalius, qui una cum ipso Legatus de latere in Germania fuerat, audiendus est Jacobus Rodulphi Sacri Collegii Clericus in Diario Consistoriali Eugenii IV. apud eruditum Georgium in Vita Nicolai V. ad annum MCDXLVII. Num. XXVIII. Anno, inquit, a Nativitate Domini MCDXLVI. Pontificatus Domini Eugenii Papæ IV. anno XVI. die vero XV. mensis Decembris Quatuor Temporum fuerunt creati in S. R. E. Cardinales per eundem Reverendissimi in Christo Patres, Domini Henricus Archiepiscopus Mediolanensis, Thomas Episcopus Bononiensis absens, Joannes Episcopus Placentinus etiam absens, & Joannes Abbas Monasterii S. Pauli extra muros Urbis.

Tum vero mox ita ad rem nostram subjicit; Anno prædicto die Veneris XXIII. Mensis Decembris Reverendissimi in Christo Patres, Domini Thomas Episcopus Bononiensis, & Joannes Placentinus Episcopus intraverunt Urbem sine Capello, associati a quatuordecim Cardinalibus usque ad Palatium Domini nostri Papæ, & ibidem in Consistorio generali recepti fuerunt in S. R. E. Cardinales, & dati sunt eis Capelli Cardinalatus, necnon Tituli assignati, videlicet, Bononiensi Titulus S. Sussannæ, & Placentino S. Angeli Diaconia, & iterum reducti ad habitationes eorum per prædictos Dominos Cardinales. Habentur etiam ipsius Eugenii IV. Litteræ die XVI. Decembris anni MCDXLVI. datæ, quibus eidem Thomæ in Cardinalium Senatum adscito, retinendi Bononiensem Ecclesiam potestas fit, & Titulus S. Sussannæ assignatur. Ex his autem manifeste apparet, rubeum Galerum obviam eis extra Portam Flaminiam non fuisse missum, imo in Urbem sine eodem ingressos, ac in Consistorio publice eundem Galerum ab Eugenio eis impositum.

V. Ut in Urbem anno Christi MCDL. a Nicolao Papa V. & a Sacro Collegio recepti duo novi Cardinales fuerint, Nicolaus de Cusa, & Petrus Episcopus Augustanus, docet ex antiquis monumentis eruditus Georgius in Vita ejusdem Nicolai V. Papæ ad ipsum annum MCDL. Num. III. Initio hujus anni, inquit, & quidem die Dominica, mensis Januarii XI. die, Nicolaus de Cusa Tituli S. Petri ad Vincula Presbyter Cardinalis e Germania redux in Urbem venit cum Capello nigro, & a Cardinalibus, ut moris est, exceptus, & ab eis ad Pontificis Aedes deductus, rubeo Galero ornatus fuit; die vero Luna XIX. Januarii fuit eidem Cardinali os apertum. Tum vero habet: Anno eodem die XVII. Aprilis in Urbem venit Petrus Episcopus Augustanus Tituli S. Vitalis Presbyter Cardinalis, ab Eugenio IV. die XVII. Decembris creatus, cui ex more Cardinalibus occurrentibus, eumque ad Pontificem deducentibus, datus est Pileus rubeus in Consistorio ab ipso Pontifice, deinde deinde a Purpuratis Patribus deductus; die postmodum XXIV. Aprilis fuit eidem Cardinali os apertum. Duo hæc exempla egregie comprobant varios ritus, quæ in receptione Cardinalium ad Urbem primum venientium ante editionem nostri Cæremonialis servari consueverunt. Variant nonnihil ab antiquis usus recentiores in excipiendis ipsis novis Cardinalibus, uti diu Romæ degens egomet non semel vidi, viderique de ea re possunt recentiores Libri cæremoniales, & Apostolicorum Cæremoniariorum Diaria, in quibus passim fit mentio prædictæ novorum Cardinalium receptionis.

§. XXIII.

De reditu novi Cardinalis cum Galero, sive Legati.

Si autem novus Cardinalis habuit Galerum, sive est Legatus Apostolicus aliquis ille, qui venit, recipitur apud portam, deducitur ad Palatium, & deinde ad Consistorium ad pedes Papæ, ut de novo Cardinale sine Galero diximus; recipitur ad osculum pedis, manus, & oris a Pontifice, & ab omnibus Cardinalibus ad osculum pacis, & tandem ponitur ad sedendum in ordine suo, secundum pronunciationem de ipso factam, si est novus; sive in loco antiquo, si est Legatus; & non ducitur ad Altare.

tare, neque aliquid cantatur, sed finito Consistorio deducitur domum suam ab omnibus; visitat, & visitatur, ut de aliis dictum est superius.

COMMENTARIUS.

I. **N**ihil afferri ad explicandum hunc §. luculentius potest, quam quod ante editionem nostri hujus Cæremonialis præscripsit Ordo Romanus XIV. Cap. CXVIII. apud Mabillonium Tomo II. Musei Italici pag. 440. & sequenti, ubi ita inquit: *Cum autem hujusmodi Legati, vel Nuncii redeunt de Legatione sua, & volunt intrare Curiam, omnes Cardinales de Curia debent exire eis obviam extra Villam, & eosdem Legatos, vel Nuncios expectare in convenienti campo, ut superius in recessu est dictum; & deinde omnes Cardinales cum dictis Legatis, vel Nunciis, debent ascendere Palatium, ubi recipiuntur prædicti Legati, vel Nuncii in Consistorio per dictum Papam ad osculum pedis, & oris; & si non sit, nisi unus Legatus, vel Nuncius, ille associatur a loco, ubi fuit per Cardinales receptus extra Villam usque ad Palatium Papa per duos juniores Diaconos Cardinales. Pergit idem Romanus Ordo, cui & alii mss. Codices Cæremoniales concinunt, ac præsertim ille Davantriæ, & ait: *Si vero sint duo Legati, ipsorum Legatorum, vel Nunciorum prior in ordine Cardinalatus associatur a loco prædicto per alios duos penultimos juniores Diaconos Cardinales, secundum suæ prioritatis ordinem incedendo. Quibus Legatis, vel Nunciis receptis per Papam ad osculum pedis, & oris, vadunt ipsi Legati, vel Nuncii ad sedendum in sede sua secundum ordinem suum; ipsi vero Dia-**

coni Cardinales, qui eosdem Legatos, vel Nuncios associaverint, post eos veniunt ad reverentiam Papæ, prout est fieri consuetum, & deum vadunt ad sedendum in loco suo.

II. Iis residentibus, ex præscripto ejusdem memorati Ordinis XIV. Romani, *Papa recipit aliquod thema, & facit quandam collationem ad commendationem & laudem ipsorum Legatorum, vel Nunciorum, prout videtur Papæ; in qua collatione ipsi Legati, vel Nuncii sedent in locis suis, capitibus omnino discoopertis, etiam absque biretis; & sic est, quandiu laus & commendatio illius collationis ipsis diriguntur per Papam, & ipsa collatione finita, remanent illa die omnes Cardinales ad comedendum cum Papæ. Addit, ipsam collationem fieri per Pontificem solitam in adventu Nunciorum, vel Legatorum, fuisse introductam per Benedictum Papam XII. & observatam per Dominum Clementem VI. temporibus tamen Clementis V. & Joannis XXII. observatam minime fuisse. Ceterum ne quid omitamus de antiquo ritu, quem enarramus, teste eodem Romano Ordine, Nuncii ipsi, vel Legati in primo Consistorio relationem faciebant de gestis per eos in Legationibus suis. Quod quidem intelligitur, si ipsi parati essent in primo Consistorio referre post adventum suum; nam alias si non essent tunc parati, consuevit eis designari per Papam certa dies ad referendum, de gestis scilicet suæ Legationis.*

§. XXIV.

De novo Cardinali, vel Legato redeunte, vacante Sede.

Si vero novus Cardinalis, vel Legatus, redierit ad Curiam, Sede vacante, nullus Cardinalis vadit sibi obviam, quia tunc Collegium tenet quodammodo locum Pontificis, sed cum suis privatis amicis se recipit domum habitationis suæ sine aliis cæremoniis.

COMMENTARIUS.

I. **Q**uanta sit Cardinalium potestas Sede Apostolica vacante, docent nos inter alios Fagnanus in Capite, *Cum olim* XIV. *De majoritate & obedientia*, Cohellius in Notitia Cardinalatus Cap. XIII. & Cardinalis de Luca, Parte II. Relationis Curie Romanæ, Discursu III. ubi etiam Num. XI. affirmat, in novendiali spatio Papæ defuncti magis quam quovis alio tempore elucere Cardinalitiam dignitatem, & quidem non solum ob formam habitus, quia scilicet per Urbem incedunt cum Rochetto discoperto, & Mozzetta, eo modo, quo in signum jurisdictionis incedit Papa per universum Orbem, & Episcopus in propria Diocesi, vel Cardinalis in propria Ecclesia Titulari; verum etiam ob magna obsequia, quæ ab Oratoribus Regum & Principum propriæ domi singulariter recipiunt, atque ubi collegialiter in Sacrario Vaticanæ Basilicæ sunt congregati, Oratores prædictos, aliosque Magnates generosos audiunt, ita summæ Pontificiæ dignitatis

To. I.

imaginem tunc temporis repræsentantes.

II. Hinc recte in hoc nostro §. præscriptum est, ut si novus Cardinalis, vel Legatus, redierit ad Curiam, Sede vacante, nullus Cardinalis procedat ei obviam, ob eam scilicet rationem, quam mox subjicit: *Quia tunc Collegium tenet quodammodo locum Pontificis.* Scitissime inquit, quodammodo, quia nimirum, ut memorati Auctores notarunt, multa sunt, quæ Collegium Cardinalium agere nequit, ipsa Apostolica Sede vacante, adeo ut prædictum Cardinalium Collegium deterioris etiam conditionis sit quam sint inferiora Collegia, in quæ transit jurisdictio, Sede vacante, ut varios Auctores citans tradit idem Fagnanus in citato Capite, *Cum olim, De majoritate &c.* Quicquid sit, quod ait hic noster §. desumptum est quidem ex Ordine Romano XIV. Cap. CXVI. ubi ita legitur: *Item sciendum, quod si vacaret Sedes Apostolica tempore, quo rediret ad Curiam Cardinalis antiquus, sive noviter creatus, qui fuisset Legatus, aut Nuncius,*

Tt

tunc

tunc Cardinales alii, etiamsi non essent in Conclavi pro electione futuri Pontificis, non vadunt

Cardinali obviam venienti; quia Sede vacante personam Papæ quodammodo representant.

DE CONSISTORIO PUBLICO AC LOCO ET ORDINE CONSISTORII.

T I T U L U S IX.

I. **C**onsistorium generaliter sumtum est quivis locus, ubi constituitur. Ita jam pridem pervetustus Auctor Tertullianus in Libro, *De resurrectione carnis*, terram, in qua homines consistimus, Consistorium dixit. Interdum Consistorium locus etiam fuit Cubiculariis potissimum addictus, in quo excubabant potius quam cubabant, quo paratiores essent ad Domini sui præcepta. Ita Monachus Sangallensis Lib. II. *De gestis Caroli Magni*, ait, quosdam Legatos, priusquam ad Imperatoris admitterentur conspectum, *reperisse in Consistorio Cubicularios Imperatoris circa Magistrum suum*. Cum igitur in hisce locis consisterent qui Principis audientiam præstolabantur, ipseque Princeps ex interiori cubiculo in illud exterius progredere-
tur, & veniret, quo supplices audiret, & causas, ac negotia dirimeret subditorum, in eo pro Tribunali sedebat, quin etiam inquirentibus in negotium, & dispicientibus Consistorianis, ut Ammianus Lib. xv. ait. Atque inde Consistorium appellavere generatim locum, in quo Princeps de rebus publicis consultat, ac deliberat cum suis Consistorianis, ut pluribus docet eruditissimus Gothofredus in Notis ad Legem § 11. Libri 1. Ti-

tulo X. Codicis, *De officio omnium Judicum*. Atque hinc postmodum invaluit, ut Cardinalium confessus coram Papa in ejus Palatio per modum Senatus dictus sit Consistorium, atque in ea appellatione hodie sumitur dum de Consistorio Papæ, atque de Beneficiis, & negotiis Consistorialibus sermo incidit.

II. Porro duplex est hodie Consistorium, aliud scilicet extraordinarium, magisque sole-
mne, cui præter Cardinales intersunt alii quoque Prælati, Ministri, ac Principum Oratores, & Magistratus, ac privati viri, sive Clerici, sive laici, qui Papæ præsidenti assistant; quod & publicum dicitur, uti adsciscere licet ex Clementina I. *De jure jurando*, ubi ita Papa Clemens V. inquit: *Præfatis itaque Nunciis in nostra, & Fratrum nostrorum præsentia constitutis, ac secundum dicti tenorem mandati Avenione, ubi tunc eramus cum nostra Curia residentes, in publico Consistorio, in quo erat Prælatorum, & aliorum tam Clericorum, quam laicorum non modica multitudo &c.* Alia species Consistorii est, quod ordinarium vocatur, fitque in forma minus solemni cum solo interventu Cardinalium pro negotiis pertractandis, soletque secretum diei, de quo inferius dicemus.

§. I.

Consistorii publici locus, & ordo, & quæ negotia in eo tractantur.

Quia publicum Consistorium frequenter nominavimus, & in posterum nominaturi sumus, operæ pretium videtur, ordinem, & modum ipsius Consistorii explicare. In Palatio Apostolico apud Sanctum Petrum tres Aulæ sunt Pontificales, quas in Conclavi contineri superius diximus. Prima omnium maxima pro Consistorio publico ornari solet, quando Reges, aut Regii Legati sunt excipiendi. Canonizationum etiam causæ in ea perorantur. In tertia Aula excipiuntur Legationes aliorum Principum, & Rerumpublicarum, cum ad venerandum Summum Pontificem veniunt: publicantur novi Cardinales: excipiuntur Legati Apostolici, quando revertuntur ex suis Legationibus: excipiuntur Cardinales novi venientes ad Romanam Curiam; & agitantur Causæ, quæ publicum Consistorium requirunt. In capite Aulæ erigitur Solum Pontificale, ad quod tribus amplis gradibus ascenditur. Forma Solii erit ferme quadrata, latitudinis in summo plano palmorum duodecim, vel circa; in medio Sedes erit parieti hærens cum magno, & parvo scabello: planum totum cum magno scabello coopertum erit panno coccineo. Sedes vero aureo erit ornata panno, & a pariete, & supra caput pendeat aureus pannus. A dextra infra Solum per viginti palmos, vel circa, sedilia Episcoporum Cardinalium, & Presbyterorum erunt remota a pariete per duos palmos; habebunt reclinatorium, sive postergale altum usque ad spatulas, & gradum altitudinis sex, aut octo digitorum, super quem pedes teneant. Primum sedile erit longitudinis trium cannarum, vel circa, secundum mensuram Romanæ Curia. Huic conjunctum erit secundum sedile duarum cannarum longitudinis in transversum Aulæ ita ut ibi sedentes in faciem Pontificis respiciant. A sinistra Pontificis erit sedile Diaconorum Cardinalium e regione Episcoporum Cardinalium, inter quod, & sedile, quod in transversum porrigitur, erit spatium decem palmorum, aut duodecim, ut sit quodammodo ostium ad ingressum Consistorii. Longitudo sedilis Dia-

conorum erit duarum cannarum cum dimidia, vel circa. Hæc sedilia erunt pariformiter ornata aulæis, & tapetis, & ejusdem altitudinis, & latitudinis, ita ut in nullo differant gradus Solii Pontificalis; & totum spatium, quod sedilibus circumplectitur, pannis viridibus sternitur.

COMMENTARIUS.

I. **C**onsistorium publicum, sive extraordinarium, magisque solemne, uti in præfatione ad hunc Titulum diximus, est illud, quod præter Cardinales, alios admittit Prælatos, & Ministros, ac etiam Principum Oratores, aliosque Magnates; qui in Papæ Solio assistant, uti etiam docet Cardinalis de Luca in Relatione Curiae Romanæ Parte II. Discursu v. Solemne Consistorium ter in hebdomada, tempore Innocentii III. haberi solitum, fuisse, docent nos ejusdem Pontificis Acta ex editione Bosqueti pag. 28. ubi ita legimus: *Ter in hebdomada solemne Consistorium, quod in consuetudinem jam devenerat, publice celebrabat, in quo auditis querimoniis singulorum, minores causas examinabat per se tam subtiliter & prudenter, ut omnes super ipsius subtilitate, & prudentia mirarentur.* Hodie vero illud rarius habetur, ad Papæ beneplacitum, prout negotiorum urgentia exigit, inquit laudatus Cardinalis de Luca, qui etiam mox subdit, pro frequentiore praxi bis in mense illud celebrari, diemque ordinariam esse Feriam secundam de mane, quamvis aliquando alia etiam die habeatur, quia hoc a Pontificis dependet arbitrio.

II. Resoluta ergo a Pontifice Consistorii incertum diem, horam, & locum, indictione, & Cardinalibus in Curia præsentibus die præcedente insinuata, *singuli Cardinales cum solemnibus comitatu, & obsequio ad illud accedunt more Regio, adeo ut in hac functione, uti notat de Luca, magis quam in aliis Romana Curia majestas videatur elucere, atque ita verificari id, quod antiqui Scriptores de profana triumphantis Romanae Reipublicæ Senatoribus dicere solent, ut scilicet tot Reges reputari mereantur.* Congregatis Cardinalibus, Papa in Solio Pontificali, ad quod tribus amplis gradibus ascenditur, ut ait hic noster §. in Sede aliquantulum elevata sedente, atque adhuc januis apertis, patenteque omnibus Nobilibus qualificatis Viris, ac Prælatibus, aditu, singulis Cardinalibus petentibus præstatur ab ipso Pontifice auricularis audientia super propriis, vel Principum, aut amicorum, vel familiarium precibus, aliisque negotiis. Hac autem privata audientia pro Papæ beneplacito absoluta, omnes a loco Consistorii ejiciuntur, solis Cardinalibus cum Papa remanentibus, atque tunc negotia Consistorialia tractari incipiunt. Porro tempore Innocentii III. causas minores in Consistorio, auditis utrisque partibus, per Pontificem decisas fuisse, Acta hujus Pontificis superius relata evincunt, notatque idem laudatus Cardinalis de Luca loco jam citato, non ita pridem Consistorium haberi solitum fuisse pro brevioribus causis in forma contentiosa etiam cum interventu Procuratorum, & Advocatorum utriusque partis decidendis per Pontificem cum voto Cardinalium; atque ex hujusmodi decisionibus aliqua

pars Canonum registratorum in quinque Libris Decretalium, est desumpta. Negotia vero, quæ hodie in Consistorio explicantur, teste eodem Auctore Cardinale de Luca, forenses, & contentiosas formam amplius non habent, sed solum gratiosas, vel politicam, ut Principis supremum Senatum decet.

III. Supervacaneum est explicare & hoc loco alias Consistoriales functiones in nostro hoc §. notatas, cum jam de eisdem abunde suis locis dixerimus. Ut autem aliquid de loco dicamus, ubi Consistorium haberi consuevit, ex præscripto nostri §. prima trium Aularum, & omnium maxima, quæ sunt in Palatio Vaticano, pro Consistorio publice ornari solet &c. Habent hæc quidem locum, ubi Papa Romæ degit, si enim alibi maneret, Consistorium semper in Domo illius fieret. Imo teste Auctore Commentariorum Pii II. Lib. ix. commemorans aliquando Pius in Agro Senensi, Consistorium non semel in Silva fecit: *Fiebat, ait, & aliquando cum Cardinalibus sub Castaneis Consistorium, & Legationes in pratis audiebantur. Vexabatur quotidie per silvas Pontifex, & sequentibus Curialibus inter eundem privata simul, & publica absolvebat negotia.* De loco Consistorii, ejusque ornatu jam multa adnotarunt Cæremoniarii Apostolici in suis ms. Diariis, in quibus etiam negotia narrant, quæ in eodem tractari solebant.

IV. Sed his omissis, unum est, quod hic omitti nullatenus existimamus, quod nempe tradit in suo ms. Diario Paris de Grassis anno Christi MDXXI. Leonis Papæ X. anno VIII. Cum enim tunc temporis quæreretur a quibusdam, an conveniret majestati Sedis Apostolicæ, quod in publicis Consistoriis, & Congregationibus, & similibus actibus Papa respondere debeat per se ipsum personaliter loquendo Oratoribus Principum proponentibus, an vero quod Papa faciat, sicut alii Principes respondere soliti per Interpretes. Ait Grassus, se de hac quæstione interrogatum, respondisse, quod judicio suo laudabiliter fieret, si Principi per se ipsum personaliter proponenti Papa similiter per se ipsum personaliter respondeat: Oratori vero Principis proponenti similiter non per se ipsum Papa, sed per Interpretem suum, sive Secretarium, sive quemvis alium quasi Oratorem respondeat: qui mos servatur ab omnibus aliis Principibus adversus quoscunque etiam Oratores Apostolicos, & Legatos Papales. Addit mox, hoc suum judicium ipsi Pontifici Leoni X. minime displicuisse, quia in veritate majestati Sedis Apostolicæ sic convenire videtur, præsertim quia in maximo periculo constituitur quisque Papa responsurus personaliter; nam si Papa bene dicit, facit procul dubio debitum suum; si autem in uno verbo solum inter orandum deficiat, vituperium ingeritur, & Papa quodammodo deridetur, & Majestas sua diminuitur, sicut aliquando contigit;

tigit; & sic contigit Paulo Secundo, qui in creatione Ducis Ferrariæ dixit: *Aggregamus eum aliorum Ducum*; & sicut etiam vidimus Innocentium VIII. nam ipse numquam publice dixit aliquid, quin in parte, vel in toto defecerit, cum risu totius Senatus, & Curia. Fortasse lapsus lingue fuit, ubi Paulus II. Pontifex dixit: *Aggregamus eum aliorum Ducum*; nuperus siquidem Auctor vindiciarum, quas præfixit Vitæ ipsius Pauli ex Codice Angelicæ Bibliothecæ desumptæ, editæ Romæ anno MDCCXI. pluribus conatur ostendere, fuisse ipsum Pontificem eximium litterarum cultorem. Est laudatus Auctor vindiciarum, doctrina, ac dignitate eminentissimus Angelus S. R. E. Cardinalis Quirinus.

V. Quicquid autem de his sit, assert mox Grassus in suæ confirmationem sententiæ duo alia exempla, alterum nempe Alexandri VI. alterum Julii II. *Vidimus*, inquit, *Alexandrum VI. qui in Consistorio publico ut vidit, quod Succinus tam magnus Orator defecit inter orandum, Papa Alexander volens quodammodo supplere defectum illius, animose incæpit orare, & respondit ad aliqua, quæ fuerunt per illum oblata, & non proposita. Quæ Papa cum ipse audisset, voluit seipsum corrigere, & non ita potuit, aut scivit, ut non cespitaverit, aut balbutierit. De Julio II. deinde subjicit, quod ipse ita timide dicebat, sicut puer sub disciplina Pedagogi tremebundus facere solet, & aliquando verba imperfecta, aut bis, & tertio eadem repetita corripbat, quod erat valde inconveniens. Concludit Grassus, quod, ut tanta indecentia de cetero evitaretur, non disconvenire videretur, si modus supradictus introduceretur, maxime quia, quod dicunt multi, quod iste modus re-*

spondendi per se ipsum, non antiquus est, sed tantum a Pio Secundo introductus, qui erat Vir eloquentissimus, post quem alii Pontifices in reliquis Pio æquales idem facere voluerunt, prout faciunt, & vere nullus post Pium prædictum ita facunde dicit, sicut nunc Sanctissimus Dominus noster Leo, nempe Decimus ejus nominis, cujus gesta laudatus Grassus in suo memorato ms. Diario describebat.

VI. Fatetur tamen Grassus, sua sententia Leoni ipsi Pontifici, & Cardinalibus proposita in Consistorio, dixisse tandem illi Pontificem, *Patribus non placere, quod usus renovetur, sed quod a Pio II. usque modo servatum fuit, servetur deinceps, & sic Pontifex*, ut idem Grassus tunc Apostolicus Cæremoniarius scribit, *in Consistorio publico per se ipsum respondit Oratori, sive Secretario proponenti.* Laudat rursus Leonem X. facundumque oratorem appellat, ideoque innovatus non fuit tunc usus antiquus. Addit, intellexisse se ab aliquibus Patribus, quod res ista diu multumque inter ipsos discussa fuit, & quasi placuit majori parti, ut illud servaretur, quod ipse proposuerat, propter illud periculum, quod evenire faciliter solet, & potest, ut sæpe in factis evenit. Verum, si unquam abfuit periculum istud, omnino profecto nunc abest, regnante BENEDICTO XIV. cujus tanta est sapientia, facundia, & doctrina, ut ipsi eloquentissimi Principum Oratores, Virique eruditissimi laudato Pontifici loquenti sæpe succumbant. Sed nec puto, omnino credendum Grassus, cum laudati Pontifices, quos ille carpit, ab aliis Auctoribus qui illorum Vitas scripsere, summo opere laudentur ob suam etiam ipsorum facundiam.

§. II.

De habitu, & locis in publico Consistorio.

Pontifex ad publicum Consistorium, ut ad Capellam, procedit, paratus Amictu, Alba, Cingulo, Stola, Pluviali rubro, & Mitra preciosis, Cruce cum Cardinalibus præcedente. Sedet in sua Sede Pontifex. Cardinales facta ex more reverentia omnes in suis sedibus sedent. Diaconi non assistunt postquam fecerint reverentiam. Archiepiscopi, Episcopi, Protonotarii, & omnes Prælati sedent supra tres gradus Solii Pontificalis, & cum eis in ultimo Subdiaconi, Auditores, Clerici Camera, & Acolythi, omnes cum suis Cappis laneis. Curiales togati sedent super terram inter sedilia Cardinalium. Cubicularii, & Secretarii cum capuciis ad collum, in terra inter Prælatos, & Curiales togatos. Si nepotes Pontificis, aut aliqui Magni Principes adfunt, unus, vel duo, non tamen tales, quos sedere deceat in sedili Cardinalium, hi stant juxta Pontificem hinc inde. Oratores Regum, & Principum, & magni Nobiles stant ad dexteram Pontificis inter gradus Solii, & parietes. Familiares Papæ, & Nobiles stant a sinistra inter gradus, & parietes. Advocati Consistoriales stant retro, vel post sedilia Presbyterorum, & Diaconorum Cardinalium. Procuratores Regum, Principum, & Religionum simul cum Procuratore Fiscali stant post sedile Episcoporum Cardinalium inter murum, & sedile; Fiscalis tamen tenet primum locum. Spatium autem inter sedilia Presbyterorum, & Diaconorum Cardinalium servientes armorum observant, tanquam ostium, & aditum Consistorii, & illac, qui ingressuri sunt ad Pontificem, ingrediuntur. Magister sacri Hospitii, quæ dignitas hoc tempore est in nobili Comitum Domo, illic stat ante servientes armorum in fine sedilis Presbyterorum, & in capite sedilis Diaconorum stare debent Clerici Cæremoniarum, ut præsto sint ad exequendum, quæ Pontifex mandaverit, & ordinandum, quæ sunt agenda, Cum autem Consistorium tenebitur pro causis judicialibus tantum, quod fieri con-

consuevit a Pontificibus interdum, cum ob alias causas non tenetur, Advocatus proponens stat post sedile Presbyterorum Cardinalium contra Pontificis faciem, & causam suam exponit, & in fine cedulam suæ supplicationis inter sedentes in terram Curiales projicit, qui illam ad manus Vicecancellarii transmittunt. Siquis est ex aliis Advocatis, qui contradicere velit, & pro adversario respondere, licet. Finita altercatione, Pontifex respondet per verbum *placet*, simpliciter, vel cum limitatione, ut sibi videtur; & Vicecancellarius manu propria signat supplicationem secundum Pontificis responsum, & idem in Libro, quem penes se habet, scribit, nam quidam ex suis apud pedes suos sedens, Librum, & pugillare servat. Expeditis autem causis, surgunt omnes, & duo seniores Diaconi accedunt ad assistentiam Pontificis, qui revertitur ad Cameram eo ordine, quo venerat.

COMMENTARIUS.

I. **C**onsuevisse olim causas in Consistorio forma contentiosa, etiam cum inter-ventu Procuratorum & Advocatorum utriusque partis decidi per Papam cum voto Cardinalium, notat Cardinalis de Luca in Relatione Curiae Romanae, Parte II. Discursu v. de ea-que re diximus nos supra in Commentario ad §. 1. ubi etiam notavimus, negotia, quæ hodie in Consistorio explicantur, forenses, & contentiosam formam amplius non habere, sed solum gratiosam, vel politicam, ut Principis supremum Senatum decet. Porro spectat & hunc nostrum §. eumque egregie illustrat, quod citato loco tradit idem Cardinalis de Luca. Postquam scilicet Cardinales in convenienti numero statuta hora in Aula Consistorii congregati sunt, Cappa magna, Rochetto, & bireto induti, Papa ad suam consuetam sedem aliquantum elatam sub Throno, seu baldachino in habitu privato cum Rochetto scilicet, & Mozzetta, ac bireto Pontificio accedit, ibique, donec omnium Cardinalium accessus sequatur, vel etiam eo sequuto, ad sui placitum, januis adhuc apertis, adeo ut omnibus nobilibus, & qualificatis Viris, ac Prælati, aditus pateat, singulis Cardinalibus petentibus privatam auricularem audientiam præstat super propriis, vel Principum, aut amicorum, vel familiarium precibus, ac instantiis, aliisque negotiis. Atque in hac fun-

ctione præsertim Papæ majestas dignoscitur, quoniam licet Cardinales in præsentia Papæ se-deant in scamno ligneo, cooperto capite cum bireto Cardinalitio; tamen ubi singuli Papam ibi publice alloquuntur, coram eo stant capite discooperto, cum magno obsequio, ac reverentia, quamvis magnorum Principum filii sint, vel Cardinales magnæ existimationis, qui eundem Pontificem in minoribus in suo famulatu, vel obsequio habuerint, ejusque promotores fuerint; ipsaque audientia pro Papæ placito expleta, omnes ab Aula ejiciuntur, solis Cardinalibus cum Papa remanentibus, in proxima Aula solum assistentibus Collegii Secretario, & Clerico, aliisque Ministris, ut vocati promte accurrant, ita tamen ut Consistorii secreta audire non valeant.

II. Hactenus Cardinalis de Luca; ceterum quod Consistorium publicum spectat, de quo loquitur noster §. videre est apud Macrum in suo Hierolexico verbo *Cardinalis*, figuram rotundam ære incisam, ubi conspicitur Pontifex Paulus II. sedere in eminenti Cathedra Pluviali, & Pontificali Tiara, quam Regnum vocant, indutus, hinc vero & inde Cardinalium Senatus, testæ capita habentium non quidem bireto, sed Galero, eodemque prorsus modo, quo nunc in equitatu solemni utuntur. Sed de his & aliis in hoc §. contentis jam alias diximus.

§. III.

De Consistorio secreto.

Secretum Consistorium celebratur in Aula aliqua Palatii Apostolici remotiori, hodie Aulam papagalli appellant. Sedes Pontificalis parieti hæret in medio, surgit a solo sine thalamo, & gradibus; scabellum habet magnum, super quod Pontifex tenet pedes, & aliud parvum, per quod ad majus ascenditur. Scabella pro sedibus Cardinalium ante Pontificem locantur in forma quadrata. A dextra, & a fronte sedent Episcopi, & Presbyteri suo ordine, unus post alium. Prior Episcoporum primus prope Pontificem, deinde alii. A sinistra vero Prior Diaconorum primum juxta Papam obtinet locum; alii deinde sequuntur; ultimus Presbyterorum proximus est ultimo Diaconorum, inter quos nemo Cardinalium sedet. Pontificis Sedes aureo panno est ornata. Scabella Cardinalium nuda sunt, sed picta rubeo colore cum armis Papæ. Locus inter Sedem Papæ, & scabella Cardinalium, tapetis sterni consuevit. Ultimus Diaconorum tintinnabulum, seu campanellam retinet, ut signum faciat custodibus Consistorii, si Pontifex, aut Patres ab eis aliquid velint. In angulis ante faciem Pontificis scabella duo hinc & inde removentur, quoad omnes convenerint; ut inde tanquam per ostia intrent Cardinales ad sedendum; & cum omnes congregati

gati sunt, illa duo scabella restituuntur in locum suum. Pontifex si est pronunciaturus Cardinales, sive Prælatos, consuevit exire paludatus, & Mitratus; in aliis negotiis cum suo Rochetto, & parvo Capucio, quamvis hodie raro nisi in principio Pontificatus exeat cum Pluviali, & Mitra. Alii omnes præter Cardinales excludantur, cum tractare incipiunt Consistorialia. Duo secreti Cubicularii pro foribus excubant cum suis Capuciis super collum inversis, ut præsto sint, si signum fiat. Pontifex negotia incumbentia in Senatu proponat; deinde per ordinem sententias rogat (votum enim suum sententias appellant). Quisque surgens sententiam suam dicit. Deinde Pontifex secundum majoris partis sententiam decernit.

COMMENTARIUS.

I. **Q**uo ordine Cardinales in secreto Consistorio sedeant, docet hic noster §. Constituitur enim Consistorium secretum ex Pontificis præsentia, adstantibus tantummodo S. R. E. Cardinalibus, uti ex nostro Cæremoniali notat Cohellius in sua Cardinalatus Notitia, Cap. xv. Est vero & in hoc Commentario illud notandum, quod quamvis Papa in Cubiculo, vel alibi cum Cardinalibus conveniat, & cum illis loquatur, votumque eorum exquirat, non tamen hic discussa, & pertractata determinationem habere dicuntur; cum proprius Consultationis locus ex antiquo instituto Sacrum Consistorium esse censeatur, tanquam Congregatio Congregationum, ut est doctissimi Cardinalis Paleotti sententia in suo celebri Opere, *De sacri Consistorii Consultationibus*, Parte III. Quæstione III.

II. Antequam vero summatim referam quæ in privatis Consistoriis pertractentur, notandum cenfeo, in ipso Consistorio unamquamque Provinciam, seu Regna, Regesque, & Regularium Ordines fere omnes, habere suos Patres S. R. E. Cardinales, quos Protectores vocant, quorum munus est ad Episcopales, Archiepiscopales, Patriarchales Ecclesias, itemque Monasteria, & Abbatias, quas Consistoriales nuncupant, electos Summo Pontifici, & Purpuratis Patribus proponere, Ecclesiarumque statum, ac prærogativas, & an electio ad Capitulum, Civitatem, Provinciam, Regem, vel alios pertineat, brevi compendio referre; nec omittuntur alia quæcumque ad cultum, Fidem, Religionem, Christiani gregis pacem, atque ad conservandum nedum spiritualis, sed temporalis quoque Romanæ, & universalis Ecclesiæ ditionem pertinent, ut Tholosanus in Syntagma-
te Juris universi, Parte II. Lib. xv. Cap. iv. aliique ab ipso relati testantur.

III. Inter negotia ipsa Consistorii privati, præcipua est novorum Cardinalium creatio, de qua suse diximus supra in Commentariis ad Titulum VII. Juxta receptum morem Papa, vel initio Consistorii, aut frequentius in fine dicit Cardinalibus, quod habent Fratres, atque illos nominando, quos in sacrum Collegium vult cooptare, eos interrogat, quid ipsis videatur, eisque approbantibus, vel laudantibus, fit Decretum promotionis, quæ illico publicatur extra Consistorium; quandoque tamen non exprimendo numerum eorum, qui promoveantur, aliquorum nomina publicare non solet, sed ea, ut dicitur, reservat in pectore. Porro autem tametsi negotia Consistorialia, ut est promotio Cardinalium, proponantur Cardinalibus *Consistorialiter* congregatis, eorumque suffragia per

Papam ibidem præsentem exquirantur, & quidem secundum morem, qui ab aliquot seculis invaluit, ut diximus supra in citatis Commentariis ad Titulum VIII. nihilominus illorum omnium decisio dependet a solo Pontifice, vota-
que Cardinalium reputantur consultiva, quia scilicet certi id juris est, uti alias ostendimus, omnem auctoritatem, & jurisdictionem in solo Romano Pontifice residere, ejusque regimen esse plane Monarchicum. Atque hæc est communis Theologorum, & Canonistarum sententia.

IV. Imperatoris quoque, Regum, aliorumve Principum depositiones, si necessitas postularet, & Imperii, Regnorum, ac Principatum collationes eminentissimus hic Senatus decernit; quæ quidem res, cum gravissimæ sint, & magnam consultationem exigant, iccirco Summi Pontifices, tam magnam agitare molem, & aleam jacere, nisi prius expositis in Consistorio rationibus, & consentientibus Cardinalibus, non assolent, Bellarmino teste, *De potestate Papæ in temporalibus*, Cap. XII. Quod etiam observatum fuisse a Gregorio IX. in depositione Friderici II. Imperatoris, a Paulo III. in Henrici VIII. Angliæ Regis, a Pio V. in Elisabethæ ejusdem Regni occupatricis, ex eorumdem Pontificum Constitutionibus de ea re editis addiscimus, aliaque multa curiosus Lector cognoscet ex Mamfredo, *De Cardinalatu*, Cap. XII. dum agit de vocatione Dominorum S. R. E. Cardinalium per Papam facienda in promotionibus Imperatoris, Regum, aliorumque Principum, atque in illorum privatione, & depositione. Verum si eruditissimum Cardinalem Paleottum in docto Opere, *De sacri Consistorii consultationibus*, quispiam legat, nil ultra de ipso Consistorio, deque rebus ibi tractandis, ac de officio Cardinalium tunc præsertim præstando, inquirendum existimo.

V. Ceterum cum negotiorum gravitas, & multitudo in dies magis magisque ad Apostolicam Sedem devolvantur, solusque Pontifex satis omnibus facere nequeat, & Consistorium semper, omnesque Cardinales simul convocare sit difficile, summa quidem prudentia factum videmus, rerum peragendarum molem in varios, ac inter se distinctos Cardinalium conventus, Congregationes appellant, æqua lance divisam, & juxta cujusque rei indigentiam, assignatam, ita ut Cardinales ipsi non omnes omnibus Congregationibus interfint, sed ut partiti oneris portionem levius ferant, diligentius examinent, Pontificem denique pro suprema manus appositione commodius consulant, certi certis fuerint adlecti, ut notat Cohellius in Notitia Cardinalatus, Cap. xv.

DE

DE PROVISIONE ECCLESIARUM

TITULUS X.

I. **E**st Consistorialis functio, ut inter alios notat Cardinalis de Luca, Parte II. Relationis Romanæ Curiae, Discursu v. Provisio Ecclesiarum Patriarchalium, Metropolitanarum, & Cathedralium, itemque Monasteriorum quorundam Regularium, quæ propterea Consistorialia nuncupantur. Quod primam spectat provisionem, est plane ipsa de duplici specie. Una scilicet Ecclesiarum titularium tantum absque residentia, & administratione, eo quia Diœcesis de facto occupata sit ab infidelibus, schismaticisve. Altera vero, ut dicemus infra in Commentario ad §. I. de Ecclesiis habentibus actualem jurisdictionem, atque administrationem in Diœcesi Catholica. Prima species explicatarum provisionum fit solo nutu, & placito Papæ, cum quandam honorificam præminentiam solum importare videatur, constituendo personam in ordine Pontificali absque alio Pontificalium exercitio, jure proprio, sed solum jure alieno. Unde propterea de consuetudine Curiae receptum est, ut per hujusmodi provisiones non resultet vacatio aliarum Ecclesiarum, vel Beneficiorum incompatibilium, ut in promotis ad Episcopatus actuales absque dispensatione super retentione resultat, ut in beneficiaria materia Scriptores advertunt.

II. Porro provisionem Episcopatum, aliarumque dignitatum pertinuisse jam olim dumtaxat ad Summum Pontificem, ex variis sacris Canonibus probat inter alios Fagnanus in Capite, *Nullus in Ecclesia, De electione &c.* ubi etiam testimonium affert Eugenii Papæ IV. qui in Decretali Epistola, quam scripsit ad Archiepiscopum Cantuariensem, dum Florentiæ præsideret Generali Concilio Florentino, quod nos fusc explicuimus Tomo IV. Commentariorum in Concilia Œcumenica. Sic autem inter alia in ipsa Epistola inquit Eugenius: *Ut Sancti attestantur Patres, omnes Patriarchales, Archiepiscopales, Episcopales, Cathedrales, aliasque dignitates Romana fundavit Ecclesia; sicutque licuit, uni Ecclesiæ amplam, & alii ampliorem, & alii amplissimam, prout expedire judicavit, tradidit potestatem; omnes enim tanquam unius arboris rami ab una eademque radice, & ut diversi aquarum rivuli ab eodem fonte prodierunt, licet unus alio copiosior, atque uberior: Atque hæc fuit vetustiorum Romanorum Pontificum sententia, uti liquet ex Epistola Nicolai Papæ relata a Gratiano in Canone I. Distinctione XXI. Omnes, inquit, sive Patriarcha cujuslibet apicem, sive Metropoleon primatus, aut Episcopatum Cathedras, vel Ecclesiarum, sive cujuscumque Ordinis dignitatem instituit Romana Ecclesia; illam vero solus ipse fundavit,*

& supra petram Fidei mox nascentis erexit, qui Beato Petro aterna vita clavigero terreni simul, & celestis Imperii jura commisit. Legendus est S. Cyprianus, sive Auctor Canonis, qui incipit, *Loquitur Dominus*, apud eundem Gratianum Causa XXIV. Quæstione I.

III. Docet præterea Fagnanus, Romanos ipsos Pontifices postea concessisse, ut in Cathedralibus, & Collegiatis Ecclesiis jus eligendi Prælatum esset penes Capitulum, citatque Canonem, *Congregatio*, Causa XVI. Quæstione ultima, & Decretalem, *Nullus, De electione &c.* Sed addit mox tamen, supervenisse deinde Regulas Cancellariæ, quas Summi Pontifices in crastinum assumptionis suæ facere solent suo tempore duraturas, quibus fere sublata est ipsius Decretalis dispositio præsertim in Italia, & in Hispania, adeo ut multi affirmaverint, titulum electionis hodie recessisse ab aula; nam præter reservationes Cathedralium, & Monasteriorum clausas in Corpore Juris, de quibus agitur in Extravagante, *Ad regimen, De præbendis*; in secunda Cancellariæ Regula Papa sibi reservat generaliter omnes Ecclesias Patriarchales, Primitiales, Archiepiscopales, Episcopales, necnon omnia Monasteria Virorum valorem annum ducentorum florenorum communi æstimatione excedentia, & de his Papa Consistorialiter providet. Atque hæc quidem Consistorialis provisio habet vim electionis, & confirmationis, ut notat Glossa in Cap. I. *De electione &c.* in VI. verbo, *provisionem*.

IV. Crevit sensum magis magisque suprema in Ecclesiam Romani Summi Pontificis potestas, & in Episcopos, quos plurimis ab hinc seculis fere universim confirmare consuevit. Ut enim observat Thomassinus Parte II. Lib. II. Cap. XLIII. alios ab eo contigit confirmari, quod dubium quid esset in eorum causa; alios quod illos nollent sui Metropolitanis confirmare; alios quod aliqua opus haberent dispensatione; alios quod aliqua superanda esset gravis difficultas. Quicquid sit, hodierno illi usui, quo jam a solo Pontifice Romano omnes pene Orbis Christiani Episcopatus dispensantur, & unus ferme ipse prisca omnia obtinet Metropolitanorum jura, potest haud dubie patrocinium ex antiquitate accersiri, ut egregie ostendit laudatus Thomassinus Parte II. Lib. I. Cap. VIII. Num. VII. qui etiam aliis locis fusc demonstrat, hunc usum non sibi ultro sumsisse Pontifices Romanos, sed eo sensim pervenisse, ipsa rerum adductos necessitate. Videtis quæ diximus Tomo I. Cærimonialis Episcoporum in Commentario ad Caput I. & quæ dicemus mox infra in Commentariis nostris ad sequentes Paragraphos præsentis hujus Tituli.

§. I.

De modo promotionis Episcoporum actualium.

Cum autem provisiones Ecclesiarum Pontificalium, sive Monasteriorum occurrunt, Pontifex

tifex committit vivæ vocis oraculo alicui ex Cardinalibus , ut de opportunis legitime se informet , & deinde in secreto Consistorio referat . Cardinalis Commissarius primo diligenter inquit de essentia , qualitate , & regione Ecclesiæ vacantis ; tum de veritate , & modo vacationis ; demum de qualitate , & sufficientia providendi , seu confirmandi . Nam quædam Provinciæ habent privilegium a Sede Apostolica eligendi sibi Prælatos , cum illorum Ecclesiæ , sive Monasteria vacant , & tunc ultra prædicta , diligenter inquiretur , an electio fuerit Canonica , & concorditer facta . Providendus autem ab ipso Pontifice nominatur , sive motu proprio , sive ad petitionem Principum , aut aliorum , & aliquando plures nominantur , & de pluribus exquiritur . Examinantur super præmissis testes medio juramento . Recognoscuntur publica documenta , & aliæ Scripturæ , & conficitur processus ordinarius . Cum placuerit Summo Pontifici , Cardinalis Commissarius in secreto Consistorio refert publice omnia , quæ in processu continentur summarie , & simpliciter , ac dilucide . Processum ipsum in scriptis per Scribam suum redactum secum habens Pontifex , relatione audita , exquirat primo votum Commissarii proponentis , deinde Patrum sententias . Deinde si Sanctitati suæ videtur expedire , pronunciat in hanc formam , remoto e capite bireto , dicens , videlicet : *Auctoritate Omnipotentis Dei , & Beatorum Apostolorum Petri & Pauli , ac nostra , providemus Ecclesiæ Pientinensi de persona dilecti Filii Augustini Patricii Clerici Senensis , præficientes eum illi Ecclesiæ in Episcopum , & Pastorem , curam , & administrationem illius Ecclesiæ in spiritualibus , & temporalibus eidem plenarie committendo . In Nomine Patris , & Filii , & Spiritus Sancti . Amen .* Et sic dicens facit signum Sanctæ Crucis . Si vero electio erit confirmanda , non dicit , *providemus* , sed , *electionem de persona dilecti Filii Alberti electi Argentinæ ad Ecclesiam Argentinam canonice factam confirmamus , & approbamus , præficientes eum illi Ecclesiæ in Episcopum &c.*

COMMENTARIUS.

I. **U**bi agitur de ea provisionis specie , quæ est actualium Episcoporum , tunc prævia respectu Ecclesiarum Italiæ , Insularumque adjacentium , solemnitate examinis , quod primum introduxit Clemens Papa VIII. uti notavimus in Commentariis ad Tomum I. Romani Pontificalis , itemque ad I. Tomum Cæremonialis Episcoporum , sive promovendus electus sit per Papam , sive per Capitulum , aut nominatus per Principem , respective , pro Regionum diversis usibus , coram Cardinali ad id per Papam deputato per Notarium particularem his actibus generaliter designatum , efformatur processus super vita , moribus , legitimis natalibus , ætate , gradu , aliisque necessariis requisitis pro Episcopatu , ac etiam super statu Ecclesiæ : *Cardinalis Commissarius* , inquit noster §. *primo diligenter inquit de essentia , qualitate , & regione Ecclesiæ vacantis ; tum de veritate , & modo vacationis ; demum de qualitate , & sufficientia providendi , seu confirmandi ; nam quædam Provinciæ habent privilegium a Sede Apostolica eligendi sibi Prælatos , cum illorum Ecclesiæ , sive Monasteria vacant .* Varia id genus privilegia , seu Concordata Romanos inter Pontifices , ac Principes , quibus Episcopatum , atque Abbatiarum nominationes sic illis conceduntur , ut electionum confirmatio ad Summum Romanum Pontificem pertineat , recenset inter alios Thomassinus in sua veteri & nova Ecclesiæ disciplina .

II. Quantum ad normam procedendi ad creationem , confirmationemve Episcoporum , ea plane , quæ in hoc §. statuuntur , sacris Canonibus concinunt , novoque robore a Generali Tridentino Concilio munita fuere , ubi Sessione XXIIV. *De reformatione* , Cap. I. sic inter

alia provide statuit: *Omnes inquisitiones, informationes, testimonia, ac probationes, quacumque de promovendi qualitatibus, & Ecclesiæ statu a quibuscumque, etiam in Romana Curia habita, per Cardinalem, qui relationem facturus erit in Consistorio, & alios tres Cardinales diligenter examinentur; ac relatio ipsi Cardinalis relatoris, & trium Cardinalium subscriptione roboratur, in qua ipsi singuli quatuor Cardinales affirmant, se adhibita accurata diligentia invenisse promovendos qualitatibus a Jure, & ab hac Sancta Synodo requisitis præditos; ac certo existimare sub periculo salutis æternæ idoneos esse, qui Ecclesiis præficiantur, ita ut relatione in uno Consistorio facta, quo maturius interea de ipsa inquisitione cognosci possit, in aliud Consistorium judicium differatur, nisi aliud Beatissimo Pontifici videbitur expedire.* Porro post Concilium Tridentinum statuit Clemens Papa VIII. eos qui ordinandi sunt Episcopi in Italia, Insulisque adjacentibus, a delectis ad hoc Cardinalibus, additis simul, qui in Urbe sunt, doctissimis Theologis, & Canonici Juris Consultissimis, diligentibus, atque improvise examine in præsentia Summi Pontificis probari. Atque ita nunc nonnisi bene disertis aditum patere ad Episcopatum scribit Baronius ad annum Christi CCCXCVIII. Quod institutum magno Christianæ Reipublicæ bono alii quoque Pontifices illius Successores postea retinere. Sed de hoc examine videri inter alios possent memoratus Fagnanus in Capite, *Nisi cum pridem, De renunciatione*, & Cardinalis de Luca Parte II. Relationis Romanæ Curiae Discursu XXI.

III. Completo processu, cum placuerit Summo Pontifici, ait noster §. *Cardinalis Commissarius in secreto Consistorio refert publice omnia, quæ*

qua in processu continentur, summarie & simpliciter ac dilucide. Tum paulo post idem §. sub-
jicit: Pontifex relatione audita, exquirat primo
votum Commissarii proponentis, deinde Pa-
trum sententias; deinde si sua sanctitati videtur
expedire, pronunciat in hanc formam, remoto e
capite bireto, dicens &c. Huc facit quod docet
laudatus Cardinalis de Luca citata Parte II. Re-
lationis Romanæ Curiae, in Discursu v. nempe,
quod isto processu completo idem Cardinalis in
primo Consistorio facit Ecclesiae, ac personæ
providendæ præconizationem, tam oretenus in
ipso Consistorio, omnibus Cardinalibus audien-
tibus, quam cum memorialibus, seu brevibus
informationibus antecedenti die transmissis per
manus singulorum Cardinalium super omnibus,
quæ in processu continentur, ac justificata sunt,
ad effectum, ut eo intermedio spatio usque ad
alterum Consistorium, extrajudiciales informa-
tiones per Cardinales haberi valeant super iis,
quæ in contrarium eis obstare possint, atque de
tempore propositionis opponi. In sequenti vero
Consistorio idem Cardinalis proponit Papæ il-
lam personam electam tanquam idoneam, ut eam
Ecclesiae viduatæ præficiat, atque nemine ali-
quid habente in contrarium, Papa desuper in
ipso Consistorio interponit Decretum; ideoque
ex tunc provivus dicitur Episcopus, atque obti-
net ea, quæ sunt jurisdictionis, non autem ea,
quæ sunt Ordinis Pontificalis, pro quibus neces-
saria est Consecratio, de qua nos abunde dixi-
mus Tomo I. Romani Pontificalis in Commen-
tario ad Titulum XIII. Ceterum non est hoc lo-
co omittendum quod idem Cardinalis de Luca
subdit: Optimum quidem nimiumque commenda-
bile est institutum, sed desideranda videretur
aliqua melior ejus praxis, quoniam, ut quan-
doque fert fama, sive vera, sive falsa, citra Pa-
pæ rectam intentionem, sequuntur hujusmodi ele-
ctiones in personis parum dignis, quarum mali
mores, vel alii defectus innotescant; & tamen
ex quadam usu, vel ex alia causa nemo loquitur,
adeo ut istud optimum, nimiumque proficuum
institutum quando præticaretur, ad formalita-
tem redactum videatur.

IV. Quod instructionem spectat de qualita-
tibus promovendi hominis, qui extra Romanam
Curiam degit, ea ex Tridentini Concilii præscri-
pto, & Constitutione Gregorii XIV. edita Idibus
Maji anno MDXCI. sumenda est quidem a Sedis
Apostolicæ Legatis, seu Nunciis Provinciarum,
aut ejus Ordinario, eoque deficiente, sumenda
a vicinioribus Ordinariis, ut in ipsius Concilii
Tridentini Sessione XXI. De reformatione, Cap.
II. videre est, ubi etiam statuitur, ut assumen-
dus ad Ecclesiam Cathedralē, non solum, ata-
te, moribus, & vita, ac aliis, quæ a sacris Ca-
nonibus requiruntur, plene sit præditus, verum
etiam in sacro Ordine antea saltem sex mensium
spatio constitutus. Additque tum paulo post ea-
dem Synodus: Scientia præter hæc ejusmodi pol-
leat, ut muneris sibi injungendi necessitati possit
satisfacere: ideoque antea in Universitate stu-
diorum Magister, sive Doctor, aut Licentiatas
in sacra Theologia, vel jure Canonico merito sit
promotus. aut publico alicujus Academiæ testi-
monio idoneus ad alios docendos ostendatur. Quod
si Regularis fuerit, a Superioribus suæ Religio-
nis similem fidem habeat. Prædicti autem omnes,
unde instructio, seu testificatio erit sumenda,

To. I

hæc fideliter, & gratis referre teneantur: alio-
quin eorum conscientias graviter oneratas esse
scient; ac Deum, & Superiores suos habebunt ul-
tores. Hucusque Tridentinum Concilium, vide-
rique de eadem re potest celeberrima S. Pii V.
Constitutio, quæ incipit, Quamvis, edita an-
no Domini MDLXV. III.

V. Aliæ etiam complures diligentiae, quo
Instructio hujusmodi sincere, & fideliter habe-
atur, præscriptæ sunt ex Decretis Sacræ Congre-
gationis rerum Consistorialium, & præsertim
in Instructione particulari super hoc publicata &
impressa anno MDCXXV. in qua quod pertinet
ad litteraturam, præscriptum est, ut testes in-
terrogentur, an sciant, assumendum aliquo gra-
du in Jure Canonico, vel in sacra Theologia infi-
gnitum esse, quibus in locis, quanto tempore,
& quo fructu ipsi Theologiæ, vel Juri Canonico
operam dederit, & an vere ea doctrina polleat,
quæ in Episcopo requiritur, ad hoc ut possit alios
docere, & quæ sit causa scientiæ. Quod si pro-
movendus nullum habeat gradum, ex parte il-
lius exhibeatur publicum alicujus Academiæ te-
stimonium ad præscriptum Concilii. Ac si ortus
sit in Provinciis, in quibus non sunt Universita-
tes studiorum, neque consuetum est suscipi gra-
dum aliquem, ejusmodi testimonium sumatur ex
Viris gravibus, & sacre Theologiæ, vel Juris
Canonici peritis. Quod si Regularis sit, a suis
Superioribus Regularibus, quorum appellatio-
ne quoad hoc intelliguntur dumtaxat, qui nul-
lum sui Ordinis Superiorem agnoscunt, sive ii
nuncupentur cujusvis Ordinis Abbates, Magi-
stri, Ministri, ac Præpositi Generales, vel qua-
rumlibet Congregationum Præsidentes, sive Di-
finitores, aut Visitatores, Capitulum Generale,
repræsentantes, sive alio quocunque nomine;
& in eorum absentia, ipsorum Vicarii, seu Com-
missarii Generales, vel in Romana Curia Pro-
curatores Generales Ordinum, aut Congrega-
tionum, ut legitur in eadem Instructione. Quæ
cum ita sint, mirum plane videri debet, quod ali-
quando præter Romanorum Pontificum inten-
tionem ad Episcopatus promoveantur, qui pa-
rum idonei sunt, nec mediocri scientia præditi.

VI. Juxta hodiernum styllum, ut paucis mul-
ta concludam, quæ fuse enarrat eruditus Vane-
spen Parte I. Juris Ecclesiastici universi, Titu-
lo XIV. Cap. I. & sequentibus, Cardinalis pro-
ponens, si de Ecclesia spectante ad nominatio-
nem Regis agatur, est Cardinalis protector illius
Regni; tres alii vero Cardinales sunt primus
Cardinalis Episcopus, primus Cardinalis Pres-
byter, & primus Cardinalis Diaconus. In pri-
mo Consistorio fit nuda propositio nominati ad
Ecclesiam vacantem per Cardinalem proponen-
tem, diciturque Præconizatio, resolutione ta-
men dilata in alterum Consistorium, ut interea
Pontifex, & Cardinales de persona promovenda
melius se informare queant. In secundo Consi-
storio idem Cardinalis rursus præsentat promo-
vendum, ac de omnibus, quæ statum Ecclesiæ,
& qualitates promovendi spectant, Pontificem,
& Cardinales informat, vocaturque hæc præsen-
tatio Propositio. Omnibus absolutis, Pontifex
colligit suffragia Cardinalium, & si dicant, no-
minatum esse confirmandum, Pontifex pronun-
ciat in hanc formam, remoto e capite bireto, in-
quit noster §. Auctoritate Dei omnipotentis &c,
Scite vero subdit Vanespen citato loco, Cap. IV.

V u

in

in fine : *Si hæc tam serio, atque exacte observarentur in facienda informatione super moribus, atque confirmatione Nominati, aut Electi ad Cathedralis Ecclesias, quæ a Conciliis, & Romanis Pontificibus ordinata sunt, indubie spes esset, quod sat exacta etiam haberetur de Promovendis notitia*. Tandem ut nihil antiquitatis ignoretur de antiquo ritu servato a Papa in pronuntiatione Prælatorum, lubet hoc loco describere, quod legitur in antiquo Romano Ordine xiv. Auctore Jacobo Gajetano Cap. cii. apud Mabillonium. Tomo II. Musæi Italici pag. 390. his verbis.

VII. Item regulariter quandocumque pronuntiat Prælatos aliquarum Ecclesiarum, maxime si plures pronuntiat, & etiam si unum tantum alicujus solemnæ Ecclesiæ, consuevit exire extra in Consistorio publico, & pronuntiare Prælatos, vel Prælatum promovendos in absentia ipsorum; & facta aliqua commendatione per Papam de Prælati in Promovendorum absentia, postmodum ipsis Promovendis venientibus ad præsentiam Domini, brevibus, & paucis dictis

ipsis Promovendis per Papam, vadunt Promovendi ad pedem Domini, & non ad osculum; & incepto, *Te Deum laudamus*, per aliquem ex Capellanis, Summo Pontifice nihilominus in Sede sua residente, Promoti ducuntur ad Altare, quod ibi paratum est, ante quod debent orare genuflexi, & prostrati, & ducuntur secundum ordinem pronuntiationis suæ singuli a duobus Cardinalibus Diaconibus secundum ordinem suæ prioritatis. Et dicto *Te Deum laudamus*, & postmodum dictis duabus Orationibus cum nota per Priorem ipsorum Cardinalium, qui est ibi, & fusa magis submissa voce benedictione per eum super ipsos, & ipsis electis surgentibus, & deosculantibus Altare, & consequenter ipsis receptis ab omnibus, & singulis Cardinalibus ad osculum, Episcopis primo, Presbyteris secundo, Diaconibus tertio, reducantur a Diaconibus Cardinalibus ordine, ut supra, ad pedes Domini. Qui singuli primo ad pedem, deinde ad osculum Domini Papæ recipiuntur. Post hæc Dominus reingreditur Cameram, si placet.

§. II.

Pronunciandi Abbatis forma.

Auctoritate &c. providemus Monasterio S. Galgani Ordinis Cisterciensis Senensis Diocesis de persona dilecti Filii A. ejusdem Monasterii Monachi professi in Sacerdotio & legitima ætate constituti: præficientes eum illi Monasterio in Abbatem, curam, regimen, & administrationem ipsius Monasterii in spiritualibus, & temporalibus eidem plenarie committendo. In Nomine Patris, & Filii, & Spiritus Sancti Amen.

COMMENTARIUS.

I. **J**uxta antiquum ritum pertinuit jam olim ad Monachorum conventum electio suorum Abbatum, uti constat ex Regula Sancti Benedicti Cap. lxxiv. idque veluti in Jus commune ipsi utique rerum naturæ consentaneum transit, ut notat Thomassinus Parte 1. *Disciplina*, Lib. II. Cap. xciii. ubi tamen & illud observat, fuisse adhuc tempore S. Benedicti, & etiam longe post ejus ævum in aliquibus locis Abbates, quos eligerent Episcopi. Seculo x. ut idem Auctor admonet, Parte III. Lib. II. Cap. xx. Proceres quidem Galliæ usque ad Regis Roberti tempora portiones Abbatum invaserunt, & se Abbates etiam dici voluere. Porro invaluit mos, ut per II. Cancellariæ Regulam Papa sibi reservet *omnia Monasteria Virorum valorem*

annuum ducentorum florenorum auri communi estimatione excedentia nunc quomodocumque vacantia, & in posterum vacatura. Provisio autem Abbatiarum istarum expeditur Consistorialiter, sive in Consistorio Cardinalium, quæ propterea Consistoriales vocantur, prævia tamen informatione, ac propositione, quæ in Cathedralium Ecclesiarum provisione servari consuevit, uti expresse declaravit Gregorius XIV. in Constitutione, quæ incipit: *Onus Apostolica*, edita 1. Maji anno mxcxi. Sciendum tamen quod docet Vanespen Parte 1. *Juris Ecclesiastici universi*, Titulo xxxi. Cap. ix. Num. x. in quibusdam Provinciis, Abbates in vim Provisionis Apostolicæ possessionem non accipere sine Placito Regio.

§. III.

In qua Ecclesiarum provisione confectio Processus omittatur?

Interdum autem, cum Ecclesia vacat in Curia Romana, & Persona providenda est familiaris, sive valde nota Pontifici, Pontifex sine aliquo processu, sive commissione, proponit Personam, & de consensu Fratrum pronuntiat, & providet, ut superius est dictum.

COMMENTARIUS.

I. **M**anus cito nemini imponendas, mandat Apostolus in Epistola 1. ad Timotheum, quem Ephesiorum Epi-

scopum ordinaverat. *Quid est*, ait S. Leo in Epistola 1. *cito manus imponere, nisi ante aetatem maturitatis, ante tempus examinis, ante meritum*

tum laboris, ante experientiam disciplinæ, Sacerdotalem honorem tribuere non probatis? Hinc quam solícite inquisierit circa personam electam ante provisionem, seu collationem, S. Gregorius, patet ex variis ejusdem Papæ epistolis, ac præsertim ex Epistola xviii. Libri viii. Plura de hac re videri possunt apud Hallerium, *De Sacris Ordinationibus*, Thomassinum in sua veteri ac nova Ecclesiæ Disciplina, & Vannespennium Parte i. *Juris Ecclesiastici*, Titulo xiv. Cap. II. & III. quod inscriptum est: *Per quos, & qua forma hodie informatio de Nominatis ad Episco-*

patus sumatur. Cæterum necessaria hæc prorsus sunt, cum persona electa extra Curiam degeret, nam alias, ut ait hic §. noster, *interdum cum Ecclesia vacat in Curia, & persona providenda est familiaris, sive valde nota Pontifici, Pontifex sine aliquo processu, sive commissione, proponit personam, & de consensu Fratrum pronunciat, & providet*. Notandum illud *interdum*, ut plurimum enim summæ adhibentur diligentia & canonicè processus fiunt etiam circa personas, quæ diu in Curia commoratae sunt, ac notæ sunt Sacro Collegio, & Summo ipsi Pontifici.

§. IV.

De habitu, & prima visitatione Prælatorum, & juramento.

Pronunciatus in Episcopum mox accipit Rochettum, & tondet caput, faciens sibi magnam coronam, & ut primum poterit, indutus magna Cappa, & sociatus ab amicis equitat cum Galero nigro Episcopali, primum ad Palatium Apostolicum, & agit gratias Summo Pontifici de sua promotione; deinde ad omnes Cardinales, quibus etiam agit gratias, quod promotionem suam benigne juverint, & in ea gratiosè consenserint. Et quando Promotus intrat ad Pontificem, seu Cardinales, solent etiam admitti Prælati, & nobiles Curiales, qui eum deducunt, ut possint audire proponentem, & respondentem. Solent Promoti agere gratias pro dignitate sibi commissâ, merita sua extenuando, & dignitatis auctoritatem amplificando, Ecclesiam sibi commissam commendando, & se offerendo. Pontifex pro qualitate personæ respondet, allegando merita Promoti, vel intercessorum ejus, & monet, ut Ecclesiæ, ad quam promotus est, honori, & utilitati totis viribus incumbat. Cardinales plerumque solent respondere, quod ipsis non sunt agendæ gratiæ, sed Summo Pontifici, qui personam suam ad illam dignitatem promovere voluit; ad alia vero respondent secundum merita, & secundum proposita, laudando, monendo, & hortando, ut expedire judicaverint. Promoti Clerici seculares statim, ut diximus, utuntur Rochetto, & Capello ab extra panno nigro, ab intus serico viridi cooperto cum cordulis, & mappulis viridibus. Promoti vero ex Religione utuntur priori habitu sine Rochetto, nisi sint Canonici Regulares, qui illo utuntur in sua Religione, & utuntur Galero ab extra, & ab intus nigri coloris, sicut Protonotarii, & Abbates. Præsentes ante expeditionem Litterarum Apostolicarum præstant juramentum fidelitatis Summo Pontifici in manibus Prioris Diaconorum Cardinalium genuflexi in forma, quam Clericus Cæremoniarum exhibet, qui de juramento est rogatus, & facit inde instrumentum, & refert in Cancellaria, qualiter talis Prælati juravit; neque in Cancellaria expediuntur Litteræ sine tali relatione; (1) & licet per Cameram aliquando expediantur sine hujusmodi relatione, & male, & cum gravi præjudicio Apostolicæ Sedis, & ideo providendum. Ad absentes mittitur forma juramenti cum aliis Litteris.

C O M M E N T A R I U S.

Plura quæ in hoc §. continentur, jam fuse enarravimus Tomo i. Romani Pontificalis, in Commentariis ad Titulum xiii. & i. Tomo Cæremonialis Episcoporum in Commentariis ad Caput i. Libri i. Sed nequid omittamus quod & in hoc Opere desiderari possit, nonnulla notabimus, quæ ad hunc §. spectant. *Pronunciatus in Episcopum*, inquit, *mox accipit Rochettum, & tondet caput, faciens sibi magnam coronam*. Corona hic ampla dicitur, cum superiore tota capitis parte rafa, vel tonsa, longioris capilli circulus in modum coronæ relinquebatur juxta veterem Ecclesiæ morem, de quo Synodus iv. Toletana anni dcxxxiii. Can. xli. sic ait: *Omnes Clerici, vel Lectores, sicut Levitæ, & Sacerdotes, detonso superius toto ca-*

To. i.

pitate, inferius solam circuli coronam relinquant, non sicut bucusque in Gallicia partibus facere. Lectores videntur, qui prolixis, ut laici, comis, in solo capitis apice modicum circulum tondent. Ritus enim iste in Hispania bucusque hæreticorum fuit. Unde oportet, ut pro amputando Ecclesiæ scandalo, hoc signum dedecoris auferatur, & una sit tonsura, vel habitus, sicut totius Hispaniæ est usus. Qui autem hoc non custodierit, Fidei catholica reus erit. Plura quidem jam nos docet hic Canon. i. eam fuisse Diaconorum, Presbyterorum, & Episcoporum tonsuram, quæ partem superiorem capitis totam aperiret: *Detonso superius toto capite*; idque solum relictum esse crinium, quod esset circuli instar, aut coronæ: *inferius solam circuli coronam relinquant*; & hæc

V u 2

qui-

(1) Hæc verba, & licet per Cameram aliquando expediantur sine hujusmodi relatione, leguntur quidem in Romana hujus Cæremonialis editione anni 1560. desunt tamen in Veneta i. anni 1516.

quidem tonsuræ forma fuit, ac coronæ Clericalis. II. Clericos omnes a Lectoribus ad Episcopum usque, tonsuram eandem, atque coronam gestare debuisse. III. usos semper esse Episcopos, & Presbyteros, ac Diaconos ejusmodi tonsura, & corona, qualis hic præscribitur, ipsos etiam Provinciarum omnium Hispaniæ Clericos inferiores, si Galliciam unam excipias, ubi Lectores *prolixis, ut laici, comis, in solo capitis apice modicum circulum tonderent*. IV. denique ea re damnata, jussisque inferioribus Clericis eandem gestare tonsuram, & coronam, quam gestarent Episcopi, & Presbyteri, decretum esse ab ipsa celeberrima Toletana IV. Synodo, ut pro hæreticis haberentur Clerici, qui in retinendo hæreticorum usu fuerint pertinaces.

II. Constat itaque ex enarrato Canone Toletano, æqualem fuisse olim Clericorum, & Episcoporum tonsuram, qualis est nunc Monachorum, Fratrumque complurium. Verum cum Seculo XIII. corona in Clericis imminui cœperit, jussi sunt ipsi quidem deferre amplas coronas, sed Monachi amplissimas, Episcopi tamen haud Monachali dissimilem: *Clericus Cathedralis, vel Conventualis Ecclesiæ, vel alius, qui de Beneficio vivit, talem tonsuram ferat, quæ gradum non habeat, sed dirigatur in gyrum, ita quod capilli, qui propter inferiorem, & superiorem rasuram remanent, propter suam rotunditatem possint dici corona*. Verba sunt Synodi Montif-Pessulani anni MCCXIV. Can. IV. jubetque Can. XXI. ut ampliores Canonici gestent coronas nempe duorum, vel trium digitorum: *Canonici Regulares amplas coronas portent, & Monachi amplissimas. Itaque duorum digitorum, vel trium amplius sit Monachis circulus capillorum*. Sane, quod Episcopos spectat, ut alias omittam Synodos, Budeusis anni MCCLXXIX. Can. I. illis præcipit, ut tonsuram circularem, & Monachalis similem coronam gestent, tum ut exemplo suo reliquos Clericos, non sola auctoritate urgeant ad Legum Ecclesiasticarum obsequium, tum etiam propterea quod Episcopatus supra Monachorum omnium Religiones longe præstantissima Religione excellat: *Pralati coronam, & tonsuram patentibus omnino auribus circularem juxta Regularium, seu Religiosorum generalem consuetudinem approbatam, cum nulla Religio Pontificali Religione sit major, de cetero deferant*. Porro seculo ipso XIII. jam ea disciplina invaluit, ut major, vel minor esset, pro majoribus, vel minoribus Ordinum gradibus corona. Id enim constat ex Vorcestrensi Syodo anni MCCXL. Can. XXI. quo latiore monet esse debere coronam Clericorum majoribus in Ordinum gradibus eminentium: *Ne comam nutriant, sed circulariter, & decenter, tondeantur, coronam habentes decentis amplitudinis, secundum quod exegerit Ordo, quo fuerint insigniti*. Cum aliorum omnium amplissimus sit Ordo Episcoporum, merito mandat hic noster §. ut pronunciat in Episcopum mox accipiat Rochettum, & caput tondeat, *faciens sibi magnam coronam*, sive ut ait Cæremoniale Episcoporum Lib. I. Cap. I. §. I. *statim curabit sibi amplam coronam in capite decenter formari*.

III. Præter magnam seu amplam coronam, pronunciat in Episcopum mox accipit Rochettum, ait noster §. & quidem si præsens fuerit, ex Summi Pontificis manibus, ut ait Cæremoniale Episcoporum Lib. I. Cap. I. §. II. Nondum

ergo labente Seculo XV. quo florebat ordinator nostri hujus Cæremonialis Augustinus Patricius, ea disciplina invaluisse videtur, ut novus Episcopus de manu Papæ Rochettum acciperet. Induebat quippe ipsam lineam vestem domi suæ Episcopus, ibatque ad Pontificem, ac deinde ad Cardinales, ut de Episcopatu sibi collato gratias ageret. Sunt & qui autumant, eum, qui in Episcopum electus, & confirmatus sit, ante Consecrationem, Rochetto uti non posse, probantque ex Capite, *Clerici Officia*, verbo, *Pontificis, De vita & honestate Clericorum*, quia scilicet appellatione Pontificis non venit electus, & confirmatus in Episcopum, sed qui est jam consecratus, ex Glossa in Clementina II. *De celebratione Missarum*; notatque Panormitanus in Cap. *Eam te, De rescriptis*. Affert hanc sententiam Riccius Tomo III. Praxis Fori Ecclesiastici, ut nimirum nequeat electus, & confirmatus in Episcopum, ante Consecrationem uti Rochetto. Sed hæc opinio facile eliditur ex contrario usu, cujus hic noster §. meminit, & citatus §. II. Cæremonialis Episcoporum, ubi expresse edicitur, electum in Episcopum si præsens fuerit in Curia, *ex Sanctitatis suæ manibus Rochettum accipere*, absentem vero ea veste seipsum induere.

IV. Ubi quis in Curia præsens pronunciat in Episcopum sit, *indutus magna Cappa*, inquit noster §. & *sociatus ab amicis equitat cum Galero nigro Episcopali primum ad Palatium Apostolicum, & agit gratias Summo Pontifici de sua promotione; deinde ad omnes Cardinales &c.* De communibus Episcoporum vestibus, sicut & de eorum visitatione ad Summum Pontificem, & Cardinales, dictum jam. His fuit in citatis toties Commentariis ad Cæremoniale Episcoporum Lib. I. Cap. I. §. I. & sequenti, ubi etiam fuit notatum, morem antiquum, ut nimirum Episcopi post suam ipsorum promotionem teneantur non modo Summum Pontificem, sed & S. R. E. Cardinales præsentem in Curia visitare, innovatum fuisse a Leone X. Sessione IX. Concilii V. Lateranensis, Constitutione quæ incipit, *Superna dispositionis arbitrio*, edita anno MDXIV. ubi inter alia sic inquit: *Promotus vero eosdem Cardinales, qui præsentem in Curia fuerint, ex antiquo more, consuetudineque laudabili quamprimum visitare teneantur; quem quidem morem laudabilemque consuetudinem innovamus, ac inviolabiliter observari mandamus*. Teneri quoque absentes gratiarum actiones, & Ecclesiarum suarum commendationis officium, tam apud Summum Pontificem, quam apud Eminentissimos Dominos Cardinales peragere, docet etiam laudatum Cæremoniale Episcoporum citato loco §. III. Ceterum quod ait hic præsens §. ut nempe promoti ex Religione utantur priori habitu sine Rochetto, nisi sint Canonici Regulares, qui illo utuntur in sua Religione, plenius clariusque explicatum habemus ex memorato Episcoporum Cæremoniali Lib. I. Cap. I. §. IV. cujus hæc sunt verba: *Promoti vero ex Regulari Ordine non Clericali, non utuntur Rochetto, sed retinent in vestibus colorem habitus suæ Religionis, & deferunt ubique Mozzettam ejusdem coloris; & biretum nigrum, Galero tamen viridi, prout supradicti Clerici, utuntur, sed Canonici Regulares utuntur etiam Rochetto, prout ante promotionem ad Episcopatum utebantur in sua Congregatione, & colore violaceo, sed non Mozzetta,*

ut

ut Presbyteri Sancti Spiritus, & Militiarum, S. Joannis, S. Jacobi, & aliarum; qui tamen sui Ordinis insignia in vestibus non deferunt, sed ejusdem Ordinis Crucem ad collum intus pendentes. Cum autem Episcopi nulli Regulari Ordini adscripti, seu ex Ordinibus Militaribus assumti, extra Diocesim fuerint, Mozzetta supra Mantelletum utantur, ubi talis viget consuetudo. Videtis quæ & nos scripsimus in hunc §. citato Tomo 1. Cæremonialis Episcoporum.

V. Mandat tandem præsens §. ut promoti in Episcopos, si præsentem in Curia sint, ante expeditionem Litterarum Apostolicarum præstent juramentum fidelitatis Summo Pontifici in manibus Prioris Diaconorum Cardinalium &c. Plura de hoc juramento jam diximus Tomo 1. Romani Pontificalis, Titulo xiv. ne actum itaque iterum agamus, ad eum locum Lectorem curiosum remittimus, ubi & de origine ejus juramenti diximus, & singula ejusdem capita explicuimus.

§. V.

Qui appellantur Electi.

Promoti ad Ecclesias, sive Monasteria, ante suam Consecrationem, sive Benedictionem, quam infra tres menses sumere debent, non appellantur Episcopi, sive Abbates, sed electi; & quamvis utantur Episcopali, sive Abbatiali habitu, non tamen possunt uti paramentis, & Mitris sine speciali indulto Pontificis. Consueverunt tamen Pontifices in Curia committere Ministris Cæremoniarum, ut Prælati hujusmodi concedant, quod possint in Capella Sanctissimi Domini nostri cum aliis, Pluviali, & Mitra uti in publicis actibus.

COMMENTARIUS.

I. **E**A fuit vetus Ecclesiæ disciplina, quam fuisse probavimus Tomo I. Romani Pontificalis in Commentariis ad Titulum xiii. ut nempe electus in Episcopum nullum jus haberet in administratione Ecclesiæ, neque Ecclesiæ Pastor, aut Prælatum censeretur ante Consecrationem, quia scilicet per ipsam Consecrationem, sive Ordinationem Episcopus constituebatur. Hinc Patribus idem erat ordinare & consecrare Episcopum, ac constituere Episcopum, aut Ecclesiæ de Episcopo providere, neque inter illa decem primis Ecclesiæ seculis in sacris Canonibus ullum discrimen reperitur, uti notat inter alios Vanespen Parte 1. *Juris Ecclesiastici universi* Titulo xv. Cap. iv. ubi etiam observat, juxta priscam illorum temporum disciplinam, per Consecrationem demum accipisse Episcopos auctoritatem, & potestatem, tam quoad ea, quæ jurisdictionis, quam quæ Ordinis dicuntur. Eodem teste Auctore habuere quidem hæc locum, cum nempe multis seculis Consecratio Episcoporum haud fuit sejuncta a Confirmatione. Posterior enim ætas, quæ Confirmationem a Consecratione distinguere cœpit, licet etiam ea quæ jurisdictionis sunt ab iis quæ Ordinis sunt, separavit, per ipsam tamen Confirmationem ante

Consecrationem, quæ jurisdictionis sunt, in Episcopum transire voluit, imo per Confirmationem Pastorem & Prælatum Ecclesiæ sine Consecratione constitui, omneque regimen Ecclesiæ committi, solis iis exceptis, quæ Ordinis sunt, quæ tamen ut in Ecclesia sua, aut Subditis suis per alios Episcopos conferantur, & impendantur, permittere, aut delegare potest, ut idem Vanespen late ostendit citato loco Titulo xiv. Cap. iv.

II. Nota hæc omnibus sunt vel ipsis Ecclesiastici Juris tyronibus, eademque non uno in loco nostrorum Operum explicuimus, in Commentariis scilicet ad citatum Pontificale Romanum, atque ad Concilia Oecumenica, in quibus etiam illustrata & alia reperies in hoc §. contenta. Ceterum tametsi electi in Episcopos, aut in Abbates, ante Consecrationem, aut Benedictionem, non possint uti Paramentis, & Mitris sine speciali indulto Pontificis, consueverunt tamen Pontifices, ut ait hic noster §. constataque ex variis exemplis, quæ in mss. Apostolicorum Cæremoniarum Riariis occurrunt, in Curia committere Ministris Cæremoniarum, ut Prælati hujusmodi concedant, quod possint in Capella Sanctissimi Domini nostri cum aliis, Pluviali, & Mitra uti in publicis actibus.

§. VI.

De Pallio, & quomodo traditur.

Promoti ad Metropolitanas, seu (1) Patriarchales Ecclesias, etiam si sint consecrati Episcopi, appellantur Archiepiscopi. Neque Patriarchæ nisi primum acceperint Pallium de Corpore Beati Petri sumtum, sed electi ad illas Ecclesias, & translati de una Ecclesia Metropolitana ad aliam, non possunt uti Pallio, quod acceperant in prima sua Ecclesia, & minus Pallio Prædecessoris defuncti, seu translati, sed oportet, quod de novo petatur Pallium, & obtineatur, & interim non possunt ordinare, neque consecrare, Synodum celebrare, nec alia pleraque Pontificalia exercere. Debent autem petere Pallium per se, vel Procuratorem intra tempus sex mensium. Sunt & qui-

(1) In editis legitur, *parochiales*.

quidam Episcopi, qui ex indulto Apostolico, Pallio utuntur, ut Lucensis in Thufcia, Papiensis in Lombardia, Bambergensis in Germania, & siqui alii, quo uti debent intra suas Ecclesias diebus & modo in privilegio a Sede Apostolica illis concessis. Cura conficiendorum, & conservandorum Palliorum ad Subdiaconos Apostolicos pertinet, qui ex lana munda & alba illa hoc pacto conficiunt. Sanctimoniales Monasterii S. Agnetis, vel Religiosi, qui sunt in illa Ecclesia offerunt quotannis agnos duos albos super Altare illius Ecclesiæ in die festivitatis Sanctæ Agnetis, dum in Missa solemni cantatur *Agnus Dei*. Qui agni recipiuntur a duobus Canonicis Ecclesiæ Lateranensis, & ab eis postea consignantur Subdiaconis Apostolicis, qui agnos ipsos in pascua mittunt, quoad veniat tempus tondendi ipsos agnos opportunum. Ex his agnis lana tondetur, quæ mixta cum alia lana alba, & pariter munda reducit in filium, ex quo Pallia hujusmodi contexuntur latitudine digitorum trium, reducta in orbem ita ut humeros Præsulum ambiant; a pectore & renibus particulam pendentem habet Pallium longitudinis palmi, & semis, & in ejus extremitatibus laminas plumbeas tenues ad parem latitudinem in fine orbiculatas nigro serico textas. In ipso orbe Cruces quatuor infutas supra pendentes particulas ante & post, & super humeros utrosque. Sic confecta Pallia ex eodem (1) nigro sericeo per Subdiaconos portantur ad Basilicam Principis Apostolorum, & per Canonicos Basilicæ ponuntur super Corpora Petri & Pauli Apostolorum, sub Altari majore, ubi factis ex more vigiliis, illa per noctem dimittunt, deinde restituant Subdiaconis, qui in loco honesto ea conservant. Ufus autem Pallii hujusmodi, in quantum potuimus explorare, antiquissimus est, & a Lino Pontifice Petri Apostoli immediato Successore habuit originem; ita enim scriptum legimus a Maximo Episcopo in Homilia de Veste Sacerdotali: *In Lege gratiæ antiquum est illud nostrum Ephoth (ideest Pallium) quod nostri Patriarchæ arbitrantur a Lino post Petrum secundo Romano Pontifice institutum, & in singulare potestatis privilegium nostris Deo plenius Præsulibus datum*. Et Eusebius Casariensis in Sermonem de Epiphania scribit: *Nihil antiquius Veste illa Sacerdotali Archipræsulis nostri, quæ illi vesti de Veteri Testamento successit Ephoth bysso auroque contexta, qua in signum plenissimæ potestatis primus Linus amictus est, cui & typum dedit, & nomen, ut a veteribus accepimus Scriptoribus, quam appellavit & Pallium*. Cum autem aliquis Prælatus indiget Pallio, illud primo per quempiam ex Advocatis Consistorialibus Procuratorem ab eo ad hoc specialiter constitutum a Summo Pontifice in Consistorio instanter, instantius, & instantissime petitur. Pontifex, excluso Advocato, exquirat Patrum sententias, an dandum sit Pallium, deinde committit Priori Diaconorum, ut Pallium Prælato, vel ejus Procuratori assignet; expediuntur super ea re Litteræ Apostolicæ in forma consueta, & Prior Diaconorum Cardinalium imponit locum, & diem, ubi, & in quo Pallium consignare debeat. Id plerumque fieri solet in domo ipsius Cardinalis in sua Capella, interdum autem in Ecclesia Sancti Petri, & super majus Altare, & valde condecoranter, maxime pro maximis Ecclesiis, & ultramontanis, & ita vidi servari a Reverendissimo Domino Cardinali Senensi Priore Diaconorum. Statuta die Prælatus, si est præsens, vel ejus Procurator in absentia cum speciali mandato, venit ad locum ordinatum. Adsunt Dominus Prior Diaconorum Cardinalium, & Subdiaconus Apostolicus cum ipso Pallio, qui Pallium explicat super medium Altaris. Prælatus, si est præsens, indutus super Rochettum, sive Superpelliceum Planeta, genuflexus in gradu Altaris ante Priorem Diaconorum stantem in cornu dextro Altaris, ubi legitur Evangelium, petit sibi dari, & consignari Pallium his verbis: *Ego N. electus Ecclesiæ N. instanter, instantius, & instantissime peto, mihi tradi, & assignari Pallium de Corpore Beati Petri sumtum, in quo est plenitudo Pontificalis officii*. Tunc Dominus Prior Diaconorum accipiens Pallium de Altari, imponit illud super humeros Prælati genuflexi, dicens: *Ad honorem Omnipotentis Dei, & Beatæ Mariæ semper Virginis, atque Beatorum Apostolorum Petri & Pauli, necnon Ecclesiæ N. tibi commissa, tradimus tibi Pallium de Corpore Beati Petri sumtum, in quo est plenitudo Pontificalis officii cum Patriarchalis, vel Archiepiscopalis nominis appellatione, ut & utaris eo intra Ecclesiam tuam certis diebus, qui exprimuntur in privilegiis ab Apostolica Sede concessis*. In Nomine Patris, & Filii, & Spiritus Sancti. Amen; & illud cum Subdiacono aptat, non tamen infigit spinulas, & recipit illum ad osculum pacis. Demum Clericus Cereemoniarum extrahit illi Pallium, & advocatis testibus rogat se de illo actu, plicat Pallium, & illud portat ad dictum Prælatum, vel illud reservat in loco sacro, quoad

(1) Verba, *ex eodem nigro sericeo*, leguntur quidem in Romana editione, sed desiderantur in Veneta I.

quoad Prælatus recedat, & tunc dat illi Pallium cum publico instrumento. Vidi etiam, cum essem Minister Cæremoniarum, Sixtum Papam Quartum manibus propriis dedisse Pallium Patriarchæ Constantinopolitano Hieronymo Lando Veneto tunc Archiepiscopo Cretenſi, quod tamen, ut arbitror, non puto, condecens esse, cum traditio Pallii proprie ad Diaconum spectet; & ipsi Romano Pontifici in sua Coronatione, & Consecratione nemo imponat Pallium, nisi Prior Diaconorum. Si autem Pallium tradendum sit Procuratori in absentia Prælati, Procurator indutus Superpelliceo, genuflectit, ut de Prælato diximus, & petit Pallium, & jurat in hanc formam: *Ego N. Procurator, & procuratorio nomine, & pro parte Reverendi in Christo Patris, & Domini, Domini N. Electi Ecclesiæ N. instanter, instantius, & instantissime, peto, mihi tradi, & assignari Pallium de Corpore B. Petri sumtum, in quo est plenitudo Pontificalis officii, & promitto illud reverenter portare eidem Reverendo Patri Domino N. nec pernoctabo in aliquo loco, nisi una nocte tantum, nisi præpeditus fuero legitime, & tunc in Cathedrali ipsius; & si non fuerit Cathedralis, in Collegiata; & si non fuerit Collegiata, in Parochiali Ecclesia remittam, & honorifice reponam. Sic me Deus adjuvet, & hæc Sancta Dei Evangelia.* Diaconus autem Cardinalis accipiens Pallium de Altari, imponit illud super humeros Procuratoris, dicens: *Ad honorem Omnipotentis Dei, & Beatorum Apostolorum Petri & Pauli, & Domini nostri Papæ, ac Sanctæ Romanæ Ecclesiæ, assigno tibi Pallium de Corpore B. Petri sumtum, in quo est plenitudo officii cum Archiepiscopalis nominis appellatione, nomine & pro parte Reverendi in Christo Patris Domini N. & Ecclesiæ N. ad quam electus est, ut eo utatur intra Ecclesiam suam certis diebus, qui exprimuntur in privilegiis ab Apostolica Sede concessis.* Et in fine Procurator osculatur illi manum, & rogat Clericum Cæremoniarum, & petit instrumentum. Clericus extrahit illi Pallium, plicat, & reportat, & conservat in loco sacro, quousque Procurator sit discessurus, & tunc dat illi Pallium, & instrumentum in publica forma. Qui Pallium sunt accepturi, postquam fuit petitum in Consistorio, & concessum, componunt primum cum Subdiaconis, nam illi, ut diximus, tenent Pallia. Qui accipiunt secundum valorem, & taxam Ecclesiæ, aliquando plus aliquando minus pro centenario. Et quia vidi varios usus, & nihil firmi statutum legi, de quota nihil dicam. Clerici Cæremoniarum & ipsi ratione officii sui & instrumenti mercedem suam exigunt etiam ad proportionem taxæ, & valoris Ecclesiarum, non tamen tantum, quantum Subdiaconi. Solent etiam qui Pallium accipiunt, Diacono Cardinali duo bireta, & totidem suis Camerariis dono dare; antiquitus dabant, ut legi, vinum album, & species; portabunt etiam duas faculas cereas, quæ ardeant super Altare, dum Pallium traditur, & sericum ad induendum Pallium, cum quo illud ad Ecclesiam suam deferunt.

COMMENTARIUS.

I. **S**atis profecto erit, si pauca quædam de Pallio, & ejus traditione hoc loco dixerimus, quia ipsam rem lato, ut dici affoet, calamo jam pertractavimus Tomo I. nostri Romani Pontificalis in Commentariis ad Titulum XIV. Nihil vero de ea re putamus luculentius afferri posse celeberrima Constitutione Sanctissimi Domini nostri Papæ BENEDICTI XIV. feliciter regnantis, quæ est de benedictione, & traditione Pallii, quamque dignam censuimus, ut in hoc Commentario integram describeremus, ob recentiore ritum, quem ipse laudatissimus Pontifex induxit. Sic autem inquit:

BENEDICTUS EPISCOPUS

Servus Servorum Dei

Ad perpetuam rei memoriam

Rerum Ecclesiasticarum origines quo altius ex sacræ antiquitatis memoria repetimus, eo magis illas & solidis fundamentis innixas, & sublimi non minus quam vetusta institutione venerabiles, ipsaque disciplina & ritu graves ac religioſas, agnoscere & comprobare gaudemus. Ita porro de sacris Palliis, quæ a Romano Pontifice Patriarchis, & Archiepiscopis concedi,

ipsisque in Curia præsentibus tradi, absentibus autem transmitti consueverunt, a primis usque Ecclesiæ sæculis complura extant certissima monumenta; nec dubium est, quin eorum traditioni, five transmissioni, solemniter semper præmissa fuerit Benedictio. Quia tamen hujusmodi Benedictionis ritus nonnullas mutationes in evolutione temporum subiisse dignoscitur, officii Nostri esse judicavimus illius formam perpetuis futuris temporibus observandam constituere, ac præsentium Literarum auctoritate firmare.

Inter speciales prærogativas Basilicæ Sancti Petri in Vaticano, quarum meminit Petrus Mallius ejusdem Basilicæ Canonicus tempore Alexandri III., hæc recensetur, quod *in ea tantum vigilantur Pallia*, quæ a Romano Pontifice Patriarchis, & Archiepiscopis mittuntur. Maphæus autem Vegius alter Sancti Petri Canonicus sub Prædecessore nostro Martino V. Lib. 11. Rerum memorabilium Basilicæ S. Petri, piam supplicationem describit, quæ ab ipſius Basilicæ Clero, cum cantu Psalmorum Pœnitentialium, Litaniarum, aliarumque precum, fiebat, dum ad Pallia benedicenda procedebatur; atque addit,

dit, nocturnas vigilias ea occasione ita celebrari consuevisse, quemadmodum in pervigilio Festi Sanctorum Apostolorum Petri & Pauli. De hujusmodi Vigiliis similiter mentio est in Libris Sacrarum Cæremoniarum Ecclesiæ Romanæ, qui tribuuntur Christophoro Marcello Archiepiscopo Corcyrensi, a quo videlicet Prædecessori quondam Nostro Leoni Papæ X. oblatis fuerunt; ubi etiam Lib. I. Sectione x. Cap. v. dicitur, quod ipsa Pallia demittebantur in sacram Beati Petri Confessionem, ut supra illius Corpus consistere: *Per Canonicos Basilicæ ponuntur super Corpora Petri & Pauli Apostolorum sub Altari Majore, ubi factis de more Vigiliis, illa per noctem dimittunt, deinde restituant Subdiaconis, qui in loco honesto ea conservant.* Erat quippe in anteriori fronte Altaris dictæ Confessionis parva quædam veluti fenestra, & in hujus solo intra ipsius Altaris molem, foramen erat, æneæ arcæ ad perpendicularum respondens, in qua Sacrum Apostolorum Principis Corpus requiescit; ut latius legere est in descriptione veteris situs, & formæ ejusdem Confessionis, quam Michael Lunigus Prædecessori Nostro Urbano Papæ VIII. dicavit, quæque tam seorsim, quam cum aliis Operibus Typis edita pluries fuit.

Verum quum mutata deinceps fuerit Aræ Majoris forma, nocturnarum autem Vigiliarum disciplina magna ex parte in desuetudinem abiit; annuentibus Prædecessoribus Nostri Romanis Pontificibus, inductum fuit, ut prædictæ Basilicæ Archipresbyteri Vicarius in Episcopali Ordine constitutus, vel alius Episcopus ejusdem Basilicæ Canonicus, qui Matutinis Officiis in Festo Sanctorum Petri & Pauli in Pontificalibus assisteret, idem Benedictionem Palliorum faceret, cujus ritus talis erat.

Pallia, quæ benedicenda erant, auratæ Pelvi imposita, ab ipsius Vaticanæ Basilicæ Canonico Altarista nuncupato, comitantibus duodecim ejusdem Basilicæ Beneficiatis, ad Confessionem Beati Petri deferiebantur, ibique locabantur super Mensam stragula pretiosa coopertam, inter duo Candelabra accensis cereis subjecta. Episcopus vero, qui Matutinis Officiis, ut præfertur, adstiterat, post decantatas Laudes, Pontificalibus adhuc indutus, una cum assistentibus Ministris paratis, & Clero Basilicæ, ad Confessionem ipsam descendebat, Pallia aspergebat aqua benedicta, tum incenso adolebat, ac demum solemnem Benedictionis preces super illa recitabat; Pallia vero sic benedicta, per totam Festivitatis Octavam, supra Corpus Apostoli requiescebant; expleta autem Octava, a Sacrarum Curatoribus removebantur, & inclusa capsulæ holoserico coccineo coopertæ, recondabantur in Oratorio Secretarii, in quo Sanctorum Reliquiæ asservantur; clavis autem capsulæ tradebatur primario Pontificis Cæremoniarum Magistro.

Ritum hunc, qui ad proximos usque annos viguit, nos ipsi semper observari vidimus, quo tempore in minoribus constituti, prædictæ Vaticanæ Basilicæ Canonicatum tenuimus; nisi quod anno Jubilei millesimo septingentesimo vigesimo quinto, die xxii. Februarii, in Festo Cathedræ Sancti Petri Antiochiæ, fel. record. Prædecessor Noster, ac Dignitatis Nostre amplifactor, Benedictus Papa XIII. hujusmodi Pallia per se ipsum benedicere maluit. Cujus Nos

exemplo excitati, ejusque præclara vestigia libenter sectantes, duobus proxime elapsis annis, in pervigilio Natalis Sanctorum Apostolorum Petri & Pauli, Vespertinis Officiis in ipsa Basilica Vaticana de more persolutis, hujusmodi Pallia benediximus, certo ordine, ac ritu, quem in posterum quoque servare decrevimus, atque etiam a Successoribus Nostri Romanis Pontificibus, seu respective ab eo S. R. E. Cardinali, qui forsitan, absente Pontifice, Vesperarum solemnitati in Pontificalibus adstiterit, observari, & adhiberi, præsentium Litterarum mansuro tenore statuimus.

Primum itaque volumus, & mandamus, ut singulis annis Palliorum numerus sufficiens pro Ecclesiarum opportunitate, in Vigilia Apostolorum de mane, a prædictæ Basilicæ Canonico Altarista, cum consueto comitatu, ad Confessionem Beati Petri deferatur, ibique decenter, ut supra diximus, collocetur; ipsaque Pallia post Vesperas ejusdem diei in ipsa Basilica ritu maximo celebratas, a Summo Pontifice, si præfens fuerit, sin minus ab eo Cardinali, qui Pontificalia peregerit, benedicantur. Sicut enim ipsius Romani Pontificis, vel saltem illius personam, & vices gerentis, maxime propriam, ita huic potissimum diei merito adscribendam censemus hujusmodi Benedictionem; tum quia Sacrum Pallium, *in quo* (ut Innocentii Papæ III. Prædecessoris Nostri verbis utamur) *Pontificalis officii plenitudo cum Archiepiscopalis nominis adpellatione confertur*, speciale munus est, quod a solo Romano Pontifice Beati Petri Successore conceditur; tum quia eo die conspicuus universi Collegii S. R. E. Cardinalium, aliorumque ipsius Ecclesiæ Romanæ Procerum confusus, ac frequentissimi Populi concursus, hujusmodi functionis splendorem, & majestatem magnopere augebit.

Expletis itaque Vesperis, descendat ad Confessionem unus ex Auditoribus Causarum Palatii Apostolici, Sacris Subdiaconalibus vestibus indutus, præcedentibus duobus sevientibus armorum, Mazzeriis Papæ nuncupatis, comitantibus hinc & inde duobus aliis Auditoribus Collegis, cum supparo, & Superpelliceo; & subsequentibus Pontificiæ Consistorialis Aulæ Advocatis; atque is præparata Pallia coram Pontifice, aut Cardinale Pontificalia exercente, afferat, & sistat. Decet enim hujusmodi munus injungi præfatis Auditoribus, in Subdiaconorum Ordine Pontifici ministrantibus, quorum videlicet Collegii Decano singulis annis traduntur Agni, ex quorum velleribus contexenda sunt Sacra Pallia; nec minus convenit, Consistoriales Aulæ Advocatos adesse, ad quos singulari privilegio pertinet pro Pallii concessione apud Pontificem in Consistorio residentem perorare.

Ipsæ autem Pontifex, seu illius vice, ut præfertur, Cardinalis ille, qui Officio in Pontificalibus adstiterit, Pallia prædicta more solito adperget aqua benedicta, tum incenso adolebit, deindeque pronuntiabit super ea preces, & Benedictiones, juxta formulam inferius statuendam.

Peracta demum Benedictione, eadem sacra Pallia includantur arcule argenteæ auro obductæ, quam semper in ipsa Confessione Beati Petri Apostoli, & prope sacrum illius Corpus, in loco ad id designato asservari mandamus; quam-

quamque ad hunc effectum, exquisito cælaturæ opere, nostro sumptu conflata, nuper eidem Beatissimo Apostolorum Principi reverenter obtulimus, ipsum enixe orantes, ut de negligentis, & offensionibus nostris, quæcumque in ipsius Basilicæ servitio admisimus, dum inter illius Canonicos accensebamur, indulgentiam, & veniam Nobis ab Omnipotenti Deo dignanter imploret. Volumus autem, ut huiusmodi arculæ cura, & custodia spectet ad ipsius Basilicæ Canonicum Altaristam pro tempore existentem; illius vero Clavis a primario Pontificiarum, Cæremoniarum Magistro retineatur.

Denique attendentes, quo ritu huiusmodi Pallia a Cardinali S. R. E. Diaconorum Priore absentium Patriarcharum seu Archiepiscoporum Procuratoribus traduntur, animadvertimus, ipsos Procuratores iuramentum præstantes juxta antiquam formulam, quæ ipsis exhibetur, plura promittere, quæ nec omnino his temporibus integre adimpleri, nec sine perjurii crimine negligi posse videntur. Quapropter volumus, & statuimus, ut huiusmodi iuramentum deinceps a Procuratoribus prædictis alia forma præstetur, inferius pariter inferenda præsentibus Litteris; quas quidem, cum omnibus in iisdem statutis, atque præscriptis, semper & perpetuo validas, & efficaces existere, & fore, & ab omnibus, ad quos pertinet, ac pertinebit in posterum, plenissime observari, decernimus: Non obstantibus, si quæ sunt in contrarium, Apostolicis Ordinationibus, & Constitutionibus, nec non Capellæ Pontificæ, & ipsius Vaticanæ Basilicæ, etiam Apostolica auctoritate approbatis, & confirmatis, ritibus, formulis, usibus, & consuetudinibus etiam immemorabilibus; quibus omnibus, & singulis, quatenus opus sit, Motu proprio, ac de Apostolicæ potestatis plenitudine, pro præmissorum perpetua executione, derogamus, ac derogatum censi volumus, cæterisque contrariis quibuscumque.

Formula igitur Precum ad benedicenda Pallia in Vigilia Sanctorum Apostolorum Petri & Pauli, talis est. Post Vesperas, Pontifex, seu Cardinalis, qui illius vice in Pontificalibus Officio adstiterit, ipsa Pallia ter aspergit aqua benedicta, dicendo Antiphonam: *Asperges me &c.* ac ter incenso adolet, deinde dicit:

*V. Adjutorium nostrum in nomine Domini,
R. Qui fecit calum, & terram,
V. Dominus vobiscum,
R. Et cum spiritu tuo.*

O R E M U S.

Deus, Pastor æternæ animarum, qui eas Oviū nomine designatas, per Jesum Christum Filium tuum, Beato Petro Apostolo, ejusque Successoribus, boni Pastoris typo regendas commisisti, atque ipsis sacrarum Vestium symbolis Pastoralis curæ documenta significari voluisti; effunde per ministerium nostrum super hæc Pallia de Beatorum Apostolorum Principum Altari sumpta, copiosam Benedictionis ✠, & Sanctificationis ✠ tuæ gratiam, ut quam mystice representant Pastoralis officii plenitudinem, atque excellentiam, pleno quoque operentur effectu. Humilitatis nostræ preces benignus excipe, atque eorundem Apostolorum meritis, & suffragiis concede; ut quicumque ea, te largiente, gestaverit, intelligat se Oviū tuarum Pastorem, atque in opere exhibeat, quod signatur in
To. I.

nomine. Sit boni magnique illius imitator Pastoris, qui errantem Ovem humeris suis impositam cæteris adunavit, pro quibus Animam posuit. Sit ejus exemplo in custodia Gregis sibi commissi sollicitus, sit vigil, sit circumspectus, nequa Ovis in morsus incidat, fraudesque luporum. Sit disciplina zelo districtus, quod perierat requirens, quod alienum reducens, quod confractum alligans, quod pingue, & forte, custodiens. Videat humeris suis impositam Crucem, quam Filius tuus proposito sibi gaudio sustinere non recusavit; sitque illi crucifixus Mundus, & ipse Mundo. Tollat injectum collo suo Evangelicum jugum, sitque ei ita leve, ac suave, ut in via mandatorum tuorum cæteris exemplo, & observatione præcurrat. Sit ei hoc symbolum unitatis, & cum Apostolica Sede communionis perfectæ tessera, sit charitatis vinculum, sit Divina hereditatis funiculus, sit æternæ securitatis pignus; ut in die adventus, & revelationis Magni Dei, Pastorumque Principis Jesu Christi, cum Ovibus sibi creditis stola potiatur immortalitatis, & gloriæ. Per eundem &c.

Formula autem juramenti, quod Procuratores absentium Archiepiscoporum, aliorumque, quibus Pallium a Romano Pontifice concessum fuerit, præstare debent in manibus Cardinalis Sanctæ Romanæ Ecclesiæ Diaconorum Prioris pro tempore existentis, dum Pallium ipsis ferendum, seu transmittendum suscipiunt, talis est.

Ego N. Procurator, & procuratorio nomine, & pro parte Reverendissimi in Christo Patris, & Domini N. electi Ecclesiæ N. instantius, & instantissime peto, mihi tradi, & assignari Pallium de Corpore Beati Petri sumptum, in quo est plenitudo Pontificalis Officii, & promitto illud reverenter portare, vel portari facere eidem Reverendissimo Patri Domino N. Sic me Deus adjuvet, & hæc sancta Dei Evangelia.

Nulli ergo omnino Hominum liceat paginam hanc Nostræ ordinationis, statuti, decreti, & voluntatis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, & Beatorum Petri & Pauli Apostolorum ejus noverit incursum.

Datum Romæ apud Sanctam Mariam Majorem Anno Incarnationis Dominicæ MDCCXLVI I. I. pridie Idus Augusti Pontificatus Nostri Anno VIII.

II. Hactenus Constitutio feliciter regnantis Papæ BENEDICTI XIV. de benedictione, & traditione Pallii, in qua, sicut & in ceteris ejusdem Pontificis aureis Litteris, atque Operibus elucet non modo profunda eruditio, & rerum omnium presertim Ecclesiasticarum peritia, verum etiam summa pietas, religio, humilitas, ac reliquæ virtutes, quibus tum in minoribus tum in Summi Pontificatus apice, nituit semper nitetque Vita ipsius Pontificis Maximi, qui unice regimini Ecclesiæ, & divino cultui augendo intentus, noctes pene insomnes ducit, ut egregia ipsius Opera testantur, in quibus vel Viri doctissimi, & in studio Ecclesiasticarum antiquitatum diu versati multa scitu digna inveniunt, quæ ipsi ignorabant; idque ipsi Viri eruditissimi testati non semel sunt in Libris, quos ediderunt, ubi passim memoratum Pontificem, ejusque singularem doctrinam cum pietate conjunctam summopere laudant.

X x

DE

DE PUBLICATIONIBUS SOLEMNIBUS.

TITULUS XI.

§. I.

De pacis publicatione.

In publicatione pacis, lectis Capitulis, Pontifex surgit sine Mitra, incipit, *Te Deum*, & Cantores prosequuntur, & in fine Chorus cantat Antiphonam: *Da pacem Domine Domine in diebus nostris, quia non est alius, qui pugnet pro nobis, nisi tu Deus noster*; & Pontifex dicit hos versiculos, Choro respondente: *Fiat pax in virtute tua. R. Et abundantia in turribus tuis. V. Non nobis Domine non nobis. R. Sed Nomini tuo da gloriam. V. Domine exaudi orationem meam. R. Et clamor meus ad te veniat. V. Dominus vobiscum. V. Et cum spiritu tuo.*

Oremus.

Deus, a quo sancta desideria, recta consilia, & iusta sunt opera: da servis tuis illam, quam mundus dare non potest, pacem, ut & corda nostra mandatis tuis dedita, & hostium sublata formidine, tempora sint tua protectione tranquilla. Per Christum Dominum nostrum. Amen.

COMMENTARIUS.

I. **P**ro sua in universam Ecclesiam, ac in ipsos Reges, & Principes suprema auctoritate, ac potestate, soliti semper fuere Summi Romani Pontifices, ubi Christianos Principes inter se dissidentes, belligerantesque agnoscebant, eos ad pacem hortari, Litteris, Legatisve Apostolicis ad eosdem missis, uti nos passim docent Ecclesiasticæ Historiæ, ex quibus etiam constat, solitos fuisse Romanos ipsos Pontifices longa aggredi itinera, ut dissidentes Principes conciliarent. Sane, ut aliquod de hac re exemplum proferam, Germania ex duorum Imperii competitorum Othonis Saxonis, & Philippi Suevi factionibus, continuis afflicta cladi- bus, Innocentius Pappa III. anno MCCVII. a Principibus Imperii certior ejus dissidii factus, confestim misit in Germaniam Hugolinum Ostiensem Episcopum, & Leonem Sanctæ Crucis Presbyterum, Cardinales, qui accepto a Philippo Othonis æmulo juramento, de stando iudicio Papæ super omnibus, pro quibus fuerat excommunicatus, eum solemniter absolverunt, remque inter duos competitores ita composue-

runt, ut Philippus filiam suam uxorem daret Othoni, facta a Pontifice dispensatione super quarto gradu consanguinitatis, quo erant conjuncti, eique Otho, si superviveret, in Imperio succederet; & interim dum hæc ad Pontificem ab Apostolicis, & utriusque Principis Legatis referrentur, essent induciæ unius anni. Hæc pacis condiciones Pontifex ratas habuit, & promulgari fecit. Hæc constant ex Epistolis ipsius Innocentii super negotio Imperii, CXIII. usque ad CL. & confirmantur ab Auctoribus ejusdem temporis, Conrado Urspergeni Abbate, Godfrido Colonienfi, & Areoldo Lubecensi in ipsorum Chronicis. Ceterum, ut alia exempla omit- tam, Paulum III. anno MDXXXV. Mense Ma- jo Roma profectum, longo, & laborioso itinere, exactæ jam ætatis senem Niceam, sive Niciam Urbem maritimam ditionis Ducis Sabaudie, ut ibidem cum Imperatore Carolo V. & Franci- sco I. Gallie Rege congregaretur ad pacem in- ter eos conciliandam, tradunt post alios ad ip- sum annum Spondanus, & Scriptores Vitæ lau- dati Pauli III. Papæ.

§. II.

In publicatione Fæderis initi contra hostes Ecclesiæ, aut infideles.

Lectis Capitulis, Pontifex surgat, & incipiat sine Mitra, *Te Deum laudamus*. Cho- rus prosequitur Hymnum usque ad finem. Pontifex pronunciat: *Pater noster*, & de- inde: *Et ne nos inducas in tentationem. R. Sed libera nos a malo. Amen. V. Chri- stus vincit, Christus regnat, Christus imperat. R. In æternum, & in seculum se- culi. V. Respice Domine in faciem Christi tui. R. Exaudi preces Ecclesiæ Sanctæ tuæ. V. Misere nostri Domine, misere nostri. R. Respice nos, & ostende no- bis lucem miserationum tuarum. V. Adjuva nos Deus salutaris noster. R. Et prop- ter gloriam Nominis tui Domine libera nos. V. Propitius esto peccatis nostris prop- ter Nomen tuum. R. Ne forte dicant in gentibus, ubi est Deus eorum. V. Salvos fac nos Domine Deus noster. R. Ut liberati de tribulatione confiteamur Nomini San- cto tuo. V. Concede Domine populo tuo, ut sit ei cor unum, & anima una. V. In* obser-

observatione mandatorum tuorum. V. Alleva manus tuas super gentes alienas. R. Ut videant potentiam tuam, & agnoscant te. V. Innova signa, & immuta miracula. R. Glorifica manum, & brachium sanctum tuum. V. Hostium nostrorum elide superbiam. R. Et eorum contumaciam dexterae tuae virtute prosterne. V. Ultio sanguinis servorum tuorum qui effusus est. R. Intrent in conspectu tuo & gemitus compeditorum. V. Effunde iram tuam in gentes, quae te non noverunt. R. Et in Regna, quae Nomen tuum non invocaverunt. V. Ecce inimici tui Domine sonuerunt. R. Et qui oderunt te, extulerunt caput. V. Averte a nobis Domine indignationem tuam. R. Et procul sit a nobis furor tuus. V. Da mercedem Domine, sustinentibus te. R. Ut Prophetæ tui fideles inveniantur. V. Sanctus Deus, Sanctus fortis, Sanctus immortalis. R. Misere nostri. V. Mitte nobis auxilium de Sancto. R. Et de Sion tuere nos. V. Domine exaudi orationem meam. R. Et clamor meus ad te veniat. V. Dominus vobiscum. R. Et cum spiritu tuo.

Oremus.

Omnipotens sempiterne Deus, qui pretiosissimo Sanguine dilectissimi Filii tui humanum genus redimere, ac per Beatos Apostolos tuos jacentem in tenebris mundum ad Evangelii lucem erigere dignatus es: quæsumus, ut adversus impias Turcorum gentes, cunctasque barbaras nationes vivificæ Crucis inimicas, Fideles Christianorum Principes, ac populi ita potenter arma suscipiant, ut pro tui Nominis gloria militantes, virtutis tuæ brachio sublevati, ad Ecclesiam tuam victorici virtutis signa reportent.

Omnipotens sempiterne Deus, in cujus manu sunt omnes potestates, & omnium jura Regnorum, respice in auxilium Christianorum Catholicorum, ut gentes paganorum, & hæreticorum, quæ in sua feritate confidunt, dextera tuæ potentia conterantur. Per Christum Dominum nostrum. Amen.

Si vero hostes sint Christiani, dicantur istæ Orationes.

Oremus.

Protektor noster aspice Deus, & ab inimicorum nos defende periculis, ut omni perturbatione semota, liberis tibi mentibus serviamus.

Deus refugium nostrum, & virtus, adesto præsens Ecclesiæ tuæ precibus Auctor ipse pietatis, & præsta, ut ab omni exuamur bellorum nequitia, & in tuæ protectionis securitate latemur. Per Christum Dominum nostrum. Amen.

COMMENTARIUS.

I. Inter alios Lutheri errores in celeberrima Leonis Papæ X. Bulla damnatos trigessimus quartus est ille, non licere Christianis bellum gerere contra Turcas, quia scilicet voluntas Dei esse videtur, ut a Turca tanquam flagello quodam puniamur, & non licet nobis Dei voluntati resistere; quod autem ista sit voluntas Dei, probat Lutherus ipse in assertionem prædicti articuli xxxiv. ab experientia, quæ docuit hætenus, nihil Christianis profuisse bellum contra Turcas. Sed inepta est, ac inutilis hæc Lutheri ratio; nam, ut scite docet Bellarminus Lib. III. *De laicis*. Cap. xvi. etsi voluntas Dei sit, ut peccata nostra per Turcam puniantur, tamen non est voluntas Dei, ut Turcæ non resistamus, imo voluntas ejus est, ut illi resistamus. Non enim Deus permittit, Turcam in nos sævire, ut pereamus, sed ut convertamur; tunc autem ad conversionem perducimur, cum Turcæ nos oppugnanti resistere conamur, resistendo laboramus, laborando nostram infirmitatem agnoscimus, atque inde ad Deum toto corde revertimur, & ejus auxilium imploramus. Itaque ex fine, quo Deus permittit, Turcam in nos sævire, sequitur manifeste, ipsum velle, ut Turcæ resistamus. Præterea ita flagellum Dei est bellum Turcæ, sicut pestis, fames, hæresis, fomes peccati, & similia, nemo autem tam stultus est, qui ideo putet, non esse quærenda medicamenta contra

To. I.

pestem, neque terram colendam, ne moriamur fame, neque hæresi, & fomiti resistendum.

II. Sed neque verum est, quod dicit Lutherus, experientiam docere, nihil nobis prodesse bellum contra Turcas; nam, ut omittamus plurimas victorias de Turcis relatas, certe cum primum arma illata sunt in Terram promissionis, felicissimo eventu Jerusalem a nostris recuperata fuit, & regnaverunt Christiani annis lxxxviii. donec oriri cœperunt inter ipsos Christianos Principes contentiones, quæ quidem causa potissima fuere, ut Turcæ ipsi suum dilatarint imperium. Dedit etiam dilatationi ipsi causam Lutherum, ex Joanne Cochleæ patet, qui in actis Lutheri anni mxxxvi. ait, perierisse tunc Hungariam, quia Germani a Rege Hungariæ vocati in auxilium, maluerunt Luthero parere tunc concionanti contra bellum in Turcas, quam cogitare, quid bonum commune postulet. Porro tanto odio Romanum Pontificem persequutus est Lutherus, ut plane optaret, videre Turcam occupantem omnia Regna Christianorum, ut saltem eo modo nomen Pontificis extingueretur. Neque hoc fuisse votum, ac desiderium ejus, divinare se ait Bellarminus, sed ex verbis illius colligit, quippe qui in Libro ad nobilitatem Germaniæ, Cap. xxv. asserere non erubescit, nullum esse pulchrius regimen usquam, quam apud Turcas, qui legibus Alcorani gubernantur; nullum autem turpius, quam

X x 2

quam apud Christianos, qui Jure Canonico, & Civili reguntur; & in assertione citati articuli xxxiv. non veretur affirmare, Pontificem, & Pontificios esse multo peiores, & truculentiores Turcis, & stultum esse pugnare pro pejoribus Turcis, contra meliores; & in Epistola quadam contra duo mandata Imperialia, Oro, inquit, *cunctos pios Christianos, ne ullo modo sequamur, vel in militiam ire, vel dare aliquid contra Turcas, quandoquidem Turca decies prudentior, probiorque est, quam sunt Principes nostri.*

III. Tædet in hisce Lutheri deliriis amplius immorari; quis enim nescit, justam habere causam Christianos inferendi bellum Turcis, qui nullo jure tot Christianorum Regna occuparunt, qui extinguere penitus cupiunt Christianam Religionem, omnemque navant operam, ut homines Christiani fiant Mahumetani. Merito itaque & antiqui Summi Romani Pontifices, & recentiores, Urbanus II. Paschalis II. Eugenius III. & alii multi, necnon Generalia Concilia Lateranensia, itemque Lugdunense, Vienneuse, & alia, generale bellum indixere Turcis; Sanctique Viri suis concionibus publicis populos ad hujusmodi bellum excitarunt, & sermonem miraculis confirmarunt, ut ipsemet S. Bernardus modeste indicat initio Libri II. *De consideratione ad Eugenium III.* Porro tanta est absurditas, & impietas ejus sententiæ, quam Lutherus aliquando docuit, ut idem ipse Lutherus postea contrarium scripserit in Libro, *De Visitatione Saxonica*, ubi sic inter alia inquit: *Clamant aliqui Prædicatores temerarie, non resistendum esse Turcæ. Hic sermo seditiosus est, qui neque ferri, neque permitti debet. Tenentur igitur Potestates resistere Turcis, qui non solum cupiunt Provincias devastare; uxores, ac liberos violare, & interficere, verum etiam jura Provincia, cultum Dei, omnemque ordi-*

nationem bonam abrogare, ac tollere. Idcirco debent Principes ob id præcipue belligerare &c. Tum etiam ibidem subdit: *Multo tolerabilius foret viro bono videre filiorum suorum interitum, quam Turcicis eos moribus imbui. Turca enim nullam prorsus honestatem vel sciunt, vel curant.* Ita Lutherus.

IV. Longum esset recensere hoc loco veterum exempla Pontificum, qui sacro contra infideles, ac præsertim Turcas fœdere Christianos Principes jungi procurarunt. Laudandus præ ceteris S. Pius V. cujus zelum, ac studium literis consignavit in ejus Vita Clarissimus Gabutius Lib. III. Cap. 1. & seq. Is Pontifex, ut inter alia Capite II. inquit memoratus Auctor, Præfecturæ munus Marco Antonio Columnæ Paliani, Taleacotique Duci, Neapolitani Regni Equitum Magistro, III. Idus Junii anno Domini mclxx. detulit; eumque utpote Virum prudentissimum, ac bellicæ virtutis laudibus insignem duodecim Pontificiis triremibus cum potestate præfecit. Quæ res magno apparatu, ac pompa perfecta est. Nam ad cælestem opem pro felicissimo rerum successu suppliciter implorandam per Marcum Antonium Cardinalem Columnam coram Pontifice in publico amplissimorum Patrum cœtu, in Sacello Pontificio, peracto Sacrosancto Missæ Sacrificio, Pius sacris de more precibus adhibitis, suis ipse manibus Columnæ dedit Præfecturæ Vexillum ex damasceno serico rubro confectum, in quo erat Christi Domini de Cruce pendentis Imago depicta, atque hinc inde effigies Sanctorum Apostolorum Petri & Pauli, his verbis inscriptis: *IN HOC SIGNO VINCES.* Ut qui Constantini illius Magni pietatem, & animi magnitudinem egregie referret, is eodem, quo ille, fausto, ac salutari signo tanquam hostilis cujusque, & infestæ violentiæ propugnaculo contra Christiani Nominis hostes felicissime uteretur.

§. III.

In publicatione fœderis initi pro defensione Ecclesiæ, & conservatione pacis.

Lectis de more Capitulis, surgit Pontifex sine Mitra, & dicit: *Te Deum laudamus.* Chorus prosequitur. Quo finito, pronunciat Pontifex: *Pater noster &c. Et ne nos inducas in tentationem. R. Sed libera nos a malo. V. Salvos fac servos tuos Domine. R. Deus meus sperantes in te. V. Dissipa gentes, quæ bella volunt. R. Ut liberentur dilecti tui, & confiteantur Nomini tuo. V. Concede Domine populo tuo, ut sit ei cor unum, & anima una. R. In observatione mandatorum tuorum. V. Mitte nobis Domine auxilium de Sancto. R. Et de Sion tuere nos. V. Domine exaudi orationem meam. R. Et clamor meus ad te veniat. V. Dominus vobiscum. R. Et cum spiritu tuo.*

Oremus.

Ecclesiæ tuæ quæsumus Domine preces placatus admitte, ut destructis adversitatibus, & erroribus universis, secunda tibi serviat libertate. Per Christum Dominum nostrum. Amen.

Deus auctor pacis, & amator charitatis, quem nosse, vivere; cui servire, regnare est; protege ab omnibus impugnationibus supplices tuos, ut qui in defensione tua confidimus, nullius hostilitatis arma timeamus. Per Christum Dominum nostrum. Amen.

COMMENTARIUS.

I. **C**onsuevisse jam olim Summos Pontifices pro defensione Ecclesiæ jus gladii assumere, & conscribere exercitum,

docent nos passim Scriptores. Primum qui id fecerit, fuisse S. Gregorium VII. affirmant Leodienses in famosa adversus Paschalem II. Epistola

stola pro Henrico Imperatore: *Quis Pontificem Romanum, inquit, unquam suis Decretis auctorizavit, ut debeat gladio, ac bello in peccantes uti? Gregorius primus hujus nominis Papa, quid omnes ante se Papa super hoc senserint, & quid omnes post se sentire debeant, ostendit scribens Sabiniano Diacono.* Laudatam S. Gregorii Epistolam in eodem nobiscum sensu exponunt, & pergunt: *Hoc exemplo omnes a primo Gregorio contenti, utebantur solo gladio spirituali usque ad ultimum Gregorium, qui primus se, & suo exemplo alios Pontifices contra Imperatores accinxit gladio belli.* Tum vero inferius hæc subdunt: *Solus Hildebrandus Papa ultimam manum sacris Canonibus imposuit, quem legimus præcepisse Mathildi Marchionissæ in remissionem peccatorum suorum, ut debellaret Henricum Imperatorem.* Ecclesiæ hostes, & proprio, & alieno gladio invadere, istisque militibus plenam peccatorum indulgentiam impartiri non ergo primus cœpit in Claromontana Synodo anni mxcv. Urbanus II. ut quidam opinati sunt, sed antea id fecerat laudatus Pontifex S. Gregorius VII. illiusque factum in Henrici Imperatoris gratiam damnavit Clerus Leodiensis, uti notavit eruditus Lupus Tomo IV. Operum editionis Venetæ in Scholio ad Canonem VI. Remensis Concilii S. Leonis IX.

II. At vero certum illud est, jam ante Gregorium VII. S. Leonem IX. movisse exercitum contra Normannos, & propria manu pugnasse: *Leo Papa, inquit Marianus Scotus ad annum MLI. exercitum ducens per Apuliam contra Nortmannos, infinita utrobique cade peracta, sine victoria rediit.* Eundem annum signant Lambertus Schafnaburgensis, & Chronographus Hildensheimensis. De ea pugna ita scribit Sigebertus Gemblacensis: *Leo Papa, dum Nortmannos a Romanorum terminis deturbare nititur, multam calamitatem incurrit, quia cum multis etiam ipse capitur; sed tamen ipse relaxari noluit, nisi etiam suis relaxatis.* Quod ipsum referunt in generali Historia Otho Frisingensis Lib. VI. Cap. xxxiii. & in Chronico ad memoratum annum MLI. Hermannus Contractus, ajens bellum istud merito fuisse infelix: *Quia tantum Sacerdotem spiritualis potius, quam pro caducis rebus carnalis pugna decebat.* Reprehendit quoque hanc in Leone Papa IX. expeditionem S. Petrus Damiani Lib. IV. Epistola IX. ad Oldericum Firmanum Episcopum, afferens, laudatum Pontificem per gestum contra Normannos bellum, a S. Gregorii Magni, S. Ambrosii, & similium Episcoporum moribus, & regulis deviasse. Verum multis argumentis hanc S. Petri Damiani opinionem egregie refellit Baronius ad annum MLI. Num. xlii. & seqq. Sane erat Leo IX. nobilis Francus Tullensium antea Episcopus, ideoque Francorum Episcoporum, qui exercitum in hostes ducere, & propriis etiam manibus pugnare consueverant, solemnem morem factus Papa non statim dereliquit, uti observat laudatus Lupus loco citato.

III. Quicquid sit, exercitum quidem duxit memoratus Pontifex, sed non fuit tamen ipse primus Papalis militiæ institutor; jam enim & ante ipsum Gregorius VI. creatus Pontifex anno Domini mxlii. pro defensione Ecclesiæ militem conscripsit, atque pugnavit. Ejus tempore ob inuasas a Laicis omnes ferme S. Petri possessio-

nes, pauperrima erat Romana Ecclesia, Italia plena latronibus, ipsorum in potestate erat cum Fidelium oblationibus Basilica etiam Lateranensis, Excommunicatio Papalis spernebatur, Henricus III. Imperator Germanicis occupatus bellis auxilium negabat. Hinc ergo militem conscripsit Pontifex, Lateranensem Basilicam a latronibus, insignemque Apostolici patrimonii portionem a violentis raptorum manibus recuperavit, atque Italicas ad Urbem vias piis peregrinantibus securas reddidit. Ejus rei causa a multis etiam suis Cardinalibus fuisse appellatum sanguinarium, & multa passum, scribit in suo Chronico Guillelmus Monachus Malmesberienensis. Quicquid sit non solum Leo IX. aut Gregorius VII. sed & omnes alii hucusque Pontifices armatam militiam pro defensione Ecclesiæ habuere. Etenim post Gregorii VII. tempora, ipsique motam ab Henrico Imperatore IV. schismaticam, & barbaram rebellionem, de qua diximus Tomo III. Conciliorum, non in solis suis patrimoniis raptores Reges & aut Principes, sed & in ipsa Romana Urbe populares seditionos, ideoque & exilia passi sunt Pontifices, adeo ut a Gregorio IX. & annum tributum exegerit Romanus Senatus, prætenderitque, nec Urbem posse interdici a Pontifice, nec ullum civem excommunicari. Atque hinc militiam suam auxit laudatus Gregorius, eique præfecit Petrum Vintoniensem Episcopum, de quo Matthæus Parisius ita scribit ad annum mcccxiv. *Idem Episcopus fuerat in obsequio Richardi Regis Anglorum bellatoris magnifici diebus adolescentia sua, ubi plus didicit in bello dimicare, quam Evangelii semina prædicando seminare.*

IV. Quamquam autem hæc graviter reprehenderint magnus laudati Gregorii Papæ IX. æmulus Imperator Fridericus II. eique adhærentes, fatendum nihilominus est, optime se gessisse Pontificem; absque armata enim illius militia patrimonium Apostolicæ Sedis tunc proculdubio invasissent laici Principes, & juxta detestabilem Arnoldi Monachi Brixienensis prædicationem Romanus Episcopus, & Clerus omnis ex solis Fidelium oblationibus jamdudum victitare debuisset. Porro afferri & alia possent exempla Pontificum, qui ad compefcendam laicorum Principum, civiumque Romanorum insolentiam Milites conscripserunt, ut Ecclesiam defenderent; sed his omiſſis, lubet & hoc loco adnotare, quod tradit Theodoricus Niemus Lib. VII. *De Schismate*, nempe Bonifacium IX. Pontificem stipari cœpisse armata militia in omni publico per Urbem processu. Quam ob causam ita procederet, exponit citato loco idem Niemus. Itaque, uti ex hæcenus dictis constat, necessitate exigente, post annum Christi millesimum, cœpere Pontifices armata uti militia, primusque ejus institutor fuisse videtur Gregorius VI. creatus Pontifex anno mxlii. Teste Luitprando Lib. III. Cap. xli. Joannes XI. *Marozia filius, quem ex Sergio III. Papa meretrix ipsa genuerat*, constitutus Pontifex anno cmxxxi. potentia Vidonis Tusciæ Provinciæ Marchionis, cui Marozia nupsit, clypeum quidem, & lorica quandoque induit, & ita spectandum populis se exhibuit, *verum sine militia, quam Romana tunc Ecclesia adhuc ignorabat*, uti notat doctissimus Lupus loco citato, ubi etiam & alia observat, quæ legi a curioso lectore possunt.

OR.

ORDO QUOMODO PAPA EQUITAT
IN PONTIFICALIBUS.

T I T U L U S XII.

I. **S**olemnes equitationes Romanorum Pontificum frequenter occurrunt in prisca Romanis Ordinibus, Cæremonialibus, atque in mss. Cæremoniariarum Apostolicarum Diariis.

Data Ecclesiæ pace, quanta olim cum pompa Romanus Præsul incederet, testis est antiquus Scriptor Ammianus Marcellinus, qui in Historia sua Lib. xxvii. apud Baronium anno ccclxvii. loquens de Schismate Damasum inter & Ursicinum, inter alia inquit, haud se mirari, si tanta contentione Romanus Episcopatus appeteretur, cum, ut ait, illum adepti, *futuri sint ita securi, ut ditentur oblationibus matronarum, procedantque vehiculis insidentes, circumspette vestiti, epulas curantes profusas, adeo ut eorum convivia regales superent mensas*. Certe quidem ita Romæ his temporibus effulgebat splendor Pontificum, ut ipsis etiam amplissimis Magistratibus invidiam commoveret. Unde Prætextatus ille Romanorum nobilissimus, qui in Valentiniani, atque Valentis Imperatorum exordio in Græcia Proconsulatum gessit, aliisque Magistratibus deinde etiam Romæ auctus fuit, teste S. Hieronymo in Epistola lxi. ad Pammachium, solebat ludens ipsi Damaso Papæ dicere: *Facite me Romanæ Urbis Episcopum, & ero protinus Christianus*. Ut plane appareat, quod notat idem Baronius ad ipsum annum ccclvii. summo, atque regali Christi Ecclesiæ Sacerdotio, regiam pariter ma-

gnificentiam tunc temporis fuisse conjunctam.

II. Sequioribus seculis solemnibus equitatione Romanos Pontifices diebus præsertim solemnibus ad Ecclesiam procedere consuevisse, docent passim citati Romani Ordines, præ ceteris ita Romanus primus Ordo inquit apud Mabillonium Tomo II. Musei Italici, pag. 4. *Diebus solemnibus sicuti est Pascha, primo omnes Acolythi regionis tertiæ, & Defensores omnium Regionum convenientes diluculo in Patriarchio Lateranensi præcedunt Pontificem pedestres ad Stationem, stratores autem laici a dextris, & a sinistris equi ambulant. Qui autem eum equitantes præcedunt, hi sunt, Diacones, Primicerius, & duo Notarii Regionarii, Defensores regionarii, Subdiaconi regionarii. Procedunt vero divisim turmis, spatium inter se, & Apostolicum facientes. Post equum vero hi sunt, qui equitant, Vicedominus Vestiarius, Nomenclator, atque Sacellarius. Unus autem ex Acolythis Stationarius præcedit pedester equum Pontificis, gestans sanctum Christum manu in mappula involuta cum ampulla &c.* Similia leguntur in aliis Ordinibus. Nomenclatoris autem officium erat convivas invitare, eorumque nomina describere, ut videre est apud eruditum Dufresne in suo Glossario, ubi etiam docet, Sacellarium idem fuisse, ac Thesaurarium a sacco seu facello, probatque ex S. Augustino in Psalmum cxlv. & ex S. Isidoro Lib. xx. Cap. ix. *Fiscus*, inquit, *saccus est publicus*.

§. I.

Pontificalis equitationis Ordo.

Si Romanus Pontifex Romæ, vel alibi moram trahens, velit de loco ad locum in solemnibus pompa, idest Pontificalibus, equitare, hic ordo servetur. Primo equitabunt valisarii Dominorum Cardinalium cum familiis ipsorum Dominorum Cardinalium, & aliorum Prælatorum mixtim incedentibus, ut eis placuerit, qui tamen longis vestibus utuntur. Clerici Pontificem non præcedunt cum istis, sed sequuntur. Tum per ordinem isti sequuntur. Tonsor, & Sartor Papæ cum valisiiis rubris, in quibus sunt vestes Pontificis. Familiares, & Scutiferi Papæ; Nobiles, & Barones minores cum attinentibus Cardinalium. Scala Papæ panno rubro cooperta, quam equus albus phaleratus portat. Equum aliquis ex Parasfrenariis Papæ freno ducit. Scala ipsa lignea, quæ tres gradus continet, equo Pontificis apponitur, per quam equum suum ascendit, si equitat; deinde reponitur super equum, & ad locum suum reducit. Post scalam equitant duodecim cursores Papæ cum duodecim vexillis rubris. Inde Vexilliferi Viri nobiles cum vexillis Civitatis, Papæ, Ecclesiæ, & Sanctæ Crucis, ornati, ut in Coronatione Pontificis diximus, & ordine ibi declarato. Si plura erunt Vexilla, pro dignitate illorum disponentur; digniora erunt ultima. Deinde equi duodecim albi phalerati freno ducentur sine sessoribus. Tum quatuor Nobiles portantes quatuor Pileos ex cremesino supra baculos quosdam ad mensuram trium, vel quatuor palmorum: hi Scutiferi honoris vocantur. Incedunt post hos Procuratores Regum, & Principum, Procurator Fiscalis, Advocati, & Secretarii mixti, ut alias dictum est; & post Cubicularii cum capuciis supra collum, & circa pectus inversis Secretarii, & Advocati, Cubicularii autem circa pectus tantum. Hos sequuntur Acolythi, Clerici Camera, & Auditores Rotæ cum Rochettis, & Cappis. Inde Proceres, & Barones majores, & Oratores Regum, & Principum simul cum Senatore, & Conservatoribus

Ur.

Urbis. Inter omnes Senator præcipuum locum habebit, cedetque tantum Oratori Cæsaris. Deinde si quis aderit Magnus Princeps, aut Præfectus Urbis, sive aliquis insignis, qui tamen non sedeat in scamno Cardinalium. Subdiaconi Apostolici postea equitabunt cum Rochettis, & Cappis, & ille qui fert Crucem Papalem, Pileum capite gestabit ab extra nigro panno, ab intus serico cum cordulis & mappulis cærulei coloris. Ante Crucem duo Magistri Ostiarii cum suis virgis sericeis. Immediate incedent post Crucem duodecim pedites Clerici, vel Laici accensa funalia deferentes, & juxta eos equitabunt duo Clerici Capellæ laternas duas argenteas præferentes, in quibus candelæ perpetuo lucent. Ducitur post equus albus phaleratus, mansuetus, & pulcher cum tintinnabulo ad collum benesonante, qui capfulam vehit cum Sacratissimo Christi Corpore, supra quod cives nobiles portabunt baldachinum. Funalia condecenter deferentur per Clericos cum Superpelliceis. Sic tempore Pauli Secundi aliquando fieri vidimus; nam tunc Beneficiati S. Petri ea portarunt. Post Sacramentum Sacrista Apostolici Palatii cum suo habitu, & baculo in manu equitabit; & post eum si quis aderit Princeps, qui in scamno Cardinalium sedeat. Nam inter Sacramentum, & Papam, & quando Sacramentum non adest, inter Crucem, & Papam nemo omnino incedere debet, nisi Cardinales, & qui cum eis sedent. Procedunt deinde Domini Cardinales, Diaconi, Presbyteri, Episcopi. Duo tantum assistentes antiquiores Diaconi Pontifici semper assistunt, & ante eum immediate incedunt. Senior ferulam manu gestat ex officio, ut Prior Diaconorum, & ad quem spectat ordinare Processiones; & ita omnes Libri antiqui Cæremoniarum continent, & servatum vidi tempore Pii Secundi, cum Prosper Columnensis erat Prior Diaconorum; & tempore Pauli, cum Rodericus Boria, qui nunc est Episcopus Portuensis erat Prior. Camerarius autem, si est Cardinalis, non debet portare ferulam, sed ejus Vicecamerarius, quia non ut Cardinalis, sed ut Camerarius portat ille, qui potest esse non Cardinalis secundum observationes superiorum temporum. Nostro tamen tempore & Latinus Ursinus, & qui nunc Camerariatum tenet Raphael S. Georgii Cardinales ferulam portare & Processionem ordinare consueverunt, Cardinale Senensi Priore Diaconorum id non modo æquo animo ferente, sed libentissime permitte. Procedet deinde Pontifex cum Pluviali, & Mitra pretiosa, sive cum Regno, idest, Tiara, tripici Corona ornata, vestus equo albo, sive sella sub baldachino; equum freno ducent primum majores Principes, deinde alii inferiores. Sellam humeris etiam a principio Principes, & alii, ut in Processione Coronationis diximus, portabunt. Post Pontificem Cubicularii duo secreti, & inter eos Decanus Rotæ, qui servit de Mitra, cum habitibus suis sequuntur; inde duo Medici cum Secretario Papæ, si non est Prælatus. Consuevit inter hos equitare Eleemosynarius Papæ, & aliquando cum videt pressuram circa Pontificem, spargere pecunias. Deinde serviens armorum armatus omnibus armis præter galeam equitat portans umbellam crocei rubeique coloris. Aliorum autem servientium armorum cum suis argenteis baculis pars equitat ante Crucem; alii vero discurrunt per pompam sursum, & deorsum: instantes, & curantes, ut pompa suo ordine procedat. Parafrenarii cum suis mantellis, Cursores cum virgis, & baculis argenteis, & etiam coraceis vento, sive stupa plenis, turbam semoventes; & Custodes Corporis cum baculis ligneis Pontificem pedites circumstant. Post umbellam sequuntur Prælati cum suis Cappis amplis, & Pileis, primum Patriarchæ si qui adsunt, tunc Assistentes Papæ Oratores Prælati, Archiepiscopi, Episcopi, Protonotarii, Abbates. Postremo Curiales Togati mixtim, ut placet, pompam claudunt.

COMMENTARIUS.

I. **S**olemni equitatione solemnibus statis diebus solitos fuisse antiquitus Summos Pontifices, ad Ecclesias Urbis a domo sua procedere, ut in eisdem Missarum solemnia Pontificaliter, ut ajunt, celebrarent, diximus supra in Commentario ad Tituli hujus rubricam. Sæpe etiam solitos ipsos fuisse, pro necessitate Ecclesiæ universalis, sive alicujus particularis, longinqua subire itinera, docent nos passim Ecclesiasticæ Historiæ. Sane pompa, quam nostrum Cæremoniale in hoc §. describit, nullatenus in antiquioribus Pontificum equitationibus inveni-

tur. Invaluit potissimum seculo xv. quo Augustinus Patricius Cæremoniale ipsum ordinavit; tametsi eodem seculo, quo Joannes Davantrias Cæremoniale suum scripsit, ordo minus sollemnis in itinatione Papæ servaretur. Ergo teste hoc Auctore equitaturus Pontifex in aliquem locum, primo in suo cubiculo Itinerarium recitabat: *Sciendum*, inquit, *quod, quando Papa equitat, antequam exiat de Camera, dicit ista quæ sequuntur. Antiphona. In viam pacis, salutis, & prosperitatis dirigat Dominus gressus nostros, & Angelus suus bonus comitetur nobis.*

biscum ad dirigendos pedes nostros in viam pacis, ut cum salute & gaudio eamus, & revertumur ad propria. *Postea dicitur totus Psalmus, Benedictus Dominus Deus Israel, cum Gloria Patri, & Sicut erat. Post reincipitur tota Antiphona: In viam pacis. Deinde sequitur: Kyrie eleison, Christe eleison, Kyrie eleison. Pater noster. Et ne nos. Sed libera &c. V. Esto nobis Domine turris fortitudinis. R. A facie inimici. V. Nihil proficiat inimicus in nobis. R. Et filius iniquitatis non apponet nocere nobis. V. Utinam dirigatur viæ nostræ. R. Ad custodiendas justificationes tuas in viam pacis. Domine exaudi orationem meam &c. Dominus vobiscum. Et cum spiritu tuo.*

II. Sequuntur mox tres orationes, nempe, *Actiones nostras quasumus Domine aspirando &c. & aliæ duæ, quæ leguntur in Itinerario Clericorum, quod legitur in fine Breviarii Romani; prima incipit: Omnipotens sempiterne Deus dirige actus nostros; altera, Deus, qui filios Israel. Sequitur deinde ordo ipse equitationis in hunc modum descriptus: Debet precedere Sahnerius Papæ, qui portat Capellam, & debet esse albus equus, vel mulus; & ire ante Crucem, & debet portare in collo campanellam, & cophini debent esse cooperti de scarlato rubeo; deinde Crux, quam debet Capellanus portare, imo Subdiaconus, deinde Camerarius Papæ cum Capellanis commensalibus, & ejus familia sequuntur Crucem. Hodie non servatur hoc, sed soli Cardinales precedunt immediate Papam sequentem ordinem. Nam ante Papam statim incedunt duo antiquiores Cardinales Diaconi, & ante illos alii duo secundum ordinem antiquitatis; & si ultimus Diaconorum non habet Diaconum socium, Prior Episcoporum, & ipse incedunt simul; & deinde combinatim incedunt ceteri Cardinales, Episcopi,*

& Presbyteri, ita quod antiquiores sint ultimi propinquiore Papæ; duo ultimi Presbyteri præcedunt omnes alios Cardinales. Subsequentur tres Cardinales cum eorum familiis, unus Episcopus, vel Presbyter, & duo Diaconi; postea veniunt equi albi Papæ, qui a parte posteriori cum tota sella debent esse cooperti de scarlato rubeo, a parte tamen anteriori debent esse discooperti totaliter; & famuli debent eos ducere peditando per frenum. Iste modus nunc servatur, licet antiquitus macerii consueverint eos ducere. Subsequently debent venire duo Domicelli Papæ portantes super singulos baculos longitudinis brachii duos Capellos Papæ, qui debent esse cooperti de serico. Subsequently venit Papa signando populum; post, vel circa quem debent Milites, & alii Domicelli esse, & macerii Papæ; & duo ejus Domicelli, seu macerii debent eum ducere per frenum equi, quem equitat, unus a dextris, & alius a sinistris. Hodie duo, vel plures de Magnatibus majoribus, qui ibi fuerunt; Forerii vero, vel dicti Cursores Papæ etiam peditando debent esse ante eum; portans vero papilionem debet ire post Papam; hodie vadit ante, vel juxta. Serviientes vero armorum, vel vocati macerii habent precedere Papam cum Camerario. Eleemosinarius Papæ debet ire retro ipsum, & pecuniam pauperibus spargere. Atque hic erat ordo solemnæ equitationis Papæ, quem describit in suo ms. Cæremoniali Davantrias, eratque in usu initio seculi xv. quo ipse claruit.

III. Placuit autem ordinem ipsum referre, ut inde addiscamus, solemnioris Pontificiæ equitationis pompam in hoc nostro §. descriptam cepisse primum circa medium seculum xv. Quicquid sit, tametsi eo seculo, & sequenti equitationes ipse frequentes essent, paulatim fere in defuetudinem abierunt.

§. II.

Ordo cum Papa equitat ad aliquam Ecclesiam religionis gratia, sive ad alium locum, & non in Pontificalibus.

Valisarii, & Familiares Cardinalium, & Prælatorum in brevibus præcedunt; valisarii Papæ, Scutiferi Papæ cum minoribus nobilibus, & attinentibus Cardinalium; aliqui equi albi phalerati sine sessoribus cum Magistro Stabuli; post eos Procuratores Regum, & Principum, & Fiscalis; duo Forerii cum pulvinaribus aureis, & tapeto, ut super his genuflectat Pontifex in oratione, & hoc si vadit ad aliquam Ecclesiam ad orandum, aliter Forerii non vadunt in ordine. Secretarii, & Advocati mixti; Cubicularii, & omnes cum suis capuciis super humerum sinistrum. Acolythy, Clerici Cameræ, Auditores Rotæ cum habitu quotidiano. Nobiles majores cum Oratoribus non Prælati, & Senatore. Subdiaconi cum Cruce, & Magistris Ostiariis. Post Crucem secundum antiquum, & debitum morem ipse Pontifex debet procedere equo, vel sella vestus, si non habet (1) Pluviale, & Mitram, & tunc habebit Stolum supra Rochettum, (2) longum succinctum, & desuper capucium parvum rubei coloris secundum debitum ordinem, quia supra Rochettum semper Papa utitur colore rubeo, præterquam a Sabbato Sancto ad Octavam Paschæ; hodie tamen, quia sic factitavit Sixtus Quartus, utitur plerumque albo capucio contra majorum normam; & deinde si est frigus, vel tempus pluviosum, Mantum rubeum apertum a parte anteriori, & Pileum in capite purpureum cum aureo limbo in extremitatibus. Deinde sequi debent Cardinales Episcopi, Presbyteri, Diaconi; sed tempore Sixti & post Crucem, quamvis incongrue Cardinales præcedebant, Diaconi, Presbyteri, Episcopi; & duo antiquiores Dia-

(1) Ita in editione Romana, in Veneta vero r. & Colonienſi legitur, *Stolum &c.*

(2) In eadem Veneta, & Colonienſi editione legitur, *longam succinctam.*

Diaconi assistunt. Custodes Corporis armati ante Crucem instructi acie incedunt. Post Pontificem mox sequuntur duo secreti Cubicularii cum Secretario, si non est Prælatus, & duo Medici. Decanus Rotæ non adest, quia Pontifex non habet Mitram. Cardinales cum sequuntur, primo erunt Episcopi, tum Presbyteri, demum Diaconi omnes, quia non assistunt Pontifici, cum non habet Mitram; sequuntur deinde assistentes Prælati, Oratores Prælati, Archiepiscopi, Episcopi, Protonotarii, Abbates, & alii Curiales togati mixti.

COMMENTARIUS.

I. **G**ratia religionis solitos fuisse aliquando Summos Pontifices ad aliquem locum equitare, docent & Historiarum Vitarum ipsorum Pontificum, & mss. Apostolicorum Cæremoniariorum Diaria, in quibus etiam ritus narratur ejus equitationis. Tradit Viçtorellus in Notis ad Ciaconium, ubi Vitæ Pii II. Papæ illustrat, Pium ipsum Anconam iturum, ut Crucesignatorum classem contra Turcas pararet, Lauretanam ad ædem in eodem itinere divertisse, Calicemque aureum, & Patenam ponderis insignis, & operis, nuncupati voti munus, Angelorum Reginæ, adjecta hac inscriptione, dedisse.

PIA DEI GENITRIX.

Quamvis tua potestas nullis coarctetur finibus, ac totum impleat Orbem miraculis: quia tamen pro voluntate sapius uno loco magis, quam alio delectaris, & Laureti tibi placitam sedem

per singulos dies innumeris signis, & miraculis exornas: Ego infelix peccator, mente, & animo ad te recurro, supplex orans, ut mihi ardentem febrim, molestissimamque tussim auferas, lassisque membris sanitatem restituas, Reipublicæ, ut oredimus, salutarem. Interim hoc munus accipito meæ servitutis signum.

Pius Papa II, anno hujus. Sal. MCDLXIV.

II. Notat præterea Viçtorellus, ubi Pius, xiv. Kal. Julii Roma discessit, lætica vestum, usque ad Pontem Milvium processisse, quatri-duoque adverfo tyberi lembo navigasse, & deinde terrestri itinere usum fuisse, Cardinales Carvaialium, & Papiensem in ipso itinere mensæ suæ honore prosequutum. Vide Campanum in Vita Pii II. Auctorem Commentariorum ipsius Pii, & Cardinalem Papiensem in Epistola sua lx i. Varia exempla quæ ad hunc §. spectant, legi possunt in aliorum Pontificum Vitis.

§. III.

Quando Cardinales debent præcedere Pontificem, & quando sequi.

Sed considerandum est, utrum in hac processione decentius Domini Cardinales præcedant, an sequantur Pontificem. Bonæ memoriæ Dominus Franciscus Cardinalis Mantuanus meo judicio hujus novæ consuetudinis auctor dicere solebat, Cardinales semper debere præcedere Pontificem, quando Pontifex habet Stolam. Sed cum vena dictum sit, hæc non est bona ratio, quia Pontifex nunquam debet exire in publicum sine Stola, & ita semper vidi servari a Pio II. cui per quatuor annos ad minus in suo Pontificatu deservivi; quem etiam per agros, & nemora peragrantem, eum Stola semper conspeximus. Et Paulus cum per Urbem vehebatur etiam lætica clausus, nunquam erat sine Stola, & in Matutinis certe majoris Hebdomadæ Pontifex exit ad Capellam cum Stola, & Manto; & quia sine Mitra Cardinales sequuntur, non autem præcedunt. Ego autem arbitror, Cardinalem Mantuanum, quia ut secundus Diaconus assistebat Pontifici, fuisse huic opinioni, ne unquam abesset a latere Pontificis. Ceterum, ut in Processionibus quando Prælatus est indutus sacris vestibus, Canonici sui præcedunt, quando autem profanis, & quotidianis, subsequuntur, ita & Cardinales Pontificem Mitratum præcedunt, sine Mitra, sequuntur. Neque unquam Pontifici sine Mitra existenti sit a Cardinalibus reverentia publica, & assistentia a Diaconis. De his tamen statuet Summus Pontifex, prout sibi placebit. Nos, ne antiquæ, & congruæ cæremoniæ omnino pereant, hæc pauca diximus.

COMMENTARIUS.

I. **C**erta est plane ea regula, quam docet hic noster §. ut nempe, sicut in Processionibus, quando Prælatus est indutus sacris vestibus, Canonici sui præcedunt, quando autem profanis, & quotidianis, subsequuntur, ita & Cardinales Pontificem Mitratum præcedunt, sine Mitra, sequuntur. Tradit & eam regulam non uno in loco Cæremoniale To. I.

Episcoporum, quod nos non ita pridem perpetuis Commentariis illustravimus, & ut alia ejus loca omittamus, sic quidem inquit Lib. i. Cap. xv. Num. ix. Ideo Canonici parati antecedunt Episcopum, quia itur sacra Processione; secus quando non sunt parati, nec Episcopus procedit cum Pluviali, & Mitra, vel cum Planeta, sed tantum in Cappa; tunc enim ipse debet antec-

Y y

re,

re, *Canonici vero subsequi, ut dictum fuit; quia non est Processio sacra*. Sane Collegium Cardinalium accuratam esse effigiem antiquissimorum Ecclesiæ Capitulorum, notavit non uno in loco Thomassinus, præsertim vero, Parte I. *Disciplina*, Lib. III. Cap. VIII. Num. XII. & Cap. X. Num. V. id quod etiam alii Scriptores docent, & post ipsos etiam nos sæpe in nostris ad laudatum Cæremoniale Episcoporum Commentariis advertimus.

II. Fuit quidem, ut ait hic noster §. ejus opinionis Franciscus S. R. E. Cardinalis Mantuanus, Ludovici scilicet Gonzagæ Mantuani Marchionis filius, a Pio Papa II. anno MCDLXI. creatus, Cardinales scilicet *semper debere precedere Pontificem, quando Pontifex habet Stolam*. Sed hanc opinionem, quam propugnabat memoratus Cardinalis Mantuanus, *ne unquam abesset a latere Pontificis*, quia scilicet ut secundus Diaconus Pontifici ipsi assistebat, merito Augustinus Patricius nostri hujus Cæremonialis ordinator in præsentī §. refellit, quia nimirum Romanus Pontifex Maximus *numquam debet exire in publicum sine Stola*; adducitque exempla laudati Pii Papæ II. & Pauli itidem II. quorum primus, cui adminus in suo Pontificatu per quatuor annos deservivit, per agros etiam, & nemora peragrans, Stolam semper gestavit, alter vero licet per Urbem lætica clausus veheretur, numquam sine Stola erat. Consuevisse jam olim non modo Summos Romanos Pontifices, sed & Episcopos quoque, & Presbyteros atque Diaconos jugiter Stolam deferre, ostendimus nos in nostris Commentariis ad Pontificale Romanum. Certe de S. Thoma Cantuariensi Episcopo scribit in ejus Vita Joannes Saresburiensis apud Mabillonium in Præfatione ad Seculum I. Benedictinum, Num. CVIII. quod *Stolam jugam Christi suave circa collum, diebus, ac noctibus habebat*, Quod Presbyteros spectat, statuit quidem Concilium Moguntinum anni Domini DCCCXIII. Can. XXVIII. *ut Presbyteri sine intermissione utantur Orario propter differentiam Sacerdotii dignitatis*. Huc respiciunt Caput CLXIX. Libri VI. Capitularium, & Canon XXVI. Concilii Triburiensis apud Burchardum Wormaciensem Lib. VI. Cap. X. *Ut Presbyteri non vadant nisi Stola, vel Orario induti*.

III. Gestare denique solitos fuisse & Diaconos Stolam primo suæ Ordinationis anno,

docet nos Auctor Vitæ S. Mauri Abbatis, *Qui claudum, & mutum curaturus, Stolam, cum qua eodem anno, jubente Beato Magistro suo, ordinatus ad ministerium fuerat Leviticum, & quam juxta morem, sanctitatis gratia, primo indefinenter ferebat anno, de collo suo protulit, & super caput infirmi, Crucis signum faciens, posuit*. Qui ritus si ab aliis Diaconis usurpabatur, certe non alio consilio, aliove fine, inquit eruditissimus Thyers, de Stola Diaconali agens, quam ut Ordinis sui dignitatem in oculis haberent semper, atque a Subdiaconis discriminentur, quemadmodum liquet ex Canone IX. Concilii I. Bracarensis, quod celebratum fuit anno Christi DLXIII. *Placuit, inquit, ut quia in aliquantibus hujus Provinciae Ecclesiis Diacones absconsis infra Tunicam utuntur Orariis, ita ut nihil differre a Subdiacono videantur, de cetero superposito scapula, sicut decet, utantur Orario*. Orarium idem est, ac Stola, viderique possunt, quæ de hac re, & de Bracarensis Canonis interpretatione scripsimus in Opere, *De Codice Sancti Evangelii &c.* Lib. II. Cap. X. ubi etiam Joannem Cardinalem Bonam confutavimus, qui memoratorum Conciliorum Canones, ubi loquuntur de Orario, seu Stola a Presbyteris *sine intermissione* gestanda, intelligendos esse autumat de Orario, seu Stola improprie accepta, seu de veste talari, quam re vera sine intermissione deferre hodieque Sacerdotes tenentur.

IV. Invaluit vero pluribus ab hinc seculis usus, ut solus Romanus Pontifex propter ejus singularem præstantiam sacra Stola decoratus incedat. Quamobrem in Urbe Roma ob Papæ reverentiam sacri Oratores, Sacerdotes scilicet, quos seculares vocant, itemque Regulares, qui Superpelliceis utuntur, sine Stola concionantur, quam alias in sacris Concionibus pendentem a collo habere deberent, Etiam Parochi Romæ præterquam in exequiis, deferre Stolam in sacris Processionibus diu abstinerunt, sed tandem nostro hoc tempore Sapientissimus Dominus noster BENEDICTUS XIV. Ecclesiasticæ disciplinæ peritissimus gestationem Stolæ eisdem permisit, nullam inde agnoscens irrogari injuriam Pontificiæ majestati. Hinc non video, cur & ipsi sacri Oratores cum verbum Dei Romæ prædicant, sacram Stolam e collo pendentem adhibere nequeant.

§. IV.

De itineratione Papæ, quando ad alias Urbes, seu alia loca vult se transferre.

Pontifex cum ad alia loca vult transmigrare, primum re cum sacro Collegio communicata, deleget aliquos ex Dominis Cardinalibus, qui itineris sui sint comites, & ad minus tres, ex quibus duo sint Diaconi, alius Episcopus, sive Presbyter; et si non adesent tot Diaconi, poterit unus esse Presbyter pro illo Diacono. Alii Cardinales præire, vel sequi poterunt, vel remanere, si brevi Papa est rediturus, prout eis videtur. Sed honestum est, quod aliqui præcedant. Si Papa est ingressurus aliquam Civitatem insignem, ne videatur ita solus, & ut honorent ingressum, præmittentur Commissarii, qui (1) provideant in dies de hospitibus pro Pontifice, & sua familia, pro Cardinalibus, & aliis Pontificem deducantibus, & isti habebunt nomina omnium in volumine, sive in rotulo, ut sciant pro quibus debeant providere.

(1) Ita in editione Romana, in Veneta I. legitur: *qui curent hospitibus &c.*

dere. Pontifex cum suo Capucio, & Stola ad collum, Mantello rubro, & Galero ex cremusino equitabit, sive portabitur in sella; & antequam discedat camera sua, dicet has orationes: *In viam pacis, salutis, & prosperitatis dirigat Dominus gressus nostros, & Angelus suus bonus comitetur nobiscum ad dirigendos pedes nostros in viam pacis, ut cum salute, & gaudio eamus, & revertamur ad propria.* Postea dicitur totus Psalmus: *Benedictus Dominus Deus Israel, cum Gloria Patri, &, Sicut erat.* Postea repetitur tota Antiphona: *In viam pacis &c.* Deinde sequitur: *Kyrie eleison, Christe eleison, Kyrie eleison. Pater noster. Et ne nos inducas in tentationem. Sed libera nos a malo. V. Esso nobis Domine turris fortitudinis. R. A facie inimici. V. Nihil proficiat inimicus in nobis. R. Et filius iniquitatis non apponat nocere nobis. V. Utinam dirigantur via nostra. R. Ad custodiendas justificationes tuas in viam pacis. V. Domine exaudi orationem meam. R. Et clamor meus ad te veniat. V. Dominus vobiscum. R. Et cum spiritu tuo.*

Oremus.

Actiones nostras, quasumus Domine, aspirando praeveni, & adjuvando proseguere, ut cuncta nostra oratio, & operatio a te semper incipiat, & per te caepa finiatur. Omnipotens sempiternus Deus dirige actus nostros in beneplacito tuo, ut in Nomine dilecti Filii tui mereamur bonis operibus abundare.

Deus, qui filios Israel per maris medium sicco vestigio ire fecisti; quique tribus Magis iter ad te stella duce pandisti, tribue nobis, quasumus, iter prosperum, tempusque tranquillum, ut Angelo sancto tuo comite, ad eum, quo pergimus, locum, ac demum ad aeternae felicitatis portum feliciter pervenire valeamus. Per Christum Dominum nostrum. Amen.

Deinde capit iter suum. Ante Pontificem semper praefertur Crux per Subdiaconum Apostolicum, & post Crucem portabitur Corpus Christi super equum album cum campanella: ante equum praebet Clericus Capellae cum laterna cum lumine, & post Sacrista cum ferula, & isti semper erunt inter Papam, & Crucem.

COMMENTARIUS.

I. **D**iximus supra in Commentario ad rubricam hujus Tituli de ritu itinationis Papae ex ms. antiquo Cæremoniali Joannis Davantriae, & de precibus, quas ex eodem Cæremoniali descripsimus. Illud autem primum hoc loco explicabimus, quod est de habitu Papae iter agentis: *Pontifex cum suo Capucio, ait noster &. & Stola ad collum, Mantello rubro, & Galero ex cremusino equitabit, sive portabitur in sella &c.* Usus fuisse Pontificem jam ante editionem hujus Cæremonialis Chlamyde cum Capuceo de scarletto albo, docet nos in suo Romano xv. Ordine Petrus Amelius, Cap. XLVIII. Forte Capucium est illa vestis, quam Mozzettam dicimus, de cujus loquitur antiquum ms. Diarium relatum ab erudito Philippo Bonannio in sua Hierarchia Ecclesiastica, his verbis: *Caputium autem Pontificis Maximi recens indumentum antiquis Pontificibus omnino incognitum. In Galliis extitit mutatum, cum Apostolica Sedi in illis partibus contigit commorari. Ibi enim propter aeris intemperiem, ac hiemis asperitatem, veteri illo Manto deposito, Mantellum, & Caputium purpureum Pontifices prima vice induere incæperunt &c.* Sane post restitutam in Urbem Apostolicam Sedem a Gregorio Papa XI. in Cæremonialibus eorum temporum occurrit passim mentio Capucii Papalis, & Mozzettæ, de qua videri possunt quæ scripsimus nos Tomo I. Cæremonialis Episcoporum, Libro I. in Commentario ad Caput II. Alia vero quæ in hoc §. statuuntur, ac praesertim de Eucharistiæ prælatione, iter agente Summo Pontifice, jam supra explicata a nobis abunde.

de fuerunt, ubi etiam nonnihil diximus de origine ejus ritus, de quo peculiare Opusculum scripsit Angelus Rocca.

II. Restat ut alterum explicemus, quod in secunda Oratione hujus §. dicitur, de tribus nempe Magis, quibus Deus iter stella Duce ad Christum recens natum monstravit, ex ipsa enim Oratione addiscimus, tres fuisse Evangelicos Magos; quem etiam numerum solide inter alios probat eruditus Melchior Inchofer in Libro cui Titulus, *Tres Magi Evangelici*, Cap. xxvi. Tres itidem Magos fuisse docet marmorea lamina sepulcralis reperta hoc anno MDCCCL. in Cæmeterio Priscillæ, & collocata in porticu S. Mariæ trans Tyberim. Ea namque præter vultum cum reliqua superiori parte corporis feminae, cui conjuncta est perbrevis epigraphe, *Severa in Deo vivas*, spectandam offert graphito, ut ajunt, opere expressam Deiparam in Cathedra compositam, tenentemque manibus puerulum Jesum super genua sedentem, ad quam propere videntur successivo gradientes ordine, gestantesque ambabus ulnis complexam non vacuum quampiam patenam Viri tres decoram chlamydem tunicamque viatorum more succinctam induti. Per hos autem nequis dubitaret significari Magos Christi adoratores, prospexit satis operis artifex, excelsius ibi stella expressa, & quidem Deiparam inter, & properantes illos, quam Evangelium stetisse narrat loco, ubi puer erat, addita insuper figura hominis pone Cathedram indicatam stantis, & eandem stellam digito monstrantis, hoc est, ut arbitror, Josephi Sanctissimi Viri Mariæ.

Y y *

§. V.

§. V.

Ordo intrandi aliquam Urbem in Pontificalibus.

Cum autem Pontifex voluerit intrare aliquam insignem Urbem, firmabit se in aliqua Ecclesia, vel domo extra portam civitatis, & ibi capiet Pluviale, & Mitram, & interim omnia parabuntur, quæ portantur in pompa, quando Pontifex equitat in Pontificalibus, scilicet Vexilla parva, & magna, & cum illis Vexilla Civitatis, in quam intrat; equi phalerati, Pilei quatuor, equus cum scala, umbella, & reliqua, baldachinum pro Sacramento, & pro Papa cives invenient. Erit etiam paratus Clerus Urbis illius cum Crucibus, & Reliquiis Sanctorum extra portam Civitatis. Pueri etiam obviabunt pedites, cum ramis olivarum, vel aliarum arborum, clamantes, *Vivat Papa*. Pontifex cum sua Curia equitabit eo ordine, quo superius diximus, in Pontificalibus, hoc addito, quod sarcinæ Pontificis præcedent omnes equos, & Clerus paratus cum sua Processione ibit immediate ante Crucem Papæ. Si autem aliqui Cardinales exeuntes de Civitate obviabunt Pontifici, postquam habuerit Mitram, & Pluviale, advertat ille, qui ducit equum cum scala Papæ, ut statim præcedat, & deponat scalam ad dextram partem Papæ. Cardinales autem descendant ex equis suis remote, & accedent reverenter ad Papam; & primo osculentur ei pedem, & manum, deinde per scalam ascendant, & osculentur faciem; postea ascendant suos equos, & vadant in suo ordine. Hoc servatum legimus apud Majores nostros; & quia videtur in se habere gravitatem, & majestatem, quamquam in usu non viderimus, placuit his addere. Cum Pontifex erit prope portam Civitatis, Prælatus illius cum Cruce accedat ad Pontificem debitis reverentiis, & offert illi Crucem osculandam, quam Pontifex reverenter, cum Mitra tamen, osculabitur; non enim commode poterit ei abstrahi, & imponi Mitra equestri ab equestribus. Si tamen placuerit & Mitram deponere, non erit inconveniens. Deinde Prælatus incipiet Antiphonam: *Eccce Sacerdos Magnus &c.* & aliam: *Dum esset Summus Pontifex &c.* & ibit cum Clero ad locum suum ante Crucem in Porta. Princeps Civitatis, etiamsi sit Rex, ducet equum Pontificis fræno, vel si Pontifex vehitur sella, subit sellam cum suis Processionibus dignioribus per aliquot passus; deinde jubente Pontifice, alii succedunt ei, & ille ascendit equum, & equitat in suo ordine. Si vero Civitas non sit sub Principe, sed libera; tunc Summi Magistratus ducunt equum fræno, vel subeunt sellam a principio, & mox mutantur, & alii nobiles cives succedunt; sed post Magistratus vadunt circa Pontificem pedites, alii autem portant baldachinum supra Pontificem, alii supra Sacramentum. Cum Pontifex pervenerit ad portam Ecclesiæ principalis, Prælatus offert ei Aspersorium cum aqua benedicta, & Pontifex aspergit se ipsum, & circumstantes. Deinde imponit incensum in thuribulo, & per Prælatum incensatur. Si autem Pontifex descenderit ex equo, antequam intret Ecclesiam, & si Diaconi Cardinales erunt prope ipsum, antiquior de manu Prælati accipiet Aspersorium, & porrigit Pontifici, & ministrabit navicellam, cum Pontifex ponet incensum, & Clerus cantabit, *Te Deum laudamus*. Cum perventum fuerit ad Altare, genuflectet Pontifex ad orandum ante Altare super Faldistorium, quousque fuerit finitum, *Te Deum laudamus*. Et Prælatus Ecclesiæ dicet super eum Versiculos, & Orationes, prout diximus in nostro Pontificali, in receptione Pontificis. Quibus dictis, Pontifex surgit, ascendit ad Altare, & solemniter benedicit populo, dicens: *Sit Nomen Domini benedictum &c.* & mox unus de Diaconis pronunciat Indulgentias, prout Pontifici placebit. Inde eodem ordine Pontifex deducitur ad suum hospitium, & alii divertunt ad sua. In exitu autem Civitatis, si Papa voluerit proficisci in habitu Pontificali cum Pluviali, & Mitra, servabitur idem ordo, ut in introitu, præterquam de Processione Cleri, de vexillis, de umbella, de baldachinis, quæ non aderunt. Et Pontifex extra portam intrabit aliquam Ecclesiam, & deponet Mitram, & Pluviale, & induet Mantum rubrum, & Capellum ex cremusino, & procedet, ut superius dictum est, itinerando cum suis tribus Cardinalibus. Quod si Pontifex in eundo noluerit uti Pontificalibus, tunc poterit equitare per Civitatem ordine quo diximus superius, cum equitat non in Pontificalibus ad aliquam Ecclesiam religionis gratia, nisi quod Sacramentum Corporis Christi semper aderit, & Forerii cum pulvinaribus non aderunt; extra Civitatem, cum sibi videbitur, dimittet Cardinales, & alios,

& alios, qui honoris causa suam Sanctitatem deduxerint, & retinebit eos, qui secum sunt profecturi.

COMMENTARIUS.

I. **O**bservatum hunc olim morem, data Ecclesiæ pace, ut Episcopis, sive Apostolicæ Sedis Legatis ad aliquem locum venientibus Clerus, & Populus, honoris, & officii causa, prælato Crucis vexillo obviam procederet, per vetusta nos docent vel Seculi Christi IV. exempla a nobis allata in Commentariis ad Romanum Pontificale, Parte III. Titulo XX. qui inscriptus est: *Ordo ad recipiendum processionally Prælatum, vel Legatum*. Hinc non mirum, si Romanis Pontificibus Maximis, qui Episcoporum omnium Principes sunt, & Jesu Christi in Terris Vicarii, exhibiti semper fuerint vel a Summis Principibus, summi honores, ubi ad eorum loca accessissent. Certe S. Joannem I. Papam summo cum honore excepit Justinus Imperator Constantinopolim venientem, ab eoque coronari voluit: *Occurrerunt Beato Joanni Papæ, inquit in ejus Vita Anastasius, a milliario XII. omnis Civitas cum cereis, & Crucibus in honorem Beatorum Petri & Pauli*. Et paulo post: *Tunc Justinus Augustus dans honorem Deo, humiliavit se pronus in terram, & adoravit Beatissimum Joannem Papam*. Et postea: *Justinus autem Imperator gaudio repletus est, quia meruit temporibus suis Vicarium Beati Petri Apostoli videre in Regno suo, de cujus manibus cum gloria coronatus est Justinus Augustus*; qui etiam, ut idem Auctor subdit, Joanni ipsi Papæ obtulit Patenam auream cum gemmis pensantem libras viginti, Calicem aureum cum gemmis pensantem libras quinque, scyphos argenteos quinque, pallia auro texta quindecim, quæ ipse Joannes detulit postea Romam ad Beatos Apostolos Petrum & Paulum, & ad S. Mariam, atque ad Sanctum Laurentium.

II. Longum esset omnia velle id genus exempla referre, quibus Vitæ Romanorum Pontificum, & Principum Christianorum abundant. Dicam quid de Stephano Papa IV. aliis V. narrat Auctor Vitæ Ludovici Pii: *Stephanus, ait, post sui consecrationem ad Dominum Imperato-*

rem venire non distulit. Vix enim duobus exactis mensibus summa cum festinatione ei occurrere festinavit. Præmisit tamen Legationem, quæ super ordinatione ejus Imperatori satisfaceret. Imperator autem ejus adventu præcognito, Bernardo quidem nepoti, Italiæ Regi, eum comitari jussit. Sed & appropinquanti alios Missos, qui eum debito honore perducerent, direxit. Ipse autem adventum ejus Remis sustinere statuit. Cui etiam obviam Hildebaldum Archicappellanum Sacri Palatii, Theodulphum Episcopum Aurelianensem, Joannem Arelatensem, non Atrebatensem, ut habet Baronius ad annum DCCCXVI. aliorumque Ministrorum Ecclesiæ copiam præcedere jussit Infulis indutos Sacerdotalibus. Quo honore, & qua reverentia Ludovicus ipse Imperator Summum Pontificem Stephanum exceperit, narrat Theganus his verbis: Perrexit post Missum Dominus Ludovicus obviam supradicto Pontifici, obvians ei in campo magno Remensium. Descendit uterque de equo suo, & Princeps se prosternens omni corpore in terram tribus vicibus ante pedes tanti Pontificis, & tertia vice erectus salutavit Pontificem istis verbis, dicens: Benedictus, qui venit in Nomine Domini, Deus Dominus, & illuxit nobis. Et respondens Pontifex: Benedictus sit Dominus Deus noster, qui tribuit oculis nostris secundum David Regem videre.

III. Occurrendum Summis Principibus, ac præsertim Romanis Pontificibus Maximis non modo solemnem Cleri & populi Processionem, sed cum Vexillis, Crucibus, Reliquiis Sanctorum, olivarum, aliarumque arborum ramis, merito ait hic noster §. sequutus est enim veterem ritum, quo tum longe ante, tum post annum Christi millesimum excipi a Principibus, & a Populis Summi Romani Pontifices consueverunt, uti non uno in loco superius diximus, & in nostris ad Pontificale Romanum Commentariis. Videri præterea potest quod & de ipsa re scripsit doctissimus Moretus in celeberrimo Opere, quod, *De Presbyterio*, inscripsit.

§. VI.

Quid agendum, si cum Papa adesset unus Diaconus tantum cum Episcopo, vel Presbytero Cardinali.

Et quia in hujusmodi itenerationibus sæpe accidit, quod apud Pontificem sint pauci Cardinales, si hoc, vel aliquo tempore accideret, quod in aliqua solemnitate dum Pontifex exit ad Ecclesiam in Pontificalibus, non esset præsens, nisi unus Diaconus, & unus Episcopus tantum, Cardinalis Episcopus iret a dextris, & Diaconus a sinistris Papæ, & sic sederent in assistentia Papæ, Diaconus tamen semper imposeret, & extraheret Mitram adjuvante Episcopo. Si vero adesset aliquis Presbyter Cardinalis cum uno Diacono, tunc Diaconus iret, & sederet a dextris semper, & similiter imposeret, & extraheret Mitram Pontifici. In incensatione autem, & pace, Presbyter Cardinalis, si adest, id faciet, quamvis sit assistens, si non sit alius Presbyter, si non aderit, faciet unus Episcopus Cardinalis; & si non aderit Episcopus, faciet Diaconus, tam in Missis, quam in Vesperis, tam parato Pontifice in Pontifica-

ficalibus, quam non parato; & si nullus aderit Cardinalis, dignior Prælatum incensabit, & dabit Pacem Pontifici.

COMMENTARIUS.

I. **E**xtat in Cæremoniali Episcoporum, quod nos non ita pridem Commentariis illustravimus, Caput inscriptum, *De supplendis vicibus Canonicorum, aliorumque Ministrorum deficientium*; Est Cap. xxvi. Lib. I. in eoque multa invenies, quæ & ad hujus §. explicationem facient. Ratum enim illud fixumque est, quod iterum, atque iterum nota-

tum a nobis jam fuit, non aliter spectandum esse Romanorum Cardinalium Sacrum Collegium, quam ut absolutissimam imaginem Capitulorum primævæ Ecclesiæ, & sanctioris disciplinæ. Id profecto pluribus probat eruditissimus Thomassinus Parte 1. *Disciplina*, Lib. III. Cap. VII. Num. XII. & Cap. X. Num. V. quem Auctorem jam nos superius laudavimus.

DE RECEPTIONE PRINCIPUM TITULUS XIII.

I. **P**ervetustus est quidem ritus ille vel apud Gentiles usitatissimus, ut Civitatem quamcumque intranti Imperatori, aut Summo Principi, cum solempni Processione obviam iretur. Celebre est quod ea in re de Germanico Caji Caligulæ Imperatoris patre scribit in ipsius Caligulæ Vita Svetonius Tranquillus, Cap. IV. sic inquit: *Sic vulgo favorabilis, ut plurimi tradant, quoties aliquo adventet, vel sicunde discederet, præ turba occurrentium, prosequentiumve, nonnumquam eum discrimen vitæ adiisse; e Germania vero post compressam seditionem revertenti Prætorianas cohortes universas prodisse obviam, quamvis pronuntiatum esset, ut duæ tantummodo exirent: Populi autem Romani sexum, ætatem, ordinem omnem usque ad vicissimum lapidem effudisse se.* Ita a Capuanis Hannibalem, ab Atheniensibus Attalum Asiæ Regem, a Gallis Viennensibus Julianum Cæsarem fuisse susceptum, testantur Titus Livius, Ammianus Marcellinus, & alii antiqui Scriptores, inter quos memoratus Suetonius, & Julius Capitolinus, Cæsaris Augusti, quod solitus semper esset, ne populum inquietaret, nocte ingredi, vel egredi Civitates, atque Antonini

Philosophi, quod filiæ suæ nuptum proficiscenti occurri prohibuisset, summopere modestiam prædicant.

II. Apud Christianos consuevisse jam olim Imperatores, ac Reges solempni cum Processione a Populo, & Clero, atque a Pontificibus ipsis excipi, testes sunt Ecclesiasticarum Historiarum Scriptores. S. Gregorius Turonensis, qui, ut ajunt Baronius, & Bellarminus, Seculo Christi VI. floruit, Lib. VIII. *Historiæ Francorum*, Cap. I. memoriæ prodit, Guntheranno Regi, cum ipsa S. Martini Festivitate Aureliam venisset, obviam processisse immensam hominum multitudinem cum signis, atque vexillis. Signa hic idem sunt, ac Cruces, eaque vox frequenter occurrit apud Scriptores Ecclesiasticos, atque in Lege I. Codicis. *Nemini licere &c.* ubi sancitum est, *Signum illud, idest Crucem, Salvatoris Christi, nemini licere, vel in solo, vel in silice, vel in marmoribus humi positum insculpere &c.* Quo ritu demum exceptus sit a Romano Pontifice Carolus Magnus, alique Imperatores, ac Principes, ubi Romam venerit, dicemus mox infra in Commentariis ad Paragraphos sequentes, tamen de eadem re aliis locis dixerimus.

§. I.

De receptione Imperatoris venientis ad Urbem Peregrinationis gratia.

Fridericus Tertius anno salutis sexagesimo octavo supra millesimum quadringentesimum Romam venit religiosæ peregrinationis gratia. Eum Paulus Secundus Pontifex Maximus summis honoribus excepit. Quæ igitur in suo adventu mature, & prudenter ordinata sunt, atque servata, quoniam omnibus interfui, ex officio hic annotabo, & ut posteri his uti, si voluerint, facile possint, adnectam. Ut primum igitur nuntiatus est, Cæsarem in Italiam adventasse, Romam via Flaminia petiturum, jussit Provinciarum Ecclesiæ Romanæ Præfectis, per quas iter facturus erat Cæsar, ut venienti honoris causa obviam irent Pontificis nomine ad fines Provinciæ, illumque cum omni suo comitatu publicis sumptibus magnifice exciperent, & honores ei omnes impenderent, juberentque per Civitates omnes, qua esset transiturus, Clerum in porta obviam exire cum Crucibus, & deducere ad Ecclesiam cum Antiphonis, Versiculis, & Orationibus, ut in Pontificali habetur. Deinde ut Ecclesiæ Agrum Cæsarem intrasse cognovit, Nobiles quosdam ex ordine equestri præmilit, qui Cæsari obviam irent congratulantes Pontificis nomine prosperum ejus adventum, eique omnia Pontificis officia pollicentes. Post hos sunt missi duo Sacri Palatii Causarum

Au-

Auditores, qui Spoleti, & duo deinde Archiepiscopi cum duobus Episcopis ex assistentibus Papæ, qui Narniæ Cæsari se exhibuerunt. Designavit præterea Pontifex duos Apostolicæ Sedis Legatos Guillelmum Episcopum Ostiensem Rothomagensem, & Franciscum S. Eustachii Diaconum Senensem, S. R. E. Cardinales; datis mandatis, ut duorum dierum itinere Cæsari obviam irent. Sed Legati cum primum obviam fiunt Imperatori, descendunt ex equis, cum ex propinquo eum manifeste videant, & suæ Majestati reverentiam faciunt, sive descenderit, sive in equo remanserit; consuevit tamen & ipse, descendentibus Legatis, descendere. Die autem, quo Urbem intravit, hoc ordine exceptus est. Primum obviam ivere ad tertium lapidem Vicecamerarius, Præfectus, Senator, Conservatores, & Cancellarii Urbis, omnes cum habitu suæ dignitatis, & cum his capita Regionum, & alii Magistratus Urbani cum Civibus nobilioribus, quos non multo intervallo Ordines Curiae, & Cancellariæ Officiales, duce Episcopo Urbinatæ, Correctore, & Abbreviatore Litterarum Apostolicarum, sequuti sunt. Tertio loco Prælati Domestici Pontificis cum aulicis Proceribus, & Nobilibus multis ad secundum lapidem processere. Sacer deinde Cardinalium Senatus extra portam ad quingentos passus Cæsarem expectabat, cui advenienti, suo, & Pontificis nomine felicem adventum gratulatus est, verba faciente, Priore Episcoporum Cardinalium. Clerus Urbis in ipsa porta cum Crucibus, & Reliquiis, ut Cæsarem exciperet, jussus erat. Hoc igitur ordine, quamvis propter ferum introitum omnino servari non potuerit, Urbem ingressus est. Primo procedebant mixtæ Cardinalium familiæ cum militibus Cæsaris, tum Familiares Pontificis laici cum Familiaribus Imperatoris. Inde Nobiles, & Barones; tum Conservatores cum Officialibus Urbis; deinde Oratores Principum, & Regum non Prælati; postremo Senator, & Præfectus Urbis cum suis ornamentis; Armiger Cæsaris cum ense nudo inter illos, & Cæsarem solus equitabat. Sequebatur Cæsar cum baldachino medius inter duos Episcopos Cardinales; cui in porta Vicarius Papæ, qui, Clero Urbis præest, paratus in Pontificalibus, Crucem exosculandam porrigere debet. Et Clerus cantat: *Ecce mitto Angelum meum*. Et Clerus cum Processione præcedit immediate ante Præfectum, & Senatorem. Imperatorem sequuntur Cardinales per ordinem, Episcopi, Presbyteri, & Diaconi. Officiales, & nobiliores Cives ducunt equum Cæsaris freno, & baldachinum portant. Post Cardinales sequebantur Prælati Cæsaris cum Prælati Oratoribus, & demum alii, Archiepiscopi, Episcopi, Proto-notarii, Abbates, & alii Curiales togati. Ex itinere duo Presbyteri, & duo Diaconi Cardinales divertentes, ad Pontificem pervenerunt, qui cum illis, & nonnullis aliis Prælati, atque aulicis suis, cum Pluviali, & Mitra descendit ad Ecclesiam S. Petri, ubi in Capella majori, in Sede eminenti sedens Cæsarem expectabat. Cæsar ordine, quo diximus, ad gradus Basilicæ pervenit, ubi equo descendens, a Cardinalibus, & aliis ad Confessionem Beati Petri deductus est, ubi paratum erat faldistorum, super quod procumbens aliquantulum oravit. Interim Cardinales omnes ad Pontificem ascendentes, in locis suis sederunt, & illi duo Presbyteri, & Diaconi, qui prævenerant Cæsarem, apud faldistorium orantem expectantes, illum finita oratione ad Pontificem deduxerunt, qui, ut Pontificem vidit, genu terram tangens, illum veneratus est, & accedens propius idem fecit; ascendens deinde ad Solium, in terram pronus Pontificis pedes osculatus est, deinde manum. Pontifex benigne illum suscipiens, atque a terra elevans, ad osculum oris recepit, & assurgens, eum modeste amplexatus est; moxque jussit, eum sedere in Sede pro eo honorifice præparata inter Solium Pontificis, & sedilia Episcoporum Cardinalium. Tum excepit Prælatos, & Proceres Cæsaris ad pedis osculum. Deinde a duobus Diaconis Cardinalibus deductus Cæsar ad Altare majus, ibi super paratum sibi faldistorium diutius genuflexus oravit. Interim Chorus cantavit Antiphonam: *Elegit eum Dominus, & excelsum fecit illum præ Regibus terræ. V. Glorificavit illum in conspectu Regum. R. Et non confundetur*. Surgens deinde Pontifex sine Mitra, dixit: *Pater noster. Et ne nos inducas in tentationem. R. Sed libera nos a malo. V. Deus judicium tuum Regi da. R. Et justitiam tuam filio Regis. V. Salvum fac Domine servum tuum N. Imperatorem nostrum. R. Deus meus sperantem in te. V. Mitte ei Domine auxilium de Sancto. R. Et de Sion tuere eum. V. Nihil proficiat inimicus in eo. R. Et filius iniquitatis non apponat nocere ei. V. Fiat pax in virtute tua. R. Et abundantia in turribus tuis. V. Domine exaudi orationem meam. R. Et clamor meus ad te veniat. V. Dominus vobiscum. R. Et cum spiritu tuo.*

Or-

Oremus.

Deus, qui B. Petro Apostolo tuo, collatis clavibus Regni cælestis, animas ligandi, atque solvendi Pontificium tradidisti: concede, ut intercessionis ejus auxilio famulus hic tuus N. Imperator noster a nexibus peccatorum suorum liberetur.

Præstende Domine quæsumus famulo tuo N. Imperatori nostro dextram cælestis auxilli, ut te toto corde perquirat, & quæ digne, & humiliter postulat, assequi mereatur.

Omnipotens sempiterne Deus Christiani Imperii protector, & conservator, da servo tuo N. Imperatori nostro virtutis invictæ triumphum, ut ad nostram, & Ecclesiæ tuæ sanctæ, atque Fidelium omnium unitatem, & pacem, subditas illi facias universas barbaras nationes. Per Christum Dominum nostrum. Amen.

Post hæc Pontifex de Solio descendit, & Cæsarem iterum amplexatus, manu sinistra illum tenens, pariter Palatium Apostolicum ascenderunt, & in Sacellum S. Nicolai (1) ingressi aliquantulum confederunt, & familiariter confabulati sunt. Deinde Pontifex Cæsarem ad cubiculum illi paratum dimisit, jussitque, Cardinales complures illum deducere; ipse vero cum suis per aliam Sacelli portam, ad Cameram suam, profectus est. Dum Cæsar Romæ fuit, sæpe noctu, uno, vel altero famulo sociatus, clam & indicto tempore ad Pontificis cubiculum accessit, cui Pontifex obviam exivit, cum primum id potuit, & descendente ipse deduxit usque ad secundam, & tertiam Aulam; & aliquando ipse Pontifex inexpectatus ad Cæsaris Cubiculum cum paucis venit, illumque semper, quantum potuit, honoravit, cum summa tamen gravitate, & majestate, & in Ecclesiâ, & in via. In Ecclesiâ orante Pontifice super Faldistorio sibi parato ante Altare, ut sit, Imperator super aliud Faldistorium orabat a sinistris positum coopertum purpureo ornamento cum pulvinari etiam purpureo, & parvo scabello viridi etiam (2) & parvo pulvinari purpureo. Sedes Cæsaris cum suo reclinatorio, sive postergali sita erat inter Sedem Pontificis, & sedilia Cardinalium in formam Sedis Pontificalis, sed non tantæ altitudinis, neque latitudinis; cooperta erat panno serico viridis coloris, & scabellum parvum habebat viride, super quod pedes tenebat Imperator; altitudo ipsius sedis ita erat instituta, in Capella Apostolica, ut non altior esset locus, ubi sederet Imperator, quam ubi Pontifex teneret pedes; & item scabellum Cæsaris æquale erat sedibus Cardinalium. Cum incensabatur Pontifex per Cardinalem assistentem, mox incensabatur Imperator per primum ex Prælatis assistentibus Pontificis. Cum Pontifex pacem accipiebat ab assistente Cardinale, primo dabat pacem Imperatori, postea Diaconis assistentibus. Inter eundem semper manu sinistra illius dextram tenebat, (3) aliquando, & ad dextram eum ponebat; volebatque, ut æquali semper gradu incederet, quamvis modeste semper Cæsar reluctaretur. In discessu mandavit Pontifex, quod iridem, ut in introitu, honoraretur; sed ille summo mane cum paucis e suis consensu equo ante recessit, quam Cardinales convenissent; pauci admodum ejus festinationem sunt assequuti. Donavit Pontifex Cæsarem pluribus muneribus, primum veste aurea, & equo albo phalerato cum aliquibus jocalibus cum Reliquiis Sanctorum admodum pretiosis, quorum pretium supra duorum millium aureorum ferebatur.

C O M M E N T A R I U S.

I. **T**Anta fuit olim veterum Christianorum Imperatorum religio, ut invisiendi gratia Apostolorum Limina, ipsumque Jesu Christi in terris Vicarium, Romanum Pontificem Maximum, a longinquis Regionibus se ad Urbem conferrent, solitusque fuit eos semper Pontifex ipse summo cum honore, & eximia liberalitate excipere. Teste Anastasio in Vita Hadriani I. Papæ, cujus locum descripsit Baronius ad annum DCCLXXIV, cum jam per sex menses stetisset Carolus Magnus in obsidione Ticini Civitatis, adveniente tempore Paschali, relicto ibi exercitu, magnum desiderium habens ad Limina Apostolorum properandi, Romam per Tuscia partes properavit, ita festinanter adveniens, ut in ipso Sabbato Sancto se Liminibus præsentaret Apostolicis. Ita

plane Anastasius, qui mox ita subdit: *Cujus adventum audiens Beatissimus Hadrianus Papa, quod sic repente ipse Francorum advenisset Rex, in magno stupore, & extasi deductus, direxit in ejus occursum universos Judices ad fere triginta millia ab hac Romana Urbe in locum, qui vocatur Novas, ubi eum cum Bandora susceperunt.* Bandora hoc loco idem est, quod bandum, seu vexillum, eaque vox occurrit passim apud Scriptores, ut pluribus docet Dufresne in suo Glossario. Judices autem vocantur Magistratus, & Primores Urbis.

II. Pergit Anastasius, aliosque honores recenset Carolo ipsi Romam adventanti a laudato Pontifice exhibitos: *Et dum appropinquasset, fere unius milliario a Romana Urbe, direxit universas Scholas militia una cum Patronis, simul-*

(1) Ita in Veneta 1. editione anni 1516. in Romana vero anni 1560. additum est: *quod nunc dicitur Capella Paulina.*

(2) Ita in Romana editione; in Veneta 1. desunt hæc verba: *& parvo pulvinari.* (3) Hæc verba; *aliquando & ad dextram eum ponebat*, leguntur in editione Romana, sed desunt in 1. Veneta.

mulque & pueris, qui ad discendas litteras pergebant, deportantes omnes ramos palmarum, atque olivarum, laudesque omnes canentes, cum acclamationum earundem Laudum vocibus, ipsum Francorum susceperunt Regem. Extremum ejus occursum, seu Processionis agmen venerandæ Cruces clausurunt: Obviam illi ejus Sanctitas dirigens venerandas Cruces, idest signa, sicut mos est ad Exarchum, aut Patricium suscipiendum, cum ingenti honore suscipi fecit. Itaque pervetustus est ritus cum solemnî Processione, cum olivarum ramis, cum Laudum acclamationibus, & venerandis Crucibus Principi Romam venienti occurrere, nihilque fere in hoc Cæremoniali Romanæ Ecclesiæ Augustinus Patricius ejus ordinator scripsit, quod in ipsa Romana Ecclesia antiquo usu non esset receptum, a priscis Summis Pontificibus iterum atque iterum comprobato, & ab ipsis Principibus religiose pieque servato.

III. Ergo ut post Anastasium narrat ad ipsum annum DCCLXXIV. Baronius, statim ubi Christianissimus Rex Cruces illas conspexit, equo descendens pedestris ad Ecclesiam S. Petri processit, & perveniens ad atrium, ubi eum Pontifex cum reliquo Clero opperiebatur, omnes gradus singillatim deosculatus est; ac demum a Pontifice benigne exceptus, post mutuos amplexus tenuit in incessu, & ingressu Ecclesiæ dextram manum Pontificis, cunctis acclamantibus, *Benedictus qui venit in Nomine Domini &c.* Quod quidem accidit in die Sabbati Sancti. Erant sane Laudes istæ, victoriæ, vel vitæ diuturnioris adprecationes, cum iisque susceptus tunc fuit Carolus tanquam Patricius, ac Defensor Ecclesiæ Romanæ, quemadmodum & sub Leonis III. Pontificatu, quando quartum Romam profectus est, ut in ejusdem Pontificis Vita notavit Anastasius, & ex eo Baronius, Ciaconius, Pagius, alique Scriptores Vitarum Romanorum Pontificum. Earundem Laudum usum Traguri, quæ parvula insula est Dalma-

tiæ proxima, adhuc continuari, observat Joannes Lucius in Historia Dalmatiæ & Croaciæ, Lib. II, Cap. VI, ubi Laudes hæc inter Missarum solemnia a duobus ex Canonicis Ambonem ascendentibus acclamantur, Choro loco populi respondente, sed loco Imperatoris, profertur nomen Summi Pontificis. Legendum mediæ & infimæ Latinitatis Glossarium eruditi Dufresne, in voce, *Laudes*.

IV. Quamquam verò sit mos antiquus, ut cum ingenti honore, pietate, ac munificentia Summi Pontifices Romæ Imperatores exciperent, ut plurima exempla nos docent, non tamen idem ordo in ipsis excipiendis in hoc §. descriptus in omnibus cæremoniis servatus antiquitus fuit; hic enim ordo servatus primum videtur in adventu Friderici III, Imperatoris Romæ, & quidem anno MCDLXVI. *religiosæ peregrinationis gratia*, quem *Paulus II. Pontifex Maximus summis honoribus excepit*, ut ait hic noster §. Legendus porro Augustinus Patricius, qui nostrum hoc Cæremoniale ordinavit, ejusque receptionis cæremoniam direxit, erat enim tunc temporis Apostolicarum Cæremoniarum Præfectus, in Epistola ad Joannem Manellum Cremanum, quæ minutissimam descriptionem continet rituum servatorum in ipso adventu Friderici III. Imperatoris ad Paulum, Papam II. legiturque apud Mabillonium Tomo I. Musei Italici, Parte II. pag. 156, & seqq.

V. Ut alia omittam, observandum hic nobis est, primam Orationem, quæ antiqua est, & ut est in hoc §. descripta, totidem verbis legitur in priscis Sacramentariis, & Missalibus Libris, seculo elapso fuisse in uno verbo mutatam. Ubi enim olim legebatur, *Deus, qui Beato Petro Apostolo tuo, collatis clavibus Regni celestis, animas ligandi, atque solvendi Pontificium tradidisti &c.* in recentioribus Breviariis, & Missalibus centum circiter ab hinc annis impressis, sublatum fuisse verbum illud, *animas*,

§. II.

De receptione Regis venientis ad Urbem.

Cum Pontifici nunciatum erit, Regem quempiam Romam venturum, mandet Rectori Provinciæ, qua ille erit primum transiturus, ut venienti Regi ad fines Agri Ecclesiæ obviam vadat, illum Pontificis nomine benigne suscipiat, honoret, & per totam suam Provinciam deducat, alatque cum omni sua familia publicis sumtibus. Cum Civitates, & insignia Oppida intrabit, occurret ei Clerus cum Processione, & baldachino, cantantes Hymnos, Antiphonas, Versiculos, & Orationes, ut in Libro Pontificali habetur; & mittat quamprimum numerum equitum, qui sunt cum Rege, & qualitatem Comitum ejus ad Pontificem; mittantur deinde ad tres dietas, duo Prælati, qui occurrant Regi Pontificis nomine; & deinde quatuor alii ad duas; demum per quindecim, aut viginti quinque milliaria mittantur duo ex Presbyteris, sive Diaconis Cardinalibus Legati obviam, qui Regem ad Urbem deducant. Ordinantur qui in toto itinere, dum erit in terris Ecclesiæ, faciant expensas Regi. In die Introitus Vicecamerarius, sive Gubernator Urbis cum Præfecto, Senatore, Conservatoribus, Cancellariis, Capitibus Regionum, & aliis Officialibus, & Nobilibus Civibus primi exhibunt obviam ad secundum, aut tertium lapidem. Ad primum lapidem occurret Regi Familia Pontificis cum omnibus Ordinibus, & Officialibus Curiæ. Sacer Senatus Cardinalium in porta obviabit Regi; & per Priorem Episcoporum Cardinalium fient verba congratulatoria nomine Pontificis, & Collegii, & omnes Cardinales tangent manum Regi, & osculabuntur genam. Deinde hoc ordine

intrabunt Urbem. Primo præcedunt Familiæ Dominorum Cardinalium, & Curialium mixtim. Familia deinde Pontificis cum Officialibus Curie Secularis, videlicet Scriptoribus Apostolicis, Abbreviatoribus, & hujusmodi. Et cum Familia Regis Barones, Nobiles, Conservatores, Oratores Principum, & Regum non Prælati, Præfectus Urbis, & Senator. Siquis Princeps, aut magnus Nobilis erit, cum Rege locetur inter Oratores Laicos, vel cum Senatore, aut Præfecto, pro dignitate sua. Nota tamen, quod Orator Imperatoris semper præcedit Senatorem. Sequentur deinde servientes armorum cum suis baculis argenteis, quorum aliqui semper discurrent, curantes, ut alii præcedant secundum datum ordinem. Deinde Sacrum Collegium Cardinalium, Episcopi, Presbyteri, Diaconi. Rex vero erit medius inter duos Seniores Diaconos in ultimo loco. Post Regem erunt immediate duo, aut tres Cubicularii, sive Secretarii sui. Deinde Oratores, Prælati, Archiepiscopi, Episcopi, Protonotarii, Abbates; & siquis Prælatus erit cum Rege, ponetur inter Prælatos Oratores. Prælati ex Familia Papæ in hujusmodi actibus, quando Collegium est præsens, non præponuntur aliis, quia Collegium est ibi tunc nomine suo, & Pontificis, sed stabunt in loco suæ promotionis. Clerus Urbis cum Vicario occurret Regi ad gradus Basilicæ S. Petri, & ibi Regi ex equo descendenti Vicarius offeret Crucem osculandam; & tunc præcedent cantantes Antiphonam: *Ecce ego mitto Angelum meum &c.* & alios Hymnos; & sic deducetur ad Altare majus ordine, quo venerat: ubi super faldistorium sibi paratum orabit genuflexus, interim Chorus cantabit Responsorium: *Posui adiutorem super potentem, & exaltavi electum de plebe mea. V. Inveni David servum meum, oleo sancto meo unxi eum. R. Et exaltavi &c.* Item aliud: *Tua est potentia, tuum Regnum Domine, tu es super omnes gentes, da pacem Domine in diebus nostris. V. Creator omnium Deus, terribilis, & fortis, justus, & misericors. R. Da pacem Domine &c.* Finito Responso, Rege adhuc prostrato permanente, Prior Cardinalium dicit Versus, & Orationes infra scriptas supra Regem, stans in cornu dextro Altaris, ubi dicitur Evangelium: *Pater noster. V. Et ne nos inducas in tentationem. R. Sed libera nos a malo. V. Deus judicium tuum Regi da. R. Et justitiam tuam filio Regis. V. Salvum fac Domine N. Regem. R. Deus meus sperantem in te. V. Mitte ei auxilium de sancto. R. Et de Sion tuere eum. V. Nihil proficiat inimicus in eo. R. Et filius iniquitatis non apponat nocere ei. V. Domine exaudi orationem meam. R. Et clamor meus ad te veniat. V. Dominus vobiscum. R. Et cum spiritu tuo. Oremus.*

Deus, cui omnis potestas famulatur, da huic famulo tuo N. Regi prosperum suæ dignitatis effectum, in quo te semper timeat, tibi que jugiter placere contendat.

Deus, qui B. Petro Apostolico tuo, collatis clavibus Regni Cælestis, animas ligandi, atque solvendi, Pontificium tradidisti: concede, ut intercessionis ejus auxilio famulus hic tuus N. Rex a nexibus peccatorum liberetur.

Præstende Domine N. Regi famulo tuo dexteram Cælestis auxilii, ut te toto corde perquirat, & quæ digne, & humiliter postulat, assequi mereatur. Per Christum Dominum nostrum. Amen.

Surgat Rex ab oratione, & deducatur a Cardinalibus ad aliquem locum sibi præparatum ad hoc, & ibi eum dimittant cum duobus ultimis Presbyteris, & totidem ultimis Diaconis Cardinalibus; alii omnes ascendant ad Pontificem; qui paratus cum Pluviali & Mitra pretiosis exit ad publicum Consistorium in prima Aula Regali ornatum. Cum omnes federint, facta a Cardinalibus consueta reverentia Sanctissimo Domino nostro, sedebunt in loco suo, & mox deducetur Rex ad Pontificem a quatuor Cardinalibus in hunc modum. Primo præcedent Familiares Regis, tum quatuor servientes armorum, & post eos Minister Cæremoniarum; inde duo Presbyteri Cardinales, deinde Rex medius inter duos antiquiores Diaconos, & post eum sex, aut octo Prælati prædicti. Rex tertio genuflectet in conspectu Pontificis; duo Presbyteri Cardinales præcedentes facient reverentiam Pontifici, & expectabunt ibi stantes ante Pontificem. Deinde ascendet primus Diaconus, & post eum Rex, qui genuflexus osculatur pedem Sanctissimi Domini nostri. Pontifex porrigit ei manum, quam postquam fuerit osculatus, levet eum, & recipiat ad osculum oris. Interim ascendet & alius Diaconus. His peractis, & aliquibus verbis gratulatoriis, & grates agentibus per Pontificem, & Regem dictis, deducitur Rex a Diaconis ad sedendum post primum Episcopum Cardinalem, & ipsi revertuntur ad sedendum ad locum suum; & tunc si Pontifici placet, proponuntur ab Advocatis aliquæ causæ; quibus finitis, surgunt omnes, & Rex accedet ad Pontificem cum Cardinalibus, & ejus familia osculatur

latur pedes Pontificis . Deinde Pontifex cum omnibus revertitur ad cameram, & mittit aliquos Cardinales, qui deducunt Regem ad cameram suam. Et nota, quod secundum quod legi in pluribus Libris Cæremoniæ, Rex in primi die adventus sui non debet servire Pontifici in aliquo actu, neque in ferenda cauda, neque in mensa, si secum pranderet, neque in aliqua re. In aliis autem diebus portabit caudam Pluvialis, dabit aquam manibus sive in Missa, sive in mensa, & in convivio portabit primum ferculum, & in collatione primum potum, & huiusmodi. Sedebit autem ubicumque erit in publico, aut in secreto cum Cardinalibus post primum Cardinalem super eussinum aureum, sive purpureum, & in loco suo incensabitur, & capiet pacem per eundem, ut alii Cardinales. Pontifex donabit Regem aliquibus muneribus devotis, & pretiosis, veste aurea, & equo phalerato, sicut fecit Sixtus Quartus Christigervo Regi Daciæ, & Ferdinando Regi Siciliæ, qui Romam venerunt tempore Jubilei anno millesimo quadringentesimo septuagesimo quinto. In discessu sociabitur Rex a Cardinalibus usque ad portam Civitatis. Si Rex veniet ad Urbem ob aliam causam quam peregrinationis, possunt omitti omnia, quæ sunt in Ecclesia S. Petri, & sine Processione Cleri deduceretur a Cardinalibus ad locum destinatum, & inde ad Consistorium publicum, ut dictum est. Si vero Pontifex non esset Romæ, neque in terris suis, quando Rex aliquis ad eum veniet, tunc neque per tot dietas mitteret ante eum, neque faceret ei expensas; in ingressu autem honoraretur, & reciperetur in Consistorio publico, uti superius dictum est.

COMMENTARIUS.

I. **V**arios variis temporibus venisse Reges Romam religionis causa ad visitanda Apostolorum Limina, & Summum Romanum Pontificem, docent frequenter Pontificum Vitæ, & mss. Apostolicorum Cæremoniarum Diaria, in quibus ritus narrantur in ipsorum Regum receptione servati. Extat in ms. Cæremoniali Joannis Davantriæ Titulus, qui inscriptus est: *Modus tentus in adventu Domini Ferdinandi Regis Aragonum ad Dertusiam, ubi Dominus Benedictus Papa cum sua Curia residebat &c.* Est is pseudo-pontifex Benedictus XIII. seu Petrus de Luna, qui etiam extra Urbem degens in receptione ipsius Regis cæremonias pene omnes servavit tunc quidem usu receptas, ac deinde in hoc nostro §. descriptas: *Una die, inquit Davantrias, ante ingressum suum, scilicet die Luna post prandium, Domini Cardinales, scilicet S. Georgii, & S. Eusebii, associantibus eos Dominis Camerario Papæ, & Menescallo, cum Prælati, & aliis familiaribus, & Officiariis Papæ, iverunt ad locum de Cberta, ubi Rex manebat, & primogenitus cum fratre suo Domino Petro, exivit obviam eis. Demum facta Regi visitatione per eos ex parte Papæ, recepto congerio, Dertusiam redierunt; sequenti vero die omnes Cardinales exierunt ei obviam quasi per tractus tres balista; & facta reverentia more solito, Domini Cardinales redierunt ad Consistorium, dentis Dominis Sancti Georgii, & Sancti Eustachii (in margine legitur S. Eusebii) qui associaverunt eum unus a dextris, & alius a sinistris, quousque in principio pontis Procuratores Civitatis exiverunt cum pallio, idest baldachino, sub quo, præcedentibus dictis Cardinalibus, ivit per Villam, quousque vidit Crucem; tunc descendit, de equo scilicet, cui insidebat, & ivit pedes sub pallio inter dictos Cardinales, & genuflectens adoravit Crucem, & osculatus est eam; ivitque sic ad Ecclesiam, & oravit, & auditis orationibus, & benedictione recepta, ascendit eques castrum, & ibi per Dominum Papam fuit receptus in Consistorio, ut To. I.*

moris est, & Domini Cardinales associaverunt eum usque ad Cameram suam in Castrum &c. Hic Ferdinandus Rex Aragoniæ sequutus primum partes Petri de Luna, consilio deinde Sancti Vincentii Ferrerii se ab eo subtraxit, uti diximus Tomo IV. Conciliorum

II. Extat & in eodem Davantriæ ms. Cæremoniali alius Titulus, qui inscriptus est: *Modus tentus tempore Domini Benedicti in Regis Navariæ ingressu, quando venit Perpinianum; ubi cæremonia ejus receptionis fassus refertur his verbis: Primo ante ingressum ejusdem Regis, per unum diem ibit ad dictum Regem ad locum de Bagis Camerarius, & Præceptor Castelloti Thesaurarius, Magister Hospitii Dominus Garfias Lupi de Sesse ad salutandum &c. ex parte Domini nostri. Post die sequenti idem Camerarius Domini nostri exhibit cum Prælati Domesticis, Militibus, Clericis Camera, & aliis Familiaribus Domini nostri obviam dicto Domino Regi usque ad medium itineris de Bagis. Demum exhibunt Domini Cardinales omnes usque ad certum locum, de quo eis videbitur, distantem a Villa. Item cum dicti Domini Cardinales fuerunt cum dicto Rege, duo juniores recipiunt Dominum Regem in medio; & Dominus Auxitanus, & Dominus Camerarius cum eo, cum aliquibus, qui associant eum, dimisso Rege, ibunt statim ad Dominum nostrum, qui præadvísatus per Dominum Camerarium, qui aliquantulum præcedet dictum Dominum Auxitanum sedebit in Consistorio, & dictus Dominus Auxitanus exhibebit reverentiam Domino nostro. Post hac Dominus Rex, qui interim continuaverit iter suum veniendi ad Dominum nostrum in medio duorum Cardinalium, qui eum associabunt, cum intrabit portam Aula Consistorii, statim genuflectet, & levabit se, & stabit sic ibi quousque Dominus Auxitanus iverit ad associandum eum. Et cum dictus Dominus Auxitanus fuerit cum dicto Rege, antiquior Diaconorum, qui associabant eum, scilicet Regem, ibit ad Dominum nostrum ad exhibendam reverentiam, & redibit statim ad Do-*

minum Regem associandum, & quando redierit junior Diaconus, ibit ad exhibendam reverentiam Domino nostro: & Rex statit semper in medio duorum, quousque ultimus Diaconum exhibuerit reverentiam; & dictus Cardinalis ultimus Diaconum, exhibita reverentia Domino nostro, debet statim redire. Et tunc Rex in medio duorum Cardinalium Auxitani, & de Flisco, procedant ultra, & semper in locis strictis præcedat Dominus Auxitanus, & sequetur eum Rex, & Regem Dominus de Flisco. Et cum intrabunt parcum Consistorii, dictus Rex genuflectet, & post procedet in medio dictorum Dominorum Cardinalium, usque ad pedes Domini nostri & Dominus noster faciet aliquantulum gestum assurgendi; & tanget sibi modicum de manu in capite, sedens in Cathedra sua. Ipse autem Rex osculabitur pedem, & manum Domino Papæ, & ipse recipiet eum ad osculum. Post Dominus Rex associatus per duos dictos Cardinales sedebit ad manum dexteram Papæ in quadam Cathedra, qua ibi erit parata cum coxino de panno auri, & ad pedes nihil debet tenere; tamen dictus Rex debet facere posse de tollendo coxinum de Cathedra, & Papæ non permittet &c. Prolixior adhuc hic Ordo est, sed placuit aliqua describere, ut vel inde intelligas variatos semper fuisse nonnihil ritus in Principibus excipiendis pro temporum scilicet varietate, & Principum ipsorum conditione.

III. Omisissis aliis quæ ad majorem nostri hujus §. enarrationem dici hic possent, cum in eodem mentio fiat adventus Romam Christigervi, sive Christierni Regis Daciæ tempore Sixti IV, lubet hoc loco referre Jacobi Cardinalis Papiensis Epistolam DLVI. Bernardo Elçinenfi, scriptam de ritu in ejus Regis receptione Romæ servato, & de obsequiis ab eodem exhibitis laudato Pontifici Sixto IV, & Cardinalibus: *Nos hic Dacarum Regem honoribus summis accepimus. Turba omnis Curialis egressa est obviam, Patres ad portam congressi, medium illum per Urbem ad Basilicam Petri, inde ad Pontificem perduxere, juridicundo tunc publice præsidentem, Procubuit in genua ante illius pedes, nec ante se elevari est passus, quam sermonibus suis esset responsum. Redeunti in Cubiculum Sixto, exeuntique ad Divina horum dierum, gremia ejus semper portavit, Lavanti manus polvim sustinuit. Inter duos primos Cardinales sessum receptus, non prius*

sedere, non prius regi voluit, quam utrumque ab utroque factum esset. Me hodie alterum ex duobus illis assidentem rogari per Interpretem fecit, ut pateremur, post omnes Cardinales ad osculum Crucis eum ascendere, Est enim hac dies Parasceve. Cum rogarem cur ita deposceret? Ut habeatur, inquit, justus honor summo Senatui. Plura hujusmodi hoc solo triduo sunt ab eo præstata Apostolica Sedi, in quibus trium Regnorum Rex a Septentrionibus veniens, nobis Italis, quo animo esse in summum Sacerdotem debeamus, exemplo suo edocuit. Porro plura alia quæ in hunc §. dici possent, legere est nostro Tomo III. Romani Pontificalis in Commentariis ad Titulum XXIII. Necessè est enim, ut multa omittamus, quæ a nobis copiose parata jam fuerant pro interpretatione Romanæ Ecclesiæ Cæremonialis, sed rei familiaris angustia non finit, ut majori impensa onerer, quam vires meæ ferre valeant.

IV. Unum adhuc lubet hoc loco referre, quod de adventu Ladislai Neapolitani Regis ad Urbem scriptum reliquit Petrus Amelius in suo Romano Ordine xv, Cap. CLXVI. *Nota, inquit, quod anno Domini MCCCXCIII, die Sabbati xviii, Aprilis in Vigilia Paschæ Dominus Ladislaus Rex Neapolitanus Romam intravit; & in S. Paulo omnes Cardinales sibi obviam iverunt. Romani vero cum pallio in porta prope metam eum cum pallio receperunt, sub quo solus per totam Urbem usque ad gradus S. Petri equitavit. Duo vero Diaconi Cardinales, qui eum associabant ante Banderenses equitabant, & illi Vexilliferi Romanorum immediate ante Regem equitabant. Post Regem immediate Patriarcha Gradenfis, & post eum Comes Laurentii, & alii Milites, & Prælati. Addit mox alia, quæ & hunc nostrum §. illustrant: Die vero S. Paschæ in Missa Rex semper servavit Papæ de aqua, & semper sedebat inter duos primos Episcopos Cardinales; deinde Patriarcha Constantinopolitanus post Priorem Presbyterum Cardinalem, qui erat tertius in illa Sede; deinde Patriarcha Gradenfis, & sic omnes alii. In prandio vero dictus Rex in mensa etiam sedebat inter duos primos Episcopos Cardinales, Paucis ab hinc annis, post fugatos apud Velitras Germanos, venit Romam Carolus Borbonius Rex utriusque Siciliæ, sed minime servatæ fuerunt cæremoniæ in §. nostro præscriptæ, quod noluit eo nomine Urbem ingredi, sed veluti privatus Princeps,*

§. III.

De receptione Reginae.

Si aliqua Regina veniret Romam honoraretur, & in ejus adventu omnia servarentur, quæ dicta sunt de Rege in omnibus & per omnia, & in Ecclesia dicuntur, quæ inferiorius ponemus, sed non recipietur a Pontifice ad osculum oris, sed ad pedis, & manus, neque poneretur ad sedendum inter Cardinales, verum salutato Pontifice, post osculum pedis, & manus, surgeret, & rediret ad Cameram suam, & illa dimitteretur cum aliquibus Cardinalibus ad locum sibi paratum. Quod tamen servatum non fuit in Regina Daciæ tempore Sixti Quarti, & Innocentii Octavi; non enim recepta fuit in Consistorio, sed a Collegio deducta (1) ad domum suæ habitationis. In Ecclesia fieret ei suggestus ornatus extra & prope Capellam, ubi cum suis ancillis posset stare, & audire Missam; & cum Diaconus incensat Cardinales, Reginam Acolythus unus eodem modo incensat. Similiter cum datur pax Cardinalibus, Subdiaconus, qui servit in Missa, portet pacem argenteam, sive auream osculandam Reginae. Neque

(1) Ita legendum cenſeo, tamen in Cæremoniali legatur *ſeducta*.

que illa servit in aliquo Pontifici, nec debet esse aliquo modo in convivio cum Pontifice. In porta igitur Ecclesiæ S. Petri super gradus occurrit ei Clerus cum Processione indicta, & Prælatus offert ei Crucem osculandam; & Chorus cantat Responsorium; *Ista est speciosa inter filias Jerusalem. Sicut vidistis eam plenam charitate, & dilectione in cubilibus, & in hortis aromatum.* V. *Ista est speciosa, quæ ascendit de deserto deliciis affluens.* Sicut vidistis &c. Gloria Patri &c. Sicut vidistis &c. Deinde cantando *Te Deum laudamus*, perveniunt ad Altare majus, ubi Regina super faldistorium orat. Interim Prælatus stans apud Altare, dicit super eam Versiculos, & Orationem, videlicet, V. *Salvam fac ancillam tuam Domine.* R. *Deus meus sperantem in te.* V. *Mitte ei auxilium de sancto.* R. *Et de Sion tuere eam.* V. *Nihil proficiat inimicus in ea.* R. *Et filius iniquitatis non apponat nocere ei.* V. *Fiat pax in virtute tua.* R. *Et abundantia in turribus tuis.* V. *Domine exaudi orationem meam.* R. *Et clamor meus ad te veniat.* V. *Dominus vobiscum.* R. *Et cum spiritu tuo;* Oremus.

Deus, cujus providentia in sui dispositione non fallitur, ineffabilem clementiam tuam supplices exoramus, ut sicut Hester Reginam Israeliticæ plebis causa salutis ad Regis Assueri thalamum, Regniq[ue] sui consortium transire fecisti: ita hanc famulam tuam, Christianæ plebis salutis gratia, ad gratiam tuam transire facias, ut tibi super omnia jugiter placere desideret, & te inspirante, quæ tibi placita sunt, toto corde perficiat, & dextera tuæ potentia illam semper hic, & ubique circumdet. Per Christum Dominum nostrum. Amen.

COMMENTARIUS.

I. Sicut Reges, ita & Regina Romam venientes, summo honore exceptæ fuere a Romano Pontifice, uti & antiqui Codices Cæremoniales, & Historiæ Ecclesiasticæ nos docent. Certe cum Joanna Siciliæ Regina, mense Martii anni MCCCLXVIII. ad Urbanum V. Papam, qui tunc temporis Romæ morabatur, veniret, non modo Petrus Rex Cypri, qui Romæ aderat, ei obviam exivit, sed & Urbanus Cardinales omnes, & Procures Romanos in occursum introeuntis submitit; ac ipse ad gradus Basilicæ S. Petri expectans illam, ad majorem Aram deduxit. Die vero decima nona ejusdem mensis, quæ concurrebat cum Dominica quarta Quadragesimæ, qua in Introitu Missæ cantatur, *Latere Jerusalem*, & in qua consuevit dari per Papam Rosa aurea Viro notabili in Curia existenti, Pontifex Rosam Reginae Joannæ tanquam notabili, majori, & excellentiori, licet Vir non existeret dedit, Regi Cypri eam in hoc præferendo, quæ more solito cum Cardinalibus, & alijs Nobilioribus per Urbem equitavit, ut ait Auctor ejus primæ Vitæ apud Baluzium in Historia Vitarum Paparum Avionensium, ubi etiam in Notis ad eum locum col. 1015. observat ex Garosco de Ulmoisca Veteri, factum illud displicuisse quibusdam Cardinalibus; nihilo tamen minus Urbanus, si fides sit adhibenda Libro diversarum Chronicarum Regni Siciliæ ms. in Archivo Vaticano Num. CDLIV. juxta Bzovium anno MCCCLXVIII. Num. IV. in Festo Paschatis, seu die nona Aprilis benedictum inter sacrificandum *Ensem auratum* eidem Reginae Joannæ assidenti donavit; ipsa vero Petro Regi

Cypri, quieo accinctus Nicolaum Spinellum Juvenatium Reginae Cancellarium baltheo militari ornavit, Sed de his vide quæ diximus supra Titulo VII. in Commentario ad Caput VI.

II. Quamquam vero ex nostro §. si aliqua Regina veniret Romam, honoraretur, & in ejus adventu omnia servarentur, quæ dicta sunt de Rege in omnibus & per omnia; subdit tamen, & quidem recte idem noster §. quod non recipietur a Pontifice ad osculum oris, sed ad pedis, & manus. Patres siquidem aperte, nec raro, insectantur mulierum oscula, & quamvis aliqui agunt universe de Christianis omnibus, multo magis idem statuerent de sacris hominibus. Ceterum nolo iccirco derogatum usui antiquo deosculandi Antistitem & Sanctorum Virorum manus, quem quidem morem variis exemplis probat eruditus Raynaudus in Dissertatione, *De sobria alterius sexus frequentatione per sacros & religiosos homines*, Cap. xv. Quicquid sit, pergit noster §. & ait, Regina Romæ honorifice receptam, & in Consistorium admittam non debere poni ad sedendum inter Cardinales, verum salutato Pontifice, post osculum pedis, & manus, dimitti debere cum aliquibus Cardinalibus ad locum sibi paratum. Addit, servatum id fuisse in Regina Dacia tempore Sixti IV. & Innocentii VIII. non enim recepta fuit in Consistorio, sed a Collegio deducta ad domum suæ habitationis. Vox *seducta* legitur in omnibus editionibus hujus Cæremonialis, rectiusque poterat dici *deducta*. Verbum enim *seduco* sæpe in malam partem accipitur, ideoque eam vocem corrigendam in textu censui.

§. IV.

De receptione Primogeniti Regis.

Primogenitus Regis, qui est hæres Regni, & futurus Rex, si superstes erit, honoratur iisdem fere cæremoniis in suo adventu, sicut de Rege diximus: pauca mutabun-

buntur. Non mittentur obviam per tot dies Prælati, neque mittentur Legati Cardinales, sed per unum, aut duos dies mittentur etiam aliqui Prælati, & Collegium obviabit in porta Urbis. Descendet ad Palatium Apostolicum, & ducetur suo tempore a duobus Diaconis ad Pontificem ad publicum Consistorium, & post receptionem ad osculum, sedebit post primum Presbyterum Cardinalem, & non post primum Episcopum, ut sit aliqua differentia inter patrem & filium. Si veniret Romam causa devotionis, posset recipi in Ecclesia S. Petri, sicut de Rege diximus; sed in Orationibus non diceretur S. Rex, sed simpliciter famulus tuus N. Omnia alia servantur, ut superius dictum est de Rege. In Capella sedebit, ut diximus. Thure excipietur, & accipiet pacem ut Rex. In recessu deducetur a Collegio Cardinalium, usque ad portam Civitatis, & semper erit medius inter duos Seniores Diaconos Cardinales in ultimo loco tam in veniendo, quam in redeundo,

COMMENTARIUS.

I. **Q**uod ut plurimum Maximi Principes, eorumque filii licet Primogeniti sub alio nomine, ac titulo soliti sint ad Urbem venire, hinc est, quod cæremoniæ ad ipsos recipiendos in nostro Cæremoniali præscriptæ, pene abolitæ videantur, uti non semel notatum fuit. Possem hoc loco varias Principum, qui Romam venire, receptiones describere, quas in suis mss. Diariis Cæremoniarii Apostolici recensent, sed cum non idem,

cæremoniarum ordo in ipsis receptionibus servatus fuerit, uti ex memoratis Diariis constat, ideo easdem referre omittimus; tum præsertim, quod inde semper controversiæ subortæ sint circa honores, quibus Principes non solum primogeniti Regum, sed & secundogeniti recipi volebant. Legendus Burchardus in ms. Diario gestorum Alexandri Papæ VI. ubi agit de adventu Principis filii secundogeniti Ferdinandi Regis Neapolitani,

§. V.

De receptione alicujus Principis Electoris Imperii, sive alterius Maximi Principis.

Principes Electores Imperii digniores habentur aliis Principibus præter Reges, sicut Cardinales aliis Prælatibus ratione electionis. Hi septem numero sunt, tres Archiepiscopi, Colonienſis, Moguntinus, & Trevirensis, Tres Principes, Comes Palatinus Rheni, Dux Saxonie, Marchio Brandeburgensis. Septimus additus fuit Rex Bohemie. Colonienſis Cancellaria Imperiali præest, per Italiam, Moguntinus, qui & Decanus est Electorum, per Germaniam, Trevirensis per Gallias; & quilibet illorum in sua Provincia, & Dioecesi procedit secundum Caroli Quarti Sanctionem, Palatinus, qui inter laicos primum locum obtinet, Archidapifer est Imperii, & ad eum pertinet deferre aureum pomum ante Cæsarem. Dux Saxonie Archimarescallus est, & Ensem nudum ante Cæsarem præfert. Brandeburgensis Camerarius Imperii censetur, & ante Cæsarem Sceptrum Imperiale portat. Et quamvis ille Comes, hic Marchio dicatur, sunt tamen & Ducatus Titulo omnes insigniti. Nam Palatinus ex Ducibus Bavariæ primus habetur. Et Brandeburgensis Pomeraniæ, & Stetinenſem Ducatum obtinet; sed Comitatus, & Marchionatus sunt attributa eligendi potestas. Hæc volumus delibasse, quæ non facile alibi legas, ut omnes sciant, quid importet Nomen Electoris Imperii. Quos tam Prælatos, quam Principes pari modo honorandos esse in eorum adventu ad Curiam censeo, nisi in sedendo, ut postea dicemus. Princeps igitur Maximus excipietur, ut Agrum Ecclesiæ Romanæ intraverit, omni humanitate, & honore, ut diximus de Rege, sed non tanto apparatu; neque Clerus ibit obviam cum Processione. Mittentur aliqui a Pontifice obviam per unum, aut duos dies. In introitu eorum, familiæ Cardinalium sigillatim unaquæque per se extra portam per quingentos passus, vel circa, exhibunt obviam Principi; congratulantur felicem ejus adventum nomine heri sui, & offerent domum, & ejus bona. Oratores Principum, & Senatus ulterius progredientur. Familia Papæ post alias familias ibit obviam Principi; & demum duo Cardinales nomine Pontificis, & Collegii paulo extra portam Principi occurrent, & post congratulationem capient eum medium, & ducent ad Pontificem in publicum Consistorium hoc modo. Procedent familiæ Cardinalium, & Curialium, & primum, qui in brevibus sunt; deinde familia Principis cum suis sarcinis; demum familiares Papæ laici cum Nobilibus; post-

stremo Oratores non Prælati. Princeps deinde medius inter dictos duos Cardinales, & ante eos servientes armorum. Post vero Prælati Oratores cum Prælati Papæ. Deinde si quis Prælatus erit cum Principe, honorabitur pro sua dignitate. Postea sequentur alii Prælati ordine suo consueto. Deducetur Princeps ad Palatium, & expectabit in parva Capella cum sua familia. Illi duo Cardinales ibunt ad Pontificem, qui paratus ex more exhibit ad publicum Consistorium paratum in Aula ultima, non in prima Regia; & facta reverentia a Cardinalibus, proponetur aliqua causa ab Advocatis, & cum prima erit finita, vel ante, si placebit Sanctissimo Domino nostro, quatuor, aut sex Prælati, ex primis Assistentibus discedent a pedibus Pontificis, & ibunt ad deducendum Principem ad Consistorium, qui veniet medius inter duos primos digniores, & facta trina reverentia, recipietur a Pontifice ad osculum pedis, manus, & oris. Deinde post aliqua verba, quibus & gratias aget, & gratulabitur, surget; perque Clericum Cæremoniarum deducetur ad sedendum inter duos ultimos Diaconos Cardinales, & proponetur aliqua causa, vel finietur proposita. Finito Consistorio, surgent omnes, & Princeps cum aliquibus Cardinalibus ibit ad Pontificem, & illo stante, & cum Pontifice confabulante, poterunt ejus familiares osculari pedes Papæ. Postea Papa revertetur ad Cameram suam, & Princeps ibit immediate post Crucem inter duos jüniores Cardinales, & sic sedebit in Ecclesia, & ibi, quandocumque erit cum Reverendissimis Cardinalibus; & cum hac die discedet a Papa, & ibit ad locum sibi assignatum, debet deduci ab illis duobus Cardinalibus, qui eum deduxerunt ad Palatium.

COMMENTARIUS.

I. **Q**uandoprimum constituti fuerint Septemviri Electores Imperii, diximus supra in Commentariis ad Titulum v. ubi eorum opinionem refutavimus, qui eam institutionem ad Pontificatum Gregorii Papæ V. referunt. Certa profecto est Panvinii opinio in Libro, *De Comitibus Imperatoris*, ubi ex pluribus Auctoribus aperte demonstrat, ante *Friderici II. Imperatoris tempora Imperii Electores fuisse omnes Germaniæ Principes, tum sacros, tum profanos, qui in ejus rei memoriam hodie dicuntur Principes Imperii, quorum numerum ad LIII. vel LIV. fuisse, liquet ex Abbate Urspergense, ubi de Henrici IV. Imperatoris Comitibus verba facit*. Recenset mox Auctor Archiepiscoporum, Episcoporum, aliorumque Principum nomina tam sacrorum, quam laicorum, & ita inquit: *Hi igitur Principes, vel omnes, vel quotquot adesse poterant, ante Friderici II. Imperatoris obitum Comitibus Imperii adesse solebant; interregni enim tempore vocati, ad præscriptum sibi locum veniebant; perinde ac nostra ætate fieri solet in eis Germanorum Principum conventibus, quos Dietas vocant. Qui autem ex competitoribus, quos plures fuisse aliquando legimus, plura suffragia ab his, qui aderant, ferebat, is Rex Romanorum demum appellabatur. Hanc autem consuetudinem servatam fuisse usque ad Friderici II. Imperatoris obitum, satis ex tot Auctorum superius citatis testimoniis liquere arbitror*.

II. Docet hæc Panvinus, qui etiam & alia mox addit, quibus hic noster §. magis magisque illustratur. Ergo, ut ait laudatus Auctor, ex his omnibus Principibus Imperii antiquitus institutum fuit, ut tres priores Archiepiscopi, videlicet Moguntinus, Colonienfis, & Trevirensis Imperii Cancellarii essent: Moguntinus siquidem in Germania, Colonienfis in Italia, Trevirensis per Burgundiam, Lotharingiam, Regnum Arelatense, & ceteras Galliarum Provincias, quæ Imperio suberant. Per has enim potissimum

Provincias Imperii Romani ditio tum extendebatur, Regno Arelatensi, & ceteris per Gallias Imperialibus Provinciis nondum a Francis Occidentalibus occupatis. Hos autem tres Archiepiscopos ideo præcipue electos fuisse præ cæteris, qui Cancellarii Imperii essent, existimat Panvinus, quod vetustissimi, & nobilissimi omnium Germanicorum Episcoporum essent. Moguntinus enim Metropolitanus est totius Germaniæ a Sancto Bonifacio I. Archiepiscopo institutus: Colonienfis vero Archiepiscopus ideo Cancellarii dignitatem obtinuit, tum propter antiquitatem, tum etiam quod in ejus Diocesi Aquisgrani Regis inauguratio celebretur. Porro omnium vetustissimus est Trevirensis Episcopatus, a S. Petro institutus in Galliis. Ex Abbatibus vero, Fuldenfis Archicapellanus erat Imperii. Atque hinc postea manasse subdit idem Panvinus, ut cum Septem Electores instituti fuerunt, potissimum hi tres Archiepiscopi ceteris Prælati sint, solique electionis dignitate insigniti, tanquam Imperii Romani digniores Principes, & ejusdem Cancellarii, vel, ut postea usurparunt, Archicancellarii, ob quod munus aliis Archiepiscopis eminentiores erant.

III. Quicquid de his sit, est & ejus opinionis Michael Beutherus in sua, *De Septemviratu Principum Electorum*, narratione, sub Carolo IV. qui claruit Seculo xiv. Romanorum Imperatorum, seu Regum Electores ad septenarium hunc numerum primum redactos fuisse, idque ex certis documentis ostendi. Facta est porro postremis temporibus & alia additio, de qua alibi jam differuimus. Ceterum quod ritum spectat receptionis Principis alicujus Electoris Imperii, siue alterius Maximi Principis, ad Urbem venientis, diserte expressus est ritus ipse in hoc nostro §. Sed sciendum tamen, invaluisse jam pridem usum, ut ipsi Principes Maximi ut plurimum veluti incogniti ad Urbem accedant, eamque ob causam præscriptæ ad ipsos recipiendos cæremoniæ prætermittuntur.

§. VI.

§. VI.

De receptione Principis non ita clari.

Princeps autem non Elector Imperii, sive Dux non ita clarus, Magnus tamen, iisdem fere cæremoniis honorabitur, sed non ibunt obviam ei Cardinales aliqui, neque sedebit inter Cardinales, verum post omnes Cardinales, & erit medius intrans inter duos primos Prælatos Pontificis. Cætera, ut supra. Et si esset Dux, aut Princeps minoris qualitatis, qui non deberet sedere in sedibus Cardinalium, non recipietur in Consistorio publico, sed modo supra dicto deducetur ad suum Hospitium.

C O M M E N T A R I U S.

I. **Q**uinam sint Principes non ita clari, non est facile definire. Non semel accidit, ut qui minoris potentiæ essent, ac præsertim consanguinei, affinesve Pontificis, ex peculiari ejus gratia, Romam venientes summo honore exciperentur. Varia de hac re exempla afferunt in suis mss. Diariis Apostolicarum Cæremoniarum Magistri, longumque esset hujusmodi receptiones hoc lo-

co narrare. Temporibus nostris jam ipsæ receptiones in defuetudinem abiire, solent enim Principes incogniti venire ad Urbem mutato titulo Principatus vitandi causa cæremonias, quæ in eorum ingressu sunt ex antiquo instituto peragi solitæ. Sic Magni Duces Hetruriæ Cosmus III. anno Jubilei MDCC. & Violantes Beatrix a Bavaria sequenti Jubileo anni MDCCXXV. Petiliani Comites se appellarunt.

§. VII.

De Principe Electore Prælato.

Princeps Elector Archiepiscopus, videlicet Moguntinus, Colonienfis, sive Trevirensis, quamvis præcedant Laicos Electores, cum ultra Sacram Dignitatem, etiam Ducatus Titulo decorentur, tamen familiarius consueverunt a Pontifice tractari in sedendo, ut audiui; nam ex eis nemo meis temporibus ad Curiam venit. Credo tamen, quod debeant recipi, ut alii Principes Electores; & in sedendo erit ille Archiepiscopus Elector post omnes Cardinales in sede Diaconorum Cardinalium. Si tamen erit præsens alius similis Princeps, quia tunc ipse non cederet illi, poterunt, si erunt plures, sedere in eodem sedili, secundum ordinem ipsorum.

C O M M E N T A R I U S.

I. **J**am superius dictum fuit, Magnos Principes, ubi Romam veniunt, solitos esse mutare titulos sui Principatus, quia scilicet non semper recipi possunt, aut debent eo honore, quo ipsi vellent. Hinc forte Clementem Augustum e Bavaria Electum Archiepiscopum Colonensem, eundemque Monasteriensem, & Paderbonensem Episcopum sacri Romani Imperii Principem electorem, qui

una cum Violante Beatrice a Bavaria Magna Hetruriæ Principe ejus amita, de qua diximus in Commentario superiori, Romam petebat, ut a Benedicto XIII. Consecrationis munus acciperet, Viterbii Pontifex jussit consistere, quo profectus in Ecclesia S. Mariæ de Quercu Fratrum Ordinis Prædicatorum die x. Novembris, ipsum Colonensem Archiepiscopum ritu solemniter consecravit.

§. VIII.

De receptione Oratorum, sive Legatorum Regum, & Principum, sive Rerumpublicarum.

Pridie quam Oratores sunt ingressuri Urbem, debent id significare honesto modo. Et si ipsi Oratores veniunt ad præstandam obedientiam Summo Pontifici, sive ob aliquam rem magni momenti, & spectantem ad bonum publicum, tunc Pontificis nomine debet intimari per Cursores Cardinalibus, & Prælatis Curix dies & hora introitus illorum Oratorum, & per quam portam, ut mittant familiam ad honorandum. Et nota, quod intimatio hujusmodi non consuevit fieri nisi in casibus prædictis. Cum autem Oratores ob res privatas suorum Dominorum veniunt, non mittuntur

tur familiæ, sed privati amici mittunt. Tempore Sixti cæremoniæ hujusmodi fuerunt multum (1) relaxatæ, adulationis & complacentiæ gratia; bonum esset, quod res ad debitam gravitatem reducerentur. Die igitur & hora prædicta familiares Dominorum Cardinalium separatim exhibunt obviam Oratoribus per medium miliare, vel circa extra Urbem. Si veniunt per portam S. Petri, familiæ non transeunt Domum Leproforum, neque ullo modo ascendunt Montem; & similiter, si per portam S. Mariæ de Populo, non transeunt pontem Æmilium. Advenientibus Oratoribus, ille, cui commissum est a Cardinali, accedit, & nomine Domini sui gratulatur felicem adventum Oratorum, & dicit, Dominum suum misisse familiam suam ad honorandum illorum introitum propter reverentiam, devotionem, affectionem, sive benevolentiam ex Domini illius conditione, cujus titulos diligenter servare debet, quem habet erga Dominum illorum; & pollicetur, atque offert omnem operam Domini sui, domum, familiam, & omnia, quæ potest ad beneplacita illorum; & habito ab illis responso, recedunt ad partem, dant locum aliis, & vadunt ad loca sua, & semper honorabiliores remanent cum Oratoribus. Familia Papæ debet eis occurrere paulo extra portam, & facta salutatione, aptantur per Clericum Cæremoniarum in hunc modum. Primo procedunt familiæ Curialium, tam Cardinalium, quam aliorum, qui in brevibus sunt; deinde sarcinæ, & familia novorum Oratorum, bini, & bini; post familiares Papæ, Laici, & Nobiles, ac Barones siqui sunt; tum servientes armorum cum suis baculis argenteis; inde Oratores, quorum primus erit medius inter duos primos Prælatos Pontificis. Deinde, si erunt plures Oratores, ponentur unus post alium, medius inter unum Prælatus Pontificis, & unum ex Oratoribus Principum, qui sunt in Curia, sive sint Prælati, sive laici; & Prælatus Pontificis erit a dextris novi Oratoris, & Orator antiquus a sinistris. Quando non erunt plures Oratores, novi sequentur, unus Prælatus Palatii, & unus Orator; & qui superabundabunt, sive Prælati Palatii, sive Oratores, ibunt bini & bini. Quod si novi Oratores essent tot numero, ut Prælati Papæ, & Oratores antiqui non sufficerent ad retinendos eos medios, ibunt post primum, qui erit inter duos, ut diximus, ex Palatio, alii bini & bini; unus Orator novus, & unus Prælatus Palatii, sive unus Orator antiquus; & hoc alternatim, videlicet, post primum erit unus Orator antiquus, deinde unus Prælatus Palatii, & sic deinceps usque ad ultimum. Sequentur deinde alii Prælati suo ordine, & post eos Subdiaconi, Auditores, Clerici Camerae, Acolythy, Cubicularii, alii Familiares Papæ Togati, ac demum alii Curiales. Cum pervenerint ad portam hospitii novorum Oratorum, ipsi novi Oratores firmabunt se in equis, & agent gratias Prælati, & Oratoribus, qui eos deduxerunt, & sic remanebunt in porta respondentes facientibus reverentiam cum capite detecto, quousque Prælati omnes transeant, & discedant; tunc intrabunt domum, & descendent ad quiescendum; neque prius ibunt in publicum, quam visitaverint Summum Pontificem. Die deinde statuta parabitur Consistorium publicum in Aula convenienti Oratoribus, ut alias diximus, & in sero præcedenti intimetur Cardinalibus, Prælati, & Officialibus Curiae. Hora consueta Domini Cardinales veniunt ad Palatium, & Summus Pontifex paratus Pluviali, & Mitra pretiosis exit in publicum Consistorium. Interim Oratores ipsi veniunt ad Palatium comitati ab amicis, & aliqui Cardinales amici solent mittere familias suas ad deducendum eos ad Palatium; nam tales Cardinales præveniunt aliquantulum alios, & statim mittunt familias. Et est advertendum, quod Papa non prius exeat ad Consistorium, quam Oratores intraverint Palatium, ne indecenter oporteat eum expectare. Illi autem ut descenderint, expectabunt in Capella minori, vel si Consistorium erit in Aula Regali, expectabunt in aliquo loco inferius ad hoc eis parato. Cum Pontifex, & alii sederint, fit reverentia a Cardinalibus more solito. Deinde proponitur aliqua causa ab Advocatis. Tunc Clericus Cæremoniarum perquirat a Referendario, qui habet curam Signaturæ, quot causæ sint proponendæ; & cum tempus videbitur, assumat Prælatos e numero assistantium Papæ tot, quot sufficiant pro numero Oratorum; videlicet, si erit unus, vel duo Oratores, non assumantur minus quam quatuor, & deducantur medii. Et si fuerit inter Oratores aliquis Prælatus, debet deferre Cappam. Oratores si essent sex, octo, vel plures Oratores; tot assumantur Prælati, & unus ultra, ut primus Orator sit medius, alii unus Orator, & unus Prælatus; qui Prælati ibunt simul ad locum, ubi Oratores expectant, & eos deducunt ad Consistorium. Cum apparuerint in conspectum Pontificis, tertio cum distantia genuflectunt, prout Clericus Cæremoniarum.

To. I.

A a a

nia-

(1) Ita in editione Romana anni 1560. in Veneta 1. sic legitur: *laxiores, idque ambitioni, & gratia datum; non improbandum, si res ad pristinam gravitatem reducerentur.*

niarum, qui eos præcedet, ostendet; & tunc Advocatus tacebit, etiam si sua propositio non esset finita. Oratores, præeunte primo Prælato, ad Pontificem ascendent, & recipientur ad osculum pedis, manus, & oris; genuflexi dicent secreta aliqua verba, & præsentabunt Papæ Litteras credentiales, vel publica documenta commissionis eorum, quas prius osculabuntur, quam in manibus Pontificis tradant. Pontifex Litteras, & instrumenta dat Secretario, & Oratores per Clericum Cæremoniarum ducuntur retro scamnum Presbyterorum Cardinalium, quod est in conspectu Pontificis, & ibi stant, quousque sit tempus exponendi. Advocatus autem si non finierat, prosequitur causam suam, & ea finita, Secretarius Pontificis surgit, & legit Litteras, & instrumenta, stans ante Pontificem, clare, & distincte pronunciando, ita ut bene ab omnibus intelligatur. Quibus finitis, Orator, cui incumbit, stans detecto capite, accepto signo, incipit orationem suam, & alii ejus Collegæ simul stantes capite detecto permanent; & illo se inclinante, vel genua flectente, pariter se inclinant, & genuflectunt. Finita oratione, Pontifex respondet, ut sibi videbitur. Procurator autem Fiscalis rogat omnes Pretonotarios, Clericos Cameræ, & alios Notarios publicos de obedientia præstita, vel actu facto, & responso Pontificis, & petit instrumentum, & instrumenta. Post responsum surgunt omnes, & Oratores interim veniunt ad Dominum nostrum ad circulum cum aliquibus Cardinalibus, & eorum familiares osculantur pedes Pontificis, qui mox revertitur ad Cameram suam, ut venerat. Oratores deducuntur ad hospitium suum a suis amicis particularibus, & non a familiis Cardinalium, quia illæ debent comitari Dominos suos.

COMMENTARIUS.

I. **E**st hodieque Romæ in usu receptio Oratorum, seu Legatorum Regum, & Principum, de eaque passim tractant Apostolicarum Cæremoniarum Magistri in suis mss, Diariis, quorum loca supervacaneum est referre, tum maxime, quod perspecta fere ea cæremonia omnibus est, qui in Urbe aliquo temporis spatio commorati sint. Unum vero hic ego adnotabo, licet Legatis Regum, & Principi, atque Rerumpublicarum Jure Gentium honor, ac veneratio debeatur, & in eorum ingressu, & cum commorantur in Principum ditione, ad quos missi fuerunt, Legatos illos dici, qui non unius tantum Principis mittentis, sed etiam ejus, ad quem mittuntur, assensu, & voluntate constituuntur; Duo, inquit Grotius Lib. II. *De jure belli & pacis*, Cap. xviii. Num. v. *requiruntur, ut quis Legatus constituatur, auctoritas videlicet mittentis, & Principis, ad quem mittitur*. Legatorum quippe Officium ex tacita partium conventionione proficiscitur, ut idem Grotius notat; hæc vero est reciproca, & utriusque consensus requirit; nec immerito, cum utriusque Principis interfit, quis Legatus eat. Idque multo magis locum habet in iis Legatis, qui postremis hinc temporibus diu, aut etiam perpetuo in Aulis morantur; in his enim cessat ratio Juris Gentium, hoc est necessitas: *Optimo jure rejici possunt, quæ hodie sunt Legationes assidue, quibus quam non sit opus, docet mos antiquorum, quibus illa ignorata*. Idipsum Wicquefortius Libro I. *De Legato*, testatur: *Certum est, ait, Legationes ordinarias nec Juris Gentium, nec ducentis retro annis notas fuisse; suntque quamplures Nationes, apud quas nullus earum usus; sola Europa eos admittit, sique aliquis Principum eas respuerit, qui quidem poterit aliquid contra morem fecisse, nihil contra Jus Gentium*.

II. Hæc ita vera sunt, ut sive antiquam, sive recentem historiam evolvas, infinita reperies Legatorum exempla, qui aut non recepti,

aut remissi sunt; nec tamen creditum est, Jura Gentium violari. Sic Romani Ætolis denuntiaverunt, teste Livio, *ne Legatos mitterent, alioquin pro hostibus fore*. Porro, ut alia exempla omittam, anno MDLIII. Paulus IV. Figueroam Philippi II. Legatum, & Mediolanensi Præfectura defunctum, cum fere Romam intraret, Urbe exclusit, negavitque pro Legato agnitionem iri, quod Pontificis cursorem litteris, quas ferebat, spoliasset, incurrissetque Censuras; nec Philippus succensuit, substituitque Vargam Venetiis prius Legatum. Sive ergo Legationis naturam, sive exempla Principum inspicias, etiam quibus maxima est Juris Gentium reverentia, concedi omnino debet, Legatum dici non posse, qui a Principe admissus non est, posse vero non admitti ex plurimis causis, quas Grotius recenset. Sed vide Auctorem Opusculi editi anno MDCLXXXV. cui Titulus: *Legatio Romam Marchionis Lavardini, & ob eandem Regis Christianissimi cum Romano Pontifice dissidium &c.*

III. Ubi admissi a Principe fuerint Legati, qui ad eum ab alio Principe directi sunt, jam non est dubium, quin ritus pervetustus sit, ut eisdem Legatis summi honores exhibendi sint. Est autem primus honor, qui Legatis Regum, & magnorum Principum exhiberi solet, ut obviam illis eatur, uti fuse ostendit eruditissimus Conradus Brunus in præclarissimo Opere, *De Legationibus*, Lib. v. Cap. vi. ubi varia ejus ritus exempla refert, quibus antiquæ historiæ refertæ sunt. Itur hodieque obviam Legatis, seu Oratoribus Principum Urbem ingressuris, sed paulo tamen diverso ritu, quem præscribit hic noster §. uti docent mss. recentiorum Apostolicorum Cæremoniarum Diaria quorum, loca supervacaneum est in hoc Commentario referre, tum præsertim quod non ita rari sunt hujusmodi Oratorum ingressus. Differunt autem Oratores ipsi a Ministris, non enim hi, ut illi excipiuntur, neque honoribus donari solent, qui ipsis Oratoribus exhibentur.

DE

DE CONCILIO GENERALI TITULUS XIV.

Scripturi caeremonias in sacro Generali Concilio servandas, primum de loco Concilii, & sedium dispositione differendum putamus, deinde de personis, & earum habitu, tertio de ordine rerum gerendarum, & ultimo de sacris precibus, & orationibus.

§. I.

Quandonam Generale Concilium reputetur legitimum.

Generale Concilium tunc Canonicum, & legitimum reputatur, cum a Romano Canonico Pontifice indicitur, vel quod schismatis favientis procella, Catholica Ecclesia sibi ipsi indicit. Neque Concilium aliquod susceptum legimus, quod Apostolica Beati Petri Sedes non probaverit, illique vel per suum Antistitem Romanum Pontificem, vel per ejus Legatos non praesuerit.

COMMENTARIUS.

I. **D**isseruimus jam, & quidem fufe de Conciliis, & variis ad ipsa spectantibus, Tomo I. Conciliorum in Prolegomenis, in quibus per plura Capita Concilii nomen, etymon, definitionem, divisionem, originem, ritusque antiquos in eo celebrando observatos ex veteribus monumentis tironum rei Synodalis eruditioni explicuimus. Ea itaque tantum hoc loco enarrabimus, quae in hoc Titulo praescripta sunt, ubi de Generali Concilio agitur, quod, ut ait hic praesens §. *tunc Canonicum, & legitimum reputatur, cum a Romano Canonico Pontifice indicitur, vel quod schismatis favientis procella Catholica Ecclesia sibi ipsi indicit.* Et quidem Jus esse solius Romani Praefulis non modo Generale Concilium indicere, verum etiam ei vel per seipsum, vel per Legatos Apostolicae Sedis praesidere, fufe probavimus in citatis Prolegomenis, Cap. VII. & IX. Certa enim est illa nostri hujus §. sententia: *Neque Concilium aliquod susceptum legimus, quod Apostolica Beati Petri Sedes non probaverit, illique vel per suum Antistitem Romanum, vel per ejus Legatos non praesuerit.* Quod adeo verum est, ut etiam si ab initio Concilium fuerit auctoritate Apostolica congregatum, tamen si postea per Romanum Pontificem dissolutum, aut alio translatum fuerit, ex eo tempore remaneat acephalum, & schismaticum, nec sit amplius Concilium, sed Conciliabulum, uti addiscimus ex Canone, *Clericus*, Distinctione XX. & fuit definitum in Generali Concilio Lateranensi V. sub Leone X. Sessione XI. Unde Julianus Cardinalis S. Angelii, qui ab initio fuerat Apostolicae Sedis Legatus in Concilio Basileensi, post illius dissolutionem, seu translationem ab Eugenio

Papa IV. factam differens cum Aenea Sylvio, qui fuit postea Pius II. dicebat, illud non Synodum Ecclesiae, sed Satanae, & Ministrorum ejus Synagogam, ut refertur in ejusdem Pii Constitutione, quae incipit, *In minoribus agentes*, edita VI. Kal. Maji anno MCDLXIII. legiturque in Romano Bullario.

II. At vero quamvis solius sit Summi Romani Pontificis Concilium Generale indicere, sic tamen, ut possit etiam alius, ipso Pontifice Maximo consentiente, indicere Concilium, quin etiam satis sit, si indicationem factam ipse postea ratam habeat, & confirmet, ut inter alios docet Cardinalis Bellarminus Lib. I. *De Conciliis & Ecclesia*, Cap. XII. potest nihilominus tempore schismatis, ubi scilicet Papa esset schismaticus, multoque magis, si esset haereticus, Catholica Ecclesia sibi ipsi Generale Concilium indicere, quod quidem idem hic noster §. Canonicum, & legitimum vocat. Sane docet Bellarminus ibidem Cap. XIV. posse in eo casu congregari Concilium imperfectum, quod sufficiet ad providendum Ecclesiae de Capite. Ecclesia enim sine dubio habet auctoritatem providendi sibi de Capite, quamvis non possit sine Capite statuere de multis, de quibus potest cum Capite, ut recte docet Cardinalis Cajetanus in Opusculo, *De potestate Papae*, Cap. XV. & XVI. & longe ante Cajetanum Clerus Romanae Ecclesiae in Epistola XXXI. ad S. Cyprianum. Porro addit Bellarminus, Concilium istud imperfectum fieri posse, si vel indicatur a Collegio Cardinalium, vel ipsi per se Episcopi in locum unum conveniant. Sed multa scitu digna de hac quaestione, & de aliis similibus, videri possunt apud doctissimum Jacobatum, *De Concilio*.

§. II.

De loco, & sedibus Concilii.

Indicto igitur Concilio Generali, ornetur locus Concilii, hoc est, ubi publicae Sessiones habendae sunt, in Ecclesia Cathedrali, sive alio capaci loco, in hunc ferme modum.

dum. Primum caveatur, ut nullus omnino aditus relinquatur ad ipsum locum præter unum tantum, qui valvis, & firmis clausuris obserari possit. Si erit Ecclesia Cathedralis, relinquenda erit quæ sit capax pars superior apud Altare majus pro Missis solemnibus celebrandis, & asseribus, aut alia materia separanda a parte inferiori, in qua sedes aptabuntur pro Concilio. Igitur in capite loci, ubi Sessiones celebrandæ erunt, constructur thalamus pro sede Papæ cum tribus gradibus debitæ proportionis; latitudo ultimi plani erit decem palmorum, longitudo vero duodecim; in medio erit sedes ampla cum suo postergali, & cum scabellis magno & parvo, & omnia erunt ornata, ut sit in publico Consistorio. Erunt etiam duo scabella hinc inde pro Diaconis assistentibus Papæ. In ista linea (1) mille erunt aliæ sedes, nisi forte Imperatoris, aut Regum, si quis istorum esset interfuturus Concilio. Sedes Imperatoris parabitur juxta sedem Papæ, quæ habebit duos gradus conjunctos gradibus Papæ, sed non tantæ latitudinis, aut longitudinis, erit ornata cum panno aureo post tergum, sed non supra caput; habebit scabellum parvum ad pedes viridi colore pictum; & advertendum, quod locus, ubi sedet Imperator, non sit altior loco ubi tenet pedes Pontifex. Si vero Reges adessent unus vel duo, parentur sedes pro eis cum postergali usque ad spatulas, & ornentur, ut scamna Cardinalium; habebunt tamen pulvinaria ex cremusino, & scabellum viride sine gradibus, & situabuntur hinc inde, non ad lineam omnino sedis Papæ, sed aliquantulum transversæ, ut possint respicere ad faciem Pontificis a dextris, deinde & a sinistris intra gradus sedis Papalis. Per longitudinem loci erunt scamna pro Cardinalibus, & Prælati cum postergali, & unico gradu, longitudinis octo cannarum, vel circa; sed media pars a dextris pro Episcopis, & Presbyteris, & (2) alia pars a sinistris pro Diaconis Cardinalibus erit aliquantulum eminentior, videlicet quatuor, aut quinque digitorum altitudinis pulchrioribus pannis ornata. Post scamna prædicta in transversum ante faciem Pontificis ad lineam erigantur quatuor sedes Patriarchales distinctæ, & separatæ suis postergalibus & gradibus ad similitudinem scamnorum prædictorum, & (3) situentur paribus intervallis, ita ut quadraturam facientes, lineam transversalem impleant; & inter duas medias erit quasi janua & aditus ad sedes primæ quadraturæ. Intra hanc primam quadraturam fient sedilia humiliora sine gradibus, & sine postergali per longitudinem cum transversa usque ad aditum, qui debet relinqui latitudine unius cannæ, vel circa. Post primam quadraturam fient & alia scamna post priora ejusdem fere altitudinis, sine postergali tamen, quæ complectantur post etiam Patriarcharum sedes, relicto spatio pro aditu, & item si locus erit capax, fiat alius ordo sedilium post secundum, & tot, quot loci amplitudo, & Prælatorum numerus exigit. Erigatur etiam in dicto Conventu Altare aliquod cum Cruce, & Sacra Eucharistia, sive Reliquiis Sanctorum in loco congruo, ut possit Pontifex orare cum venit ad Concilium, & cum dicit preces pro Synodo, illuc faciem convertere. Si autem Papa non erit futurus (4) præsens in Concilio, poterunt scamna prædicta fieri apud Altare majus sine sede Papali; & Præsides Concilii, finita Missa, paratus sacris vestibus ac si esset celebraturus, sedebit in Faldistorio posito ante Altare, vertens renes ipsi Altari.

COMMENTARIUS.

I. Juxta antiquum ritum statuit primum hic noster §. ut indicto Concilio Generali, *ornetur locus Concilii, id est, ubi publicæ sessiones habenda sunt in Ecclesia Cathedrali, sive alio capaci loco*. Legendum plane quod de hac re scripsimus nos Tomo 1. Conciliorum in Prolegomenis, Cap. xvi. quod inscriptum est, *De loco, ubi Concilia celebrarentur*. Ibi enim jam luculenter ostendimus, ut plurimum Sacros Conventus, atque Concilia, non alibi, quam in Ecclesiis celebrari consuevisse. Audiendus hic tamen Scriptor Vitæ S. Stephani junioris Tomo 1. Analektorum Græcorum, de sex primis œcumenicis Conciliis ita inquit: *An non in sacris Templis sex Sanctæ Synodi congregata sunt. Prima Nicea in Templo S. Sophia, se-*

cunda Constantinopoli in Templo S. Irenes, Tertia Ephefi in Templo Theologi, Quarta in nostra Calchedonenfi Metropoli in Templo celeberrimæ Euphemia, Quinta autem, & Sexta Constantinopoli, illa in Templo S. Sophia, hac in sacro Palatio in loco, qui dicitur Trullus. Sed ut verum fatear, licet tum præcæ, tum recentiores etiam Synodi ut plurimum in Ecclesiis, & in Secretariis, sive Sacristiis celebrarentur, ecquis tamen est in Ecclesiastica Historia adeo peregrinus, qui nesciat, Concilium omnium vetustissimum Nicænum 1. in Aula Palatii Constantini Magni Imperatoris celebratum? Fidem facit ejus rei Eusebius Lib. 111. *De Vita Constantini*, Cap. x11. Sexta pariter Synodus, & Quinisexta, ut alias omittam, ubinam habitæ fuerunt,

(1) Ita in omnibus editionibus, forte legendum, *multa*. (2) Ita in editione Veneta, in Romana vero, *quarta*. (3) Ita in Romana, in ipsa Veneta, *collocantur*. (4) Ita in editione Romana, in aliis dicitur vox *præsent*.

runt, quam in ea Regiæ Domus parte, quæ Trullus dicebatur, & illa quidem Constantino Pogonato Imperatore, hæc Justiniano II.

II. Moris autem etiam antiqui fuisse, ut in Basilicarum Secretariis Concilia Episcoporum agerentur, demonstrat luculentissime Cardinalis Baronius ad annum cdl. exemplis compluribus tum Ecclesiæ Africanæ, ubi Concilia Carthaginensia in Secretariis habita reperiuntur; tum Romanæ Ecclesiæ sub Martino I. Pontifice Maximo, & aliarum pariter Ecclesiarum. Eundem locum Eusebius Lib. x. *Historia*, Cap. 1v. & Evagrius Lib. II. Cap. 111. *Sanctuarium*, sive *Sacrarium* appellarunt. Harum namque, & *Secretarii* vocum, eandem esse significationem, sed & alia appellatione a Græcis *Diaconium* dici, docet Canon XXI. Concilii Laodicensis anni cccxiv. Eo loci disponi consuevisse sacra Vasa ad ministerium, ac sacros Codices ad lectionem, tradit S. Paulinus, qui claruit Seculo iv. in Epistola II. ad Severum his versibus,

Hic locus est, veneranda penus quo conditur, & quo Promitur alma sacri pompa ministerii.

Ecclesiæ itaque, & nostræ Religionis negotia, atque Concilia, uno, vel altero exceptis, non alio in loco, quam in Ecclesiis, vel earum Secretariis a primis usque seculis celebrari consueverunt. Secretaria autem olim Templi vicem retulisse, utpote in quibus erecta erant Altaria, ut in Lateranensi S. Thomæ, in Vaticano S. Gregorii, notavit Mabillonius in Commentario prævio ad Romanum Ordinem, Cap. 111. in fine. Consentaneum vero omnino erat, ipsa Ecclesiæ Religionisque Christianæ negotia in Templis tractari, ut loci dignitate, & reverentia, eorum qui convenerant animi ad maiorem religionem excitarentur; unde aliquando non modo in Ecclesia, sed ipsius sacratori loco Altari viciniore Præsulum habebatur corona, idque præsertim eluxit in Chalcedonenſi Concilio, cujus Sessiones omnes, ut ex illius Actis constat, ante Altaris Sanctissimi cancellos celebratæ fuerunt.

III. Sed ut ordinem in hoc nostro §. præscriptum persequamur, *Si erit Ecclesia Cathedralis*, inquit, in qua scilicet Concilium est celebrandum, *relinquenda erit quæ sit capax pars superior apud Altare majus pro Missis solemnibus celebrandis, & asseribus, aut alia materia separanda a parte inferiori, in qua sedes aptabuntur pro Concilio*. Solemnium Missarum in Conciliis celebratarum, & quidem in quibuslibet eorum Sessionibus, expressa quidem fit mentio in Actis Conciliorum Constantiensis, Basileensis, Florentini, & aliorum sequentium. Certe aperto ipso Concilio Constantiensis die 1. Novembris anni mcdxiv. quod indixerat Joannes XXIII. ab eodem celebrata est Missa sollemnis, tum vero deinde in unaquaque Sessione servatus fuit idem ritus ab aliis Episcopis, sicut & ille habendi sermonem post ipsa Missarum sollemnia. Ceterum ex eodem nostro §. cautum & illud est, ut præter hoc majus Altare Ecclesiæ, in qua habetur Concilium, *erigatur in dicto Conventu Altare aliquod cum Cruce, & sacra Eucharistia, sive Reliquiis Sanctorum in congruo loco &c.* Suntque hæc conformia pristina Conciliorum disciplinæ, in quibus, ut in citatis nostris Prolegomenis ad Concilia demonstravimus Cap. xx. consuevit Sacer Evangelii Codex ho-

norificentissimo collocari Throno una cum Sanctorum Reliquiis, ac Imaginibus. Sane in Generali VIII. Synodo mentio habetur expressa sacrarum vivificæ Crucis Reliquiarum, quæ ex vetusta consuetudine cum Imagine Christi Domini, testimonio Theodori Studitæ in refutatione & subversione impiorum Poematum Iconomachorum apud Jacobum Sirmondum Tomo v. editionis Venetæ, in Conciliis ante omnium oculos collocabatur. Ajunt autem laudatæ VIII. Synodi Acta: *Propositis venerabilibus lignis, & Sanctis Evangeliiis*.

IV. Celeberrimum pervetustumque ejus ritus exemplum ponendi scilicet in Conciliis super Throno Sacrum Evangelii Codicem, ut nimirum Christus quem Evangelium repræsentet, veluti Pontifex præsidens invisibiliter videretur, docet nos S. Cyrillus Alexandrinus Episcopus in Apologetico inserto Actis Œcumenicæ Synodi Ephesinæ, Libro 111. Cap. x111, sic inquit: *Sacra Synodus Christum confessorem, & velut caput constituit, venerandum enim Evangelium in sancto Throno collocatum erat, Sacerdotum auribus insonans; Justum judicium judicate &c.* Quo ritu non id tantum Patres exprimere voluerunt, sed illud etiam, quod dixit Servator, Matthæi Cap. xv111. *Ubi fuerint duo, vel tres congregati in Nomine meo, ibi sum in medio eorum*; ut observat Filescus, *De sacra Episcoporum auctoritate*, Cap. xv111. §. II. Ceterum cum ejusdem Ephesinæ Synodi relatio ad Principem doceat nos, *Sanctum Evangelium, quod ipsum Christum præsentem monstrabat, in Throno, qui medium locum obtinebat, fuisse propositum*, hinc Legati Romani, qui Nomine Papæ eidem Concilio præsidebant, erant ad lævam intrantium, ut Christo Pontifici sedenti, eosque intuenti, essent ad dexteram, ut notat Lupus in Dissertatione, *De Synodo 1. Nicenæ*, Cap. ix. quia scilicet dextram, & Latinis, & Græcis fuisse semper honorabiliorem, ut ait, facile posset extendi.

V. Addit & alia laudatus Lupus, quæ veterem disciplinam spectant, quæque etiam jam pridem mutavit Ecclesia. Certum tamen profecto est illud, semper Romanos Pontifices, ubi Conciliis sive per se ipsos, seu per Legatos suos præfuerunt, honorabiliorem, eminentioremque locum obtinuisse, ut pluribus exemplis ostendi posset. Ut autem alia omittam, teste Rogerio Hovedeno in parte posteriori Anna-lij, ubi agit de Concilio Generali III. Lateranensi celebrato ab Alexandro III. anno Christi mclxxix, ipse Papa in Lateranensi Ecclesia in eminentiori loco cum Cardinalibus suis, & Præfectis, & Senatoribus, & Consulibus Urbis constitutus, *Feria secunda tertiæ hebdomadæ Quadragesimæ, quæ tertio Nonas Martii evenit, primum Concilii sui diem celebravit*, idest primam Concilii Sessionem. Quod sedem Imperatoris spectat, si is forte esset interfuturus Concilio, ex præscripto quidem nostri hujus §. *Sedes Imperatoris parabitur juxta sedem Papæ, quæ habebit duos gradus conjunctos gradibus Papæ, sed non tantæ latitudinis, aut longitudinis; erit ornata cum panno aureo post tergum, sed non supra caput; habebit scabellum parvum ad pedes viridi colore pictum; & advertendum, quod locus, ubi sedet Imperator, non sit altior loco ubi tenet pedes Pontifex*. Hinc summa fuit Con-

Constantini Magni Imperatoris pietas, qui, ut scribit in ejus Vita Eusebius Lib. III. Cap. x. *simul ac ad summum locum venit*, Niceni scilicet Generalis I. Concilii, cui interfuit, *primum in medio conventu erectus constitit, ac, cum parva quadam sella ex auro fabricata illi esset loco posito, non prius consedit, quam Episcopi ad id innuissent, idemque omnes post Imperatorem fascitarent.*

VI. Quo ornatu adfuerit Constantinus ipse laudato Concilio I. Niceno, exponit idem Eusebius citato loco, ubi post descriptam Concilii Aulam, ita de adventu illius, & comitatu, atque ornatu inquit: *Imperatorem antecedunt alii, non ex armatis, & satellitibus, qui ei adesse consuevissent, sed ex amicis solum, qui Christi Fidem amplexarentur.* Tum paulo post: *Imperator deinde tanquam quidam celestis Dei Angelus, purpurea vestitu, & nitido, velut claro luminis fulgore splendescens, coruscantibusque illius radiis illustratus, & conspicuo auri, lapidumque pretiosorum nitore pulchre adornatus, per medium confessum intrat.* Quo habitu, & quibus ornatus insignibus Constantiensis Concilio interfuerit Sigismundus Augustus, docent nos Acta ejusdem Concilii apud Pagium in Vita Joannis XXIII. Num. xxxiv. ubi enarrat Acta Sessionis III. Interfuisse eum ait coronatum & Augustali habitu indutum. Acta Bibliothecæ Regiæ ab eodem Auctore citata, sedisse ajunt ipsum Dalmatica, & Pluviali vestitum, Diademate coronatum, Sceptro, Pomq aureo, ac Ense per tres Proceres tentis, ac Corona per alium quartum, quando ipsemet non eam capite gestabat, assistentibus ei a latere duobus Cardinalibus. Re vera in Sessione XIV. ut videre est in Actis editis, Ludovicus Comes Palatinus tenebat Pomum, seu Mundum, Henricus Dux Bavarie Ensem, Fridericus Burgravius Sceptrum, & Andreas Baro de Hungaria Coronam.

VII. Præter Imperatorem interfuerunt etiam Conciliis Reges, de quibus ita & hic noster §, inquit: *Si vero Reges adessent unus vel duo, parentur sedes pro eis cum postergali usque ad spatulas, & ornentur, ut scamna Cardinalium; habebunt tamen pulvinaria ex cremusino, & scabellum viride sine gradibus &c.* Sciendum autem hic illud, quod jam explicuimus Tomo I. Conciliorum in Prolegomenis, Cap. xv. quodque inferius iterum repetemus, Imperatores, Regesque, aliosque laicos, licet Conciliis interfuerint, nullo tamen modo suffragium dedisse, aut legem præscripsisse. Interfuerunt quidem tanquam Concilii defensores sine ullâ judiciali potestate, caventes tantum, ut pacata fierent omnia, decretaque executioni mandarentur. Sane adfuit, uti dictum est, Niceno I. Generali Concilio Constantinus, sed tanta cum reverentia, ut non prius in parva sella aurea ipsi in loco superiori parata assidere voluerit, quam Episcopi innuissent. Quod post Eusebium testantur Socrates, Lib. I. *Historia*, Cap. x. Theodoretus, Lib. I. Cap. VII. Sozomenus, Lib. I. Cap. XVIII. & alii nihil ab invicem discrepantes. Quænam vero fuerint ejusdem Imperatoris partes in Synodo assidentis, satis idem Eusebius expressit Lib. III. *De Vita Constantini*, Cap. XIII. nempe attente audire, studere paci, favere veritati, & fovere concordiam, tumultus comprimere, discrepantes

a veritate revocare, non autem ferre suffragium, vel causam sententia definire, vel quampiam ad eam rem pertinentem inconsultis Patribus legem ferre. Nam & commendatur in eo potissimum a S. Ambrosio in Epistola XXXII. ad Valentinianum Imperatorem de rebus gestis in ipsa Nicena I. Synodo, modestia Constantini, quod liberum in omnibus reliquerit de Fide judicium Episcopis.

VIII. Nunc ut de aliorum sedibus dicamus in Aula Concilii locandis, ex præscripto quidem nostri hujus §. *per longitudinem loci erunt scamna pro Cardinalibus, & Prælati cum postergali, & unico gradu longitudinis octo canarum, vel circa; sed media pars a dextris pro Episcopis, & Presbyteris, & alia pars a sinistris pro Diaconis Cardinalibus.* Si vetustiore disciplinam inspiciamus, non est dubium, quin diu suum quique gradum Cardinales servarint, adeo ut ne ipsi quidem Cardinales subscriberent sederentve ante alios Episcopos ordinatione priores, nec Presbyteri Cardinales ante ullos prorsus Episcopos. Certe viguit hæc disciplina vel ineunte Seculo XI. uti liquet ex Romana Synodo anni MXV. sub Benedicto Papa VIII. ubi plures subscribere Episcopi alii non solum ante Cardinales Presbyteros, sed etiam ante Episcopos ejusdem sacri Collegii, prout vel Archiepiscopi erant, vel Ordinationis ævo seniores. Porro cœpere primum Episcopi Cardinales adulescente memorato Seculo XI. aliis omnibus antequam Episcopis, eoque postea Cardinales alii sensim pervenere; quia scilicet in Romana Synodo Nicolai II. Papæ anno MLIX. celebrata ad infringendam Imperatorum audaciam, qui Romani Pontificis electionem sibi vendicant, constitutum fuit, ut penes ipsos Episcopos Cardinales præcipua esset eligendi Papam potestas. Audiendus de hac re S. Petrus Damiani, qui Libro I. Epistola XX. ad Cadaloum Parmensem Episcopum, quem Imperatoria potestas, vel grassatio Romanæ Sedis intruserat, ita scribit: *Taceamus interim de Senatu, de inferioris Ordinis Clero, de populo. Quid tibi de Cardinalibus videtur Episcopis, qui videlicet, & Romanum Pontificem principaliter eligunt, & quibusdam aliis prærogativis, non modo quorumlibet Episcoporum, sed & Patriarcharum, atque Primatum jura transcendunt.* Et populo post: *Nimirum cum electio illa per Episcoporum Cardinalium fieri debeat principale judicium, secundo loco jure præbeat Clerus assensum, tertio popularis favor attollat applausum &c.*

IX. Recte observat in hunc locum doctissimus Thomassinus Parte I. *Discipline* Lib. II. Cap. CXIII. laudati Petri Damiani verba tanto videri mirabiliora, quod iis primaria potestas eligendi Romani Præfulis, ad solos revocatur Cardinales Episcopos, reliquique Cardinales promiscue fere permiscetur cum Clero reliquo; unum iis, velut & populo integrum, ut sit assentiri electioni a Cardinalibus Episcopis factæ. Cum ita ergo assurrexissent Episcopi Cardinales supra Episcopos alios quovis, supra Primates etiam, & Patriarchas, sedere etiam, ante Episcopos omnes cœperunt. Cœpisse inquit Thomassinus, quod ea novatio sensim, & lentissimis facta sit incrementis. Tarditatis autem tantæ non immerito conjicitur causa fuisse, Cardinalium ceterorum cum Episcopis Cardinali-

salibus individua societas. Non enim tantæ molis fuerat Episcopos aliquos supra Episcopos alios sedere jubere, quantæ eodem confessus honore supra Episcopos quosvis donare etiam Presbyteros, Diaconosque. Id enim vero non potuit, nisi sensim sine sensu, & multo temporis intervallo perfici. Sed cum tandem ad illam sedendi prærogativam emerissent Cardinales Episcopi, paulatim ad se & alios pertraxere fecum Cardinales, quibuscum in unum Senatum, unum Collegium, & unum quodammodo corpus coaluere. Ceterum etfi eodem Seculo XI. labente, & Seculo etiam XII. legantur quandoque Cardinales omnes Archiepiscopis quoque antepositi in Conciliis Romano, & Beneventano, & in Galliis, non hæc tamen fuit iis semper deinceps prærogativa, sed suum identidem gradum Episcopi recuperavere, ut idem Thomassinus citato loco ostendit.

X. Certe Seculo Christi XIII. in Generali Concilio I. Lugdunensi, quod celebratum fuit anno MCCXLV. sub Innocentio Papa IV. ad dextram, & ad lævam laudati Pontificis, qui eidem Concilio præfuit, sedit sacrum omne Cardinalium Collegium supra Archiepiscopos, & Epi-

scopos omnes: *Ad dextram*, ajunt Acta Concilii, & *in eminentioribus locis sederunt Episcopi Cardinales, ex altera vero Presbyteri Cardinales; Archiepiscopi, & Episcopi post eos*. Imo & in Concilio Lugdunensi II. itidem Generali, cui præfuit Gregorius Papa X. anno MCCCLXXIV. sederunt Cardinales non solum supra Episcopos, Metropolitanos, & Primates omnes, sed & supra Patriarchas Latinos Constantinopolitanum & Antiochenum, ut docent ejusdem Concilii Acta, notatque ad ipsum annum Raynaldus. At vero demum quamvis ita se res haberet, diu tamen concertationes in Anglia, & in Polonia duraverunt contra hanc sedendi prærogativam, qua post ipsa Concilia Lugdunensim gaudebant S. R. E. Cardinales supra ceteros Episcopos omnes; legique de ea controversia potest celebris Eugenii IV. Epistola, quam ad Henricum Archiepiscopum Cantuariensem scripsit de S. R. E. Cardinalium dignitate ceteris Ecclesiasticis dignitatibus præstantiori, afferens inter alia, multisque argumentis confirmans, prærogativa ipsa sedendi merito omnes Cardinales potiri supra omnes Episcopos quosvis.

§. III

Qui habent vocem deliberativam in Conciliis?

In Conciliis autem illis venerandis, ac sacrosanctis, quibus Fides nostra, & recte vivendi norma purgata, atque firmata est, non legimus intervenisse statuendi causa, nisi Episcopos, & Abbates, & ii tantum Decretis se subscribebant. Episcopos appellamus etiam Episcoporum Principes, quoniam hæc est suprema in Ecclesia Dei potestas. Inferioris autem gradus Ecclesiasticos Viros, & Principes seculares consulendi, ac instruendi gratia, non autem decernendi intererant, qui, ut periti ajunt, consultivam vocem habent in Conciliis, non definitivam, seu deliberativam. Aderunt igitur in Conciliis ad statuendum Romanus Pontifex tanquam Rector & moderator totius Ecclesiæ, Pastor gregis Dominici, & omnium Episcoporum Episcopus: Sacer Cardinalium Senatus, Patriarchæ, Primates, Archiepiscopi, Episcopi, Abbates, quibus non immerito Ordinum Religiosorum Generales Magistri additi sunt. Denique omnes Prælati, qui secundum formam juramenti, quod præstant, cum ad dignitates promoventur, ad Synodum venire tenentur. Alii autem, ut diximus, differendi, instruendi, consulendive gratia poterunt interesse, non tamen in Sessionibus publicis induti sacris vestibus sedebunt, neque sententiam dicent.

COMMENTARIUS.

I. **C**atholicorum una sententia est, quam merito inter alios Theologos propugnat præstantissimus Cardinalis Bellarminus, Lib. I. *De Conciliis*, Cap. xv. *solos Prælatos majores*, eosque omnes, idest Episcopos in Conciliis Generalibus, & Provincialibus habere jus suffragii decisivi ordinarie; ex privilegio autem, & consuetudine, etiam Cardinales, Abbates, atque Generales Ordinum, licet Episcopi non sint; ex Presbyteris autem, & aliis Clericis minoribus tantum vocari aliquos Viros doctos, qui juvent in disputando, vel aliis ministeriis: Principes vero vocari, tum ut Concilium defendant, tum ut testes, & conscii Decretorum Concilii postea transgressores & contumaces pœnis corporalibus puniant: denique ex privatis laicis tantum vocari aliquos,

qui videntur utiles, vel necessarii ad aliquod ministerium Concilii. Hanc sententiam esse Catholicorum doctrinam, patet tum ex personis, quæ interfuerunt Conciliis, tum ex Joanne Cardinali Turrecremata Lib. III. Cap. XII. & xv. atque ex aliis Catholicis Auctoribus passim. Legi autem inter alia possunt, quæ scripsimus nos Tomo I. Conciliorum in Prolegomenis, Cap. xv. quod inscriptum est: *Qui laici, & quam ob causam Synodis adfuissent? Quæ essent in ipsis Judicium gloriosorum, & Patriciorum munera? Quæ Regum partes?* In ipso enim Capite non modo Catholica doctrina propugnatur, sed & vetera multa Ecclesiæ monumenta, quæ ad rem faciunt quammaxime, explicantur.

II. Catholicæ doctrinæ patrocinantur passim vetera Patrum testimonia a Bellarmino al-

lata

lata loco citato, qui omnes passim asserunt, Concilia Episcoporum esse, testaturque Eusebius Lib. v. *Historia Ecclesiastica*, Cap. xxiii. super questione Paschatis tempore Victoris I. qui creatus Pontifex fuit anno Christi cxxxv, *Conventus Episcoporum, & Concilia per singulas quasque Provincias* convocata fuisse; constatque ex Actis Concilii Œcumenici Chalcedonenſis, quod cum pro Dioscoro Monachi, & laici ingressi essent, sæpius Patres clamarunt: *Mitte foras superfluos, Concilium Episcoporum est*, Merito itaque Pulcheria Imperatrix in Epistola ad Strategum Bithyniæ, quæ habetur ante Concilium Chalcedonenſe, iussit, ut Clerici, Monachi, ac laici etiam vi repellerentur a Concilio, exceptis paucis illis, quos Episcopi secum duxerant, ut ipsi nempe Concilio aliquid opis afferrent; nam alias, uti liquet ex Actione 1. ejusdem Concilii, cum ad Martinum Archimandritam mitteretur, ut subscriberet, ingenue respondit, non esse suum, sed Episcoporum tantum subscribere; testaturque jam antea fuerat Theodosius junior in Epistola ad Ephesinam Synodum, quæ legitur in Actis ejus Concilii, *illicitum esse, eum, qui non sit ex ordine Sanctissimorum Episcoporum, Ecclesiasticis immisceri tractatibus*. Idipsum testati sunt & alii Principes, uti in *Historia Ecclesiastica* legimus.

III. Ut alia argumenta omittam, probatur Catholica ipsa sententia ex ipsis Conciliis hætenus celebratis; omnium enim Conciliorum Decreta ab Episcopis solis facta esse, patet ex subscriptionibus; nam ubique inveniuntur soli Episcopi subscripsisse, exceptis paucis Generalibus, quibus Imperator etiam subscripsit, sed alia forma, quam Episcopi; Episcopi enim *definiendo* ut Judices, Imperatores vero *consentiendo* subscripserunt; & quibusdam etiam postremis Conciliis exceptis, ut Florentino, Lateranenſi v. & Tridentino, quibus subscripserunt Abbates, & Generales Ordinum. Cæteri autem licet optimi, & doctissimi Viri essent, nunquam sunt admissi, nisi ad consultandum, excepto Concilio Basileenſi, ubi Presbyteri perperam admissi fuerunt ad suffragium decisivum contra morem omnis antiquitatis. Sed jam nos Tomo iv. Conciliorum, ubi enarravimus Concilium Basileenſe, solide ostendimus, Concilium ipsum non fuisse legitimum. Porro in omnium ultimo Generali Concilio Tridentino immediate post Episcopos sederunt Abbates, & post Abbates, Ordinum Generales, inter quos primus fuit Generalis Ordinis Prædicatorum, ut notat Fagnanus in Cap. *Ut Abbates, De atate & qualitate*, Num. xix. citatque Catalogum Patrum, qui habetur expressus in calce ipsius Concilii

§. IV.

De diversis Officialibus Concilii.

Aderunt etiam diversi Magistratus, & Ministri Concilii, quos tamen Pontifex Summus, si præsens erit, constituet; alios, qui negotia proponenda suggerant; alios, qui venientes ad Concilium in volumine describant, Missorum, ac Legatorum facultates examinent, & publica documenta rimentur; alios, qui locum Concilii custodiant, Gesta autem Concilii excipere, & in publicam formam redigere spectat proprie ad Protonotarios Apostolicos, Clericos Cameræ, & Secretarios Papæ; qui tamen, antequam scripta sua publicent, corrigenda illa exhibeant his, qui a Pontifice, sive a Concilio, erunt deputati. Sedes autem omnes consignabunt Clerici Cæremoniarum. Si Papa erit in Conciliis, & cum difficultas aliqua orietur, consulant super ea re Summum Pontificem. Sin vero Summus Pontifex abesset, constituerentur a Concilio, qui sedibus consignandis præsent.

COMMENTARIUS.

I. Illud plane vel ex veteribus Conciliis constat, in ipsis Conciliis scilicet, multis de causis aliquos posse interesse. Alii enim interfunt, ut Judices, qui dicuntur habere decisivum suffragium, quales sunt ordinarie Episcopi, & ex privilegio, atque ex consuetudine, Cardinales, Abbates, & Generales Ordinum, licet Episcopi non sint, de quibus dictum jam fuit in Commentario præcedenti. Alii, ut disputando examinent difficultates, habentque, ut ajunt votum consultivum; fuitque hæc vetus Ecclesiæ disciplina, ut ipsi etiam Presbyteri, Diaconi, aliique inferiores Clerici in Ecclesiasticis illis Conventibus admitterentur, ut Episcopes scilicet congregatos adjuvarent, sive in disputationibus adversus hæreticos, sive in examinandis, solvendisque rebus dubiis. Quid in Generali I. Nicæno Concilio adversus Arium præstiterit S. Athanasius tunc Alexandrinæ Ec-

clesiæ Diaconus, quantumque profuerit, omnibus notum est, testesque sunt Eusebius Lib. iii. *De Vita Constantini*, Cap. viiii. & Socrates Lib. i. *Historia Ecclesiastica*, Cap. viiii. eo in Concilio præter Episcopos cccxviii. adfuisse Presbyterorum, qui eos comitati fuerant, Diaconorum, Acolythorum, aliorumque plurium tantam multitudinem, eorum ut numerus iniri vix potuisset.

II. Siqua circa Fidem, aut disciplinam agitata erant, ea diligenti examine discutiebantur, ac disputantium verba Notarii, qui & Conciliis aderant, scriptis excipiebant. Ita teste Socrate Lib. II. *Historia Ecclesiastica*, Capito xxx. in Sirmienſi Synodo *Basilus Ancyranæ Ecclesiæ Præsul in certamen descendit cum Photino, Notariis verba eorum excipientibus*, In Seleuciensi quoque Synodo, ut idem Auctor scribit Cap. xxxix, *aderant etiam Notarii, qui*

singulorum dicta notis exciperent. Erat antiquus ritus, cujus mentionem facit S. Augustinus, qui in Epistola xxxiii. Procleianum Episcopum Donatistam ad disputationem provocans, *Dummodo, inquit, verba nostra non inaniter ventilentur, sed stylo excipiantur, ut & tranquillus, & ordinatius differamus, & siquid a vobis dictum de memoria lapsum fuerit, recitatione revocetur*; itemque Epistola xlii. referens quæ acta fuerant de concordia cum Fortunio Tubursico Donatistarum Episcopo, *postulavimus, ait, ut a Notariis verba nostra exciperentur*. Afferri & alia possent veterum loca, sed recitata huc usque veterem ejus rei disciplinam satis declarant.

III. Præter hos, ex pervetusto etiam ritu Concilia alii intersunt, ut ministrent, quales

sunt Notarii, Custodes, alique Officiales, ut defendant Concilium, & dent operam, ut intus, & extra, omnia sint pacata, & rite fiant. Sed quicumque tandem Conciliis interesse permitterentur, nullis sane sacrum ingredi Conventum dabatur, nisi a Diacono introductis; unde Concilium Alexandrinum de Tyri Synodo Ariana loquens, *Qua fronte, inquit, talem Conventum Syodum appellare audent, cui Commentariensis, sive Carcerarius pro Diaconis adventantes introducebant*. Ex Concilio Toletano iv. Canone iv. cui varii vetusti diversarum Ecclesiarum Codices Rituales concinunt, cautum plane fuit, *ut ad unam januam, per quam Sacerdotes, idest Episcopi, ingredi oportet, Ostiarii stent*. Similia & in aliis Conciliis leguntur, de quibus jam alibi diximus

§. V.

Ordo sedendi in Conciliis.

Ordo autem sedendi in publicis Sessionibus hic erit. Summus Pontifex in Solio Pontificali sedebit, cui a lateribus super scabellis sedebunt Diaconi duo assistentes, & Prior Presbyterorum in scabello, & in loco magis (1) convenienti, sive a dextris, sive a sinistris, prout in Capella cum (2) Papa celebrat, sed (3) nunc, & quoties in divinis ministrat, ut Capellanus assistens, erit indutus Pluviali, non Planeta. Imperator, si aderit, sedebit in sede sua ad dexteram Pontificis, & tunc Diaconi non sedebunt apud Sedem Papæ, sed ante ipsam Sedem hinc inde super parvis scabellis, ut erat mos antiquus, & hoc ne Diaconus a dextris videatur sedere medius inter Papam & Imperatorem. Reges sedebunt in nominatis sedibus suis. Episcopi, & Presbyteri Cardinales in prima parte eminentiori scamnorum a dextris. Diaconi Cardinales præter illos duos, in prima parte a sinistris. Patriarchæ quatuor Ecclesiarum, Constantinopolitanus, Antiochenus, Alexandrinus, & Hierosolymitanus sedebunt in quatuor illis sedibus singularibus contra faciem Pontificis; & nota, quod prædicti Patriarchæ in Missis, & aliis actibus, sive sint parati, sive non, sedent ante assistentes Papæ. Alii Patriarchæ, Prælati, Archiepiscopi, Episcopi, Abbates, parati sedebunt in scamnis post Cardinales hinc inde; primum tamen locum habebit Vicecamerarius, si erit Prælatus paratus; & ita servatum legimus in Concilio Pisano, præsidente Alexandro V. & in Constantiensi, præsidente Joanne XXIII. Deinde Oratores Regum, & Principum, si erunt parati, inde reliqui Prælati parati. Et impleta prima quadratura scamnorum, implebuntur reliquæ post illam; postremi erunt Generales Ordinum. Et adverte, quod Prælati omnes cujuscunque sint gradus, secundum Gregorii Papæ Decretum, sedebunt inter Collegas suos secundum Ordinem, sive promotionem suam. Assistentes Papæ parati sedebunt super gradus thalami Pontificalis ad sinistram partem. Protonotarii Apostolici, & Clerici Camerae ad dextram. Subdiaconi vero, Auditores Rotæ, & Acolythy in parte anteriori ad pedes Papæ. Super planum sedebunt duo Cubicularii secreti Papæ, Decanus Auditorum, qui servit de Mitra, & Secretarius Papæ, si non est Prælatus. Oratores autem laici, sive non Prælati, sedent intra primam quadraturam in sedibus illis humilioribus pro Dominorum suorum dignitate, ita ut digniores sint propinquiore primis scamnis Papæ; & si aderit aliquis Magnus Princeps, sedebit in scamno Diaconorum post omnes Diaconos, si alias consuevit sedere in suo scamno; alii inferiores Domini laici, inter, vel post Oratores non Prælatos secundum eorum qualitatem; ceteri vero Sacerdotes, & Clerici, qui aderunt, stabunt post scamna Prælatorum, ut poterunt.

COMMENTARIUS.

I. **R**ecte admonet præstantissimus Cardinalis Baronius ad annum cccxv. nullam cognoscendæ antiquæ disciplinæ

To. I.

confessus in Synodis veriore rationem suffragari posse, quam illam, quæ petitur exemplo rerum gestarum in Synodis Œcumenicis antiquioribus.

B b b

ribus.

(1) Ita in editione Romana, in Veneta vero r. legitur, in loco eminenti. (2) In ipsa Veneta perperam legitur, cap. Cappa. (3) Ibidem, tunc.

ribus. Cum autem ex quatuor primis solius Chalcedonensis Acta supersint integra, & incorrupta, non immerito ex ipsis Actis priscam sedendi in Synodis rationem censuimus initio hujus Commentarii eruendam, non omittentes deinde recentiorum sedendi morem explicare. Ergo, uti jam pridem notavimus Tomo I. Conciliorum in Prolegomenis, Cap. xxiii. in prima Actione Concilii Chalcedonensis, confessus Episcoporum ita dispositus invenitur, ut a læva parte Apostolicæ Sedis Legati, & post ipsos Patriarchæ Anatolius Constantinopolitanus & Maximus Antiochenus; a dextris vero Dioscorus Alexandrinus, atque Juvenalis Hierosolymitanus sederent. Dubitare autem hic non oportet, quin locus sinister a Patribus illis sanctior & dignior fuerit existimatus, cum præsertim idem Dioscorus hæresis infamatus ad Synodum judicandus venisset. Id duplici ratione contingere potuisse docet laudatus Baronius, sive quod in Ecclesia Christi ad imitationem Patriarchalis benedictionis Jacob, ut habetur Genesis Cap. xlviii. mutato rerum ordine, dextera in sinistram dignitatis ergo mutaretur, sive quod apud Romanos, teste Varrone, *De lingua Latina*, Lib. vi. Cicerone, Plinio, Plutarcho, aliisque compluribus, pars sinistra melioris esset auspicii, ac proinde dignior haberetur, ut ex Virgilio etiam addiscimus, qui Lib. II. *Æneidos* scripsit: *Intonuit lævum*. Atque hæ rationes, aliæque ab eodem Baronio adductæ, si compertæ fuissent S. Petro Damiani, dum in Tractatu de picturis Apostolorum Petri & Pauli disceptaret, quorum pingi soleret Petrus ad sinistram, & Paulus ad dexteram, non se fatigasset in conquirendis Pauli supra Petrum prærogativis, ut recte animadvertit Cabassutius in Notitia Conciliorum, Cap. xi. nec hæretici si easdem rationes attenderent, tam misere desiperent, ad deprimentum Principis Apostolorum Primatum, ejusmodi picturas nobis opponere.

II. Neque est prætereunda alia ratio præclarissima, qua prædictus Annalium Parens ostendit, sinistram partem in Sacris potiorē esse, quam dextram. Cum enim in medio Confessus Episcoporum, ut habent Acta dictæ Synodi Chalcedonensis, & aliorum Conciliorum, super egregium Thronum poni consuevisset sacrosanctum Jesu Christi Evangelium, quod ut declarat S. Cyrillus Alexandrinus, dum agit de Synodo Ephesina, & jam diximus nos supra in Commentario ad §. II. typum ipsius Christi gereret, ex eo intelligere possumus, sic a parte sinistra Legatos Sedis Apostolicæ esse locatos, ut positus in medio Christus Dominus in universum confessum respiciens, a dextris haberet, qui sederent a sinistra, & a sinistra, qui in dextra confiderent. Secundum quod etiam in antiquo Romano Ordine legitur his verbis: *Sedebant ea locali dispositione, ut intrantibus Ecclesiam, Episcopi sint ad sinistram, Presbyteri vero ad dexteram, ut quando Pontifex sederit, & ad eos respexerit, Episcopos ad dexteram, Presbyteros contueatur ad sinistram*. Qua ratione fiet, ut multæ conciliari possint de sinistra & dextera parte oboriri solitæ controversiæ, cum alia in progressu, in confesso ratio alia attendatur.

III. Quod sp. estat recentiorum sedendi morem in Œcumenicis Synodis, lubet eum hoc loco

describere ex Actis Vaticanis, ubi narrant sedendi ordinem, qui servatus fuit in Generali Concilio Lugdunensi I. sub Innocentio IV. anno mccxlv. Dominus Papa, Missa celebrata, locum eminentiorem ascendit; Imperator vero Constantinopolitanus sedit ad dexteram, & quidam alii Principes laici sederunt ad sinistram, & Diaconus Cardinalis Vicecancellarius Magister Martinus Neapolitanus cum Notariis, Auditore, & Correctore, Capellanis, Subdiaconis, & quibusdam aliis, inferius vero sic Prælati sederunt. Ex opposito tres Patriarchæ ordinati fuerunt, videlicet Constantinopolitanus ad dexteram, Antiochenus, Aquileensis tertio. Addunt mox ipsa Acta, de Patriarcha isto Aquileensi scandalum tunc fuisse exortum, ex eo quod, ut alii Patriarchæ dicebant, sedere non debebat juxta eos, cum non esset de quatuor Patriarchis. Ajunt sedem ipsam tunc fuisse destructam, & tandem, ut evitaretur scandalum, de voluntate Domini Papæ, ut creditur, restructam fuisse. Quicquid sit, pergunt Acta ordinem sedendi enarrare, & ita inquirunt: *In navi vero Ecclesiæ ad dexteram, & in eminentioribus locis sederunt Episcopi Cardinales, ex altera vero Presbyteri Cardinales; Archiepiscopi, Episcopi post eos. In sedibus autem constitutis in navi Ecclesiæ sederunt aliqui de Episcopis, Abbates, Procuratores Capitulorum, Nuntii Regum, & Imperatoris Friderici, & multi alii erant ibi*. Idem fere ordo servatus fuit in Concilio Lugdunensi Generali II. cui præfuit Gregorius Papa X. anno mccclxxiv. ut Acta Vaticana testantur, quæ etiam nos docent, nullam tunc fuisse de locis controversiam, cum per eundem Summum Pontificem fuerit ordinatum, quod sine præjudicio Ecclesiarum suarum sederent.

IV. Ergo ut iterum atque iterum dictum fuit, præcedunt Cardinales Patriarchas, Patriarchæ Primates, Primates Archiepiscopos, Archiepiscopi Episcopos, inter quos passim Concilia in sedendo ordinem servandum esse voluerunt ex tempore consecrationis ipsorum, uti constat ex Concilio Milevitano II. anni cdxvi. Can. iii. cui Titulus: *Ut posteriores anterioribus Episcopis non præferantur*; atque ex Bracarense II. Concilio Can. vi. quo cautum est, *ut conservato Metropolitanis Episcopi primatu, ceteri Episcoporum secundum suam ordinationis tempus, alius alii sedendi deferat locum*. Idipsum edicit Concilium IV. Toletanum celebratum anno dcccxxiii. Can. iii. Episcopi, inquit, *secundum ordinationis suæ tempora resideant*. Eandem disciplinam inculcarunt Summi Romani Pontifices, S. Leo Magnus, & S. Gregorius itidem Magnus, & ille quidem in Epistola V. ad Dorum Beneventanum Episcopum, ubi vel de ipsis Presbyteris statuit, ut in eo sedendi ordine permaneant, quem unicuique ordinationis suæ tempus adscripsit. Gregorius vero Lib. vii. Epistola cxii. de Episcopis ita ad Syagrium Episcopum scripsit: *Episcopos secundum ordinationis suæ tempus, sive ad considendum in Conciliis, sive ad subscribendum, vel qualibet alia re, attendere loca sua decernimus, & sacrorum sibi prærogativam Ordinum vindicare*: Sane in ipsa tamen Epistola tribuit Gregorius Augustodunensi Sedi, ut ejus Episcopus omnes alios Provinciæ Episcopos præcederet, & primus esset post Lugdunensem. Sic Cenomanensis

his Episcopus, teste Goffrido Lib. III. Epistola XI. comprovincialium primus fuit, non habita ratione temporis, quo fuit ordinatus; quam prærogativam habere in sua Provincia Episcopum Catalaunensem, testatur Fulbertus in Epistola ad Deodatum Episcopum Sveffionensem. Ceterum præcedunt semper Primates Archiepiscopos, & Archiepiscopi Episcopos, non habita ratione temporis suæ Ordinationis, uti ex laudato superius Concilio Milevitano constat, ubi addita est ea exceptio, quæ dicit; *Servato utique jure Primatum Numidia, & Mauritania*. Id quod etiam quantum ad Metropolitanos, seu Archiepiscopos excepit citata Synodus Bracarenfis II. Canone VI. qui mandat, *ut conservato Metropolitanis Episcopi primatu, ceteri Episcopi &c.*

V. Nequa autem de tempore illo consecrationis controversia unquam oriri posset, sapientissime cautum est ex memorato Concilio Milevitano II. Can. XIV. *ut quicumque deinceps ab Episcopis ordinantur, Litteras accipiant ab Ordinatoribus suis, manu eorum subscriptas continentes Consulem, & diem, ut nulla altercatio de posterioribus, vel anterioribus oriatur*. Litteræ ipsæ jam non aliter legitime censebantur, nisi ubi Consul & dies fuissent appositi, uti constat ex Lege I. Codicis Theodosiani, Titulo I. *De Constitutionibus Principum, & Edictis*. Quam Legem edidit Constantinus anno CCCXXII. uti supputat eruditissimus Gotophredus, qui etiam plura scitu digna in ipsam Legem notavit. Quod si illo anno nondum essent creati Consules, vel nulli forent, ea utebantur formula, *post Consulatum N. V. C.* ut in Fastis videre licet; decrevitque id Concilium Milevitanum Canone XX. Atque huic rei aliquid affine extat in Synodo Sveffionensi apud S. Medardum anno DCCCLIII. post Caput IX. in Causa Hincmari.

VI. Quibus vero induti vestibus Patres olim Conciliis interessent, peculiari Capite, quod est XIX. explicuimus jam in Prolegomenis nostris ad Concilia nostro I. Tomo Conciliorum præfixis. Certe, ut hic Græcam Ecclesiam omittam, de qua citato loco dictum fuit, obtinuisse jamdudum in Ecclesia Latina morem, ut sacris nonnisi induti vestibus Viri Ecclesiastici Conciliis interessent, constat ex Concilio Toletano IV. Can. III. ubi expressa fit mentio Diaconi Alba induti, qui Codicem Canonum in medio proferens, capitula de Conciliis agendis pronuntiabat. Alba autem olim, sicut & hodie, vestis sacra erat, divinisque, ut docent Scriptores Liturgici, Officiis addicta. In Anglicana Synodo ab Humberto Merciorum Episcopo coacta sub Offa Rege anno DCCXCIII. Antistites memorantur convenisse Sacerdotalibus Infulis adornati. In Pontigonensi quoque, præfente Carolo Calvo, & Legatis Joannis Papæ VIII. anno, ut vult Baronius, DCCCLXXV I. sacro etiam in habitu Episcopos confedisse, testantur ejusdem Concilii Acta apud Aimonium Monachum Lib. V. *De gestis Francorum*, Cap. XXXIII. XI. *Kal. Julii Episcopis, & ceteris quibusque Clericis vestibus Ecclesiasticis indutis, & domo, ac sedilibus palliis protensis, atque in gremio Synodi, & prospectu Imperialis Sedis, lectorio, superpositis sacrosanctis Evangeliiis venit Dominus Imperator Carolus in habitu francisco cum Legatis Sedis Apostolica in Synodum*. Tum vero To. I.

Actione VIII. legitur, quod venit Imperator Græcanico more paratus deducentibus eum Apostolica Sedis Legatis more Romano vestitis, ad Episcopos Ecclesiasticis vestimentis indotos &c. Eundem ritum servatum in Triburiensi Concilio anno DCCCXCV. docet ejus Concilii Præfatio his verbis: *Interim Episcoporum sacer Conventus in Basilica prædicta Villa post communes Orationes, & preces finitas, honorificentissime insulati, Pontificalibus sedibus suffulti, mentibus serenati, prudentia præditi, Sacrosanctum ingressi sunt Synodale Colloquium*.

VII. Post annum millesimum perspicue a Conciliis declaratum est, quo quisque cultu & habitu Synodo interesse debeat. Concilium Budense anni MCLXXIX. Episcopis, & Abbatibus Mitræ privilegio donatis Superpelliceum, Stolum, Pluviale, & Mitram assignat; Prælati inferioribus Superpelliceum, Stolum, & Pluviale; Parochis, & Presbyteris ceteris Superpelliceum, & Stolum; Monachis Stolum duntaxat. Synodus Colonienfis anni MCLXXX. Can. XIX. Albam, Stolumque Prioribus, Archipresbyteris, & Decanis ruralibus tribuit; Parochis vero solum Superpelliceum. Synodus Nemaufensis anni MCLXXXIV. Parochis solum Superpelliceum in Synodo Paschali, Cappas rotundas in Synodo S. Lucæ præscripsit. In aliis Synodis non minus perspicuum est sacris vestibus discrimen, quibus sacri Viri in Conciliis utebantur. Sciendum tamen est, minime suspicandum esse, altioris quicquam arcani in ea diversitate latuisse, sed puram putam ipsam fuisse disciplinæ, ut in sexcentis aliis, varietatem.

VIII. Alia testimonia congerere supervacaneum est, cum ipsa sacra actio usum sacrarum vestium in Conciliis plane suadeat. Unde S. Stephanus Papa, & Martyr, qui vixit anno Christi CCL. *Vestimenta Ecclesiæ*, inquit, *in quibus Domino ministratur, cultusque divinus, cum omni honorificentia, & honestate a Sacerdotibus, reliquisque Ecclesiæ Ministris celebratur, & sacrata esse debent, & honesta; quibus, aliis in usibus, cum Deo, ejusque servitio consecrata, & dedicata sint, nemo debet frui, quam Ecclesiasticis, & Deo dignis officiis*. Hujus constitutionis mentionem passim faciunt Liber Pontificalis, Beda, Ado, Alcuinus, Strabo, Gratianus, alique complures de divinis officiis agentes. Ceterum, cum in Ecclesia celebranda sit Synodus, & in ipsa tractanda sint quæ spectant Religionem, & Fidem Catholicam, implorandaque sit gratia Spiritus Sancti, qui illuminet corda Præfulum, expedit ait Cardinalis Jacobatius Lib. I. *De Concilio*, quod Cardinales, Prælati, & illuc convenientes sint induti Pluvialibus, Planetis, & vestibus sacris, & cum Mitris albis, quæ debent esse planæ, ac sine ornamento, si sint Episcopi coram Summo Pontifice; Cardinales autem utuntur Mitris albis aliquanto auriphrygiatis, ut a ceteris Præfulibus distinguantur. Papa autem, ut subdit laudatus Auctor, debet esse indutus vestibus Pontificalibus, Pluviali scilicet rubeo, & Mitra pretiosa juxta ritum in Concilio Constantiensi servatum. Imperator tandem sedebit in habitu Imperiali, & Rex in habitu Regio. Qui plura desiderat, legere poterit quæ scripsimus nos in nostris ad Concilia Œcumenica Commentariis, ubi uniuscujusque Historiam narravimus.

§. VI.

Ordo rerum gerendarum in Conciliis.

Ordinem autem rerum agendarum ex antiquis Conciliis propter eorum vetustatem colligere non potuimus, nisi quantum ad Sessiones pertinet, in quibus discussa communiter proponebantur, & per verbum *Placet* a Patribus firmabantur. Sed quoniam novissimorum Conciliorum Constantiensis & Basileensis res gestæ diligentissime annotatæ fuerunt, & in ordine satis inter se congruunt, modum in illis servatum perstringemus. Sed defuit in Basileensi Congregatione multitudinis in Sanctos Episcopos reverentia, & superabundavit temeritas, atque arrogantia, quando non pluris fieret sententia optimi cujusque Antistitis, quam minimi Canonici, & id quod ad Episcopos spectat, diffinire & sancire, multitudo sibi arrogaret; unde Ecclesiam Dei, quam unitam esse convenit, in diuturnam, & perniciosam scissuram adduxit. Ordinem igitur profecto illius Concilii, & procedendi morem laudarem, si Prælati tantum, ut prisce voluerunt, decernendi & diffinendi potestatem permisissent. Sed abstinebunt, ut arbitror, postea horum exemplo ab hujusmodi novitate, & bene ordinata idoneis Ministris committent. Modum igitur hunc servabunt, qui, absente Pontifice, non incompetenter fortasse servari poterit, si Prælati, ut diximus, relinquatur tantum statuendi facultas.

C O M M E N T A R I U S.

I. **V**etus est mos rogandi, ac decernendi Leges tam Civiles, quam Ecclesiasticas per verbum *Placet*, uti jam fuso ostendimus Tomo I. Conciliorum in nostris Prolegomenis ad Concilia, Cap. IV. quod inscriptum est, *De antiquitate, vi, ac usu verbi Placuit, quod in Apostolorum Concilio, & in aliis sequioris ævi usurpari consuevit*. Et quidem in Legibus Ecclesiasticis constituendis primi, qui ea formula usi sunt, fuerunt haud dubie Apostoli in Concilio Hierosolymitano apud Lucam in Actis Apostolicis, Cap. XV. *Tunc placuit Apostolis, & senioribus, cum omni Ecclesia &c.* Et post alia: *Placuit nobis collectis in unum &c.* Eam formulam, quam certe Ecclesia in sacris Canonibus decernendis ab Apostolis accepit, inde ortum habuisse opinor, sententiam sequens præclarissimi Auctoris Ferdinandi Mendozæ, *De Concilio Illiberritano*, Lib. II. Cap. II. quod post dissensiones, & disceptationes de re dubia positiva excitatas (in omnibus enim consentire omnes naturæ profecto est humana paulo superioris) cum post exactam disputationem pacati fuerint omnium animi, & in eandem sententiam venerint, tandem præscribendum decretum est, quæritur a singulis vel a Præfide, vel a Notario Concilii, an illis placeat eam Constitutionem decerni; quibus sibi placere respondentibus, fide gestorum postea a Notario facta, & litteris consignata, verbum *Placuit* a Patribus usurpatum in principio decreti, vel Sanctionis refertur; quod, ut alia omittam, constat ex Concilio Carthagenensi I. & II. Cum enim Gratus Episcopus Carthagenensis Africanæ Ecclesiæ Primas, & Præses Concilii hæc proposuisset; *Et illud præcipue, si videtur vestra dilectioni, cavendum est, ut Pastoris cura &c.* ad finem Canonis dicitur; *Universi dixerunt; Placet*. Et Canone X. cum idem Gratus proposuisset, avaritiæ cupiditatem radicem omnium malorum esse, prohibendumque inde esse, nequis alienos fines usurpet, universi di-

xerunt: *Placet, Placet*. Id ipsum aliorum Conciliorum usu receptum est passim. Recte itaque ait hic noster §. ex antiquis Conciliis, quantum ad Sessiones pertinet, illud quidem colligi, quæ in iis discussa communiter proponebantur, per verbum *Placet* a Patribus fuisse firmata.

II. Docet præterea noster §. quod licet ordo rerum agendarum in Conciliis, ex antiquis Conciliis propter eorum vetustatem colligi nequeat, novissimorum tamen Conciliorum Constantiensis, & Basileensis res gestæ diligentissime annotatæ fuerunt. Sed quicquid sit de Constantiensi Concilio, notandum hoc loco quod de ipso Concilio Basileensi mox subjicit; *Sed defuit, inquit, in Basileensi Congregatione multitudinis in Sanctos Episcopos reverentia, & superabundavit temeritas, atque arrogantia, quando non pluris fieret sententia optimi cujusque Antistitis, quam minimi Canonici, & id quod ad Episcopos spectat, diffinire, & sancire, multitudo sibi arrogaret; unde Ecclesiam Dei, quam unitam esse convenit, in diuturnam, & perniciosam scissuram adduxit*. Notent hæc qui Synodum ipsam Basileensem ad sydera usque extollere non erubescunt, Quanta fuerint ejus vitia, & horrenda epitheta, quibus non modo a nostratibus, sed & ab exteris Scriptoribus impetita sit, jam nos fuso diximus Tomo IV. Conciliorum, ubi ejusdem Concilii Historiam, & Sessiones enarravimus. Ut alia omittam, celebre est hanc in rem Aneæ Silvii testimonium, qui postea fuit Pius II. Papa. Is quippe in Oratione habita anno MCDLII, adversus Australes, quam vulgavit præclarissimus Muratorius Tomo II. Anecdotorum, refert, in hac Synodo Basileensi quædam Decreta, ipsis coquis, & stabulariis perstreptibus, facta fuisse; *Inter Episcopos, ceterosque Patres conscriptos, vidimus in Basilea coquos, & stabularios Orbis negotia judicantes*. Tum merito subdit: *Quis horum dicta, vel facta judicaverit Legis habere vigorem?* §. VII.

§. VII.

De Constantiensi & Basileensi Conciliis.

Primum omnes ad Concilium venientes, sive suo, sive alieno nomine, per Cursores præordinatos describebantur; tum Patres omnes per quatuor nationes dividebant, Italicam, Germanicam, Gallicanam, & Hispaniensem. In Constantiensi tamen Synodo, quia Hispani cum suo Benedicto XIII. diu in contumacia persistentes, non affuerunt, nisi in fine, Anglicana quartum locum obtinuit, quæ Basileæ cum Gallieana est connumerata. Ex nationibus pari ex unaquaque numero quatuor conventus creabant, quas sacras disputationes vocitabant, locis, vocabulis, & potestate discretas. Nam in prima Fidei Catholicæ; secunda de pace populi Christiani; tertia de reformatione Ecclesiæ; & in postrema de aliis emergentibus negotiis agitabatur. Erant cuique conventui separata tribunalia, & loca, in quibus convenirent proprii Magistratus; Præsident, qui concionem advocaret, negotia proponeret, & secundum majoris partis sententias concluderet; Promotor, qui tanquam curator publicus ingereret negotia, instaretque, ut absolverentur; Scriba, qui gesta, Decretaque publicis documentis adnotaret; Nuncius deinde, sive Apparitor, qui Patres convocaret, citaret, Edicta proponeret, & similia. Conveniebant hæc Collegia ter in hebdomada iisdem horis in propriis Prætoriis, ubi re Divina peracta, rebus gerendis operam dabant. Ex quatuor deinde sacris deputationibus duodecim Virorum Collegium eligebatur, terni ex unoquoque conventu, & deputatione, Viri doctrina, & experientia clari. Ad hos negotia omnia primum deferrebantur, qui rebus mature digestis, vel ea respuebant, vel si admittenda videbantur, ad Collegium, cui competere, remittebant; eratque his potestas, cum aliquid grave instaret, convocare quatuor conventus etiam extra ordinem. Ceterum quæ a duodecim Virorum Collegio ad quempiam ex quatuor conventibus remittebantur, proponebantur per Præsidentem illius conventus, neque licebat illa die de propositis quicquam decernere, nisi res manifeste celeritatem necessariam exigeret. Quod major deinde pars statuisset (1) ad alios tres conventus deferbatur, eorum opinio cum rationibus & argumentationibus utriusque partis. Quod per tres conventus approbatum erat ad Præsidentem Concilii publicis documentis deferbatur, qui statuto die in generali Congregatione de ea re referebat; neque licebat, Præsidentem de aliqua re agere cum Patribus in generali conventu, nisi prius de ea deliberatum, sive, ut aiebant, conclusum fuisset per quatuor, aut saltem per tres deputationes. Denum ubi quippiam a Patribus approbatum erat in generali Congregatione, quæ octavo quoque die frequentabatur, in formam Decreti redactum in publica Sessione ritu solemni statuebatur.

N O T A.

De Constantiensi, & Basileensi Conciliis, ac de ordine in eis servatis, videri possunt quæ

de eisdem fusc diximus Tomo IV. Conciliorum, ubi prædicta Concilia Constantiense, & Basileense enarravimus.

§. VIII.

De generali Congregatione in Conciliis.

Generalis Congregatio differt a publica Sessione, quod in illa res statuendæ per quatuor deputationes discussæ approbantur hoc modo. Ubi in sacris deputationibus aliquid decernendum censebatur, Præsident illarum quisque in suo conventu id firmabat his verbis: *In Nomine Sanctæ Trinitatis Patris & Filii & Spiritus Sancti. Ego concludo in talem sententiam.* Idem fiebat deinde in generali Congregatione. Ubi vero Præsident Concilii Præsidentium deputationum vota cognoverat, concludebat nomine totius Concilii. Oportebat tamen illum concludere secundum Præsidentium vota. His peractis, cum res ita exigebat, publica Sessio indicebatur. In omnibus tamen supradictis, si Papa erit præsens, ipse erit rector, moderator, ac dispensator; & Deputationes, Collegia, Magistratus, & rerum omnium ordinem pro suo arbi-

(1) Post hæc verba in editione Romana anni 1560. addita & hæc sunt: & si ita minori parti videre etiam differebatur, tum vero sequitur ut in hoc §.

arbitrio constituet. Quæ ideo recensuimus, ut posterius hinc capere possint, quæ res publicæ magis expedire videbuntur.

COMMENTARIUS.

I. **D**ocet hic primum noster §. generalem Congregationem differre a publica Sessione, quod in illa res statuenda per quatuor Deputationes discussæ approbantur &c. Erat certe & hæc differentia inter ipsas generales Congregationes omnium Nationum, & Sessiones, quod hæc cum magnis solemnitatibus & Officio Divino fierent, in Congregationibus vero generalibus non modo omitterentur dictæ solemnitates, quæ requirebantur ad publicam Sessionem, sed & Officium quoque Divinum. Hinc apud Labbeum, ubi agitur de Concilio Constantiensi legitur, die xx. mensis Februarii factam fuisse Congregationem generalem, sed sine solemnitatibus Sessionis, videlicet Officiorum Missæ, Litaniarum, & aliarum Orationum ad Sessiones Synodales pertinentium. Porro modus in publica Sessione Conciliorum generalium, qui dicitur observatus in ipsa Generali Synodo Constantiensi, extat apud laudatum Labbeum Tomo xviii. Conciliorum. Sed nec omittendum illud, aliud esse Synodi Sessionem, aliud Actionem, cum in uno interdum

confessu plures causæ vel actiones explicari soleant. In Synodo Chalcedonensi sex primæ Sessiones sex omnino actiones continent, singulas singulas. At Sessio septima tres actiones complectitur, septimam, octavam, & nonam. Octava autem unicam actionem, nempe decimam, Denique Synodi universæ Sessiones, sive, ut Liberatus Cap. xiiii. vocat, *Secretaria*, fuerunt duodecim, actiones vero sexdecim. Vide Sirmondum in Notis ad Facundum Lib. v, qui id pluribus explicat Cap. xiii. & xiv.

II. Ex præscripto ejusdem nostri hujus §. ubi Conciliis *Papa erit præsens, ipse erit rector, moderator, ac dispensator, & Deputationes, Collegia, Magistratus, & rerum omnium ordinem pro suo arbitrio constituet*. Ratio est, quia, ut docent Theologi passim, Summus Pontifex est supra Concilium, ideoque, uti post alios notat Fagnanus in Capite, *Ex parte, De capellis Monachorum*, etiam si discrepant sententiæ inter Papam, & Concilium, prævaleret semper sententia Papæ. Sed & de his videri possunt, quæ diximus in Prolegomenis ad concilia,

§. IX.

De publica Sessione, & sacris precibus.

Publicæ Sessiones his ceremoniis celebrari consueverunt. Antequam prima Sessio celebraretur, indicitur omnibus Conciliariis triduanum jejunium. Deinde statuta die Pontifex cum omnibus Prælatibus, & aliis, qui interesse debent, ac Clero cum sacra pompa, si placet, venit ad locum Concilii, ubi per ipsum Pontificem, vel alium Prælatum, cantatur Missa de Sancto Spiritu, & fit Pontifici reverentia per Cardinales, & omnes Prælatos paratos. In aliis Sessionibus non solet semper cantari Missa sollemnis ante, sed Papa, audita Missa privata, venit ad Concilium cum Pluviali rubro, & Mitra pretiosa, & facta oratione ante Altare ascendit ad Sedem suam, & similiter omnes alii sedent in sedibus prænomminatis, & fit ei reverentia a Cardinalibus cum suis Cappis laneis, si prius non est facta. Deinde duo seniores Diaconi accipiunt Dalmaticas, & unus eorum Stolum, & Manipulum, quia est cantaturus Evangelium. Subdiaconus etiam paratur. Deinde accedunt ad Pontificem, & imponunt ei Sandalia, & dicitur Psalmus: *Quam dilecta*. Interim Cardinales, & alii Prælati accipiunt paramenta sibi convenientia omnes rubri coloris, & omnibus indutis aliquantulum quiescunt. Tunc silentio facto, Diaconus a dextris surgens alta voce præfatur: *Orate*, & mox tam Pontifex super Faldistorium sibi paratum, quam alii sine Mitra in terra genuflexi diutius orant versi ad Altare. Surgens deinde Pontifex solus, aliis prostratis permanentibus, absolute dicit hanc orationem in tono competenti, videlicet: *Adsumus Domine Sancto Spiritus, adsumus quidem peccati immanitate detenti, sed in Nomine tuo specialiter adgregati. Veni ad nos, & esto nobiscum, & dignare illabi cordibus nostris. Doce nos quid agamus, quo gradiamur, & ostende, quid efficere debeamus, ut, te auxiliante, tibi complacere in omnibus valeamus. Ego salus, & effector iudiciorum nostrorum, qui solus cum Deo Patre, & ejus Filio Nomen possides gloriosum. Non patiaris, perturbatores esse justitiæ, qui summam diligis æquitatem; non in sinistram nos ignorantia trahat, non favor inest, non acceptio munerum, vel personæ corrumpat; sed junge nos efficaciter tibi solius tuæ gratiæ dono, ut simus in te unum, & in nullo aberremus a vero, quatenus in Nomine tuo collecti, sic in cunctis teneamus cum moderamine pietatis justitiam, ut hic a te in nullo dissentiat sententia nostra, & in futuro pro bene gestis con-*

consequamur premia sempiterna. Qua finita, omnes respondeant: *Amen*. Finita Oratione, Diaconus a sinistris, surgens versus ad Patres dicit: *Erigite vos*; & omnes surgunt, & Cantores cantant Antiphonas: *Exaudi nos Domine, quoniam benigna est misericordia tua, secundum multitudinem miserationum tuarum respice nos Domine*. Iterum Diaconus a dextris conversus ad Patres dicit: *Orate*; & similiter omnes procumbunt, & aliquantulum orant secrete. Surgens deinde Diaconus a sinistris dicit: *Erigite vos*; & omnes surgunt, & Pontifex, omnibus stantibus, detecto capite dicit orationem absolute: *Mentes nostras quaesumus Domine, Paracletus, qui a te procedit, illuminet, & in omnem, sicut tuus promissit Filius, inducat veritatem. Qui tecum vivit, & regnat in unitate ejusdem*. Qua finita, iterum genuflectunt, & fit Litania, quæ per duos ex Cantoribus pronunciatur, & omnes respondent; & post versum illum, *Ut Dominum Apostolicum &c.* surgens Pontifex cum Mitra benedicit Synodo, dicens: *Ut hanc Sanctam Synodum, & omnes gradus Ecclesiasticos benedicere digneris*. Et omnes respondent: *Te rogamus audi nos*. Iterum dicit: *Ut hanc Sanctam Synodum, & omnes gradus Ecclesiasticos benedicere, & regere digneris*. R. *Te rogamus audi nos*. Et tertio: *Ut hanc Sanctam Synodum, & omnes gradus Ecclesiasticos benedicere, regere, & conservare digneris*. R. *Te rogamus, audi nos*. Et procumbente iterum Pontifice, Litania pericitur. Deinde surgunt omnes, & Pontifex versus ad Altare sine Mitra dicit: *Oremus*. Diaconus a dextris: *Flectamus genua*. Et Diaconus a sinistris: *Levate*; & Pontifex: *Da quaesumus Ecclesie tue misericors Deus, ut Spiritu Sancto congregata, hostili nullatenus incursione perturbetur. Per &c. in unitate ejusdem &c.* Tum Diaconus petit benedictionem pro Evangelio, & imponitur a Pontifice incensum more solito, & cantatur Evangelium competens rei, de qua agitur, cum luminaribus, & ceremoniis consuetis, & in fine Pontifex osculatur Librum, & incensatur more consueto. Presbyter Cardinalis paratus cum Pluviali servit Pontifici, & de Libro, & de navicula incensi, ac si Pontifex celebraret. Finito Evangelio, omnes sedent, & Pontifex Patres hortatur verbis convenientibus ad facienda Decreta, assignans rationes, cur ita sit faciendum; deinde surgens sine Mitra, incipit Hymnum: *Veni Creator Spiritus*. Omnes genuflectunt, & ipse etiam postquam incoeperit, genuflectit, procumbens super Faldistorium, quousque primus versus perficiatur. Deinde omnes surgunt, & stant capitibus detectis. Cantores, & Patres, si volunt, proseguuntur Hymnum. In fine Pontifex dicit V. *Emitte spiritum tuum, & creabuntur*. R. *Et renovabis faciem terræ*. Et Pontifex: *Oremus*. *Deus, qui corda fidelium Sancti Spiritus illustratione docuisti, da nobis, in eodem Spiritu recta sapere, & de ejus semper consolatione gaudere. Per Dominum &c. in unitate ejusdem &c.* Demum duo Cantores dicunt: *Benedicamus Domino*. R. *Dee gratias*. Quibus finitis, Diaconus legit Decreta facienda, & rogat Patres, an ista placeant; qui incipiendo a Summo Pontifice, respondent: *Placet*; vel, *Non placet*. Et Protonotarii Apostolici, Clerici Camerae, & alii Tabularii rogati Decreta notant, & in publicam formam redigunt, quæ deinde Bulla, ac sigillo Apostolico muniuntur. Evangelia mutantur in Sessionibus secundum materias, de quibus tractatur. Si Romanus Pontifex non adesset, Præsident Concilii paratus cum Sandaliis, Diacono, & Subdiacono omnia faceret, ut prædictum est, nisi ea, quæ ad Summum Pontificem tantum spectant. Decreta legeret aliquis Prælatus, & Litteræ signentur Bulla Concilii. Decretis firmatis, omnes deponunt sacras vestes, & tunc revertuntur Domum, quemadmodum venerunt. Si Papa est præsens, Decreta intulantur hoc modo: *Martinus Episcopus Servus Servorum Dei. Sacro approbante Concilio &c.* ut in Constantiensi. Si autem abest Pontifex, sic scribitur, ut in Basileensi: *Sacro sancta Generalis Synodus Basileensis, in Spiritu Sancto legitime congregata, Generale Concilium faciens, & universalem Ecclesiam representans &c.*

COMMENTARIUS.

I. **P**ervetusta est haud dubie Ecclesie disciplina, ut sacra Synodi nonnisi ab oratione, jejunio, aliisque religiosis operibus, præsertim vero ab invocatione Spiritus Sancti inchoarentur. Id sane & nos abunde probavimus in nostris Prolegomenis nostro 1. Tomo Conciliorum præfixis, Cap. xv 1. & quidem de præmittendo jejunio (quod hic noster §. pri-

mum præscribit, ubi ait, quod, *antequam prima Sessio celebretur, indicitur omnibus Conciliaribus triduanum jejunium*) testem habemus Auctorem antiquissimum Tertullianum, qui in Libro, *De jejniis adversus Psychicos*, idest, animales (ita factus Montanista Catholicos appellitabat) hunc in modum scribentem: *Aguntur præcepta per Gracias illas certis in locis Con-*

Concilia ex universis Ecclesiis, per quæ, & aliora quæque in commune tractantur, & ipsa representatio totius nominis Christiani magnæ veneratione celebratur; & hoc quam dignum Fide auspicante congregari undique ad Christum. Vide, quam bonum, & quam jucundum, habitare Fratres in unum. Hoc tu psallere non facile nosti, nisi quo tempore cum compluribus cœnas. Conventus autem illi Stationibus prius, & jejunationibus operati. Quibus verbis docet Pamelius indicare Tertullianum optimam primitivæ Ecclesiæ in Synodorum celebratione consuetudinem, qua jejunia solebant præmitti, ejusque rei habere nos exemplum in Concilio Apostolorum Antiocheno, ubi segregati sunt a se mutuo Sancti Apostoli Paulus & Barnabas, uti legitur in Actis Apostolicis, Cap. xiii.

II. Memorant eandem jejunandi disciplinam Toletana Concilia quamfrequentissime, quorum Tertium anno DLXXXIX. celebratum hæc habet: *Admoneo pariter, & exhortor jejunii vos, & vigiliis, atque orationibus operam dare.* Et paulo inferius: *Ad hæc autem gratias Deo agentes, & Religiosissimo Principi (Reccaredo) universo Concilio in laudibus acclamante, triduanum est exinde prædicatum jejunium.* Sic & Patres Concilii Remensis II. Carolo Magno Imperatore, ac Leone III. Pontifice Maximo, anno Domini DCCCXIII. ante omnia triduanum secundum consuetudinem jejunium, atque Litanias celebrarunt, quatenus Deo miserante, ea, quæ ad laudem, & gloriam sui Sancti Nominis, seu correctionem totius Christianitatis Imperii spectant, statuuntur, & ordinari mereantur, quæ conveniunt illuc ordinaturi. Idipsum nos docet Concilium Moguntinum eodem anno habitum, ut liquet ex ejusdem Præfatione, quæ sic inter alia inquit: *Ibique pariter adunati primitus cum Litanis triduanum celebravimus jejunium, divinam suppliciter postulantes clementiam, quatenus sancta gratia sua conventum, & actionem ipsius Synodi sibi acceptabilem facere dignaretur.* Totidem plane verbis locuti sunt Patres in Concilio alio Moguntino, quod celebratum fuit anno DCCCXIII. sub Leone IV. Papa, & Lothario Imperatore. Solemnes preces una cum triduo jejunio Cardinalibus quoque indixit Sanctus Gregorius Papa VII. in Concilio suo Romano VI. quod contra Berengarii errores anno MLXXXIX. celebravit, quodque iniquis calumniis impetiit Benno pseudocardinalis, causans illum preces ipsas una cum jejunio triduo indixisse, *ut Deus ostenderet, quis rectius sentiret, Romana ne Ecclesia, an Berengarius?* Sed hanc calumniam jam confutavimus nos Tomo I. Conciliorum in Prolegomenis citato Cap. xvi.

III. Ex dictis hætenus constat, ritum esse antiquum in ipsa Conciliorum celebratione, non modo tridui jejunii indictionem, sed & recitationem Litaniarum, de quibus etiam abunde diximus nostro Tomo II. Romani Pontificalis in Commentario ad §. v. Tituli v. qui inscriptus est: *Ordo ad Synodum*, in quo & Litanie ipsæ, Hymnus, *Veni Creator Spiritus*, Orationes, precesque aliæ recensentur, & quidem juxta veteres Cæremoniales Codices, quorum loca una cum veterum Scriptorum testimoniis in Commentariis ad memoratum Titulum descripsimus. Legendi itaque a curioso Lectore Commentarii illi, in quibus multa certe inveniet,

quæ præsentem §. egregie illustrent. Possem & illis alia scitu digna hoc loco adjungere, quæ tamen omittere coactus sum, sicut & alia plurima vetera monumenta non dum edita, a nobis summo studio, ac labore conquistata, ne magis magisque ære alieno gravemur, quod pro editione hujus Operis contraximus sola in Deum fiducia, qui, ut ait in Epistola sua S. Jacobus Apostolus Cap. I. *dat omnibus affluenter, & non impropere.*

IV. Unum est quod hic omittere nullatenus licet, quod nempe in fine nostri hujus §. edicatur: *Si Papa est præsens*, inquit, *Decreta intitulantur hoc modo*: Martinus Episcopus Servus Servorum Dei. Sacro approbante Concilio &c. *ut in Constantiensi.* Scite docet Fagnanus in Capite, *Antigonus*, *De pactis*, *Decreta* in Concilio, cui Papa præsidet, ita demum edenda esse nomine Concilii, si Papa in hoc consentiat, alias vero secus. Hac enim ratione factum, ut multæ Constitutiones a Concilio fuerint denominatæ, quia Romani Pontifices ad imitationem B. Petri quandoque ex humilitate consenserunt, ut gesta, quæ sibi tribuenda essent, adscriberentur Concilio, uti perspicue, solideque ostendit idem Fagnanus citato loco, ubi etiam recte subjicit, extra consensum Papæ, tametsi aliter nonnulli Canones innuere videantur, qui certe nullum Successoribus Beati Petri præjudicium, ut ajunt, inferre possunt, Constitutiones five originatas a Papa, five a Concilio, indistincte tribui Papæ debere, & ejus nomine edi; tum quia Concilia omnia universalialia congregantur, & auctoritatem accipiunt a Romano Pontifice Maximo, tum etiam quia Concilia ipsa Œcumenica ex veteri Ecclesiæ disciplina semper & constanter servata ab eodem Pontifice confirmantur, ab eaque confirmatione robur accipiunt, uti jam probavimus nostro Tomo I. Conciliorum in Prolegomenis, Cap. viii. & Cap. xxxiii.

V. Præterea, cum uti in eisdem Prolegomenis Cap. xxvi. probatum est, Summus Pontifex sit absolute supra Concilium, Constitutionesque facere possit etiam absque Concilio, juxta Textum in Capite, *Ad Apostolicam*, *De sententia & re judicata*, in Sexto, & receptam a Theologis passim S. Thomæ sententiam in Secunda Secundæ, Quæstione I. Articulo x. ex adverso autem Concilii Patres statuere aliquid sine auctoritate Papæ nequeant, ut idem S. Thomas docet in Opusculo, *Contra impugnantes Religionem*, quem inter alios sequitur Cardinalis Turrecremata in Summa, *De Ecclesia*, Quæstione Lvi. non mirum videri debet, si a Romano Pontifice Maximo tanquam majori & digniori Constitutiones editæ in Concilio, cui ipse præest, principaliter denominari debeant. Atque hæc est complurium Canonistarum sententia; unde Glossa in dicto Capite, *Ad Apostolicam*, ubi agitur de depositione Friderici Imperatoris, singulariter ait: *Nota quod in superscriptione dicitur*: Sacro præsentem Concilio ad memoriam sempiternam. *Quod dicit de Concilio, potius est ad honestatem, quam ad necessitatem; & sine sententia, vel licentia Concilii sententia Papa sufficeret contra Imperatorem, & quemcumque alium.* Tum paulo post: *Ibi non dicit, quod in Concilio facta fuerit depositio; ipse enim, Papa scilicet, habet plenitudi-*

rudinem potestatis &c. Vide & alia in hanc rem notata a laudato Fagnano in dicto Capite, *Antigonus*.

VI. Tandem, ut docet noster §. ubi Pontifex non adesset Concilio, decreta edita in ipso Concilio scriberentur sicut in Synodo Basileensi hoc modo: *Sacrosancta Generalis Synodus Basileensis in Spiritu Sancto legitime congregata Generale Concilium faciens, & universalem Ecclesiam representans &c.* Ducere argumentum a Synodo Basileensi supervacaneum est, & inutile, fuit enim Synodus ipsa, uti superius dictum est, Conciliabulum, *defuitque in ipsa in Sanctos Episcopos reverentia, & superabundavit temeritas, atque arrogantia*. Porro Petrus Soave Polanus narrat in sua de Tridentino Concilio pseudohistoria, in ipso Concilio præcipue sub Paulo III. & Pio IV. nonnullos ex Patribus voluisse, ut in Decretis apponeretur inscriptio significans, quod *Tridentina Synodus representet universalem Ecclesiam*; quæ inscriptio non modo in Basileensi, sed & in Constantiensi Concilio apposita jam fuerat. Additque historicus, huic petitioni obstitisse Legatos, ac reliquos omnes Patres, maxime dubitantes, ne hoc concessio adderentur alla verba, quæ in ipsa Constantiensi inscriptione leguntur Romani Pontificis auctoritati adversantia. Sed plane fallit falliturque historicus ipse, & alii, qui eam Constantiensem inscriptionem opponunt, ad infinuandum, quod Concilium sit supra Pontificem.

VII. Ad refellendam adversariorum calumniam lubet hoc loco Constantiensem ipsam inscriptionem referre, ejusque sensum, ac vim explicare. Ergo in Sessione IV. inscriptio hæc fuit: *Sacrosancta Constantiensis Synodus in Spiritu Sancto legitime congregata, Generale Concilium faciens, Ecclesiam Catholicam militantem representans, potestatem a Christo immediate habens, cui quilibet cujuscunque status, vel dignitatis etiam Papalis existat, obedire tenetur in his, quæ pertinent ad Fidem, & extinctionem Schismatis, & reformationem*. Scio, ex hac inscriptione ita argumentari adversarios. Aut hoc Concilium fuit legitimum, aut non. Si primum, ergo Concilium est supra Papam. Si secundum, ergo ejus acta nulla sunt, & consequenter depositio Pontificum ad extinctionem Schismatis, atque electio Martini V. quod nemo asserit. Si vere Constantiensis Synodus Catholicam Ecclesiam repræsentavit, & jure talem inscriptionem apposuit; cur non hoc debuit facere & Synodus Tridentina? Sed hæc argumentatio facile refellitur a Scipione Henrico in censura Petri Soave, Sectione III. Articulo IV. ubi scite docet, omne Concilium generale, ut in se est, Catholicam, seu universalem Ecclesiam repræsentare, sed suo modo. Nam sicut Ecclesia Catholica constat ex Capite, quod est Romanus Pontifex, & ex membris, quæ sunt reliqui Christifideles; ita Concilium, ut Ecclesiam Catholicam repræsentet, debet constare ex Capite, quod est ipse Pontifex Romanus, & ex membris, quæ sunt reliqui Episcopi. Accidit autem, quod quandoque Ecclesia est sine Capite, ut Sede vacante; vel sine certo, & indubitato Capite, ut tempore Schismatis, quod maxime fuit sub Concilio Constantiensi. Tunc Concilium eo tempore existens potest Catholicam Ecclesiam repræsentare, sed sine Capite,

To. I.

ut ipsa Ecclesia tum erat, unde Constantiense Concilium illo tempore fuit acephalum. Repræsentavit ergo Constantiense Concilium Ecclesiam Catholicam sed sine Capite; fuit enim pro Capite restituendo convocatum. Quare quoad extinctionem schismatis potuit ex se ipso quæcumque facere Decreta. Quoad vero res Fidei, vel reformationis, potuit quidem ferre Decreta, quæ tamen vim non haberent, nisi post confirmationem Romani Pontificis, ut de facto apparet ex ipsius Concilii Actis post electionem Martini V. qui confirmavit Synodalia Decreta de Fide. Quare ex recitata inscriptione Constantiensi non infertur, quod Concilium simpliciter sit supra Papam; sed quod Concilium Constantiense eo tempore, quo ea inscriptione usum est, fuerit tantum supra illos Pontifices dubios, atque incertos eo tempore. Atque hic potest esse verus & germanus sensus ejus inscriptionis.

VIII. Itaque ex dictis infertur, quare Legati, & reliqui Patres in Tridentino Concilio noluerint in Decretis simili inscriptione uti, quod scilicet Concilium Catholicam Ecclesiam repræsentet. Primo, quia hæc inscriptio satis recens erat, ac tantum seculo elapso in usu posita. Secundo, quia Constantiensis Synodus, tum primum hac inscriptione usa est, quando cœpit judicare adversus Joannem XXIII. Pontificem, & non ante Sessionem IV. Ut autem ostenderet, quo jure hoc faceret, causam apposuit eo quod Catholicam Ecclesiam repræsentaret. Hoc vero necesse non fuit in Tridentino. Hinc patet, quod tum Constantiense, tum Basileense Concilium talem inscriptionem apposuerunt. Constantiense quidem legitime, & juste, de incertis, & dubiis Pontificibus judicare incipiens; Basileense autem audens se extollere supra verum, & indubitatum Pontificem, unde ex Concilio in Conciliabulum abiit. Tridentinum vero Concilium, quia institutum fuit adversus Lutherum, & alios illius temporis hæreticos, quorum summa intentio & conatus semper fuit, ut Romani Pontificis auctoritatem infringerent, statuit, rejecta Constantiensi inscriptione, quæ nullius usus eo tempore esse poterat, apponere singulis Sessionibus, Apostolicæ Sedis auctoritatem. His adde, quod sicut Constantiensis inscriptio vera & legitima fuit, ut patet ex supradictis, quia tunc Ecclesia erat sine vero ac legitimo Capite, ad quod statuendum Constantiensis Synodus instituta fuerat: ita inscriptio Basileensis fuit falsa & illegitima, quia tunc Ecclesia erat sub vero & indubitato Capite. Unde nec Concilium Tridentinum poterat hac inscriptione uti, cum vere effet sub certo & indubitato Pontifice. Quapropter & in ipsa Historia narratur, Legatos scripsisse ad Pontificem, *Si Patres voluissent ut in Decretis poneretur inscriptio, quod Concilium illud Ecclesiam Catholicam repræsentet*; apponendum etiam fuisse; *repræsentare illam cum suo Capite Romano Pontifice*. Atque hoc modo talis inscriptio poterat esse legitima & vera, non tamen necessaria, ut ex supradictis patet. Placuit autem de hac re, de qua alias nonnihil diximus Tomo IV. Conciliorum in enarratione Generalis Concilii Tridentini, pauca hæc notasse, quæ tamen fusius explicata videri possunt apud Pallavicinum in sua celeberrima Tridentini Concilii Historia.

Ccc

DE

DE MORTE ET EXEQUIIS REVERENDISSIMORUM
CARDINALIUM ET PAPÆ

TITULUS XV.

T Ametſi in Tituli hujus inſcriptio-
ne nulla extet Papæ mentio,
cum tamen ſub uno ipſo Titulo
duo extant Capita, quorum
primum eſt de morte, & exe-
quiis Sanctæ Romanæ Eccleſiæ Cardinalium, al-
terum vero de ægrotatione, morte, & exequiis
Summi Romani Pontificis, hinc eſt quod nos in
ipſa Tituli inſcriptione addidimus, & *Papæ*. Hoc
notato, ſit nunc.

CAPUT I.

De ægrotatione, & exequiis Reverendiſſimorum Cardinalium.

§. I.

De Cardinalium teſtamento, & ejus executoribus.

Quoniam ſacra Philoſophia eſt aſſidua meditatio mortis, quia nihil omnino certius, quamvis hora incerta ſit: decet Summos Viros ſemper paratos eſſe quoad interiorem, & exteriorem hominem, ne improviſi ab ultimo die opprimantur. Dum igitur mente, & corpore valebunt Domini Cardinales, & alii Prælati, & magni Viri Eccleſiaſtici, ſi ſapiant, rebus ſuis conſulant, & ultimam voluntatem, indulgente Pontifice, legitimo firmabunt teſtamento. Quod ſi dum ſanus erat quiſpiam neglexit, ſaltem dum corpore languet, & mortem adventare timet, id agere non prætermittat; ſed cum recte animæ ſuæ, familiæ, & ſuis hæredibus proſpexerit, id præcipue curet, ut ex numero Cardinalium exequutores eos deligat ſui teſtamenti, qui integritate, & auctoritate clari habeantur, qui familiam tueri, & legata, atque relicta teſtatoris implere velint, & poſſint.

COMMENTARIUS.

I. **E** Piſcopos, ceterosque Beneficiarios de ſolo patrimonio, non autem de iis, quæ ex Eccleſiæ rebus acquiſſent, teſtandi habuiſſe poteſtatem, ex longo Patrum, & Conciliorum agmine Occidentis Orientisque, docet erudiſſimus Thomafſinus Parte III. *Diſciplina*, Lib. II. Cap. xxxviii. & ſeqq. Sed ut nonnihil dicamus de diſciplina Sæculi XII. de qua alias fuſe diximus Tomo III. Conciliorum in Commentario ad Canonem xv. Concilii Generalis III. Lateranenſis, ipſum quidem Concilium quod celebratum fuit anno mclxxxix, citato Canone xv. convenienter declarat, res omnes Beneficiarium, qui Eccleſiæ bonis, & Beneficiis ſuffarcinati, illam omni ope ſucceſſione ſua fraudare moliuntur, ad Eccleſiam ipſam devolutum iri, ſive teſtamenti aliquid ſcripſerint, ſive exceſſerint inteſtati: *Indemnitati itaque Eccleſiarum providere volentes, ſive inteſtati deceſſerint, ſive aliis conferre voluerint, penes Eccleſias eadem bona præcipimus remanere*. Non diſplicet Concilio teſtamenta edi a Clericis, ſed ſive teſtantium, ſive inteſtatorum, res ad Eccleſiam, ex qua derivatæ ſunt, necesse eſt revocari, uti obſervat idem Thomafſinus locis citatis Cap. xlvii. Num. v.

II. Quod Cardinales ſpectat, qui electioni Eugenii IV. Papæ interfuere Cardinales, inter alia Capita, quæ antequam ad electionem Pontificis procederent, inter ſe ſtatuerunt, atque

jurarunt, ut ea futurus Pontifex etiam ſervaret, illud non poſtremum fuit, ne Cardinales ſcilicet teſtari vetarentur, aut Prælati cæteri, qui in Curia diem extremum obirent, ut eos Pontifex ſineret, *juxta Juris diſpoſitionem, & conſuetudinem, qua in multis Regnis, & Regionibus ſervantur, fieri executiones juxta voluntatem decedentium, relinquendo conſcientiis eorum diſtributionem bonorum ad eos quomodo libet pertinentium*. Vide Raynaldum ad annum mcdxxxix. ubi Capitula ipſa deſcribit. Porro Paulus III. Bullam promulgavit, quam Galli *Compacti*, vocant, qua Cardinalibus copia ſit teſtandi de rebus per Eccleſiam acquiſitis, per Eccleſias etiam Cathedrales; ubi vero inteſtati exceſſerint, eorum hæreditas inter hæredes, & domesticos dividitur, judicio trium Cardinalium. At vero niſi pauperum ex grege ſint hæredes hujusmodi, mordicus ſemper retinenda ea, qua totius rei cardo vertitur, regula, non poſſe res Eccleſiæ Deo ſemper ſacras, niſi in uſus pios effundi, ut idem Thomafſinus notat. Hodie teſtantur, ut volunt, ſi tamen excipias ornamenta Capellæ, ſive Oratorii, quæ in propriis ædibus Cardinales habent, de quibus abunde diximus Tomo IV. Conciliorum in Commentariis ad Sæſſionem ix. Concilii v. Lateranenſis, Videri autem & poſſunt ea quæ congeſſit Cohellius in ſua Cardinalatus Notitia. Capite xvi. Privilegio xvi. quod inſcriptum eſt

est hoc modo: *De facultate testandi Cardinalibus concessa.*

III. De Cardinalium testamento mandat & illud hic noster §. ut Cardinalis testamentum condens id præcipue curet, ut ex numero Cardinalium executores eos deligat sui testamenti, qui integritate, & auctoritate clari habeantur, qui familiam tueri, & legata, atque relictæ testatoris implere velint, & possint. Clericos tam seculares, quam Regulares posse deputari executores ultimarum voluntatum, & quidem etiam ad non pias causas, docet inter alios Fagnanus in Capite, *Tua nobis*, xvii. & Capite, *Joannes Clericus*, xix. *De testamentis*, ubi etiam advertit, id intelligi, dummodo per hoc non

retrahantur a divinis officiis; & quoad Regulares dummodo non sint ex Ordine Minorum Sancti Francisci, quibus hoc officium est interdictum, ut in Clementina, *Exivi*, §. *verum*, *De verborum significatione*; & dummodo id fiat de licentia suorum Prælatorum petita, & obtenta, ut habetur in Capite, *Religiosus*, *De testamentis*, in Sexto, & Clementina, *Religiosis*, Titulo eodem. Quodnam, & quotuplex sit executorum ultimarum voluntatum, seu testamentorum, munus, docent Civilis æque ac Canonici Juris Consulti. Ex præscripto nostri Cæremonialis in hoc præsentî Capite varia sunt Cardinalium executorum munia, uti ex præsentî, & alijs Paragraphis sequentibus patet.

§. II.

De Sacramentis a Cardinale ægrotante excipiendis.

Cæterum qui ægrotanti assistent, si ille morbo oppressus ejus rei non meminisset, curent diligenter, ut in tempore Ecclesiastica Sacramenta, non clam, sed publice administrentur, & dum in extremis laborare incipit, advocent executores, qui decedentem solitis officiis consolentur, & bonorum omnium descriptionem faciant, eaque fidis Ministris, & in locis tutis custodienda committant. Executores in domo decedentis convenientes, quæ ad salutem, seu consolationem animæ illius pertinent, in primis procurabunt, ordinabuntque, ut Viri Religiosi psallentes, & orantes morientem circumstant; administrationi, & curæ domus præficient aliquem ex suis, qui cum Officialibus domus familiam gubernet pacifice, & quiete, & necessaria provideat; indeque ad deducendum funus quæ opportuna sunt statuunt; & committant alicui docto Viro, ut orationem funebrem meditetur.

COMMENTARIUS.

I. **S**tatutum iterum atque iterum fuit, ut, cum frequenter morbo ingravescente, plures ex hac vita, Sacramentali sine Confessione demigrant, medici pœnam excommunicationis incurrant, si tertiam post infirmivisitationem, ab infirmi cura non abstinant, usque dum ipse Pœnitentiæ non susceperit Sacramentum, quod Confessarius, relictæ apud ægrotantem schedula ejus manu subscripta testari teneatur. Novissime id quidem statuit in suo Romano Concilio anni mcccxxv. sanctæ memoriæ Benedictus XIII. sequutus sanctionem de ea re edita a S. Pio Papa V. in Constitutione, quæ incipit: *Super gregem Dominicum*, edita anno MDLXVI. & Canonem xxii. Concilii Œcumenici iv. Lateranensis sub Innocentio Papa III. anno mcccxv. quem Canonem jam nos fusc enarravimus Tomo nostro III. Conciliorum. Ex præsentî nostro §. cautum plane est, ut qui ægrotanti, Cardinali, assistent, si ille morbo oppressus ejus rei non meminisset, curent diligenter, ut in tempore Ecclesiastica Sacramenta, non clam, sed publice administrentur. Sed parum fidentium Cardinalium ægrotantium Familiaribus, quos in suo testamento, quod legitur in Additionibus ad Ciaconium Tomo II. col. 1062. & seq. ita depingit Jacobus Cardinalis Papiensis: *Circumstantium est molesta cupiditas, qui sua, non nostra quærentes, ab animæ cura ad terrena nos revocant, cogentes sæpe perturbationibus suis eum mori, qui vel moriturus non erat, vel certe tam cito non moriturus.*

To. I.

II. Notanda præsertim sunt ea §. nostri verba, quibus dicitur, diligenter curandum, ut in tempore Ecclesiastica Sacramenta, non clam, sed publice administrentur. Neque decet, quod alias cum Magnatibus infirmis observari hodieque non sine abusu, & Christiani populi scandalo videmus, qui ex consecrata Eucharistia in Missa, quæ in eorum domestico, privatoque Oratorio celebratur, communicant. Quod quidem est contra Conciliorum, & Pontificum Maximorum decreta, quibus expresse edicitur, Eucharistiam ad infirmum publice esse deferendam. Certe, ut alios omittam, Honorius III. in Capite, *Sane*, X. *De celebratione Missarum*, diferte Sacerdoti mandat, ut ipsam Eucharistiam in decenti habitu, superposito velamine ferat, & referat manifeste, ac honorifice ante pectus cum omni reverentia, & timore, semper lumine præcedente, cum sit candor lucis æternæ, ut ex hoc apud omnes Fides, & devotio augeatur. Id ipsum præscribunt Synodi passim, ac Rituales Codices, uti notat Vanespen Parte II. *Juris Ecclesiastici universi*, Titulo iv. Capite iv. Num. xvi. ubi etiam verba Pastoralis Mechlinensis refert, quæ sunt hujusmodi: *Non enim toleranda est eorum licentia, & abusus, qui sine gravi necessitate sub clamide occulte sine lumine & honore illud, Eucharistiæ scilicet Sacramentum, deferunt.*

III. Juxta nostri §. præscriptum, quo edicitur, diligenter curandum, ut Cardinali ægrotanti in tempore Ecclesiastica sacramenta, non

Ccc 2

clam

clam, sed publice administrantur, jam non modo Eucharistia, sed & extrema quoque unctio publice ad eum est deferenda, & ministranda juxta ritum nempe antiquum, quem præscriptum passim legimus in priscis æque ac recentioribus Ritualibus libris, longo agmine ab erudito Edmundo Martene allatis Lib. I. *De antiquis Ecclesiæ ritibus*, Cap. VII. Articulo III. Ordine I. & sequentibus; ex quibus addiscimus, solemni olim cum apparatu consuevisse deferri extremam unctionem ad infirmos. Sed ut omittamus hoc loco hunc ritum de quo plene dicemus in nostris ad Rituale Romanum Commentariis, quos brevi edituri sumus in lucem, curandum etiam diligenter, ut in domum Cardinalis morientis Sacri ac Religiosi Viri convenientes, ei assistant, animamque Deo religiosis precibus commendent. Præcipua hæc cura esse Parochi debet ex Concilio Agathensi anni DVI. cui adhærens Sanctus Carolus in suo Provinciali v. Mediolanensi

Concilio, Capite inferipto, *Quæ pertinent ad Sacramentum extremæ unctionis*, inter alia statuit, ut nempe quod ipso Concilio Agathensi cautum est, *id unusquisque Parochus præstare curet, ut Missæ Sacrificio peracto, si quis in Parochiali vicinia ægrotos habet, frequenter, atque adeo quotidie, quantum per alias suæ curæ Parochialis occupationes potest, invisat, atque eisdem præstet, quæ sunt sollicitudinis munerisque Parochialis officia, prout opus esse viderit*. Sed & de hac quoque re opportunius dicemus in citatis nostris Commentariis ad Rituale Romanum.

IV. Edicit tandem noster §. ut Executores a Cardinale moriente delecti, *administrationi & curæ domus*, ipsius scilicet Cardinalis morientis, *præficiant aliquem ex suis, qui cum officialibus domus familiam gubernet pacifice, & quiete, & necessaria provideat*. Hic fuit mos veterum Cardinalium, ut ex eorum testamentis liquet.

§. III.

De curando Cardinalis Cadavere in ejus domo.

Cum autem languens spiritum Creatori reddiderit, Ministri, deposito ex lecto post mortuam Cadavere, illud calida aqua lavent, barbam radant, mundetur, & ita curent opportunis remediis, ut corpus sine foetore usque ad præstitutum tempus reservari possit. Significent executoribus horam transitus, ut illi de hora funeris deliberare valeant; quam deinde per Cursos aliis Cardinalibus, Prælati, & Curialibus, atque etiam Collegiis, & Conventibus Clericorum, ac Religiosorum, quos funeri interesse voluerint, intimabunt. Sed nota, quod ante Sixti IV. tempora Cardinales non consueverunt ire ad domum Cardinalis defuncti, nisi executores tantum; mittebant autem familias suas; post ea vero tempora fere omnes interfunt, quando Vigiliæ dicuntur, non tamen sequuntur funus. Quid magis deceat, alii viderint. Ministri Cardinalis defuncti, ut corpus mundaverint, illud vestiant omnibus quotidianis indumentis usque ad Rochetum inclusive; deinde ornent eum sacris vestibus, ac si Missam esset celebraturus. Si est Presbyter, aut Episcopus Cardinalis, imponant Sandalia, Amictum, Albam, Cingulum, Stolum, Manipulum, Tunicellam, Dalmaticam, Chirothecas, Planetam, Mitram simplicem, & Anulos. Si vero esset Diaconus, super Stolum transversam, Dalmaticam tantum imponent, & Mitram simplicem in capite, ea scilicet ornamenta, quibus uteretur, si Evangelium esset dicturus; & ita indutum deponant in terra super aliquem pannum, sive tapetum cum cereis ardentibus a capite, & a pedibus. Ponent super ejus pectus Crucem aliquam, quam manibus teneat. Interea tota domus nudetur ornamentis omnibus. In majori Aula domus quasi in medio paretur lectica ex tabulis, quæ a terra distet circa sex palmis, latitudine decem, longitudine duodecim palmorum, aut circa; & super eam ponatur lectus ex lana sive pluma cum cervicali longo, & magno panno aliquo cooperiatur lectus, & lectica circa a lateribus. Hinc inde parentur scamna cum foraminibus, ut ibi ponantur sexdecim, aut viginti intorticia. Ad pedes lecti erit mensula cum mappa munda, & super eam duo candelabra cum luminaribus, Superpelliceum unum, una Stola cum Pluviali nigri coloris; item vas cum aqua benedicta, & asperforium, & thuribulum cum navicella incensi, & libellus pro dicendis orationibus. Circum circa per totam Aulam ponantur sedilia pro Cardinalibus, Prælati, & aliis Curialibus, qui veniunt ad honorandum defunctum. Familiæ in istis Vigiliis, & in deducendo funere non interfunt, quia non sunt adhuc induti veste lugubri; habebunt tamen singuli nigrum biretum expensis defuncti. Cum aderit hora præstituta, corpus defuncti ita ornatum, ut diximus, ponetur super lectum in Aula, & accenduntur intorticia. Cardinales, Prælati, & alii, qui venerunt, sedebunt circum circa. Religiosi per singula Collegia, sive per singulos Conventus incipient Vigiliæ, & primi dicent Invitatorium cum primo Nocturno, & post Responsorium tertiæ Lectionis dignior ex eis indutus Superpelliceo, Stola, & Pluviali, stans apud mensam ad pedes lecti dicit: *Pater noster*; asperget, & incensabit per circulum; & deinde sequitur.

Et

Et ne nos inducas, cum Versiculis, & Orationibus consuetis. Cum incipient cantare, distribuentur cantantibus aliquæ candelæ; cum primi finierint, aliqui sequentur secundum, & deinde tertium Nocturnum, & deinde Laudes, & digniores, qui aderunt, incipient. Et si essent plura Collegia, sive plures Conventus, poterunt duo simul cantare unum Nocturnum. Paretur interim feretrum ad portandum corpus, & quinquaginta, aut sexaginta intorticia, quæ ante corpus per stabularios deferantur.

C O M M E N T A R I U S.

I. **Q**Uæ obsequia exhiberentur defunctis statim post obitum ipsorum, jam nos alias explicuimus, præsertim vero Tomo II. Commentariorum in partem alteram Cæremonialis Episcoporum, in Librum scilicet secundum Cap. xxxviii. Illa nos in hoc Commentario notabimus quæ ad hunc §. spectant, in quo illud primum edicitur, ut mortuo Cardinale, *ministri, deposito ex lecto post mortuam cadavere, illud calida aqua lavent &c.* Fuit hic plane antiquus mos ad nostra hæc usque tempora usitatus, ut omnis a recens mortua immunditia, quam ex diutina infirmitate, aut aliunde contrahere potuerunt, lotione extingeretur. Hanc consuetudinem statim ab initio accepit a Judæis Ecclesia; nam Acta Apostolorum Tabithæ religiosæ femine mortem Cap. ix. sic expriment: *Factum est autem in diebus illis, ut infirmata moreretur, quam cum lavissent, posuerunt illam in cœnaculo.* Jam non modo lavari cadavera consuevisse, verum etiam variis unguentis, & aromatibus ad arcendum fœtorem condiri, pluribus exemplis ostendit eruditus Martene Lib. III. *De antiquis Ecclesiæ ritibus*, Cap. xii. Num. II. & seqq.

II. Loto cadavere, induitur mox illud vestibus, quæ cuique mortuo propriæ sunt: *Ministri Cardinalis defuncti*, ait noster §. *ut corpus mundaverint, illud vestiant omnibus quotidianis indumentis usque ad Rochetum inclusive; deinde ornent eum sacris vestibus, ac si Missam esset celebraturus &c.* Est hic plane antiquus ritus, cujus meminit Romanus Ordo xv. Auctore Petro Amelio Cap. clxvi. quod inscriptum est, *De exequiis Cardinalium*, ubi sic inter alia inquit: *Cardinalis vero, si est Episcopus, debet esse totaliter indutus de vestibus sacris coloris nigri, aut violacei totaliter, ut Pontifex, cum Mitra alba, chirothecis, & Sandalia cum anulo Pontificali.* Tum vero mox: *Item si sit Presbyter, eodem modo. Si Diaconus, eodem modo, sed in habitu Diaconi, & non cum Planeta, nec chirothecis, nec cum anulis Pontificalibus, sed cum aliis tunicis, & parvis chirothecis, & parvo Anulo.* Contra Cæremonialis hujus præscriptum jam non violaceus, aut niger fuit color vestium, quibus indutum fuit statim post ejus obitum S. Caroli corpus, sed album, ut testatur Auctor illius Vitæ Libro vi. Cap. ix. *Collocatum postremo est in Palatii Sacello, vestitum Pontificiis indumentis albi coloris.*

III. Spectant & ad hunc nostrum §. quæ varii Auctores de sepulturæ ritibus tradunt apud laudatum Martene citato Cap. xii. sed præ ceteris audiendus hanc in rem Auctor Anonymus Turonensis, qui in suo ms. Codice ejus Ecclesiæ plura de antiquo ritu nos docet, quæ nonnihil faciunt ad ejusdem nostri §. explicationem: *Sigillum cereum*, inquit, *in modum Crucis com-*

positum, & aquam benedictam continens super caput defuncti ponimus, quod est signum baptismi, & Christianitatis suæ, & testimonium, quod ipse Fidem Christi habuit in mente. Clerici vero ordinati cum illis indumentis, in quibus fuerunt ordinati, debent & sepeliri, & Sacerdos cum illis, cum quibus assistit Altari. Tum paulo post: *Episcopus debet habere anulum, quia Sponsus est. Ceteri Sacerdotes non, quia Sponsi non sunt, sed amici Sponsi.* Item capilli debent Clerico tonderi, corona fieri, barba radi. Est itaque & antiquus mos ille radendi barbam recens defuncto, cui plane adhærens noster §. inter alia edixit, ut ministri defuncti Cardinalis, ejus barbam radant. De Cruce ponenda super defuncti pectus, cum qua etiam Christianorum cadavera sepeliri consueverunt, testes habemus antiquos Scriptores, inter quos Odo Fossatenis in Vita Burchardi Comitis sic inquit: *Illam autem tabulam sepulchri ipsius ab antecessoribus nostris optime operata, ac decorata fuit; super pectus ejus Crux deaurata cum litteris A & Ω superposita fuit.* Teste Durando in Rationali Divinorum Officiorum Libro vii. Cap. xxxv. *in quocumque loco extra Cæmeterium Christianus sepeliatur, semper Crux capiti illius apponi debet, ad notandum, illum Christianum fuisse, quia hoc signum diabolus valde veretur, & timet accedere ad locum Crucis signaculo insignitum.*

IV. Quicquid autem de hisce ritibus sit, docet præterea hic noster §. *quod ante Sixti IV. tempora Cardinales non consueverunt ire ad domum Cardinalis defuncti, nisi executores tantum; mittebant autem familias suas.* Addit mox, quod post ea vera tempora fere omnes intersunt, quando Vigilia dicuntur, non tamen sequuntur funus. Introducitur recens moris post Sixtum IV. ut nempe Cardinales convenirent in domum Cardinalis defuncti, ubi Vigiliæ a Religiosis dicebantur, varia exempla habemus apud Apostolicos Cæremonarios ejus temporis. Teste Burchardo in suo ms. Diario, anno mcdxcviii. die xviii. Septembris R. in Christo Pater & Dominus, Dominus Joannes Baptista S. Nicolai in Carcere Tulliano Diaconus Cardinalis de Sabellis vulgariter nuncupatus, in Castro suo Gandulpho diem clausit extremum. Portatum fuit corpus, sive cadaver suum in nocte immediate sequenti Romam in Palatium habitationis & residentie suæ, positum ibidem in Aula cum intorticiis, & aliis more solito. Notandum autem potissimum, quod statim idem Auctor subjicit: *Die Mercurii XIX. immediate sequente convenerunt Cardinales in eodem Palatio cum Prælati, & aliis ad honorandum funus, & Fratres per Conventus dixerunt Vesperas, & Matutinas defunctorum; quibus finitis, portatum fuit funus ad Ecclesiam B. Mariæ in Ara Celi.*

§. IV.

§. IV.

De Cadaveris delatione ad Ecclesiam, & quæ in ipsa preparanda.

Finitis Vigiliis, ponitur corpus super feretrum, & Religiosi suo ordine præcedunt, deinde luminaria, postea corpus, quod per Religiosos defertur, postremo sequuntur Prælati, & Curiales; & cum pervenerint ad Ecclesiam, ubi sepelitur, finito officio, omnes descendunt, quisque ad suam habitationem. Hæc funeris deductio sæpe intermittitur propter varias causas, & tunc factis Vigiliis in domo defuncti, discedunt omnes, & in nocte portatur corpus ad Ecclesiam per familiam cum aliquibus Religiosis. Post hæc executores statuunt diem, in quo exequiæ inchoentur, & interim distribuunt pannum nigrum familiæ, Prælati quinque cannas, Capellani quatuor, scutiferi tres, stabularii duas cum dimidia. Ordinant, ut fiat pallium aureum pro lecto sub campana, sive castro doloris, quod fiet ipsum Castrum doloris cum lectica, scamnis pro intorticiis, & banchis, in quibus sedeat familia. Item pingantur arma, suspendanturque circa Ecclesiam, Altare, & Castrum doloris. Fiet cera ad sufficientiam. Consueverunt esse ad sex, vel octo millia librarum ceræ. Suspenduntur intorticia circum circa in Ecclesia unius lanceæ spatio inter se distantia. A lateribus lecti hinc inde super scamnis ponantur duodecim, aut sexdecim intorticia in quolibet latere. Præficiantur aliqui, qui teneant computum ceræ, & qui illam subministrant distributoribus. Alii, qui curent, ut Missæ vere, & suo ordine legantur, & dent eleemosynam celebrantibus. Ordinent, qui Cardinalis primam, & qui ultimam Missam sit celebraturus; qui Prælati intra Novenam celebrent, & aliæ Missæ legantur; quod Cantores cum Capella, cum paramentis, & libris opportunis ex Palatio Apostolico adsint; quod ibidem sint quinque Pluvialia nigra cum suis Stolis; quod committatur quatuor Cardinalibus, ut cum celebrante in fine Missæ apud Castrum doloris absolvant, ut inferius dicemus; quod parentur quatuor scabella apud primas & postremas columnas Castri, & alia necessaria.

C O M M E N T A R I U S.

I. **I**ndicta ad sepeliendum defuncti cadaver die, juxta veterem ritum omnes, qui funeri interesse debebant, ad illius domum conveniebant, unde ad Ecclesiam, & ad sepulturam illud efferebant. Hoc certe in usu olim positum fuit, ut, teste erudito Martine Lib. II. *De antiquis Ecclesiæ ritibus*, Cap. IV. Num. 1. corpus parentis a filiis, cognatorum a consanguineis, Imperatorum a Principibus Senatus, ad tumulum deportaretur. Id ipsum satis indicat S. Ambrosius Lib. 1. de excessu fratris sui Satyri, ubi sibi ipsi ita exclamat. *O dura cervix, quæ tam lugubre onus, consolabili licet obsequio gestare potuisti!* In funere S. Macrinæ feretrum sustinuit S. Gregorius Nyssenus illius frater cum Araxio Episcopo, *posteriores vero feretri partes subjecerunt alii duo de Clero insignes Viri*, ut ipse testatur in ejusdem S. Macrinæ Vita, Cap. XXIV. Teste S. Hieronymo in Epitaphio Paulæ Matronæ Romanæ, ipsa Paula translata Episcoporum manibus, & cervicem feretro subicientibus, cum alii Pontifices lampades, cereosque præferrent, alii choros psallentium ducerent, in medio Ecclesiæ Spelunca Salvatoris est posita. Corpus vero S. Hugonis Lincolnensis Episcopi a Regibus, Comitibus, & Principibus ad Ecclesiam delatum legitur apud Matthæum Parisium in Anglicana Historia ad annum MCC. De feretri bajulis sui temporis consuetudinem ita exprimit Auctor Anonymus Turonensis in suo ms. Speculo Ecclesiæ: *Debet autem corpus perferri ad tumulum a consimilibus, ut si fuerit Diaconus a Diaconis, si Sacer-*

dos a Sacerdotibus, si miles a militibus, alicujus fraternitatis confrater a confratribus.

II. Feretrum præibat Clerus & populus facces, seu cereos gestantes, idque comprobari multis exemplis posset, quorum aliqua recenset Martene citato loco, Num. II. Quod Cardinalium funus spectat, juxta præscriptum nostri §. *ponitur corpus super feretrum, & Religiosi suo ordine præcedunt, deinde luminaria, postea corpus, quod per Religiosos defertur*, per illos nempe, ad quorum Ecclesiam effertur cadaver sepeliendum. Fuit hæc quidem Cardinalium prærogativa, ut eorum cadavera deferrentur ad Ecclesiam per Viros Religiosos, id quod etiam manifestum fit ex Diario Burchardi Cæremoniarii Apostolici, ubi enarrat Pontificatum Alexandri VI. Papæ. Sic enim inter alia inquit ad annum MCDXCIII. *Feria II. XI. Martii circa horam XI. portatum fuit ad Ecclesiam Beata Mariæ Aracali sepeliendum ibidem corpus quondam Dominici de Mari Januensis patris Reverendissimi Domini Cardinalis Beneventani, qui obiit nocte præterita Romæ in domo habitationis suæ sitæ inter Ecclesiam Minervæ, & domum Magdalenorum, per servitores, & domesticos suos, quia Fratres Aracali noluerunt illud portare, asserentes, se non esse sacchinos, & Cardinales dumtaxat portare.* Teste eodem Burchardo, mortuo Romæ anno MCDXCIV. die XX. Septembris Nicolao Conrado de Comitibus electo in Archiepiscopum Compsanum, *deportatum fuit funus per decem Presbyteros seculares ad hoc per nos ordinatos, quia Fratres Ara-*

Aracali, ad quorum Ecclesiam portandum erat, noluerunt illud portare, dicentes, id apud eos non esse consuetum.

III. Invaluit autem mos, ut Cardinales ipsi & Principes Romæ defuncti non quidem feretro hominum humeris vecto, sed magno curru tracto ab equis hora secunda noctis ad Ecclesiam deferantur, comitantibus nonnullis ex familia, intorticia accensa gestantibus. Cautum est quidem ex hoc nostro §. ut in deductione funeris quinquaginta, aut sexaginta intorticia per stabularios ferrentur. Ex præscripto autem Ordinis xv. Romani, Cap. clxvi. quod est de exequiis Cardinalium, deferri centum intorticia debebant. Præter hanc ceram multa alia opus erat pro Castro, ut ajunt, doloris, de quo mox infra, & pro illis, quibus ea occasione in magna copia dispensabatur: *Consueverunt esse ad sex, vel octo millia librarum cera*, ait hic noster §. Magna tunc erat impensa funeris, quam quidem in suo testamento moderatus est Jacobus Cardinalis Papiensis, ubi ita inter alia statuit: *Impendia funeris, quæ adhiberi ad solamen superstitum magis, quam defunctorum levamen solent, summam mille ducatorum aureorum veto excedere, in qua includatur etiam vestitus familia. Quanto hæc exhibebuntur parcius, tanto erit plenius, unde & illi bene fiat, & mea anima consulatur, Supervacua nec placeant Deo, nec laudes inter homines habent, Transit, brevi memoria funeris, diu permanent damna, Tempora in hoc Patrum nostrorum magis sunt attendenda, quam nostra, qui gloria benefactorum, non luminum multitudine illustrari volebant sepulchra, Quicquid amplius sumetur, quicquid plus erogabitur, piaculum executoris sit, non sobria statuentis.*

IV. Addit mox alia Papiensis in memorato suo Testamento, quæ hoc loco referre satis profecto erunt ad ea multa explicanda, quæ in hoc nostro §. de Castro doloris, de apparatu Ecclesiæ, de cera, de lecto, super quo collocandum est Cardinalis cadaver, de panno familiæ distribuendo, de Missarum celebratione, ac de aliis statuuntur: *Castrum doloris, inquit, cubito angustius in circuitu sit, quam nostratia solent; ipse etiam lectus ad proportionem angustior; stratum vero lecti, quod pallium dicitur, ad vetus exemplum ex simplici damasceno violaceo sit sine ullo omnino auro, vel argento, fimbrias laterum habens ex simplici item damasceno caelestini coloris, in quibus latera singula, singula tantum insignia familia habeant. Veto in circuitu Ecclesiæ appendi tot insignium depicta lintea, ludis meo judicio aptiora, quam funeri; pendeant tantum super Altari, in quo Missa major cantabitur, & in circuitu Castri, & in edito laterum Ecclesiæ, quantum Castrum ipsum porrigitur. Eandem volo esse collationem funeralium, quam & insignium, ardere ea tot in locis sine sacrarum necessitate, quem habeant usum non video. Legem in his executori do, ne honoris sui causa exempla magis, quam ad seipsum cogatur respicere.*

V. Pergit Papiensis, abusumque sui ævi reprehendit, quo magna ea occasione funeris fieri solita erat cereorum dissipatio: *Cereorum quotidiana, & promiscua dispersio magis, quam dispensatio multum auget impensam; nec fructum qui proponitur, habet; avaritia in his stu-*

deri videtur, non orationi. Ad eos rapiendos concurritur undique ex tota Ecclesia, pugnatur, clamatur, sacra omnia perturbantur, quodque indignius Ecclesia est, ad hos compescendos tumultus, publici vindices adhibentur, bastis, gladiisque in domo Domini perstreperes. Ea ne accidant, preces, non rixæ, meum celebrent funus; nolo, nisi confidentibus ad orationem, & divina canentibus illos distribui. Per pietatem, quæ debetur mortuis, id non negligat executor funeris. De Missis legendis, canendisve, earumque eleemosyna ita deinde subdit: Quaque die in salutem animæ meæ legantur per devotos Christi Sacerdotes XXX. Missæ tantum, cum ita una cantatur; qui cantaverit, & Prælati futurus est, ferat in eleemosyna carlinos quatuor in singulis Missis; unum, qui legerit; & bis solvendis fidelis adhibeatur Minister, qui seipsum, & pauperes, & animam meam non fraudet. De panno denique familiæ distribuendo ita cavit: Solent mortuis Cardinalibus familiares non veri ad accipiendas familiarium verorum vestes accurrere, instare, ut dentur; si non dantur, indignari, ac lamentari: ut error non sit, eos vestiri volo, qui in notula manu mea subscripta, vel anulo meo signata, præsentique Testamento inclusa inveniuntur apposti; & Capellani quatuor canna; Scutiferis, inter quos Parasfrenarios, & primum coquum, & cellarium, & dispensatorem nomino, primæ sortis tres; reliquis dimidiam cannam minus; sed secundæ sortis jubeo dari, ita tamen, ut diebus funeris ad orationem omnes conveniant, & pro me deprecantur.

VI. Legi integrum Papiensis testamentum potest apud continuatores Ciaconii in ejus Vita, ubi & hæc inter alia leguntur verba: *Ad funus de more celebrandum pradiola, & domus vendita. Ut ea se res habuerit, vel ex nostro Cæremoniali addiscimus, magnam fuisse impensam funeris Cardinalium, tum præsertim quod novem diebus peragi tunc temporis debebat. Ex præscripto Romani Ordinis xv. Cardinales, & Patriarchæ, quilibet habebat tortitiam ad minus de quatuor libris; alii vero de libra, aut de duabus libris, sicut placebat executoribus. Fieri quoque debebat Castrum doloris cum candelis; circumquaque debebant etiam esse ad minus centum tortitiæ, & plus secundum voluntatem executorum. Sed nec omittendum quod de ipso Castro doloris, & feretro laudatus Ordo xv. Romanus edicit: Subtus Castrum doloris, inquit, sedent familiares; item in feretro debent esse magnum, & longum pulvinar subtus caput Cardinalis de nigro, colore scilicet, item unum aliud ad pedes, super quo stant duo Pilei Cardinalis. Atque hæc satis nos docent, ritus in nostro §. descriptos, jam non fuisse ab Augustino Patricio inventos, sed eo antiquiores; præcessit enim Amelius memorati Ordinis xv. Auctor Patricium hujus nostri Cæremonialis ordinatorem sub Innocentio Papa VIII. Videtis apud Ciaconii continuatores Tomo II. col. 511, & seqq. testamentum Nicolai S. R. E. Cardinalis Capocci, qui obiit anno mcccclxviii. in quo testamento multa curiosus Lector inveniet, quæ hoc caput de exequiis Cardinalium illustrant. Inter alia autem mandavit, ut ejus sepultura esset in terra sine aliquo edificio, & quod nullus ejus familiaris induatur de nigro.*

§. V.

§. V.

*De exequiis celebrandis Cardinali defuncto ac primum de Missa ;
& Oratione funebri.*

Omnibus opportune dispositis, vesperi ante statutam diem per Cursores faciunt intimari Cardinalibus, Prælatibus, Oratoribus, & Officialibus Curia, quod in tali loco cras incipientur exequia bonæ memoriæ Reverendissimi Domini Cardinalis N. & Reverendissimus Dominus A. celebrabit, & Dominus, vel Magister B. faciet orationem. Mane deinde hora competenti Reverendissimi Domini Cardinales conveniunt ad Ecclesiam, sedebunt prope Altare majus in sedilibus pro eis præparatis, nudis tamen, & sine aliquo panno. Prælati, & alii Curiales sedebunt in locis suis. Familiæ defuncti Cardinalis summo mane omnes nigris vestimentis induti simul bini & bini ex domo defuncti venient ad Ecclesiam. Duo Cursores eos præcedent, & sedebunt in banchis circa Castrum doloris pro eis locatis. Supra lectum, qui erit sub Castro doloris, erit pannus aureus cum insignibus defuncti, & duo cervicalia nigra. Ad caput lecti, & ad pedes duo Pilei rubri ipsius defuncti. Hinc inde astabunt duo Parafrenarii mortui Cardinalis, qui cum duobus flabellis factis cum insignibus Cardinalis ex serico nigro videantur abigere muscas, etiam si sit tempus hyemale, qui sedulo flabella placide movent. Omnibus paratis incipitur Missa pro defunctis, & cum fuerit dicta prima Collecta, Clerici Cæremoniarum incipiunt distribuere ceram Dominis Cardinalibus primum, tum Oratoribus, & Prælatibus, inde Familiæ defuncti, deinde Officialibus Curia, demum ceteris præsentibus, tam mulieribus, quam Viris. Quæ profecto dispensatio ceræ, sive potius dissipatio, est valde importuna, & tumultuosa, & meo judicio satis inconveniens; nam ob strepitum, & clamorem petentium, & rapientium candelas, divinum Officium, & funebri oratio admodum conturbatur. Antequam incipiatur Evangelium, accenduntur dictæ candelæ, & per Ministros tenentur accensæ usque ad finem Missæ. Finita Missa, post *Requiescant in pace*, fit Sermo in laudem defuncti; & Cardinalis, qui celebravit, dimissa Planeta, accipit Pluviale, & sedet cum Mitra alba, dum fit Sermo.

C O M M E N T A R I U S.

I. **C**elebrari consuevisse jam olim mortuorum exequias mane, principemque locum tenuisse incruentum Missæ Sacrificium, docent nos passim antiqui Codices Rituales, & vetera exempla, quorum nonnulla recenset Martene in citato toties Opere, *De antiquis Ecclesiæ ritibus*, Lib. III. Cap. XIV. Una cum Missa haberi etiam solita fuit oratio funebri, saltem in personarum illustrium funere, ad eos scilicet qui convenerant, vel in defuncti laudem, vel ad excitandos fideles, ut instantes ad Deum preces funderent pro ipsius animæ requie. Ita Rodulfus Abbas S. Vitoni, ut legitur apud Hugonem Flaviniacensem, *Missæ dicta, Sermonem dato, terra redditus est*. Ita in funere S. Udalrici Episcopi Wolfgangus, qui exequiis præerat; *publica Missa expleta, omnes in commune, sobrio, & cauto sermone admoovit, ut pro illa sancta anima, intima intentione cordis devote exorent, ut ab omni vinculo delictorum absolutæ, Deo donante, perenni gaudio in ævum cum Sanctis, & electis Dei perfrui mereretur*. Ita etiam in S. Bonaventuræ S. R. E. Cardinalis exequiis, ut Auctor ejus Vitæ scribit apud Surium die XIV. Julii, *primam Missam celebravit Frater Petrus Tarentasiensis Episcopus Cardinalis Ostiensis, & Sermonem habuit proposito themate, nempe, Doleo super te mi Frater Jonata*; qui totus fuit in ejusdem Sancti laudem. Juxta præscriptum Ordinis xv. Romæ-

ni Cap. cixvi. *in exequiis Cardinalium semper unus Cardinalis debet dicere Missam. Sermonem facit aliquis Magister in theologia, qui debet fieri post Missam*. Vide quæ de utroque ritu diximus nos Parte II. Cæremonialis Episcoporum in Commentariis ad Cap. xxxviii. Ceterum quamvis olim orationes funebres passim & quidem plures fierent in exequiis Cardinalium, ut ex eorum Vitis addiscimus, jam Romæ invaluit mos, ut in ipsis Cardinalium exequiis, quæ uno tantum die celebrantur, nulla prorsus funebri oratio habeatur.

II. Notandus est nunc alius abusus, qui contra præscriptum hujus Cæremonialis, imo contra pervetustam, laudabilem, ac generalem Ecclesiæ disciplinam invaluerat, quemque iccirco merito correxit primum sanctæ memoriæ Benedictus XIII. ac novissime iterum feliciter regnans Summus Pontifex BENEDICTUS XIV, qui etiam Constitutionem de ea re edidit anno mpcxli. qua præscribitur forma, & solemnitas in exequiis S. R. E. Cardinalium servanda, estque hujusmodi.

BENEDICTUS EPISCOPUS

Servus Servorum Dei

Ad perpetuam rei memoriam.

Præcipuum intimi amoris nostri, & sinceræ in Christo caritatis erga Venerabiles Fratres nostros Sanctæ Romanæ Ecclesiæ Cardinales, quos in Apostolicæ nostræ sollicitudinis partem fu-

superna cælestis Patrisfamilias evocat dispositio, a Nobis exigit studium, ut quemadmodum omnia & singula, eis viventibus, eorumque sublimi dignitati debita privilegia, quantum in Domino possumus, firmo constantique animo tuemur, ita & eorumdem ex hac mortali vita decedentium curam geramus, ut & ipsorum funera a Nobis, Romanisque Pontificibus Successoribus nostris, & ipsorum Cardinalium superstitum cœtu stabili, ac solemni, etsi lugubri, decorentur honore, & ipsorum animæ incruento Altaris Sacrificio, Ecclesiasticis precibus, ac supplicationibus juventur, quibus adjunctæ, omni macula diluta, quam in terreno hujus Sæculi pulvere contraxerunt, per merita Salvatoris nostri Christi Domini cælestem patriam ingrediantur, ibique apud Patrem misericordiarum pro Nobis intercedant, Divinamque opem Nobis implorent in gravissimo Apostolici hujus ministerii onere ferendo, ut in fine diei repromissum laborantibus in Vineam suam æternæ beatitudinis denarium a Domino recipere mereamur.

Cum itaque, sicut accepimus, postquam piæ memoriæ Benedictus Papa XIII. Prædecessor noster pie provideque attendens, quod ab aliquo tempore, & ante ejus Pontificatum Sanctæ Romanæ Ecclesiæ Cardinalium pro tempore in Romana Curia decedentium exequiæ, quæ olim, & veteribus temporibus, multifarie, sed angusta semper, & decenti pompa celebratæ fuerunt, tunc vero cum assistentia Sanctæ Romanæ Ecclesiæ Cardinalium superstitum cœtus, decantatis in eisdem exequiis a Regularibus ex Ordinibus Mendicantium tribus nocturnis Defunctorum Officii, ut plurimum de Vespere, & si aliquando de mane, aliqua sic suadente causa, habitæ fuerant, numquam cum solemni Defunctorum Missæ celebratione, præsentem defuncti Cardinalis corpore, peragebantur; propterea, ut in exequiis celebrandis hujusmodi solemnis Missa prædicta semper, prout exigit pia Ecclesiæ consuetudo, præsentem defuncti Cardinalis cadavere, celebraretur, Cardinalibus ab onere interveniendi de vespere recitationi Officii Defunctorum, non autem Fratribus ex Ordinibus Mendicantium a decantandi Nocturnos Officii prædicti obligatione exemptis, laudabilem personaliter una cum omnibus & singulis Ordinibus Capellas Pontificias constituentibus ad exequias prædictas de mane celebrandas, in quibus præfata Missa solemnis a Cardinale reliquorum Cardinalium cœtus Camerario pro tempore existente solemniter celebrabatur, conferendi se ipsum, & in exequiarum hujusmodi fine, supra defuncti Cardinalis corpus per se Absolutionem impertiendi introduxerat morem, quem, usquequo in hac terrena peregrinatione permansit, religiose servavit; felicitis recordationis Clemens Papa XII. similiter Prædecessor noster provida animi consideratione secum perpendens, quod ad peragendas de mane & vespere exequias prædictas, pro duplici videlicet uno & altero lugubribus apparatus, celebratio hujusmodi majores exigebat sumptus, gravioribus dispendiis parcere cupiens, exequias ipsas ad primævum statum redegerit.

Nos igitur animo nostro attente ac diligenter considerantes, quod antiquitus, sicut ex
To. I.

veteribus sacrarum Cæremoniarum libris compertum est, in more Romanæ Ecclesiæ fuit, ut, adstante Sanctæ Romanæ Ecclesiæ Cardinalium Collegio, Missa, præsentem Cardinalis defuncti cadavere, celebraretur, & pro ejus anima offerretur Deo salutare immaculatæ Hostiæ Sacrificium, quemadmodum nunc in omnibus, etiam infimi Ordinis personarum exequiis pie, sancteque servari solet; cupientesque antiquam, & laudabilem consuetudinem in usum revocare; & insuper rationi congruum, maximeque conveniens existimantes, ut Romanus Pontifex pro tempore existens eis, qui sibi in oneroso Pontificii regimine adjutores extiterunt, ultimum debitumque sui amoris, suæque pietatis persolvat officium, absque eo tamen, quod eorum patrimonia majori expensarum onere graventur, præsentem hac nostra perpetuo valitura Constitutione, motu proprio, ex certa scientia, Apostolica auctoritate, de consensu etiam Venerabilium Fratrum nostrorum Sanctæ Romanæ Ecclesiæ Cardinalium, quibuscum deliberationem nostram in Consistorio nostro secreto communicavimus, decernimus, & statuimus, quod in posterum Cardinalium in Romana Curia decedentium exequiæ semper de mane, nunquam vero de vespere celebrentur, & celebrari debeant, infra scripta forma servata, videlicet, quod Fratres ex Ordinibus Mendicantium de mane diluculo ad Ecclesiam, in qua defuncti Cardinalis corpus expositum reperitur, pro inibi prædictis tribus Officii defunctorum Nocturnis de more decantandis, sollicitè accedant; quibus quidem Nocturnis decantatis, eodem mane absque ulla lugubris apparatus mutatione, vel aliarum expensarum augmento Capella Pontificia, intervenientibus Romano Pontifice, ac Sacro Cardinalium cœtu, necnon omnibus & singulis Capellam Pontificiam constituentibus, habeatur, & in ea Sacrum Missæ Defunctorum Sacrificium a prædicto Cardinale Cardinalium Cœtus pro tempore Camerario existente, eoque impedito, ab altero Cardinale ab eodem Cardinale Camerario delegato, solemniter celebretur, quodque supra defuncti Cardinalis corpus Absolutio ab eodem Pontifice præsentem, eoque absente, a dicto Cardinale Camerario, seu eo pariter absente, a Cardinale, ut præfertur, delegato impertiatur.

Quocirca Romanum Pontificem pro tempore existentem, Sacrumque nunc & pro tempore etiam existentem prædictæ Romanæ Ecclesiæ Cardinalium cœtum enixe obsecramus, ut in celebratione exequiarum Cardinalium in Curia decedentium, omnia & singula a Nobis per præfentes perpetuo statuta & decreta debite executioni demandari, eaque semper, & inviolabiliter servari studeant, qua de re minime dubitamus, sed certa spe in Domino confidimus, quod quisque Romanorum Pontificum Successorum nostrorum memor erit, se vicem gerere in terris Cælestis æternique Pontificis, qui in morte Lazari amici sui lacrymatus est adeo, ut mirarentur Judæi, & dicerent: *Ecce quomodo amabat eum*; ita & ipse exemplo Christi Domini eisdem Cardinales sibi Coadjutores a Domino datos in visceribus caritatis complectens, in eorum ab hac luce discessu, supremis paterni amoris officiis, & solemni Pontificalium exequiarum, ac propitiatorii Missæ Sacrificii cele-

D d d

bra-

bratione, aliisque piarum orationum subsidiis prosequi libenter curabit, ut & defunctorum animæ ob eorum Apostolatus munus laudabiliter expletum una cum Beatis Apostolis manere mereantur in Cælis, & erga sublimem Cardinalatus dignitatem ex solempni celebratione huiusmodi populorum obsequium, & veneratio in terris augeatur.

Nulli ergo omnino hominum liceat hanc paginam nostri decreti, constitutionis, declarationis, exhortationis, & voluntatis infringere, vel ei ausu temerario contraire. Si quis autem hoc attentare præsumperit, indignationem Omnipotentis Dei, ac Beatorum Petri & Pauli Apostolorum ejus se noverit incursurum. Datum Romæ apud Sanctam Mariam Majorem nono Calendas Decembris anno Incarnationis Dominicæ millesimo septingentesimo quadragesimo primo Pontificatus Nostri Anno Secundo.

III. Nunc ut explicemus reliqua, quæ in hoc nostro §. statuuntur, mandat hic quidem, ut supra lectum sit *pannus aureus cum insignibus defuncti, & duo cervicalia nigra; ad caput lecti, & ad pedes duo Pilei rubri ipsius defuncti*. Fuit is antiquus mos, cujus etiam testem habemus Petrum Amelium in Romano xv. Ordine, Cap. clxvi. ubi sic inter alia inquit: *Item in feretro debet esse magnum, & longum pulvinar subtus caput Cardinalis de nigro; item unum aliud ad pedes, super quo stant duo Pilei Cardinalis*. Jam non duo, sed unus tantum Pileus poni hodie solet ad pedes Cardinalis defuncti, qui deinde ex antiquo instituto in eam appendi solet Ecclesia, vel Capella, ubi sepultus fuit, uti videre est passim in Ecclesiis Urbis. Porro quod fuit antiqui ritus, servatur hodieque in exequiis Papæ, ad cujus pedes duo Pilei ponuntur, uti non semel vidimus nos, &

quidem primum in funere Benedicti XIII. & deinde in Clementis XII. exequiis, ab initio enim Pontificatus ipsius Benedicti usque ad præsentem diem Romæ commorati sumus.

IV. Ex præscripto quoque nostri §. in Cardinalium exequiis, *hinc inde adstant duo Parasfrenarii mortui Cardinalis, qui cum duobus flabellis factis cum insignibus Cardinalis ex serico nigro videantur abigere muscas, etiamsi sit tempus hyemale, qui sedulo flabella placide movent*. Est & hic antiquus ritus servatus in Papæ funere, in quo tamen non duo, sed quatuor adstare soliti erant ad Castrum doloris, tenentes flabella, muscasque expellentes, quæ etiam aliquando non aderant. Meminit fane ejus cæremonix Aeneas Sylvius in sua ad Fridericum III. oratione, ubi etiam cæremoniam ipsam dedit: *Media hyeme sub Pyra, quam doloris Castrum appellant, quatuor lugubribus induti vestibus flabellis, quæ non adsunt, muscas expellunt, ventulumque non præsentis Pontifici faciunt &c.* Carpit mox ipsam cæremoniam, sed addit tamen, *concedendum esse aliquid consuetudini*. Sane Joannes Mabillonius in suo Itinere Italico ad annum MDCLXXXVI. non sine admiratione refert pag. 133. quod, *cum Basilicam, quæ Aracali vocatur, adiisset, exposito illic magna cum pompa Cardinalis Savelli recens mortui cadavere, quatuor famuli (non duo, ut præscribit noster §.) in quatuor funeris angulis amplissima flabella movebant ad abigendas muscas, quæ per id tempus non admodum infesta erant. Sed ita præcipiunt cæremoniarum leges; & ita quidem, nam, ut inquit hic noster §. adhibenda sunt ipsa flabella in Cardinalium funere cum eorum insignibus, & ita placide movenda, ut videantur abigere muscas, etiamsi sit tempus hyemale*.

§. VI.

De ritu, & Officio Absolutionis circa Castrum doloris.

Illo finito, iterum accenduntur candelæ, & quatuor alii Cardinales, si mortuus erat Episcopus Cardinalis, Episcopi Cardinales, si tot numero fuerint præsentés, & si deficiat numerus, Præsbyteri suppleant. Si vero mortuus erat Presbyter, sive Diaconus, quatuor Presbyteri Cardinales capiunt Superpelliceum, Amictum, Stolum, Pluviale nigrum, & Mitram albam in capite, & simul cum Celebrante vadunt ad Castrum doloris hoc ordine. Primo procedunt duo ex Capellanis Celebrantis cum Superpelliceis, unus defert thuribulum, & navicellam, alius vas aquæ benedictæ cum aspersorio; deinde duo alii cum candelabris, & luminaribus. Inde Subdiaconus paratus cum Cruce. Deinde duo Cardinales juniores parati; tum duo seniores parati; ultimo Cardinalis, qui celebravit, & post eum Diaconus paratus, & alii sui Capellani cum Superpelliceis. Unusquisque Cardinalis habet secum unum Capellanium cum Superpelliceo, qui servit ei de Mitra, & aliquos Scutiferos, qui ei assistunt, quorum unus defert cereum accensum. Cum pervenerint ad Castrum doloris, Subdiaconus cum Cruce, & Ceroferariis ponit se ad pedes lecti in medio, extra Castrum tamen. Post eum sunt Cantores. Ad Caput lecti ponitur in medio contra Crucem Faldistorium Celebrantis, super quod ille sedet, & apud eum stat Diaconus Evangelii, qui defert incensum, & aquam benedictam, & alii Capellani; senior Cardinalis ponit se juxta columnam ad humerum dextrum, secundus in dignitate juxta columnam ad pedem sinistram, tertius Cardinalis ad humerum sinistram, ultimus ad pedem dextrum, & ibi aliquantulum quiescunt. Caput lecti figitur proximior pars Altari, & pedes pars propinquior portæ Ecclesiæ. Post morulam surgunt omnes deposita Mitra, & tenente Librum uno ex Capellanis, Celebrans cum Diacono incipit Absolutionem:

nem: Non intres in iudicium cum servo tuo Domine, quia nullus apud te justificabitur homo, nisi per te omnium peccatorum ei tribuatur remissio: non cum ergo quaesumus Domine tua judicialis sententia premat, quem tibi vera supplicatio Fidei Christianae commendet; sed gratia tua illi succurrente, mereatur iudicium evadere ultionis aeternae, qui dum viveret, insignitus est signaculo Sanctae Trinitatis. Per Christum Dominum nostrum. Amen.

Finita Oratione, Cardinales omnes sedent cum Mitra, & Cantores cantant primum Responsorium: *Subvenite &c.* Antequam finiatur Responsorium, Diaconus cum deferentibus incensum & aquam benedictam accedit ad seniore Cardinalem ad humerum dextrum sedentem; & cum cantatur, *Requiem aeternam*, Clericus Cereemoniarum accipit thuribulum, & navicellam, & accedit ad ipsum seniore Cardinalem, & offert thuribulum, Diacono vero navicellam. Cardinalis imponit incensum in thuribulo dicens: *Ab illo benedicaris &c.* Deinde cum Cantores cantant *Kyrie eleison*, surgunt omnes sine Mitra, & ipse primus Cardinalis dicit voce competenti: *Pater noster*, & mox capit aspersorium de manu Diaconi, & circuit lectum, aspergens illum aqua benedicta. Diaconus interim elevat a manu dextra fimbriam Pluvialis. Cum vero Cardinalis transit ante alios Cardinales ibi astantes, facit unicuique reverentiam inclinando caput, & idem etiam facit Cruci; Diaconus vero, qui simul pergit, genuflectit. Facto circuitu, reddit aspersorium Diacono, & de ejus manu capit thuribulum, & simili modo incensat circum circa, inclinando se Cardinalibus, & Cruci. Ut autem complevit gyrum, reddit thuribulum Diacono, & revertitur ad locum suum. Diaconus quando dat aliquid Cardinali, vel recipit ab eo, osculatur ejus manum. Cardinalis stans in loco suo, voce competenti, tenente Librum ante ipsum Diacono, dicit: *Et ne nos inducas &c. R. Sed libera &c. V. A porta inferi. R. Erue Domine animam ejus. V. Requiescat in pace. R. Amen. V. Domine exaudi orationem meam. R. Et clamor meus ad te veniat. V. Dominus vobiscum. R. Et cum spiritu tuo.*

Oremus.

Deus, cui omnia vivunt, & cui non pereunt moriendo corpora nostra, sed mutantur in melius; te supplices deprecamur, ut suscipi jubeas animam famuli tui N. per manus Sanctorum Angelorum deducendam in sinum Amici tui Abrahamae Patriarchae, resuscitandum in novissimo judicii magni die; & quicquid vitiorum fallente diabolo contraxit, Tu pius & misericors abluas indulgendo. Per Christum Dominum nostrum. R. Amen.

Finita Oratione; Cardinales sedent, & Chorus cantat Responsorium: *Qui Lazarum resuscitasti a monumento fatidum, tu ei Domine dona requiem, & locum indulgentiae. V. Qui venturus es judicare vivos, & mortuos, & seculum per ignem. Tu ei Domine &c. Requiem aeternam &c. Tu ei &c. Kyrie eleison.* Diaconus interim cum portantibus incensum & aquam benedictam accedit ad secundum Cardinalem apud sinistram pedem; & cum dicitur, *Requiem*, imponitur incensum. Ad *Kyrie eleison* surgunt omnes; & deinde ipse secundus Cardinalis dicit: *Pater noster*, aspergit, & incensat, ut primus, & reversus ad locum suum dicit: *Et ne nos &c. R. Sed libera &c. V. A porta inferi. R. Erue Domine animam ejus. V. Requiescat in pace. R. Amen. V. Domine exaudi orationem meam. R. Et clamor meus ad te veniat. V. Dominus vobiscum. R. Et cum spiritu tuo.* Oremus.

Fac quaesumus Domine hanc cum famulo tuo misericordiam, ut facturum suorum in paenis non recipiat vicem, qui tuam in votis tenuit voluntatem; ut sicut hic cum vera Fides junxit Fidelium turmis, ita eum illic associet Angelicis Choris. Per Christum Dominum nostrum. R. Amen.

Finita Oratione, sedent Cardinales cum Mitra, & Chorus cantat Responsorium: *Domine quando veneris judicare terram, ubi me abscondam a vultu irae tuae? Quia peccavi nimis in vita mea. V. Commissa mea paveco, & ante te erubesco, dum veneris judicare, noli me condemnare. Quia peccavi &c. Requiem &c. Quia peccavi &c. Kyrie eleison, ter.* Interim Diaconus cum sociis accedit ad tertium Cardinalem apud sinistram humerum sedentem, & in tempore ponitur incensum, & ad *Kyrie eleison* omnes surgunt, ut supra, & ipse tertius Cardinalis dicit: *Pater noster*, aspergit, & incensat, ut alii, & reversus ad locum suum dicit: *Et ne nos inducas &c. R. Sed libera &c. V. A porta inferi. R. Erue Domine animam ejus. V. Requiescat in pace. R. Amen. V. Domine exaudi &c. R. Et clamor &c. V. Dominus vobiscum. R. Et cum spiritu tuo.* Oremus.

Inclina Domine aurem tuam ad preces nostras, quibus misericordiam tuam supplices

deprecamur, ut animam famuli tui N. quam de hoc seculo migrare iussisti, in pacis ac lucis regione constituas, & Sanctorum tuorum jubeas esse consortem. Per Christum Dominum nostrum. Amen.

Oratione completa, sedent Cardinales. Chorus cantat Responsorium: *Ne recorderis Domine peccata mea, dum veneris judicare seculum per ignem. V. Dirige Domine Deus meus in conspectu tuo viam meam. Dum veneris &c. Requiem &c. Dum veneris &c. Kyrie eleison. Christe. Kyrie.* Interim Diaconus cum sociis accedit ad ultimum Cardinalem apud dextrum pedem, & in tempore imponitur incensum. Surgunt ad *Kyrie eleison*; & ipse Cardinalis quartus dicit: *Et ne nos &c. R. Sed libera &c. V. A porta inferi. R. Erue Domine animam ejus. V. Requiescat in pace. R. Amen. V. Dominus vobiscum. R. Et cum spiritu tuo.*

Oremus.

Absolve quesumus Domine animam famuli tui N. ab omni vinculo delictorum, ut in resurrectionis gloria inter Sanctos, & electos tuos resuscitatus respiret. Per Christum Dominum nostrum.

His finitis, sedent, & Chorus cantat: *Libera me Domine de morte æterna in die illa tremenda, quando Cæli movendi sunt & terra: dum veneris judicare seculum per ignem. V. Tremens factus sum ego, & timeo, dum discussio venerit, atque ventura ira. Quæ Cæli &c. V. Dies illa dies iræ, calamitatis, & miseriæ, dies magna, & amara valde. Dum veneris &c. Requiem æternam &c. Libera &c. Kyrie eleison, Christe eleison, Kyrie eleison.* Interim Diaconus cum Sociis accedit ad Cardinalem, qui celebravit, sedentem ad caput, & in tempore imponitur incensum. Ad *Kyrie eleison* surgunt Cardinales sine Mitra, & qui celebravit, dicit: *Pater noster*, aspergit, & incensat, ut fecerunt alii quatuor, & reversus ad locum suum, stans dicit: *Ex ne nos &c. R. Sed libera &c. V. A porta inferi. R. Erue Domine animam ejus. V. Requiescat in pace. R. Amen. V. Dominus vobiscum. R. Et cum spiritu tuo.*

Oremus.

Absolve quesumus Domine animam famuli tui N. ut defunctus seculo, tibi vivat, & quæ per fragilitatem carnis humana conversatione commisit, tu venia misericordissimæ pietatis tuæ absterge. Per Christum Dominum nostrum. R. Amen. Deinde dicit idem Cardinalis: *Requiem æternam dona ei Domine. R. Ex lux perpetua luceat ei.* Et in fine duo Cantores dicunt: *Requiescat in pace. R. Amen.* His completis, omnes ordine, quo venerant, revertantur ad loca, ubi acceperunt paramenta, & exuant sacras vestes. Alii autem Cardinales, & Prælati, dum hæc fiunt circa Castrum doloris, remanent sedentes in locis suis, expectantes finem. Demum omnes discedunt ad suas habitationes.

COMMENTARIUS.

I. **C**elebrata Missa, & quidem per unum Cardinalem, ut ait Romanus Ordo xv. Cap. clxvi. factoque Sermonem, qui, ut idem Ordo inquit, *debet fieri post Missam, & ante Absolutionem*; ex præscripto citati Ordinis, cui & alii antiqui Cæremoniales Libri concinunt, *quatuor Cardinales Presbyteri antiquiores induunt se super Alba, Amictu, albo Cinctorio, Orarium, & Pluviale cum anulis, & sine Chirothecis, & Sandaliis.* Pergit idem Ordo, ritumque absolutionis fieri olim solitum in funere Cardinalis hunc in modum refert: *Tunc ille, qui dixit Missam, antecedit, & alii tres sequuntur; vadunt prope Castrum doloris, & Cantores cantant: Libera me Domine. Quo cantato, qui dixit Missam, aspergit Corpus, vel Feretrum, aqua benedicta, & thurificat, dicendo: Pater noster &c. & facit primam Absolutionem; deinde alii tres eodem modo juxta ordinem suum, prout in Libro continetur. Cardinales vero alii, & totus Clerus remanet in Choro.*

II. Sed audiamus quid mox de ipso Absolutionis officio, & ritu idem Romanus Ordo ci-

tato loco subjicit: *Finita Missa, ait, qui facit Officium, deposita Planeta, cum Ministris, cum thuribulo, & aqua benedicta accedat prope caput defuncti extra Castrum, & absolute incipit, Mitra deposita: Non iutres in judicium &c. Oratione facta, vel finita, Cantores cantant; Subvenite Sancti &c. Quo cantato, dicit: Kyrie eleison, & thurificat, & aspergit funus aqua benedicta, prout in Oratorio continetur. Tunc adsunt quatuor Presbyteri Cardinales induti cum Pluvialibus, & Mitris albis, & Stolis; & cantato, Ne recorderis, antiquior dicit Orationem, quam sibi placet post Pater noster, ut supra, & thurificat &c. Postea cantatur: Memento mei Deus; quo dicto, alius Cardinalis, qui est penultimus, eodem modo thurificat, & dicit aliam orationem. Consequenter immediate alius Cardinalis, qui stat ab alio latere, qui secundo loco dicit Orationem, similiter thurificat, prout alii fecerunt, & dixerunt, & orationem, dicit, quam sibi placet. Deinde ultimus Cardinalis similiter facit; quibus finitis, cantatur: Libera me Domine; quo cantato, ille, qui facit Officium, similiter, ut prius*

thurificat, & dicit ultimam orationem, scilicet: Absolve &c. & tunc quilibet recedit; & fit Sermo. Ita laudatus Ordo Romanus, qui paulo superius de Sermonibus habendo in exequiis Cardinalium, tradit, fieri consuevisse ipsum Sermonem, vel ante Absolutionem, vel Absolutione facta, imo alicubi post Evangelium.

III. De ipsa Absolutione ad Castrum doloris fieri a quatuor Sacerdotibus paratis solita, jam diximus nos Tomo II. Cæremonialis Episcoporum, sed non putamus hoc loco omittendum exemplum ejus Absolutionis factæ anno MCDXXXIV. in funere Cardinalis Novariensis juxta relationem Petri Amelii in citato Romano Ordine xv. Cap. CLXVI. ubi ita inquit: Anno MCDXXXIII. in exequiis Domini Cardinalis Novariensis celebravit Missam Dominus Cardinalis Sancti Marci, & dicta Missa, immediate fuit Sermo. Facto Sermonem Dominus Cardinalis de Urfinis, Dominus Cardinalis Sancti Marcelli, Dominus Venetiarum, Dominus Cardinalis Sancti Marci, induti Pluvialibus venerunt ad feretrum; & primo antecedeabant duo Presbyteri Cardinales, videlicet, Dominus Sancti Marcelli, & Dominus Venetiarum; deinde Dominus de Urfinis, & Dominus Sancti Marci Presbyter Cardinalis, qui celebraverat illo mane; & duo ipsorum steterunt ad unum latum feretri, & duo in altero latere. Primam autem Orationem dixit Dominus Sancti Marci, qui celebraverat, videlicet: *Non intres in judicio*; & Cantores, dicta illa Oratione, dixerunt cantando: *Subvenite*; & dicto per eos *Kyrie eleison*, Dominus de Urfinis dixit: *Pater noster*; & asperxit aquam benedictam, & incensavit, &

dixit secundam Orationem: *Deus, cui omnia vivunt*; & dicta oratione, Cantores dixerunt: *Ne recorderis*; & dicto *Kyrie eleison*, Dominus Cardinalis Sancti Marcelli ab alio latere asperxit, & incensavit, & dixit Orationem tertiam, videlicet: *Inclina Domine*, quæ oratio est in Missali; & dicta Oratione, Cantores dixerunt: *Qui Lazarum*, idem Dominus Cardinalis Sancti Marci, qui celebraverat Missam, qui erat in alio latere, ut supra, loco unius Presbyteri Cardinalis, qui deficiebat, asperxit, & incensavit, & dixit Orationem: *Fac quesumus Domine hanc cum servo &c.* qua Oratione dicta, Cantores dixerunt: *Memento mei Deus*; & dicto *Kyrie eleison*, Dominus Cardinalis Venetiarum dixit, *Pater noster*, & asperxit, & incensavit, & dixit Orationem: *Absolve quesumus Domine animam famuli tui*; quæ Oratio est in Missali; qua Oratione dicta, Cantores dixerunt: *Libera me Domine de morte &c.* & dicto *Kyrie eleison*, non fuit incensatum; sed Dominus Cardinalis Sancti Marci in fine dixit Orationem, videlicet: *Absolve*, quæ oratio est in Officio Mortuorum.

IV. Hactenus Romanus Ordo xv. aliaque multa afferri possent exempla exequiarum tum veterum, tum recentiorum S. R. E. Cardinalium, quæ passim legi in mss. Diariis Apostolicorum Cæremoniariarum, quæ etiam aliqua notatu digna continent, sed ne gravemur majori impensa in editione hujus Operis, consulto illa, & alia multa omittimus; tum præsertim quod de exequiis defunctorum, & ritibus in iis servatis jam aliis locis dixerimus, potissimum vero in Commentariis ad Cæremoniale.

§. VII.

De Novendialibus Cardinali defuncto celebrandis, & quibus ritibus.

In prima, & nona die, quæ est ultima, in quibus sunt eadem cæremoniæ, nisi quod in ultima non fit Sermo, consueverunt legi in Ecclesia, ubi sunt exequiæ, centum, quinquaginta Missæ, & datur pro eleemosyna cuique celebranti unus grossus Papalis, & duæ parvæ candelæ. Aliis septem diebus intra Novenam dicuntur centum Missæ quolibet die; & hora competenti cantatur Missa pro defunctis per aliquem Episcopum, & familia defuncti adest sedens in loco suo. Intorticia non accenduntur circa Ecclesiam, sed super scamnis a lateribus lecti, & novem supra Castrum doloris sine aliis candelis. Cardinales non veniunt; distribuitur cera Celebranti, & Ministris, Clericis, sive Religiosis illius Ecclesiæ, familiæ defuncti, & aliis, qui adsunt. Apud sepulchrum vero, ubi jacet Corpus, quotidie ponuntur duo intorticia, quæ ardent, dum Divina celebrantur. Finita Missa inter Novenam, Prælatus, qui celebrabit, deponit Planetam, & accipit Pluviale, & Mitram, & præcedente Subdiacono cum Cruce, Ceroferariis, incenso, & aqua benedicta, vadit ad Castrum doloris. Eum sequuntur Diaconus, & alii Ministri Altaris; Religiosi autem, sive Clerici Ecclesiæ disponunt se circa Castrum. Subdiaconus cum Cruce, & Ceroferariis ad pedes, Prælatus vero stans ad caput in medio sine Mitra absolute incipit: *Non intres in judicium*, ut supra; & in fine Chorus cantat primum Responsorium; & post *Kyrie eleison*, Prælatus sine Mitra dicit: *Pater noster*; aspergit, & incensat per circuitum, ut supra diximus de Cardinalibus, & deinde stans in loco suo dicit: *Et ne nos inducas &c.* cum aliis versiculis, & prima oratione, in fine cujus dicit: *Requiem æternam dona ei Domine. R. Et lux perpetua luceat ei.* Et Chorus dicit: *Requiescat in pace.* Et sic revertitur ad se exuendum. In secunda die dicitur secundum Responsorium, & secunda oratio, & sic deinceps, & cum finierint, reincipitur a primo. In nona die fit omnino, ut in prima, nisi quod non fit Sermo. Cantatur Missa per Cardinalem, & per Cardinales fit Absolutio apud Castrum doloris. A die vero, quo sepul.

pultum est corpus, usquequo incipiantur exequiæ, consueverunt in ea Ecclesia celebrari aliquot Missæ pro defunctis, non tamen per Prælatos, & fiunt ad partem ibi aliquot eleemosyne propter hoc.

C O M M E N T A R I U S.

I. **Q**uod in hoc §. edicitur, fuisse quidem videtur ritus paulo ante nostri hujus Cæremonialis editionem institutus, nulla enim de Novendialibus mentio in exequiis Cardinalium celebrandis in Romano Ordine xv. Petri Amelii, Cap. clxvi. ubi de ipsis Cardinalium exequiis agit. Mentionem certe ejus moris facit in suo Testamento Jacobus Papiensis, quem inter Cardinales retulit Pius Papa II. anno mcdlxi. Invaluit autem non

multo post Augustinum Patricium Auctorem nostri hujus Cæremonialis mos, uti ipsæ Cardinalium exequiæ una tantum die absolvantur, isque est hodiernus ritus, ad evitandam forte ingentem impensam, præsertim ceræ, quæ in memoratis Novendialibus solita erit distribui, sive, ut ajunt Cæremoniales antiqui Codices, & mss. Apostolicorum Cæremoniariorum Diaria dispergi, & rapi. Queritur de hac rapina Grafus passim in suo ms. Diario.

§. VIII.

De muneranda defuncti Cardinalis familia.

Familia vero defuncti solet per quadraginta dies sustentari in ejus domo, & tandem unicuique redditur aliquod præmium, vel secundum taxationem à Domino factam, vel, ut exequutores censuerint, habita ratione servitii, temporis, & qualitatis.

C O M M E N T A R I U S.

I. **R**efert Durandus in suo Rationali divinarum Officiorum Libro vi. Capite xxxv. quosdam ad tertiam diem, alios ad septimam, nonnullos ad nonam, rursus alios ad trigessimam, alios ad quadragesimam, quosdam ad quinquagesimam, non paucos ad sexagesimam, & plures ad centesimam diem funeris solemnia protelasse. Verum in Cardinalibus licet Novendialia, de quibus superius dictum fuit, in desuetudinem abierint, unoque die Cardinalis defuncti exequiæ solennes celebrentur, viget tamen adhuc ea consuetudo munerandæ familiæ Cardinalis defuncti. Sane solitum olim fuit distribui pannus iis, qui ipsi Cardinali inservierant, ejusque moris meminit Jacobus Cardinalis Papiensis sic in suo Testamento inter alia inquires: *Solent mortuis Cardinalibus familiares non veri ad accipiendas familiarium verorum vestes accurrere, instare, ut dentur; si non dantur, indignari, ac lamentari. Ut error non sit, eos vestiri volo, quos in notula manu mea subscripta, vel annulo meo signata, præsentique testamento inclusa invenientur apppositi, & Capellani quatuor canna, scutiferis, inter quos Parafrenarios, & primum coquum, & cellarium, & dispensatorem nomino, primæ sortis tres, reliquis dimidiam cannam minus, sed secundæ sortis jubeo dari; ita tamen, ut ad orationem omnes convenient, & pro me deprecantur.*

II. Omissis aliis, quæ dici ad hunc §. possent, operæ pretium puto describere hoc loco novam BENEDICTI XIV. regnantis Pontificis Maximi Constitutionem, quæ incipit, *In eminenti*, editam die xv. Julii anni mdccl. ubi proponitur ratio secernendi honorarios a veris Familiaribus S. R. E. Cardinalium, & Prælatorum Romanæ Curie. Multa enim in ipsa Constitutione decernit Sapientissimus Pontifex, quibus

hic noster §. egregie illustratur. Certe multum debet Christiana, & Litteraria Respublica ipsi Pontifici, quippe qui, & sacros Ritus, & Questiones Theologicas, & controversias Juris, & siquid est obscurum, intricatumque, stupenda eruditione, & mirabili perspicuitate explicavit, atque dilucidavit. Legenda aurea ipsius Opera iterum atque iterum typis commissa, in quibus res omnes miro ordine digestas invenies, & sua ab origine repetitas. Nota hæc omnibus sunt, constantque vel ex memorata Constitutione, *In eminenti*, quæ est hujusmodi.

B E N E D I C T U S E P I S C O P U S

Servus Servorum Dei.

Ad perpetuam rei memoriam.

In eminenti supremi Principatus celsitudine, Dei voluntate, constitutos, ea nos inter alias cura sollicitat, ut forensium litium, & controversiarum germina, quantum fas est, succidamus, earumque potissimum, quæ nec sine bonæ fidei detrimento intentari, nec sine injustæ vexationis damno, & immeriti dispendii periculo sustineri, neque demum sine publicæ tranquillitatis perturbatione agitari consueverunt.

Neminem latet, antiquam esse in hac Romana Urbe, & Curia consuetudinem, ut plures pluresque inter Venerabilium Fratrum Nostrorum S. R. E. Cardinalium, nec non ipsius Curie Prælatorum Familiares quoquo modo adnumerari contendant, eisque operam suam, atque servitia, vel tamquam Aulici nobiles, aut studiorum Adjutores, sive Familiæ medici, aut Causarum, quas forte in Tribunalibus pendentes habeant, Sollicitatores, Patroni, Advocati, vel, si ab Urbe recedant, tamquam negociorum gestores, sive ad alia Officia eorum Personis, ac Dignitatibus congruentia, sponte profiteantur, & exhibeant, nullius quidem stipendii, aut mercedis conditione, sed eorum favo-

favoris, & gratiæ sibi unice, ut ajunt, proposito præmio, quod tamen satis apparet a spe aliqujus utilitatis ex eorundem Patrocinio percipiendæ sejunctum non esse.

Et quidem pluribus sæpe contingit, ut hujusmodi spei fructus optatos consequantur, pluribus etiam contraria sors cadit. Verum tam ex his, quam ex illis non pauci deinde inveniuntur, qui extincto Cardinale, vel Prælato, cui supradictum servitium præstiterunt, non dubitant ab hæredibus complurium annorum, cum salaria petere, atque, etiam allatis probationibus super hujusmodi servitio defunctis præstito, hæredes ipsos in jus, & judicium vocare; unde hi, quum plerumque ignari sint conditionum, quibus auctores sui cum illis convenerant, ancipitis judicii difficultatibus incommodisque vexantur; quemadmodum Nobis, in Romana Curia ab ineunte ætate versatis, & in hujus quoque generis litibus non semel Judicis officio functis, certo deprehendere licuit.

Et illorum quidem actioni Romanæ Urbis consuetudo adstipulatur, secundum quam salarium, licet non expresse conventum, cuilibet famulatum impendenti debetur. Quod si hæredes a prædictis conventi, ea exceptione se tueantur, quod & auctorum suorum mens fuerit, & adversarii ipsi in animo habuerint, ab hujusmodi consuetudine in eorum casu discedere; hinc statim ingredi necesse est immensam, implicitamque conjecturarum sylvam; quarum plures a dictis hæredibus colliguntur, ut ostendant, tum auctorum suorum, tum eorum qui ipsis famulati sunt, mutuum consensum fuisse, ut a præfata consuetudine recederetur. Contra vero plures aliæ afferuntur ab iis, qui præstiti servitii mercedem postulant, ut Judici persuadeant, mutuum hujusmodi consensum nunquam inter eos, eorumque defunctos Patronos intercessisse; atque ita multiplices diuturnæque lites in Tribunalibus agitantur, diversoque exitu finiuntur, quemadmodum fert earum controversiarum natura, quarum decisio ex conjecturis potissimum pendet; dum ex his aliæ unius Judicis intellectui magis validæ apparent, alteri vero aliæ majoris momenti videntur.

Ad hæc incommoda præcavenda, quibus civilis societas non parum perturbatur, promptum, ac tutum remedium id esset, ut præfati Cardinales, atque Prælati, nullius opera, servitioque ullo modo uterentur, præterquam eorum, quos justis mensuris, diurnisque stipendiis remunerari statuerunt, exclusis aliis, qui licet ipsis gratuita obsequia, ac servitia liberaliter polliceantur, nihilominus eos tam in vita, quam in morte, ac etiam post mortem multis modis vexare non omittunt. Nam, & viventibus importuni sunt, dum novas quotidie rationes comminiscuntur, quibus præstitam illis operam, per eorum patrocinii favorem, compensari postulent; & morientibus molesti esse non verentur, tam instanter, quam audacter, ut aliquando Nobismetipsis videre contigit, petentes, Ecclesiasticarum Pensionum, si quas iidem Cardinales, atque Prælati transferre possunt, participes fieri; & iis defunctis, plura controversiarum capita, etiam judicialiter adversus hæredes, & reliquam familiam excitare solent, non solum pro consequendis retroacti temporis salariis, de quibus supra diximus, sed etiam

pro consueto quadraginta dierum proxime decurrendorum stipendio, pro vestibus ad luctum comparandis, ac pro virili portione capienda cum aliis Familiaribus, quibus Cardinales prædicti certam pecuniarum summam, pro rata, & pro qualitate servitii præstiti, inter eos dividendam, legare consueverunt. Sed quoniam nimis difficile fore cognoscimus eorum obsequia penitus rejicere, qui Procerum hujusmodi favorem, & gratiam, cum eorum Familiaritatis nomine, ambiunt; idcirco aliam rationem proponere decrevimus, qua servata, æque certum publicæ utilitatis, & quietis fructum feliciter obventurum non dubitamus.

Quum scilicet ab antiquo tempore tam Cardinalibus, quam etiam Prælatibus in more positum fuerit, Familiarium suorum nomina Indiculo quodam, quem *Rotulum* vocant, propria ipsorum manu subscripto comprehendere; id etiam in posterum ab ipsis servetur; vel si ab eorum aliquo prætermisum fuerit, quamprimum fiat; & hujusmodi Rotulo inscribantur omnes, & singuli, quos propriis servitiis additos retinent cum præstatione consueti salarii, illius nimirum, quod vel Romanæ Aulæ stylus fert, vel singulorum mos, eorumve Domus consuetudo definiit. Equum est autem, ut salarium hujusmodi debitis temporibus unicuique Familiari solvatur. Quod si quis ex descriptis in prædicto Rotulo, vivente Domino, stipendia non acceperit, integrum ipsi erit post illius mortem actionem contra ejus hæreditatem promovere, dummodo intra annum a die obitus ipsius Domini computandum, eam judicialiter intentet; sciatque, se nonnisi duorum annorum stipendia, defuncto Domino, petere posse; quæ de re extat felicitis recordationis Prædecessoris Nostri Pauli Papæ III. Constitutio, quæ incipit *Sicut Nobis*, eaque jam pridem a recolendæ memoriæ Sancto Pio Papa V. in sua, cujus initium est, *Cupientes*, innovata, & confirmata; quam Nos ipsi, præsentium tenore, & pari Apostolica auctoritate similiter confirmamus, & innovamus. Præterea iisdem Familiaribus sub consueti salarii conditione in Familiam adscitis, & in Rotulo præfato descriptis, reliqua omnia iisdem competentia jura salva & integra esse volumus, tam pro vestibus atris, certique temporis stipendio post Dominorum mortem fruendo, quam pro rata portione capienda inter alios Familiares certæ pecuniarum summæ legato conjunctim remuneratos.

Hi autem qui non mercede conducti, sed honoris tantum causa, Cardinalibus, atque Prælatibus servitia præstare consentiunt, vel in eodem Rotulo, cum expressa honorariorum denominatione describantur, vel in alium Indicem a Patronis similiter subscribendum seorsim referantur; sciantque, se cum hujusmodi distinctione descriptos, tam de jure, quam hujus Nostræ Constitutionis vigore, nihil in posterum ex defuncti Patroni bonis petere, aut consequi posse, sive per viam actionis, sive compensationis, aut retentionis, quantumvis, diuturnæ magnique momenti servitia eidem præstiterint, & quamvis ille nihil vivens in eorum utilitatem egisset, vel etiam agendo, nihil forte pro ipsis obtinuisset. Præterea nullam iisdem competere volumus actionem pro quadragenorum dierum, ut ajunt, stipendio, sive pro atris vestibus,

aut

aut pro consequenda portione cujusque summa inter alios Familiares mercede conductos, ut supra, dividendæ; sed præter honorem, quem ex defuncti familiaritate consequuti sunt, aliasque utilitates, si quas illius gratia, & auctoritate jam perceperunt, nil aliud ipsis sperandum relinquimus, quam quod vel Defunctus ipse, grati animi ergo, eisdem nominatim testamento legaverit; vel Patroni hæredes, sine præjudicio aliorum Familiarum, qui consueti Salarii conditione illi ministrarunt, ac sine ulla diminutione earum rerum, quas his præservatas fore decrevimus, eisdem Honorariis sponte largiri voluerint.

Videant itaque quicumque Magnatum prædictorum favorem, gratuitam operam ipsis exhibendo, aucupantur, quæ lege, & conditione deinceps in eorundem honorariorum Familiarum numerum cooptabuntur, suasque rationes subducant, perpensa præsentis Constitutionis dispositione; quam quidem ab ipsius publicationis die vim legis habere statuimus; sed nullo modo extendi volumus ad casus antea definitos sive in favorem Familiarum honorariorum hujusmodi, sive adversus eos, circa quos præcedentia judicata omnino attendi, & servari debere decernimus.

Cæterum nos prædictis Venerabilibus Fratribus Nostri S. R. E. Cardinalibus, aliisque præmissis, hujusmodi consilium proponimus, tamquam æquum, & ad eorum utilitatem, & quietem, Nostro, aliorumque in rebus agendis expertorum Virorum judicio, satis efficax, eadem prorsus ratione, qua Justinianus Imperator Defunctorum hæredibus suavit, ut Inventarium bonorum hæreditariorum conficerent, ne sua ipsorum propria bona creditoribus defuncti, vel Legatariis, aut ulterioribus vocatis obnoxia relinquerent; eodemque pacto, quo Episcopis ad Ecclesiarum regimen proficiscentibus utile consilium datur, ut per Inventarii similis confessionem, res suas, quas Domo secum deferunt, ab aliis secernant, quas deinceps acquisituri sunt, quasque, tamquam ex Ecclesiæ redditibus, & proventibus comparatas, sub lege Spolii post eorum mortem casuras non ignorant,

Quod si ex præmissis aliqui novum hoc Rotuli Familiarum sisthema amplecti noluerint, non sane Nobis in animo est illos ad id compellere. Verum eos admonitos volumus, quod, non servata per eos præsentis Constitutionis lege, eorum hæredes ejusdem præsentis Constitutionis beneficio minime juvabuntur, sed omnibus litium incommodis, & controversiarum ambiguitatibus expositi remanebunt, quas per præsentis de medio tollere ac remove Nobis propositum fuit; non secus ac hæredes illi, qui Inventarium rite conficere negligunt, actionum confusio subjecti remanent, ac propriorum quoque bonorum diminutionem pati periclitantur; iique Episcopi, qui omittunt descriptionem facere earum rerum, quas secum ad Ecclesias afferunt, has ipsas deinde Spoliorum Collectoribus cum aliis in unum redigendas plerumque relinquunt.

Denique has ipsas præsentis Litteras perpetuæ legis vim obtinere decernimus, ac secundum eas, & non aliter, in præmissis, per quoscunque Judices Ordinarios, & Delegatos, etiam Causarum Palatii Apostolici Auditores, in posterum judicari & definiri debere; irritum quoque & inane, si secus super his a quoquam quavis auctoritate scienter, vel ignoranter contigerit attentari.

Non obstantibus præmissis Pauli III. & Pii V. aliisque Apostolicis Constitutionibus, & Ordinationibus, nec non dictæ Almæ Urbis Statutis, Usibus, & Consuetudinibus etiam immemorabilibus, aliisque contrariis quibuscunque.

Nulli ergo omnino Hominum liceat hanc paginam nostræ ordinationis, definitionis, confirmationis, innovationis, Statuti, Decreti, & voluntatis infringere, vel ei ausu temerario contraire. Si quis autem hoc attentare præsumperit, indignationem Omnipotentis Dei, ac B. Petri & Pauli Apostolorum ejus se noverit incursum.

Datum Romæ apud S. Mariam Majorem Anno Incarnationis Dominicæ Millesimo septingentesimo quinquagesimo, Idibus Julii, Pontificatus Nostri Anno Decimo.

Atque hæc satis sint ad nostri §. eruditionem.

C A P U T II.

De agrotatione, morte, & exequiis Romani Pontificis.

§. I.

De Sacramentis excipiendis, & de concione habenda ad Cardinales.

Romanus Pontifex etsi mortales omnes dignitate, & auctoritate præcellit, omniaque in terris ligare, & solvere queat, fati tamen extremam necessitatem solvere nequaquam potest. Non est discipulus supra Magistrum, nec Servus major Domino suo. Filio suo non pepercit Deus, quem mori voluit, ut hominem a perpetua morte liberaret; utque omnes agnoscerent, neminem a corporali morte omnino esse immunitem. Cogitet Summus Pontifex, etsi omnium sit maximus, se tamen esse mortalem, & elogium illud, quod inter solemnities Coronationis suæ decantari solet, sedulo memoria repetat: *Pater Sancte, sic transit gloria Mundi. Omnis caro fenum, & omnis gloria ejus tanquam flos agri.* Sit igitur semper Pontifex paratus, ut bonus Pastor, solertissimus Vicarius, & diligentissimus villicus rationem reddere Domino suæ administrationis; & cupiens dissolvi, & esse cum Christo, cum Martino Turonensi

cla-

clamet: *Domine si adhuc populo tuo sum necessarius, non recuso laborem, fiat voluntas tua.* Curetque eo majori studio, quo ceteris omnibus præest, ut ultimum actum, quo solo coronari electi solent, cum laude perficiat. Quod si forte non agnosceret, dum ægrotat morbi periculum, Medici, qui illius curam gerunt, cum de ejus salute dubitare coeperint, prudentibus verbis eum admoneant, semotis arbitris, hortenturque ad ea peragenda, quæ ad animæ suæ salutem pertinent. Polliceantur, se omni studio curaturos quæ spectant ad corporis sanitatem; aperiant idem Confessori Pontificis, qui verbis apertioribus, secrete tamen, & cum summa reverentia, & charitate moneat Pontificem, in qua sit discrimine; hortetur, ut voluntati divinæ non invitus adhæreat; cogitat quem locum teneat; oportereque, ut alios Principes verbo, & exemplo ad viam salutis deducat. Pontifex sua sponte, quod melius erit, vel saltem his monitionibus excitatus, cum ultimum diem appropinquare cognoverit, primum peccata sua Confessori diligentissime confiteatur, petatque ab eo plenariam Indulgentiam. Deinde tempore congruo jubeat ad se vocari Prælatos domesticos, & principales Familiæ suæ, & præsentem Sacratissimo Christi Corpore, primum confiteatur, & Catholicam Fidem, quam affirmet, se semper inconcussæ, & firmiter tenuisse, & in ea velle vivere, & mori, cum Deo placuerit. Tum petat veniam ab omnibus, siquem forte injuste offenderit; largiatur eis aliquas gratias spirituales; roget, ut orent Deum pro anima sua, & petat a Sacrista, vel ab aliis Prælati, ut tunc Sacratissimum Viaticum recipiat, ut cum tempus eis videbitur, alia Ecclesiæ Sacramenta sibi administrent. Convocet post hæc, dum adhuc sensus integri sunt, Sacrum Cardinalium Senatum; profiteatur iterum Catholicam Fidem, petat veniam, si in sua administratione quempiam injuste offenderit. Roget, ut orent pro anima sua, commendet eis Ecclesiam Dei, & hortetur, ut in electione Successoris diligentes sint, & unanimes, & talem eligant, qui Christianos uberius, quam ipse paverit, qui pasci noverit; & si ei videbitur, nominet unum, vel plures, quos suo judicio magis idoneos arbitretur. Aperiat etiam eis debita, & credita, siqua sunt; & similiter scripturas, pecunias, & gemmas, ac pretiosa quæque manifestet. Condat testamentum suum, si vult, & eligat sepulturam. Demum commendet Senatui Familiam, & attinentes suos, & gratias spirituales, quas voluerint, eis largiatur, eosque cum sua benedictione dimittat. Hujusmodi ultimum cum Fratribus suis sermonem, ut audivimus, Nicolaus V. nostro tempore habuit, & quod ipsi vidimus, Pius II. Hic enim in Vigilia Assumptionis Beatæ Virginis, cum pridie de Sacramento Altaris communicatus fuisset, & cum domesticis, inter quos minimus eram, quæ superius convenire diximus, peregisset, Sacrum Collegium ad se post Vesperas convocari jussit, Patresque longo, & dulci sermone quamquam morti proximus, nam secunda noctis hora expiravit, alloquutus est. Vidimus Cardinales omnes abunde lacrymantes cubiculo languentis exire; & ultra supradicta, omni studio hortatus est Senatum, ut expeditionem contra Turcas, ob quam rem ipse Anconam se contulerat, prosequerentur.

COMMENTARIUS.

I. **Q**UOD in hoc §. edicitur, antiquum est institutum, quod ita enarrat Romanus Ordo xv. Auctore Amelio, Capite CXLIII. Sciendam est, quod iste modus consuevit observari in Romana Curia Romano Pontifice ægrotante. Medici, qui curam ejus habent, dum sciunt appropinquare mortem, & ipsum non posse evadere, tenentur sibi secrete dicere, quod ad omnem eventum cogitet de anima, primo de factis suis, & ipsi quantum poterunt, cogitabunt de sanitate corporis. Deinde tenentur secrete revelare Confessori suo, quatenus ipsum dirigat, ut cogitet de salute animæ suæ, exhortando, & monendo ipsum in generali, & in speciali, juxta scientiam, & discretionem Confessoris; maxime quomodo ipse est lumen totius universi, ideo debet dare exemplum omnibus Regibus, & Principibus, laicis, & Clericis, qui in infirmitatibus ad Deum recurrunt, & ordinant de conscientiis suis, ita ipse debet facere, qui est caput totius Christianita-

Bo. I.

tis, & quomodo tenetur confiteri, & recipere Corpus Dominicum, & petere Indulgentiam in mortis articulo, quam idem Confessor sibi dare debet; omnibus indulgere familiaribus, & eis dimittere male ablata, & furta, usque ad summam centum florenorum, prout Sanctitatis suæ placebit, sicut Dominus Gregorius Papa usque ad sexcentos Florenos dimisit.

II. Pergit Amelius, aliaque tradit, quibus noster hic §. concinit: Item debet omnibus familiaribus suis concedere Indulgentiam in mortis articulo super sigillo alicujus Prælati de domo sua. Demum debet idem Papa, vel Camerarius ejus convocare suos Cardinales ante mortem suam per duos, vel per tres dies antequam loquelam amittat, & in presentia ipsorum debet condere testamentum, & eligere sepulchrum. Item debet protestari, quomodo ipse moritur, & mori vult in unitate Fidei, & quomodo credit unam Ecclesiam Catholicam, & omnes articulos Fidei, pro quibus paratus est mori.

E e e

Item

Item quomodo non bene se gessit in regimine Papatus, & quod in nonnullis offendit, & ipsi Cardinales parcant sibi, & omnes, quos indelibe, vel injuste, siquos offendit. Item debet eis recommendare omnes suos familiares. Item debet eis revelare debita per eum contracta pro Ecclesia Dei, ut ejus Successor illis satisfaciat. Item etiam, qui sunt creditores, & quibus tenentur sibi, & Ecclesiæ Romanæ, & ubi sunt thesauri, jocalia, & bona sua, & Ecclesiæ. Item debet Cardinalibus aliquas gratias concedere in Foro conscientia. Item debet eis recommendare Ecclesiam, & quod provideant de bono Pastore in pace, & in tranquillitate, & quod si eis videretur bonum, talis, vel tales essent boni pro regimine juxta conscientiam suam. Ultimo dat eis benedictionem, & quod vadant in pace. Manu recentiori in hunc locum apud Mabillonium Tomo II. Musei Italici hæc in margine adscripta leguntur: *Fecit Papa Nicolaus V. ita quod omnes Cardinales exiverunt lacrimantes*. Id ipsum tradit Jannottus Menettus in Vita ejusdem Nicolai V. apud Muratorium Tomo III. *Rerum Italicarum*, Parte II. & ex eo Georgius in ipsius Pontificis Vita anno MCDLXV. Num. VI. sic inquit: *Sacramentorum præsidio se muniit. Cardinales ad se accivit, ut ex more cuncta perageret, atque de Pontificatus regimine rationem redderet; siquid offendisset, veniam a sacris Senatoribus peteret, longam ideo ad eos orationem habuit, quam Testamentum appellant, Quicquid in Pontificatu gessit, ordine retulit, atque ita Cardinales commovit, ut omnes e cubiculo collacrymantes exiisse dicantur*.

II. Dicta hætenus probari possent & aliorum Pontificum exemplis, sed celeberrimum omnium est exemplum Pii II. quod noster hic §. memorat; hanc enim ille, ut refert Jacobus Cardinalis Papiensis Lib. I. Commentariorum, supremam ad S. R. E. Cardinales in suum Cubiculum convocatos habuit concionem: *Fratres dilectissimi videtis quo adductus sum. Hora mea jam venit. Deus hinc nos evocat. Morimur in Fide Catholica, in qua & viximus, nihil habentes a Romana Sede diversum, pro ovibus creditis egimus in hanc diem quod potuimus. Non peperimus laboribus ullis, atque periculis. Bis caput nostrum obtulimus ad communem salutem. Perficere quod ultimum capi, potestas ultro non est. Reliqua vestra sunt. Curate vos opus hoc Dei, expeditionem scilicet in Turcas, nec finite per negligentiam labi Christiana Fidei causam. Ideo vocati in Ecclesiam estis, ut suis temporibus illi opem feratis. Mementote officii vestri, & Deum attendite, qui contemplator est omnium, retribuitque secundum opera nostra. Fideli ministerio, & crevit, & progressa est dignitas vestra. Utique per fideles ministerium est retinenda. Quarentes qua vestra sunt, non qua Jesu Christi, illam retinere diu baudquaquam potestis. Sumite quoque ex hac hora patrimonii curam, videteque, ne detrimentum accipiat. Studium hoc omne, patre decedente, filiorum esse oportet: nostrum dum licuit fuit. Porro autem Fratres in Cardinalatu nostro ante, post in Præfulatu, ad quem nos elegistis, conversati vobiscum annos plures sumus. Conversatio nostra sine peccato esse non potuit; ex carne enim sumus. Offensus nimirum aliquando*

Deus est, offensa & charitas vestra. Pro iis quæ in Deum peccavimus, ipse qui pius, qui omnipotens est, nostri misericordiam habeat. Pro iis vero, quæ in vos, rogamus, dilectissimi nostri, ut placatis animis, morienti sit venia. Eos autem, qui vel famulati sunt nobis, vel nostri sumus generis, si se dignos præstiterint, commendatos habete. Valet jam. Pax Dei, & celestis gratia vobiscum sit.

IV. Eodem teste Auctore, his ægre & cum lacrymis a Pio II. Pontifice moribundo enunciatis, tantus subito Cardinalium, qui lectum circumstabant, coortus est fletus, ut diu prægemitu loqui verbum nemo posset, atque ora singulorum lacrymantia cernerentur. Tandem Bessarion Cardinalium primus pro omnibus verba fecit. Indoluit casum in quem erat adductus non sui tantum causa, quem lacrymabile erat deficere, sed magis Christiani populi, qui tantum salutis auctorem amitteret. Laudavit Pontificem, & præclara ejus in Præfulatu opera; agens identidem gratias, quod etiam suprema hora salutaribus monitis communem rem adjuvaret. Orare se Deum dixit Patrem misericordiarum, ut sic affecto, & jacenti salutem tribueret: verum, si propter peccata superstitis populi effet migrandum, mansura in illorum animis ejus præcepta; daturusque operam filios, ut nec publicæ Christianorum res, neve privatae Romanæ Ecclesiæ detrimentum acciperent: quam autem veniam poposcisset, humilitatis suæ, non erratorum esse confessionem: benigne omnes, atque indulgenter habitos semper, nec querelam adversus eum extare: suorum quoque, quos commendasset, gratam apud omnes futuram memoriam dixit, docens, quam charus esse deberet, vel sanguis, vel contubernium ejus, qui tantum de Christianis, & de Romana Sede meritis esset: postulare autem singulos Fratrum, ut postremum piumque benedictionis suæ munus mansuris relinqueret. Post hoc Cardinalis Bessarionis responsum, iterum consurrexit fletus, & contristatio cordium multa. Pontifex, ut idem Cardinalis Papiensis narrat, manu paululum elevata, osculandam eam omnibus præbuit, flens ipse, & flentes alios intuens. Illi manu apprehensa, atque ante lectulum procumbentes ac flentes, sigillatim veniam erratorum suorum precabantur, supremumque osculum Patris capiebant. Quibus ille: *Misericors ignoscat Deus, & spiritum rectum confirmet*. Ac simul benedicens omnibus, dimisit eos a se.

V. Dicta huc usque satis profecto sunt ad nostrum hunc §. explicandum; sed lubet nihilominus ad ipsum magis magisque illustrandum ea referre quæ de ejusdem Pii II. Pontificis pietate in recipiendis Sacramentis laudatus Cardinalis Papiensis citato loco subjicit: *Biduo ante admonitus a medicis, in omnem casum vite, vel obitus habendam supremam rationem animæ esse, Domini Sacramentum, quod celebribus semper diebus valens sumebat, etiam tunc magna mentis religione accepit, tundens pectus ad singula, & flens, & peccatorem se confitens indignum communicatione tanti mysterii*. Idem & de aliis multis Pontificibus legitur, uti videre apud Auctores, qui eorum Vitas scripsere. Sanctæ etiam fuit hoc ævo mors recentiorum Pontificum-Benedicti XIII. & Clementis XII.

§. II.

De Cardinalium cura, Pontifice in extremis laborante.

Post hæc Cardinales ut cognoverint, Pontificem in extremis laborare, tres delegabunt ex Collegio, unum videlicet de quolibet Ordine, qui simul cum Camerario inventarium faciant de omnibus bonis, quæ sunt in Palatio Apostolico, & illa reponant in loco tuto sub bona custodia. Quæ vero ad Sacristam pertinent, revideant, & dimittant apud Sacristam, quoniam est officium perpetuum. Deinde provideant Cardinales, si in Urbe moritur Pontifex, ne tumultus aliquis concitentur. Advocent, & intromittant confidenter, & in tempore Ecclesiasticam militiam, & eam disponant per Civitatem in locis opportunis. Provideant etiam Provinciis Ecclesiæ, mittendo Commissarios Viros graves, & prudentes. Pontifice vero pro anima agonizante, aliquis ex Prælatiis domesticis ei adstet, & Crucem inspiciendam, osculandamque illi crebro offerat, redigatque ei ad memoriam Passionem Christi. Cubicularii adstent cum diligentia ministrantes necessaria. Sacrista in tempore extremam Unctionem, & commendationem animæ faciat, prout in Ordinario. Poenitentarii vero circumstant, legant Psalmos Poenitentiales, Passionem Christi, & alias devotas orationes, dum adhuc expirat.

C O M M E N T A R I U S.

I. **S**unt & hi antiqui ritus, quos longe ante editionem nostri hujus Cærimonialis ab Augustino Patricio ordinati descripsit in suo Romano Ordine xv. Petrus Amelius Cap. cxliiii. ubi ita inquit: *Dum approximat ad mortem, Papa scilicet, debent esse parati Cubicularii semper ad servitium suum, & debent vocare Confessorem suum, & Prælatos domus, qui sibi administrent Sacramenta Ecclesiastica, quæ debent dari juxta formam, quæ est in Polyptico, & in Pontificali Romano, & post fiat recommendatio animæ, prout in dicto Pontificali continetur. Ipso vero agonizante, unus Prælati, vel Sacerdos teneat sibi Crucem Consistorialem sine cauda, vel baculo ante ejus oculos, & frequenter sibi osculari faciat, semper sibi ad memoriam reducendo Passionem Christi. Tunc Camerarius sit avisatus, quatenus recolligi faciat omnia bona Papæ ad certum locum, & securum, propter insultum; & omnes Officiales ea quæ habent sub custodia, sibi tradant, & assignent, & etiam Cubicularii illa, quæ erant sub custodia eorum; & etiam Sacrista penes se retineat, quoniam Officium perpetuum est, & rationem reddet Sede vacante tribus prioribus Cardinalibus, & iterum ab ipsis tribus prioribus recognoscere, & ab ipsis tenere. Huc usque Romanus Ordo xv. ubi etiam quædam pene ad verbum referuntur, quæ in hoc præsentis nostro §. statuta sunt.*

II. Jam plura essent in §. ipsum notanda, sed aliis omisissis, huc spectant, quæ de Pii II. summo agone narrat ejus oculatus testis Jacobus Cardinalis Papiensis Lib. i. Commentariorum, pagina 360. Ecce inclinante jam sole, inclinare & ipse admodum cæpit, ut non procul a morte judicaretur abesse. Confestim itaque Sacramenta reliqua persolvuntur morientibus de-

bita, sensu adhuc integrior, quam lingua. Nox ad primam usque horam processerat, Cardinalesque, qui eo convenerant, domos quisque suas discesserant. Restiteram ego solus ex omni Collegio, volens quam Patri pietatem debebam, etiam suprema hora persolvere. Mecum erant Præsules tres ex Pontificis familia, & ex sorore filius Andreas, & Lollius consobrinus Frater, ceterique, qui ad interius ministerium Cubiculi serviebant. Circumstabamus omnes deficientem senem lacrymantes, & mæsti, famulabamurque morienti in eo, quod ultimum poteramus. Intuens vero ille in me, oculo innuit, ut accederem propius. Accessi statim. Voce itaque jam consumpta, quæ auribus admotis audiri vix poterat, Ora, inquit, pro me fili, peccator etenim sum. Simulque ad Crucem conversus, quæ collocata ante oculos erat, non sine suspiriis iterabat: Miserere mei Deus, miserere mei. Et tu Virgo Mater servum deficientem non desere. Per misericordiam Filii suscipe animam excedentem. Paulula deinde intermissa mora, rursus in me dirigens oculos, Continuationem, inquit, sancti propositi memora Fratribus, & adjuva tu quoad potes. Propinquant supplicia, si Dei opus deseritis. Cum respondere tentarem multa, nec possem præ gemitu, dexteram manum, quæ elevata in cubitum erat, demittens supra collum, Benefac, inquit, Fili, orationemque offer Deo pro me. Hoc illi ultimum verbum fuit, loqui ultra non valuit ob flentem profluentem, quæ pectus jam, & fauces erant completa. Legebantur sine intermissione preces Ecclesiæ, quibus expiari decedentium animæ solent. Alia in hanc rem exempla, tum veterum, tum recentiorum Pontificum supervacaneum est, videri possunt Auctores, qui illorum vitas scripseret.

§. III.

De obitu Pontificis, & de curando ejus corpore, ac de vigiliis persolvendis.

Postquam vero spiritum Creatori reddiderit, legant Officium mortuorum. Cardinales

To. I.

E e e 2

vero

vero debent mox intrare, & singuli absolvere defunctum Pontificem, dicentes unum Responsorium cum suis Versiculis, & orationem pro defunctis, videlicet: *Deus, qui inter Apostolicos &c.* & ut quisque absolvit, discedit. Cubicularii autem parent aquam calidam cum herbis odoriferis, & Fratres Plumbatores lavent ejus corpus, tonsor vero radat barbam. Interim lavetur corpus cum optimo vino albo aromatizato, & calido, & loca spumantia impleantur aromatibus, mirrha, thure, & aloe. Nares, & aures impleantur musco, & demum bene fricentur manus, & totum corpus balsamo, quod Cubicularii, & Sacrista subministrabunt. Post hæc Pœnitentarii induant eum communes vestes usque ad Rochetum, deinde sacras, ac si esset celebraturus, incipiendo a Sandaliis usque ad Mitram simplicem; tum & Anulo cum Fanone, Pallio, spinulis, & omnibus ornamentis. Paramenta erunt rubei coloris, & ponent inde corpus ita ornatum super feretrum, sive lecticam coopertam aureo panno cum Pontificis, & Ecclesiæ armis, & subtus caput cervical ex panno aureo, & ad pedes duo alii, super quibus erunt duo Pilei Pontificales. Corpus lavabitur, & ornabitur in Camera secreta, & ornatum ponetur in lectica, sive feretro in Camera papagalli; & ibi usque ad diem, si Pontifex in nocte morietur, Pœnitentarii vigilantes, & psallentes custodient corpus, & habebunt expensas, & omnia necessaria a Palatio. Deinde hora competenti, præcedente Subdiacono Apostolico cum Cruce, & cum Cappa sua obscuri coloris, videlicet violacea, Cantores Capellæ cantant *Subvenite*; & Pœnitentarii portabunt corpus ad Capellam majorem. Portabuntur ante corpus viginti sex, aut viginti octo intorticia accensa per Scutiferos defuncti. Reliquum familiæ sequetur. Cantores, & Pœnitentarii cantabunt Vesperas, & Vigiliis pro defunctis, quousque venient alii Religiosi. Et nota, quod Camerarius, si non est Cardinalis, debet omnibus, dum sunt, personaliter interesse. Si vero est Cardinalis, non ipse, sed Vicecamerarius intererit. Collegia Clericorum, & Conventus Religiosorum, ut venerint, cantant Vigiliis, aspergunt, & incensant corpus, & absolvunt, ut in exequiis Cardinalium diximus.

COMMENTARIUS.

I. **D**efumfit & hæc quoque Patricius hujus Cæremonialis ordinator ex antiquis Romanæ Ecclesiæ ritibus, quos in suo Romano Ordine xv. Capite cxiiv. quod Inscriptum est, *De Papa jam mortuo*, jam longe fusius descripsit Petrus Amelius, qui ita inquit: *Papa vero mortuo, vel eo agonizante, quod est melius, statim vocantur Pœnitentarii, & legunt ante eum Officium Mortuorum, septem Psalmos Pœnitentiales, & illa, quæ in Libro ipsorum continetur, & interim cum illis Fratribus de Bulla, si fuerint, vel de Pignotta, cum aqua, & cum bonis herbis, quam Cubicularii parare debent, lavent corpus bene; & barbitonsor radat sibi caput, & barbam; & sic loto, Apothecarius, & dicti Fratres de Bulla obturent sibi bene omnia foramina cum bumbasio, vel stupa, anum, os, aures, nares cum myrrha, thure, & aloe, si possint haberi. Lavetur etiam corpus cum vino albo, & calefacto cum herbis odoriferis, & cum bona vernagia, quæ Cubicularii, vel boticularii Papæ debent dictis lavatoribus administrare. Guttur vero de aromatibus impletur, & speciebus cum bombasio, & etiam nares cum musqueto. Ultimo etiam vultus fricetur, & ungatur cum balsamo bono, & etiam manus. Camerarius, vel Cubicularii, qui custodiunt balsamum, vel Sacrista, si habent, tradent. Ita Amelius, qui etiam inferius eum ritum recenset Absolutionis faciendæ a Cardinalibus Pontifici defuncto, antequam scilicet curetur corpus, ac sacris vestibus induatur: *Sed notandum*, inquit, *quod antequam lavetur, & induatur, Domini Cardinales, unus post alium, vel omnes simul debent eum visitare, & quilibet absolvit eum, prout veniunt, & statim recedant.**

II. Facta Absolutione, post lectum nempe Mortuorum Officium, ut ait noster §. & loto corpore, *Pœnitentarii*, ut ait Amelius *inducunt ipsum bracquam, camisiam, caligas, & tunicam &c.* Defuisse aliquando & has vestes defuncto Pontifici, sicut & alia ad curandum ejus corpus necessaria, ob familiarium avaritiam, qui omnia quæ erant Pontificis rapiebant, docet Burchardus in suo Cæremoniali, ubi enarrat exequias Sixti Papæ IV. qui obiit anno Christi mcdlxxxiv. Abbas S. Sebastiani Sacrista habuit lectum cum fornimentis, licet ad officium potius nostrum pertineret; alia omnia, quam primum defunctus ex Camera portatus fuit, unico momento, ut ita dicam, sublata sunt. Nam ab hora sexta usque ad illam horam, omni diligentia per me facta, non potui habere unum bacile, unum linteum, vel aliquod vas, in quo vinum & aqua cum herbis odoriferis pro lavando defuncto ordinaretur, neque bracas, & camisiam mundam pro defuncto induendo, licet pluries hoc a Cardinale Parmensi, Petro Mantuano, Accurtio, Gregorio, & Bartholomæo de Ruvere, Georgio scopatore secreto, & Andrea barbitonsore suo, qui omnes sui secreti Cubicularii, & domestici fuerunt, & quibus optime fecerat, petivissem. Tandem.... raminum, in qua aquam pro scutellis lavandis calefacere solebat, cum aqua calida mihi ministravit, & præfatus Andreas barbitonsor bacile de apotheca sua portari fecit. Lotus sic fuit Pontifex, & cum non esset linteum, quo tergeretur, camisia sua, in qua mortuus est, in duas partes divisa, eum tergi feci. Bracas, in quibus mortuus est, & lotus, sibi mutare non potuit, cum non essent alia. Ita plane & aliis nonnullis Pontificibus accidit.

§. IV.

§. IV.

*De funeris deductione, & exequiis celebrandis in Basilica S. Petri,
& de panni distributione.*

Postquam omnes absolverint, deducunt funus ad Ecclesiam S. Petri, & ibi ponitur Corpus in medio Ecclesiæ; præferuntur multa intorticia, & Familia sequitur. Finito Officio, remanet ibi Corpus per biduum, aut triduum, ut populus possit illum visitare, & osculari manum. In nocte reponitur in Capella majori, & tandem noctu sepelitur. Interdum Vigiliæ per Collegia, & Conventus non cantantur, sed per Canonicos Beati Petri deferitur Corpus ad Ecclesiam cum Capitulo, & Familia. Interim parantur exequiæ, erigitur Castrum doloris cum lecto, & alia fiunt, quæ in exequiis Cardinalium supra notavimus; sed largius, & abundantius Familiares Papæ, Officiales Curia, & Urbis Officiales, si Romæ sit, vestiuntur panno nigro, ut in Libris Camera Apostolicæ plenius apparet, ad quos vos remittimus. Fiunt largæ eleemosynæ pro anima Pontificis Religiosis Viris, & mulieribus per Camerarium, & Thesaurarium & maxime si Camera est dives. In prima die exequiarum leguntur ducentæ Missæ cum eleemosyna. Missam solemnem cantabit Prior Episcoporum Cardinalium. Fit Sermo de laudibus Pontificis, & in fine fiunt Absolutiones a senioribus, ut in exequiis Cardinalium scriptum est. Accenduntur hac die intorticia multa circumcirca in Ecclesia, & candelæ super Castrum doloris, & idem fit in die nono. Missam tunc cantat Subprior Episcoporum Cardinalium.

COMMENTARIUS.

I. Solemnis olim fuit deductio defuncti Pontificis ad Ecclesiam S. Petri, si scilicet Romæ diem suum obiisset extremum: Dominus Camerarius, ait Romanus Ordo xv. Cap. cxlv. sit avisatus cum Thesaurario, quod nigri panni habeantur in magna copia, & bona bora, ita quod Familiares sint induti, antequam funus exeat de Palatio; & in illa Processione semper Subdiaconus Papæ bajulet Crucem ante Feretrum, & omnes processionaliter bini & bini post corpus vadant. Teste Burchardo in suo Cæremoniali, ubi funus Sixti Papæ IV. enarrat, præcedentibus Cruce, & Cantoribus, Pœnitentiarii, & Cubicularii portaverunt defunctum. Tum vero paulo inferius subdit: Scutiferi defuncti portaverunt viginti intorticia ante funus, quod sequebantur septem Cardinales, videlicet S. Petri ad Vincula, Novariensis, Amalphitanensis, Rachanatenensis, & quidam alii. Post eos Prælati, & alii Legati. Sed non semper idem servatus est mos, ut enim ait hic noster §. per Canonicos B. Petri deferitur Corpus ad Ecclesiam cum Capitulo, & Familia. Invaluit mos, ut si Papa in Quirinali Palatio moriatur, circa secundum noctis horam, præcedentibus Pœnitentiariis sacra veste indutis, ac defuncti Familiaribus, aliisque subsequentibus vehatur lectica Corpus ad ipsam S. Petri Basilicam, ritumque deductionis istius funeris legere est in mss. Apostolicorum Cæremoniariorum Diariis, atque hic est recentissimus ritus, nam alias consuevisse olim Cardinales ipsos, atque Prælatos deducere defuncti Papæ cadaver ad Ecclesiam, docet nos exemplum Innocentii IV. qui obiit Neapoli die vii. Decembris anni mccciv. elegitque sepulturam in Ecclesia Cathedrali: Mane sequenti, inquit in ejus Vita Nicolaus de Curbio Cap. xlii. Domini Cardinales & Prælati pariter universi ipsum detulerunt ad majorem Ecclesiam tumulandum, apud quam elegerat sepulturam.

To. I.

II. Pergit noster §. atque, interim parari debere exequias, & erigi Castrum doloris cum lecto, & alia fieri, quæ in exequiis Cardinalium supra annotavimus; sed largius, & abundantius Familiares Papæ, Officiales Curia, & Urbis Officiales, si Romæ sit, vestiri panno nigro debere, & fieri largas eleemosynas pro anima Pontificis Religiosis Viris, & mulieribus per Camerarium, & Thesaurarium, maxime si Camera est dives. De panno distribuendo post mortem Papæ loquitur quidem Romanus Ordo xv. Cap. cxlvii. De pannis distribuendis iste modus consuevit observari. Primo Camerarius, si non sit Cardinalis, cum duobus Capellanis, & duobus Scutiferis; item Thesaurarius, item Confessor, si sit Prælatus; isti tres Domini de eodem panno bono & nobili. Item Referendarii de eodem panno, item Cubicularii de alio panno minori, & Clerici Camera. Item Medici cum Scutiferis Papæ de simili panno Cubiculariorum. Item magistri buticularia, panetaria, aqua falleria, cera, coquina; de alio panno minori. Item ostiarii, janitores, Clerici Capella, Cæremoniarum, omnes de consimili panno magistrorum buticularia, & servientes armorum. Juxta voluntatem Domini Camerarii omnes induantur, totum stat in sua voluntate. Item duo coqui Papæ de eodem panno Officialium. Item de prima porta, & secunda, de eodem & consimili panno. Item Cursores, famuli de Palefrenario, de panetaria, de buticularia, de cera, & coquina, omnes de uno panno minori, ad minus de quolibet officio duo; sed Palefrenarii secundum numerum ipsorum, & etiam Cursores juxta voluntatem Domini Camerarii; item Marefcallus Curia, & Advocatus Pauperum, & Magister Sacri Palatii, Procurator Fiscalis, Advocatus Papæ, omnes de uno panno; item emtor, guardavessalla, guardia major, idest custos cibariorum, custos Sacra Capella, qui est

E e e 3

est sub potestate Sacristæ, omnes de eodem panno; item Campanarias, scopator Camera Papæ, & scopator Palatii de alio panno; item si Papa moriatur Roma, sex Banderenses, tres rectores, duo consiliarii consueverunt petere; item capita regionum, & manipularii etiam consueverunt petere vestes nigras, & habuerunt in morte Urbani VI. omnes isti Officiales Urbis, qui si petierint, sunt sub beneplacito Domini Camerarii, si eis dare vult, vel non. Senator Urbis propter officium non utitur, nec vestitur, nisi vellet facere per se amore Papæ. Hactenus de panno distribuendo landatus Ordo Romanus, xv. qui etiam mox subjicit, dari tres cannas de panno unicuique.

III. Sed audiendus iterum Ordo idem Romanus de eleemosynis distribuendis, quarum hic noster §. meminit: Item, ait ille, *sunt magna eleemosyna pro anima Papæ per Thesaurarium de mandato Camerarii, primo quatuor Ordinibus Mendicantibus aqualiter quinquaginta florenos, vel viginti quinque, ad minus decem, panem, vinum, carnes pro una die; deinde Hospitalibus, & aliis pauperibus juxta voluntatem Camerarii, & secundum quod Camera est potens.* Sane dolent passim Cæremoniarii Apostolici de parsimonia in exequiis Summorum Pontificum adhibita, testaturque in suo Cæremoniali Burchardus, cum magna difficultate circa horam decimam quartam potuisse se obtinere intorticia numero viginti tantum, quibus deferri ad Ecclesiam posset Corpus Sixti IV. Papæ. Queritur & de ea parsimonia Grassus in suo ms. Diario, ubi recenset exequias Leonis Papæ X. quæ, ut ait, *paucissima in omnibus facta sunt, tum quia Camera, & Sedes Apostolica dicitur exhausta, & indebitata in summa 8000. ducatorum, & ultra, tum etiam ob rapinam Officialium deputatorum a Cardinali Armellino, & aliis deputatis, nam quasi omnes Officiales isti fuerunt mercatores Florentini acutissimi.* Certe ut idem Apostolicus Cæremoniarius refert loco citato, *cera data est Cardinalibus, & Prælatibus presentibus cum miseria, & paucissimi vestiti fuerunt, de panno scilicet, quod solitum tunc erat distribui.*

IV. De Missis, quas vocant privatas, seu planas, celebrandis in exequiis Pontificis, & de eleemosynis illas celebrantibus largiendis, jam ante hunc nostrum §. meminit memoratus Ordo Romanus xv. Cap. cxlv. ubi etiam mandat, *ut dentur cuilibet Sacerdoti celebranti V. grossi Papales pro anima sua per Thesaurarium.* De solemnibus Missis, & Sermonibus, peragendis prima die exequiarum Pontificis, ritus quidem qui ante editionem nostri hujus Cæremonialis ser-

vabatur, ita refertur a Petro Amelio in citato Romano Ordine xv. Capite cxlv. *Est etiam sciendum, quod prima die Prior Episcoporum Cardinalium debet dicere primam Missam, & facere Sermonem, vel committere Sermonem alicui Prælati, vel Magistro in Theologia: Missam vero non debet committere, quia si non posset celebrare, debet eam dicere secundus Episcopus Cardinalis, vel tertius, & sic deinceps, Morem esse antiquum, ut in magnorum Virorum funere Oratio funebris haberetur, jam alibi fuisse notavimus. Consuevisse etiam Cardinales in exequiis Papæ sermonem habere, testatur Æneas Sylvius in Oratione ad Fridericum III. quæ extat inter miscellanea Baluzii Tomo vii. pag. 548. ubi disertè ait, Cardinalem Bononiensem, qui fuit postea Nicolaus V. ultima exequiarum Eugenii IV. die gravem, elegantemque Orationem habuisse, cujus meminit in Vita memorati Nicolai V. Pontificis Maximi eruditus Georgius anno mcdxlv. pag. 2. ubi etiam ita subjicit: *Mirum sane aliquibus videri poterit, si nostri temporis ritum cum iis metiamur, hujusmodi orationem a S. R. E. Cardinale habitam, quod hodie, & jam diu in usu non est. At moris erat interdum, ut non duæ tantum, sed etiam plures novendialium tempore conciones de Pontificis laudibus a Cardinalibus, qui Missas de illius obitu ordinatim celebraturi erant, post Missam recitarentur, nisi eas alicui Prælati, seu Theologo demandarent; at nona die ab eodem Cardinale, qui Missam celebraret, seu cui ille commisisset, de Pontificis laudibus, deque alio eligendo Oratio habenda erant.**

V. Quod scribit hucusque Georgius, probatur profecto auctoritate Romani Ordinis xv. auctore Petro Amelio, Cap. cxlv. in fine, ubi ita ait: *Sciendum tamen, quod omni die debet esse Missa, quæ debet dici per Cardinales juxta ordinem suum, & Sermo per eosdem, nisi committant Prælati, vel Magistris in Theologia, aliis non.* Invaluit autem mos, ut solum in prima, & postrema die Novendialium duo habeantur Sermones, quorum primus est de laudibus Papæ defuncti, ultimus vero de eligendo futuro Pontifice. Atque hic ritus servatus fuit anno mcdxlv. in exequiis Eugenii IV. teste Ænea Sylvio in citata ad Fridericum III. oratione, ubi sic ait: *Eugenio duo Sermones facti sunt. Alterum Malatesta quidem ex genere Auditorum, alterum Cardinalis Bononiensis fecit, Thomas scilicet de Sarzana Tituli S. Susannæ Presbyter Cardinalis, qui deinde Nicolaus V. dictus est. Ille Vitam Eugenii commendavit, hic obitum. Ille; qualis fuerit Eugenius, enarravit; hic, qualis eligi deberet Successor, edocuit.*

§. V.

De Novendialibus Papæ defuncto celebrandis.

Intra Novenam quotidie aliquis Cardinalium celebrat, incipiendo a senioribus post Superiorem Episcoporum, & leguntur centum Missæ. Intorticia circa Ecclesiam, & candelæ supra Castrum doloris non accenduntur; reliqua fiunt, ut in primo, & nono die. Distributio ceræ fit quotidie Cardinalibus, Prælati, Familiæ, Curialibus, & aliis, qui aderunt, & quotidie fiunt Absolutiones a Cardinalibus in fine Missæ circa Castrum doloris. Quotidie post Missam conveniunt Cardinales in loco congruo

gruo, consulentes de rebus Ecclesiæ, & ordinantes Conclave. Nona die post Missam de Defunctis cantatur Missa de Spiritu Sancto, & fit Sermo exhortatorius ad electionem Pontificis.

COMMENTARIUS.

I. **N**ovendialia, seu Novena, preces sunt, seu Missæ per novem dies continentes celebrandæ, uti docet Dufresne in suo Glossario, verbo, *Novena*. In exequiis Papæ non ita antiqui sunt instituti. Teste siquidem Cencio in Ordine Romano XII. labente Seculo XII. exarato, Cap. XLVIII. is erat ritus, qui in Papæ Funere servabatur: *Mortuo*, inquit, *Romano Pontifice*, & *sepulto*, omnes *Cardinales ad propria revertuntur*, secundum antiquam consuetudinem. *Secunda vero die conveniunt in Ecclesia*, & *Missa mortuorum cantata*, omnes similiter secundum consuetudinem antiquam recedunt. *Tertia autem die iterum omnes in Ecclesia congregati*, *Missa Sancti Spiritus ibidem primitus celebrata*, tractant de electione &c. Novendialia in Pontificum Funere tametsi instituta videantur a Gregorio Papa X. qui, ut alibi dictum est, primus legem de Conclavi edidit in electione Summi Pontificis, non tamen statim servata fuerunt; nam Martino IV. die XXVIII. Martii anno MCCLXXXV. mortuo, exequiæ ejus per tres tantum dies celebratæ fuere, dieque prima Aprilis ejusdem anni Cardinales libere, nulla inclusionis coactione præambula, convenerunt de Successoris electione tractaturi, & tandem in crastinum, Scrutinii via electa, concorditer elegerunt Jacobum fabelium Cardinalem Diaconum S. Mariæ in Cosmedin, ut ipsemet efferit in Litteris encyclicis de sua electione datis, quæ extant apud Raynaldum ad prædictum annum; Num. XVII. & seqq.

II. Sane juxta Gregorii X. Constitutionem de inclusione Cardinalium in Conclavi Pontifice obeunte Romano, quam a quibusdam Pontificibus suspensam, vel revocatam Cælestinus V. & Bonifacius VIII. novo robore munierunt, ut diximus supra in Commentariis ad Titulum I. Bonifacio ipso VIII. die XI. mensis Octobris anno MCCCIII. e vivis erepto, Cardinales, Novendialibus prius expletis, Sacrificæ die X. nempe XXI. ejusdem mensis, rite Sancto Spiritui celebratis juxta prædictam Constitutionem, de qua nos citato loco abunde diximus, Romæ in Palatio Vaticano, in quo Bonifacius obierat, Conclave ingressi, postridie, scilicet die XXI. ejusdem mensis Nicolaum Boccasinum Ordinis Prædicatorum, Cardinalem Episcopum Ostiensem in Summum Pontificem elegerunt, unico facto, ac publicato Scrutinio, fuitque B. Benedictus XI. ut idemmet asserit in suis encyclicis Litteris de sua electione datis Kalendis Novembris, ut legere est in ejus Vita apud Pagium, qui etiam passim in sequiorum Pontificum Vitis, tradit, electos fuisse ipsos Pontifices, Novendialibus prius defuncto Papæ expletis.

III. Venio nunc ad nostrum §. quo edicitur, ut intra Novenam quotidie aliquis Cardinalium celebret, incipiendo a senioribus post Subpriorem Episcoporum, & legantur centum Missæ. Est & hic antiquus ritus, cujus meminit Romanus Ordo XV. Cap. CXLVI. sic dicens: *Item Camerarius caveat bene, ne ordo in dicendis*

Missis interrumpatur; quoniam omni die unus Cardinalis debet dicere Missam de mortuis, & faciat ibidem Sermonem; quod si velit facere, det uni Pralato, vel alicui Magistro in Theologia, quia si ordo interrumpatur, non posset reintegrari. Non enim licitum, & honestum esset, quod per Prælatum, vel Episcopum diceretur Missa; sed si aliquis de Cardinalibus infirmaretur, vel non posset Missam celebrare, alter Cardinalis eam dicet; & sic successive per ordinem usque ad finem. Loquitur hic citatus Ordo Romanus de Missa solemni pro defuncto Pontifice celebranda quotidie toto ipso tempore Novendialium.

IV. Quod attinet Missas, quas planas, seu lætas appellant, quæ Novendialium tempore quotidie pro defuncto Pontifice celebrari debent juxta nostri hujus §. præscriptum, de ejus ritu jam diximus supra in Commentario ad §. IV. De cera ut hoc loco dicamus in hujusmodi exequiis adhibenda, audiendus est Ordo Romanus XV. Cap. CXLV. sic inquiens: *In die prima sepultura ad minus debent esse cc. torticiæ, qualibet de sex libris cera, & in Castro doloris in quatuor angulis unum de dictis brandonibus, & in medio superius unum aliud, & circumquaque abundantia candelarum, quæ debent accendi, antequam Missa incipiatur. Tum vero paulo post: Item debent dare cuilibet Cardinali unam tortitiæ ad minus quatuor librarum de cera in dicta Missa, quam tenere debet ante eos unus Scutifer eorum; & hoc idem de Prælati; sed tortitiæ aliorum Prælatorum sunt de tribus libris cera; Pœnitentiariorum vero, & aliorum nobilium de una libra cera; sed Canonicorum, & aliorum Presbyterorum de quarta parte libræ, prout placebit dicto Camerario. Subdit mox etiam sic: Advertat tamen, quod omni die ad minus sint XL. torticiæ circa Feretrum, seu Castrum doloris; desuper vero non debent esse candelæ, nisi prima die. Sed nec omittenda, quæ & de ceræ distributione ait idem Ordo Romanus sequenti Cap. CXLVI. Omni die, inquit, dantur candelæ Prælati indutis de nigro, prout in prima die, quas si volunt, secum reportant &c. Porro docent passim antiqui Apostolici Cæremoniarum in suis ms. Diariis, summam ea occasione fieri consuevisse ceræ distributionem, seu potius dissipationem, ut iidem loquuntur. Cetera, quæ in nostro §. statuuntur, jam alias explicata a nobis fuere, ac præsertim in nostris ad Titulum I. Commentariis.*

V. Unum est, quod hic enarremus, quod ait scilicet & hic noster §. ut nempe toto Novendialium tempore quotidie fiant Absolutiones a Cardinalibus in fine Missæ, solemnis scilicet, circa Castrum doloris. Huc faciunt quæ scripsimus jam nos secundo Tomo Commentariorum Cæremonialis Episcoporum, in Commentariis ad Caput XI. Sed notanda, quæ scribit Paris de Grassis in suo ms. Diario, de exequiis Leonis Papæ X. quas ipse direxerat: *Quotidie, inquit, habita est Missa exequialis cum Absolutione per Pres-*

Presbyteros Presbytero celebrante, & per Episcopos Episcopo celebrante. Paridi Grassi con-

tinunt & alii sequioris ævi Apostolicarum Cæremoniarum Præfecti in mss. suis Diariis.

§. VI.

De significatione mortis Papæ per Collegium, & de stylo scribendi.

Mortuo Pontifice, Collegium id Litteris suis Principibus, & Maximis Prælatibus significat. Utitur in scribendo stylo Apostolico, Filios, & Fratres illos appellans, quos Pontifex ita vocat, & singulares singulariter salutatur, & alloquitur.

COMMENTARIUS.

I. **E**X Libro Diurno Romanorum Pontificum, quem eruditus Joannes Garnierius ex antiquissimo Codice ms. Parisiis edidit anno MDCLXXX. Cap. II. Titulo I. formulam Litterarum habemus, quæ de transitu Pontificis ad Exarchum mitti olim solebant, ab Archipresbytero, Archidiacono, & Primicerio Notariorum, qui servabant locum Apostolicæ Sedis vacantis: *Quamvis non sine gravi gemitu, & vere flebili voce a Deo servata Excellentia Domini nostri per has nostras innotescimus humiles syllabas, Dei judicio, cujus dispensatione universus regitur Orbis, ab hac luce fuisse subtrahit Dominum Ill. Sanctissimum Dominum nostrum Pontificem, cujus cuncti vere, & si dicendum est, etiam lapides ipsi fleverunt exitum. Die enim Ill. instantis mensis obiit, pro cujus consternati, ut diximus, funere omnes grandi tristitia premimur mole, ad solam Christi Dei nostri cordis oculos miserationem attolentes, ut ipse dignetur subvenire desperatis, & suum providere dignum Rectorem Ecclesiæ, a quo fundata est; qui etiam est pollicitus, non ei prevalere portas inferi. Post divinum auxilium ad vestram excellentiam Domine Ill. excellentissime, & a Deo nobis multis temporibus concedende, omnes habemus fiduciam. Ecce eventum lugubrem indicavimus, quia ad nostram consolationem humanam alibi non habemus confugium. Cur hujusmodi Litteræ ad Exarchum mitterentur, & qui essent ii, qui servantes locum dicuntur Apostolicæ Sedis, jam a nobis*

explicatum alias fuit, nempe superius in Commentariis nostris ad Titulum I.

II. Quod proprie hunc nostrum §. spectat, ritus est plane antiquus, occurritque apud Raynaldum in continuatione Annalium Cardinalis Baronii passim, ut mortuo Pontifice Cardinalium Collegium illius obitum Litteris suis Principibus, & maximis Prælatibus, ac præsertim Cardinalibus absentibus significaret. Testatur sane in suo ms. Diario Grassus, ubi enarrat ritus servatos post Leonis X. mortem, se inter alia fecisse, quod eligerentur duo Secretarii, qui nomine Collegii significarent Cardinalibus absentibus obitum Papæ, sicut de more erat. At vero placuit tunc Sacro Collegio, quod duo Clerici Collegii hoc facerent; & cum replicasset Grassus, qui Apostolicus erat Cæremoniarus, ritusque omnes dirigebat, Clericos Collegii non esse consuetos hoc exercitium facere, sed quod omnino eligerentur duo Secretarii, placuit, ut idem Cæremoniarius refert, quod ipsi duo Clerici Collegii sufficerent, attenta eorum sufficientia, & casu, quo isti non sufficerent, adderetur alter sufficiens. Certe utitur tunc in scribendo Collegium, ut ait noster §. stylo Apostolico, Filios, & Fratres illos appellans, quos Pontifex ita vocat, & singulares singulariter salutatur, & alloquitur. Ratio hunc in modum scribendi est ipsa summa Cardinalium dignitas, ac potestas Sede vacante Pontificæ dignitatis, atque auctoritatis imaginem representantium, de qua superius non uno in loco diximus.

§. VII.

De Bullis Plumbatorum per Vicecancellarium frangendis.

Vicecancellarius, ut primum Pontifex expiravit, Bullas, quibus Litteræ Apostolicæ signari consueverunt, a Plumbatoribus accipit, & partem illam, in qua Litteræ cum nomine Pontificis inscriptæ sunt, publice, & coram pluribus per ipsos Plumbatores frangit, & ad signandum omnino ineptas reddit. Aliam vero partem, in qua Apostolorum Capita sunt sculpta, lineo panniculo involutam, alligatam, & sigillo suo signatam Camerario tradit, & diligentissime curat, ne aliquæ Litteræ signari possint post Pontificis obitum.

COMMENTARIUS.

I. **V**etera monumenta nos docent, Bullis plumbeis jam olim usos fuisse Romanos Pontifices. Polydorus Virgilius est ejus quidem opinionis, Agathonem Pa-

pam, qui ad S. Petri Cathedram evectus fuit anno MDCLXXV. in cera anulo impressisse sigilla, verum postea cum Summus Pontifex multa irrogaret privilegia, ut Diplomata diuturniora

niora forent, placuisse Stephano III. & Adriano I. quorum primus anno DCCLXVIII. alter DCCLXXII. creatus Pontifex fuit, tabulas apostolicas plumbo obsignari, nec antiquius sigillum publicum reperiri opinatur. Sed vetustiora diplomata Summorum Pontificum, inquit Dominicus Raynaldus Bibliothecæ Vaticanæ Custos, non vidit Polydorus. Nam tempore S. Silvestri, qui initio Seculi IV. regebat Ecclesiam, & in cuius Pontificatu Ecclesia Romana ab immanissimo tyranno diu oppressa respirare cepit, Litteræ Apostolicæ plumbo obsignatæ fuerunt; ejusque Bulla plumbea Aretii reperitur. Afferuntur præterea, eodem teste Auctore, in Archivo Castri S. Angeli vetustissima in papyro ex frutice confecta diplomata plumbo obsignata Summorum Pontificum Leonis I. Gregorii Magni, ac Sergii. His consentanea habet Bromptonus, qui tamen ait, *a tempore Gregorii Magni Bullas fuisse, & adhuc in Romana Ecclesia aliqua ipsius privilegia bullata servari*. De sequiorum Summorum Pontificum Bullis hæc habet Luitprandus, Lib. VI. Cap. VI. *Hæc Dominum Papam nullis narrantibus fecisse credemus, nisi Litteræ fidem admitterent, quæ plumbo signatæ, ejus nominis characteres mostrant*. Bullis præterea plumbeis usos etiam Episcopos, liquet ex Concilio Cabilonensi II. anni DCCCXIII. Can. XL I. *Litteras etiam habebit, in quibus sint nomina Episcoporum & Civitatis plumbo impressa*. Sed & testatur Anastasius Bibliothecarius in Præfatione ad Octavam Synodum, omnia illius Acta in quinque Codicibus scripta, sive compacta, & omnium subscriptionibus roborata, sed & ipsos Codices plumbea Bulla munitos, atque sigillatim loci servatoribus traditos Patriarchalibus Sedibus deferendos. Quin & Abbatis Bulla plumbea memoratur a Mabillonio Lib. II. *De re Diplomatica*, Cap. XV. Num. III.

II. Quicquid de aliis sit, duo sunt quidem sigilla, quibus etiam nunc Romani Pontifices utuntur; uno in publicis jussionibus, & expeditionibus, quas Bullas vocant, idque plumbeum est, habetque ex una parte Imagines Apostolorum Petri & Pauli, ex altera nomen Pontificis pro tempore existentis; altero in privatis ad quoscumque Litteris, & gratiis concessis, quas *Brevia* appellant, habetque effigiem S. Petri in navicula positi, & retia laxantis, utpote qui prius piscium piscator, factus fuit postea a Christo piscator hominum. Porro ut de primo aliquid fufius dicamus, observat laudatus Raynaldus Vaticanæ Bibliothecæ Custos, in plumbo Diplomatum vetustissimorum Pontificum non impressas fuisse Imagines Petri & Pauli, sed tantum illius Pontificis nomen, cujus Litteræ obsignabantur, quod tantum hodie observatur, & a modernioribus Pontificibus introductum, & in usu positum est. Vetustiore quippe usque adhuc Bullam cum Imaginibus Petri & Pauli non se reperisse ait, quam sub Adriano IV. qui electus Romanus Pontifex fuit anno MCLIV. Verum sub Paschali II. ad Summum Pontificatum evecto anno MLXXXIX. hunc morem cepisse, docet Doubletus pag. CDLXXV. at cur in Bullis Summorum Pontificum, S. Pauli Imago dextram, S. Petri finistram partem occupet, quædam tradit Matthæus Parisius anno MCCXXXV. pluribus vero differit Leo Allatius, Libro I. *De consensu utriusque Ecclesiæ*,

Cap. VI. & Nicolaus Alemanus in Libro, *De laza, & dextra*. Sed & nequid omittamus ad eandem rem spectans, primus Clemens VI. Dominus suæ insignia suis Bullis impressit, ut testatur Albertus Argentinensis ad annum MCCCXLII. sic de ipso Clemente inquit: *Hic Papa, cum arma progeniei suæ haberent quinque rosas, contra morem antecessorum totidem rosas poni fecit in Bullis*.

III. Hæc notanda censui, quo facilius noster hic §. intelligi possit, ex cujus præscripto Vicecancellarius, ut primum Pontifex expiravit, Bullas, quibus Litteræ Apostolicæ signari consueverunt, a Plumbatoribus accipit, & partem illam, in qua Litteræ cum nomine Pontificis inscriptæ sunt, publice, & coram pluribus per ipsos Plumbatores frangit &c. Porro ait Grassus Cæremoniarius Apostolicus in suo ms. Diario, ubi enarrat ritus servatos post Leonis Papæ X. obitum, se inter alia fecisse, *quod rumperetur plumbum, & Anulus Piscatoris, prout in præsentia Collegii plumbum ruptum fuit, & similiter Anulus Piscatoris*. Ipsum Piscatoris Anulum qui usui fuit Pontifici defuncto, adhibitum aliquando fuisse ab illius Successore novo Pontifice, jam diximus supra in Commentariis ad Titulum I. Porro præter antiquos Bullarum Plumbatores institutos & alios complures fuisse ab Innocentio Papa VIII. legere est apud Ciaconium Tomo III. col. xcv. ubi de eodem Pontifice Auctor agens, sic inter alia scribit: *Eraria exhausta, Pontifex Sixti IV. exemplum sequutus, quo pecuniam colligeret, quinquaginta duos Viros instituit, quos Plumbatores Bullarum Apostolicarum vocavit, eisque certos Ecclesiæ proventus in perpetuum concessit; ex qua institutione ad viginti sex millia aureorum recepit, Venire singula quingentis aureis*.

IV. Cum tandem ex nostro §. illud cautum sit, ut Vicecancellarius statim defuncto Pontifice Bullas quibus signari Apostolicæ Litteræ consueverunt, a Plumbatoribus accipiat, & per eosdem publice, & coram pluribus frangat; notandum aliquid in calce nostri hujus Commentarii de ipso S. R. E. Vicecancellario censui. Et sane qui Vicecancellarii eminentissimæ dignitatis originem ex antiquis historiarum monumentis disquisierunt, teste Joanne Chokier, tradunt, illam demum post tempora Innocentii Papæ III. inventam, & erectam fuisse, eamque etiam exercuisse privatæ fortis homines, sed probitate, & eruditione spectatissimos; postea sub Bonifacio VIII. dignitatem hanc uni ex Cardinalibus tributam, idque ex congruentia rationis, & quoniam justitiæ regimen penes Vicecancellarium residebat, par erat munus istud commendare personis illustribus, in quibus ipsi Cardinales maxime excellunt. Ita plane laudatus Chokier, cujus locum descripsit etiam Vanspen, Parte I. *Juris Ecclesiastici universi*, Titulo XXIII. Cap. I. *Varia de Vicecancellarii origine*, ejusque muniis in Ecclesia Romana, commenti sunt quidem nonnulli Scriptores, quos refellit Cardinalis de Luca Parte II. *Relationis Curia Romana*, Discursu X. nec enim omnino constat, quando Vicecancellarii munus ad eam pervenerit eminentiam, & prærogativam, in qua hodie in Romana Curia conspicitur.

V. At puto equidem, eos omnino Auctores labi, qui tradunt, post Innocentii Papæ III. tem-

tempora Cancellarii dignitatem in Romana Ecclesia inventam, & erectam, ac non nisi sub Bonifacio VIII. dignitatem ipsam uni ex Cardinalibus tributam, cum constet, jam longe ante laudatos Pontifices, Innocentium III. & Bonifacium VIII. Cancellarii dignitatem fuisse summæ existimationis, & a Cardinalibus insignioribus exercitam. Certe Alexandrum III. fuisse primum ex Subdiacono Apostolico S. R. E. Cardinalem, & Cancellarium ab Eugenio Papa III. renunciatum, legere est apud Baronium ad annum MCLIX. quo creatus ipse Summus Pontifex fuit, & apud Panvinium, Ciaconium, Pagium, aliosque Auctores passim, qui de Romanorum Pontificum Vitis scripsere; qui etiam & illud uno ore testantur, fuisse ipsum Alexandrum ante Pontificatum, Apostolicæ Sedis Cancellarium prudentissimum, & omnibus virtutibus ornatissimum, divinis humanisque litteris instructissimum, pariter & eloquentissimum, quem inter alios S. Bernardus egregie laudasse reperitur, cum ab Eugenio III. Pontifice Cancellarius esset electus. Sed & legimus apud Baronium ad annum MLIV. jam ante Alexandrum III. Federicum Zoffredi Hetruriæ Ducis fratrem, a Leone IX. Archidiaconum, & Cancellarium S. R. E. declaratum fuisse, atque ad Summum Pontificatum deinde assumptum, Stephanum X. appellatum. Fuit electus hic Stephanus Pontifex Maximus anno MLVIII. ut testatur idem Baronius.

VI. Siquis autem roget, cur hodie Cardinalis, qui Cancellarii munere fungitur, non dicitur Cancellarius, sed Vicecancellarius appellatur, quasi vices dumtaxat Cancellarii agat? Varii quoque varia commenti sunt, ut memoratus Cardinalis de Luca refert loco citato. Verisimilius autem censet hic Auctor, Vicecancellarium dici cœpisse, cum dignitas Cardinalitia ad tantum fastigium evecta est, ut non videretur dignitati huic Cardinalitiæ congruere, assumere officium inferius, sive Prælatitium; quod tamen provisionaliter, seu jure cujusdam commendationis per Cardinalem administrari non sit incongruum, quemadmodum & in munere Datarii praxis docet. Si enim Cardinalis eo munere fungatur, non vocatur Datarius, sed Prodaturius. Illud itaque adjectum *vice*, quod partes vicarias docet, uti memorati de Luca & Vanespen observant, non statum inferiorem, sed potius digniorem significat, ubi scilicet Cardinales S. R. E. eo officio funguntur.

VII. At vero omittis hujusmodi indagationibus, habet Vicecancellarius suum Titulum Cardinalitium, eumque admodum conspicuum, & illustrem, nempe Ecclesiæ Collegiæ S. Laurentii in Damaso, hicque commodam, & amplam habitationem in insigni, vereque regio Palatio, quod Cancellariæ dicitur, in quo ipsa Cancellaria tanquam per speciem magni Tribunalis, statutis diebus tenetur, aliæque functiones publicæ peraguntur. Magna est profecto hujus Vicecancellarii prærogativa, quia scilicet primaria, & graviora Sedis Apostolicæ negotia publica, & solemnia, qualia sunt Acta Consistorialia, ac etiam aliarum Apostolicarum provisionum Litteræ solemnes in forma Bullarum sub antiquo Sigillo plumbi, de quo superius nonnihil diximus, per ejus manus transeunt; adeo ut cum quadam proportionem dicendus sit Cancellarius Papæ eo modo, quo in singulis Diocesium quilibet Episcopus habet Notarium, & Cancellarium majorem, qui Acta synodalia, & Judicialia, ac etiam Pontificalia conscribit, & authenticat, ut notat idem Cardinalis de Luca, & post eum Vanespen, qui etiam varios ejusdem Vicecancellarii Officiales recensent.

VIII. Nom omittendum denique hoc loco quod in Libro de rebus Lateranensibus observat eruditus Panvinus, Vicecancellarium scilicet Ecclesiæ Romanæ, ejusdem semper fuisse Bibliothecarium, & postremum, qui functus est utroque Officio sub Bonifacio VIII. Benedicto XI. & Clemente V. fuisse Papinianum Episcopum Parmensem; additque mox idem Panvinus, post ipsum Papinianum, nullum Vicecancellarium præfuisse Ecclesiæ Lateranensi, sed Romana Curia trans Alpes in Gallias a Clemente V. Pontifice traducta, novaque Bibliotheca Pontificia Avenione constituta, Vicecancellarii munus a Bibliothecario distinctum esse, factumque esse novum Bibliothecarium, qui Vicecancellarius non esset. Sed et Sixtus deum IV. nova in Vaticano Bibliotheca constructa, Officium Bibliothecarii a Sacristæ munere distinxit, ut idem Panvinus docet. Atque hæc de Vicecancellario dixisse sufficiat ob mentionem de eo factam in nostro hoc §. ac de illius officio, defuncto Summo Romano Pontifice. Qui autem de ipso plura scire desiderat, legere poterit, quæ citato loco scripsit Cardinalis de Luca, & ut alios omittam, Cohellius in sua Cardinalatus notitia.

§. VIII.

Officium Missæ Apostolica Sede vacante.

Introitus.

Sciscitabo mihi Sacerdotem fidelem, qui juxta cor meum, & animam meam fuerit, & ædificabo ei domum fidelem, & ambulabit coram Christo meo cunctis diebus. *Versus.* Ut sedeat cum Principibus, & gloriæ solium teneat, Domini enim sunt cardines terræ, & posuit super eos Orbem. Gloria Patri &c. Sicut erat &c.

Oratio.

Supplici Domine humilitate deprecemur, ut Sacrosanctæ Romanæ Ecclesiæ concedat Pontificem illum tua immensa pietas, qui & pio in nos studio semper tibi placitus, & tuo populo pro salubri regimine sit assidue ad gloriam tui Nominis venerandus. Per Dominum nostrum &c.

Le-

Leſſio Epistolæ Beati Pauli Apostoli ad Hebræos.

Fratres adeamus ad Thronum gratiæ ejus, ut misericordiam consequamur, & cum fiducia gratiam inveniamus in auxilio opportuno. Omnis namque Pontifex ex hominibus assumptus pro hominibus constituitur in his, quæ sunt ad Deum, ut offerat dona, & Sacrificia pro peccatis; qui condolare possit his, qui ignorant, & errant, quoniam & ipse circumdatus est infirmitate. Et propterea debet, ut quemadmodum pro populo, ita & pro semetipso offerre pro peccatis. Nec quisquam sumit sibi honorem, nisi qui vocatur a Deo tanquam Aaron; sicutque Christus non semetipsum clarificavit, ut Pontifex fieret, sed qui locutus est ad eum: *Filius meus es tu, ego hodie genui te.* Quemadmodum & in alio loco: *Tu es Sacerdos in æternum secundum ordinem Melchisedech.* Qui in diebus carnis suæ preces supplicationesque ad eum, qui possit eum salvum facere a morte, cum clamore valido, & lacrymis offerens, exauditus est pro sui reverentia.

Graduale.

Pontifex Sacerdos Magnus inter Fratres suos, super cujus caput fustum est unctionis oleum, & cujus manus in Sacerdotio consecratæ sunt, vestitusque est sanctis vestibus, debuit per omnia Fratribus assimilari. Ut misericors fieret, & fidelis Pontifex ad Deum, ut repropitiaret debita populi. Alleluja, Alleluja. Sacerdos sit Sanctus, sicut ego sum Dominus, qui sanctifico vos, Alleluja.

Tractus in Septuagesima.

Erunt Filii Jacob sicut a principio, & coetus ejus coram me permanebit. V. Et erit Dux ejus ex eo, & Princeps de medio ejus producet. V. Et applicabo eum, & accedet ad me. V. Quis enim iste est, qui applicet cor suum, & appropinquet mihi, ait Dominus. V. Et eritis mihi in populum, & ego vobis in Deum.

Evangelium secundum Joannem.

In illo tempore dixit Jesus Discipulis suis. Si diligitis me, mandata mea servate, & ego rogabo Patrem, & alium Paracletum dabit vobis, ut maneat vobiscum in æternum, Spiritum veritatis, quem mundus non potest accipere, quia non videt eum, nec scit eum. Vos autem cognoscetis eum, quia apud vos manebit, & in vobis erit. Non relinquam vos orphanos, veniam ad vos; adhuc modicum, & mundus jam me non videt. Vos autem videbitis me, quia ego vivo, & vos vivetis.

Offertorium.

Non participantur Sancta, donec exurgat Pontifex in ostensione, & veritate.

Secreta.

Tuæ nobis Domine abundantia pietatis indulgeat, ut per sacra munera, quæ Tibi reverenter offerimus, gratum Majestati tuæ Pontificem Sanctæ Matris Ecclesiæ regimini præesse gaudeamus. Per Dominum nostrum Jesum Christum.

Communio.

Veste sancta utetur Pontifex, qui fuerit constitutus, & qui ingreditur Tabernaculum testimonii, ut ministret in Sanctuario.

Oratio post Communionem.

Pretiosi Corporis, & Sanguinis tui nos Domine Sacramento reſectos mirifica tuæ gratia Majestatis, de illius Summi Pontificis assumptione lætificet, qui & plebem tuam virtutibus instruat, & fidelium mentes spiritualium aromatum odore perfundat. Per Christum Dominum nostrum. Amen.

COMMENTARIUS.

I. **C** Autum jam inter alia fuit ex Concilio Œcumenico Lugdunensi II. Can. II. in fine, ut in omnibus Civitatibus, ceterisque locis insignibus, ubi primum de Pontificis obitu certitudo claruerit, a Clero, & populo solemnibus pro eo exequiis celebratis, singulis diebus, donec de ipsius Ecclesiæ provisione indubitatus rumor pertulerit veritatem, humiles preces fundantur ad Dominum, & apud eum devotis orationibus insistatur, ut ipse qui concordiam facit in sublimibus suis, sic efficiat eorundem Cardinalium corda in eligendo concordia, quod provisio celer, concors, & utilis,

prout animarum salus exigit, & totius requirit Orbis utilitas, ex ipsorum unanimitate sequatur. Vult itaque & illud hoc Canone Gregorius X. ut jam in illius Commentario notavimus Tomo IV. Conciliorum, monetque Christifideles omnes, ut statim ac audierint mortem Summi Romani Pontificis, non modo ejus exequias celebrent, sed & quotidie Deum rogent pro celeri, concordi, atque utili provisione Ecclesiæ Romanæ, quæ est omnium mater, magistra, & caput. Præcipit tum etiam districtè Ecclesiarum Prælati, ac ceteris sacris hominibus, quibus concessum est Verbum Dei prædicare, ut in suis Con-

Concionibus subditos suos, auditoresque ad hoc hortentur, eisque frequentiam orationum, & observantiam jejuniorum indicant.

II. Sunt plane & hi veteres Ecclesiæ Catholicæ Ritus vel in electionibus ceterorum Episcoporum usitati, uti jam diximus Tomo I. Romani Pontificalis in nostris Commentariis ad Titulum XIII. Et quidem ritum esse antiquum, ut preces publicæ fierent, ubi destituta suo Pastore Ecclesia, novus esset eligendus Episcopus, varia Sanctorum Episcoporum Acta nos docent, ac præsertim Acta S. Bassiani Laudensis Episcopi apud Bollandum die XIX. Januarii, his verbis: *Per idem tempus Laudensis populus Pastore proprio destitutus, rogationes publicas triduo indixerat, quatenus Præsulem futurum Ecclesiæ suæ idoneum præsidere, divina pietas innotesceret.* Triduanum consuevisse indici jejunium, constat ex Actis S. Salvii Ambianensis Episcopi apud eundem Bollandum ad diem XI. ejusdem mensis Januarii: *Omnes Ecclesiastici Viri triduanum indixerunt jejunium, quatenus divina gratia ostendere dignaretur, quis eorum vocaretur Episcopus.* Atque, ut alia omittam, quæ citat Martene Lib. I. *De antiquis Ecclesiæ ritibus*, Cap. VIII. Articulo x. Num. III. mentionem quoque ejus ritus faciunt Acta S. Conradi Episcopi Constantiensis apud Surium die XXVI. Novembris, in quibus dicitur, quod S. Udalricus Augustanus Episcopus, *cum erga viduatam Ecclesiam, Constantiensem scilicet obitu Notingi ejus Ecclesiæ Episcopi, in eligendo Episcopo pro cælesti duceretur oraculo, triduanum jejunium toti Clero indixit, & populo.*

III. Una cum orationibus celebratas quoque fuisse & Missas pro electione celeri Summi Pontificis, haberi pro certo debet, tametsi de ipsa Missa in hoc nostro §. descripta nullum apud antiquiores Auctores monumentum invenerim. Sed videri plane possunt quæ diximus supra in Commentariis ad Titulum I. ubi de Conclavi agitur; in ipsis enim jam fuisse loquuti fuimus, de quotidiana Cleri secularis, & aliorum Religiosorum processione ad ipsum Conclave, & de Missis, quæ quotidie mane cantari solent in uno ex atriis Vaticani Palatii, ubi ex antiquo instituto, si Romæ scilicet Pontifex diem suum extremum obit, Conclave construitur, cantari per Capellæ Pontificiæ musicos solent. Ceterum Missa ipsa in nostro hoc §. descripta legitur in omnibus Romanis Missalibus, hac præfixa Rubrica: *Missa pro eligendo Summo Pontifice, Sede vacante, dicitur de Spiritu Sancto, vel ut sequitur.* Introitus, *Suscitabo mihi Sacerdotem fidelem* &c. Legitur ea quidem Rubrica vel in Missali Romano Lugduni edito anno Domini MDLXXVIII. ubi etiam ad calcem ipsius Missæ hæc notantur: *In die creationis, & Coronationis Papæ, & ejusdem diei anniversario dicitur Missa ut in Cathedra Beati Petri, cum oratione, Deus omnium fidelium, omittis orationibus Sanctorum Petri & Pauli.* Sane recte notat Gavantus in suo Sacrorum Ritu thesauro Parte IV. Titulo XVI. ubi agit de Rubricis Mis-

farum votivarum, quæ extant in fine Missalis, recte constitutam fuisse eam Missam pro eligendo Summo Pontifice, cum jam ex antiquo ritu pro eodem in Canone semper orandum sit distincte, & in collectis etiam oratio pro Papa sit satis frequens, & in solemnioribus anni temporibus.

IV. Ergo quod Romanus Pontifex Maximus, Christi vices in terris gerit, & universæ est Ecclesiæ Caput, recte instituta est hæc Missa, recteque etiam statuit S. Gregorius VIII. in suo Decreto Can. x. *Quod Papa solius nomen in Ecclesiis recitetur*, in omnibus scilicet ubique, nam in peculiaribus Diocesium etiam ex antiquo ritu illarum Episcoporum nomina recitantur. Neque enim laudatus Gregorius avitam ipsam, quæ Episcoporum nomina recitavit semper in omnibus eorum Ecclesiis, damnat aut proscribit. Porro sensus descripti Canonis addisci potest ex Rescripto S. Leonis IX. in Epistola VI. ad Michaellem Cerularium Patriarcham Constantinopolitanum: *Scripsisti nobis, inquit, quoniam si una Ecclesia Romana per nos haberet nomen tuum, omnes Ecclesiæ in toto orbe terrarum haberent per te nomen nostrum.* A schismate recessurus Michael petit nomen suum rescribi Romanis tabulis, sponditque Papæ nomen omnium suarum Ecclesiarum tabulis reddendum, a quibus fuerat expunctum. Sed Leo noluit ei annuere. Mutua enim Patriarchalium nominum recitatio, ut notat Lupus in recitatum Canonem S. Gregorii VII. viguit in solis æqualibus, & consorioribus orientalium Patriarcharum Sedibus, nunquam in Romana. Hæc enim Orientalium non tantum soror, sed etiam Caput est, & Mater, ideoque nullius, nisi sui solius Episcopi, nomen unquam recitavit. Sicut itaque nullus Metropolita suos Provinciales, nullusque unquam Primas, aut Patriarcha subiectos sibi Metropolitans, ita Papa, aut Romana Ecclesia nullum unquam recitavit Patriarcham.

VI. Justum itaque est, ut pro Summo Romano Pontifice universæ Ecclesiæ Præsule ab omni sub Cælo Ecclesia oreter, exemplo primorum Fidelium, qui, uti legitur Cap. XII. Actuum Apostolorum, pro S. Petro, qui primus Summus Pontifex fuit, inique ab hærode vexato jugiter suas ad Deum preces fundebant: *Oratio autem fiebat sine intermissione ab Ecclesia ad Deum pro eo.* Si autem & pro omnibus Romanis Pontificibus ex pervetusto Ecclesiæ instituto a cunctis Fidelibus orandum, orandum certe potissimum est pro regnante Summo Pontifice BENEDICTO XIX. qui sanctissime universam Ecclesiam regit, quotidieque non cessat pro ea ad Deum orare, quotidie summa Urbis, & Peregrinorum confluentium ædificatione, ad Ecclesias pergens, in quibus publicæ fidelium venerationi expositum est Venerabile Divinæ Eucharistiæ Sacramentum. Orandum profecto pro eo est, ut Christus Dominus, cujus ille, pie fideliterque vices gerit in terris, nobis, Ecclesiæque universæ incolumem servet quamdiutissime.

F I N I S.



1+2 = 0505.

Apr 27

112 = 2500

Apr 56

